



Cohãcjũ Yere Yahuducuri Tju

Piratapuyo New Testament

Contents

San Mateo	1
San Marcos	73
San Lucas	116
San Juan	192
Jesu buhe dutiro tiquiro cūriquina tiquina yerire yahuri pū ijire	245
Romanos	310
1 Corintios	342
2 Corintios	373
Gálatas	393
Efesios	404
Filipenses	415
Colosenses	422
1 Tesalonicenses	429
2 Tesalonicenses	435
1 Timoteo	439
2 Timoteo	448
Tito	454
Filemón	458
Hebreos	460
Santiago	485
1 San Pedro	493
2 San Pedro	501
1 San Juan	507
2 San Juan	514
3 San Juan	515
San Judas	517
Apocalipsis	520



Cohâcjũ Yere Yahuducuri Tju

New Testament in Piratapuyo (CO:pir:Piratapuyo)

Language: Piratapuyo

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2011 Wycliffe Bible Translators, Inc.

Copyright © 2011 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

1714589f-6ea2-51f7-92a6-b4a07a7146a1

ISBN: 978-1-5313-0526-0

San Mateo

Jesucristo Cohăcĵũ macũno tiquiro acaye panopũ cĵena ijire

(Lc 3.23-38)

1 Jesucristo acayere panopũ cĵenare yahutĵa yũhu. Tiquiro ñecũno mũnano panopũ cĵeno Davi wame tiriquire ijie tiahye. Tiquiro ijiato pano tiquina ñecũno mũnano iji turiariquiro Abrahă wame tiriquire ijie tiahye.

²Abrahă Isaac pacũro ijiahye. Isaac Jacob pacũro ijiahye. Jacob Judă gũhu pacũro ijiahye. ³Fare, Zara mehna tiquina pacũro Judă ijiahye. Tiquina pacoro Tamar wame tiricoro ijiahye. Fare Esrom pacũro ijiahye. Esrom Aram pacũro ijiahye. ⁴Aram Aminadab pacũro ijiahye. Aminadab Naasón pacũro ijiahye. Naasón Salmón pacũro ijiahye. ⁵Salmón Booz pacũro ijiahye. Tiquiro pacoro Rahab ijiahye. Booz Obed pacũro ijiahye. Tiquiro pacoro Rut ijiahye. Obed Isaí pacũro ijiahye. ⁶Isaí Davi pacũro ijiahye. Davi pehe Israe masa puhtoro ijiahye. Tiquiro Uria wame tiriquire mũnano namonore tiquiro namo tiri bato Salomo wame tiriquire pohna tiahye.

⁷Salomo Roboam pacũro ijiahye. Roboam Abia pacũro ijiahye. Abia Asa pacũro ijiahye. ⁸Asa Josafat pacũro ijiahye. Josafat Joram pacũro ijiahye. Joram Uzia pacũro ijiahye. ⁹Uzia Jotam pacũro ijiahye. Jotam Acaz pacũro ijiahye. Acaz Ezequia pacũro ijiahye. ¹⁰Ezequia Manase pacũro ijiahye. Manase Amón pacũro ijiahye. Amón Josia pacũro ijiahye. ¹¹Josia Jeconia gũhu pacũro ijiahye. Tiquina ijiri pjere Israe yehpa cĵenare Babilonia cĵena pehe ñehe căhye tiquina ya yehpapũ.

¹²Sa ye Babilonia yehpapũ tiquina esari bato, Jeconia Salatiere pohna tiahye. Salatiel Zorobabel pacũro iji-

ahye. ¹³Zorobabel Abiud pacũro ijiahye. Abiud Eliaquim pacũro ijiahye. Eliaquim Azor pacũro ijiahye. ¹⁴Azor Zadoc pacũro ijiahye. Zadoc Aquim pacũro ijiahye. Aquim Eliud pacũro ijiahye. ¹⁵Eliud Eleazar pacũro ijiahye. Eleazar Matán pacũro ijiahye. Matán Jacob pacũro ijiahye. ¹⁶Jacob José pacũro ijiahye. José María manũno ijiahye. María pehe Jesu pacoro ijiri. Jesu pehe masare yũhduoatiquiro ijiro, Cristo tiquina ni pisuriquire ijiri.

¹⁷Sa yeve Abrahăre mari queo mũhtagũ tee Davire mari queo bato tigũ ahriquina ijipihtiequina tiquina panamena mehna ijiye, catorce cururi waro ijiahye. Sa yeve mari pari turi Davire mari queo mũhtagũ tee Babiloniapũ Israe masare tiquina neato pano mari queo bato tigũ ijipihtiequina tiquina panamena mehna ijiye, catorce cururi waro pari turi ijiahye. Sa ye tuhasa Babiloniapũ tiquina esari bato mari queo mũhtagũ tee Cristo tiquiro masa bajuagũpũ mari queo bato tigũ ijipihtiequina tiquina panamena mehna ijiye, catorce cururi waro ijiahye tja.

Jesucristo tiquiro masa bajarire yuahayhe

(Lc 2.1-7)

¹⁸Sa ye ohũ saha Jesucristo masa bajarire jiri. Tiquiro pacoro María pehe José mehna omoca duhteaticoro ijiahye. Sa yero ticoro omoca duhteato pano Espĩritu Santo tutuaye mehna coă ninogăre ne bucua căhtaro masiahye ticoro basi. ¹⁹Sa yero José ticorore omoca duhteatiquiro tire masino, poto ijiyere yeriquiro ijiro ticorore cohăno taro nimahye. Masa tiquina ihũno ticorore buoro ye dueraro, masa tiquina tuhoato pano yahuro marieno ticorore cohăno taro nimahye. ²⁰Tire tiquiro tuhoturi watoa Cohăcĵũ yaquiro angel

pehe quehēnopu Josére bajuaro, ohō saha niahye:

—José, Davi munano panami iji turiagu, María mehna bue tiro marieno omoca duhteya. Ticoro Espíritu Santo yedohoro mehna coā nijinogāre ne bucua cāhtaricoro ijire. Sa yegu bue tiro marieno omoca duhteya ticorore. ²¹Ticoro pohna tirota. Tiquirota ticoro macunota tiquiro ya maca cjēnare pecapu wahaboriquinare yuhduoatiqiro ijirota. Tiquiro sa yuhduoatiqiro ijigū ihñagū Jesu wame yeguta muhu tiquirogāre, niahye angel Josére.

²²Ahri ijipihtiye sa wahahye panopu cjēno Cohācjū yere yahu muhtariqiro tiquiro ni ojoariro sahata. Tire tiquirore Cohācjū ojoa dutiahye. Ohō saha ni ojoahye Cohācjū yere:

²³Nuhmino, nijinogāre bocaro pohna tirota ticoro macunogāre. Sa yero Emanuel wame tirota tiquirogā, ni ojoahye Cohācjū yere.

“Emanuel” nino “Cohācjū mari mehnata ijire”, nino niaga.

²⁴Cohācjū yaqiro angel Josére tiquiro ni yahuri bato José pehe wahcā, angel dutiriro sahata María mehna omoca duhteahye. ²⁵Tiquiro macunogāre ticoro pohna tiato pano José pehe ticoro mehna ijiera tiahye. Ticoro pehe pohna tia wahahye. Sa yero tiquiro pehe macunogāre Jesu wame yeahye.

Asū mūja taro cjēna Jesugāre ihñañe esahye

2 Herode Judea yehpa cjēna puh-toro tiquiro ijiri pje ti yehpapu ijiri macapu Belēpu Jesu masa bajuahye. Tiquiro sa masa bajuari bato ñahpicohare buheyequina ñahpicohare quehnoano masiñequina asū mūja taro cjēna ahta, Jerusalēpu wihiahye. ²Sa wihiye, masare to cjēnare sinituahye:

—¿Judio masa puh-toro ijiatiquiro yojopure nohopu masa bajuagari tiquiro? Asū mūja taropu cjēna ijiaja. Sa yena ñahpicoha coā bajua wahā sagū ihñana “Puh-toro masa bajuaro niaga”, ni masii usā. Sa tia bajuagū ihñana, usā ihcāno mehna tiquirore ño peona ahtau ohōpu, ni, yahuahye buheyequina masare.

³Sa ye apequina Herodere tire yahuahye. Tiquina sa yahugū tuhoro Herode pehe bujua witi tuhoutuahye. Sa yeye ijipihtiyequina Jerusalē cjēna gūhu tiquiro yero sahata bujua witi tuhoutuahye tiquina gūhu. ⁴Sa yero Herode pehe ijipihtiyequina pahia puh-toare, mari judio masare buheyequina gūhure tiquiro piji cahmecoa peho, tiquinare sinituahye tiquiro:

—¿Nohopu masa bajuaboagari Cristo pehe, masa tuhutugū? ni sinituahye tiquiro.

⁵Ohō saha ni yahuahye tiquirore:

—Belēpu, Judea yehpapu ijiri macapu Cristo masa bajuarota. Ohō saha ni ojoahye Cohācjū yere yahu muhtariqiro:

⁶Belēpu yeequinare Israe masare dutiatiquiro, tiquinare cohtea-tiquiro ahtarota. Sa yero apeye macari Judea yehpapu ijiye macari yuhduoro ijire Belē pehe, ni ojoahye Cohācjū yere, ni yahuahye tiquina Herodere.

⁷Tiquina sa ni yahuri bato Herode masa tuhoeropu asū mūja taropu ahtariquinare pijioahye. Tiquiro cahapu tiquina esagū ihñano, tiquinare sinituahye. Tiquiro sa sinitugū tuhoye, tiquina ñahpicohare ihñari decore yahuahye tiquina. ⁸Tiquina sa yahuri bato Herode pehe tiquinare Belēpu ohoro, ohō saha niahye tiquinare:

—Tiquirogāre quehnoano macaña. Tiquirogāre bocana yuhure tojoana yahu tojoaya. Yuhu gūhu tiquirogāre ño

peou wahau tuu niaja, niahye tiquinare Herode.

⁹Tiquiro sa nidi bato, tiquina wahahye. Tiquina sa wahagū asū muja taropu tiquina ihñaria ñahpicoha pehe tiquina pano ummu tāducuahye. Sa yero nijinogā tiquiro ijiro bui waro tojoa wahā sahye tia ñahpicoha. ¹⁰Sa yeye ñahpicohare ihñañe, tutuaro bucueahye tiquina. ¹¹Nijinogā tiquiro ijiri wuhupu esa, sajāa wahahye tiquina. Sa sajā saye, nijinogāre tiquiro pacoro mehna ijiriquirogāre ihñahye tiquina. Sa ihñañe tiquina dusepe curi mehna quehe sa, tiquirōgāre ño peoahye. Ño peo tuhasa tiquina acarire pōoahye. Urure, bueyere, mirra wame tiye ehme sitiye gūhure ne wio, tire tiquirōgāre wapa marieno ohoahye. ¹²Tire oho tuhasa carīa wahahye tiquina. Tiquina sa carīgū quehēnopu Cohācjū yahuahye tiquinare: “Herode cahapu tojoeracāhña”, ni yahuahye Cohācjū tiquinare quehēnopure. Tiquiro sa ni yahuri bato, tiquina pehe wahcāhye. Tiquina sa wahcāri bato ape mahapu tiquina ya dihtapu tojoaa wahahye.

José gūhu Jesugāre Egiptopu ne duhti cāa wahahye

¹³Tiquina sa wahari bato Cohācjū yaquiro angel quehēnopu Josére bajuaro, ohō saha niahye:

—Wahcāña. Herode pehe nijinogāre wejēno taro, macano nine yojopure. Sa ye nijinogāre tiquiro pacoro gūhure Egiptopu umuñano ne duhti cāa wahaya. Topure yūhu nidiro punota ijiya, tee yūhu yahugūpu, ni yahuahye angel Josére.

¹⁴Tiquiro sa nigū tuhoro, José pehe ñamita wahcā, nijinogāre, tiquiro pacoro gūhure Egiptopu ne duhti cāa wahahye. ¹⁵Egiptopu esa, Herode catiro puno topure ijiahye tiquina. Sa yeahye panopu cjūno Cohācjū yere yahu

mūhtariquiro tiquiro ni ojoariro sahata. Tire tiquirore Cohācjū ojoa dutiahye. Ohō saha ni ojoahye Cohācjū yere: “Egiptopu ijiriquirore yūhu macure pijiou”, ni ojoahye Cohācjū yere.

Herode macanagāre wejē dutiahye

¹⁶Sa ye ñahpicohare buheyequina tiquina duhti yūhdu cāgū tuhoro Herode pehe usua yūhduu wahahye. Sa usuaro, Belē cjenare, ti maca duhtu caha cjēna gūhure tiquina pohnene umuagāre pua cūhma cūoyequinagāre wejē bato ti dutiahye tiquiro. Coā warore ñahpicohare buheyequina ñahpicohare tiquina ihñari decore yahuahye Herodere. Tiquina sa nigū tuhoro tiquiro wejē duariquirogā masa bajuari decore masino, “Ohōpe cūhmari cūore” nino, pua cūhma cūoyequinagāre wejē bato ti dutiahye. ¹⁷Panopu cjūno Jeremia Cohācjū yere yahu mūhtariquiro tiquiro ni ojoariro sahata wahahye. Ohō saha ni ojoahye tiquiro:

¹⁸“Ramá wame tiropu bisirota. Tutuaro bujua witiye mehna utiye bisirota. Raquel panamena numia iji turi-aye numiapu Israe masa namosānumia tiquina pohnene tutuaro uti-eta. Tiquina pohnene apequina wejēgū ihñañe, ne bujua witi duhusi”, ni ojoahye panopu.

¹⁹Sa ye Herode tiquiro yariari bato Egiptopu ijiriquirore Josére Cohācjū yaquiro angel quehēnopu bajuahye. Sa bajuaro ohō saha niahye Josére:

²⁰—Nijinogāre wejē duamediquina yariaa wahari. Sa yegū wahcāña. Tiquirogāre pacoro mehna Israe yehpapu ne tojoaa wahaya mūhu, ni yahuahye angel Josére:

²¹Tiquiro sa nidi bato José wahcā, nijinogāre pacoro mehnata Israe yehpapu ne tojoaa wahahye. ²²Sa yeperota Arquelao Herode macano

pehe tiqiro pacuro comesariquiro ijigū tūhoro José pehe Judea yehpapū tojoa duaro cueahye. Sa yero pari turi tja quehēnopū tiqirore yahu nemoahye. Tiquirore pari turi Judea yehpapū iji dutierahye. Tiquiro sa ni yahuri bato, tiqina Galilea yehpapū wahaa wahahye. ²³Ti yehpapūre Nazare wame tiri macapū ijiahye tiqina. Sa yeahye tiqina Cohācjū yere yahu muhtariquina tiqina ojoariro sahata. Ohō saha ni ojoahye: “Cristo Nazare cjūnota ijire’, nieta masa”, ni ojoahye Cohācjū yere yahu muhtariquina panopū cjēna.

Ñu wame yeriquiro masare yahuahye

(Mr 1.1-8; Lc 3.1-9, 15-17; Jn 1.19-28)

3 Sa ye ti pjere Ñu Cohācjū yequinare wame yeriquiro ijiahye. Judea yehpapū masa marienopū tiqiro Cohācjū yere yahu dūcahye masare. ²Ohō saha ni yahuahye tiquinare:

—Musa ñañe yerire bujua witiya. Tire duhuya. Ūhmuse cjūno Cohācjū musa puhtoro tiqiro ijiato mehenogā dūhsare, ni yahuahye tiqiro.

³Panopū cjūno Isaia Cohācjū yere yahu muhtariquiro Ñu tiqiro buheatire ohō saha ni ojoahye:

Masa marienopū yahuducu sañuducuriquiro ohō saha ni buherota tiqiro: “Mari puhtoro ahtato pano mahare mari quehnoyuro saha quehnoana ijyuya musa. Musa ñañe yerire bujua witiya”, ni sañuducurota, ni ojoahye Isaia Ñure.

⁴Sa yero Ñu camello poari suhtirore sañariquiro, wahiquiro cahsero mehna tuā dihoriquiro ijiahye. Poreroare, nūcu cjē umi gūhure ihyaē tiahye. ⁵Jerusalē cjēna, ijipihtiro Judea yehpapū ijyeyequina, Jordā wame tiri ma cahapū ijyeyequina gūhū tiqirore tūhoye ahtahye. ⁶Wihi, tiqirore tuho, tiqina

ñañe yerire bujua witi, Cohācjūre tire yahu yūhdūahye tiqina. Sa tiqina yahugū tūhoro Jordāpū Ñu tiquinare wame yeahye.

⁷Sa yero peyequina fariseo masa, saduceo masa gūhū Ñure tiqina wame ye dutiye ahtagū ihñano tiqiro yahuahye tiquinare:

—Añaa yero saha ña yūhdūana ijire musa. Musa ñañe yerire bujua witi duerana Cohācjū musa ñañe yeri buhiri tiqiro buhiri dahreato pano duhti masiedare musa. ⁸Sa yena potota musa ñañene bujua witiya. Quehnoañene comesaya. Sa yena quehnoañe pehere yeya musa. ⁹Ohō saha ni tuhotueracāhña: “Panopū cjūno Abrahā mari ñecu mūnano ijie tiahye. Sa yena tiqiro panamena iji turiana ijina mari Cohācjū yequina ijiaja”, ni, tuhotueracāhña musa. Musare niita niaja. Abrahā panamena iji turiana ijimene musa. Musa sa ijiepegūta ti musa sa ijyē dūhseati ijierare. Cohācjū pehe ahri utā paca mehna Abrahā panamenare dojogū ye masine. Sa yero Abrahā panamena iji turiana musa ijyē ihyo waro ijire utā paca ti paca ihyo waro ijiro sahata. ¹⁰Ohō saha ijire: Masa yucuri yero saha ijire. Cohācjū pehe yucurire quēatiare comeare cūoriquiro yero saha ijire. Sa yero ñañe dūca tiye cjūre quē cohā, ti nuhcori gūhure dūte surerota. Dūte sure tuhasa, pecapū ūjūanota tiqiro ti cjūre, nuhcori gūhure. Sata yerota masa gūhure tiqirore cahmeeñequinare. ¹¹Yūhū bato yūhū yūhdūoro tutuariquiro ahtarota. Quehnoa yūhdūariquiro ijire tiqiro. Tiquiro yero saha ijieraja yūhū pehe. Sa yegū tiqirore tuhotugū, “Ihyo ijyē ijiaja yūhū”, ni tuhotuaja yūhū. Yūhū pehe musa ñañe yerire bujua witi duti, musare wame yegū aco mehna yemi. Tiquiro pehe yūhū yūhdūoro yerota.

Espíritu Santore masa mehna ijiducugū yerota tiquiuro. Sa yero peca ñañene ujūa wero sahata tiquiuro ahtariquiuro pehe mūsa ñañe yerire cose werota. ¹²Yūhu bato ahtariquiuro cahseri cohāriquiuro yero saha ijire. Cahseri cohāriquiuro tiquiuro batiro mehna ijipihtiye trigo cahserire puti were. Tiquiro sa puti weri bato trigo pehere tiquiuro ihbori wūhūpū ihborota. Sata yerota tiquina ñañene bujua witiyequinare yūhu bato ahtariquiuro. Tiquiro puti weye cahseri pehere tiquiuro ujūanota. Ti peca ujūari peca ne yatisi. Sata yerota tiquiuro yūhu bato ahtariquiuro tiquina ñañene bujua witiyequinare, ni yahuahye Ñu.

Ñu Jesure wame yeahye

(Mr 1.9-11; Lc 3.21-22)

¹³Came Jesu Galileapū ijiriquiuro waha, Jordā wame tiri mapū buha sahye Ñure wame ye dutiro. ¹⁴Coā warore Ñu wame ye dueramahye.

—Yohou, mūhū pehe yūhū yūhdūoro tutuagu yūhū pehere mūhū wame yegū quehnoaboaga. Mūhūre wame yebogu ijieraja yūhū, ni yūhtimahye Ñu Jesure.

¹⁵Jesu pehe yūhtiahye tiquirore:

—Yūhūre wame yeya. Ohō saha yena, Cohācjū dutiro saha sohtoa tina niaja mari, niahye Jesu.

Tiquiro sa nigū tūhoro,

—Au, ni yūhtiahye Ñu.

¹⁶Sa ni tuhasa, Jesure wame yeahye. Tiquiro wame ye tuhasagū Jesu diapū ducuriquiuro maja dūcahye. Tiquiro maja dūcagū, ūhmūanopū parī maahye. Cohācjū yaquiuro Espiritu bujua yero saha tiquiro bui dijia tagū ihñahye. ¹⁷Sa dijia tagū ūhmūanopū yahuducuye bisiahye:

—Ahriquiuro yūhū macū yūhū cahīniquiuro ijire. Tiquiro mehna tutuaro bucueja, niahye ūhmūanopū.

Watīno ñañene ye dutimahye Jesure

(Mr 1.12-13; Lc 4.1-13)

4 Sa ye Espiritu Santo pehe Jesure masa marienopū neahye, topū watīno tiquirore ñañene ye dutiatio saha.

²Topū esaro cuarenta decori waro ih-yaro marieno ijiahye Jesu. Sa yero ūjua ahbahye. ³Ūjua tiquirore ahbagū ihñano watīno pehe tiquiuro cahapū esaro, ohō saha niahye:

—Mūhū Cohācjū macū ijigū, ahria ūtāre ihyaye dojomehneña, nimahye tiquiro Jesure.

⁴Jesu ohō saha ni yūhtiahye:

—Yeraja. Cohācjū yere tiquina ojoari pūpū ohō saha nine: “Masare ihyaye mehna dihita catieraro cahmene. Ijipihtiye Cohācjū tiquiro ye yahuye mehna ijiro cahmene”, nine Cohācjū, ni yūhtiahye Jesu watīnore.

⁵Tiquiro sa ni yūhtiri bato watīno pehe Jerusalēpū “Cohācjū ya maca” tiquina nidi macapū Jesure neahye. Topū esa, Cohācjū ya wūhū bui Jesure ne sahye tiquiro. ⁶Ne sa tuhasa, tiquirore ohō saha nimahye:

—Cohācjū yere tiquina ojoari pū ohō saha nine:

“Cohācjū tiquiro yequina angelere mūhūre ihña ihbo dutirota. Sa yeye tiquina pehe mūhūre ihña ihboeta ‘Ūtāpū pūha tu maari,’ niñe”, nine tiquiro ojoari pū.

Tiquiro sa nidi poto ijigū mūhū Cohācjū macū ijigū yehpapū uhpu dijia ihñōña yūhūre. Mūhūre tiquina yedohogū ihñōña yūhūre, nimahye watīno.

⁷Jesu uhpu dijia ihñō dueraro ohō saha ni yūhtiahye:

—Cohācjū yere tiquina ojoari pū ohō saha nine: “Mūsa pūhtoro Cohācjū tiquiro nidire ‘¿Poto ijiajari?’ ni masi duana Cohācjūre ye ihñō duti tuhuer-

acāhña”, nine Cohācjū yere tiquina ojoari pū, niahye Jesu.

⁸Tiquiro sa ni yūhtiri bato ūhmua yūhdudu cunapū Jesure ne mujahye watīno tja. Tū buipū ne muja sa pje, ijipihitiye macarine ihñodoque dijioahye Jesure. Tiquina cūoye gūhure ihñoahe.

⁹Sa ihñono Jesure ohō saha nimahye:

—Yūhure dūsepe curi mehna quehe sa, ño peoya mūhū. Mūhū sa yegū ijipihitiye ahri macarine mūhure ohoutja, ni yahumahye watīno.

¹⁰Tiquiro sa nigū Jesu ohō saha ni yūhtiahye:

—Satana, wahaya mūhū. Ohō saha nine Cohācjū yere tiquina ojoari pū: “Mūhū puhtoro Cohācjū dihitare ño peoya. Tiquiro ye dutiye dihitare yeya”, nine Cohācjū yere tiquina ojoari pū, niahye Jesu watīnore.

¹¹Tiquiro sa nigū tuhoro watīno waha wahahye. Tiquiro wahari bato angele pehe wihi, Jesure yedohoye ihyayere ohoahye angele.

Galilea yehpapū Jesu buhe dūcahye

(Mr 1.14-15; Lc 4.14-15)

¹²Sa ye ņure peresupū tiquina yegū tuhoro, waha wahahye Jesu. Waha, Galilea yehpapū esahye. ¹³Topū ijiri macapū Nazarepū waha, yūhdū cā, Capernau wame tiri macapū esahye. Galilea wame tiri ditara dūhtū cahapū ijiri Capernau. Ti maca Zebulón yehpa cahapū, Neftalí yehpa cahapū ijiri Capernau. Topū esa, ijiahye Jesu. ¹⁴Sata yeahye Jesu panopū cjūno Cohācjū yere yahu mūhtariquiro Isaia tiquiro ni ojoariro sahata. Ohō saha ni ojoahye:

¹⁵Zebulón yehpa cahapū, Neftalí yehpa cahapū, ditarapū wahari mahapū, Jordā wame tiri ma ape sie pahrēpū Galilea yehpa ijire. Ti yehpa judío masa ijieyequina ya yehpa ijire. ¹⁶To cjēna Cohācjū yere quehnoano masiedare. Sa

masiedapeta quehnoariquirore ihñañepū masieta. Tiquina pehe Cohācjūre ne masiedare. Sa yeye pecapū wahaboriquina ijimahye. Sa yero ihcāquiro tiquinare Cohācjū yere masigū yerota, ni ojoahye Isaia.

¹⁷Topū ijiro, Cohācjū yere yahu dūcahye Jesu:

—Musa ñañe yerire bujua witiya. Sa yena quehnoañene comesaya. Ūhmuse cjūno Cohācjū ijipihitiyequina puhtoro tiquiro ijiato mehenogā dūhsare, ni yahu dūcahye tiquiro.

Pititiaro wahi wejēnequinare

tiquiro mehna cjēna

ijiatiquinare pijiahye Jesu

(Mr 1.16-20; Lc 5.1-11)

¹⁸Sa ye Galilea wame tiri ditara dūhtū cahapū esaro, Simore, tiquiro bahūro Andre mehna boca sahye Jesu. Simo tiquina Pedro ni pisuriquiro ijiahye. Tiquina pehe wahi wejēnequina ijiye, tiquina wēñecjūre doque ñoñe niahye ditarapū.

¹⁹—Yūhū mehna cjāna ijianaja ah-taya musa. Yūhū mehna musa ahtagū musa wahire ñehe cahmecoana musa ijiro saha, Cohācjū yequina ijiatiquinare masare piji cahmecoana ijigū yeitja musare. Yūhū mehna musa ahtagū sa yeanajare cūtja musare, niahye tiquiro tiquinare.

²⁰Tiquiro sa nigū tuhoyeta tiquina wēñecjūre cū cā, tiquiro mehna wahahye.

²¹Sa ye Jesu tiquina mehna yūhdū cā, Santiagore tiquiro bahūro ņu gūhure boca sahye tja. Tiquina Zebedeo pohne ijiri. Tiquina yaria yucūsapū tiquina pacūro mehna tiquina wēñecjūre quehnoñe niahye. Tiquina puarore tiquiro pijioahye. ²²Tiquiro sa pijiogū tuhoye, tiquina pehe duita tiquina

pacurore, yucsa gũhure cũ, Jesu mehna wahahye.

Peyequina masare buheahye Jesu

(Lc 6.17-19)

²³Sa ye ijipihtiropu Galilea yehpare Jesu buhe tinidi. Judio masa mari buh-eye wuhusepu quehnoañe buheyere, umuse cjano tiqiro puhtoro ijiye tiyere buheri. Tiquinare buhe, dohatiyequinare quehnoa wahagũ yero, ijipihtiyeh dohatiye yuhduori tiqiro. ²⁴Tiqiro sa yegũ tuhoye Siria yehpa cjena ijipihitropu ti yehpau ijiyequina tiqirore masi ducari. Sa masine, sijoro saha ijiye dohatiye cuoyequinare, watiare cuoyequinare, nama yariaye cuoyequinare, tini masienequina gũhure ne sari. Sa yero ijipihtiyequina tiquinare yuhdugũ yeri Jesu. ²⁵Tiqiro sa yegũ ihñañe, Galilea yehpa cjena, Decapoli cjena, Jerusalẽ cjena, Judea yehpa cjena, Jordã ape sie pahrẽ cjena peyequina masa tiqiro mehna wahari.

Cunupu mija, topu buheahye Jesu masare

(Lc 6.20-23)

5 Sa ye masa peyequina tiqiro cahapu tiquina esagũ ihñano Jesu cunupu mijaa wahahye. Mija sa, topu dujiahye. Topu dujigũ tiqiro buheyequina tiqiro cahapu esahye. ²Tiquina esagũ ihñano ohõ saha ni buhe ducahye.

³—Tiquina ñañene bujua witiyequina Cohãcjũre cahmeñequina bucueyequina ijire. Umuse cjano tiqiro puhtoro ijiropure wahaeta tiquina. Umuse cjẽ tiquina ye ijire.

⁴Utiyequina gũhu bucueyequina ijire. Tiquinare bucuegũ yerota mari Pacu.

⁵Apequinare yuhdaduca dueyequina “Ihyo ijina ijijaja usã”, ni tuhutuyequina bucueyequina ijire. Cohãcjũ “Ohoutja”, tiquinare tiqiro nidi yehpare cuoeta tiquina.

⁶Cohãcjũ dutiro saha ye duayequina, quehnoañene ye duayequina bucueyequina ijire. Cohãcjũ tiqiro yedohogũ tiquina quehnoañene yeducueta.

⁷Apequinare paja ihñañequina bucueyequina ijire. Tiquina sa paja ihñagũ Cohãcjũ tiquina gũhure paja ihñanota.

⁸Tiquina ñañene cosenohriquina bucueyequina ijire. Cohãcjũre ihñaeta tiquina.

⁹Apequinare cahmequedagũ yeyequina bucueyequina ijire. Tiquinare “Yuhu pohna ijire”, ninota Cohãcjũ.

¹⁰Cohãcjũ dutiyere tiquina yeri buhiri apequina ñano yere Cohãcjũ tiqiro dutiriquinare. Tiquina sa ñano yegũ bucueyequina ijire tiquina pehe. Umuse cjano tiqiro puhtoro ijiropu tiqiro yere cuoeta tiquina.

¹¹Yeere masa yeri buhiri apequina masare tiquina tuhtiepegũta bucuena ijire masa. Masare tiquina ñano yepegũta bucuena ijire masa. Yeequina masa ijiri buhiri masare ijipihtiyeh ñañe tiquina quti dojomehnepegũta tiquina ni mehoepegũta bucuena ijire masa.

¹²Cohãcjũ yere yahu muhtariquinare masa pano ijiriquinare tiquinapureta ñano ye muhtahye. Tiquinare yeriro sahata masa gũhure apequina sa yegũ bucueya. Quehnoano jeripohna tiya. Sa yero umusepu masa esagũ pajiro quehnoano yerota masare Cohãcjũ, ni yahuahye Jesu.

Moa yero saha, buhrioro yero saha ijire Jesu yequina

(Mr 9.50; Lc 14.34-35)

¹³Sa ye Jesu buhe nemoahye:

—Moa mehna wahiquiro dihire ti ñano wahaeragũ yero sahata masa pehe yeequina pehe ijipihtiyequina apequinare ñañene tiquina ye dueragũ yere. Sa ijieperota moa pehe ti ñañe wahagũ pari turi quehnoañe ye masiedare. Ti moa ne quehnoaedare. Ti sa wahagũ ti

moare cohãno cahmene. Ti moare cohãri bato ti bui masa cãhta cãre. Ne dahseati ijierare ti moa tiquiro cohãne. (Ti dahseati ijieraro saha ijieracãhãna musa. Cohãcjũ ye pehere cohãedacãhãna,) ni yahuahye Jesu.

¹⁴ Sa ye tiquiro buhe nemoahye:

—Buhrioro marine ihãagũ yero sahata musa pehe yeequina pehe ahri yehpa cjẽnare Cohãcjũre masigũ yere. Cũnu bui ijiri macare nuono basioerare. ¹⁵ Sa ye sihãriare masa sihãne, sutu docapũ moha dapo masiedare. Tiare sihãriare uhmũanopũ duhu peore ti wũhũ cjẽna ijipihitiyequina tiquina ihãatiare. ¹⁶ Ohõ sahata musa gũhu buhrioro yero saha ijina, quehnoañene yeya. Musa sa yegũ ihãne masa mari Pacũ uhmũse cjũnore ño peo, “Tutuagu, quehnoagu ijire”, ni-eta, ni yahuahye Jesu.

Cohãcjũ tiquiro dutiyere tiquiro ojoari gũhũre yahuahye Jesu

¹⁷ Sa ni tuhasa, tiquinare yahu nemoahye:

—Ahrire musa masigũ cahmeaja yũhũ. Cohãcjũ dutiyere Moiserere tiquiro cãrĩre, tiquiro yere yahu muhtaũequina tiquina ojoari gũhũre cohãgũ tagũ niedũ. Ti dutiyere musare quehnoano yahu potou tũũ nii. Ti dutiyere poto ijigũ ihõou ahtaũ. Ti dutiye nidiro sahata ye sohtori tii tũũ nii. ¹⁸ Ijirota musare niaja. Pihtiri deco pano ijinigũ Cohãcjũ dutiye Moiserere tiquiro cãrĩre ne mehenogã cohãsi mari. Ahri yehpa, uhmũse gũhu ti ijiro puno tiquiro dutiye gũhu ijirota. ¹⁹ Sa yeye ti dutiyere ihquẽquina yũhdũdcaye, apequinare sata ye dutiye, uhmũse cjũno tiquiro puhtoro ijiropũ cahacjẽna yero saha ijietã. Ihcã dutirogã ijiepegũta tiquina yũhdũdcaye, cahacjẽna yero saha ijietã tiquina. Apequina ti dutiyere quehnoano yeye, apequinare tiquina yero saha ye dutiye, uhmũse cjũno

tiquiro puhtoro ijiropũ puhtoa yero saha ijietã tiquina pehe. ²⁰ Musare niita niaja yũhũ. Judio masare buheyequina, fariseo masa gũhu Cohãcjũ cahmeñene queoro yerare. Tiquina yũhdũoro Cohãcjũ cahmeñene yeya musa. Musa sa yerana, tiquiro puhtoro ijiropũre ne esasi musa, ni yahuahye Jesu.

Usuayere yahuahye Jesu

(Lc 12.57-59)

²¹ Sa ni tuhasa, tiquinare yahu nemoahye:

—Panopũ cjẽna ohõ saha ni tiquina yahirire tuhori jimedi musa: “Masare wejẽdacãhãna. Masare wejẽdiquirore tiquina buhiri dahreatiquiro ijire”, tiquina nidire tuhori jimedi musa. ²² Ahri tiquina yahuri yũhdũo cjũno musare ahri pehere yahu nemoutja. Tiquiro acayũro mehna usuariquiro pehe tiquina buhiri dahreatiquiro ijire masũnore wejẽdiquiro yero saha. Tiquiro acayũrore tuhtiriquiro “Ne tuhõ masiũe mariegũ ijire mũhũ”, nidiquiro buhiri dahre dutiyequina cahapũ tiquina neatiquiro ijire. “Tuhõ masiegũ ijire mũhũ”, tiquiro acayũrore sa nidiquirore pecapũ wahaboaga tiquiro.

²³ Musa acayũro musare tiquiro ihãna tuhtigũ ohõ saha yeya. Cohãcjũ wũhũpũ Cohãcjũre musa ño peoato pano, tiquirore wahiquirore musa ohoato pano ohõ saha yeya. ²⁴ Cohãcjũre musa ohoatire duhu cũ, musa acayũro cahapũ waha, “Pari turi cahmequedacũhna. To punota duhuuhna tire”, niãna tiquirore. Musa sa nidi bato Cohãcjũre oho, ño peona wahaya tiquiro ya wũhũpũ.

²⁵ Apequiro mũhũre yahusã duaro, puhtoro masare beseriquiro cahapũ mũhũre tiquiro nea duagũ, tiquiro mehna usuaro marieno ijija. Beseriquiro cahapũ tiquiro neatõ pano tiquiro mehna quehnoano ijija. Mũhũ sa yegũ ihãano tiquiro

muhure yahusædaboaga. Mũhu sa quehnoano ijieragũ ihñano topure mũa esagũ tiquiro pehe muhure masare beseriquirore yahusånata. Tiquiro sa yahusågũ, beseriquiro pehe peresu yeyequinapure muhure ohorota. Sa yeye tiquina muhure peresu yeeta.
²⁶ Ijirota niaja muhure. Topũ ijiniita muhũ. Tee tiquina wapa ye dutirire muhũ wapa ye pehogupũ wijiagũta muhũ, ni yahuahye Jesu.

Apequiro namono mehna ñano yeyere yahuahye Jesu

²⁷ Ohõ saha ni yahu nemoahye Jesu:

—Panopũ cjênare ohõ saha tiquina ni yahurire tũhori jimedi mũa: “Apequiro namono mehna ñano yeracãhña”, tiquina nidire tũhori jimedi mũa.
²⁸ Ahri tiquina yahuri yũhdũo cjũno musare ahri pehere yahu nemoutja. Numinore ñehedaperota, ihcãquiro ticorore ñano tutuaro cahmeno, ñano wacũ tũhoturo, ñano ye tuhasari ticoro mehna.

²⁹ Sa yegũ muhũ capea poto pehepũ ijiria mehna ñano yegũ, tiare ore we ne muhũ cohãboriro sahata ti ñañene duhuya. Tire duhueragũ pecapũ wahagũta. Mũhu capeare muhũ cohãgũ tia capea dihita butire. Mũhu pehere pecapũ muhũ wahagũ ña yũhduare. Sa yegũ ti ñañene duhuya.
³⁰ Sa yegũ muhũ omoca poto pehe ijiri omoca mehna ñano yegũ, ti omocare muhũ dũte cohãboriro sahata ti ñañene duhuya. Tire duhueragũ pecapũ wahagũta. Mũhu omocare muhũ cohãgũ ti omoca dihita butire. Mũhu pehe pecapũ muhũ wahagũ ña yũhduare. Sa yegũ ti ñañene duhuya, ni yahuahye Jesu.

Tiquiro namonore cohãñene, wame peoye gũhure yahuahye Jesu

(Mt 19.9; Mr 10.11-12; Lc 16.18)

³¹ Ohõ saha ni yahu nemoahye Jesu:

—Panopũ ahri gũhure niahye: “Tiquiro namonore cohã duariquiro tiquiro cohãtire yahuri pũ mehna ticorore cohã masine”, nimahye panopũ.
³² Ahri tiquina yahuri yũhdũo cjũno musare ahri pehere yahu nemoutja. Tiquiro namono apequiro mehna ñano yericoro ticoro ijierapegũta ticoro manũno ticorore cohãboaga. Ticoro sa cohãnohricoro apequiro mehna omoca dũhtero, ñano yero niaga ticoro apequiro mehna ijiro. Ticoro manũno ticorore tiquiro cohãri bato ticorore apequiro mehna ñano yegũ yere. Sa yero tiquiro bato namo tiriquire gũhu ticoro mehna ñano yero nine, ni yahuahye Jesu.

³³ Ohõ saha ni yahu nemoahye Jesu:

—Panopũ cjëna ohõ saha tiquina ni yahurire tũhori jimedi mũa: “Mũa ni diro sahata yeya. ‘Cohãcjũ mehna poto sa yeitja’ mũa ni diro sahata yeya”, tiquina ni yahurire tũhori jimedi mũa.
³⁴ Ahri tiquina yahuri yũhdũo cjũno musare ahri pehere yahu nemoutja. “Uhmuse mehna poto nii niaja”, ni uhmuse mehna wame peoeracãhña. Uhmuse pehe Cohãcjũ mari puhtoro tiquiro ijiro ijire. Ihyo ijiro ijierare. Sa ijigũ ihñana sa niedacãhña.
³⁵ Ahri yehpa mehna ne wame peoeracãhña. Ahri yehpa Cohãcjũ ya yehpa ijire. Sa ijigũ ihñana sa niedacãhña. Jerusalẽ mehna ne wame peoeracãhña. Tutuariquiro mari puhtoro ya maca ijire Jerusalẽ. Ihyo ijiri maca ijierare. Sa ijigũ ihñana sa niedacãhña ti wamene.
³⁶ “Yũhu dapu mehna poto nii niaja”, ni wame peoeracãhña. Mũa poari yehseye poari wahagũ ye masiedare mũa. Ti poarire ñiñe wahagũ gũhure ye masiedare mũa. Sa ye masiena “Yũhu dapu mehna poto nii niaja”, ni wame peoeracãhña.
³⁷ “Yenatja”, nina wame peoro marieno ohõ saha dihita tire niducuya. “Yesi”, nina gũhu wame peoro marieno nidu-

cuya. M̄sa wame peo nina, watĩno ñariquiro dutiro saha yena niaga, ni yahuahye Jesu.

**Tiquina cahme ihña
tuhtiyere yahuahye Jesu**

(Lc 6.29-30)

³⁸ Ohō saha ni yahu nemoahye Jesu:

—Panopu ohō saha tiquina ni yahurire tūhori jimedi m̄sa. “M̄hure apequiro m̄hu capeare tiquiro quē tihāriro sahata m̄hu ḡhu tiquirore quē tihā cahmeña. M̄hu upiriare tiquiro quē nuhariro saha m̄hu ḡhu quē nuha cahmeña”, tiquina nidire tūhori ijimedi m̄sa. ³⁹ Tiquina yahuri yuhduo cjūno ahri pehere yahu nemoutja m̄sare. M̄hure ñano yeriquirore sa ihña cāhña. Ihcā pehe m̄hu wahsupure tiquiro quēgū, ape sie ḡhure quē dutiya tiquirore. ⁴⁰ Apequiro buhiri dahre dutiriquirore m̄hure tiquiro yahusāgū, dutiriquiro pehe m̄hu camisare m̄hure yahusāriquirore oho dutiboaga. Tiquiro oho dutigū, tiquirore ohoya. M̄hu bui cjā suhtiro ḡhure oho nemoña tiquirore. ⁴¹ Apequiro surara apee borore ihcā kilómetro m̄hure tiquiro nea basa dutigū, ape kilómetrore waha nemoña tja. ⁴² M̄hure sinidiquirore ohoya. Sa yegu apequiro m̄hure waso dutigū wasoya tiquirore, ni yahuahye Jesu.

M̄sare ihña tuhtiyequinare cahña

(Lc 6.27-28, 32-36)

⁴³ Ohō saha ni yahu nemoahye Jesu:

—Masa ohō saha nine: “M̄sa mehna cjēnare cahña. Sa yena m̄sare ihña tuhtiyequinare ihña tuhti cahmeña tja”, tiquina nidire tūhori jimedi m̄sa. ⁴⁴ Tiquina yahuri yuhduo cjūno ahri pehere yahu nemoutja m̄sare: M̄sare ihña tuhtiyequinare cahña. M̄sare ñano yeyequinare tiquina ye ijiatire Cohācjūre sini basaya. ⁴⁵ M̄sa

sa yena mari Pacu ūhmuse cjūno pohna ijire m̄sa. Cohācjū pehe ihcāno saha yere masare. Ñañequina ḡhure quehnoañequina ḡhure asū asigū yere tiquiro. Sa yero Cohācjū dutiyere yeyequina ḡhure, yeyequina ḡhure acoro ahtagū yere tiquiro. Masare ihcāno saha tiquiro yeriro sahata m̄sa ḡhu yeya. ⁴⁶ M̄sare cahñequina dihitare m̄sa cahigū ti ne d̄hseati ijierare. Wapa ne cohteyequina ḡhu sata yere. Sa yena ijipihtiyequinare cahña. ⁴⁷ M̄sa acaye dihitare m̄sa quehnoano piti cagū ti ne d̄hseati ijierare. Cohācjūre masieñequina ḡhu sata yere. Sa yena ijipihtiyequinare quehnoano piti caya. ⁴⁸ Ñañe mariena ijiya m̄sa. Mari Pacu ūhmuse cjūno tiquiro ñañe marieniquiro tiquiro ijero sahata m̄sa ḡhu ñañe mariena ijiya, ni yahuahye Jesu.

Quehnoañe yeyere yahuahye Jesu

6 Pari turi tiquiro yahu nemoahye: —Cohācjū ye ijiatire quehnoañene yena, tire masare “Ohō saha ijigu ijiaja yuhu”, ni ye ihñoadacāhña apequinare. M̄sa sa ni ye ihñori buhiri quehnoañene m̄sa yeri d̄hseati ijierare. Sa yero Cohācjū ūhmuse cjūno quehnoañene m̄sa yeri wapa m̄sare ohosi. ² Sa yena pejecuoyequinare yedohona, tire masare ye ihñoadacāhña. Masa tiquina ihñenopu yedohoya tiquinare. Sata ihquēquina ye ihñore mahapu ijiyequinare, judio masa mari buheye wuhusepu ijiyequina ḡhure. Tiquina mari ihñono dihita quehnoano iji mehoñequina ijire. Sa ye ihñore tiquina, “Quehnoañequina ijire ahriquina”, masare ni ihña dutiye. Tiquina sa ni ihñagū sa ye ihñōñequina pehe bucue tuhasari. “Quehnoañequina ijire”, ni masa tiquina ño peogū bucue tuhasari tiquina. Sa yero Cohācjū pehe ne

bucue nemogū yesi tiquinare. ³Sa yena pejecuoyequinare yedohona, masa tiquina ihñenopu yedohoya tiquinare. Musa mehna cjēna mehna ijina tiquina ihñeno pejecuoyequinare yedohoya. ⁴Masa tiquina ihñenopu musa yedohoepegūta Cohācjū pehe ihñare. Sa ihñano musa sa yeri wapa ohorota musare, ni yahuahye Jesu.

Cohācjūre siniñene yahuahye Jesu

(Lc 11.2-4)

⁵Pari turi tiquiro yahu nemoahye:

—Cohācjūre sinina, masa ihñono dihita quehnoano iji mehoñequina yero saha yeracāhña musa. Judio masa mari buheye wuhusepu ducu, mahapu gūhure ducu, Cohācjūre sini ihñore tiquina masare. Sa sini ihñone poto masa tiquina ño peoye mehna tiquina bucue tuhasari. ⁶Cohācjūre sinigū tagu, muhu ya tucūpu biha saajāña. Biha saajā, mari Pacu ihñamehneniquirore siniña. Musa sa yegū masa marienopu musa siniepegūta mari Pacu musare tuhoro. Sa tuhoro musare quehnoano yerota tiquiro.

⁷Sa yena Cohācjūre sinina, tuhuro marieno musa sinidireta pari turi sini majare tojoeracāhña. Ohō sahata yere Cohācjūre masieñequina. “Peye tahari ihcāno saha usā sinigū Cohācjū usāre tuhoro”, ni tuhutumene tiquina. ⁸Tiquina yero saha yeracāhña musa. Musa siniato pano mari Pacu musa cahmeñene masi tuhasare. ⁹Sa yena ohō saha ni siniña musa Cohācjūre:

Usā Pacu, uhmuse cjū muhu quehnoagu sa ijiducure.

¹⁰Yojopure ijipihtyequina puhto ijiya. Uhmusepu muhu dutiro sahata tiquina yeriro sahata ahri yehpa cjēna gūhu yeahro.

¹¹Sa yegu decoripe usā ihyatire ohoducua usāre.

¹²Apequina usāre tiquina ñano yerire usā boaja. Sa yegu muhu gūhu usā ñano yerire boya.

¹³Sa yegu usā ñañene ye duagū usā tutuaro cahmegū ihñagū tire usāre ye dutieguta. Sa yegu usāre usā ñañene yeragū yeya.

Muhu usā puhto tutuagu sa ijiducuguta. Ijipihtyequina muhure sa ño peoducuahro, ni siniña Cohācjūre.

¹⁴Apequina musare tiquina ñano yerire musa bogū ihñano, mari Pacu uhmuse cjūno gūhu musa ñano yerire borota. ¹⁵Sa boeperota apequina musare tiquina ñano yerire musa boeragū mari Pacu gūhu musa ñano yerire bosī, ni yahuahye Jesu.

Sijiyere buheahye Jesu

¹⁶Sa yero tiquiro tiquinare yahu nemoahye:

—Cohācjūre ño peona tana sijina bujua witiyequina yero saha ye ihñoadacāhña. Sata yere masa ihñono dihita quehnoano iji mehoñequina. Tiquina wuhdo paca bujua witiyequina yero saha ijire. Tiquina sa ijiyequina ijigū tiquina sijigū ihña masine masa. Ijirota musare nii niaja. Masa tiquinare ño peogū cahmene tiquina. Sa yeye tiquinare tiquina ño peogū ihñañe bucue tuhasari. Cohācjū pehe tiquirore tiquina ño peori wapa tiquinare bucuegū yesi. Sa yena tiquina yero saha ye ihñoadacāhña musa. ¹⁷Musa sijina, musa poarire aco mehna wa peo wuhapo peoya. Sa yena musa wuhdo pacare coseya. ¹⁸Musa sa yegū musa sijigū ihña masi masa. Cohācjū dihita musa sijiyere ihña masinota. Musa sehsaro musa ijigū tiquiro musa mehna sa ijiducure. Sa ihñano tiquiro musare quehnoano yerota tiquirore musa ño peori wapa, ni yahuahye Jesu.

Ʋhmuse cjēne cuo dutiahye Jesu

(Lc 12.33-34)

¹⁹ Sa yero tiqiro yahu nemoahye:

—Ahri yehpa cjēne ne cahme-coedacāhña. Ohō cjē ahbaa wahaboaga. Ti ahbaeragū yaqueriquiro neboaga tire. Tiquiro yaqueragū mecasia tuaboaga. Sa yero ahri yehpa cjē butiaro cuarīne. Sa yena ahri yehpa cjēne tutuaro cahmedacāhña. ²⁰ Ʋhmuse cjē pehere cahmeña musa. Ʋhmuse cjēne mecasia tua masiedare. Topu musa cuoye ne ahbaerare. Topure yaqueriquiro ne masiedare. Sa yena Ʋhmuse cjēne cahmeña musa. ²¹ Topu musa cuoye ijigū, Ʋhmuse cjēne Cohācjū yere tutuaro wacūre musa, ni yahuahye Jesu.

Masa tiquina tuhuturo sahata yere

(Lc 11.34-36)

²² Sa yero ohō saha ni yahu nemoahye tiquinare:

—Sihāria quehnoano buhriogū mari quehnoano ihña masino sahata quehnoañene tuhutuye mehna quehnoano ye masinata musa. Musa tuhuturo sahata yere musa. Quehnoañene tuhutuna quehnoano yere musa. ²³ Quehnoañene tuhotuerana ñañene yere musa. Musa ñañe dihitare musa tuhituducugū ti ñañe pehe ña yuhduye ijire, ni yahuahye Jesu.

Niñerure cahñequina, Cohācjū pehere cahiedare

(Lc 16.13)

²⁴ Sa yero tiqiro yahu nemoahye tiquinare:

—Ihcāquiro Cohācjū pehere wacūno, tutua yuhduaro niñeru pehere wacūedare. Niñeru pehere tutua yuhduaro wacūno Cohācjū pehere wacūedare. Niñeru dihitare cahmediquiro ijiro Cohācjūre bucuegū

yerare. Cohācjū gūhure, niñeru gūhure puarore cahme yuhducaro basioerare musare.

Cohācjū tiqiro pohnene ihña ihbore

(Lc 12.22-31)

²⁵ Sa yegu ahrire musare nii niaja: Musa ihyayere, sihniñene, suhti gūhure pajiro bujua witi tuhotueracāhña. Musare bajumehnenno ihyayere ihyatina dihitare suhti sañatina dihitare Cohācjū yerari musare. ²⁶ Minicjua parire Cohācjū tiqiro ihña ihboyere masiña musa. Tiquina weseri marieñequina ijire. Sa yeye ihyayere tiquina ihboyere wuhuse tiquinare mariedare. Mari Pacu pehe tiquinare tiquina ihyatire ohore. Minicjua yuhduoro musa pehere cahñe Cohācjū. Sa yero musa gūhure ihña ihborota tiqiro. ²⁷ Pajiro musa tuhutuye mehna ti musare ihcā hora cati nemogū yerare. Sa yero musa pajiro tuhutuye dahseati ijierare.

²⁸ Sa yena musa suhti sañatire pajiro bujua witi tuhotueracāhña. Nucū cjē cohorī ti cohoyere tuhutuya. Ti cohorī ti basi suhtire yerare. Sa yerapeta ti cohorī quehnoañe suhti yero saha quehnoañe cohorī bajure. ²⁹ Salomo munano quehnoañe suhtire sañariquiro tiqiro ijiepegūta ti cohorī pehe tiqiro yuhduoro quehnoa yuhduaye cohorī waro ijire. ³⁰ Cohorire quehnoañe cohorī yere Cohācjū pehe. Ti cohorī pehe meheñe decorigā iiducu ñai bora dijiaa wahare. Mehenogā iji, ape decopu pecapu ujūa wahare. Sa ijiepegūta cohorire quehnoañe cohorī ijigū yere Cohācjū. Sa yero Cohācjū cohorire tiqiro quehnoañe cohorī tiqiro yeriro yuhduoro musa gūhure quehnoano yerota. Suhtire ohorota. Cohācjūre mehenogā wacū tutuare musa. ³¹ Sa yena musa ihyatire, musa sihniatire, musa suhti sañatire pajiro bujua witi tuhotueracāhña.

³² Cohācjüre cahmeeñequina pehe tire sa macaducuye nine. Mari Pacu ũhmuse cjũno ijipihtiyē mŭsa cahmeñene masine. Tiquiro sa masigũ pajiro bujua witi tuhotueracāhña. ³³ Cohācjũ mŭsa puhtoro tiquiro ijiatore cahme muhtaña mŭsa. Ijipihtiyē apee boro yuhduoro tiquirore cahmeña mŭsa. Quehnoañene tiquiro ye dutiyē gũhure cahmeña. Mŭsa sa yeri bato Cohācjũ pehe mŭsa cahmeñe duhsagũ ohorota. ³⁴ Sa yena ñamiapure mŭsa duhse wahatore pajiro bujua witi tuhotueracāhña. Ñamiare mŭsa ñano yuhdugũ Cohācjũ yedohorota musare. Miare mŭsa ñano yuhduato iji tuhasare. Sa yena mia cjē dihitare tuhotuya. Ape deco cjēne pajiro bujua witi tuhotu nemoedacāhña. Cohācjũ pehe musare yedohorota, ni yahuahye Jesu.

Apequinare “Ñañequina ijire”, niedacāhña

(Lc 6.37-38, 41-42)

7 Sa yero tiquiro tiquinare yahu nemoahye:

—Apequinare “Ñañequina ijire”, niedacāhña mŭsa. Mŭsa sa niedagũ Cohācjũ musare “Nana ijire”, nisi. ² Apequinare “Quehnoano yerare”, mŭsa ni ihñano sahata Cohācjũ pehe mŭsa gũhure sata ni ihñanota. ³ Mari queoye mehna mari buhegũ ohõ saha yena ijire mŭsa. Mŭsa acayuro tiquiro capeapu meheni pohcarogã sajāgũ ti pohcarogāre quehnoano ihñare mŭsa. Mŭsa ya capea pehere pajiri pjĩ ijipegũta ti pjĩne ne ihñedare mŭsa. Meheni pohcarogāre mŭsa ihñano saha mŭsa acayuro tiquiro ñano yeye pehere quehnoano ihñare mŭsa. Mŭsa basi mŭsa ñañene tutuaro yepenata tire masiedare mŭsa, pajiri pjĩne mŭsa ihñeno saha. ¿Duhse ijiro boro sa ijijari mŭsa? ⁴ Ohõ saha nibona ijire mŭsa: “Yuhu acayũ, ñañene yei nine

muhu. Sa yegu tire duhuya”, nibona ijire mŭsa. Sa nibona ijiepenata pajiro ñañene yere mŭsa. ¿Duhse mŭsa ñañene yepenata tire masiedari mŭsa?

⁵ Masa tiquina ihñono dihita quehnoano iji mehona ijire mŭsa sa yena. Pajiri pjĩne mŭsa capeapu ijiri pjĩne mŭsa ne muhtaboriro sahata mŭsa ñano yeye pehere duhu muhtaña. Mŭsa sa yeri bato mŭsa acayuro tiquiro ñano yeyere duhugũ ye masiboaga, meheni pohcarogāre mŭsa neboriro sahata.

⁶ Diayea yero saha ijieyequina, yesea yero saha ijieyequina gũhu ñañequina Cohācjũ yere quehnoa yuhduyere tiquina ño peerare. Tiquina pehere yahuercāhña. “Tiquina bujue, ñano niari”, nina, yahuercāhña tiquinare, ni yahuahye Jesu.

Cohācjüre mari siniñene yahuahye Jesu

(Lc 11.9-13; 6.31)

⁷ Sa yero tiquiro tiquinare yahu nemoahye:

—Cohācjüre siniña mŭsa. Sinina mŭsa nenata. Mŭsa sinidire bocanata. Tiquirore sa siniducuya mŭsa. Mŭsa sa yegũ tiquiro musare ohorota. ⁸ Ijipihtiyequina Cohācjüre siniñequina neeta. Sa yeye tiquina sinidire bocaeta. Sa yero ijipihtiyequina Cohācjüre sa siniducuyequinare tiquiro tiquinare ohorota.

⁹ ¿Mŭsa pohna pāgāre musare tiquina sinigũ utā pehere ohoboagari mŭsa tiquinare? Ne ohosi. ¹⁰ ¿Mŭsa pohna wahire musare tiquina sinigũ añā pehere ohoboagari mŭsa tiquinare? Ne ohosi. ¹¹ Mŭsa ñana ijiepenata mŭsa pohñare quehnoañene ohoe tiri mŭsa. Sa yero Cohācjũ pehe mŭsa yuhduoro quehnoañene ohore musare tiquiro pohñare tiquirore sininare. Mŭsa pohñare mŭsa ohoriro yuhduoro Cohācjũ pehe tiquiro pohñene ohore.

¹²Apequina musare tiquina quehnoano yegũ cahmene musa. Tiquinare musa quehnoano yegũ cahmeno sahata quehnoano yeya tiquina gũhure. Tiquina quehnoano yerapegũta musa pehe tiquinare quehnoano yeya. Sata ye dutire Cohãcjũ dutiye Moiserẽ tiquiro cüripũ, Cohãcjũ yere yahu muhtariquina tiquina ojoari gũhũ, ni yahuahye Jesu.

**Meheni sopecahagã
quitire yahuahye Jesu**

(Lc 13.24)

¹³Sa yero tiquiro yahu nemoahye tiquinare.

—Uhmusepũ Cohãcjũ cahapũ waha duana tiquiro yere yero cahmene musare. Sa yena tiquiro yere sa ye macaedacãno cahmene. Meheni sopecahagãpũ musa sajã duagũ mijorĩne. Sata mijorĩne Cohãcjũ cahapũ musa waha duagũ. Pecapũ masa tiquina wahagũ mijoedare. Pajiri sopecahapũ mari sajãgũ mijoedare. Ti sopecahapũ masa tiquina sajãboro saha pecapũ masa tiquina wahagũ mijoedare. Sa yeye peyequina masa topũ wahaye nine. ¹⁴Cohãcjũ cahapũ musa waha duagũ mijorĩne. Meheñequinagã masa topũ wahaeta. Topũ wahayequina ijiptiye decori Cohãcjũ mehna ijducueta, ni yahuahye Jesu.

**Yucũgu ducare masina, tu
padũ gũhure masine musa**

(Lc 6.43-44)

¹⁵Sa yero tiquiro yahu nemoahye tiquinare:

—Quehnoano yeya. “Cohãcjũ yere yahu muhtana ijiata”, ni mehoñequinare tuhoeracãhãna musa. Tiquina oveja yero saha usueyequina saha bajumene. Tiquina tuhotuyepũ ñañequina ijire tiquina. ¹⁶Tiquina ñano yegũ ihãana, ñañequina tiquina ijigũ

masinata musa. Tiquina quehnoano yegũ ihãana quehnoañequina tiquina ijigũ masinata musa. Pota bucũgu uhse tõhorine dũca tierare. Potagu higuera pacare dũca tierare. ¹⁷Quehnoadũ yucũgu quehnoañene dũca tire. Ñadũ pehe ñañene dũca tire. ¹⁸Quehnoadũ yucũgu ñañene ne dũca tierare. Sa yero ñadũ quehnoañene dũca tierare. ¹⁹Quehnoañene dũca tieye cjure dũte cohã cã, pecapũ ujuãnota. Sata yerota Cohãcjũ tiquiro cahmeñene yerariquinare. ²⁰Sa yena “Cohãcjũ yere yahu muhtana ijiata”, ni mehoñequinare ohõ saha masinata. Tiquina yerire ihãana, tiquina ni mehoñequina ijigũ masinata, ni yahuahye Jesu.

**“Musare ne masiedaja”, ninota
Cohãcjũ peyequina masare**

(Lc 13.25-27)

²¹Sa yero tiquiro yahu nemoahye tiquinare:

—Peyequina yũhure “Pũhto” niñequina ijiepetã uhmuse cjũno Cohãcjũ tiquiro pũhtoro ijiropũre wahasi tiquina. Yũhũ Pacũ uhmuse cjũno tiquiro cahmeñene yeyequina dihita tiquiro pũhtoro ijiropũre wahaeta. ²²Decorĩ pĩhtigũpũre peyequina masa ohõ saha nieta yũhure: “Pũhto, muhũ yere usã buhei. Muhũ wame mehna watiare cohã. Sa yena muhũ tutuaye mehna peye bajumehneñene yei usã”, yũhure niñequina ijietã. ²³Ohõ saha yũhtiitja tiquinare: “Musare ne masiedaja. Ñañene yena ijire musa. Yũhũ cahapũ ahtaeracãhãna”, niitja yũhũ tiquinare, ni yahuahye Jesu.

**Pua wũhũ yeyequina
quitire yahuahye Jesu**

(Mr 1.22; Lc 6.47-49)

²⁴Sa yero tiquiro yahu nemoahye tiquinare:

—Sa ye ijipihtiequina ahri yuhū buherire tuhoriquina yuhū dutiyere yeyequina, quehnoano tuho masiniquiro wuhū dahreriquiro yero saha ijire tiquina. Tiquiro pehe uhcuāñe coperi sehe, wuhure doco dūcahye. ²⁵Ti wuhure peho tuhasari bato acoro tutuaro ahta, dia mini yuhduā waha, tutuaro wiwnono wēahye. Sa ti tutuaro wēpegūta ti wuhū uhcuāno tiquiro docori wuhū ijiro ne waha sa queherahye. ²⁶Sa yeye ijipihtiequina yuhū buherire tuhoepeta yuhū dutiyere yerariquina, tuho maseniquiro wuhū dahreriquiro yero saha ijire. Tiquiro pehe ti wuhure paduro buigā doco, quehnoano ye dūcaerahye. ²⁷Ti wuhure peho tuhasari bato, acoro tutuaro ahta, dia mini yuhduā waha, wiwnono tutuaro wēahye. Sa tutuaro wēno ti wuhū pehere wēdoque cū cāhye. Sa yero ti wuhū tutuaro bora sa quehea wahahye, ni yahuahye Jesu.

²⁸Tiquiro sa ni buhegū tuhoye, tuho maria wahahye masa. ²⁹“Tiquiro potota puhtoro ijire. Sa yero quehnoano masi pehoriquiro ijiro marine buhere tiquiro. Mari judio masare buheyequina yero saha buherare”, ni tuhoutuahye tiquina.

Jesu cami bucu muna wihirore yuhduā wahagū yeahye

(Mr 1.40-45; Lc 5.12-16)

8 Jesu cunupū buhe dujiriquiro di-
jiaa wahahye. Tiquiro dijiagū ihñañe masa peyequina tiquiro bato wahahye. ²Tiquiro sa wahagū ihcāquiro cami bucu muna wihiro tiquirore piti ca, dusepe curi mehna quehe sa, tiquirore siniahye.

—Puhto, mūhū yuhure yuhduo duagu yuhduoya, niahye.

³Tiquiro sa nigū tuhoro tiquiro omoca mehna Jesu tiquirore ña peohye.

—Tire ye duaja. Mūhure yuhdugū yeyitja, niahye Jesu tiquirore.

Tiquiro sa nigūta cami bucu muna yatia wahahye. ⁴Sa ni tuhasa Jesu tiquirore niahye tja:

—Yuhū mūhure ohō saha yerire ne apequinare yahueracāhña. Mūhū pagure quehnoari pagū waharire pahire ihñogu wahaya. Moiserere Cohācjū tiquiro cūriro sahata pahire minicjuare ohoya mūhū yuhdurire masa ijipihtiequina tiquina masino quehnoano, niahye Jesu.

Surara puhtoro tiquiro cahacjūno dohatigū Jesu yuhduoahye tiquirore

(Lc 7.1-10)

⁵Sa ye Jesu Capernau wame tiri macapū tiquiro esagū cien surara puhtoro tiquiro cahapū esa, tiquirore tutuaro ohō saha ni sinidi:

⁶—Puhto, yuhū cahacjūno ne pagū tutueriquiro waha masiedaro tiquirore tutuaro purīgū ya wuhupū cuñari tiquiro, nidi tiquiro Jesure.

⁷Tiquiro sa nigū,

—Aū, tiquiro dohatiyere yuhduogu wahautja, nidi Jesu.

Tiquiro sa nigū ohō saha nidi surara puhtoro:

⁸⁻⁹—Puhto, quehnoanota.

Wahaegūta. Yuhū yuhduoro quehnoa yuhduagu ijire mūhū. Ya wuhupū mūhure sajā ta dutibogu ijieraja yuhū. Mūhū masiñe mehna yuhduoya tiquirore. Mūhū sa yegū yuhū cahacjūno quehnoa waharota. Yuhure yuhū bui ijiyequina apequina puhtoa dutire. Yuhū gūhū surarare dutiaja. Ihcāquirore “Wahaya”, yuhū nigū tiquiro wahare. Apequirore “Ahtaya”, yuhū nigū tiquiro ahtare. Yuhū cahacjūnore “Ahrire yeya”, yuhū nigū tire yere. Mūhū gūhū dutiguta ijire. Sa yero mūhū dutiro sahata tiquiro dohatiriquiro yuhdurota, nidi tiquiro.

¹⁰Tiquiro sa nigū tuho maria waharo, peyequina masa tiquiro mehna ijiyequinare ohō saha nidi Jesu:

—Ijirota musare niita niaja. Ahrikiro surara puhtoro Israe masano ijierikiro Cohacjüre tutuaro wacü tutuare. Tiquiro cahacjünore yuhu yuhdugü yeatire masi tuhasare. Ne Israe masare ahrikiro yero saha ijiyequinare ihñedaga yuhu.
¹¹ Musare niita niaja. Peyequina ahrikiro yero saha Cohacjüre wacü tutuayequina ijipiltiro cjëna gühü ihmuse cjëno puhtoro tiquiro ijiropu esa, topu ijiyequina mehna ihyæta. Abrahã, Isaac, Jacob mehna ihyæta tiquina.
¹² Masa apequina pehe Cohacjü tiquiro puhtoro ijiropu wahaboriquina tiquina ijepegüta ñanopu nahitianopu cohã cãnota tiquinare. Topu tiquiro cohãriquina tutuaro uti, bujua witiye mehna bahque dihoeta, ni yahuri Jesu.

¹³ Tire sa ni tuhasa, surara puhtorore nidi.

—Tojoahya muhu ya wuhupu. Muhu cahacjüno yuhdurota. “Potota yuhdurota”, ni muhu tuhoturiro sahata yuhdurota, nidi Jesu.

Sa nigüta tiquiro cahacjüno pehe quehnoa wahari.

Pedro mareonore dohatiricorore yuhduoahye Jesu

(Mr 1.29-31; Lc 4.38-39)

¹⁴ Sa ye Jesu Pedro ya wuhupu esa, Pedro mareono dohatigü ihñahye tiquiro. Ujuaye tigü cuñahye ticoro.
¹⁵ Ticoro sa ijigü ihñano ticoro omocare ña peoahye. Tiquiro sa ña peogüta ujuaye surua wahahye. Surugü tuhoturo ticoro pehe wahcãduca, tiquinare ihyayere peoahye.

Jesu peyequina dohatiyequinare yuhduoahye

(Mr 1.32-34; Lc 4.40-41)

¹⁶ Sa ye ñamicahapu peyequina watïare cuoyequinare masa ne wihiahye Jesu cahapu. Tiquina sa ne wihigü ihñano ihcã tahata tiquiro waha dutigü watïa wahaa wahahye. Sa yero

ijipiltiyequina dohatiyequina tiquina ne sariquinare yuhduo pehoahye Jesu.
¹⁷ Sata yeahye tiquiro panopu cjëno Cohacjü yere yahu muhtarikiro Isaia tiquiro nidiro sahata. Ohõ saha ni ojoahye: “Mari dohatiyere yuhduo cãnota tiquiro. Mari duti tiyere cohã cãnota”, ni ojoahye Isaia Jesure.

Ihquëquina Jesu mehna waha duamahye

(Lc 9.57-62)

¹⁸ Ape taha Jesu peyequina masa tiquiro cahapu tiquina ijigü ihñano, ohõ saha nidi.

—Ape sie pahrëpu isa pehãuhna, nidi.

¹⁹ Sa usã pehãto pano mari judio masare buherikiro Jesu cahapu esa, ohõ saha nidi:

—Buhegu, muhu mehna waha duaja noho muhu waharopu, nidi.

²⁰ Jesu ohõ saha ni yuhtiri:

—Ihquëquina nucu cjëna wahiquina tiquina coperi cuore. Minicjua gühü tiquina suhti cuore. Yuhu masu Cohacjü ohorigu pehe yuhu carini wuhu cuoeraja, ni yuhtiri Jesu.

²¹ Sa ye apekiro Jesu buherikiro ohõ saha nidi:

—Puhto, yuhu pacu tiquiro yariagü yarigutja. Sa ya tuhasagu pürita muhu mehna wahagutja, nidi tiquiro Jesure.

²² Jesu yuhtiri:

—Yuhure cahmeeñequina yariariquina yero saha ijire. Tiquina pehe yariariquinare yaahro. Sa yegu muhu pehe yuhu mehna cjü ijiacju ahtaya, nidi tiquiro.

Jesu wihnonore yusu dutiahye

(Mr 4.35-41; Lc 8.22-25)

²³ Sa ni tuhasa yucusapu sajãri. Sa yena usã tiquiro buhena gühü tiquiro mehna waha, sajãu.
²⁴ Ti ditarapu usã pehãgü waro wihnono tutuaro wëdi. Sa yero pahcõri yucusare quë mio cãmedi.

Sa wihnono wēpegūta Jesu pehe carīno nidi. ²⁵Sa wahagū ihñana usā tiqiurore wahcōu. Wahcō ohō saha nii:

—Puhto, yuhduoya. Mari minina tana niajū, nii usā.

²⁶Usā sa nigū Jesu yuhtiri:

—¿Duhseña cue maca cāri mūsa? Yuhure wacū tutuerare mūsa, nidi Jesu usāre.

Sa ninota wahcādūca sa, wihnonore pahcōri gūhure “Yūsuhaya”, nidi. Tiquiro sa nigū wihnono yuhdua wahari. Sa ye pahcōri gūhu yusu dijiaa wahari. ²⁷Tiquiro sa yegū ihña acūana, ohō saha nii usā:

—¿Yohou, dūhse ijiriquiro boro masuno ijiajari ahriquiuro? Ahri wihnono, pahcōri gūhu tiqiuro dutigū yuhdūducaerare tiqiurore, nii usā.

Watīa cuoyequinare watīare cohāhye Jesu

(Mr 5.1-20; Lc 8.26-39)

²⁸To bato pehā sa, Gadara cjēna ya yehpapū esau. Topū usā esagū pūaro mūsa masa coperi cahapū ijiyequina Jesure piti cari. Tiquina watīare cuoyequina cuayequina ijiri. Sa yero topū masa tiquina wahamehnenno ijiri. ²⁹Tiqiurore piti ca, sañuducuri:

—¿Mūhu Cohācjū macū dūhse yegū ahtajari mūhu usā cahapūre? ¿Usāre Cohācjū tiqiuro buhiri dahreati pje ijierapegūta usāre buhiri dahrei ahtaū niajari mūhu? ni sañuducuri tiquina.

³⁰Tiquina cahapū peyequina yesea maca ihyaye nidi. ³¹Tiquinare ihñāne, watīa ohō saha nidi Jesure:

—Usāre cohāgu sisequina cahapū waha dutiya usāre. Tiquina mehna iji dutiya usāre, ni sinidi watīa Jesure.

³²—Aū, wahaya, nidi Jesu.

Tiquiro sa nigū watīa pūaro masa mehna ijiriquina waha, yesea cahapū esari. Tiquina mehna tiquina ijigūta yesea pari, pari cjūpū oma maa buha,

ditarapū bora ñojoa, mini yaria pihtia wahari.

³³Tiquina sa wahagū ihñāne yeseare ihña ihboyequina pehe cuea waha, oma maa cāa wahari. Macapū esa, yesea tiquina minidire yahu site pehoahye. Watīare cuoriquinare Jesu watīare tiquinapūre ijiriquinare cohā wiori gūhure yahu pehoahye tiquina. ³⁴Sa tiquina yahu siteri bato ti maca cjēna ijipihtiyequina Jesure ihñāne ahtari. Sa ye tiqiurore ihñāne, tutuaro mehna waha dutiri tiqiurore.

Tini masieniquirore yuhduoahye Jesu

(Mr 2.1-12; Lc 5.17-26)

9 Sa ye Jesu yucūsapū sajā, ditarapū pehā, tiqiuro masari macapū esahye. ²Topū apequina tini masieniquirore tiqiuro cuñari cahsero mehna yo wūa wihahye Jesu cahapū. “Jesu ahriquiuro dohatiyere yuhdūgū yerota”, ni tūhotuahye tiquina. Tiquina sa ni tūhotugū masino dohatiriquirore ohō saha niahye Jesu:

—Bucueya mūhu. Mūhu ñāne yeyere cohā tuhasau yuhū, niahye tiqiuro.

³Tiquiro sa nigū tūhoye ihquēquina mari judio masare buheyequina ohō saha ni tūhotumahye. “Ahriquiuro ihyo ijiriquiro sa nino ‘Cohācjū ijiaja’, nino nine. Sa nino Cohācjūre ñano nino nine”, ni tūhotumahye tiquina. ⁴Tiquina sa ni tūhotugū masino, ohō saha niahye Jesu:

—¿Duhseña sa ñano tūhotuajari mūsa? ⁵“Mūhu ñāne yeyere cohā tuhasaja”, yuhū nigū “Ni mehogu ijire”, nine mūsa quehnoano masiedapenata. “Wahcādūca, wahaya”, yuhū nigū tiqiuro tinigū ihñana, yuhū nidi poto ijigū duita mūsa masinata. ⁶Yuhū masu Cohācjū ohorigū ahri yehpapū masa tiquina ñāne yeyere cohā masiaja yuhū. Masa tiquina ñāne yeyere cohācjūre cūri Cohācjū yuhure. Yuhū sa cohārire

musa masiato saha ohō sahata ye ihñoutja musa ihñatire, niahye Jesu.

Sa ni tuhasa tini masieniquirote ohō saha niahye:

—Wahcādūcaya. Mūhū cuñari cahserore ne cāhña mūhū ya wūhūpū, niahye tiqiurore.

⁷Tiqiuro sa nigū tūhoro tini masieniquiro wahcādūca sa, tiqiuro ya wūhūpū tojoa wahahye. ⁸Sa wahagū ihñañe masa cueahye. Sa ye Jesure Cohācjū tiqiuro tutuayere tiqiuro ohogū ihñañe masa Cohācjūre ño peo, quehnoano yahuducuahye.

Jesu Mateore pijiahye

(Mr 2.13-17; Lc 5.27-32)

⁹Tiquina sa yeri bato Jesu topū ijiriquiro ahta, yūhūre Mateore boca sari. Pūhtoa ye ijiatire masare wapa ne cohtegū ijimi. Sa yegū ti pjere yūhū dahrari tucūpū dujii. Topū yūhū dujigū ihñano ohō saha nidi yūhūre:

—Yūhū mehna cjū ijiajū ahtaya, nidi Jesu yūhūre.

Tiqiuro sa nigū tūhogu wahcādūca tiqiuro mehna wahaū.

¹⁰Came ya wūhūpū Jesu gūhū ihyaye ahtari. Peyequina wapa ne cohteyequina, “Ñano yeyequina”, tiquina niñequina gūhū usā mehna ihyari. ¹¹Tiquina mehna usā ihyagū ihñañe, fariseo masa usāre Jesu buhenare ohō saha nidi:

—¿Dūhse yero musare buheriquiro wapa ne cohteyequina mehna, ñano yeyequina mehna ihyajari? nidi tiquina usāre tiqiuro buhenare.

¹²⁻¹³Tiquina sa nigū tūhoro Jesu pehe queoye mehna buhero yūhtiri:

—Dohatiyequina duturure macaedare. Dohatiyequina dihita duturure macare. Ñañequina dohatiyequina yero saha ijire. Sa yegū ñañequina dihitare tiquina ñañene yerire būjua witi duti, quehnoañe pehere comesagū yei ahtaū nii yūhū.

Tiquina basi “Quehnoana ijiaja usā”, ni tūhotuyequinare yedohogu ahtaerū. Cohācjū tiqiuro nidire tiquina ojoarire masiña musa. “Wahiquinare musa wejē, ūjūa mūoñe mehna yūhūre musa ño peogū cahmedaja. Apequinare musa paja ihñagū pehere cahmeaja”, ni ojoahye. Ahri tiqiuro ojoari dūhse nidire masiña musa. Tire quehnoano buhe nemonā wahaya, nidi Jesu fariseo masare.

Sijiyere sinituahye Ñu buheyequina Jesure

(Mr 2.18-22; Lc 5.33-39)

¹⁴Came Ñu wame yeriquiro buheyequina Jesu cahapū esa, sinituri:

—Usā Ñu buhena pehe peye tahari Cohācjūre ño peona tana, sijiaja. Fariseo masa gūhū sata sijire. ¿Dūhse yeye mūhū buheyequina pehe sijierajari? nidi tiquina Jesure.

¹⁵Jesu tiqiuro tūhotuye mehna queoye mehna buhero taro tiquinare ohō saha ni yūhtiri:

—Ohō saha ijire ti: Omoca dūhteropū tiquina pijioriquina omoca dūhteriquiro mehna ijiye, siji masiedare. Sata yūhū buheyequina gūhū yūhū mehna ijiye, siji masiedare. Yūhū omoca dūhteriquiro yero saha ijiaja. Omoca dūhteriquiro bose deco tiqiuro yegū tiqiuro mehna cjēna būjua witiye mehna ijierare. Sa yeye ihyeyequina ijierare. Yūhū Pacu Cohācjū yūhūre tiqiuro nedi bato pūritare yūhū buheyequina mehna ijsi yūhū. Sa yeye ti pjeputa yūhū buheyequina gūhū sijieta, ni yūhtiri Jesu.

¹⁶Panopū cjē buheye wahma buheye mehna tiquina buhe more duagū ihñano ohō saha ni nemori Jesu tiquinare queoye mehna buhero.

—Ne wahma cahsero suhtiro cahsero mehna mūnano suhtirore sere ohōno cahmedare. Sa yegū wahma cahsero mari coseri bato mūnano suhtirore

weje cahmecoa, paji yuhduaro tuhngũ yere. (Ahri yero saha muna buheyere wahma buheye mehna piti dahre buheraro cahmene.) ¹⁷ Sa yena ne uhse co bisiye core wahiquiro cahsero ajurore muna ajurore pose yeraro cahmene. Sa yegũ uhse co bisiye pahmuñepu muna ajurore tuhrẽ cãhre. Sa tuhngũ uhse co gũhu, ajuro gũhu cohãa wahare. Sa yena uhse co wahma core wahma ajuropu pose yero cahmene. Sa yegũ uhse co cohãeda, ajuro gũhu cohãedare. (Sata wahma buheye muna buheye mehna buhe moredaro cahmene,) ni yahuri Jesu tiquinare.

**Jairo maconore maso, dii
muna dohatiducuricoro
gũhure yuhduoahye Jesu**

(*Mr 5.21-43; Lc 8.40-56*)

¹⁸ Tiquiro sa ni yahuri watoa mari judio masa puhtoah mehna cjũno Jesu cahapu wihiri. Wihi, dusepe curi mehna quehe sa, ohõ saha nidi.

—Yuhũ maco mianogã yariaa wahari. Ticorore mũhu omocare duhu peogu ahtaya. Mũhu sa yegũ masanota, nidi tiquiro Jesure.

¹⁹ Tiquiro sa nigũ tuhoro Jesu wahcãduca tiquiro mehna wahari. Usã tiquiro buhena gũhu wahau. ²⁰ Usã mahapu wahaducugũ topu numino dii muna dohatiducuricoro Jesu batopu ahta, tiquiro suhtiro sohtoare dahra tuhuahye. Doce cãhmari waro decoripe dii muna dohatiro niahye. ²¹ Ohõ saha ni tuhotuahye ticoro sa yero: “Ti suhtirore dahra tuhugo, quehnoa wahagota”, ni tuhotuahye ticoro. ²² Ticoro sa yegũ masino Jesu majareduca, ticorore nidi.

—Maco, bucueya mũhu. Mũhu yuhũre wacũ tutuaye mehna quehnoago tojoare yojopũre, nidi tiquiro.

Tiquiro sa nigũta yuhduah wahari ticoro.

²³ Sa ye tuhasa Jesu puhtoro ya wuhũpu esari. Topu esa, ñehe quea utiyequinare weõgu mute pohoro saha ijidure putiyequinare ihñari. Peyequina masa tiquina ñano bisigũ gũhure tuhori tiquiro. ²⁴ Tiquina sa yegũ ihñano masare ohõ saha nidi:

—Wijiaya musa. Yarierare ticoro. Carĩno nine, nidi tiquinare.

Tiquiro sa nigũ tuhoye “Sa ni maca cãno nine ahriquiro”, niñe, masa bajuri tiquirore. ²⁵ Sa yero wuhũ puhapũre ijiyequina masare tiquiro wio pehori bato yariaricoro cahapu esa, ticoro omocare ñeheahye. Tiquiro sa ñehẽgũ masa quehe sa, wahcãduca sahye ticoro. ²⁶ Tiquiro sa yerire tuhoye, to cjẽna masa ijipihtiyequina yahu siteri.

**Puaro caperi bajueyequinare
ihñagũ yeahye Jesu**

²⁷ Sa yero Jesu topu ijiriquiro wahagũ, puaro caperi bajueyequina tiquirore pisu nunu tãri:

—Davi panami iji turiagu, masare yuhduoacju, usãre paja ihñaña mũhu, ni sañuducuri tiquina.

²⁸ Tiquina sa nigũta Jesu ape wuhũpu sajãri. Tiquiro sa sajãgũ masiñe caperi bajueyequina tiquiro cahapu sajãa wahari. Tiquina sa sajã sagũ ihñano tiquiro pehe sinituri tiquinare:

—¿“Marine ihñagũ yerota tiquiro”, ni tuhotuajari musa yuhũre? nidi tiquiro.

—Puhto, sata ni tuhotuaja usã, ni yuhtiri tiquina.

²⁹ Tiquina sa nigũta tiquina caperire ña peori. Ña peo ohõ saha nidi:

—Yuhũre “Sa yerota”, musa ni tuhoturiro sahata sa yeaja musare, nidi Jesu.

³⁰ Tiquiro sa nigũta tiquina caperi pehe quehnoa wahari. Sa ye Jesu ohõ saha nidi tiquinare:

—Ahri yuhũ ohõ saha yerire apequinare ne yahueracãhña, nidi.

³¹Tiquiro sa niepegūta waha, topu ijieyequinare yahu siteri tiquina tiquiro sa yerire.

**Yahuducueriquirore
yahuducugū yeahye Jesu**

³²Ti wuhure tiquina wijiagū waro ihcāquiro yahuducueriquirore ne cāhtari masa. Watino tiquiro mehna ijiriquiro tiquirore yahuducueragū yeahye. ³³Tiquina ne sagū ihñano watinore Jesu cohā wiori. Tiquiro sa cohāgū watinore cūriquiro pehe yahuducua wahari. Tiquiro sa yegū ihñañe ijipihtieyequina ihña maria pihtia wahari.

—Ne, ahri yehpa Israe yehpapure ohō saha yeyere ihñedahti mari, ni yahuducuri tiquina basi.

³⁴Fariseo masa pehe sijoro saha ni yahuducuri:

—Watīa puhtoro tutuaye mehna watīare cohāre ahriquiro, ni yahuducuri tiquina.

Masare paja ihñahye Jesu

³⁵Sa ye ijipihtieye macari topu ijiye macarigāre, bujuye macari gūhure buhe tinino wahari Jesu. Quehnoañe buheyere judio masa mari buheye wuhusepu buhero wahari tiquiro. Sa yero Cohācjū puhtoro tiquiro ijiatire yahuri. Ijipihtieye dohatieye gūhure to cjēnare yuhduori tiquiro. ³⁶Masa peyequina ñano yuhduyequinare, pejecuoro wahayequinare tiquina ijigū ihñano Jesu tiquinare paja ihñari. Tiquina oveja opana marieñequina yero saha tiquina ijigū ihñano Jesu tutuaro paja ihñari tiquinare. ³⁷Sa yero ohō saha nidi tiquiro usāre tiquiro buhenare, queoye mehna buhero:

—Trigo peye bucua tuhasagū peye ijigū dahraye pajiro ijire. Sa ijiepegūta dahrayequina pehe meheñequinagā ijire. Sata quehnoañe buheyere

tūhoatiquina peyequina ijigū pajiro ijire mari dahraye. Sa ijiepegūta meheñequinagā dahrari masa yero saha quehnoañe buheyere buheatiquina gūhu meheñequinagā ijire. ³⁸Sa yena quehnoañe buheyere buheatiquinare apequinare tiquiro ohoatire siniña Cohācjūre, nidi Jesu.

**Jesu doce waro beseahye
tiquiro ohoatiquinare**

(Mr 3.13-19; Lc 6.12-16)

10 Came doce usāre tiquiro buhenare Jesu pijio, tutuayere ohori usāre. Watīare usā cohā masiatire ijipihtieye dohatiyere usā cohā masiatire ohori usāre.

²Ohō saha wame tii usā Jesu cūrina: Simo ijiri. Tiquiroreta Pedro ni pisuri Jesu. Simo bahuro Andre gūhu ijiri. Santiago gūhu tiquiro bahuro Ņu mehna ijiri. Tiquina Santiago gūhu pacuro Zebedeo wame tiri. ³Felipe, Bartolomé, Tomasu, yuhū Mateo ijii usā. Yuhū pehe puhtoa ye ijiatire masare wapa ne cohtegu ijimi. Usā mehna Santiago ijiri. Tiquiro pehe Alfeo macuro ijiri. Sa yero Tadeo gūhu ijiri. ⁴Simo celote ya curua cjūno ijimediquiro, Juda Iscariote gūhu ijiri. Juda pehe Jesure ihña tuhtieyequinare ihñoatiquiro ijiri.

**Jesu tiquiro buheyequinare
buhe dutiro ohoahye**

(Mr 6.7-13; Lc 9.1-6)

⁵Sa ye usāre doce tiquiro buhenare ohoro, “Ohō saha yeya”, ni yahuri usāre Jesu:

—Judio masa ijieyequina cahapure wahaeracāhña. Ne Samaria yehpapu ijiye macaripu gūhure wahaeracāhña. ⁶Israe yehpa cjēna cahapu pehere wahaya. Cohācjūre masieñequina ijire tiquina. ⁷“Uhmuse cjūno puhtoro tiquiro ijiato mehenogā duhsare”, ni buheya tiquinare. ⁸Sa yena cami bucū

muna wihare, apeye peye sijoro saha ijiye dohatiyere cwoyequina gũhũre yũhdugũ yeya. Yariariquinare masoña. Watia masa mehna ijiyequinare cohãña tiquinare. Musare sa ohogu niaja ahri tutuayere. Sa yena musa gũhũ yũhũ sa ohoriro sahata masare yũhdugũ yeya wapa neno marieno.

⁹Musa wahana niñerure ne nedacãhña. ¹⁰Ne musa ajurore, pũaro camisare, pũa pa dahpo suhtire, tuaye cju gũhũre nedacãhña. Musa sañano dihitare saña wahaya. Apeye suhtire nedacãhña. Musa buhena waharopũ ijiyequina tiquina pehe musare pohe ijiatire ohoeta. Sata ohoro cahmene tiquinare.

¹¹Ti macaripũ esana, musare quehnoano piti catiquirore macaña. Sa yena ti wũhũpũta tojoarĩña. Tee, coã wahanapũ wijiaya ti wũhũre. ¹²Sa yena wũhũpũ sajãna, “¿Ijiajari musa?” niña ti wũhũ cjenare. Musare quehnoano tiquina cahmegũ “Cohãcjũ mehna quehnoano ijiya musa”, niña tiquinare. ¹³Musare tiquina cahmedagũ, musa sa niborire niedacãhña. ¹⁴Sa yena musare tiquina cahmedagũ, tiquina tũho dueragũ ti wũhũre wijiaya. Wijiana, dahpocãri cjẽ dihta esa wahãrire wejẽ site cũña musa tiquinare tiquina ye buhirire masigũ yena. Ti maca cjẽna musare cahmedagũ sata yeya tiquina gũhũre. ¹⁵Ijirota musare niita niaja. Ahri deco pihtigũpũre Sodoma cjẽna, Gomorra cjẽna gũhũ tutuaro buhiri tiatiquinata ijire. Tiquina sa ijiepegũta tiquina yũhdũoro musare cahmeeñequina buhiri tiatiquina ijieta, ni yahuri Jesu.

Jesu yequinare apequina ñano yeatire yahuahye Jesu

¹⁶Sa ni tuhasa ohõ saha ni nemori: —Yũhũre tũhoya musa. Oveja yero saha ijinare musare ñañequina watoa

ohogu niaja. Tiquina ñañequina nũcũ cjẽna yayia usuayequina yero saha ijire. Sa yena musa pehe apequina wahiquina wacũ masiñequina yero saha ijiya. Sa ijina ijiepenata bujua yero saha ne usuena ijiya musa. ¹⁷Quehnoano yeya musa. Musare masa puhtoare ohoeta. Judio masa mari buheye wũhũsepũ quẽeta musare. ¹⁸Sa yeye yeequina musa ijiri buhiri macari cjẽna puhtoahũ cahapũ tiquina bui ijiyequina puhtoahũ cahapũ gũhũre neañeta musare. Sa yena musare topũ tiquina neagũ puhtoare, judio masa ijieyequina gũhũre quehnoañe buheyerẽ buhenata musa. ^{19–20}Musare puhtoare tiquina ohogũ tiquinare musa niatire “Yohou, masiedaboaga”, ni tũhotueracãhña. Musare tiquina sinitugũta musa niatire masinata. Sa masina tiquinare yahuna, musa tire musa esa tuharo yahuducuna nisi. Cohãcjũ pehe mari Pacũ tiquiro yaquiro Espiritu mehna musare yahuducugũ yerota.

²¹Ti pjere tiquina wahmisũmũa tiquina bahanare wejẽ dutiye ohoeta puhtoare yeequina tiquina ijiri buhiri. Tiquina pacũsũmũa tiquina pohnene wejẽ dutiye ohoeta puhtoare. Tiquina pohne pehe tiquina pacũsũmuare wejẽ dutiye ohoeta puhtoare. ²²Sa yeye yeequina musa ijiri buhiri ihña tuhtietã masa ijipihtiyequina musare. Tiquina sa yepegũta ahri yehpapũ musa catiro puno musare tiquina ñano yerire ihcãno sahana yũhũre duhuerana, yũhdũnata musa. ²³Ihcã macapũ musare tiquina ñano yegũ ape macapũ duhti cãhña. Ijirota musare niita niaja. Israe yehpapũ ijiye macarine musa pehoato pano, yũhũ masũ Cohãcjũ ohorigũ ahri yehpapũ tojoa tautja.

²⁴Ne ihcãquiro buheriquiro tiquirore yahuriquiro buipũ ijierare. Sa yero cahacjũno gũhũ tiquiro puhtoro bui cjũno ijierare. ²⁵Sa yero ohõ saha tũhõturo cahmene buheriquirore: “Yũhũre

buhერიყოირო yero sahata ijigutja”, ni tuhoturo cahmene. Cahacjuno gũhure sata ni tuhoturo cahmene. “Yũhũ puhtoro yero sahata ijigutja”, ni tuhoturo cahmene. “Tiquiro bui ijigutja. Sa yegu yũhũ puhtoro tiquiro ñano yuhdũriro sahata ñano yuhdusi yũhũ pehe”, ni tuhotueraro cahmene. Yũhũ pehe wũhũ cjũno yero saha ijiaja. Mũsa pehe ti wũhũpũ dahrayequina yero saha ijire. Sa yeye masa yũhure “Beelzebũ ijire”, ni yahusañe, masa gũhure yeequinare ñano ni yahuducuenta tiquina, ni yahuri Jesu.

“¿Noa pehere cuegũ quehnoajari?” ni yahuahye Jesu

(Lc 12.2-7)

²⁶ Sa ni tuhasa ohõ saha ni nemori:

—Sa yena musare ñano yeyequinare cueracãhña. Masa tiquina yahuerarire came apequina masieta. Sa yeye tiquina nuori gũhure apequina masieta. ²⁷ Musare tuhoerogã yũhũ yahurire peyequina masa watoa buhe turiaya masa. ²⁸ Masunore wejẽnequina tiquiro pagũ dihitarerare wejẽne. Tiquiro jeripohna yariarere. Sa yena musare wejẽ duayequinare cueracãhña. Cohãcjũ pehere cueya. Tiquiro masa pagũrere, masa jeripohnari gũhure pecapũ cohã masine. Sa yena tiquiro pehere cueya.

²⁹ Pũaro siripia wapa mariedare. Tiquina sa wapa mariedapegũta ihcãquirogãre Cohãcjũ ne boerare. Cohãcjũ dutieragũ ne yariarere tiquirogã. ³⁰ Sa yero masa poarire ne ihcã poa da dũhsaro marieno masi pehere Cohãcjũ. Sata masa ijiiye tiye gũhure masi pehere Cohãcjũ. Sa masino musare ihña ihboducure. ³¹ Siripiare tiquiro cahĩno yuhdũoro, masa pehere cahĩne Cohãcjũ. Sa yena pajiro tuhotueracãhña masa.

Jesure musa wacũ tutuarire yahuya masare

(Lc 12.8-9)

³² Ihcãquiro “Jesu yaquiro ijiaja”, masare tiquiro ni yahugũ yũhũ gũhũ tiquirore “Yaquiro ijire”, ni yahugutja yũhũ Pacure uhmuse cjũnore. ³³ Sa ijiepegũta ihcãquiro “Jesu yaquiro ijieraja”, masare tiquiro nigũ yũhũ gũhũ “Yaquiro ijierare tiquiro”, ni yahugutja yũhũ Pacure, ni yahuri Jesu.

Jesu masare tu wagũ yere

(Lc 12.51-53; 14.26-27)

³⁴ Sa ni tuhasa ohõ saha ni yahu nemori:

—¿Dũhse ni tuhotuajari masa yũhure? ¿“Tiquiro masare tiquiro buheri bato apequina tiquinare ihña tuhtisi”, ni, tuhotuajari masa? Sa ijierare. Masare yũhũ buheri bato ihquẽquina yeere tuhoeta. Apequina pehe tiquinare ihña tuhtietia. Ihcãno saha ijisi masa. ³⁵ Bucũna yũhũ buheyere tiquina tuhori buhiri tiquina pohne tiquinare ihña tuhtietia. Bucũna numia gũhũ yũhũ buheyere tiquina tuhori buhiri tiquina pohna numia tiquinare ihña tuhtietia. Tiquina mareosãnumia yũhũ buheyere tiquina tuhori buhiri tiquina macũ namosãnumia tiquinare ihña tuhtietia. ³⁶ Sa yeye masa tiquina acayere ihña tuhtieyequina ijietia.

³⁷ Yũhure tiquina cahĩboriro yuhdũoro tiquina pacusũmũa pehere cahĩ yuhdũdũcaye, yeequina ijisi tiquina. Yũhure tiquina cahĩboriro yuhdũoro tiquina pohne pehere cahĩ yuhdũdũcaye, yeequina ijisi tiquina. ³⁸ Sa yeye apequina curusapũ yariariro saha yeequina tiquina ijiri buhiri ñano yuhdũeta tiquina gũhũ. Sata ñano yuhdũ dueyequina yeequina ijisi tiquina. ³⁹ Masa yũhure wacũno

marieno tiquina esa tuharo yeye pecapũ wahaeta tiquina. Sa yeye yeere sa yeducuye ijipihtiye decori yũhũ mehna ijjeta tiquina, ni yahuri Jesu.

Mari wapatatire yahuahye Jesu

(Mr 9.41)

⁴⁰Sa ni tuhasa ohõ saha ni yahu nemori:

—Musare yeequinare ihcãquiro quehnoano cahmeno, yũhũ gũhũre cahmeno nine tiquiro. Sa yero tiquiro yũhũre quehnoano cahmediquiro yũhũre ohoriquiro gũhũre cahmeno nine. ⁴¹Sa yero Cohãcjũ yere yahuriquiro wapatarota. Tiquirore quehnoano yerota Cohãcjũ. Sa yero tiquiro yere yahuriquiro tiquiro ijigũ ihñano apequiro pehe yahuriquirore quehnoano cahmeno, yahuriquiro yero sahata wapatarota tiquiro gũhũ. Sa ye apequiro quehnoano yeriquiro wapatarota. Sa yero quehnoano yeriquiro tiquiro ijigũ ihñano apequiro pehe tiquirore quehnoano cahmeno, quehnoano yeriquiro yero saha wapatarota tiquiro gũhũ. ⁴²Yaquirogã ihcãquiro tiquiro ijigũ ihñañe duhse ijiyequina tiquiogãre acore mehenogã tiquina sihõpegũta, potota tiquinare quehnoano yerota Cohãcjũ, ni yahuri Jesu.

Ñu wame yeriquiro tiquiro buheyequinare Jesure sinitu dutiro ohoahye

(Lc 7.18-35)

11 Ûsãre tiquiro buhenare tiquiro sa ni yahuri bato to cahapũ ijiye macaripũ buhero wahari tiquiro.

²Sa ye tiquiro yerire Ñu peresupũ ijiriquiro tuhoahye. Sa tuhooro Ñu tiquiro buheyequinare Jesure sinitu dutiro ohoahye. ³Sa ye Jesu cahapũ esa, sinituri tiquina Ñu buheyequina.

—¿Ñu “Yũhũ bato apequiro ahtarota”, tiquiro nidigũ ijijari mũhũ? ¿Tiquiro nidigũ mũhũ ijieragũ apequirore coht-enatari usã? ni sinituri tiquina pehe Jesure.

⁴Tiquina sa nigũ tuhoro Jesu yũhtiri:

—Yojopure musa tuhorire, musa ihñarire Ñure yahuna wahaya: ⁵“Caperi bajueyequina ihñare. Tini masieñequina tinine. Cami bũcũna quehnoa wahare. Cahmono tuhoeyequina tuhoa wahare. Yariariquina masaa wahare. Tiquina ijipihtiyequinare quehnoa wahagũ yei yũhũ. Sa yegũ pejecuoyequinare quehnoañe buheyere yahuaja. ⁶Yũhũre tuhoriquiro “Poto ijire”, niniquiro tiquiro bucuieriquiro ijire’, nidi”, ni, Ñure yahuna wahaya, nidi Jesu.

⁷Ñu buheyequina tiquina wahari bato, Jesu pehe Ñu ijiye tiyere yahu dũcari peyequina masare:

—Masa marienopũ taare wihnono wẽdoqueo mũjagũ ihñana eserari musa. ⁸“Quehnoañe suhti tiriquirore ihñana wahauhna”, niedari musa masa marienopũ wahana. Quehnoañe suhti tiyequina wapa bujuyere cuoyequina puhtoa ye wuhusepũ ijire. ⁹Masa marienopũ esana Cohãcjũ yere yahu muhtariquirore ihñana esari musa. Ijirota ijire. Ñu Cohãcjũ yere yahu muhtariquiro ijire. Apequina Cohãcjũ yere yahu muhtañequina yũhdũoro ijiriquiro ijire tiquiro pehe. ¹⁰Panopũ Cohãcjũ yere tiquina ojoari pũpũ Ñure ohõ saha ni yahuahye:

Mari Pacũ tiquiro macũnore ohõ saha ni ahye: “Mũhũ pano mũhũre yahuyu-atiquirore ohogũ niaja”, niahye, ni ojoahye panopure Ñure.

¹¹Musare ijirota niaja. Apequina ijipihitiyequina bui ijire Ñu wame yeriquiro. Ahri decoripure tiquiro sa ijiepegũta uhmuse cjũno puhtoro ijiropure ijipihtiyequina docapũ ijiriquiro pũrita Ñu bui ijire.

¹²Ñu wame yeriquiro tiquiro buhe, wame ye ducagū peyequina masa uh-muse cjēno puhtoro ijiropu tiquina tutu-aye mehna, tiquina esa tuharo sajā du-amedi. ¹³Cohācjū yere yahu muhtañe-quina tiquina ojarire, Cohācjū Moiseretiquiro cūripu gāhure buhena Cohācjū tiquiro puhtoro ijiatore masiaja mari. Ñu gūhu tireta yahuri. ¹⁴“Elia ahtarota”, panopu tiquina nidiquirota ijire Ñu pehe. Panopu cjēna tiquina nidire “Poto ijire”, ni duana Ñu tiquina sa nidiquiro tiquiro ijigū masinata musa. ¹⁵Quehnoano tuhoya musa ahrire.

¹⁶¿Yojopu cjēna masa yabequina yero saha ijiajari tiquina, musa tuhotugū? Tiquina macanagā yero saha ijire. Apequina tiquina cahmeno saha tiquina yeragū bucuere tiquinagā. Doreri cjē duaropu ape dujiye, ohō saha ni pisupere tiquinagā basi: ¹⁷“Musa basatire usā putipemi. ¿Duhšana musa basaerari usā tire putigū? Usā tutuaro ñehe quea utipe, sañuducupemi. ¿Musa pehe duhšana usā mehna utiperari?” niducuriquina yero sahata ijire yojopu cjēna gūhu. Yojopu cjēna tiquina cahmeno saha usā yeragū ihñañe bucuere tiquina gūhu. ¹⁸Tiquina yero saha yena ohō saha yere musa yojopu cjāna. Ñu wame yeriquiro Cohācjūre ño peoro taro sijiro, vinore sihniedari. Tiquiro sa sihniedagū ihñana “Watīnore cuoriquiro ijire”, nimedi musa tiquiro pehere. ¹⁹Yuhu masu Cohācjū ohorigu ijigu yuhu ihya, sihniaja. Yuhu sa yegū ihñana ohō saha nine musa yuhu pehere: “Ihñaña. Ahriquiropajiro ihyariquiropu, queheriquiro ijire. Wapa ne cohteyequina, ñano yeyequina gūhu tiquina piti tiriquiro ijire tiquiro”, nine musa yuhure. Sa nina macanagā yero saha yahuducuna nine musa. Musa cahmeno

saha usā yeragū bucuere musa. Sa masiedapenata usā ye ihñorire ihñana, Cohācjū yere usā masigū masinata musa, nidi Jesu tiquinare.

Tiquina ñañene bujua witieyequina ye macari cjēnare tuhtiahye Jesu

(Lc 10.13-15)

²⁰Apeye macari cjēnare tuhtiri Jesu. Ti macarine apeye macari yuhduoro Cohācjū tutuaye mehna ye ihñomedi tiquiro. Tiquiro sa ye ihñopegūta tiquina ñañe yerire duhuerari tiquina. Sa yero ohō saha ni tuhtiri Jesu tiquinare.

²¹—Corazín cjāna, musa ñano yuhduonata. Betsaida cjāna, musa gūhu ñano yuhduonata. Musa ye macaripure Cohācjū tutuaye mehna ye ihñomi. Tiro wame tiri macare, Sidō wame tiri maca gūhure tiquiro tutuaye mehna yuhu ye ihñogū ihñañe panopu to cjēna pehe tiquina ñañene bujua witiyoaga. Sa yeye quehnoañene comesaboaga. Masa dija suhtire saña, peca cjē nujuare tiquina bui dahra site peoboaga tiquina ñañene bujua witiyere ihñone. ²²Musare niita niaja. Buhiri dahreati deco ijigū Cohācjū Tiro cjēna, Sidō cjēna yuhduoro musa pehere musa ñari buhirire ña yuhduaro buhiri dahrerota. ²³Capernaum cjāna, musa esa tuharo uhmūseru waha duamedi. Musare Cohācjū pecaru cohānota. Musa ya macaru Cohācjū tutuaye mehna ye ihñomi. Musa yuhure tuhoerari. Sodoma wame tiri macare Cohācjū tutuaye mehna yuhu ye ihñogū ti maca pehe yojopure ijioaga. ²⁴Musare niita niaja. Buhiri dahrerari deco ijigū Cohācjū Sodoma cjēna yuhduoro, musa pehere musa ñari buhiri ña yuhduaro buhiri dahrerota, nidi Jesu ti macari cjēnare.

—**Yuhū cahapū sona taya, niahye Jesu**

(Lc 10.21-22)

²⁵ Ti pjere ohō saha nidi Jesu tiqiro Pacuro mehna yahuducuro:

—Yuhū Pacu, muhū uhmuse cjēna puhto, ahri yehpa cjēna puhto ijire. Ahri muhū buheyere “Quehnoano masina ijiaja usā”, niñequinare masigū yere muhū. Buhe pehoeyequina pehere muhū yere masigū yere muhū. Muhū sa yegū, “Quehnoare”, niaja yuhū muhūre. ²⁶ Sata ijire. Tiquina pehere masigū cahmedi muhū, nidi Jesu tiqiro Pacurore.

²⁷ Sa yero masare ohō saha ni yahu nemori:

—Yuhū Pacu ijipihiyere yuhūre ohori. Tiquiro dihita yuhūre quehnoano masine. Sa yena usā dihita yuhū masi dutiyequina mehna yuhū Pacure masiaja usā. ²⁸ Musa ñañe apee boro nucūñe yero saha ijire. Nucūñene wuana musa tahrīno saha ñañene wahyia wahare musa. Sa wahyarina ijina yuhūre cahmeña musa. Musare sogū yeitja. Musa ñañe yeyere duhugū yeitja. ²⁹ Yuhū dutiyere yeya. Yeere quehnoano masiña. Yuhū paja ihñagu ijiaja. Sa yegu yuhūduducegu ijiaja. Yuhū sa ijigū yeere quehnoano masiña musa. Sa yena soye mehna quehnoano jeripohna tinata musa. ³⁰ Yeere musa yegū mijoedare. Sa yero musa wuaye ti nucuedaro sahata yuhū pehe musare mehenogā ye dutiaja, nidi Jesu.

Judio masa tiquina sori decore trigore peheahye Jesu buheyequina

(Mr 2.23-28; Lc 6.1-5)

12 Mehenogā tiqiro sa ni buheri bato saurú ijigū usā Jesu mehna tiqiro wesepu esau. Usā tiqiro buhena

ujua ahbana, trigore pehe, ihya tuhasa, yuhdu cāa wahau usā. ² Usā sa yegū ihñañe, fariseo masa Jesure ohō saha nidi:

—Tuhorīña usāre. ¿Duhse ye muhū buheyequina saurú mari sori deco ijiepegūta dahrajari? Marine dutiyere yuhūduducaye nine, nidi tiquina.

³⁻⁴ Jesu yuhtiri. “Yuhū buheyequina yuhūduducaye niedare”, ni yahuro taro ohō saha ni yuhtiri:

—Davi tiqiro mehna cjēna mehna ujua ahbaro Cohācjū wuhupu sajā, Cohācjū ye pāre ihyahye. Ti pāre pahia dihita ihyae tiahye. Cohācjū dutiyere tiquina ojoari pū apequinare ti pāre ihya dutierare. ¿Davi gūhū tire tiquina yerire Cohācjū ojoari pūpū buherari musa? (Ti pāre ihyaro Cohācjūre yuhūduducaro niedahye. Miare ahri pjerire ihyaye yuhū buheyequina gūhū Cohācjūre yuhūduducaye niedare.)

⁵ Sa ye Cohācjū wuhupu dahrayequina pahia ne soerare mari soye decorire. Sa soerapeta Cohācjū dutiyere yuhūduducayequina ijierare. ¿Tire buherari musa Cohācjū Moiserere tiqiro cūri pūpū?

⁶ Musare niita niaja. Cohācjū wuhūre ño peona ti wuhupu dahrayequina tiquina soeragū ihñaeppenata “Quehnoanota”, nine musa. Ti wuhū yuhūoro yuhū pehere ño peoro cahmene. ⁷ Cohācjū yere tiquina ojoari pū ohō saha nine: “Wahiquinare wejē, ujua muoñe mehna yuhūre musa ño peogū cahmedaja. Apequinare musa paja ihñagū pehere cahmeaja yuhū”, nine tiqiro yere tiquina ojoari pū. Tiquiro sa nidire musa quehnoano tuhona, yuhū buheyequinare tiquina buhiri mariedapegūta tiquinare tuhtieraboaga musa. ⁸ Yuhū masu Cohācjū ohorigu ahri deco saurú decore masa tiquina yeatire yahugu ijigu puhto ijiaja, nidi Jesu fariseo masare.

Omoca buhariquiro quti ijire

(Mr 3.1-6; Lc 6.6-11)

⁹Tiquiro sa nidi bato waha, judio masa mari buheri wuhupũ esau usã Jesu mehna. ¹⁰Topũ omoca buhariquiro ijiri. Sa yeye fariseo masa pehe Jesure yahusãne tehe, tiquirore sinituri:

—Saurũ decore mari sori decore masunore yuhduo dutierare Cohãcjũ. ¿Sata ijiajari, muhũ tuhogũ? ni sinituri tiquina.

¹¹Jesu yuhtiri tiquinare:

—¿Musa yaquiro oveja saurũ ijigũ copepũ tiquiro bora sajãgũ tiquirore ne wioeraboagari musa? Ne wionata musa.

¹²Oveja yuhduoro ijire masuno pehe Cohãcjũ tiquiro ihãagũ. Sa yero saurũ ijigũ quehnoañene mari yegũ quehnoarĩne, ni yuhtiri Jesu tiquinare.

¹³Tiquiro sa nidi bato omoca buhariquirore ohõ saha nidi:

—Muhũ omocare siõ potoya, nidi tiquiro.

Tiquiro sa nigũ omoca buhariquiro pehe siõ poto, omoca quehnoa wahari ape omoca quehnoari omoca yero saha.

¹⁴Sori decore tiquiro sa yegũ ihãañe, fariseo masa waha, tiquina basi ohõ saha niahye:

—¿Duhse Jesure wejẽnatarĩ mari? ni-ahye tiquina basi.

Cohãcjũ yere yahu muhtariquiro panopũ cjũno Jesure yahuahye

¹⁵Jesu tiquina sa nidire masino, waha wahari. Tiquiro sa wahagũ peyequina masa tiquirore nunũ tãri. Sa yero tiquiro pehe ijipihtiequina tiquina mehna cjẽnare dohatiyequinare yuhdugũ yeri. ¹⁶Sa yero dohatiyequinare tiquinare tiquiro yuhduorire apequinare yahu site dutierari tiquiro. ¹⁷Sa dohatiyequinare yuhdugũ yero, Cohãcjũ yere yahu muhtariquiro Isaia

panopũ tiquiro ni ojoariro sahata yero nidi Jesu. Ohõ saha ni ojoahye Isaia:

¹⁸Ohõ saha nine Cohãcjũ: “Ahriquiro yuhũ cahacjũno ijire. Tiquiro yuhũ beseriquiro ijire. Tiquirore cahãaja. Sa yegũ tiquiro mehna bucueaja. Yaquiro Espiriture tiquirore ohogutja. Sa yero yuhũ tutuaye mehna ijipihtiequina masare yuhũ buhehere yahurota tiquiro. ¹⁹Sa yahuro tiquiro ne purĩno mehna yahusi. Sa yero sañuducusi. Sa yero maca cjã mahapũ peyequina masa watoa tiquiro tutuaro sañuducu yahusi. ²⁰Wuhjũgũ nuhrino cuadũ tiquiro nuhriedagũ yero saha masa gũhũre quehnoano yerota tiquiro. Mehenogã ujũri pecare tiquiro yatigũ yeraro saha masa gũhũre quehnoano yerota tiquiro. Sata yeducurota tiquiro watĩnore tiquiro yuhduducato pano. ²¹Sa yeye peyequina masa tiquirore wacũ tutueta”, nine Cohãcjũ, ni ojoahye Isaia.

—Jesu watĩno tutuayere cuore, ni yahusãhye masa

(Mr 3.20-30; Lc 11.14-23; 12.10)

²²Ihcã deco watĩno cuoriquire masa ne cãhtari Jesu cahapũ. Tiquiro pehe watĩnore cuoro yahuducu masiedari. Sa yero caperi ne bajuerari. Tiquina sa ne wihigũ ihãano, yuhdugũ yeri Jesu tiquirore. Tiquiro sa yegũ watĩno cuoriquire ihãa, yahuducuri. ²³Tiquiro sa wahagũ ihãañe, masa ihãa maria wahari.

—¿Ahriquiro Davi panamino iji turi-ariquiro masare yuhduoatiquire ijiajari? nidi tiquina basi.

²⁴Jesu watĩare tiquiro cohãrĩre tuhoye fariseo masa ohõ saha ni tuhoguri:

—Beelzebú watĩa puhtoro tiquiro tutuaye mehna watĩare cohãre Jesu, ni tuhoguri tiquina.

²⁵Tiquina sa ni tūhotugū masino, Jesu queoye mehna yahuri tiquinare, “Watīno ye tutuaye mehna watīare cohāgu niedaja”, nino taro:

—Ihcā yehpa cjēna tiquina basi cahmequeñe, ti yehpa cjēna waha pihtia wahaboaga. Ihcā maca cjēna tiquina basi cahmequeñe ti maca cjēna waha pihtia wahaboaga. Ihcā wūhu cjēna gūhu sata wahaboaga. ²⁶Sa yeye Beelzebú watīa puhtoro pehe watīare cohāno, tiquina watīa tiquina basi cahmequeñe niboaga. Sa ye tiquina gūhu waha pihtia wahaboaga. ²⁷Ohō saha ni yahusāre mūsa yūhure: “Tiquiro Beelzebú yedohoye mehna watīare cohāre”, ni yahusāre mūsa. Mūsa mehna cjēna gūhu watīare cohāre. ¿Watīno tiquiro tutuaye mehna watīare cohājari tiquina gūhu, mūsa ihñagū? Sa cohāedare. Tire masine mūsa. Yūhu gūhu watīno tutuaye mehna watīare cohāedaja. ²⁸Sa yegu yūhu pehe watīare cohāgu Cohācjū yaquiro Espiritu tutuaye mehna tiquinare cohāja. Yūhu sa cohāgū ihñana ohō saha masiña mūsa: Cohācjū masa bui puhtoro ahri yehpāre iji tuhasare yojoḡpāre.

²⁹Ohō sahata ijire queoye mehna mari buhegū: Tutuariquiro ya wūhupū apequiro saḡā sa yaque masiedare. Tutuariquirore duhteraro tiquiro ya wūhupū saḡā sa yaque masiedare. Tutuariquirore tiquiro duhteri bato saḡā sa yaque masine, ni yahuri Jesu.

(Sa ni yahuri, watīnore tiquiro yūhduducarire yahuro. Watīno tutuariquiro tiquiro ijiepegūta Jesu tiquirore yūhduducare watīare cohāno.)

Sa ni tuhasa ohō saha ni yahu nemori Jesu.

³⁰—Ihcāquiro yūhure cahmedaro, yūhure ihña tuhtiriquiro ijire. Ihcāquiro yūhure yedohoeraro, yūhure wape tigū yero nine.

³¹Sa yegu mū sare poto niita niaja yūhu. Ijipihtiyē ñañene masa tiquina

yegū, yahuducugū gūhure Cohācjū bo masine. Sa boeperota Espiritu Santore tiquina ñano ni yahuducugū ti pūritare ne bosī. ³²Yūhure masu Cohācjū ohorigure yūhure tiquina ñano ni yahuducurire bo masine Cohācjū. Espiritu Santo pehere tiquina ñano ni yahuducurire ne bosī Cohācjū. Yojoḡpāre, deco pihtigū gūhure tiquina sa nidire bosī tiquiro, ni buheri Jesu tiquinare.

Masa tiquina yahuducuyere tūhona tiquina ijiye tiyere masiaja mari

(Lc 6.43-45)

³³Sa yero queoye mehna buhero ohō saha ni yahu nemori tiquinare:

—Quehnoadu yucugū quehnoañene dūca tire. Ñadu yucugū ñañene dūca tire. Yucugū dūcare masina “Tu dūcata ijire”, ni masiaja mari. Mari sa masino saha masa tiquina yahuducuyere tūhona tiquina ijiye tiyere masiaja mari. ³⁴Añaa yero saha ñana ijire mūsa. Mūsa ñana ijina, quehnoañene ni masiedare mūsa. Mari wacūñepū mari tūhoturiro sahata mari duseropū wijiare. ³⁵Quehnoariquiro quehnoañene tūhoture. Sa yero quehnoañene yahuducure. Ñariquiro ñañene tūhoture. Sa yero ñañene yahuducure. ³⁶Quehnoano tūhotu yahuducuna ijiya mūsa. Quehnoano yahuducuerana, buhiri dahreati deco ijigū mūsa sa ni maca cārire Cohācjūre yahu yūhdunata. ³⁷Queoro mūsa yahuducurire masino “Quehnoana ijire”, ninota Cohācjū. Sa yero ñano mūsa yahuducurire masino “Ñana ijire”, ninota tiquiro, nidi Jesu tiquinare.

Masa ñañequina Jesure Cohācjū tutuaye mehna ye ihño dutiahye

(Mr 8.12; Lc 11.29-32)

³⁸Tiquiro sa nidi bato mari judio masare buheyequina, fariseo masa gūhu tiquirore ohō saha nidi:

—Buhegu, Cohācjū ohorigu ijigu Cohācjū tutuaye mehna ye ihñōña usāre, nimesi tiquina.

³⁹ Jesu yuhtiri:

—Yojoṗu cjēna ñañequina, Cohācjūre cahmeeñequina Cohācjū tutuaye mehna yuḥu ye ihñogū ihña duamene. Tiquina sa ihña duepegūta Cohācjū yere yahu muhtariquirore Jona panopu cjūnore Cohācjū tiquiro tutuaye mehna tiquiro yeri dihitare ye ihñonota masare. ⁴⁰ Jona ihtia deco waro pajiriquiro wahi paa puhiapu ijiahye. Tiquiro sa wahariro sahata yuḥu gūhu masu Cohācjū ohorigu ihtia deco waro masa copepu ijiguta. ⁴¹ Nínive cjēna pehe Jona Cohācjū yere tiquiro yahurire tuhoye tiquina ñañe yerire bujua witiyahye. Sa bujua witiyequina ijiye buhiri dahreati deco ijigū tiquina yojoṗu cjēnare tiquina ñañene bujua witiyequinare “Ñañequina ijire”, ni, yahusāeta. Jona tiquinare Cohācjū yere tiquiro yahugū tuhoye quehnoañene cahmeahye tiquina pehe. Sa cahmeñe quehnoano yeye niahye yojoṗu cjēna yuḥduoro. Sa yeye tiquina yojoṗu cjēnare yahusāeta. Musare niita niaja. Yojoṗu musare yuḥu buheye Jona tiquiro buheri yuḥduoro ijire. ⁴² Sa ye buhiri dahreati deco ijigū puhtoro sur cjōno panopu cjōno ducu, yojoṗu cjēnare “Ñañequina ijire”, ni yahusānota ticoro gūhu. Ticoro Salomo panopu cjūno tiquiro masiñene tuho duaro yoaropu ahri yehpa ape siepu ijiricoro Salomore tuhoro ahtahye. Sa yero quehnoano yero niahye yojoṗu cjēna yuḥduoro. Sa yero ticoro yahusānota yojoṗu cjēnare. Musare niita niaja. Yojoṗu musare yuḥu buheri Salomo tiquiro buheri yuḥduoro ijire, nidi Jesu tiquinare.

Watīno pari turi masunore tiquiro sajāri quitire yahuahye Jesu

(Lc 11.24-26)

⁴³ Sa yero pari turi Jesu tiquiro tuhotuye mehna ohō saha ni quitu yahuri tiquinare:

—Watīno masuno mehna ijiriquiro waha, aco marieni yehpapu tini, tiquiro ijiatore macamahye. ⁴⁴ Sa bocaeraro, ohō saha ni tuhotuahye tiquiro. “Masuno yuḥu cohāriquiro mehnata pari turi ijigu wahaŭtja”, ni tuhotuahye tiquiro. Sa ni tuhoturo tojoaa waha, tiquiro cohāriquiroreta bocahye. Sa tiquiro bocagū masuno pehe quehnoariquiro ijimahye. ⁴⁵ Sa yero watīno apequina siete watiare tiquiro yuḥduoro ñañequinare pijiro wahahye. Tiquiro sa pijigū tiquina ijipihtiyequina tiquiro mehna ijiahye. Masuno pehe to pano ihcāquiro watīnore cuoro, ñariquiro ijimahye. Camepu pehere peyequina watiare cuoriquiro ijiro, to pano tiquiro ijiriro yuḥduoro ña yuḥduariquiro ijiahye. Yojoṗu cjēna Cohācjūre cuomediquina tiquirore cohāñe, tiquina gūhu ña yuḥduayequina waro wahaeta, nidi Jesu tiquinare.

Jesu acaye tiquirore yahu duahye

(Mr 3.31-35; Lc 8.19-21)

⁴⁶ Masare tiquiro sa ni yahuducuri watoa tiquiro pacoro tiquiro bahana mehna sopechapu ducu, tiquirore yahu duari. ⁴⁷ Sa yero ihcāquiro Jesure yahuri:

—Mūhu paco mūhu bahana mehna mūhure yahu duaye sopechapu ducuri, nidi.

⁴⁸ Tiquiro sa nigū tuhoro topu ijiyequinare ohō saha nidi Jesu tiquinare buhero taro:

—¿Noa ijiajari yuḥu paco, yuḥu bahana gūhu, musa ihñagū? nidi.

⁴⁹Sa nino, usāre tiquiro buhenare ñupuha, ohō saha nidi:

—Ahriquina ijire yuhū paco, yuhū bahana yero saha ijiyequina. ⁵⁰Tiquina yuhū Pacu ūhmuse cjūno tiquiro cahmeñene yere. Sa yeyequina yuhū bahū, yuhū baho, yuhū paco yero saha ijire, nidi Jesu tiquinare.

Jesu oteriquiro quitire yahuahye

(Mr 4.1-9; Lc 8.4-8)

13 Ti decota Jesu wuhupū ijiriqiro wijiari. Wijia, ditarapū waha, ditara dūhtū cahapū dujiri. ²Tiquiro sa dujigū ihñañe peyequina masa tiquiro cahapū cahmecoa wahpaa waha, bihsaro yeri Jesure. Sa bihsagū ihñano yucūsapū sajā, tiapū dujiri tiquiro. Masa pehe paduropū ducuri. ³Sa yero tiquiro peye queoye mehna yahuri tiquinare, buhero taro. Ohō saha nidi tiquiro:

—Oteriquiro otero wahahye. ⁴Tiquiro sa otero wahagū apeye pjeri maha dūhtū cahapū bora quehe sahye. Topū bora quehe saye pjerire minicjua ahta, ihya cāhye. ⁵Sa ye apeye pjeri utā paca watoa bora quehe sahye. Utā paca watoa dihta marieda cjūnopū duita pihnimahye. ⁶Sa pihnieperota asū tutuaro asigū, nahcori marieda, ñaia wahahye. ⁷Apeye pjeri taa watoa bora quehe sahye. Taa pehe dia yuhdūa waha, oteye pehere wejēahye. ⁸Apeye pjeri quehnoari yehpapū bora quehe sahye. Quehnoano pihni, dūca tiahye. Apeye cju cien pjeri, apeye cju sesenta pjeri, apeye cju treinta pjeri dūca tiahye. ⁹Ahrirre quehnoano tuhoya mūsa, nidi Jesu.

Jesu queoye mehna tiquiro buherire yahuahye

(Mr 4.10-12; Lc 8.9-10)

¹⁰Tiquiro sa nidi bato usā tiquiro buhena tiquiro cahapū esa, sinituu usā tiquirore:

—¿Duhse yegu masare queoye mehna buheajari mūhū? ni, sinituu usā.

¹¹Jesu yūhtiri:

—Ūhmuse cjūno tiquiro puhtoro ijiyere panopū cjēna tiquina masiedarire musare yuhū buhenare masigū yere Cohācjū. Apequina pehere sa yerare tiquiro. ¹²Sa yero masiñequinare masi nemogū yerota tiquiro. Sa yeye tiquina pehe quehnoano masieta. Masiñequina pehe mehenogā tiquina masiepegūta tiquina pehere masiedagū yerota tiquiro. ¹³Sa yegu queoye mehna buheaja. Ohō saha ijire. Yojobū cjēna ihñāepeta, ihñedariquina yero saha tojoare. Sa yeye tuhōepeta masiedare. Tire tuhōeyequina yero saha ijire tiquina. ¹⁴Sa ijiyequina ijiye Isaia panopū cjūno tiquiro ni ojoariro sahata yere tiquina. Ohō saha ni ojoahye:

Ohō saha nine Cohācjū: “Cohācjū yere tuhonata mūsa. Sa tuhōopenata, ne masisi mūsa. ¹⁵Ahriquina masa dapu paca butiyequina tojoare. Sa ye tiquina cahmo coperire bihare, ‘tuhōari’, niñe. Tiquina caperire ihmithāre, ‘ihñari’, niñe. Sa yeraye quehnoano ihñañe, masiboaga tiquina. Sa ye tuhoye, masiboaga tiquina. Tiquina wacūnepū quehnoano masiboaga. Sa masiñe yuhūre Cohācjūre cahmeboaga tiquina. Sa yuhūre cahmegū tiquina ñañene cohā, tiquinare pecapū wahaboriquinare yuhdugū yeboaga yuhū”, nine Cohācjū, ni ojoahye Isaia.

¹⁶Mūsa pehe mūsa caperi mehna ihñana, masine. Mūsa cahmo mehna tuhona, masine. Sa yena bucuena ijire mūsa. ¹⁷Musare niita niaja. Yojobū mūsa ihñañene mūsa tuhoyere panopū cjēna Cohācjū yequina tutuaro ihña duamahye. Cohācjū yere yahu mūhtariquina gūhū tire tutuaro ihña duamahye. Sa ihña duepeta ne

ihñedahye. Yojoḡḡ mṡsa tuhoḡe gũhũre tutuaro tuho duamahye tiquina. Sa masi duepeta tire masiedahye, ni yahuri Jesu ṡsãre tiquiro buhenare.

**Jesu oteriquiro queoyere
yahu pehoahye**

(Mr 4.13-20; Lc 8.11-15)

18 Came Jesu ṡsãre yahu nemori:

—Tuhoḡa mṡsa. Oteriquiro queoyere mṡsare yahutja. Yũhũre tuhona, quehnoano masiña. 19 Oteye pjeri quehnoañe buheye yero saha ijire. Sa yeye maha duhtũ cahapũ borari pjeri quehnoañe buheye yero saha ijire. Sa yeye masa quehnoañe buheyere tuhoepeta ne masiedare. Sa yero masa quehnoañe buheyere tiquina tuhogũ ihñano watĩno pehe ahta, ti buheyere quehnoañe buheyere masi dutierare masare. Minicjũa ti pjerire tiquina dote nediro saha yere watĩno. 20 Sa ye utã paca watoa borari pjeri quehnoañe buheye yero saha ijire. Sa yeye masa quehnoañe buheyere tuho, bucueye mehna duita tire tuho nene. 21 Sa tuho nepeta utã paca watoa ijiye cju nuhcori marieñe cju yero saha ahriquina masa gũhũ tutuerare. Sa tutueraye ñano yuhduye, yeequina tiquina ijiri buhiri apequina tiquinare ñano yegũ ihñañe yee pehere duhu cãhre. Apequina tiquinare ñano yegũ tire ihcãno sahaeraye, yeere duhu cãhre. 22 Sa ye taa watoa borari pjeri quehnoañe buheye yero saha ijire. Sa yeye masa quehnoañe buheyere tuhoepeta, ahri yehpa cjeñe pajiro bujũa witi tuhotuye, niñeru pehere cahĩne. Tiquina sa yegũ ti pehe quehnoañe buheyere cahmotare. Sa cahmotagũ masa quehnoañe pehere yerare. 23 Sa ye quehnoari yehpapũ borari pjeri quehnoañe buheye yero saha ijire. Sa ye masa quehnoañe buheyere tuhoḡe, tire quehnoano

masine. Sa masiñequina ijiye, Cohãcũ cahmeno sahata quehnoañene yere tiquina. Ihquẽquina pajiro quehnoañene yere cien pjeri duca tiro saha. Apequina doca cjũnogã quehnoañene yere sesenta pjeri duca tiro saha. Apequina mehenogã quehnoañene yere treinta pjeri duca tiro saha, ni yahuri Jesu ṡsãre.

**Trigo watoa taa diari
queoyere yahuahye**

24 Sa ye pari turi queoye mehna buheri Jesu:

—Uhmuse cjũno tiquiro puhtoro ijiye ohõ saha ijire. Wese upũro tiquiro wesepũ quehnoañe pjerire tiquiro oteriro saha ijire uhmuse cjũno tiquiro puhtoro ijiye. 25 Wese upũro ijipihtiyequina tiquiro mehna cjeña gũhũ tiquina carĩno watoa tiquirore ihña tuhtiriquiro ahtahye. Sa ahtaro trigore ti oteriroḡũ taare oteahye. Ote tuhasa wahaa wahahye. 26 Came trigo pihniahye. Sa ye ti duca tiro taro yegũ waro diaa wahahye. 27 Sa ye wese upũrore dahra cohteyequina tiquiro cahapũ esa, yahuahye: “¿Puhto, quehnoañe pjeri dihitarẽ muhũ wesere muhũ otepegũta, duhse ye taa gũhũ diajari ti wesere?” nidi tiquina. 28 “Yũhũre ihña tuhtiriquiro ijiaga ti taare oteriquiro”, niahye wese upũro. “¿Taare ṡsã curegũ cahmeajari muhũ?” nimahye tiquirore dahra cohteyequina. 29 “Taare cureracãhña, ‘Trigo pehere cureari’, nina. 30 Trigo taa mehnata bucuarĩahdo. Duca nedi pje ijigũ neñequinare ohõ saha niitja: ‘Taare cure muhtaña. Tuhasa mṡsa curerire ujuãña. Came trigore peheya. Pehe peho, tire yuhũ ihbõri wuhũpũ cũña’, niitja tiquinare”, niahye wese upũro, nidi Jesu, queoye mehna yahuro.

Mostaza pje queoyere yahuahye Jesu*(Mr 4.30-32; Lc 13.18-19)*

³¹ Sa ye apeye queoye mehna usäre ohö saha ni buheri tja:

—Uhmuse cjüno tiquiro puhtoro ijiye mostaza pjegä yero saha ijire. Ti pjegä meheni pjegä waro ijire. ³² Ti pjegäre wesepu tiquiro oteri bato, quehnoano pihnine. Sa yero paji yuhduadu wahare. Sa wahagü minicjua pari ti duperipu suhti suhare, ni yahuri Jesu. (Sa nino ohö saha nino niahye. Mostaza pjegä pajidu tu bucuariro saha uhmuse cjünore mari puhtoro masinequina meheñequinagã tiquina iji muhtaepegüta camepu peyequina wahaeta.)

Päre pugü yeye queoyere yahuahye Jesu*(Lc 13.20-21)*

³³ Sa ye apeye queoye mehna usäre ohö saha ni buheri tja:

—Uhmuse cjüno tiquiro puhtoro ijiye päre pugü yeye yero saha ijire. Tire numino ihcã ajuro trigore aco mehna quehnoano tire dahra morene pä bucuatire. Ticoro sa yegü päre pugü yeye pehe trigore quehnoano sehsaa wahare, nidi Jesu. (Sa nino ohö saha nino niahye. Päre pugü yeye trigore ti sehsaa wahariro saha uhmuse cjünore mari puhtoro peyequina masa ijihiptiro cjëna masieta.)

Queoye mehna Jesu tiquiro buherire yahuahye*(Mr 4.33-34)*

³⁴ Ahri ijihiptiyere buhero, queoye mehna yahuri Jesu. Queoye marieno yahuerari tiquiro tiquinare. ³⁵ Sata yeri tiquiro Cohäcjü yere yahu muhtariquiro ni ojoariro sahata. Ohö saha ni ojoahye panopu:

Queoye mehna yahutja. Cohäcjü ahri yehpare tiquiro bajumehnedi bato

ne masare tiquiro yahuerarire yahutja, ni ojoahye Cohäcjü yere yahu muhtariquiro munano.

Trigo watoa taa diari queoyere yahu pehoahye

³⁶ Sa ye masare cohe ti, wuhpu sajãa wahari Jesu. Sa yena usã tiquiro buhena tiquiro cahapu esa, sinituu usã:

—Trigo watoa taa diari queoyere yahu pehoya usäre, nii usã tiquirore.

³⁷ Jesu yuhtiri usäre:

—Wese upuro quehnoane pjerire oteriquiro yero saha ijiaja yuhu. Yuhu masu Cohäcjü ohorigu ijiaja. ³⁸ Wese pehe ahri yehpa yero saha ijire. Quehnoane pjeri pihniñe uhmuse cjüno puhtoro ijiropu ijiatiquina yero saha ijire. Taa pehe watino yequina yero saha ijire. ³⁹ Wese upurore ihña tuhtiriquiro taare oteriquiro watino yero saha ijire. Tire nedi pje pihtiri deco yero saha ijire. Sa ye trigore neñequina angele yero saha ijire. ⁴⁰ Taare tiquina cure ujariro saha pihtiri deco ijiügü watino yequinare pecapu cohäeta tiquinare. ⁴¹ Yuhu masu Cohäcjü ohorigu yequina angelere ohogutja. Yuhu ohogü angele pehe ñañene ye dutiyequinare, ñañene yeyequinare yuhu puhtoro ijiropu neañeta. ⁴² Ne sa tuhasa pecapu cohäeta tiquinare. Topu tiquina tutuaro uti, bujua witiye mehna bahque dihoeta. ⁴³ Sa ye Cohäcjü yequina tiquina Pacuro tiquiro puhtoro ijiropu ijietä. Topu ijiye, asü deco cjüno yero saha quehnoano buhrioeta tiquina. Ahrire quehnoano tuhoya musa, ni yahuri Jesu.

Quehnoa yuhduyere tiquiro nuorire tiquiro bocari queoyere yahuahye

⁴⁴ Sa ye apeye queoye mehna yahuri tja:

—Uhmuse cjüno tiquiro puhtoro ijiye niñeru tiquiro nuori yero saha ijire.

Masuno tire wesepu wacueno mehna boca, pari turi tire nno nemoahye. Sa bocaro tutuaro bucueahye tiqiro. Sa yero tiqiro bocarire neno taro, ti wesere du duahye. Sa yero tiqiro yere dua peho, ti wesere duahye, ni yahuri Jesu. (Sa nino ohohaha saha nino niahye. Umuse ceno tiqiro puhtoro ijiye tiqiro bocari yero saha ijire. Tiqiro bocarire tiqiro tutuaro cahmediro sahata umuse cenore masa puhtore tiquina masidi bato masa tutuaro cahmene tiqirore.)

Wapa bujuri pje queoyere yahuahye

⁴⁵ Sa ye apeye queoye mehna yahuri tja:

—Umuse ceno tiqiro puhtoro ijiye wapa bujuyere pjerire perla wame tiye pjerire duriquiro yero saha ijire. ⁴⁶ Ti pjerire macano quehnoa yuhduari pjere bocahye. Bocaro, ti pjere du duaro, ijiptiye tiqiro yere dua pehoru wahahye. Sa dua tuhasa ti pjere wapa bujuri pjere duahye, nidi Jesu. (Sa nino ohohaha saha nino niahye. Ti pjere perla pjere tiqiro cahmediro sahata umuse cenore masa puhtore quehnoano tiquina masidi bato masa tutuaro cahmene tiqirore.)

Wenanu queoyere yahuahye

⁴⁷ Sa ye apeye queoye mehna Jesu yahuri tja:

—Umuse ceno tiqiro puhtoro ijiye wenanu tiquina doque nodu yero saha ijire. Tu wenanu mehna peyequina wahi sijoro saha ijiyequinare nehene. ⁴⁸ Tu wahpaa wahagu wahi wejenuquina pehe ture paduropu weje nuja, quehnoaquina wahire besere. Quehnoaquinare tiquina puhsepupu bese sajare. Nanequina wahire cohare. ⁴⁹ Pihtiri deco ijiu ohohaha saha ijiruta. Angele pehe masare beseeta. Nanequinare ne wioeta quehnoaquina cahapu ijiyequinare. ⁵⁰ Ne wio, tiquinare pecapu coheta. Topu tiquina uti, tutuaro buja witiye

mehna upiri bahque dihoeta nanequina pehe, ni yahuri Jesu.

Muna buheyere, wahma buheye guhure yahuahye

⁵¹ Tiqiro sa ni yahuri bato sinituri usare:

—Ahri ijiptiye tahoajari masa? ni sinituri tiqiro.

—Tahoaja usa, ni yuhtii usa.

⁵² Usa sa nigu tiqiro yahuri usare:

—Judio masare buheyaquina umuse ceno tiqiro puhtoro ijiye buheye, puaro buheyere yahure. Muna buheyere, wahma buheye guhure yahure. Tiquina wahu upuro yero saha ijire. Tiqiro wahu ijiye quehnoanene ne wioro, wahmare, muna guhure ne wioro tiqiro, nidi Jesu usare.

Jesu Nazarepu wahahye

(Mr 6.1-6; Lc 4.16-30)

⁵³ Ti queoyere tiqiro buheri bato, wahau usa tiqiro mehna. ⁵⁴ Waha, tiqiro masari macapu esau. Topu esa, judio masa mari buheye wuhsepupu buheri tiqiro. Tiqiro sa buhegu tahoje, taho maria wahari tiquina.

—Ahrikiro nohopu tahoari ahri buheyere? Dhsero quehnoano masi pehoajari tiqiro? Cohacu tutuaye mehna ye ihore tiqiro basi. ⁵⁵ Ahrikiro taboa dahrarikiro macano ijire. Sa ye tiqiro pacoro Maria ijire. Sa ye Santiago, Jose, Simo, Juda, tiqiro bahana ijire. ⁵⁶ Yojopure tiqiro bahana numia ahri macapu ijire. Sa yero tiqiro mari yero saha ijirikiro ijire. Ahri ijiiperota nohopu tahoari tiqiro ahri buheyere? ni yahuducuri tiquina basi.

⁵⁷ Sa ye tiquina tiqirore cahmedari. Tiquina sa cahmedagu ihano ohohaha nidi Jesu tiquinare:

—Cohacu yere yahu mhtarikirore apequina no peore. Tiquina sa no

peopegūta tiquiro ya maca cjēna, tiquiro acaye tiquirore ño peerare. Sa yena yūhure ño peerare mūsa ohōpu yūhu masarigu ijigū, nidi tiquiro tiquinare.

⁵⁸ Sa yero tiquirore tiquina wacū tutueragū ihñano, ti macapū Cohācjū tutuaye mehna peye tahari ye ihñodari Jesu.

**Ñu wame yeriquiro mūnano
yariarire yahuahye**

(Mr 6.14-29; Lc 9.7-9)

14 Ti pjere Herode Galilea cjūno puhtoro Jesu yerire tuhooahye.

² Sa tuhoooro ohō saha nimahye:

—Ñu wame yeriquiro ijiaga masatjiāno. Sa yero yojopure tiquiro masari bato ahri tutuayere cūore tiquiro bajumehneñene yero, nimahye Herode tiquiro cahacjēnare. Jesure “Ñuta ijire”, ni tūhotumahye tiquiro Ñure tiquina wejēdi bato.

³⁻⁵ Sa yero Ñure tiquiro wejē dutiatio pano Herode tiquiro bahuro Felipe namonore namo tiahye. Tiquiro sa yegū ihñano Ñu wame yeriquiro Herode pehere ohō saha nie timahye:

—Mūhu bahū namonore namo tigu Cohācjū dutiyere yūhdūducagu nine mūhu, nie timahye Ñu.

Tiquiro sa nidi buhiri Herode tiquirore wejē duamahye. “Ñu Cohācjū yere yahu mūhtariquiro ijire’, ni tūhoturi judio masa”, nino, tiquina pehere cueahye Herode. “Ñure yūhu wejēgū tiquina usuaboaga”, nino tiquinare cueahye. Sa cuero Ñure wejē dueramahye. Sa wejē dueraperota Herode tiquirore ñehe dūhte duti, peresu yeahye. Tiquiro namono Herodia dutiro mehna sa yeahye Herode. ⁶ Sa ye Herode masa bajuari deco ijigū bose deco yeahye tiquiro. Topū Herodia macono bose deco wihiyequina tiquina ihñonopū basa ihñooahye.

Ticoro sa basa ihñogū ihñano Herode bucueahye. Sa bucuero ticorore niahye:

⁷—Cohācjū mehna poto niita niaja. Yūhure mūhu sinino punota ohogutja yūhu mūhure, niahye Herode pehe Herodia maconore.

⁸ Tiquiro sa nigū tuhoro Herodia ticoro maconore ticoro siniatiye yahuahye ticorore. Ticoro sa yahugū ticoro macono pehe ohō saha ni siniyahye Herodere.

—Ñu wame yeriquiro dapure dūte sure dutiya. Sa yegū waparo mehna tiquiro dapure ohoya yūhure, niahye ticoro.

⁹ Ticoro sa nigū tuhoro Herode tutuaro bujūa witiahye. Masa tiquina ihñonopū “Ohogutja mūhure”, niahye tiquiro. Sa yero tiquiro bue tiro “Mūhure ohoeraja”, ni masiedahye ticorore. Sa yero ticoro dutiriro sahata Herode pehe tiquiro cahacjēnare Ñure wejē dutiahye. ¹⁰ Sa yero Ñu dapure dūte sure dutiahye. ¹¹ Sa dūte sure tuhasa, waparo mehna tiquiro dapure ne cāhtahye tiquina. Herodia maconore tiquiro dapure tiquina ohogū, ticoro pehe ticoro pacorore yūhdūoahye tja.

¹² Tiquina sa yeri bato Ñu buheyequina ahta, tiquiro pagure masa copepū nea cūahye. Sa cū tuhasa, tiquina tire Jesure yahuye wihiri.

**Cinco mil masare
ihyaye ohoahye Jesu**

(Mr 6.30-44; Lc 9.10-17; Jn 6.1-14)

¹³ Tiquina sa ni yahugū tuhoro, Jesu ūsā mehna yucusapū sajā, masa marienopū siho wahari. Jesu topū wahagū tuhoye, masa tiquina ye macaripū ijiriquina ahta, mahapū tiquirore nūnū tā cāa wahari. ¹⁴ Sa yero ūsā wahā sari bato tiquiro peyequina masare ihñano, paja ihñari tiquinare. Sa paja ihñano tiquina mehna cjēna dohatiyequinare yūhdugū yeri.

¹⁵ Ñamicahapũ usã tiquiuro buhena tiquiore ohõ saha nii:

—Ñamicahapũ waharo nine. Ohõ masa marienopũ ijire. Sa yegũ macaripũ masare tiquina ihyatire dú dutiya tiquina pohe tiatire, nimi usã tiquiore.

¹⁶ Jesu yuhtiri usãre:

—Wahaeracãhdo tiquina. Mũsa basita ihyayere ohoya tiquinare, nidi usãre.

¹⁷ —Ihcã omope paca pã paca, wahi pũaro to punota ijire usãre, ni yuhtii usã.

¹⁸ —Tire yũhũre ne cãhtaya mũsa, nidi usãre.

¹⁹ Tiquiro sa nigũ tuhona neau usã. Usã ne sari bato taa bui masare tiquiuro duji dutiri. Tiquina dujigũ ihcã omope paca pã pacare, pũaro wahire ne, uhmũsepũ ihña mũo, Cohãcjũre “Quehnoare”, nidi. Sa ninota pã pacare nuhano, usãre tiquiuro buhenare ohori. Tiquiro sa ohogũ usã pehe tire masare itii. ²⁰ Sa ye ijipihtiyequina quehnoano ihya, yapi yũhdũa wahari. Tiquina yapi wehorire doce pũhũse waro ne cahme-coa, wahpo dapou usã tiquiuro buhena. ²¹ Topũ tire ihyariquina umũa dihitare queogũ cinco mil umũa ijiri. Numia, macanagã gũhu ijiri.

Jesu aco bui tiniahye

(Mr 6.45-52; Jn 6.16-21)

²² Came usãre tiquiuro buhenare Jesu ditara ape sie pahrẽpũ pehãyu dutiri masare tiquiuro cohe tiri watoa. ²³ Cohe ti tuhasa, cunũpũ mũja, Cohãcjũre sinino wahahye. Ñamine topũ tiquiuro ihcãquirola ijiahye. ²⁴ Ti pjeta ditara decopũ yucusa mehna pehãducuna nimi usã. Wihnono tutuaro ahta, pahcõri bujũye wahcã, yucũsare quẽ sajãri. ²⁵ Sa wahagũ bohrea mũja tato pano Jesu aco bui tini cãhtari usã cahapũ. ²⁶ Usã cahapũ tiquiuro ahtagũ ihñana cue nii usã. Sa cuena saũuducumi usã.

—Yariariquiuro mũnano pagũ ijire, ni saũuducumi usã.

²⁷ Usã sa cuegũ ihñano Jesu ohõ saha nidi:

—Ne yũhũre ihña cueracãhña. Yũhũta ijiaja, nidi usãre.

²⁸ Tiquiro sa nigũ tuhoro Pedro nidi tiquiore:

—Puhto, potota mũhũta ijigũ, aco bui yũhũre mũhu cahapũ ducu cã dutiya, nidi tiquiuro.

²⁹ —Ahtaya, ni yuhtiri tiquiuro pehe.

Tiquiro sa nigũ Pedro yucũsare dijia, aco bui Jesu cahapũ ducu cãmedi.

³⁰ Wihnono tutuaro ahtagũ ihñano cueri tiquiuro. Sa cuero diha dijiaa wahamedi.

—Yũhũre yedohoya puhto, ni saũuducuri tiquiuro Jesure.

³¹ Tiquiro sa nigũta tiquiuro omocare ñehe,

—Mehenogã wacũ tutuare mũhũ yũhũre. ¿Dũhsegu yũhũre wacũ tutuerajari mũhũ? nidi tiquiuro Pedroro.

³² Tiquiro sa nidi bato yucũsapũ sajãri tiquina. Tiquina sa sajãri bato wihnono yũhdũa wahari. ³³ Sa yena usã tiquiuro buhena yucũsapũ ijina Jesure ño peou.

—Potota mũhu Cohãcjũ macuta ijire, nii usã tiquiore.

Genesare cjẽna dohatiyequinare yũhdũoahye Jesu

(Mr 6.53-56)

³⁴ Sa yeri bato pehã, Genesare wame tiri yehpapũ esau. ³⁵ To cjẽna Jesure ihña masidi. Sa masiñe tiquiuro cahapũ ijieyequinare dohatiyequinare ne cãhta dutiri. Sa ye tiquina dohatiyequinare tiquiuro cahapũ ne cãhtari.

³⁶ —Mũhũ suhtiro dũhtũ caha dihitare usãre ñehe tuhu dutiya, ni sinidi tiquina Jesure.

Sa ye tiquiuro suhtirore ñehe tuhuriquinape topequinata quehnoa wahari.

Masa ñañequina wahagũ yeyere yahuahye Jesu

(Mr 7.1-23)

15 Sa ye Jerusalē cjēna, fariseo masa, marine judio masare buheyequina mehna Jesu cahapũ wihkiye, sinituri tiqiurore:

²—¿Duhse ijero boro mari acaye bucuna munapũ tiquina dutirire yerajari muhũ buheyequina pehe? Tiquina ihyato pano tiquina dutiriro sahata omo coserare, nidi tiquina Jesure.

³Jesu yuhtiri tiquinare:

—¿Duhse yena mari acaye panopũ cjēna ye dutiye dihitare yena tana Cohācjũ ye dutiye pehere yerajari masa pehe? ⁴Ohõ saha nine Cohācjũ: “Musa pacusũmuare ño peoya”, nine. Sa yero “Ihcāquiro tiqiuro pacusũmuare ñañene quti dahreriquiro ijero ti buhiri apequina tiquina wejēatiquiro ijirota”, nine Cohācjũ. ⁵Tiqiuro sa niepegũta ohõ saha ye dutire masa pehe tiquina pacusũmuare yedoho dutierana: Tiquina pacusũmuare ohoborire Cohācjũ pehere oho dutire masa. Sa ni buhemene masa.

⁶Sa buhena tiquina pacusũmuare ño peogũ yerare masa. Musa sa yena Cohācjũ dutiyere yuhduducana nine masa, mari acaye panopũ cjēna ye dutiye dihitare yena. ⁷Masa tiquina ihõono dihita quehnoano iji mehona ijire masa. Cohācjũ yere yahu muhtariquiro Isaia musare potota yahu ojoahye panopure:

⁸Ahriquina masa yuhure quehnoano yahuducuepeta yuhure ne ño peorerare. ⁹Sa ye yuhure tiquina ñu buheye ne duhseati ijierare. “Cohācjũ ye dutiye ijire ahri”, ni meho buhere tiquina ye buheye pehere, ni ojoahye Isaia, nidi Jesu fariseo masare, mari judio masare buheyequina gũhure.

¹⁰Sa ni tuhasa tiqiuro cahapũ masare pijio, ohõ saha nidi:

¹¹—Tuhoya masa. Yuhũ niñene quehnoano masiña masa. Musa duserire sajãne pehe masa ihyaye pehe musare ñana ijigũ yerare. Musa ñañe yahuducuye pehe masa duseri wijiaye pehe musare ñana ijigũ yere, nidi Jesu.

¹²Tiqiuro sa ni buheri bato usã tiqiuro buhena pehe tiqiurore yahuu.

—Muhũ sa nigũ tuhoye fariseo masa usuari, ni yahuu usã tiqiurore.

¹³Tire tuho, ohõ saha ni yuhtiri usãre:

—Tiquina fariseo masa taa yero saha ijire. Yuhũ Pacu uhmuse cjũno ijipihtiye oteyere tiqiuro oterarire nuhcori mehnata cure, cohãnota. Sata yerota tiquinare. ¹⁴Tiquinare sa ihña cãhña masa. Tiquina caperi bajueyequina tiquina ihña masiedaro saha ne Cohācjũ yere masiedare. Sa ye pecapũ wahaeta. Sa masiedapeta apequina masieñequinare buhe duamedi. Sa ye caperi bajueyequina copepũ tiquina boraboriro saha tiquina buhenohriquina gũhũ pecapũ wahaeta, nidi Jesu.

¹⁵Tiqiuro sa nigũ tuhorõ Pedro nidi:

—Ahri quitire masa tiquina duseri wijiaye quitire yahu nemoña usãre tja, nidi tiqiuro Jesure.

¹⁶Jesu yuhtiri:

—¿Ne, yojopũ tuhoerajari masa?

¹⁷Masa ihyayere ihyagũ tiquina duseripũ sajãre. Sa ye tiquina paapũ sajã, yuhdua wahare. Ihyo waro ijire. Mari ihyaye marine ñana wahagũ yerare. ¿Ahrire masiedajari masa?

¹⁸Masa duseripũ wijiaye, tiquina yahuducuye pehe tiquina tuhotuyepũ ahtare. Tiquina yahuducuye pehe ñañe ijero, masare ñañequina ijigũ yere.

¹⁹Ñañe tuhotuye, masare wejẽne, apequiro namono mehna ñano yeye, ñano yeye numia mehna ñano yeye, yaqueye, ni mehoñe, masare ñañe quti dahreye masa tuhotuyepũ ahtare. ²⁰Ti ñañe pehe masare ñañequina ijigũ yere. Sa yepegũta bucuna yee tiro sahata

masa omo coserapeta tiquina ihyagū ti masare ñañequina ijigū yerare, nidi Jesu.

**Judio masono ijiericoro
Jesure wacū tutuahye**

(Mr 7.24-30)

²¹ Sa ni buhe tuhasa, usāre siho wahari tja. Tiro wame tiri maca cahapū Sidō wame tiri maca cahapū esau usā. ²² Usā topū esagū Canaa yehpa cĵono topū ijiricoro Jesu cahapū esa, sañuducuri:

—Puhto, Davi panami iji turiagu masare yuhduoacju, yuhure paja ihñaña mūhu. Yuhū maco wafinore curo, ña yuhduaro yuhduri ticoro, ni sañuducuri ticoro.

²³ Ticoro sa niepegūta Jesu yuhtierari. Sa yegū ihñana usā tiquiro buhena pehe tiquirore ohō saha nimi.

—Waha dutiya ticorore. Ñano cariboro bisiaga, nimi usā.

²⁴ Usā sa nigū tuhoro yuhtiri ticorore:

—Israe masare Cohācjüre masieñequina dihitare yedoho dutiro ohori yuhū Pacu yuhure, nidi tiquiro.

²⁵ Tiquiro sa niepegūta Jesu dahpocāri cahapū dusepe curi mehna quehe sari ticoro.

—Puhto, yedohoya yuhure, nidi ticoro.

²⁶ Jesu yuhtiri ticorore.

—Ohō saha ijire ahri: Coā warore wuhū upuro pohne ye ihyayere diayearo oho muhtagū quehnoadare. Israe masa yere ape yehpa cĵenare yuhū oho muhtagū quehnoadare, nidi Jesu ticorore queoye mehna yahuro.

²⁷ —Sata ijire puhto. Sa ijiepegūta diayea gūhu wuhū upuro mesa docapū tiquina ihya site boroyere ihya cohtere tiquina gūhu. Ape yehpa cĵo yuhū ijiepegūta yuhū gūhure yedoho masine mūhu, ni yuhtiri ticoro.

²⁸ Ticoro sa nigū tiquiro yuhtiri:

—Numio, mūhu yuhure tutuaro wacū tutuare. Mūhu cahmeno sahata sa waharota, nidi Jesu ticorore.

Tiquiro sa nigūta duita quehnoa wahari ticoro macono.

**Peyequina dohatiyequinare
yuhdugū yeahye Jesu**

²⁹ Sa ni tuhasa usāre siho waha, Galilea wame tiri ditara duhta cahapū siho esari tja. Esa, mehenugā cūhure mūja, tu buipū dujiri. ³⁰ Topū tiquiro ijigū peyequina masa tini masieñequinare, caperi bajueyequinare, pari yuri wahayequinare, yahuducu masieñequinare, peyequina apequina dohatiyequinare tiquiro cahapū ne wihiri masa. Ne wihi tuhasa Jesu dahpocāri cahapū duhu cūri tiquina. Tiquina sa duhu cūri bato quehnoa wahagū yeri Jesu tiquinare. ³¹ Tiquiro sa yegū ihñañe masa ihña maria wahari. Yahuducu masieñequina tiquina yahuducugū ihñañe, pari yuri wahayequina tiquina quehnoa wahagū ihñañe, tini masieñequina tiquina tinigū ihñañe, caperi bajueyequina tiquina ihñagū ihñañe, ihña maria wahari tiquina. Sa ye ohō saha nidi:

—Israe masa usā puhto, Cohācjū tutuagu, quehnoagu ijire, ni ño peori tiquina Cohācjüre.

**Cuatro mil masare
ihyayere ohoahye Jesu**

(Mr 8.1-10)

³² Tiquiro sa yeri bato Jesu usāre tiquiro buhenare ohō saha nidi:

—Ahriquina masa yuhū mehna ihtia deco waro iji tuhasare. Sa ye pohe mariedare tiquinare. Pohe mariedagū ihñagu tiquinare paja ihñaja. “Tiquina uĵaa ahbayequina, mahapū borari”, nigū tiquinare ihyaye marieno tiquina ye wuhusepū waha duti dueraja. Sa yegū tiquinare pohe oho duaja, nidi tiquiro.

³³Tiquiro sa nigũ usã tiquiro buhena tiquiore sinituu:

—¿Duhse mari ohõre masa marienopure pãre boca ohoboagari mari? nii usã tiquiõre.

³⁴—¿Nohope paca pã pacare cõoajari musa? nidi.

—Siete pã pacare, meheñequinagã wahire cõoaja, ni yuhtii usã.

³⁵Usã sa nigũ tiquiro masare yeh-papũ duji dutiri. ³⁶Tuhasa siete pã pacare, wahigã gãhure ne, Cohãcjũre “Quehnoare”, nidi. Sa ninota pã pacare nuha, usãre tiquiro buhenare ohori. Sa yena usã pehe ti ihyayere masare itii.

³⁷Sa ye masa tire ihya, yapi yuhdua wahari. Tiquina yapi wehorire siete puhuse waro ne cahmecoa, wahpo dapou usã.

³⁸Topũ ihyariquinare umua dihitare queogũ cuatro mil waro umua ijiri. Numia, macanagã gãhũ ijiri. ³⁹Tiquina sa ihya tuhasagũ Jesu masare waha duti, yucusapũ sajã, Magadãn wame tiri yeh-papũ usãre siho esari.

Fariseo masa, saduceo masa gãhũ Cohãcjũ tutuaye mehna ye ihñogũ ihña duamahye

(Mr 8.11-13; Lc 12.54-56)

16 Sa ye fariseo masa, saduceo masa mehna Jesu cahapũ wihiri. Tiquiro ñano yegũ ihña duamedĩ tiquiõre yahusã duaye. Sa ye tiquina tiquiõre Cohãcjũ tutuaye mehna ye ihño dutimedĩ tiquiro masiedagũ ihña duaye, “Cohãcjũ ohoriquiro ijierare”, ni duaye. ²Tiquina sa ye dutigũ Jesu yuhtiri tiquinare:

—Ñamicahapũ umuano sohãgũ ihñana “Quehnoari ñami ijirota”, nine musa. ³Sa yena bohrearo umuano sohãgũ, ñicuri deco ijigũ ihñana “Acoro ahtarota”, nine musa. Sa quehnoano masiepenata Cohãcjũ tutuaye mehna musare yuhũ ye ihñogũ ihñaepenata ne tire quehnoano masiedare musa.

⁴Yojopũ cjëna ña yuhduyequina Cohãcjũre ño peo dueyequina Cohãcjũ tutuaye mehna ye ihñogũ ihña duamene. Ye ihñosi yuhũ. Cohãcjũ yere yahu muhtariquiro Jona tiquiro duhse waharire masi tuhasare musa. Ti dihitare ihñoutja musare, ni yuhtiri Jesu.

Sa ni yahu tuhasa siho wahaa wahari tja.

Fariseo masa saduceo masa tiquina ñãñe buheyere yahuahye Jesu

(Mr 8.14-21)

⁵Ditarare usã pehãna, pãre bo cũ cã, pehã tari jii usã. ⁶Sa yero Jesu usãre yahuri:

—Quehnoano yeya. Fariseo masa, saduceo masa tiquina ye pã pugũ yeyere ihñana quehnoano yeya. Cuarĩne ti, ni yahuri.

⁷Tiquiro sa nigũ tuhona tuho masiedana, usã basi tire yahuducuu:

—Mari pãre mari ne cãhtaeragũ ihñano sa niaga ahriquiro, nimi usã basi.

⁸Usã sa nidire masino, usãre sinituri:

—¿Duhseña musa pã borire wacũajari musa? Mehenogã waro yuhure wacũ tutuare musa. ⁹¿Yojopũ masiedajari musa? ¿Cinco mil umuare ihcã omope pã pacare yuhũ nuha ohorire, numia gãhure yuhũ ohorire wacũedagari musa? ¿Nohope puhuse waro musa ne cahmecoa wahpo daporire wacũedagari musa? ¹⁰¿Sa yegu siete pã pacare nuha, cuatro mil umuare yuhũ ohorire, numia gãhure yuhũ ohorire wacũedagari musa? ¿Nohope puhuse waro musa ne cahmecoa wahpo daporire wacũedagari musa? ¹¹¿Sa yena pã pugũ yeyere yuhũ yahugũ duhse yena quehnoano tuhoerajari musa? Sa nigũ pã warore nigũ niedaja. Fariseo masa, saduceo masa tiquina pã pugũ yeyere ihñana

quehnoano yeya. Cuaríne ti, ni yahuri usäre tiqiro.

¹² Tiquiro sa ni yahugūpu usā masii. “Pā pugū yeye”, nino pā warore nino niedari. Sa nino fariseo masa, saduceo masa tiquina buheyere nino nidi. “Tiquina ye buheyere tuhoeracāhña”, nino nidi.

**Jesu poto Cristo tiqiro ijiyere
Cohācjū ohoriquiro tiqiro
ijiyere yahuahye Pedro**

(Mr 8.27-30; Lc 9.18-21)

¹³ Sa ye Jesu mehna wahana, Cesearea Filipo wame tiri maca cahapu ijiye macaripu esau usā. Sa yero macapu sajä sari bato Jesu usäre tiqiro buhenare sinituri:

—¿Noa boro ijiagari yuhū, masa yuhūre tiquina tuhotugū? ni sinituri tiqiro.

¹⁴ —“Ñu wame yeriquiro ijire”, nine mūhūre. Apequina “Elia ijire”, nine. Apequina “Jeremia ijiboaga o apequiro Cohācjū yere yahu muhtariquina mehna cjūno munano ijiboaga”, nine, ni yuhtii usā tiqiore.

¹⁵ —¿Musa pehe musa tuhotugū noa boro ijiagari yuhū? ni, sinituri tiqiro.

¹⁶ Simo Pedro yuhtiri:

—Mūhū Cristo Cohācjū ohorigū ijire. Cohācjū catiriquiro waro macū ijire mūhū, ni yuhtiri Simo Pedro.

¹⁷ —Simo Ñu macū mūhū bucuegu ijire. Ohō saha ni mūhū yuhūre yuhtiyē masa tiquina yahuri ijierare. Yuhū Pacū uhmuse cjūno pehe tire mūhūre masigū yeri. ¹⁸ Mūhūre niita niaja. Mūhū Pedro wame tigū ijire. (Pedro nino utā nino nine.) Ahri utā paa bui tutuari wuhūre yuhū yeboriro saha yeequina pehere wacū tutuayequina ijigū yeitja yuhū. Sa ye yeequina ne pecapu wahasi. ¹⁹ Uhmuse cjūno mari puhtoro ijiro cjā sawire mūhūre ohoutja. Sa yegu ahri yehpare mūhū ye dutieragū uhmusepu

gūhūre ye dutisi. Ahri yehpare mūhū ye dutigū uhmusepu gūhūre ye dutiye ijieta, nidi Jesu.

²⁰ Tiquiro sa nidi bato usäre tiqiro buhenare ohō saha nidi:

—Yuhūre “Cristo ijire tiqiro”, ni yahu sitenedacāhña apequinare, ni, dutiri usäre.

**Jesu tiqiro yaria masa
wijiatiye yahuahye**

(Mr 8.31–9.1; Lc 9.22-27)

²¹ Ti pjeta Jesu usäre tiqiro buhenare quehnoano yahu peho ducari:

—Jerusalēpu yuhūre waharo cahmene yojopure. Topū judio masa mari bucuna, mari pahia puhto, marine judio masare buheyequina gūhū yuhūre ñano yeeta. Yuhūre wejēeta. Sata ñano yuhūro cahmene yuhūre. Sa yegu ihtia deco wahaboro masa wijiagūta, ni yahuri usäre tiqiro.

²² Tiquiro sa nigū tuhoro Pedro pehe ape sie cjūnogā Jesure ne saduca, tiqiore ohō saha nidi:

—Puhto, mūhū nino saha sa wahaeracāhdo. Mūhūre tiquina wejēdacāhdo, nimesi tiqiro Jesure.

²³ Tiquiro sa nigū tuhoro Jesu majareduca, tiqiore ohō saha nidi:

—Satana yero saha yahuducugū nine mūhū. Sa niedacāhña. Mūhū tuhotuye masa ye ijire. Cohācjū ye ijierare. Sa yegu yuhū yeatire cahmota duare mūhū, nidi Jesu Pedroro.

²⁴ Tiquiro sa nidi bato usäre yahuri:

—Ihcāquiro yaquiro iji duaro, tiqiro cahmeno ye duamedire duhu cānota. Sa yero yaquiro tiqiro ijiri buhiri ñano yuhūdeperota yuhūre duhusi. Sa yero yeere yeducuriquiro ijirota. ²⁵ Masūno yuhūre wacūno marieno tiqiro esa tuharo tiqiro cahmeno sahata yero, pecapu waharota. Sa yero yeere masūno sa yeducuriquiro ijipihtiyē decori yuhū mehna uhmusepu ijirota tiqiro.

²⁶ ¿Ihcāquiro masuno ahri yehpa cĵene ijipihiyere cŵoriquiro Cohācĵure cahmedaro pecapŵ waharo, yabere wapatajari tiquiro? Sa ijiriquiro ne wapataerare. Pecapŵ tiquiro jeripohna wahagŵ ne duhse wapa ye wioro basioerare. ²⁷ Yŵhŵ masŵ Cohācĵŵ ohorigŵ yeequina angele mehna ahri yehpapŵ tojoa tagŵ yŵhŵ Pacŵ asi siteye mehna tojoa tagŵ ijipihiyequina masare tiquina ñaŵe yeri buhiri buhiri dahreitja. Tiquina quehnoaŵe pehere yegŵ quehnoano yeitja tiquinare. ²⁸ Ijirota musare yahutja. Ihquēquina musa ohōpŵre ijina musa yariato pano yuhŵre yŵhŵ pŵhto sajāgŵ ihñanata, ni yahuri Jesu.

Jesu tiquiro pagŵre comesahye

(Mr 9.2-13; Lc 9.28-36)

17 Sa ye seis decori bato Jesu Pedre, Santiagore tiquiro bahŵro Ñu gŵhŵre ŷhmŵanŵ cŵnŵpŵ tiquina dihitare piji mŵjari. ² ŷhmŵanopŵ tiquina esari bato tiquina ihñonopŵ tiquiro pagŵre comesahye. Tiquiro wuhdo aŵŵ deco cĵŵno yero saha asi siteahye. Sa yero tiquiro suhtiro buhrioro yero saha yehsero wahahye. ³ Sa ye Jesu Moise mŵnano, Elia mŵnano mehna tiquina yahuducugŵ ihñahye tiquina ihtiaro buheyequina. ⁴ Sa yero Pedro Jesure nimahye:

—Pŵhto, mari ohōpŵ ijigŵ quehnoa duare. Mŵhŵ cahmegŵ ihtia wuhugŵ yeitja. Mŵhŵ ya wuhugŵ, Moise ya wuhugŵ, Elia ya wuhugŵ yeitja, nimahye tiquiro.

⁵ Tiquiro sa ni yahuducuri watoa ehmeo quehnoano asiye ehmeo tiquinare cahmotahye. Sa wahagŵ ehmeo watoapŵ yahuducuye bisiro ca tahye.

—Ahriquiro yŵhŵ macŵ yŵhŵ cahñiquiro ijire. Tiquiro mehna

bucueaja. Tiquirore tŵhoya, ni yahuducuro ca tahye.

⁶ Sa nigŵ tŵhoye tiquiro buheyequina tŵho maria waha, yehpapŵ doque quehe sahye. ⁷ Tiquina sa wahari bato Jesu tiquina cahapŵ esa, tiquinare buacarero, ohō saha niahye:

—Wahcādŵcaya musa. Yojoŵre musa ihñarire, musa tŵhori gŵhŵre cueracāhña, niahye tiquiro tiquinare.

⁸ Tiquiro sa nigŵ tiquina ihñahye, Jesu dihitare ihñahye. Tiquina ihñariquina pehe mariedahye.

⁹ Sa ye cŵnŵpŵ tiquina dijia tagŵ Jesu tiquinare tutuaro mehna niahye:

—Mianogŵata yŵhŵ sa waharire apequinare yahueracāhña. Yŵhŵ masŵ Cohācĵŵ ohorigŵ yŵhŵ yaria masa wijari batopŵ tire apequinare yahuya musa, niahye Jesu.

¹⁰ Tiquiro sa nidi bato Pedro gŵhŵ tiquirore sinituahye:

—“Cristo masare yŵhdŵoatiquiro tiquiro ahtato pano Eliare ahta mŵhtano cahmene”, nine marine judio masa buheyequina. ¿Duhse ijiro boro sa niajari tiquina? ni sinituahye tiquina tiquirore.

¹¹ Jesu yŵhtiahye:

—Potota ijire. Eliare ahta mŵhta dutiri Cohācĵŵ, ijipihiyere quehno mŵhtatiquirore. ¹² Ohō saha nigŵ musare nigŵ niaja. Elia wihi tuhasari. Tiquiro sa wihiepegŵta tiquina tiquirore ne ihñahye masiedari. Sa ye tiquina duhse ye duaro yeri jiri tiquirore. Sata yeeta yŵhŵ gŵhŵre. Yŵhŵ masŵ Cohācĵŵ ohorigŵ ijia. Tiquina sa yegŵ ñano yŵhdŵgutja yŵhŵ, niahye Jesu.

¹³ Tiquiro sa ni yahugŵ tiquina quehnoano tŵhoahye. “Elia”, nino, Ñu wame yeriquirore nino niahye. Tire masiahye tiquina.

**Jesu watĩnore
cuoriquirore yũhduoahye**

(Mr 9.14-29; Lc 9.37-43)

¹⁴ Sa ye peyequina masa cahapu tiquina dijia tagũ ihĩano ihcãquiro amũno Jesu cahapu esa, dusepe curi mehna quehe sari.

¹⁵ —Pũhto, yũhu macure paja ihĩaña. Tiquiro ñama yariayere dohatiriquiro ijire. Sa yero ña yũhduaro yũhdure. Peye tahari pecapu bora sa quehea mujare tiquiro. Ihquẽ tahari diapũ bora ñojoa mujare. ¹⁶ Sa yegu mũhu buheyequina cahapu tiquirore ne sami. Tiquina tiquirore yũhduo masiedari, nidi tiquiro Jesure.

¹⁷ Jesu yũhtiri:

—Yojopũ cjãna, ñana ijire mũa. Yũhure ne wacũ tutuerare. Yoa yũhduari pje musare buhemi yũhu. ¿Noho puno yoari pje yũhure mũa cariboajari? Tiquirore ne cãhtaya yũhure, nidi Jesu.

¹⁸ Sa yero watĩnore tiquiro tuhtigũta watĩno pehe masũno mehna ijiriquiro wahaa wahari. Sa wahari batogãta quehnoa wahari tiquiro.

¹⁹ Came usã tiquiro buhena usã sehsharo ijina Jesure sinituu:

—¿Dũhsena usã pehe ahriquiro pehere watĩnore cohã masiedari, mũhu tuhotugũ? ni sinituu usã.

²⁰ Jesu yũhtiri:

—Yũhure mehenogã wacũ tutuare mũa. Poto musare yahuguta niája. Mostaza capegã meheni pjegã ijire. Ti yero saha Cohãcjũre mehenogã mũa wacũ tutuana ohõ saha wahagũ ye masinata mũa. Ahdũ cũnure “Sohõpũ wahaya”, mũa nigũ, waharota. Cohãcjũre sata wacũ tutuana, ijipihitiyere ye masine mũa. [²¹ Sa ijiepegũta ahriquiro boro watĩnore mũa cohã duana Cohãcjũre tutuaro sinino cahmene musare. Sa ye duana sijiro cahmene musare Cohãcjũre sinina tana,] nidi Jesu usãre.

**Pari turi Jesu tiquiro yaria
masa wijiatiye yahuahye**

(Mr 9.30-32; Lc 9.43-45)

²² Sa ye Galilea yehpapũ usã tinigũ, Jesu usãre yahuri:

—Yũhu masũ Cohãcjũ ohorigũ ijiája. Masa yũhure ñehe, apequinapure yũhure ohoeta. ²³ Sa tiquina ohori bato yũhure wejẽeta. Sa tiquina wejẽgũ ihtia deco wahaboro masa wijiaguta, ni yahuri tiquiro usãre.

Tiquiro sa ni yahugũ tutuaro bujua witi usã.

**Cohãcjũ wũhu cjẽ wapare
sinituahye apequina**

²⁴ Sa yena Capernaupũ sajã sagũ, Cohãcjũ wũhu cjẽ ijiatiye wapa ne cohteyequina Pedro cahapu esa, tiquirore sinituahye.

—¿Musare buheriquiro Cohãcjũ wũhu cjẽ wapa ijiatiye wapa yeajari tiquiro? ni sinituahye tiquina.

²⁵ —Wapa yere tiquiro, ni yũhtiahye Pedro.

Tiquiro sa nidi bato wũhupũ tiquiro sajãgũ Jesu sinitu muhtahye Pedroro:

—¿Simo dũhse ni tuhotuajari mũhu? ¿Ahri yehpa cjẽna puhtoa yabequina pehere wapa neajari, mũhu tuhotugũ? ¿Tiquina mehna cjẽnare wapa neajari? ¿O ape yehpa cjẽna pehere wapa neajari, mũhu tuhotugũ? ni sinituahye tiquiro Pedroro.

²⁶ —Ape yehpa cjẽna pehere wapa nene, ni yũhtiahye Pedro.

Tiquiro sa nigũ Jesu yahuahye:

—Sa yero puhtoro tiquiro ya yehpa cjẽnare wapa nedari. ²⁷ Sa ijiepegũta wapa ne cohteyequinare usuagũ ye dueraja mari. Sa yena wapa yenata. Ditarapũ wahaya. Topũ esa, yohyeri dare doque ñoña. Sa yegu wahi mũhure ihyariquirore weje nũoña. Tiquiro duseropũ niñeru cjoere bocaguta mũhu.

Ti cjoere queoro wapa tiri cjoere ijirōta. Yuhure, mūhū gūhure Cohācjū wūhū cjēna tiquina wapa negū quehnoano queoro esa tuharota ti cjoere. Ti cjoere bocagū mari wapamonore wapa yegū wahaya, niahye Jesu Pedrore.

**Jesu buheyequina tiquina mehna
cjūnore puhto sō duamahye**

(Mr 9.33-37; Lc 9.46-48)

18 Ti pjere usā tiquiro buhena Jesu cahapū esa, sinituu tiquirore:

—ǃhmūse cjūno puhtoro ijirōpore usā mehna cjūno noa wahaboagari puhtoro? ni sinituu usā.

²Usā sa nigū Jesu nijinogāre pijio, tiquirogāre usā caha duhu docori. Duhu doco tuhasa, usāre nidi:

³—Poto musare yahugutja. Ahriquina macanagā Cohācjūre tiquina puhtoro waro tuhoture. Sa yena musa gūhū tiquina yero saha tuhotuna, quehnoañene comesana, ūhmūse cjūno puhtoro ijirōpore wahanata. Tiquina yero saha tuhotuerana puhtoro tiquiro ijirōpū wahasi musa. ⁴Sa yero ūhmūse cjūno puhtoro ijirōpore sa tuhotu cāriquiōro ahriquiōro nijinogā yero saha tuhoturiquiōrota apequina bui puhtoro wahare. ⁵Sa yena yeere yena tana ohō saha ijieyequinagāre cahmena, yūhū gūhure cahmene musa, ni yahuri Jesu.

Ñañene yegū cuarīne

(Mr 9.42-48; Lc 17.1-2)

⁶Sa yero tiquinare yahu nemori:

—Ahriquiōrogā yero saha ijiriquiōro yuhure wacū tutuariquiōrogāre yahutja musare. Apequiōro ahriquiōrogā yero saha ijiriquiōrore ñañene ye dutiro tiquiro ña yuhduaro yuhdurota. Tiquiro wamūare pajiria utāre duhte yo, pajiri mapū tiquirore cohāgū ñano wahaboaga tiquiro. Sa ijiepegūta ahriquiōrogā yero saha ijiriquiōrore ñañene ye dutiriquiōro tiquiro pehe pajiri mapū tiquina

cohāriquiōro yuhduoro ñano yuhdurota. ⁷Masare ñañene yegū yeye ijire. Tire yeye ahri yehpa cjēna ñano yuhdure. Ñañene yeducure masa. Tiquina sa yegū tiquinare ñañene yegū yeyequina pehe ña yuhduaro yuhdueta.

⁸Mūhū omoca mehna ñano yegū ti omocare mūhū dute cohāboro saha ti ñañene duhuya. Tire duhueragū pecapū wahagūta. Topūre ne peca yatierare. Mūhū omocare mūhū cohāgū ti si dihita butiboaga. Sa yegū mūhū pehe sa bajuri turu ijiepegūta came Cohācjū mehna ijiguta. Pua omoca mehna pecapū wahagū mūhū sa wahagū ña yuhduaboaga. Sa yegū ti ñañene duhuya. Mūhū dahpocā mehna ñano yegū ti dahpocā gūhure mūhū dute cohāboro saha ti ñañene duhuya. Tire duhueragū pecapū wahagūta. Topūre ne peca yatierare. Mūhū dahpocāre mūhū cohāgū ti si dihita butiboaga. Sa yegū sa bajuri turu ijiepegūta came Cohācjū mehna ijiguta. Pua dahpocā mehna pecapū wahagū mūhū sa wahagū ña yuhduaboaga. Sa yegū ti ñañene duhuya. ⁹Mūhū capea mehna ñano yegū tiare ore we mūhū cohāboro saha ti ñañene duhuya. Tire duhueragū pecapū wahagūta. Topūre ne peca yatierare. Tiare mūhū cohāgū tia dihita butiboaga. Ihcā pehe capea mariedapegūta came Cohācjū mehna ijiguta. Pua capea mehna pecapū wahagū mūhū sa wahagū ña yuhduaboaga. Sa yegū ti ñañene duhuya, ni yahuri Jesu.

**Oveja butiriquiōro
queoyere yahuahye Jesu**

(Lc 15.3-7)

¹⁰Sa ni tuhasa ohō saha ni yahu nemori:

—Ne, ahriquinagāre macanagāre ihña tuhtieracāhña. Musare niita niaja yūhū. Tiquinagā yeequina angele tiquinagāre cohteyequina ūhmūsepu ijieyequina pehe

yuhū Pacu cahapu sa ijiducure. [¹¹ Yuhū masu Cohācjū ohorigū ahri yehpau pecapu wahaboriquinare yuhduogu tūu nii yuhū,] ni yahuri Jesu.

¹² Sa ni tuhasa tiqiro tuhoye mehna ohō saha ni queoye mehna buheri usāre.

—Ovejare coheriquiro cien ovejare cuoriquiro ihcāquiro oveja butia wahagū ohō saha yerota tiquinare coheriquiro pehe. Apequina ovejare noventa y nueve ovejare tiquina ihyaropu duhu doco, butiriquirore macano waharota. ¹³ Ijirota nii niaja musare. Tiquirore bocaro bucueroa tiqiro. Apequina noventa y nueve duhsayequina mehna bucueroa tiqiro. Tiquinare tiqiro bucueroa yuhduoro butiriquiro pehere bocaro tutuaro bucueroa. ¹⁴ Sata mari Pacu uhmuse cjūno ahriquina ihyo ijiyequina gūhure pecapu tiquina wahagū cahmedare, ni yahuri Jesu.

**Muhū acayuro mūhure nāno yegū
ohō saha ye dutiahye Jesu**

(Lc 17.3)

¹⁵ Sa ni tuhasa ohō saha ni yahu nemori:

—Muhū acayuro mūhure nāno tiqiro yegū tiqiro mehna yahugū wahaya. Musa sehsharo tire yahuya. Muhū sa yegū tiqiro mūhure tuhoboaga. Tiquiro tuhogū “Mūhure ne pari turi ohō saha yesi yuhū”, tiqiro nigū muhū acayurore pari turi piti tigu niaga muhū. ¹⁶ Mūhure tiqiro tuho dueragū pūrita ihcāquiro mehna waha duagu o puaro mehna waha duagu tiquinare piti ti cā, pari turi tiqirore yahuna wahaya. Musa sa yena puana o ihtiana tiqirore musa yahusāgū, “Poto tjire”, ni masieta apequina. ¹⁷ Sa yena muhū mehna cjēna gūhure tiqiro tuho dueragū ijiptiyequina Jesu yequina cahmecoañequinare yahusāna wahaya. Sa yena Jesu yequina cahmecoañequinare tiqiro tuho duer-

agū ihnana Cohācjūre nō peo dueriquiro tiqiro ijiro saha yeya tiqirore. Wapa ne coheriquiro tiqiro ijiro saha yeya tiqirore.

¹⁸ Ijirota musare niita niaja. Ahri yehpau musa Jesu yequina nāne musa ye dutieragū uhmusepu gūhure ye dutisi. Ahri yehpau musa quehnoañene ye dutigū uhmusepu gūhure ye dutiye ijirota.

¹⁹ Pari turi musare yahutja ahri: Musa puana Cohācjūre sinigū, musa puana musa sinidire ihcāno saha musa tuhutugū yuhū Pacu uhmuse cjūno tire yerota. ²⁰ Puaro o ihtiaro yequina, yeere yeatiquina tiquina cahmecoagū yuhū tiquina mehna ijiaja, ni yahuri Jesu.

**Cahācjūno apequiro tiqiro
wapamonore tiqiro bo duerari
quitire yahuahye Jesu**

²¹ Came Pedro Jesu cahapu esa, sinituri:

—¿Puhto, yuhū acayuro muhū yaquiro peye tahari yuhure nāno tiqiro yegū ihnagu nohope tahari tire bogutari yuhū? ¿Siete tahari bogutari yuhū? ni sinituri Pedro.

²² Jesu yūhtiri:

—Siete taharita mūhure apequiro nāno yerire muhū bogū to wahaerare. Peye tahari mūhure nāno tiqiro yegū gūhure boya.

²³ Uhmuse cjūno masa puhtoro tiqiro ijiye ahri queoye yero saha ijire. Ijiptiyequina masa puhtoro tiqiro cahācjēnare tiqirore wapamonequinare wapa ye peho duti duamahye. ²⁴ Tiquina wapamorire tiqiro queo ducagū, tiqirore dahra cohteyequina pehe pajiro wapamoriqirore tiqiro cahapu ne cāntahye. Wapamoriqiro paji yuhduaro wapamoahye tiqiro puhtoro. ²⁵ Sa yero tiqiro wapa ye masiedagū tiqiro puhtoro tiqirore,

tiquiro namonore, tiquiro pohnene cahacjēna sō, tiquinare apequinare dua dutimahye. Sa ye ijipihtiyē tiquiro cūoye gūhure dua dutimahye, tiquiro wapamonore wapa ye peho dutiro. ²⁶Tiquiro sa dua dutigū pajiro wapamoriqiro pehe dusepe curi mehna quehe sa, tiquiro puhtore tutuaro siniahye: “Puhto, yūhure paja ihñagu cohteniña. Mūhure wapa ye pehoutja”, niahye tiquiro puhtore. ²⁷Tiquiro sa nigū tuhoro, tiquirore paja ihñano tiquiro wapamonore sata bo cāhye.

²⁸Tiquiro sa yeri bato wapamoriqiro pehe waha, apequiro cahacjūnore tiquirore mehenogā wapamoriqirore boca sahye. Sa boca saro wamua ñe-heahye tiquirore. “Yūhure mūhu wapamonore wapa ye pehoya”, niahye tiquiro mehna cjūnore tiquiro yero saha ijiriqirore cahacjūnore. ²⁹Tiquiro sa nigū apequiro cahacjūno pehe dusepe curi mehna quehe sa, tiquirore tutuaro sinimahye. “Yūhure paja ihñagu mehenogā cohteniña. Mūhure wapa ye pehoutja”, nimahye apequiro cahacjūno tiquirore. ³⁰Tiquiro sa ni siniepegūta yahtierahye. Sa yero tiquiro apequiro cahacjūnore peresu ye dutiahye. Tee tiquiro wapa ye pehogūpu wiro taro niahye tiquirore. ³¹Pajiro wapamoriqiro mehenogā wapamoriqirore tiquiro sa yegū ihña, usua, apequina cahacjēna pehe tiquina puhtore yahusāñe wahahye. ³²Tiquina sa ni yahusāgū tuhoro tiquina puhtoro tiquina yahusāriqirore pijio, ohō saha niahye: “Mūhu ña yūhduagu ijire. Mūhu yūhure tutuaro sinigū mūhu wapamonore bo pehomi yūhu. ³³Mūhure yūhu sa yepēgūta mūhu pehe mūhure wapamoriqirore boerañohiti. Mūhu wapamono pehere yūhu boriro sahata tiquiro mūhure wapamono gūhure mūhu bogū quehnoa yūhduaboaga. ¿Dūhsegu tiquirore paja ihñedari mūhu, sa yegu?” niahye puh-

toro tiquirore. ³⁴Sa nino tutuaro usua, peresu yeahye tiquiro cahacjūnore. Tee tiquiro wapa ye pehogūpu wiro taro niahye, ni yahuri Jesu.

³⁵Sa yero ohō saha ni ahri quitire yahu bato tiri:

—Sata yerota yūhu Pacu ūhmuse cjūno musare. Mūsa ijipiltina mūsa acaye musare tiquina ñano yerire quehnoano mūsa bo pehoeragū tiquiro musare buhiri dahrerota, nidi Jesu.

Tiquina namosānumiare cohāñene yahuahye Jesu

(Mr 10.1-12; Lc 16.18)

19 Tire tiquiro sa ni yahuri bato tiquiro Galileapu ijiriqiro Judea yehpapu usāre siho wahari. Jordā wame tiri ma ape sie pahrēpu esau usā. ²Topu usā wahagū peyequina masa usāre nunu tā cāri. Tiquina mehna cjēnare dohatiyequinare yūhdugū yeri tiquiro.

³Sa ye ihquēquina fariseo masa Jesure yahusā duaye, ñano tiquiro yahuducugū tuho duaye, tiquirore sinituri:

—¿Mari namosānumiare cohāgū quehnoaboagari? ¿Mari dutiye pehe sata ye dutiagari, mūhu tuhotugū? ni sinituri tiquina.

⁴Jesu yahtiri:

—¿Cohācjū yere tiquina ojoari pūpu ne ahrire buherari mūsa? Ohō saha ni ojoahye: “Coā waropure ahri yehpare bajumehnediqiro ūmuno, numino gūhure yeahye”, ni ojoahye. ⁵Sa yero ohō saha ni ojoa nemoahye: “Sa yero ūmuno tiquiro pacusūmure cohā wija, tiquiro namono mehna ijirota. Sa ye tiquina puaro ijiepetā ihcā pagu yero saha ijire. ⁶Sa ye tiquina puaro yero saha ijierare. Ihcā pagu yero saha ijiye nine. Cohācjū tiquiro omoca dūhte dutiyequina ijire. Sa ye tiquinare cahme duhueraro cahmene”, ni ojoahye, nidi Jesu tiquinare.

⁷Tiquiro sa nigū fariseo masa sinituri tja:

—Muhū ohō saha ni yahuepegūta ohō saha ni ojoahye Moise pehe: “Muhū namonore cohā duagu papera pūre tire ojoaya. Sa ojoagu ti pūre muhū namonore muhū ohori bato ticorore cohā masine muhū”, ni ojoahye Moise. ¿Muhū nino saha ijiepegūta Moise pehe duhsero ohō saha ni ojoayari? ni yuhtiri tiquina tiquirore.

⁸Jesu yuhti cahmedi tiquinare:

—Cohācjüre musa necusumua panopu cjēna tiquina tuho dueragū ihñano tiquina namosānumiare tiquina cohāgū, “Sata wahacūnahdo”, niahye Moise. Tiquiro sa niepegūta coā waropure ahri yehpare sa ijierari. ⁹Musare nita niaja. Masuno tiquiro namono ticoro ñano yerapegūta ticorore cohāno, apecorore namo tiro, tiquiro apecoro mehna ñano yero nine. [Sa yero ahriquiro cohāricorore namo tiriquiro gūhu ticoro mehna ñano yeriquiro ijire,] nidi Jesu.

¹⁰Tiquina sa nigū tuhona, usā tiquiro buhena pehe tiquirore ohō saha nii:

—Sata umano tiquiro namono mehna tiquina cahme cohāedagū mari pehere mari namo tieragū quehnoaboaga, nii usā.

¹¹Jesu yuhtiri:

—Ihquēquinareta namo ti dutierare Cohācjū. Tiquiro namo ti dutiriquina dihita namo tieta. ¹²Umua namo ti dutieraye ihquēgā ijire. Ihquēquina umua numiare cahmeeñequina masa bajuare. Apequina umua masa tiquina apēni tōho tiquina weriquina pehe namo ti masiedare. Apequina umua umhuse cjūno tiquina puhtoro yere yedoho duaye, namo tierare. Sa ye ahriquina namo ti dueyequina sata tuhotu cāhñequina, sata tiquina sohtori tigū quehnoare, nidi Jesu usāre.

Macanagā ye ijiatire Cohācjüre sini basahye Jesu

(Mr 10.13-16; Lc 18.15-17)

¹³Sa ye masa macanagāre Jesu cahapu ne wihiri. Sa ne wihiye, tiquina Jesure tiquiro omocare tiquinagā bui ña peo duti duamed. Sa ye tiquinagāre Cohācjüre sini basa duti duamed Jesure. Tiquina sa yegū ihñana usā tiquiro buhena tiquinare tuhtimi. ¹⁴Usā sa tuhtigū ihñano, usāre Jesu ohō saha nidi: —Macanagā yuhu cahapu ahtaahro. “Waharisa”, niedacāhña tiquinagāre. Tiquinagā Cohācjüre tiquina puhtoro tuhoture. Sa ye tiquiro umhuse cjūno puhtoro ijiporu ahriquinagā yero saha tuhotuyequina ijire topure, nidi Jesu usāre.

¹⁵Sa ninota tiquiro omocare tiquinagā bui ña peo tuhasa, wahaa wahari.

Doeri cjē upuro Jesure sinituahye

(Mr 10.17-31; Lc 18.18-30)

¹⁶Tiquiro sa yeri bato ihcāquiro Jesu cahapu wihi, sinituri tiquirore:

—¿Ne quehnoaga buhegu, ijipihtiyē decori Cohācjū mehna iji duagu, quehnoañene ye duagu duhse yeboagari yuhu? nidi tiquiro.

¹⁷—¿Duhse ijiro boro yuhure quehnoañene sinituajari muhū? Cohācjū dihita quehnoariquiro ijire. Ijipihtiyē decori Cohācjū mehna iji duagu tiquiro dutiye yeya, nidi Jesu.

¹⁸—¿Dise boro dutiye pehere nigū najari? ni sinitu nemori tiquiro.

Jesu yuhtiri:

—Masare wejēdacāhña. Wuana tieracāhña. Yaquercāhña. Ni mehoedacāhña. ¹⁹Muhū pacusumua ño peoya. Muhū basi muhū cahño saha muhū cahapu ijiriquiro gūhure cahña. Ahri dutiye yero cahmene, nidi Jesu.

²⁰—Ahri dutiye ne yuhducaera tii yuhu. ¿Duhse ye nemoagari yuhu ijipi-

htiye decori Cohācjū mehna iji duagu? nidi tiquiro Jesure.

²¹ Tiquiro sa nigū tuhoro Jesu yahu nemori:

—Muhu ñañe mariegu iji duagu muhu ye ijipihiyere duagu wahaya. Sa duagu ijipihiyere muhu wapataru niñerure pejecuoyequinare ohoya. Muhu sa yegū pajiro muhu ye uhmusepu, Cohācjū cahapu ijirota. Muhu sa yeri bato yuhu mehna cjū ijigū ahtaya, ni yahuri Jesu.

²² Tiquiro sa nigū tuhoro tutuaro bujua witiri. Tiquiro doeri cjē upuro ijipihiyere cuoriquiro ijiri. Sa yero Jesu yahugū tuhoro tutuaro bujua witiri. Pejecuoyequinare oho dueraro wahaa wahari.

²³ Tiquiro sa wahari bato Jesu usāre tiquiro buhenare yahu nemori:

—Ijirota musare niita niaja. Doeri cjē upuro Cohācjū puhtoro ijiropure tiquirore waharo basioera cjūre.

²⁴ Musare yahu nemoutja: Camello pehe awia copepu tiquiro sajā duagū basioerare tiquirore. Tiquiro sa ijiro yuhduoro doeri cjē upuro Cohācjūre cahmedaro, Cohācjū puhtoro ijiropure waharo basioerare, nidi tiquiro.

²⁵ Tiquiro sa nigū tuhona usā tuho maria waha, usā basi ohō saha nii:

—Aa, duhse tiquiro nino sahata ijigū, ne ihcāquiro masuno Cohācjū cahapu waha masiedaboaga, nii usā basi.

²⁶ Usā sa nigū Jesu usāre ihñano, yahuri:

—Masa tiquina esa tuharo tiquina quehnoano yeri mehna Cohācjū cahapu waha masiedare. Cohācjū pehe masare pecapu wahaboriquinare yuhduo masine. Tiquiro ijipihiyere quehnoano ye masi peho cāre, nidi tiquiro usāre.

²⁷ Tiquiro sa nigū Pedro tiquirore nidi:

—Tuhorīña. Usā pehe usā ye ijipihiyere cū cāu muhu mehna wahana tana. ¿Usā ohō saha yena, duhse ijiyere wapatanatari usā? nidi tiquiro.

²⁸ Tiquiro sa nigū tuhoro ohō saha nidi Jesu:

—Musare niita niaja: Pihitiri deco bato ijipihiyere wahma dihita came-saeta. Ti pjepure yuhu masu Cohācjū ohorigu yuhu puhtoro yuhu dujiropu asi siteropu dujiitja yuhu. Topu yuhu dujigū masa gūhu doce dujiye pahtaripu puhtoa tiquina dujiye pahtaripu dujinata. Sa yena Israe masare doce cururi cjēnare besenata musa quehnoañequina gūhure, ñañequina gūhure. ²⁹ Sa ye yeere yena tana masa wuhusere, masa bahanare, masa pacusumware, masa pohinare, masa weserire cūrina ijina, pajiro wapatanata. Sa yena ijipihiyere decori Cohācjū mehna ijinata. ³⁰ Sa ijiepegūta yojopure peyequina puhtoa ijiriquina ti pjepure ihyo ijiequina tojoaeta. Sa ye yojopure peyequina ihyo ijiequina ijimediquina ti pjepure puhtoa comesaeta, ni yahuri Jesu usāre tiquiro buhenare.

Ukse wesere dahrayequina queoyere yahuahye Jesu

20 Sa ye Jesu pari turi queoye mehna yahu nemori tja:

—Uhmuse cjūno masa puhtoro ijire. Wese upuro queoye mehna tiquiro puhtoro ijiyere yahutja musare. Tiquiro wese upuro bohrea quehagū tiquiro ya wesere dahratiquinare pijiro wahahye. ² “Ihcā cjoe niñeru cjoe wapa yegutja ihcā decore”, niahye tiquinare. “Au”, niahye dahratiquina. Tiquina sa nigū wesepu dahra dutiro ohoahye tiquiro tiquinare. ³ Sa yero decopu nueve ijigū doeri cjē duaropu wahahye tiquiro. Topu esaro, apequina dahraeyequinare ihñahye. ⁴ Sa ihñano tiquinare niahye: “Musa gūhu ya wesere dahrana wahaya. Quehnoano wapa yegutja”, niahye tiquiro. ⁵ Sa ye tiquina wesepu dahraye wahahye. Sa ye wese upuro coheri pje ijigū, ñamicahapu

tres ijigū gūhure dahra dutiahye. ⁶Sa ye ñamicahapū cinco ijigū doeri cjē duaropū tiquiro wahahye tja. Topū esa, apequina dahraeyequinare ihñano, tiquinare niahye: “¿Musa dahse yena ni-ajari dahraerapenata ohōpūre?” ni sini-tuahye tiquinare. ⁷“Ne, usāre dahraye mariedare”, ni yūhtiahye tiquina. “Musa gūhū ya wesere dahrana wahaya”, niahye tiquinare. Sa ye tiquiro ni-diro sahata tiquiro ya wesere dahraye wahahye.

⁸Sa ye ñamicahapū dahra duhuri pje ijigū wese upūro tiquiro dahrayequinare cohteriquirore ohō saha niahye: “Dahrayequinare pijiya. Tiquina wihigū tiquinare wapa yeya. Caperū yūhū dahra dutiriquinare wapa ye muhtaña. Tiquinare wapa ye tuhasa, apequina gūhure wapa ye tuhasa, yūhū dahra duti muhtariquinare wapa ye bato tiya”, niahye tiquiro. ⁹Sa yero cinco ijigū dahra ducayequinare ihcā cjoe niñeru cjoe wapa yeahye. ¹⁰Tiquiro sa wapa yegū ihñañe, “Usāre paji cjūnogā wapa yerota”, ni tuhutumahye tiquiro duti muhtariquina pehe. Tiquina gūhure ihcāno saha wapa yeahye. ¹¹Sa ye niñerure tiquiro wapa yegū tiquina puhtoro mehna usuaye, tiquina basi cahme niahye: ¹²“Ahriquina usā batopū tiquiro dahra dutiriquina pehe ihcā horata dahrari. Usā pehe ihcā deco quehnoano dahra nahñoa wahami. Ñano asū asiri usāre. Usā sa yoari pje dahraepēgūta usā batopū dahra ducariquina gūhure ihcāno saha wapa yeri tiquiro”, ni usuahye tiquina basi. ¹³Ihcāquiro tiquina mehna cjūno tiquiro sa nigū tuhoro, wese upūro yūhtiahye tiquirore: “Ne yūhū acayū, ‘Ihcā cjoe niñeru cjoere wapa yegutja’, nimi musare. Yūhū sa nigū yūhtiri musa. Sa yegū yūhū ni-diro sahata musare wapa yei yūhū. Queoro wapa yei musare. Ne yaquerū musare. ¹⁴Sa

yegū yūhū wapa yerire ne, muhū ya wuhupū tojoarisa. Ahriquirore came yūhū dahra dutiriquiro gūhure musare yūhū wapa yeriro punota wapa yegutja. ¹⁵Yee niñeru ijire ahri. Sa yegū yūhū cahmeno sahata ahri mehna wapa yegutja. ¿Apequinare bui cjūnogā yūhū quehnoano wapa yegū ihñā tuhtiajari muhū?” niahye tiquiro wese upūro, ni yahuri ti queoyere Jesu.

¹⁶Sa nino, yahu nemori tiquiro:

—Ahri queoye ni-diro saha came cjā curua iji muhtari curua ijirota uhmusepū. Sa ye iji muhtari curua pehe tiquina camepū cjā curua tojoarota uhmusepū, ni yahuri Jesu.

Pari turi Jesu tiquiro yaria masa wijiati-re yahuahye

(Mr 10.32-34; Lc 18.31-34)

¹⁷Sa ye Jerusalēpū wahaducu, usāre doce tiquiro buhenare pijio tuhasa, ape siepū usāre usā sehsaro neari Jesu. Usā sehsaro usā ijigū usāre yahuri:

¹⁸—Tuhoya yūhure. Yojobure Jerusalēpū wahana ni-aja mari. Topū yūhure masure Cohācjū ohorigure ñehe, apequinapure yūhure ohoeta. Pahia puhtoare, judio masare buheyequina gūhure yūhure ohoeta. Sa ye yūhure wejē dutieta tiquina. ¹⁹Sa wejē dutiye, judio masa ijieyequinare yūhure ohoeta. Tiquina sa ohori bato tiquina pehe yūhure bujūpe, tana, curusapū quē bihaeta yūhure. Sa yegū yūhū yariari bato ihtia deco wahaboro masa wijiagutja, ni yahuri Jesu usāre.

Santiago, Ñu mehna tiquina pacoro pehe tiquinare sini basahye Jesure

(Mr 10.35-45)

²⁰Sa ye Zebedeo namono pūaro ticoro pohne mehna Jesu cahapū esa, dusepe curi mehna quehe sahye tiquirore sinino taro.

²¹—¿Duhse yuhũ yegũ cahmeajari muhũ? niahye Jesu ticorore.

—Muhũ puhto sajãgu yuhũ pohnare dutiyequina sõña. Sa yegu muhũ pua peheripũ duji dutiya tiquinare, ni siniahye ticoro.

²² Jesu ohõ saha niahye:

—Musa ñano yuhduatire masiedapenata sa sinine musa. ¿Yojopure yuhũ ñano yuhduato saha musa gũhu ñano yuhduna ihcãno sahaboagari musa? niahye Jesu ticoro pohnene.

—Ihcãno sahanata, ni yuhtiahye Santiago, Ñu mehna.

²³—Ijirota niita niaja musare. Yuhũ ñano yuhduato saha ñano yuhdunata musa gũhu. Sa ijiepegũta yuhũ mehna dutiatiquinare, yuhũ mehna dujiatiquinare bese masiedaja yuhũ. Yuhũ Pacu pehe quehno tuhasari tire. Sa ye tiquiro beseatiquina dihita yuhũ pototo pehe yuhũ cũ pehe pehe dujieta, niahye Jesu tiquinare.

²⁴ Sa yena usã apequina diez tiquiro buhena pehe Santiago, Ñu ahriquina puaro mehna usuau usã. Jesure tiquina pacoro ticoro sini basarire tuhona usuau tiquina mehna. ²⁵ Usã sa usuagũ ihñano, Jesu usãre ijipihitina tiquiro buhenare piji cahmecoa, yahuri usãre:

—Cohãcjãre masieñequina puhtoa pehe tiquina masare dutiye, usuaro mehna dutire. ²⁶ Musa pehe ne sa yesi musa basi. Musa mehna cjũno puhtoro iji duaro, ijipihitiyequina tiquiro mehna cjẽna cahacjũno ijiro cahmene tiquiore.

²⁷ Sa yero ijipihitiyequinare dutiriquiro iji duaro, apequina cahacjũno ijiro cahmene tiquiore. ²⁸ Sata ijigu ijiaja yuhũ gũhu. Yuhũ masu Cohãcjũ ohorigu ahri yehpapure masare yedohogu ahtau. Sa yegu peyequina masa ye buhirire yariagu ahtau nii. Sa yegu masare pecapu wahaboriquinare yuhduogu ahtau nii. Masare dutipegu tagu niedu, nidi Jesu usãre.

Puaro caperi bajueyequinare ihñagũ yeahye Jesu

(Mr 10.46-52; Lc 18.35-43)

²⁹ Sa ye Jericõpu ijirina usã wahagũ peyequina masa Jesure nunu tãri. ³⁰ Sa ye Jesu tiquiro yuhduagũ puaro caperi bajueyequina maha duhtu cahapu dujiyequina tuhori. Sa tuhoye, ohõ saha ni sañuducuri:

—Puhto, Davi munano panami iji turiagu, masare yuhduoacju, usãre paja ihñaña, ni sañuducuri.

³¹ Tiquina sa ni sañuducugũ masa pehe tiquinare tuhtiri.

—Dihta mariañña, nidi masa tiquinare.

Tiquina sa tuhtigũ tuhoye, to pano tiquina sañuducuriro yuhduoro sañuducu nemori tja.

—Usã puhto, Davi munano panami iji turiagu, usãre paja ihñaña, ni sañuducu nemori.

³² Tiquina sa nigũ tuhoro Jesu esaduca, tiquinare pijio, sinituri:

—¿Duhse yuhũ yegũ cahmeajari musa? ni sinituri.

³³—Puhto, usãre ihñagũ yeya, ni yuhtiri tiquina.

³⁴ Tiquina sa nigũ Jesu tiquinare paja ihñari. Sa paja ihñano tiquina caperire ña peori. Tiquiro sa ña peogũta tiquina pehe ihñaahari. Sa ihñañe, tiquiore nunu tã cãa wahari.

Jerusalẽpu esahye Jesu

(Mr 11.1-11; Lc 19.28-40; Jn 12.12-19)

21 Sa ye Jerusalẽpu esana tana Betfagẽ wame tiri macapu esa muhtau usã Jesu mehna. Cũnu Olivo wame tidu cahapu Betfagẽ ijiri. Topu esaro, usã tiquiro buhena mehna cjẽnare puaro Jesu tiquiro pano oho muhtari. ² Ohõ saha dutiri tiquinare:

—Si macapu burroare nena wahaya. Topu esana, duita burroare ticoro

macnogā mehna tiquina dūhte docoricore bocanata. Tiquinare boca, yuta dare pā, ne cāhta basaya yūhure. ³Musa sa yegū ihñano, burroa uparo “¿Dūhsena tana burroare pājari musa?” tiquiuro nigū tūhona ohō saha ni yūhtiya. “Mari puhtoro burroare cahmedi. Sa yero mianogā wiarota tiquiuro”, ni yūhtiya tiquiore, ni duti ohori Jesu p̄aro tiquiuro buheyequinare.

⁴Sa yeri Cohācjū yere yahu mūhtariquiuro tiquiuro ni ojoariro sahata. Ohō sahata ni ojoahye panop̄:

⁵Jerusalē cjēnare ohō saha ni yahuya: “Ihñaña musa. Musa puhtoro musa cahap̄ ahtare. Tiquiro quehnoano masa quehnoariquiuro ijire. Burro macnogā bui pesariquiuro ahtarota”, ni yahuya Jerusalē cjēnare, ni ojoahye panop̄.

⁶Jesu tiquiuro dutiriquina p̄aro ti macap̄ esa, tiquiuro dutiriro sahata yeahye tiquina. ⁷Burrore, ticoro macnogā gūhure ne cāhta, tiquina bui sañañe suhtire tu we ne, burrogā bui duhu peori tiquina. Tiquina sa yeri bato Jesu tiquirogā bui mūja p̄jeri, waharo taro. ⁸Mūja p̄je tuhasa, tiquirogā bui Jerusalēp̄ wahari. Tiquiro ahtagū ihñañe masa peyequina tiquina bui cjē suhtire tu we ne, seō cū mūhtari tiquiuro wahari mahare, Jesure ño peoye. Apequina pehe p̄uri tiye d̄up̄r̄ire mahap̄ cū mūhtari tiquiore ño peoye. ⁹Sa ye tiquiuro pano wahayequina, tiquiuro bato nun̄ tãñequina mehna sañuducuri:

—Davi panamino iji turariquiore marine yūhd̄uoatiquiore ño peouhna. Ahriquiuro Cohācjū ohoriquiuro quehnoano iji ahro. Ūhmuse cjūnore “Tutuagū ijire”, ni ño peouhna, ni sañuducuri masa.

¹⁰Sa ye Jerusalēp̄ tiquina esagū to cjēna pehe ihña maria wahari.

—¿Noa ijjajari ahriquiuro? ni cahme sinituri tiquina.

¹¹Apequina masa yūhtiri:

—Ahriquiuro Cohācjū yere yahu mūhtariquiuro Nazare cjūno Jesu wame tiriquiuro ijire, ni yahuri tiquina masare.

Cohācjū wūhup̄ esahye Jesu

(*Mr 11.15-19; Lc 19.45-48; Jn 2.13-22*)

¹²Came Cohācjū wūhup̄ esari Jesu. Ti wūhup̄ esa, sajāa wahari. Ti wūhup̄ duayequinare, dūyequina gūhure cohā wiori tiquiuro. Sa yero niñeru came-saye mesarire ne majare cū mūjari. Bujuaare duayequina tiquina dujiye pahtari gūhure sata yeri. ¹³Sa yero tiquinare ohō saha nidi:

—Cohācjū yere tiquina ojoari p̄up̄ ohō saha nine: “Ya wūhū Cohācjū mehna yahuducuri wūhū wame tirota”, nimene tiquiuro ojoari p̄up̄. Musa pehe ahri wūhup̄ duana musa basi cahme ya-quere musa, nidi tiquiuro tiquinare.

¹⁴Tiquiro sa yeri bato caperi bajueyequina, tini masieñequina gūhū Cohācjū wūhup̄ tiquiuro cahap̄ wihiri. Tiquina sa wihigū tiquinare yūhd̄ugū yeri tiquiuro. ¹⁵Sa quehnoañene tiquiuro yegū ihñañe, pahia pūhtoa, marine judio masare buheyequina gūhū usuari tiquiuro mehna. Sa ye macanagā Jesure “Davi panami iji turiagū, masare yūhd̄uoacjū, tutuagū ijire mūhū”, tiquina ni ño peogū tūhoye usuari pari turi tiquina. ¹⁶Sa usuaye ohō saha nidi Jesure:

—¿Tiquina sa nigū tūhoerajari mūhū? Sa niedacāhdo, ni tuhtiri tiquina Jesure.

—Tiquina sa nigū tūhoaja. ¿Cohācjū ojoari p̄up̄ ahrire ne buherari musa? Macanagāre Cohācjūre quehnoano ño peogū yeri mūhū, nine Cohācjū yere tiquina ojoari p̄up̄, nidi Jesu.

¹⁷Sa ni tuhasa tiquinare cohā cā, Betania wame tiri macap̄ esa, ti ñamine top̄ ijiri.

Jesu higuerağure yaria dutiahye

(Mr 11.12-14, 20-26)

¹⁸ Ape deco bohrearopu Jerusalēpu tojoaro, ujua ahbari Jesu. ¹⁹ Sa ujua ahbaro, maha duhtu cahapu ijidu higuerağure wame tidare ihñano, tu ducare macano wahamedi. Dũca mariedari tu pehe. Pũri dihita ijiri. Tu sa ijigũ ihñano Jesu tare ohõ saha nidi:

—Ahdũ ne pari turi dũca tisi, nidi tiquiro.

Tiquiro sa nigũta duita tu pehe ñaia wahari. ²⁰ Tu sa wahagũ ihñana usã tiquiro buhena ihña maria wahau.

—¿Yohou, dũhsero ahdũ duita ñaia wahajari? ni sinituu usã.

²¹ Jesu yũhtiri:

—Ahrire wacũña masa. Cohãcjũre quehnoano wacũ tutuaya. “Potota sa yerota tiquiro”, nina, ahdũre yũhu yeriro sahata ye masinata masa gũhu. Sa yena ahdũre yũhu yaria dutiriro yũhũoro ye masinata masa. Ahdũ cũnũre “Duha ne, pajiri mapu cohãdu ijiahro”, masa nigũ duha cohãdu ijirota. ²² Cohãcjũre masa wacũ tutuagũ, “Yũhu sinidiro sahata waharota”, masa ni wacũgũ masa sinidiro sahata waharota, nidi Jesu usãre.

Jesure dutiriquirore sinituahye apeqũna

(Mr 11.27-33; Lc 20.1-8)

²³ Sa ye Cohãcjũ wũhũpu tojoa sa, buheri tiquiro. Tiquiro sa buhegũ pahia pũhũa, mari judio masa bucũna mehna tiquiro cahapu wihi, sinituri:

—¿Dũhsegu canũ ñamicahare sa yeari mũhu? ¿Noa mũhũre tire sa ye dutiari? ni sinituri tiquina.

²⁴ Tiquina sa nigũ Jesu yũhtiri:

—Mũsa pehere sinitu mũhtagũtja. Quehnoano yũhũre mũsa queoro yũhtigũ mũsare yahũtja yũhu gũhu. ²⁵ ¿Ñu masare tiquiro wame yegũ

noa boro pehe tiquirore wame ye dutiyari, masa tũhotugũ? ¿O Cohãcjũ dutierayari? ¿O masa pehe dutiyari, masa tũhotugũ? ni sinituri Jesu tiquinare.

Tiquiro sa nigũ tiquina pehe tiquina basi ohõ saha nidi:

—¿Dũhse ni yũhtinatari mari? “Cohãcjũ Ñure dutie tiahye”, mari nigũ, “¿Dũhsena Ñu tiquiro dutiepegũta tuho duerari masa?” niboaga Jesu marine. Sa yena “Cohãcjũ Ñure dutie tiahye”, ni yũhti masiedaja mari. ²⁶ Ahriquina masa pehe “Potota Ñu Cohãcjũ yere yahu mũhtariquiro ijiri”, ni tũhoturi tiquina. Sa ni tũhotuye “Ñu tiquiro wame yegũ Cohãcjũ pehe tiquirore dutierahye”, mari nigũ tũhoye masa usueta mari mehna. Sa yena ti gũhũre yahu masiedaja mari, nidi tiquina basi.

²⁷ Tiquina sa nidi bato Jesure yũhtiri tiquina.

—Ñure wame ye dutiriquirore usã masiedaga, nidi tiquina.

Tiquina sa nigũ tũhoro ohõ saha nidi Jesu:

—Ti pje pũrita yũhu gũhu masa sinitu mũhtarire yahueraja mũsare. Yũhu yerire dutiriquirore yahueraja mũsare, nidi tiquiro tiquinare.

Pũaro pacũro queoyere yahuahye Jesu

²⁸ Tiquiro sa nidi bato Jesu queoye mehna buhe nemori tiquinare:

—¿Ne, dũhse tũhotujari masa ahri queoyere? Pũaro pacũro ijiahye. Wahmino pehere ohõ saha niahye tiquiro pacũro: “Macũ, wesepũ dahragũ wahaya”, niahye. ²⁹ “Wahaeraja”, ni yũhtimahye tiquiro macũno coã warore. Sa nieperota camepũre wesepũ waha duaro ijiahye tiquirore. Sa yero wahahye tiquiro. ³⁰ Sa yero tiquina pacũro tiquiro macũno dũhsariquiro cahapu esa, tiquiro wahminore tiquiro dutiriro

sahata wesepu waha dutimahye. “Au”, nimahye duhsariquiro. Sa nieperota wahaerahye tiquiro. ³¹¿Diquiro pehe tiquiro pacuro dutiro sahana yeari? ni sinituri Jesu.

—Tiquiro wahmino pehe yeahye, ni yuhtiri tiquina.

Tiquina sa nigū Jesu yahuri:

—Musare niita niaja. Wapa ne cohteyequina, umua mehna nāno yeducuye numia tiquina buipu waro musa pehe nā yuhduana ijire. Sa ye Cohācjū puhtoro ijiropare musa esaborirore tiquina pehe musare esa muhtaboaga. ³²Ńu wame yeriquiro buhero musare “Quehnoano yeya”, ni yahumedi. Sa tiquiro yahugū duhsariquiro pacurore tiquiro yuhtierari sahana tiquirore tuhoerari musa. Sa yena tiquirore yuhtierari. Wapa ne cohteyequina pehe, umua mehna nāno yeducuye numia gūhu tiquirore tuhori. Tiquina sa tuhogū ihñari musa. Musa sa ihñapenata tiquirore ne tuho duerari. Sa yena tuhoerari musa, nidi Jesu pahia puhtoare, mari judio masa bucuna gūhure.

Ñañequina dahra cohteyequina queoyere yahuahye Jesu

(Mr 12.1-12; Lc 20.9-19)

³³Sa ye Jesu pari turi queoye mehna ohō saha ni tiquinare buhe nemori:

—Apeye queoyere tuhoya musa. Dihta cuoriquiro ijiahye. Tiquiro ya dihtapu uhse darire oteahye. Ote tuhasa, sahrinore ye tuhasa, uhsere tiquina cuhta mutoti copere sehe, umuari wuhugā yeahye.

’Sa yero ti wesere apequinare ihcā pehe pahrē pahma cūahye. Sa yero ti wesere tiquinare ihñā ihbo duti, ape yehpapu waha wahahye tiquiro. ³⁴Sa ye uhse nidi pje ijigū wese upuro tiquiro cahacjēnare wesere ihñā ihboye-

quina cahapu ohoahye. Wese cjē tiquiro oteri ducare tiquiro ya pahrē cjē ducare ne dutiro ohomahye. ³⁵Sa ye wesere ihñā ihboyequina pehe tiquiro cahacjēnare nāno yeahye. Ihcāquirore tuaro quē, apequirore wejē, apequirore utā mehna doqueahye. ³⁶Came wese upuro pari turi tiquiro cahacjēnare tiquiro oho muhtariquina yuhduo cjūno ijiri cuaruare ohomahye tja. Sa ye wesere ihñā ihboyequina tiquina gūhure munanota yeahye tja.

³⁷’Sa yero tiquiro oho bato tiriquire tiquiro macno ijiahye. “Yuhu macu pehere ño peota”, nino tiquirore ohomahye. ³⁸Tiquiro sa ni tuhotuepegūta wesere ihñā ihboyequina tiquiro macno ahtagū ihñañe, ohō saha niahye: “Wese upuro macno ijire ahriquiro. Tiquirore wejēihna mari. Sa yero ahri wese mari ya wese tojoarota”, nimahye tiquina basi. ³⁹Sa niñeta tiquirore ñehe, wese duhtu cahapu ne cā, wejēahye tiquina tiquirore.

⁴⁰’¿Ne, wese upuro ahtaro duhse yero-tari tiquiro wesere ihñā ihboyequinare? ni sinituri Jesu pahia puhtoare, bucuna gūhure.

⁴¹Tiquiro sa nigū tiquina yuhtiri:

—Tiquiro apequinare wesere ihñā ihboatiquinare comesarota iji muhtañequinare nā yuhduayequinare wejēno taro. Tiquirore queoro ducare tu watiquina pehere ihñā ihbo dutirota, ni yuhtiri tiquina.

⁴²Tiquina sa nigūta Jesu yahu nemori tiquinare:

—¿Cohācjū yere tiquina ojoari pūpu ahrire yuhure tiquiro ni ojoarire ne buherari musa?

Ahriquiro Cristo utā yero saha ijire. Utāre wuhu dahreyequina tiquina cohāno saha masa tiquirore cohāeta. Tiquina sa yepegūta yojopure wuhu dahreyequina wuhure yeye tiquina cū muhtaria utāre tiquina

cūno saha Cohācjū tiquiore puhtoro sōri. Cohācjū pehe ahrire yeri. Tiquiro sa yegū ihñana, “Quehnoa yuhduare”, ni, tuhotuaja mari, ni ojoahye panopu.

‘¿Tire ne buherari masa? ⁴³Musare niita niaja yuhu. Cohācjū tiquiore puhtoro ijiro masa ijiato ijiboaga. Tiquiro puhtoro ijirore apequina pehere masa ijiborimore ohorota Cohācjū. Apequina masa pehe tiquiore dutiro sahata yeeta. [⁴⁴Ijipihtiyequina tia utā bui doque queheyequinare muta sitea wahaeta. Sa yero tia utā pehe masuno bui bora pjero mutaa wahagū yerota tiquiore. Tiquiro pagu munanore daye manarigā wahagū yerota. (Sata yuhure ño peo dueyequina yuhu buhiri dahreatiquina ñano yuhdueta,)] nidi Jesu pahia puhtoare, mari acaye judio masa bucuna gūhure.

⁴⁵Ti queoyere tiquiore nigū tuhoye, “Sohō tiquiore yahu muhtari queoye, wese ihña ihboyequina queoye mehna marine nino niaga tiquiore”, ni tuhoturiti tiquina. ⁴⁶Sa ni tuhotuye, tiquiore ñehe duamede. Masa pehe Jesure ño peo, “Cohācjū yere yahu muhtariquiore ijire tiquiore”, niñequina ijie tiri tiquina. Tire masiñe, pahia puhto, bucuna mehna masare cueye, Jesure ñehedari.

Pajiri bose deco cjē queoyere yahuahye Jesu

(Lc 14.15-24)

22 Sa ye pari turi queoye mehna tiquinare buhe ducari Jesu.

²—Uhmuse cjūno puhtoro ijiro ahri queoye yero saha ijire. Ihcā yehpa cjēna puhtoro ijiahye. Sa yero tiquiore macuno ya deco bose deco yeahye. Tiquiro omoca duhteri bose deco ijiahye. ³Sa yero puhtoro tiquiore cahacjēnare bose decore ihñañe ahtatiquinare piji dutiro ohomahye. Tiquina pehe ahta duerahye. ⁴Sa yero apequinare piji dutiro ohomahye tja tiquiore

cahacjēnare. “Yuhu pijioriquinare ohō saha ni yahuya. ‘Mari ihyatire dahre tuhasari. Wecware, wecuagā dihi tiyequinagā gūhure wejē tuhasari. Sa yero ijipihtiro bose deco cjē ijiatire quehno tuhasari. Sa yena bose deco cjēne ihyana ahtaya’, ni yahuya tiquinare”, ni ohomahye puhtoro tiquiore cahacjēnare. ⁵Tiquina sa yahuri bato tiquiore pijionohriquina sa tuhutu cāhye. Bose decore ihñañe wahaerahye. Ihcāquiore tiquiore ya wesepu wahaahya. Apequiore tiquiore dahrayere ihñano wahaahye. ⁶Apequina pehe tiquiore cahacjēnare ñehe, tiquinare ñano ye, wejē cāhye. ⁷Tiquina sa yegū tuhoro, puhtoro pehe usuahye. Usua, tiquina sa wejēdi buhiri buhiri dahre dutiro tiquiore surarare ohoahye. Sa ye surara tiquinare wejē peho, tiquina ya macare ujūa cāhye. ⁸Tiquina sa yeri bato, puhtoro tiquiore cahacjēnare ohō saha niahye: “Bose deco cjē ijiatire quehno tuhasamede. Sa ijiepegūta yuhu pijio muhtariquina yuhu bose decore ihñaboriquina ijierare. Nañequina ijiri tiquina. ⁹Sa yena macare ijie maharipu duhse ijieyequina masa boca sayequinare bose decore ihñatiquinare pijiya”, niahye tiquiore cahacjēnare. ¹⁰Tiquiro sa nigū tiquiore cahacjēna maharipu waha, ijipihtiyequinare tiquina boca sayequinare, ñañequina, quehnoañequina gūhure yahuahye. Tiquina sa pijiri bato esahye tiquina pari. Quehnoano ti bose deco tiquina yeri tucūre masa wahpa yuhdua wahaahye.

¹¹Topu tiquina dujigū puhtoro pehe ihcāquiore omoca duhteri deco cjā suhtirore sañeniquiore ihñahye. ¹²“¿Ne yuhu acayu, duhse yegu omoca duhteri deco cjā suhtirore sañedapegūta sajā tari mahu?” ni sinituahye puhtoro.

“Tiquiro sa sinitugū masuno pehe yuhtierahye. ¹³Tiquiro sa yuhtieragū

ihñano tiquiro cahacjēnare ohō saha niahye: “Ahriquire ore omocarine dahteya. Tiquiro dahpocāri gūhure dahteya. Duhte tuhasa ne wijia, sopecahapū cohāña tiquirore nahitianopū. Topū tiquiro tutuaro uti, bujua witiro mehna bahque dihorota”, niahye puhtoro, ni yahuri Jesu.

¹⁴ Tiquiro sa nidi bato ohō saha ni bato tiri tiquiro:

—Ahri queoye ijiro saha Cohācjū peyequina masa tiquiro pijioriquina ijiepetā meheñequinagā tiquiro mehna tojoaeta, ni yahu bato tiri Jesu.

**Puhtoa ye wapare apequina
sinituahye Jesure**

(Mr 12.13-17; Lc 20.20-26)

¹⁵ Tiquiro sa nidi bato fariseo masa waha, tiquirore tiquina yahusātire tiquina basi yahuducuahye. Tiquiro ñano yuhtigū tuho duaye nimahye tiquirore yahusāñe tehe. ¹⁶ Sa yahuducuye tiquina mehna cjēnare, Herode ya curua cjēna gūhure Jesure sinitu dutiye ohoahye. Tiquina pehe Jesu cahapū wihi, tiquirore meje cū sinitumedi:

—Buhegū, poto yahuducugū ni mehoñe mariegū mūhū ijigū masiaja usā. Cohācjū yere queoro mūhū yahugū gūhure usā masiaja. Sa yegū ihcāquiro puhtoro waro ijiepegūta tiquiro gūhure dōyaro marieno potota yahure mūhū. ¹⁷ Sa yegū usāre yahuya. ¿Roma cjēno ijipihtiyequina puhtoro yere marine wapa yero cahmejari, mūhū tuhotugū? ¿Mari dutiye wapa ye dutiajari, mūhū tuhotugū? ni sinitumedi tiquina Jesure.

¹⁸ Tiquina sa nigū tuho tiquirore tiquina ñano ye duayere masino ohō saha nidi:

—Masa ihñono dihita quehnoano iji mehona ijire musa. ¿Dūhsena yūhū ñano yahuducugū tuho duajari musa? ¹⁹ Yo-jopure niñeru cjoere puhtoare wapa

yeati cjoere ne cāhtaya. Ti cjoere ihñauhna, nidi tiquiro.

Tiquiro sa nigū tuho yere niñeru cjoere ne cāhtari tiquina.

²⁰ Sa yero tiquiro sinituri tiquinare:

—¿Noa boro queoye wahñajari ahri cjoere? ¿Noa boro wame wahñajari? ni sinituri.

²¹ —César, masa ijipihtiyequina puhtoro queoye, tiquiro wame gūhū wahñare, ni yuhtiri tiquina.

Tiquina sa nigū tuho Jesu yahuri:

—Ti pje pūrita masa ijipihtiyequina puhtoro yere tiquiro pehere ohoya. Cohācjū yere Cohācjū pehere ohoya, nidi Jesu.

²² Tiquiro sa nigū tuho yere, tuho maria waha, waha wahari.

**Saduceo masa Cohācjū tiquiro
masoñene sinituahye Jesure**

(Mr 12.18-27; Lc 20.27-40)

²³ Sa ye ti decota ihquēquina saduceo masa Jesu cahapū wihiri. Saduceo masa pehe “Cohācjū yariariquinare masosi”, ni tuhotuyequina ijiri. Sa ye ohō saha nidi tiquina tiquirore:

²⁴ —Buhegū, ohō saha ni buheahye Moise: “Ihcāquiro wahmino namo tiriquire pohna mariedaperota yariagū ihñano tiquiro bahurore tiquiro wahmino namono ijiricore nūoano cahmene. Sa yero wahmino mūnano tiquiro pohna tiboriro saha pohna tiro cahmene tiquiro bahurore. Sa ye tiquiro pohne tiquiro wahmino mūnano pohne yero saha ijietā”, ni ojoahye Moise, nidi tiquina saduceo masa.

²⁵ Tire sa ni yahu tuhasa ahri queoyere yahu nemori tiquina Jesure:

—Ihcāquiro masūno ijiahye. Seis bahana tiahye tiquiro. Tiquina wahmino pehe namo ti, pohna mariediquiro yariaa wahahye. Sa yero apequiro tiquiro bahuro gūhū tiquiro wahmino namono ijiricore nūoahye.

²⁶ Sa n̄oari bato tiquiro wahmino yero sahata pohna mariedaperota yariaa wahahye tja. Sa yero ahriquiroyo bah̄ero tiquiro wahmino m̄nano yero sahata pohna mariedaperota yariaa wahahye. Sa dihita wahahye ihc̄aquiroyo pohne waro. Ne pohna mariedapeta yaria pih̄tia wahahye tiquina. ²⁷ Tiquina namono ijiricoro ḡh̄u tiquina bato yariaa wahahye. ²⁸ ¿Coh̄ācj̄u ijipih̄tiyequinare yariariquina m̄nare tiquiro masoḡu diquiroyo boro namono pehe ijiboagari ticoro? Tiquina ijipih̄tiyequina ticorore namo tiriquina m̄na ijiahye. ¿Sa yero diquiroyo namono pehe ijiboagari ticoro pototi? ni sinituri tiquina.

²⁹ Jesu yuhtiri tiquinare:

—Coh̄ācj̄u yere tiquina ojoari p̄ire, tiquiro masiñe ḡh̄ure ne masiedare m̄sa. Sa ye m̄sa tuhotuye pehe ne potoyo ijierare. ³⁰ Yariariquina m̄na tiquina masa m̄jari bato tiquina angele yero saha ijire. Namoye marieñequina, man̄u marieñe numia ijire top̄ure. ³¹ Yariariquina m̄na tiquina masa wijiato pehere musare yahutja. ¿Coh̄ācj̄u musare tiquiro nidire ne buherari m̄sa? Oh̄o saha niahye tiquiro. ³² “Yuh̄u Abrah̄ā, Isaac, Jacob tiquina puhto ijiaja”, nine Coh̄ācj̄u”, ni ojoahye panop̄ure. Tiquina yariari bato “Tiquina puhto ijiaja”, ni yahuahye Coh̄ācj̄u. Sa nieperota yariariquina m̄na puhtoro ijierare Coh̄ācj̄u. “Tiquina puhto ijiaja”, tiquiro niñe mehna catiyequina tiquina ijiḡu masiaja mari. Tiquiro catiyequina puhtoro ijire, ni yahuri Jesu tiquinare.

³³ Tiquiro sa ni buheḡu tuhoye peyequina masa tuho maria wahari.

**Quehnoa yuh̄uari
dutiroye yahuahye Jesu**

(Mr 12.28-34)

³⁴ Sa ye saduceo masa Jesure tiquina yuhti masiedaḡu tuhoye, fariseo masa

pehe tiquiro cahap̄u cahmecoari. ³⁵ Sa yero tiquina mehna cj̄ūno marine judio masare buheriquiro pehe Jesu tiquiro n̄ano niḡu tuho duaro meje c̄u sinitumedi tiquirore.

³⁶ —¿Buheḡu, Coh̄ācj̄u ye dutiroyo quehnoa yuh̄uari dutiroyo noho pehe ijiajari, m̄h̄u tuhotuḡu? ni sinituri tiquiro.

³⁷ Jesu tiquirore yuhtiri:

—“Tutuaro m̄sa jeripohna mehna, m̄sa tutuaye mehna, quehnoano m̄sa wacũne mehna Coh̄ācj̄ure cah̄iña”, nine Coh̄ācj̄u. ³⁸ Ahri dutiroya ijire quehnoa yuh̄uari dutiroyo apeye dutiroye yuh̄uoro. ³⁹ Ahri dutiroyo bato apero dutiroyo quehnoa yuh̄uare: “M̄h̄u basi m̄h̄u cah̄iño saha m̄h̄u cahap̄u ijiiyequina ḡh̄ure cah̄iña”, nine Coh̄ācj̄u. ⁴⁰ Ahri p̄ua dutiroya apeye dutiroye ḡh̄ure masi pehoḡu yere. Ahri p̄ua dutiroye yena, ijipih̄tiye apeye dutiroye ye pehona niaja mari. Coh̄ācj̄u yere yahu m̄htariquina panop̄u tiquina ojoari ḡh̄ure yena niaja mari, ni yahuri Jesu.

Cristo Davi m̄nano puhtoro ijire

(Mr 12.35-37; Lc 20.41-44)

⁴¹ Sa ye fariseo masa top̄u cahme-coañequina tiquina ijiḡu Jesu tiquinare sinituri:

⁴² —“Cristo Coh̄ācj̄u tiquiro ohoatiquiro ijire”, nine m̄sa. ¿Noa boro ijiajari tiquiro ñecno m̄nano panop̄u cj̄ūno, m̄sa tuhotuḡu? nidi tiquiro.

—Cristo Davi m̄nano panamino iji turiariquiroyo ijirota, ni yuhtiri tiquina.

Jesu yahuri:

⁴³ —¿Cristo Davi m̄nano panamino iji turiariquiroyo tiquiro ijiḡu duhse yero Davi pehe puhtoro tiyari Cristore? ¿Duhse yero sa puhtoro ti dutiyari Espíritu Santo tiquirore? Oh̄o saha niahye Davi:

⁴⁴ Coh̄ācj̄u yuh̄u puhtorore oh̄o saha nidi: “Oh̄op̄u yuh̄u potoye pehep̄u

dujiya. Sa yegũ mũhũre ihña tuhtiyequinare mũhũre yũhdũdũca basautja yũhũ”, nidi Cohãcjũ yũhũ pũhtoro, ni ojoahye Davi.

⁴⁵ Sa ni ojoarota Davi pũhtoro tiahye Cristore. ¿Davi Cristo ñecũno iji turi-ariquiro ijiro dũhse yero tiquiro pũhtoro tiyari Cristore? Cristo Davi pũhtoro ijire, ni yahuri Jesu.

⁴⁶ Tiquiro sa ni yahugũ tiquina tiquirore ne yũhti masiedari. Sa ye to punota sinitu duhu cãri tiquina tiquirore. Sa ye cueye, pari turi sinituerari tiquirore.

**Judio masare buheyequina,
fariseo masa gũhũ tiquina
ñano yeyere yahuahye Jesu**

(Mr 12.38-40; Lc 11.37-54; 20.45-47)

23 Sa ye peyequina masare, usã gũhũre Jesu yahuri tja.

²—Marine judio masare buheyequina fariseo masa gũhũ Cohãcjũ dutiye Moisere tiquiro cũrĩre yahuyequina ijire tiquina. ³ Tiquina sa yahuyequina ijigũ musare tiquina yahuriro sahata tire ye pehoya masa. Sa yepenata tiquinare ihña cũedacãhña masa. Tiquina buheriro sahata yerare tiquina.

⁴ Masare peye dutire tiquina. Sa dutiepeta tiquina dutiro saha masa yeragũ ihñañe tiquinare yedohoerare.

⁵ Masa tiquina ihñono dihita quehnoano ye ihñomene tiquina. Cohãcjũ yere tiquina ojoari pũre tiquina duhu sãñe acarigãre, buju cjũñe acarigãre tiquina wũhdoa bui dũhte yori, masare ihña dutiye. Tiquina omocari gũhũre dũhte yori. Sa ye tiquina suhti tu pjeri da bui tiquina ohõri da ehse yũhdũari da ijire. Cohãcjũre tiquina ño peorire masa pehere ye ihñõñe nimene tiquina. Ti queoro ijierare tiquina sa ye ihñõñe.

⁶ Sa ye bõse decori ijigũ pũhtoa tiquina dujiyepũ duji duare. Sa ye judio masa mari buheye wũhusepũ gũhũre

quehnoañe dujiye pahtari dihitare cahmene tiquina. ⁷ Sa ye doeri cjẽ duaropũ apequina pũhtoare quehnoano ño peo tiquina sinino saha tiquina piti cagũ cahmene tiquina. Tiquinare “Buhegũ”, masa tiquina ni pisugũ cahmene.

⁸ Apequina musare pisuye “Buhegũ”, niedacãhdo. Mũsa ijipihtina ihcãno saha ijina nine. Sa yegũ musare buhegũ ihcũta ijiaja. ⁹ Sa yena ahri yehpa cjẽnare “Mari pacũ”, nina tiquinare ño peona niaga. Ne sa niedacãhña. Æhmuse cjũno dihita mari Pacu ijire. Tiquiro dihitare ño peoro cahmene marine. ¹⁰ Sa yena masunore “Pũhto”, niedacãhña. Mũsa pũhto yũhũ Cristo pehe ihcũta ijiaja. ¹¹ Cahãcjũno yero saha musare yedohoriquiro tiquiro ijire masa pũhtoro ijiatiquiro. ¹² Ihcãquiro pũhtoro iji duaro tiquirore ihyo ijiriquiro yero saha ijiro cahmene. Sa yero “Ihyo ijigũ ijiaja yũhũ”, ni tũhoturiquiro pehe pũhtoro ijirota, ni yahuri Jesu.

**Judio masare buheyequina,
fariseo masa mehna tiquina ni
mehoñene yahuahye Jesu**

¹³ Tiquiro sa nidi bato tiquinare yahu nemori:

—Mũsa judio masare buhena, fariseo masa gũhũ ñano yũhdũnata. Masa ihñono dihita quehnoano iji mehona ijire masa. Sijoro saha masa buhegũ tũhoye masa pehe Cohãcjũ pũhtoro ijiropũre wahasi. Mũsa gũhũ topũre wahasi. Sa yena topũre waha duayequinare cahmotare masa.

[¹⁴ Mũsa judio masare buhena, fariseo masa gũhũ ñano yũhdũnata. Masa ihñono dihita quehnoano iji mehona ijire masa. Wape wiha numia ye wũhũsere tiquina cũoye gũhũre ehmare masa tiquina numiare. Sa yena yoari pje masa ihñonopũ Cohãcjũre sini ihñomene masa masare. Mũsa sa yeri

buhiri peyequina yuhdũoro Cohãcjũ buhiri dahrerota musare.]

¹⁵ Mũsa judio masare buhena, fariseo masa gũhu ñano yuhdũnata. Masa ihũono dihita quehnoano iji mehona ijire musa. Pajiri mapũ pehã, yoaro cjẽ yehparipũ wahare musa, musa dutiyere yeatiquire macana tana. Mũsa dutiyere yeatiquire boca, tiquire buhere. Mũsa sa yegũ tiquire pehe musa yuhdũoro pecapũ wahatiquire ijirota.

¹⁶ Mũsa ñano yuhdũnata. Caperi bajueyequina tiquina ihña masieno saha masiena ijire musa. Sa ijiepenata apequinare buhemene musa. Ohõ saha ni buhemene musa: “Cohãcjũ wũhu mehna yũhu nino sahata yeitja’, nidiquiro, tiquire nidiro sahata yerapegũta quehnoanota”, ni buhemene musa. “Cohãcjũ ya wũhu cjẽ uru mehna yũhu nino sahata yeitja’, nidiquiro tiquire pehere tiquire nidiro sahata ye sohtori tiro cahmene”, ni ti gũhũre buhemene musa. ¹⁷ Caperi bajueyequina tiquina ihña masieno saha masiena ijire musa. Tuho masiena ijire. ¿Dise boro pehere ño peoro cahmeajari? Uru ño peoreraro cahmene. Cohãcjũ pehe ti uru ti wũhũpũ ijigũ quehnoañe ijigũ yere tire. Sa yena ti wũhu pehere ño peoro cahmene musare. Sa ye musa buheye pehe queoro ijierare. ¹⁸ Ahri gũhũre buhemene musa: “Cohãcjũ wũhu cjã altar mehna yũhu nino sahata yeitja’, nidiquiro tiquire nidiro sahata yeragũ quehnoanota”, ni buhemene musa. “Ti altar bui ijieye mehna Cohãcjũre tiquina ohori mehna yũhu nino sahata yeitja’, nidiquiro tiquire pehere tiquire nidiro sahata ye sohtori tiro cahmene”, ni buhemene musa. ¹⁹ Caperi bajueyequina tiquina ihña masieno saha masiena ijire musa. ¿Dise boro pehe ti waro ijiajari, musa tuhutugũ? Cohãcjũre masuno tiquire ohori ti waro ijiera cjũre. Ti altar bui Cohãcjũre tiquire ohogũ, quehnoañe

wahare ti altar bui ijieye. Sa yero ti altar pehe ihyo ijiri altar ijierare. Cohãcjũre tiquina ohori bui cjũnogã quehnoari altar ijire. ²⁰ Sa yero “Cohãcjũ wũhu cjã altar mehna yũhu nino sahata yeitja”, ihcãquiro nino, ti altar bui cjẽ tiquire ohori mehna sa nino niaga. Sa ye musa buheye pehe queoro ijierare. ²¹ Sa yero “Cohãcjũ wũhu mehna yũhu nino sahata yeitja”, ihcãquiro nino, potota Cohãcjũ mehnata sa ninota niaga. Cohãcjũ ti wũhu cjũno ijire. ²² Sa yero “Uhmuse mehna yũhu nino sahata yeitja”, ihcãquiro nino, Cohãcjũ ijiropũ mehnata sa nino niaga. Sa yero Cohãcjũ mehnata sa nino niaga. Tiquire pehe to cjũno ijire. Sa ye musa buheye pehe queoro ijierare.

²³ Mũsa judio masare buhena, fariseo masa gũhu ñano yuhdũnata. Masa ihũono dihita quehnoano iji mehona ijire musa. Moa yero saha ijieye ihyayere ocagũ yeyere cũona mehenogã ohomene musa. Cohãcjũre ño peona tana pahiare ohomene musa. Mehenogã ohomene musa. Menta, anís, comino wame tiye ocagũ yeyere ohomene musa. Sa ohoopenata quehnoañene yerare musa. Sa yena masare paja ihñedare musa. Sa yena Cohãcjũre wacũ tutuerare musa. Oteye ducare musa nedire mehenogã pahiare musa ohogũ quehnoare. Sa ohona ohõ saha ye nemoña: Quehnoañene yeya. Sa yena paja ihñaña masare. Sa yena Cohãcjũre wacũ tutuaya. ²⁴ Caperi bajueyequina tiquina ihña masieno saha masiena ijire musa. Ohõ saha yere musa: Mũsa ye dutiyere ye dutina, ihyo ijieyegã warore dutiyere yere musa. Sa yepenata Cohãcjũ pototi tiquire dutiye warore yerare musa.

²⁵ Mũsa judio masare buhena, fariseo masa gũhu ñano yuhdũnata musa. Masa ihũono dihita quehnoano iji mehona ijire musa. Mũsa waparire, musa sihniñe wajarire bui musa cosero saha

quehnoañene ye ihñore mûsa buigã warona. Sa yepenata Cohãcjũ yere queoro yerare mûsa. Apequina yere ehmana, mûsa basi dihita bujyere ne duana ijire mûsa. Sa dihita tuhature mûsa. ²⁶ Caperi bajueyequina tiquina ihña masieno saha masiena ijire mûsa fariseo masa. Mûsa jeripohnarine came-saya mûsa. Quehnoañe pehere yeya. Mûsa sa yena masa tiquina ihñonopũ quehnoana ijinata mûsa.

²⁷ Mûsa judio masare buhena, fariseo masa gãhu ñano yũhdunata. Masa ihñono dihita quehnoano iji mehona ijire mûsa. Masa cope, yehseye mehna tiquina wisõri cope yero saha ijire mûsa. Masa ti copere tiquina ihñagũ quehnoari cope bajure. Sa bajuepegũta, puhia pũ ahbariquirore, tiquiro cohãrine, ñañene ihñedare tiquina. ²⁸ Sata mûsa gãhu masa ihñonopũ quehnoañequina yero saha bajumene mûsa. Sa quehnoañequina yero saha bajuna mûsa ijiepegũta mûsa tuhutuyepũ ñañe, ni mehoñe iji yũhduare ahbaye yero saha, ni yahuri Jesu.

**Judio masare buheyequina, fariseo
masa gãhure tiquiro buhiri
dahreatire yahuahye Jesu**

²⁹ Sa ni tuhasa ohõ saha ni yahu nemori tiquinare:

—Mûsa judio masare buhena, fariseo masa gãhu ñano yũhdunata. Masa ihñono dihita quehnoano iji mehona ijire mûsa. Cohãcjũ yere yahu muhtañequina panopũ cjẽna tiquina masa coperire quehnoano quehnomene mûsa, tiquinare ño peoro saha yena. Sa yena quehnoano yeyequina mûna tiquina queoyere mûsa yeri queoyere quehnoano quehnomene mûsa. ³⁰ Sa yena ohõ saha niducumene mûsa: “Panopũre

usã ñecusumua iji turiayequina mûna tiquina yeriro saha usã pehe yeraboaga. Ti pjepũ ijieyeyinare Cohãcjũ yere yahu muhtariquinare usã wejẽdaboaga”, niducumene mûsa. ³¹ Sa nina mûsa ñecusumua iji turiayequina Cohãcjũ yere yahu muhtariquinare wejẽdiquina mûna tiquina yerire ihñona nine. Tiquinare wejẽdiquina mûna tiquina panamena iji turiana mûsa ijieyeyinare ihñona nine mûsa. ³² Mûsa ñecusumua iji turiayequina mûna tiquina yeriro sahata ye sohtori ticũnahña.

³³ Aña yero saha ña yũhdunata ijire mûsa. Mûsa ñañe yerire bujua witi duerana Cohãcjũ mûsa ñañe buhirire pecapũ musare tiquiro cohãto pano duhti masiedare mûsa. ³⁴ Sa yegũ musare niita niaja. Cohãcjũ yere yahu muhtariquinare, apequina quehnoano masiñequinare, apequina musare buheatiquinare mûsa cahapũ ohoutja. Yũhu sa ohogũ mûsa pehe ihquẽquina tiquinare wejẽnata. Apequinare curusapũ quẽ bihanata. Apequinare mûsa buheye wũhusepũ tananata. Sa yena macaripepũ tiquinare ñano yena, oma nũnũ tãnata mûsa. ³⁵ Mûsa sa yena ijipihtiyequina ñañe marieñequinare mûsa wejẽdi buhiri buhiri tinata. Abe mũnanore Caĩ wejẽdi buhiri ijipihina mûsa gãhu buhiri tinata. Ijipihtiyequina tiquiro bato ijieyeyinare quehnoañequinare tiquina wejẽdi buhiri gãhure buhiri tinata mûsa gãhu. Sa yena Cohãcjũ wũhu cahapũ wahiquinare mûsa ohori altar cahapũ Zacariare wejẽahye mûsa. Tiquiro pehe Berequia macũno ijiahye. Sa yena tiquiro gãhure mûsa wejẽdi buhiri buhiri tinata mûsa. ³⁶ Ijirota musare yahugũta niaja. Tiquina ijipihtiyequinare tiquina wejẽdi buhiri yojopũ cjẽna gãhu buhiri tieta, ni yahuri Jesu.

**Jerusalē cjēnare
tutuario cahīahye Jesu**

(Lc 13.34-35)

³⁷ Sa ni tuhasa ohō saha ni nemori:

—Ahyou, Jerusalē cjāna, Cohācjū yere yahu muhtariquinare wejēdina ijire mūsa. Mūsa acaye panopū cjēna gūhu sata yeyequina mūna ijiahye. Sa yena mūsa cahapū tiquiro ohoriquinare utā paca mehna doque wejēdina ijire mūsa. Canaca ticoro pohnene ticoro wūye dūpuri mehna ticoro moha cuñano saha peye tahari cahīducumi musare. Musare cahmemi. Mūsa pehe yūhure ne cahmedari. ³⁸ Yojopū mūsa ya maca cohōri maca ijirota. ³⁹ Ijirota musare niita niaja. Camepū ahtautja yūhu. Sa yūhu ahtagū ihñana mūsa yūhure “Cohācjū tutuaye mehna ahtariquiro quehnoahdo”, ninata. Yūhure mūsa tire niato pano yūhu tojoa tato pano pari turi yūhure ihñasi mūsa, nidi Jesu tiquinare.

—Cohācjū wūhu cohāri wūhu
ijirota, niahye Jesu

(Mr 13.1-2; Lc 21.5-6)

24 Sa ye Cohācjū wūhupū ijiriquiro Jesu tiquiro wijia wihigū usā tiquiro buhena ti wūhure ti wūhu cahapū ijiye wūhuse gūhure ihñana,

—Quehnoa yūhdūye wūhuse ijicjoare. Ihñaña mūhu gūhu, nii usā tiquirore.

² Jesu yuhtiri:

—Ahri wūhusere yojopūre ihñamene mūsa. Musare yahuguta niaja. Ahri wūhusere ijipihtiye mūsa ihñari, ahri wūhuse cjē utā paca gūhure cohā pehoeta. Ne ihcāria utā tojoasi, nidi tiquiro usāre.

Pihtiri deco ijiatire yahuahye Jesu

(Mr 13.3-23; Lc 21.7-24; 17.22-24)

³ Came Olivo wame tidū cūnupū esa, topū dujiri Jesu. Topū dujigū usā tiquiro buhena usā sehsharo tiquiro cahapū esa.

—Yahuya usāre. ¿Duhse ijigū sa waharotari mūhu nidiro saha waharo? ¿Ahri yehpapū mūhu tojoa tati deco, pihtiatu deco panogā ijigū duhse ti waha dūcagū ihñanataru usā? ni sinituu usā.

⁴ Jesu yuhtiri:

—Quehnoano yeya mūsa. Sa yena musare apequina tiquina ni mehoñene tuhoeracāhña. ⁵ Peyequina masa “Cristo ijiaja yūhu”, ni mehoñequina ahtaeta. Tiquina sa ni mehogū tuhoye peyequina masa Cohācjū yere duhueta. ⁶ Mūsa cahagāpū masa apequina tiquina cahme wejēgū tuhonata mūsa. Sa yena yooropū gūhure tiquina cahme wejēgū tuhoonata mūsa. Sa tuhoopenata ne tire pajiro wacūedacāhña. Sa waharota. Tiquina sa yegū pihtiatu deco dūhsarīnota. ⁷ Ti pjere ihcā yehpa cjēna ape yehpa cjēna mehna cahme wejēeta. Sa ye ihcāquiro pūhtoro yequina apequiro pūhtoro yequina mehna cahme wejēeta. Sa ye peyequina masa ūjua mehna yarieta. Sa yero peye yehparipū yehpa nūhminota. ⁸ Sa wahagū ahri yehpa cjēnare tiquina nāno yūhdū nemoato dūhsarota ti pjere. Nāno yūhdū nemoeta.

⁹ Ti pjere apequina musare nēhe, nāno ye dutiye ohoeta musare apequina pūhtoapūre. Tiquina sa ohogū musare wejēeta. Yeequina mūsa ijiri buhiri ijipihtiyequina musare ihña tuhtietu. ¹⁰ Ti pjere peyequina yeequina ijimediquina yūhure cohāeta. Sa ye tiquina mehna cjēnare tiquina ihña tuhtietu. Sa ye tiquina mehna cjēna tiquina ijiepegūta tiquinare nāno yeatiquinare ohoeta tiquina. ¹¹ Ti pjere peyequina “Cohācjū yere yahu muhtana ijiaja”, ni mehoñequina ijieta. Sa ye peyequina masa tiquina ni mehoñene tuhoeta. ¹² Ti pjere nā yūhdūaro yeeta masa. Sa ye tiquina mehna cjēnare cahī nemosi. ¹³ Sa yena mūsa tutuana ijina, ahri yehpapū mūsa catinino puno ihcāno sahana, yūhdūnata mūsa. ¹⁴ Sa yero ahri

quehnoañe buheye ijiphiropu ahri yehparure tiquina yahuri buheye ijirota. Cohăcjŭ puhtoro ijiyere yahuri buheye tiquina yahu siteri buheye ijirota, ijiphiyequina ti buheyere tiquina masiata saha. Tiquina sa yahuri bato pihitri deco đucarota.

¹⁵ Cohăcjŭ yere yahu muhtariquiro Daniel munano panopu cŭno ña yuhduariquore Cohăcjŭ yere ñano yeriquirore yahue tiahye panopure. Ti pjere tiquiro ñariquiro pehe Cohăcjŭ ya wuhupu tiquiro ducugŭ ihñanata masa. Ahri yuhu nidire quehnoano masiña masa. ¹⁶ Topu tiquiro ducugŭ ihñane, Judea yehparu ijiequina pehe cunu cahapu oma duhtiahro. ¹⁷ Sojaro mehna oma duhtiahro. Ti pjere tiquina wuhuseri bui cŭ paaripu ijiequina wuhu puhiapu ijiyere tiquina yere neñe wahaeracăhdo tiquina umuñano waharo. ¹⁸ Sa ye ti pjere apequina weseripu ijiequina tiquina bui cŭ suhti wuhupu ijieyeh suhtire neñe wahaeracăhdo tiquina umuñano waharo. ¹⁹ Ti pjere niji pacosănumia, tiquina pohnene apuone numia gŭhu pejecuro wahaeta. ²⁰ Sa yena Cohăcjŭre ohŭ saha ni siniña: “Pohecŭ ijigŭ judio masa usă soye decori ijigŭ gŭhure usă oma duhtiat deco ijieracăhdo”, ni siniña masa Cohăcjŭre. ²¹ Ti decorire masa ña yuhduaro wahaeta. Ahri yehpare tiquiro bajumehnedi bato masa ñano yuhdue tiahye. Tiquina sa yuhduepegŭta ijiphiye ti puriñe yuhduoro pihitri deco panogă ña yuhduaro yuhdueta masa. Sa ñano tiquina yuhduri bato parituri sata ñano yuhduasi ahri yehparu. ²² Cohăcjŭ ti decorire meheñe decorigă ijigŭ yerota. Tiquiro sa yeragŭ ne ihcăquiro masuno yuhdueraboaga. Sa yero tiquiro beseriquina tiquina yuhduatire meheñe decorigă cŭnota Cohăcjŭ.

²³ Ti pjere apequina musare “Ihñaña. Ohŭpu ijire Cristo”, tiquina nigŭ tiquinare tuhoeracăhña. “Topu ijire Cristo”, tiquina nigŭ tiquinare tuhoeracăhña. ²⁴ “Cristo ijiaja”, ni mehoñequina, “Cohăcjŭ yere yahu muhtarina ijiaja”, ni mehoñequina ijiet ti pjere. Sa ye Cohăcjŭ tiquiro beseriquinare ni mehoñe, tiquina bajumehneñene ye ihnoeta. Cohăcjŭ yequinare Cohăcjŭre tiquina cohăgŭ ye duare tiquina ni mehoñequina. ²⁵ Ahri ijiphiyere yahuyaja musare ti sa wahato pano. Sa yena tuhoya masa. ²⁶ Apequina masa musare “Ihñaña. Masa marienopu ijire Cristo”, tiquina nigŭ topure ihñana wahaeracăhña. Sa yena “Ohŭpu ahri tucŭripu ijire tiquiro”, tiquina nigŭ tiquinare tuhoeracăhña. ²⁷ Yuhu masu Cohăcjŭ ohorigu wacŭeno mehna tojoa tautja. Upo miadoqueoro umusere asŭ muja taropu, asŭ sajănopu wacŭeno mehna ti miadoqueoro saha wacŭeno mehna tojoa tautja yuhu. ²⁸ Masa tiquina ñahe yeducuriropu topu Cohăcjŭ tiquina ñahe buhiri buhiri dahrerota tiquinare, ni yahuri Jesu.

Cristo ahri yehparu tiquiro tojoa tatire yahuahye tiquiro

(Mr 13.24-37; Lc 21.25-33; 17.26-30, 34-36)

²⁹ Sa ye tiquinare yahu nemori:

—Ti ñano yuhduye decori bato asŭ deco cŭno, ñami cŭno gŭhu buhrio duhueta. Tiquina sa wahagŭ ñahpicoha paca umusepu ijieyeh paca bora dijia taeta. Sa ye umuse cŭ yehpari, ñahpicoha gŭhu ti sa wahaducurore came-saeta. Sa ye nuhmia. ³⁰ Ti pjeta yuhu masu Cohăcjŭ ohorigu umusepu yuhu bajumehnenore yuhu ihnogŭ ihñaeta masa. Sa ye ijiphiye cururi cŭena utieta. Sa yegu yuhu tutuaye mehna, yuhu asi siteye mehna umuano cŭ ehmeo

cururi bui ahri yehpapure yuhū tojoa tagū ihñæeta tiquina. ³¹ Corneta bisirota. Sa yegū yeequina angelere ijipihtiropū ahri yehpapū ohoutja yuhū. Sa ye ijipihtiropū yeequina yuhū beseriquinare tiquina neeta.

³² Yojopure higeragare tuhutuya mūsa. Tū queoye mehna mū sare buheitja. Tū yucugū pūri tigū ihñana, cūhma mehenogā dūhsagū masine mūsa. ³³ Sata ahri ijipihtiye yuhū nidire ti sa wahagū ihñana, yuhū tojoa tato mehenogā ti dūhsagū masinata mūsa. ³⁴ Ijirota niita niaja mū sare. Ti pje cjēna tiquina yariato pano ijipihtiye yuhū ni diro sahata sa waharota. Ūhmūse, ahri yehpa gūhū pihtia waharota. ³⁵ Yuhū yahuducuye pehe ne comesasi. Ijipihtiye yuhū ni diro sahata sa waha sohtori tirota.

³⁶ Ti decore yuhū tojoa tati decore, ti hora gūhūre masiedaja yuhū. Angele gūhū tire masiedare. Masa gūhū masiedare. Yuhū Pacū dihita tire masine.

³⁷ Noé tiquiro ijiri pje cjēna tiquina ijiriro sahata ahri yehpapū yuhū tojoa tato panogāre sata ijieta masa. ³⁸ Yehpa miniato pano masa ihya, sihni, yeahye. Sa yeye ūmūa, numia mehna omoca dūhteahye. Noé gūhū yucusapū tiquina sajāto pano sa yee timahye masa. ³⁹ Duita tutuaro acoro ahta, wacūeno mehna yehpa minia wahahye. Masa gūhū mini pihtia wahahye. Wacūeno mehna tiquina minidiro saha yuhū masū Cohācjū ohorigū ahri yehpapure wacūeno mehna tojoa taūtja. ⁴⁰ Ti pjere wesepū pūaro dahrayequina ijigū ihcāquiro yuhūre cahmediquirore neitja. Sa yero yuhūre cahmeediquiro topū tojoarota. ⁴¹ Ti pjere pūaro numia ihcānopū tiquina trigore ña mūtoñequina numia ijigū ihcācoro yuhūre cahmedicorore neitja. Sa yero yuhūre cahmeedicoro topūta tojoarota.

⁴² Quehnoano wacū masi cohteya. Yuhū mūsa pūhto, yuhū tojoa tati decore ne masiedare mūsa. ⁴³ Ahrire wacūña. Yaqueriquiro wūhūpū tiquiro sajā yaqueato panore wūhū upūro masino, ti ñami tiquiro cariedaboaga, yaqueriquirore cohtero. Sa yero yaqueriquirore tiquiro ya wūhūpū sajā dutieraboaga. Yaqueriquiro tiquiro wacūeno mehna tiquiro ahtariro saha wacūeno mehna ahtaūtja yuhū. ⁴⁴ Sa yena yeere sa yeducuna yuhūre cohteya. Yuhū masū Cohācjū ohorigū ahri yehpapū tojoa tagū wacūeno mehna ahtaūtja, nidi Jesu.

**Apequiro dahra cohteriquiro
tiquiro pūhtorore ño peo,
apequiro ño peorare**

(Lc 12.41-48)

⁴⁵ Sa ye Jesu queoye mehna ohō saha ni buhe nemori tja:

—Dahra cohteriquiro tiquiro pūhtorore ño peoriquiro tūho masiniquiro ijire. Tiquiro sa ijigū ihñano apequina dahra cohteyequina bui cūre tiquirore tiquiro pūhtoro pehe waharo taro. Sa tiquirore cū tuhasa wahaa wahare pūhtoro. Sa yero ihyari pje ijigū dahra cohteriquiro apequinare ihyayere itire. ⁴⁶ Came pūhtoro tiquiro ya wūhūpū tojoa wihire. Tiquiro tojoa wihigū ihñano dahra cohteriquiro pehe tiquiro pūhtoro dutiriro sahata ye pehoriquiro ijiro, bucueriquiro ijirota. ⁴⁷ Ijirota mū sare niita niaja. Tiquiro sa yegū ihñano tiquiro pūhtoro ijipihtiye tiquiro yere ihña ihboriquiro cūnota tiquirore. ⁴⁸ Sa yepegūta ñariquiro dahra cohteriquiro pehe “Yuhū pūhtoro bajuerare”, nino, ⁴⁹ apequina dahra cohteyequinare quēpe, pajiro ihya, sihni, queheyequina mehna queherota. ⁵⁰ Came tiquiro pūhtoro wacūeno mehna tojoa tarota. Ti deco, ti hora gūhūre ne masiedare dahra

cohteriquiro. ⁵¹ Pũhoro pehe tojoa taro ñariquiro tiquiro ñano yerire tũhoro, tiquirore tutuaro buhiri dahrerota. Sa yero ni mehoñequina tiquina waharopu cohãnota tiquirore. Topũre tiquiro tutuaro uti, bujua witiro mehna bahque dihorota, ni yahuri Jesu.

**Pua omope nuhmia queoye
mehna buheahye Jesu**

25 Sa ye Jesu pari turi queoye mehna ohõ saha ni buhe nemori tja:

—Uhmuse cjũno pũhoro tiquiro ijiye ahri queoye yero saha ijire: Pua omope nuhmia ijiahye. Ihcã ñami tiquina sihõñe paca mehna omoca duhteatiquirore piti caye wahahye. ² Tiquina mehna ihcã omope numia tũho masieñequina numia ijiahye. Apequina numia pehe ihcã omope numia tũho masieñequina numia ijiahye. ³ Tũho masieñequina numia pehe tiquina sihõñe pacare, pose tiye pacare nemahye. Apee pacare uñse pose tiye pacare ti pihtigũ tiquina pioborire nedahye. ⁴ Tũho masieñequina numia pehe tiquina sihõñe paca uñse pose tiye pacare neahye. Apee paca tiquina pioati paca gũhũre neahye. ⁵ Sa ye omoca duhteatiquiro tiquiro bajueragũ tiquina numiare wujua purigũ caria wahahye. ⁶ Sa yero ñami decopũ sañuducugũ tũhoahye. “Tũhoya. Omoca duhteatiquiro ahtaro ca tare. Tiquirore piti cana ahtaya”, ni sañuducugũ tũhoahye. ⁷ Tiquiro sa nigũ tũhoye numia wahcã, tiquina ye sihõñe pacare quehnoahye. ⁸ Sa ye tũho masieñequina numia pehe apee numia tũho masieñequina numiare ohõ saha niahye: “Usã sihõñe paca yatiro nine. Sa yena mehenogã musa ye uñsere ohoya usãre”, ni sinimahye tiquina numia. ⁹ Tiquina sa siniepegũta tũho masieñequina numia

ohõ saha yũhtiahye: “Usã ye uñse mari ijipihtinare esa tuhaeraboaga. Sa yena uñse cwoyequinare musa basi dũna wahaya”, ni yũhtiahye tũho masieñequina numia pehe. ¹⁰ Sa ye tũho masieñequina numia dũye wahahye. Tiquina sa wahari bato omoca duhteatiquiro wihiahye. Tiquiro wihigũ ihña tiquina yere quehno tuhasariquina numia tũho masieñequina numia tiquirore piti cahye. Piti ca bose deco omoca duhteri decopũ tiquiro mehna ihñañe wahahye. Sa ye bose decore tiquina yeri wũhũpũ apequina mehna numia tiquina sajãri bato, sopecahare biha cãhye. ¹¹ Camepũ tũho masieñequina numia pehe wihimahye. “Puhto, usãre pũohña”, nimahye tiquina numia. ¹² “Ijirota musare niita niaja. Musare masiedaja yũhũ”, niahye tiquiro tiquina numiare.

¹³ Sa yena tũho masieñequina numia tiquina yere quehnoano quehno tuhasa, tiquina cohteriro saha quehnoana, ñañe mariena iji, cohteya musa gũhũ. Yũhũ tojoa tati decore ti hora gũhũre ne masiedare musa, ni yahuri Jesu.

**Niñeru cjoeri uru cjoeri
queoyere yahuahye Jesu**

¹⁴ Sa ni yahu tuhasa queoye mehna ohõ saha ni buhe nemori tja:

—Ti pjere yũhũ tojoa tati pje ahri queoye yero saha ijirota. Wũhũ upũro ijiahye. Tiquiro ape siepũ tinino waharo taro, tiquirore dahra cohteyequinare pi-jioahye. Sa yero tiquinare tiquiro yere cohte dutiahye.

¹⁵ Sa cohte dutiro tiquina ihbo masino puno tiquinare niñeru cjoerire ohoahye. Ihcãquirore ihcã omope cjoeri wapa bujũye cjoerire uru cjoerire ohoahye. Apequirore pua cjoerire ohoahye. Apequirore ihcã cjoerire ohoahye. Tiquinare oho tuhasa, wahaa wahahye. ¹⁶ Sa ye ihcã omope cjoeri

tiquiro ohoriquiro duita tiquiro wahari batota ti cjoeri mehna apee borore dúahye. Tiquiro dúrire apequinare duahye. Tiquiro duari wapa pua omope cjoeri wapa yeahye tiquirore. Sa yero pua omope cjoeri cuoahye. ¹⁷ Sa yero pua cjoer tiquiro ohoriquiro duita tiquiro wahari batota ti cjoeri mehna apee borore dúahye. Tiquiro dúrire apequinare duahye. Tiquiro duari wapa pititia cjoer wapa yeahye tiquirore. Sa yero pititia cjoer cuoahye. ¹⁸ Ihcã cjoere tiquiro ohoriquiro pehe cope sehe, ti cjoere yahye, ti copepu nuono.

¹⁹ 'Came yoari bato tiquina puhtoro wihiahye. Sa wihiro tiquiro niñeru cjoeri mehna tiquina ñehe memorire queoro ahtaro tiquirore dahra cohteyequinare pijioahye. ²⁰ Sa yero ihcã omope cjoeri tiquiro ohoriquiro puhtoro cahapu esa, pua omope cjoeri wiahye tiquirore. "Ihcã omope cjoeri yuhure ohori muhu. Ihñaña. Ti cjoeri mehna apeye cjoerire ñehe nemou", niahye tiquirore. ²¹ "Quehnoano yeaya muhu. Muhu quehnoagu, yuhu dutiro saha yerigu ijire. Mehenogãre quehnoano yeaya muhu. Sa yegu yojopure muhure pajiro muhu dahratire cõtja. Sa yegu yuhu mehna bucueya muhu", niahye tiquiro puhtoro. ²² Sa yero pua cjoere ñehediquiro puhtoro cahapu esa, yahuahye tiquirore: "Pua cjoer yuhure ohori muhu. Ihñaña. Ti cjoeri mehna apeye cjoeri pua cjoer ñehe nemou", niahye tiquiro. ²³ "Quehnoano yeaya muhu. Muhu quehnoagu, yuhu dutiro saha yerigu ijire. Mehenogãre quehnoano yeaya muhu. Sa yegu yojopure pajiro muhu dahratire cõtja. Sa yegu yuhu mehna bucueya muhu", niahye tiquiro puhtoro.

²⁴ 'Sa yero ihcã cjoere ñehediquiro puhtoro cahapu esa, yahuahye tiquirore: "Puhto, muhu apequina pehere tutuaro dahra dutigu ijire. Sa

tutuaro dahra dutigu ijigu muhu basi oterapeguta ti ducare nene muhu. ²⁵ Muhu sa ijigũ muhure cuei. Sa cuegu cope sehe, ti copepu muhu niñeru cjoere nuou. Ihñaña. Ohõpu ijire muhu ya cjoer niñeru cjoer", niahye tiquiro. ²⁶ "Muhu ñagu, cape bujagu ijire. Yuhu basi oterapeguta ti ducare yuhu negu ijigũ masine muhu. ²⁷ Yuhu sa ijigũ ihñaepeguta yuhu niñeru cjoere niñeru ihbõru wuhuru ihbõboaya muhu. Muhu sa ihbogũ tiquina ti cjoere wiayepu apee niñeru oho nemoboaya tiquina", niahye puhtoro tiquirore. ²⁸ Sa nino apequina tiquiro dahra cohteyequinare dutiahye tiquiro: "Niñeru cjoere ehmaña tiquirore. Pua omope cjoerire cuoriquiro pehere ohoya. ²⁹ Cuoyequinare oho nemoutja. Sa ye pajiro cuoeta. Cuoyequina pehere mehenogã tiquina cuoepeguta tire ehmautja. ³⁰ Ahriquiro dahra cohteriquiro dahseatiquiro ijierare. Nahitianõpu ñanõpu cohã cãhña tiquirore. Topu tiquiro tutuaro uti, bujua wiro mehna bahque dihorota", niahye puhtoro, ni yahuri Jesu.

Buhiri dahreatire yahuahye Jesu

³¹ Sa ye Jesu yahu nemori:

—Yuhu masu Cohãcũ ohorigu ijipihtiequina angele mehna puhto ijigu tagu, yuhu puhtoro dujiropu yuhu asi siteye mehna dujigutja. ³² Sa yuhu dujigũ, ahri yehpa cãna ijipihtiequina yuhu cahapu cahmecoeta. Tiquina sa cahmecoari bato pua curua tu waitja tiquinare. Ovejare ihña ihboriquiro ovejare, cabra gũhure tiquiro tu wariro saha masare tu wa docoutja. ³³ Sa tu wagu oveja yero saha ijieyequinare quehnoañequinare yuhu poto pehe bese docoutja. Sa yegu cabra yero saha ijieyequinare ñañequinare yuhu cũ pehe pehepu bese docoutja. ³⁴ Yuhu sa yeri bato yuhu ijipihtiequina puhto

pehe yuhũ poto pehepũ yuhũ bese docoriquinare ohõ saha ni yahutja: “Yuhũ Pacũ musare quehnoano yere. Ahri yehpare bajumehnenopũ musa ye ijiatire tiqũro puhtoro ijire quehnoyu tuhasari Cohãcjũ. Sa yena yojopũre tiqũro quehnoropũre ijina ahtaya. ³⁵ Yuhũ ujuu ahabagũ musa pehe yuhũre ihayere ohori. Yuhũ aco wuogũ yuhũre musa sihõri. Mũsa cahapũ yuhũ tinigũ yuhũre ihña masiedapenata yuhũre quehnoano piti cari musa. ³⁶ Suhti mariegũ yuhũ ijigũ ihñana musa pehe yuhũre suhti sãari. Dohatigũ yuhũ ijigũ musa yuhũre ihñana ahtari. Peresupũ yuhũ ijigũ gũhũre yuhũre ihñana ahtari musa”, niitja quehnoañequinare. ³⁷ Yuhũ sa nigũ tuhoye tiquina yuhũre sinitueta: “¿Puhto, dũhse ijigũ muhu ujuu ahabagũ muhũre ihayere ohori usã? ¿Dũhse ijigũ muhu aco wuogũ muhũre sihõri usã? ³⁸ ¿Dũhse ijigũ muhũre ihña masiedapenata muhũre quehnoano piti cari usã? ¿Dũhse ijigũ suhti mariegũ muhu ijigũ muhũre suhti sãari usã? ³⁹ ¿Dũhse ijigũ muhu dohatigũ o peresupũ muhu ijigũ gũhũre muhũre ihñana esari usã?” nieta yuhũre. ⁴⁰ Tiquina sa ni sinitugũ tuhogu yuhũ puhto tiquinare yahutja. “Ijirota musare niita niaja. Ahriquina yeequina mehna cjũno ihyo ijiriquireo tiquireo ijiepegũta, tiquireo musa sata yeri. Sa ijiriquireo sa yena, yuhũre yero saha yena nidi musa tiquinare”, ni yahutja. ⁴¹ ‘Quehnoañequinare yuhũ sa ni yahuri bato yuhũ cũ pehe pehepũ ducuyequinare yuhũ ijipihtiequina puhto ohõ saha ni yahutja: “Cohãcjũ tiquireo buhiri dahreatina ijire musa. Yuhũ mehna tojoeracãhña. Pecapũ wahaya musa. Ti peca ne yatierare. Watĩno, tiquireo yequina angele gũhu tiquina ijiatire ti pecare yeri Cohãcjũ. ⁴² Yuhũ ujuu ahabagũ musa pehe yuhũre ihayere ohoerari. Yuhũ aco wuogũ

musa yuhũre sihõedari. ⁴³ Yuhũre masiedana musa yuhũre piti caerari. Sa ihña cãri. Suhti mariegũ yuhũ ijiepegũta, yuhũre suhti sãaedari musa. Dohatigũ yuhũ ijigũ peresupũ yuhũ ijigũ gũhũre sa ihña cãri musa yuhũre”, ni yahutja tiquinare ñañequinare. ⁴⁴ Yuhũ sa nigũ tuhoye tiquina yuhũre sinitueta: “¿Puhto, muhu ujuu ahabagũ, muhu aco wuogũ, usã masiedigũ muhu ijigũ, suhti mariegũ muhu ijigũ, dohatigũ muhu ijigũ, peresupũ muhu ijigũ dũhse ijigũ usã pehe muhũre yedohoerari?” ni sinitueta yuhũre. ⁴⁵ Tiquina sa ni sinitugũ yuhũ tiquinare ohõ saha ni yahutja: “Ijirota musare niita niaja. Ahriquina yeequina mehna cjũno ihyo ijiriquireo musa ne yedohoerari. Sa ijiriquireo musa yedohoerana, yuhũreta sa yena nidi musa”, ni yahutja tiquinare. ⁴⁶ Sa yero tiquinare sa buhiri dahreducurota Cohãcjũ. Ti buhiri dahreye ne pihtisi. Sa ye, quehnoañequina pehe ijipihtie decori quehnoano ijietta, ni yahuri Jesu.

Pahia puhtoa, judio masa bucuna mehna Jesure wejẽ duahye

(Mr 14.1-2; Lc 22.1-2; Jn 11.45-53)

26 Ti ijipihtiyere tiquireo buheri bato Jesu usãre tiquireo buhenare yahuri:

²—Pua deco bato pascua ijirota. Tire musa masine. Ti pjere yuhũ masure Cohãcjũ ohorigure ñeheeta. Ñeheñe, yuhũre curusapũ wejẽeta, nidi tiquireo usãre.

³Sa ye pahia puhtoa, judio masa bucuna gũhu cahmecoahye. Caifa pahia puhtoro ya wuhũpũ cahmecoahye tiquina. ⁴Topũ cahmecoahye, tiquina ni mehoñe mehna Jesure ñehe tiquina wejẽatire cahme yahuye niahye.

⁵—Bose deco ijigũ tiquireo ñehedacũhna, “Masa usuari”, nina, niahye tiquina basi.

**Numino ehme sitiye uḥse
mehna Jesure pio peohaye**

(Mr 14.3-9; Jn 12.1-8)

⁶Ti pjere Simo cami bucū muna wi-
hiro ijimediquiro ya wuhupū ijiri Jesu.
Tiquiro ijiri maca Betania wame tiri
maca ijiri. ⁷Ti wuhupū tiquiro ihyari
watoa ihcācoro numino ehme sitiye
ne cāhta, Jesu dapu bui pio peori. Ti
ehme sitiye alabastro wame tiriapū pose
tiri. Wapa bujūye co ijiri. ⁸Ticoro sa pio
peogū ihñana usā Jesu buhena usuau.

—¿Duhsero ahricoro ahri core wapa
bujūyere sa ye siteajari? ⁹Ti ehme
sitiyere duaboaya. Sa duaro pajiro wapa
ñeheboaya. Sa ñeheno ti niñerure pe-
jecuoyequinare ohoboaya ahricoro, nii
usā tiquiro buhena.

¹⁰Usā sa ni usuagū ihñano, Jesu
yahuri usāre:

—Sa niedacāhña ticorore. Yuhure
quehnoano yero nine. ¹¹Pejecuoyequina
pehe mūsa mehna sa ijuducuetā. Sa yena
tiquina pehere mūsa oho masine. Yuhu
pehe ahri yehpapure mūsa mehna sa
ijuducusi. ¹²Yuhure tiquina yato pano
yuhu pagure quehnoyuro, ticoro yuhure
pio peori. ¹³Ijirotā mūsare niita ni-
aja. Ijipihtiro ahri yehpapū quehnoañe
buhayere tiquina yahuropū ahricoro yo-
jopure ticoro yerire yahueta. Tiquina sa
yahugū tuhoye ticorore masa peyequina
wacūeta, ni yahuri Jesu usāre.

**Juda Iscariote Jesure ihña
tuhtiyequinare ihñoahye**

(Mr 14.10-11; Lc 22.3-6)

¹⁴Ti pjere ihcāquiro usā mehna cjūno
Juda Iscariote pahia puhtoā cahapū
esahye. ¹⁵Esa, tiquinare sinituahye.

—¿Jesure mūsare yuhu ihñogū noho
puno wapa yenatari mūsa? ni sinituahye
tiquinare.

Tiquiro sa nigū tiquina tiquirore
treinta cjoeri plata cjoerire ohoahye.

¹⁶Tiquina sa ohogū Juda pehe Jesure
tiquiro ihñoati ñamine cohtero niahye.

**Jesu tiquiro buhayequina mehna
tiquiro ihya bato tiri deco ijiahye**

(Mr 14.12-25; Lc 22.7-23; Jn
13.21-30; 1 Co 11.23-26)

¹⁷Sa ye pugū yeye moremehneñe pāre
tiquina ihyati deco bose deco iji ducari
deco usā tiquiro buhena Jesu cahapū
waha, sinituu tiquirore:

—¿Noho boropū bose deco ijigū
mari ihyatire quehnoyu dutigu ohoutjari
mūhu usāre? nii tiquirore.

¹⁸Usā sa nigū tiquiro yuhtiri:

—Jerusalēpū wahaya. Topū
ijiriqirore ohō saha ni yahuya: “Marine
buheriquiro tiquiro ñano yuhduati deco
mehenogā duhsatjiññohti. Pascua ijigū
mūhu ya wuhupū Jesu usāre tiquiro
buhenare siho ihyati ijiññohti”, ni
yahuya ti wūhu upūrore, ni ohori Jesu
usāre.

¹⁹Sa yena usāre tiquiro dutiriro sahata
yena, pascua ijigū usā ihyatire quehnoy
usā.

²⁰Sa ye ti ñamine usā mehna doce
tiquiro buhena mehna ihyaro nidi Jesu.

²¹Usā ihyari watoa tiquiro usāre yahuri:

—Ijirotā mūsare niita niaja. Ihcāquiro
mūsa mehna cjūno yuhure ihña tuhtiyequi-
nare ihñonota yuhure, ni yahuri
tiquiro usāre.

²²Tiquiro sa nigū tuhona tutuaro
bujua witina, tiquirore sinitu ducau usā
ijipihtina:

—¿Puhto, yuhūta ijiajari mūhure
ihñoacjū? ni sinituu.

²³Usā sa ni sinitugū tiquiro yuhtiri:

—Yuhu ihyari papū yuhu mehna soha
ihyariquiro ijire yuhure ihña tuhtiyequi-
nare ihñoatiquiro. ²⁴Panopū yuhure
tiquina ojoariro sahata yuhu masū Co-
hācjū ohorigu yariagutja. Sa yero yuhure
ihña tuhtiyequinare ihñoatiquiro ñano
yuhdurota. Tiquiro pehe masa bajueraro

quehnoa yuhduaboaya. Ñano yuhduer-
aboaya, nidi Jesu.

²⁵ Tiquiro sa nigūta tiquirore ihñoat-
iquiro Juda sinituri:

—¿Buhegu, mähure ihñoacju ijiajari
yuhu? ni sinituri tiquiro.

Jesu yahtiri:

—Ûhu. Mühata ijire, nidi.

²⁶ Sa ni yahu tuhasa usã tiquiro
buhena mehna ihyaró taro nidi. Sa yero
Jesu páre ne, Cohãcjüre “Quehnoare”,
nidi. Sa ni tuhasa tire nuha, usãre tiquiro
buhenare itiri.

—Ahrire ne, ihyaya. Ahri yuhu pagu
ijire, nidi tiquiro.

²⁷ Sa ni tuhasa tiquiro sihni di pare ne,
Cohãcjüre “Quehnoare”, ni, usãre ohori.

—Musa ijipihtina ahrire sihniña.

²⁸ Ahri yuhu dii ijire. Peyequina masa
tiquina ñañe yerire cohãgũ tagu
yariutja. Sa yegu yuhu diire cohãutja.
Cohãcjũ “Músare yuhduoutja”, tiquiro
nidiro esagũ yuhu yariaro mehna
tiquiro nidiro sohtori tirota. ²⁹ Músare
niita niaja. Yuhu Pacu tiquiro puhtoro
ijiropu uhmusepu musa mehna wahma
core uhse core sihniitja. Mari sa sihniato
pano ahri core sihni nemosi yuhu, nidi
Jesu usãre.

³⁰ Sa yena Cohãcjũ yere basa tuhasana
cunupũ Olivo wame tidupũ wahau usã.

Pedro Jesure tiquiro cohãtire yahuahye Jesu

(Mr 14.26-31; Lc 22.31-34; Jn 13.36-38)

³¹ Topu usã esagũ Jesu pehe usãre
yahuri:

—Mia ñami yuhure cohã cãnata musa.
Ohõ sahata nine Cohãcjũ tiquiro yere
tiquina ojoari pũpu yuhure yahuro:
“Ovejare ihña ihboriquiro yero saha
ijiriquire yuhu Cohãcjũ cohãgutja.
Yuhu sa cohãgũ tiquiro yequina oveja
yero saha ijieyequina duhti site cãa wa-
haeta”, nine Cohãcjũ tiquiro yere tiquina
ojoari pũpu. ³² Sa yegu Cohãcjũ yuhure

tiquiro masori bato musa pano Galileapu
wahayutja yuhu, nidi tiquiro.

³³ Tiquiro sa nigũ tuhoro ohõ saha
nimedi Pedro:

—Yuhu mehna cjẽna ijipihtieyquina
mähure tiquina cohãepẽgũta yuhu
pehe mähure ne cohãsi, nimedi Pedro
tiquirore.

³⁴ Jesu yahtiri:

—Ijirota niita niaja mähure. Mia ñami
canaca tiquiro yahuato pano “Yuhu
Jesure masiedaga”, niita muhu. Ihtia
taha sa niita muhu, nidi tiquiro Pedrorre.

³⁵ Tiquiro sa niepẽgũta Pedro ohõ saha
ni yahtiri:

—Muhu mehna yuhure tiquina wejẽ
duepẽgũta “Jesure masiedaga”, ne nisi
yuhu, ni yahtimedi Pedro.

Sa yena usã gũhu apequina tiquiro
buhena Pedro tiquiro nidiro sahata nimi
usã Jesure.

Getsemaní wame tiri wesepu Cohãcjüre siniahye Jesu

(Mr 14.32-42; Lc 22.39-46)

³⁶ Sa ye Getsemaní wame tiri wesepu
Jesu usã tiquiro buhena mehna waha,
topu esa, usãre nidi:

—Ohõ dujiyuya. Musa ohõ dujiri wa-
toa sohõ cjũnogãpu Cohãcjüre sinigu
wahagu niaja, nidi tiquiro usãre.

³⁷ Sa ni tuhasa, Pedrorre, puaro
Zebedeo pohnene tiquina ihtiarore piji
cãri. Sa yero tiquiro tutuaro bujua witi,
ñano jeriphona tiahye. ³⁸ Sa bujua
witiro tiquiro mehna cjẽnare tiquiro piji
cãriquinare ohõ saha niahye:

—Tutuaro ñano jeriphona tiaja yuhu.
Yuhure tutuaro purino saha tuhótu-
gu niaja. Sohõ cjũnogã wahagu niaja.
Ohõpu tojoaya. Sa yena yuhu mehnata
cariedacãhña musa gũhu, niahye tiquiro
tiquinare.

³⁹ Sa ni tuhasa mehenogã waha nemo,
yehrapu quehe sa, Cohãcjüre niahye:

—Mai, yuhū nāno yuhduatire ye dueragu yeracāhña. Yuhū sa niepegūta yuhū cahmeno saha yeracāhña. Mūhū pehe masine. Mūhū cahmeno saha yeya yuhure, ni siniahye tiquiuro Cohācjüre.

⁴⁰ Sa ni tuhasa, ihtiaro tiquiuro buheyequina cahapū wihiro, carīnequinare ihñahye. Tiquinare ihñano, Pedrore ohō saha niahye:

—¿Ihcā hora waro yuhū mehna carīegū iji masiedajari mūhū?
⁴¹ Quehnoano yeya mūsa. Sa yena Cohācjüre siniducuya mūsa, “Nāno yeari”, nina. Mūsa tuhutuye mehna quehnoañene ye duamene mūsa. Mūsa sehsaro sa ye duepenata tire ye masiedare mūsa, ni yahuahye Jesu.

⁴² Sa ni yahu tuhasa, pari turi waha, Cohācjüre siniahye:

—Mai, yuhū nāno yuhduatire ye duagu yeya yuhure. Mūhū cahmeno saha yeya, ni siniahye tiquiuro.

⁴³ Ni, tiquiuro buheyequina ihtiaro buheyequina cahapū pari turi wihiahye tja. Sa wihiro carīnequinareta ihñahye tja. Wūjua purī yuhduahye tiquinare.
⁴⁴ Sa yero tiquinare cū cā, pari turi waha, Cohācjüre siniahye. To pano tiquiuro nidiro sahata niahye tja. ⁴⁵ Sa ni tuhasa tiquiuro buheyequina cahapū wihi, tiquinare ohō saha niahye:

—¿Yojopū pūritare carīnina niajari mūsa? ¿Sorīna niajari mūsa? niahye tiquiuro.

Sa ni tuhasa, masa tiquina ahtagū ihñano, ohō saha niahye.

—Tuhoya. Mianogāta yuhū masure Cohācjū ohorigure ñañequinare ohoeta yuhure. ⁴⁶ Wahcāña. Isa wahana. Ihñaña. Yuhure ihña tuhtiequinare ihñoatiquiuro ohōpū ahtare, niahye tiquiuro.

Jesure ihña tuhtiequina tiquiore peresu yeahye

(Mr 14.43-50; Lc 22.47-53; Jn 18.2-11)

⁴⁷ Tiquiro sa nino watoa usā mehna cjūno ijimediquiuro Juda pehe wihiri. Masa peyequina ahtari tiquiuro mehna. Tiquina pahia pūhtoa, judio masa bucuna gūhū tiquina ohoriquina ijiri. Ñoseñe pjinine, yucu tiāri gūhure cūori. ⁴⁸ Coā warore Jesure ihña tuhtiequinare ihñoatiquiuro masare ohō saha ni yahuyu tuhasahye:

—Yuhū wahsupu ihmidiquiurota ijirota mūsa ñeheatiquiro. Tiquirore yuhū ihmidi bato ñeheña tiquiore, niahye Juda tiquinare.

⁴⁹ Sa ye wihiro Jesu cahapū duita wahari.

—¿Buhegū, ijiajari mūhū? ni, tiquiore wahsupu ihmidi.

⁵⁰ Tiquiro sa ihmigū Jesu ohō saha nidi:

—Yuhū acayū, ohōpūre mūhū yei tūu ahtarire yeya mūhū, nidi tiquiuro.

Sa ye tiquina Jesure ñehedi.

⁵¹ Tiquina sa yegū ihñano Jesu mehna cjūno tiquiuro ñoseni pjinē tuā we ne, pahia pūhtoro cahacjūnore cahmonore dute pahrē cāri. ⁵² Tiquiro sa yegū ihñano Jesu tiquiore yahuri.

—Mūhū ñoseni pjinē ihboya. Apequinare mūhū ñosegū tiquina ñose cahmegū yariagūta mūhū. ⁵³ Yuhū Pacure yuhure yuhū yedoho dutigū tiquiuro pehe peyequina angelere doce cururire yuhū cahapū ohoboaya tiquiuro. ¿Tire masiedajari mūhū? ⁵⁴ Sa yedohoboriquiuro tiquiuro ijiepegūta tiquiore yuhure yedoho dutisi yuhū. Yuhū sa dutieragū Cohācjū yere tiquina ojoari pū ti nidiro sahata sa waharota, nidi tiquiuro.

⁵⁵ Sa ni tuhasa masare yahuri tiquiuro:

—¿Duhse ijiro boro mūsa ñoseñe pjinē mehna, yucu tiāri mehna yaque

bucurore yero saha musa yuhure ñehena ahtajari? Decoripe Cohăcĵũ wuhupũ musare yuhũ buhe dujigũ, musa yuhure ne ñehedari. ⁵⁶ Sa ijiepegũta ahri ijipihitiye sa waharo nine Cohăcĵũ yere yahu muhtariquina tiquina ni ojoariro sahata, nidi Jesu.

Tiquirore tiquina sa ñehegũ ihñana usă tiquiro buhena tiquirore cohă oma căa wahau usă.

Judio masa puhtoa Jesure sinituahye

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Sa ye tiquirore ñehediquina pahia puhtoro Caifa wame tiriquire ya wuhupũ ne sahye tiquirore. Ti wuhupũta marine judio masare buheyequina, bucuna gũhu cahmecoahye. ⁵⁸ Topũ Jesure tiquina neagũ Pedro yoraropũ tiquinare ihña nunũ tăhye. Sa nunũ tăno Caifa ya wuhure cahmotari sahrĩnore esa, ti sahrĩno puhiapũ sajăa wahahye. Sajă sa, ti wuhure cohteyequina surara mehna dujiahye. Jesure tiquina dăhse yegũ ihñano taro niahye.

⁵⁹ Sa ye pahia puhtoa, apequina puhtoa mehna Jesure wejẽ duti duaye, ni mehoñe mehna tiquirore tiquina ñano buhiri dahreatire wacũ macamahye. ⁶⁰ Tiquina yahusătire wacũ bocaerahye. Sa wacũ bocaerapeta peyequina masa tiquirore sa ni meho yahusă maca căhye. Sa ye puaro tiquina bato wihiyequina tiquirore yahusăhye tja.

⁶¹ —Ahriquire ohô saha nidi: “Cohăcĵũ wuhure cohă masiaja. Sa cohăgu ihtia deco wahaboro ti wuhure pari turi yeitja”, tiquiro nigũ tuhoh usă, ni yahusă maca căhye Jesure.

⁶² Tiquina sa nidi bato pahia puhtoro wahcădũca sa, Jesure sinituahye:

—¿Ahriquina muhure tiquina yahusăepegũta tiquinare yuhti cahmedajari muhu? niahye puhtoro.

⁶³ Tiquiro sa nigũ tuhooperota Jesu sata tuhohu căhye. Tiquiro sa yuhtieragũ ihñano pahia puhtoro pari turi sinituahye tja:

—Cohăcĵũ catiriquire wame mehna poto niña muhu. Muhu sa niedagũ tiquiro muhure buhiri dahrerota. Yahuya usăre. ¿Cristo Cohăcĵũ macuta ijajari muhu? ni sinituahye tja.

⁶⁴ Tiquiro sa nigũputa Jesu yuhtiahye:

—Tiquirota ijaja. Musare poto yahuguta niaja. Came yuhũ masu Cohăcĵũ ohorigu yuhũ Pacu tutuariquire cahapũ tiquiro poto pehepu yuhũ dujigũ ihñanata musa. Sa yena umuse cĵe ehmeo cururi bui yuhũ ahtagũ gũhure ihñanata musa, ni yuhtiahye Jesu.

⁶⁵ Tiquiro sa nigũ tuhoro pahia puhtoro tiquiro sañari suhtirore tuhrẽ căhye apequinare “Usua yuhduare”, ni ihña masi dutiro.

—Cohăcĵũre pajiro ñano yahuducuro nine ahriquire. Sa ye tiquiro ñano yahuducuyere tuho tuhasaja mari. Sa ye topequinata yahusăahdo ahriquire. Ohôputa tiquiro ñano yahuducugũ tuhoaja mari basita. ⁶⁶ ¿Dăhse yenatari mari yojopure ahriquire? ni sinituahye tiquiro apequina puhtoare.

—Tiquiro ñari buhiri wejẽ căno cahmene tiquirore, ni yuhtiahye tiquina.

⁶⁷ Tiquina sa nidi bato tiquiro wuhdoare sihco puti ohô, tiquirore quẽpeahye tiquina. ⁶⁸ Tiquirore quẽpe tuhasa, ohô saha niahye tiquirore:

—¿Noa pehe muhure quẽajari? Cristo ijigu ihñedapeguta yahuya usăre, ni bujupeahye tiquina.

—Tiquirore masiedaga, niahye Pedro Jesure

(Mr 14.66-72; Lc 22.56-62; Jn 18.15-18, 25-27)

⁶⁹ Sa ye ti wuhũ cahapũ ijiri paapu quehnoari paapu Pedro pehe dujiahye.

Tiquiro sa dujigū ihñano pahia puhtoro cahacjōno tiquiro cahapu esaro, ohō saha niahye:

—Muhu gūhu Jesu Galilea cjūno mehna ijiri, niahye ticoro.

⁷⁰Ticoro sa nigū tuhoro, Pedro ohō saha niahye:

—¿Duhse ni maca cōo niajari muhu? Muhu nidiquirore ne masiedaga yuhu, niahye Pedro ticoro ijiptiyequina tiquina tuhoro.

⁷¹Tiquiro sa nidi bato ti paa cja sahrino sopecaha cahapu wahahye Pedro. Topu tiquiro ijigū apecoro cahacjōno tiquirore ihñano, topu ijiyequinare ohō saha niahye:

—Jesu Nazare cjūno mehna ijiri ahriquiri, niahye ticoro Pedrore tja.

⁷²Ticoro sa nigū tuhoro Pedro yuhtiahye:

—Cohācjū mehna poto nii niaja. Tiquiro muhu nidiquirore ne masiedaga yuhu, ni yuhtiahye Pedro.

⁷³Sa ye came cjūno topu ducuyequina Pedro cahapu waha, tiquirore ohō saha niahye tja:

—Poto tjire. Jesu yequina mehna cjū ijire muhu gūhu. Tiquina yero saha yahuducure muhu, niahye tiquina Pedrore.

⁷⁴Tiquina sa nigū Pedro yuhtiahye:

—Poto Cohācjū mehna nii niaja musare. Yuhu poto yuhu niedagū Cohācjū yuhare buhiri dahreahro. Tiquirore musa nidiquirore ne masiedaga yuhu, ni yuhtiahye tiquiro tiquinare.

Tiquiro sa nigūta canaca yahuahye.

⁷⁵Tiquiro yahugū tuhoro Jesu tiquirore nidire wacūahye. “Canaca tiquiro yahutato pano ‘Jesure masiedaga’, niita muhu. Ihtia taha waro sa niita muhu”, Jesu tiquirore nidire wacūahye Pedro. Sa wacūno, ti sahrinore wijia, tutuaro utiahye.

Pilato cahapu Jesure neahye

(Mr 15.1; Lc 23.1-2; Jn 18.28-32)

27 Sa ye bohrea quehagūpu pahia puhtoa mari judio masa bucuna gūhu Jesure tiquina wejē dutiatire cahme yahuducuahye. ²Tiquina sa yeri bato tiquirore duhte, Pilato cahapu nea, tiquirore ohoahye Pilatore. Pilato pehe ti yehpa cjēna puhtoro ijiri.

Juda Iscariote yariaa wahahye

³Sa yero Jesure tiquina wejē dutigū ihñano Juda pehe Jesure ihñoriquiro tiquirore tiquiro ihñorire tutuaro wacū bujua witiahye. Sa bujua witiro treinta cjoeri tiquiro ñehedi niñeru cjoerire wiaro waharo, pahia cahapu, bucuna cahapu esa, ohō saha niahye:

⁴—Jesu musare yuhu ihñoriquiro ñañe marieniquiro tiquiro ijiepegūta tiquina wejē dutiri tiquirore. Sa yegu musare tiquirore ihñogu ñano yegu niaya yuhu, ni yahuahye Juda tiquinare.

Tiquiro sa ni yahuri bato tiquina yuhtiahye:

—Sata yecūnahdo. Usāre duhseati ijierare ti muhu sa niñe. Muhu dihita sa ni tuhoture tire, ni yuhtiahye tiquina tiquirore.

⁵Tiquina sa ni yuhtiri bato Cohācjū ya wuhupu Juda tiquiro ye niñeru cjoerire doque site cūahye. Doque site cū, wahaa wahahye. Waha, yuta dare duhte ohō, tiquiro basi wamūare tu suha, uhpu cjū sa, yariaa wahahye.

⁶Sa ye pahia puhtoa niñeru cjoerire ne, ohō saha niahye:

—Ahri niñerure Cohācjū wuhu cja acaropu niñeru ihbori acaropu mari cū masiedaja. Ahri niñeru mehnata masunore wejē dutiri. Sa ye mari ye dutiye marine sa ijiye niñerure ihbo dutiare, niahye tiquina basi.

⁷Tiquina sa nidi bato “Ohō saha yeihna”, tiquina ni yahuri bato dihi suturire

yeriquiro ya yehpare dúahye. Ti cjoeri mehna dúahye. Ape sie cjéna tiquina wihi tiquina yariagū tiquina yati yehpa ijiatore ti yehpare dúahye. ⁸ Sa ye ti yehpare “Dii yehpa”, wame yeri masa. Yojopu gūhure sata wame tire. ⁹ Ahri ijipihtiye sa wahahye Jeremia panopu “Sa waharota”, tiquiro ni ojoariro sahata. Tiquiro Cohācjū yere yahu muhtariquiro ijiyahye. Ohō saha ni ojoahye tiquiro: “Treinta niñero cjoerire plata cjoerire ‘To punota wapa yenata tiquirore usā ñe-heaire’, nieta Israe masa. ¹⁰ Sa ye ti cjoeri mehna dihi suturire yeriquiro ya yehpare dúeta tiquina. Ohō sahata yuhure ye dutiri Cohācjū”, ni ojoahye Jeremia panopu.

Pilato Jesure sinituahye

(Mr 15.2-5; Lc 23.3-5; Jn 18.33-38)

¹¹ Sa ye Pilatore tiquina ohori bato tiquiro pehe Jesure sinituahye:

—¿Potota judio masa puhtota ijiajari mūhu? ni sinituahye Jesure.

—Mūhu nino sahata ijiaja, ni yuhtiahye Jesu.

¹² Sa ni yuhtieperota, pahia puhtoa, bucuna gūhu tiquina tiquirore yahusāgū yuhtierahye Jesu. ¹³ Tiquiro sa yuhtieragū ihñano Pilato sinituahye:

—¿Ahri ijipihtiye mūhure tiquina yahusārire tuhoerajari mūhu? ni sinituahye tiquiro Jesure.

¹⁴ Tiquiro sa ni sinituepegūta Jesu ne mehenogā yuhtierahye. Tiquiro sa yuhtieragū ihñano Pilato ne dūhse ni masiedahye.

Jesure wejē dutiahye

(Mr 15.6-20; Lc 23.13-25; Jn 18.38-19.16)

¹⁵ Cūhmaripe pascua ijigū masa yaquiro ijiatiquirore ihcāquiro peresupu ijiriquirore Pilato sa wio basaducue tiahye. ¹⁶ Ti pjere Barrabá wame tiriquiro peresupu ijiyahye. Tiquirore

masiahye masa. ¹⁷ Sa yero tiquina cahmecoagū Pilato pehe sinituahye tiquinare:

—¿Diquiro pehere musare wio basaboagari yūhu? ¿O Barrabá pehere o Jesure Cristo tiquina nidiquirore wio basaboagari yūhu? ni sinituahye tiquiro.

¹⁸ Jesure masa cahīgū ihñañe judio masa mari puhtoa tiquirore ihña tuhtiahye. Sa ihña tuhtiyehye tiquirore ohoahye Pilatore. Sa yero masa tiquina cahīdi buhiri tiquina ihña tuhtirire masino Pilato Jesure wio duamahye.

¹⁹ Sa ye Pilato masare ñañe yeyequinare tiquiro beseri pahtapu dujigū tiquiro namono tiquirore quti ohoahye: “Mia ñamine Jesure quehēgo, tutuaro ñano yūhdū. Sa yegu tiquirore ñañe marieniquirore ne sijoro saha yeracāhña mūhu”, ni yahudoqueoahye tiquiro namono Pilatore.

²⁰ Sa ye coā waropure pahia puhtoa, bucuna gūhu masare ohō saha ni duti tuhasahye. “Barrabá pehere wio duti, Jesu pehere wejē dutiya”, ni dutiahye masare. ²¹ Sa yero Pilato masare sinituahye:

—¿Ahriquina puarore diquiro pehere musare wio basaboagari yūhu? ni sinituahye.

—Barrabá pehere wio basaya usāre, ni yuhtiahye.

²² —¿Ahriquiro Jesu Cristo tiquina nidiquiro pehere dūhse yeitari yūhu, musa sa ni sañuducugū? ni sinituahye tiquiro.

—Curusapu quē biha wejēña tiquirore, ni yuhtiahye masa ijipihtiyequina.

²³ —¿Yabe borore ñañene yeari ahriquiro, musa sa nigū? niahye tiquiro.

Tiquiro sa nigū tuhoeye tiquina tutuaro mehna sañuducuahye:

—Curusapu quē biha wejēña tiquirore, ni sañuducuahye masa tiquirore.

²⁴Tiquina sa ni sañuducugū tūhoro, tiquirore tiquina tūho dueragū ihñano “Masa usua, cahmequeboaga”, nino, yuhtiro ohō saha yeahye Pilato. Masa tiquina ihñonopu tiquiro omo coseahye. Sa omo cosero ohō saha niahye.

—Ahriquiore wejēdi buhiri yee buhiri ijierare. Mūsa ye buhiri ijire, nino omo coseahye.

²⁵Tiquiro sa nigū tūhoye ijipihtiyequina masa ohō saha niahye.

—Ahriquiore wejēdi buhiri usā, usā pohna gūhu usā ye buhiri ijiahro, niahye masa.

²⁶Tiquina sa nigū tūhoro Pilato Barrabāre peresupu ijiriquiore wio dutiahye masa tiquina cahmeniquiore. Sa ye tuhasa Jesu pehere yuta dari mehna tana duti, tiquirore curusapu wejē dutiro ohoahye surarare.

²⁷Tiquiro sa ohogū Pilato ya wūhupu tiquiro yequina surara Jesure neñe esahye. Sa ye tiquina surara ijipihtiyequina Jesu cahapu cahmecoahye. ²⁸Sa ye tiquiro suhtire tu we ne, puhtoro ya suhtiro saha bajuri suhtirore tiquirore sāahye. ²⁹Sa sāa tuhasa, pota behtore ye tuhasa, tiquiro dapu bui duhu peoahye. Sa duhu peo tuhasa, yucugure pota pehe dahra suhahye. Dahra suha tuhasa, dūsepe curi mehna quehe sa, bujupeahye tiquirore.

—Quehnoano ahtaya. Judio masa puhto, quehnoano ahtaya, ni bujupeahye tiquirore.

³⁰Sa nieta tiquirore sihco puti ohō, tiquina dahra suhadure tiquirore tuā we ne, tiquiro dapure quēahye tū mehnata.

³¹Tiquina sa bujuperi bato tiquina sāari suhtirore tu we ne, tiquiro ye suhti pehere sāahye tja. Sāa tuhasa, curusapu wejēne tehe, tiquirore ne wijiahye.

Tiquina Jesure curusapu quē biha, wejēahye

(Mr 15.21-32; Lc 23.26-43; Jn 19.17-27)

³²Tiquirore ne cā, Simo wame tiriquiore Cirene cūñore piti ca, tiquirore Jesu wuari curusare wua cā dutiri.

³³Wua cā Gólgota wame tiropu esari. “Gólgota”, nino “Dapu pehtoro”, nino nine. ³⁴Sa ye vinore suēñe co mehna tiquina moreñe core Jesure ohomedi. Ti acore sihni tuhu, sihniedari tiquiro.

³⁵Sa ye Jesu ye suhtire tiquina tu we nedu bato tiquirore curusapu quē bihari tiquina. Sa quē biha tuhasa, tiquiro ye suhtire “¿Noa yaro ijirrotari ohō?” ni, cahme doqueperi, ni ojoahye panopu. ³⁶Doquepe tuhasa tiquirore ihña dujiducuri tiquina. ³⁷Tiquiro dapu bui curusapu ohō saha ni ojoari pñine duhu ohōri tiquina tiquiro ñañe buhirire yahu duaye. “AHRIQUIRO JESU JUDIO MASA PUHTORO IJIRE”, ni ojoari tiquina ti pñine.

³⁸Came puaro yaque bucunare Jesu cahapu apeye curusaripu quē biha docori tiquina. Ihcāquiro tiquiro pota pehe, apequiro tiquiro cū pehe pehe quē biha docori tiquina. ³⁹Curusari cahapu yūhdu cānequina Jesure ihña, tiquina dapu pacare yure, tiquirore ñano yahuducuri:

⁴⁰—¿Cohācjū wūhure cohā, ihtia deco wahaboro pari turi ti wūhure dahreborigu ijijari mūhu? Cohācjū macu ijigu mūhu basi dijia taya. Sa yegu mūhu basi yedohoya, nidi masa.

⁴¹Sata ni bujuperi tiquirore. Pahia puhto gūhu, marine judio masare buheyequina gūhu, bucuna gūhu tiquirore sa ni bujuperi.

⁴²—Tiquiro apequinare yūhduoriquiro ijiro tiquiro basi gūhu yūhduoahro. “Israe masa puhto ijijaja”, nimene tiquiro. Sa yena tiquiro basi

dijia tagū ihñana tiqiore wacū tutuanata. ⁴³Tiqiuro pehe Cohācjūre wacū tutuamene. Sa yero “Cohācjū macū ijiaja”, nimene tiqiuro. Tiqiuro sa ijigū Cohācjū pehe tiqiore yedohoahro, ni bājūperi tiquina.

⁴⁴Yaque bucūna tiqiuro cahapū tiquina quē bihanohriquina sata tiqiore bājūpe, ñano yahuducuri tiquina gūhū.

Jesu yariaa wahahye

(Mr 15.33-41; Lc 23.44-49; Jn 19.28-30; He 6.19-20; 10.19-20)

⁴⁵Sa ye coheri pje ijigū ihtia hora waro ijipihtiropū nahitiano ijiri. ⁴⁶Sa yero ti pjere nahitia yūhdūgū waro Jesu tutuaro sañuducuri:

—¿Elí, Elí lema sabactani? nidi tiqiuro. Sa nino ohō saha nino niahye: “¿Yūhū Pacū, yūhū Pacū, dūhsegū yūhūre cohājari mūhū?” nino nidi.

⁴⁷Tiqiuro sa nigū tūhoye ihquēquina topū ducuyequina ohō saha nimedi:

—Cohācjū yere yahu mūhtariqiore Eliare pijioro niboaga, nimedi tiquina.

⁴⁸Sa yero ihcāqiuro tiquina mehna cjūno oma cā, aco ihmini suhte mehna vino suēne core soha tuhasa, yucūgū sohtoapū dūhte ohō, Jesu cahapū esa, tiqiore sihōmedi. ⁴⁹Tiqiuro sa yegū ihñāne apequina sihōriqiore ohō saha nidi:

—Cohteniña. Elia ahriqiore tiqiuro yūhdūogū ihñāhna mari, nidi apequina.

⁵⁰Tiquina sa nidi bato pari turi sañuducu, Jesu pehe yariaa wahari.

⁵¹Tiqiuro yariagūta Cohācjū wūhū cjā suhtiro cahsero, topū tiquina cahmotari cahsero deco tūhū maa dijia, cjū saa wahahye. Sa yero yehpa gūhū ñuhmidi. Sa ñuhmigū utā paca bājūye paca wahtia wahari. ⁵²Sa ye masa coperi parīgū, peyequina Cohācjū

yequina mūna panopū yariariquina mūna masa wijiahye. ⁵³Masa wijia, Jesu masa wijari bato ti coperire cohā cā, quehnoari macapū Jerusalēpū wahari tiquina. Topū tiquina wahagū peyequina masa ihñāhye tiquinare.

⁵⁴Sa ye ti ijipihtiyere ihñāne, yehpa ñuhmigū ihñāne, surara pūhtoro tiqiuro yequina surara mehna ihñā maria wahari. Tiquina Jesure curusapū ijiriqiore cohteyequina ijiri. Ihñā maria waha, ohō saha nidi:

—Ijirota ijire. Ahriqiuro Cohācjū macūnota ijimeya, nidi tiquina.

⁵⁵Sa ye Galileapū Jesu mehna ahtariquina numia tiqiore yedohoriquina numia yooropū tiqiore curusapū ijiriqiore ihñaducuyequina nidi. ⁵⁶Tiquina numia mehna María Magdalena ijiri. Apecoro María wame tiricoro gūhū ijiri. Ticoro pehe Santiago, José gūhū pacoro ijiri. Apecoro Zebedeo namono ijiri.

Jesu pagure masa copepū cūahye José

(Mr 15.42-47; Lc 23.50-56; Jn 19.38-42)

⁵⁷Sa ye ñamicahapū José Arimatea cjūno doeri cjē upūro topū wihiahye. Tiqiuro Jesu buheriqiuro ijiri. ⁵⁸Wihi, Pilato cahapū esa, Jesu pagure siniahye. Tiqiuro sa sinigū tūhoro Jesu pagure tiqiore oho dutiahye Pilato. ⁵⁹Tiqiuro sa dutiri bato José pehe tiqiuro pagure ne dijio, quehnoari suhtiro wete marieni suhtiro mehna tiqiuro pagure wahmeahye. ⁶⁰Wahme tuhasa, José tiqiuro ya masa copepū cūahye Jesu pagure. Ti cope tiquina utāpū seheri cope wahma cope ijiri. Ti copepū ne sajā duhu cū tuhasa, pajiria utāre tu torē cāhye tia mehna bihoro taro. Biha tuhasa, waha wahahye. ⁶¹Sa ye María Magdalena, apecoro María mehna ti copere ihñā dujiducuahye.

Jesure tiquina cūri copere surara cohteahye

⁶²Sa ye ape deco, pascua ijiatire tiquina quehñori deco bato, saurú ijigū pahia puhto, fariseo masa gūhu Pilato cahapu cahmecoahye. ⁶³Cahmeco tuhasa ohō saha niahye tiquina Pilatore:

—Puhto, tiqiro ni mehoriquiro Jesu catiro ohō saha niahye: “Ihtia deco wahaboro masa wijiagutja yūhu”, niahye tiqiro. ⁶⁴Tiqiro sa nidiqiro ijigū tiqiro buheyequina pehe tiqiro pagure yaqueboaga. Sa yaqueye masare ohō saha niboaga: “Jesu masa wijiari”, niboaga tiquina. Tiqiro Jesu pehe masare ni mehono nidi. Sa ijiepegūta tiqiro buheyequina pehe “Tiqiro masa wijiari”, niñe, ni mehoñe nieta. Sa yero Jesu tiqiro ni mehoriro yūhñoro tiquina ye ni mehoñe pehe ña yūhñarota. “Sa yaqueari”, nigū ihtia deco waro tiqiro masa copere mūhu yequina surarare cohte dutiya, niahye tiquina Pilatore.

⁶⁵Pilato yūhtiahye:

—Au. Ti copere cohteahro. Sa yena mūsa gūhu mūsa ye masino puno ti copere quehnoano cohteya, niahye tiqiro tiquinare.

⁶⁶Tiqiro sa nigū tiquina waha, ti copere biharia utā mehnarūta ñehogūpūta wihtā ñeheahye masa tiquina sajāgū ihña masiñe tehe. Sa ye surarare ti copere cohte dutiahye.

Jesu masa wijiahye

(Mr 16.1-8; Lc 24.1-12; Jn 20.1-10)

28 Sa ye judio masa mari sori deco saurú pehe yūhdugū domingo ijigū ñami cjūnogā ijigū María Magdalena apecoro María mehna Jesu masa copere ihñañe wahahye. ²Sa yero duita yehpa tutuaro ñuhmiahye. Sa ñuhmigū mari puhtoro tiqiro yaqiro angel uhmusepū ijiriquiro dijia ta,

masa copere biharia utāre tu torē cā, tia bui dujiahye. ³Upo miadoqueoro yero saha quehnoano asi siteahye tiqiro. Sa ye tiqiro suhti ehmeo curua yero saha quehnoano yehseye suhti ijiahye. ⁴Tiqiro sa bajuagū ti copere cohteyequina surara cue yūhdūye, nanare yūhdūa waha, buigā warona yaria yūhdūa wahahye. ⁵Sa yero angel pehe tiquina numiare ohō saha niahye:

—Yūhñe cueracāhña. Curusapu tiquina quē bihariqiro, Jesure mūsa macagū masiaja yūhu. ⁶Tiqiro yojopure ohōre mariedare. Tiqiro nidiro sahata masa wijiāa wahari. Tiqiro pagure tiquina cūrirore ihñana ahtaya. ⁷Sa yena tiqiro buheyequina cahapu umññano waha, ohō saha ni yahuna wahaya: “Jesu masa wijiari. Sa yero mūsa pano Galileapu tiqiro wahayurota. Topū tiqirore ihñanata mūsa”, ni yahuna wahaya mūsa. Ahrita ijire mūzare yūhu yahuri qiti, niahye angel tiquina numiare.

⁸Tiqiro sa nidi bato tiquina numia masa copepū ijiye numia sojaro mehna wijiā, tiqirore cuepeta bucue yūhdūye mehna Jesu buheyequinare yahuye oma cāa wahahye. ⁹Sa wahayequina numiare Jesu piti ca, ohō saha niahye:

—¿Quehnoano ijijari mūsa? niahye tiqiro.

Tiqiro sa nidi bato, tiquina pehe tiqiro cahapu esa, dahpocārine ñehe, tiqirore ño peoahye.

¹⁰—Cueracāhña mūsa. Yūhu bahanare “Galileapu wahaya”, ni yahuna wahaya. Topū yūhñe ihñaeta tiquina, niahye Jesu tiquinare.

Masa copere cohteyequina surara tiquina ihñarire yahuahye

¹¹Tiqiro sa nidi bato numia wahari watoa ihquēquina masa copere cohteriquina mehna cjēna surara, Jerusalēpū pahia puhtoare ijipihtiyere

yahu pehoye wahahye. Jesu tiqiro masa copere wijiarire yahu peho cāhye. ¹²Tiquina sa ni yahugū pahia puhtoā, judio masa mari bucna mehna cahmecoahye. Cahmecoā, yahuducuahye. Sa yeye surarare ni meho dutiye niñerure wapa yeahye.

¹³—Ohō saha niña mūsa masare: “Ñami usā carīdi bato tiqiro buheyequina pehe masa copere wihi, tiqiro pagure ne cāri jiri”, ni yahuya masare. ¹⁴Mūsa sa ni yahugū Pilato pehe mūsa carī yuhduarire tuhoboaga. Tiquiro sa tuhogū, “Mūsa tuhtiari”, nina, mūsa yahu basanata usā tiqirore, niahye tiquina surarare.

¹⁵Tiquina sa nidi bato surara pehe niñerure ñehe, tiquinare tiquina ni meho dutiriro sahata masare yahuye wahahye. Sa ye tiquina ni mehoriro sahata Jesu tiqiro masa copere wijiarire yahuducuri judio masa. Yojopū gūhure sata nine tiquina.

**Jesu tiqiro yere buhe dutiro
ohoahye tiqiro buheyequinare**

(Mr 16.14-18; Lc 24.36-49; Jn 20.19-23)

¹⁶Sa ye usā Jesu buhena once buhena cunupū Galileapū ijidupū Jesu

tiqiro waha dutidupū wahau usā. ¹⁷Topū esa, Jesure ihñana, ño peou usā tiqirore. Sa ño peopenata, usā ihquēquina “Ahriqiro Cohācjū macuno ijieraboaga”, ni tuhotumi. ¹⁸Usā sa ño peogū tiqiro pehe usā cahapū wihi, ohō saha nidi:

—Ahri yehpapure, uhmūsepe gūhure Cohācjū ijipihtiyequina bui tutuayere ohori yūhure. ¹⁹Tiqiro sa ohogū ohō saha dutiaja mūsa: Ijipihtiro cjēnare yeere buhena wahaya. Yeequina tiquina wahatire buhena wahaya. Sa yena mari Pacu wame mehna, yūhū wame mehna, Espiritu Santo wame mehna tiquinare wame yeya. ²⁰Sa yena mūsa yūhū dutirire tiquina ye pehoatire buheya tiquinare mūsa. Sa yena ahrire yūhū niatire wacūña: Ijipihtiye decori ahri yehpa ijiro puno mūsa mehna sa ijiducugutja. Mūsa mehna yūhū sa ijiducuatire wacūña mūsa, ni yahuri usāre Jesu.

San Marcos

Ñu wame yeriquiro buhe ducahye

(Mt 3.1-12; Lc 3.1-9, 15-17; Jn 1.19-28)

1 Ahri pūpū Jesucristo Cohācjū macuno tiquiro yerire quehnoañe buheyere yahu ducaja. ²Cohācjū yere yahu mūhtariquiro mūnano Isaia tiquiro ojoariro sahata yahuye ijire. Ohō saha ni ojoahye tiquiro:

Cohācjū tiquiro macunore ohō saha niahye: “Mūhū pano mūhūre yahuyuatiquirore ohoyugū niaja.

³Sa yero tiquiro masa marienopū waharota. Tiquirore tuhoyequinare yahuro sañuducurota: ‘Mari pūhtoro tiquiro ahtato pano mahare mari quehnoyuro saha quehnoana ijyuya mūsa. Mūsa ñañe yerire bújua witiya,’ ni sañuducurota,” niahye Cohācjū, ni ojoahye Isaia.

⁴Ñu wame yeriquiro masa marienopū buhee tiahye.

—Mūsa ñañe yerire bújua witiya. Yo-jopūre quehnoañe pehere comesaya. Sa yena wame yenohrina ijyia. Mūsa sa comesagū ihñano Cohācjū mūsa ñañe yerire borota, ni buhee tiahye tiquiro.

⁵Sa yero ijipihtiyequina Judea dihta cjē macari cjēna Jerusalē cjēna mehna tiquiro cahapū esagū ihñañō Ñu pehe Jordā wame tiri mapū wame yeahye tiquinare. Tiquinare tiquiro wame yegū tiquina pehe tiquina ñañe yerire yahu yūhdūahye Cohācjūre.

⁶Sa yero Ñu camello poari suhtirore sañariquiro wahiquina cahsero mehna tūā dihoriquiro ijyahye. Poreroare, umiquina nūcū cjēna umine ihyae tiahye. ⁷Sa yero ohō saha ni buhee tiahye.

—Yūhū bato yūhū yūhdūoro tutuariquiro ahtarota. Quehnoa yūhdūariquiro ijire tiquiro. Tiquiro

yero saha ijieraja yūhū pehe. Sa yegū tiquirore tuhotugū, “Ihyo ijigū ijiaja yūhū”, ni tuhotuaja yūhū. ⁸Mū sare wame yegū aco mehna wame yei. Tiquiro pehe yūhū yūhdūoro yerota. Espiritu Santore masa mehna ijiducugū yerota, ni buhee tiahye Ñu.

Ñu Jesure wame yeahye

(Mt 3.13-17; Lc 3.21-22)

⁹Sa ye ti pjere Jesu Nazarepū Galilea yehpapū ijiri macapū ijiriquiro Jordā wame tiri mapū esahye. Topū tiquiro esagū Ñu wame yeahye tiquirore. ¹⁰Tiquiro wame ye tuhasagū Jesu diapū ijiriquiro maja sadūca ūhmūanopū ihñā mūoahye. Ūhmūse parī maa wahahye. To parī maagūta Espiritu bujua yero saha Jesu bui dijia tahye. ¹¹Sa yero ūhmūsepū yahuducuro ca tahye:

—Mūhū yūhū macū yūhū cahīgū ijire. Mūhū mehna tutuaro bucueaja, nino ca tahye ūhmūsepū.

Satana ñañene ye dutimahye Jesure

(Mt 4.1-11; Lc 4.1-13)

¹²Ti pjere Jesure masa marienopū Espiritu Santo neahye. ¹³Topūre esaro cuarenta decori waro ijyahye. Watīno pehe Jesu tiquiro ñañene yegū ihñā duaro ñañene ye dutimahye tiquirore. Sa yero Jesu wahiquina nūcū cjēna mehna ijyahye. Topū tiquiro ijigū ihñañe angele pehe tiquirore yedohoahye.

Jesu Galilea yehpapū buhe ducahye

(Mt 4.12-17; Lc 4.14-15)

¹⁴Sa ye Ñure peresupū tiquina biha daporī bato Jesu pehe Galilea yehpapū quehnoañe buheyere Cohācjū pūhtoro ijyere yahuro wahahye. ¹⁵Ohō saha ni yahuahye:

—Yo-jopūre ohō saha ijire. Cohācjū tiquiro pūhtoro ijyato mehenogā dūhsare. Mūsa ñañe yerire bújua witiya. Sa yena quehnoañene comesaya.

Quehnoañe buheyere tuhoya musa, ni buhee tiahye Jesu.

**Jesu pititiaro wahi
yohyeyequinare “Yuhu mehna
cjāna ijiana ahtaya”, niahye**

(Mt 4.18-22; Lc 5.1-11)

¹⁶Tire yahu tuhasaro Galilea wame tiri ditara duhtu cahapu esaro, ihñahye Simore, tiqiuro bahuro Andre mehna. Tiquina wahi yohyeyequina ijiahye. Sa ye tiquina wēñecjare doque ñoñe niahye ti ditarapu.

¹⁷—Yuhu mehna cjāna ijiana ahtaya musa. Yuhu mehna musa ahtagū musa wahire ñehe cahmecoana musa ijiro saha Cohācjū yequina ijiatiquinare masare piji cahmecoana ijigū yeitja musare. Yuhu mehna musa ahtagū sa yeanajare cūtja musare, niahye Jesu.

¹⁸Tiqiuro sa nigū tuhoye tiquina wēñecjare cū cā, tiqiuro mehna wahahye.

¹⁹Sa ye tiquina mehenogā yuhdu cā, Santiagore, tiqiuro bahuro Ñu gūhure boca sahye tja. Tiquina pehe Zebedeo pohne ijiahye. Tiquina yaria yucusapu wēñecjare quehnoñe niahye. ²⁰Sa yero tiqiuro pijjogū tiquina pehe tiquina pacurore, tiqiurore yedohoyequina mehna yucusapu cū cā, Jesu mehna wahahye.

Watjare cuoriqiuro Jesure piti cahye

(Lc 4.31-37)

²¹Sa ye tiquina Capernau wame tiri macapu esahye. Sa yero saurū ijigū judio masa buheri wuhupu buhero esahye tiqiuro. ²²Sa yero tiqiuro quehnoano masi pehoriqiuro buhero usā judio masare buheyequina yero saha ijierahye tiqiuro. Tiquiro sa buhegū ti maca cjēna tuho maria wahahye. ²³Ti pjere ti wuhupu ijiriqiuro watjare cuoriqiuro ijiahye. Sa yero ohō saha niahye Jesure:

²⁴—Muhu Jesu Nazare cjū cariboeracāhña usāre. ¿Duhse yei tūu niajari usāre? ¿Muhu usāre butigū yei tūu niajari? Cohācjū macu quehnoagu muhu ijigū yuhu masiaja, ni sañuducuahye tiqiuro Jesure.

²⁵Tiqiuro sa nigū tuhoro Jesu tuhtiahye watjare:

—Dihta mariahña. Duhuya tiqiurore, niahye Jesu.

²⁶Sa yeye watia tiqiurore yehpapu doque quehe sa tunugū yeye, tiqiuro tutuaro sañuducuri watoa duhuahye tiqiurore. ²⁷Sa ye ijipihtiyequina ti wuhupu dujiyequina acua yuhdua waha, ohō saha niahye:

—Ahyou. ¿Ahri wahma buheye ijiahari? Tiqiuro puhtoro yero saha dutire watjare. Tiqiuro dutigū tiquina watia pehe yuhducaerare tiqiurore, ni yahuducuahye ti wuhupu dujiyequina tiquina basi.

²⁸Sa ye meheñe decori batota duita ijipihtiyequina Galilea yehpa cjēna tire tiqiuro sa yerire tuhoahye.

**Jesu Simo Pedro mareonore
duti yuhdugū yeahye**

(Mt 8.14-15; Lc 4.38-39)

²⁹Sa ye Jesu gūhu judio masa buheri wuhupu ijiriquina wijiaa wahahye. Tiquina sa wijiaro bato Jesu, Santiago, Ñu, apequina tiquina mehna cjēna gūhure, Simo, tiqiuro bahuro Andre mehna tiquina ya wuhupu siho saja sahye. ³⁰Ti pjere Simo mareono ujuaye dohatiricoro cuñano bui ticoro cuñagū ihñañe yahuahye Jesure. ³¹Tiquina sa ni yahugū tuhoro tiqiuro pehe ticoro cahapu esaro, ticoro omocare ñehe, ticorore weje wahcō dapoahye. Tiquiro sa weje wahcō dapogūta ticorore ujuaye surua wahahye. Ti sa sururi bato ticorota ihyayere peoahye.

**Jesu peyequina
dohatiyequinare yuhduoahye**

(Mt 8.16-17; Lc 4.40-41)

³² Ñamicahapũ asũ sajãri bato masa peyequina dohatiyequinare, watia cuoyequinare Jesu cahapũ ne sahye. ³³ Sa ye ijipihtiyequina ti maca cjẽna cahmecoa duca sahye ti wuhũ sopecahapũ. ³⁴ Sa yero Jesu peyequina dohatiyequinare, peyequina watia cuoyequinare quehnoa wahagũ yeahye. Peyequina watiare cohãhye. Sa yero Jesure watia tiqiurore masigũ ihñano Jesu pehe tiquinare yahuducu dutierahye.

Jesu buhe tinino wahahye

(Lc 4.42-44)

³⁵ Sa ye ñami cjũno wahcã, nahitia cjũgũ masa marienopũ Cohãcjũre sinino wahahye Jesu. ³⁶ Tiquiro sa wahagũ ihñañe Simo gũhũ tiqiurore macañe esahye. ³⁷ Sa ye tiqiurore piti caye, ohõ saha niahye:

—Masa ijipihtiyequina muhũre macañe nidi, niahye tiquina.

³⁸ Tiquina sa nigũ tuhoro ohõ saha niahye Jesu:

—Ahri macarine buhegũ ahtaũ yuhũ. Sa yena apeye macari ohõ cahagã cjẽ macaripũ wahauhna mari. Yuhũ ti macari gũhũre buheitja, niahye Jesu tiquinare.

³⁹ Sa yero ijipihtiye Galilea yehpare buhe tiniahye. Sa yero macaripe judio masa buheye wuhusepũ buhero, watiare masa mehna ijiyequinare cohã wioahye.

**Jesu cami bucũ muna
wihirore yuhduoahye**

(Mt 8.1-4; Lc 5.12-16)

⁴⁰ Sa ye apequiro dohatiriquiro cami bucũ muna wihiro Jesure piti caro dũsepe curi mehna quehe sa siniahye:

—Muhũ yuhũre yuhduo duagu yuhduoya, niahye cami bucũ muna wihiro.

⁴¹ Tiquiro sa nigũ tuhoro Jesu tiqiurore paja ihñahye. Sa yero tiqiuro omocare siõdoqueo tiqiurore ña peoahye. Sa ña peoro ohõ saha niahye:

—Tire ye duaja. Quehnoagu ijiya muhũ, niahye Jesu.

⁴² Tiquiro sa nigũta tiqiuro cami ahbari yati maa wahahye. Quehnoa wahahye tiqiuro. ⁴³ Tiquiro sa wahagũ ihñano Jesu tiqiurore tutuaro mehna yahuahye:

⁴⁴ —Apequinare ahrire yahu siteracãhña. Sa yahuerapegũta muhũ pagure pahire ihñoña. Cohãcjũ dutiye Moiserre tiqiuro cũriro sahata yeya. Sa yegu minicjuare ohoya pahire muhũ quehnoagu muhũ waharire masare muhũ ihñoatire, niahye Jesu. Sa ni tuhasa “Wahaya”, niahye tiqiurore.

⁴⁵ Tiquiro sa yahu dutierapegũta tiqiuro waha, ijipihtiye macari cjẽnare Jesu yerire yahuahye. Tiquiro sa yahuri bato Jesu masa peyequina ijiropure waha masiedahye. Sa yero tiqiuro meheñequinagã ijiropũ ijiyahye. Topũ tiqiuro ijigũ peye macari cjẽna tiqiuro cahapũ esahye.

**Jesu tini masieniquirore
tinigũ yeahye**

(Mt 9.1-8; Lc 5.17-26)

2 Meheñe decori bato Jesu Capernaupũ tojoa wahahye. Wuhũpũ tiqiuro ijigũ masa tuhohahye. ² Sa ye topũ masa peyequina cahmecoa, ti wuhũre wahpa wijiadũca saa wahahye. Sa yero Jesu tiquinare quehnoañe buheyere yahuahye. ³ Sa ye apequina gũhũ ahta, pititiaro umũa tini masieniquirore ne wihiahye. ⁴ Tiquina masa peyequina ijigũ ihñañe Jesu cahapũ sajã masiedahye. Sa ye tiquina wuhũ buipũ muji pahmare

ne wedoqueo, Jesu bui waro meheni copegã dahre, tini masieniquirore tiqiro cuñari cahsero mehna duhu dijioahye Jesu caha waro. “Jesu ahrikirore tiqiro dohatiyere yuhdugũ yerota”, ni tuhoutuahye tiquina. ⁵Tiquina sa ni tuhoutugũ masino Jesu pehe dohatiriqirore ohõ saha ni yahuahye:

—Yũhũ macũ, mũhũ ñañe yerire cohã tuhasaũ, niahye Jesu tini masieniquirore.

⁶Tiqiro sa nigũ tuhoye, usã acaye judio masare buheyequina topũre dujiyequina tiquina basi ohõ saha ni tuhoutumahye: ⁷“Ahrikirore sa ni yahuducueracãhdo. Cohãcjũre ñano yahuducuro nine tiqiro. Masũno mari yero saha ijirikirore ijire tiqiro gũhũ. Sa yero tiqiro ahrikirore ñañe yerire cohã masiedare. Cohãcjũ dihita masa tiquina ñañe yerire cohã masine”, ni tuhoutumahye tiquina. ⁸Tiquina sa ni tuhoutugũ ihñano Jesu tiquina tuhoutuyere masino ohõ saha niahye:

—¿Duhse yena mũa sa ni tuhoutuajari? ⁹“Mũhũ ñañe yerire cohã tuhasaja”, yũhũ nigũ, “Ni mehoga ijire”, yũhũre nina nine mũa masiedapenata. Tiqiro tini masieniquirore “Wahcãdũca, wahaya”, yũhũ nigũ, tiqiro tinigũ ihñana yũhũ nidi potota ijigũ duita masinata mũa. ¹⁰Yũhũ masũ Cohãcjũ ohorigũ ahri yehpapũre masa tiquina ñañe yerire cohã masiaja yũhũ. Yũhũ sa cohãrire mũa masiato saha ohõ saha tiqiro wahagũ yeitja, niahye Jesu judio masare buheyequinare.

Sa ni tuhasa tini masieniquirore ohõ saha niahye:

¹¹—Mũhũre niita niaja. Wahcãdũcaya. Mũhũ cuñari cahserore ne cãhña mũhũ ya wũhũpũ, niahye Jesu tiqirore.

¹²Tiqiro sa nigũta tini masieniquirore wahcãdũca sa, tiqiro cuñari cahserore

ne, ijipihitiyequina tiquina ihñono wijiã wahahye. Tiqiro sa yegũ ihñañe tiquina ijipihitiyequina ihña acũaa wahahye. “Cohãcjũ tutuarikirore ijire. Ne mari ohõ saha yegũre ihñeda tii”, niahye tiquina basi.

Jesu Levire “Yũhũ mehna cjũ ijiajũ ahtaya”, niahye

(Mt 9.9-13; Lc 5.27-32)

¹³Sa ye pari turi Jesu ditara duhtũ cahapũ wahahye. Sa yero masa peyequina tiqiro cahapũ tiquina cahmecoagũ ihñano tiqiro buheahye tiquinare. ¹⁴Sa ye tuhasa topũ ijirikirore waharo Levire Alfeo macũnore tiqiro dahrari tucũpũ boca sahye. Apequina mehna pũhtoa ye ijiatire wapa ne cohteyequina ijiahye Levĩ gũhũ. Tiqirore boca saro ohõ saha niahye:

—Yũhũ mehna cjũ ijiajũ ahtaya mũhũ, niahye Jesu Levire.

Tiqiro sa nigũ Levĩ pehe wahcãdũca sa, Jesu mehna wahahye.

¹⁵Jesu mehna wahayequina peyequina ijiahye. Sa yero Levĩ ya wũhũpũ mesa cahapũ peyequina wapa ne cohteyequina mehna, “Ñano yeyequina”, tiquina niñequina mehna tiqiro buheyequina mehna dujiahye Jesu. ¹⁶Topũ tiquina dujiri bato apequina usã judio masare buheyequina, fariseo masa mehna Jesu tiqiro ihyagũ ihñahye tiquina. Sa ihñañe ohõ saha niahye:

—¿Duhsero ñano yeyequina, wapa ne cohteyequina mehna ihyajari Jesu? ni sinituahye judio masare buheyequina Jesu buheyequinare.

¹⁷Tiquina sa nigũ tuhoro queoye mehna yũhtiahye Jesu:

—Dohatiyequina duturure macaedare. Dohatiyequina dihita duturure macare. Ñañequina dohatiyequina yero saha ijire. Sa yegũ ñañequina dihitarẽ tiquina ñañe yerire

bɔjɔa witi duti, quehnoañe pehere tiquinare comesagũ yegu tagu nii yũhũ. Tiquina basi “Quehnoana ijiaja usã”, ni tũhotuyequinare yedohogu tagu niedu yũhũ, niahye tiquiro tiquinare.

Sijiyere Jesure sinituahye apequina

(Mt 9.14-17; Lc 5.33-39)

¹⁸Ti pjere Ñu buheyequina, fariseo masa gũhũ Cohãcjũre ño peoye tehe, sije tiahye. Sa ye masa Jesure sinituahye:

—Ñu buheyequina, fariseo masa buheyequina gũhũ Cohãcjũre ño peoye tehe sijire. ¿Dũhse ye muhu buheyequina sijierajari? niahye tiquina Jesure.

¹⁹Jesu tiquiro tũhotuye mehna queoye mehna buhero tiquinare ohõ saha ni yũhtiahye:

—Ohõ saha ijire ti: Omoca dũhteriquiro bose deco ijigũ tiquiro mehna cjẽna bɔjɔa witiro mehna ijierare. Sa ye sijiyequina ijierare. Sata yũhũ buheyequina gũhũ yũhũ mehna ijiye, siji masiedare. ²⁰Yũhũ Pacu Cohãcjũ yũhũre tiquiro neari bato pũritare pari turi yũhũ buheyequina mehna ijisi yũhũ. Sa ye ti pjerũ yũhũ buheyequina gũhũ sijieta, niahye Jesu.

²¹Panopũ cjẽ buheye mehna tiquina buhe more duagũ ihñano ohõ saha ni nemoahye Jesu tiquinare queoye mehna buhero.

—Ne wahma cahsero suhtiro cahsero mehna mũnano suhtirore sere ohõno cahmedare. Sa yegũ wahma cahsero mari coseri bato mũnano suhtirore weje cahmecoa, paji yũhũaro tũhũgũ yere. (Sata mũna buheye wahma buheye mehna piti dahre buheraro cahmene.) ²²Sa yena ne uhsẽ co bisiye core wahiquire cahsero ajuropũre mũna ajuropũre pose yeraro cahmene. Sa yegũ uhsẽ co bisiye pahmuñepũ mũna ajurore tũhnũ dijiaa wahare. Ti ajuro tũhnũgũ uhsẽ co gũhũ ajuro gũhũ cohãa wa-

hare. Sa yena uhsẽ co wahma core wahma ajuropũ pose yero cahmene. (Sata wahma buheye mũna buheye mehna buhe moredaro cahmene,) ni buheahye Jesu tiquinare.

Saurũ ijigũ Jesu buheyequina trigo parorire peheahye

(Mt 12.1-8; Lc 6.1-5)

²³Ape deco saurũ ijigũ Jesu gũhũ trigo wesepũ wahahye. Tiquiro buheyequina pehe trigo parorire pehe yũhũ cãhye. ²⁴Tiquina sa yegũ ihñañe ohõ saha ni tuhtiahye fariseo masa Jesure:

—Tũhorĩna usãre. ¿Dũhse ye muhu buheyequina saurũ mari sori deco ijipegũta dahrajari? Mari dutiye yũhũdũcaye nine, niahye tiquina Jesure.

²⁵⁻²⁶Tiquina sa nigũ tũhoro Jesu tiquinare yũhtiahye. “Yũhũ buheyequina yũhũdũcaye niedare”, nino taro ohõ saha niahye:

—Davi mũnano tiquiro mehna cjẽna mehna ujuã ahbaro, Cohãcjũ wũhũpũ sajã, Cohãcjũ ye pãre ihyahye. Sa yero tiquiro mehna cjẽna gũhũre ti pãre ohoahye. Ti pãre pahia dihita ihyae tiahye. Cohãcjũ dutiye tiquina ojoari pũ apequinare ti pãre ihya dutierare. Ti pjere Abiatar wame tiriquire pahia pũhtoro ijiahye. ¿Davi gũhũ tire tiquina yerire Cohãcjũ yere tiquina ojoari pũre buherari musa? (Ti pãre ihyaro Cohãcjũre yũhũdũcaro niedahye. Miare ahri pjerire ihyaye yũhũ buheyequina gũhũ Cohãcjũre yũhũdũcaye niedare,) niahye Jesu tiquinare.

²⁷Sa ni tuhasa ohõ saha ni nemoahye: —Sa yero Cohãcjũ saurũ decore tiquina sori deco cũno, masa ya deco cũno nidi dahra wahyariquinare so dutiro. Ti deco cahãcjẽna ijiatire cũno niedari masare. ²⁸Sa yegu yũhũ masũ Cohãcjũ ohorigũ ahri deco saurũ decore

masa tiquina yeatire yahugu ijigu puhto ijijaja, niahye Jesu tiquinare.

Omoca buhariquiro quti ijire

(Mt 12.9-14; Lc 6.6-11)

3 Sa ye Jesu usā judio masa buheri wuhupū esaro, sajahye tja. Sa yero omoca buhariquiro gūhū topū ijiahye. Sa ye ti wuhupū ijiequina Jesu dihitare ihñadoque ohōahye. ²Saurú ijigū Jesu omoca buhariquirore tiquiro yuhduogū ihña duahye tiquina. Tiquiro sa yegū ihñañe tiquirore yahusā duahye. “Mari sori decore Jesu dahraro nine”, ni yahusā duahye tiquina. ³Sa yero ohō saha niahye Jesu omoca buhariquirore:

—Wahcādūca saya. Ohōpū ahtaya, niahye.

Sa ni tuhasa ti wuhupū ijiequinare yahuahye:

⁴—¿Saurú ijigū quehnoañene yegū quehnoadajari? ¿O ñañe yegū pehere quehnoajari, masa tuhutogū? Saurú ijigū masunore masogū quehnoarīne. Masunore wejēgū pehere quehnoaedare, ni yahuahye Jesu tiquinare.

Tiquiro sa niepegūta tiquina pehe ne yuhtierahye. ⁵Tiquina sa yuhtieragū ihñano Jesu tiquina mehna usuahye. Tiquina tuho dueragū ihñano Jesu bujua witiyahye.

—Muhū omocare siō potoya, niahye tiquiro omoca buhariquirore.

Tiquiro sa nigū tuhoro tiquiro omocare siō potoahye. Tiquiro siō potogūta omoca quehnoa wahahye. ⁶Sa omoca quehnoa wahagū ihñañe fariseo masa wijiaa wahahye. Wijia, Herode mehna cjēna mehna cahmecoa, “¿Duhse ye Jesure wejēnatari mari?” niahye tiquina basi.

Masa peyequina ditara duhtu cahapū ijiahye

⁷⁻⁸Sa ye Jesu tiquiro buheyequina mehna ditara cahapū wahahye. Tiquina

sa wahagū ihñañe Galilea cjēna masa peyequina tiquiro bato esahye. Sa ye Judea yehpa cjēna, Jerusalē cjēna, Idumea yehpa cjēna, Jordā wame tiri ma ape sie pahrē cjēna, Tiro wame tiri maca cjēna, to cahapū ijiequina, Sidō wame tiri maca cjēna, to cahapū ijiequina mehna masa peyequina ijipilhtiequina tiquiro yerire tuhoye, tiquiro cahapū esahye. ⁹Sa ye masa peyequina ijieye, Jesu cahare bihsa dūca sahye. Sa yero Jesu yucusare quehno pahsa dutiahye tiquiro buheyequinare. ¹⁰Peyequina dohatiequinare tiquiro yuhduogū ihñañe apequina dohatiequina gūhū Jesure piha duaye, bihsa dūca sahye. ¹¹Sa ye watiare cuoyequina pehe Jesure ihñañe tiquiro cahapū dusepe curi mehna quehe sahye.

—Muhū Cohācjū macū ijire, ni sañuducuahye tiquina tiquirore.

¹²Sa yero tiquinare Cohācjū macūno tiquiro ijieye tutuaro mehna apequinare yahu dutierahye Jesu.

Jesu tiquiro buheyequinare doce tiquiro ohoatiquinare bese docoahye

(Mt 10.1-4; Lc 6.12-16)

¹³Sa ye Jesu cunupū mūja, tiquiro cahmeñequinare pijiahye. Tiquiro pijigū tuhoye, tiquiro cahapū esahye tiquina.

¹⁴Sa yero doce umuare tiquiro mehna cjēnare, tiquiro ohoatiquinare, apeye macaripure tiquiro yere buheatiquinare bese docoahye Jesu. Sa ye tiquina ya curua Jesu cūriquina wame tiahye.

¹⁵Sa yero dohatiequinare yuhduoatire, watiare cohāti gūhure cūahye tiquinare.

¹⁶⁻¹⁹Ahriquina ijiahye doce umua Jesu tiquiro bese docoriquina: Simo, Santiago Zebedeo macūno, Ñu Santiago bahuro, Andre, Felipe, Bartolomé, Mateo, Tomasu, Santiago Alfeo macūno, Tadeo, Simo celote ya curua cjūno ijimediquiro, Juda Iscariote, ahriquina ijiahye tiquiro bese docoriquina. Jesu

Simore Pedro wame yeahye. Santiagore, Ñu mehna Boanerges wame yeahye. Boanerges “Ūpo cjēna”, nino nine. Juda Iscariote Jesure ihña tuhtiyequinare ihñoatiquiro ijiahye.

**—Jesu watīno tutuayere
cñore, ni yahusāhye masa**

(Mt 12.22-32; Lc 11.14-23; 12.10)

²⁰ Tiquinare bese doco tuhasa, di-
jia, Jesu tiquiro buheyequina mehna
wuhupũ sajāa wahahye. Sa ye topũ pari-
turi masa peyequina cahmecoañe, bih-
saa wahahye. Tiquina sa bihsagũ ihñano
Jesu ihya masiedahye. Sa ye tiquiro
buheyequina gũhũ ihya masiedahye.
²¹ Sa ye apequina Jesu acaye tire tuhoye
tiquiro cahapũ esaye, tiquirore ñe-
hemahye. “Tiquiro tuhõ masieniquiro
waharo nine”, nimahye tiquina.

²² Apequina ohõ saha nimahye:

—Beelzebú tiquirore sa wahagũ yero
niaga. Tiquiro watīare cohãno, Beelzebú
watīa puhtoro tutuaye mehna tiquinare
cohãre, nimahye Jerusalēpũ ahtariquina
usã judio masare buheyequina.

²³ Tiquina sa nigũ tuhoro Jesu pehe
tiquinare piji, tiquiro tuhõtuye mehna
queoye mehna yahuahye tiquinare,
“Watīno ye tutuaye mehna watīare
cohãgũ niedaja”, nino taro.

²⁴ —Watīa tiquina basi cohã
masiedare. Sa ye ihcã yehpa cjēna
tiquina basi cahme wejē, ti yehpa cjēna
yaria pihtia wahaboaga. ²⁵ Sa ye ihcã
wuhũ cjēna tiquina basi cahmequeñe
ti wuhũ cjēna waha pihtia wahaboaga.
²⁶ Sa yero Satana watīa puhtoro
pehe watīare cohãno tiquina basita
cahmequeñe niboaga. Sa ye tiquina
waha pihtia wahaboaga.

²⁷ Ohõ sahata ijire mari queoye
mehna buhegũ. Tutuariquiro ya
wuhupũ apequiro sajā sa yaque
masiedare. Tutuariquirore duhteraro

tiquiro ya wuhupũ sajā sa yaque
masiedare. Tutuariquirore tiquiro
duhteri bato sajā sa yaque masine, ni
yahuahye Jesu.

(Ohõ saha ni yahuahye watīnore
tiquiro yuhduducarire yahuro. Watīno
tutuariquiro tiquiro ijiepegũta Jesu
tiquirore yuhduducare watīare cohãno.)
²⁸ Sa ni tuhasa ohõ saha ni yahu
nemoahye Jesu:

—Poto niita niaga musare. Ijipihtiye
ñañe masa tiquina yegũ tiquina yahudu-
cugũ gũhũre Cohãcjũ bo masine. ²⁹ Sa
boeperota Espiritu Santore tiquina ñano
yahuducugũ ti pūritare ne bosì. Tiquina
sa nidi buhiri sa buhiri tiducuyequina iji-
eta, niahye Jesu tiquinare.

³⁰ Jesu Espiritu Santo tiquiro tutu-
aye mehna watīare tiquiro cohãepegũta
“Tiquiro watīno tutuaye mehna watīare
cohãno nine”, nimahye masa. Tiquina
sa nigũ tuhoro ti quitire Espiritu Santo
quitire yahuahye Jesu tiquinare.

Jesu acaye tiquirore pijiahye

(Mt 12.46-50; Lc 8.19-21)

³¹ Sa ye Jesu bahana tiquiro pacoro
mehna wihyahye. Sa wihye sopeca-
hapũ ijiahye. Apequinare piji dutiahye
tiquirore. ³² Sa ye masa tiquiro cahapũ
dujiyequina yahuahye tiquirore.

—Muhũ paco, muhũ bahana mehna
sopecahapũ muhũre pijiri, niahye.

³³ Tiquina sa nigũ tuhoro ohõ saha ni-
ahye Jesu tiquinare buhero taro:

—¿Noa ijiajari yuhũ paco, yuhũ ba-
hana gũhũ, musa ihñagũ? niahye tiquiro
tiquinare buhero.

³⁴ Sa nino tiquiro caha dujiyequinare
ihñano ohõ saha niahye:

—Ahriquina ijire yuhũ paco, yuhũ ba-
hana yero saha ijieyequina. Cohãcjũ cah-
meñene yere ahriquina. ³⁵ Sa yeyequina
yuhũ bahũ, yuhũ baho, yuhũ paco yero
saha ijire, ni buheahye Jesu tiquinare.

Jesu oteriquiro quitire buheahye

(Mt 13.1-9; Lc 8.4-8)

4 Sa ye pari turi ditara duhtu cahapu Jesu buhe ducahye. Sa ye topure buhe ducaro masa peyequina tiquiro cahapu tiquina cahmecoagū ihñano Jesu pehe yucusapu buhe pahsaye. Sa ye masa pehe ditara duhtu cahapu ducuahye. ²Sa yero Jesu peye tiquiro tuhotuye mehna piti dahre yahuahye tiquinare buhero.

³—Ahri quitire tuhoya musa, niahye tiquiro.

—Oteriquiro otero wahahye. ⁴Tiquiro sa otegū apeye pjeri maha duhtu cahapu bora quehe sahye. Sa bora quehe saye pjerire minicjua ahta, ihya cāhye. ⁵Sa ye apeye pjeri utā pjeri watoa bora quehe sahye. Utā pjeri watoa dihta marieda cjuño ijiepegū duita pihnimahye. ⁶Sa pihnidi ijieperota, asū tutuaro asigū nuhcori marieda, ñaia wahahye. ⁷Apeye pjeri taa watoa bora quehe sahye. Taa pehe dia yuhdua waha, oteri pehere wejē cāhye. Sa yero dūca mariedahye. ⁸Apeye pjeri quehnoari dihtare bora quehe sahye. Quehnoano pihniñe ijiro quehnoano dūca tiahye. Apeye cju treinta pjeri, apeye cju sesenta pjeri, apeye cju cien pjeri dūca tiahye. ⁹Ahrire quehnoano tuhoya musa, niahye Jesu.

Jesu quitu mehna tiquiro buherire yahuahye

(Mt 13.10-17; Lc 8.9-10)

¹⁰Sa ye tiquina sehsaro ijiye doce buheyequina, apequina Jesu mehna ijiyequina ti quitire masi duaye, Jesure sinituahye. ¹¹Tiquina sa sinituri bato Jesu ohō saha ni yahuahye:

—Cohācjū masa puhtoro tiquiro ijiyere, panopu apequina tiquina masiedarire musare masigū yere Cohācjū. Apequina pehere sa yerare tiquiro. Tiquinare quitu mehnata

buheitja. ¹²Sa ye tiquina ihñapeta ihñedariquina yero saha tojoare. Sa ye tuhoepeta masisi. Tiquina masiñe quehnoañe pehere comesaboaya. Tiquina sa comesagū ihñano tiquina ñañe yerire boboaya Cohācjū. (Sa ijiepegūta tiquina pehe ne tuho duerare,) niahye Jesu.

Jesu oteriquiro quitire yahu pehoahye

(Mt 13.18-23; Lc 8.11-15)

¹³Tiquiro sa nidi bato ohō saha ni yahu nemoahye tiquinare:

—¿Ahri quitire tuhoena niajari musa? ¿Musa ahri quitire tuhoerana, dūhe apeye quitire tuhonatari musa? niahye Jesu tiquinare.

Sa ni tuhasa ohō saha ni yahu nemoahye tiquinare:

¹⁴—Oteriquiro tiquiro oteri pjeri quehnoañe buheye yero saha ijire. ¹⁵Sa yero maha duhtu caha bora quehe sari pjeri quehnoañe buheye yero saha ijire. Sa yero masa quehnoañe buheyere tiquina tuhogū ihñano Satana pehe ahta, ti buheye quehnoañe buheyere masi dutierare tiquinare, minicjua ti pjerire tiquina dote nediro saha yero.

¹⁶Sa ye utā pjeri watoa bora quehe sari pjeri quehnoañe buheye yero saha ijire. Sa ye masa quehnoañe buheyere tuho, bucueye mehna duita tire tuho ñehe maa wahare. ¹⁷Sa tuho ñehepeta utā pjeri watoa ijiye cju nuhcori marieñe cju yero saha ahriquina masa gūhu tutuerare. Sa tutueraye, ñano yuhduye, yeequina tiquina ijiri buhiri apequina tiquinare ñano yegū ihñañe yee pehere duhu cāhre. Apequina tiquinare ñano yegū tire ihcāno sahaeraye, yeere duhu cāhre. ¹⁸Sa ye taa watoa bora quehe sari pjeri quehnoañe buheye yero saha ijire. ¹⁹Sa ye masa quehnoañe buheyere tuhoepeta, ahri yehpa cjeñe pajiro bujua witi tuhotuye, niñeru

pehere cahĩne. Apee boro gũhũre peye tutuaro cahmene. Tiquina sa ni tũhotugũ ti pehe quehnoañe buheyere cahmotare. Ti sa cahmotagũ masa quehnoañe pehere yerare. ²⁰Sa ye quehnoari yehpapũ bora quehe sari pjeri quehnoañe buheye yero saha ijire. Sa ye masa quehnoañe buheyere tũhoye tire cahmene. Sa masĩnequina ijiye, Cohãcjũ tiquiro cahmeno sahata quehnoañene yere tiquina. Ihquẽquina mehenõ quehnoañene yere treinta pjeri dũca tiro saha. Apequina bui cjũno quehnoañene yere sesenta pjeri dũca tiro saha. Apequina pajiro quehnoañene yere cien pjeri dũca tiro saha, ni yahuahye Jesu tiquinare.

Jesu sihãria quitire buheahye

(Lc 8.16-18)

²¹Sa ni tuhasa ohõ saha ni nemoahye:

—Ne sihãriare dihi sutu docapũ cũedare. Sa ye tiare cumuno docapũ cũedare. Æhmũanopũ duhu peore quehnoano buhrio dutiye. ²²Ijipihtiyẽ tiquina masiedarire came masa masieta. Sihãria buhriogũ mari ihña masino saha panopũre tiquina masiedarire masieta masa. ²³Ahrire quehnoano tũhoya mũsa. ²⁴Mehenogã masi duana mehenogã masinata. Pajiro masi duana mehenogã masinata. Sa yena mũsa tũhona quehnoano tũho nũnũña. ²⁵Quehnoano tũho nũnũriquirõ quehnoano masinota. Tũho nũnũeniquiro, “Mehenogã tũhoaja”, tiquiro niepegũta ti pehe butia waharota, niahye Jesu tiquinare.

Jesu trigore oteriquiro quitire buheahye

²⁶Sa ni tuhasa ohõ saha ni yahu nemoahye:

—Cohãcjũ masa pũhtoro tiquiro ijiye trigore oteriquiro yero saha ijire. ²⁷Ote tuhasa bohrearo tiquiro oteri pihniñene ihñare tiquiro. “¿Duhse pihni wija ta

dũcajari?” ni ihña masiedare oteriquiro tiquiro basi. ²⁸Ti oteri ti basi dũca tire. Pari pũgã wija mũhtare. Came pari paro wija, bũcuare. ²⁹Ti parori bũcua tuhasagũ ihñano, pehere peheri pje ijigũ. (Tiquiro ote, ti bũcuarire tiquiro masiedaro saha Cohãcjũ yequina masa tiquina wahari gũhũre yahu peho masiedare masa,) ni buheahye Jesu.

Mostaza pje quitire yahuahye Jesu

(Mt 13.31-32; Lc 13.18-19)

³⁰Sa ni tuhasa ohõ saha ni buhe nemoahye queoye mehna buhero:

—¿Ne Cohãcjũ masa pũhtoro tiquiro ijiye yabe boro yero saha ijiajari, mũsa tũhotugũ? ¿Dise quiti mehna tire yahunatarĩ? ³¹Mostaza pjegã yero saha ijire Cohãcjũ pũhtoro ijiye. Ti pjegã tiquiro otegũre meheni pjegã waro ijire. ³²Sa ijieperota ti pjegã quehnoano pihnine. Sa yero pajidũ wahare. Sa ye tũ dũpũri bũjũye dũpũri bũcũagũ ihñañe minicjũa ti dũpũripũ suhti suhare, niahye Jesu. (Sa nino ohõ saha nino niahye. Mostaza pjegã pajidũ tũ bũcuariro saha uhmũse cjũnore mari pũhtorore masĩnequina meheñequinagã tiquina iji mũhtaepẽgũta camepũre peyequina wahaeta.)

Quiti mehna tiquiro buherire yahuahye Jesu

(Mt 13.34-35)

³³Sa yero ti quiti tiquiro nidiro saha peye quitire tiquina tũho ñeheno puno quehnoañe buheyere buheahye tiquinare. ³⁴Quiti marieno yahuerahye tiquinare. Sa yero tiquina sehõsaro ijiyequinare Jesu quehnoano yahu pehoahye tiquiro buheyequinare.

Jesu wihnonore yusũ dutiahye

(Mt 8.23-27; Lc 8.22-25)

³⁵Sa ye ti decore ñamicahapũ Jesu tiquiro buheyequinare ohõ saha niahye:

—Isa, si pahrēpu pehāuhna, niahye tiquinare.

³⁶Tiquiro sa nigū tūhoye yucusapu sajā, masare yehpapu ducuyequinare tota cū, tiquiro buheyequina dihita Jesure ne pehā wahahye. Sa ye apeye yucusari mehna apequina tiquina bato pehāhye. ³⁷Tiquina sa pehāgū wihnono tutuaro wēahye. Sa wēno yucusare tutuaro pahcōri quē sajāhye. Mehenogā dūh-samahye tiquina miniboriro. ³⁸Sa wahari watoa Jesu yucusa ohoturopu suhti puti buipu carīno niahye. Sa ye tiquina tiqiurore wahcōahye.

—¿Buhegu, mūhu cuerajari? Mari minina tana niajū, niahye tiquina tiqiurore.

³⁹Tiquina sa nigūta Jesu pehe wahcā, wihnonore,

—To punota wē duhuya, niahye.

Sa ninota pahcōri gūhure,

—Yusuahya, niahye.

Tiquiro sa nigūta wihnono yūhdūa wahahye. Sa ye pahcōri gūhu yusu dijiaa wahahye.

⁴⁰—¿Dūhse yena cue maca cāna niajari musa? ¿Musa yūhure wacū tutuerajari? niahye Jesu.

⁴¹Sa wahagū ihñañe acua yūhdūa wahahye.

—¿Yohou, dūhse ijiriquiro boro masūno ijiajari ahriquiro? Ahri wihnono, pahcōri gūhu tiqiuro dutigū yūhdūducaerare tiqiurore, niahye tiquina pehe.

Watīare cuoriquirore yūhdūoahye Jesu

(Mt 8.28-34; Lc 8.26-39)

5¹⁻²Sa ye tiquina si pahrēpu Gerasa cjēna ya yehpapu pehā sahye. Sa yero Jesu pehe yucusapu sañariquiro maja sadūcahye. Tiquiro sa maja sadūcari bato watīa cuoriquiro masa coperi utā coperi watoapu ijiriquiro wijia ta, tiqiuro cahapu ahtahye.

³Watīa cuoriquiro masa coperi watoa ijiriquiro ijiahye. Apequina pehe tiqiurore come da pajiri da mehna ñehe dūhte masiedahye. ⁴Sa ye peye tahari masa tiqiurore dahpocāri apōñe behtori mehna, come dari mehna dūhtemahye. Tiquiro omocari gūhure dūhtemahye. Sa yero tiqiuro pehe come darire nuha, dahpocāri apōñe behtori gūhure nuha site mujahye. Sa ye tutuariquiro tiqiuro ijiro mehna masa pehe tiqiurore ñehe masiedahye. ⁵Ñami ijigū, deco ijigū utā coperi watoapu cūnapu sa sañuducue tiahye tiqiuro. Sa yero utā mehna tiqiuro basi tiqiuro pagure quēe tiahye. ⁶Sa yero yoaropu Jesure ihñadoqueo tiqiuro cahapu oma maa cāhta, dūsepe curi mehna quehe sahye tiqiurore ño peoro taro.

⁷⁻⁸—Watīa duhuya tiqiurore, niahye Jesu.

Tiquiro sa nigū tūhoro watīa cuoriquiro ohō saha niahye:

—¿Jesu, Cohācjū tutuariquiro macu, yabere yegu tūu niajari mūhu yūhure? Cohācjū tiqiuro ihñonopu siniaja yūhu mūhure. Yūhure ñano yeracāhña, ni sañuducuahye watīa cuoriquiro Jesure.

⁹—¿Dūhse wame tiajari mūhu? niahye Jesu tiqiurore.

—Usā peyequina ijiaja. Sa yena “Peyequina watīa” wame tiaja. ¹⁰Usā ahri dihtapu ijinare ape siepu waha dutieracāhña, niahye watīa cuoriquiro.

¹¹Ti pjere yesea peyequina tiquina cahapu cūnu dahpotopu ihyaye niahye. ¹²Topu tiquina ihyaducugū ihñañe, ohō saha ni siniahye watīa:

—Sisequina yesea cahapu waha dutiya usāre. Tiquina mehna iji dutiya usāre, ni siniahye watīa tiqiurore.

¹³Tiquina sa nigū tūhoro tiquinare waha dutiahye Jesu. Tiquiro sa waha dutigū watīa masūno mehna ijiriquina waha, yesea dos mil yesea cahapu esahye. Tiquina cahapu tiquina esari

bato yesea pehe ijipihtiyequina ditara dũhtũ cahapũ oma buha, ti ditarapũ bora ñojoa, mini yaria pihtia wahahye.

¹⁴Tiquina sa minigũ ihñañe, yeseare cohteyequina pajiri macapũ, daye macarigãpũ gũhũre tire yahuye waha, oma cãa wahahye. Tiquina sa yahugũ tũhoye masa pehe peyequina tiquiro yerire ihñañe wahahye. ¹⁵Sa ye Jesu cahapũ wihiye, watia cuoriqiro tiquiro suhti tiriqiro, tũho masiniqiro tiquiro dujigũ ihñañe, ihña maria waha, cueahye. ¹⁶Sa ye watia cuomediquiro, yesea gũhũre tiquina sa waharire ihñariquina apequinare yahu pehoahye. ¹⁷Tiquina sa yahu pehogũ tũhoye, Jesure tutuaro mehna ape siepũ waha dutiahye.

¹⁸Sa yero yucũsapũ Jesu tiquiro sajãgũ ihñano, “Mũhũ mehna waha duaja”, ni tutuaro sinimahye watĩare cuomediquiro Jesure. ¹⁹Tiquiro sa nigũ Jesu tiquirore yahuahye:

—Yũhũ mehna wahaeracãhña. Mũhũ ya wũhũpũ mũhũ caha ijiyequina cahapũ yũhũ mũhũ pũhto mũhũre yũhũ yerire yahugũ wahaya. Mũhũre yũhũ paja ihñarire yahugũ wahaya tiquinare, niahye tiquirore.

²⁰Tiquiro sa nigũ watia cuomediquiro pehe Decapoli wame tiri macapũ Jesu tiquirore yũhũorire yahu dũcahye. Tiquiro sa ni yahugũ tũhoye ijipihtiyequina masa tũho maria wahahye.

Jairo maconore yũhũoro, dii mũna wihoro dohatiducuricoro gũhũre yũhũoahye Jesu

(Mt 9.18-26; Lc 8.40-56)

²¹Sa ye pari turi Jesu tiquiro majare pehã sagũ masa peyequina tiquiro cahapũ ditara dũhtũ cahapũ cahmecoahye. ²²Sa yero usã judio masa buheri wũhũre ihña ihboriqiro Jairo wame tiriqiro ahta, Jesure ihña, tiquiro dahpocãri ca-

hapũ dũsepe curi mehna quehe saro, ohõ saha niahye:

²³—Yũhũ macogã yariaro nidi. Sa yegu ticorore mũhũ omoca mehna ña peogu, yũhũogũ ahtaya. Mũhũ sa yegũ ticoro masanota, niahye tiquiro Jesure.

²⁴Tiquiro sa nigũ Jesu gũhũ pehe tiquiro mehna wahahye. Mahapũ tiquiro wahagũ masa peyequina tiquirore nũnũ tã cã bihsaro esadũca sahye. ²⁵Sa yero numino doce cũhmari waro decoripe dii mũna dohatiducuricoro topũ ijiyahye. To pano peyequina duturuu ticorore ñano yũhũgũ yeahye. ²⁶Sa yero duturuare ijipihtiye ticoro niñeru mehna wapa yemahye ticoro aco ye dutiro. Tiquina sa yepegũta ticoro mũnanota ijiducu cãhye. Sa yero ticoro tiquinare ihñari bato to pano ijiriro yũhũoro ñano wahahye. ²⁷Ticoro sa ñano yũhũari bato Jesu yeyere tũhoye, apequina yahuahye ticorore. Sa yero ticoro Jesu bato masa peyequina watoa ahta, Jesu suhtirore ñehe tuhuaahye. ²⁸“Yũhũ tiquiro suhtiro dihitare ñehe tuhugo quehnoa wahagota”, ni tũhotuahye. ²⁹Sa yero ticoro sa ñehe tuhuri bato ticoro dii mũna dohatiyere yũhũgũ ticoro pagure quehnoari pagũ tũhotuahye. ³⁰Sa yero Jesu tiquiro tutuaye mehna dohatiyere tiquiro cohãre masino, masa watoa majaredũca sa ihñaahye.

—¿Noa yũhũ suhtirore ñehe tuhuajari? niahye tiquiro.

³¹Tiquiro sa nigũ tũhoye tiquiro buheyequina ohõ saha niahye:

—Bihsarĩne. Sa ye masa peyequina mũhũre pihare. “¿Noa yũhũre ñehe tuhuajari?” nigũ, ¿dũhse nigũ sa niajari mũhũ? niahye tiquina pehe tiquirore.

³²Sa yero Jesu tiquirore ñehe tuhuricorore macahye. ³³Tiquiro sa macano watoa ticoro pehe ticoro pagũ quehnoa wahagũ tũhoturo, cue nanare dũsepe

curi mehna quehe sahye tiquiro caha tiquirore ño peoro. ³⁴Sa yero ticoro potota yahu pehoahye tiquirore. Ticoro sa ni yahuri bato Jesu ticorore yahuahye:

—Maco, yuhure muhu wacū tutuaye mehna quehnoago tojoare yojopure. Bucueye mehna wahaya. Dohatiye mariego ijiya, niahye Jesu ticorore.

³⁵Tiquiro sa ni yahuducuri bato judio masare buheri wuhure ihña ihboriquiro ya wuhū cjēna yahuye wihiahye.

—Muhū maco yaria wahari. Sa yegū buheriquirore piji cāhteracāhña, niahye tiquina.

³⁶Tiquina sa niepegūta sa tūhotu cāhno, Jesu ti wuhure ihña ihboriquirore ohō saha ni yahuahye:

—Bujūa witiyacāhña. Yuhure wacū tutuaya. Ti dihitare yeya, niahye ti wuhure ihña ihboriquirore.

³⁷Sa ni tuhasa Santiago, tiquiro bahuro Ñu, Pedro tiquina dihitare “Yuhū mehna ahtaya”, niahye Jesu.

³⁸Sa yero judio masa buheri wuhure ihña ihboriquiro ya wuhupū esahye. Ti wuhupū masa peyequina ñano bisi ñehe quea utigū, tiquina sañuducugū tūhoahye Jesu.

³⁹—Ñano ni, ñehe quea utieracāhña mūsa. Ticorogā mūsa sa ni utigū yarierare. Carīno nine, niahye Jesu tiquinare.

⁴⁰Tiquiro sa nigū tūhoye “Sa ni maca cāhno nine ahriquirō”, ni bujahye tiquina pehe tiquirore.

Sa yero tiquiro tiquinare sopecahapū wio peho cāhye. Sa wio tuhasaro ticorogā pacusumūare, tiquiro mehna cjēna gūhure ticorogā cahapū neahye Jesu. ⁴¹Sa yero Jesu ticoro omocare ñehe, “Talita cum”, niahye tiquiro. “Talita cum”, nino, “Mehenicorogā wahcāña’, niaja yuhū”, nino nine.

⁴²Tiquiro sa nigū ticorogā wahcādūca sa, tiniyahye. Doce cūhmari cūoricoro ijiyahye ticoro. Ticorore tiquiro sa yegū ihñañe tiquina ihña maria wahahye.

⁴³Sa yero Jesu tutuaro mehna tiquiro sa yerire yahu site dutierahye. Sa ye tuhasa ticorore ihyayere oho dutiahye.

Nazare cjēna Jesure cahmedahye

(Mt 13.53-58; Lc 4.16-30)

6 Sa ye topū ijiriquiro Jesu waha, tiquiro buheyequina mehna tiquiro ya dihtapū tojoa sahye. ²Sa yero Jesu saurū ijigū judio masa buheri wuhupū buhe dūcahye. Tiquiro sa buhegū masa peyequina tiquirore tūhoye, acua wahahye.

—¿Ahriquirō nohopū tūhoyari ahri buheyerē? ¿Dūhse yero quehnoano masi pehoajari ahriquirō? Cohācjū tutuaye mehna ye ihñore ahriquirō masare.

³Ahriquirō taboa dahrari masūno María macūno, Santiago, José, Juda, Simo tiquina wahminota ijimederō. Sa ye tiquiro bahana numia mari ya macapū ijinimedi. Sa yero tiquiro gūhū mari yero saha ijiriquiro ijire, niahye tiquina Jesure tūhoriquina.

Sa ye Jesure ihña tuhtiye, tiquirore cahmedahye. ⁴Tiquina sa cahmedagū ihñano ohō saha niahye Jesu:

—Cohācjū yere yahu muhtariquirōre apequina ño peore. Tiquina sa ño peoepegūta tiquiro ya maca cjēna, tiquiro acaye tiquiro ya wuhupū ijiyequinata ño peerare tiquirore. Sa yena yuhure ño peerare mūsa ohōre bucarigū yuhū ijigū, niahye Jesu tiquinare.

⁵Sa yero ti macapū ijiriquiro Jesu Cohācjū tutuaye mehna ye ihño masiedahye. Sa ye ihñoedaperota ihquēquina dohatiyequina bui tiquiro omocare duhu peo, yuhdūoahye tiquiro.

⁶Sa yero to cjēna Jesure tiquina wacū tutueragū ihñano, “¿Dūhse ijiro boro yuhure cahmedajari?” ni tūhotuahye tiquiro. Sa yero Jesu ti maca cahapū ijiye macaripū buhero wahahye.

**Jesu doce buheyequinare
buhe dutiro ohoahye**

(Mt 10.5-15; Lc 9.1-6)

⁷Sa ye Jesu doce tiquiro buheyequinare pijio, p̄eयेequina dihita ohoahye tiquinare macarip̄are buhe dutiro. Sa yero tiquiro tutuayere ohoahye tiquinare watiare tiquina cohātire. ⁸Sa ohoro apee boro, ihyayere, ajurire, niñerure tiquiro ne cā dutierahye tiquinare. Tiquina tuaye c̄j̄a dihitare ne cā dutiahye tiquinare. Ihcānota suhtirore saña dutiahye tiquinare. P̄aro saña dutierahye. ⁹Sa yero c̄hta c̄ñe cahserire saña dutiahye tiquinare. Ihcā suhtirota saña dutiahye tiquinare. P̄aro saña dutierahye. ¹⁰Sa yero ohō saha ni yahuahye tiquinare:

—Ijipihtiye macarip̄are musare tiquina car̄ino ohogū ti wuh̄p̄ta tojoar̄iña. Coã wahanap̄a wijiaya ti wuh̄re. ¹¹Sa yena ape maca c̄j̄ena musare tiquina cahmedagū tiquina t̄ho dueragū ti macare yuh̄d̄ana dahpoc̄ari c̄j̄e dihta esa wah̄aire wej̄e site c̄ña musa tiquinare tiquina ye buhirire masigū yena, ni yahuahye Jesu tiquinare.

¹²Sa ye doce buheyequina masare tiquina ñañe yerire buj̄aa witi dutiye, quehnoañe pehere ye dutiye, buh-eye wahahye. ¹³Sa wahaye peyequina watiare cohāñe, dohatiyequinare ñhse mehna wisōñe yuh̄d̄agū yeahye.

**Ñu wame yeriquirore
apequina wej̄eahye**

(Mt 14.1-12; Lc 9.7-9)

¹⁴Sa ye Jesure masa peyequina masiahye. Sa yero tiquiro yerire p̄h̄toro Herode t̄hooahye. Sa t̄hoooro ohō saha ni t̄hotumahye tiquiro: “Ñu wame yeriquiro yariariquiro pari turi bajuaro niaga. Sa bajuariquiro ijiro tiquiro tutuaye mehna tire yero niaga”,

ni t̄hotumahye Herode. “Jesu Ñuta ijire”, ni t̄hotumahye. ¹⁵Apequina pehe ohō saha ni t̄hotumahye: “Elia ijire”, ni t̄hotumahye. Apequina pehe “Cohāc̄j̄a yere yahu muhtariquiro panop̄a c̄j̄ena yero saha ijire tiquiro”, ni t̄hotumahye tiquina Jesure. ¹⁶Tiquina sa ni t̄hotuepegūta Herode pehe Jesu tiquiro yerire t̄horo ohō saha ni t̄hotumahye. “Ñu yuh̄a dapu d̄ate sure dutiriquiro bajuaro niaga”, ni t̄hotumahye.

¹⁷⁻¹⁸Ñure tiquina wej̄eato pano Herode tiquirore ñehe duti, peresu ye dutiahye. Herode tiquiro bah̄uro Felipe namonore Herodia wame tiricorore ehma, namo tiahye.

—M̄h̄a bah̄a namonore namo tiḡa Cohāc̄j̄a dutiyere yuh̄d̄ad̄ucaḡa nine m̄h̄a, ni yahuahye Ñu Herodere.

Tiquiro sa nidi buhiri Herode namono Herodia Ñure peresu tiquina yegū cahmeahye. ¹⁹Sa yero ticoro pehe Ñure ih̄ña tuhtiro, tiquirore wej̄e duti duamahye. Sa ye dueperota ticoro tiquirore wej̄e duti masiedahye. ²⁰Herode Ñure cuero “Ñu quehnoañene yeriquiro, quehnoariquiro ijire”, ni t̄hotuahye. Sa yero Herodere cariboro yeahye Ñu pehe tiquirore yahuro. Sa cariboepegūta tiquiro bucueye mehna t̄homahye Ñure. ²¹Tiquiro sa bucueye mehna t̄hoepegūta Herodia tiquirore ticoro wej̄e dutiati deco ñm̄a sahye. Ti p̄je Herode masa bajuari deco ijigū tiquiro bose deco dahreahye. Sa ye tiquiro yequina gobierno c̄j̄ena, surara p̄h̄toa, Galilea c̄j̄ena p̄h̄toa ḡuh̄a tiquiro ya bose decore ih̄ñañe wihiahye. ²²Sa yero Herodia macono bose decore ih̄ñano wihiro tiquina ih̄ñonop̄a basa ih̄ñoahye. Ticoro sa basa ih̄ñogū ih̄ñañe, Herode tiquiro pijioriquina ḡuh̄a bucueahye. Tiquina sa bucuegū ih̄ñano ohō saha niahye Herode:

—Mũhũ cahmeñene siniña yũhũre. Sa yegũ ohogutja mũhũre mũhũ cahmeñene. ²³ Cohãcjũ mehna poto niaja mũhũre. Mũhũ sinino puno yeere deco mehna ohogutja mũhũre, niahye tiquiro ticorore.

²⁴ Tiquiro sa nigũ ticoro Herodia macono pehe ticoro pacoro cahapũ waha, sinituahye:

—¿Yabere sinigotari yũhũ? ni sinituahye ticoro pacorore.

—Ñu wame yeriquiro dapure siniña, niahye ticoro pacoro pehe.

²⁵ Ticoro sa nigũta Herodia macono mũmũñano pũhoro Herode cahapũ waha, siniahye:

—Mianogãta Ñu wame yeriquiro dapure waparo mehna ohoya yũhũre, niahye ticoro.

²⁶ Ticoro sa nigũ tũhoro pũhoro Herode pehe tutuaro bũjũa witiahye. Masa tiquina ihñonopũ “Ohogutja mũhũre”, niahye tiquiro. Sa yero bæ tiro, tiquiro “Mũhũre ohoeraja”, ni masiedahye ticorore. ²⁷ Sa yero duita surarare peresupũ ijieyequinare coheriquirore Ñu dapure ðate sure ne cãhta dutiahye. ²⁸ Tiquiro sa dutigũ tũhoro surara pehe waha, tiquiro dapure ðate sure, waparo mehna ne cãhtahye. Ne cãhta nuhminore Herodia maconore ohoahye. Sa yero ticoro tiquiro dapure ñehe, ticoro pacorore oho yũhũoahye.

²⁹ Sa ye Ñu buheyequina ijiriquina pehe tire tũhoye, topũ esa, tiquiro pagure masa copepũ ne cã, cũahye.

Jesu cinco mil masare ihyaye ohoahye

(Mt 14.13-21; Lc 9.10-17; Jn 6.1-14)

³⁰ Sa ye Jesu ohoriquina tiquiro cahapũ tojoa saye, tiquina yerire, tiquina buherire yahyahye tiquirore.

³¹ Ti pjere masa peyequina sa majareducuye, tiquinare ne ihyaro

ohoerahye. Sa yero ohõ saha niahye Jesu tiquinare.

—Masa marienopũ mari sehsaro sona wahauhna, niahye tiquinare.

³² Sa ye tiquina sehsaro yucusa mehna masa marienopũ wahahye.

³³ Tiquina sa wahagũ ihñañe masa peyequina tiquinare masiahye. Sa masiñe peye macari cjãna mahapũ waha, Jesu tiquiro esatopũ tiquina masa pehe oma cã esa mũhtahye.

³⁴ Tiquina sa esagũ Jesu tuha sa paha, yucusapũ sañariquiro maja ðcaro,

tiquiro masa peyequina ijigũ ihñahye. Oveja coheriquiro mariequina yero saha ijiahye masa, tiquiro ihñagũ.

Sa yero Jesu tiquinare paja ihñano, peye quehnoañe buheyere buheahye.

³⁵ Ñamicahapũ doce buheyequina Jesu cahapũ esa, ohõ saha niahye:

—Ohõ masa marienopũ ijire. Ñamicaha waharo nine. ³⁶ Ohõ cahagã ijieye wũhũseripũ, macaripũ gũhũre tiquina ihyatire dú dutiya masare tiquina pohe tiatire, niahye tiquina Jesure.

³⁷ —Ihyayere ohoya tiquinare, nimahye Jesu tiquiro buheyequinare.

Tiquiro sa nigũ ohõ saha ni yũhtiahye:

—¿Dos cientos niñeru cjoeri mehna tiquina ihyati pãre ðunatari usã? niahye tiquina Jesure.

³⁸ —¿Nohope paca pã ijiajari? Ihñana wahaya, niahye tiquiro.

Tiquiro sa nigũ tiquina pehe ihyayere bocaye, ohõ saha niahye:

—Ihcã omope paca pã paca, pũaro wahi ijire, niahye tiquina pehe.

³⁹ Tiquina sa nigũ tũhoro Jesu pehe pe cururi taa bui duji dutiahye masare.

⁴⁰ Tiquiro sa duji dutiri bato tiquina pe cururi dujiahye. Ihquẽ cururire cincuenta masa ijiahye. Apeye cururi pehere cien masa ijiahye.

⁴¹ Tiquina sa duji tuhasagũ ihñano Jesu pehe ihcã omope paca pã pacare, pũaro wahi mehna ne, uhmũsepũ ihña mũoahye. Sa ihña

m̄ono Cohācjüre “Quehnoare”, nino ni-ahye. Tiquiro sa nidi bato pã pacare nuha, tiquiro buheyequinare masare iti duti ohoahye. Sa yero puaro wahire iti dutiahye ijipihtiyequinare. ⁴² Sa ye ijipihtiyequina ihya, yapi yũhdua wahahye. ⁴³ Tiquina ihya duharire doce puħuse waro pãre, wahi gũħure ne cahmecoa wahpo dapoahye tiquina. ⁴⁴ Sa ye pãre ihyariquina m̄ma dihitare tiquina queogũ cinco mil m̄ma ijiahye.

Jesu aco bui tiniahye

(Mt 14.22-27; Jn 6.16-21)

⁴⁵ Ti pjeta Jesu tiquiro buheyequinare yucusapu sajã duti, ape sie pahrẽpu Betsaidapu tiquiro pano pehãyu dutiahye. Sa yero tiquina pehãri watoa Jesu pehe masare cohe tiahye. ⁴⁶ Cohe ti tuhasa cunupu Cohācjüre sinino wahahye. ⁴⁷ Came ñamipu yucusa mehna ditarapu tiquina pehãducugũ Jesu ihcãquirola tiquina pehã tariropu ijiahye. ⁴⁸ Sa yero tiquina ñano yũhdu wajagũ, tiquina pano wiħnono wẽgũ ihñadoqueoahye tiquiro. Sa yero bohrea muja tato pano tiquina cahapu esaro, aco bui tini cãa wahahye. Tiquinare tiquiro yũhdu cã duamahye. ⁴⁹ Tiquiro yũhdu cã duepegũta tiquirore aco bui ahtagũ ihñãne, cue niahye. “Yariariquiro ijiboaga”, ni ihñamahye tiquina. Sa ni tuhotuye tiquina sañuducuahye. ⁵⁰ Ijipihtiyequina tiquirore ihñãne, ihña maria wahahye. Tiquina sa ihña mariagũ ihñano Jesu tiquinare yahuahye:

—Wacũ tutuaya musa. Ne, yũħure cueracãhña. Yũħuta ijijaja, niahye tiquinare.

⁵¹ Sa ni tuhasa tiquiro tiquina mehna yucusapu sajãhye. Tiquiro sajãri batogãta wiħnono yũhdua wahahye. Sa wahagũ tiquina pehe acua yũhdua wahahye. ⁵² Tiquiro pãre peye yerire wacũedahye tiquina. Tire quehnoano masiedahye.

Jesu Genesare cjẽnare, dohatiyequinare yũhduoahye

(Mt 14.34-36)

⁵³ Sa ye tiquina pehã sa, Genesare dihtapu pehã sa, tiare duhte poho, duhtu cahapu pahsahye. ⁵⁴ Sa ye yucusapu ijiriquina tiquina majagũta masa pehe Jesure ihña masiahye. ⁵⁵ Sa ihña masiñe ijipihti tiquina ya yehrapu oma maja, dohatiyequinare tiquina cuñãne cahseri mehna yo cãtahye. “Jesu topu ijiri”, masa nigũ tuħoye topure esahye tiquina. ⁵⁶ Sa ye ijipihtiye macari tiquiro esaye macaripu, bujuye macaripu, daye macarigãpu, meheñe wũħusegã ijiye cahapu gũħure masa dohatiyequinare Jesu cahapu nea cũahye. Sa topu maharipu tiquina cunopu Jesure tiquiro suhtiro duhtu cahare ñehe tuħu duaye, tutuaro siniahye tiquina:

—Mũħu suhtiro duhtu caha dihitare usãre ñehe tuħu dutiya, ni siniahye.

Sa ye tiquiro suhtirore ñehe tuħuriquinape quehnoa wahahye tiquina.

Masa ñãñequina wahagũ yeyere yahuahye Jesu

(Mt 15.1-20)

7 Sa ye Jerusalẽpu ahtariquina usã acaye judio masare buheyequina, fariseo masa gũħu Jesu cahapu cahmecoahye. ²⁻⁴ Fariseo masa ijipihtiyequina apequina judio masa mehna panopu cẽna tiquina dutiriro saha tiquina omocarine omo coserape ihyera tiahye. Sa ye doeri cẽ duayequina cahapu esayequina tiquina ye wũħusepu wihiye tiquina dutiriro saha tiquina omocarine omo coserape ihyera tiahye. Sa ye peye apeye dutiyere panopu cẽna judio masa tiquina dutiyere yee tiahye. Sihniñe parire coseye, dihi suturire coseye, come suturire coseye, yee tiahye tiquina judio masa, “Cohācjũ sa cahmene”, niñe. Sa ye Jesu

cahapu cahmecoañe Jesu buheyequina judio masa tiquina dutiro saha tiquina omo coseragū ihñahye fariseo masa. ⁵ Sa ihña tuhasaye Jesure sinituahye:

—Muhu buheyequina ihyaye mari ñecusumua muna tiquina dutiro sahata tiquina omocarine omo coserare. ¿Duhse yeye mari dutiyere yerajari? nihaye tiquina Jesure.

⁶ Tiquina sa nigū tuhoro Jesu yahuahye tiquinare.

—Masa tiquina ihñono dihita quehnoano iji mehona ijire masa. Cohācjū yere yahu muhtariquiro munano Isaia musare panopure potota yahue tiahye. Ohō saha niahye:

Ahriquina masa yuhure quehnoano yahuducuepeta yuhure ne ño peerare. ⁷ Sa ye yuhure tiquina ñu buheye duhseati ijierare. “Cohācjū ye dutiye ijire ahri”, ni meho buhere tiquina buheye, ni ojoahye Isaia.

⁸ Ti ijirota ijire. Panopu cjenā ye dutiye pehere yena tana Cohācjū ye dutiyere yerare masa. ⁹ Cohācjū ye dutiyere cohāna, masa acaye ye dutiye pehere yere masa. ¹⁰ Ohō saha yena Cohācjū ye pehere yuhduducana nine masa. Panopure ohō saha nihaye Cohācjū tiquiro dutiyere Moiserē cūno: “Musa pacusumua ño peoya. Ihcāquiro tiquiro pacusumua ñano quti dahreriquiro ijiro ti buhiri tiquina wejēatiquiro ijirota”, niahye Cohācjū Moiserē tiquiro cūri dutiye. ¹¹ Tiquiro sa niepegūta ohō saha ye dutire masa tiquina pacusumua yedoho dutierana: Tiquina pacusumua tiquina ohoborire Cohācjū pehere oho dutire masa. Sa ni buhemene masa. ¹² Sa buhena tiquina pacusumua ño peogū yerare masa tiquinare. ¹³ Sa yena Cohācjū dutiyere yuhduducana nine masa mari acaye panopu cjenā ye dutiye pehere yena. Apequinare masa ye buheye dihitarē

tūho dutire masa. Peye sa ijiyere yere masa, niahye Jesu tiquinare.

¹⁴ Sa ni tuhasaro apequinare pijioahye. Ohō saha niahye:

—Musa ijipihtina tuhoya yuhure. Yuhu niñene quehnoano masiña masa.

¹⁵ Musa duserire sajāne pehe masa ihyaye pehe musare ñana ijigū yerare. Musa ñañe yahuducuye pehe masa duseri wijiaye pehe musare ñana ijigū yere. [¹⁶ Yuhure quehnoano tuhoya,] niahye Jesu.

¹⁷ Sa ni tuhasa Jesu masa cahapu ijiriquiro waha, wuhupu sajā wahahye. Sa sajā sagū ihñañe tiquiro buheyequina pehe tiquiro buherire sinituahye. Tiquina sa sinitugū tuhoro ohō saha nihaye tiquiro:

¹⁸ —¿Ne tūho ñehedajari masa? Musa duserire sajāne pehe masa ihyaye pehe musare ñana ijigū yerare. ¹⁹ Ti masa tuhutuyepure sajāedare. Musa paapu sajā yuhdua wahare, niahye Jesu.

Sa nino “Ijipihtiyē ihyaye quehnoañe ijire”, nino niahye. ²⁰ Ohō saha ni nemoahye:

—Musa ñañe yahuducuye pehe masa duseri wijiaye pehe musare ñana ijigū yere. ²¹⁻²² Ñano tuhutuye, wuana tiye, numia mehna ñano yeducuye, umua mehna ñano yeducuye, masare wejēne, yaqueye, apequiro yere tutuaro cahme yuhduye, ñano yeye, ni mehoñe, peye ñañene yeducuye, apequiro yere coo ihña tuhtiyē, ñano quti dahreye, “Apequinare yuhduducaya”, ni tuhutuye, tūho masiñequina ijiye, ti ijipihtiyē musare masa tuhutuyepu ahtare. ²³ Ijipihtiyē ahri ñañe masa tuhutuyepu ahta, musare ñana ijigū yere, niahye Jesu.

Judio masono ijiericoro Jesure wacū tutuahye

(Mt 15.21-28)

²⁴ Sa yero Tiro wame tiri maca cahapu esaro, to cja wuhupu sajā wahahye.

Sa yero apequinare tiquiro ijiri wuhure yahu dutierahye. Sa yahu dutieraperota tiquinare tiquiro duhti masiedahye. ²⁵ Ti pjereta numino ticoro macono watino cuoricoro tiquiro cahapu ijiahye. Sa ye Jesu yerire ihnañe apequina ticoro pacorore yahuahye. Tiquina sa yahuri bato ticoro pacoro pehe waha, Jesu dahpocari cahapu dusepe curi mehna quehe sahye tiquirore ño peoro. ²⁶ Ticoro Siria yehpapu ijiri yehpa Fenicia wame tiri yehpa cjono ijiahye.

—Watino cohãrĩna yuhu macore, ni siniahye ticoro Jesure.

²⁷ Ticoro sa sinigũ tuhoro ohõ saha niahye Jesu:

—Wahmanore wuhu upero pohne ye ihyayere diayere yuhu oho muhtagũ to wahaerare. (Israe masa yere ape yehpa cjẽnare yuhu oho muhtagũ to wahaerare,) niahye Jesu ticorore queoye mehna yahuro.

²⁸ —Sa tjire puhto. Sa ijiepegũta diayea gũhu mesa doca tiquina pohne ihya site dijioyere ihya cohtere tiquina gũhu. (Ape yehpa cjõ yuhu ijiepegũta yuhu gũhure yedoho masine muhu,) ni yuh-tiahye ticoro.

²⁹ —Muhu sa ni yuhtigũ muhu macore watino duhu tuhasari. Ihnãgo wahaya, niahye Jesu ticorore.

³⁰ Tiquiro sa nigũ tuhoro waha, ticoro wuhupu esaro, ticoro maconore watino marienicoropure cuñanopu ijiricorore ihñahye.

Cahmono tuhoeriquirore, yahuducu masieniquirore yuhduoahye Jesu

³¹ Ti pjere Jesu Tiro wame tiri maca cahapu ijiriquiro waha, Sidõ wame tiri macare esa yuhdu cã, Decapoli wame tiri macare esa yuhdu cã, Galilea wame tiri ditarapu esahye. ³² Sa ye cahmono tuhoeriquirore, yahuducu masieniquirore Jesu cahapu ne cãhtahye apequina.

—Muhu omoca mehna ña peoya tiquirore, ni siniahye tiquina tiquirore.

³³ Tiquina sa nigũta Jesu pehe tuhoeriquirore ne cã, masa marienopu siho esahye. Tiquina sehsaro ijiahye. Sa yero Jesu tiquiro omo piri mehna tuhoeriquirore cahmo coperire ohbe sõahye. Sa ye tuhasa, sihco puti, tiquiro ñehmenore ña peoahye.

³⁴ Sa ye tuhasa uhmusepu ihña muo, jeri ne, ohõ saha niahye:

—Efata, niahye Jesu. “Efata”, nino “Põohña”, nino nine. Sa nino tiquirore tuho dutiro niahye. Sa yero yahuducu dutiro niahye.

³⁵ Tiquiro sa nigũta tiquiro pehe tuho boca, tiquiro ñehmeno cahbiro wahagũ tuhoturo quehnoano yahuducuahye.

³⁶ Sa yero Jesu tiquinare tire apequinare yahu site dutierahye. Tiquiro sa yahu site dutierape taharita tja tiquina apequinare yahu site nemoahye. ³⁷ Sa ye masa tuho maria wahaye, ohõ saha niahye:

—Ijipihtiyere tiquiro quehnoano yere. Tuhoeyequinare quehnoano tuhogũ yere. Yahuducu masieñequina gũhure quehnoano yahuducugũ yere Jesu, niahye masa.

Cuatro mil masare ihyayere ohoahye Jesu

(Mt 15.32-39)

8 Ti pjere pari turi masa peyequina cahmeoarí bato ihyaye marieñequina tiquina ijigũ ihñano Jesu tiquiro buheyequinare pijioahye:

²—Ahriquina masa ihtia deco waro yuhu mehna iji tuhasari. Sa ye tiquinare pohe mariedare. Tiquina pohe mariedagũ ihñagu tiquinare paja ihñaja yuhu. ³ Apequina tiquina mehna cjẽna yoropu ahtari. “Tiquinapu ujua ahbayequina mahapu borari”, nigũ tiquinare ihyaye marieno tiquina ye wuhusepu waha duti dueraja. Sa yegu

tiquinare pohe oho duaja, niahye Jesu tiqiuro buheyequinare.

⁴—¿Duhse ye mari ohõre masa marienopure pãre boca ohoboagari mari? niahye Jesu buheyequina tiqiurore.

⁵—¿Nohope paca pã pacare cõoajari mûsa? ni sinituahye Jesu.

—Siete pã paca ijire, niahye tiquina.

⁶ Sa yero tiqiuro masare yehpapũ duji duti, siete pã pacare ne, Cohãcjũre “Quehnoare”, niahye. Sa ni tuhasa, ti pacare nuha, tiqiuro buheyequinare oho, masare iti dutiahye. Tiquiro sa dutiri bato tiqiuro buheyequina pehe pãre masare itiahye. ⁷ Sa ye wahi gũhũre meheñequinagã cõoahye tiquina. Sa yero tiquinare Cohãcjũre “Quehnoare”, ni, wahi gũhũre iti dutiahye. ⁸ Tiquina iti tuhasagũ tiquina ihyaye, yapi yũhdũa wahahye. Tiquina ihya dũharire siete pũhuse waro ne cahmecoahapõ dapoahye tiquina. Tiquina cuatro mil masa ijiahye. ⁹⁻¹⁰ Sa ye tuhasa Jesu masare cohe tiahye. Cohe ti tuhasa tiqiuro buheyequina mehna yucusapũ sajãhye. Sajã tuhasa Dalmanuta wame tiri maca cahapũ wahahye.

Fariseo masa Jesure Cohãcjũ tutuaye mehna ye ihõno dutiahye

(Mt 16.1-4; Lc 12.54-56)

¹¹ Sa ye fariseo masa wihi, Jesu mehna cahme duse tutuahye. Tiquina Jesure Cohãcjũ tutuaye mehna ye ihõno dutiye, tiqiuro ye ihõno masiedagũ ihõna duamahye. ¹² Tiquina sa dutigũ tũhoro Jesu tutuaro bujũa witi pihopũri, jeri sajãedaro, ohõ saha niahye:

—¿Mûsa yojopũ cjãna duhse yena mûsa Cohãcjũ tutuaye mehna ye ihõnoñene ihõna duajari? Potota niita nijaja mûsare. Yojopũ cjãnare mûsare Cohãcjũ tutuaye mehna ne ye ihõnosi yũhũ, niahye Jesu.

¹³ Sa ni tuhasa waha, pari turi yucusapũ sajã, ape sie pahrẽpũ pehãa wahahye.

Fariseo masa, Herode mehna cjẽna gũhũre tiquina ñãñe buheyere yahuahye Jesu

(Mt 16.5-12)

¹⁴ Sa wahaye, pãre bo cũ, yucusapũ ihcãriata pãre cõoahye tiquina. ¹⁵ Sa yero Jesu cua pesaro mehna yahuahye tiquinare.

—Quehnoano yeya. Fariseo masa, Herode mehna cjẽna gũhũ tiquina ye pãre pugũ yeyere ihõnana quehnoano yeya. Cuarĩne ti, ni yahuahye.

¹⁶ Tiquiro sa nigũ tũhoye tiqiuro buheyequina pehe tire tiquina basi yahuducuahye.

—Mari pãre mari ne cãhtaeragũ ihõnana sa niaga ahriqiuro, nimahye tiquina.

¹⁷ Tiquina sa nidire masino tiquinare sinituahye Jesu:

—¿Duhse yena mûsa pã borire wacũajari mûsa? ¿Mûsa masiedajari? ¿Tũhoerajari? ¿Tũho duerajari mûsa? ¹⁸ ¿Caperi tina ijiepenata ihõnedajari mûsa? ¿Sa yena cahmono tina ijiepenata tũhoerajari mûsa? ¿Mûsa ahrire wacũedajari? ¹⁹ ¿Yũhũ ihcã omope paca pã pacare nuha, cinco mil masare yũhũ ohorire wacũedajari mûsa? ¿Tiquina ihya dũharire nohope pũhusere pã pacare mûsa ne cahmecoahapõ dapori pũhusere neari mûsa? niahye Jesu tiquinare.

—Doce pũhuse nei, niahye tiquina tiqiurore.

²⁰ —¿Sa ye yũhũ siete pã pacare cuatro mil masare yũhũ ohori bato nohope pũhusere pã pacare mûsa wahpo dapori pũhusere neari mûsa? niahye Jesu.

—Siete pũhuse nei, niahye tiquina tiqiurore.

²¹—¿Sa ihñáepenata quehnoano masiedajari msa? niahye Jesu tiquinare.

**Jesu caperi bajueriquirore
ihñagū yeahye**

²²Sa ye Betsaidapū tiquina esagū ihñañe, masa pehe caperi bajueriquirore ne cāhtahye.

—Tiquirore ña peoya, ni tutuaro sini-ahye tiquina Jesure.

²³Sa yero Jesu caperi bajueriquiro omocare ñehe, ti maca dūhtū cahapū tiquirore tūā cāhye. Topū ne sa, tiquiro caperire sihco puti, tiquiro omocari mehna tiquirore ña peohaye.

—¿Mūhū ihñagū bajuajari? ni sinitu-ahye Jesu.

²⁴Tiquiro sa nigū tiquiro pehe ihñano ohō saha niahye:

—Ūmūare ihñaja. Yūhū sa ihñaepegūta tiquina yucūri tiniñe cju yero saha bajure, niahye caperi bajueriquiro.

²⁵Tiquiro sa nigū tūhoro Jesu pehe tiquiro omocari mehna tiquiro caperire ña peohaye tja. Tiquiro sa ña peori bato caperi bajueriquiro tutuaro tiquiro ihñagū caperi quehnoano bajuahye. Sa yero ijipihtiyere quehnoano ihñahye tiquiro. ²⁶Sa yero Jesu tiquirore tiquiro ya wūhūpū ohoahye.

—Macapū pūritare wahaeracāhña, ni-ahye Jesu tiquirore.

**Jesu potota Cristo tiquiro
ijiyere Cohācjū ohoriquiro
tiquiro ijiyere yahuahye Pedro**

(Mt 16.13-20; Lc 9.18-21)

²⁷Sa ye Jesu tiquiro buheyequina mehna Cesarea Filipino wame tiri maca cahapū ijīye macaripū waha nemoahye. Topū waharo Jesu sinituahye tiquiro buheyequinare:

—¿Noa boro ijigari yūhū, masa yūhūre tiquina tūhotugū? ni sinituahye tiquiro.

²⁸Tiquiro sa sinitugū tūhoye yūhti-ahye tiquina:

—“Ūnu wame yeriquiro ijire”, nine. Apequina “Elia ijire”, nine. Apequina “Cohācjū yere yahu mūhtariquina mehna cjūno ijiboaga”, nine, ni yūhtiahye tiquiro buheyequina tiquirore.

²⁹Tiquiro sa nidi bato Jesu sinitu nemoahye:

—¿Msa pehe tūhotugū noa boro ijigari yūhū? ni sinituahye tja.

—Mūhū Cristo Cohācjū ohorigu ijire, ni yūhtiahye Pedro.

³⁰Tiquiro sa nigū tūhoro Jesu ohō saha niahye:

—Yūhūre “Cristo ijire tiquiro”, ni yahu site niedacāhña apequinapūre, ni-ahye tiquinare.

**Jesu tiquiro yaria masa
wijiatiire yahuahye**

(Mt 16.21-28; Lc 9.22-27)

³¹Sa ye tiquiro buhe dūcahye tiquinare.

—Yūhū masū Cohācjū ohorigu iji-aja. Sa yegū tutuaro ñano yūhdūgūta. Sata waharo cahmene yūhūre. Judio masa būcūna, pahia pūhtoa, mari judio masare buheyequina yūhūre cahmedaye, yūhūre wejēeta. Tiquina sa wejēgū ihtia deco wahaboro masa wijiagūtja, ni-ahye Jesu tiquinare.

³²Sa nino ne tūho wisiagū yero marieno yahuro niahye tiquinare. Tiquiro sa nigū tūhoro Pedro pehe yoa cjūnogā Jesure ne sadūca, tiquirore sa ni dutierahye. ³³Tiquiro sa ni dutieragū tūhoro Jesu tiquiro buheyequinare majare ihñā, tuhtiahye Pedrorre.

—Satana yero saha yahuducugū nine mūhū. Sa niedacāhña. Mūhū tūhotuyē

masa ye ijire. Cohācjū ye ijierare, niahye tiqiro Pedrove.

³⁴ Sa ni tuhasa masare tiqiro buheye-quina mehna tiqiro cahapū pijio ohō saha niahye:

—Ihcāquiro yaquiro iji duaro, tiqiro esa tuharo ye duamedire duhu cānota. Sa yero yaquiro tiqiro ijiri buhiri nāno yuhdūeperota yuhure duhusi. Sa yero yeere yeducuriquiro ijirota. ³⁵ Masuno tiqiro esa tuharo tiqiro cahmeno sahata yeriquiro pecapū waha-
rota. Sa yero masuno, yeere sa yeducuro, quehnoāne buheyere sa yeducuro, ijipihtiyē decori yuhū mehna ūhmusepū ijiducurota. ³⁶ ¿Ihcāquiro masuno ahri yehpa cjēne ijipihtiyere cūoriquiro pecapū waha-
ro yabere wapatajari tiqiro? Sa ijiriquiro ne wapataerare. ³⁷ Pecapū tiqiro jeripohna wahagū ne dūhse wapa ye wioro basioeraga. Masuno jeripohna ihyo waro ijierare. ³⁸ Yojopūre, nānequina Cohācjūre cahmeeņequina tiquina esa tuharo yeri deco ijiro nine. Ihuēquina yuhure, yuhū buheye gūhure bue tisāboaga. Tiquina sa yegū ihnāgū yuhū masū Cohācjū ohorigū quehnoānequina angele mehna yuhū Pacū asi sitero mehna tojoa tagū yuhure bue tisānequinare bue tisāgutja yuhū gūhū, ni yahuahye Jesu.

9 Sa ni tuhasa ohō saha ni nemoahye Jesu:

—Potota niita nijaja musare. Ihuēquina mūsa ohōpūre ijina mūsa yariato pano Cohācjū tiqiro pūhtoro ijirōpūre yuhū sajāgū yuhure ihnānata, niahye Jesu tiquinare.

Jesu tiqiro pagūre comesahye

(Mt 17.1-13; Lc 9.28-36)

² Sa ye seis decori bato Jesu Pedrove, Santiagore, tiqiro bahūro Nū gūhure ūhmanū cūnūpū tiquina dihitare piji mūjahye. Ūhmanopū esari

bato tiquina ihnōnopū tiqiro pagūre comesaa wahahye. ³ Tiquiro suhtiro asi sitero yero saha yehsero wahahye. Ahri yehpa cjēna numia suhti coseyequina numia sa yehseye ye masiedare. ⁴ Sa ye Jesu Elia mūnāno, Moise mūnāno mehna tiquina yahuducugū ihnāhaye tiquina ihtiaro tiqiro buheyequina. ⁵⁻⁶ Sa ye tiquina tutuaro cueahye. Sa cuero dūhse ni masiedamehno ohō saha nimahye Pedro:

—Pūhto, mari ohō ijigū quehnoa duare. Ihtia wuhūgā yematja. Mūhū ya wuhūgā, Moise ya wuhūgā, Elia ya wuhūgā yematja, nimahye tiqiro Jesure.

⁷ Sa yero tiquina bui ehmeo curua cahmotahye. Sa cahmotagūta ehmeo watoapū nino ca tahye:

—Ahriquiro yuhū macū yuhū cahniquiro ijire. Tūhoya tiqirore, nino ca tahye.

⁸ Sa nigūta Pedro gūhū ihnāmahye. Jesu dihitare ihnāhaye. Tiquina ihnāriquina pehe mariedahye. ⁹ Sa yero cūnūpū tiquina dijia tagū Jesu tiquinare yahuahye:

—Mianogā yuhure sa wahaire apequinare yahueracāhna. Yuhū masū Cohācjū ohorigū yuhū yaria masa wijari bato tire apequinare yahuya mūsa, ni yahuahye tiqiro.

¹⁰ Sa ye tiqiro dutiro sahata tiquina ihnārire yahuerahye apequinare. Sa ye tiquina basi ohō saha ni sinitu yahuducuahye:

—¿“Yuhū yaria masa wijari bato”, nino dūhse nino niari tiqiro? ni, yahuducuahye tiquina.

Sa ye Jesure ohō saha ni sinituahye:

¹¹ —“Cristo tiqiro ahtato pano Eliare ahta mūhtano cahmene”, nine mari acaye judio masare buheyequina. ¿Dūhse ijiro boro sa niagari tiquina? ni sinituahye tiquina tiqirore.

¹²⁻¹³ Jesu yūhtiahye:

—Ijirota ijire. Eliare ahta m̄hta dutiri Cohāc̄jū, ijipihtiyere quehno m̄htatiqirore. Ȳh̄u mas̄ Cohāc̄jū ohorigu peye tahari ñano ȳhduguta. Apequina ȳh̄ure cahmedaye, ñano yeeta. ¿Duhse ijiro boro tire sa ni ojoari, musa tuhotugū? Sa yegū ahrire niitja m̄sare: Elia wihi tuhasari. Tiquiro sa wihiepegūta tiquina cahmediro saha tiqirore ñano yeahye. Sata ni ojoahye tiqirore, ni-ahye Jesu tiquinare.

**Jesu coã wahm̄ua
cāhtariqirore ȳhd̄oahye**

(Mt 17.14-21; Lc 9.37-43)

¹⁴Sa ye dijia ta, apequina buheyequina cahap̄ esa, peyequina masare ihñahye. Tiquiro buheyequina pehe judio masare buheyequina mehna cahme d̄use tutuaye niahye. ¹⁵Sa ye Jesu ḡh̄u tiquina dijia tagū ihñañe, ijipihtiyequina masa acua waha, tiqiro cahap̄ oma cã wahahye. Tiquiro cahap̄ esaye,

—¿Ahtajari? niahye tiqirore.

¹⁶—Ahtaja, ni tuhasa,

—¿Duhse ni cahme d̄use tutuana niari m̄sa tiquina mehna? ni sinituahye Jesu tiqiro buheyequinare.

¹⁷Tiquiro sa ni sinitugū t̄horo, masa watoa ducuriquiro yahuahye tiqirore:

—Buhegū, ȳh̄u mac̄ure wat̄no c̄oriquirore m̄h̄ure ne cãhtami. Wat̄no pehe tiqirore yahuducu dutierare. ¹⁸Ȳh̄u mac̄ure tiqiro ñehegū yehpap̄ bora, bahque diho, buhaa wahae tiri tiqiro. Sa waharo sahpo tua wahae tiri. Sa yegū m̄h̄u buheyequinare wat̄nore cohã dutimi. Ȳh̄u sa dutiepegūta tiquina cohã masiedari wat̄nore, ni yahuahye Jesure.

¹⁹Tiquiro sa nigū t̄horo Jesu ohō saha niahye tiquinare:

—Ne, ȳh̄ure wacū tutuerare m̄sa. Yoari pje m̄sare buhemaja ȳh̄u. ¿Noho puno yoari pje ȳh̄ure m̄sa cariboa-

jari? Tiquirore ne cãhtaya ȳh̄ure, ni-ahye Jesu.

²⁰Tiquiro sa nigū t̄hoye wat̄no c̄oriquirore Jesu caha ne cãhtahye. Tiquina ne wihigū ihñano wat̄no pehe coã wahm̄ua cãhtariqirore yehpap̄ doque quehe sa, tunu nanaregū yeahye. Sa yero sahpo tuaa wahahye.

²¹—¿Noho puno yoari pje wat̄nore c̄oajari ahriqiro? ni, sinituahye Jesu pehe tiqiro pac̄urore.

—Nijinogã ijiroputa tiqirore c̄o d̄cari. ²²Sa yero wat̄no pehe tiqirore pecap̄, acop̄ cohã wejēmedi. Sa yegū m̄h̄u ye masigū us̄are paja ihñã, yedohoya, niahye tiqiro pac̄uro Jesure.

²³Tiquiro sa nigū t̄horo ohō saha ni-ahye Jesu:

—¿“M̄h̄u ye masiegū ijire”, niajari m̄h̄u ȳh̄ure? Ȳh̄ure m̄h̄u wacū tutuagū ihñano, Cohāc̄jū ijipihtiyere ye peho masine, m̄h̄ure yedohoro, niahye Jesu.

²⁴Tiquiro sa nigūta coã wahm̄ua cãhtariqiro pac̄uro ohō saha ni sañuducuahye:

—M̄h̄ure wacū tutuaja. Ȳh̄u wacū tutueragū ihñagu ȳh̄ure yedohoya m̄h̄ure ȳh̄u wacū tutuato saha, niahye tiqiro.

²⁵Sa yero masa peyequina tiquina cahap̄ oma cãhta, tiquina cahmecoagū ihñano, Jesu wat̄nore ohō saha ni tuhtiahye:

—M̄h̄u yahuducu dutiegū, t̄ho dutiegū ahriqiro mehna ijirigū wahaya. Sa wahagu tiqirore pari turi cariboeracãhña, niahye Jesu.

²⁶Tiquiro sa nigū t̄horo wat̄no sañuducu, coã wahm̄ua cãhtariqirore yehpap̄ doque quehe sa tunu nanaregū ye, wahahye. Tiquiro sa yegū coã wahm̄ua cãhtariqiro yariariqiro yero saha wahahye.

²⁷—Tiquiro yariaa wahare, nimahye masa peyequina.

Tiquina sa niepegūta Jesu pehe tiquiro omocare ñehe, tiquirore wahcōahye. Tiquiro sa wahcōgū wahcāhye tiquiro pehe. ²⁸ Came Jesu gāhu wuhupū tiquina sajā sagū tiquiro buheyequina tiquirore sinituahye:

—¿Duhse yena usā pehe watīnore cohā masiedayari, mūhu tuhōtugū? ni sinituahye tiquina.

²⁹ —Ahriquiro boro watīnore cohā duana Cohācjūre tutuaro sinino cahmene musare, ni yuhtiahye Jesu tiquinare.

**Pari turi Jesu tiquiro yaria
masa wijiatire yahuahye**

(Mt 17.22-23; Lc 9.43-45)

³⁰ Sa ye topū ijiriquina waha, Galilea yehpupū esa, yūhdūa wahahye. Topū tiquina waharire apequina masigū cahmedahye Jesu tiquiro yequinare buhero taro. ³¹ Topū esaro tiquiro buheyequinare bueahye. Ohō saha ni bueahye:

—Yūhu masū Cohācjū ohorigū iji-aja. Masa yūhure ñehe, apequinapūre yūhure ohoeta. Tiquina sa ohori bato yūhure wejēeta. Tiquina sa wejōrigū ijiepegūta ihtia deco wahaboro masa wi-jiagūtja, niahye tiquinare.

³² Tiquiro sa nigū tuhoye tiquina quehnoano tūho ñehedahye. Sa ye cū-eye, tiquirore tire sinitu nemoedahye.

**Jesu buheyequina tiquina mehna
cjūnore puhto sō duaye nimahye**

(Mt 18.1-5; Lc 9.46-48)

³³ Sa ye Capernaupū tiquina esari bato wuhupū tiquina ijigū Jesu pehe sinituahye tiquinare.

—¿Mahapūre ahtana, duhse ni yahuducu cāhtana niari mūsa? ni, sinituahye tiquinare.

³⁴ Tiquiro sa sinitugū tiquina yuhtierahye. Mahapūre ahtaye, cahme ohō saha ni yahuducu cāhtaye niahye:

—¿Mari mehna cjūnore diquiro pehere mari puhtoro sōnatari mari? ni yahuducuye niahye mahapūre ahtaye.

³⁵ Sa ye tiquina sa nidire bue tiye Jesure yuhtierahye. Tiquina sa yuhtieragū ihñano Jesu nuju sa, tiquiro buheyequinare doce buheyequinare pijio ohō saha niahye:

—Mūsa puhto iji duana ijipihtiyequina masa tiquina cahācjāna ijiro cahmene musare. Sa yena ihyo ijina ijipihtiyequina docapū ijinata mūsa, niahye Jesu tiquinare.

³⁶ Sa nino nijinogāre tiquina watoa duhu docoahye. Duhu doco tuhasa tiquirogāre ne wūa, ohō saha ni yahuahye:

³⁷ —Yeere ye duana ahriquirogāre mūsa cahmena, yūhu gūhure cahmene mūsa. Sa yena yūhure cahmena, yūhure ohoriquiro mari Pacū gūhure cahmene mūsa, niahye Jesu tiquinare.

**Marine ihña tuhtiriquiro
ijieraro, mari mehna cjūno ijire**

(Mt 10.42; Lc 9.49-50)

³⁸ Came Ņu ohō saha niahye Jesure:

—Buhegū, mūhu wame mehna watiare cohāriquirore usā ihñan. Mari mehna cjūno tiquiro ijieragū ihñana tire tiquirore ye dutierahti usā, niahye tiquina.

³⁹ Tiquina sa nigū tuhoro Jesu tiquinare yahuahye:

—Sa niedacāhña mūsa tiquirore. Ihcāquiro yūhu wame mehna Cohācjū tutuaye mehna yero, came yūhure ñano ni yahuducu masiedare. ⁴⁰ Marine ihña tuhtiriquiro ijieraro, tiquiro mari mehna cjūno ijire. ⁴¹ Musare potota nii niaja. Yeequina mūsa ijigū ihñañe apequina musare tiquina yedohogū ihñano Cohācjū tiquinare quehnoano yerota. Acore musare tiquina mehenogā sihōgū tiquinare quehnoano yerota

Cohācjū tiquina sa yeri wapa, niahye Jesu tiquinare.

Ñañene yegū cuarīne

(Mt 18.6-9; Lc 17.1-2)

⁴²Sa yero Jesu yahu nemoahye:

—Ahriquirogā yero saha ijiriquireore yuhure wacū tutua ducariquireore yahugutja mūsare. Apequireo ahriquirogā yero saha ijiriquireore ñañene ye dutiro tiquiro ña yuhduaro yuhdurota. Ihcāquireore tiquiro wamupū pajiria utāre duhte yo, pajiri mapū tiquirore tiquina cohāgū ñano wahaboaga tiquiro. Sa ijiepegūta ahriquirogā yero saha ijiriquireore ñañene ye dutiriquiro tiquiro pehe pajiri mapū tiquina cohāriquireo yuhduoro ñano yuhdurota. ⁴³⁻⁴⁴Muhū omoca mehna ñano yegū ti omocare muhū dute cohāboriro saha ti muhū ñano yeye pehere duhuya. Tire duhueragu pecapū wahaguta. Topure ne peca yatierare. Sa ye becoa ne yarierare. Muhū omocare cohāgū ti si dihita butiboaga. Sa yegū muhū pehe sa bajuri turu ijiepeguta came Cohācjū mehna ijiguta. Pua omoca mehna pecapū wahagu muhū sa wahagū ña yuhduaboaga. Sa yegū ti muhū ñano yeye pehere duhuya. ⁴⁵⁻⁴⁶Muhū dahpocā mehna ñano yegū ti dahpocā gūhure muhū dute cohāboriro saha ti muhū ñano yeye pehere duhuya. Tire duhueragu pecapū wahaguta. Topure ne peca yatierare. Sa ye becoa ne yarierare. Muhū dahpocāre muhū cohāgū ti si dihita butiboaga. Sa yegū sa bajuri turu ijiepeguta came Cohācjū mehna ijiguta. Pua dahpocā mehna pecapū wahagu muhū sa wahagū ña yuhduaboaga. Sa yegū ti muhū ñano yeye pehere duhuya. ⁴⁷⁻⁴⁸Muhū capea mehna ñano yegū tiare ore we muhū cohāboriro saha ti muhū ñano yeye pehere duhuya. Tire duhueragu pecapū wahaguta. Topure

ne peca yatierare. Sa ye becoa ne yarierare. Tiare muhū cohāgū tia dihita butiboaga. Ihcā capea mariedapegūta came Cohācjū mehna ijiguta. Pua capea mehna pecapū wahagu muhū sa wahagū ña yuhduaboaga. Sa yegū ti muhū ñano yeye pehere duhuya.

⁴⁹Ahri yehpapū ijina ñano yuhdu-nata mūsa. Pecapū mari ujūgū marine purino saha ñano yuhdu-nata mūsa. ⁵⁰Moa quehnoano ocare. Moa ocaer-agū ti moare ocagū yero basioerare. Moa ocaeraro ti moa ne quehnoaedare. Ti moare duhsero basioerare. Sa ijigū ihñana ti moare cohāno cahmene. Moa quehnoano ti ocaro saha mūsa gūhū masa quehnoana ijiya. Sa yena ape-quina mehna quehnoano mehna ijiya, ni yahuahye Jesu tiquinare.

Tiquina namosānumiare cohāñene yahuahye Jesu

(Mt 19.1-12; Lc 16.18)

10 Sa ye tiquiro topū ijiriquireo waha, Judea yehpa cahapū esa, Jordā wame tiri ma ape sie pahrēpū esahye. Topū tiquiro esagū ihñāñe masa peyequina tiquiro cahapū cahmecoahye tja. Tiquina sa cahmecoagū ihñano to pano tiquiro buheriro sahata pari turi buheahye tja. ²Tiquiro sa buheri watoa fariseo masa wihahye. Jesure ñano tiquiro yahuducugū tūho duamahye tiquina. Sa tūho duaye tiquina Jesure sinituahye.

—¿Mari namosānumiare cohāgū quehnoaboagari? ¿Mari dutiye pehe sata ye dutiajari, muhū tūhotugū? ni sinituahye tiquina.

³—¿Duhse ye dutiajari to Moise mūsare tiquiro cūri? ni yūhtiahye Jesu.

⁴—“Pāpera pūre mūsa cohāñene yahuyere ojoana mūsa namosānumiare cohā masine”, niahye Moise, ni yūhtiahye fariseo masa pehe.

⁵Tiquina sa nigū tuhoro ohō saha ni yahuahye Jesu:

—Cohācjū dutiyere mūsa ye dueragū ihñano sa ni ojoahye Moise. ⁶Tiquiro sa ni ojoari ijepegūta ahri yehpare bajumehnediquiro umuno, numino gāhure yeahye. ⁷Sa yero umuno tiquiro pacusumūare cohā wijia, tiquiro namono mehna ijirota. ⁸Sa ye tiquina pūaro ijiepetā ihcā pagū yero saha ijire. Sa ye tiquina pūaro yero saha ijierare. Ihcā pagū yero saha ijiye nine. ⁹Cohācjū tiquiro omoca duhte dutiriquina ijire. Sa ye tiquinare cahme duhueraro cahmene, niahye Jesu tiquinare.

¹⁰Sa ni tuhasa tiquiro buheyequina mehna wuhupū sajāa wahahye. Wuhupū sajā sa, tiquina namosānumiare cohāñene tiquiro buheyequina sinituahye tja tiquirore. ¹¹Tiquina sa sinitugū tiquiro yuhtiahye:

—Tiquiro namonore cohāriquirō apecorore namo tiro, apecoro mehna ñano yeriquiro ijire. Sa yero tiquiro cohāricorore ñano wahagū yero nine. ¹²Sa yero numino pehe ticoro manūnōre cohāno, apeqirore manū tiro, tiquiro mehna ñano yericoro ijire, niahye Jesu tiquinare.

**Macanagā ye ijiatire
Cohācjūre sini basahye Jesu**

(Mt 19.13-15; Lc 18.15-17)

¹³Sa ye macanagāre Jesure ña peo dutiye tehe tiquinagāre Jesu cahapū ne cāhtaye niahye. Tiquina sa yegū ihñañe tiquiro buheyequina pehe tiquinagāre ne cāhtayequinare tuhtiahye. ¹⁴Tiquina sa tuhtigū ihñano Jesu usuaro, ohō saha niahye tiquinare:

—Macanagā yuhū cahapū ahtaahro. “Waharīsa”, niedacāhña tiquinagāre. Tiquinagā Cohācjūre tiquina puhtoro tuhoture. Sa ye Cohācjū tiquiro puhtoro ijiropure ahriquinagā yero saha

tuhotuyequina ijire topure. ¹⁵Ijirota niita niaja musare. Ahriquinagā Cohācjūre tiquina cahmeno saha mūsa pehe cahmedana, tiquiro cahapū wahasi mūsa. Mūsa wahaeragū mūsa puhtoro ijisi tiquiro, niahye Jesu.

¹⁶Sa ni tuhasa Jesu macanagāre ne wua, tiquinagāre ña peoro ohō saha niahye:

—Ahriquinagā quehnoañequina wa-haahro, ni sini basahye Cohācjūre.

Doeri cjē upuro Jesure sinituahye

(Mt 19.16-30; Lc 18.18-30)

¹⁷Sa ye Jesu mahapū tiquiro wahaducugū apeqiro pehe oma cā, tiquiro dah-pocāri cahapū dusepe curi mehna quehe sahye tiquirore ño peoro.

—¿Ne, quehnoagu buhegu, yuhū ijip-ihtiyē decori Cohācjū mehna iji duagu duhse yegutari yuhū? niahye tiquiro Jesure.

¹⁸Tiquiro sa nigū Jesu yuhtiahye:

—¿Duhse ijiro boro yuhūre “Quehnoagu”, ni pisuajari mūhū? Cohācjū dihita quehnoariquirō ijire. ¹⁹Ahri Cohācjū dutiyere masine mūhū: Masare wejēdacāhña. Wuana tieracāhña. Yaqueracāhña. Ni mehoedacāhña. Apequina yere ni meho nedacāhña. Mūsa pacusumūare ño peoya. Ahri dutiyere yero cahmene masare, ni yahuahye Jesu tiquirore.

²⁰—Buhegu, tire ijipihtiyere coā wah-mua cāhtagu ijiguputa yuhūducaera ti yuhū, niahye tiquiro Jesure.

²¹Tiquiro sa nigū tuhoro Jesu pehe tiquirore ihñadoque ohō, cahñahye. Sa yero ohō saha niahye:

—Mehenogā duhsare mūhūre mūhū ye pehoato. Ijipihtiyere mūhū yere duagu wahaya. Sa yegu ijipihtiyere mūhū wapatari niñerure pejecuoyequinare ohoya. Mūhū sa yegū pajiro mūhū ye umūsepe, Cohācjū cahapū ijirota.

Muhū sa yeri bato yuhū mehna cjū ijiacjū ahtaya, niahye Jesu tiquirore.

²² Tiquiro sa nigū tūhoro tiquiro pehe peye doeri cjē cūoriquiro ijiro tire pe-jescuoeyequinare oho dueraro, bujua witi, coaera, wahaa wahahye.

²³ Tiquiro sa bujua witi-gū ihñano Jesu majareduca sa, tiquiro buheyequinare ihñadoque ohō, ohō saha niahye:

—Doeri cjē cūoyequina Cohācjū pūhtoro ijiropūre tiquinare waharo basioera cjūre, niahye tiquinare.

²⁴ Tiquiro sa nigū tūhoye tiquina pehe tiquirore tūho maria wahahye. Sa ni tuhasa Jesu pari turi yahuahye tiquinare:

—Yuhū acaye, ijiptiyequina doeri cjē opana Cohācjūre wacūno marieno Cohācjū pūhtoro ijiropū tiquinare waharo basioerare. ²⁵ Camello pehe awia copepū tiquiro sajā duagū basioerare. Tiquiro sa ijiro yūhdūoro doeri cjē cūoriquirore Cohācjūre wacūno marieno Cohācjū pūhtoro tiquiro ijiropūre tiquirore waharo basioerare, ni yahuahye tiquinare.

²⁶ Tiquiro sa nigū tūhoye to pano tiquina tūho mariariro yūhdūoro tūho maria waha, tiquina basi ohō saha niahye:

—Yohou, tiquiro nino sahata potota iji-gū ne ihcāquiro masūnore yūhdūoer-aboaga Cohācjū, niahye tiquina basi.

²⁷ Tiquina sa nigū tūhoro Jesu tiquinare ihñadoque ohō, ohō saha niahye:

—Masa tiquina esa tuharo quehnoano yeri mehna Cohācjū cahapū waha masiedare. Cohācjū pehe masare pecapū waboriquinare yūhdūo masine. Tiquiro ijiptiyere quehnoano ye masi peho cāhre, niahye Jesu tiquinare.

²⁸ Tiquiro sa nigū Pedro tiquirore ohō saha niahye:

—Tūhorīña. Usā pehe ijiptiye usā yere cū cāu muhū mehna wahana tana, niahye tiquiro Jesure.

²⁹ Tiquiro sa nigūta Jesu ohō saha niahye:

—Ijirota niita niaja musare. Quehnoañe buheyere, yeere yena tana yūhūre ño peona tana musa wūhūserere, musa bahanare, musa pacusūmūare, musa pohnare, musa weserire cūrina ijina, pajiro wapatanata musa yojopūre. ³⁰ Sa yena musa wūhūserere, musa bahanare, musa pacosānumiare, musa pohnare, weserire, to pano musa cūoriro yūhdūoro yojopūre peye cūonata musa. Sa ye apequina musare ñano yeeta. Sa yena camerūre ape tjuropū ijiptiye decori Cohācjū mehna ijinata. ³¹ Yojopūre peyequina pūhtoa ijiriquina ti pjeprere ihyo ijiyequina tojoaeta. Sa ye yojopūre peyequina ihyo ijiyequina ijiriquina ti pjeprere pūhtoa comesaeta tja, ni yahuahye Jesu tiquinare.

Pari turi Jesu tiquiro yaria masa wijiatiye yahuahye

(Mt 20.17-19; Lc 18.31-34)

³² Sa ye tiquina mahapū maja, Jerusalēpū mūjañe niahye. Jesu tiquina panogā ūhmū tāhye. Sa tiquiro ūhmū tāgū ihñañe tiquiro buheyequina ihñā maria wahahye. Sa ye tiquina bato nūnū tāriquina pehe cuero mehna nūnū tāhye. Sa yero Jesu tiquiro buheyequinare tiquina sehsaro neahye tja. Sa yero masa tiquirore dūhse yeatiye Jesu yahu dūcahaye tiquinare.

³³ —Tūhoya yūhūre. Yojopūre Jerusalēpū wahana niaja mari. Topū masa yūhū masūre Cohācjū ohorigūre ñehe, apequinapūre yūhūre ohoeta. Pahia pūhtoare, mari acaye judio masare buheyequina gūhūre yūhūre ohoeta. Sa ye yūhūre wejē dutieta tiquina. Sa wejē dutiye judio masa

ijieyequina pehere yuhure ohoeta.
³⁴Tiquina sa ohori bato tiquina pehe yuhure bujipe, sihco puti ohō, tana, wejēeta. Sa yegu yuhu yariari bato ihtia deco wahaboro masa wijiagutja, ni yahuahye Jesu tiquinare.

Santiago, Ñu mehna Jesure siniahye
(Mt 20.20-28)

³⁵Sa ye Santiago, Ñu mehna Jesu cahapu esaye, siniahye tiquiore. Tiquina Zebedeo pohne ijiahye. Sa ye ohō saha ni siniahye:

—Buhegu, usā sinino saha usāre yeya muhu, niahye tiquina Jesure.

³⁶—¿Duhse yuhu yegū cahmeajari mūsa? niahye Jesu tiquinare.

³⁷—Ijipihtiequina puhtoro ijigu usāre muhu mehna duji dutiya. Ihcāquiro muhu poto pehe, apequiro muhu cū pehe pehe duji dutiya usāre, muhu mehna puhtoa usā ijiato saha, niahye tiquina Jesure.

³⁸Tiquina sa nigū tuhoro ohō saha ni yahuahye Jesu tiquinare:

—Musa ñano yuhduatore masiedapenata sa sinine yuhure. ¿Yojopure yuhu ñano yuhduato saha mūsa gūhu ñano yuhduna ihcāno sahaboagari? ni sinituahye tiquinare.

³⁹Tiquiro sa sinitugū tuhoye tiquina yuhtiahye:

—Ihcāno sahanata, ni yuhtiahye tiquina.

Tiquina sa nigū Jesu ohō saha ni yahuahye:

—Yuhu ñano yuhduato saha ñano yuhdunata mūsa gūhu. ⁴⁰Musa sa yuhduanaja mūsa ijiepegūta, yuhu mehna dutiatiquinare, yuhu mehna dujiatiquinare bese masiedaja yuhu. Ahrire yuhu Pacu pehe quehno tuhasari. Sa ye tiquiro beseatiquina dihita yuhu poto pehe yuhu cū pehe pehe dujieta, niahye Jesu tiquinare.

⁴¹Sa ye apequina puā omopequina buheyequina Santiago, Ñu ahriquina puaro mehna usuahye tiquina sa sinidire tuhoye. ⁴²Tiquina sa usuagū ihñano Jesu tiquiro buheyequinare pijio ohō saha niahye:

—Cohācjūre masieñequina puhtoa pehe tiquina masare dutiye, usuaro mehna dutire. ⁴³Musa pehe ne sa yesi mūsa basi. Mūsa mehna cjūno puhtoro iji duaro, ijipihtiequina tiquiro mehna cjēna cahacjūno ijiro cahmene tiquiore. ⁴⁴Sa yero ijipihtiequinare dutiriquire iji duaro, apequina cahacjūno ijiro cahmene tiquiore. ⁴⁵Sata ijigu ijiaja yuhu gūhu. Yuhu masu Cohācjū ohorigu ijiepegūta ahri yehpau masare yedohogu ahtau. Sa yegu peyequina masa ye buhirire yariagu ahtagu nii. Sa yegu peyequina masare pecapu wahaboriquinare yuhduogu ahtagu nii. Masare dutiepegu ahtagu niedu, niahye Jesu tiquinare.

Bartimeore, caperi bajueriquirore
ihñagū yeahye Jesu

(Mt 20.29-34; Lc 18.35-43)

⁴⁶Sa ye tiquina Jericópu esahye. Sa yero Jesu tiquiro buheyequina, masa peyequina mehna ti macapu ijieyequina tiquina wahagū Bartimeo pehe maha duhtu cahapu dujiahye. Tiquiro Timeo macuno caperi bajueriquiro ijiro, decoripe masare niñerure siniducuriquiro ijiahye. ⁴⁷Sa yero topu Jesu Nazare cjūno tiquiro cahapu ahtagū tuhoro Bartimeo ohō saha ni sañuducuahye:

—Jesu, Davi munano panami iji turiagu, masare yuhduoacju, paja ihñaña yuhure, ni sañuducuahye Jesure.

⁴⁸Tiquiro sa nigū tuhoye masa peyequina Bartimeore “Dihta mariaña”, ni tuhtiahye tiquina tiquiore. Tiquina sa tuhtigū tuhoro Bartimeo to pano tiquiro

sañuducuriro yuhdno cjüno sañuducu nemoahye tja:

—Jesu, Davi munano panami iji turiagu, masare yuhduoacjü, paja ihñaña yuhure, ni sañuducuahye tiqiro.

⁴⁹Tiqiro sa ni sañuducugü tuhoro Jesu pehe esaduca, “Pijiohya tiqirore”, niahye. Tiqiro sa nigü tiquina pehe caperi bajueriqirore piji cähye:

—Bucueya. Wahcäducaya. Tiqiro mähure pijiore, niahye tiquina Bartimeore.

⁵⁰Tiquina sa nigü tuhoro tiqiro bui cjã suhtirore tu we cü, uhpu yuhdu cã, Jesu cahapü esaducahye. ⁵¹Sa yero Jesu sinituahye tiqirore.

—¿Duhse yuhü yegü cahmeajari mähü? niahye Jesu tiqirore.

—Yuhü puhto, yuhure ihñagü yeya, niahye caperi bajueriqiro.

⁵²—Wahaya. Mähü yuhure wacü tu-tuagu quehnoa wahare, niahye Jesu tiqirore.

Tiqiro sa nigüta caperi bajueriqiro ihñaa wahahye. Sa quehnoa waharo Jesu mehna mahapü wahaa wahahye.

Jerusalëpü esahye Jesu

(Mt 21.1-11; Lc 19.28-40; Jn 12.12-19)

11 Sa ye Jerusalëpü tiquina esato panogã Betfagé wame tiri maca cahapü, Betania wame tiri maca cahapü ijidapü, Olivo wame tidü cunupü esa muhtahye. Topü esaro puarore tiqiro buheyequina mehna cjënare Jesu ohoro ohõ saha niahye:

²—Si macapü wahaya. Topü esana duita burrogãre tiquina dũhte docoriquirogãre bocanata. Apequina pesamehnediquirogã ijiaga. Tiquirogãre bocana, yuta dare pã, ne cãhta basaya yuhure. ³Musa sa yegü ihñano burrogã upuro “¿Duhse burrogãre pãjari?” tiqiro nigü tuhona, ohõ saha ni

yuhütiya tiqirore: “Mari puhtoro burrogãre cahmedoqueo nidi. Sa yero mianogãta wiarota tiqiro”, ni yahuya tiqirore, ni yahu duti ohoahye tiqiro buheyequinare puarore.

⁴Tiqiro sa nigü waha, wuhü cahapü ijiri mahapü sopecaha cahapü burrogãre tiquina dũhte docoriquirogãre bocahye.

⁵Sa ye tiqirogãre yuta dare tiquina pãgü ihñañe topü ducuyequina sinituahye tiquinare:

—¿Duhse yena tana musa yuta dare pãjari burrogãre? ni sinituahye tiquina.

⁶Tiquina sa nigü tuhoye, tiquina pehe Jesu tiqiro nidiro sahata yahuahye topü ducuyequinare. Tiquina sa yahugü tuhoye topü ducuyequina pehe “Neahña”, niahye tiquinare.

⁷Sa ye tiquina burrogãre Jesu cahapü ne sahye. Tiquina ne sari bato tiqirogã bui tiquina suhtire duhu peo tuhasagü ihñano, Jesu pehe tiqirogã bui mÿja pjeahye, waharo taro. ⁸Sa ye masa peyequina tiquina bui sañañe suhtire tu we ne, mahapü seõ cü muhtahye, Jesure ño peoye. Apequina pehe püri tiye dupurire weseripü tiquina ne cãhtari dupurire mahapü cüahye.

⁹Sa ye tiqiro pano wahayequina, tiqiro bato ahtayequina mehna ohõ saha ni sañuducuahye:

—Ahriqirore ño peouhna. Ahriqiro Cohãcjü tiqiro ohoriquiro quehnoano ijiagro. ¹⁰Mari ñecu iji turiariquiro Davi munano puhtoro tiqiro ijiriro saha ahtariquiro quehnoano ijiagro. Uhmuse cjünore “Tutuagu ijire”, ni ño peouhna, ni sañuducuahye tiquina.

¹¹Sa yero Jesu Jerusalëpü esaro Cohãcjü ya wuhupü sajã saro, ti wuhupü ijiyere ijiipihütiyere ihña peho cãhye. Ihña tuhasa “Ñamicahapü ijire. Deco cjünota wahauhna”, nino, Jesu tiqiro buheyequina doce buheyequina mehna Beta-niapü wahahye.

Jesu higueraḡure yaria dutiahye

(Mt 21.18-19)

¹²Sa ye ape deco tiquina Betaniapu ijiriquina wahaa wahahye. Sa yero Jesu pehe ɛjua ahbaa waha, yoaropu higuera wame tidure quehnoano pūri tidure ihñano tu ducare macano wahamahye. ¹³Duca mariedahye. Duce tiri pje ijieraro pūri dihita ijiahye. ¹⁴Sa yero duca mariedagū ihñano ohō saha niahye:

—Ahdū ducare masa ne pari turi ihyeracāhdo. Ne duca tieracāhdo, niahye Jesu.

Tiquiro sa nigū tiquiro buheyequina pehe tuhoahye.

Jesu Cohācjū wuhure Cohācjū mehna yahuducuri wuhū ye dutiahye

(Mt 21.12-17; Lc 19.45-48; Jn 2.13-22)

¹⁵Tiquiro sa yeri bato tiquina Jerusalēpu esahye. Topu esaro, Jesu Cohācjū ya wuhupu saḡa saro apee boro duayequinare, dūyequina gūhure cohā wioahye. Sa yero niñeru comesaye mesarire yo wahcō, ne majare cū mujahye. Bujuuare duayequina tiquina dujiye pahtari gūhure sata yeahye. ¹⁶Sa yero apee borore ne saḡa dutierahye masare. ¹⁷Sa yero Jesu ohō saha ni buheahye tiquinare:

—Ohō saha nine Cohācjū yere tiquina ojoari pū: “Ya wuhū Cohācjū mehna yahuducuri wuhū wame tirota. Sa yero ijipihtiro cjēna ya wuhū ijirota”, ni ojoahye Cohācjū yere tiquina ojoari pū. Ti pū sa niepegūta mūsa pehe ahri wuhupu duana, mūsa basi cahme yaquere mūsa, ni buheahye tiquinare.

¹⁸Tiquiro sa ni buhegū ijipihtiyequina masa pehe tuho maria wahahye. Sa ye pahia puhto, usā judio masa buheyequina mehna tiquirore cue niahye. Sa ye tiquina tiquirore wejēatire wacū macamahye. ¹⁹Tiquina sa yegū ñamic-

ahapu Jesu tiquiro buheyequina mehna ti macapu ijiriquina wahaa wahahye.

Higueraḡu ñaia wahahye

(Mt 21.20-22)

²⁰Sa ye bohrearo mahapu maja taye, higueraḡure ihñahye. Tu nuhcoripu ñai duca, ñaia wahahye tu. ²¹Ture ihñano Pedro pehe wacū, ohō saha niahye:

—Buhegu, ihñaña. Higueraḡu mūhu yaria dutidū yaria wahaya, niahye Pedro.

²²Tiquiro sa nigūta Jesu yahuahye tiquinare:

—Cohācjūre wacū tutuaya mūsa. ²³Ijirota niita niaja mū sare. Ahdū cūnure pajiri mapu mūsa cohā dutigū mūsa nidiro saha sa waharota. Cohācjūre quehnoano mūsa wacū tutuagū “Yuhū sinidiro saha waharota”, mūsa ni tuhotugū mūsa nidiro saha waharota. ²⁴Sa yegū ahrire yahugutja mū sare. Cohācjū mehna yahuducuna, tiquirore sinina, “Yuhū sinidiro saha ohorota yuhure”, ni tuhotuya. Mūsa sa yegū ihñano Cohācjū mūsa siniñene ohorota. ²⁵Sa yena Cohācjū mehna mūsa yahuducuo pano mū sare apequina tiquina ñano yegū mūsa usarire duhuya. Mūsa sa yegū ihñano mari Pacu uhmūse cjūno mūsa ñañe yeri pehere tiquiro gūhu usua duhurora. [²⁶Mū sare ñano yeriquinare mūsa usua duhueragū mari Pacu gūhu uhmūse cjūno mūsa ñañe yeri pehere usaro ne duhūsi tiquiro gūhu,] niahye Jesu.

Pahia puhto, judio masare buheyequina, bucuna mehna Jesu mehna cahme duse tini wiahye

(Mt 21.23-27; Lc 20.1-8)

²⁷Tiquiro sa nidi bato tiquina Jerusalēpu wahahye tja. Sa ye Jesu Cohācjū wuhupu tiquiro tinigū ihñañe pahia puhto, usā judio masare

buheyequina, bũcũna gũhũ tiqiro cahapũ esaye, tiqirore sinituahye:

²⁸—¿Dũhsegu canũre sa yeari mũhũ? ¿Noa mũhũre tire sa ye dutiari? ni sinituahye tiquina Jesure.

²⁹Tiquina sa nigũ Jesu yũhtiahye:

—Mũsa pehere sinitu muhtagũtja. Quehnoano yũhũre mũsa yũhtigũ mũsare yahugũtja yũhũ gũhũ. ³⁰¿Nu masare tiqiro wame yegũ noa boro pehe tiqirore wame ye dutiyari, mũsa tũhotugũ? ¿O Cohãcjũ dutierayari? ¿O masa pehe tiqirore dutiyari, mũsa tũhotugũ? ni sinituahye tiquinare.

³¹Tiqiro sa nigũ tiquina pehe tiquina basi ohũ saha niahye:

—¿Dũhse ni yũhtinatari mari? “Cohãcjũ Ñũre dutiri jiri”, mari nigũ, “¿Dũhsena Cohãcjũ Ñũre tiqiro dutiepegũta tiqirore tũho duerari mũsa?” niboaga Jesu marine. ³²Sa yero “Ñũ tiqiro wame yegũ Cohãcjũ pehe tiqirore dutierari jiri”, mari nigũ masa pehe usueta mari mehna, niahye tiquina basi.

“Potota Ñũ Cohãcjũ yere yahu muhtariqiro ijire”, ni tũhotue tiahye masa pehe. Sa ye pahia puhtoa, usã judio masare buheyequina, bũcũna mehna tiquinare cue niahye. ³³Sa ye tiquina Jesure ohũ saha ni yũhtiahye:

—Ñũre wame ye dutiriqirore usã masiedaga, niahye tiquina Jesure.

—Ti pje pũrita yũhũ gũhũ ahrire yũhũ yerire dutiriqirore yahueraja mũsare, niahye Jesu tiquinare.

Ñãnequina dahra cohteyequina quitire yahuahye Jesu

(Mt 21.33-46; Lc 20.9-19)

12 Sa ye Jesu tiqiro tũhotuye mehna ohũ saha ni queoye mehna buhe dũcahye tiquinare.

—Wese upũro uhsẽ darire oteahye. Ote tuhasa, sahrĩnũre doco, uhsere tiquina cũhta mũtoati copere sehe, uhmũari wũhũgã dahreahye tiqiro. Sa

yero ti wesere apequinare ihcã pehe pahma cũno, ti wesere cohte dutiahye. Cohte duti tuhasa ape siepũ wahaa wahahye tiqiro. ²Came uhsẽ ñĩdi pje ijigũ wese upũro tiqiro cahacjũnũre wese cjẽ tiqiro ya pahma cjẽ dũcare ne dutiro ohomahye. ³Sa ye wesere cohteyequina pehe tiqiro cahacjũnũre ñehe, quẽahye tiqirore. Sa ye tuhasa tiqiro cahacjũnũre uhsẽ tũhorine ohõerapeta tojoa dutiahye tiqirore. ⁴Sa yero wese upũro apeqiro tiqiro cahacjũnũre ohomahye tja. Sa ye cohteyequina pehe tiqiro dapure cami dahre, ñano yeahye tiquina tiqirore. ⁵Sa yero apeqiro pehere tiqiro ohogũ cohteyequina tiqirore wejẽahye. Peyequina apequina gũhũre sa dihita ye mũjahye. Apequina pehere quẽ, apequina pehere wejẽahye tiquina.

⁶Sa yero wese upũro macũno dihita dũhsahye. Tiqiro cahĩniqiro ijiahye. Sa yero tiqiro macũnũre ohoahye, “Yũhũ macũ pehere ño peoeta”, nino. ⁷Tiqiro sa ni tũhotuepegũta cohteyequina tiquina basi ohũ saha ni yahuducuahye: “Wese upũro macũno ijire ahriqiro. Tiqirore wejẽihna mari. Sa yero ahri wese mari ya wese tojoarota”, nimahye tiquina basi. ⁸Sa niñe tiqirore ñehe, wejẽ, wese dũhtũ cahapũ ne cã, cohã cãhye tiquina tiqirore.

⁹¿Ne wese upũro ahtaro dũhse yerotari tiqiro wesere cohteyequinare, mũsa tũhotugũ? Ohũ saha yerota tiquinare: Tiqiro tiquinare wejẽno, apequina pehere wesere cohte dutirota. ¹⁰⁻¹¹¿Cohãcjũ yere tiquina ojoari pũre ahrire buherari mũsa? Ohũ saha ni ojoahye:

Ahriqiro Cristo utã yero saha ijire. Utãre wũhũre dahreyequina tiquina cohãno saha masa tiqirore cohãeta. Tiquina sa cohãepẽgũta yojopũre wũhũre dahreyequina wũhũre yeye, tiquina cũ muhtaria utãre tiquina

cūno saha Cohācjū tiquirore puhtoro sōri. Cohācjū pehe ahrire yeri. Tiquiro sa yegū ihñana, “Quehnoa yahduare”, ni tuhotuaja mari, ni ojoahye panopure.

¿Tire ne buherari masa? niahye Jesu tiquinare.

¹²Tiquiro sa nigū tuhoye pahia puhtoa, usā acaye judio masare buheyequina, bucuna mehna ohō saha ni tuhotuahye: “Jesu wesere cohteyequina quiti mehna marine tuhtiro nine”, ni tuhotuahye. Sa ni tuhotuye Jesure ñehe duamahye. Sa ñehe duepeta masare cue niahye. Sa cueye tiquirore cohā cāa wahahye.

**Fariseo masa, Herode ya curua
cjēna mehna gobierno cjē
wapare sinituahye Jesure**

(Mt 22.15-22; Lc 20.20-26)

¹³Waha, tiquina fariseo masare, Herode ya curua cjēna gūhure Jesure sinitu dutiye ohoahye tja. Jesu ñano tiquiro yūhtigū ye duamahye tiquina, tiquirore yahusāne tehe. ¹⁴Sa ye Jesu cahapu esaye, tiquirore niji sio sinitumahye:

—Buhegu, poto yahuducugu, ni mehoñe mariegu mūhu ijigū masiaja usā. Cohācjū yere queoro mūhu yahugū gūhure masiaja usā. Sa yegu ihcāquiro puhtoro waro ijiepegūta tiquiro gūhure dōyaro marieno potota yahure mūhu. Sa yegu usāre yahuya. ¿Roma cjēno ijipihtiequina puhtoro yere marine wapa yero cahmejari, mūhu tuhutugū? ¿Mari dutiye wapa ye dutiajari, mūhu tuhutugū? ni sinituahye tiquina Jesure.

¹⁵Tiquina sa sinitugū tuhoro tiquina ñano ye duayere masino Jesu ohō saha ni sinituahye tiquinare:

—¿Duhse yena yūhu ñano yahuducugū tuho duajari masa? Yojopure niñeru cjoere ne cāhtaya. Ti cjoere ihñauhna, niahye Jesu tiquinare.

¹⁶Tiquiro sa nigū tuhoye tiquina pehe ihcā cjoere ne cāhtahye. Tiquina ne wihigū Jesu sinituahye tiquinare:

—¿Noa boro queoye wahñajari ahri cjoere? ¿Noa boro wame wahñajari? ni sinituahye tiquiro.

—César, masa ijipihtiequina puhtoro queoye, tiquiro wame gūhu wahñare, ni yūhtiahye tiquina.

¹⁷Tiquina sa nigū Jesu yahuahye tiquinare:

—Ti pje pūrita masa ijipihtiequina puhtoro yere tiquiro pehere ohoya. Cohācjū yere Cohācjū pehere ohoya, ni yahuahye Jesu.

Tiquiro sa nigū tuhoye tuho maria wahahye.

**Cohācjū tiquiro masoatire
yahuahye Jesu saduceo masare**

(Mt 22.23-33; Lc 20.27-40)

¹⁸Sa ye ihquēquina saduceo masa Jesu cahapu wihiahye. Saduceo masa pehe “Cohācjū yariariquinare masosi”, ni tuhutuyequina ijiahye. ¹⁹Sa ye tiquina ohō saha niahye tiquirore:

—Buhegu, ohō saha ni buheahye Moise: “Ihcāquiro wahmino namo tiriquire pohna mariedaperota yariagu ihñano tiquiro bahurore tiquiro wahmino namono ijiricore nūoano cahmene. Sa yero wahmino mūnana tiquiro pohna tiboro saha pohna tiro cahmene tiquiro bahurore. Sa ye tiquiro pohne tiquiro wahmino mūnana pohne yero saha ijietā”, ni ojoahye Moise, niahye tiquina Jesure.

²⁰Tire ni tuhasa, ahri quitireta yahu nemoahye Jesure:

—Ihcāquiro masuno ijiahye. Seis bahana tiahye. Tiquiro wahmino pehe namo ti, pohna mariedaperota yariaa wahahye. ²¹Sa yero apequiro tiquiro bahuro gūhu tiquiro wahmino namono ijiricore cūomahye. Tiquiro sa nūoari bato tiquiro wahmino yero saha pohna

mariedaperota yariaa wahahye tja. Sa yero ahriquiuro bahuro tiquiuro wahmino munano yero saha pohna mariedaperota yariaa wahahye. ²²Sa dihita wahahye ihcãquiuro pohne waro. Ne pohna mariedapeta yaria pihtia wahahye tiquina. Tiquina namono ijiricoro gũhu tiquina batota yariaa wahahye. ²³¿Ne, Cohãcjũ ijipihtiequinare yariariquina munare tiquiuro masogũ diquiuro namono pehe ijiritari ticoro? Tiquina ijipihtiequina ticorore namo tiriquina muna ijiahye. ¿Sa yero diquiuro namono pehe ijiboagari ticoro pototi? ni sinituahye tiquina.

²⁴Jesu yũhtiahye tiquinare:

—Cohãcjũ yere tiquina ojoari pũre, tiquiuro masiñe gũhure ne masiedare msa. Sa yero msa tuhutuye pehe ne poto ijierare. ²⁵Yariariquina muna tiquina masa mujari bato angele yero saha ijire. Namu marieñequina, manũ marieñe numia ijire topure. ²⁶Yariariquina muna tiquina masa wijiato pehere musare yahugutja: Tire Moise quehnoano yahu pehoahye. Mehenugã ujũri quitire ohõ saha ni yahuahye tiquiuro: “Yũhu Abrahã, Isaac, Jacob tiquina puhto tjiaja”, ni yahuri Cohãcjũ yũhure”, ni ojoahye Moise tiquiuro ojoari pũpũ. ²⁷Tiquina yariari bato “Tiquina puhto tjiaja”, ni yahuahye Cohãcjũ. Sa nieperota yariariquina muna puhtoro ijierare Cohãcjũ. “Tiquina puhto tjiaja”, tiquiuro niñe mehna catieyquina tiquina ijigũ masiaja mari. Tiquiro catieyquina puhtoro ijire. Sa yena “Yariariquina masasi”, ni tuhutuna potota tuhutuerare msa, niahye Jesu tiquinare.

**Quehnoa yũhdũro
dutiore yahuahye Jesu**

(Mt 22.34-40)

²⁸Sa ye ihcãquiuro usã acaye judio masare buheyequina mehna cjũno tiquina cahapu wihi, tiquina cahme

yahuducugũ tuhohahye. Jesu quehnoano yũhtiyere tuhoro sinituahye tiquiore.

—¿Cohãcjũ ye dutiro quehnoa yũhdũari dutiro noho pehe ijiajari, mũhu tuhutugũ? ni sinituahye tiquiuro Jesure.

²⁹Jesu tiquiore yahuahye:

—Ahri dutiro ijire apeye dutiye bui quehnoa yũhdũari dutiro: “Israe masa, tuhoya. Cohãcjũ msa puhtoro yũhu ihcũta ijiaja. ³⁰Tutuaro msa jeripohnari mehna, quehnoano msa wacũñe mehna, msa tutuaye mehna yũhure cahĩña”, nine Cohãcjũ. ³¹Ahri dutiro bato apero dutiro quehnoano ijire. “Mũhu basi mũhu cahĩno saha mũhu cahapu ijieyquina gũhure cahĩña”, nine Cohãcjũ. Ahri puaro dutirota ijipihtiey apeye dutiye yũhdũoro ijire, ni yahuahye Jesu tiquiore.

³²Tiquiro sa nigũ judio masare buheriquiro ohõ saha niahye:

—Sa tjire. Buhegu, potota nine mũhu. Cohãcjũ ihcãquiurota ijire. Apequiuro tiquiuro yero saha ijiriquiro mariedare. Mũhu niñe potota ijire. ³³Cohãcjũre tutuaro mari jeripohnari mehna, mari wacũñe mehna, mari tutuaye mehna tiquiore cahĩno cahmene marine. Yũhu caha ijieyquinare yũhu basi yũhu cahĩno saha tiquina gũhure cahĩno cahmene yũhure. Wahiquinare wejẽ ujũa muo mari ohori mehna mari ño peogũ quehnoarĩmene. Ahri yũhdũoro Cohãcjũre, masa gũhure mari cahĩne quehnoa yũhdũare. Mũhu sa niñe ijirota ijire, niahye judio masare buheriquiro Jesure.

³⁴Tiquiro sa quehnoano yũhtigũ tuhoro Jesu yahuahye tiquiore:

—Mehenogã dũhsare mũhure Cohãcjũre mũhu quehnoano masiato, ni ahye tiquiore.

Tiquiro sa nigũ tuhoye apeyquina cu-eye, ne sinituerahye Jesure.

Cristo Davi mʌnano puhtoro ijire

(Mt 22.41-46; Lc 20.41-44)

³⁵ Sa ye Cohācjū wuhupū buhero ohō saha niahye Jesu:

—“Cristo Davi mʌnano panamino iji turiariquiro ijire”, ni buhere mari acaye judio masare buheyequina. ¿Duhse niñe sa ni buheajari tiquina? ³⁶ Davi tiquiro basí Espiritu Santo tiquiro dutiriro sahata ohō saha ni yahuahye:

Cohācjū yuhū puhtore ohō saha nidi: “Ohōpū yuhū poto pehe dujiya. Sa yegū mʌhure ihña tuhtiequinare mʌhure yuhduduca basagutja yuhū”, nidi Cohācjū yuhū puhtore, ni ojoahye Davi mʌnano.

³⁷ Sa ni ojoaro Davi mʌnano puhtoro tiahye Cristore. ¿Davi mʌnano Cristo ñecuno mʌnano iji turiariquiro ijieperota duhsero Davi pehe puhtoro tiyari Cristore? Cristo Davi mʌnano puhtoro ijire, ni yahuahye Jesu.

Tiquiro sa ni buhegū peyequina masa bucueye mehna tuhoahye tiquirore.

Jesu judio masare buheyequina tiquina ñañene yahuahye

(Mt 23.1-36; Lc 11.37-54; 20.45-47)

³⁸ Sa yero tiquiro buhe nemono ohō saha niahye:

—Mari acaye judio masare buheyequina tiquina ñañe yeyere quehnoano ihñaña. Sa yena tiquina yero saha yeracāhña. Tiquina yoaye suhti saña, masa tiquina ihñonopū majare, doeri cjē duaropū apequina puhtoare quehnoano ño peo tiquina sinino saha tiquina piti ca sinigū cahmene tiquina. ³⁹ Sa ye mari judio masa buheye wuhusepū quehnoañe dujiye dihitare duji duare. Sa ye bose deco ijigū topū gūhure quehnoañe dujiye dihitare cahmene tiquina. ⁴⁰ Tiquina wape wiha numia ye wuhusere tiquina cuoye gūhure ehmare ti numiare. Sa ye

tiquina masa ihñonopū yoari pje Cohācjūre siniducumene masare ihña du-tiye. Tiquina sa yeri buhiri apequina bui cjūno tiquinare Cohācjū pajiro buhiri dahrerota, niahye Jesu tiquinare.

Wape wihoro ticoro ohorire yahuahye Jesu

(Lc 21.1-4)

⁴¹ Sa yero Jesu Cohācjū wuhū cjē niñeru tiquina sari acaro cahapū dujiyahye. Topū masa tiquina niñeru duhu sīgū ihña dujiro niahye. Sa ye niñeru opana ti acaropū pajiro duhu sāhye. ⁴² Sa yero wape wihoro pejecuoricoro ti acaropū ahta, pua cjoegā duhu sāhye. Pua cjoe ihcā centavo pose ijire. ⁴³ Ti cjoeri ticoro duhu sīgū ihñano tiquiro buheyequinare pijioahye:

—Ijirota niita niaja musare. Ahricoro wape wihoro pejecuoricoro pehe niñeru ihbori acaropū duhu sāno apequina ijipihtiyequina tiquina ohori yuhduoro ohori ticoro pehe. ⁴⁴ Apequina doeri cjē opana pajiro tiquina ohopegūta tiquina ye pajiro duhsare. Ahricoro pehe pejecuoricoro ijieperota ijipihtiye ticoro ihyatire dúborigāre oho pehori, niahye Jesu.

—Cohācjū wuhū cohāri wuhū ijirota, niahye Jesu

(Mt 24.1-2; Lc 21.5-6)

13 Sa ye Cohācjū wuhupūre tiquina wijiagū ihcāquiro buheyequina mehna cjūno ohō saha niahye:

—Buhegu, ihñaña. Ahri wuhuse quehnoañe utā paca mehna tiquina yeri wuhuse quehnoa yuhduaye wuhuse ijicjoare, niahye tiquiro.

² Tiquiro sa nigū Jesu yahuahye tiquinare:

—Ahri ijipihtiye mari ihñari wuhuse, ahri wuhuse cjē utā paca gūhure cohā pehoeta. Ne ihcāria utā tojoasi, niahye Jesu tiquinare.

Decori pihitiare yahuahye Jesu

(Mt 24.3-28; Lc 21.7-24; 17.22-24)

³Sa ye Jesu Olivo wame tidu cunupu Cohăcjŭ wuhŭ potopu ijidupu esahye. Tu buipu dujiahye. Topu Pedro, Santiago, Ńu, Andre mehna tiquina sehsaro ijiye, tiquina tiqiurore sinituahye:

⁴—Yahuya usăre. ĆDuhse ijigŭ sa waharotari mŭhu nidiro saha waharo? ĆDeco pihitiato panogă ijigŭ duhse ti waha ducagŭ ihŭanatari usă? ni sinituahye tiquina Jesure.

⁵Jesu yuhtiahye:

—Quehnoano yeya musa. Sa yena apequina tiquina ni mehoŭene tuhoeracăhŭna musa. ⁶Peyequina masa “Cristo ijiaja yuhŭ”, ni mehoŭequina ahtaeta. Tiquina sa ni mehogŭ tuhoye peyequina masa Cohăcjŭ yere duhueta.

⁷Musa cahagă masa apequina tiquina cahme wejĕgŭ tuhonata musa. Sa yena yoraropu gŭhure tiquina cahme wejĕgŭ tuhoonata musa. Sa tuhoopenata ne tire pajiro tuhotueracăhŭna. Sa waharota. Tiquina sa yegŭ pihitiati deco duhsarŭnota. ⁸Ti pjere ihcă yehpa cjĕna ape yehpa cjĕna mehna cahme wejĕeta. Sa ye ihcăqiuro puhtoro yequina apeqiuro puhtoro yequina mehna cahme wejĕeta. Sa yero ijipihitiri yehpa ņuhminota. Sa ye peyequina masa ujuu mehna yarieta. Sa wahagŭ ahri yehpa cjĕnare tiquina ņano yuhdu nemoato duhsarŭnota. Ńano yuhduŭrieta.

⁹Sa wahagŭ ihŭana musa basi quehnoano yeya. Apequina musare ņehe, ņano ye dutiye ohoeta apequina puhtoapure. Sa ye judio masa mari buheye wuhusepu musare quĕeta. Tiquina sa yegŭ bujuye macari cjĕna puhto, tiquina bui puhto gŭhu musare buhiri dahreye tehe sinitueta musare. Yeequina musa ijiri buhirire apequina musare yahusăeta. Sa yena yeere yahunata musa tiquinare. ¹⁰Sa ye

pihitiati deco pano quehnoaŭne buheye ijipihitiye yehpari cjĕnare buheripu ijirota. ¹¹Sa yena musare buhiri dahre dutiye, buhiri dahre dutiatiquiro cahapu tiquina neagŭ tiqiurore musa niatire “Yahu masiedaboaga”, ni tuhotueracăhŭna musa. Ti pjere musa niatire musare Espŭritu Santo yahurota. Tiquiro sa yahurire yahuya musa. Musa esa tuharo yahuducusi musa. Espŭritu Santo musare yahuducu basarota. ¹²Ti pjere tiquina wahmisumŭa tiquina bahanare wejĕ dutiye ohoeta puhtoare, yeequina tiquina ijiri buhiri. Tiquina pacusumŭa tiquina pohne wejĕ dutiye ohoeta puhtoare. Tiquina pohne pehe tiquina pacusumŭare wejĕ dutiye ohoeta puhtoare. ¹³Sa ye yeequina musa ijiri buhiri musare masa ijipihitiyequina ihŭna tuhtieta. Tiquina sa yepegŭta ahri yehparu musa catiro puno musare tiquina ņano yerire ihcăno sahana yuhure duhuerana, yuhduŭnata musa.

¹⁴Sa yena ņa yuhduariqiurore Cohăcjŭ yere ņano yeriqiurore ihŭanata musa. Cohăcjŭ ya wuhupu tiqiuro ducugŭ ihŭanata. Topu tiqiurore ijieraro cahmene. Topu tiqiuro ducugŭ ihŭaŭne Judea yehparu ijiyequina cunŭ cjuŭpu duhti oma mujaa wahaahro. Ahri yuhŭ nidire quehnoano masiŭna musa. ¹⁵Sojaro mehna oma duhtiahro. Ti pjere tiquina wuhuse bui cjĕ paaripu ijiyequina wuhŭ puhiapu ijiyere tiquina yere neŭne wahaeracăhdo tiquina waha madoqueoato saha. ¹⁶Sa ye ti pjere apequina tiquina weseripu ijiyequina tiquina bui cjĕ suhtire wuhupu ijiye suhtire neŭne wahaeracăhdo tiquina waha madoqueoato saha. ¹⁷Ti pjere nihi pacosănumia, tiquina pohne apŭoŭne numia gŭhu pejecuro wahaeta. ¹⁸Sa yena ohŭ saha ni siniŭna Cohăcjŭre: “Pohecŭ ijigŭ sa wahaeracăhdo”, ni siniŭna tiqiurore. ¹⁹Ti decorire masa ņa

yuhduaro wahaeta. Ahri yehpare tiqiro bajumehnedi bato masa ñano yuhdæ tiahye. Ti sa ijiepegûta ijipihtiye ti puriñe yuhduoro pihtiati deco ijigûre ña yuhduaro masa yuhdueta. Sa ñano tiquina yuhduri bato pari turi sa ña yuhduaro yuhdusi ahri yehparu. ²⁰Sa yero Cohâcjû ti decorire meheñe decorigã ijigû yerota. Tiquiro sa yeragû ne ihcâquiro masuno yuhdueraboaga. Sa yero tiquiro beseriquina tiquina yuhduatire meheñe decorigã cûnota Cohâcjû.

²¹Ti pjere apequina musare “Ihñaña. Ahriquiro ijire Cristo”, tiquina nigû tiquinare tuhoeracãhña. “Topu ijire Cristo”, tiquina nigû gûhure tuhoeracãhña. ²²“Cristo ijijaja”, ni mehoñequina, “Cohâcjû yere yahu muhtana ijijaja”, ni mehoñequina ijijeta ti pjereta. Sa ye Cohâcjû beseriquinare ni mehoñe, tiquina tutuaye mehna ye ihñoeta. Cohâcjû yequinare Cohâcjûre tiquina cohã duagû ye duare tiquina mehoñequina. ²³Ahrire yahuyujaja musare sa wahato pano. Sa yena quehnoano yeya musa, ni yahuahye Jesu.

Jesu ahri dihtapure tiquiro tojoa tatire yahuahye

(Mt 24.29-35, 42-44; Lc 21.25-36)

²⁴Sa ni tuhasa ohõ saha ni yahuahye Jesu:

—Ti decori ijigû tiquina ñano yuhduri bato asû deco cjûno, ñami cjûno gûhu buhrio duhu cãeta. ²⁵Tiquina sa wahagûta ñahpicoha paca uhmusepu ijiye paca bora dijiaa wahaeta. Sa ye uhmuse cjê yehpari, ñahpicoha gûhu ti sa wahaducurore comesaeta. Sa ye ñuhmieta. ²⁶Ti pjeta yuhu masu Cohâcjû ohorigu ahtagutja. Sa ye uhmusepu yuhu tutuaye mehna yuhu asi siteye mehna uhmuse cjê ehmeo cururi buipû ahri yehpapure yuhu tojoa tagû ihñaeta masa. ²⁷Sa yegu

yeequina angelere ijipihtiropu ahri yehparu ohogutja. Sa ye ijipihtiropu yeequina yuhu beseriquinare tiquina neeta.

²⁸Yojopure higueraure tuhotuya musa. Tu qiti mehna musare queoye mehna buhegutja. Tu yucugû pûri tigû ihñana cûhma mehenogã duhsagû masine musa. ²⁹Sata ahri ijipihtiye yuhu nidi sa wahagû ihñana, yuhu tojoa tato mehenogã duhsagû masinata musa. ³⁰Ijirota niita niaja musare. Ti pje cjëna tiquina yariato panore ijipihtiye yuhu nidiro sahata sa waharota. ³¹Uhmuse, ahri yehpa gûhu pihtia waharota. Yuhu yahuducuye pehe ne comesasi. Ijipihtiye yuhu nidiro sahata sa waha sohtori tiarota.

³²Ti decore yuhu tojoa tati decore, ti hora gûhure masiedaja yuhu. Angele gûhu tire masiedare. Masa gûhu ne masiedare. Yuhu Pacu dihita tire masine.

³³Musa gûhu ti decore masiedare. Sa yena quehnoano yeya. Quehnoano cohteya. Cohâcjûre siniña musa. ³⁴Ohõ saha cohteya musa. Ahri qiti mehna musare queoye mehna buhegutja. Wuhu upuro yoropu tiquiro tinino saha ijire ahri. Tiquiro wahato pano tiquiro cahacjënare wuhure cohte dutiahye. Tiquinape tiquina dahrayere cûahye. Sa yero wuhure cohteriquirore tiquiro tojoa tatore cohte dutiahye. ³⁵Sa yena musa gûhu quehnoano wacû masi cohteya. Wuhu upuro tiquiro tojoa tatore tiquina masiedariro saha yuhu musa puhto tojoa tati decore masiedare musa gûhu. Ñamicahapu, ñami deco, canaca tiquiro yahuri pje ijigû bohrearopu ahtaboaga. ³⁶Yuhu sa wacûeno mehna yuhu wihiatore masina, yeere sa yeducuya. Sa yena wuhure quehnoano cohteya. ³⁷Sa yegu musare yuhu nino sahata ijipihtiequinare sa niaja: Quehnoano

wacū masi cohteya, niahye Jesu tiquinare.

**Pahia pūhtoa, judio masare
buheyequina mehna
Jesure wejē duahye**

(Mt 26.1-5; Lc 22.1-2; Jn 11.45-53)

14 Sa ye ti pjere pascua wame tiri bose deco pano pugū yeye more-mehneñe päre tiquina ihyati deco pano, p̄na deco dūhsariāhye. Ti pjere pahia pūhtoa, usā acaye judio masare buheye-quina mehna Jesure tiquina ni mehoñe mehna tiquina ñehe wejēatire cahme yahuducuye niahye.

²—Bose deco ijigū tiquirore ñehedacūhna “Masa usuari”, nina, niahye tiquina basi.

**Numino ehme sitiye ūhse
mehna Jesure pio peohaye**

(Mt 26.6-13; Jn 12.1-8)

³Sa ye Jesu gūhu Betaniap̄u, Simo camī bucū m̄na wihiro ijimediquiro ya wūhup̄u ijiahye. Sa yero tiquina ihyari watoa numino pehe alabastro mehna yeriare ehme sitiye nardo wame tiye ūh-sere pose tiriare ne wihiahye. Ti ūhse pehe wapa bujūye ijiahye. Sa yero ticoro tiare pohadoqueo, Jesu dapu bui pio peohaye. ⁴Ticoro sa yegū ihñañe ape-quina usuaa wahahye.

—¿Dūhse yero ahricoro ahri ehme sitiye co wapa bujūyere sa ye siteajari? ⁵Tire ticoro duaboaya. Tire duaro tres cientos niñeru cjoerire wapataboaya. Sa yero ti niñerure pejecuoyequinare ohoboaya ticoro, ni cohteahye apequina pehe ticoro sa yegū ihñañe.

Sa ye tiquina ticorore tuhtiahye.

⁶Tiquina sa nigū tuhoro Jesu tiquinare yahuahye:

—Sa niedacāhña ticorore. Yuh̄re ticoro quehnoano yero nine. ⁷Pejecuoyequina pehe m̄sa mehna sa ijiducuenta. Sa yena m̄sa cahmedi

pje tiquinare oho masine. Yuh̄u pehe ahri yehpare m̄sa mehna sa ijiducusi. ⁸Ticoro curoo puno mehna ticoro yuh̄re sa yeri. Yuh̄re tiquina yato pano yuh̄u pagure quehnoyuro, ehme sitiye pio peori ticoro. ⁹Sa yegu potota niita niaja masare. Ijipihtiro ahri yehp̄ap̄u quehnoañe buheyere tiquina yahuatop̄u ahricoro yojoop̄ure ticoro yerire yahueta. Tiquina sa yahugū tuhoye ticorore masa peyequina wacūeta, ni yahuahye Jesu.

**Juda Iscariote Jesure ihña
tuhtiyequinare tiquiro ihñoatire
yahuahye pahia pūhtoare**

(Mt 26.14-16; Lc 22.3-6)

¹⁰Ti pjereta Juda Iscariote doce buheyequina mehna c̄jūno Jesure tiquiro ihñoatire yahuro wahahye tiquirore ihña tuhtiyequinare, pahia pūhtoare. ¹¹Sa ye pahia pūhtoa tire tuhoye bucueahye.

—Muh̄re niñerure ohonatja, niahye tiquina Judare.

Sa yero Jesure ihña tuhtiyequinare tiquiro ihñoatire wacū macahye.

**Jesu tiquiro buheyequina mehna
tiquina ihya bato tiri deco ijiahye**

(Mt 26.17-29; Lc 22.7-23; Jn 13.21-30; 1 Co 11.23-26)

¹²Pugū yeye moremehneñe päre tiquina ihyati bose deco iji ducari deco, ovejare pascua deco ijigū ihyatiquirore tiquina wejēati deco ijiahye. Ti pjere tiquiro buheyequina pehe sinituahye Jesure:

—¿Noho borop̄u bose deco ijigū mari ihyatire quehnoyu dutigu ohoutjari m̄hu usāre? niahye tiquirore.

¹³Tiquina sa nigūta Jesu pehe p̄aro tiquiro buheyequina mehna c̄jēnare ohoahye.

—Jerusalēp̄u wahaya. Top̄u m̄sa esagū aco suture wuariquiro masare

piti carota. Tiquiro piti cagū tiquiro mehna wahaya. ¹⁴Sa wahana tiquiro siho sajāri wuhupū esana wuhū up-urore ohō saha ni yahuya: “¿Nohopū yuhū buheyequina mehna pascua cjē ihayere ihyanatari?” nidi buheriquiro”, niña wuhū upurore. ¹⁵Musa sa nigū tuhoro uhmuano cjā tucūre pajiri tucūre mari cahmeñe mehna tiquina quehnori tucūre ihñonota wuhū upuro. Topū mari ihyatire dahreya musa, niahye Jesu tiquinare.

¹⁶Tiquiro sa nigū tuhoye tiquina tiquiro buheyequina ti macapū wahahye. Topū esagū tiquinare tiquiro nidiro sahata wahahye. Sa ye tiquina pascua cjē ihayere dahreahye.

¹⁷Sa ye nahitia cāhtagū Jesu doce tiquiro buheyequina mehna topūre esahye. ¹⁸Sa yero tiquina mehna mesapū ihyaro Jesu tiquinare yahuahye:

—Poto niita niaja musare. Ihcāquiro musa mehna cjūno yuhū mehna ih-yariquirota yuhūre ihña tuhtiequinare ihñonota, ni yahuahye Jesu tiquinare.

¹⁹Tiquiro sa nigū tuhoye tiquina pehe bajūa witiahye.

—¿Yuhuta ijiajari muhūre ihñocajū? ni sinitu pihtiahye tiquina Jesure.

²⁰—Musa mehna cjūnota ijire tiquiro. Yuhū ihyari papū yuhū mehna soha ih-yariquirota ijire yuhūre ihña tuhtiequinare ihñotiquiro. ²¹Panopū yuhūre tiquina yahu ojoariro sahata yuhū masu Cohācjū ohorigū yariagūta. Sa yero yuhūre ihña tuhtiequinare ihñoriquiro pejecuoro yuhūrota. Tiquiro pehe masa bajueragū, quehnoa yuhūaboya. Ñano yuhūderaboya, niahye Jesu tiquinare.

²²Sa ni yahu tuhasaro tiquiro buheyequina mehna ihyaro taro niahye. Sa yero Jesu pāre ne, Cohācjūre “Quehnoare”, niahye. Sa ninota tiare nuha, itiahye tiquinare.

—Ahrirre ne ihyaya. Ahri yuhū pagū ijire, niahye tiquiro tiquinare.

²³Sa ni tuhasa tiquiro sihnini pare ne, Cohācjūre “Quehnoare”, ni tuhasa, ohoahye tiquinare. Tiquiro oho tuhasagū tiquina ijipihtiequina tire sihniahye.

²⁴—Ahri yuhū dii ijire. Peyequina masa tiquina ñañe yerire cohāgū tagū yariagūta. Sa yegū yuhū diire cohāgūta. Mari Pacū “Musare yuhūogūta”, tiquiro nidiro esagū yuhū yariaro mehna tiquiro nidiro sohtori tirota. ²⁵Poto niita niaja musare. Cohācjū tiquiro puhtoro ijiropū wahma core uhse core yuhū sihniato pano, ahri dihtapūre uhse core pari turi sihnisi yuhū, niahye Jesu tiquinare.

Pedro Jesure tiquiro cohātire yahuahye Jesu

(Mt 26.30-35; Lc 22.31-34; Jn 13.36-38)

²⁶Sa ye tiquina ihcā taha Cohācjū ye basayere basa tuhasa, cunupū Olivo wame tidupū wahaa wahahye. ²⁷Topū siho esaro Jesu tiquinare yahuahye:

—Yojopūre musa ijipihitina yuhūre cohānata. Ohō sahata nine Cohācjū yere tiquina ojoari pūpū yuhūre yahuro: “Ovejare ihña ihboriquiro yero saha ijiriqirore Cohācjū cohānata. Sa tiquiro cohāgū tiquiro yequina oveja yero saha ijieyequina duhti site cāa wahaeta”, nine Cohācjū yere tiquina ojoari pūpū. ²⁸Sa yegū Cohācjū yuhūre tiquiro masori bato musa pano Galileapū wahayugūta yuhū, niahye Jesu tiquinare.

²⁹Tiquiro sa nigū Pedro ohō saha niahye:

—Yuhū mehna cjēna ijipihtiequina tiquina cohā cāepēgūta yuhū pehe muhūre ne cohāsi, nimahye Pedro tiquirore.

³⁰Jesu yuhūahye:

—Potota niita niaja muhūre. Mia ñamita canaca pūa taha tiquiro yahuato pano “Yuhū Jesure masiedaja”, nigūta

mũhũ. Ihtia taha sa nigũta mũhũ, niahye Jesu Pedrore.

³¹ Tiquiro sa niepegũta Pedro ohõ saha ni tutuaro bisiro yũhtiahye:

—Mũhũ mehna yũhũre tiquina wejẽ duepegũta “Jesure masiedaja”, ne nisi yũhũ, ni yũhtimahye tiquiro Jesure.

Pedro sa nigũ tũhoye tiquiro mehna cjẽna gũhũ sa dihita ni yũhtiahye.

**Getsemaní wame tiri wesepũ Jesu
Cohãcjũre siniahye**

(Mt 26.36-46; Lc 22.39-46)

³² Sa ye tiquina Getsemaní wame tiri wesepũ wahahye. Topũ esaro ohõ saha niahye Jesu:

—Yũhũ Cohãcjũre yũhũ sinino watoa ohõ dujiyuya, niahye tiquiro buheyequinare.

³³ Sa ni tuhasa Pedrore, Santiagore, Ñũre tiquinare ihtiarore piji cãhye. Tiquinare sa piji cãno, pajiro tũhotu dũc-ahye tiquiro. Sa yero ñano jeripohna tiahye.

³⁴ Sa bujua witiro tiquiro mehna cjẽnare tiquiro piji cãriquinare ohõ saha niahye:

—Yũhũ ñano jeripohna tiaja. Yũhũre tutuaro purĩno saha tũhotugũ njaja. Ohõ tojoaya. Sa yena yũhũ mehnata cariedacãhña mũa gũhũ, niahye Jesu tiquinare.

³⁵⁻³⁶ Sa ni tuhasa tiquiro topũ mehenogã waha nemo, yehparũ quehe saro, Cohãcjũre niahye:

—Mai, mũhũ ijipihtiyere ye masine. Sa yegũ yũhũ ñano yũhũuatire ye dueragu yeracãhña. Yũhũ sa niepegũta yũhũ cahmeno saha yeracãhña. Mũhũ pehe masine. Mũhũ cahmeno saha yeya yũhũre, ni siniahye tiquiro Cohãcjũre.

³⁷ Sa ni tuhasa, ihtiaro tiquiro buheyequina cahapũ wihiro, carĩnequinare ihñahye. Tiquinare ihñano Pedrore niahye:

—¿Simo, carĩgu njajari mũhũ? ¿Ihcã hora waro yũhũ ihcãno mehna carĩegu iji masiedajari mũhũ? ³⁸ Quehnoano yeya mũa. Sa yena Cohãcjũre siniducuya mũa, “Ñano yeari”, nina. Mũa tũhotuye mehna quehnoañene ye du-amene mũa. Mũa sehũsaro sa ye duepenata tire ye masiedare mũa, niahye Jesu Pedrore.

³⁹ Sa ni yahu tuhasa pari turi waha, Cohãcjũre siniahye. To pano tiquiro sinidiro sahata siniahye tja. ⁴⁰ Sa sini tuhasaro pari turi tiquina cahapũ wihiahye tja. Sa wihiro carĩnequinare ihñahye tja. Wujua quehe yũhũuahye tiquina. Sa ye tiquina Jesure dũhse ni masiedahye. ⁴¹ Sa yero pari turi Cohãcjũre tiquiro sinidi bato tiquina cahapũ wihi, tiquinare niahye:

—¿Yojopũ pũritare carĩnina njajari mũa? ¿Sorĩna njajari mũa? To punota mũmũ saro taro nine. Mianogãta yũhũre Cohãcjũ ohorigũre ñañequinare tiquina ohoati pje mũmũ saro nine. ⁴² Wahcãña. Isa wahana. Ihñaña. Yũhũre ihña tuhtiyequinare ihñoatiquiro ohõ ahtare, niahye Jesu tiquinare.

**Jesure ihña tuhtiyequina
tiquirore peresu yeahye**

(Mt 26.47-56; Lc 22.47-53; Jn 18.2-11)

⁴³ Tiquiro sa nino watoata Juda, doce buheyequina mehna cjẽno ijimediquiro wihiahye. Sa ye masa peyequina ñoseñe pjĩni, yucu tiãri cũoyequina tiquiro mehna wihiahye. Pahia pũhũa, judio masare buheyequina, bũcũna, tiquina ohoriquina masa pehe ijiahye. ⁴⁴ Coã warore Jesure ihña tuhtiyequinare ihñoatiquiro masare ohõ saha ni yahu queo tuhasahye.

—Wahsupure yũhũ ihmidiquiro tiquirota ijirota mũa ñeheatiquiro. Tiquirore yũhũ ihmidi bato ñeheña tiquirore. Sa yena quehnoano ñeheña

tiqirore “Duhtiari”, nina, ni yahu tuhasahye Juda pehe.

⁴⁵ Sa yero wihirota Jesu cahapū duita waha madoqueoahye.

—Buhegū, ninota wahsupure ihmi-ahye tiqirore.

⁴⁶ Tiquiro sa yegū ihñañe tiquina Jesure ñecheahye.

⁴⁷ Tiquina sa yegū ihñano to cahapū ducuyequina mehna cjūno tiqiro ñoseni pñine tuā we nedoqueo, pahia puhtoro cahacjūnore tiqiro cahmonore dute pahrē cāhye.

⁴⁸ Sa yero Jesu ohō saha niahye:

—¿Duhse ijero boro musa ñoseñe pñini mehna, yucu tiāri mehna ahtana, yaqueriqirore yero saha yuhure ñehena ahtajari? ⁴⁹ Decoripe Cohācjū wuhupū musare yuhū buhe dujigū, musa yuhure ne ñehedari. Sa ijiepegūta ahri ijipihtiye sa waharo niaga Cohācjū yere tiquina ni ojoariro sahata, niahye Jesu masare.

⁵⁰ Sa ye Jesu buheyequina tiqirore cohā cā, ijipihtiyequina oma site cāa wahahye.

⁵¹ Sa yero wahmāno suhti mariediquiro ihcāno coma cjūno dihita comariquiro Jesu bato nunū tāmahye. Tiquiro sa nunū tīgū ihñañe tiqirore ñehemahye. ⁵² Tiquirore tiquina ñehe duagū ihñano tiqiro coma cjūnore cohā cā, suhti mariediquiro oma cāa wahahye.

Puhtoa cahapū neahye Jesure

(Mt 26.57-68; Lc 22.54-55, 63-71; Jn 18.12-14, 19-24)

⁵³ Sa ye pahia puhtoro cahapū Jesure ne cāhye. Sa ye ijipihtiyequina pahia puhtoa, bucūna, usā acaye judio masare buheyequina gūhū cahmecoahye. ⁵⁴ Sa yero Pedro pehe Jesu bato yoaropū nunū tāhye. Sa nunū tāno pahia puhtoa ya wuhū cahapū esahye. Sa yero tiqiro ti wuhure cohteyequina surara mehna peca duhtū cahapū sohma dujiahye.

⁵⁵ Pahia puhtoa, ijipihtiyequina apequina puhtoa gūhū Jesure wejē duti du-aye, ni mehoñe mehna tiqirore tiquina ñano buhiri dahreatore wacū macañe nimahye. Tiquina yahusātire wacū bo-caerahye. ⁵⁶ Sa wacū bocaerapeta peyequina masa tiqirore sa yahusā maca cāhye. Tiquina yahusāñe poto ijierahye. Apequiro sijoro saha ni, apequiro sijoro saha niahye. ⁵⁷ Sa ye apequina topū esaye, Jesure yahusāhye.

⁵⁸ —Ahriquiro ohō saha nidi: “Yuhū ahri wuhure Cohācjū wuhure masa tiquina dahreri wuhure cohāgutja. Sa cohāgū ihtia deco wahaboro ti wuhure pari turi yegutja. Ti wuhū masa tiquina dahreri wuhū ijisi”, tiqiro nigū usā tuhō, niahye ni meho yahusāñequina.

⁵⁹ Tiquina sa ni yahusāepēgūta tiquina yahusāñe gūhū poto ijierahye. Apequiro sijoro saha ni, apequiro sijoro saha niahye.

⁶⁰ Tiquina sa nigū tuhoro pahia puhtoro tiquina watoa ducuriquiro wahcādūca sa, Jesure sinituahye:

—¿Ahriquina mūhure tiquina yahusāepēgūta tiquinare yuhti cahmedajari mūhū? ¿Mūhure tiquina yahusārire duhse ni yuhti cahmeajari mūhū? niahye tiqiro Jesure.

⁶¹ Tiquiro sa nigū tuhoeperota Jesu sata tuhōtu cāhye. Tiquiro sa yuhtier-agū ihñano pahia puhtoro tiqirore sinituahye tja:

—¿Cristota ijiajari mūhū? ¿Quehnoariquiro Cohācjū macū warota ijiajari mūhū? niahye tiqiro Jesure.

⁶² —Tiquiro tjiaja. Sa yena yuhure masare Cohācjū ohorigure yuhū Pacū tutuariquiro poto pehepū yuhū dujigū ihñanata musa. Sa yena uhmuse cjē ehmeo cururi watoa yuhū ahtagū gūhure ihñanata musa, niahye Jesu tiqirore.

⁶³⁻⁶⁴ Tiquiro sa nigūta pahia puhtoro pehe tiqiro sañari suhtirore tiqiro

basi tũhrē cāhye, apequinare “Usua yũhdũare”, ni ihña masi dutiro.

—Cohãcjũre ñano yahuducuro nine ahriquiuro. Sa yena tiquiro ñano yahuducuyere tũho tuhasaja mari. Sa ye topequinata yahusãahdo ahriquiore. ¿Sa yena duhse yenatari mari yojopũre ahriquiore? niahye pahia pũhtoro apequina pũhtoare.

—Tiquiro ñari buhiri wejẽno cahmene tiquirore, ni yũhtiahye apequina pũhtoa.

⁶⁵Sa ye tiquna mehna cjẽna Jesure sihco puti, tiquiro caperire dũhte biha, tiquirore quẽpeahye. Quẽpe tuhasa ohõ saha nipeahye:

—¿Noa pehe mũhũre quẽari? Ihñedapegũta yahuya usãre, ni bũjũpeahye tiquna.

Sa ye pũhtoro yequina surara pehe Jesure quẽpe tuhasa, neahye.

**—Tiquirore masiedaga,
niahye Pedro Jesure**

(Mt 26.69-75; Lc 22.56-62; Jn 18.15-18, 25-29)

⁶⁶Sa yero wũhũ caha ijiri paapũ quehnoari paapũ Pedro ijigũ pahia pũhtoro cahacjõno wihiahye. ⁶⁷Pedro tiquiro sohmagũ ihñano ticoro tiquiro dihitare ihñaducuahye.

—Nazare cjũno mehna, Jesu mehna mũhũ gũhũ ijiri, niahye ticoro Pedrore.

⁶⁸Ticoro sa nigũ tũhoro tiquiro ohõ saha niahye:

—¿Dũhse ni macago nijari mũhũ? Mũhũ nidiquirore ne masiedaja yũhũ, niahye Pedro ticorore.

Tiquiro sa nidi bato Pedro sahrĩno sopecaha cahapũ wahahye. Sa yero topũ tiquiro ducugũ canaca yahuahye. ⁶⁹Topũ tiquiro ijigũ ihñano cahacjõno pehe ticoro cahapũ ducuyequinare yahuahye tja:

—Ahriquiuro gũhũ Jesu buheyequina mehna cjũno ijire, niahye ticoro.

⁷⁰Ticoro sa nigũ tũhoro Pedro pari turi ohõ saha niahye tja:

—Tiquirore masiedaja yũhũ, niahye tja.

Sa yero came cjũnopũ topũ ducuriquina Pedrore ohõ saha niahye:

—Ijirota ijire. Mũhũ Galilea cjũ ijire. Sa yegũ tiquna mehna cjũta ijire mũhũ, niahye tiquna tiquirore.

⁷¹Tiquna sa nigũ tũhoro tiquiro yũhtiahye:

—Potota Cohãcjũ mehna niaja mũsare. Potota yũhũ niedagũ Cohãcjũ yũhũre buhiri dahreahro. Tiquirore mũsa nidiquirore ne masiedaga yũhũ, ni yũhtiahye Pedro tiquinare.

⁷²Tiquiro sa nigũta canaca yahuahye tja. Tiquiro sa yahugũ tũhoro Jesu tiquirore nidire wacũahye Pedro: “Canaca pũa taha tiquiro yahuatõ pano mũhũ yũhũre ‘Jesure masiedaga’, niguta mũhũ. Ihtia taha sa nigũta mũhũ”, Jesu tiquiro nidire wacũahye Pedro pehe. Tiquiro sa nidire wacũno, tutuaro utiahye Pedro.

Pilato Jesure sinituahye

(Mt 27.1-2, 11-14; Lc 23.1-5; Jn 18.28-38)

15 Sa ye bohrearopũ pahia pũhtoa, bũcũna, usã judio masare buheyequina, ijipilhtiequina apequina pũhtoa mehna cahmecoa, yahuducuahye tiquna yeatire masiñe tehe. Tiquna basi yahuducu tuhasa, Jesure dũhte, ne cã, Pilatore ohoahye tiquirore. ²Tiquna ne sagũ ihñano Pilato tiquirore sinituahye:

—¿Potota judio masa pũhtota ijijari mũhũ? niahye tiquiro Jesure.

—Mũhũ nino sahata ijijaja, ni yũhtiahye Jesu.

³Sa ye pahia pũhtoa peye yahusãhye tiquirore. ⁴Tiquna sa ni yahusãgũ tũhoro Pilato tiquirore sinituahye tja:

—Ahriquina mūhure peye yahusāne nine. ¿Tiquina sa yahusāepēgūta yūhtierajari mūhū? niahye tiquiro.

⁵Tiquiro sa niepēgūta Jesu ne pari turi yūhti nemoedahye. Sa yero Pilato ne dūhse ni masiedahye.

Jesure wejē dutiahye

(Mt 27.15-31; Lc
23.13-25; Jn 18.38–19.16)

⁶Cūhmaripe pascuaripe masa yaquiro ijiatiquirore ihcāquiro peresupū ijiriquire tiquina cahmediquirore Pilato wio basaducue tiahye. ⁷Ti pjere Barrabá wame tiriquire peresupū ijiahye. Tiquiro puhtoare cohā duayequina, masare wejēnequina mehna cĵūno ijiahye. ⁸Sa ye masa peyequina Pilato cahapū esaye, tiquirore siniahye:

—Cūhmaripe usāre mūhū yeducuriro sahata yeya usāre. Ihcāquiro peresupū ijiriquire usāre wio basaya, niahye tiquina.

⁹Tiquina sa nigūta Pilato tiquinare sinituahye:

—¿Musa yaquiro ijiatiquirore masa judio masa puhtorore wio basaboagari yūhū? ni sinituahye masare Jesure wio duaro.

¹⁰Jesure masa tiquina cahīgū ihñāne pahia puhtoa gūhū tiquirore ihñā tuhtiahye. Sa ihñā tuhtiyē tiquirore ohoahye Pilatopūre. Sa yero masa tiquina cahīdi buhiri tiquina ihñā tuhtire masino Pilato Jesure wio duamahye. ¹¹Tiquiro sa wio duepēgūta pahia puhtoa Jesu mehna masare usuagū yeahye. Ohō saha ni dutiahye tiquinare: “Barrabá pehere wioya. Jesure wejē dutiya”, ni dutiahye masare. ¹²Sa yero Pilatore Barrabáre tiquina wio dutiri bato Pilato tiquinare sinituahye tja:

—¿Ahriquiro judio masa puhtoro masa nidiquiro pehere dūhse yegūtari yūhū, masa sa nigū? ni sinituahye tiquiro.

¹³—Curusapū quē biha wejēña tiquirore, ni sañuducuahye masa.

¹⁴—¿Yabe borore ñañene yeari ahriquiro, masa sa ni sañuducugū? ni sinituahye tiquinare.

Tiquiro sa nigū tūhoye tiquina sañuducu nemoahye tja:

—Curusapū quē biha wejēña tiquirore, ni sañuducuahye tiquina.

¹⁵Tiquina sa ni sañuducugū tūhoro Pilato pehe masare bucuegū ye duaro Barrabá pehere peresupū ijiriquire wio dutiahye masa tiquina cahmediquirore. Sa yero Jesu pehere yuta dari mehna tana duti, curusapū quē biha wejē dutiro ohoahye surarare.

¹⁶Sa ye surara Pilato ya wūhūpū pretorio wame tiri wūhūpū tiquirore ne sahye. Ne sa tuhasa tiquina apequina surarare tiquina mehna cĵenare cahmecoāne tehe pijioahye. ¹⁷Sa ye tiquina puhtoro ya suhtiro yero saha bajuri suhtirore Jesure sāa, pota behtore dahre, ti behtore tiquiro dapu bui duhu peoahye. ¹⁸Sa ye tuhasa ohō saha ni bujūpeahye tiquina tiquirore:

—Quehnoano ahtaya. Judio masa puhto, quehnoano ahtaya, ni bujūpeahye.

¹⁹Sa nieta yucūgū mehna tiquiro dapure quē, tiquirore sihco puti wisō, cua pesaro yeyequina yero saha tiquirore quehe sa, ño peoro saha yeahye. Tiquirore ñano yeye niahye. Sa ye bujūpeye niahye. ²⁰Sa yepe tuhasa tiquina sāari suhtirore tu we nedoqueo, tiquiro ye suhti pehere tiquirore sāa, tiquirore curusapū quē biha wejēne wahaye, nea wahaye tiquina.

Tiquina Jesure curusapũ quẽ biha wejẽahye

(Mt 27.32-44; Lc 23.26-43; Jn 19.17-27)

²¹ Sa ye topũ wahariquiro, Simo Cirene cjũno ihquẽ wũhũse ijiropũ esariquiro, tiquina cahapũ wihigũ ihñañe surara pehe tiquirore Jesu ya curusare wũa cã dutiahye. Alejandro, Rufo pacũro ijiahye Simo pehe.

²² Waha, Gólgota wame tiropũ esahye. Gólgota nino “Dapu pehtoro”, nino nine. ²³ Sa ye vinore mirra wame tiye co mehna tiquina moredi core Jesure ohomahye. Sa yero ti core sihni duer-ahye tiquiro. ²⁴ Sa ye curusapũ Jesure quẽ bihahye tiquina. Quẽ biha tuhasa tiquiro suhti ijiirire “¿Noa yaro ijirotari ohõ?” ni cahme doquepeahye tiquina.

²⁵ Jesure curusapũ tiquina quẽ bihagũ ihtia hora dũhsahye coheri pje esato. ²⁶ Sa ye curusapũ ohõ saha ni ojoari pjĩne duhu ohõahye tiquina tiquiro ñañe buhirire yahu duaye. “AHRIQUIRO JUDIO MASA PËHTORO LJIRE”, ni ojoahye tiquina ti pjĩne. ²⁷ Sa ye pũaro yaque bũcũna Jesu caha apeye curusaripũ tiquina quẽ biha ohõriquina ijiahye tiquina. Ihcãquiro poto pehe, apequiro cũ pehe pehe quẽ biha ohõahye tiquina gũhũre. [²⁸ Tiquina sa yegũ panopũ Cohãcjũ yere tiquina yahu ojoariro sahata waharo niahye. Ohõ saha ni ojoahye: “Dutiyere yũhdũdcayequina mehna cjũno ijire”, ni, tũhoturi masa tiquirore”, ni ojoahye panopũ.]

²⁹ Sa ye curusari cahapũ yũhdũ cãñequina Jesure ihña, tiquina dapu pacare yuredoqueo, tiquirore ñano ni yahuducuahye:

—Quehnoare. Quehnoare. ¿Cohãcjũ wũhũre cohã, ihtia deco wahaboro pari turi ti wũhũre dahreacjũ ijiajari mũhũ?
³⁰ Mũhũ basi dijiahye. Sa yegũ mũhũ basi yedohoya. Sa yegũ yũhdũ witigũta mũhũ, ni bũjupeahye tiquina.

³¹ Tiquina yero sahata pahia pũhtoa gũhũ usã judio masare buheyequina gũhũ tiquirore sa ni bũjupeahye. Sa ni bũjupeye ohõ saha niahye tiquina basi:

—Tiquiro apequinare yũhdũoriquiro ijieperota tiquiro basi yũhdũo masiedare. ³² “Israe masa pũhto, Cristo ijiaja”, nimesi tiquiro. Sa yena tiquiro basi dijia tagũ ihñana tiquirore wactũ tutuanata, ni bũjupeahye tiquina.

Sa ye yaque bũcũna tiquiro caha tiquina quẽ biha ohõriquina gũhũ sata ñano ni bũjupeahye tiquirore tja.

Jesu yariaa wahahye

(Mt 27.45-56; Lc 23.44-49; Jn 19.28-30; He 6.19-20; 10.19-20)

³³ Sa ye coheri pje ijigũ ihtia hora waro ijipihtiropũ nahitiaa wahahye.

³⁴ Sa yero nahitia yũhdũgũ waro Jesu tutuaro sañuducuahye:

—¿Eloi, Eloi lema sabactani? niahye tiquiro.

Sa nino ohõ saha nino niahye. “¿Yũhũ Pacũ, yũhũ Pacũ, dũhsegu yũhũre cohã-jari mũhũ?” nino niahye.

³⁵ Tiquiro sa nigũ tũhoye ihquẽquina topũ ducuriquina ohõ saha nimahye:

—Cohãcjũ yere yahu mũhtariquirore Elia mũnanore pijioro niboaga, nimahye tiquina.

³⁶ Sa yero ihcãquiro tiquina mehna cjũno oma cã, aco ihmini sũhtere vino sũẽne core tiquiro sohari sũhtere ne cã, yucũgu sohtoapũ dũhte ohõ, Jesure sihõmahye. Sa sihõno ohõ saha nimahye:

—Cohteniña. Elia mũnana ahriquirore tiquiro yũhdũogũ ihñariñna mari, nimahye tiquiro apequinare.

³⁷ Tiquiro sa nidi bato Jesu pehe tutuaro sañuducu, yariaa wahahye.

³⁸ Tiquiro yariagũta Cohãcjũ wũhũ cjã suhtiro cahsero tore tiquina cahmotari cahsero deco mehna bui pehe tũhũ dijia ta, tũhũ maa cjũ saa wahahye.

³⁹ Tiquiro sa yariagũ ihñano surara

pūhtoro Jesu caha ducuriquiro ohō saha niahye:

—Ijirōta ijire. Ahriquiro Cohācjū macūnota ijire, niahye tiquiro.

⁴⁰Sa ye yoaropū ducuye numia Jesure ihñaducuye niahye. Tiquina numia mehna María Magdalena ijiahye. Apecoro María wame tiricoro gūhū ijiahye. Ticoro pehe José, tiquiro bahuro Santiago, tiquina pacoro ijiahye. Apecoro Salomé ijiahye. ⁴¹Tiquina numia Jesu yere quehnoano tūhoyequina numia ijiye, Galilea yehpapū tiquiro ijigū tiquiore yedohoe tiahye. Tiquina numia mehna peyequina apequina numia gūhū Jerusalēpū Jesu mehna ahtariquina numia ijiahye.

Jesu pagure masa copepū cūahye

(Mt 27.57-61; Lc 23.50-56; Jn 19.38-42)

⁴²⁻⁴³Sa ye ti deco tiquiro yariari deco saurú pano judio masa usā sori deco pano ijiri deco ijiahye. Sa yero pascua cjē ijiatire tiquina quehnoyuri deco ijiahye. Ti nāmīta José Arimatea cjūno cuero marieno Pilato cahapū esahye Jesu pagure sinino esaro. José judio masa usā pūhtoā mehna cjūno, pūhtoā tiquina cua pesaro ihñariquiro waro ijiahye. Sa yero Cohācjū masa bui tiquiro pūhtoro sajātore cohtero niahye. ⁴⁴Sa yero José Pilatore tiquiro sini tuhasagū tūhoro tūho maria wahahye Pilato pehe. “¿Jesu yaria tuhasayari?” ni tūhoturo, tūho maria wahahye. Sa yero surara pūhtore pijio ohō saha niahye tiquiore:

—¿Jesu yariaa wahari? ni, sinituahye tiquiore.

⁴⁵Tiquiro sa nigū surara pūhtoro yūhtiahye:

—Yariaa wahari, niahye.

Tiquiro sa nigū Pilato Jesu pagure oho dutiahye Josere. ⁴⁶Tiquiro sa oho

dutiri bato José quehnoari suhtirore dúahye. Dú tuhasa, Jesu pagure ne dijio, suhtiro mehna wahme, masa copepū utāpū tiquina seheri copepū tiquiro pagure cūahye. Cū tuhasa, ti cope caha ijiria utāre pajiria utāre tu torē cā, ti copere bihahye. ⁴⁷Sa ye María Magdalena, María José pacoro Jesure tiquina cūriore ihñahye.

Jesu masa wijiāhye

(Mt 28.1-10; Lc 24.1-12; Jn 20.1-10)

16 Sa ye saurú yūhdugū María Magdalena, María Santiago pacoro, Salomé mehna wisōñe co ehme sitiye dūahye tiquiro pagure wisōñe tehe. ²Sa ye domingo bohrea queharo Jesure tiquina cūri copepū wahahye tiquina. ³Wahaducuye, ohō saha niahye:

—¿Ti copere biharia utāre noa marine pōo basarotari na? niahye tiquina basi.

⁴Ti copepū esaye, ti copere biharia utāre pajiria utāre tiquina pōo cūriare ihñahye tiquina. ⁵Sa ihñāñe ti copepū sajā sahye. Sa sajā saye, wahmūnore poto pehe dujiriquire yehseye suhti tiriquire ihñā, acuaa wahahye. ⁶Tiquina sa acuagū ohō saha niahye tiquiro:

—Yūhure ihñā acueracāhñā. Jesu Nazare cjūno tiquina quē biha wejēdiquiro mūsa macariquiro masa wija tuhasari. Ohōre mariedare. Tiquirore tiquina cūriore ihñāñā. ⁷“Tiquiro mūsa pano Galileapū waharota”, ni yahuna wahaya tiquiro buheyequinare, Pedro gūhure. Topū tiquiro nidiro sahata mūsa tiquiore ihñanata, ni yahuahye wahmūno tiquinare.

⁸Tiquiro sa nigū tūhoye tiquina cuye, nanare, masa cope cahapū ijiriquina oma cāa wahahye. Sa cuye apequinare yahuerahye.

Jesu María Magdalenare bajuahye

(Jn 20.11-18)

[⁹Sa ye domingo ijigū Jesu tiquiro masa wijiari bato María Magdalenare bajua muhtahye. Ticoro siete watiare cuomedicoro ijimahye. Sa yero Jesu tiquiro yariato pano watiare tiquiro cohānoricoro ijiahye. Sa yero ticoro pehehere bajua muhtahye tiquiro masa wijiari bato. ¹⁰Sa ye Jesu mehna cjēna tiquiro yariagū ihñāne tutuaro bajua witi, utiye niahye. Sa tiquina utiri watoa ticoro pehe tiquirore ihñarire yahumahye tiquinare. ¹¹“Cristo catiri. Ihñau”, ticoro ni yahuepegūta tuho duerahye.

Jesu tiquiro buheyequinare bajuahye

(Lc 24.13-35)

¹²Came puaro tiquina mehna cjēna wuhuse marienopu tiquina tinigū Jesu sijoro saha bajuriquiro tiquinare bajuahye. ¹³Tiquiro sa bajuagū ihñāne tiquina tojoaa waha, apequinare Jesu yequinare tire yahuahye. Tiquina sa ni yahuepegūta tiquina pehe tuho duerahye.

Jesu tiquiro yere buhe dutiro ohoahye tiquiro buheyequinare

(Mt 28.16-20; Lc 24.36-49; Jn 20.19-23)

¹⁴Came doce tiquiro buheyequinare mesa cahapu tiquina dujigū tiquinare bajuahye tiquiro. Sa yero tiquirore ihñariquinare tiquina yahugū tuho dueyequinare masino Jesu tiquinare

tuhtiahye. Tiquirore tiquina quehnoano wacū tutuerari buhirire tuhtiahye tiquinare. ¹⁵Sa tuhti tuhasaro tiquinare ohō saha niahye:

—Ahri yehpa ijipihtiropu quehnoañe buheyere ijipihtiequina masare buhena wahaya. ¹⁶Yuhure wacū tutuayequinare tiquina wame yenhriquinare pecapu wahaboriquinare yuhduorota Cohācjū. Sa ye yuhure wacū tutuayequina Cohācjū tiquiro buhiri dahreatiquina pecapu wahatiquina ijjeta. ¹⁷Sa ye yuhure wacū tutuayequina yuhu tutuaye mehna ohō saha yeeta: Yuhu tutuaye mehna, yuhu wame mehna watiare cohāeta. Sa ye wahma yahuducuyere yahuducuetā. ¹⁸Sa ye añaaare tiquina ñehegū, ijipihtie nima duhse ijiye nimare tiquina sihnigū, tiquinare ne purīsi. Sa ye dohatiequina bui tiquina omocarine tiquina ña peogū dohatiequina pehe quehnoa wahaeta, niahye Jesu tiquiro buheyequinare.

Jesu uhmusepu mujaa wahahye

(Lc 24.50-53)

¹⁹Sa ni yahu tuhasa mari puhtoro Jesu uhmusepu mujaa wahahye. Topu esaro Cohācjū poto pehe dujahye tiquiro mehna puhtoro ijiro. ²⁰Sa ye Jesu buheyequina ijipihtiropu quehnoañe buheyere buheye wahaa wahahye. Tiquina sa buhegū mari puhtoro tiquinare yedohoahye. Tiquiro tutuaye mehna ye ihño, masigū yeahye tiquinare, masare tiquiro ye buheyere tuho dutiro. To punta ijire.]

San Lucas

1¹⁻² Puhto Teófilo, ahrire muhu buheatire mähure ojoa ohogu niaja. Jesu usã mehna ijinino tiquiuro yerire apequina ojoa duca tuhasari jiri. Coã waropure Jesure ihñariquina, tiquiuro yere buheriquina tiquina ni yahuriro sahata apequina tire ojoa duca tuhasari jiri. ³ Sa yegu ahri ijipihtiyere quehnoano masi peho duagu buhei. Sa yegu yuhu gühu tire quehnoano ojoa duaja muhu buheatire yegu. ⁴ Jesu yere yahuyequina mähure buhe tuhasari. Tire quehnoano muhu masi nemoatire ahri püre mähure ojoa ohogu niaja.

Ñu wame yeatiquiuro tiquiuro masa bajuatire angel yahuahye

⁵ Jesu masa bajuato pano, Herode Judea yehpa cjëna puhtoro tiquiuro ijigü Zacaria wame tiriquiro pehe pahi ijiahye. Sa yero Zacaria tiquiuro ya curua cjëna pehe pahia curua Abia munano ya curua cjëna ijiahye. Zacaria namono gühu pahi Aaron munano panameono iji turiaricoropü ijiahye. Ticoro pehe Elisabe wame tiricoro ijiahye. ⁶ Tiquina puaro Cohãcjü dutyiere quehnoano ye pehoyequina tiquina ijigü ihñano, “Decoripe quehnoañene yere”, ni ihñahye Cohãcjü tiquinare. ⁷ Elisabe ne pohna marienicoro ijiahye. Ticoro Zacaria mehna sata muhñu cähye pohna mariedape.

⁸ Pahia dahrayere dahraye tehe, decoripe tiquina comesae tiahye. “Zacaria ya curua cjëna ijire”, tiquina nidi bato tiquiuro pahia decoripe tiquina yeducuriro saha Cohãcjü ya wuhupü dahraro taro niahye Zacaria. ⁹ Pahia sa yeducuriro saha tiquina “¿Noare ijyrotari ujüa mñoatiquiro?” niñe, doquepeye mehna bueyere ehme sitiyyere ujüa mñoatiquirore beseahye.

Cohãcjüre ño peori altarpü tiquina beseriquiro Zacaria ehme sitiyyere ujüa mñoatiquiro ijiahye. Sa yero tiquiuro Cohãcjü wuhupü sajãa wahahye ujüa mñoono waharo. ¹⁰ Wuhupü ijyero ehme sitiyyere tiquiuro ujüa mñoono watoa ijipihtiyequina masa pehe sopecahapü Cohãcjüre sinie tiahye. ¹¹ Ti pjere Cohãcjü yaquiuro angel Cohãcjüre ño peori altar poto pehe bajuaduca sahye Zacariare. ¹² Tiquiro sa bajuagu ihñano Zacaria tiquiore ihña maria, cuea wahahye. ¹³ Sa tiquiuro cuegü ihñano angel tiquiore yahuahye:

—Zacaria, cueracãhña. Cohãcjü muhu sinidire tuhori. Sa yena musa pohna tinata. Musa macu masa bajarota. Tiquiro bajuagu Ñu wame yeya tiquirogäre. ¹⁴⁻¹⁷ “Tiquiro quehnoariquiuro, tutuariquiuro ijire”, ni, ihñanota Cohãcjü muhu macure. Tiquiro masa bajuari bato vinore, sihbiore sihnisi. Sa yero tiquiuro masa bajuari bato Espiritu Santo nidiro sahata yeriquiro ijyrotata tiquiuro. Sa yero peyequina muhu acaye Israe masare Cohãcjü mari puhtoro quehnoano cahmegü yerota muhu macu. Sa yero tiquiuro Cohãcjü yere buhero Elia munano Cohãcjü yere yahu muhtariquiuro tiquiuro buheriro sahata Espiritu Santo yedohoro mehna Cohãcjü tutuaye mehna muhu macu gühu buherota. Sa buhero tiquina pacusumua tiquina pohne mehna quehnoano cahme cahigü yerota. Sa yero dutyiere yuhducariquinare quehnoano tiquina ño peoye mehna yuhutigü yerota. Sa buhero mari puhtoro Cohãcjü yequina ijiatire yerota tiquiuro. Sa yegu tiquiuro masa bajuari bato muhu bucueguta. Peyequina apequina gühu bucueeta, niahye angel Zacariare.

¹⁸ Tiquiro sa nigü tuhoro Zacaria pehe sinituahye angelre:

—Ūsā bŭcŭna ijiaja. ¿Sa yegu mŭhu nidi poto ijigŭ dŭhse masigutari yŭhu? niahye tiquiro.

¹⁹Tiquiro sa nigŭ angel pehe tiquirore yahuahye:

—Yŭhu Gabriel wame tigŭ ijiaja. Cohācjŭ cahacjŭ tiquiro cahapŭ ducugŭ ijiaja yŭhu. Cohācjŭ ahri quehnoañe quitire yahu dutiro, mŭhu cahapŭ yŭhure ohori. ²⁰Yŭhu yahuriro sahata potota wahaŕota. Yŭhu sa niepegŭta yŭhure mŭhu poto tŭhoerari. Sa yegu yojopŭre mŭhu yahuducuegu wahaguta. Mŭhu macŭ tiquiro bajuari bato yahuducugŭta tja, niahye angel Zacariare.

²¹Sopecahapŭ ijiyequina masa Zacariare cohteye niahye. “¿Dŭhse ijiro boro tiquiro Cohācjŭ wŭhŭpŭ ijiro, sojaro wijia taerajari?” ni, cohteye niahye masa tiquirore. ²²Sa yero ti wŭhŭpŭ ijiriquiro wijia wihi, tiquina mehna yahuducu masiedahye. Tiquiro sa yahuducu masiedagŭ ihñañe “Tiquiro Cohācjŭ wŭhŭpŭ bajuanohno niaya”, ni, tŭhotuahye tiquina. Sa yero yahuducu masiedaro tiquiro omocari mehna masare yahuducuahye.

²³Cohācjŭ wŭhŭpŭ tiquiro dahraye pihŭtigŭ, tojoaa wahahye tiquiro ya wŭhŭpŭ. ²⁴Tiquiro sa wahari bato tiquiro namono Elisabe coā nijinore cuo cāhtaro niahye. Sa yero ticoro ihcā omope asŭri waro masa cahapŭ wahaerahye. ²⁵Ohō saha niahye ticoro: “Yojopŭre yŭhure Cohācjŭ yedohori. Yŭhu pohna mariego ijigo tutuaro buoro tŭhotuu yŭhu. Cohācjŭ yedohoro mehna nijinogāre bocagota”, ni tŭhotuahye ticoro.

Jesu tiquiro masa bajuatire yahuahye angel

²⁶⁻²⁷Elisabe seis asŭri ticoro niji patoro ticoro ijiri bato Cohācjŭ pehe angel Gabriel wame tiriquirere nuh-

mino cahapŭ ohoahye. Ticoro Nazarepŭ Galilea yehpapŭ ijiri macapŭ ijiahye. María wame tiricoro ijiahye. José wame tiriquirere ijiahye ticoro mehna omoca dŭhteatiquiro. Tiquiro panopŭ cjŭno Davi mŭnano panamino iji turiariquiro ijiahye. ²⁸Sa yero María cahapŭ esaro, angel yahuahye:

—¿Ne, ijiajari mŭhu, María? Cohācjŭ mŭhu mehna ijiro nine. Sa yero mŭhure quehnoano yero nine. [Ijipihtye numia apequina numia yŭhdŭoro quehnoano yere mŭhure,] niahye angel ticorore.

²⁹Tiquiro sa nigŭ tŭhoro, ticoro tutuaro wacŭ tŭhotuahye. Angel tiquiro yahurire tŭhoturo “¿Dŭhse nino yŭhure sa niagari?” ni wacŭahye ticoro. ³⁰Ticoro sa ni wacŭgŭ ihñano angel yahuahye ticorore:

—María, Cohācjŭ mŭhure tutuaro cahñe. Sa yego mŭhure yŭhu yahuatire tŭho acŭeracāhña. ³¹Quehnoano tŭhoya. Nijinore bocagota mŭhu. Sa yero mŭhu macŭ masa bajarota. Tiquirore Jesu wame yegota mŭhu. ³²⁻³³Tiquiro tutua yŭhdŭariquiro ijirota. Sa ye tiquirore “Cohācjŭ ŭhmuse cjŭno macŭno ijire”, nieta masa. Sa yero mŭhu macŭ ñecŭno iji turiariquiro mŭnanopŭ Davi mŭnano Israe masa tiquina pŭhtoro tiquiro ijiriro sahata mŭhu macŭ gŭhure cŭnota Cohācjŭ. Sa yero ijipihtye decori tiquiro Israe masare dutirota. Sa yero tiquiro pŭhtoro ijiye pehe ne pihŭtisi, niahye angel.

³⁴Tiquiro sa nigŭ María pehe sinituahye:

—¿Dŭhse yŭhu manŭ mariedapegota pohna tiboagari yŭhu? niahye ticoro.

³⁵Ticoro sa nigŭ angel pehe yahuahye:

—Espíritu Santo mŭhure pohna tigŭ yerota. Sa yero Cohācjŭ tiquiro tutuaye ehmeo curua yero saha ahtarota mŭhure. Sa ye “Cohācjŭ macŭno ijire”, nieta masa mŭhu macŭre ñañe yerariquirore. ³⁶⁻³⁷Cohācjŭ ijipihtiyere

ye masine. Sa yero m̄h̄u acayoro Elisabe buc̄oro ijieperota nijinogāre bocari ticoro ḡh̄u. Ticoro pohna tirota am̄nogāre. Masa ticorore “Pohna marienicoro ijire”, tiquina nidicoro, yojop̄ure seis as̄iri waro wahare nijino ticoro bocari bato, niahye angel Marīare.

³⁸ Tiquiro sa nigū Marīa yūhtiahye:

—Yūh̄ure tuhoya. Mari puhtoro tiquiro cahacjō ijiaja yūh̄u. M̄h̄u nidiro saha yūh̄ure sa wahaahro, niahye ticoro.

Ticoro sa nidi bato angel wahaa wahahye.

Marīa Elisabere ih̄n̄ano wahahye

³⁹ Tiquiro sa nidi bato Marīa c̄un̄u cj̄u ijiri yehpap̄u Judea yehpap̄u ijiri macap̄u sojaro mehna wahaa wahahye. ⁴⁰ Top̄u esaro, Zacaria ya wuh̄up̄u sajāno, “¿Ne, ijiajari?” niahye ticoro Elisabere. ⁴¹ Ticoro sa nigū Elisabe tuhogāta, ticoro mac̄uno pehe niji suhtirop̄u ijiriq̄uiri n̄uh̄miahye. Elisabe Esp̄iritu Santo dutiriro sahata ye pehoricoro ijiro, tiquiro tutuayere cuoricoro ijiahye. ⁴² Sa yero tutuaro bucueye mehna ticoro tutuaro yahuducuahye.

—Ijipihtiequina numia yūhd̄oro m̄h̄ure quehnoano yeri Cohācj̄ū. M̄h̄u mac̄u ḡh̄ure quehnoano yeri Cohācj̄ū. ⁴³ Cuehi, yūh̄u puhtoro pacoro yūh̄u cahap̄u ahtagū quehnoano yeri yūh̄ure Cohācj̄ū. ⁴⁴ M̄h̄u yūh̄ure “¿Ne, ijiajari?” m̄h̄u nigū yūh̄u mac̄u pehe niji suhtirop̄u ijiriq̄uiri bucueye mehna n̄uh̄miahti yūh̄ure. ⁴⁵ Cohācj̄ū tiquiro nidiro sahata yerota. Sa yego tiquiro yahurire tuhorigo ijigo bucuego ijire m̄h̄u, niahye Elisabe.

⁴⁶ Ticoro sa nigū Marīa yūhtiahye:

“Cohācj̄ū quehnoariq̄uiri, tutuariq̄uiri ijire”, niaja. Yūh̄u quehnoano

jeripohna tiaja. ⁴⁷ Cohācj̄ū yūh̄ure pecap̄u wahaborigore yedohoriquiro ijire. Sa yero yojop̄ure yūh̄ure quehnoano bucueye mehna ijigū yere. ^{48–49} Yūh̄ure tiquiro cahacjōre wacūri jiri. Cohācj̄ū tutua yūhd̄uariq̄uiri quehnoañe dihitare yūh̄ure yedohori. Sa ye yojop̄ure “Ticorore Cohācj̄ū quehnoano yeri”, ijipihtiequina masa sa ni, yahuducuenta yūh̄ure. Cohācj̄ū ñañe marieniquiro ijire. ⁵⁰ Ijipihtie decori ijipihtiequina tiquirore ño peoyequinare tiquiro paja ih̄n̄ariq̄uiri ijire. ⁵¹ Cohācj̄ū tiquiro tutuaye mehna yeahye. “Apequinare masi yūhd̄ud̄ucaja”, niñequinare yūhd̄ud̄ucahye tiquiro. ⁵² Puhtoare cohāhye tiquiro. Sa yero cahacjēna pehere puhtoa yero saha cūahye tiquinare. ⁵³ Uj̄ua ahbayequinare tiquiro quehnoañe ih̄yayere ohoahye. Sa yero peye doeri cj̄e cuoyequinare doeri cj̄e cuoeragū yeahye tiquiro. ^{54–55} Mari ñecusum̄ua iji turiayequina m̄n̄are tiquiro yahu cūriro sahata ye pehoahye Cohācj̄ū. “Pecap̄u wahaboriq̄uiri yūhd̄outja”, tiquiro ni yahu cūriro sahata ye pehoahye. Sa yero tiquiro cahacjēnare Israe masare tiquiro yedohoahye. Abrahā m̄n̄anore mari ñecusum̄ua m̄n̄are ijipihtiequina tiquiro acaye tiquiro bato ijiequina ḡh̄ure Cohācj̄ū ijipihtie decori sa paja ih̄n̄aducuriquiro ijie tiahye. Tiquinare tiquiro yahu cūrire boerahye Cohācj̄ū, niahye Marīa.

⁵⁶ Ihtia as̄i waro Elisabe mehna ijiahye. To puno ticoro ijiri bato ticoro ya macap̄u tojoaa wahahye Marīa.

Ñu masa bajuahye

⁵⁷ Elisabe ticoro niji wahcō, pohna tiahye. Ticoro macuno masa bajuahye. ⁵⁸ Sa yero Cohācjū ticorore tiqiro sa yegū ticoro ya maca cjēna ticoro acaye gāhu ticoro mehna bucueahye. ⁵⁹ Ocho decori tiqiro masa bajuari bato, tiqiro pacusumua tiqirogāre cuhnucunu sohto cahserogāre yūhre ne dutiye tee niahye. Sa yeye tiquina mehna cjēna tiquina cahapu esahye tiquina yūhre negū ihñañe tehe. Tiquina mehna cjēna Zacaria tiqiro pacuro wamene tiqirogāre wame ye duamahye. ⁶⁰ Tiquina sa wame ye duepegūta tiqiro pacoro ohō saha niahye:

—Tiqiro pacuro wamene wame yer-
aja. Ñu wame yematja tiqirogāre, ni-
ahye ticoro.

⁶¹ —Mūhu acaye ne ihcāqiro Ñu wame tiriqiro mariedare, niahye tiquina ticorore.

⁶² Sa ye tiquina omocari mehna yahuducu, Zacariare sinituahye tiquina:

—¿Mūhu waro dūhse wame ye duajari mūhu macure? ni, sinituahye tiqirore.

⁶³ Tiquina sa nigū tiqiro pehe ojoari pjīne sini, ñehe, ojoahye: “Yūhu macu Ñu wame tirota”, ni, ojoahye Zacaria. Tiqiro sa ni ojoagū tiquina pehe tūho maria wahahye. ⁶⁴ Tiqiro sa ni ojoari bato tiqirore yahuducugū yeahye Cohācjū. Sa yero tiqiro yahuducua wahahye.

—Cohācjū tutuariqiro, quehnoariqiro ijire, niahye tiqiro.

⁶⁵ Tiqiro sa ni yahuducugū tūhoye to cjēna tūho maria wahahye. Sa ye ahri ijipihtiyere Judea yehpa cjēnare cunu cju watoa ijiyequinare masa yahu siteahye. Sa ye masa to cjēna quehnoano masi pihitia wahahye. ⁶⁶ Ijipihtiyequina tire tūhoye wacūahye. “Cohācjū tutu-
ayere ahriqirogā cūore. Sa yero ihyo

ijiriqiro ijisi tiqirogā”, ni, tūhotuahye masa.

Zacaria Cohācjūre ño peohye

⁶⁷ Sa yero tiqiro pacuro Zacaria Espiritu Santo dutiriro sahata ye pehoriqiro ijiro tiqiro tutuayere cūoriqiro ijiro Cohācjū yere yahuahye:

⁶⁸ Cohācjūre ño peouhna mari. Mari Israe masa tiqiro yequina ijijaja mari. Sa yero mari cahapu wihiro, marine yedohoro quehnoano yūhdugū yerota. ⁶⁹ Sa yero Cohācjū tutuariqirore marine pecapu wahaborinare quehnoano yūhdugū yeatiqirore ohori jiri. Marine quehnoano yūhdūoatiqiro tiqiro acayuro mūnano Davi ijire. Davi mūnano pehe marine yūhdūoatiqiro cahācjūno ijire.

⁷⁰ Panopu tiqiro yere yahu mūhtariquinare Cohācjū ohō sahata ni ahrire yahu dutiahye. ⁷¹ Marine ihña tuhtiyequina marine ñano tiquina ye duagū ihñano “Mūsare yedohoutja”, ni, cūahye Cohācjū marine. ⁷² Mari ñecusumua mūnare “Mūsare paja ihñagu, yedohoutja. Mūsare yūhu yahu cūrire wacūtja”, niahye Cohācjū mari ñecusumua iji turiayequina mūnare. Ti pjerure tiqiro nidiro sahata marine yojopure yere. ⁷³⁻⁷⁵ Ohō saha ni cūahye Cohācjū panopure Abrahāre: “Mūhu acaye cameru ijiyequinare ihña tuhtiyequina tiquina ijigū cohāutja. Sa yegu mūhu acayere yedohoutja. Sa ye tiquina cuero marieno yūhu dutiyere ye masieta. Sa yegu tiquina ñañene yūhu cohāgū, tiquina yūhu ihñonopu ijipihtiyere decori quehnoañequina ijiducuenta”, ni, yahu cūahye panopu Cohācjū mari acayuro mūnanore Abrahāre, niahye Zacaria.

Sa ni tuhasa tiqiro macunore ohō saha niahye:

⁷⁶⁻⁷⁷ Macu, mūhure ohō saha nieta masa: “Cohācjū tutua yūhdūariqiro tiqiro yere yahu mūhtariqiro ijire”, nieta mūhure. Sa yegū mūhū mari pūhtoro Cristo pano wahayugūta mūhū. Sa wahagū ohō saha ni yahugūta mūhū. “Cohācjū mūsa űañene cohāno, pecapū wahaborinare yūhdūorota mūsare”, ni, yahugūta mūhū. Sa ni yahugū mari pūhtoro tiqiro ahtatire yahuyugū nigūta mūhū. ⁷⁸ Cohācjū pehe marine tutuaro paja ihñariqiro marine quehnoano yeriqiro ijiro, tiqiro marine pecapū wahaborinare yūhdūo duare. Marine yūhdūoro ahtarō Cristo mari cahapū ahtarota. ⁷⁹ Ijipihtiyequina marine pecapū wahaborinare yūhdūo duare tiqiro. Sa yero Cohācjūre masiena mari ijigū ihñano marine masigū ye duare tiqiro. Sa yero mari quehnoano ihcāno mehna mari ijiatire yahurota marine, niahye Zacaria.

⁸⁰ Sa yero Zacaria macūno quehnoano pagū tiriqiro masahye. Sa yero Cohācjūre tutuaro ño peohye. Sa yero yoari pje masa marienopū ijie tiahye. Israe masare buhe dūcaro topūta ijie tiahye.

Jesu masa bajuahye

(Mt 1.18-25)

2 Ti pjere ijipihtiye yehpari cjēna pūhtoro Augusto ijie tiahye. Sa yero ijipihtiyequinare queo dutiahye. ² Ahriquina masare tiquina coā queo dūcagū Siria yehpa cjēna pūhtoro Cirenio wame tiriqiro ijiahye. ³ Sa ye ijipihtiyequina tiquina ñecūsumūa panopū cjēna ye macaripū tiquina wamene oja ohōñe wahahye. ⁴ José gūhū Nazarepū

Galilea yehpapū ijiri macapū ijiriquina waha, Judea yehpapū Belē wame tiri macapū esahye. Pūhtoro Davi mūnāno panopū cjūno tiqiro masa bajuariro ijiahye Belē. José Davi mūnāno panamino iji turiariqiro ijiro Belēpū tiqiro wamene oja ohō dutiro wahahye. ⁵ Sa yero María tiqiro omoca dūhteaticoro mehna topū tiqiro wamene oja ohō dutiro esahye. Ticoro pehere meheñe decorigā dūhsahye nijino bajuato. ⁶ Sa yero Belēpū esaro ticoro niji wahcōahye. ⁷ Topūre masa tiquina carīni wūhū ne esa tuhaerahye tiquinare. Sa yero ticoro pohna ti tuhasa, tiquiogāre suhtiro mehna coma, wecua tiquina ihyari cohropū, taa bui tiquiogāre duhu peohye. Tiquiogā ticoro coā macū ti mūhtariquiogā ijiahye.

Angele ovejare ihña ihboyequinare bajuahye

⁸ Ti ñamine oveja tiquina ijiropū ovejare ihña ihboyequina tiquina yequina ovejare ihña ihboye niahye. ⁹ Sa yero Cohācjū ohoriqiro angel tiquinare bajuahye. Tiqiro sa bajuagū Cohācjū asi siteye tiquinare buhriohye. Tiqiro sa asi sitegū ihñañe, ovejare ihña ihboyequina cuea wahahye. ¹⁰ Tiquina sa wahagū angel tiquinare yahuahye:

—Quehnoañe quitire mūsare yahugū ahtaja. Ijipihtiyequinare masare bucūegū yerota ahri qiti. Sa yena yūhure cueracāhña mūsa. ¹¹ Mia ñamine pūhtoro Davi mūnāno ya macapū mūsare pecapū wahaborinare yūhdūoatiqiro, Cristo Cohācjū ohoriqiro mari pūhtoro masa bajua tuhasari. ¹² Sa yero suhtiro mehna comariquiogā wecua ihyari cohro bui tiquina duhu peoriqirogā mūsa ihñatiqirogā tiqiro ijirota, ni yahuahye angel tiquinare.

¹³ Tiqiro sa nigūta peyequina űhmūse cjēna iji mūhtariqiro angel

mehna Cohācjüre ño peohaye. Ohō saha ni ño peohaye tiquina:

¹⁴ Cohācjüre ũhmuse cjūnore ño peouhna. Sa ye Cohācjū tiquiro cahñequina cuero marieno cahmequeno marieno quehnoano ijiahro, ni, ño peohaye angele pari.

¹⁵ Sa ni tuhasa ũhmusepū tiquina mūjari bato ovejare ihña ihboyequina pehe tiquina basi cahme yahuducuahye:

—Ahrire Cohācjū marine tiquiro yahurire Belēpū isa ihñauhna, niahye tiquina basi.

¹⁶ Sa niñe sojaro mehna wahaa wahahye. Tiquina Mariāre, Josére boca sa, nijinogāre wecua ihyari cohropū tiquina duhu peoriquirogāre ihñahye tiquina. ¹⁷ Ovejare ihña ihboyequina tiquirogāre ihña tuhasa nijinogāre angel tiquiro yahurire yahuahye apequnare. ¹⁸ Tiquina sa ni yahugū ijipihitiyequina tiquinare tuho maria wahahye. ¹⁹ Ahri ijipihitiyere María wacū tūhotuahye. ²⁰ Sa yeye ovejare ihña ihboyequina pehe angel tiquiro yahuriro saha ijigū ihñañe, “Cohācjū tutuariquiro ijire”, ni bucueahye. Sa ni bucueye tojoa wahahye.

Cohācjū wuhupū Jesu pacusumua tiquirogāre neahye

²¹ Ihcā semana bato nijinogā tiquiro cuhnucunū sohtoa cahserogāre yūhre ne tuhasa tiquirogāre tiquina Jesu wame yeahye. Jesure coā waro ticoro bocato pano angel pehe “Jesu wame yeya tiquirogāre”, ni yahu tuhasahye. Sa yeye tiquirogāre Jesu wame yeahye.

²²⁻²⁴ Cohācjū dutiye Moise tiquiro yahuriro saha yeye tehe, José, María mehna Jerusalēpū wahahye. Topū wahahye María ticoro pohna tiri bato pagū quehnoaricoro ticoro tojoarire ihñono taro. Cohācjū dutiriro sahata tiquina minicjuare ohoye wahahye Cohācjüre ño peoye. Ohō saha duti-

ahye Cohācjū: “Bujuaare pūaro ohoya yūhure. O tiquina mariedagū apequnina boro minicjuare ohoya yūhure ño peona”, ni dutiahye Cohācjū. Tiquiro dutiriro sahata yeahye tiquina ticoro pagū quehnoari pagū ticoro waharire ihñoñe taye.

Topū wahaye tiquina Jesugāre neahye. Tiquirogāre Cohācjüre “Ahriquirogā mūhū yaquiro ijiatiquirogā ijire”, ni ihñoñe wahahye. Ohō saha yeahye Cohācjū yere tiquina ojoari pūpū tiquiro ye dutiriro sahata. “Ijipihitiyequina mūsa pohna coā bajua muhtañequinagāre Cohācjüre ihñoña. ‘Ahriquirogā mūhū yaquirogā ijiatiquiro ijire’, ni ihñoña”, ni dutiahye Cohācjū. Sa ye tiquiro dutiriro sahata yeahye tiquina, Jerusalēpū ijiye.

²⁵ Ti macapū Simeo wame tiriquiro ijiahye. Tiquiro quehnoariquiro, Cohācjüre ño peoriquiro ijiro, Israe masare Cohācjū yedohoatire coheriquiro ijiahye. Sa yero Simeo Espiritu Santo tiquiro nidiro saha yeriquiro ijiahye. ²⁶ Sa yero tiquiro yariato pano Cohācjū tiquiro ohoatiquirore Cristore tiquiro ihñatire yahuahye Espiritu Santo tiquirore Simeore. ²⁷ Sa yero Espiritu Santo tiquirore dutigū Cohācjū wuhupū sajāa wahahye. Tiquiro sajā sari bato Jesu pacusumua tiquina macunogāre ne sajāhye. Cohācjū tiquiro dutiriro sahata yeye niahye. ²⁸ Simeo pehe tiquirogāre wua ne, Cohācjüre ño peo, “Quehnoare”, ni, tiquiro mehna yahuducuahye.

Ohō saha niahye tiquiro Cohācjüre:

²⁹⁻³² Yojopū pūritare pūhto, mūhū nidiro sahata masare pecapū wahaboriquinare yūhdūoatiquirore ohori jiri mūhū. Tiquiro judio masa ijieyequinare buhero mūhure quehnoano masigū yerota tiquinare. Masare yūhdūoatiquiro Israe masunore mūhū cūahye. Ūsā acayūrore Israe masunore

muhū cūgū ijipihtiyequina masiñe, “Israe masare quehnoano yere Cohācjū”, nieta masa. Ahriquirogā usāre yuhduoatiqiro ijire. Sa yegu ahriquirogāre ihña tuhasagū, yojopāre quehnoano bucuegu yariūtja, niahye Simeo.

³³ Simeo tiquiogāre tiqiro sa nigū tiquiogā pacusumua pehe tuho maria wahahye. ³⁴ Sa yero Simeo tiquinare “Quehnoano ijiya mūsa”, nino tiqiro María Jesu pacorore yahuahye:

—Cohācjū ahriquiogāre beseahye. Sa beseriquirogā tiqiro ijiepegūta judio masa peyequina tiquiore yuhdudūcaeta. Sa ye tiquina pecapū wahaeta. Sa yero judio masare peyequina tiqiro yuhduoatiqiro gūhure Cohācjū beseri tiquiogāre. Tiquiro Cohācjū yere yahuriqiro tiqiro ijiepegūta masa peyequina tiquiore ñano ni yahuducūta. ³⁵ Tiquina sa yegū apequina tiquina ñano wacūñene masieta. Sa yego muhū tutuaro purīno yero saha bujua witigota, niahye Simeo Mariare.

³⁶ Topū Cohācjū yere yahu muhtaricoro Ana wame tiricoro ijiahye. Ticoro Fanuel macono ijiro, Aser mūnano ya curua cjōno ijiahye. Bucūoro waro ijiahye. Ticoro nuhmino ijiro manū tiahye. Sa yero siete cūhmari waro ticoro manūno mehna ijiahye. To puno tiqiro ijiri bato ticoro manūno yariaa wahahye. ³⁷ Sa yero ochenta y cuatro cūhmari waro wape wihoro ijie tiahye ticoro. Sa yero ticoro deco gūhure ñami gūhure Cohācjū yere yero taro siji, Cohācjū mehna yahuducu, Cohācjū wūhure ne wijiaera tiahye. ³⁸ Simeo tiqiro yahuducuri watoa ticoro tiquina cahapū wihiro, bucūero, Cohācjūre “Quehnoare”, niahye. Sa yero Jerusalē cjēnare pecapū waboriquinare yuhduoatiquiore cohteyequinare ticoro Jesugāre yahuahye peyequina masare.

José, María, Jesu mehna Nazarepū tojoaa wahahye tja

³⁹ Cohācjū dutiriro sahata ye tuhasaye, tiquina ya macapū Nazarepū tojoaa wahahye. Galilea yehpapū ijiahye ti maca Nazare. ⁴⁰ Sa yero Jesu quehnoano masa, tutuariqiro wahahye. Sa yero tiqiro quehnoano tuho masiniqiro ijiahye. Sa yero tiquiore Cohācjū quehnoano yeahye.

Jesu coā wahmua dūcaro, Cohācjū ya wūhupū judio masare buheyequina mehna yahuducuro niahye

⁴¹ Cūhmaripe Jesu pacusumua Jerusalēpū pascua decorire bose decorire ihñañe wahae tiahye. ⁴² Jesu doce cūhmari tiqiro cūogū tiquina yeducuriro sahata tiquina ijipihtiyequina Jerusalēpū wahahye. ⁴³ Sa yeye bose decorire ihña tuhasa tiquina ya macapū tojoaa wahahye tja. Tiquina sa tojoepegūta Jesu pehe Jerusalēpū tojoa cāhye. Tiquiro pacusumua tiqiro tojoa queherire masiedahye. ⁴⁴ “Tiquiro mari mehna cjēna mehna ijiaga”, ni tuhotumahye tiquina. Sa ye tiquina ihcā deco waro Jesu marieno wahamahye. Sa ye tiquina Jesure tiquina acaye watoa macamahye. ⁴⁵ Ne bocaerahye. Sa ye tiquina Jerusalēpū tiquiore macañe wahahye.

⁴⁶ Ihtia deco bato Cohācjū wūhupū tiquiore boca sahye. Sa yero Jesu judio masare buheyequinare tuho, tiquinare sinituro niahye. Sa ye cahme yahuducuye niahye. ⁴⁷ Tiquina ijipihtiyequina Jesure tuhoye quehnoano masiniquiogā tiqiro ijigū ihñañe, tiquina tuho maria wahahye. ⁴⁸ Tiquiro pacusumua gūhū Jesure ihñañe, ihña maria wahahye. Sa yero tiqiro pacoro tiquiore ohō saha niahye:

—¿Macu, dáhsegu sa yeajari mǎhu usãre? Mǎhu pacusumua ohõ saha ni tuhottuu usã. “Tiquiro butia wahaga”, ni macaja usã mǎhure, niahye ticoro macunore.

⁴⁹Ticoro sa nigũ tiquiro pacusumuaere yahuahye:

—¿Dǎhsena yǎhure macajari mǎsa? Yǎhu Pacu yǎhure tiquiro dutiriro saha yegũ niaja. ¿Tire masiedajari mǎsa? niahye tiquiro.

⁵⁰Tiquiro sa niepegũta tiquina tuhõ ñehedahye.

⁵¹Sa yero Jesu Nazarepu tojoaa waha, tiquiro pacusumuaere ne yǎhduducaerahye. Ahri ijipihitiye tiquiro yerire María quehnoano wacũahye. ⁵²Sa yero Jesu bucua, quehnoano tuhõ masiniquiro wahahye. Sa ye Cohãcjũ, masa gũhu “Quehnoariquiro ijire”, ni ihñahye tiquirore.

Ñu wame yeriquiro masare Cohãcjũ yere yahuahye

(Mt 3.1-12; Mr 1.1-8; Jn 1.19-28)

3 Ti pjere tiquina puhtoro Tiberio wame tiriquiro puhtoro ijiri bato quince cǎhmari wahahye. Sa yero Poncio Pilato wame tiriquiro Judea yehpa cjẽna puhtoro ijiahye. Sa yero Herode wame tiriquiro Galilea yehpa cjẽna puhtoro ijiahye. Tiquiro bahuro Felipe Iturea yehpa cjẽna, Traconite yehpa cjẽna gũhu tiquina puhtoro ijiahye. Sa yero Lisania wame tiriquiro Abilinia yehpa cjẽna puhtoro ijiahye. ²Sa ye Anás, Caifa mehna ijipihitiyequina pahia puhtoa ijiahye. Ahriquina ijipihitiyequina tiquina ijiri pjere Ñu Zacaria macuno masa marienopu ijiriquirore Cohãcjũ pehe tiquirore tiquiro yere yahu dutiahye. ³Sa yero Jordã wame tiri ma dǎhtu cahapu ijiri yehpau ijipihitiropu Ñu buhero wahahye.

—Musa ñañe yeyere bujua witiya. Yojopure quehnoañe pehere comesaya. Sa yena wame yenohrina ijiya. Musa sa comesagũ ihñano Cohãcjũ mǎsa ñañe yerire borota, ni, buhee tiahye tiquiro.

⁴Isaia munano panopu cjũno Cohãcjũ yere yahu muhtariquiro ojoariro sahata ahriquiro yojopure yero niahye. Ohõ saha ni ojoahye Isaia Ñu tiquiro buheatire:

Masa marienopu yahuducu sañuducuriquiro ohõ saha ni buherota: “Mari puhtoro ahtato pano mahare mari quehnoyuriro saha quehnoana ijiyuya mǎsa. Musa ñañe yerire bujua witiya. ⁵Pe wuhturi, pe buhuari gũhure quehnoari paa mari yeriro saha, pari yawi ijiye maharine potoye mahari mari yeriro saha, ñañe maharine quehnoañe maharine mari yeriro saha, wetere mǎsa coseriro saha mǎsa ñañe yeyere duhuya. ⁶Musa sa yegũ Cohãcjũ musare pecapu wahaborinare tiquiro yǎhduogũ ihñæta ijipihitiri yehpa cjẽna”, ninota tiquiro sañuducu yahuriquiro pehe, ni ojoahye Isaia munano panopure.

⁷Masa peyequina Ñu cahapu wihiye tiquiro tiquinare wame yegũ cahmeahye tiquina. Sa yero tiquiro tiquinare yahuahye:

—Añaã pari yero saha ña yǎhduna, cue duhti duana ijire mǎsa. Musa ñañe yerire bujua witi duerana Cohãcjũ mǎsa ñañe buhirire tiquiro buhiri dahreato pano duhti masiedare mǎsa. ⁸Sa yena potota mǎsa ñañene bujua witina ijina, quehnoañene comesana ijina, quehnoañe pehere yeya mǎsa. Ohõ saha ni tuhottueracãhña. “Panopu cjũno Abrahã mari ñecu munano ijie tiahye. Sa yena tiquiro panamena ijina mari Cohãcjũ yequina ijiaja”, ni tuhottueracãhña mǎsa. Musare niita niaja. Abrahã pana-

mena iji turiana ijimene m̄sa. M̄sa sa ijepegũta ti m̄sa sa ijiye d̄h-seati ijierare. Cohãcjũ pehe ahri utã paca mehna Abrahã acayere dahre masine. Sa ye Abrahã acaye m̄sa ijiye ihyo waro ijire utã paca ihyo waro ti ijiro saha. ⁹ Ohõ saha ijire: Masa yucuri yero saha ijire. Cohãcjũ pehe yucurire quẽatiare comeare c̄oriquiro yero saha ijire. Sa yero ñaÑe d̄ca tiye cjure d̄te cohã, ti nuhcori gũhure d̄te sure peho cãnota. D̄te sure tuhasa, pecapũ ujũanota tiquiro ti cjure, nuhcori gũhure. Sata yerota masa gũhure tiquirore cahmeeÑequinare, niahye Ñu masare.

¹⁰ Tiquiro sa nigũ tuhoye masa pehe tiquirore sinituahye:

—¿D̄hse yenatari usã? niahye tiquina Ñure.

¹¹ —P̄ca suhtiro c̄oriquiro suhti mariediquirore ihcãno ohoya. Sa yena m̄sa ihyaye c̄ona apequina gũhure ohoya, niahye Ñu.

¹² MeheÑequinagã puhtoa ye ijiatire wapa ne cohteyequina wame yenhriquina iji duahye tiquina gũh. Sa yeye Ñu cahapũ wihiye, tiquirore sinituahye:

—¿Buhegũ, usã pehe d̄hse yenatari usã? niahye tiquina tiquirore.

¹³ —M̄sa puhtoa tiquina dutiro punota masare wapa neña. Ni meho wapa ne nemoedacãhña, ni yahuahye Ñu tiquinare.

¹⁴ Apequina surara tiquirore sinituahye tja:

—¿Usã pehe d̄hse yenatari? niahye tiquina tiquirore tja.

—Masa yere niÑerure ehmedacãhña. Sa yena tiquina ye niÑerure ni meho nedacãhña. M̄sare tiquina wapa yero punota bucueya, ni, yahuahye Ñu.

¹⁵ Masa Cristore Cohãcjũ tiquiro ohoatiquirore cohteye niahye. Sa yeye ohõ saha ni tuhodu d̄cahye tiquina Ñure. “Ahriquiro Ñu pehe Cristo ijiboaga”, ni

tuhotumahye tiquina. ¹⁶ Tiquina sa nigũ tuhoro Ñu ijipihtiequinare yahuahye:

—Yũhũ bato yũhũ yũhũoro tutuariquiro ahtarota. Quehnoa yũhũariquiro ijire tiquiro. Tiquiro yero saha ijieraja yũhũ pehe. Sa yegũ tiquirore tuhotugũ, “Ihyo ijigũ ijiaja”, ni tuhotuaja yũhũ. Yũhũ pehe m̄sare wame yegũ aco mehna wame yemi. Tiquiro pehe yũhũ yũhũoro yerota. Espiritu Santore masa mehna ijiducugũ yerota. Sa yero pecapũ ñaÑene tiquiro ujũa wero saha tiquiro ahtariquiro pehe m̄sa ñano yeyere cose werota.

¹⁷ Yũhũ bato ahtariquiro trigo cahseri cohãriquiro yero saha ijire. Ti cahserire cohãriquiro tiquiro batiro mehna ijipihtieye trigo pjeri cahserire puti were. Sa ye tuhasa trigo pehere tiquiro ihbori wũhũpũ cũnota. Sata yerota tiquina ñaÑene bujũa witiyequinare yũhũ bato ahtariquiro. Tiquiro puti weri cahseri pehere ujũanota. Ti peca tiquiro ujũari peca ne yatisi. Sata yerota tiquiro yũhũ bato ahtariquiro tiquina ñaÑene bujũa witiyequinare, ni yahuahye Ñu.

¹⁸ Peye tiquiro sa ni yahuye mehna masare quehnoañe buheyere yahuahye Ñu. ¹⁹ Sa yero puhtoro Herode pehe tiquiro bahũro Felipe namonore tiquiro namo tiri buhiri, pajiro ñaÑene tiquiro yeri buhiri gũhure Ñu tiquirore yahumahye. ²⁰ Tiquiro sa ni yahuri buhiri Herode pehe Ñure peresu yeahye, pari turi ñaÑene yero.

Ñu Jesure wame yeahye

(Mt 3.13-17; Mr 1.9-11)

²¹ Ñure tiquina peresu yeato pano apequina masare Ñu pehe wame yero niahye. Tiquinare wame yero Jesu gũhure wame yeahye. Sa yero Jesu diapũ ducuriquiro Cohãcjũre tiquiro sinino watoa uhm̄use parĩ maa wahahye. ²² Sa parĩ maari bato Espiritu Santo bujua yero saha bajuriquiro Jesu buipũ di-

jia tahye. Tiquiro ahtagū ũhmusepū yahuducuro ca tahye:

—Mũhũ yũhũ macũ yũhũ cahĩgũ ijire. Mũhũ mehna tutuaro bucueaja, nino ca tahye ũhmusepũ.

Jesu acaye paṛopũ cĵena ijiahye

(Mt 1.1-17)

²³ Jesu buhe đucari cũhmare treinta cũhmari cũoahye tiquiro. “Tiquiro José macũno ijire”, ni, tũhotumahye masa. José pehe Elí macũno ijiahye. ²⁴ Elí Matat macũno ijiahye. Matat Leví macũno ijiahye. Leví Melqui macũno ijiahye. Melqui Jana macũno ijiahye. Jana José macũno ijiahye. ²⁵ José Matatía macũno ijiahye. Matatía Amós macũno ijiahye. Amós Nahúm macũno ijiahye. Nahúm Esli macũno ijiahye. Esli Nagai macũno ijiahye. ²⁶ Nagai Maat macũno ijiahye. Maat Matatía macũno ijiahye. Matatía Semei macũno ijiahye. Semei Josec macũno ijiahye. Josec Judá macũno ijiahye. ²⁷ Judá Joanán macũno ijiahye. Joanán Resa macũno ijiahye. Resa Zorobabel macũno ijiahye. Zorobabel Salatiel macũno ijiahye. Salatiel Neri macũno ijiahye. ²⁸ Neri Melqui macũno ijiahye. Melqui Adi macũno ijiahye. Adi Cosam macũno ijiahye. Cosam Elmadam macũno ijiahye. Elmadam Er macũno ijiahye. ²⁹ Er Josué macũno ijiahye. Josué Eliezer macũno ijiahye. Eliezer Jorim macũno ijiahye. Jorim Matat macũno ijiahye. ³⁰ Matat Leví macũno ijiahye. Leví Simeo macũno ijiahye. Simeo Judá macũno ijiahye. Judá José macũno ijiahye. José Jonam macũno ijiahye. Jonam Eliaquim macũno ijiahye. ³¹ Eliaquim Melea macũno ijiahye. Melea Mena macũno ijiahye. Mena Matata macũno ijiahye. Matata Natán macũno ijiahye. ³² Natán Davi macũno ijiahye. Davi Isai macũno ijiahye. Isai Obed macũno ijiahye. Obed Booz

macũno ijiahye. Booz Salmón macũno ijiahye. Salmón Naasón macũno ijiahye. ³³ Naasón Aminadab macũno ijiahye. Aminadab Admin macũno ijiahye. Admin Arni macũno ijiahye. Arni Esrom macũno ijiahye. Esrom Fare macũno ijiahye. Fare Judá macũno ijiahye. ³⁴ Judá Jacob macũno ijiahye. Jacob Isaac macũno ijiahye. Isaac Abrahā macũno ijiahye. Abrahā Taré macũno ijiahye. Taré Nacor macũno ijiahye. ³⁵ Nacor Serug macũno ijiahye. Serug Ragau macũno ijiahye. Ragau Peleg macũno ijiahye. Peleg Heber macũno ijiahye. Heber Sala macũno ijiahye. ³⁶ Sala Cainán macũno ijiahye. Cainán Arfaxad macũno ijiahye. Arfaxad Sem macũno ijiahye. Sem Noé macũno ijiahye. Noé Lamec macũno ijiahye. ³⁷ Lamec Matusalē macũno ijiahye. Matusalē Enoco macũno ijiahye. Enoco Jared macũno ijiahye. Jared Mahalaleel macũno ijiahye. Mahalaleel Cainán macũno ijiahye. ³⁸ Cainán Eno macũno ijiahye. Eno Sete macũno ijiahye. Sete Adán macũno ijiahye. Adán Cohācjũ yeriquiro ijiahye.

Watĩno ñañene ye dutimahye Jesure

(Mt 4.1-11; Mr 1.12-13)

4 Jesu Espĩritu Santo dutiriro saha ye pehoriquiro ijiro, Jordā wame tiri ma cahapũ ijiriquiro tojoaa wahahye. Tiquiro sa tojoaa wahagũ Espĩritu Santo pehe tiquireore masa marienopũ neahye. ² Topũ esaro cuarenta decori ijiahye. Sa yero watĩno pehe Jesure ñañene yegũ cahmemahye. Sa yero ñañene ye dutimahye tiquireore. Ti decorire ne Jesu ihyerahye. Sa yero ti decori pihtigũ waro tiquiro ũjua ahbahye.

³ Tiquiro sa ũjua ahbagũ ihñano watĩno ohõ saha nimahye Jesure:

—Mũhũ Cohācjũ macũ ijĩgũ, ahria ũtāre ihyaye dojomehneña, nimahye Jesure.

⁴Jesu ohō saha ni yuhtiahye:

—Yeraja. Cohācjū yere tiquina ojoari pūpū ohō saha nine: “Masare ihyaye mehna dihita catieraro cahmene. Ijipihtiye Cohācjū ye yahuye mehna ijiro cahmene”, nine Cohācjū, ni yuhtiahye Jesu watīnore.

⁵Tiquiro sa nidi bato watīno pehe tiquireore cūnū uhmānū buipū ne mūja saro, duita ijipihtiye macarine ihño dijioahye Jesure. ⁶Sa ihñono Jesure yahuahye:

—Ijipihtiye ahri macari yuhure tiquireo ohori ijire. Sa yegū yuhū cahmediquirore oho masiaja. Sa yegū ahri macarine, ahri macari cjenare dutiati gūhure, tiquina cūoye mehna mūhure ohoutja. ⁷Yuhure mūhū ño peogū ahri macari ijipihtiye macarine mūhure ohoutja, niahye watīno Jesure.

⁸Jesu ohō saha ni yuhtiahye tiquireore:

—Mūhure ño peeraja. Ohō saha nine Cohācjū yere tiquina ojoari pū: “Mūhū puhtoro Cohācjū dihitare ño peoya. Tiquiro ye dutiye dihitare yeya”, ni ojoahye Cohācjū yere, niahye Jesu watīnore.

⁹⁻¹¹Tiquiro sa nidi bato Jerusalēpū watīno pehe tiquireore ne cā, Cohācjū wūhū buipū ne sahye. Ne sa tuhasa tiquireore ohō saha nimahye:

—Cohācjū yere tiquina ojoari pū ohō saha nine: “Cohācjū tiquireo yequina angelere mūhure ihña ihbo dutirota. Sa yeye tiquina pehe mūhure ihña ihboeta, ‘Mūhūpū utāpū puhari’, niñe”, ni ojoahye Cohācjū yere tiquina ojoari pūpū. Tiquiro sa nidi poto ijigū mūhū Cohācjū macū ijigū, yehpapū uhpu dijia ihñoña yuhure. Mūhure tiquina yedohogū ihñoña yuhure, nimahye watīno Jesure.

¹²Jesu uhpu dijia ihño dueraro ohō saha ni yuhtiahye tiquireore:

—Cohācjū yere tiquina ojoari pū ohō saha nine: “Mūsa puhtoro Cohācjū

tiquireo nidire ‘¿Poto ijiajari?’ ni masi duana, Cohācjūre ye ihño duti tuhueracāhña”, nine Cohācjū yere tiquina ojoari pūpū, niahye Jesu watīnore.

¹³Sa yero watīno ijipihtiye ñañene Jesure ye dutimahye. Sa duti tuhasaro mehenogā duhu cārīahye.

Galilea yehpapū Jesu buhe dūcahye

(Mt 4.12-17; Mr 1.14-15)

¹⁴Came Jesu Galileapū tojoaa wahahye. Sa yero tiquireo Espiritu Santo tutuaye mehna yeahye. Topū ijipihtiropū masa tiquireore quti tiahye. ¹⁵Judio masa buheye wūhusepū Jesu gūhū buhee tiahye. Sa ye ijipihtiyequina masa tiquireore quehnoano yahuducuahye.

Nazare cjēna Jesure ne cahmedahye

(Mt 13.53-58; Mr 6.1-6)

¹⁶⁻¹⁷Came Nazarepū Jesu tiquireo masariropūta esahye. Topū esa, saurū ijigū tiquireo sa yeducuro saha judio masa tiquina buheri wūhūpū sajā sahye. Topū tiquireo Cohācjū yere tiquina ojoari pūre buhero taro topū ducuahye. Tiquiro sa ducugū ihñañe to cjēna pehe Cohācjū yere yahu muhtariquireo Isaia mūnano tiquireo ojoari pūre tiquireore ohoahye. Ti pūpū Jesu ahri yahuyere bocaro buheahye:

¹⁸Cohācjū yaquiro Espiritu yuhū mehna ijiro, yuhure dutiri. Tiquiro pejecuoyequinare quehnoañe buheyere yahu dutiro ohori yuhure. Sa yero peresupū ijiyequina gūhure tiquinare tiquireo yuhduoatire yahu dutiro ohori yuhure. Caperi bajueyequina tiquina quehnoano ihñatire ohori yuhure. Sa yero masa ñano tiquina yenohriquinare wioacjūre yuhure ohori. ¹⁹Mari puhtoro Cohācjū tiquireo yequinare pecapū wahaboriquinare tiquireo yuhduoatire yuhure yahu dutiro ohori, ni buheahye Jesu.

²⁰ Sa ni buhe tuhasa Jesu ti püre quehnoari tunu torē, wuhū cjūnore wia tuhasa, nuju sahye. Tiquiro nuju sagū ihñañe topu ijiyequina ijipihtiequina tiquiro dihitarē ihñañe. ²¹ Tiquina sa yegū tiquiro tiquinare yahu dūcahye:

—Ahri mianogāta yuhū buhero saha Cohācjū tiquiro nidiro sahata waharo nine, niahye Jesu.

²² Tiquiro sa nigū tuhoye “Ahrikiro quehnoariro ijiye”, ni tuhohūahye tiquina. Sa yeye tiquina tiquiro quehnoano yahuducgū tuhoye, tuho maria wahahye. Sa yeye ohō saha niahye tiquina basi:

—¿Yohnah, José macūno ijierajari ahrikiro? niahye tiquina basi.

²³ Tiquina sa nigū masino Jesu yahūahye tiquinare:

—Yuhū buheyere tuho duerana, ohō saha ni tuhohūre mūsa yuhūre: “Duturu dohatiro tiquiro basi aco ti masine duturu waro tiquiro ijiyere ihñono. Mūhū gāhū duturu tiquiro ye ihñono saha mūhū nidiro saha ijigū Cohācjū tutuaye mehna ye ihñona ūsāre. Capernaupūre Cohācjū tutuaye mehna ye ihñonohi mūhū. ūsā gāhūre sa ye ihñona, mūhū buheyere ‘Poto tjire’, ūsā niato saha”, ni duare mūsa yuhūre. ²⁴ Ahrire yahutja mū sare. Cohācjū yere yahu mūhtariqiore tiquiro ya maca cjēna ño peerare. Sa yena yuhūre ño peerare mūsa ohōpu yuhū masarigū ijigū. ²⁵ Sata ijiahye panopūre. Panopū Elia tiquiro ijiri pjere ihtia cūhma ape cūhma deco waro ne acoro ahtaerahye. Sa yero ijipihitropūta ne ihyaye mariedahye. ²⁶ Ti pjere peyequina wape wiha numia Israe yehpapū tiquina ijipegūta Cohācjū Elia mūnanore tiquinare yedoho dutiro ohoerahye. Tiquiro ya macare sa ye dutieraperota ape yehpapū Sidō cahapū ijiri macapū Sarepta wame tiri maca cjōno wape wihore yedoho dutiro Elia mūnanore ohoahye Cohācjū. ²⁷ Came Co-

hācjū yere yahu mūhtariqiore Eliseo mūnāno tiquiro ijiri pjere Israe yehpapū peyequina cami bucū mūna wiha tiquina ijipegūta ihcāqiore Israe masūnore ne quehnoa wahagū yerahye Eliseo mūnāno. Tiquiro ya yehpa cjēnare yeraperota Naamān wame tiriqiore Siria yehpa cjūno dihitarē quehnoa wahagū yehahye tiquiro. Sa yero Israe masare yedohero, Israe masa ijiyequina pehere yedohohahye Cohācjū, niahye Jesu tiquinare.

²⁸ Tiquiro sa nigū tuhoye ijipihtiequina ti wuhūpu ijiyequina usua yuhūdua wahahye. ²⁹ Sa yeye tiquina wahcādūca, Jesure ne wijia, ti maca dūhtū cahapū ijiri cūnpū tiquirore tūdoque dijio duamahye. ³⁰ Tiquina sa ye duepegūta Jesu tiquina watoata wahaa wahahye.

Watīnore cuoriquiro Jesure piti cahye

(Mr 1.21-28)

³¹ Came Jesu Galilea yehpapū ijiri macapū Capernau wame tiri macapū esa, saurū ijigū masare buheahye. ³² Quehnoano masi pehoriqiore tiquiro buhegū tuhoye masa tuho maria wahahye. ³³ Ti wuhūpu watīnore cuoriquiro ijiahye. Tutuaro sañuducūahye:

³⁴ —Mūhū Jesu Nazare cjū ūsāre cariboeracāhña mūhū. ¿Dūhse yegū tagū nijari ūsāre? ¿Mūhū ūsāre butigū yegū tagū nijari? Cohācjū macū, quehnoagū mūhū ijigū yuhū masiaja, ni sañuducūahye Jesure.

³⁵ Tiquiro sa nigū tuhoro Jesu tuhtiahye watīnore:

—Dihta mariahña. Duhuya tiquirore, niahye Jesu.

Tiquiro sa nidi bato masūnore watīno pehe yehpapū doque quehe sa tunugū yehahye. Tiquiro sa yeri bato tiquiro pehe quehnoa wahahye. ³⁶ Topū ijiyequina ijipihtiequina tiquiro sa wahagū ihñañe, ihña maria wahahye. Sa ye tiquina basi ohō saha ni yahuducūahye:

—¿Yabe boro buheye ijajari ahri sa wahagū yeye? Yohnah. Tutuaro mehna puhtoro yero saha ahriquiroy watīare dutire. Sa yeye tiquiro dutiro sahata tiquina masare duhure, ni yahudu-cuahye tiquina basi.

³⁷ Tiquiro sa yegū ihñañe ti yehpapu ijipihtiropu masa Jesure quiti dahreahye.

Jesu Simo Pedro mareonore dutire yuhduoahye

(Mt 8.14-15; Mr 1.29-31)

³⁸ Judio masa tiquina buheri wuhure wijia, Simo ya wuhupu sajā sahye Jesu. Topu Simo mareono dohatiro niahye. Tutuaro ujuaye tiahye. Sa ye tiquina ticoro dohatigū yahuahye Jesure. ³⁹ Tiquina yahuri bato tiquiro ticoro cahapu esa, ujuayere suru dutiahye. Tiquiro sa suru dutiri bato ticorore ujuaye surua waha, duita quehnoa wahahye. Ticoro sa waharo wahcā nuju sa, ticorota tiquinare ihyayere peoahye.

Peyequina dohatiyequinare yuhduoahye Jesu

(Mt 8.16-17; Mr 1.32-34)

⁴⁰ Asū sajāri bato ijipihtiyequina masa tiquiro cahapu ijiyequina dohatiyequinare Jesu cahapu ne sahye. Dohatiyequina peyequina sijoro saha ijiye dohatiyere cuoahye. Sa yero Jesu tiquiro omocari mehna tiquina bui ña peo, ijipihtiyequinare tiquina dohatiyere quehnoano yuhduoahye. ⁴¹ Watīa gūhure Jesu duhu dutigū tiquina duhuye sañuducuahye:

—Muhū potota Cohācjū macu ijire, niahye tiquina Jesure.

Jesu Cohācjū ohoriquiroy tiquiro Cristo ijigū watīa masiahye. Sa yero Jesu tiquinare yahuducu dutierahye, “Cristo ijire’, ni yahu siteari”, nino.

Galilea yehpapu buheahye Jesu

(Mr 1.35-39)

⁴² Bohrea muja tagū Jesu ti macapu ijiriquiroy waha, masa marienopu esahye. Tiquiro sa esari bato masa tiquirore maca cā, boca saye, ohō saha niahye:

—Ūsā ya macapu tojoaya ūsā mehna. Ape sie wahaeguta, nimahye tiquina Jesure.

⁴³ Tiquina sa niepegūta tiquiro pehe ohō saha ni yuhtiahye:

—Cohācjū tiquiro puhtoro ijiyere quehnoañe buheyere apewe macaripu gūhure buhe duaja yuhū. Cohācjū yuhure ohori tire yahuacjūre, niahye Jesu tiquinare.

⁴⁴ Sa yero Judea yehpapu ijiye wuhūsepu, judio masa tiquina buheye wuhūsepu tiquiro buhe tiniahye.

Jesu tiquiro buheyequinare peyequina wahi wejēgū yeahye

(Mt 4.18-22; Mr 1.16-20)

5 Ape deco Jesu Genesare wame tiri ditara duhtu cahapu esahye. Topu tiquiro ijigū ihñañe peyequina masa Cohācjū yere tuho duaye tiquirore nunū tā sahye. Quehnoano wahpa duca saa wahahye masa pari. ² Pua yucusa padrupu pahsaye yucusarire Jesu ihñahye. Ti yucusari cjēna yohyeyequina maja saduca, tiquina wēñecjūre coseye niahye. ³ Sa yero Jesu Simo yariapu sajāhye. Sajā tuhasa tia yucusare dia duhtu cahapu cuñariare weje buho dutiahye. Sa yero yucusapu duji, masare buheahye. ⁴ Buhe tuhasa, Jesu Simore ohō saha niahye:

—Deco cjūnogā tu wioya. Sa yena muhū mehna cjēna mehna musa wēñecjūre doque ñoña wahi ñeheanaja, niahye Jesu.

⁵ Tiquiro sa nigū tuhoroy Simo Jesure yuhtiahye:

—Puhto, wahi wejē bohreami usā mia ñamine. Bohrepenata ne ihcāquirogā wejēdahti usā. Sa wejēdapenata muhu dutiro saha doque ño tuhunata, ni yuh-tiahye Simo.

⁶Sa ni tuhasa tiquina doque ñoahye. Sa tiquina doque ñogū tiquina wēñecjare peyequina wahi sajahye. Peyequina tiquina sajägū wēñecjū tuhñua wahamahye. ⁷Sa wahagū ihñañe aperia cjēnare tiquina mehna cjēnare pijioahye.

—Musa gūhu yedohona ahtaya usāre, ni pijioahye Simo gūhu.

Tiquina sa yedohori bato puaria yucusa quehnoano miniparo bocahye wahire. ⁸Simo Pedro sa wahi peyequina tiquina sajägū ihñano, Jesu cahapū dusepe curi mehna quehe sa, tiquirore niahye:

—Yuhū puhto, muhu mehna ijibogū ijieraja yuhū. Ñagu ijiaya yuhū. Sa yegu yuhure duhuya, niahye Simo Jesure.

⁹Tiquiro, ijipihitiyequina tiquiro mehna cjēna gūhu peyequina wahi sajägū ihñañe, ihña maria wahahye tiquina gūhu. ¹⁰Puaro Simo mehna cjēna Zebedeo pohne Santiago, tiquiro bahuro Ñu mehna, tiquina gūhu ihña maria wahahye. Tiquina sa ihña mariagū ihñano Jesu Pedrorre yahuahye:

—Ihña mariedacāhña. Yojoপুরে muhu wahire ñehe cahmecoagu muhu ijiro saha Cohācjū yequina ijiatiquinare piji cahmecoagu ijiguta muhu, niahye Jesu Simore.

¹¹Tiquiro sa nidi bato tiquina yucusarire ditara duhtu cahapū weje mo cū cā, tiquina ye ijipihitiyere topūta cū cā, Jesu mehna wahaa wahahye.

**Jesu cami bucu muna wihirore
cami yatigū yeahye**

(Mt 8.1-4; Mr 1.40-45)

¹²Jesu ape macapū tiquiro ijigū cami bucu muna wihiro tiquirore piti cahye.

Sa piti caro tiquiro Jesure ihña, dusepe curi mehna quehe sa, tutuaro siniahye:

—Puhto, muhu yuhure yuhduo duagu yuhduoya, ni siniahye.

¹³Tiquiro sa nidi bato Jesu tiquirore ña peoro ohō saha niahye:

—Tire ye duaja. Yojoপুরে quehnoagu ijiya muhu, niahye.

Tiquiro sa nigāta tiquiro cami ahbari yatia wahahye. ¹⁴Sa yero Jesu tiquirore dutiahye:

—Ahri yuhū ohō saha yerire apequinare yahueracāhña. Pahi cahapū wahaya yojoপুরে. Sa yegu muhu pagure quehnoari pagū waharire ihñoña tiquirore. Cohācjū dutiye Moiserre tiquiro cūri nidiro saha yeya. Sa yegu pahire puaro minicjūare ohoya muhu cami yuhdurire ijipihitiyequinare ihñogu tuhū, niahye cami bucu muna cuomediquirore.

¹⁵“Yahueracāhña”, tiquiro sa niepegūta ijipihitropū masa Jesure quti dahre nemoahye. Tiquina sa quti dahregū tuhoye masa peyequina tiquiro cahapū esahye. Dohatiyequina yuhdu duaye, tiquina gūhu tiquiro cahapū esahye. ¹⁶Tiquina sa esaepēgūta Jesu masa marienopū Cohācjūre sinino wahaa wahahye.

Jesu tini masieniquirore yuhduoahye

(Mt 9.1-8; Mr 2.1-12)

¹⁷Ape deco Jesu buhegū fariseo masa, judio masare buheyequina gūhu topū dujiahye. Tiquina peye macari Galileapū ijiye macari cjēna, Judeapū ijiye macari cjēna, Jerusalē cjēna ijiyahye. Sa yero Jesu Cohācjū tutuaye mehna dohatiyequinare yuhduoahye. ¹⁸Meheñequinagā umua tini masieniquirore tiquiro cuñari cahsero mehna yo wua wihiahye. Sa yeye tiquirore Jesu cahapū cū duaye, wuhupū yo sajä duamahye tiquina tiquirore. ¹⁹Sa sajä duepeta masa

peyequina ijigū tiquina tiquirore yo sajā masiedahye. Sa yeye tiquirore wuhū buipū yo mūjahye. Yo mūja sa, mehenogā pōo we, ti copepū tini masieniquirore tiquiro cuñari cahsero mehna duhu dijioahye Jesu cahapū ijijequina watoa. ²⁰“Jesu ahriquiore tiquiro dohatiyere yuhdugū yerota”, ni tuhotuahye tiquina. Tiquina sa ni tuhotugū masino Cohācjüre tiquina wacū tutuayere masino, Jesu tini masieniquirore ohō saha ni yahuahye:

—Yuhū acayū, mūhū ñañe yeyere yuhū cohā tuhasau, niahye Jesu tiquirore.

²¹Tiquiro sa nigū tuhoye fariseo masa, judio masare buheyequina gūhū tiquina basi ohō saha ni tuhotumahye: “Ahriquiore sa ni yahuducueracāhdo. Masuno mari yero saha ijiro, tiquiro ñañe yeyere cohā masiedare. Cohācjū dihita masa tiquina ñañe yeyere cohā masine”, ni, tuhotumahye tiquina.

²²Jesu tiquina tuhutuyere masino, ohō saha niahye:

—¿Duhse yena sa ni tuhotuajari mūsa? ²³“Mūhū ñañe yeyere yuhū cohā tuhasaja”, yuhū nigū, “Ni mehogu ijire”, yuhūre nine mūsa quehnoano masiedapenata. “Wahcādūca wahaya”, yuhū nigū tiquiro tinigū ihñana yuhū nidī poto ijigū duita masinata. ²⁴Yuhū masū Cohācjū ohorigū ahri yehpapū ñañe yeyere cohā masiaja yuhū. Masa tiquina ñañe yeyere cohācjüre cūri Cohācjū yuhūre. Yuhū sa cohārire mūsa masiatio saha ohō saha ye ihñoutja mūsa ihñatire, niahye Jesu.

Sa ni tuhasa tini masieniquirore ohō saha niahye:

—Mūhūre niita niaja. Wahcādūcaya. Mūhū cuñari cahserore ne cāhñā mūhū ya wuhūpū, niahye tiquirore.

²⁵Tiquiro sa nigū tuhoroa ijipihtiyequina tiquina ihñonopū wahcādūca, tiquiro cuñari cahserore ne, tiquiro

ya wuhūpū tojoa wahahye. Sa waharo tiquiro Cohācjüre ño peoro, bucueye mehna quehnoano yahuducuahye. ²⁶Tiquiro sa yegū ihñañe masa pehe ijipihtiyequina ihñā maria wahahye. Tiquina ihñā maria waha, Cohācjüre ño peoye, bucueye mehna quehnoano yahuducuahye:

—Miare sijoro saha ijiyere ihñau mari, niahye tiquina.

Jesu Levire pijiahye

(Mt 9.9-13; Mr 2.13-17)

²⁷Sa ye tuhasa waha, Leví wame tiquirore tiquiro dahrari tucūpū ijiriquirere boca sahye Jesu. Leví pehe pūhtoa ye ijiatire masare wapa ne cohteriquiro ijiahye. Sa boca saro tiquirore ohō saha niahye:

—Yuhū mehna cjū ijiajū ahtaya, niahye tiquiro Levire.

²⁸Tiquiro sa nigū Leví pehe ijipihtiye tiquiro dahrayere duhu cā, Jesu mehna wahaa wahahye.

²⁹Came Leví ya wuhūpū Jesu ya bose deco yeye niahye. Topū peyequina wapa ne cohteyequina, apequina Leví gūhū mehna dujiahye. ³⁰Tiquina mehna Jesu gūhū dujigū ihñañe meheñequinagā fariseo masa, judio masare buheyequina mehna usua, Jesu buheyequinare sinituahye.

—¿Duhseña ñano yeyequina, wapa ne cohteyequina mehna ihyajari mūsa? ni tuhtiahye tiquina.

³¹Tiquina sa nigū tuhoro Jesu yuh-tiahye tiquinare. Ohō saha ni queoye mehna buheahye:

—Dohatiyequina duturure macaedare. Dohatiyequina dihita duturure macare. Ñañequina dohatiyequina yero saha ijire. ³²Sa yegū ñañequina dihitaré tiquina ñañene bujua witi dutigu, quehnoañe pehere comesagū yegū tūū nii yuhū. Tiquina basi “Quehnoana ijiaja usā”,

ni tãhotuyequinare yedohogu ahtaeru yũhũ, niahye Jesu.

Sijiyere Jesure sinituahye apequina

(Mt 9.14-17; Mr 2.18-22)

³³Sa yeye meheñequinagã masa Jesure ohõ saha ni sinituahye:

—Ñu buheyequina peye tahari Cohãcjũre ño peoye tehe, sijire. Sa yeye, tiquina peye tahari Cohãcjũre sinine. Fariseo buheyequina gũhũ tiquina yero saha yere. Tiquina sa yepegũta muhu buheyequina pehe ihya, sihnine. Sa ye Cohãcjũre ño peoye tehe, sijierare. ¿Duhse yeye sa yerajari tiquina? niahye tiquina Jesure.

³⁴Tiquina sa nigũ Jesu tiquiro tãhotuye mehna quiti dahre buhero taro tiquinare ohõ saha ni yũhtiahye:

—Ohõ saha ijire ti: Omoca dũhteropũ tiquina pijioriquina omoca dũhteriquiro mehna ijiye, siji masiedare. Sata yũhũ buheyequina gũhũ yũhũ mehna ijiye, siji masiedare. Yũhũ omoca dũhteriquiro yero saha ijiaja. Omoca dũhteriquiro bose deco tiquiro yegũ tiquiro mehna cjẽna ihyeyequina ijierare. ³⁵Yũhũ Pacũ Cohãcjũ yũhũre tiquiro nedi bato pũritare yũhũ buheyequina mehna ijisi yũhũ. Sa yeye ti pjerũta yũhũ buheyequina gũhũ sijieta, niahye Jesu.

³⁶Panopũ cjẽ buheye wahma buheye mehna tiquina buhe more duagũ ihãano ohõ saha ni nemoahye Jesu tiquinare queoye mehna buhero.

—Ne wahma suhtirore meheni cahserogã tũhrẽ ne, mũna suhtirore sere ohõno cahmedare. Mari sa sere ohõna wahma cahserore tũhrẽ cohãna niaja. Sa yero wahma cahsero mũna suhtiro mehna ihcãno saha bajuerare. ³⁷Sa yena ne ùhse co bisiye core wahiquireo cahsero ajuropũre mũna ajuropũre pose yero cahmedare. Sa yegũ ùhse co

bisiye pahmuñepũ mũna ajurore tũhrẽ cãhre. Sa tũhnũgũ ùhse co gũhũ, ajuro gũhũ cohãa wahare. ³⁸Sa yena ùhse co wahma core wahma ajuropũ pose yero cahmene. (Sata wahma buheye mũna buheye mehna buhe moredaro cahmene.) ³⁹Mũna core masa tiquina sihnidi bato, wahma core cahmedare tiquina. Ohõ saha nine masa. “Mũna co wahma co bui cjũnogã quehnoañe ijire”, nine masa, niahye Jesu tiquinare.

Judio masa tiquina sori decore trigore peheahye Jesu buheyequina

(Mt 12.1-8; Mr 2.23-28)

6 Ape deco saurũ ijigũ Jesu gũhũ trigo wesepũ esahye. Topũ esa, tiquiro buheyequina pehe trigo parorire pehe, ti pjerire sahquẽ site dijio, ti pjerire ihya cã wahaa wahahye tiquina. ²Tiquina sa yegũ ihãañe meheñequinagã fariseo masa tiquinare sinituahye:

—¿Duhse yena mũsa saurũ mari sori deco ijiepegũta Cohãcjũ tiquiro dutierari decore dahrajari mũsa? niahye fariseo masa.

Tiquina sa nigũ tũhoro Jesu tiquinare yũhtiahye “Yũhũ buheyequina yũhdũducaye niedare”, nino taro:

³⁻⁴—Davi mũnano tiquiro mehna cjẽna mehna ùjũna ahbaro, Cohãcjũ wũhũpũ sajã, Cohãcjũ ye pãre ihyahye. Sa ihyarõ tiquiro mehna cjẽna gũhũre ti pãre ihya dutiro ohoahye. Ti pãre pahia dihita ihyae tiahye. Cohãcjũ dutiye ti pãre apequinare ihya dutierare. ¿Davi mũnano tire tiquiro yerire buherari mũsa? (Ti pãre ihyarõ Cohãcjũre yũhdũducaro niedahye. Miare ahri pjerire ihyaye yũhũ buheyequina gũhũ Cohãcjũre yũhdũducaye niedare.) ⁵Yũhũ masũ Cohãcjũ ohorigũ ahri deco saurũ decore masa tiquina yeatire yahugũ ijigũ puhto ijiaja, niahye Jesu.

Omoca buhariquiro quti

(Mt 12.9-14; Mr 3.1-6)

⁶Ape deco saurú ijigū Jesu judio masa tiquina buheri wuhupū saajā saro, buheahye masare. Topū omoca poto pehe buhariquiro ijiahye. ⁷Meheñequinagā judio masare buheyequina, fariseo masa gūhū Jesure yahusā duamahye. “Saurú decore masunore dohatiyere yuhduoboaga Jesu”, ni, ihña nūnū yahusā duamahye tiquina Jesure. ⁸Jesu tiquina tuhutuyere masino, omoca buhariquirore ohō saha niahye:

—Wahcādūcaya. Ohōpū ahtaya, niahye tiquiro.

Tiquiro sa nidi bato omoca buhariquiro pehe wahcādūca, topū ducuahye. ⁹Sa yero Jesu tiquinare sinituahye.

—Musare sinitutja: ¿Saurú ijigū yabere ye dutiajari Cohācjū dutiye? ¿Quehnoañene yegū quehnoadajari? ¿Ñañene yegū pehere quehnoaboagari, musa tuhutugū? Saurú ijigū masunore masogū quehnoarīne. Saurú ijigū masunore wejēgū pehere quehnoaedare. Nārīne, niahye Jesu tiquinare.

¹⁰Sa nino Jesu tiquinare ijipihtiyequinare ihñadoqueo, omoca buhariquirore ohō saha niahye tja:

—Mūhū omocare siō potoya, niahye tiquiro.

Tiquiro sa nigūta omoca buhariquiro pehe siō potogūta, omoca quehnoa wahahye. ¹¹Tiquiro sa yegū ihñañe tiquina tiquiro mehna tutuaro usuahye.

—¿Dūhse yenatari mari ahriquirore? niahye tiquina basi.

Jesu tiquiro buheyequinare docere tiquiro ohoatiquinare bese docoahye

(Mt 10.1-4; Mr 3.13-19)

¹²Ti decorire Jesu cūnupū Cohācjūre sinino mujaa wahahye. Topū ijiro,

ñamine Cohācjū mehna yahuducu bohreahe. ¹³Bohrearopū tiquiro buheyequinare tiquiro cahapū pijioahye. Pijio tuhasa, tiquina mehna cjēnare doce waro tiquiro ohoatiquinare bese docoahye. Sa ye tiquiro cūriquina wame tiahye. ¹⁴⁻¹⁵Ahriquina ijiahye Jesu tiquiro bese docoriquina: Simo ijiahye. Simore Pedro ni pisuahye Jesu pehe. Simo bahuro Andre, Santiago, ņu, Felipe, Bartolomé, Mateo, Tomasu, Santiago ijiahye. Santiago pehe Alfeo macūno ijiahye. Sa ye Simo celote ya curua cjūno ijimediquiro, ¹⁶Juda Santiago bahuro, Juda Iscariote tiquina ijiahye tiquiro bese docoriquina. Juda Iscariote pehe Jesure ihña tuhtiyequinare ihñoatiquiro ijiahye.

Jesu peyequina masare buheahye

(Mt 4.23-25)

¹⁷Sa ye Jesu tiquiro buheyequina mehna cūnū buipū ijiriquina dijia taye, peyequina apequina tiquiro buheyequina mehna dijia wihidūca, quehnoari paapū ducuahye tiquina. Ijipihtiropū Judea yehpapū ijiye macari cjēna, Jerusalē cjēna, Tiro wame tiri maca cjēna, Sidō wame tiri maca cjēna pajiri ma dūhtū cahapū ijiye macari cjēna masa peyequina tiquiro cahapū wihiahye. ¹⁸Tiquina Jesu buheyere tuhoye tehe, tiquina dohatiyere cohāgū cahmeahye. Watīa cūoyequina gūhū tiquiro cahapū wihi, quehnoa wahahye. ¹⁹Jesu tiquiro tutuaye mehna yuhdūgū yeahye tiquinare. Sa ye tiquina ijipihtiyequina tiquirore dahra tuhuye ahtahye.

Jesu bucueye, bujua witiye gūhūre buheahye

(Mt 5.1-12)

²⁰Came Jesu tiquiro buheyequinare ihña, yahuahye:

—Musa pejesuona, (musa ñañene bujua witina), Cohãcjũ tiquiro puhtoro ijiropu wahanata musa. Sa yena musa bucuenata.

²¹ 'Yojopure musa ujua ahbana, yapina ijinata. Sa yena bucuenata.

'Yojopu utina ijina, came musa bujunata. Sa yena musa bucuenata.

²² 'Yuhu masu Cohãcjũ ohorigu ijiaja. Sa yena yeere yena musa ijiri buhiri apequina musare tiquina ihña tuhtiepegũta bucuena ijire musa. Musare tiquina cohãepẽgũta bucuenata. Musare tiquina ñano yahuducuepegũta "Ñana ijire", musare tiquina niepegũta musa pehe bucuenata. ²³ Musare tiquina sa yegũ ihñano uhmusepu musa esagũ pajiro quehnoano yerota Cohãcjũ musare. Sa yena tutuaro bucuena ijiya. Quehnoano jeripohna tina ijiya. Musare ihña tuhtiequina tiquina acaye panopu cjẽna sata ñano yeahye Cohãcjũ yere yahu muhtariquina gũhure.

²⁴ 'Sa yena musa yojopu peye suona ahri yehpapu musa quehnoano iji cã tuhasari. Sa yena ñano yuhduna ijinata musa.

²⁵ 'Yojopu yapina musa ujua ahbanata. Musa sa ijinata ñano yuhdunata.

'Yojopure musa bujurina ijina camerure utinata. Sa yena ñano yuhdunata.

²⁶ ' "Cohãcjũ yere yahu muhtana iji-aja", ni mehoñequinare "Quehnoañequina ijire", nimahye peyequina panopu cjẽna. Sa nimediquina tiquina acaye yojopu cjẽna gũhu sata "Quehnoañequina ijire", niboaga ihquẽquina musa mehna cjẽnare. Tiquina sa ninohrina musa ijina ñano yuhdunata musa gũhu, ni buheahye Jesu.

Musare ihña tuhtiequina tiquina ijiepegũta tiquina gũhure cahña

(Mt 5.38-48; 7.12)

²⁷ Sa yero ohõ saha ni buhe nemoahye Jesu:

—Yuhure tuho duanare, musareta nigu niaya. Musare ihña tuhtiequina tiquina ijiepegũta tiquina gũhure cahña. Musare ihña tuhtiequinare quehnoano yeya. ²⁸ Musare "Ñano yuhduahro", niñequina tiquina ijiepegũta quehnoa dutiya tiquinare. Musare ñano yeyequina tiquina ijiepegũta "Tiquina gũhu quehnoano ijiahro", ni sini basaya Cohãcjũre. ²⁹ Ihcãquiro musa wahsupure tiquiro quẽgũ, ape sie gũhure quẽ dutiya tiquirore. Musa bui cã suhtirore tiquiro ehmagũ musa camisa gũhure sa oho cãhña tiquirore. ³⁰ Musare sinidiquirore tiquiro sinino punota ohoya tiquirore. Musa yere tiquiro negũ tiquirore sinitueracãhña pari turi tire. ³¹ Apequina musare tiquina quehnoano yegũ cahmene musa. Tiquinare musa quehnoano yegũ cahmeno saha quehnoano yeya tiquina gũhure. Tiquina quehnoano yerapegũta musa pehe tiquinare quehnoano yeya.

³² 'Musare cahñequina dihitare musa cahĩgũ ti ne duhseati ijierare apequina pehere musa cahĩedagũ. Ñañequina gũhu sata yere. ³³ Sa yena musare quehnoano yeyequina dihitare musa quehnoano yegũ ti gũhu ne duhseati ijierare apequina pehere musa quehnoano yeragũ. Tire ñañequina gũhu yere. ³⁴ Sa yero "Yuhure wiaya tire", musa niñequina dihitare musa wasogũ ne ti duhseati ijierare. Ñañequina gũhu apequinare "Yuhure wiaya tire", tiquina niñequinare wasore. ³⁵ Sa yena musa pehe musare ihña tuhtiequina gũhure cahña. Sa yena tiquinare quehnoano yeya. Apequirore

wasona “Yũhũre ne wiasi ahriquiroy”, ni tũhotuenata tiquiroyre wasoya. Cohãcjũ pehe tiquiroyre “Quehnoare”, nieñequina gũhũre, ñañequina gũhũre quehnoano yere. Tiquiroy yero saha yeya musa gũhũ. Musa sa yegũ Cohãcjũ tutuaro quehnoano yerota musare. Sa yena Cohãcjũ tutua yũhdũariquiroy uhmũse cjũno pohna ijinata. ³⁶Mari Pacu uhmũse cjũno tiquiroy paja ihñariroy sahata musa gũhũ masare paja ihñaña, ni yahuahye Jesu.

Apequina gũhũre “Ñañequina ijire”, niedacãhña

(Mt 7.1-5)

³⁷Sa yero tiquinare yahu nemoahye:

—Apequinare “Ñañequina ijire”, niedacãhña musa. Musa sa niedagũ Cohãcjũ musa gũhũre “Ñana ijire”, nisi. Apequina musare tiquina ñano yerire tiquina ñano nidi gũhũre boya musa. Musa sa bogũ ihñano Cohãcjũ musa gũhũre musa ñañe yerire borota. ³⁸Apee borore cõna apequinare ohoya. Musa sa ohogũ Cohãcjũ gũhũ musare ohorota. Sa ohoro quehnoano queoro musare pajiro ohorota. Quehnoano wahpa yũhdũro ohorota. Apequinare musa ohoriro punota Cohãcjũ gũhũ musa gũhũre ohorota, niahye Jesu tiquinare.

³⁹Sa ni tuhasa Jesu quti mehna buhero ohõ saha ni yahu nemoahye:

—Caperi bajueyequina sehsharo tiquina basi quehnoano tuã cã masiedare. Sa tuã cãñe, tiquina pũaropũ bora maa sajàa wahaeta copepũ. (Sata Cohãcjũ yere masieñequina apequinare buhe masiedare. Sa ye tiquina ijipihtiyequina pecapũ wahaeta.)

⁴⁰Buheyequina tiquinare buheriquiroyre masi yũhdũdũcaerare. Sa ijiepetã ijipihtiyequina buheyequina tiquina quehnoano buhe pehori bato tiquinare

buheriquiroy yero saha ijietã, niahye Jesu.

⁴¹Sa ni tuhasa apeye quti mehna yahu nemoahye:

—Mari queoye mehna buhegũ ohõ saha yena ijire musa: Musa acayũro tiquiroy capeapũ meheni pohcarogã tiquiroyre bora sajàgũ ti pohcarogãre quehnoano ihñare musa. Musa ya capeapũ pajiri pjĩ ijiepegũta ti pjine ne ihñedare musa. Meheni pohcarogãre musa ihñano saha musa acayũro tiquiroy ñano yeye pehere quehnoano ihñare musa. Musa basi musa ñañene tutuaro yepenata tire masiedare musa pajiri pjine musa ihñedaro sahata. ¿Dũhse yena sa yeajari musa? ⁴²Ohõ saha nina yero saha ijire musa: “Yũhũ acayũ, ñañene yegu nine muhũ. Sa yegu tire duhuya”, nina yero saha ijire musa. Sa nina ijiepenata pajiro ñañene yere musa pehe. ¿Dũhse yena musa ñañene yepenata tire masiedajari musa? Masa ihñono dihita quehnoano iji mehona ijire musa sa yena. Pajiri pjine musa capeapũ ijiri pjine musa ne muhtaboriro saha musa ñano yeye pehere duhu muhtaña. Musa sa yeri bato musa acayũro tiquiroy ñano yeyere duhugũ ye masiboaga meheni pohcarogãre musa neboriro saha, ni buheahye Jesu.

Masa yahuducuyere tuhona tiquina ijie tiyere masiaja mari

(Mt 7.17-20; 12.34-35)

⁴³Sa yero queoye mehna buhero ohõ saha ni yahu nemoahye tiquinare:

—Quehnoadũ yucũgũ ñañene dũca tierare. Sa yero ñadũ quehnoañene dũca tierare. ⁴⁴Yucũ dũcare masina tũre masine musa. Potagũ higuera pacare dũca tierare. Sa yero potã bucũgũ uhsẽ tõhorine dũca tierare. ⁴⁵Sata ijire masa gũhũ. Quehnoariquiroy tiquiroy tũhotuyepũ quehnoañe ijire. Sa yero tiquiroy quehnoañene yere quehnoadũ

quehnoañene dũca tiro saha. Ñariquiroy tiquiroy tũhotuyepũre ñañe ijire. Sa yero tiquiroy ñañene yere ñadũ ñañene dũca tiro saha. Mari tũhotuyepũ marine ti ijiro saha yahuducujaja mari, ni yahuahye Jesu.

**Pua wũhu yeyequina
quitire yahuahye Jesu**

(Mt 7.24-27)

⁴⁶ Sa yero tiquinare yahu nemoahye:

—Mũsa yũhure “Pũhto”, nine. Sa niepenata yũhu dutiye pehere yerare mũsa. ¿Dũhse ijiro boro sa yerajari? ⁴⁷ Ijipihtiyequina yũhure cahmeñequina yũhu yahuyere tũhore. Sa yeye yũhu dutiyere yũhdũdũcaerare. Ohõ sahata ijire yũhure yũhdũdũcaeyequina: ⁴⁸ Wũhu dahreriquiroy yero saha ijire tiquina. Tiquiroy uhcũañe coperire sehe, wũhure doco dũcare. Ti wũhu quehnoano tiquiroy yeri wũhu ijiro dia minigũ tutuaro aco tutuepegũta ti wũhu quehnoano tojoare. ⁴⁹ Sa yeye yũhu dutiyere tũhoepeta yũhdũdũcayequina pehe wũhure quehnoano yerariquiroy yero saha ijire. Ti wũhure buigã doco, quehnoano ye dũcaerare. Tiquiroy sa yeri wũhu ijiro dia minigũ aco tutuagũ duita ti wũhu cohõ burũa wahare. Sa yero ti wũhu tutuaro bora quehea wahare, ni ahye Jesu.

Surara pũhtoro cahacjũnore tiquiroy dohatigũ Jesu yũhdũoahye tiquiroy

(Mt 8.5-13)

7 Ti quitire masare yahu tuhasa Jesu gũhu Capernaupũ esahye. ² Topũ ijiriquiroy cien surara pũhtoro tiquiroy cahacjũnore tutuaro cahĩahye. Tiquiroy cahacjũno pehe tutuaro dohatiro, yariaropũ niahye. ³ Sa yero Jesu yeyere tũhoro, judio masa bũcũnare Jesu cahapũ ohoahye pũhtoro pehe.

—Dohatiriquiroy yũhdũogũ ahtaya, ni, yahu dutiro bũcũnare ohoahye pũhtoro.

⁴ Tiquina Jesu cahapũ esa, ohõ saha ni tutuaro mehna yahuahye tiquiroy:

—Surara pũhtoro usãre ohori. Tiquiroy cahacjũnore dohatiriquiroy yũhdũgũ cahmedi tiquiroy. Tiquiroy pũhtoro pehe quehnoariquiroy ijire. Tiquiroy sa ijigũ yedohoya tiquiroy. ⁵ Mari ya maca cjẽnare tiquiroy cahĩne. Sa yero tiquiroy usã buheri wũhure tiquina yeri wapare wapa yere, niahye bũcũna Jesure.

⁶ Tiquina sa ni yahugũ tũhoro Jesu pehe tiquina mehna wahahye. Surara pũhtoro ya wũhu cahagãpũ tiquiroy esagũ pũhtoro pehe tiquiroy mehna cjẽnare Jesure ohõ saha ni yahu dutiro ohoahye:

—Pũhto, quehnoanota. Ahtaeracãhña. Quehnoogũ ijieraja yũhu. Ya wũhũpũ mũhure sajã ta dutibogũ ijieraja yũhu. ⁷ Sa yegũ mũhu cahapũ wahaeraja. Yũhu sa ijipegũta mũhu masĩne mehna yũhdũ dutiya mũhu tiquiroy. Mũhu sa yegũ yũhu cahacjũno quehnoanota. ⁸ Yũhure yũhu bui ijiyequina apequina pũhtoa dutire. Sa yegũ yũhu gũhu surarare dutiaja. Ihcãquiroy “Wahaya”, yũhu nigũ tiquiroy wahare. Apequiroy “Ahtaya”, yũhu nigũ tiquiroy ahtare. Yũhu cahacjũnore “Ahrire yeya”, yũhu nigũ tire tiquiroy yere. Mũhu gũhu dutigũta ijire. Sa yero mũhu dutiro saha tiquiroy dohatiriquiroy yũhdũrota, ni yahu dutiahye surara pũhtoro.

⁹ Tiquiroy sa nigũ tũho maria waharo, peyequina masa tiquiroy mehna ijiyequinare majaredũca sa, yahuahye:

—Mũsare niita niaja. Tiquiroy surara pũhtoro Israe masũno ijieriquiroy Cohãcjũre tutuaro wacũ tutuare. Tiquiroy cahacjũnore yũhu yũhdũgũ yeatire masi tuhasare. Israe masare ne ahriquiroy yero saha ijiyequinare ihñeda tirũ yũhu, ni ahye Jesu.

¹⁰Tiquiro sa nidi bato surara puhtoro Jesu cahapũ tiquiro ohoriquina tiquina puhtoro ya wuhapũ tojoaa wahahye. Tojoa sa dohatiriquiro yuhdũriquiropũre ihñahye tiquina.

**Jesu wape wihoro
macunore masoahye**

¹¹Came cjũnogã Nai wame tiri macapũ Jesu tiquiro buheyequina mehna peyequina masa mehna wahahye. ¹²Ti macare sajãri sopecaha cahapũ tiquiro esagũ yariariquiore masa ne wijia taye niahye. Yariariquiropacoro wape wihoro ijiahye. Ihcãquirola ijiriquiro yariahye. Sa ye to cjẽna masa peyequina ticoro mehna wahahye. ¹³Tiquina sa wahagũ ihñano Jesu ticorore paja ihñahye.

—Utieracãhña, niahye Jesu ticorore.

¹⁴Sa nino yariariquiropacoro tiquiro masa putire ña peoahye. Tiquiro sa ña peogũ ihñañe ti putire wũayequina pehe esadũcãhye.

—Macũ, yũhũ mũhũre ohõ saha nijaja. Wahcã nujuña, niahye Jesu.

¹⁵Tiquiro sa nidi bato yariariquiropacoro mũnãno wahcã nuju, yahuducãhye. Sa yero Jesu tiquirore tiquiro pacorore wiahye. ¹⁶Tiquiro sa yegũ ihñañe tiquina ijipihtiyequina cuea wahahye. Sa yeye tiquina Cohãcjũre ño peo, ohõ saha niahye:

—Cohãcjũ yere yahu mũhtariquiropacoro masi yuhdũriquiropacoro yojopũ pũritare mari watoa ijire, niahye tiquina.

—Cohãcjũ marine tiquiro yequinare yedohoro wihi tuhasare, niahye apequina.

¹⁷Sa yeye ijipihtiyequina Judea yehpa cjẽnare ti yehpa dũhtũ cahapũ ijiye macari cjẽnare Jesu yerire masa yahu site pehoahye.

**Ñu wame yeriquiro
tiquiro buheyequinare
Jesure sinitu dutiahye**

(Mt 11.2-19)

¹⁸Sa ye Jesu yerire ihñañe Ñure yahuahye tiquiro buheyequina. Sa tiquina yahugũ tũhoro pũarore tiquiro cahapũ pijio, ¹⁹Jesure sinitu dutiro ohoahye Ñu. Ohõ saha ni sinitu dutiahye:

—¿Ñu “Yũhũ bato apequiropacoro ahtarota”, tiquiro nidigũta ijijari mũhũ? ¿Tiquiro nidigũ mũhũ ijieragũ apequiropacoro cohtenatari usã? ni sinitu dutiahye Ñu pũaro tiquiro buheyequinare.

²⁰Sa ye tiquina Jesu cahapũ esa, sinituahye tiquirore:

—Ñu wame yeriquiro mũhũre sinitu dutiro ohori usãre. ¿Ñu “Yũhũ bato apequiropacoro ahtarota”, tiquiro nidigũta ijijari mũhũ? ¿Tiquiro nidigũ mũhũ ijieragũ apequiropacoro cohtenatari usã? ni sinituahye tiquina Jesure.

²¹Ti pjeta peyequina dohatiyequinare, watia cũoyequinare, caperi bajueyequinare yuhdũgũ yehye Jesu. ²²Sa yero Ñu ohoriquinare Jesu yũhtiahye:

—Yojopũre mũsa ihñarire mũsa tũhorire Ñure yahuna wahaya: Ohõ saha niña: “Caperi bajueyequina ihñare. Tini masieñequina tinine. Cami ahbariquina quehnoa wahare. Tũhoerariquina tũhoa wahare. Yariariquina masaa wahare. Tiquina ijipihtiyequinare quehnoa wahagũ yei yũhũ. Sa yegũ pejecũoyequinare quehnoañe buheyere yahujaja. ²³Yũhũre tũhoriquiro ‘Poto ijire’, nidiquiro tiquiro bucueriquiro ijire”, Ñure ni yahuna wahaya, niahye Jesu.

²⁴Ñu buheyequina tiquina wahari bato Jesu pehe Ñu tiquiro ijiye tiyere yahu dũcãhye peyequina masare:

—Masa marienopũ esana, taare wihnono wẽdoqueo mũjagũ ihñana

eserari m̄sa. ²⁵“Quehnoañe suhti sañariquiore ihñana wahauhna”, niedari m̄sa masa marienop̄ wahana. Quehnoañe suhti sañañequina wapa bujyere cuoyequina puhtoa ye wuhusep̄ ijire. Masa marienop̄ ijierare. ²⁶Masa marienop̄ esana Cohãcjũ yere yahu muhtariquiore ihñana esari m̄sa. Ijirota ijire. Ñu Cohãcjũ yere yahu muhtariquiore ijire. Apequina Cohãcjũ yere yahu muhtariquina yuhduoro ijiriquiro ijire tiquiore pehe. ²⁷Panop̄ Cohãcjũ yere tiquina ojoari p̄p̄ Ñure ohõ saha ni yahuahye:

Mari Pacu tiquiore macunore ohõ saha ni-ahye: “Muh̄ pano muh̄re yahuyu-atiquiore ohogutja. Muh̄ wihiatore quehnoyurota tiquiore”, niahye Cohãcjũ, ni ojoahye panop̄re Ñure.

²⁸Musare poto niita niaja. Apequina masa ijipihtiyequina bui ijire Ñu. Ahri decorip̄re tiquiore sa ijiepegũta Cohãcjũ tiquiore puhtoro ijirop̄re ijipihtiyequina docap̄ ijiriquiro p̄rita Ñu bui ijire, niahye Jesu masare.

²⁹Tiquiro sa nigũ tuhoye ijipihtiyequina masa, wapa ne cohteyequina mehna Ñu tiquiore wame yenohriquina ijiye ohõ saha ni tuhoutuahye Cohãcjũre. “Cohãcjũ poto yeriquiro ijire”, ni tuhoutuahye tiquina. ³⁰Fariseo masa pehe, judio masare buheyequina gũh̄ Ñu wame yenohriquina iji duerahye. Sa ye tiquinare Cohãcjũ yequina tiquiore ye dugũ cahmedahye tiquina.

³¹Sa yero Jesu pari turi yahuahye:

—¿Yojop̄ cjẽna masa disequina yero saha ijiajari tiquina, m̄sa tuhutugũ?
³²Tiquina macanagã yero saha ijire. Apequina tiquina cahmeno saha yeragũ bucuere tiquinagã. Doeri cjẽ duarop̄ apepe dujiye, ohõ saha ni pisuducure tiquinagã basi: “M̄sa basatire usã putipemi. ¿Duh̄sena m̄sa basaerari usã putipegũ? Usã tutuaro ñehe quea utipe,

sañuducumi. ¿M̄sa pehe duhsena usã mehna utiperari?” niducuyequina yero sahata ijire yojop̄ cjẽna gũh̄. Yojop̄ cjẽna tiquina cahmeno saha usã yeragũ ihñane bucuere tiquina gũh̄. ³³Ñu wame yeriquiro Cohãcjũre ño peoro taro sijiro, vinore sihniedare. Tiquiro sa sihniedagũ ihñana, “Watĩnore cuore. Sa yero tuho masieniquiro ijire”, nimesi m̄sa tiquiore. ³⁴Yuh̄ masu Cohãcjũ ohorigũ ijigũ, yuh̄ ihya sihni-aja. Yuh̄ sa yegũ ihñana ohõ saha nine m̄sa yuh̄ pehere. “Ihñaña. Ahriquiore pajiro ihyariquiore, queheriquiro ijire. Wapa ne cohteyequina, ñano yeyequina gũh̄ tiquina mehna piti tiriquiro ijire tiquiore”, nine m̄sa yuh̄re. Sa nina macanagã yero saha yahuducuna ijire m̄sa. M̄sa cahmeno saha usã yeragũ bucuere m̄sa. ³⁵Sa masiedapenata usã ye ihñorire ihñana, Cohãcjũ yere usã masigũ masinata m̄sa, ni yahuahye Jesu.

Simo wame tiriquiro fariseo masuno ya wuhup̄ ijiahye Jesu

³⁶Fariseo masuno tiquiore ya wuhup̄ ihya dutiro pijiahye Jesure. Tiquiro sa pijigũ Jesu tiquiore ya wuhup̄ esa, tiquina ihyari mesa cahap̄ nuju sahye. ³⁷⁻³⁸Ti macap̄re ñañe yericoro ijiahye. Jesu fariseo masuno ya wuhup̄ tiquiore dujigũ ticoro tuhohaye. Sa tuhoro alabastro mehna yeriare ehme sitiye pose tiriare ne cãhta, Jesu behero pehep̄ wihiduca, utiahye. Sa utiro, Jesu dahpocãrine ticoro yahco co mehna weo, ticoro poari mehna wuohaye. Tiquiro dahpocãri wuagũ ihñano ticoro tiquiore dahpocãrine ihmi, ehme sitiye mehna pio peohaye. ³⁹Ticoro sa yegũ ihñano fariseo masuno Jesure pijiriquiro tiquiore basi ohõ saha ni tuhutumahye: “Ahricoro tiquiore ñehe tuhuricoro ñañe yericoro ijire. Ahriquiore Jesu Cohãcjũ yere yahu muhtariquiore ijiro tire masi-

boaga”, ni, tūhotumahye. ⁴⁰Tiquiro sa ni tūhotuyere masino Jesu yahuahye tiquirore:

—Simo, yojopu pūritare mūhure yahu duaja, niahye Jesu.

—¿Buhegu, yūhure dūhse ni yahu duajari mūhu? niahye Simo.

⁴¹Tiquiro sa nigū Jesu ohō saha ni queoye mehna buhe yahuahye:

—Puhtorore puaro wapamoñequina ijiahye. Ihcāquiro wapamoriquiro quinientos niñeru cjoerire wapamoahye. Apequiro pehe cincuenta niñeru cjoerire wapamoahye. ⁴²Sa ye tire tiquina wapa ye masiedagū ihñano tiquiro tiquina wapamoñene wapa ye dutierahye. ¿Yojopu pūritare diquiro pehe wapamoriquiro tiquiro puhtorore cahī yūhdūrotari? ni sinituahye Jesu.

⁴³Simo yūhtiahye:

—Ōbah, pajiro wapamoriquiro mehenogā wapamoriquiro yūhdūoro tiquiro puhtorore cahīboaga, niahye Simo.

—Poto yūhtiri mūhu yūhure, niahye Jesu.

⁴⁴Sa ni tuhasa tiquirore pio peoriorore majare ihña, Jesu Simore yahu nemoahye:

—Ahricorore ihñaña mūhu. Mūhu ya wūhūpu yūhu sajā wihiri bato yūhu dahpocārine coseati acore yūhure ohoerari mūhu. Ahricoro pehe ticoro yahco co mehna yūhu dahpocārine weo, ticoro poari mehna wūori yūhure. ⁴⁵Mūhu pehe yūhure piti ca ihmiedari. Ahricoro pehe ohōpu yūhu dujiro puno yūhu dahpocārine ihmidi. ⁴⁶Mūhu pehe yūhu dapure ūhse mehna pio peoerari. Ticoro pehe yūhu dahpocārine ehme sitiye mehna pio peori. ⁴⁷Sa nigū mūhureta yuhugūta niaja. Ahricoro ticoro ñañe yeye pe yūhdūaye ijire. Sa ijieperota ticoro tutuaro cahīne yūhure. Sa yegu ticoro ñañene bou. Sa yeye tiquina ñañene mehenogā yūhu bonohriquina

mehenogā cahīne yūhure, niahye Jesu Simore.

⁴⁸Sa ni tuhasa tiquiro ticorore yahuahye:

—Yojopu pūritare mūhu ñañe yeyere bou, niahye Jesu.

⁴⁹Tiquiro sa nigū tūhoye Jesu mehna dujiyequina tiquina basi ohō saha ni yahuducuahye:

—Ahriquiro potota ñañe yeyere boriquiro ijire. ¿Dūhse ijiriquiro boro ijiajari ahriquiro ñañene boriquiro? niahye tiquina basi.

⁵⁰Sa yero Jesu numiore ohō saha ni yahuahye:

—Yūhure mūhu wacū tutuagū mūhure pecapu wahaborigore yūhdūoaja. Cuero marieno mūhu ya wūhūpu tojoaa wahaya, niahye Jesu ticorore.

Numia Jesure yedohoahye

8 Came bujūye macaripu, daye macarigāpu gūhure esa, Cohācjū tiquiro puhtoro ijiyere quehnoañe buheyere yahuahye Jesu. Doce tiquiro buheyequina pehe tiquiro mehna ijiahye. ²Sa ye numia gūhu watīa cūomediquina numia, dohatimediquina numia Jesu quehnoa wahagū tiquiro yeriquina numia tiquiro mehna tiniahye. “María”, tiquina nidicorore “Magdalena”, ni pisue tiahye ticorore. Ticorore siete watīare Jesu cohāhye to pano. Sa yero ticoro gūhu Jesu mehna tiniahye. ³Chuza wame tiriquiro Herodere yedohomediquiro namono Juana gūhu Jesu mehna tiniahye. Susana wame tiricoro gūhu apequina numia mehna peyequina tiquina cūoye mehna Jesu gūhure yedohoahye.

Jesu oteriquiro quitire yahuahye

(Mt 13.1-9; Mr 4.1-9)

⁴Sa ye peye macari cjēna Jesu cahapu cahmecoahye. Tiquina sa cahmecoari bato Jesu tiquiro tūhotuye mehna

queoye mehna tiquinare yahuahye buhero taro:

⁵—Oteriquiro otero wahahye. Tiquiro sa otegū apeye pjeri maha dūhtu cahapū bora quehe sahye. Sa yeye ti pjerire masa cūhta diho cūahye. Sa ye minicjua pari pehe ti pjerire ihyahye. ⁶Sa ye apeye pjeri utā paca watoa bora quehe sahye. Topū yehpapū aco mariedahye. Sa ye ti pjeri pihni wahcādūca űaia wahahye. ⁷Apeye pjeri taa watoa bora quehe sahye. Taa pehe ti oteye mehna pihniahye. Taa pehe dia yūhdūa waha, oteyere wejēahye. ⁸Apeye pjeri quehnoari yehpapū bora quehe sahye. Quehnoano pihni, dūca tiahye. Sa ye peye dūca tiahye, niahye Jesu.

Sa ni tuhasa ohō saha tutuaro ni nemoahye:

—Ahrire quehnoano tūhoya masa, ni ahye tiquiro.

Jesu queoye mehna tiquiro buherire yahuahye

(Mt 13.10-17; Mr 4.10-12)

⁹Came tiquiro buheyequina ti queoyere masi duaye, Jesure sinituahye: —¿Ahri queoye mehna dūhse ni yahugū nijari mūhū? ni, sinituahye tiquina.

¹⁰Tiquina sa nigū Jesu yūhtiahye:

—Cohācjū masa pūhtoro tiquiro ijiyere panopū apequina tiquina masiedarire musare masigū yerota Cohācjū. Apequina pehere sa yerare tiquiro. Tiquinare queoye mehnata buheitja. Yūhū sa yegū tiquina yūhū buheyere tūhoepeta masisi, niahye Jesu tiquiro buheyequinare.

Jesu oteriquiro quitire yahu pehoahye

(Mt 13.18-23; Mr 4.13-20)

¹¹Sa ni tuhasa tiquinare yahu nemoahye:

—Ohō saha ni yahure ahri quti: Oteye pjeri quehnoañe buheye yero saha ijire. ¹²Sa ye maha dūhtu cahapū borari pjeri pehe quehnoañe buheye yero saha ijire. Sa yero masa quehnoañe buheyere tiquina tūhogū ihñano watīno pehe ahta, ti buheyere masi dutierare masare. Minicjua ti pjerire tiquina dote nediro saha yere. Tiquiro sa yeragū tiquina Cohācjūre wacū tutuaboa. Tiquina sa wacū tutuagū ihñano Cohācjū pehe tiquinare pecapū wahaboriquinare yūhdūoboa. ¹³Utā pjeri watoa borari pjeri quehnoañe buheye yero saha ijire. Sa ye masa quehnoañe buheyere tūho, bucueye mehna tire tūho nene. Sa tūho nepeta utā watoa ijiye cju nūhcori marieñe cju yero saha ahriquina masa gūhū tutuerare. Sa tutueraye yeequina tiquina ijiri buhiri apequina tiquinare űano yegū ihñañe yee pehere duhu cāhre. ¹⁴Sa ye taa watoa borari pjeri quehnoañe buheye yero saha ijire. Sa ye masa quehnoañe buheyere tūhoepeta, ahri yehpa cjēne pajiro bujua witi tūhotu, niñeru pehere cahī, ahri yehpa cjēne bucuere tiquina. Sa yeye ti pehe quehnoañe buheyere cahmotagū, masa pehe quehnoañe pehere yerare. ¹⁵Sa ye quehnoari yehpapū borari pjeri quehnoañe buheye yero saha ijire. Sa yeye masa quehnoañe buheyere tūhoye, quehnoano mehna ti buheyere yūhdūdūcaerare. Sa ye yucūgū dūca tiro saha quehnoañe buheyere tūhoyequina pehe Cohācjū tiquiro cahmeno saha quehnoañene yere, niahye Jesu.

Jesu sihāria quitire buheahye

(Mr 4.21-25)

¹⁶Sa ni tuhasa apeye queoye mehna buheahye tiquiro:

—Ne sihāriare dihi sutu docapū cūedare masa. Sa ye tiare cumuno docapū cūedare. Ūhmūanopū tiare duhu peore wūhūpū sajā tayequina

tiquina quehnoano ihña sajã tato saha. ¹⁷Ijipihtiye tiquina masiedarire came masa masieta. Sihãria buhriogũ mari ihña masino saha panopũ tiquina masiedarire masieta masa.

¹⁸Sa yena musa tuhona quehnoano tuho nũnũña. Quehnoano tuho nũnũrikiro, quehnoano masinota. Tuho nũnũdikiro “Mehenogã tuhoaja”, tiqiro niepegũta ti pehere boaa waha, niahye Jesu.

Jesu acaye tiqirore pijiahye

(Mt 12.46-50; Mr 3.31-35)

¹⁹Came Jesu bahana tiquina pacoro mehna tiqiro cahapũ wahaye nimahye. Masa peyequina ijigũ tiqiro cahapũ eserahye. ²⁰Sa yero ihcãkiro Jesure yahuahye:

—Mũhu paco mũhu bahana mehna sopecahapũ ducuri. Mũhũre ihñañe taye niñohti, niahye tiqiro Jesure.

²¹Tiqiro sa nigũ Jesu ohõ saha ni yahuahye ijipihtiyequinare:

—Cohãcjũ buheyere tuhoyequina, tire yũhdũdũcaeyequina tiquinata yũhu paco yũhu bahana yero saha ijire, niahye Jesu tiquinare.

Jesu wihnonore yũsũ dutiahye

(Mt 8.23-27; Mr 4.35-41)

²²Ape deco Jesu tiqiro buheyequina mehna yucũsapũ sajãhye.

—Isa, pehãũhna, ni, tiquina ijipihtiyequina tia mehna ditarapũ pehãa wahahye.

²³Sa pehãno carĩa wahahye Jesu. Tiquina sa pehãducuropũ tutuaro wihnono wẽahye. Wihnono wẽgũ bũjũye pahcõri wahcã, tiquinare mio cãmahye. Sa waharo miono cua yũhdũahye tiquinare. ²⁴Sa wahagũ ihñañe, acũaa waha, Jesu cahapũ waha, tiqirore wahcõahye.

—Buhegu, mari yariana tana niajú, niahye tiquina.

Tiqina sa nigũ Jesu pehe wahcã, wihnonore,

—To punota wẽ duhuya, niahye.

Sa nino pahcõri gũhũre,

—Yũsua wahaya, niahye.

Tiqiro sa nigũta wihnono yũhdũa wahahye. Sa ye pahcõri gũhũ yũsũ dijiaa wahahye. ²⁵Sa wahari bato Jesu tiquinare ohõ saha niahye:

—¿Musa yũhũre wacũ tutuerajari? niahye tiqiro.

Tiqiro sa nigũ tiquina pehe cue, acũaa waha, tiquina basi ohõ saha ni yahuducuahye:

—¿Yohou, dũhse ijirikiro boro masũno ijiajari ahrikiro? Ahri wihnono, pahcõri gũhũ tiqiro dutigũ yũhdũdũcaerare tiqirore, niahye tiquina basi.

Watĩa cõorikirore yũhdũoahye Jesu

(Mt 8.28-34; Mr 5.1-20)

²⁶Sa ye tiquina ape sie pahrẽpũ Gerasa cjẽna ya yehpapũ pehã sahye. Ti yehpa Galilea yehpa poto ijiahye.

²⁷Topũ Jesu tiqiro maja sadũcagũ waro to cjãno watĩa cõorikiro tiqiro cahapũ ahtahye. Tiqiro yoari pje suhti marienikiro ijiro, tiqiro ya wũhũpũre ne ijierahye. Sa yero masa coperi utãpũ tiquina seheri coperi cahapũ ijie tiahye tiqiro. ²⁸⁻²⁹Sa ye peye tahari watĩa tiqirore ñeheahye. Sa yero tiqiro peresupũ ijigũ tiqiro omocarine, dahpocãrine come dari mehna dũhterikiro ijieperota, ti darire tuã sure mũjahye. Sa ye watĩa pehe tiqirore masa marienopũ ne cã mũjae tiahye. Sa yero tiqiro Jesure ihñaodoqueo, tutuaro saũuducu, Jesu cahapũ dũsepe curi mehna quehe sahye. Tiqiro sa yegũ ihñano Jesu pehe tiqirore dutiahye:

—Ahrikiro mehna ijieracãhña. Wahaya watĩa, niahye.

Tiquiro sa nigū tūhoro watīa cuoriquiro tutuaro sañuducu, sinituahye Jesure:

—¿Jesu, ūhmuse cjū Cohācjū macu yabere yei tūu niajari mūhū yūhure? Yūhure ñano yeracāhña, niahye watīa cuoriquiro.

³⁰Tiquiro sa nigū Jesu pehe sinituahye tiquirore:

—¿Dūhse wame tiajari mūhū? niahye.

Peyequina watīa tiquiro mehna iji-ahye. Sa yero ohō saha niahye tiquinare cuoriquiro.

—Watīa peyequina wame tiaja ūsā, ni, yūhtiahye watīa cuoriquiro.

³¹—Ūhcūāri copepū ūsāre waha dutieracāhña, ni, tutuaro siniahye watīa pehe.

³²Ti pjere topū cūnū dahpotopū yesea peyequina ihyaye niahye. Tiquina topū ihyagū ihñāñe watīa ohō saha ni siniahye Jesure:

—Sisequina yesea cahapū waha dutiya ūsāre. Tiquina mehna iji dutiya ūsāre, ni, siniahye watīa.

Tiquina sa nigū tūhoro Jesu tiquinare yesea cahapū waha dutiahye. ³³Tiquiro sa waha dutiri bato watīa pehe masuno mehna ijimediquina waha, yesea cahapū esahye. Tiquina cahapū tiquina esari bato yesea pehe pari cjūpū oma maa buhaa waha, ditarapū bora ñojoa mini yaria phtia wahahye.

³⁴Yeseare cohteyequina yesea tiquina sa minigū ihñāñe, cue, oma cāa wahahye. Sa oma cā macapū esa, ti maca cjēnare, ihquē wūhuse ijiro cjēna gūhure tiquina ihñarire yahu siteahye. ³⁵Tiquina sa yahu siteri bato masa ihñāñe wahahye. Sa ye Jesu cahapū esa, watīa cuomediquirore suhti sañariquiro tūho masiniquiro tiquiro dujigū ihñahye tiquina. Tiquina ijipihtiyere ihñāñe, tiquina cue niahye.

³⁶Watīa cuomediquiro tiquiro quehnoa waharire ihñāñequina apequinare

tiquina ihñarire yahuahye. ³⁷Ti pjeta Gerasa yehpa cjēna peyequina Jesure tutuaro cueye, tiquirore waha dutiahye. Tiquina sa waha dutigū Jesu yucusapū sajā, waharo taro niahye. ³⁸Watīa cuomediquiro Jesu wahato pano tutuaro sinimahye tiquirore:

—Mūhū mehna waha duaja, ni sinimahye.

³⁹Tiquiro sa nigūta Jesu tiquirore yūhtiahye:

—Mūhū ya macapū wahaya. Sa wahagū Cohācjū mūhure tiquiro yerire yahuya apequinare, niahye Jesu.

Tiquiro sa nidi bato waha, tiquiro ya macapū esaro, masuno pehe Jesu tiquirore yerire ijipihtiyequina tiquiro ya maca cjēnare yahuahye.

Jairo maconore yūhduoro, dii mūna wihoro dohatiducuricoro gūhure yūhduoahye Jesu

(Mt 9.18-26; Mr 5.21-43)

⁴⁰Ape sie pahrēpū Jesu pari turi tiquiro pehā sagū ihñāñe masa peyequina tiquirore cohte, bucueye mehna piti cahye tiquirore. ⁴¹⁻⁴²Topū judio masa buheri wūhū cohteriquiro Jairo wame tiriquiro Jesu cahapū esa, tiquiro dahpocāri cahapū dusepe curi mehna quehe sahye tiquirore ño peoro. Tiquiro macono yariaro niahye. Ticoro ihcācorota ijiricoro doce cūhmari cuoricoro ijiahye. Sa yero tiquiro ya wūhūpū Jesure piji cāhye. “Au”, ni, tiquiro mehna wahahye Jesu gūhū.

Mahapū tiquina sa wahagū pe yūhduayequina masa ijiye, wahpa yūhduahye. ⁴³Sa yero apecoro numino doce cūhmari waro dii mūna dohatiducuricoro topū ijiahye. To pano duturuare ijipihtiyē ticoro ye niñeru mehna wapa yemahye ticoro aco ye dutiro. Tiquina sa aco yepēgūta mūnanota ijiducu cāhye ticoro. ⁴⁴Sa yero ticoro Jesu behero pehepū

ahta, tiqiro suhtiro sohtoare ticoro ñehe tuhugūta ticoro dohatiye pihitia wahahye. ⁴⁵Ticoro sa ñehe tuhugū tuhoturo Jesu sinituahye.

—¿Noa yuhū suhtirore ñehe tuhujari? niahye tiqiro.

Ijipihtiequina “Ñehe tuhuerū”, niahye. Sa ye Pedro gūhū ohō saha niahye:

—Buhegū, bihsarine. Sa yeye masa peyequina mūhure ñehe tūhure. ¿Dūh-segū sa ni sinituajari mūhū? niahye tiquina Jesure.

⁴⁶Tiquina sa nigū Jesu yuhtiahye:

—Mianogāta yuhū yuhdugū yei ihcācorore. Sa yegū yuhure ticoro ñehe tuhugū masiaja, niahye tiqiro.

⁴⁷Tiqiro sa nigū tuhoro ticoro duhti masiedaro, nanarericoro Jesu cahapū dūsepe curi mehna quehe sahye tiqirore ño peoro. Sa ye ijipihtiequina masa tiquina tuhoropū ticoro dohatiyere, Jesure ticoro ñehe tuhurire, ticoro quehnoa waharire yahuahye ticoro. ⁴⁸Ticoro yahu tuhasagū Jesu ticorore yahuahye:

—Maco, yuhure mūhū wacū tutuaye mehna quehnoago tojoare yojopure. Bucueye mehna wahaya, niahye ticorore.

⁴⁹Tiqiro sa nini watoa Jairo ya wuhupū ijiriqiro yahuro wihiahye:

—Mūhū macogā yariaa wahari. Sa yegū buheriqirore piji cāhtaeracāhña, niahye tiqiro.

⁵⁰Tiqiro sa nigū tuhoro, Jairore ohō saha ni yahuahye Jesu:

—Bujua witi tuhotueracāhña. Yuhure wacū tutuaya. Ti dihitare yeya. Mūhū sa yegū ticorogā masaa waharota, niahye Jesu.

⁵¹Sa ni tuhasa tiqiro ya wuhupū esa, Pedro, Ñu, Santiago, dohatiricoro pacusumua topequinata ne sajāhye. Apequina pehere Jesu sajā dutierahye.

⁵²Topū ijipihtiequina masa tiquina ñehe quea utiri watoa sajā sahye Jesu.

—Utieracāhña. Ticorogā yariere. Carīno nine, niahye tiqiro.

⁵³Tiqiro sa nigū tuhoye tiquina pehe ticoro yariaricoro ijigū masiñe, Jesure bujua hye. “Sa ni maca cāno nine”, ni bujua hye. ⁵⁴Sa yero Jesu ticorogā omocare ñehe, pisuahye:

—Mehenicorogā wahcāña, niahye.

⁵⁵Tiqiro sa nigūta yariaricoro masaa waha, wahcādūca sahye ticorogā. Ticoro wahcādūcari bato Jesu ticorore ihyayere oho dutiahye. ⁵⁶Ticoro sa masagū ihñañe ticoro pacusumua ihña maria wahahye. Sa yero Jesu tire apequinare yahu dutierahye.

Jesu doce tiqiro buheyequinare buhe dutiro ohoahye

(Mt 10.5-15; Mr 6.7-13)

9 Sa ye Jesu docere tiqiro buheyequinare pijio, tiqiro tutuayere ohoahye tiquinare. Watīare tiquina cohātire, dohatiequinare yuhdugū yeati gūhure tiqiro tutuayere ohoahye tiquinare. ²Sa ye tuhasa tiquinare Cohācjū tiqiro puhtoro ijiyere buhe dutiro, dohatiequinare yuhdūo dutiro ohoahye tiquinare. ³Ohō saha ni dutiahye Jesu tiquinare:

—Musa wahana apee borore nedacāhña. Tua dūre, ajurore, ihyayere, niñerure nedacāhña. Musa sañano dihitare saña cāhña. Apeye suhtire nedacāhña. ⁴Ijipihtie macaripū musare tiquina carīno ohogū ti wuhupūta ijiniña. Coā wahanapū wijiaya ti wuhure. ⁵Apeye macari cjēna musare tiquina cahmedagū ihñana ti macarine yuhdū cāa wahaya. Sa wahana musa dahpocāri cjē dihta esa wahārire wejē site cūña musa tiquinare tiquina ye buhirire masigū yena, niahye Jesu.

⁶Tiqiro sa nidi bato tiqiro buheyequina pehe waha, ijipihtie macaripū

quehnoañe buheyere yahu tiniahye. Sa ye dohatiyequinare yuhduoe tiahye.

Jesu tiqiro yerire Herode tuhoahye

(Mt 14.1-12; Mr 6.14-29)

⁷Sa ye Herode Galilea yehpa cjëna puhtoro Jesu yerire tuhoahye. “¿Noa boro ijijari tiqiro Jesu?” nieperota ne masiedahye. Ihuëquina ohō saha nimahye Jesure. “Ñu wame yeriquiro mūnano masa mūjahye. Sa yero ‘Jesu’, tiquina nidiquiro tiquirola ijire”, nimahye ihquëquina. Tiquina sa nigū tuhoro Herode Jesure dūhse ni masiedahye. ⁸Sa ye apequina “Tiquiro Elia mūnano yojopū bajuaro nine”, nimahye. Apequina pehe “Cohācjū yere yahu mūhtariquina panopū cjëna mehna cjūno yojopū masa bajuaro nine”, nimahye Jesure. ⁹Tiquina sa ni yahuducuepegūta ohō saha ni tūhotuahye Herode: “Ñu dapure dūte sure duti tuhasau yūhū. ¿Yojopūre ijiriquiro masa tiquina yahuriquiro noa boro ijiboagari tiqiro pehe?” ni, tūhoturo tiqiro Jesure ihña duamahye.

Jesu cinco mil masare ihyayere ohoahye

(Mt 14.13-21; Mr 6.30-44; Jn 6.1-14)

¹⁰Sa ye Jesu tiqiro ohoriquina tiqiro cahapū tojoa sa, tiquina yerire yahuahye Jesure. Tiquina yahu tuhasagū Jesu tiquina dihitare Betsaida wame tiri macapū siho wahahye. ¹¹Tiquina waharire masiñe, masa peyequina tiquinare nūnū tā cāa wahahye. Jesure tiquina ūmū sagū ihñano piti cahye Jesu tiquinare. Sa yero tiqiro Cohācjū puhtoro ijiyere tiquinare yahu, dohatiyequinare yuhdugū yeahye.

¹²Ñamicahapū doce tiqiro buheyequina tiqiro cahapū esa, Jesure yahuahye:

—Ohō masa marienopū ijire. Ohō majano cjē wūhusepū ahriquina masare ohoya. Carīato, tiquina ihyati gūhūre maca dutiya tiquinare, niahye tiquina Jesure.

¹³⁻¹⁴Tiquina sa nigū Jesu yūhtiahye tiquinare:

—Sa niedacāhña. Ihyayere ohoya tiquinare, niahye.

Tiqiro sa nigū tūhoye tiquina yūhtiahye:

—Ihcā omope paca pā paca, pūaro wahi to punota cūoaja mari. ¿Ahriquina peyequina masa tiquina ihyatire dūboagari usā? niahye tiqiro buheyequina.

Peyequina masa tiquina ijigū ihñāne sa niahye tiqiro buheyequina. Topūre cinco mil ūmūa ijiahye. Sa yero Jesu yahuahye tiqiro buheyequinare:

—Cincuenta masare ihcā curua duji dutiya. Apeye cururi gūhūre topequinata duji dutiya, niahye Jesu tiqiro buheyequinare.

¹⁵Tiqiro sa nigū buheyequina tiqiro dutiro sahata ye, ijipihtiyequina masare duji dutiahye. ¹⁶Duji duti tuhasa Jesu ihcā omope paca pā pacare pūaro wahire ne, ūmūanopū ihña mūoahye. Sa ihña mūono Cohācjūre “Quehnoare”, niahye. Tiqiro sa nidi bato pā pacare nuha, tiqiro buheyequinare masare iti dutiro ohoahye. ¹⁷Sa ye tiquina ijipihtiyequina masa ihya, yapi yūhdua wahahye. Tiquina yapi wehorire doce pūhuse ne cahmecoa wahpo dapoahye tiqiro buheyequina.

Jesu potota Cristo tiqiro ijiyere Cohācjū ohoriquiro tiqiro ijiyere yahuahye Pedro

(Mt 16.13-19; Mr 8.27-29)

¹⁸Ihcā deco Jesu ihcāquirola ijiro, Cohācjūre sinino niahye. Tiqiro sinini watoa tiqiro buheyequina tiqiro ca-

hapu esahye. Sa yero Jesu sinituahye tiquinare:

—¿Noa boro ijiagari yuhu, masa yuhure tiquina tuhutugū? ni sinituahye.

Tiquiro sa sinitugū tuhoye tiquiro buheyequina yuhtiahye:

¹⁹—“Nu wame yeriquiro ijire”, nine mūhure. Apequina “Elia ijire”, nine. Apequina “Cohācjū yere yahu muhtariquina mehna cjūno panopu cjūno masa bajuaro nine yojopure”, nine, ni yuhtiahye tiquiro buheyequina pehe tiquirore.

²⁰Tiquina sa nidi bato Jesu tiquinare sinituahye tja:

—¿Musa pehe musa tuhutugū, noa boro ijiagari yuhu? ni, sinituahye tja.

—Muhu Cristo Cohācjū ohorigu ijire, ni yuhtiahye Pedro.

Jesu tiquiro yaria masa wijiatiye yahuahye

(Mt 16.20-28; Mr 8.30-9.1)

²¹Sa ye Pedro “Cristo ijire muhu”, tiquiro nidire apequinare Jesu yahu site dutierahye tiquiro buheyequinare. ²²Sa ni yahu site dutiera tuhasa ohō saha ni nemoahye:

—Yuhu masu Cohācjū ohorigu tutuaro ñano yuhduta. Sata yuhdaro cahmene yuhure. Sa ye mari judio masare buheyequina, bucuna, pahia puhtoahye mehna yuhure cahmeda, yuhure wejēta. Tiquina wejēdi bato ihtia deco wahaboro masa wijiagutja, niahye Jesu tiquinare.

²³Came ijiptiyequinare ohō saha ni yahuahye Jesu:

—Ihcāquiro yaquiro iji duaro, tiquiro cahmeno ye duamedire duhu cānota. Sa yero yaquiro tiquiro ijiri buhiri ñano yuhduperota yuhure duhusi. Sa yero yeere yeducuriquiro ijirota. ²⁴Masuno yuhure wacūno marieno tiquiro esa tuharo tiquiro cahmeno saha yero, pecapu waharota. Sa yero

yeere sa yeducuriquiro ijiptiye decori yuhu mehna uhmusepu ijiducurota.

²⁵¿Ihcāquiro masuno ahri yehpa cjēne ijiptiye cūoriquiro Cohācjūre cahmedaro pecapu waharo, yabere wapatajari tiquiro? Sa ijiriquiro ne wapataerare. ²⁶Ihquēquina yuhure, yuhu buheye gūhure bue tisāboaga. Tiquina sa yegū ihñagu yuhu gūhu yuhure sa yeyequinare bue tisāgutja. Yuhu masu Cohācjū ohorigu quehnoañequina angele mehna usā asi siteropu, yuhu Pacu tiquiro asi siteropu tojoa tagu tiquinare bue tisāguta. ²⁷Poto niita niaja musare. Yojopure ihquēquina musa ohōpore ijiyequina musa yariato pano Cohācjū ijiptiyequina bui puhtoro tiquiro iji ducagū ihñanata musa, niahye Jesu tiquinare.

Jesu tiquiro pagure comesahye

(Mt 17.1-8; Mr 9.2-8)

²⁸Sa ye ocho decori tire tiquiro yahuri bato Jesu Pedore, Nure, Santiagore tiquina dihitare pijiahye. Sa ye waha, Cohācjūre siniñe waha, canpu mujaa wahahye tiquina. ²⁹Cohācjūre tiquiro sinini watoa Jesu ya wuhdoa comesahye. Sa yero tiquiro suhtiro asi siteri suhtiro quehnoano yehseri suhtiro wahahye. ³⁰Tiquiro sa wahari watoa puaro muua tiquiro mehna yahuducuye niahye. Yahuducuyequina pehe Elia munano, Moise munano gūhu ijiahye. ³¹Tiquina uhmuse cjē asi siteye mehna bajuahye. Jesu camegāta Jerusalēpu tiquiro yariatire tiquina Jesu mehna yahuducuye niahye. ³²Pedro gūhure wujua puri yuhduahye. Sa carīepeta acua, wahcā wihi, Jesu tiquiro asi siteyere ihñañe, puaro tiquiro mehna ducuyequina gūhure ihñahye. ³³Moise munano gūhu tiquina wahato panogā Pedro Jesure ohō saha nimahye:

—Puhto, mari ohõre ijigũ quehnoa duare. Ihtia wuhugã yematja. Mũhũ ya wuhugã, Moise ya wuhugã, Elia ya wuhugã yematja, nimahye Pedro.

Sa nieperota tiquiro nidire ne masiedahye. ³⁴Tiquiro sa ni yahuducuri watoa tiquinare ehmeo curua cahmotahye. Sa cahmotagũ ihñañe tiquina cuea wahahye. ³⁵Sa yero ehmeo puhiapũ yahuducuye bisiro ca tahye:

—Ahriquiroyũhũ macũ, yũhũ beseriquiro ijire. Quehnoano tuhoya tiquirore, nino ca tahye ehmeo curua puhiapũre.

³⁶Tiquiro sa nidi bato Jesu dihitare ihñañe tiquina. Came tiquina ihñarire apequinare yahuerahye. Ne ihcãquiroyũhũ yahuerahye.

Jesu watĩno cõoriqirogãre yũhduoahye

(Mt 17.14-21; Mr 9.14-29)

³⁷Ape deco tiquina cũnũpũ tiquina dijia tagũ peyequina masa Jesure piti cahye. ³⁸Sa yero tiquina mehna cõũno Jesure pisuahye:

—Buhegu, mũhũre tutuaro ahrire sini duaja yũhũ. Yũhũ macũ ihcãquiroyũhũ ijire. Sa yegũ tiquirore ihña basaya mũhũ. ³⁹Watĩno tiquirore ñehe, sañuducu tunu nanaregũ ye, sahpo tua wahagũ yee tire. Sa yero watĩno yũhũ macũre ñano yũhdugũ ye, ne duhu duerare. ⁴⁰Mũhũ buheyequinare watĩnore cohã dutigũ tutuaro sinimi. Yũhũ sa siniepegũta tiquina tiquirore cohã masiedari, niahye tiquiro Jesure.

⁴¹Tiquiro sa nigũ Jesu pehe ohõ saha niahye tiquiro buheyequinare:

—Yojopũ cõẽna mũsa ñana ijire. ¿Yũhũre ne wacũ tutuerabutiajari? Yoabutiari pje mũsare buhemi yũhũ. ¿Noho puno yoari pje yũhũre mũsa cariboboagari? ni tuhtiahye Jesu.

Sa ni tuhasa watĩa cõoriquiroyũhũ pacũrore ohõ saha niahye:

—Mũhũ macũre ne cãhtaya, niahye.

⁴²Tiquiro sa nidi bato tiquiro macũno Jesu cahapũ tiquiro ahtari watoa watĩno pehe tiquirore yehpapũ doque quehe sa, tunu nanaregũ yeahye. Tiquiro sa yegũ Jesu watĩnore waha dutiahye. Tiquiro sa dutigũ watĩnore cõoriqirogã yũhduo wahahye. Sa yero Jesu pehe tiquirogãre wiahye tiquiro pacũrore. ⁴³Ijipihtiyequina masa Cohãcõũ tutuaye mehna tiquiro quehnoa wahagũ ihñañe, ihña maria wahahye.

Pari turi Jesu tiquiro yaria masa wijiatire yahuahye

(Mt 17.22-23; Mr 9.30-32)

Masa Jesu tiquiro yerire tiquina ihña, ihña maria wahagũ Jesu pehe tiquiro buheyequinare ohõ saha ni yahuahye:

⁴⁴—Mianogãta yũhũ yahuatire boeracãhña mũsa. Yũhũre Cohãcõũ tiquiro ohorigũre apequiroyũhũre ñehe dutiro ohorota masare, niahye Jesu.

⁴⁵Tiquiro sa niepegũta tiquina pehe tiquiro yahuyere quehnoano tuhoerahye. Tiquiro yahurire tiquinare masino basioerahye. Ti pjeta Cohãcõũ tiquinare tire tuho dutiero niahye. Sa ye tiquina cueye, tire tiquirore sinituerahye.

Jesu buheyequina tiquina mehna cõũnore puhto sõ duamahye

(Mt 18.1-5; Mr 9.33-37)

⁴⁶Came Jesu buheyequina cahme sehña soye niahye:

—¿Mari mehna cõũno diquiroyũhũ pehe puhtoro sajãnotari? niñe niahye tiquina basi.

⁴⁷Tiquina sa nigũ Jesu pehe tiquina tuhotuyere masino, nijinogãre tiquiro cahapũ ducu duti, tiquiro buheyequinare yahuahye:

⁴⁸—Yeere yena tana ahriqirogãre cahmena, yũhũ gũhũre cahmene mũsa. Sa yena yũhũre cahmena, yũhũre ohoriquiroyũhũre gũhũre cahmene mũsa.

Musa mehna cĵuno musa cahacĵuno ijiro tiqiro gũhu puhtoro ijirota, niahye Jesu.

**Marine ihña tuhtiriqiro
ijieraro, mari mehna cĵuno ijire**

(Mr 9.38-40)

⁴⁹ Came Ñu Jesure ohō saha ni yahuahye:

—Buhegu, muhu wame mehna watiare cohãriqirore usã ihña. Mari mehna cĵuno tiqiro ijieragũ ihñana tire tiqirore ye dutierũ usã, niahye Ñu Jesure.

⁵⁰ Tiquiro sa nigũ Jesu Ñure apequina buheyequina gũhure ohō saha ni yahuahye:

—Sa niedacãhña musa tiqirore. Marine ihña tuhtiriqiro ijieraro, tiqiro mari mehna cĵuno ijire, niahye Jesu tiqiro buheyequinare.

Jesu Santiqore, Ñu gũhure tuhtiahye

⁵¹ Ti pjere Jesu uhmusepu tiqiro wahato panogã, “Jerusalẽpu wahautja”, niahye tiqiro. Sa nino topu waharo niahye. ⁵² Sa ye Jesu tiqiro pano ohoriquina waha, Samaria yehpa cã macapu esa, topu Jesu tiqiro ijiatire quehno duamahye. ⁵³ Jesu Jerusalẽpu waharo taro niahye. Topu wahatiqiro tiqiro ijigũ tuhoye, to cĵena tiqirore cahmedahye. ⁵⁴ Tire tuhoye Santiago, Ñu mehna yahuahye Jesure:

—Puhto, muhu cahmegũ uhmuse cã peca mehna tiquinare wejẽ dutinata, nimahye tiquina tiqirore.

⁵⁵ Tiquina sa nigũ Jesu majare ihña, tuhtiahye tiquina puarore.

⁵⁶ Sa tuhti tuhasa, ape macapu Jesu gũhu waha wahahye.

Apequina Jesu mehna wahamahye

(Mt 8.19-22)

⁵⁷ Ti mahapu tiquina wahagũ, ihcãqiro Jesure yahuahye:

—Muhu mehna waha duaja noho muhu waharopu, niahye tiqiro.

⁵⁸ Tiquiro sa ni tuhasagũ Jesu yuhtiahye:

—Ihqũequina nucũ cĵena wahiquina tiquina coperi cuore. Minicjua gũhu tiquina suhti cuore. Yuhu masu Cohãcĵũ ohorigũ pehe yuhu carini wuhu cuoeraja, niahye Jesu.

⁵⁹ Came apeqirore Jesu pijiahye:

—Yuhu mehna cĵũ ijicjũ ahtaya, niahye.

Tiquiro sa nigũ yuhtiahye Jesure:

—Puhto, yuhu pacu tiqiro yariagũ yarĩgutja. Sa ya tuhasagu pũrita muhu mehna wahagutja, niahye tiqiro.

⁶⁰ Tiquiro sa nigũ Jesu yahuahye:

—Yuhure cahmeeñequina yariariquina yero saha ijire. Tiquina pehe yariariquinare yaahro. Sa yegu muhu pehe Cohãcĵũ tiqiro puhtoro ijiyere quehnoañe buheyere buhegu ahtaya, niahye Jesu tiqirore.

⁶¹ Sa yero apeqiro Jesure ohō saha niahye:

—Puhto, muhu mehna wahautja. Muhu mehna yuhu wahato pano yuhu acayere cohe tinni wahautja, niahye tiqiro Jesure.

⁶² Tiquiro sa nigũ Jesu yahuahye tiqirore:

—Dahrariqiro dahra dueraro tiqiro dũhseatiqiro ijierare. Tiquiro yero sahata ijiriquiro ohō saha ijire: “Cohãcĵũ yere ye duaja”, nieperota tire yerare. Tiquiro Cohãcĵũ yaqiro ijiboriqiro ijierare, niahye Jesu.

**Jesu setenta y dos buheyequinare
buhe dutiro ohoahye**

10 Came Jesu apequina buheyequinare setenta y dos buheyequinare bese, macaripu tiqiro wahato pano ohoyuahye. Ti macarine pũyequina dihita ohoyuahye tiqiro. ² Sa

ohoyuro ohō saha ni yahuahye tiquinare queoye mehna buhero:

—Trigo peye ti bꝛꝛꝛa tuhasagū peye ijigū dahraye pajiro ijire. Sa ijiepegūta dahrayequina pehe meheñequinagā ijire. Sata quehnoañe buheyere tuhoatiquina peyequina ijigū pajiro ijire mari dahraye. Sa ijiepegūta meheñequinagā dahrari masa yero sahata quehnoañe buheyere buheatiquina gūhu meheñequinagā ijire. Sa yena quehnoañe buheyere buheatiquinare apequinare tiquiro ohoatire siniña Cohācjüre musa. ³Wahaya musa. Musare yuhu ohogū musa oveja pohne yayia watoa tiquina ijiro sahata musa gūhu ñañequina usuayequina watoa ijinata. ⁴Niñeru ajurore, paji cjūri ajuro gūhure, dahpo suhtire nedacāhña. Musa mahapu tinina apequinare boca sa yahuducueracāhña. Poto wahaya. ⁵Ijipihtiye musa sajāñe wuhusepu sajāna, “Ahri wuhu cjēna quehnoano ijiahero”, ni mahtaña. ⁶Ti wuhu cjēna quehnoano mehna ijieyequina cahmequeno marieñequina tiquina ijigū, tire niña tiquinare. Quehnoano mehna tiquina ijieragū ihñana ti wuhu cjēnare sa niedacāhña. ⁷Ihcā wuhurpu sajā saducana tiquina quehnoañequina ijigū ti wuhurputa tojoaya. Topu tiquina duhu peorire ihya, sihniña. Dahrayequinare tiquina wapatayere neno cahmene. Sa yena tiquina wapatayere tiquina neno sahata tiquina duhu peorire neña musa gūhu. Sa yena ihcā wuhurputa musa esari wuhurputa ijina, ti maca cjē wuhusepu carī tiniedacāhña. ⁸Macapure musa esana to cjēna pehe musare tiquina cahmeñequina ijigū ti ihyayere tiquina duhu peorire ihyaya. ⁹To cjēna dohatiequinare yuhduoya. Sa yena ohō saha niña to cjēnare: “Cohācjū yojoपुरे mari puhtoro tiquiro ijiati mehenogā duhsare”, niña tiquinare. ¹⁰Ape macapu

musa esagū tiquina pehe musare cahmedaboaga. Tiquina cahmedagū ihñana ti maca decopu waha, ohō saha niña tiquinare. ¹¹“Ahri maca cjē dihtare dahpocāri cjē dihtare wejē site cohāna niaja usāre musa cahmedari buhiri ihñona. Sa yena ahrire wacūña. Cohācjū mari puhtoro yojoपुरे tiquiro ijiati mehenogā duhsare”, niña tiquinare. ¹²Musare poto niita niaja. Sodoma cjēna ña yuhduayequina ijiahye. Tiquina sa ijiepegūta pihtiatī deco ijigū Cohācjū tiquiro buhiri dahreati deco ijigū Sodoma cjēna yuhduoro musare cahmeñequina pehere buhiri dahrerota, niahye Jesu.

Apeye macari cjēna Cohācjüre yuhduucayequina ijire

(Mt 11.20-24)

¹³Came Jesu ohō saha niahye macari cjēnare:

—Corazín cjāna, musa ñano yuhduñata. Betsaida cjāna, musa gūhu ñano yuhduñata. Musa ye macaripure Cohācjū tutuaye mehna ye ihñomi. Tiro wame tiri macare, Sidō wame tiri maca gūhure tiquiro tutuaye mehna yuhu ye ihñogū ihñañe panopu to cjēna pehe tiquina ñañene bujua witiboaga. Sa ye quehnoañene comesaboaga. Duita tiquina masa dija suhtire saña, tiquina basī peca cjē nujuare tiquina bui dahra site peoboaga tiquina ñañene bujua witiyere ihñone. ¹⁴Cohācjū tiquiro buhiri dahreati deco ijigū Tiro cjēna, Sidō cjēna yuhduoro musa pehere musa ñari buhiri musare tutuaro buhiri dahrerota tiquiro. ¹⁵Capernau cjāna, musa esa tuharo uhmusepu waha duamene. Musa sa waha duepegūta musa ñari buhiri musare Cohācjū pecapū cohānota, niahye Jesu.

¹⁶Sa ni tuhasa Jesu tiquiro buheyequinare yahuahye:

—Musare tuhoyequina yuhu gühure tuhore. Musare cahmeeñequina, yuhu gühure cahmedare. Sa yeye yuhure cahmeeñequina, tiquina yuhure ohoriquiro gühure cahmedare, niahye Jesu tiquinare.

Setenta y dos buheyequina tojoa wihiahye

¹⁷ Came setenta y dos buheyequina bucueye mehna tojoa wihiahye:

—Puhto, muhu wame mehna muhu tutuaye mehna watiare usã dutigũ tiquina pehe usãre yuhduducacare, niahye tiquina Jesure.

¹⁸ Tiquina sa nigũ Jesu yuhtiahye tiquinare:

—Uhmusepu mia sitedoque dijioro sahata, watino tiquiro bora dijia tagũ ihñau. ¹⁹ Quehnoano tuhoya. Musare yuhu tutuayere ohou yuhu. Sa yegu añaa parire, cutipa parire, watinore marine ihña tuhtiriquirore musa yuhduducacare ohou yuhu. Sa ye tiquina musare ñano ye masiedare. ²⁰ Yuhu sa ohopegũta watia musare tiquina yuhduducacaregũ ihñana ti dihitaro bucuercãhña. Ahri pehere bucuera. Uhmusepu Cohãcjũ yequina tiquina wamene tiquiro ojoa ohõri tjupe musa wamene tiquiro ojoa ohõgũ ihñana, ti pehere bucuera musa, niahye Jesu tiquinare.

Jesu bucuerahye

(Mt 11.25-27; 13.16-17)

²¹ Ti pjere Espiritu Santo Jesure tutuaro bucuergũ yehaye. Sa yero Jesu ohõ saha niahye:

—Mai, muhu uhmusepu gühure yehparu gühure puhto ijire. Masi yuhduducacayequinare muhu yahuerarire ihyo ijieyequina pehere yahuri muhu. Muhu sa yegũ ihñagu “Quehnoa yuhduducare”, niaja. Sata ijire mai. Muhu ye duariro sahata, muhu cahmediro sahata tiquinare muhu yere yahuri muhu, niahye Jesu.

Sa ni tuhasa apequinare ohõ saha niahye:

²²—Yuhu Pacu ijipihtiyere yuhure ohori. Yuhu Pacu dihita yuhure masine. Yuhu gũhu tiquirore masiaja. Yuhu bereriquina gũhu tiquirore masine, yuhu masi dutieyequina ijieye. Topequinata yuhu Pacure masiaja usã, niahye Jesu.

²³ Tiquiro sa nidi bato tiquina sehsharo ijigũ Jesu tiquiro buheyequinare ohõ saha niahye:

—Ahri ijipihtiyere musa ihñana bucuena ijire. ²⁴ Ijirota ijire. Peyequina Cohãcjũ yere yahu muhtariquina, ihquẽ yehpari cjenã puhtoã gũhu yojopu musa ihñarire ihña duamahye tiquina gũhu. Sa ye musa tuhori gühure tuho duamahye, niahye Jesu.

Quehnoariquiro Samaria cjãno quitire yahuahye Jesu

²⁵ Ti pjeta judio masare buheriquiro Jesu cahapu wihi, Jesure tiquiro ñano yahuducugũ ye duamahye:

—¿Buegu, yuhu ijipihtieyere decori Cohãcjũ mehna iji duagu duhse yeboagari yuhu? ni, sinituahye tiquiro Jesure.

²⁶ Tiquiro sa nigũ Jesu yuhtiahye tiquirore:

—¿Duhse ni yahujari Cohãcjũ yere tiquina ojoari pupe? ¿Cohãcjũ tiquiro ni ojoarire duhse ni tuhotujari muhu? niahye Jesu tiquirore.

²⁷ Jesu sa nigũ tiquiro yuhtiahye:

—Ohõ saha niahye Cohãcjũ: “Tuturo musa jeripohnari mehna, quehnoano musa tutuaye mehna, musa wacũne mehna Cohãcjũre cahña. Sa ye muhu basi muhu cahño saha muhu cahapu ijieyequina gühure cahña”, niahye tiquiro Jesure.

²⁸ Tiquiro sa nigũ Jesu yuhtiahye:

—Potota nine muhu. Tire yeya. Sa yegu ijipihtieyere decori Cohãcjũ mehna ijiguta muhu, niahye tiquirore.

²⁹“Ahriquiore Cohācjū dutiyere ye pe-horiquiore ijire”, masa tiquiore tiquina ni ihñagū cahmeahye judio masare buheriquiro. Sa cahmeno tiquiore Jesure ohō saha ni sinituahye:

—¿Noa boro ijiboagari yūhure mūhu cahī dutiriquiro? niahye tiquiore.

³⁰Tiquiro sa nigū Jesu ohō saha ni queoye mehna piti dahre buheahye:

—Ihcā deco Jerusalēpū ahtariquiore Jericópū wahariquiore mahapū tiquiore tinigū yaqueyequina tiquiore ñeheahye. Sa ñeheñe, tiquiore suhtirore tu we ne, tiquiore tutuaro quēahye. Sa tutuaro quē, tiquiore yariaro taro yegū duhuahye tiquina tiquiore. ³¹Ti pjeta pahi ti mahapū ahtahye. Sa ahtaro tiquina quēdiquirore ihñaeperota maha ape sie dūhtū cahapū yūhdū cāa wahahye. ³²Sa ye Cohācjū wūhūpū dahrariquiore gūhū pejecuoriquiore cahapū esa, tiquiore ihña, maha ape siepū yūhdū cāa wahahye. ³³Sa ye Samaria cjūno pehe topū waha, yoa cjūnopū pejecuoriquiore ihña, tiquiore paja ihñahye. ³⁴Sa yero tiquiore pejecuoriquiore cahapū esa, ūhse, vino mehna moredire tiquiore camine pio peoahye. Pio peo tuhasa suhtiro cahsero mehna dūhteahye tiquiore camine. Tuhasa, pejecuoriquiore tiquiore yaquiore burro bui duhu peo, carīni wūhūpū ne cāhye tiquiore. Topū ijire, Samaria cjūno quehnoano ihña ihboahye tiquiore. ³⁵Ape deco tiquiore carīni wūhū upūrore pua cjoerire oho, ohō saha niahye: “Ahriquiore ihña ihboya. Ahri esa tuhaeragū pari turi tojoa tagū wapa ye pehoutja”, niahye Samaria cjūno wūhū upūrore, niahye Jesu.

³⁶Sa ni tuhasa judio masare buheriquirore sinituahye Jesu:

—¿Ahriquina ihtiaro ūmūa diquiore pehe ijiajari pejecuoriquiore cahīdiquiro? niahye Jesu.

³⁷Tiquiro sa nigū tūhoro buheriquiro pehe Jesure yūhtiahye:

—Pejecuoriquiore yedohoriquiore ijiajari tiquiore cahīdiquiro, niahye tiquiore Jesure.

—Wahaya. Mūhū gūhū masare sata yei wahaya, niahye Jesu buheriquirore.

Marta, María gūhū cahapū tiniahye Jesu

³⁸Sa ye Jesu tiquiore buheyequina mehna tiquina wahagū, ape macapū tiquina tinigū, Marta wame tiricoro tiquinare ticoro ya wūhūpū sajā ta dutiahye. ³⁹Ticoro bahoro María tiquiore dahpocāri cahapū duji, tiquiore buheyere tūhoahye. ⁴⁰Ticoro sa yegū ihñano Marta ticoro dahraye peye ijigū usuahye. Sa yero ticoro Jesure yahuahye:

—¿Pūhto, yūhū ihcōta dahragū yūhūre yūhū baho ticoro yedohoeragū mūhūre quehnoajari, mūhū ihñagū? Ticoro yūhūre yedoho dutiya, niahye Marta Jesure.

⁴¹Ticoro sa nigū Jesu yūhtiahye:

—Marta, dahraye peye cūogo pajiro tūhoture mūhū. ⁴²Cohācjū tiquiore yere tūho dutire. María quehnoañene yero taro, tire cahmene. Sa yegū yūhūre ticoro tūhogū “Yedohogo wahaya”, niedaja ticoro, niahye Jesu Martare.

Jesu Cohācjūre siniñene buheahye

(Mt 6.9-15; 7.7-11)

11 Ihcā deco Jesu Cohācjūre sinino niahye. Tiquiro sini tuhasagū, ihcāquiore tiquiore buheyequina mehna cjūno tiquiore ohō saha niahye:

—Pūhto, Ōu tiquiore buheyequinare tiquiore buheriro sahata Cohācjūre siniñene ūsā gūhūre buheya mūhū, niahye tiquiore Jesure.

²Tiquiro sa nigū tūhoro Jesu tiquinare yahuahye:

—Ohō saha Cohācjüre siniña: “Usā Pacu, uhmuse cjū mūhu quehnoagu sa iiducure. Yojoṗure ijipihiteyquina puhto ijiya. ³Sa yegu decoripe usā ihyatire ohoducuya usāre. ⁴Apequina usāre tiquina ñañe yerire usā boaja. Sa yegu mūhu gūhu usā ñañe yerire boya. Sa yegu usā ñañene ye duagu usā tutuoro cahmegū ihñagu tire usāre ye dutieguta”, ni siniña Cohācjüre, niahye Jesu tiquinare.

⁵Came Jesu quti mehna tiqiuro buheyequinare ohō saha ni buheahye:

—Ihcāqiuro ñami decopu tiqiuro acayuro ya wūhupu waha, tiqiurore siniahye: “Yūhu acayu, ihtiaría pã pacare ohoya yūhure. ⁶Apeqiuro yūhu acayuro tinino ahtariqiuro mianogāta ya wūhupu wihiri. Sa yegu tiqiurore yūhu nuati mariedare”, niahye tiqiuro acayurore. ⁷Tiqiuro sa nigū tiqiuro acayuro wūhu puhiapu ijiriqiuro yūhtiahye: “Yūhure cariboeracāhña. Sopedaha bihariro ijire. Yūhu, yūhu pohna mehna carīna niaja. Wahcāno pjeraga yūhure mūhure ihyayere ohoborigū”, niahye tiqiuro acayuro. ⁸¿Dūhse waharotari sinidiquirore? Poto niaja musare. Tiqiuro acayuro ijieperota, ihyaye ohoborigiuro wahcā duerahye. Tiqiuro wahcā duerapegūta ihyaye sinidiquiro pehe bæ tiro marieno tiqiuro yoari pje siniducugū ijipihiteye tiqiuro sinidiro sahata ohorota. ⁹Sa yegu ahrire musare ni yahugu niaja: Cohācjüre siniña. Sa sinina musa nenata. Musa sinidire bocanata. Tiqiurore sa siniducuya. Musa sa yegū tiqiuro ohorota. ¹⁰Ijipihiteyquina Cohācjüre siniñequina neeta. Sa ye tiquina sinidire bocaeta. Sa yero ijipihiteyquina Cohācjüre sa siniducuyequinare tiqiuro tiquinare ohorota.

¹¹¿Musa pohna musare wahire tiquina sinigū añare ohoboagari musa

tiquinare? ¹²¿Musa pohna canaca duere tiquina sinigū cutipare ohoboagari musa tiquinare? Ne ohosi. ¹³Musa ñana ijiepenata musa pohñare quehnoañene ohoe tiri musa. Sa yero Cohācjū pehe musa ohori yūhduoro quehnoañene ohore musare. Tiqiuro mari Pacu uhmuse cjūno Espiritu Santore ohorota tiqiurore siniñequinare, niahye Jesu tiqiuro buheyequinare.

—Jesu watīno tutuayere
cūore, ni, yahusāhye masa

(Mt 12.22-30; Mr 3.20-27)

¹⁴Ti pjeru Jesu watīnore cohāno niahye. Watīno pehe yahuducu masiedagū yeahye masunore. Sa yero watīno masunore tiqiuro duhuri bato masuno pehe yahuducu dūcahye. Tiqiuro yahuducugū tūhoye masa peyequina tūho maria wahahye. ¹⁵Tiquina sa tūho mariepegūta apequina pehe ohō saha niahye:

—Ahriqiuro Jesu watīare tiqiuro cohāgū Beelzebú wame tiriqiuro watīa puhtoro pehe tiqiurore yedohore, niahye apequina.

¹⁶Apequina “¿Jesu Cohācjū tiqiuro ohoriquiro ijijari?” ni masi duaye tiqiurore Cohācjū tutuaye mehna ye ihño dutimahye. ¹⁷Tiquina sa dutigū tūhoro “Watīno tutuaye mehna watīare cohāre”, ni, tiquina tūhotuyere masino, tiquinare ohō saha ni yahuahye Jesu, “Watīno ye tutuaye mehna watīare cohāgu niedaja”, nino taro:

—Ihcā yehpa cjēna tiquina basi cahmequeñe, ti yehpa cjēna yaria pihtia wahaboaga. Sa ye ihcā wūhu cjēna tiquina basi cahmequeñe, ti wūhu cjēna waha pihtia wahaboaga. ¹⁸Sa ye, watīno yequina watīa tiquina basi cahmequeñe, tiquina watīa gūhu waha pihtia wahaboaga. Ihcā curua iji masiedaboaga. Musa yūhure ohō saha nine. “Tiqiuro watīno tutuaye mehna watīare cohāre”,

musa yuhure nina niaga. ¹⁹ ¿Yuhure musa nidi poto ijigū musa mehna cjēna watīare cohāñe watīno tutuaye mehnata cohājari tiquina gūhu, musa ihñagū? Musa mehna cjēna watīare cohāñe, watīno tutuaye mehna cohāñe niedare. Ahrire masina watīno tiqiuro tutuaye mehna watīare yūhu cohāedagū masinata musa. ²⁰ Sa yegū yūhu pehe watīare cohāgū Cohācjū tutuaye mehna cohāja. Ahrire masina, Cohācjū tiqiuro puhtoro iji ducayerere masinata musa.

²¹ Tutuariqiuro tiqiuro ye wamoā mehna tiqiuro ya wūhure tiqiuro ihña ihbogū tiqiuro yere apequina yaque masiedare. ²² Tiquiro sa ihña ihbopegūta apeqiuro tutua yūhdūriqiuro tiqiuro mehna cahmeque, tiqiore yūhdūdūca, tiqiuro ye wamoare ehma cā, tiqiuro yere ehma cāhre. Ohō sahata ye yūhdūdūcaro cahmene watīare. ²³ Ihcāqiuro yūhure cahmedaro, yūhure ihña tuhtiriqiuro ijire. Ihcāqiuro yūhure yedohoeraro yūhure nāno yero nine, ni buheahye Jesu.

Watīno pari turi masūnore tiqiuro sajāri quitire yahuahye Jesu

(Mt 12.43-45)

²⁴ Sa yero tiqiuro tūhotuye mehna ohō saha ni queoye mehna buheahye tiquinare:

—Watīno masūno mehna ijiriqiuro waha, tiqiuro aco marieni yehpapū tinino, tiqiuro ijiatore macamahye. Bocaeraro, ohō saha ni tūhotuahye: “Masūno yūhu duhuriqiuro mehna pari turi ijigū wahautja”, ni, tūhotuahye tiqiuro. ²⁵ Sa nino tiqiuro tojoa waha, masūnore bocahe. Sa tiqiuro bocagū masūno pehe quehnoariqiuro ijimahye. ²⁶ Sa yero watīno apequina siete watīare tiqiuro yūhdūoro ñañequinare pijiro wahahye. Tiquiro sa pijigū tiquina ijipihtiyequina watīa masūno mehna

ijiahye. Sa yero masūno pehe to pano ihcāqiuro watīnore cūoro, ñariqiuro ijimahye. Camepū pehere peyequina watīare cūoriqiuro ijiro, to pano tiqiuro ijiriro yūhdūoro ña yūhdūariqiuro ijiahye, niahye Jesu.

Jesu bucueyere yahuahye

²⁷ Tire tiqiuro sa nigū masa watoa ijiricoro numino Jesure yahuahye:

—Mūhure pohna tiricoro, mūhure apūoricoro bucuericoro ijire, niahye Jesure.

²⁸ Ticoro sa ni tuhasagū tūhoro Jesu ticorore yūhtiahye:

—Cohācjū yahuducuyere tūhoyequina tiqiuro dutiyere yeyequina tiquinata ijiaga bucueyequina, niahye Jesu ticorore.

Masa ñañequina Jesure Cohācjū tutuaye mehna ye ihño dutiahye

(Mt 12.38-42; Mr 8.12)

²⁹ Sa ye peyequina masa Jesu cahapū tiquina wihigū, tiqiuro tiquinare yahu nemoahye:

—Yojopū cjēna ñañequina ijire. Yūhure poto nigū yūhu ijiyere tiquina masi duaye, Cohācjū tutuaye mehna yūhu ye ihñogū ihña duamene. Tiquina sa ihña duepegūta Jona panopū cjūno Cohācjū tutuaye mehna tiqiuro yeri dihitare ihñonota Cohācjū tiquinare. ³⁰ Jona Cohācjū yere yahu mūhtariqiuro ijiro, tiqiuro Nñive wame tiri maca cjēnare Cohācjū yere tiqiuro masigū yeriro sahata yūhu masū Cohācjū ohorigū masigū yeaja yojopū cjēnare. ³¹ Buhiri dahreati deco ijigū puhtoro sur cjōno panopū cjōno ducu, yojopū cjēnare “Ñana ijire musa”, ni, yahusānota ticoro. Ticoro Salomo panopū cjūno tiqiuro masiñene tūho duaro yoaropū ahri yehpa ape siepū ijiricoro Salomoro tūhoro ahtahye. Sa yero quehnoano yero niahye yojopū cjēna yūhdūoro.

Sa yero ticoro yahusānota yojopu cjēnare. Sa nigu musare poto niita niaja. Yojopu musare yuhu buheye Salomo tiqiro buheri yuhduoro ijire. ³²Buhiri dahreati deco ijigū Nínive wame tiri maca cjēna gūhu ducu, yojopu cjēnare “Nana ijire musa”, ni yahusāeta tiquina. Jona tiquinare Cohācjū yere tiqiro yahugū tuhoye, tiquina ñañene bujua witi, quehnoañene cahmeahye tiquina pehe. Sa cahmeñe quehnoano yeye niahye yojopu cjēna yuhduoro. Sa ye tiquina gūhu yojopu cjēnare “Nana ijire musa”, ni yahusāeta. Musare poto niita niaja. Yojopu musare yuhu buheye Jona tiqiro buheri yuhduoro ijire, ni yahuahye Jesu.

Masa tiquina tuhuturo sahata yere

(Mt 5.15; 6.22-23)

³³Sa yero queoye mehna buhero ohō saha ni yahu nemoahye tiquinare:

—Masa sihāriare sihāñe nwoedare. Tiare sihāñe dihi sutu docapu duhu dapoerare. Tiare uhmusepu duhu peore wuhupu sajā tayequina tiquina quehnoano ihña sajā tatore yeye. ³⁴Sihāria quehnoano buhriogū mari quehnoano ihña masino sahata quehnoañene tuhutuye mehna quehnoano ye masinata musa. Musa tuhuturo sahata yere musa. Quehnoañene tuhutuna quehnoano yere musa. Quehnoañene tuhutuerana ñañe pehere yere musa. ³⁵Sa yena quehnoano yeya. Musa tuhutuyepu ñañene wacūedacāhña. Ñañene ne cahmedacāhña. ³⁶Tuhasa musa tuhutuyepu quehnoañe ijigū, ñañe ne mariedagū quehnoañe dihitaré tuhutunata, ni buheahye Jesu.

Fariseo masare, judio masare buheyequina gūhure Jesu tuhti yahuahye

(Mt 23.1-36; Mr 12.38-40; Lc 20.45-47)

³⁷Jesu tiqiro buhe tuhasagū ihña, fariseo masano tiqirore tiqiro ya wuhupu ihya dutiro pijiahye. Sa yero Jesu tiqiro ya wuhupu sajā sa, tiquina ihyaropu tiquina mehna nuju sahye. ³⁸Tiqiro sa nuju sagū fariseo masano pehe Jesure ihña nununo judio masa tiquina omo coseducuro sahata tiqiro omo coseragū ihñano ohō saha ni tuhutuahye: “Yohou. ¿Ahriquiore duhsero omo coserajari usā yero saha?” ni tuhutuahye. ³⁹Tiqiro sa ni tuhutugū masino Jesu tiqirore yahuahye:

—Musa fariseo masa sihniñe parire, wapari gūhure bui pehe dihitaré masa cosero sahata quehnoañene ye ihñore masa buigā warona. Sa yepenata Cohācjū yere queoro yerare. Apequina yere ehma mujare musa. Sa yena ñañe dihitaré tuhuturo masa. ⁴⁰Tuho masiedare masa. Cohācjū masa pagurire yeriquiro masa tuho masiñe gūhure yeahye. ¿Tire masiedajari masa? ⁴¹Sa yena masa yere pejecuoyequinare ohoya musa. Musa sa yena quehnoañene tuhutuna ijinata.

⁴²Musa fariseo masa ñano yuhdunata. Moa yero saha ijiyere ihyayere ocagū yeyere cuona mehenogā ohomene masa. Cohācjūre ño peona tana pahiare ohomene masa. Sa ohoopenata quehnoañene yerare masa. Sa yena masare paja ihñedare masa. Sa yena Cohācjūre ño peoerare masa. Oteye ducagāre masa nedire mehenogā Cohācjūre masa ohogū quehnoañene. Sa ohona ohō saha ye nemoña: Quehnoañene yeya. Sa yena paja ihñaña masare. Sa yena Cohācjūre ño peoya musa.

⁴³Musa fariseo masa ñano yuhdunata. Buheri wuhupu ijina, quehnoañe

dujiye dihitare duji duare m̄sa. Dori c̄j̄ duarop̄u apeq̄uina p̄uhtoare quehnoano ño peo tiq̄uina sinino saha m̄sare piti caḡu cahmene m̄sa.

⁴⁴Ñano yuhd̄unata m̄sa. Masa cope n̄ori cope yero saha ijire m̄sa. Ti cope cahaḡa masa ijiye, puhiap̄u c̄j̄no ahbariq̄uore ih̄nedare tiq̄uina. (Sata masa m̄sa cahaḡa ijiye, masa t̄uhotuyep̄ure ñañe ijiyere masiedare tiq̄uina,) niahye Jesu tiq̄uinare.

⁴⁵Tiq̄uero sa niḡu t̄uho judio masare buheyequina mehna c̄j̄no Jesure yahuahye:

—Buheḡu, tire niḡu us̄a ḡuh̄ure ñano nii niaga m̄uh̄u, niahye tiq̄uero Jesure.

⁴⁶Tiq̄uero sa niḡu Jesu yuhtiahye:

—Ijirota ijire. Judio masare buhena m̄sa ḡuh̄u ñano yuhd̄unata. M̄sa apeq̄uina ye masiedarire ye dutire m̄sa tiq̄uinare. Sa ye dutiepenata m̄sa pehe tiq̄uinare ne mehenoḡa yedohoerare ti dutiyere tiq̄uina yeati pehere.

⁴⁷Sa yena m̄sa ñano yuhd̄unata. Coh̄āc̄j̄u yere yahu m̄uhtariq̄uina panop̄u c̄j̄na tiq̄uina masa coperire quehnoano quehnomene m̄sa tiq̄uinare ño peoro saha yena. M̄sa sa yepeḡuta panop̄u c̄j̄na m̄sa acaye pehe tiq̄uinare wej̄eahye. ⁴⁸M̄sa acaye panop̄u c̄j̄na pehe Coh̄āc̄j̄u yere yahu m̄uhtariq̄uina tiq̄uina wej̄ēdiro sahata m̄sa ḡuh̄u yeboaga. Sa yena yojop̄ure ti masa coperire quehnomene m̄sa. Sa quehnona m̄sa acaye tiq̄uinare tiq̄uina wej̄ēdire wac̄ure m̄sa. Sa tiq̄uina wej̄ōrire wac̄una “Quehnoa c̄ahre”, ni wac̄ure m̄sa.

⁴⁹Coh̄āc̄j̄u tiq̄uero masiñe mehna oh̄o saha ni yahuahye: “Yeere yahu m̄uhtariq̄uina ḡuh̄ure yuh̄u buhe duti c̄uriq̄uina ḡuh̄ure ohoutja tiq̄uinare. Sa yeye tiq̄uina yuh̄u ohoriq̄uinare apeq̄uinare wej̄ē, apeq̄uinare ñano yeeta”, niahye Coh̄āc̄j̄u. ^{50–51}Ahri yehpare Coh̄āc̄j̄u tiq̄uero bajumehnedi

bato Caī pehe Abere wej̄eahye. Sa ye Coh̄āc̄j̄u yere yahu m̄uhtariq̄uinare Abe bato ijiyeq̄uina ḡuh̄ure ñañequina wej̄eahye. Came Zacariare Coh̄āc̄j̄u wuh̄up̄u Coh̄āc̄j̄ure ño peori altar cahap̄u m̄sa acaye wej̄eahye. Ijipihtiyeq̄uina tiq̄uinare tiq̄uina wej̄ēdi buhiri yojop̄u c̄j̄nare Coh̄āc̄j̄u buhiri dahrerota. Sata ijire. M̄sare niḡuta niaja. Ijipihtiyeq̄uina tiq̄uinare tiq̄uina wej̄ēdi buhirire yojop̄u c̄j̄nare Coh̄āc̄j̄u buhiri dahrerota.

⁵²M̄sa judio masare buhena, m̄sa ñano yuhd̄unata. Coh̄āc̄j̄u masiñene tiq̄uina ojoari p̄urine c̄uoepenata apeq̄uinare yahuerare m̄sa. M̄sa basi Coh̄āc̄j̄u yere t̄uhoerare. Sa yena apeq̄uina tiq̄uero yere tiq̄uina t̄uho duepeḡuta tire m̄sa tiq̄uinare t̄uho dutierare, niahye Jesu tiq̄uinare.

^{53–54}Tiq̄uero sa niḡu t̄uhoye judio masare buheyequina, fariseo masa ḡuh̄u tiq̄uero mehna usua, tiq̄uore ñano yahuducuahye. Sa ye Jesu tiq̄uero ñano yuhtiḡu t̄uho duaye, tiq̄uina peye ni meho c̄u sinitumahye tiq̄uore, tiq̄uore yahus̄a duaye.

Tiq̄uina ni mehoducurire Jesu yahuahye

(Mt 16.6; 10.26-27; Mr 8.15)

12 Sa ye Jesu cahap̄u masa peyeq̄uina cahmecoa, wahpa yuhd̄uahye. Top̄u Jesu tiq̄uero buheyequinare oh̄o saha ni yahu d̄ucahye:

—Quehnoano wac̄u masiña m̄sa. Fariseo masa tiq̄uina ye p̄are puḡu yeyere ih̄ñana quehnoano wac̄u masiña. Tiq̄uina ni mehoducurire niḡu niaja “P̄are puḡu yeye”, niḡu. ²Ijipihtiye apeq̄uina tiq̄uina masiedarire came masieta. ³Sa yero ñamip̄ure tiq̄uina n̄o yahuducurire buhriorop̄u bajuḡu yero sahata Coh̄āc̄j̄u yahurota. Bihari tuc̄up̄u apeq̄uore cahmono caha tiq̄uina ni-

dire masa peyequina watoa yahurota Cohācjū, ni yahuahye Jesu.

**Masa tiquina cueatiqiore
yahuahye Jesu**

(Mt 10.28-31)

⁴Sa yero Jesu yahu nemoahye tiquinare:

—Poto niita niaja musare. Masare wejēnequina wejē tuhasa pari turi tiquina wejōriquina munare ñano ye nemo masiedare. Sa yena musare wejē duayequinare cueracāhña.

⁵Yojopure masa cueatiqiore masa ño peoatiqiore yahutja. Cohācjū pehere cue, ño peoya. Tiquiro masa yariari bato pecapu cohā masine musare. Sata ijire. Poto nigū niaja. Cohācjū pehere cue, ño peoya.

⁶Ihcā omopequina siripia wapa mariedare. Sa wapa mariedapegūta ihcāquiogāre Cohācjū ne boerare.

⁷Sa yero masa poarire ne ihcā poa da dñsaro marieno masi pehere Cohācjū. Sata masa ijiye tiye gūhure masi pehere Cohācjū. Sa masino musare ihña ihboducure. Siripia yuhduoro Cohācjū cahīne masa pehere. Sa yena tiqiore ño peona, cueracāhña masa, niahye Jesu.

**Jesu yequina masa
ijiyere yahuya masare**

(Mt 10.32-33; 12.32; 10.19-20)

⁸Sa ye Jesu yahu nemoahye:

—Musare niita niaja. Ihcāquiore “Jesu yaquiore ijiaja”, masare tiqiore nigū ihñagu, yuhū masu Cohācjū ohorigu “Tiquiro yaquiore ijire”, ni yahutja Cohācjū yequina angelere. ⁹Ihcāquiore “Jesu yaquiore ijieraja”, masare tiqiore nigū, yuhū gūhū “Tiquiro yaquiore ijierare”, ni, yahutja Cohācjū yequina angelere.

¹⁰Ihcāquiore yuhūre ñano tiqiore ni yahuducugū ti ñañene Cohācjū bo ma-

sine. Sa boeperota ihcāquiore Espiritu Santo pehere tiqiore ñano ni yahuducugū ti ñañene ne Cohācjū bosí.

¹¹Mari judio masa buheri wuhupū puhtoah cahapū apequina musare ne sajà “Ñañequina ijire”, ni yahusāeta. Tiquina sa yahusāgū masa yahuducuatire “Acuehi, masiedaboaga”, ni tuhouteracāhña. ¹²Tiquina musare yahusāgūta Espiritu Santo masa yahuducuatire yahurota, niahye Jesu.

**Doeri cjē upuro
quitire yahuahye Jesu**

¹³Sa ye masa mehna cjūno Jesure ohō saha ni yahuahye:

—Buhegu, usā pacu tiqiore yariari bato tiqiore ye usāre tojoare. Sa yegu yuhū wahmine tire yuhū gūhure queoro tu wa dutiya, niahye tiqiore Jesure.

¹⁴Tiquiro sa nigū Jesu yuhūtiahye:

—Ne ti borore tu wabogu ijieraja yuhū, niahye Jesu tiqiore.

¹⁵Sa ni tuhasa Jesu ijipihtiyequinare yahuahye:

—Quehnoano yeya masa. Doeri cjēne, apee boro gūhure cahīedacāhña. Peye cnoepenata ti mehnata bucueducueraja mari, niahye Jesu.

¹⁶Sa ni tuhasa Jesu quití mehna yahuahye tiquinare:

—Doeri cjē upuro quehnoari yehpare cuoahye. Sa ye ti yehpapū tiqiore otegū quehnoano dūca tiahye. ¹⁷Sa yero tiqiore basi ohō saha ni tuhutumahye: “Dūca ihboye wuhuse ne esa tuhaerare. ¹⁸Yojopure ohō saha yeitja: Yojopū yuhū ihboye wuhusere cohā cā, muna wuhuse yuhduoro wahma wuhuse yeitja. Ti wuhusepū yuhū oteye dūcare, ijipihtiyere yeere ihboutja. ¹⁹Yuhū sa yeri bato, ohō saha ni, tuhutumahye yuhū basi: ‘Yuhū peye apee boro cuogu ijiaja. Quehnoano soutja. Sa yegu ihya, sihni, bucuaitja’, ni tuhutumahye yuhū basi”, ni tuhutumahye tiqiore. ²⁰Tiquiro sa ni

tuhotugū Cohācjū tiquirore yahuahye: “Muhū ne tuho masiegu ijire. Mia ñamita muhū yariaguta. Muhū sa wahagū muhū ye, muhū cahīdi butia waharota”, niahye Cohācjū tiquirore, niahye Jesu masare.

²¹ Tire nino, masare ohō saha ni yahuahye Jesu:

—Sata wahaeta doeri cjē opana Cohācjūre wacūeñequina. Sa yero peye doeri cjēne, niñerure tiquiro ye ijiasi dihitare ihboriquiro Cohācjūre wacūedarō, tiquiro pejecuoriquiro yero saha ijirota, Cohācjū tiquiro ihñagū. Sa yero Cohācjū tiquirore ihña bucuere, niahye Jesu.

Cohācjū tiquiro pohnene ihña ihbore (Mt 6.25-34)

²² Sa ye Jesu tiquiro buheyequinare ohō saha ni yahuahye:

—Ahrire musare nigu niaja: Musa ihyatire, musa suhti sañatire, pajiro bujua witi tuhoturacāhña. ²³ Cohācjū musare bajumehnenō, ihyatiquina dihitare yerari musare. Sa yero suhti sañatiquina dihitare yerari musare tiquiro. ²⁴ Minicjua parire Cohācjū tiquiro ihña ihboyere masiña. Tiquina weseri marieñequina ijire. Sa ye ihyayere tiquina ihboye wuhuse tiquinare mariedare. Tiquina sa ijigū ihñano tiquinare Cohācjū tiquina ihyatire ohore. Minicjua yuhduoro musa pehere cahīne Cohācjū. ²⁵ Pajiro musa tuhutuye mehna ti musare ihcā hora cati nemogū yerare. Sa yero musa pajiro tuhutuye duhseati ijierare. ²⁶ Sa ye pajiro musa tuhutuye mehna ne mehenogā ye masiedare musa. ¿Sa yena pajiro musa tuhutuye ti duhseati ijierapegūta duhse yena musa ihyatire, musa sihniatire, musa sañatire pajiro bujua witi tuhotuajari?

²⁷ Nucū cjē cohore tuhutuya. Ti cohorī ti basi suhtire yerare. Sa yerapeta quehnoañe suhti sañañequina

yero saha quehnoano bajure ti cohorī. Salomo munano quehnoañe suhtire sañariquiro tiquiro ijiepegūta ti cohorī pehe tiquiro yuhduoro quehnoa yuhduaye cohorī waro ijire. ²⁸ Cohore quehnoañe cohorī yere Cohācjū pehe. Tiquiro sa yepegūta cohorī pehe meheñe decorigā ijiducume ñai bora dijiaa wahare. Mehenogā iji, ape deco pecapu ujūa wahare. Ti sa ijiepegūta cohore quehnoañe cohorī ijigū yere Cohācjū. Sa yero Cohācjū cohore tiquiro quehnoañe cohorī tiquiro yeriro yuhduoro musa gūhure quehnoano yerota. Suhtire ohorota. Mehenogā Cohācjūre wacū tutuare musa. ²⁹ Sa yena musa ihyatire, musa sihniatire pajiro bujua witi tuhoturacāhña. ³⁰ Cohācjūre cahmeñequina pehe ahri yehpa cjēna pehe tire sa macaducuye nine. Mari Pacū uhmuse cjūno ijipihtiye musa cahmeñene masine. Tiquiro sa masigū pajiro bujua witi tuhoturacāhña. ³¹ “Cohācjū yuhū puhtoro ijire”, ni tuhotu, tiquirore cahmeña musa. Musa sa yeri bato Cohācjū pehe musa cahmeñe duhsagū ohorota, ni yahu nemoahye Jesu.

Uhmusepu mari peye cuo masiaja (Mt 6.19-21)

³² Sa yero tiquinare yahu nemoahye:

—Yuhū cahīna, meheñequinagā ijiepenata, cueracāhña musa. Cohācjū tiquiro puhtoro ijiorpore tiquiro mehna musa ijigū cahmene tiquiro. ³³ Sa yena musa yere dua pehoya. Tire dua, ti niñerure ne, pejecuoyequinare ohoya. Sata musa yegū uhmuse cjē musa wapataye ne pihtisi. Uhmusepu musa ye ijiro ne pihtierare. Topore musa yere nea masiedare yaqueriquiro. Sa ye mecasia gūhū tire tua masiedare. ³⁴ Uhmusepu musa ye ijigū uhmuse cjē dihitare tuhutonata musa, niahye Jesu.

Jesu tiqiro tojoa tatire cohte dutiahye tiqiro yequinare

³⁵⁻³⁶ Sa ni tuhasa tiquinare yahu nemoahye:

—Musa yere quehnoyu tuhasariquina yero saha yeere sa yeducuna ijina yuhure cohteya. Dahra cohteyequina tiquina puhtoro omoca duhteri bose decopu tiqiro wahagu tiqiro tojoa tatire tiquina cohtere. Tiquina sa cohteriro saha yuhu tojoa tatire cohteya musa guhu. Puhtoro tiqiro wuhupu wihi, sopecahare tiqiro dotegu tuhoye tiquina duita po sore tiqirore. ³⁷ Dahra cohteyequina tiquina puhtoro wihigu tiqiro cahmeno sahata yeducuyequina ijiye, bucueyequina ijieta. Tiquina sa yegu ihnano puhtoro pehe dahra cohteriquiro yero saha comesarota. Sa yero dahra cohteyequinare duji dutiro, tiqiro tiquina ihyayere peorota. ³⁸ Tiquiro wihiri pje nami decopu, o bohreagupu ijiepeguta dahra cohteyequina pehe tiqiro wihiri pjere tiqirore quehnoano cohteyequina ijiye, bucueyequina ijieta tiquina. ³⁹ Ahrire wacuna. Yaqueriquiro wuhupu tiqiro wihiatu pano ti wuhu cjueno masiedare. Wuhu cjueno yaqueriquiro tiqiro wihiatore masino, yaqueriquirore sajā ta dutieraboaga. Sa yero wacueno mehna ahtare yaqueriquiro. ⁴⁰ Sa yena musa guhu cohteya. Yuhu masu Cohacju ohorigu wacueno mehna ahtautja. Sa yena yeere sa yeducuna ijina cohteya musa, niahye Jesu tiquinare.

Apequiro dahra cohteriquiro tiqiro puhtoro tiqiro no peogu, apequiro pehe no peoerahye

(Mt 24.45-51)

⁴¹ Tiquiro sa nigu Pedro pehe sinitu-ahye Jesure:

—¿Ahuri quitire yahugu usare nigu ni-ajari? ¿O ijipihtieyequinare sa nigu ni-ajari? niahye Pedro.

⁴² Tiquiro sa nigu Jesu tiqiro tuhoye mehna ohō saha ni queoye mehna buheahye tiquinare:

—Dahra cohteriquiro tiqiro puhtoro no peoriquiro tuho masiniquiro ohō sahata ijire. Puhtoro tinino waharo, dahra cohteriquirore tiqiro ya wuhure cure. Tiquiro cunohriquiro pehe dutiriquiro ijirota. Sa yero tiqiro ihyari pje ijigu apequina dahra cohteyequinare ihyayere itire. ⁴³ Came puhtoro tiqiro wihigu dahra cohteriquiro pehe tiqiro puhtoro tiqiro dutiriro sahata ye pehoriquiro ijiro, tiqiro bucueriquiro ijirota. ⁴⁴ Poto niguta niaja musare. Tiquiro sa yegu tiqiro puhtoro ijipihtie tiqiro yere ihna ihboriquiro cunota tiqirore. ⁴⁵ Apequiro dahra cohteriquiro pehe “Yuhu puhtoro yoari pje bajuerare”, niboaga. Sa nino apequina dahra cohteyequinare umuare, numia guhure que muja, pajiro ihya, sihni, queheboaga. ⁴⁶ Tiquiro sa yeri bato wacueno mehna tiqiro puhtoro wihirota. Sa wihiro tiqirore nano buhiri dahrerota. Sa yero Cohacjare yuhduducayequinare tiqiro cohānopu tiqirore cohānota.

⁴⁷ Sa yero dahra cohteriquiro tiqiro puhtoro cahmeñene masiniquiro ijieperota tire tiqiro yeragu, tiqiro quehnoano dahraeragu tiqiro puhtoro pehe tiqirore yuta da mehna tananota. ⁴⁸ Apequiro pehe dahra cohteriquiro tiqiro puhtoro cahmeñene masieniquiro ijiro quehnoano yeragu ihnano tiqiro puhtoro pehe derogā tiqirore tananota. Cohacju pajiro masare ohoro pajiro tiquinare apequinare oho dutirota. Sa yero tiqiro cahmeñene masigu yere masare. Quehnoano tiqiro masigu

yenohriquinare quehnoano yũhti dutire tiquiro, niahye Jesu.

Jesu masare cahme tu wagũ yere

(Mt 10.34-36)

⁴⁹Sa ni tuhasa Jesu tiquinare yahuahye tja:

—Peca Ƴjũa weriro sahata yũhu ahri yehpapũre masa tiquina ñaÑe yeyere cose wegũ ahtagũ nii. Yojoꝑũ pũrita peca Ƴjũa wero saha ñaÑe marieÑe-quina masa tiquina ijigũ tutuaro cahmeaja yũhu. ⁵⁰Yũhu ñano yũhdũtja. Yũhu sa ñano yũhdũatire cohtegu, ñano jeripohna tiaja yũhu. ⁵¹¿Dũhse ni tuhotuajari mũa yũhũre? ¿“Tiquiro masare tiquiro buheri bato apequina tiquina basi ihña tuhtisi”, ni tuhotuajari mũa yũhũre? Sa ijierare. Masare yũhu buheri bato ihquẽquina yeere tuhoeta. Apequina pehe tiquinare ihña tuhtieta. Ihcãno saha ijisi masa. Mũsare nigũta niaja. Masa yũhu buheyere tuhoye, pũa curua cahme tu waeta. ⁵²Yojoꝑũre ihcã wũhu cãena ihcã omopequina masa yũhu buheyere tuhoye, pũa curua tiquina basi cahme tu waeta. Ihcã curua ihtiaro, ape curua pũaro ijietia. ⁵³Tiquiro pacũro tiquiro macũnore ihña tuhtirota yaquiro tiquiro ijiri buhiri. Tiquiro macũno gũhu tiquiro pacũrore ihña tuhtirota yaquiro tiquiro ijiri buhiri. Sa yero ticoro pacoro maconore ihña tuhtirota yacoro ticoro ijiri buhiri. Sa yero apecoro macono gũhu ticoro pacoro ihña tuhtirota yacoro ticoro ijiri buhiri. Sa yero ticoro mareono ticoro macũ namonore ihña tuhtirota yacoro ticoro ijiri buhiri. Sa yero apecoro macũ namono gũhu ticoro mareonore ihña tuhtirota yacoro ticoro ijiri buhiri. Sa waharota, yũhu buheyere tiquina tuhogũ, niahye Jesu.

Quehnoari deco ijiatire, ñari deco ijiatire masa tiquina masiÑene yahuahye Jesu

(Mt 16.1-4; Mr 8.11-13)

⁵⁴Sa ye Jesu masare ohõ saha ni yahuahye tja:

—Ahrie peheꝑũ acoro cururire ihñana, duita “Acoro ahtarota”, nine mũa. Mũa sa nidi bato acoro ahtare. ⁵⁵Sa yena surpũ wihnono ahtagũ “Asiri deco ijirota”, nine mũa ahri yehpapũ ijina. Mũa sa nidi bato cũhmari deco ijire. ⁵⁶Mũa masa ihñonopũ quehnoano iji mehoducuna ijire. Mũa ahri yehpare Ƴhmũse gũhũre ihñana, quehnoari deco ijiatire, ñari deco ijiatu gũhũre masine mũa. ¿Sa yena yojoꝑũ cãe decorire masiepenata dũhsena ahri yehpa cãana yojoꝑũre mũa dũhse wahatire masiedajari mũa? niahye Jesu.

Mũsare ihña tuhtiriquiro mehna mũa cahmequidire cahmeque duhuya

(Mt 5.25-26)

⁵⁷Sa ni tuhasa ohõ saha ni yahu nemoahye:

—¿Mũa poto yeatire yojoꝑũ masiedajari mũa? ⁵⁸Apequiro mũhũre yahusãno waharo buhiri dahre dutiri wũhũꝑũ waha dutiboaga. Topũ wahana “Pari turi mũhũre sa yesi”, nigũ cahmeque duhuya. Mũhu sa duhueragũ tiquiro buhiri dahre dutiriquiro cahapũ neaboaga mũhũre. Sa yero buhiri dahre dutiriquiro pehe mũhũre surarare tiquiro ohogũ, mũhũre surara peresu yeeta. ⁵⁹Mũhũre nigũ niaja. Topũ ijiniita mũhu. Tee tiquina wapa ye dutirire mũhu wapa ye pehogũꝑũ wijiaguta mũhu, niahye Jesu.

**Musa ñañe yerire bujua witi,
quehnoañe pehere comesaya**

13 Ti pjere meheñequinagã masa Jesure ohõ saha ni yahue tiahye:

—Galilea cǵena wahiquirore wejẽ ujãa muo Cohãcjũre tiquina ño peori watoa Pilato pehe tiquinare wejẽahye. Tiquiro sa wejẽgũ wahiquiro dii mehna masa dii moreahye, ni, yahuahye tiquina Jesure.

²Tiquina yahu tuhasagũ Jesu yuhtiahye:

—¿Galilea cǵena Pilato tiquiro wejẽgũ wejõriquina munare duhse ni tuhotu-ajari musa? ¿Tiquina sa yariagũ apequina Galilea cǵena yuhduoro ñañequina tiquina ijiri buhiri sa yeyari Cohãcjũ tiquinare, musa tuhotugũ? ³Ijierare. Musare niita niaja. Musa pehe musa ñañene bujua witierana, quehnoañe pehere comesaerana, musa gũhu yariana pecapũ wahanata. ⁴Sa ye sohõ ijiriquina diez y ocho masa Siloé wame tiri wũhu uhmũari wũhu tiquina bui wihnoa dijiaro, tiquinare wejẽ pehoahye. ¿Sa waha yariaye, apequina Jerusalẽ cǵena yuhduoro ñañequina ijiyari tiquina, musa tuhotugũ? ⁵Ijierare. Musare niita niaja. Musa ñañene bujua witierana quehnoañe pehere comesaerana, musa gũhu yarianata. Sa yena pecapũ wahanata, niahye Jesu tiquinare.

**Higueragu duca mariedũ
quitire yahuahye Jesu**

⁶Sa ni tuhasa apeye queoye mehna piti dahre yahuahye tiquinare:

—Wese upũro tiquiro wesepũ higueragũre cuoahye. Sa yero tiquiro tu dũcare macano wahamahye. Bocaerahye. ⁷Bocaeraro tiquiro wese dahrariquirore yahuahye. “Tũhoya yũhũre. Ihtia cũhma waro higueragu dũcare macamaja. Dũca mariedare. Tũ dũca mariedagũ tũre quẽ cohã cãhã. Tũ ya wesepũ ijigũ apedũre

otero basioerare. Apedũ tu ihyaborire ihyaboaga tu dũca mariedũ pehe”, niahye wese upũro tiquirore dahra cohteriquirore. ⁸Tiquiro sa nigũ tuhoro dahra cohteriquiro ohõ saha niahye: “Pũhto, ahdu ihcã cũhma waro ducuriãhdo. Tũ nuhcoripũ yũhu sehegũtja. Tuhasa, wahiquiro cũhta mehna ti copere yautja. ⁹Yũhu sa yeri bato tu ape cũhma dũca tiro dũca tiboaga. Tũ dũca mariedagũ muhu quẽ cohã dutiguta”, niahye dahra cohteriquiro wese upũrore, ni, yahuahye Jesu.

**Saurũ deco ijigũ Jesu
dohatiricorore yuhduoahye**

¹⁰Ti pjere saurũ deco ijigũ Jesu judio masa buheri wũhũpũ buhero niahye. ¹¹Topũ watĩno cuoricoro ijiahye. Watĩno pehe diez y ocho cũhmari waro dohatigũ yeahye ticorore. Sa yero pari tjũ ducuricoro ijiro, poto ducu masiedahye. ¹²Ticoro sa ijigũ ihũano Jesu ticorore ihũna, pisuahye:

—Numio, muhu dohatiye pihitia wahare, ni, pisuahye Jesu.

¹³Tiquiro pisuri bato ticorore tiquiro ña peogũ duita ticoro quehnoano poto dũca sahye. Sa waharo “Cohãcjũ tutuagu, quehnoagu ijire muhu”, ni ño peoahye ticoro. ¹⁴Jesu ticorore saurũ deco ijigũ tiquiro yuhduogũ ihũano judio masa buheri wũhu cohteriquiro pehe tiquiro mehna usuahye. Sa usuario tiquiro masare ohõ saha niahye:

—Seis decori ijire mari dahraye decori. Sa yena musa dohatiyequinare yuhduo duana, ti decorire tire yeya. Saurũ mari sori decore tire yeracãhã, niahye ti wũhũre cohteriquiro.

¹⁵Tiquiro sa nigũ Jesu ohõ saha ni yuhtiahye:

—Masa ihũono dihita quehnoana iji mehona ijire musa. Musa wecũre, burro gũhũre cuona saurũ decore tiquina duh-

teri dare pã, tiquinare ne buha, sihni dutiboaga. ¹⁶Yojopũ ahricorore Abrahã mũnano acayorore watino diez y ocho cũhmari waro ticorore dohatigũ yere. ¿Saurũ deco ijigũ ticorore yũhdũo dutierajari musa? niahye Jesu.

¹⁷Tiquiro sa nigũ tuhoye, tiquina bũoro wahahye. Sa ye apequina pehe ijipihtiyequina Jesu yerire ihña, bucueahye.

Mostaza pje queoyere yahuahye Jesu

(Mt 13.31-32; Mr 4.30-32)

¹⁸Sa ye Jesu queoye mehna buheahye masare:

—¿Ne Cohãcjũ masa pũtoro tiquiro ijiye yabe boro yero saha ijjajari? Ahri quti mehna tire tiquiro pũtoro ijijere yahutja yũhũ. ¹⁹Mostaza pjegã yero saha ijire. Ti pjegãre oteriquiro tiquiro ya wesere otere. Tiquiro oteri bato ti pjegã pihnine. Sa ye tu bũcuagũ minicjũa pari ti dũpũripũ suhti suhare, niahye Jesu. (Sa nino ohõ saha nino niahye. Mostaza pjegã pajidu tu bũcuariro saha uhmũse cjũnore mari pũtorore masiñequina meheñequinagã tiquina iji muhtaepẽgãta camerũ tiquina peyequina wahaeta.)

Pã pugũ yeye queoyere yahuahye Jesu

(Mt 13.33)

²⁰Sa yero pari turi Jesu queoye mehna buheahye:

—¿Ne Cohãcjũ masa pũtoro tiquiro ijiye yabe boro yero saha ijjajari? ²¹Pãre pugũ yeye yero saha ijire. Tire numino ihcã ajuro trigore aco mehna quehnoano tire dahra morene pã bũcuatire. Ticoro sa yegũ pãre pugũ yeye pehe trigore quehnoano sehssa wahare, niahye Jesu. (Sa nino ohõ saha nino niahye. Pãre pugũ yeye trigore ti sehssa wahariro saha uhmũse cjũnore mari pũh-

torore peyequina masa ijipihtiro cjẽna masieta.)

Meheni sopecahagã quitire yahuahye Jesu

(Mt 7.13-14, 21-23)

²²Sa ye Jesu bũjũye macaripũ, daye macarigãpũ gũhũre buhe cã, Jerusalẽpũ esaro taro niahye. ²³Tiquiro sa wahari watoa masũno Jesure ohõ saha ni sinituahye:

—¿Pũhto, meheñequinagã masare pecapũ wahaboriquinare yũhdũorotari Cohãcjũ? niahye tiquiro Jesure.

Tiquiro sa nigũ Jesu queoye mehna buhero ohõ saha ni yahuahye:

²⁴—Peyequina masa Cohãcjũ cahapũ waha duaye, sajã duamene. Meheni sopecahagãre musa sajã duagũ mijorĩne. Sata Cohãcjũ cahapũ musa waha duagũ mijorĩne. Masa sa sajã duepeta sajã masiedare. Sa yena musa pehe mehni sopecahagãre musa tutuaro sajã duaboro sahata Cohãcjũ pehere tutuaro masiña. ²⁵Ohõ saha yerota Cohãcjũ peyequina masare. Tiquiro wũhũ upũro yero saha ijire. Wũhũ upũro wahcã, sopecahagãre biharota. Tiquiro sa yegũ sopecahagãpũ ducuna, dotenata. Dotena ohõ saha ninata. “Pũhto, sope pahmare pũohña”, musa nigũ wũhũ upũro pehe yũhtirota. “Musare, musa ahtariro gũhũre ne masiedaja yũhũ”, ni yũhtirota. ²⁶Tiquiro sa nigũ musa yũhtinata. “Mũhũ mehna usã ihya, sihni. Usã ya macapũ buheri mũhũ”, ninata musa. ²⁷Musa sa nigũ tiquiro pehe yũhtirota. “Musare, musa ahtariro gũhũre ne masiedaja. Ijipihtina musa ñañe yerina yũhũ cahapũ ahtaeracãhña”, ninota wũhũ upũro. ²⁸Sa ye Abrahãre, Isaare, Jacore, ijipihtiyequina Cohãcjũ yere yahu muhtariquinare Cohãcjũ tiquiro pũtoro ijire tiquina ijigũ ihñana, musa pehe sopecahapũ cohõrina ijina tutuaro utinata. Sa yena musa tutuaro bũjũa witina, bahque di-

honata. ²⁹Ti pjere ijipihitiro cjēna Cohācjū tiquiro puhtoro ijiropure esa, tiquiro mehna ihya dujieta. ³⁰Yojopure ihyo ijiyequina ijiriquina ti pjere puhtoa ijieta. Sa yeye yojopure puhtoa ijiriquina ti pjepure ihyo ijiyequina ijieta, niahye Jesu.

Jerusalē cjēnare tutuario cahīahye Jesu

(Mt 23.37-39)

³¹Ti pjere meheñequinagā fariseo masa Jesu cahapu esa, tiquirore yahuahye:

—Herode mūhure wejē duare. Sa yegu ape siepu wahaya mūhu, niahye tiquirore.

³²Tiquina sa nigū Jesu pehe yuhtiahye:

—Herode ni mehoñe peyariquiro ijire tiquiro. Ohō saha ni yahuya tiquirore: “Jesu watīare cohāno nine. Sa yero dohatiyequinare yuhduoro nine. Tire miare, ñamia gūhure yerota. Sa yero ñamia bohrearo dahra bato tirota”, ni yahuya Herodere. ³³Sa yegu miare waha, ñamia gūhure waha, ñamia bohrearo gūhure waha, Jerusalēpu esautja. Cohācjū yere yahu muhtagure yuhure wejēeta masa. Cohācjū yere yahu muhtariquinare tiquina wejēgū Jerusalēpu ijiro cahmene tiquinare. Sa yegu yuhu gūhure Jerusalēpu ijiro cahmene.

³⁴Ahyou, Jerusalē cjāna, masa Cohācjū yere yahu muhtariquinare wejē, masa cahapu tiquiro ohoriquinare utā paca mehna doque wejēdi masa. Canaca ticoro pohnene wūye dupuri mehna ticoro moha cuñano saha peye tahari musare cahīducumi. Musare cahmemi. Masa pehe yuhure ne cahmedari. ³⁵Yojopu masa ya maca cohōri maca ijirota. Ijirota niita naja musare. Cohācjū mari puhtoro tiquiro tutuaye mehna ahtautja yuhu. Yuhu ahtagū masa yuhure

“Cohācjū tutuaye mehna ahtariquiro quehnoahdo”, ninata. Yuhure masa tire niato pano pari turi yuhure ihñasi masa, niahye Jesu.

Dohatiriquirore yuhduoahye Jesu

14 Ape deco saurú ijigū fariseo masa puhtoa mehna cjūno ya wuhupu Jesu ihyarō wahahye. Ti wuhupu ijiyequina tiquirore ihña nūñahye. ²Sa yero omoca, ñecu gūhu ipinohriquiro tiquiro cahapu esahye. ³Sa yero Jesu judio masare buheyequinare, fariseo masa gūhure sinituahye:

—¿Saurú ijigū dohatiriquirore yuhduo dutiajari Cohācjū yere tiquina ojoari pūpu? niahye Jesu.

⁴Tiquiro sa ni sinituepegūta tiquina yuhtierahye. Tiquina yuhtieragū ihñano Jesu dohatiriquirore yuhduo, “Wahaya”, niahye tiquirore. ⁵Sa ye tuhasaro, tiquinare sinituahye tja:

—¿Ihcāquiro masa mehna cjūno tiquiro macno saurú deco mari sori deco ijigū aco ijiri copepu tiquiro bora sajāgū ne wioeraboagari, masa tuhotugū? ¿Tiquiro yaquiro wecu gūhure ne wioeraboagari, masa sa nina? Ne wioboaga tiquiro, niahye Jesu.

⁶Tiquiro sa niepegūta tiquina tiquiro siniturire yuhti masiedahye tja.

Omoca duhteri bese deco ijigū pijiariquinare yahuahye Jesu

⁷Fariseo masuno ya wuhupu ijiro ti wuhu cjūno tiquiro pijioriquina quehnoañe dujiyere tiquina besegū ihñahye Jesu. Sa ihña tuhasa ohō saha ni yahuahye ijipihitiquinare:

⁸—Omoca duhteri bese deco musare tiquiro pijiogū, quehnoañe dujiyere bese dujieracāhña. Masa yuhduoro cua pesayequinare pijioaboaga ahri wuhu upuro. ⁹Tiquiro sa yegū masa quehnoañe dujiyepu dujigū “Ahriquina cua pesayequina pehere masa dujiyere

ohoya”, niboaga wuhũ upũro musare. Tiquiro sa nigũ musa pehe buoro wahana, ñaÑe dujiyepũ dujiboaga. ¹⁰ Sa yena wuhũ upũro musare tiquiro pijiogũ, ñaÑe dujiyepũ duji mahtaña. Musa sa yegũ wuhũ upũro musare “Quehnoañe dujiye pehere dujina ahtaya”, ninota musare tiquiro. Musa sa wahagũ apequna tiquiro pijioriquina pehe musare ño peoye mehna ihñaeta. ¹¹ Ihcãquiro tiquiro basi “Puhtota ijiaja”, ni tãhoturiquiro cahacjũno ijirota. Sa yero apequro “Cahacjũ ijiaja”, ni, tãhoturiquiro, apequnare yuhdũduca dueriquiro tiquiro pehe puhtoro ijirota, niahye Jesu tiquinare.

¹² Sa ni tuhasa Jesu wuhũ upũrore yahuahye:

—Muhũ bose deco dahregũ muhũ cahapũ ijiyequinare, muhũ bahanare, muhũ acayere, doeri cjẽ opanare pijioeracãhña. Muhũ tiquinare pijiogũ muhũ gũhũre tiquina gũhũ piji cahmeeta. Sa piji cahmeÑe muhũre tiquina wapamonore wapa yeeta. ¹³ Muhũ bose deco dahregũ pejecuoyequinare, tini masieÑequinare, pari yuri wahayequinare, caperi bajueyequinare pijiohya. ¹⁴ Muhũ sa yegũ ihñano Cohãcjũ muhũre quehnoano yerota. Tiquina pehe muhũre tiquina wapamonore wapa ye masiedare. Sa yero quehnoañequina yariariquina tiquina masa mujari pje ijigũ Cohãcjũ pehe quehnoano muhũ yeri wapa muhũre quehnoano yerota, niahye Jesu wuhũ upũrore.

**Pajiri bose deco
queoyere yahuahye Jesu**

(Mt 22.1-10)

¹⁵ Tiquiro sa nigũ tuhoru apequro ih-yari mesa cahapũ dujiriquiro, Jesure yahuahye:

—Cohãcjũ tiquiro puhtoro ijiropũ tiquiro ih-yari mesa cahapũ dujiye-

quina tutuaro bucueyequina ijietã, ni-ahye tiquiro Jesure.

¹⁶ Tiquiro sa nigũ Jesu ahri queoyere yahuahye tiquirore:

—Pajiri bose deco dahreriquiro peyequina masare pijioahye. ¹⁷ Tiquiro pijiori bato bose deco tiquiro cahacjũnore tiquiro pijioriquinare yahu dutiro ohoahye. “Isa, ijipihiyere bose deco cjẽ ijiatire quehno tuhasari. Sa yero musare pijiori”, ni, yahu dutiahye tiquiro cahacjũnore. ¹⁸ Tiquiro cahacjũno tiquiro sa ni yahuepegũta, tiquiro pijionohriquina pehe “Waha masiedaja”, niahye tiquina. Tiquiro pijio mahtanohriquiro ohõ saha ni yahuahye tiquiro cahacjũnore. “Mianogãta yehpare dũu. Sa yegũ ti yehpare ihñagũ wahagũ niaja. Sa yero waharo basioeraga. No peo cjũña muhũ yũhũre. Yũhũre basioerare”, niahye tiquiro pijio mahtanohriquiro pehe tiquiro cahacjũnore. ¹⁹ Apequro pehe ohõ saha niahye: “Wecuare pũa omoca pihtiyequinare mianogãta dũu. Buhe tuhugũ wahau tũu niaja ti weje cãtore. Sa yegũ wecuare ‘¿Quehnoano dahrajari?’ ni ihñagũ wahagũ tũu niaja. Sa yegũ wahasi. Yũhũre basioerare”, niahye tiquiro gũhũ. ²⁰ Apequro pehe ohõ saha niahye: “Yũhũ mianogãta omoca duhteĩ. Sa yero bose decopũ waharo basioeraga yũhũre”, niahye tiquiro cahacjũnore.

²¹ Tiquiro sa nigũ cahacjũno pehe tojoa waha, tiquiro puhtoropũre tiquina nidire yahu peho cãhye. Tiquiro sa ni yahugũ tiquiro puhtoro tutuaro usua, ohõ saha niahye tiquiro cahacjũnore. “Wuhũse watoa cjẽ maharipũ wahaya. Pejecuoyequinare macarĩsa. Sa yegũ pejecuoyequinare, tini masieÑequinare, caperi bajueyequinare, pari yuri wahayequinare umuñano ne cãhtaya tiquinare”, niahye puhtoro. ²² Came cjũnogã tiquiro cahacjũno yahuahye

tiquiro puhtorore: “Puhto, muhu dutiriro sahata yei. Yuhu sa yepeguta apequina guhu esa tuhaeta”, niahye tiquiro cahacjuno. ²³Tiquiro sa nigu puhtoro tiquirore dutiahye: “Ihque wuhuse ijiropu wahaya. Topu bujuye maharipu, daye maharigapu guhure masare ya wuhuru ahta dutiya, ya wuhuru tiquina wahpagu. ²⁴Poto niita niaja muhure. Ahriquina yuhu pijio muhtamediquina yuhu ihyayere ne mehenoga ihyasi”, niahye puhtoro, ni yahuahye Jesu.

Jesu mehna wahagu mijorine

(Mt 10.37-38)

²⁵Ti pjere peyequina masa Jesu mehna wahahye. Sa yero Jesu tiquinare majare ihna, yahuahye:

²⁶—Ihciquiro yuhu buheriquiro iji duaro apequina yuhduoro yuhu pehere cahino cahmene. Tiquiro pacurore, tiquiro pacorore, tiquiro namonore, tiquiro pohnene, tiquiro bahanare, tiquiro pagu guhure tiquiro cahino yuhduoro yuhu pehere cahino cahmene. ²⁷Ihciquiro yuhu buheriquiro iji duaro yeere sa yeducuriquiro ijirota. Sa yero yaquiro tiquiro ijiri buhiri nano yuhduerperota yuhure ne duhusi. ²⁸Ahrire masiyuro cahmene musare. Oho saha ijire ti: Wuhu dahreriquiro tiquiro umuari wuhure yeato pano wuhu wapa tiatire queo muhtare. Sa yero, ti wuhure tiquiro pehoatire masine tiquiro. ²⁹Wapa tiyere queoraro ti wuhure yero pehoerabo. Sa ye tiquirore ihnaequina bujubebo. ³⁰“Ahriquiri ti wuhure yero, tutuerare”, ni, bujubebo. ³¹Puhtoro apequiro puhtoro yeequina mehna tiquina cahmequeato pano, tiquiro yequina surarare tiquiro cahme wejē dutiato pano, tiquiro yequina surarare queorota. “¿Yuhu diez mil surara mehna apequiro veinte mil

surara cuoriquiro mehna cahme wejegu tutueraboagari yuhu?” ni, tuhoturo queorota tiquiro. ³²Sa queoro, tiquiro tutueratire masinota. Sa masino apequiro puhtoro tiquiro yequina surara mehna cahme wejeno ahtariquiro yoaropu tiquiro ijigata, tutueriquiro pehe “Cahme wejedacuhna”, ni dutiro ohoboaga dahra cohteriquirore. ³³Sa yena yuhu buhena iji duana, musa yeatire musare masino cahmene. Musa ye duaye pehere duhu duerana, yuhu buhena iji masiedare, ni yahuahye Jesu.

Moa ocyere yahuahye Jesu

(Mt 5.13; Mr 9.50)

³⁴Sa yero tiquinare yahu nemoahye:

—Moa quehnoano ocare. Ti ocaeragu ocaye yero basioerare. ³⁵Moa ocaeraro ti moa ne quehnoaedare. Ti moare duhsero basioerare. Ti sa ijigu ti moare cohano cahmene. Ne duhseati ijierare ti moa. (Ti duhseati ijieraro saha ijieracahna musa. Cohacju ye pehere cohadedacahna.) Ahrire quehnoano tuhoya musa, niahye Jesu.

Oveja butiriquiro queoyere yahuahye Jesu

(Mt 18.10-14)

15 Sa ye ape deco peyequina wapa ne cohteyequina apequina “Ñanequina”, tiquina niñequina mehna Jesure tuhoye ahtahye. ²Tiquina sa yegu ihnañe fariseo masa, judio masare buheyequina guhu Jesure ihna tuhtye, ohō saha niahye tiquina basi:

—Ahriquiri ñanequinare piti tire. Sa yero tiquina mehna ihyare, ni, yahuducuahye tiquina basi.

³Tiquina sa ni yahuducugu Jesu tiquiro tuhotuye mehna ohō saha ni, queoye mehna buheahye tiquinare:

⁴—¿Cien oveja cuoriquiro ihciquiro oveja butigu ihnano duhse yerotari tiquiro? Ohō saha yerota. Tiquiro

noventa y nueve ovejare tiquina ihyaropu cū, butiriquirore macano waharota. Ovejare bocaropu duhurota. ⁵Tiquirore bocaro bucuero. Sa yero tiquiro butiriquirore wua peo, tiquiro ya wuhupu ne tojoaa waharota. ⁶Ne tojoa sa, tiquiro cahapu ijiyequinare, tiquiro acayere piji cahmecoanota. “Yaquiro oveja butiriquirore boca tuhasa. Sa yena yuhu mehna bucueya”, ninota tiquiro tiquinare. ⁷Poto niita niaja musare. Noventa y nueve oveja peyequina tiquina ijiro sahata, peyequina masa ohō saha ni tuhature: “Ñano yeraja. Sa yegu yuhu ñañene bujua witisí. Quehnoañe pehere comesasi yuhu”, ni, tuhature peyequina masa. Tiquina sa ni tuhutugū ihñañe ihmuse cjēna Cohācjū cahapu ijiyequina bucuere. Apequiro pehere bucuere. Butiriquiro oveja ihcāquirota butiriro sahata tiquiro upuro tiquirore bocariro sahata ihcāquiro ñariquiro tiquiro ñañene bujua witiḡ, quehnoañe pehere comesagū ihñañe, Cohācjū cahapu ijiyequina tutuaro bucuere, niahye Jesu.

Niñeru cjoe butiri queoyere yahuahye Jesu

⁸Sa ni yahu tuhasa, queoye mehna yahu nemoahye tja:

—¿Pua omope cjoeri niñeru cjoeri cuoricoro ihcā cjoe butiḡ duhse yerotari ticoro? Ohō saha yerota ticoro. Sihāriare sihā, wuhure coha, quehnoano maca pehorota. Ti cjoere bocaropu duhurota. ⁹Ti cjoere boca tuhasa, ticoro cahapu ijiyequinare, ticoro mehna cjēnare piji cahmecoanota. “Niñeru cjoe yuhure butiri cjoere boca. Sa yena yuhu mehna bucueya”, ninota ticoro. ¹⁰Potota niita niaja musare. Sata ihcāquiro ñariquiro tiquiro ñañene bujua witiḡ quehnoañe pehere

comesagū Cohācjū yequina angele pehe tutuaro bucueta, niahye Jesu.

Tiquiro macano butiri queoyere yahuahye Jesu

¹¹Sa ni yahu tuhasa Jesu queoye mehna yahu nemoahye tja:

—Bucaro pohne puaro umua ijiahye.

¹²Duhsariquiro pehe ohō saha niahye tiquiro pacurore: “Mai, muhu yariari bato muhu ohoatire yuhure ohoya”, niahye tiquiro pacurore. Tiquiro sa nigū tiquina pacuro puaropureta tiquiro pohnene itiahye tiquiro cuorire.

¹³Mehēne decorigā bato duhsariquiro tiquiro yere ijiphtiyere ne, yoaropu ape yehpau waha wahahye. Topu esaro tuho masieniquiro yero saha ye, tiquiro niñerure, tiquiro yere ye site peho cāhye. ¹⁴Tiquiro ye site pehori bato ti yehpau ne ihyaye mariedi pje iji dūcahye. Sa yero tiquiro ujua ahbahye. ¹⁵Sa yero ti yehpa cjē dahrayere macahye.

Tiquiro bocagū tiquiro puhtoro yesea cohteriquiro sōahye tiquirore. ¹⁶Sa yero tiquiro yeseare nu, tiquina ihyayere ihya duamahye. Tiquiro sa ihya duepegūta ti ihyayere to cjēna ohoerahye tiquirore. ¹⁷Sa ye tiquiro topu wacūahye. “Yuhu pacure dahra cohteyequina pehe bujuye ihyayere ihyare. Tiquina ihya duhari gūhu bujuye duhsare. Tiquina sa quehnoano yuhduri watoa yuhu pehe ohōpu ijigu, ujua ahbagu niaga. ¹⁸Yojopure yuhu pacu cahapu tojoagutja. Yuhu pacu cahapu esagu ohō saha niitja tiquirore:

‘Mai, Cohācjūre ñano yei. Muhu gūhure ñano yei. ¹⁹Ñagu ijiaja yuhu. Muhu macu yero saha ijibogu ijieraja yuhu. Muhure dahra cohteriquiro yero saha yeya yuhure’, niitja yuhu pacure”, ni tuhutuahye tiquiro. ²⁰Sa ni tuhuturota wahcādūca, tiquiro pacuro cahapu tojoaa wahahye. Topu tiquiro

esariquiro tojoa tagū tiquiro pacuro pehe yoaroputa tiquiro macunore ihñahye.

Tiquiro sa wihigū ihñano macunore paja ihñahye. Paja ihñano tiquiro cahapū oma cā, tiquirore quē suhsu maa, tiquiro wahsupure ihmiahye pacuro tiquiro macunore. ²¹ “Mai, Cohācjūre ñano yei. Mūhū gūhure ñano yei. Naḡū ijiaja yūhū. Mūhū macu yero saha ijibogū ijieraja yūhū”, niahye tiquiro pacurore. ²² Tiquiro sa nigū tūhoro pacuro pehe dahra cohteyequinare pijiahye. “Sojaro mehna, quehnoa yūhduari suhtirore ne cāhtaya. Sa yena yūhū macure sãaña. Sãa tuhasa, tiquiro omoca sañari behtore sãa, dahpo suhti gūhure sãaña. ²³ Sãa tuhasa, dihi tiriquiregāre wecūgāre wejēña. Bose deco yeihna mari. ²⁴ Ahriquiro yūhū macu yariariquiro yero saha wahariquiro ijire. Sa wahaeperota yojopure catire tiquiro. Tiquiro butimediquirore pari turi bocaū. Sa yena bōse deco yeihna mari”, niahye tiquiro pacuro. Tiquiro sa nidi bato bōse deco dahre dūcahye tiquina.

²⁵ Ti pjere tiquiro wahmino pehe wesepū ijiahye. Wesepū ijiriquire cohe tojoa taro wūhū cahapū esaro, tiquina basayere tuhoahye tiquiro. ²⁶ Tūhoro, ihcāquiro dahra cohteriquirore pijio, tiquirore sinituahye tiquiro: “¿Dūhse ijio boro basaye niari?” niahye tiquiro dahra cohteriquirore. ²⁷ “Mūhū bahū coheri. Tiquiro quehnoariquiro, catiriquire tiquiro cohegū mūhū pacu dihi tiriquiregāre wecūgāre wejē dutiri”, ni yūhtiahye dahra cohteriquiro. ²⁸ Tiquiro sa ni yahugū tiquiro wahmino pehe tutuaro usuaro, wūhupū sajāedahye. Tiquiro sajāedagū ihñano tiquiro pacuro sopecahapū wijia ta, “Sajā taya”, ni, pijimahye tiquiro macunore. ²⁹ Tiquiro sa pijigū macuno yūhtiahye. “Tūhoya mai. Yoari pje mūhure dahra cohteriquiro

yero saha mūhure yedohomi. Sa yegu mūhū dutiyere ne ihcā taha yūhducaeru. Yūhū mūhure dahra cohtepēgūta yūhure ne ohoerari mūhū. Ne ihcāquiro wahiquirogāre ne ohoerari mūhū yūhure yūhū piti tiyequina mehna yūhū bōse deco dahreatire. ³⁰ Sa yero ahriquire mūhū macu pehe ñañequina numia mehna mūhū yere ye site pehoñohiti. Tire ye site peho tuhasa, wūhupū tiquiro tojoa wihigū dihi tiriquiregāre wecūgāre wejē dutiñohti mūhū tiquiro ihyatiquire”, niahye tiquiro wahmino pehe pacurore. ³¹ “Macu, yūhū mehna ijipihtiye decori mūhū ijigū ijipihtiye yūhū cūoye mūhū ye ijire. ³² Mūhū bahū pehe yariariquiro yero saha wahari marine. Sa ye yojopure tiquiro catiriquire ijire. Tiquiro butiriquire yero saha ijiri. Tiquiro sa wahari bato yojopure tiquirore bocaū. Sa yero tiquiro tojoa wihigū mari bōse deco ye bucuegū quehnoare”, niahye tiquiro macunore, niahye Jesu tiquinare.

Niñeru cohteriquiro tūho masiniquiro quitire Jesu yahuahye

16 Sa ye ahri quitire tiquiro buheye-quinare yahuahye Jesu:

—Doeri cjē upuro ye niñerure cohteriquiro niñerure quehnoano tiquiro ihboeragū ihñano apequiro pehe yahusāhye doeri cjē upurore. “Mūhū ye niñerure ye sitero nine”, ni yahusāhye tiquirore. ² Tiquiro yahusā tuhasari bato niñeru cohteriquirore pijioahye. Sa yero tiquiro wihigū ihñano, tiquirore puhtoro yahuahye. “Yee niñerure mūhū ye siterire apequiro yūhure yahuri. Sa yegu yeere cohtegu iji nemosi mūhū. Sa yegu yeere mūhū yerire yahu peho ojoaya. Mūhure cohāḡu niaja”, niahye puhtoro tiquirore. ³ Tiquiro sa nidi bato ohō saha ni tūhotuahye cohteriquiro tiquiro basi: “Yūhū puhtoro yūhure

cohāno taro niaga. Yūhu tutueraja. Sa yegū tutuaro dahra masiedaja. Sa yegū apequinare yūhu niñerure sinigū buoro yūhduboaga yūhu. ¿Sa yegū dahse yeitari yūhu? ⁴Yojopū pūritare yūhu yeatire masiaja yūhu. Ohō saha yūhu yegū yūhu dahraye mariedagū yūhu puhtorore wapamoñequina yūhure cahieta. Sa ye tiquina ye wuhusepū sajā dutieta yūhure”, ni tūhotuahye tiquiro. ⁵Sa ni tūhoturo tiquiro ijipihitiyequina tiquiro puhtorore wapamoñequinare pijioahye. Pijio tuhasa, cohteahye. Wihi muhtariquirore ohō saha ni sinituahye tiquiro. “¿Yūhu puhtorore noho puno wapamoajari mūhū?” niahye tiquiro. ⁶Tiquiro sa nigū wapamoriquiro pehe yūhtiahye. “Cien tambores ūhsere olivo dūca mehna tiquina yeri ūhsere wapamoaja tiquirore”, ni, yūhtiahye. Tiquiro sa ni yahugū cohteriquiro pehe ohō saha ni yahuahye. “Ohōpū ijire mūhū wapamonore ojoa ohōri pū. Dujiya. Sa yegū mūhū wapamonore deco mehna ne, deco mehna ojoa quehnoña”, niahye cohteriquiro wapamoriquirore. ⁷Sa ni tuhasa apequiro wapamoriquirore sinituahye tiquiro. “¿Mūhū waro, noho puno wapamoajari?” niahye tja. “Cien ajuri trigo pjeri ajurire wapamoaja yūhu”, niahye wapamoriquiro niñerure cohteriquirore. “Ohōpū ijire mūhū wapamonore ojoa ohōri pū. Mūhū wapamonore ochenta ojoa quehnoña”, niahye cohteriquiro. ⁸Tiquiro sa quehnoano ni meho mihnigū ihñano “Ahriquiro ni mehoriquiro quehnoano masidiquiro ijiaga”, ni tūhotuahye tiquiro puhtoro niñerure cohteriquirore. Ahri deco cǵēna, Cohācjūre cahmeeñequina tiquina yere quehnorire tiquina niñeru ihborire Cohācjū yequina yūhdūoro masiaga tiquina, niahye Jesu.

⁹Sa ni tuhasa Jesu yahu nemoahye:

—Sa yegū musare niita niaja. Musa cuoyere, pejecuoyequinare musa ohogū, tiquina pehe musare cahieta. Musa sa yegū musa cuoye pihtiaro bato musa ūh-musepū esagū musare cahieta topure.

¹⁰Ihyo ijiyequina ye dahrayere poto yena, puhtoa ye dahraye gūhure poto yenata. Ihyo ijiyequina ye dahrayere queoro yerana, puhtoa ye dahraye gūhure queoro yesi musa. ¹¹Sa yena ahri yehparū musa cuoye mehna musa quehnoano yerana Cohācjū musare tiquiro ye buheye gūhure quehnoano yesi musa. Sa yero ti buheyere cūsi tiquiro. ¹²Sa yena apequiro yere musa quehnoano ye basaeragū ihñano musa ye ijiatire ohosi musare.

¹³Ihcāquiro Cohācjū pehere wacūno, tutua yūhdūaro niñeru pehere wacūedare. Niñeru pehere tutua yūhdūaro wacūno Cohācjū pehere wacūedare. Niñeru dihitare cahmediquiro ijiro Cohācjūre bucuegū yerare. Cohācjū gūhure, niñeru gūhure puarore cahme yūhdūducaro basioerare musare. Niñerure cahme yūhdūariquiro Cohācjūre quehnoano ño peo masiedare, niahye Jesu.

¹⁴Tiquiro sa nigū tūhoye fariseo masa pehe tiquirore bujūpeahye. Tiquina pehe niñerure cahīahye. Sa ye bujūpeahye. ¹⁵Tiquina bujūpegū tūhoro Jesu tiquinare yahuahye:

—Masa tiquina ihñonore musa quehnoano yemene. Musa sa yegū “Quehnoañequina, poto yeyequina ijire”, nimene masa musare. Cohācjū pehe musa tūhotuyere masine. Masa “Quehnoa yūhdūare”, tiquina nidire Cohācjū pehe sijoro saha ni tūhoture. Tire ihña yabire, niahye Jesu.

Cohācjū dutiyere, tiquiro puhtoro ijiyere yahuahye Jesu

¹⁶Sa ni tuhasa ohō saha ni nemoahye Jesu:

—Ñu wame yeriquiro tiquiro ijiato pano Moisere tiquiro cūri dutiye mehna Cohācjū marine dutiri. Cohācjū yere yahu muhtariquina tiquina ojoari mehna gūhu marine dutiri. Yojoṗu pehere Ñu tiquiro buhe ducari bato quehnoañe buheyere, Cohācjū tiquiro puhtoro ijiye gūhure masi ducare masa. Sa masiñe masa tiquina esa tuharo tiquina tutuaye mehna Cohācjū tiquiro puhtoro ijirore saḵā duamene. ¹⁷ Moisere tiquiro cūri dutiyepu Cohācjū nidiro sahata ye pehorota tiquiro. Uhmuse gūhu ahri yehpa gūhu pihtia wahaepēgūta Cohācjū nidiro sahata ye pehorota, niahye Jesu.

Namonore cohāñene yahuahye Jesu

(Mt 19.1-12; Mr 10.1-12)

¹⁸ Sa ni tuhasa ohō saha ni nemoahye Jesu:

—Masuño tiquiro namonore cohāno, apecoro mehna omoca duhtero, ticoro mehna ñano yero nine. Apequiro tiquiro cohāricoro mehna omoca duhtero, tiquiro gūhu ticoro mehna ñano yero nine, niahye Jesu.

Doeri cjē upuro, pejecuoriquiro queoyere yahuahye Jesu

¹⁹ Sa ye queoye mehna yahuahye Jesu:

—Ti pjeṗure doeri cjē upuro ijie tiahye. Tiquiro suhti pehe wapa buḵu yuhduahye. Sa yero decoripe quehnoañe dihitare ihyaro, peye cuoahye tiquiro. ²⁰ Sa yero ti pjere apequiro pejecuoriquiro, Lázaro wame tiriquire ijie tiahye. Tiquiro pagu peye cami tiriquire ijahye. Sa ye apequina pehe tiquirore doeri cjē upuro ya wūhu cjā sahrīno cahapu ne sae tiahye. ²¹ Sa yero pejecuoriquiro pehe doeri cjē upuro tiquiro ihyari mesa docapu yehpapu dujiro tiquiro ihya site dijioyere ihya timahye. “Tiquiro ihya site dijiorire ihyagu yapiguta yūhu”, ni,

tūhotue timahye tiquiro. Sa ye diayea tiquiro camine nehneñe ahtae tiahye.

²² Sa yero pejecuoriquiro tiquiro yariaa wahagū, Abrahā cahapu paraíso wame tiropu angele tiquirore ne mujahye. Sa yero doeri cjē upuro gūhu tiquiro batogāta yariaa wahahye. Tiquiro yariagū tiquirore yahye. ²³ Sa yero doeri cjē upurore tutuaro peca uḵūahye. Sa yero pecapu ijiro uhmusepu ijiriquire Abrahāre ihñahye. Lázaro gūhure ihñahye. ²⁴ Ihñā tuhasa, tiquiro Abrahāre pisuahye. “Yūhu acayu Abrahā, paja ihñāña yūhure. Pecapu yūhu ñano yuhduḡu nijaja. Yūhu sa wahagū Lázarore yūhure ohoya. Sa yero acore tiquiro omo piriapu soha, yūhu ñehmenore aco mehna nehono ahtaahro. Tire yusuoahro tiquiro”, niahye doeri cjē upuro. ²⁵ Tiquiro sa nigū Abrahā tiquirore yahuahye: “Yūhu acayu, catigapu muhu ijipihtiyere quehnoañene cuori. Lázaro pehe decoripe ñano yuhduḡi. Yojoṗu pehere muhu ñano yuhduḡū tiquiro pehe ohōpore bucueye mehna ijiro nine. ²⁶ Sa ye mari watoa uhcūari cope ijire. Sa ye ohōre ijiyequina topure waha masiedare. Sa ye topu ijiyequina ohōpore ahta duayequina ahta masiedare”, niahye Abrahā doeri cjē upurore. ²⁷ Tiquiro sa nigū doeri cjē upuro ohō saha ni nemoahye: “Yūhu acayu, tutuaro sinijaja muhure. Lázarore yūhu pacu ya wuhupu ohoya. ²⁸ Yūhu ihcā omopequina bahana tii. Lázaro tiquinare yahuahro. Tiquina ohōre ñano yuhduropure ahtaeracāhdo”, niahye tiquiro. ²⁹ Sa nigū Abrahā pehe yuhtiahye: “Cohācjū dutiyere Moise marine cūrire, Cohācjū yere yahu muhtariquina tiquina ojoarire cuore muhu bahana. Sa ye muhu bahana tireta tūhoahro”, niahye Abrahā. ³⁰ Tiquiro sa nigū doeri cjē upuro pehe yuhtiahye: “Yūhu acayu Abrahā, tire

cuoepeta quehnoano tuhosi. Lázaro yariariquiro masa bajua, tiquina cahapu esagū ihñañe tiquina pehe ñañene bujua witi, quehnoañe pehere comesaeta. Sa ye quehnoañene yeeta yuhu bahana pehe”, niahye doeri cjē upuro munano. ³¹ Tiquiro sa nigū Abrahā pehe yahuahye: “Muhu bahana Moise cūri pū tiquiro yahuyere, Cohācjū yere yahu muhtariquina muna tiquina yahuyere tuho dueyequina ijire. Sa ye Lázaro yariariquiro munano masa bajuepegūta tiquina Cohācjūre tuho duasi”, niahye Abrahā, ni, yahuahye Jesu.

Ñañene yegū cuarīne

(Mt 18.6-7, 21-22; Mr 9.42)

17 Sa ye Jesu yahuahye tiquiro buheyequinare:

—Masare ñañe yegū yeye peye ijire. Sa yeye masa ñañene yere. Ti sa ijiepegūta masunore ñañene yegū yeriquiro pehe ña yuhduaro yuhdurota. ² Masunore tiquiro wamapu pajiria utāre duhte yo, pajiri mapu tiquirore cohāgū ñano wahaboaga tiquiro. Apequiro pehe ahriquinagā mehna cjūnogāre ñañene yegū yero pajiri mapu tiquina cohāriquiro yuhduoro ñano yuhdurota. Tiquirore tutuaro buhiri dahrero cahmene. ³ Quehnoano yeya musa. Musa acayuro ñano tiquiro yegū ihñana “Yeracāhña”, niña tiquirore. Sa yena tiquiro ñañene bujua witi, quehnoañene comesagū musa pehe tiquiro ñañe yeyere boya. ⁴ Sa yero musa acayuro ihcā decota siete tahari musare ñano tiquiro yegū musare tiquiro bo dutigū boya. “Pari turi muhure ñano yesi”, siete tahari tiquiro nigū tope taharita tiquiro ñano yerire boya, niahye Jesu.

Cohācjūre wacū tutuayere yahuahye Jesu

⁵ Sa ye Jesu buheyequina tiquirore ohō saha niahye:

—Cohācjūre usāre quehnoano wacū tutua nemogū yeya, niahye tiquina Jesure.

⁶ Tiquina sa nigū Jesu yuhtiahye:

—Mostaza capegā meheni pjegā ijire. Ti yero saha Cohācjūre mehenogā wacū tutuana, ohō saha wahagū ye masinata musa: Ahdu yucugure ohō saha ni masine: “Muhu yucugu muhu basi duhtu cā, pajiri mapu bora ñojoaña”, ni masine musa. Musa sa nigū tu yucugu pehe musa dutiro sahata waharota, niahye Jesu.

Dahra cohteriquiro tiquiro dahrayere yahuahye Jesu

⁷ Came ahri quitire yahuahye Jesu:

—Musare dahra cohteriquiro ijiro wesepe tanare. Sa yero ovejare ihña ihbore. ¿Dahra cohteriquiro tiquiro tojoa wihigū duhse niboagari musa tiquirore? ¿“Sojaro mehna ahtaya. Muhu ihyaye ohōpu ijire”, niboagari musa? ⁸ Sa niedare musa. Tiquirore ohō saha nine musa: “Yuhu ihyayere doha quehnoña. Sa yegu yuhu ihya sihnigū yuhure cohteya. Yuhu bato muhu gūhu ihya sihniña”, nine musa dahra cohteriquirore. ⁹ Dahra cohteriquiro musa dutiyere tiquiro yegū tiquirore “Quehnoare”, niedare musa. Tiquiro dahraye dihitare yero niaga tiquiro. ¹⁰ Musa gūhu tiquiro yero saha ijire. Cohācjū dutiriro sahata ye pehona ohō saha ni, tuhutuya musa. “Usā gūhu dahra cohtena dihita ijiaja. Ihyo ijina ijiaja usā. Usā dahraye dihitare yei usā”, ni, tuhutuya musa, niahye Jesu tiquiro buheyequinare.

**Pua omopequina cami bucū muna
wihare yuhduoahye Jesu**

¹¹ Ape deco Jerusalēpu Jesu waharo niahye. Topu waharo Samaria yehpa, Galilea yehpa, ti pua yehpa watoa yuhdu cāhye. ¹²⁻¹³ Ape macapu wahari mahapu tiqiuro tinigū pua omopequina cami bucū muna wiha pehe tiqiurore piti cahye. Sa ye yoa cjūnopu ducuye pisuahye:

—Jesu, puhto, usāre paja ihñaña, niahye tiquina.

¹⁴ Sa nigū tiquinare ihña, yahuahye Jesu:

—Pahire musa pagurire quehnoañe paguri musa waharire ihñona wahaya, niahye tiquinare.

Sa nidi bato tiquina wahari watoa quehnoa wahahye. ¹⁵ Sa yero ihcāquiro tiquina mehna cjūno quehnoano tiqiuro pagu wahagū ihñano, Jesu cahapu majare tojoa tahye. Sa tojoa taro tutuaro mehna Cohācjüre ño peoahye. “Cohācjū tutuariquiro, quehnoariquiro ijire”, ni, ño peoahye tiqiuro. ¹⁶ Sa nino tiqiuro Jesu dahpocāri caha dusepe curi mehna quehe sa, “Quehnoare”, niahye tiqiuro. Samaria cjūno ijiahye. ¹⁷ Tiquiro sa yeri bato Jesu ohō saha ni sinituahye:

—Pua omopequina ijiri masa quehnoa wahariquina. ¿Apequina nueve dūhsayequina pehe nohopu ijiagari tiquina? ¹⁸ Ahriquiro ape yehpa cjūno dihita Cohācjüre “Quehnoare”, nino taro tojoa tari. ¿Duhse ijiro boro apequina ahtaerajari? niahye Jesu.

¹⁹ Sa ni tuhasa Jesu yahuahye dusepe curi mehna quehe sariquirore.

—Wahcādūcaya. Wahaya. Mūhu Cohācjüre wacū tutuagu, yuhdure mūhu, niahye Jesu tiqiurore.

**Cohācjū tiqiuro puhtoro
ijiatire yahuahye Jesu**

(Mt 24.23-28, 36-41)

²⁰ Ti pjere meheñequinagā fariseo masa Jesure sinituahye:

—¿Duhse ijigū Cohācjū puhtoro iji ducarotari? niahye tiquina.

Tiquina sa nigū Jesu yuhtiahye:

—Cohācjū tiqiuro puhtoro iji ducagū masa ihña masiedare. ²¹ “Cohācjū puhtoro ijiye ohōpu ijire”, ni masiedare. “Sohōpu ijire”, ni masiedare. Cohācjū tiqiuro puhtoro ijiye masa tiquina tuhotuyepu ijire, niahye Jesu fariseo masare.

²² Sa ni tuhasa Jesu tiqiuro buheyequinare ohō saha ni yahuahye:

—Came yuhu masu Cohācjū ohorigu ahri yehpapu yuhu tojoa tatire tutuaro cahmenata musa. Mehenogā yuhure ihña duepenata yuhure ihñasi musa. Musa yuhure sa ihña duepegūta ti pjere ahtasi yuhu. ²³ Apequina musare ohō saha nieta. “Tiqiurore ihñaña. Cristo ijire. Ahriquirore ihñaña. Cristo ijire”, nieta musare. Tiquina sa niepegūta tiquinare tuhoeracāhña. ²⁴ Upo miadoqueoro wacūeno mehna ti mia sitedoqueoro sahata yuhu gūhu masu Cohācjū ohorigu wacūeno mehna tojoa tautja. ²⁵ Ahrire yuhu yeato pano yuhu tutuaro ñano yuhduta. Sa ye yojopu cjēna yuhure cahmesi. ²⁶ Noé tiqiuro ijiri pje cjēna tiquina ijiriro sahata yuhu masu Cohācjū ohorigu yuhu tojoa tagū sata ijietama. ²⁷ Noé tiqiuro ijiri pjere ijipihiyequina masa sa ihyaducue tiahye. Sa ye sihniducue tiahye. Ūmua, numia mehna omoca dūhtee tiahye. Noé pajiria yucūsapu tiqiuro sajāto pano Cohācjū tiquinare tiqiuro mioato pano ti ijipihiyere masa yeducue tiahye. Sata ijirota yuhu tojoa tagū gūhure. ²⁸ Lote tiqiuro ijiri pje cjēna tiquina ijiriro sahata yuhu tojoa tagū ijietama. Lote tiqiuro ijie tiri pjere masa ihya, sihni, dú, dua, we-

serire ote, wuhuse yeahye. ²⁹Tiquina sa yeri watoa Sodoma wame tiri macapu ijiriqiro Lote tiquiro wahari deco ahmuse cja peca, peca asiye paca utã pjeri gũhu acoro ahtaro saha tiquina bui bora pje, tiquinare wejẽ pehoe tiahye. ³⁰Yũhu masũ Cohãcjũ ohorigũ wacũeno mehna yũhu tojoa tagũ tiquina yero sahata yeyequina ijjeta masa ti pjere.

³¹Ti pjere ihcãqiro tiquiro ya wũhu bui cja paapu quehnoari paapu ijiriqiro wũhu puhiaapu tiquiro ye ijigũ tire neno wahaeracãhdo tiquiro sojaro mehna wahato saha. Sa yero wesepũ ijiriqiro gũhu ti pjere tiquiro ya wũhũpũ piheraçãhdo tiquiro sojaro mehna wahato saha. ³²Lote namono ticoro waharire wacũña musa. ³³Masũno yũhũre wacũno marieno tiquiro esa tuharo tiquiro cahmeno saha yero, pecapu waharota. Sa yero yeere sa yeducuriqiro ijipihitiye decori yũhu mehna ahmusepũ ijjirota.

³⁴Ti ñamine pũaro ihcã cuñanopũ carĩnequinare ihcãqiro yũhũre cahmeniqirore neitja. Sa yero yũhũre cahmedariqiro topũ tojoarota. ³⁵Ti pjere pũaro numia ihcãnopũ tiquina trigore tu mutoñe numiare ihcãcoro yũhũre cahmenicorore neitja. Sa yero yũhũre cahmedaricoro topũta tojoarota. ³⁶[Sa ye wesepũ pũaro dahrayequina tiquina ijigũ ihcãqirota neitja. Ihcãqiro topũ tojoarota,] niahye Jesu.

³⁷Sa nigũ tiquiro buheyequina pehe sinituahye tiqirore.

—¿Nohopũ sa waharotari? ni sinituahye tiquina.

Tiquina sa nigũ Jesu yũhtiahye:

—Masa tiquina ñano yeducuriopũ, topũ Cohãcjũ buhiri dahrerota tiquinare, niahye Jesu.

Wape wihoro ticoro buhiri dahre dutiye queoyere yahuahye Jesu

18 Sa ye Jesu tiquinare Cohãcjũre siniñene yahuro ohõ saha niahye:

—Musa Cohãcjũre sinina, cohteya tiquiro yũhtiatire. Yoari pje cohtepinata bujua witieracãhña. Tiquirore sinina duhueracãhña, niahye Jesu.

²Tiquiro sa nidire buhero taro ahri queoye mehna yahuahye tiquinare:

—Ape macapu tiquina buhiri dahre dutiriqiro ijiahye. Tiquiro Cohãcjũre ño peerahye. Sa yero masa gũhũre ño peerahye. ³Sa yero wape wihoro gũhu topũ ijiahye. Ticoro tiquiro cahapu sa majareno ohõ saha niahye: “Yũhũre ihña tuhtiriqirore buhiri dahre dutiya mũhu. Yũhũre ni cahmota basaya”, ni siniducuahye ticoro tiqirore. ⁴Ticoro sa nigũ peye tahari tiquiro “Yesi yũhu”, nimahye ticorore. Tiquiro sa niepegũta ticoro peye tahari sa siniducuro tiqirore ni cariboro ye cãmahye. Ticoro caribogũ, ohõ saha niahye tiquiro basi. “Yũhu Cohãcjũre, masa gũhũre ño peeraja. ⁵Yũhu sa ño peoegũ yũhu ijiepegũta ahricoro pehe yũhũre caribo ye cãmaga. Yũhũre sa cariboro yũhũre caributigũ yerota ticoro. Sa ni yahusãducugũ ticorore ihña tuhtiriqirore buhiri dahre dutiitja”, niahye buhiri dahre dutiriqiro, niahye Jesu.

⁶Sa nino Jesu tiquinare yahu nemoahye:

—Sa niahye ñariqiro buhiri dahre dutiriqiro. Tiquiro nidire wacũña musa. ⁷Tiquiro yũhdũoro Cohãcjũ pehe tiquiro yequina tiquiro beseriquinare ñamipũ, decopũ tiqirore sinidiquinare yũhtiro, yedohorota. ⁸Musare niita niaja. Cohãcjũre tiquina sinidiro sahata duita tiquinare yedohorota. ¿Tiquiro sa yũhtiriqiro ijiepegũta yũhu masũ Cohãcjũ ohorigũ ahri yehpapũ tojoa

tagu Cohäcjure wacū tutuayequinare bocaboagari yuhū? niahye Jesu.

Puaro masa Cohäcjure tiquina siniñe quitire yahuahye Jesu

⁹Sa ye apeye quititi mehna ohō saha ni yahuahye Jesu: “Usā pehe quehnoana ijiaja. Apequina pehe ñano yeyequina ijire”, ni, tuhotuyequinare ahri quitire yahuahye:

¹⁰—Cohäcju ya wuhuru puaro umua Cohäcjure siniñe wahahye. Ihcäquiro fariseo masuno ijiahye. Apequiro wapa ne cohteriquiro ijiahye. ¹¹Sa yero fariseo masuno pehe ducu, ohō saha ni yahuahye Cohäcjure: “Yuhū yaquerigu, ñañene yerigu, numia mehna ñano yerigu ijieraja. Apequina yero saha ijieraja. Ahriquiro wapa ne cohteriquiro yero saha ñagu ijieraja. Sa yegu mūhure ‘Quehnoare’, niaja Cohäcju. ¹²Yuhū semanaripe pua decore mūhū yere yegu sijiaja. Sa yegu pua omope cjoeri niñeru cjoerire wapatagu ihcā cjoere mūhure ohoaja”, niahye fariseo masuno Cohäcjure. ¹³Sa yero wapa ne cohteriquiro pehe yoaropu muhri yo ducu, tiquiro ñañene bujua witi, umūsepure ihñedahye. Tiquiro ñañene bujua witi quiro ijiro tiquiro cutirote quē ohō, siniahye Cohäcjure: “Cohäcju, yuhū ñagu ijiaja. Sa yegu mūhū paja ihñaña yuhure”, niahye tiquiro Cohäcjure. ¹⁴Musare niita niaja. Ahriquiro wapa ne cohteriquiro pehere tiquiro ya wuhuru tojoagū Cohäcju pehe “Mūhū ñañene cohā tuhasa”, niahye tiquiro. Apequiro fariseo masunore “Mūhū ñañene cohā”, niedahye Cohäcju. “Yuhū quehnoagu ijiaja”, nidiquiro Cohäcju ihñagū ñariquiro ijire. “Yuhū ñagu ijiaja. Sa yegu yee ñañene bujua witi”, nidiquiro Cohäcju quehnoariquiro ijigū yerota tiquiro, niahye Jesu.

Macanagäre tiquina ye ijiatire Cohäcjure sini basahye Jesu

(Mt 19.13-15; Mr 10.13-16)

¹⁵Sa ye masa tiquina pohnene macanagäre Jesure ña peo dutiye tehe, tiquiro cahapu ne wihiahye. Tiquina sa yegū ihñañe Jesu buheyequina tiquinagäre ne wihiyequinare tuhtiahye. ¹⁶Tiquina sa tuhtigū ihñano Jesu macanagäre pijioahye tiquiro cahapu. Pijio tuhasa ohō saha niahye tiquiro buheyequinare:

—Macanagā yuhū cahapu ahtaahro. “Waharisa”, niedacāhña tiquinagäre. Tiquinagā Cohäcjure tiquina puhtoro tuhoture. Sa ye Cohäcju puhtoro ijiropäre ahriquinagā yero sahata tuhotuyequina ijire topäre. ¹⁷Potota niita niaja musare. Ahriquinagā Cohäcjure tiquina cahmeno saha musa pehe cahmedana, tiquiro cahapu wahasi musa. Musa wahaeragū musa puhtoro ijisi tiquiro, niahye Jesu.

Doeri cje uparo Jesure sinituahye

(Mt 19.16-30; Mr 10.17-31)

¹⁸Tiquiro sa nidi bato judio masa puhto mehna cjuño Jesure sinituahye:

—¿Ne, quehnoagu, buhegu, ijipihtiyere decori Cohäcju mehna iji duagu, dūhse yeboagari yuhū? niahye tiquiro.

¹⁹Tiquiro sa nigū Jesu yuhtiahye:

—¿Dūhse ijiro boro yuhure “Quehnoagu”, ni pisuajari mūhū? Cohäcju dihita quehnoariquiro ijire. ²⁰Ahri Cohäcju dutiyere masine mūhū. “Wuana tieracāhña. Masare wejēdacāhña. Yaqueracāhña. Ni mehoedacāhña. Musa pacusumūare ño peoya”, ni, sa ye dutire Cohäcju. Sa yegu tire yeya mūhū, niahye Jesu.

²¹Tiquiro sa nigū Jesure yuhtiahye:

—Tire ijipihtiyere yuhū coā wahmua cāhtagu ijiguputa yuhdudacaerahi, niahye tiquiro.

²²Tiquiro sa nigū tūhoro, Jesu tiquirore ohō saha ni yahuahye:

—Mehenogā dūhsare mūhūre mūhū ye pehoati. Ijipihtiyere mūhū yere duagu wahaya. Sa yegū ijipihtiyere mūhū wapatarari niñerure pejecuoyequinare ohoya. Mūhū sa yegū peye mūhū ye ūhmusepū, Cohācjū cahapū ijirota. Sa ye tuhasagū yūhū mehna cjū ijiacjū ahtaya, niahye Jesu tiquirore.

²³Tiquiro sa nigū tūhoro tiquiro pehe peye doeri cjē cūoriqiro ijiro tire pejecuoyequinare oho dueraro, tutuaro bujua witi, waha wahahye.

²⁴Tiquiro sa bujua witi gū ihñano Jesu ohō saha ni yahuahye apequinare:

—Doeri cjē opana Cohācjū tiquiro puhtoro ijiropure tiquinare waharo basioera cjūre. ²⁵Camello pehe awia copepū tiquiro sajā duagū basioerare tiquirore. Tiquiro sa ijiro yūhdūoro doeri cjē upūro Cohācjūre cahmedaro, Cohācjū tiquiro puhtoro ijiropure waharo basioerare, niahye Jesu.

²⁶Tiquiro sa nigū tiquirore tūhoyequina ohō saha niahye:

—Aa, dūhse tiquiro nino saha potō ijigū, ne ihcāqiro masuno Cohācjū cahapū waha masiedaboaga, niahye tiquina basi.

²⁷Tiquina sa nigū Jesu yūhtiahye:

—Masa tiquina esa tuharo quehnoano yeri mehna Cohācjū cahapū waha masiedare. Cohācjū pehe masare pecapū waboriquinare yūhdūo masine. Tiquiro ijipihtiyere quehnoano ye masi peho cāre, niahye Jesu tiquinare.

²⁸Tiquiro sa nigū Pedro tiquirore ohō saha niahye:

—Tūhorīñā. Ūsā pehe ijipihtiyere ūsā yere cū cāu mūhū mehna wahana, niahye tiquiro Jesure.

²⁹Tiquiro sa nigū Jesu ohō saha niahye:

—Potota mūsare niita niaja. Mūsa Cohācjū yere yena tana mūsa wūhūserē, mūsa pacūsumūare, mūsa bahanare, mūsa namosānumiare, mūsa pohnare cūrīna ijina pajiro wapatanata mūsa yojopure. ³⁰Mūsa cūrī yūhdūoro wapatanata. Sa yena mūsa yariari bato ijipihtiyere decori Cohācjū mehna ijinata mūsa, niahye Jesu tiquinare.

Pari turi Jesu tiquiro yaria masa wijiatiye yahuahye

(Mt 20.17-19; Mr 10.32-34)

³¹Sa ye Jesu doce tiquiro buheyequinare neahye. Sa neano tiquinare yahuahye:

—Tūhoya yūhūre. Yojopure mari Jerusalēpū wahana niaja. Topū yūhūre masure Cohācjū ohorigure Cohācjū yere yahu mūhtariquina panopū tiquina yahuriro sahata sa yeeta yūhūre. ³²Topū masa yūhūre ñehēñe, judio masa ijieyequinare ohoeta yūhūre. Yūhūre tiquina ohori bato tiquina yūhūre bujūpe, ñano ni, yūhūre sihco puti ohōeta. ³³Sa ye yuta dari mehna tana tuhasa wejēeta yūhūre. Sa yegū ihtia deco wahaboro masa wijiaguta yūhū, niahye Jesu tiquinare.

³⁴Tiquiro sa ni yahurire quehnoano masiedahye tiquiro buheyequina. Cohācjū tire tiquinare quehnoano masigū yeraniahye.

Caperi bajueriquirore ihñagū yeahye Jesu

(Mt 20.29-34; Mr 10.46-52)

³⁵Sa ye Jesu gūhū Jericó wame tiri maca cahagāpū esahye. Topū caperi bajueriquiro maha dūhtū caha duji, niñerū sinino niahye. ³⁶Sa yero masa peyequina tiquiro caha yūhdūagū tūhoro sinituahye tiquinare:

—¿Dūhse ijiro boro masa peyequina yūhdūajari? ni sinituahye tiquiro.

³⁷—Jesu Nazare cjũno waharo nine, ni, yahuahye apequina tiquirote.

³⁸Tiquina sa ni yahugũ tũhoro tiquiro sañuducuahye:

—Jesu, Davi mũnano panami iji turiagu, masare yuhũoacjũ, yuhũre paja ihñaña, ni sañuducuahye Jesure.

³⁹Tiquiro sa nigũ tiquiro caha ihña-ducuyequina pehe, “Dihta mariaña”, ni tuhtiahye tiquirote. Tiquina sa ni tuhtiepegũta to pano tiquiro sañuducuro yuhũoro sañuducu nemoahye tja:

—Davi mũnano panami iji turiagu, masare yuhũoacjũ, yuhũre paja ihñaña, ni sañuducuahye tiquiro.

⁴⁰Tiquiro sa ni sañuducugũ tũhoro, Jesu pehe esadũca, “Pijioya tiquirote”, niahye. Tiquiro sa nigũ tiquina pehe caperi bajueriquirote piji cãhye. Tiquina sa piji cãgũ Jesu cahapũ esagũ Jesu pehe tiquirote sinituahye:

⁴¹—¿Dũhse yũhũ yegũ cahmeajari mũhũ? niahye Jesu.

—Yũhũ puhto, yuhũre ihñaagũ yeya, ni yuhtiahye caperi bajueriquiro.

⁴²—Ihñaña. Yuhũre wacũ tutuagũ, quehnoa wahare mũhũ, niahye Jesu tiquirote.

⁴³Tiquiro sa nigũta caperi bajueriquiro ihñaa wahahye. Sa quehnoa waharo, tiquiro Jesu mehna wahahye. “Cohãcjũ tutuariquiro ijire”, niahye tiquiro. Sa ye masa peyequina caperi bajueriquiro ihñaagũ ihñañe “Cohãcjũ quehnoariquiro, tutuariquiro ijire”, niahye tiquina gũhũ.

Zaqueo Jesure piti cahye

19 Sa ye Jesu Jericópu esa, ti macapũ yuhũ cãno taro niahye. ²Doeri cjẽ upũro Zaqueo wame tiriquiro wapa ne cohteyequina puhtoro topũ iji-ahye. ³Sa yero tiquiro Jesure “¿Diquiro boro ijiagari?” ni ihña masino taro

Jesure ihña duamahye. Sa tiquiro ihña duepegũta uhmuediquirogã ijigũ masa peyequina tiquirogãre cahmotahye. ⁴Sa yero tiquiro masare oma yuhũ cã, sicó-moro wame tidũ yucũgũpũ mũjahye Jesure ihñano taro. Came cjũnogã tũ cahapũ Jesu yuhũaro taro niahye. Sa yero Zaqueo tũpũ cohtero niahye. ⁵Tiquiro sa cohte pesari watoa Jesu pehe tũ dah-potopũ esadũca, Zaqueore ihña mũo, tiquirote pisuahye:

—Zaqueo yojopũre mũhũ ya wũhũpũ tojoagutja. Sa yegũ sojaro mehna dijia taya, niahye Jesu.

⁶Tiquiro sa nigũ Zaqueo pehe sojaro mehna dijia ta, tutuaro bucueye mehna tiquiro ya wũhũpũ waha duhtiahye Jesure. ⁷Tiquiro sa piti cãgũ ihñañe, ijipihtiequina masa tiquina basi ohõ saha ni yahuducuahye:

—Ahriquiro Jesu ñariquiro ya wũhũpũ tinino waha duare, ni, yahuducuahye ijipihtiequina tiquina basi.

⁸Zaqueo pehe piti ca tuhasa topũ ducuro, Jesure yahuahye:

—Puhto, tũhoya yuhũre. Ijipihtie yeere deco mehna pejecuoyequinare ohoutja. Sa yegũ yũhũ apequirote cien niñeru cjoerire ni meho ehmarigũ ijigũ, cuatro cientos niñeru cjoerire wapa ye bui peoutja tiquirote, niahye Zaqueo Jesure.

⁹Tiquiro sa nigũ Jesu pehe yahuahye tiquirote:

—Miare mũhũre mũhũ ya wũhũpũ ijiyequina gũhũre pecapũ waha-boriquinare Cohãcjũ yuhũo tuhasare. Mũhũ gũhũ Abrahã mũnano acayũ ijire. ¹⁰Yũhũ masũ Cohãcjũ ohorigũ pecapũ wahaboriquinare macagũ ahtagũ nii. Topũ wahaboriquinare quehnoano yuhũogũ ahtagũ nii, niahye Jesu Zaqueore.

**Niñeru cjoeri uru cjoeri
quitire yahuahye Jesu**

(Mt 25.14-30)

¹¹ Sa ye tiqiurore tuhoyequinare Jesu apeye queoye mehna yahuahye. Mehenogā duhsahye Jerusalēpū tiqiuro esato. Sa ye tiqiurore tuhoyequina ohō saha ni tuhotuahye: “Cohācjū puhtoro yojopure iji ducaro taro nine”, ni, tuhotuahye tiquina. ¹² Tiquina sa ni tuhotugū Jesu yahuahye tiquinare:

—Ihcāqiuro puhtoro macuno puhtoro sajātiqiuro yoropū ape yehpapū waharo taro niahye. Topure esagū ihñano tiquina tiqiurore puhtoro sōñe tee niahye. Came tiqiuro ya wuhupū tojoa wihiro taro niahye. ¹³ Coā warore tiqiuro wahato panore puhtoro pua omopequina dahra cohteyequinare pijioahye. Sa pijioro, tiqiuro tiquinare tiquinape cjoeri niñeru cjoeri wapa bujūye cjoeri uru cjoerire ohoahye. Oho tuhasa, yahuahye tiquinare: “Yūhū mariedagū ahri niñeru mehna mūsa wapata nemoatire macañā”, niahye tiqiuro dahra cohteyequinare. ¹⁴ Sa ye tiqiuro ya maca cjēnata tiqiurore cahmedahye. Sa cahmedaye, apequinare tiqiurore puhtorore yahu dutiye ohoahye. “Mūhū usā puhto ijigū cahmedaja usā”, niahye tiquina yahu dutiriquina pehe. ¹⁵ Sa tiquina cahmedapegūta came tiquina puhtoro sajāhye tiqiuro. Puhtoro sajā tuhasa tiqiuro ya wuhupū tojoa tahye.

’Sa tojoa wihiro dahra cohteyequinare tiqiuro ye niñeru mehna tiquina wapata nemore masino taro, tiquinare pijioahye. ¹⁶ Tiqiuro pijiori bato, wihi mūhtariqiuro tiqiurore yahuahye: “Puhto, mūhū niñeru cjoe, yūhure mūhū oho cjoe mehna pua omope cjoeri wapata nemou yūhū”, niahye dahra cohteriquiro puhtorore. ¹⁷ “Quehnoano yeaya mūhū. Mūhū quehnoagu dahra cohtegu ijire. Mūhū mehenogā mehna

yūhū dutiro saha ye pehogū ijigū yojopū pua omope macari cjēna tiquina puhto ijicjū wahaguta mūhū”, niahye puhtoro dahra cohteriquirore. ¹⁸ Tiqiuro bato wihiriquiro tiqiuro mehna cjāno ohō saha niahye: “Puhto, mūhū ya cjoe niñeru cjoe yūhure mūhū oho cjoe mehna ihcā omope cjoeri wapata nemou yūhū gūhū”, ni yahuahye tiqiuro puhtorore. ¹⁹ “Ihcā omope macari cjēna puhto ijicjū wahaguta mūhū”, niahye puhtoro tiqiurore. ²⁰ Tiqiuro sa nidi bato apeqiuro dahra cohteriquiro wihi, yahuahye: “Puhto, mūhū niñeru cjoe ohō ijire. Suhtiro cahsero mehna coma, ti cjoere ihbou. ²¹ Mūhū tutuaro dahra dutigu ijire. Sa tutuaro dahra dutigu ijigū mūhū basi oterapegūta ti ducare nene mūhū. Sa yegu mūhure cue nii”, niahye tiqiuro puhtorore “Ti cjoe mehna wapataerū yūhū”, ni yahuro. ²² Tiqiuro sa nigū tiqiuro puhtoro ohō saha niahye: “Mūhū sa nigū nāgu ijire mūhū. Yūhure mūhū sa nidi buhiri mūhure buhiri dahregutja yūhū. Yūhū mūhure tutuaro dahra dutigu yūhū ijigū masine mūhū. Apequina yere yūhū negū yūhū oterarigu ijiepegūta ducare negū yūhū ijigū masine mūhū. ²³ Yūhū sa ijigū ihñapegūta ya cjoere niñeru ihbori wuhupū cūedahya mūhū. Tire tiquina wasori wapa wapata nemoboaya mūhū. ¿Dūhsegu sa yerari mūhū? Tire mūhū yegū tojoa wihigu wapata nemoboaya yūhū”, niahye tiquina puhtoro. ²⁴ Sa ni tuhasa tiqiuro cahapū ducyequinare dutiahye: “Niñeru cjoere ehmaña tiqiurore. Pua omope cjoerire cūoriquirore ohoya”, niahye puhtoro. ²⁵ Tiqiuro sa nigū tiquina pehe yahuahye tiqiurore: “Puhto, pua omope cjoeri cūoriquiro peye cūo tuhasare”, niahye tiquina. ²⁶ Tiquina sa nigū puhtoro yūhtiahye: “Mūsare niita niaja. Ijipihtiyequina cūoyequinare oho nemoutja. Cūeriquiro pehere

mehenogā tiquiro c̄oepegūta tire ehmagutja. ²⁷Yojop̄ p̄iritare yuh̄re ih̄na tuhtiequinare yuh̄re tiquina puhtoro iji dutierariquinare yuh̄ cahap̄ ne cāhtaya. Sa yena yuh̄ ih̄nop̄ wejēna tiquinare”, niahye puhtoro dahra cohteyequinare, ni, buheahye Jesu.

Jerusalēp̄ esahye Jesu

(Mt 21.1-11; Mr 11.1-11; Jn 12.12-19)

²⁸Sa ni tuhasa Jesu apequina pano Jerusalēp̄ wahahye. ²⁹Tiquiro Betfagē wame tiri maca cahap̄ Betania wame tiri maca cahap̄ esa, c̄n̄n̄ Olivo wame tid̄ cahap̄ esa muhtahye. Jerusalēp̄ tiquiro esato mehenogā d̄hsatjīahye. Sa yero p̄aro tiquiro buheyequinare Jesu ohoro ohō saha niahye:

³⁰—Si macap̄ burrogāre nena wahaya. Top̄ esana, burrogāre tiquina d̄hte docoriquirogāre boca sanata. Apequina pesamehnediquirogā ijiaga. Tiquirogāre bocana, yuta dare p̄a, ne cāhta basaya yuh̄re. ³¹Musa sa yegū ih̄n̄ano, burrogā up̄ro “¿D̄hsena burrogāre p̄jari?” tiquiro nigū tuhona ohō saha ni yuhtiya tiquirore: “Mari puhtoro burrogāre cahmedoqueo nidi”, ni, yahuya tiquirore, ni yahu duti ohoahye tiquiro buheyequinare p̄arore.

³²Tiquiro sa nigū tiquina p̄aro pehe tiquiro nidrop̄ esahye. Tiquina sa esagū ijipihtiye Jesu tiquiro nidiro sahata ijiyahye. ³³Sa ye tiquirogāre tiquina p̄agū ih̄nañe tiquirogā opana tiquinare sinituahye:

—¿D̄hse yena tana m̄sa yuta dare p̄jari burrogāre? ni, sinituahye tiquina.

³⁴—Mari puhtoro burrogāre cahmedoqueo nidi, ni yuhtiahye tiquina.

³⁵Sa ni yahu tuhasa tiquirogāre Jesu cahap̄ ne sahye. Ne sa tuhasa tiquina bui c̄jē suhtire tiquirogā bui seō peo, tiquirogā buip̄ Jesu m̄ja p̄jegū yedo-

hoahye tiquina. ³⁶Jesu tiquirogā bui pe-sagū tiquiro wahato pano masa tiquina bui c̄jē suhtire tu we ne, mahap̄ seō cū muhtahye Jesure ño peoye. ³⁷Sa ye tiquina Jerusalē cahagāp̄ esa, Olivo wame tid̄p̄ dijia tari mahap̄ esahye. Top̄ Jesu buhegū tuhoyequina peye-quina ijipihtiye Cohācj̄ tutuaye mehna tiquiro ye ih̄nore, tiquiro quehnoañe yerire tiquina ih̄narire wacūñe, Cohācj̄re “Quehnoagū, tutuagū ijire”, ni sañuducuahye. Sa ye tutuaro sañuducu, Cohācj̄re ño peoye, ohō saha niahye:

³⁸—Ahrikiro Cohācj̄ tiquiro ohoriquirore, mari puhtorore Cohācj̄ quehnoano yeahro. Ūhm̄se c̄jēna quehnoano ijiahiro. Cohācj̄ tiquiro tutuarikiro ijigū ijipihtiyequina masiahdo, ni ño peohye tiquina.

³⁹Tiquina sa nigū tuhoye fariseo masa meheñequinagā tiquina watoa ijiye-quina Jesure yahuahye:

—Buhegū, m̄h̄ buheyequinare dihta maria dutiya, niahye tiquina.

⁴⁰—Musare niita niaja. Tiquina sañuducueragū ut̄a paca pari pehe sañuducuboaga, niahye Jesu fariseo masare.

⁴¹Sa ni tuhasa Jesu Jerusalē cahagāp̄ esa, ti macare ih̄n̄ano, utiahye. ⁴²Ohō saha niahye tiquiro:

—Jerusalē c̄jēna yojop̄ p̄iritare musare pecap̄ wahaborinare Cohācj̄ tiquiro yuh̄duoatire m̄sa masigū quehnoa yuh̄duaboaga. Sa ijiepegūta yojop̄re m̄sa tire ne tuho duerare. Sa yero Cohācj̄ tire musare masi dutierare. ⁴³Musare ih̄na tuhtiequina m̄sa ijiri macare cahmota sotoa peho quēheeta. Sa ye, musare tiquina wijia dutisi. ⁴⁴Ti p̄jeta tiquina m̄sa ya macare cohā pehoeta. M̄sa gūh̄re wejēeta. Musare ih̄na tuhtiequina quehnoano cohā pehoeta m̄sa ya macare. Cohācj̄ pecap̄ wahaborinare musare tiquiro yuh̄duoatire m̄sa masi

duerari. MUSA masi duerari buhiri musare ihña tuhtiyequinare Cohãcjũ musare cohã dutirota, niahye Jesu Jerusalẽ cjenare.

Cohãcjũ wuhũpu Jesu esahye

(Mt 21.12-17; Mr 11.15-19; Jn 2.13-22)

⁴⁵Sa ye Jerusalẽpu esaro, Jesu Cohãcjũ wuhũpu sajãa wahahye. Sa yero apee boro duayequinare ti wuhũpu ijiyequinare boca saro, tiquinare cohã wio cãhye. Ohõ saha niahye tiquinare:

⁴⁶—Cohãcjũ yere tiquina ojoari pũpu ohõ saha nine: “Ya wuhũ Cohãcjũ mehna yahuducuri wuhũ wame tirota”, niahye tiquiore yere tiquina ojoari pũpu. Tiquiro sa niepegũta musa pehe ahri wuhũpu duana, musa basi cahme yaquere musa, niahye Jesu.

⁴⁷Sa ye decoripe Cohãcjũ wuhũpu Jesu buheahye. Sa ye pahia puhto, judio masare buheyequina, masa puhto gãhu tiquiore tiquina wejẽatire wacũ macahye. ⁴⁸Masa ijipihtiyequina tiquiore sa tuhoducuye, tiquiore buheyere quehnoano tuho nũnũnequina ijiahye. Tiquina sa quehnoano tuho nũnũgũ Jesure wejẽ duayequina pehe tiquiore tiquina wejẽatire bocaerahye.

Pahia puhto, judio masare buheyequina, bucuna gãhu Jesu mehna cahme tuhtiye niahye

(Mt 21.23-27; Mr 11.27-33)

20 Ape deco Cohãcjũ wuhũpu Jesu masare quehnoañe buheyere buhero niahye. Tiquiro sa buhegũ pahia puhto, judio masare buheyequina, bucuna mehna tiquiore cahapu wihiye, sinituahye:

²—Yahuya usãre. ¿Duhsegũ canũre sa yeari mũhu? ¿Noa mũhũre tire sa ye dutiari? niahye tiquina Jesure.

³Tiquina sa nigũ Jesu yuhtiahye tiquinare:

—MUSA pehere sinitu mũhtagũtja. Yahuya yuhũre. ⁴¿Nu masare tiquiore wame yegũ noa boro pehe tiquiore wame ye dutiyari, musa tuhutugũ? ¿O Cohãcjũ dutierayari? ¿O masa pehe dutiyari, musa tuhutugũ? ni sinituahye Jesu tiquinare.

⁵Tiquiro sa nigũ tiquina pehe tiquina basi ohõ saha niahye:

—¿Duhse ni yuhtinatari mari? “Cohãcjũ Ñure dutie tiahye”, mari nigũ, “¿Duhseña Ñure Cohãcjũ dutiepegũta tiquiore tuho duerari musa?” niboaga Jesu marine. Sa yena “Cohãcjũ Ñure dutiye tiahye”, ni yuhti masiedaja mari. ⁶Ahriquina masa pehe “Potota Ñu Cohãcjũ yere yahu mũhtariquiore ijire”, ni tuhature tiquina. Sa ni tuhutuye “Ñu tiquiore wame yegũ Cohãcjũ tiquiore dutierahye”, mari nigũ tuhoye marine masa utã paca mehna doqueeta. Sa yena ti gãhũre yuhti masiedaja mari, ni yahuducuahye tiquina basi.

⁷Sa ni yahuducu tuhasa tiquina Jesure yuhtiahye:

—Ñure wame ye dutiriquiore usã masiedaja, niahye tiquina.

⁸Tiquina sa nigũ Jesu yuhtiahye:

—Ti pje pũrita yuhũ gãhu musa sinitu mũhtarire yahueraja musare. Ahrire yuhũ yerire dutiriquiore yahueraja musare, niahye tiquinare.

Ñañequina dahra cohteyequina queoyere yahuahye Jesu

(Mt 21.33-44; Mr 12.1-11)

⁹Sa ye Jesu tiquiore tuhutuye mehna queoye mehna ohõ saha ni buhe dũcahye masare:

—Wese upũro uhse darire oteahye. Ote tuhasa, ti wesere apequinare ihcã pehe pahma cũahye. Pahma cũno ti wesere tiquinare ihña ihbo dutiahye. Sa duti tuhasa ape yehpũ waha, yoari pje bajuerahye. ¹⁰Sa yero uhse ñidi pje ijigũ wese upũro tiquiore cahacjũnore we-

sere ihña ihboyequina cahapũ ohoahye. Wese cjē oteri đucare tiqiro ya pahrē cjēne ne dutiro ohomahye. Sa ye ihña ihboyequina pehe tiqiro cahacjūnore piti ca quēahye tiqirore. Sa ye tiquina tiqirore đucare ohoerapeta tojoa dutiahye. ¹¹ Sa yero wese upũro apequiro tiqiro cahacjūnore ti wese cjē oteri đucare ne dutiro ohomahye tja. Sa ye wesere ihña ihboyequina tiqiro gũhũre quē, ñano yeahye tiqirore. Sa ye tuhasa tiqirore ti đucare ohoerapeta tojoa dutiahye tja. ¹² Tiquina sa yeri bato wese upũro apequiro cahacjūnore ohomahye tja. Sa ye wesere ihña ihboyequina pehe tiqiro gũhũre cami dahre, ti wese đũhtũ cahapũ cohã cãhye tiqirore.

¹³ Tiquina sa yeri bato wese upũro ohõ saha ni tuhotumahye: “¿Đũhse yegutari yũhũ? Ohõ saha yegutja. Yũhũ macũre yũhũ cahĩniqirore ohogutja. Ijirota ijire. Tiquina tiqirore ño peoeta”, ni tuhotumahye wese upũro pehe. ¹⁴ Sa ye tiqiro macũnore tiqiro ohoriquirore esagũ ihñañe ihña ihboyequina pehe tiquina basi ohõ saha ni, yahuducuahye. “Ahriquiro wese upũro macũno ijire. Tiquirore wejēihna. Sa yero ahri wese mari ya wese tojarota”, nimahye tiquina basi. ¹⁵ Sa ni tuhasa wese upũro macũnore wese đũhtũ cahapũ nea, wejē cãhye tiqirore. ¿Tiquina sa yegũ ihñano đũhse yerotari wese upũro wesere ihña ihboyequinare? niahye Jesu.

¹⁶ —Ti wesere ihña ihboyequinare wejēno taro, apequinare wesere ihña ihbo dutirota, ni yũhtiahye Jesu tiqiro basi.

Tiqiro sa nigũ tuhoye masa pehe ohõ saha niahye:

—Marine sa wahaeracãhdo, niahye tiquina.

¹⁷ Tiquina sa nigũ Jesu pehe tiquinare sinituahye:

—¿Cohãcjũ yere tiquina ojoari pũre ohõ saha ni yahuducuye, đũhse nino ni-ajari, musa tuhotugũ?

Ahriquiro Cristo utã yero saha ijire.

Utãre wũhũ dahreyequina tiquina cohãno saha masa tiqirore cohãeta. Tiquina sa yepegũta yojopũre wũhũ dahreyequina wũhũre yeye tiquina cũ muhtaria utãre tiquina cũno saha Cohãcjũ tiqirore puhtoro sõri, ni ojoahye.

¹⁸ Ijipihtiyequina tia utã bui doque queheyequinare mũta sitea wahaeta. Sa yero tia utã masũno bui bora pjero, mũtaa wahagũ yerota tiqirore. Tiquiro pagũ mũnanore daye manarigã wahagũ yerota, niahye Jesu. (Sa nino tiqirore cahmedariquina, tiqiro buhiri dahreatiquina tiquina ñano yũhduatire yahuro niahye.)

Pũtoa ye wapare apequina sinituahye Jesure

(Mt 21.45-46; 22.15-22; Mr 12.13-17)

¹⁹ Tiquiro sa nigũ tuhoye judio masare buheyequina, pahia puhtoã gũhũ, “Jesu wesere ihña ihboyequina queoye mehna marine tuhtiro nine”, ni, tuhotuahye tiquina.

Sa ni tuhotuye tiquina Jesure ñehe duamahye. Sa ñehe duepeta tiquina masare cue niahye. ²⁰ Sa cueye, Jesure tiquina ñeheatĩ pjere cohteahye tiquina. Sa ye “Poto ijiyequina yero saha ye meho ijiya musa”, niahye tiquina apequinare. Tiquiro ñano ni yũhtigũ ye duaye nimahye tiqirore yahusã duaye. Sa ye Jesure sinitu dutiye ohoahye ni mehoñequinare. Jesu ñano ni yahuducugũ tuhoye ti yehpa cjēna puhtorore peresu ye dutiye tee nimahye. ²¹ Sa ye tiquina Jesure ni meje cũ sinituye nimahye:

—Buhegu, poto yahuducugũ, ni mehoñe mariegu mũhũ ijigũ usã masiaja. Sa yegu ihcãquiro puhtoro

waro tiquiro ijiepegūta tiquiro gūhure dóyaro marieno potota yahure mūhū. Mūhū Cohācjū yere poto mūhū buhegū gūhure usā masiaja. ²²Yahuya usāre. ¿Ne, Roma cjūnore ijipihtiyequina puhtorore gobierno cjēne marine wapa yero cahmejari, mūhū tuhotugū? ¿Mari dutiye wapa ye dutiajari, mūhū tuhotugū? ni sinituahye tiquina Jesure.

²³Tiquina sa nigū tuhorō Jesu tiquina ñano ye duayere masino, tiquinare yuhtiahye:

²⁴—Yojopure niñeru cjoere puhtoare wapa yeati cjoere ne cāhtaya. Ti cjoere ihñauhna, niahye.

Ti cjoere tiquina ne wihigū ihñano ohō saha niahye Jesu:

—¿Noa boro queoye wahñajari ahri cjoere? ¿Noa boro wame wahñajari? niahye Jesu tiquinare.

—César, masa ijipihtiyequina puhtoro queoye, tiquiro wame gūhū wahñare, ni yuhtiahye tiquina.

²⁵Tiquina sa nigū Jesu yahuahye:

—Ti pje pūrta masa ijipihtiyequina puhtoro yere tiquiro pehere ohoya. Cohācjū yere Cohācjū pehere ohoya, niahye Jesu tiquinare.

²⁶Sa ye masa tiquina ihñonopū Jesure ñano ni yahuducugū ye masiedahye tiquina. Sa ye Jesu yuhtiyere tuhoye, tiquina tuho maria wahahye. Sa tuho maria waha, dihta maria wahahye.

**Cohācjū tiquiro masoatire
yahuahye Jesu saduceo masare**

(Mt 22.23-33; Mr 12.18-27)

²⁷Sa ye meheñequinagā saduceo masa Jesu cahapū wihiahye. “Cohācjū yariariquinare masosi”, ni tuhotuyequina ijiahye saduceo masa. Sa ye tiquina ohō saha niahye tiquirore:

²⁸—Buhegū, ohō saha ni buheahye Moise: “Ihcāquiro tiquiro wahmino namo tiriquire pohna mariedaperota tiquiro yariagū ihñano tiquiro bahurore

tiquiro wahmino namono ijiricorore nūoano cahmene. Sa yero tiquiro wahmino mūnano tiquiro pohna taboriro sahata pohna tiro cahmene tiquiro bahurore. Sa ye tiquiro pohne tiquiro wahmino mūnano pohne yero saha ijieta”, ni, ojoahye Moise, niahye tiquina.

²⁹Tire ni tuhasa ahri quitire tja yahu nemoahye Jesure:

—Ihcāquiro masano ijiahye. Seis bahana tiahye. Tiquina wahmino pehe namo ti, pohna mariediquiro yariaa wahahye. ³⁰Sa yero apequiro tiquiro bahuro gūhū tiquiro wahmino namono ijiricorore nūoahye. Tiquiro sa nūoari bato tiquiro wahmino yero sahata pohna mariedaperota tiquiro gūhū yariaa wahahye. ³¹Sa yero ahriquire bahuro gūhū tiquiro wahmino mūnano yero sahata pohna mariedaperota yariaa wahahye. Sa dihita wahahye ihcāquiro pohne waro. Ne pohna mariedapeta yaria pihitia wahahye. ³²Tiquina namono ijiricoro gūhū tiquina batota yariaa wahahye. ³³¿Ne, Cohācjū ijipihtiyequinare yariariquina mūnare tiquiro masogū diquire namono pehe ijiboagari ticoro pototi? Tiquina ijipihtiyequina ticorore namo tiriquire mūna ijiahye. ¿Sa yero diquire namono pehe ijirrotari? ni sinituahye tiquina.

³⁴Tiquina sa nigū Jesu yuhtiahye:

—Yojopū cjēna omoca dūhtere. ³⁵Tiquina sa dūhtepegūta apequina pehe topū cjēna pehe sa ijierare. Apequina umuare, numia gūhure poto yeyequinare Cohācjū quehnoañequina ijigū yerota. Tiquina yariari bato masa mūjaeta. Sa ye tiquina topū omoca dūhterare. ³⁶Sa ye tiquina angele yero sahata ne yariasi. Tiquina Cohācjū masoriquina ijiye, Cohācjū pohne ijire. ³⁷Yojopure yariariquina mūna tiquina masa wijiati pehere musare yahutja. Tire Moise quehnoano yahu pehoahye.

Tiquiro mehenugā ujūri quitire ohō saha ni yahuahye: “Abrahā, Isaac, Jacob tiquina puhtoro ijire Cohācjū,” ni ojoahye Moise. ³⁸Tiquina yariari bato “Tiquina puhto ijijaja”, ni yahuahye Cohācjū. Sa nieperota yariariquina muna puhtoro ijierare Cohācjū. “Tiquina puhto ijijaja”, tiquiro niñe mehna catiyequina tiquina ijigū masiaja mari. Tiquiro catiyequina puhtoro ijire. Ijipilhtiyequina masa catire, Cohācjū ihñagū, niahye Jesu tiquinare.

³⁹Tiquiro sa nigū meheñequinagā judio masare buheyequina ohō saha niahye:

—Buhegu, mūhu quehnoano yuhtiri, niahye tiquina Jesure.

⁴⁰Sa ye pari turi Jesure sinitu duer-ahye tiquina.

Cristo pehe Davi munano puhtoro ijire

(Mt 22.41-46; Mr 12.35-37)

⁴¹Came Jesu ohō saha ni yahu nemoahye tiquinare:

—“Cristo Davi munano panamino iji turiariquiro ijirota”, ni buhere apequina. ¿Duhse ye tiquina sa ni buheajari?

⁴²Davi munano tiquiro basi Salmopu tiquiro ojoari pūpu ohō saha ni, ojoahye: Cohācjū yūhu puhtorore ohō saha nidi: “Ohōpu yūhu poto pehepu dujiya. ⁴³Sa yegu mūhure ihña tuhtiyequinare mūhure yūhdūca basautja yūhu”, nidi Cohācjū yūhu puhtorore, ni, ojoahye Davi munano.

⁴⁴Sa ni ojoaro Davi munano Cristore “Yūhu puhtoro”, ni pisuahye. Davi munano Cristo ñecūno iji turiariquiro ijieperota Cristore “Yūhu puhtoro”, ni pisuahye. ¿Davi munano Cristo ñecūno iji turiariquiro ijieperota duhse ijire boro tiquiro “Yūhu puhtoro”, ni pisuyari Cristore? Cristo pehe Davi munano puhtoro ijire, ni yahuahye Jesu.

Judio masare buheyequina tiquina ñañe yeyere yahuahye Jesu

(Mt 23.1-36; Mr 12.38-40; Lc 11.37-54)

⁴⁵Masa peyequina Jesure tiquina tuhori watoa Jesu pehe tiquiro buheyequinare ohō saha ni yahuahye:

⁴⁶—Mari judio masare buheyequina tiquina ñañe yeyere ihñana quehnoano wacū masiña. Sa yena tiquina yero saha yeracāhña. Tiquina yoaye suhti saña, masa tiquina ihñonopu tini, doreri cjē duaropu apequina puhtoare quehnoano ño peo tiquina sinino saha tiquina piti ca sinigū cahmene tiquina. Sa ye tiquina mari judio masa buheye wūhusepu quehnoañe dujiye dihitare duji duare. Sa ye bose deco ijigū topu gūhure quehnoañe dujiye dihitare cahmene. ⁴⁷Tiquina wape wiha numia ye wūhūserē tiquina cuoye gūhure ehmare ti numiare. Sa ye tiquina masa ihñonopu yoari pje Cohācjūre siniducumene masare ihña dutiye. Tiquina sa yegū apequina bui cjūno tiquinare Cohācjū buhiri dahrerota, niahye Jesu tiquinare.

Wape wihoro Cohācjū wūhūpu ticoro ohorire yahuahye Jesu

(Mr 12.41-44)

21 Sa ni yahu tuhasa Cohācjū wūhū cjē niñeru tiquina sārī acarore niñeru opana tiquina ye niñerure duhu sīgū ihña dujiro niahye Jesu. ²Sa ihñano wape wihoro pejecuoricoro pua cjoegāre ticoro duhu sīgū gūhure ihñahye. ³Tire ihña tuhasa ohō saha ni yahuahye:

—Potota niita niaja musare. Ahricoro wape wihoro pejecuoricoro pehe niñeru sārī acaropu duhu sāno apequina ijipilhtiyequina ohori yūhdūoro ohori ticoro pehe. ⁴Apequina niñeru opana pajiro tiquina ohopegūta tiquina ye pajiro duhsare. Ahricoro pehe pejecuoricoro

ijieperota ijipihtiye ticoro ihyatire ticoro dúborigäre oho pehori, niahye Jesu.

**—Cohãcjũ wuhũ cohõri wuhũ
ijirota, niahye Jesu**

(Mt 24.1-2; Mr 13.1-2)

⁵ Sa ye apequina Cohãcjũ wuhũre ohõ saha niahye:

—Quehnoañe utã paca mehna yeri wuhũ, quehnoa yuhduari wuhũ ijicjoare. Masa Cohãcjũ ya wuhũ ijiatire tiquina ohori gãhũ ti wuhũpũre quehnoano cõri jire, ni, yahuducuye niahye.

Tiquina sa nigũ Jesu yahuahye tiquinare:

⁶—Ahri ijipihtiye mari ihñari wuhũsere, ahri utã paca gãhũre cohã pehoeta. Ne ihcãria utã tojoasi, niahye Jesu tiquinare.

Pihtiati deco ijiatire yahuahye Jesu

(Mt 24.3-28; Mr 13.3-23)

⁷ Tiquiro sa nigũ tuhoye tiquina pehe sinituahye tiquirore:

—¿Buhegũ, dũhse ijigũ mũhũ ni-diro saha sa waharotari? ¿Pihtiati deco panogã ijigũ dũhse ti waha ducagũ ihñanatarari usã? ni sinituahye tiquina Jesure.

⁸ Jesu yuhtiahye tiquinare:

—Quehnoano yeya mũa. Sa yena mũsare apequina tiquina ni mehoñene tũhoeracãhña. Peyequina masa “Cristo ijijaja yuhũ”, ni mehoñequina ahtaeta. Sa niñe, “Yojopũre pihtiati deco ijiatu mehenogã dũhsare”, nieta. Tiquina sa nigũ tũhoeracãhña. ⁹ Sa ye apequina “Cahme wejẽne nine”, mũsare nieta. “Yojopũre pũhtoare masa cohãñe nine”, nieta. Mũa tire tũhona cueracãhña. Pihtiati deco pano ohõ saha waha mũhtanota. Sa wahagũ pihtiati deco wahato dũhsarĩnota, niahye Jesu.

¹⁰ Sa ni tuhasa ohõ saha ni yahu nemoahye:

—Ihcã yehpa cjẽna ape yehpa cjẽna mehna cahme wejẽeta. ¹¹ Sa yero tutuaro yehpa ñuhmi, masa peyequina ujuua mehna yaria, ijipihtiro cjẽna dohatieta. Sa ye uhmuse cjẽ cua pesaye bajuagũ ihñañe, masa ihña maria wahaeta.

¹² Ahri ijipihtiye sa wahato pano, apequina mũsare ñehe, ñano yeeta. Sa ye mari judio masa buheye wuhũsepu tiquina mũsare yahusã, perusu yeeta mũsare. Tiquina sa yegũ peye yehpari cjẽna pũthoa cahapũ, peye macari cjẽna pũthoa cahapũ ducunata mũa tiquina yahusãnohrina. Yeequina mũa ijiri buhiri sa yeeta. ¹³ Tiquina sa yahusãgũ mũa pehe quehnoañe buheyere tiquinare yahunata. ¹⁴ Ti pjere mũsare tiquina yahusãgũ pũhtorore mũa yuhtiatire “Yahu masiedaboaga”, ni tũhotueracãhña mũa. ¹⁵ Yuhũ mũsare yahu basautja. Mũsare sa yedohogu tũho masiñene, quehnoañe yahuducuye gãhũre mũsare yahugũ yeitja. Mũa sa yegũ mũsare ihña tuhtiyequina pehe mũa yahuducuyere tũho, “Ti potu ijierare”, ni, yuhti masisi. ¹⁶ Ti pjere mũa pacusumũa, mũa bahana, mũa acaye, mũa mehna cjẽna gãhũ mũsare ihña tuhtiyequinare ohoeta mũsare, yeequina mũa ijiri buhiri. Tiquina sa yegũ mũsare ihña tuhtiyequina mũa mehna cjẽnare apequinare wejẽeta. ¹⁷ Sa ye yeequina mũa ijigũ ihñañe, ijipihtiyequina mũsare ihña tuhtietu. ¹⁸ Mũsare sa ihña tuhtiepetu ne mehenogã mũsare ñano yesi. ¹⁹ Sa yena mũa wacũ tutuana ijijya. Mũa sa yena, Cohãcjũ mehna sa ijiducunata.

²⁰ Sa ye peyequina surara Jerusalẽpu tiquina cahmota sotoa peho cãgũ ihñana, Jerusalẽne tiquina cohãto mehenogã dũhsagũ masinata mũa. ²¹ Ti sa wahagũ ihñañe Judea yehparũ ijijyequina cunũ cjũ cahapũ oma duhtiahro. Sa ye Jerusalẽpu ijijyequina wahaahro. Sa ye weseripu ijijyequina

Jerusalēpu tojoeracāhdo sojaro mehna tiquina wahato pehe. ²²Ti decoripū buhiri dahreye decoripū ijipihtiye Cohācjū tiquiro ojoari pū tiquiro nidiro sahata sa waharota. ²³Ijipihtiropū ahri yehpapū ñano yūhdueta. Ti sa wahagū, niji wahcōñe numia, tiquina pohnene apūoñe numia gūhū pejecuoro wahaeta. ²⁴Apequina ahri maca cjēna mehna cahme wejēeta. Sa ye apequina ahri maca cjēnare ijipihtiye yehparipū ne cā, peresu yeeta. Sa ye judio masa ijieyequina Jerusalēne ñano ye, tiquinare yūhdudcaeta. Judio masa ijieyequina ya deco pihtigūpu Jerusalē cjēnare ñano ye duhueta, ni yahuahye Jesu.

Jesu ahri yehpapū tiquiro tojoa tatire yahuahye

(Mt 24.29-35, 42-44; Mr 13.24-37)

²⁵Sa yero tiquinare yahu nemoahye:

—Ti pjere asū deco cjūno, ñami cjūno, ñahpicoha gūhū sijoro saha ijieyequina wahaeta. Ijipihtiyequina ahri yehpa cjēna “Acuehi, yarianata”, ni tuhotuyequina pajiri ma cjē pahcōri cua yūhduaro ti pahcōri bisi cāhtagū tuhoye tutuaro cueeta. ²⁶Ti pjere ūhmuse cjē yehpari, ñahpicoha gūhū ti sa wahaducurore camesaeta. Sa ye ñuhmieta. Ti sa wahagū ihñañe, masa pehe ahri yehpa pihtiatire cohteye, tutuaro cueeta. ²⁷Ti pjeta yūhū masū Cohācjū ohorigū Cohācjū tutuaye mehna tiquiro asi siteye mehna ehmeo curua buipū yūhū ahtagū ihñañe masa. ²⁸Ahri sa waha ducagū ihñana, wacū tutuana ijiya. Sa yena ūhmusepū ihñañe. Ti pjere Cohācjū musare pecapū wahaborinare tiquiro yūhdūoato mehenogā dūhsarota, niahye Jesu.

²⁹Sa ni tuhasa ahri queoye mehna buheahye Jesu:

—Higueragure, apeye cju gūhūre tuhotuya musa. ³⁰Tu yucugū pūri tigū ihñana, cūhma mehenogā dūhsagū

masine musa. ³¹Sata ahri ijipihtiye yūhū nidire ti sa wahagū ihñana, Cohācjū tiquiro puhtoro ijiati pje mehenogā dūhsagū masinata musa.

³²Musare poto niita niaja. Ti pje cjēna tiquina yariato pano ijipihtiye yūhū nidiro sahata sa waharota. ³³Ūhmuse, ahri yehpa gūhū pihtia waharota. Yūhū yahuducuye pehe ne camesasi. Ijipihtiye yūhū nidiro sahata sa waha sohtori tirota.

³⁴Yūhū tojoa tati decore ne masiedare musa. Sa yena quehnoano yeya. Bose decorire queheye decorire yeducueracāhña. Sa yena queheracāhña. Ahri yehpa cjēne pajiro tuhotueracāhña. Musa yūhū nidiro sahata yena, wacūeno mehna ahri yehpapū yūhū ahtagū musa ne acuasi.

³⁵Wahiquirore yuri da wacūeno mehna ti da tuā suharo saha wacūeno mehna ahtaütja yūhū. Ijipihtiyequina ahri yehpa cjēna tiquina masiedi watoa ti deco wacūeno mehna sa waharota. ³⁶Quehnoano wacū masi cohteya. Sa yena Cohācjūre ahrire sa siniducuya: “Ahri pihtiatati decore sa wahagū yūhūre yedohoya. Tutuayere ohoya yūhūre ahrire quehnoano yūhū yūhduatire. Sa yegu Cristore mūhū ohoriquirore cuero marieno yūhūre piti cagū yeya”, ni, siniña Cohācjūre, niahye Jesu.

³⁷Sa ye ti decorire Cohācjū wūhūpu Jesu buhee tiahye. Ñaminipe buhe tuhasaro Olivo wame tidū cūnūpu waha, topū iji bohreye tiahye. ³⁸Bohreyepe tahari ijipihtiyequina masa Cohācjū wūhūpu tiquirore tuhoye wahae tiahye.

Pahia puhtoa, judio masare buheyequina mehna wejē duahye Jesure

(Mt 26.1-5, 14-16; Mr 14.1-2, 10-11; Jn 11.45-53)

22 Sa ye ti pjere pugū yeye more-mehneñe päre tiquina ihyati bose

deco mehenogā duhsahye. Ti bose deco pascua wame tiahye. ²Sa ye pahia puhto, judio masare buheyequina mehna Jesure wejē duaye, tiquina wejēatire wacū macahye. Jesure wejē duepeta, masa pehere cueahye, “Usuari”, niñe.

³Sa ye wafino Juda Iscariotere nāno tiquiro ye dutigū Juda pehe yuhtiahye tiquirore. Juda doce buheyequina mehna cjanō ijimahye. ⁴Sa yero tiquiro pahia puhtoare, Cohācju wuhū cjēna surara puhtoa mehna gūhure yahuro wahahye. Tiquina cahapu esa, tiquinare Jesure tiquiro ihñoatire yahuahye tiquinare. ⁵Tiquiro sa nigū tuhoye, tiquina bucue, “Muhure niñerure wapa yenatja”, niahye tiquina Judare. ⁶Tiquina sa nigū Juda “Au, tiquirore musare ihñoutja”, ni, masa tiquina ihñeno watoa Jesure ihña tuhtiequinare tiquiro ihñoati namine cohtero niahye.

**Jesu buheyequina mehna tiquiro
ihya bato tiati deco ijiahye**

*(Mt 26.17-29; Mr 14.12-25;
Jn 13.21-30; 1 Co 11.23-26)*

⁷Pugū yeye moremehneñe pāre ihyati bose deco iji ducari deco ijiahye. Sa yero pascua cjē ijiatire ovejare tiquina ihyatiquinare tiquina wejēdi deco ijiahye. ⁸Ti pjeta Pedrore, Ņu gūhure Jesu yahuahye:

—Bose decopu mari ihyatire quehnona wahaya, niahye Jesu tiquinare.

⁹—¿Noho boropu mari ihyatire quehnoyu dutigū ohoajari muhū usāre? ni sinituahye tiquina tiquirore.

¹⁰Tiquina sa nigū Jesu yuhtiahye:

—Jerusalēpu musa esagū aco sutu wuariquiro musare piti carota. Tiquiro piti cagū tiquiro mehna wahaya. ¹¹Sa wahana tiquiro siho sajāri wuhupu esana wuhū upurore ohō saha ni yahuya. “¿Nohopu yuhū buheyequina

mehna pascua cjē ihyayere ihyanatari?’ nidi buheriquiro”, niña wuhū upurore. ¹²Musa sa nigū tuhoro uhmuano cjā tucūre pajiri tucūre mari cahmeñe mehna tiquina quehnoiri tucūre ihñonota wuhū upuro. Topu mari ihyatire dahreya musa, niahye Jesu tiquinare.

¹³Tiquiro sa nigū tiquina ti macapu wahahye. Topu tiquina esagū tiquinare tiquiro niđiro sahata wahahye. Sa ye tiquina pascua cjē ihyatire dahreahye.

¹⁴Ihyari pje ijigū Jesu doce tiquiro buheyequina mehna ihya dujiahye. ¹⁵⁻¹⁶Topu ihyaropu dujiro Jesu tiquinare yahuahye:

—Musare niita niaja. Ahri pascua bose decore mari dahreja Cohācju tiquiro yequinare tiquiro yuhduotire wacūna. Came Cohācju tiquiro puhtoro ijiropu tiquiro yequinare yuhduo tuhasarota. Tiquiro sa yuhduoato pano ahri deco cjēne pari turi ihyasi yuhū. Sa yegu yojopure yuhū nāno yuhduato pano ahri pascua cjē ihyayere musa mehna tutuaro ihya duahti yuhū, niahye Jesu.

¹⁷⁻¹⁸Sa ninota Jesu sihnidi pare ne, Cohācjūre “Quehnoare”, ni sini, tiquinare yahuahye:

—Musare niita niaja. Cohācju ijipihituequina puhtoro tiquiro ijiato pano ahri vinore ne pari turi sihnisi yuhū. Sa yena ahri vinore ne, musa basi iti sihniña, niahye Jesu.

¹⁹Sa ni tuhasa pāre ne, Cohācjūre “Quehnoare”, niahye. Sa yero tiare nuha, itiahye tiquinare. Tiare itiro, tiquinare yahuahye:

—Ahri yuhū pagu ijire. Yuhū pagu yuhure ihña tuhtiequinare tiquina ohori pagu ijirota musare yuhū yuhduoati. Sa yena yuhure musa wacūatire ahrire ihyaya, niahye Jesu.

²⁰Sa ihya tuhasa sata tiquiro tiquinare sihnidi pa gūhure ohoahye. Sa ohoro, tiquinare yahuahye:

—Musa ñañe yeyere cohāgu tagu yariūtja. Sa yegu yuhū diire cohātja. Cohācjū “Musare yuhdoutja”, tiqiro nidiro esa tuhagū yuhū yariaro mehna tiqiro nidiro sohtori tirota.

²¹ Yojoṗure tuhoya musa. Yuhūre ihña tuhtiequinare yuhūre ihñoatiquiro yojoṗure yuhū mehna ohō dujire. ²² Cohācjū tiqiro dutiriro sahata yuhū masu Cohācjū ohorigū yariūtja. Tiquiro sa yaria dutiepegūta yuhūre ihña tuhtiequinare ihñoatiquiro pūrta ña yuhdūaro yuhdūrota, niahye Jesu tiquinare.

²³ Tiquiro sa nigū tiquina pehe tiquina basi ohō saha ni sinituahye:

—¿Jesure ihña tuhtiequinare ihñoatiquiro mari mehna cjūno diquiro boro ijiagari? ni, yahuducuahye tiquina basi.

—¿Mari mehna cjūno diquiro pehe ijiagari puhtoro? ni yahuducuahye Jesu buheyequina tiquina basi

²⁴ Came Jesu buheyequina ohō saha ni yahuducuahye:

—¿Mari mehna cjūno diquiro pehe ijiagari puhtoro? ni yahuducuahye tiquina basi.

²⁵ Tiquina sa ni yahuducugū tuhoro Jesu tiquinare yahuahye:

—Cohācjūre cahmeeñequina puhtoa pehe tiquina masare dutiye, purino mehna dutire. Sa ye puhtoare “Tiquina masare yedohoyequina ijire”, nimene apequina masa tiquinare. ²⁶ Musa pehe sa yesi musa basi. Musa mehna cjūno musa wahmi pehere tiqiro bahuro yero saha ijiro cahmene. Musa mehna cjūno puhtoro iji duaro cahacjūno yero saha ijiro cahmene tiquirore. ²⁷ ¿Diquiro ijiagari puhtoro? ¿Ihya dujiriquiro pehe puhtoro ijiagari? ¿O ihyayere itiriquiro pehe puhtoro ijiagari? Ihya dujiriquirota ijiaga puhtoro. Tiquiro sa ijiepegūta yuhū pehe cahacjūno yero saha musare yedohogu ahtau.

²⁸ Masa yuhūre tiquina ñano yepegūta musa pehe yuhūre duhuerare.

²⁹ Sa yegu yuhū Pacu yuhūre tiqiro puhtoro sōriro sahata musa gūhūre puhtoa sōgutja yuhū. ³⁰ Yuhū puhto yuhū ijigū yuhū ihyari mesapu musa gūhū ihya, sihninata. Sa yena musa puhtoa dujiyere dujinata. Musa topu dujina Israe masare doce cururi cjēnare besenata musa ñañequinare, quehnoañequinare, niahye Jesu tiqiro buheyequinare.

Pedro Jesure tiqiro cohātire yahuahye Jesu

(Mt 26.31-35; Mr 14.27-31; Jn 13.36-38)

³¹ Sa ni tuhasa Pedrore Jesu ohō saha ni yahuahye:

—Simo Pedro yuhūre tuhoya. Musare ijipihtinare watino yuhūre cohāgū ye duare. Trigo wese cjūno trigore tiqiro wejē site cohāriro sahata musare ijipihtinare watino ñano ye duare. Sa ye duaro, Cohācjūre sinidi. ³² Tiquiro sa sinigū ihñagū yuhū pehe Cohācjūre sini basau mūhūre. Yuhūre mūhū wacū tutua duhueratire sini basau mūhūre. Sa yegu mūhū yuhū mehna cjū pari turi ijigu yeequinare yedohoya mūhū, yuhūre tiquina wacū tutua nemoati, niahye Jesu Pedrore.

³³ Tiquiro sa nigū Pedro yuhtiahye:

—Puhto, yuhūre tiquina peresu yepegūta, yuhūre tiquina wejē duepegūta mūhū mehna cjū ijiitja, niahye Pedro.

³⁴ Jesu yuhtiahye:

—Pedro, mūhūre niita niaja. Mia ñami canaca tiqiro yahuato pano “Jesure masiedaja”, niguta mūhū apequinare. Ihtia taha sa niguta mūhū, niahye Jesu Pedrore.

**Jesure tiquina ñano ye ducato
mehenogã duhsahye**

³⁵Sa ni tuhasa Jesu tiquiuro buheye-quinare yahuahye:

—¿Sohõ ijiri pje niñeru ajuro mariena, pajiri ajuro mariena, dahpo suhti mariena musare yũhu ohogũ apee boro duhsari musare? ni sinituahye Jesu.

—Ne usãre yabe duhsaerari, ni yũhtiahye tiquina.

³⁶—Ti pjere musare duhsaerapegũta yojopũ pehere niñeru ajurore cuona tire neña. Pajiri ajurore cuona gũhu neña. Sa yena musare ñoseni pjĩ mariedagũ musa suhtire duana ti pjĩne dúya. ³⁷Ahrire musare nii niaja. Cohãcjũ yere tiquina ojoari pũpũ tiquina nidiro sahata yũhure sa waharo cahmene. Ohõ saha niahye ti pũpũ: “‘Tiquiro dutiyere yũhdũdũcayequina mehna cjũno ijire’, nieta masa”, ni, ojoahye, niahye Jesu.

³⁸—Ihñaña puhto. Pũa pjĩ ñoseñe pjĩnine cuoaja usã, niahye tiquiuro buheyequina.

—To punota ijire, ni yũhtiahye Jesu.

**Getsemaní wame tiri wesepũ Jesu
Cohãcjũre siniahye**

(Mt 26.36-46; Mr 14.32-42)

³⁹Sa ye Jesu tiquiuro sa yeducuriro sahata Olivo wame tidũ cunũpũ wahahye. Tiquiro sa wahagũ tiquiuro buheyequina tiquiuro mehna wahahye. ⁴⁰Topũ esaro tiquiuro tiquinare yahuahye:

—Cohãcjũre siniña musa ñano yer-
atire, niahye Jesu tiquinare.

⁴¹Sa ni tuhasa tiquiuro dihita mehenogã waha nemo, dũsepe curi mehna quehe sa, Cohãcjũre siniahye:

⁴²—Mai, yũhu ñano yũhduatire ye dueragu yeracãhña. Yũhu sa niepegũta yũhu cahmeñe pehere yeracãhña. Mũhu pehe masine. Mũhu cahmeno saha yeya yũhure, ni siniahye Jesu Cohãcjũre.

⁴³Tiquiro sa sinigũ uhmũsepũ ahtariquiuro angel Jesure bajua, yedohoahye tiquiore. ⁴⁴Sa yero Jesu ñano jeripohna ti, tutuaro mehna Cohãcjũre siniahye. Sa yero tiquiuro asi ti cuhsaye dii pjeri yero saha tiquiore wijia, yehpapũ bora quehe sahye.

⁴⁵Cohãcjũre sini bato ti, wahcãdũca sa, tiquiuro buheyequina cahapũ wihi-ahye. Tiquiro wihigũ tiquiuro buheye-quina tutuaro bũjũa witiyequina ijiye, carĩne niahye. ⁴⁶Sa yero Jesu tiquinare ohõ saha ni yahuahye:

—¿Duhsena carĩajari musa? Wahcãña. Cohãcjũre siniña musa, “Ñano yeari”, nina, niahye Jesu tiquinare.

**Jesure ihña tuhtiyequina
tiquiore peresu yeahye**

(Mt 26.47-56; Mr 14.43-50; Jn 18.2-11)

⁴⁷Tiquiro sa ni yahuducuri watoa masa peyequina wihiahye. Juda doce buheyequina mehna cjũno ijimediquiro masare uhmũ tã cãhtariquiuro ijiahye. Sa yero tiquiuro Jesu cahapũ wihi, wahsupu ihmiahye tiquiore. ⁴⁸Tiquiro sa ihmigũ Jesu tiquiore sinituahye:

—¿Juda, yũhu masure Cohãcjũ ohorigare yũhure ihña tuhtiyequinare ihñogu yũhure wahsupu ihmĩne mehna sa yeajari mũhu? niahye Jesu.

⁴⁹Tiquiro sa nidi bato Jesu buheye-quina masa Jesure tiquina ñeheatire masĩne, tiquiore sinituahye:

—¿Puhto, usã ñoseñe pjĩni mehna tiquina mehna cahmequema? niahye tiquina.

⁵⁰Tiquina sa nidi bato ihcãquiuro Jesu buheyequina mehna cjũno pehe pahia puhtoro cahacjũnore tiquiuro ñoseni pjĩ mehna tiquiuro cahmonore poto pehe ijiri cahmonore dũte pahrẽ cãhye. ⁵¹Tiquiro sa yegũ ihñano Jesu tiquiore ohõ saha niahye:

—Sa yeracãhña, niahye.

Ni, cahacjūno cahmono ijiriropu űa ohōahye. Tiquiro űa ohōgūta cahmono mūnano sahata ijiahye tja. ⁵²Sa ye tuhasa pahia puhtoare Cohācjū wūhu cjēna surara puhtoare, bucūna gūhure tiquirore űehēne ahtariquinare Jesu sinituahye:

—¿Dūhse ijiro boro mūsa űoseűe pĵini, yucu tiāri mehna yaqueriquirore tiquina yeriro saha mūsa yūhure űehena ahtajari? ⁵³Decoripe Cohācjū wūhuru mūsa mehna yūhu ijigū, mōsa yūhure űehedari. Sa ijiepegūta yojopure mūsa ya deco yūhure mūsa űano yeati deco ijire. Yojopu watīno tiquiro űano yeati deco gūhu ijire, niahye Jesu.

**—Tiquirore masiedaja,
niahye Pedro Jesure**

*(Mt 26.57-58, 69-75; Mr 14.53-54,
66-72; Jn 18.12-18, 25-27)*

⁵⁴Tiquina Jesure űehē tuhasa pahia puhtoro ya wūhuru neahye tiquina tiquirore. Tiquina topu neagū Pedro yoropu tiquinare ihūa nūnu tāhye. ⁵⁵Puhtoro ya wūhuru esa, topu wūhu cahapu ijiri paapu, quehnoari paa decopu peca wijiāhye apequina. Tiquina wijiāgū ihūano Pedro peca cahapu dujiyequina mehna dujiahye. ⁵⁶Tiquiro dujiri bato ihcācoro cahacjōno tiquirore quehnoano ihūa, apequinare ohō saha ni yahuahye:

—Ahriquiropu gūhu tiquiro mehna ijiri, niahye ticoro.

⁵⁷Ticoro sa nigū tuhoro Pedro yuhtiahye:

—Numio, tiquirore ne masiedaja yūhu, nimahye tiquiro.

⁵⁸Came cjūnogā apequiropu Pedroro ihūa, ohō saha ni yahuahye:

—Mūhu gūhu tiquina mehna cjū ijire, niahye tiquiro.

—Ne ijieraja, nimahye Pedro.

⁵⁹Ihcā hora bato apequiropu apequinare ohō saha ni yahuahye:

—Ijirota ijire. Ahriquiropu Galilea cjūno ijire. Sa yero potota Jesu mehna ijiri ahriquiropu gūhu, niahye tiquiro apequinare.

⁶⁰Tiquiro sa nigū Pedro yuhtiahye:

—Ne, mūhu nidiquirore masiedaja yūhu, ni yuhtiahye Pedro.

Tiquiro sa ni yahuducuri watoa canaca yahuahye. ⁶¹Tiquiro yahugūta Jesu wūhu cahapu ijiriquiropu Pedroro majare ihūadoqueoahye. Tiquiro sa yegū Pedro pehe Jesu tiquiro nidire wacūahye. “Mia űami canaca tiquiro yahuato pano, ‘Yūhu Jesure masiedaja’, nigūta mūhu. Ihtia taha sa nigūta mūhu”, Jesu tiquiro nidire wacūahye Pedro. ⁶²Sa wacūno Pedro topu wijiata, tutuaro utiahye.

Jesure bujūpe, quēahye tiquina

(Mt 26.67-68; Mr 14.65)

⁶³Sa ye Jesure cohteyequina surara tiquirore bujūpe, quēpeahye. ⁶⁴Sa quēpeye, tiquiro caperire dūhte cahmota, tiquirore sinituahye:

—¿Diquiro mūhure quēari? Ihūedapeguta yahuya űsāre, ni sinitupeahye tiquina.

⁶⁵Sa ye peye űano ni yahuducuahye tiquina tiquirore.

Jesure puhtoa sinituahye

(Mt 26.59-66; Mr 14.55-64; Jn 18.19-24)

⁶⁶Bohrearopu judio masa bucūna, pahia puhtoa, judio masare buheyequina gūhu cahmecoahye. Tiquina sa cahmecoanopu apequina tiquina cahapu Jesure ne cāhtahye.

⁶⁷—Yahuya űsāre. ¿Cristota ijijari mūhu? ni sinituahye tiquina Jesure.

Tiquina sa nigū Jesu yuhtiahye:

—Mūsaűe yūhu yahugū, yūhure tuhosi mūsa. ⁶⁸Mūsaűe yūhu sinitugū yūhure yuhtisi mūsa. Sa yena yūhure wiosi mūsa. ⁶⁹Mūsa wioerapegūta came cjūnogā ijipihtiye decori yūhu masu

Cohācǵū ohorigū Cohācǵū tutuariquiro tiquiro poto pehepū dujigutja, niahye Jesu.

⁷⁰Tiquiro sa nigū tiquina ijipihtiye-quina sinituahye tja pari turi:

—¿Sa nigū Cohācǵū macuta ijiajari muhū? niahye tiquina.

—Musa nino sahata ijiaja, ni yuhtiahye Jesu tiquinare.

⁷¹Tiquiro sa nigū tiquina ohō saha ni yahuducuahye tiquina basi:

—Ahriquiro Cohācǵüre pajiro tiquiro ñano yahuducugū mari basi tuhō. Sa ye topequinata yahusāahdo ahriquirore, niahye tiquina basi.

Pilato Jesure sinituahye

(Mt 27.1-2, 11-14; Mr 15.1-5; Jn 18.28-38)

23 Sa ni tuhasa tiquina ijipihtiye-quina wahcādūca, Jesure Pilato cahapū neahye. ²Ne esa, Jesure yahusā dūcahaye:

—Ahriquiro mari ya yehpa cǵenare tiquiro ñano ye dutigū usā tuhō. Mari puhtoro ahriquiro wapa ye dutiare. Sa yero tiquiro “Puhto ijiaja. Cristo masare yuhduoacǵū ijiaja yuhū”, ni yahuducure tiquiro basi, ni yahusāhye tiquina Jesure.

³Tiquina sa ni yahusāri bato Pilato Jesure sinituahye:

—¿Judio masa puhtota ijiajari muhū? niahye tiquiro Jesure.

—Muhū nino sahata ijiaja, ni yuhtiahye Jesu.

⁴Tiquiro sa nigū Pilato pahia puhtoare, masa gūhure yahuahye:

—Ahriquiro buhiri mariedare, niahye tiquiro.

⁵Tiquiro sa niepegūta tiquina tutuaro yahusā nemoahye:

—Tiquiro buheye mehna masare cahmequegū yere. Galilea yehpapū tiquiro tire ye dūcari. Sa ye dūca tuhasa ijipitiro Judea yehpapū tire tiquiro yere. Sa

yero yojopū ohōpū gūhure tire yero taro nine, ni, yahusāhye tiquina.

Herode Jesure sinituahye

⁶Tiquina sa ni yahusāgū tuhoro Pilato pehe sinituahye:

—¿Ahriquiro Galilea cǵāno ijiajari? niahye tiquiro.

⁷—To cǵūnota ijire, ni yuhtiahye apequina.

Tiquina sa ni yuhtigū tuhoro Pilato pehe Jesu tiquiro ijiri yehpare masino puhtoro Herode ya yehpa cǵāno Jesu tiquiro ijigū masiahye. Tire masino Jesure Herode cahapū ohoahye. Ti pjere Herode Jerusalēpū ijiahye. ⁸To pano Herode Jesure tuhō tuhasahye. Tiquiro sa tuhori bato yoari bato tiquirore ihña duahye. Jesu Cohācǵū tutuaye mehna tiquiro ye ihñogū ihña duamahye tiquiro. Sa yero tiquiro Jesure ihñano, bucueahye. ⁹Sa yero peye tahari sinituahye Jesure. Tiquiro sa sinituepegūta Jesu ne yuhtierahye tiquirore. ¹⁰Pahia puhtoa, judio masare buheyequina gūhū Herode cahapū esa, tutuaro Jesure yahusāhye. ¹¹Tiquina yahusāri bato, Herode tiquiro yequina surara mehna bujūpe, Jesure ñano yeahye. Sa bujūpeye, quehnoari suhtirore puhtoro tiquiro sañari suhtiro yero saha bajuri suhtirore sāahye tiquina Jesure. Sa bujūpe tuhasa, tiquirore Pilato cahapū ohoahye tja. ¹²Ti decore Herode, Pilato mehna quehnoano tiquina basi cahme yeyequina iji dūcahaye. To panore tiquina basi cahme ihña tuhtiyequina ijinimahye.

Masa Jesure wejē dutiahye

(Mt 27.15-26; Mr

15.6-15; Jn 18.39-19.16)

¹³Sa ye Pilato pahia puhtoare, apequina puhtoare, masa gūhure tiquiro pijiogū, cahmeoahye. ¹⁴Tiquina cahme-coa pihtigū ihñano ohō saha niahye Pilato tiquinare:

—Ahriquiore yuhure ne cāhtana, “Tiquiro masare ñano ye dutiri”, nimesi msa yuhure. Yojoḡ msa ihñonopu ahriquiore quehnoano sinitu pehou tja. Yuhu sa sinituri bato msa tiquirore sa yahasāducugū tiquirore ñaṇe buhiri ne mariedare, yuhu ihñagū. ¹⁵ Herode gāhu tiquirore “Ne, ñaṇe buhiri mariedare”, nidi. Sa nino ahriquiore pari turi usāre oho majare tojore tja. Sa yena ahriquiore tiquiro ñaṇe buhiri mariedagū tiquirore msa wejē duti masiedare. ¹⁶ Sa yegu tiquirore yuta dari mehna tana dutiitja yuhu. Sa tiquina tanari bato tiquirore wioutja, nimahye Pilato masare.

[¹⁷ Cuhmaripe pascua bose decorire masa yaquiro ijiatiquirore ihcāquiro peresupu ijiriquiore Pilato wio basaducue tiahye.] ¹⁸ Sa ye Pilato “Jesure wioutja”, tiquiro nigū tuhoye ijiphiyequina masa ohō saha ni sañuducuahye:

—Tiquirore Jesure wejēña. Barrabá pehere usāre wio basaya, ni sañuducuahye masa.

¹⁹ To pano Barrabá pehere Jerusalēpu pūhtoare tiquiro cohā dutiri buhiri, masare tiquiro cahmeque dutiri buhiri, tiquiro wejēdi buhiri, peresu yeahye tiquirore. Sa ye camepure tiquirore masa wio dutiye niahye. ²⁰ Pilato Jesu pehere wio duamahye. Sa yero tiquiro masare sinituahye tja. ²¹ Tiquiro sa wio duepegūta tiquina tiquirore niahye tja:

—Curusapu quē biha wejēña tiquirore. Wejēña tiquirore, ni sañuducuahye tiquina.

²² Tiquina sa nigū Pilato ihtia taha waro ohō saha nimahye tiquinare:

—¿Yabere ñano yeri tiquiro msa sa ni sañuducugū? Ne tiquirore ñaṇe buhiri mariedare. Sa yegu tiquirore wejē duti masiedaja. Tiquirore yuta dari mehna tana dutiitja. To punota ye dutiitja. Sa yegu wioutja tiquirore, nimahye Pilato.

²³ Tiquiro sa niepegūta tiquina tutuaro mehna sañuducu nemo, Jesure curusapu wejē dutiahye. Tiquina sa ni sañuducugū tuhoro tiquina cahmediro sahata Pilato yeahye. ²⁴ Sa yero tiquina sinidiro sahata Pilato Jesure wejē dutiahye. ²⁵ Sa dutiro tiquiro peresupu ijiriquiore masare cahmequegū yeriquirore, masare wejēdiquiore masa tiquina sinidiro sahata Pilato Barrabá pehere wioahye. Sa yero Pilato Jesure curusapu wejē dutiahye.

Tiquina Jesure curusapu quē biha wejēahye

(Mt 27.32-44; Mr 15.21-32; Jn 19.17-27)

²⁶ Sa ye tiquina Jesure wejēñe waha, neahye. Ti pje tiquina sa yeri watoa Simo wame tiriquiore Cirene cñño ihquē wuhuse ijiropu esariquiore tojoa taro niahye. Jerusalēpu tiquiro wihigū ihñañe Jesure neañequina tiquirore piti ca, ñehe, curusare tiquirore wua cā dutiahye Jesu bato pehe.

²⁷ Sa ye masa peyequina Jesure ihña nunu tāhye. Sa ye masa watoa ijiyequina numia tiquirore tiquina sa yegū ihñañe tutuaro utiahye. ²⁸ Tiquina utigū tuhoro, tiquina numiare Jesu majare ihña, ohō saha niahye:

—Jerusalē cñña numia, yuhure utieracāhña. Msa ye ijiatire, msa pohna ye ijati gūhure utiya. ²⁹ Apeye decori ijigū ña yuhduaro yuhdunata msa. Ti pjere masa ohō saha nieta. “Pohna mariena numia, pohna tiena numia, apūoedari numia yojoḡ mari ijigū quehnoa yuhduaboaga”, nieta numia.

³⁰ Ti pjere cññe ohō saha ni yahuducuetā masa. “Mūhu cññu usā buipū bora dijia taya. Usāre nñoña”, nieta masa cuye. ³¹ Masa yuhure buhiri mariegure ohō saha tiquina yegū, ñaṇe buhiri cwoyequina pehe ña yuhduaro wahaeta, niahye Jesu.

³² Apequina puaro dutiyere yuhduducayequina tiquina ijigū tiquina gūhure Jesu mehna tiquina wejēatiquinare neahye tiquina. ³³ Tiquinare nea, “Dapu pehtoro”, wame tiropu esa, curusapu Jesure quē biha ohōahye. Sa ye puaro yuhduducayequina gūhure apequiore tiqiro poto pehe, apequiore tiqiro cū pehe pehe quē biha ohōahye. ³⁴ Tiquina sa yegū Jesu ohō saha niahye:

—Mai, ahriquina yuhure wejēatiquina yojopu tiquina nāno yerire boya tiquinare. Tiquina dahse yerire masiedare tiquina. Sa yegu tiquina nāno yerire boya, niahye Jesu.

Sa ye Jesu suhtire cahme itiyē, tiquina doquepeahye. Tiquiro suhtire “¿Noa yaro ijirōtari ohō?” ni cahme doquepeahye tiquina. ³⁵ Sa ye masa topu ducuyequina tiquina ihñaducuri watoa judio masa puhto Jesure bujūpeahye:

—Tiquiro apequina masare yariaboriquinare yuhduoñohiti. Sa yero tiqiro Cristo Cohācjū beseriquiro ijiro, yojopu yariaboriquiro ijiro, tiqiro basi yuhduoahro, ni, bujūpeahye tiquina.

³⁶ Surara gūhu tiquiore bujūpeahye. Jesu cahapu esa, tiquina tiquiore ñañe co vinore ohomahye. ³⁷ Tire yeye ohō saha niahye tiquina:

—Muhu judio masa tiquina puhto ijigu muhu basi yuhduya. Sa yegu yuhdu witiiguta muhu, ni, bujūpeahye tiquina.

³⁸ Sa ye tiqiro bui ohō saha ni oja ohōahye. “AHRIQUIRO JUDIO MASA PUHTORO LJIRE”, ni, oja ohōahye.

³⁹ Apequiore tiqiro mehna tiquina quē biha ohōriquiore yuhduducariquiore pehe nāno yahuducuahye Jesure:

—¿Muhu Cristo masare yuhduoacju ijierajari? Muhu basi, usā gūhure yedohoya, niahye tiqiro Jesure.

⁴⁰ Tiquiro sa nigū tuhoro apequiore yuhduducariquiore Jesu poto pehepu

tiquina quē biha ohōriquiore pehe tiquiore ohō saha niahye:

—Mari gūhure poto ijiye mehna buhiri dahrere tiquina. ¿Duhsegu Cohācjūre ne ño peerajari muhu? ⁴¹ Marine ñañe buhiri ye, poto yeye nine tiquina. Ñañene mari yeri buhiri marine buhiri dahrere tiquina. Ahriquiore pehe ñañene yerare, niahye tiqiro apequiore yuhduducariquiore.

⁴² Sa nino, tiqiro Jesure ohō saha niahye:

—Jesu, muhu puhto ijigu tojoa tagu, yuhure wacūña, niahye tiqiro Jesure.

⁴³ —Muhure ahrire nii niaja. Miare paraíso wame tiropu muhu yuhu mehna ijiita, niahye Jesu tiquiore.

Jesu yariaa wahahye

(Mt 27.45-56; Mr 15.33-41; Jn 19.28-30; He 6.19-20; 10.19-20)

⁴⁴ Sa ye coheri pje ijigū asū asi duhuahye. Sa yero ijipihtiro ti dihtapure ihtia hora waro quehnoano nahitiahye.

⁴⁵ Nahitiari watoa, Cohācjū wuhu cja suhtiro cahsero, tiquina tore cahmotari cahsero decopu ti cahsero uhmusepu tuhnu daca, tuhnu yojoa saa wahahye.

⁴⁶ Sa yero Jesu tutuaro sañuducuahye:

—Mai, yuhu jeripohnare muhure wiaja muhu ihña ihboatire, ni, sañuducuahye Jesu.

Sa ni tuhasa yariaa wahahye.

⁴⁷ Tiquiro sa yariagū ihñano, surara puhtoro pehe “Cohācjū tutuariquiore ijire”, nino, “Ahriquiore Jesu mūnāno potota quehnoariquiore ijimeya”, niahye surara puhtoro.

⁴⁸ Sa ye tiquina wejēgū ihñañe ahtariquina Jesu tiqiro yariagū ihñañe, tiquina ye wuhusepu tojoaa wahahye. Tojoaa waha, tiquina ñañe yerire bujua witiye mehna tiquina cutiro bui quē ohōahye. ⁴⁹ Ijipihtiyequina Jesu yequina tiqiro mehna cjena Galileapu

tiquiro mehna ahtariquina numia gũhu Jesure yoropu ihñaducuahye.

Jesu pagure masa copepu cūahye

(Mt 27.57-61; Mr 15.42-47; Jn 19.38-42)

⁵⁰⁻⁵¹Ti pjere José wame tiquiro topu ijiahye. Judea yehpa cjā maca Arimatea wame tiri maca cjūno ijiahye. Sa yero tiquiro quehnoariquiro, poto yeriquiro ijire, Cohācjū pūhtoro iji dūcatire cohteriquiro ijiahye. Sa yero tiquiro judio masa pūhtoa mehna cjūno ijieperota Jesure tiquina wejē dutigū cahmedamahye tiquiro. ⁵²Sa yero Pilato cahapu esa, Jesu pagure siniahye. ⁵³Sini tuhasa, Jesu pagure ne dijio, quehnoari suhtiro mehna tiquiro pagure wahmeahye. Sa wahme tuhasa, masa copepu utāpu tiquina seheri copepu cūahye tiquiro pagure. Ti copere ne apequina yariariquinare cūedarīahye. ⁵⁴Ti deco saurū deco ijiatire tiquina quehnoyuri deco ijiahye. Saurū tiquina sori deco ijiasi mehenogā dūhsahye.

⁵⁵Sa ye Galileapu Jesu mehna ahtariquina numia masa copepu José mehna wahahye. Masa copepu esa, ti copere ihña, Jesu pagure tiquina cūrire ihñahye. ⁵⁶Came tiquina ye wūhūsepu tojoaa waha, ehme sitiye co, wisōñe mehna quehnoahye tiquina. Sa ye saurū ijigū Cohācjū dutiye Moiserē tiquiro cūri dutiye nino sahata tiquina soahye.

Jesu masa wijiahye

(Mt 28.1-10; Mr 16.1-8; Jn 20.1-10)

24 Domingo ijigū bohrearopu tiquina numia ehme sitiye tiquina quehnorire Jesu masa copepu ne cāmahye. ²Ti copepu esa, ti copere bihariare utāre tiquina pōo duhu cūria utāre ihñahye. ³Sa ihñañe tiquina ti copepu sajāa wahahye. Jesu pagure bocaerahye tiquina. ⁴Tiquiro pagure bocaera, “¿Dūhse wahayari?” ni tūhotuahye tiquina. Tiquina sa ni

tūhotu yahuducuri watoa pūaro umña asi siteye suhti sañañequina tiquina cahapu ducuahye. ⁵Topu tiquina ducugū ihña, numia cueye, dusepe curi mehna quehe sahye. Sa ye umña pehe tiquinare yahuahye:

—¿Dūhsena yariariquiro ijire Jesure macajari msa? YojoPURE tiquiro catiriquiro ijire. ⁶Tiquiro ohōre mariedare. Masa wijia tuhasari. ¿Sohō ijiri pjere tiquiro Galileapu msa mehna ijire msare tiquiro nidire wacūajari msa? ⁷“Yūhure Cohācjū ohorigure apequiro ohorota ñañequinare. Tiquiro ohori bato yūhure curusapu quē biha wejēeta tiquina. Sa yegu yūhu yariari bato ihtia deco wahaboro masa wijiajutja yūhu”, nidi msare. ¿Tiquiro sa nidire wacūajari msa? niahye umña pehe.

⁸Tiquina sa nigū tūhoye, numia pehe tiquiro nidire wacūahye. ⁹Tiquina sa nidi bato tiquina tojoaa waha, once buheyequinare apequina gūhure tire yahu pehoahye. ¹⁰Tiquina numia pehe María Magdalena, Juana, María Santiago pacoro ijiahye. Tiquina numia apequina numia gūhu ijiahye Jesu buheyequinare yahuri numia. ¹¹Tiquina sa ni yahuepegūta Jesu buheyequina pehe “Poto niñe niedaga. Ni mehoñe niaga ahriquina numia”, ni tūhotumahye. Sa ye tiquina numiare tūho duerahye.

¹²Tiquina sa nigū tūhoro, Pedro pehe masa copepu oma cā, ihñano wahahye. Ti copepu esa, tiquiro muhri ihña sōahye. Jesure tiquina wahmedi suhtiro dihitare ihñahye. “¿Dūhse wahayari?” ni, tūhotu, tiquiro ya wūhūpu tojoaa wahahye.

Emau wame tiri maca cjā mahapu Jesu bajuahye

(Mr 16.12-13)

¹³Ti decota pūaro Jesu buheyequina mehna cjēna Emau wame tiri macapu

wahaye niahye. Jerusalē once kilómetro yoaro ijire Emaup̄ esato. ¹⁴Emaup̄ waha, ijipihtiye Jerusalēp̄ ti pjere Jesu tiquiro sa waharire tiquirore tiquina ñano yerire yahuducu cãñe niahye. ¹⁵Tiquina sa ni yahuducuri watoa Jesu pehe tiquina cahap̄ esa, tiquina mehna wahahye. ¹⁶Sa ye tiquirore ihñaepeta tiquina tiquirore ihña masiedahye.

¹⁷—¿Duhse ni yahuducu cãna nijari m̄sa? ni, situahye Jesu.

Tiquiro sa nigũ tiquina b̄j̄na witiye-quina esaducahye.

¹⁸Cleofa wame tiquiro pehe Jesure yuhtiahye:

—¿Yojop̄re Jerusalēp̄ tiquina yerire m̄h̄u dihita masiedajari? ni situahye tiquiro.

¹⁹—¿Duhse wahari Jerusalēp̄re? niahye Jesu.

Tiquiro sa nigũ Cleofa yuhtiahye:

—Jesure Nazare cj̄n̄ore tiquina yerire nina niaja. Tiquiro Cohãcj̄ yere yahu m̄htariquiro ijimedi. Sa ye tiquiro yahuducurire t̄hoye, tiquiro yeri ḡh̄ure ihñañe, “Tutuariquiro ijire”, ni, t̄hotumedi masa. Cohãcj̄ ḡhu sata ni t̄hotuaga. ²⁰Mari pahia p̄h̄toa, apequina p̄h̄toa mehna tiquirore wej̄e dutiye, apequinare ohori. Tiquina sa ohogũ apequina pehe tiquirore curusap̄ quẽ biha wej̄edi. ²¹“Roma cj̄n̄are cohãtiquiro Israe masa p̄h̄toro ijiatiquiro ijire”, ni, t̄hotumi usã tiquirore. Mia mehna ihtia deco wahare tiquiro yariari bato. ²²Meheñequinagã numia usã mehna cj̄na numia usãre acuagũ yeri. Bohrearop̄ Jesu tiquiro masa copep̄ tiquina numia esa, ²³tiquiro pagure bocaerañoh̄ti. Tiquiro pagure bocaeraye, tiquina tojoa wihi yahuri. “Usãre angele bajuari. Jesu catiñoh̄ti”, ni yahuri usãre numia pehe. ²⁴Tiquina sa nigũ apequina usã mehna ni diro sahata ihñañoh̄ti. Tiquina ḡhu

Jesure ihñañoh̄ti, niahye tiquiro Jesure.

²⁵Tiquiro sa nidi bato Jesu yahuahye tiquinare:

—Musa ne t̄ho masiedare. ¿Cohãcj̄ yere yahu m̄htariquina m̄na tiquina nidire quehnoano t̄hoerari m̄sa?

²⁶Cristore tiquiro p̄h̄toro ijato pano uhm̄sep̄ tiquiro m̄jato pano tiquirore ñano yuh̄ro cahmedi. ¿Tire masiedajari m̄sa? niahye Jesu tiquinare.

²⁷Sa nino Cohãcj̄ Cristore tiquiro ni yahu tiquina ojoarire Jesu yahu peho cãhye tiquinare. Moise m̄n̄ano tiquiro ojoarire Jesu yahu d̄cahye. Sa yero ijipihtiyequina Cohãcj̄ yere yahu m̄htariquina Cristore tiquina ojoari ḡh̄ure yahu peho cãhye tiquiro.

²⁸Tiquina wahari macap̄ tiquina esaye taye yegũ, Jesu pehe tiquinare yuh̄u cãa wahamahye. ²⁹Tiquiro sa yepegũta tiquina tiquirore waha dutierahye:

—Usã mehna tojoaya. Ñamicahap̄ ijire. Nahinop̄ nine, niahye tiquina tiquirore.

Sa yero Jesu tiquina mehna wuh̄p̄ sajãa wahahye. ³⁰Wuh̄p̄ sajã sa, tiquiro tiquina mehna ihyari mesap̄ nuju sa, p̄re ne, Cohãcj̄re “Quehnoare”, niahye. Sa nino ti p̄re nuha ne, tiquinare ohoahye. ³¹Tiquiro sa yegũ ihñañe tiquina Jesure ihña masiahye. Tiquina ihña masi d̄cagũta tiquiro buti maa wahahye. ³²Tiquiro sa buti maa wahagũ ihñañe tiquina basi ohõ saha ni yahuducuahye:

—Mahap̄ tiquiro marine tiquiro yahuducuri watoa Cohãcj̄ tiquiro ojoarire tiquiro yahuri watoa mari jeripohnari mehna quehnoano bucueye mehna t̄hotuu mari, niahye tiquina basi.

³³Sa ni tuhasa tiquina duita Jerusalēp̄ majare tojoaa wahahye tja.

Topu esa, once buheyequinare apequina mehna cahmecoañequinare bocahe. ³⁴ Tiquina esagū, once buheyequina ohō saha niahye:

—Potota mari puhtoro masa wijiañohti. Simo Pedro tiqiurore ihñañohti, niahye once buheyequina.

³⁵ Tiquina sa nigū puaro Emau cjeña mahapu Jesure tiquina ihñarire yahuahye:

—Jesu pāre tiqiuro nuhagū usā ihña masi tiqiurore, ni, yahu pehoahye tiquina apequinare.

Jesu tiqiuro buheyequinare bajuahye
(Mt 28.16-20; Mr 16.14-18; Jn 20.19-23)

³⁶ Tiquina sa ni yahuri watoa tiquina cahapu iji tuhasahye Jesu pehe.

—¿Ijiajari musa? niahye tiqiuro tiquinare.

³⁷ Tiquiro sa nigū tuhoye tiquina “Mari yariariqiuro munanore ihñana niaja”, ni tuhutuye, tutuaro cueahye.

³⁸ Tiquina sa cuegū ihñano tiqiuro tiquinare yahuahye:

—¿Duh-sena cueajari musa? ¿Duh-sena “Ahri poto ijierare”, niajari musa?

³⁹ Yuhu omocarine, yuhu dahpocāri gūhure ihñaña. Musa yuhure ihñana, ihña masinata. Yuhure ñehe tuhuya. Ñehe tuhuna masinata musa. Yariariqiuro munanopu pagu mariedare. Yuhu pehe pagu tiaja, niahye Jesu.

⁴⁰ Sa nino tiqiuro omocari gūhure, tiqiuro dahpocāri gūhure ihñoahye tiquinare. ⁴¹ Tiquiro sa ihñoepēgūta tiquina tutuaro bucue, ihña maria waha, “Ahri poto ijieraga”, ni tuhoturiahye. Tiquina sa tuhutugū masino Jesu tiquinare sinituahye:

—¿Ohōpu ihyaye ijiajari? niahye tiqiuro.

⁴² Tiquiro sa nigū tuhoye wahi dohariqiurore ohoahye tiqiurore. ⁴³ Tire ne, tiquina ihñonopu Jesu ihyahye. ⁴⁴ Ihya tuhasa, Jesu yahuahye tiquinare:

—Sohō ijiri pje musa mehna ijigu musare yuhu yahuriro sahata yojopu yuhu sa waha. Cohācjū dutiye Moise marine tiqiuro cūri tiqiuro sa ni ojoariro sahata yuhure sa wahari. Cohācjū yere yahu muhtariquina, Salmo ojoari pūre ojoayequina gūhu panopu yuhure tiquina ni yahuriro sahata yojopure yuhure sa wahari. Sa wahacjūta iji yuhu, niahye Jesu.

⁴⁵ Sa ni tuhasa Cohācjū yere tiquina yahu ojoarire tiqiuro buheyequinare masigū yehye Jesu:

⁴⁶—Cohācjū yere tiquina ojoari ohō saha nine: “Cristore ñano yuhdūro cahmene. Sa yero ihtia deco wahaboro tiqiuro yariari bato tiqiuro masa wijiarota. ⁴⁷ Tiquiro masa wijari bato ijipihtiye yehparipu tiqiuro yequina Cristo yere yahueta. Masa tiquina ñañene tiquina bujua witiatire, quehnoañene tiquina comesatire Cohācjū tiquina ñañene tiqiuro cohātire yahueta tiqiuro yequina. Sa yahuye taye, Jerusalēpu yahu dūcaeta”, niahye Cohācjū yere tiquina ojoari pūpu, niahye Jesu.

⁴⁸ Sa ni tuhasa ohō saha ni yahu nemoahye:

—Musa pehe ahri ijipihtiyere ihñarina ijire. Sa yena apequinare yahunata. ⁴⁹ “Espiritu Santore musare ohoutja”, Cohācjū tiqiuro nidiquirore yuhu pehe musare ohoutja. Tiquiro uhmuse cje tutuayere ohoatiqiuro ijire. Sa yena Jerusalēpu tiqiuro wihiatire cohteya musa, niahye Jesu tiqiuro buheyequinare.

Jesu uhmusepu mujaa wahahye

(Mr 16.19-20)

⁵⁰ Sa ni tuhasa Jesu tiquinare Jerusalēpu ijiyequinare Betania cahapu neahye. Topu esa, Jesu tiqiuro omocarine ne muo, “Quehnoano ijiya”, niahye tiquinare. ⁵¹ Sa ni

tuhasa, tiquinare cū, ʌhmʌsepʌ mʌjaa wahahye. ⁵²Tiquiro mʌjari bato tiquina tiquiore ño peo, Jerusalēpʌ tutuaro bucueye mehna tojoaa wahahye.

⁵³Торʌ iji, decoripe tiquina Cohācjū wʌhʌpʌ Cohācjū mehna yahuducu, “Quehnoare”, ni ño peohye tiquina tiquiore. To punota ijire.

San Juan

Cohācjū ye yahuducuyere yahuriquiro masuṇota iji dūcahye

1 Duitaputa ahri yehpa to ijiato panoputa Cohācjū ye yahuducuyere yahuriquiro Cristo masare yuhduoatiquiro duita iji tuhasae tiahye. Tiquiro Cohācjū mehna ijiahye. Sa yero tiquiro Cohācjūta iji cāhno niahye. ²Duitaputa coā waropure Cristo Cohācjū mehna ijiahye. ³Sa yero coā waropure ne mariedarire bajumehneahye. Ahri yehpare, uhmūserere, ijipihiyere, masa gūhure bajumehne dutiahye Cohācjū tiquirore. Sa yero ahrire bajumehne pehoahye tiquiro. Ahrire yojopure mari ihñañene, mari ihñedari gūhure tiquiro bajumehnedagū ne mariedaboya. ⁴Cristo catiyere ohoriquiro ijiro nine. Buhrioro marine to quehnoano ihña masigū yero saha mari Pacure quehnoano masigū yere. Sa yero mari Pacure masigū yere masare. ⁵Ahri yehpa cjēna ñañene wacū, tiquina tutuaro cahmeñe nahitiano yero saha ijiye nine. Buhrioro quehnoano marine to ihña masigū yero saha Cohācjū ye yahuducuyere yahuriquiro masare masigū yere. Sa yero nahitiano buhrioro to yuhducaero sahata Cristore ne ñañe yuhducaerare.

⁶⁻⁷Cohācjū Ñu wame tiquiro pehere ohoahye, Cristo buhrioro yero saha ijiriquirore masare yahu muhta dutiro. Tiquiro ohogū Ñu pehe masare yahuro ahtari tiquiro yahuriquirore Cristore ijipihiyequina tiquina wacū tutuatare. ⁸Ñu pehe Cristo ijierari. Sa ijieraro tiquiro Cristo pehere masare yahu muhtano ahtari. ⁹Cristo buhrioro yero saha ijiriquiro ijipihiyequina masare Cohācjūre masigū yeatiquiro pehe ahri yehpapu ahtari jiri. Ijirota ijire ahri.

Tiquiro buhrioro yero saha ijiriquiro warota ijire.

¹⁰Sa yero Cristo ahri yehpapu ijiri jimedi. Ahri yehpare bajumehnediquiro ijiahye. Tiquiro sa ijiepegūta tiquiro ya yehpa cjēna tiquirore ne masiedari.

¹¹Tiquiro ya yehpapu masa bajuari jimedi. Tiquiro ya yehpapu tiquiro masa bajuariquiro ijiepegūta tiquiro ya yehpa cjēna pehe ne tiquirore cahmedari jiri.

¹²Tiquina sa cahmedapegūta apequina pehere ijipihiyequina tiquirore cahmeñequina pehere tiquinare Cohācjū tiquiro pohne ijigū yeri jiri. Tiquirore wacū tutuayequina pūrita potota tiquiro pohne warota ijire. ¹³Tiquina Cohācjū pohneta ijiye nine. Sa ye masa tiquina masa bajuariro saha ijierare, Cohācjū pohne tiquina wahagū.

¹⁴Sa yero Cristo masuṇo tiquiro iji dūcari bato mari mehnata ijire tiquiro. Tiquiro sa ijigū ihñana masare cahñiquiro, potota yahuriquiro tiquiro ijigū usā masii. Tiquiro dihita Cohācjū macuṇo ijiro tutuariquiro quehnoariquiro ijiri. Tiquiro sa ijiriquiro ijigū usā masii. ¹⁵Ñu Cristore yahu muhtano ohō saha ni sañuducuri masare yahuro:

—Siquiro ahtare yuhū ohō saha ni yahuriquiro: “Tiquiro yuhū bato ahtariquiro ijire. Sa ijieperota tiquiro yuhū yuhduoro tutuariquiro ijire. Tiquiro yuhū masa bajuato panopu iji tuhasahye. Sa yero tiquiro yuhū yuhduoro tutuariquiro ijire”, masare yuhū ni yahuriquiro ahriquirota ijire, nidi Ñu Jesure masare yahuro.

¹⁶Tiquiro Cristo pehe quehnoano tutuaro masare cahñiquiro ijiro marine ijipihitnare quehnoano yeducuri. ¹⁷Cohācjū dutyere Moise pehe cū muhtahye marine. Jesucristo pehe Cohācjū masare tiquiro cahñene buhero ahtari. Cohācjū tiquiro potota yahuducuye gūhure buhero ahtari. ¹⁸Masa ne Cohācjūre

ihñedare. Tiquirore mari ihñedapegũta tiquiro macũno ihcãquirota ijiriquiro tiquiro Pacũro mehna sa ijiducure. Sa yero tiquiro Pacũrore marine masigũ yeri.

**Apequina Ñu wame
yeriquirore sinituahye**

(Mt 3.3, 11-12; Mr 1.2-3,
7-8; Lc 3.4-6, 15-17)

¹⁹ Ûsã acaye judio masa pũthoa Jerusalẽpũ ijyiequinare pahiare, Cohãcjũ wũhupũ dahrayequina gũhũre Ñu cahapũ ohori jiri. “¿Noa boro ijajari mũhũ?” ni sinitu dutiye ohori jiri tiquinare. Tiquina sa sinitugũ ohõ saha ni yahuri Ñu pehe. ²⁰ Yeero boro marieno yahuri. Potota yahuri:

—Yũhũ Cristo Cohãcjũ masare yũhdũo dutiro tiquiro ohorigũ ijieraja, nidi tiquiro.

²¹ Tiquiro sa nigũ tiquina pehe tiquirore pari turi sinituri tja:

—¿Mũhũ Cristo ijieragũ Elia pehe ijiajari mũhũ? nidi tiquina.

—Ijieraja yũhũ, nidi tiquiro.

—¿Ûsã cohterigũ Cohãcjũ yere yahu mũhtacjũ pehe ijiajari mũhũ? nidi tiquina.

—Tiquiro ijieraja yũhũ, nidi Ñu pehe.

²² Tiquiro sa nigũ tiquina tiquirore pari turi sinituri tja:

—Ûsãre sinitu dutiriquinare usã yahuro quehnoano potõ usãre yahu madoqueohya. ¿Noa boro pehe ijiajari mũhũ? ¿Mũhũ basita dũhse ijigũ ijiajari mũhũ? “Sa ijigũ ijiaja yũhũ”, ni yahuya usãre, nidi tiquina Ñure.

²³ Tiquina sa nigũ ohõ saha ni yũhtiri tiquiro:

—Masa marienopũ ohõ saha ni sañuducugũ ijiaja yũhũ, Cohãcjũ yere yahu mũhtariquiro Isaia mũnanao tiquiro ni yahuriro sahata: “Mari pũthoro tiquiro ahtato pano mahare mari quehnoyuro saha quehnoana ijyiyua

mũsa”, ni masare yahu sañuducugũ ijiaja yũhũ, nidi Ñu tiquinare.

²⁴ Ñure sinituyequina fariseo masa tiquina ohoriquina ijiri. ²⁵ Sa ye tiquina Ñure sinituri tja:

—¿Mũhũ Cristo, Elia, Cohãcjũ yere yahu mũhtagũ usã cohterigũ ijierapegũta dũhsegũ masare wame yeajari mũhũ? nidi tiquina.

²⁶ Tiquina sa nigũ tũhoro yũhtiri tiquiro:

—Yũhũ aco mehna masare wame yeaja. Apequiro pehe mũsa masieniquiro pehe mũsa watoa iji tuhasare. ²⁷ Tiquiro pehe yũhũ bato ahtariquiro yũhũ yũhdũoro tutuariquiro ijire. Quehnoa yũhdũariquiro ijire. Tiquiro yero saha ijieraja yũhũ pehe. Sa yegũ tiquirore tũhotugũ, “Ihyo ijigũ ijiaja yũhũ”, ni tũhotuaja yũhũ, nidi Ñu tiquinare.

²⁸ Sa ni yahuducuri tiquina, Betaniapũ Jordã wame tiri ma ape sie pahrẽpũ, Ñu masare tiquiro wame yerirõpũ.

**Jesu Cohãcjũ ohoriquiro
tiquiro yaquiro cordero yero
saha ijiriquiro ijire**

²⁹ Ape decõpũ Jesu Ñu cahagã cjũno tiquiro ahtagũ Ñu tiquirore ihñano ohõ saha nidi:

—Ihñaña. Ahriquiro Cohãcjũ ohoriquiro tiquiro yaquiro cordero yero saha ijiriquiro ijire. Corderore mari wejẽdiro sahata masa ahriquiro gũhũre wejẽeta. Sa yariaro ahri yehpa cjenare tiquina ñaña yerire cohãnota tiquiro.

³⁰ Ahriquirota ijire yũhũ ohõ saha nidiquiro: “Yũhũ bato ahtariquiro yũhũ yũhdũoro tutuariquiro ijire. Yũhũ masa bajuato pano tiquiro iji tuhasahye. Sa yero tiquiro yũhũ yũhdũoro tutuare”, yũhũ nidiquiro ahriquirota ijire.

³¹ Yũhũ pehe ahriquirore masiedahti. Sa masiedapegũta aco mehna wame

yei ahtau nii yũhu acaye Israe masa ahriquiore tiquina masiatore, nidi Ñu.

³² Sa ni tuhasa Ñu yahu nemori:

—Espíritu Santo uhmusepu bujua yero saha Cristo bui dijia ta, tiquiore bui wihiducagũ ihñau. ³³ Cohãcjũ yũhure tiquiore yahuerağũ tiquiore ne masied-
aboaga yũhu. Tiquiro yũhure musare aco mehna wame ye dutiro ohoriquiore Cohãcjũ pehe ohõ saha ni yahu mũhta tuhasari yũhure: “Espíritu Santo dijia ta tiquiore bui wihiducanohriquiore tiquiota ijirota. Tiquiro pehe Espiritu Santore masa mehna ijiducugũ yerota”, nidi Cohãcjũ yũhure. ³⁴ Yojopũ pũritare tiquiore ihña tuhasau yũhu. Sa ihñagũ “Potota Cohãcjũ macũno ijire”, nii yũhu musare, ni yahuri Ñu usãre.

Jesu buheyequina tiquiore piji mũhtariquina ijire

³⁵⁻³⁶ Ape decopũ Ñu mehna usã puana tiquiore buhena usã ducugũ, Jesu usã cahapũ yũhũ cãno nidi. Tiquiro sa yũhũ cãgũ Ñu tiquiore ihñano, pari turi ohõ saha nidi usãre:

—Ihñaña. Ahriquiore Cohãcjũ yaquiore cordero yero saha ijiriquiro ijire, nidi Ñu.

³⁷ Tiquiro sa nigũ usã puana tiquiore buhena pehe tire tũhona Jesure nunũ tãũ. ³⁸ Usã sa nunũ tãgũ ihñano Jesu usãre majare ihña, sinituri:

—¿Yabere macana nijari msa? nidi tiquiore.

Tiquiro sa nigũ usã gũhu sinituu tiquiore:

—¿Buhegu, nohopũ ijiajari mũhu? nii usã tiquiore.

³⁹ —Yũhu mehna ahtatjiãna ihñana taya, nidi Jesu usãre.

Tiquiro sa nigũ usã pehe tiquiore ijiropũ ihñana wahau. Ti pjere ñamica-
hapũ cuatro hora ijiri. Sa yena ti decore tiquiore mehna tojoau usã.

⁴⁰ Usã puana Ñure tũhorina, Jesure nunũ tãrina yũhu piti Andre mehna ijii. Andre pehe Simo bahũro ijiri. ⁴¹ Sa yero duita tiquiore wahminore Simore maca, boca, tiquiore ohõ saha ni yahuahye:

—Mesiare Cohãcjũ marine yũhũduo dutiro tiquiore ohoriquiore usã bocaũ, ni-
ahye Andre Simore. Mesia usã ye mehna nina, Cristo nina nijaja.

⁴² Sa ni tuhasa tiquiore Simore Jesu cahapũ neari. Tiquiro cahapũ esagũ ihñano Jesu pehe Simore ohõ saha nidi:

—Mũhu Simo wame tigũ, Ñu macũ ijire. Yojopũre mũhure Cefa wame yeitja, nidi Jesu Simore. Cefa usã ye mehna nina, Pedro nina nijaja.

Felipere, Natanae gũhure pijiahye Jesu

⁴³ Ape decopũ Jesu Galilea yehpapũ waha duari. Sa yero tiquiore wahato pano Felipere piti ca ohõ saha nidi:

—Yũhu mehna cjũ ijiajũ ahtaya, nidi Jesu.

⁴⁴ Felipe pehe Betsaida cjũno ijiri. Tiquiro Andre, Pedro mehna ihcã maca cjẽna ijiri tiquina. ⁴⁵ Sa yero Felipe Natanaene maca, tiquiore bocaro ohõ saha ni yahuri:

—Cohãcjũ dutiyere Moise tiquiore ojoari pũpũ tiquiore yahuriquiore ape-
quina Cohãcjũ yere yahu mũhtariquina gũhu tiquina yahuriquiore usã bocaũ. Jesu Nazare cjũno, José macũnota ijire, nidi tiquiore Natanaene.

⁴⁶ —Nazarepũre ne ihcãquiore quehnoariquiore mariedare, nidi Natanae.

—Ihñagũ taya mũhu, nidi Felipe.

⁴⁷ Sa ye Jesu cahapũ tiquiore esagũ ihñano Jesu pehe ohõ saha nidi Natanaene:

—Ahriquiore yojopũ ahtariquiore potota quehnoariquiore judio masũno warota ijire. Tiquirore mehoñe ne mariedare, nidi Jesu Natanae pehere.

⁴⁸Tiquiro sa nigũ tũhoro Natanae pehe tiquirore sinituri:

—¿Dũhsegu yũhũre quehnoano masi-ajari muhũ? nidi.

—Felipe muhũre tiquiro pijiato pano, higueraqu docapu muhũ ijigũ ihũau yũhũ muhũre, nidi Jesu.

⁴⁹Tiquiro sa nigũ Natanae pehe ohõ saha nidi tja:

—Buhegu, potota muhũ Cohãcjũ macu ijire. Muhũ Israe masa usã puhto ijiajũ ijire, nidi Natanae.

⁵⁰Tiquiro sa nigũ tũhoro ohõ saha ni yuhtiri Jesu:

—Higueraqu docapu yũhũ muhũre ihũarire masigu yũhũre “Cohãcjũ macu ijire”, ni wacũ tutuare muhũ. ¿Tita muhũre sa masigũ yeajari? Ahri muhũre yũhũ ihũari yũhũoro Cohãcjũ tutuaye mehna ye ihũogutja yũhũ muhũre. Yũhũ sa ye ihũogũ ihũaguta muhũ, nidi Jesu Natanaene.

⁵¹Sa ninota ohõ saha ni yahu nemori:

—Potota muhũre niita niaja. Yũhũ masu Cohãcjũ ohoriguta ijiaja. Uhmũsepu parĩ maagũ Cohãcjũ tiquiro yequina angele yũhũ bui tiquina dijia tagũ, tiquina mujagũ gũhũre ihũaguta muhũ, nidi Jesu tiquirore.

Caná wame tiri macapu tiquina omoca dũhteropu Jesu wahahye

2 Ihtia deco bato Canãpu Galilea yehpapu ijiri macapu omoca dũhteri bose deco ijiri. Sa yero Jesu pacoro ti wũhũpu ijiri. ²Jesu mehna usãre tiquiro buhena gũhũre omoca dũhteropu pijiori tiquina. ³Ti bose deco cjẽ vino pihtigũ Jesu pacoro tiquirore yahuri:

—Yojoũpũre vino pihtia wahari, nidi ticoro Jesure.

⁴Ticoro sa nigũ tũhoro Jesu ohõ saha nidi:

—¿Iũo, dũhsego tago tire yũhũre yahuajari muhũ? Masa yũhũre tiquina

masiato dũhsarĩne, nidi Jesu tiquiro pacorore.

⁵Tiquiro sa nidi bato tiquiro pacoro pehe tiquina cahacjẽnare dutiri:

—Yũhũ macu tiquiro dutiro sahata yeya, nidi ticoro.

⁶Ti pjeũpũre usã acaye judio masa Cohãcjũ yere yeye tehe masare tiquina pagũrĩre sa coseducu dutie tiri. Sa ye ti wũhũpũre seis suturi utã mehna tiquina yeri suturi aco pose tiye suturi ijiri. Ti suturi Cohãcjũ yere yeye tehe tiquina cosine aco pose tiye suturi ijiri. Ti suturi cincuenta o setenta litro pose esa tuhari.

⁷Sa yero tiquina cahacjẽnare dutiri Jesu:

—Ahri suturire acore pio sã nemoña. Quehnoano wahpo dapoya, nidi Jesu.

Tiquiro sa nigũ tiquina pehe quehnoano wahpo dapo peho cãhri ti suturire.

⁸Tiquina sa yeri bato Jesu tiquinare dutiri tja:

—Yojoũpũre ti acore wa ne, wũhũ cjũnũre ohoya, nidi.

Tiquiro sa nigũ tuhoye ti acore wa ne, wũhũ cjũnũre ohori. ⁹Tiquina sa ohogũ tiquiro pehe ti acore vino wahagũ yeri acore sihni tuhuri. Ti acore tiquiro dũhse yerire masiedari tiquiro. Tiquiro sa masiedapẽgũta tiquiro cahacjẽna ti acore wayequina pehe masidi. Wũhũ cjũno sa masiedaro omoca dũhteriquirore pijio, ohõ saha ni yahuri:

¹⁰—Apequina masa quehnoañe vinore sihõ muhtare. Masa tiquina quehnoano sihnidi batopũ ña cjũne core sihõri tiquina. Muhũ pehe quehnoañe core ihbo, came cjũno ti core sihõri usãre, nidi wũhũ cjũno omoca dũhteriquirore.

¹¹Canãpu Galileapũ ijiri macapu Jesu acore vino tiquiro wahagũ yero, topũ Cohãcjũ tutuaye mehna coã ye dũcari. Sa yero apequinare tiquiro tutuayere ihũori Jesu. Tiquiro sa ihũori bato usã tiquiro buhena tiquirore wacũ tutuau.

¹²Came Jesu tiqiro pacorore, tiqiro bahanare, usāre tiqiro buhena gūhure Capernaupū siho esari. Topū esana, meheñe decorigā tojoarī usā.

Jesu Cohācjū wuhūpūre esahye

(Mt 21.12-13; Mr 11.15-18; Lc 19.45-46)

¹³Pascua ijigū judio masa usā bose deco ijīato mehenogā duhsatjiāri. Sa yero Jesu Jerusalēpū esari. ¹⁴Topū esaro tiqiro Cohācjū wuhūpū sajā saro, wecūare, ovejare, bujuaare du-ayequinare boca sari. Sa yero niñerure comesayequina mesaripū dujigū tiquina gūhure boca sari. ¹⁵Sa boca saro yuta dari mehna tanari da ye, tiquinare ijipihtiyequinare sopecahapū tana nūnū wiori. Oveja, wecua gūhū tana nūnū wio cāri tiqiro. Sa yero niñeru comesayequina ye mesarire ne majaredoqueo, doque cū cāri. Ti niñeru cjoeri gūhure doque site cāri. ¹⁶Sa ye tuhasa bujuaare duayequinare ohō saha nidi:

—Musa bujuaare ne wijiaya. Yuhū Pacu ya wuhūre apee boro duari wuhū yeracāhña, nidi Jesu tiquinare.

¹⁷Tiqiro sa yegū ihñana usā tiqiro buhena pehe Cohācjū yere tiquina ojoari pūpū tiqiro nidire wacūu: “Cohācjū, mūhū ya wuhūre tutuaro cahñaja. Sa cahīgū ti wuhūre ñano tiquina yegū ihñagū tutuaro bujua witiāja yuhū’, ni ojoahye Cohācjū yere tiquina ojoari pūpū”, ni wacūu usā Jesu buhena.

¹⁸Jesu tiqiro sa yeri bato usā acaye judio masa puhtoā tiqirore sinituri:

—¿Duhsegu mūhū ahriquinare Cohācjū wuhūpūre ijīyequinare cohā wioari? Cohācjū mūhūre tire ye dutiriqiro tiqiro ijigū Cohācjū tutuaye mehna ye ihñōña mūhū usā ihñatire, nidi tiquina Jesure.

¹⁹Tiqina sa nigū Jesu yuhtiri:

—Ahri wuhūre mūsa cohāgū ihtia deco wahaboro tuhasautja yuhū, nidi Jesu tiquinare.

²⁰—Ihtia deco ahri wuhūre yesi mūhū. Cuarenta y seis cahmari waro tiquina yeri wuhū ijire ahri wuhū, nidi tiquina pehe Jesure.

²¹Tiqiro sa nigū tiquina tiqirore quehnoano tuhoerari. Jesu “Ahri wuhūre”, nino tiqiro pagure nino nidi jimedi.

²²Sa ye tiqiro yariari bato, tiqiro masa wijiari bato usā tiqiro buhena pehe tiqiro nidire wacūna, Cohācjū yere tiquina ojoari pūre Jesu tiqiro yahuri gūhure “Ti ijirota ijire”, ni wacūu usā.

Ijipihtiyequina tiquina wacūñene Jesu masine

²³Pascua bose deco ijigū Jesu Jerusalēpū ijiri. Topū tiqiro ijigū masa peyequina Cohācjū tutuaye mehna tiqiro ye ihñogū ihñañe tiqirore wacū tutuari. ²⁴Tiqina sa wacū tutuepegūta Jesu masa tiquina wacūñene quehnoano masino, “Yuhūre sa wacū tutuaducueta”, ni tuhotuerahye. ²⁵Masa tiquina tuhotuyere quehnoano masidi tiqiro. Sa masino masa tiquina tuhotuyere apeqinane ne sinituerari.

Jesu Nicodemore yahuahye

3 Ti macare Nicodemo wame tiriqiro, judio masa puhtoā mehna cjūno ijiri. Tiqiro fariseo masa ya curua cjūno ijiri. ²Sa yero ihcā ñami tiqiro Jesu cahapū ahta, tiqiro mehna yahuducuahye:

—Buhegu, mūhū Cohācjū buhe dutiro tiqiro ohorigu mūhū ijigū usā masi-aja. Cohācjū mūhūre tiqiro yedohoer-agū mūhū pehe tiqiro tutuaye mehna ne ye ihñōedaboaga. Mūhū peye tahari Cohācjū tutuaye mehna ye ihñore, ni-ahye Nicodemo Jesure.

³Tiqiro sa nigū Jesu pehe yahuahye:

—Ijirota mūhūre niita niāja. Wahma masa bajuariqiro yero saha pari turi

masa bajuariquiro dihita Cohācjū yaquiro iji masine, niahye Jesu.

⁴—Yohnah. ¿Bucuro pehe dūhse ye pari turi masa bajuaboari tiquiro? Tiquiro pacoro niji suhtiropū majare sajā, pari turi baja masiedaboaga tiquiro, niahye Nicodemo.

Tiquiro sa nigū Jesu yūhtiahye:

⁵—Ijirota niita niaja mūhure. Wahma masa bajuariquiro yero saha aco mehna, Espiritu Santo tiquiro tutuaye mehna pari turi masa bajuariquiro dihita Cohācjū yaquiro iji masine. ⁶Numia niji pacosānumia ijiye, macanagāre masa bajuagū yere. Espiritu Santo pehe masare Cohācjū pohne ijigū yere.

⁷“Wahma masa bajuariquiro yero saha pari turi masa bajuariquiro dihita Cohācjū yaquiro iji masine”, yūhū nigū, tūho wisieracāhña. ⁸Espiritu Santo masare Cohācjū pohne tiquiro yegū ti wihnono yero saha ijire. Wihnono to ahtariropū ahtare. To ahtaro ca tagū mari tūhoaja. Sa tūhoepenata to ahtarirore, to waharirore ne masiedaja. Sata yere Espiritu Santo masare Cohācjū pohne yero, niahye Jesu Nicodemore.

⁹—Mūhū niñene quehnoano masiedaga, niahye Nicodemo.

¹⁰Tiquiro sa nigū tūhoro ohō saha niahye Jesu:

—¿Mūhū judio masare buhegū ijiepeguta, dūhsegū yūhū niñene tūhoerajari? ¹¹Ijirota niita niaja mūhure. Ūsā masidire ūsā ihñarire ūsā yahuaja. Ūsā sa yahuepegūta ne mūsa acaye judio masa ne tūho duerare. ¹²Ahri yehpa cjē mehna masa tiquina masa bajuari mehna mūsare queoye mehna yūhū buhe mūhtarire “Ijirota ijire”, niedare mūsa. Sa niedana queoye mehna buhero marieno Cohācjū yere yūhū yahugū gūhure “Ijirota ijire”, nisi mūsa.

¹³Ne ihcāquiro ūhmūsepū Cohācjū cahapū wahariquiro ne pari turi tojoa

tasi. Yūhū masū Cohācjū ohorigū yūhū dihita ūhmūsepū ijirigū ahri yehpapū ahtaū. Sa yegū yūhū dihita Cohācjū yere mūsare yahu masiaja. ¹⁴Panopure masa marienopū Moise mūnano bronze wame tiri come mehna tiquina yeriquirore añare yucūgū tiquina docodūpū duhu yoahye. Yucūgūpū tiquina duhu yoriro sahata yūhure masure Cohācjū ohorigure tiquirore tiquina yeriro sahata yūhū gūhure duhu yoeta. ¹⁵Yūhure tiquina sa yeri bato ijipihtiequina yūhure wacū tutuayequina ijipihtie decori Cohācjū mehna ijiducuenta, niahye Jesu.

Cohācjū ijipihtiequinare cahīne

¹⁶Sa ni tuhasa ohō saha ni nemoahye:

—Cohācjū ijipihtiequina ahri yehpa cjēnare tutuaro cahīne. Sa yero yūhure tiquiro macūre ihcūta ijigure Cohācjū ohori ijipihtiequina yūhure wacū tutuayequina pecapū tiquina “Wahaeracāhdo”, nino. Sa ye ijipihtie decori Cohācjū mehna ijietā tiquina. ¹⁷Cohācjū yūhure tiquiro macūre masare buhiri dahre dutiro ohoerari yūhure ahri yehpapūre. Sa yero masare pecapū waha-boriquinare yūhūoacjūre yūhure ohori.

¹⁸Yūhure Cohācjū macūre wacū tutuayequinare ne buhiri dahresi Cohācjū. Yūhure wacū tutueyequina pūritare Cohācjū buhiri dahre duti tuhasari. Masa yūhure Cohācjū macūre ihcūta ijigure tiquina wacū tutuerari buhiri, buhiri dahrerota tiquinare. ¹⁹Yūhū, Cohācjū macū ahri yehpapū ahtagū buhriero quehnoano marine to ihña masigū yero sahata Cohācjū yere quehnoano masigū yeaja. Yūhū sa masigū yegū ihñañe yūhure wacū tutueyequina yūhure cahmedare. Tiquina ñañe yeye pehere quehnoano cahmene. Tiquina sa cahmedi buhiri tiquinare buhiri dahrerota. ²⁰Ijipihtiequina ñañene yeyequina

tiquina ñañe yeyere duhu duerare. Sa ye buhrioro to bajumehmeno sahata tiquina ñañe yerire “Bajumehneari”, niñe, yuhure cahmedari tiquina. ²¹Quehnoañene yeyequina pehe yuhure, yuhu buheye gähure cahmene. Cohäcjü yere tiquina yeyere yuhu quehnoano bajuro dahregü bue tierare tiquina. Sa ye yuhure buhrioro yero saha ijigüre cahmene, ni yahuahye Jesu.

**Pari turi Ñu wame yeriquiro
Jesure yahuahye**

²²Came Jesu usäre tiquiro buhenare Judea yehpapu siho wahari. Topu esaro to cjëna mehna meheñe decorigã tojoa, wame yeri tiquinare. ²³Ñu gähü masare wame yero niahye Enón wame tiri macapu. Enón Salim wame tiri maca capapu ijiri. Topu dia ijiri. Sa yero Ñu topu wame yero niahye masare. ²⁴Tiquina peresu yeato pano Enópü wame yero niahye Ñu. ²⁵Ti pjere Ñu buheyequina mehna cjëna meheñequinagã judio masuno mehna wame yeyere yahuducuye niahye. ²⁶Sa ye tiquina Ñu capapu esa, tiquiore yahuahye:

—Buhegu, Jordã si pahrëpu muhu mehna ijiriquiro “Tiquirota ijiaga”, muhu nidiquiro pehe yojoppure masare wame yero nine. Tiquiro sa yegü ijipihtiyequina tiquiro capapu dihita wahare, niahye tiquina Ñure.

²⁷Tiquina sa nigü tuhoro Ñu yuhtiahye:

—Tiquiro tutuariquiro ijigü Cohäcjü pehe tiquiore sa ijigü yere. ²⁸“Cristo ijieraja”, yuhü nigü musa tuhori. Sa ijierapeguta tiquiro pano ohonoho muhtarigu ijiaga yuhü. ²⁹Cristo mehna masa tiquina wahagü ihñagu tutuaro bucueaja. Ohõ saha ijire ti: Omoca

duhtericoro ticoro manuno mehna ijiro wahare. Omoca duhtegü cohteriquiro pehe duhteatiquiro namo tigü ihñano tiquiro yahuducugü tuhoro tutuaro bucueri. Sa yegu yuhü omoca duhtegü cohteriquiro tiquiro bucueri saha Cristo mehna masa tiquina wahagü ihñagu tutuaro bucueaja. ³⁰Cristo pehere wacü tutuaro cahmene masare. Yuhü pehere wacü tutuaro cahmene masare, ni yuhtiahye Ñu.

**Cohäcjü macuno uhmusepu
ahtariquiro ijire**

³¹Sa ni tuhasaro ohõ saha ni nemoahye Ñu:

—Uhmusepu ahtariquiro ijipihtiyequina yuhduoro tutuariquiro ijire. Ahri yehpapu masarina ijina ahri yehpa cjëna ijiaga mari. Sa yena ahri yehpa cjëne yahuducuaaja mari. Uhmusepu ahtariquiro pehe ijipihtiyequina yuhduoro tutuariquiro ijire. ³²Tiquiro ihñarire, tiquiro tuhore tiquiro yahure. Tiquiro sa yahuepeguta tiquiro yahuyere masa pehe ne tuho duerare.

³³Uhmusepu ahtariquiro tiquiro yahuyere masa tuhoye, “Cohäcjü potota nidiquiro ijire”, niñe nine tiquina. ³⁴Ahriquiro Cristore Cohäcjü ohoriquire Espiritu Santo ye tutuayere oho pehore Cohäcjü. Sa yero tiquiro Cohäcjü ye yahuducuyere yahure.

³⁵Cohäcjü tiquiro macunore tutuaro cahine. Sa yero ijipihtiyequina puhtoro iji dutiri tiquiro macunore. Ijipihtiye upuro iji dutire tiquiore. ³⁶Cohäcjü macunore wacü tutuayequina pehe ijipihtiye decori Cohäcjü mehna ijietä. Tiquiro macunore yuhduocayequina pehe Cohäcjü capapu wahasi. Sa ye ijipihtiye decori uhmusepu ijisi. Sa yero Cohäcjü tiquinare tutuaro buhiri dahrerota, niahye Ñu.

Jesu Samaria cjõno mehna yahuducuro niahye

4 Jesu Ñu yuhduoro peyequina buheyequinare tiqiro cuogũ, Ñu yuhduoro masare tiqiro wame yegũ fariseo masa tuhoahye. ²Tiquina sa tuhoepegũta Jesu pehe tiqiro basi masare wame yerari. Usã tiqiro buhena pehe masare wame yei. ³Fariseo masa tiquina sa masigũ tuhoro Jesu pehe Judea yehparũ ijiriquiro Galilea yehparũ usãre siho tojoaa wahari.

⁴Topũ wahana Samaria yehpare esa yuhdu cãna tana nii usã. ⁵Sa yuhdu cãna Samaria yehparũ ijiri macarũ Sicar wame tiri macarũ esau. Ti maca caharũ panopũ cjẽno Jacob mnanano tiqiro macũno José mnananore tiqiro ohoiri yehpa ijiri. ⁶Topũ Jacob mnanano tiqiro sihnidi cope ijiri. Sa yero Jesu pehe yoropũ ahtariquiro ijiro, tiqiro wahyia yuhduaro ti cope duhtũ caharũ nuju sari. Ti pje tiqiro nuju sari pje coheri pje waro ijiri. ⁷⁻⁸Usã tiqiro buhena pehe macarũ ihyayere usã dúna wahari bato ihcãquirota tiqiro topũ tojoa nuju sari. Sa yero Samaria cjõno ti coperũ aco waro wihigũ Jesu ticorore acore siniyahye:

—Acore ohoya yuhũre, niahye.

⁹—Muhũ judio masũ ijire. Yuhũ pehe Samaria cjõ ijiaja. ¿Duhsegũ yuhũre acore siniajari muhũ? niahye ticoro Jesure.

Judio masa Samaria cjẽnare ihña tuhtiyequina ijire. Sa yero ticoro sa niahye.

¹⁰Ticoro sa nidi bato Jesu ticorore yahuahye:

—Muhũre Cohãcjũ tiqiro yedoho duayere masigo, muhũre acore sinigũre masigo, muhũ yuhũ pehere siniboaya. Muhũ sa sinigũ apeye aco pehere

ohoboaya yuhũ. Ti aco pehe catigũ yere, niahye Jesu ticorore.

¹¹Tiqiro sa nigũ tuhoro ticoro yuhtiyahye tiqirore:

—Ne muhũre sutu mariedare. Sa yero ahri cope uhcuãrĩne. ¿Sa yegũ ahri catigũ yeye acore nohopũ wa neboagari muhũ? ¹²Mari ñecu mnanano Jacob panopũ cjũno ahri copere marine cüe tiahye. Tiqiro, tiqiro pohne, nuñequina gũhũ ahri acore sihnie tiahye. ¿“Apeye acore ohoboaya yuhũ”, muhũ nigũ, Jacob yuhduoro tutuagũ ijiajari muhũ, sa ni tuhotugũ? niahye ticoro.

¹³Ticoro sa nigũ Jesu yuhtiyahye:

—Ijipihtiyequina ahri acore sihniñequina, pari turi aco wũoeta. ¹⁴Yee aco pehere sihniñequina ne pari turi aco wũosi. Sa ye, yee acore sihniñequina Cohãcjũ mehna sa ijiducueta. Ma pohterũ aco to sa wijiaducuro sahata yee aco ne pihtisi, niahye Jesu.

¹⁵Tiqiro sa nigũ tuhoro numino pehe ohõ saha niahye:

—Ti acore ohoya yuhũre pari turi yuhũ aco wũoeraro quehnoano. Sa yego pari turi ne ohõpũre aco wasi yuhũ, niahye ticoro.

¹⁶Ticoro sa nigũ Jesu ticorore yahuahye:

—Ti pje pũrita muhũ manũnore pijigo wahaya. Piji tuhasa ohõpũ ahtaya tiqiro mehna, niahye Jesu ticorore.

¹⁷⁻¹⁸—Manũ mariego ijiaja yuhũ, niahye ticoro.

—Ijirota nimene muhũ. Ihcã omope tahari manũ ti tuhasamedi muhũ. Sa yero yojopũre muhũ mehna ijiriquiro muhũ manũno ijierare. Sa ye “Manũ mariego ijiaja”, nigo potota nimene muhũ, niahye Jesu ticorore.

¹⁹Tiqiro sa nigũ tuhoro ohõ saha niahye ticoro:

—Åa, Cohãcjũ yere yahu muhtagũ ijire muhũ, yuhũ tuhutugũ. ²⁰Usã ñecusumua iji turiayequina muna ahdu

сннрн Cohăcjüre ño peoe tiahye. Sa yena mŭsa pehe judio masa “Jerusalêpŭ Cohăcjüre ño peoro cahmene masare”, nie tiri mŭsa judio masa, niahye ticoro.

Ticoro sa nigŭ Jesu yŭhtiahye:

²¹—Numio, yŭhŭ pehere tŭhorîña. Camerŭ ahdu сннрн, Jerusalêpŭ gŭhure mari Pacure ño peosi mŭsa. ²²Mŭsa pehe mŭsa ño peoriquire masiedare. Masare yŭhdŭoatiquire judio masŭnota ijire. Sa yena ŭsă judio masa pehe ŭsă ño peoriquire masiaja. ²³Yojopure, camerŭ gŭhure Cohăcjüre potota ño peoyequina tiquina quehnoano tŭhotuye mehna tiquire ño peoeta. Sa mari ño peogŭ cahmene Cohăcjŭ. ²⁴Cohăcjüre, pagŭ marieniquiro tiquire ijigŭ masa tiquire ihñedare. Sa ye tiquire ño peoye, tiquina quehnoano tŭhotuye mehna tiquire quehnoano potota ño peoro cahmene masare, niahye Jesu.

²⁵Tiquire sa nigŭta ticoro yŭhtiahye:

—Mesia, “Cristo” tiquina nidiquiro pehe masare yŭhdŭoatiquire tiquire ahtatire masiaja yŭhŭ. Tiquire ahtaro marine ijipihtiyere buhe peho cănota, niahye ticoro.

²⁶—Yŭhuta ijiaja Cristo, niahye Jesu ticorore.

²⁷Tiquire sa nigŭ waro wihii ŭsă. Sa yena ŭsă tiquire buhena pehe Jesu numino mehna tiquire yahuducugŭ ihñana, ihña maria wahau. Sa ihña mariepenata, “¿Dŭhse cahmeajari mŭhŭ? ¿Dŭhse niari mŭhŭ ticorore?” ni sinituerŭ tiquire. ²⁸Sa yero numino ticoro ya suture duhu dapo că, macarŭ wahaa wahari. Topŭ esaro masare yahuro, ohŭ saha niahye:

²⁹—Yŭhŭ yerire yahu pehoriquire ihñana ahtaya mŭsa. Tiquire potota Cristo ijiboaga, ape taha yero, niahye ticoro.

³⁰Ticoro sa nigŭ tŭhoye ti maca cjëna pehe Jesure ihñañe ahtari. ³¹Ti pjere ŭsă

Jesu buhena pehe tiquire tutuaro ihya dutimi:

—Buhegŭ, ihyaya, nimi ŭsă.

³²—Sijoro ijie ihyayere cŭoaja yŭhŭ. Tire mŭsa masiedare, nidi tiquire.

³³Tiquire sa nigŭ tŭhona ŭsă basi ohŭ saha ni yahuducuu:

—¿Apequina tiquire ihyaye oho tuhasayari? nii ŭsă basi.

ŭsă sa nigŭ Jesu yahuri:

³⁴—Masa pehe ihya coare. Yŭhure ohoriquire tiquire cahmeñe pehere ye coaja yŭhŭ pehe. ³⁵“Pititia asŭ dŭhsare mari dŭca duha neato”, wese upuro tiquire nidiro saha masa pehe ni tŭhotueracăhña. “Cohăcjŭ yere ŭsă yahuato dŭhsarîne”, ni tŭhotueracăhña. Ijirota niita niaja mŭsare. Yojopŭ pŭritare masare ihñaña. Dŭcare neni pje to ijiro sahata, yojopŭ pŭrita masa yŭhŭ buheyere tiquina tŭhoati pje ijiro nine.

³⁶Oteye dŭcare neñequinare tiquina wapa yeriro sahata yeere buheriquinare, yeequina ijiatiquinare pijiequinare, tiquina sa yeri wapa tiquinare quehnoano yeitja yŭhŭ. Tiquina sa buhegŭ tŭhoye yŭhŭ buheyere tŭhoyequina yeequina pehe Cohăcjŭ mehna ijipihtie decori iiducuetă. Sa ye tiquinare buhe mŭhtañequina, came yeequina wahagŭ yezequina gŭhŭ ihcăno saha bucueducuetă.

³⁷“Ihcăquiro ote mŭhtariquire ijire. Apequiro pehe dŭcare neniquire ijire”, nie tiahye panopŭ. Ti ijirota ijire. Tiquina sa nidiro sahata ihquëquina yeere yahu mŭhtañequina ijire. Apequina pehe yeere buheye, yeequina wahagŭ yere. ³⁸Wese upuro yezequina dahra cohteyequina oterariquina tiquina ijiepegŭ tiquire oteye dŭcare tiquinare ne dutiro ohore. Sa masare buhe mŭhtaedarina mŭsa ijiepegŭta yeequina wahatiquinare buhe dutigu ohoaja mŭsare. Apequina pehe tiquinare buhe mŭhta tuhasari. Tiquina

buhერიquinაჲე pari turi buhe nemona, yeequina wahagū yenata mūsa pehe. Sa ye buhe mūhtaŋequina pehe tiquina yedohoro mehna apequinare yeequina wahagū yenata mūsa, nidi Jesu.

³⁹ Ti pjere Samaria cjōno “Yūhū yerire tiqiro yahu pehori”, ticoro sa nigū tūhoye Samaria cjēna peyequina Jesure cahmeahye. ⁴⁰ Sa ye Samaria cjēna Jesu cahapū esaye, “Ūsā mehna tojoariŋa”, nidi tiqirore. Tiquina sa nigū ūsā gūhū tiqiro mehna pua deco tojoari. ⁴¹ Apequina gūhū peyequina Jesure tūhoye, cahmedi tiqirore. ⁴² Ohō saha nidi masa numinore:

—Coā waropure mūhū yahurire tūhona, Jesure cahmei. Yojopū pūritare tiqiro yahuducuyere tūhona tiqirore cahmeaja. Sa yena tiqiro pehere tūhona ahri yehpa cjēnare pecapū wahaboriquinare yūhdūoriquiro potota tiqiro ijigū yojopū ūsā masiaja, nidi masa Samaria cjōnore.

Pūhtoro macūnore

dohatiriquirore yūhdūoahye Jesu

⁴³ Pua deco bato Jesu ūsāre Galilea yehpapū siho wahari. ⁴⁴ Coā waropure ohō saha nie tiri tiqiro: “Cohācjū yere yahu mūhtariquirore tiqiro ya yehpa cjēna tiqirore űo peerare. Sa ye yūhūre űo peerare ohō cjēna ohōpū yūhū bucuarigū ijigū”, nie tiri Jesu. ⁴⁵ Sa ye Galileapū tiqiro esagū to cjēna tiqirore quehnoano piti cari. To pano Jerusalēpū bose deco Jesu tiqiro yerire ihŋariquina ijiri tiquina.

⁴⁶ Sa ye Canāpū Galileapū ijiri macapū acore tiqiro ūhse co bajumehnedi macapū wahaŋ ūsā tiqiro mehna. Canā cahapū ijiri macapū Capernau wame tiri macapū pūhtoro macūno dohatiro niahye. ⁴⁷ Sa yero Jesu Judeapū ijiriquiro tiqiro Galileapū esagū pūhtoro tūhoahye. Tire tūhoro Jesu cahapū wihiri:

—Yūhū macū yariaro nidi. Sa ye tiqirore yūhdūogū ahtaya, ni tutuaro mehna pijiri tiqirore.

⁴⁸ Tiquiro sa nigū tūhoro Jesu yūhtiri:

—Cohācjū tutuaye mehna yūhū yegū ihŋedana, ne yūhūre wacū tutuerare mūsa, nidi Jesu tiqirore.

⁴⁹ Tiquiro sa nigū pūhtoro pehe ohō saha nidi:

—Pūhto, yūhū macū tiqiro yariato pano ahtaya, nidi tiqiro Jesure.

⁵⁰ —Tojoahya. Mūhū macū catiaga, nidi Jesu.

Tiquiro sa nigū tūhoro, “Tiquiro nidiro sahata catirotā yūhū macū”, nino, pūhtoro tojoaa wahari.

⁵¹ Sa tojoaducuriquirore tiqiro cahacjēna tiqirore piti ca, yahuahye:

—Mūhū macū catiri, ni yahuahye tiquina tiqirore.

⁵² —¿Noho asū ijigū yūhdūari yūhū macū? ni sinituahye tiqiro cahacjēnare.

—Canūre coheri pje batogā ujuaye sururi tiqirore, niahye tiquina.

⁵³ Tiquina sa nigū tūhoro ohō saha ni tūhotuahye tiqiro: “Jesu yūhūre tiqiro sa ni yahuri pjeta ujuaye suruaya”, ni tūhotuahye pūhtoro pehe. “Poto ninota niaya yūhūre”, nino, tiqiro ijipihtiyequina tiqiro acaye mehna Jesure wacū tutuahye.

⁵⁴ Jesu Judea yehpapū ijiriquiro Galilea yehpapū tiqiro esari bato pūhtoro macūnore tiqiro yūhdūorire mari queogū pua taha Cohācjū tutuaye mehna ye ihŋo tuhasari Jesu.

Tini masieniquirore yūhdūoahye Jesu

5 Came judio masa Cohācjūre ūsā űo peori bose deco ijigū Jesu Jerusalēpū esari tja. ² Topū oveja wame tiri sopecaha cahapū cuhsari cope ijiri. Ūsā judio masa ye mehna niŋe Betzata wame tiri cope ijiri. Ti cope cahapū ihcā omope tihamehneŋe tucūri ijiri. ³ Ti tucūripū

peyequina dohatiyequina cuñari. Caperi bajueyequina, pari yuri wahayequina, tini masieñequina tiquina ti cope cahapũ ijiri. [Topũ ijiye aco ñuhmi maanore cohteye nidi. ⁴Topũ buharo ti cope cjẽ acore ihquẽ tahari ñuhmigũ ye mujahye angel. Ti cope cjẽ aco ñuhmidi bato ña mio muhtariquiro pehe dũhse ijiyere dohatiyeere cuoriquiro quehnoa wahahye.] ⁵Sa yero tore treinta y ocho cuhmari waro dohatiriquiro ijiri. ⁶Topũ tiquiro cuñagũ ihñano tiquiro sa yoari pje dohatiriquiro ijigũ masidi Jesu tiquirore. Sa masino tiquirore sinituri:

—¿Pagũ dohatiye mariegu iji duajari muhũ? nidi Jesu.

⁷Tiquiro sa nigũta dohatiriquiro yuhtiri:

—Ti aco ñuhmigũ yuhũre aco ijiri copepũ neaboriquiro mariedare. Ti copepũ yuhũ ña mio duepegũta apequina pehe yuhũ pano sa ña mio muhtaducure, nidi tiquiro Jesure.

⁸—Wahcãdũcaya. Muhũ cuñari cahserore ne cãhña, nidi Jesu tiquirore.

⁹Tiquiro sa nigũta dohatiriquiro pehe tiquiro cuñari cahserore ne, tini dũcari. Ti deco saurũ judio masa usã sori deco ijiri. ¹⁰Ti decore Jesu sa yegũ ihñañe judio masa usã puhtoa pehe dohatimediquirore ohõ saha ni yahuahye:

—Miare saurũ deco mari sori deco ijiepegũta muhũ cuñari cahserore neare muhũ. Sa yegũ mari dutiyere yuhdũdũcagu nine muhũ, niahye tiquina tiquirore.

¹¹—Yuhũre yuhũ dohatiyere cohãriquiro pehe ohõ saha nidi yuhũre: “Muhũ cuñari cahserore ne cãhña”, nidi tiquiro yuhũre, ni yuhtiahye dohatimediquiro.

¹²—¿Tire muhũre sa nidiquiro pehe noa boro ijari tiquiro? ni sinituahye tiquina.

¹³Topũ masa peyequina tiquina ijigũ ihñano Jesu pehe waha tuhasari. Sa

yero dohatimediquiro pehe tiquirore yuhdũoriquiro wamene masiedahye. ¹⁴Came Cohãcjũ wuhũpũ Jesu tiquirore piti ca yahuri:

—Tũhorĩña muhũ yuhũre. Yojobure quehnoano pagũ tire muhũ. Ñañene ye nemoedacãhña. Pari turi ñañene ye nemoğũ muhũ dohatiriro yuhdũoro wahagũta muhũ, nidi Jesu tiquirore.

¹⁵Tiquiro sa nidi bato dohatimediquiro pehe usã judio masa puhtoa tiquirore sinituriquina cahapũ esaro yahuahye tiquinare:

—Jesu wame tiriquiro yuhũre yuhdũgũ yeri, ni yahuahye tiquiro.

¹⁶Sa ye saurũ ijigũ dohatiriquirore tiquiro dohatiyere Jesu cohãgũ masiñe, judio masa usã puhtoa pehe tiquirore ñano ye dũcari.

¹⁷Sa ñano tiquirore tiquina ye duagũ masino Jesu pehe yahuri tiquinare:

—Yuhũ Pacũ yojobure dahrarĩno nine. Yuhũ gũhũ dahrarĩ niaja, ni yahuri tiquirore ñano ye duayequinare.

¹⁸Tiquiro sa nigũ judio masa usã puhtoa pehe tiquiro mehna tutuaro usuaye, to pano tiquina nidiro yuhdũoro tiquirore wejẽ duari. Saurũ decore tiquina sori decore ihcãquiro dohatiriquirore tiquiro yuhdũogũ ihñañe tiquina usuari. Sa usuaye tiquiro Cohãcjũre “Yuhũ Pacũ”, nigũ tuhoye, tiquina pehe to pano tiquina nidiro yuhdũoro usua nemoahye tja. “Yuhũ Pacũ’, nino Jesu tiquiro basi ‘Cohãcjũ mehna ihcãno saha ijiaja’, ni wacũaga tiquiro”, ni tuhaturi judio masa usã puhtoa.

Jesu Cohãcjũ ohoriquiro ijire

¹⁹Sa ye Jesu tiquinare yahuari:

—Ijirota niita niaja musare. Yuhũ Cohãcjũ macũ, yuhũ esa tuharo yeraja. Yuhũ Pacũ tiquiro yerire ihñagũ, tire yeaja. ²⁰Yuhũ Pacũ yuhũre tiquiro macũre cahĩne. Sa yero tiquiro yerire

yuhure ihño pehore. Ahri yojopu tiquiro tutuaye mehna yuhu yeri yuhduoro tiquiro apeyere ye dutirota yuhure. Tiquiro sa ye dutigū tiquiro tutuaye mehna ye ihñoutja yuhu. Sa yena ihña maria wahanata musa. ²¹Yuhu Pacu yariariquinare tiquiro masoriro sahata yuhu gūhu yuhu cahmeñequinare masoutja. ²²⁻²³Ne yuhu Pacu pehe masa tiquina ñañe buhirire buhiri dahreriquiro ijierare. Yuhu pehere tire tiquina ñañe buhirire buhiri dahreacjüre cūri yuhu Pacu. Ijipihtiyequina masa tiquirore tiquina ño peoriro sahata yuhu gūhure tiquina ño peoatire buhiri dahreacjüre cūri yuhure. Yuhure tiquiro macure ño peoerana yuhu Pacu gūhure ño peoerare musa. Tiquiro ijire yuhure ohoriquiro, nidi Jesu.

²⁴Sa ni tuhasa ohō saha ni yahu nemori:

—Ijirota niita niaja musare. Yuhu yahuducuyere tuhoyequina, yuhure ohoriquirore wacū tutuayequina ijipihtiye decori uhmusepu sa ijiducueta. Sa yegu tiquinare buhiri dahresi yuhu. Sa ye tiquina pecapu wahaboriquina yuhdueta. ²⁵Ijirota niita niaja musare. Pecapu wahatiquina yuhure Cohācjū macure tiquina tuhoati pje yojopu ijire. Cameru gūhure yuhure tiquina tuhoeta tja. Sa tuhoye tuho nñuñequina pehe Cohācjū mehna sa ijiducueta. ²⁶Cohācjū yuhu Pacu pehe sa ijiducugū yeriquiro ijire. Sa yero yuhure tiquiro macure sa ijiducugū yeacju iji dutiri tiquiro yuhure. ²⁷Sa yegu yuhu masu Cohācjū tiquiro ohorigu yuhu ijigū tiquiro masare buhiri dahreacjüre cūri yuhure. ²⁸Ahrire tuhona, tuho mariedacāhña musa. Ape decopure ijipihtiyequina yariariquina masa coperipu ijiyequina yuhu yahuducugū tuhoeta. ²⁹Sa tuhoye, quehnoañene yeriquina ijipihtiye

decori Cohācjū mehna ijiatiquina masa mjaeta. Ñañene yeriquina pehe ñañene tiquina yeri buhiri pecapu wahaeta, ni yahuri Jesu.

³⁰Sa ni tuhasa ohō saha ni yahu nemori:

—Yuhu esa tuharo ne yeraja. Ne yuhu basi yuhu cahmeno ye dueraja. Yuhure ohoriquiro tiquiro dutiriro sahata ye duaja. Sa yegu tiquiro nidiro sahata buhiri dahreaja. Sa yegu yuhu masare buhiri dahregu queoro yeaja. ³¹“Yuhu tutuagu ijiaja”, yuhu ni yahugū “Muhu yahuye ne pota ijierare”, ni masiboaga musa. ³²Apequiro ijire yuhure yahuriquiro. Tiquiro Ñu pehe masare yahure yuhure. Masare yuhure tiquiro yahuri ijirota ijire. Tire yuhu quehnoano masiaja. ³³Musa apequina pehere Ñupure yuhure sinitu dutina ohori. Sa yero potota yahure tiquiro musare. ³⁴“Cohācjū macuno ijire ahriquiro”, yuhure ni yahuatiquinare macaedaja. Sa macaedapeguta Ñu masuno tiquiro ijiepegūta yuhure “Cohācjū macuno ijire”, tiquiro ni yahurire yahugu niaja. Musa yuhure wacū tutuatire, musa pecapu wahaborina musa yuhduatire yuhure Ñu tiquiro yahurire yahugu niaja. ³⁵Sihāria meheñe decorigā ihña masigū yero sahata Ñu musare buhe muhtano mehenogā tiquiro catiro puno musare masigū yeri. Tiquiro sa buhegū tuhona meheñe decorigā bucueri musa. ³⁶Yuhu ijiye tiyere tiquiro sa buhepegūta Cohācjū pehe yuhu ijiyere quehnoano yahure. Tiquiro sa yahugū Ñu yuhu ijiyere tiquiro yahuye yuhduoro ijire Cohācjū ye yahuye. Sa yegu Cohācjū tiquiro tutuaye mehna yuhure tiquiro ye dutirire yojopu yei niaja. Ahrire yuhu yegū ihñana potota Cohācjū ohorigu yuhu ijiyere masine musa. ³⁷Sa yero yuhu Pacu yuhure ohoriquiro tiquiro basi “Tiquiro yuhu

ohoriquiro ijire”, ni yahure musare. Tiquiro sa ni yahuepegūta tiquiro yahuducuyere ne tuhoerari musa. Sa yena musa tiquirore ne masiedari. ³⁸Yuhure Cohācjū ohorigare musa ne tuho duerari. Sa yena musa Cohācjū yere ne cahmedari. ³⁹Cohācjū yere tiquina ojoari pūre musa buhena, “Mari ahri pūre buhena ijipihtiyē decori Cohācjū mehna sa ijuducunata”, nine musa. Ti pūta yuhure yahure. ⁴⁰Ti pū yuhure ti yahuepegūta musa pehe yuhure cahmedare. Ijipihtiyē decori Cohācjū mehna musa sa ijuducuatire yuhure sini duerare musa, ni yahuri Jesu.

⁴¹Sa ni tuhasa ohō saha ni nemori:

—Yuhure musa ño peoeragū ihñagu usueraja yuhū pehe. ⁴²Musa pehe Cohācjūre musa cahñedagū masiaja yuhū. ⁴³Cohācjū yuhū Pacu tiquiro yuhure dutiriro sahata yuhū ahtaepēgūta musa yuhure cahmedari. Apequiro pehere Cohācjū ohoeriquiro tiquiro ijiepegūta tiquiro pehere cahmenata musa. ⁴⁴Apequina masa musare tiquina ño peogū cahmene musa. Cohācjū musa mehna tiquiro bucuegū cahmedare musa. Tiquiro dihita Cohācjū waro ijire. Sa cahmedana yuhū gūhure tuhoerare musa. Yuhure wacū tutuerare. ⁴⁵Musare yuhū Pacure ne yahusāsi yuhū. Tire masiña musa. Moise tiquiro ojoari pū pehe musare yahusānota. “Ti pū cjē dutiyere mari ye pehona, Cohācjū cahapu wahanata”, musa nidi pū pehe musare yahusānota. ⁴⁶Moise tiquiro ojoari pūpū yuhū pehere yahuahye. Sa yena ti pūre “Ijirota ijire”, nina, yuhū yahuyē gūhure “Ijirota ijire”, niboaya musa. ⁴⁷Moise tiquiro ojoari pūre “Ijirota ijire”, niedana, yuhū yahuducuyē gūhure “Ijirota ijire”, nisi musa, nidi Jesu tiquinare.

Cinco mil masare ihyayere ohoahye Jesu

(Mt 14.13-21; Mr 6.30-44; Lc 9.10-17)

6 Sa tiquiro buheri bato Galilea wame tiri ditara ape sie pahrēpū usā Jesu mehna pehāa wahañ. Ti ditara pajiri ditara Tiberia wame tiri. ²To pano Galilea yehpapū Jesu dohatiyequinare tiquina dohatiyere tiquiro cohāgū masa ihñae tiri. Tiquina sa ihñari bato Jesu pehāgū ihñañe masa peyequina tiquirore nunū tā cāri. ³Topū esana usā tiquiro buhena pehe tiquiro mehna cunupū muja sa, tu buipū dujii. ⁴Ti deco pasua wame tiri bose deco ijiato judio masa usā ya bose deco mehenogā dūhsari. ⁵⁻⁶Topū dujiro, Jesu peyequina masa tiquiro cahapu tiquina ahtagū ihñadoqueori. Sa ihñadoqueoro Felipere sinituri:

—¿Ahriquina masa tiquina ihyatire nohopū dúnatari mari? nidi Felipere.

Jesu tiquiro basi tiquiro yeatire masieperota Felipere sinituri, “¿Dūhse yuhtitrotari?” nino. ⁷Tiquiro sa sinitugū tuhoro Felipe yuhtiri:

—Doscientos niñeru cjoeri pose ihyayere mari dūepēgūta masare dayegā ihyayere mari itiepegūta ne esa tuhasi, nidi Felipe Jesure.

⁸Usā mehna cjūno Andre, Simo Pedro bahuro pehe Jesure yahuri:

⁹—Ihcā omope pā pacare, pūaro wahire nijino ohō cūore. To punogāta tiquiro cūepēgūta masa pehe peyequina waro ijire. Sa yero ahri mehenogā ihyaye ne esa tuhasi, nidi Andre.

¹⁰—Masare duji dutiya musa, nidi Jesu usāre tiquiro buhenare.

Topū taa dayegā ijiro ijiri. Usā duji dutigū masa nuju sa pihtiyari taa buipū. Ūmua dihitare mari queogū cinco mil ijiri. ¹¹Tiquina sa nuju sagū ihñano Jesu pehe pāre ne, Cohācjūre “Quehnoare” nidi. Sa ni tuhasarota usāre tiquiro buhenare iti dutiri. Tiquiro sa dutigū

usã pehe dujiyequinare iti cãu. Pũaro wahi gũhũre iti cãu. Ijipihtiyequinare quehnoano tiquina esa tuharo ihyayere tiquinare itii. ¹²Sa ye masa pehe yapia wahari. Tiquina sa yapigũ ihñano Jesu usãre nidi:

—Tiquina ihya duharire quehnoano ne peho cãhña. Sa yena tiquina ihya duharire ne bosì, nidi.

¹³Tiquiro sa nigũ usã pehe ihcã omope pã paca duhsarire usã ne cahmeco-agũ doce puhuse waro wijiari. ¹⁴Sa ye masa ti bajumehnenore Jesu tiquiro yegũ ihñañe, ohõ saha nidi:

—Ijirota ijire. Ahriquiuro Cohãcjũ yere yahu muhtariquiuro ahri yehpapũ ahtariquiuro mari cohteriquirota ijire, nidi tiquina.

¹⁵Tiquina Jesure tiquina puhtoro iji-atiquiro ñehe sõ duamedì. Jesu tire masino pari turi ihcãquiurota cunupũ waha wahari.

Jesu aco bui tiniahye

(Mt 14.22-27; Mr 6.45-52)

¹⁶Ñamicahapũ usã tiquiro buhena ditarapũ buhaũ. ¹⁷Topũre buha sa, yucusapũ sajã, Capernau wame tiri macapũ pehãu. Usã pehãri pje ñamipũ ijiri. Sa yero Jesu usã cahapũ ahtaerani. ¹⁸Wihnono tutuaro wẽgũ, pajiri ma pahcõri wahcãri. ¹⁹Ihcã omope kilómetro esaboro waro usã esagũ waro Jesu usã cahapũ wihiri. Aco bui tiquiro ahtagũ ihñau usã. Sa usã cahapũ tiquiro ahtagũ ihñana usã cuei. ²⁰Sa usã cuegũ ihñano tiquiro usãre yahuri:

—Ne yuhũre ihña cueracãhña. Yuhũta ijijaja, nidi Jesu.

²¹Tiquiro sa nigũ tuhona usã bucu-eye mehna tiquirore piti ca sajã dutii. Tiquiro sajãri batogãta usã wahari yehpapũre pehã sa tuhasau.

Masa pehe Jesure macahye

²²Ti ñamine masa topũ tojoariquina pehe ihcãriata usã pehãtiare ihñahye. Tia mehna usã pehãgũ ihñari tiquina. Jesu usã mehna tiquiro wahaeragũ gũhũre ihñari tiquina. Sa ye ape decore tiquirore cohteye nimahye. ²³Tiberia wame tiri macapũ ahtaye, Jesu Cohãcjũre “Quehnoare”, tiquiro nidiro cahagã cjũnopũ, masare tiquiro ihyaye itiriro caha cjũnopũ wahã sahye tiquina yucusa mehna. ²⁴Sa ye ape deco usã Jesu mehna ijirirore usã mariedagũ ihñañe, masa yucusapũ sajã, Capernaupũ usãre nunũ tã pehã sari. Jesure maca saye nidi tiquina.

Jesu catiyere oho, ihyaye yero saha ijiriquiuro ijire

²⁵Ditarapũ pehã, Jesure boca saye, masa sinituri tiquirore:

—¿Buhegu, duhse ijigũ ahtari muhũ ohõpũre? ni sinituri tiquina.

²⁶Tiquina sa sinitugũ Jesu tiquinare yahuri:

—Ijirota niita niaja musare. Bajumehnedire yuhũ yepegũta yuhũ pehere wacũ tutuerare musa. Yuhũre wacũ tutuerapenata yuhũre macare musa. Yuhũ mehna bujũye ihyana, musa yapirina yuhũre maca cãhtari tja. ²⁷Ihyaye ne sa ijiducuerare. Camepũ pihtia wahare. Sa yena tire wacũducueracãhña. Apeye ihyaye sijoro saha ijiye ihyaye pehere macaña musa. Ti ihyayere bocana ijipihtiye decori Cohãcjũ mehna ijinata. Sa ye ti ihyaye pũrita ne pihtierare. Ti ihyayere yuhũ masu Cohãcjũ ohorigu musare ohoutja. Cohãcjũ yuhũ Pacu yuhũre tire oho dutiriquiro ijire. Cohãcjũ tiquiro ohorigu yuhũ ijiyere ihño tuhasari musare, nidi Jesu.

²⁸Tiquiro sa nigũ tiquina sinituri tiquirore:

—¿Cohācjū tiquiro ye dutiyere yena tana dūhse yenatari ũsā? ni sinituri tiquina.

²⁹—Ahrire Cohācjū musare ye dutire: “Yūhu ohoriquirore wacū tutuaya”, nino musare ye dutire Cohācjū, nidi Jesu.

³⁰Tiquiro sa nigū tūhoye tiquina ohō saha nidi tja:

—Cohācjū ohorigu ijigu tiquiro tutuaye mehna ye ihñōña ũsāre mūhure ũsā quehnoano wacū tutuatire. ¿Yabe borore yeitjari mūhu? ³¹Mari ñecusumua munapu panopu cjēna masa marienopu maná wame tiye pacare ihyae tiahye. Cohācjū yere tiquina ojoari pūpu ohō saha ni yahuahye: “Tiquiro tiquinare ũhmuse cjē ihyayere ohoie tiahye tiquina ihyatire”, ni ojoahye Cohācjū yere tiquina ojoari pūpu. ¿Tiquiro sa yeriro sahata yeitjari mūhu gūhu? nidi tiquina.

³²Tiquina sa nigū Jesu yahuri tiquinare:

—Ijirota niaja musare. Moise ũhmuse cjē ihyayere ohoerari musare. Yūhu Pacu pehe ũhmuse cjē ihyaye potota ijiyere musare ohoriquiro ijire. ³³Cohācjū ye ihyaye ũhmusepu dijia taye, ijipihitiri yehpa cjēnare catiyere oho masine, nidi Jesu tiquinare.

³⁴—Pūhto, decoripe ti ihyayere ohoya ũsāre, nidi tiquina.

³⁵Tiquina sa nigū tūhoro Jesu yahuri tiquinare:

—Yūhu pehe catiyere oho, ihyaye yero saha ijigu ijiaja. Mari ye ihyayere mari ihyari batota duita ũjua ahbaa wahaja mari tja. Sihniñe gūhure mari sihnidi batota aco wūoa wahaja tja. Sa ijipegūta yūhure cahmediquiro, yūhure wacū tutuariquiro ũjua ahbaerariquiro yero saha tiquiro bucueye tiquirore pihitisi. ³⁶Musa pehe yūhure ihñāepenata yūhure wacū tutueranine. Tireta musare yahue timi yūhu. ³⁷Ijipihitieuquina yeequina ijiatiquinare yūhure yūhu Pacu

tiquiro cūriquina pehe yūhure cahmeeta. Sa ye yūhure cahmeñequinare ne cohāsi yūhu. ³⁸Ūhmusepu ahtagu yūhu cahmeno yei ahtagu niedu yūhu. Yūhure ohoriquiro tiquiro cahmediro sahata yei ahtagu nii yūhu. ³⁹Ahrita ijire yūhure ohoriquiro tiquiro cahmeñe waro: Ijipihitieuquina yeequina yūhure tiquiro ohoriquinare yūhu boeragū cahmene yūhure ohoriquiro pihitiri deco ijigū tiquina masa mujatire. ⁴⁰Ijipihitieuquina yūhure Cohācjū macure ihñāñequina, yūhure wacū tutuayequina ijipihitieu decori tiquiro mehna tiquina ijigū cahmene yūhu Pacu. Sa yegu pihitiri decopu tiquinare masoutja, nidi Jesu.

⁴¹“Yūhu ũhmusepu ahtaye ihyaye yero saha ijigu ijiaja”, tiquiro nigū tūhoye judio masa ũsā pūhto pehe tiquiro mehna usua, tiquina basi Jesure ñano ni yahuducuri.

⁴²—¿Ahriquiro Jesu José macuno ijierajari? Tiquiro pacuro, pacoro gūhure mari masiaja. Sa yero mari yero saha pagu tiriquirota ijire. ¿Sa ijieperota dūhsero “Ūhmusepu ahtau”, nijari tiquiro? ni usuari tiquina.

Tiquina sa nigū tūhoro Jesu yahuri tiquinare:

⁴³—Musa yūhure ñano ni yahuducueracāñña. ⁴⁴Yūhu Pacu yūhure ohoriquiro pehe masare yūhu pehere cahmegū yere. Tiquiro sa yeragū masa pehe yeequina iji masiedaboaya. Pihitiri deco ijigū yeequinare masoutja yūhu. ⁴⁵Cohācjū yere yahu mūhtariquina pehe ohō saha ni ojoahye: “Cohācjū tiquinare buherota”, ni ojoahye Cohācjū yere yahu mūhtariquinapu. Ijipihitieuquina yūhu Pacu ye buheyere tūhoyequina, tiquirore yūhtieuquina yūhure cahmene. Sa yeye yeequina ijire.

⁴⁶Yūhu Pacure ne ihcāquiro masuno ihñedare. Yūhu Cohācjū ohorigu dihita yūhu Pacure ihñau. ⁴⁷Ijirota ni-

aja musare. Yuhure wacū tutuariquiro ijipihtiye decori yuhū Pacū mehna sa ijiducurota. ⁴⁸ Yuhū catiyere oho, ihyaye yero saha ijigū ijiaja. ⁴⁹ Mūsa ñecusumua mūna iji turiayequina masa marienopū manāre ihyaē tiahye. Sa tire ihyaepeeta yariaa wahae tiahye. ⁵⁰ Uhmūsepū ahtari ihyayere yuhū niñe ihyayere masuno ihyaro, ne pecapū wahasi. ⁵¹ Yuhū uhmūsepū ahtari ihyaye catiyere oho, ihyaye yero saha ijigū ijiaja yuhū. Ahri ihyayere ihyariquiro ijipihtiye decori yuhū Pacū mehna sa ijiducurota. Ahri ihyaye catigū yere. Ahri ihyaye yero saha ijiye yuhū pagūta ijire. Ijipihitiri yehpa cjēna Cohācjū mehna tiquina sa ijiducuatire yuhū pagūre ohogūtja. Sa ohogu yariagūtja, nidi Jesu.

⁵² Tiquiro sa nigū tūhoye usā acaye judio masa pehe tire ohō saha ni yahuducuri tiquina basi:

—¿Ahriquiro dūhse ye tiquiro pagūre ihyatire ohorotari? nidi tiquina basi.

⁵³ Tiquina sa nigū tūhoro Jesu yahuri:

—Ijirota niaja musare. Yuhū masū Cohācjū ohorigu ijiaja. Yuhū pagūre ihyeriquiro, yuhū diire sihnienuiro uhmūsepū wahasi. ⁵⁴ Sa yuhū pagūre ihyariquirore, yuhū diire sihnidiquirore pihitiri deco ijigū masoutja. Sa yero uhmūsepū sa ijiducurota tiquiro. ⁵⁵ Yuhū pagū potota ihyaye waro yero saha ijire. Yuhū dii potota sihniñe yero saha ijire. ⁵⁶ Yuhū pagūre ihyariquiro yuhū diire sihnidiquiro yuhū mehna bucueye mehna ijiducurota. Sa yegu yuhū gūhū tiquiro mehna bucueye mehna ijiducujaja. ⁵⁷ Yuhū Pacū yuhūre ohoriquiro sa ijiducure. Sa ijiducuro, yuhū gūhūre sa ijiducugū yere. Sa yeye yuhūre sa ijiducugūre masa ihyaye, Cohācjū mehna uhmūsepū sa ijiducuenta tiquina gūhū. ⁵⁸ Ahri tjire uhmūsepū ahtari ihyaye. Mari ñecusumua mūna iji turiayequina tiquina ihyari yero saha ijierare ahri ihyaye. Tiquina pehe ti ihyayere

ihyaepeeta yaria pihtia wahae tiahye. Ahri ihyaye pehere ihyariquiro uhmūsepū sa ijiducurota, nidi Jesu.

⁵⁹ Capernaupū judio masa usā buheri wuhupū Jesu buhero, sata ni yahuri.

Jesu ye buheyere tūhona uhmūsepū sa ijiducunata mari

⁶⁰ Peyequina Jesure cahmeñequina tiquiro sa ni buheyere tūhoye, ohō saha ni yahuducuri:

—Ahri buheye tutuaro mijore. Sa yena mari tūho duera cjūaja, ni yahuducuri tiquina basi.

⁶¹ Tiquina sa nigū Jesu pehe tiquina yahuducurire masidi. Sa masino tiquiro sinituri tiquinare:

—¿Ahri buheyere tūhona usuajari mūsa? ⁶² ¿Yuhū masū Cohācjū ohorigu uhmūsepū yuhū tojoaa wahagū ihñana dūhse ni tūhotunatari mūsa? ¿To gūhūre usuanatari mūsa? ⁶³ Masuno tiquiro jeripohnare cūoro catire. Tiquiro pagū pehe tiquirore catigū yerare. Masuno tiquiro jeripohna tiquirore catigū yero saha yuhū buheye pehe musare Cohācjū mehna sa ijiducugū yere. ⁶⁴ Apequina mūsa mehna cjēna ne yuhūre wacū tutuerare, nidi Jesu.

Coā waropūre Jesu tiquirore wacū tutueyequinare masidi. Sa yero tiquirore ihñā tuhtiequinare ihñootiquiro gūhūre masi tuhasari. Sa tiquirore wacū tutueyequinare masino “Apequina mūsa mehna cjēna yuhūre wacū tutuerare”, nidi Jesu. ⁶⁵ Sa ni tuhasa ohō saha ni nemori:

—Ohō saha ni yahumi musare: “Yuhū Pacū masare yuhū pehere cahmegū yere. Tiquiro sa yeragū masa pehe yeequina iji masiedaboaya”, musare nie timi, nidi Jesu.

⁶⁶ Tiquiro sa ni buhegū tūhoye peyequina Jesure cahmemediquina tiquirore cohā, tiquiro mehna pari turi wahaer-

ari. ⁶⁷ Tiquina sa yegū ihñano Jesu usāre doce tiquiro buhenare sinituri:

—¿Musa gūhū yūhūre cohānatjari? ni sinituri usāre. ⁶⁸ Tiquiro sa nigū Simo Pedro yūhtiri tiquirore:

—Puhto, usāre apequiro buheriquiro mariedare. Mūhū ye buheyere tuhona Cohācjū mehna sa ijiducunatja usā. Mūhū ye buheyere dihita tire yahure usāre. ⁶⁹ Sa yena usā mūhūre wacū tutuaja. Sa yena mūhū quehnoagu, Cohācjū macū tiquiro ohorigū mūhū ijigū usā masiaja. Sa yena mūhūre cohāsi usā, nidi Simo Pedro Jesure.

⁷⁰ Tiquiro sa nigū tuhoro Jesu yahuri usāre:

—Yūhū pehe musare doce besei. Sa ijiepegūta ihcāquiro musa mehna cjūno wafino yaquiro ijiatiquiro ijire, nidi usāre tiquiro buhenare.

⁷¹ Sa nino Judare Simo Iscariote macūnore nino nidi. Juda pehe doce usā mehna cjūno Jesure ihña tuhtiequinare ihñoatiquiro ijiri.

Jesu acaye tiquirore “Cohācjū macūno ijire”, ni, ne masiedahye

7 Came Jesu Galilea yehpapū tinino wahari. Judea yehpapū judio masa tiquirore wejē duari. Tiquina sa wejē duagū masino tiquiro ti yehpapū wahaerari. ² Judio masa daye wuhusegā usā yeati bose deco mehenogā dūhsatjāri. ³ Sa ye Jesu bahana tiquirore yahuri:

—Judeapū wahaya. Topū mūhū yequinare mūhū bajumehneñene ihñogu wahaya mūhū. ⁴ Masare mūhū bajumehneñene ihño duagu ne nūosi mūhū. Ye ihñono cahmene. Potota ahri bajumehneñene ye masigu ijigu tire masare ihñoña, nimedi tiquina.

⁵ Tiquiro bahana ijiepetā Jesure “Cohācjū macūno ijire”, niedari. Sa yeye sa nidi tiquina tiquirore. ⁶ Tiquina sa nidi bato Jesu yahuri tiquinare:

—Masa yūhūre tiquina quehnoano masiati pje dūhsarīne. Mūsa ihña duana bose deco ijigū waha masine. ⁷ Ahri yehpa cjēna musa pehere ihña tuhtierare. Tiquina ñañe yerire yūhū yahugū tiquina yūhū pehere ihña tuhtire. ⁸ Bose deco ijigū wahaya musa sehsaro. Yūhū pehere yūhū wahati pje dūhsarīne. Sa yegu yūhū pehe bose decore mianogāre ihñau waharisi, nidi Jesu tiquinare.

⁹ Sa nino tiquiro Galileapū tojoari.

Jesu daye wuhusegā tiquina yeri bose deco ijigū wahahye

¹⁰ Bose decopū Jesu bahana tiquina wahari bato Jesu gūhū tiquina bato wahari. Sa waharo masa tiquina ihñeno watoa wahari. ¹¹ Bose deco ijieyequina judio masa usā puhtoa tiquirore macari:

—¿Nohopū ijiagari tiquiro? ni sinituahye tiquina.

¹² Sa ye masa gūhū Jesure peyequina yahu wajahye. Apequina “Tiquiro quehnoariquiro ijire”, niahye. Apequina “Tiquiro ñariquiro ijire. Masare mehoriqiro ijire”, ni yahu wajahye tiquina.

¹³ Sa niepeta judio masa usā puhtoare cueye masa tiquina ihñenopū Jesure yahu wajahye.

¹⁴ Bose decori deco mehna dūhsagū Cohācjū wuhupū Jesu sajā saro, buheri. ¹⁵ Tiquiro sa buhegū usā acaye judio masa tuho maria waha, ohō saha nidi:

—¿Ahriqiro buheropū buhemehnediquiro ijieperota dūhsero quehnoano masi pehoajari? nidi tiquina basi tiquirore.

¹⁶ Tiquina sa nigū Jesu yahuri tiquinare:

—Yūhū buheri yee yahuducuye ijierare. Yūhūre ohoriqiro ye yahuducuye pehe ijire ahri buheyere. ¹⁷ Cohācjū cahmeñene ye duayequina yūhū buheyere Cohācjū ye yahuducuye ti ijigū masieta. Yūhū esa tuharo

yuhū buheragū gūhure masieta tiquina. ¹⁸Ihcāquiro tiquiro esa tuharo tiquiro masiñe mehna buhero “Yuhū dihitarē ño peoya”, nino nine tiquiro. Sa ijiepegūta yuhure ohoriquiro pehere mūsa ño peogū cahmeaja yuhū pehe. Yuhū sa nigū tuhona “Potota ni yahuducure tiquiro. Ne mehoedare”, ni masinata mūsa.

¹⁹Cohācjū dutiyere Moise mūnano pehe cūahye mū sare. Tiquiro sa cūiepegūta mūsa ijipihtina ti dutiye pehere ne yuhtiarari. ¿Dūhsena yuhure wejē duajari mūsa? nidi Jesu usā acaye judio masare.

²⁰—Tūho masiedare mūhū. Watīnore cūore mūhū. Mūhure wejē duayequina mariedare, ni yuhtiri tiquina Jesure.

Tiquina sa nigū Jesu yuhtiri:

²¹—Mari judio masa mari sori deco saurū ijigū ihcā tahata Cohācjū tutuaye mehna dohatiriquiro tiquiro dohatiyere yuhū cohāgū mūsa ihña maria wahari.

²²Mari ñecusumūa mūna panopū cjēna pehe tiquina pagure cuhnucunū sohtoa cahserogāre yuhre neñequina tiquina yeriro sahata Moise yuhre ne duti-ahye. Potota Moise pehe ti duti-ahye. Potota Moise pehe ti duti-ahye. Mari ñecusumūa mūna iji turiayequina pehe tire cū, yahu turi-ahye. Tiquiro sa dutigū saurū sori deco ijiepegūta masunore tiquiro cuhnucunū sohtoa cahserogāre yuhre nene mūsa. ²³Saurū ijigū masunore tiquiro cuhnucunū sohtoa cahserogāre yuhre nene mūsa, Moise dutiyere yena tana. ¿Mūsa gūhū saurū decore tire yepenata ti decopū dohatiriquirore yuhū yuhduogū dūhsena yuhū mehna usuajari mūsa? ²⁴Yuhū yerire mūsa quehnoano masiedapenata, yuhure ñano tuhotuer-acāhña. Mūsa quehnoano masidi bato yuhure mūsa tuhotugū potota ijirota. Yuhū yerire masina, queoro masiña mūsa, nidi Jesu.

Jesu coā waropū tiquiro ahtaritore yahuahye

²⁵Tiquiro sa ni yahuri bato meheñe-quinagā Jerusalē cjēna tiquirore ohō saha ni yahu wajari:

—¿Ahriquiro judio masa puhtoa tiquina wejē duariquiro ijierajari?

²⁶Sa yero tiquirore tiquina wejē duepegūta ijipihtiyequina ihñono masare buhero nine tiquiro. Sa ye tiquirore wejē duayequina ijiepetā sa ihña cāre. ¿“Tiquiro potota Cristo ijire”, ni, tuhotuagari puhtoa pehe?

²⁷Sa ijiepegūta ahriquiro Jesu tiquiro ahtaritore mari masiaja. Cristo pehe masare yuhduoatiquiro tiquiro ahtagū tiquiro ahtariro pehere masimehnedare. Sa yero masare yuhduoatiquiro Cristo waro ijierare Jesu, ni yahu wajari tiquina Jerusalē cjēna.

²⁸Tiquina sa niñene masino, Jesu ohō saha ni tutuaro sañuducu buheri Cohācjū wuhupū:

—Yuhure ohō saha ni tuhature mūsa: “Tiquirore masiaja. Sa yena tiquiro ahtariro gūhure masiaja”, ni tuhutumene mūsa. Mūsa sa ni tuhotuepenata yuhure ohoriquirore ne masiedare mūsa. Yuhure ohoriquiro poto niniquiro, poto yeriquiro ijire. Tiquirore ne masiedare mūsa.

²⁹Tiquirota yuhure ohori. Sa yegū tiquiro cahapūta ahta. Sa yegū yuhū pehe tiquirore masiaja, nidi Jesu judio masare.

³⁰Tiquiro sa nigū tuhoye tiquirore ñehe duamedi. Tiquina sa ñehe duepegūta Jesu tiquiro ñano yuhduati pje dūhsarīdi. Sa ye tiquina tiquirore ñehe masiedari. ³¹Apequina masa pehe peyequina tiquirore wacū tutuaye, ohō saha nidi:

—“Cristo peye tahari Cohācjū tutu-aye mehna ye ihñonota”, panopū tiquina ni yahu muhtariro sahata ahriquiro

Jesu pehe peye tahari Cohācjū tutuaye mehna ye ihñore. Ijipihtiyequina apequina yuhduoro Cohācjū tutuaye mehna ye ihñore tiqiro. Sa yero Cristo Cohācjū ohoriqirota ijire ahriqiro Jesu, nidi Jesure wacū tutua ducayequina.

Fariseo masa Jesure peresu ye dutiahye

³² Masa Jesure tiquina sa ni yahuducugū tuhoahye fariseo masa. Sa ye tiquina, pahia puhtoahye mehna Jesure ñehe dutiye ohoahye surarare, Cohācjū wuhure cohteyequinare.

³³ Sa yero Jesu judio masare ohō saha nidi:

—Meheñe decorigā mūsa mehna ijini-itja. Sa yegu mehenogā bato yuhure ohoriqiro cahapū wahautja. ³⁴ Yuhū ijiatore mūsa waha masiedare. Sa yena yuhure macaepenata ne bocasi mūsa, nidi Jesu judio masare.

³⁵ Tiquiro sa nigū tuhoye tiquina basi ohō saha ni yahuducuri:

—¿Ahriqiro sa nino nohopū waharotari, mūsa tuhutugū? ¿Griego masa cahapū judio masa waha siteriquina tiquina ijiye macaripū griego masapūre buhero wahaboagari ahriqiro? ³⁶ ¿“Yuhū ijiatore mūsa waha masiedare. Sa yena mūsa yuhure macaepenata ne bocasi”, tiqiro nigū duhse nino boro ahriqiro sa nijari? ni yahuducuri judio masa tiquina basi.

Catigū yeye mārīne yahuahye Jesu

³⁷ Bose deco bato tiri deco ti deco waro ijiro nidi. Ti decore Jesu topū ducuro, tutuaro mehna sañuducu yahuri:

—Aco wñoyequina acore tiquina tutuaro cahmeno saha ijipihtiye decori Cohācjū mehna mūsa ijiatire tutuaro cahmena yuhure siniña. Mūsa sa sinigū tiqiro yequina mūsa iji dutiitja. ³⁸ Yuhure wacū tutuayequinare ohō saha ni ojoahye Cohācjū yere tiquina

ojoari pūpū: “Māri pohteripū catigū yeye aco sa wijiaducuro sahata catigū yeriquiro tiquina mehna sa ijuducurota”, ni ojoahye Cohācjū yere tiquina ojoari pūpū, ni yahuri Jesu judio masare.

³⁹ Sa catigū yeriquirore wame peo yahuro “Yuhure wacū tutuayequina Espiritu Santore cuoeta”, nino nidi Jesu. Tiquiro uhmūsepū tiqiro mājadarīgū Espiritu Santo pehe wihieraniahye.

Judio masa tu wahye pua curua

⁴⁰ Jesu tiqiro sa nigū tuhoye, masa peyequina ohō saha ni yahuducuri:

—Ahriqiro potota Cohācjū yere yahu muhtariqiro mari cohteriquiro ijire, nidi masa.

⁴¹ Ohō saha nidi apequina gūhū:

—Ahriqiro Cristo marine yuhduoatiquiro ijire, nidi.

Apequina pehe ohō saha nidi:

—Cristo ahtarō, Galilea yehpa cjūno ijisi tiqiro. Ahriqiro Jesu pehe to cjūnota ijire. ⁴² Cristo Davi mūnāno panamino ape tjuro cjūno ijiatiquiro ijirota. Sa yero Davi ya maca ijiriropū Belēpū Cristo masa bajuarota. Ohō saha ni yahure Cohācjū yere tiquina ojoari pūpū. Ahriqiro Jesu pehe Belēpū masa bajuerahye. Sa yero tiqiro Cohācjū ohoriqiro Cristo waro ijierare, nidi tiquina.

⁴³ Sa ye Jesure tuhomediquina pua curua tu wari tiquina basi. ⁴⁴ Meheñequinagā masa pehe Jesure ñehe duamedī. Sa ñehe duepeta tiqirore ñehedari.

Judio masa puhtoahye Jesure ne wacū tutuerahye

⁴⁵ Sa ye surara pahia puhtoahye cahapū fariseo masa cahapū tojoaa wahahye. Tiquina tojoa sagū ihñañe tiquina surarare sinituahye:

—¿Duhseña Jesure ñehedari mūsa? ni sinituahye tiquina pehe.

⁴⁶—Tiquiro quehnoa yuhduaro yahuducuriquiro ijiri. Apequina tiquiro yero saha yahuducuyequina ne mariedare, ni yuhtiahye surara tiquinare.

⁴⁷Tiquina sa nigū fariseo masa pehe ohō saha ni yahuahye:

—¿Mūsare tiquiro mehogū “Potota nino niaga”, nijari masa gūhū? ⁴⁸Mari puhto Jesure wacū tutueyequina ijiye ne tiquirore cahmedare. Usā gūhū sa ijina tiquirore cahmedaja. ⁴⁹Ahriquina masa pehe Cohācjū dutiyere Moisere tiquiro cūrire masiedare. (Sa masieñequina ijiye Jesure wacū tutuayequina ijiye, tiquirore cahmene.) Tiquina sa cahmedi buhiri tiquinare mari Pacū buhiri dahrerota, niahye fariseo masa.

⁵⁰Fariseo masūno Nicodemo Jesure yahuducuro esariquiro topū ijiahye tiquina mehna. Tiquina sa nigū tuhoro ohō saha niahye tiquiro tiquinare:

⁵¹—Jesu ñano yerire masiedaja mari. Sa masiedana marine tiquiro yahuato pano tiquirore buhiri dahre masiedaja mari. Sa masiedapenata tiquirore buhiri dahrena, mari ye dutiyere yuhduducana nijaja mari, niahye Nicodemo tiquinare.

⁵²Tiquiro sa nigū tuhoye ohō saha ni yuhtiahye tiquina:

—¿Mūhū gūhū tiquiro yero saha Galilea cjūta ijajari? Cohācjū yere tiquina ojoari pūre buhe pehoya. Sa buhegū “Cohācjū yere yahu muhtariquina ne ihcāquiro mariedare Galileare”, ni buhe masiita mūhū. (Sa yero sa ni maca cāno nine Jesu,) ni yuhtiahye tiquina Nicodemore.

[⁵³Tiquina sa nidi bato tiquina ye wuhusepū tojoaa wahahye.

Umūno mehna ñano yericorore judio masa puhtoa wacūeno mehna esa pjeahye

8 Jesu cūnupū Olivo wame tidupū wahari. ²Sa yero bohrearo Cohācjū

wuhupū tiquiro esari tja. Tiquiro esagū ihñañe masa peyequina tiquiro cahapū cahmecoari. Tiquina sa cahmecoagū ihñano tiquiro pehe dujitjiāno tiquinare buhe ducari. ³Tiquiro sa buheri watoa usā acaye judio masa buheyequina, fariseo masa mehna ti wuhupū numinore ne cāhtari. Ticoro umūno mehna ñano yegū waro wacūeno mehna esa pjeahye tiquina ticorore. Sa esa pjeeye ticorore Cohācjū wuhupū ne sajāri tiquina. Ne sajā sa tuhasa ijipihitiyequina ihñono ticorore duhu docoye ohō saha nidi:

⁴—Buhegū, ahricoro umūno mehna ñano ticoro yegū waro wacūeno mehna ticorore esa pjei. ⁵Cohācjū dutiyere Moise mūnanopū marine tiquiro cūri ohō saha nine: “Umūno mehna ñano yericorore utā paca mehna doque wejēña”, niahye Cohācjū dutiye. ¿Mūhū waro dahse ni tuhotaajari ahrire? ni sinituri tiquina Jesure.

⁶Jesu ñano nigū tuho duaye nimesi tiquina tiquirore yahusāñe tehe. Tiquina sa sinituepegūta Jesu muhri quehe, yehpapū tiquiro omo piria mehna ojoari. ⁷Sa tiquina ni sinituducugū Jesu pehe wahcā nuju sa, tiquinare yahuri:

—Musa mehna cjūno ñano yerariquiro ticorore utā mehna doque muhtaahdo, nidi Jesu.

⁸Sa ni tuhasa pari turi muhri quehe, yehpapū ojoari tja. ⁹Tire tuhoye tiquina ñañe yerire wacūñe, tiquina wahmisumua pehe wijia muhtari. Tiquina bato tiriquina mehna cjēna gūhū wijia pihitia wahari. Sa yero numino topū ducuricoro Jesu mehna tojoari. ¹⁰Sa yero Jesu wahcā nuju sa ticorore sinituri:

—¿Nohopū wahajari tiquina? ¿Mūhūre buhiri dahre duamediquina mariedajari yojopūre? nidi ticorore.

¹¹—Mariedare puhto, ni yuhtiri ticoro.

—Yuhū gūhū buhiri dahreraja mūhure. Wahaya. Sa yego ñañene ye nemoedacāhña, nidi Jesu ticorore.]

Buhrioro marine ihña masigū yero saha Jesu ahri yehpa cjēnare mari Pacūre masigū yere

¹² Pari turi Jesu ti wuhūpū ijiye-quinare yahuri:

—Buhrioro marine to ihña masigū yero sahata yuhū ahri yehpa cjēnare Cohācjūre masigū yeaja. Yuhure wacū tutuariquiro ijipihkiye decori Cohācjū mehna sa ijiducurota. Sa yero tiquiro quehnoañene wacūnota. Sa yero tiquiro ñañene wacū duerare, ni yahuri Jesu.

¹³ Tiquiro sa nigū tiquirore fariseo masa ohō saha nidi:

—Mūhū basi mūhū ijiye tiyere sa ni yahuducugu nine. Sa ye mūhū ohō saha ni mūhū esa tuharo mūhū ni yahuducu maca quēhe ne dūhseati ijierare, nidi tiquina Jesure.

Tiquina sa nigū Jesu yūhtiri:

¹⁴—Yuhū ahtarirore masiaja yuhū. Yuhū wahato gūhure masiaja yuhū. Mūsa ne tire masiedare. Mūsa ohō saha niepegūta yuhū ijiye tiyere mūsa yuhū yahuri poto tjire. ¹⁵ Mūsa esa tuharo mūsa ihñari dihitaro masine mūsa. Sa yena quehnoano masiedare mūsa. Sa masiedapenata yuhure ñano ni yahuducure mūsa. Yuhū pehe yuhū esa tuharo masare ne sa niedaja. ¹⁶ Sa yegu masa tiquina ijiye tiyere ihña masigū yuhū esa tuharo ihña masiedaja. Yuhū pūrita yuhure ohoriquiro mehna ihña masiaja. Sa yegu masa tiquina ijiye tiyere yuhū ihña masiñe poto tjire. ¹⁷ Mūsa dutiye tiquina ojoari pū ohō saha ni yahure. “Pūaro masa ihcāno saha tiquina yahugū ohō saha tiquina yahuye poto tjire”, ni yahu ojoari jiri. ¹⁸ Yuhure yahuriquiro mehna usā pūana tjiaja. Yuhū ijiye tiyere yahuaja yuhū. Sa yero yuhū Pacū

gūhū yahure yuhū pehere. Tiquiro tjire yuhure ohoriquiro, nidi Jesu.

¹⁹—¿Nohopū ijiagari mūhū pacū? ni sinituri tiquina.

—Yuhure mūsa masiedare. Yuhū Pacū gūhure masiedare mūsa. Yuhure masina, yuhū Pacū gūhure masiboaga mūsa, ni yūhtiri Jesu tiquinare.

²⁰ Jesu tiquinare buhero sa ni yahuducuri Cohācjū wuhūpū tiquina niñeru sāne acari cahapū. Tiquiro ñano yuhduati pje ijieranidi. Sa ye tiquina mehna tiquiro ijipegūta tiquina tiquirore ñehedari.

—Yuhū wahatopūre mūsa pehe waha masisi, niahye Jesu

²¹ Pari turi Jesu tiquinare yahuri tjia:

—Yuhū ahtaripū wahautja. Yuhū wahari bato mūsa yuhure macanata. Sa yena mūsa ñañe buhiri tiye mehna yarianata. Yuhū wahatopūre mūsa pehe waha masisi, ni yahuri Jesu.

²²—“Yuhū wahatopūre mūsa pehe waha masisi”, tiquiro nigū tuhoye, “¿Ahriquiro tiquiro basi wejē yariarotari, sa nino?” nidi usā acaye judio masa tiquina basi.

²³ Tiquina basi sa nigū Jesu yahuri tiquinare:

—Mūsa pehe ahri yehpa cjāna ijire. Yuhū pehe ūhmūse cjū ijiaja. Ahri yehpapū bajarina ijire mūsa pehe. Ūhmūsepū ahtarigū ijiaja yuhū pehe. ²⁴ Mūsa yuhū ijiye tiyere yuhū nidire “Poto ijierare”, nina, mūsa ñañe buhiri tiye mehna yarianata mūsa. Sa yegu “Mūsa ñañe buhiri tiye mehna yarianata mūsa”, nimi mūsa, nidi Jesu tiquinare.

²⁵—¿Noa boro ijiajari mūhū? ni sinituri tiquina.

—Coā waropūre yuhū niducuriro sahata ijiaja yuhū. ²⁶ Mūsa yuhū yahuati pajiro dūhsarīne. Sa yero mūsa ñano yeri buhirire mūsa yuhū yahuati pajiro dūhsarīne. Sa yegu yuhure ohoriquiro

tiquiro yahurire ahri yehpa cĵenare yahuaja. Tiquiro yahuri poto tjire, nidi Jesu tiquinare.

²⁷ “Yuhure ohoriquiro”, tiquiro nigũ tuhoye, “Mari Pacu ijiaga”, ni tuhoturari tiquina. ²⁸ Tiquina sa ni tuhoturagũ ihñano Jesu yahuri tiquinare.

—Yuhure masure Cohãcĵũ ohorigure masa yucu teõ mehna wahcõ dononata. Musa sa yena, “Tiquiro Cohãcĵũ ohoriquiro tjire”, ni masinata masa yuhure. Sa yena yuhũ esa tuharo yuhũ yerarigũ ijigũ masinata masa. Sa yena yuhũ Pacu yuhure tiquiro buheri dihitare yahurigũ yuhũ ijigũ gũhure masinata masa. ²⁹ Sa yero yuhure ohoriquiro pehe yuhũ mehna ijire. Tiquiro cahmeñene ijipihtye decori yeducuaja. Sa yero yuhure tiquiro ne cohãedare, nidi Jesu.

³⁰ Tiquiro sa nigũ tuhoye, tiquirore masa peyequina wacũ tutuari.

Cohãcĵũ pohnene, ñaņe yeyequina gũhure yahuahye Jesu

³¹ Sa ye apequina judio masa Jesure wacũ tutuari. Sa yero Jesu tiquinare yahuri:

—Yuhũ dutiyere ye pehona, potota yuhũ buhena ijire masa. ³² Sa yena poto masinata masa. Poto ijiyere masina, ñaņe yeyere duhu masinata. Sa yena cahacĵena yero saha iji nemosi masa, nidi Jesu tiquinare.

³³ Tiquiro sa nigũ tuhoye ohõ saha ni yuhtiri tiquina:

—Usã pehe panopũ cĵũno Abrahã munano panamena iji turiana ijiaga. Sa yena ne apequina tiquina cahacĵena ijieraja usã. ¿Sa yegũ “Cahacĵena yero saha iji nemosi”, nigũ, duhse ijiro boro usãre sa nijari mũhũ? ni sinituri tiquina Jesure.

³⁴ Tiquina sa nigũ tuhoro ohõ saha nidi tiquiro:

—Ijirota niaga musare. Ijipihtyequina ñaņene yeyequina pehe tiquina ñaņene

ye duhu masiedare. Sa yero ñaņe pehe tiquina puhtoro yero saha ijire. Sa ijieyeyequina ijie cahacĵena yero saha ijire tiquina. ³⁵ Cahacĵũno pehe tiquiro puhtoro ya curua cĵũno ijipihtye decori ijiducuerare. Ti wuhũ cĵũno macũno pehe ijipihtye decori potota ti curua cĵũno ijire tiquiro. (Yuhũ pehe Cohãcĵũ macu ijiaga. Sa yegũ dutigũ ijiaga. Musa ñaņe yeyere duhu dutiitja.) ³⁶ Sa yena yuhũ Cohãcĵũ macu ñaņene yuhũ duhugũ yenohrina ijina potota ñaņene duhrina ijire masa. ³⁷ Abrahã munano panamena iji turiana masa ijigũ masiaga. Sa ijiepenata yuhũ yahuyere pehere tuho duerare masa. Sa yena yuhure wejẽ duare masa. ³⁸ Yuhũ Pacu yuhure tiquiro masigũ yerire yahuaja musare. Yuhũ sa yahuepegũta masa pacu watĩno musare tiquiro dutiyere yere masa gũhũ, nidi Jesu tiquinare.

³⁹ —Abrahã munano panopũ cĵũno usã ñecũ munano ijie tiahye. Sa yero watĩno usã pacu ijierare, ni yuhtiri tiquina.

Tiquina sa nigũ Jesu yuhtiri:

—Abrahã panamena iji turiana ijina, tiquiro yeriro sahata yeboaga masa. ⁴⁰ Cohãcĵũ yuhure poto tiquiro yahuyere musare yuhũ yahuepegũta yuhure wejẽ duare masa. Abrahã munano pehe ne sa yera tiahye. ⁴¹ Musa pacu tiquiro yeriro sahata yere masa, nidi Jesu tiquinare.

Tiquiro sa nigũ tiquina yuhtiri:

—Omoca duhtemehneñequina pohna ijieraja usã. Ihcãquirota ijire usã Pacu. Tiquirota ijire Cohãcĵũ, nidi tiquina.

⁴² Tiquina sa nigũ Jesu yuhtiri:

—Cohãcĵũ mehna cĵũ ijigũ, ohõpũre ahtaũ. Sa yena Cohãcĵũ masa Pacu tiquiro ijigũ yuhure cahĩboya masa. Yuhũ esa tuharo ahtaerũ yuhũ pũrita. Cohãcĵũ tiquiro ohogũ ahtaũ ohõpũre. ⁴³ ¿Dũhsena yuhũ yahuducuyere tuhoerajari masa? Yuhũ yahuyere tuho duerare masa. Sa yena tuhoerare

musa. ⁴⁴Musa pacu pehe watino ijire. Sa yena watino cahmeñe pehere ye duare musa. Ahri yehpa coã waropu to iji ducagupu, yojopu gũhure tiqiro masare wejediqiro ijire. Tiquirore poto yahuducuye mariedare. Sa yero tiqiro ne poto yahuducuerare. Tiquiro coã waropu ni meho muhta ducariqiro ije tiahye. Sa yero tiqiro sa ni mehoducuriqiro ijiro, ni mehoñene yahure. ⁴⁵Yuhu pehe musare poto yahuaja. Sa yuhu yahuepegũta yuhure tuhoerare musa. ⁴⁶“Muhu ñano yegu ijire”, yuhure ni masiedare musa. ¿Poto musare yuhu yahuepegũta duhsena tuhoerajari musa? ⁴⁷Cohãcjũ pohne pehe tiqiro yahuducuyere tuhore. Tiquiro pohne ijierana, tiqiro yahuducuyere tuho duerare musa, nidi Jesu tiquinare.

Abrahã tiqiro ijiato pano Cristo pehe iji tuhasae tiahye

⁴⁸Tiqiro sa nigũ tuhoye judio masa tiqirore ohõ saha nidi:

—“Muhu Samaria cjũ ijire. Sa yegu watinore cuore muhu”, usã nidi poto tjire, nidi tiquina Jesure.

⁴⁹Tiquina sa nigũ tuhoro ohõ saha ni yuhtiri Jesu:

—Watino cueraja yuhu. Yuhu Pacure ño peoaja. Musa pehe yuhure ño peoerare. ⁵⁰Yuhure masa tiquina ño peogũ cahmedaja yuhu. Yuhu Pacu pehe yuhure ño peogũ cahmene masare. Tiquiro purita yuhu ijiye tiyere quehnoano ihña masino, sata ño peo dutire. Sa yero yuhure tiquina cahmedari buhiri, buhiri dahreatiqiro ijirota tiqiro. ⁵¹Ijirota niaja musare. Yuhu dutiyere yeriqiro ijipihtiye decori Cohãcjũ mehna sa ijiducurota, nidi Jesu.

⁵²Tiqiro sa nigũ tuhoye ohõ saha nidi tiquina:

—Yojopu puritare watino cuogu muhu ijigũ usã quehnoano masiaja. Abrahã munano yariaa wahahye. Cohãcjũ yere yahu muhtariquina gũhu yaria pihtia wahahye. ¿Sa yegu “Yuhu dutiyere yeriqiro ijipihtiye decori Cohãcjũ mehna sa ijiducurota”, nigũ duhse nigũ sa niajari muhu? ⁵³¿Usã ñecu munano Abrahã yuhduoro tutuajari muhu? Tiquiro, Cohãcjũ yere yahu muhtariquina gũhu yariaa wahahye. ¿Muhu pehe noa boro ijiajari muhu, sa ni yahuducugu? Muhu sa nibogu ijierare, nidi tiquina.

⁵⁴Tiquina sa nigũ tuhoro Jesu yahu nemori:

—Yuhu basi “Tutuagu ijiaja yuhu”, yuhu nigũ, tutuagu ijieraboaga yuhu. Yuhu Pacu pehe “Tiquiro tutuariqiro ijire”, nine yuhure. “Usã Pacu”, musa nidiquiro pehe yuhu Pacu tjire. ⁵⁵Musa pehe yuhu Pacure ne masiedare. Yuhu pehe tiqirore masiaja. “Tiquirore masiedaja”, nigũ musa yero saha ni mehoñe peyagu ijiaboaga yuhu. Potota tiqirore masiaja. Sa yegu tiqiro dutiyere yeaja. ⁵⁶Ahri yehpapu yuhu ahtatore mari ñecu Abrahã munano masie tiahye. Sa masino tiqiro bucuee tiahye, nidi Jesu.

Tiqiro sa nigũ tiquina yuhtiri:

⁵⁷—Cincuenta cuhmari cuoeraga muhu. Abrahã munano panopu cjũno ijiri. ¿Yojopure tiqiro munanore muhu duhse masiboagari? nidi judio masa Jesure.

⁵⁸—Ijirota niaja musare. Abrahã tiqiro ijiato pano yuhu pehe iji muhta tuhasae tii, nidi Jesu tiquinare.

⁵⁹Tiqiro sa nigũ tuhoye tiquina pehe utã pacare ne, tiqirore doque duamedi. Tiquina sa doque duepegũta Jesu pehe Cohãcjũ wuhupu ijiriquiro duhti wijiaa wahari.

Caperi bajueriquiروه ihñagũ yeahye Jesu

9 Sa yena Jesu usã tiquiro buhena mehna mahapũ wahana, apequiروه caperi bajueriquiروه boca sau. Tiquiro wahma masa bajuaroputa caperi bajueriquiروه ijie tiahye. ²Usã gãhu tiquiروه ihñana, sinituu Jesure:

—¿Buhegũ, ahriquiروه dũhsero caperi bajueriquiروه masa bajuayari? ¿Ñañene yeyari tiquiro sa waharo? ¿O tiquiro pacusũmua pehe ñañene yeyari tiquiro sa wahagũ? ni sinituu usã pehe Jesure.

³Usã sa nigũ tuhoro ohõ saha ni yũturi tiquiro:

—Ahriquiروه ñañene yeri buhiri caperi bajueriquiروه wahaerari. Tiquiro pacusũmua gãhu ñañene tiquina yeri buhiri caperi bajueriquiروه wahaerari. Cohãcjũ tiquiروه caperi bajueragũ yeri tiquiروه ihñagũ yero taro, masare tiquiro ihñoatire. ⁴Yũhũre ohoriquiروه tiquiro cũrire yojopũre yero cahmene marine. Ñamipũ mari dahra masieno sahata camepũ yũhũre ohoriquiروه tiquiro cũrire ye masiedaja mari. ⁵Ahri yehpapũ buhioro marine to ihña masigũ yero saha ijigũ ahri yehpa cjẽnare Cohãcjũ yere masigũ yeaja yũhũ, nidi Jesu.

⁶Sa ni tuhasarota yehpapũ sihco puti cũri. Tiquiro sa sihco puti cũrire dihta mehna dahra more, caperi bajueriquiروه tiquiro caperire wisõri. ⁷Sa wisõno ohõ saha nidi Jesu:

—Siloé wame tiri copepũ cuhsari copepũ mũhũ caperire cosegũ wahaya, nidi Jesu.

Siloé usã ye mehna niñe “Ohori cope”, niñe nidi.

Jesu tiquiro caperire cose dutiriquiروه pehe waha, cose, caperi ihñariquiروه tojoa wihiri. ⁸Tiquiro tojoa wihigũ tiquiro cahapũ ijieyquina tiquiروه ihñari. To pano niñeru sinimediquiروه

tiquiro ijigũ ihñariquina tiquiروه ohõ saha nidi tiquina basi:

—¿Ahriquiروه sohõ ijiriquiروه niñeru sinidiquiروه ijierajari? nidi tiquina.

⁹—Tiquirota ijire, nidi apequina pehe.

—Tiquiro ijierare. Tiquiro saha bajuriquiروه ijire, nidi apequina pehe.

Tiquina sa nigũ tuhoro caperi bajueramediquiروه pehe ohõ saha nidi:

—Tiquiro tjiaja yũhũ, nidi tiquinare.

¹⁰Tiquiro sa nigũ masa tiquiروه sinituri.

—¿Caperi bajuegũ ijirigũ dũhse waha ihñari mũhũ? ni sinituri tiquina tiquiروه.

¹¹—Jesu wame tiriquiروه sihco co mehna dihta mehna dahra more, yũhũ caperire wisõri. Yũhũre wisõ tuhasa “Siloé wame tiri copepũ mũhũ caperire cosegũ wahaya”, tiquiro nigũ cosegũ esau yũhũ. Yũhũ sa coseri bato yũhũ caperi quehnoano bajuri yũhũre, ni, yahuri tiquiro masare.

¹²—¿Mũhũre sa yeriquiروه nohopũ ijiagari tiquiro? nidi tiquina.

—Õbah. Noho ijiro ijiaga, nidi tiquiro.

Caperi bajueramediquiروه fariseo masa sinituahye

¹³Sa ni yahuducu tuhasa tiquina caperi bajueramediquiروه fariseo masa cahapũ neari. ¹⁴Ti deco Jesu dihtare sihco co mehna dahra more caperi bajueriquiروه tiquiro ihñagũ yeri deco saurũ deco ijiri. Ti deco usã sori deco ijiri. ¹⁵Sa ye fariseo masa pehe tiquiروه sinituahye tja.

—¿Dũhse ye mũhũ ihñari? ni sinituahye tiquina.

—Dihta mehna yũhũ caperire wisõri. Sa yegu yũhũ caperire yũhũ coseri bato ihña dũcau yũhũ, ni yahuahye tiquiro tiquinare.

¹⁶—Tiquiro saurũ decore mari sori decore mari dahra dutieri decore dahraya. Sa yero tiquiro Cohãcjũ

yaquiro ijierare, niahye apequina fariseo masa pehe.

Apequina pehe ohō saha niahye:

—Ñañene yeriquiro ohō saha yuhdæo masiedare. Sa yero tiquiro quehnoariquiro ijiboaga, niahye apequina.

Sa ye tiquina pua curua tu wahye tiquina basi.¹⁷ Sa ye pari turi tiquina caperi bajueramediquirore sinituahye tja.

—¿Muhare caperire quehnoano yeriquirore muhu waro duhse ni tuhutuajari Jesure? niahye tiquina tiquirore.

—Tiquiro potota Cohācjū yere yahu muhtariquiro ijire, niahye caperi bajueramediquiro.

¹⁸Coā waropure judio masa ohō saha ni tuhutumahye. “Ahriquiro caperi bajueramediquiro ijierare”, ni tuhutumahye tiquina. Sa ni tuhutuye caperi bajueramediquiro pacusumare pijioahye tiquina.¹⁹ Pijio, tiquiro pacusumare sinituahye fariseo masa puhto.

—¿Ahriquiro potota musa macu ijijari? ¿Duita tiquiro caperi bajueriquiro masa bajuari? ¿Potota caperi bajueriquiro ijieperota duhsero ihñajari yojopure? ni sinituahye tiquina tiquiro pacusumare.

²⁰—Ahriquiro usā macuta ijire. Sa yero duita caperi bajueriquiro masa bajue tiri tiquiro.²¹ Tire masiepenata tiquiro ihñarire, tiquirore ihñagū yeriquiro gūhure masiedaja usā. Usā macure sinituya. Bucuro ijire tiquiro. Tiquiro basi yahu masine, niahye tiquiro pacusumua.

²²Judio masa usā puhto coā waropure ohō saha nie tiahye.

—“Jesuta Cristo Cohācjū ohoriquiro ijire”, niñequinare mari buheye wuhusepu sajā dutisi usā, nie tiahye judio masa puhto.

Tiquina sa nigū tuhoye caperi bajueramediquiro pacusumua judio masa puhtoare cue niahye.²³ Sa cueye, “Bucuro ijire tiquiro. Tiquirore sinituya”, niahye tiquina judio masa puhtoare.

²⁴Came judio masa puhto pari turi pijioahye caperi bajueramediquirore tja. Pijio ohō saha niahye tiquirore:

—Cohācjū mehna poto yahuya muhu. Jesure ni mehoriquiro tiquiro ñañe yeriquiro ijigū usā masiaja. Sa yegu poto yahuya usāre, niahye judio masa caperi bajueramediquirore.

²⁵Tiquina sa nigū tuhoro ohō saha ni yuhitiahye tiquiro:

—Jesure tiquiro ñañe yeriquiro ijigū masiedaja yuhu. Ihcānota masiaja yuhu. Panopure caperi bajuegu ijie tii yuhu. Yojopure ihñaja yuhu. Ti dihitare masiaja yuhu, ni yuhitiahye caperi bajueramediquiro tiquinare.

²⁶—¿Duhse yeri muhare tiquiro? ¿Muhu caperi ihñatire duhse yeri tiquiro muhare? ni sinituahye tiquina.

²⁷—Tireta musare yahu tuhasami yuhu. Yuhu sa niepegūta musa ne tuho duerare yuhare. ¿Duhse ye duana pari turi yuhu yahugū tuho duajari musa? ¿Musa gūhu tiquiro buhena iji duajari? niahye tiquiro tiquinare.

²⁸Tiquiro sa nigū tuhoye tiquina tuhitiahye tiquirore:

—Muhu Jesu buherigu ijire. Usā pehe Moise buhena ijiaja.²⁹ Potota Cohācjū Moisere yahuducue tiahye. Jesu tiquiro ahtarirore usā masiedaja, niahye tiquina caperi bajueramediquirore.

³⁰Tiquina sa nigū yuhitiahye tiquiro:

—¿Tiquiro ahtarirore musa masiedagū yuhure ihñagū yeriquiro ijiro, Cohācjū ohoriquiro ijieraboagari tiquiro? ³¹Cohācjū ñañe yeyequinare tiquina siniñene tuhoerare. Ti pūritare mari masiaja. Tiquinare tuhoeraperota Cohācjūre ño peoriquirore, tiquiro dutiyere yeriquirore tiquiro siniñene

tuhore Cohācjū. ³²Coā waropure ahri yehpa iji ducagūpūre ne coā masa bajaropū caperi bajueriquirore ne ihcāquiro ihñagū yeriquiro marieda tiahye. ³³Sa yero Jesu Cohācjū ohoriquiro ijieraro yūhure ihñagū yeraboaya tiquiro, niahye tiquiro tiquinare.

³⁴—Mūhū duita ñagū ijie tiahye. ¿Sa ijiepeguta usāre buhe duajari mūhū? ni-ahye judio masa pūhtoa tiquirore.

Sa ni tuhasayeta tiquina tiquirore cohā wio cāhye.

Jesu yere cahmeeñequina caperi bajueyequina tiquina ihña masieno saha mari Pacure masiedare

³⁵Sa yero caperi bajueramediquirore tiquina cohā wiorire Jesu tuhori. Sa tuhoro caperi bajueramediquirore boca saro tiquirore sinituri:

—¿Masunore Cohācjū ohoriquirore wacū tutuajari mūhū? nidi Jesu.

³⁶—¿Pūhto, noa ijiajari tiquiro? Tiquirore masigū wacū tutuagutja tiquirore, nidi caperi bajueramediquiroresure.

³⁷—Tiquirore ihña tuhasari mūhū. Yojoopure mūhū mehna yahuducugū tiquirota ijiaja yūhū, nidi Jesu caperi bajueramediquirore.

³⁸—Pūhto, mūhure wacū tutuaja, nidi caperi bajueramediquiro.

Sa nino tiquiro Jesu caha dūsepe curi mehna quehe sa, tiquirore ño peori.

³⁹Tiquiro sa ño peogū ihñano ohō saha nidi Jesu:

—Quehnoañequina, ñañequina gūhū tiquina yerire masigū yei ahtaū ahri yehpapure. Caperi bajueyequina tiquina ihña masieno saha tiquina yero saha ijieyequina yūhū Pacure masiedare. Sa masieñequinare yūhū Pacure masigū yei ahtaū yūhū. “Usā quehnoano masiaja”, ni tuhotediquina quehnoano tiquina

masiedarire masigū yei ahtaū yūhū, nidi Jesu.

⁴⁰Tiquiro sa nigū tuhoye meheñequinagā fariseo masa tiquirore ohō saha nidi:

—¿“Caperi bajueyequina tiquina ihña masieno saha quehnoano masiedare masa gūhū”, nii niajari mūhū usāre? nidi fariseo masa Jesure.

⁴¹Tiquina sa nigū ohō saha nidi Jesu:

—Caperi bajueyequina tiquina ihña masieno saha potō masa quehnoano masiedagū, musare buhiri mariedaboaya. “Usā quehnoano masina ijiaja”, masa nidi buhiri, buhiri tina ijinine masa yojoopure, nidi Jesu tiquinare.

Ovejare coheriquiro quitire yahuahye Jesu

10 Came queoye mehna buhero ohō saha nidi Jesu:

—Ijirota niaja musare. Ovejare coheri sahrīno sopecaha sajāedariquiro, sopecaha marienopū sajāriquiro pehe yaque bucuro ijire. ²Sopecaha sajāriquiro pehe ovejare coheriquiro ijire. ³Sopecahare coheriquiro sopecahare pōore ovejare coheriquiro sajātore. Ovejare coheriquiro yahuducugū tūho cāhtare tiquiro nuñequina oveja pari. Tiquinare pijioro tiquina wame mehna pisuducure tiquiro. Sa yero tiquinare sahrīnopū ijiriquinare piji wiodocore sopecahapū.

⁴Tiquiro yequinare ijipihtiequinare piji wio tiquinare sa ūhmū tāducure. Oveja pehe tiquiro yahuducuyere tūho masiñe tiquiro bato nūnū tāre. ⁵Apequirore tiquina ihña masieniquire nūnū tāedare tiquina. Sa ye apequina tiquina yahuducuyere tuhoye, cue oma sitea wahare, nidi Jesu tiquinare.

⁶Ahri queoyere tiquiro sa yahuepegūta tiquiro yahuyere masiedari tiqina.

**Jesu ovejare quehnoano
cohteriquiro yero saha tiquiro
yequinare quehnoano cohtere**

⁷Pari turi Jesu tiquinare yahuri tja:

—Ijirota niaja musare. Ovejare cohteri sahrīno sopecaha yero saha iji-aja yūhū. ⁸Ijipihtiyequina yūhū pano ahtayequina ni mehoñene buheyequina yaqueyequina yero saha ijire. Tiquina sa ijiepegūta oveja yero saha ijie-quina yeequina pehe apequinare ne tuho cāedare. ⁹Yūhū ovejare cohteri sahrīno sopecaha yero saha iji-aja. Sopecaha sañānequina yero saha ijire yūhūre wacū tutuayequina. Sa yegū tiquinare pecapū wahaboriquinare yūhūoutja. Ovejare cahmotari sahrīno tiquinare cahmo-tariro sahata yūhū yūhūoyequinare cahmotautja. Sa ye tiqina cahmeñene cūeta tiqina, nidi Jesu.

¹⁰Sa ni tuhasa ohō saha ni nemori:

—Musare ni meho buheyequina ovejare yaqueyequina yero saha ijire. Ape-quina yaque duaye, apequina wejē du-aye ahtare. Oveja yero saha ijie-quinare, yeequina ijipihtiye decori Cohācjū mehna ijiatiquinare yegū ahtaū yūhū. Sa yegū yeequina decoripe tiqina bucueatire ahtaū yūhū. ¹¹Ovejare quehnoano cohteriquiro yero saha iji-aja yūhū. Ovejare quehnoano cohteriquiro yariatiquiro ijieperota tiquiro yequina ovejare cohtere, “Sijoro wahari”, nino. Yeequina Cohācjū mehna tiqina sa ijiducuatire yegū yariūtja yūhū. ¹²Oveja upūro cahacjūno pehe oveja upūro ijierare. Sa yeye oveja tiquiro yequina ijierare. Sa yero yairo ovejare tiquiro ihyaro ahtagū ihñano tiquiro cahacjūno pehe ovejare cohā doco cā, oma cāa wahare. Tiquiro sa cohā docori bato, yairo ovejare tiquiro

ñehegū ihñāñe oveja pari oma site cāa wahare. ¹³Tiquiro cahacjūno pehe tiquiro wapataye dihitare cahmene. Sa yero tiquiro ovejare quehnoano cohte coerare, nidi Jesu.

¹⁴Sa ni tuhasa ohō saha ni nemori:

—Ovejare quehnoano cohteriquiro yero saha iji-aja yūhū. Sa yegū yeequinare masiaja yūhū. Sa yeye yeequina pehe yūhūre masine. ¹⁵Sata yūhū Pacū gūhū yūhūre masine. Sa yegū yūhū gūhū yūhū Pacure masiaja. Oveja yero saha ijieyequina yeequina Cohācjū mehna tiqina sa ijiducuatire yariūtja yūhū. ¹⁶Apequina oveja ape sahrīno cñena yero saha ijieyequina apequina masa gūhū yeequina ijietā. Tiquina gūhūre neagutja. Sa ye yūhū yahuducugū tuho cāeta tiqina gūhū. Sa ye yeequina ijipihtiyequina ihcā curuata ijietā. Sa yegū yūhū dihita yeequinare cohteitja, nidi Jesu.

¹⁷Sa ni tuhasa ohō saha ni nemori:

—Yeequina Cohācjū mehna tiqina sa ijiducuatire yariūtja yūhū. Yūhū yari-ari bato masa mūjagutja. Sa yeacjū yūhū ijigū yūhū Pacū yūhūre cahñe. ¹⁸Yūhū wejē dutieragū yūhūre wejē masiedaboaya tiqina. Yūhū cahmeno sahata yūhūre wejēeta. Sa yegū yee-quina Cohācjū mehna tiqina sa ijiducuatire yariūtja. Yaria masiaja yūhū. Sa yegū masa mūja masiaja. Yūhū Pacū yūhūre tireta ye dutiri, nidi Jesu.

¹⁹Tiquiro sa nigū tuhoye judio masa pūa curua tu wari. Apequina sijoro tuhota, apequina gūhū sijoro tuhota.

²⁰—Tiquiro watīno cūore. Sa yero tuho masiedare. ¿Dūhsena tiquirore pari turi tuhoajari mūsa? nidi apequina peye-quina judio masa.

²¹Apequina pehe ohō saha nidi:

—Watīno cūoriquiro ijiro sa ni yahuducueraboaya. Caperi bajueriquirore ihñagū ye masiedare watīnore cūoriquiro. Sa yero watīnore

cnoerare Jesu, nidi apequina judio masa.

Judio masa Jesure cahmedahye

²² Ape deco usã acaye judio masa Jerusalêpũ bose deco yeye nidi pari turi. Cohãcjũ wuhure panopũ Cohãcjũre tiquina ohorire tiquina wacũati deco ijiri. Ti pjere pohecũ ijiri. ²³ Ti decore Salomo wame tiri tucũpũ Cohãcjũ wuhũpũ ijiri tucũpũ Jesu ihña tinino nidi. ²⁴ Ti tucũpũ tiqiro ijigũ ihñañe usã acaye judio masa tiqiro cahapũ cahmecoa, tiqirore sinituri.

—Yoabutiari pje usãre quehnoano yahueraga mũhũ. Poto usãre quehnoano yahu madoqueohya mũhũ. ¿Cohãcjũ ohorigũ Cristota ijijari mũhũ? nidi tiquina Jesure.

²⁵ Tiquina sa nigũ tuhoro ohõ saha ni yũhtiri Jesu:

—Mũsare yahu tuhasamajagũ. Yũhũ sa yahuepegũta yũhure tuho duerare mũsa. Yũhũ Pacũ yũhure tiqiro dutiriro sahata tiqiro tutuaye mehna ye ihñoaja. Sa yegũ yũhũ Cristo ijiyereta mũsare ihñoũgũ niája. ²⁶ Yũhũ sa ihñoepegũta yũhure tuho duerare mũsa. Mũsa pehe yeequina ijierare. Sa yena apequiro yequina oveja yero saha ijina, yũhũ pehere tuhoerare mũsa. ²⁷ Ovejare cohteriqirore tiqiro yequina tiquina tuhoro saha yũhure yeequina tuhore. Sa yegũ tiquinare masiája yũhũ. Sa ye tiquina yũhũ mehna wahare. ²⁸ Sa yegũ ijipihitiye decori Cohãcjũ mehna ijigũ yeaja tiquinare. Sa ye tiquina pecapũ wahasi. Sa yegũ yeequinare yũhũ cohtegũ apequina pehe ne yũhure ehma masiedare yeequinare. ²⁹ Yũhũ Pacũ yũhure yeequinare ohoriquiro ijipihitiyequina yũhũoro tutuariquiro ijire. Sa ye yũhũ Pacũ pehe yeequinare tiqiro cohtegũ apequina pehe tiqiro gũhũre ne ehma masiedare tiquinare. ³⁰ Yũhũ,

yũhũ Pacũ mehna ihcũta ijijaja, nidi Jesu judio masare.

³¹ Tiqiro sa nigũ tuhoye judio masa pehe tiqirore tiquina doque wejẽati utã pacare pari turi nemedi tja. ³² Tiquina sa yegũ ihñano Jesu sinituri tiquinare:

—Yũhũ Pacũ tutuaye mehna peye tahari ye ihñomi mũsare. ¿Dise boro pehere yũhũ yeri buhiri yũhure utã paca mehna doque wejẽ duajari mũsa? ni sinituri Jesu.

³³ Tiqiro sa nigũ tuhoye ohõ saha nidi tiquina:

—Cohãcjũ tutuaye mehna mũhũ ye ihñori buhiri mũhure utã mehna doque wejẽ dueraja usã. Cohãcjũre mũhũ ñano yahuducuri buhiri mũhure utã paca mehna doque wejẽ duaja usã. Masũ ijiepegũta “Cohãcjũ ijijaja yũhũ”, mũhũ niñe buhiri mehna mũhure utã paca mehna doque wejẽ duaja usã, ni yũhtiri tiquina.

³⁴ Tiquina sa ni yũhtigũ tuhoro Jesu tiquinare yahuri:

—Mũsa gũhure “Cohãmana”, ni pisuri Cohãcjũ. Sata ni ojoahye tiqiro dutiyere tiquina ojoari pũpũ. ³⁵ Cohãcjũ yere tiquina ojoari pũ potota ijigũ mari masiája. “Ni mehoñe ijire”, ti pũre ni masiedaja mari. Sa yero tiqiro yere tuhoyequinare potota tiqiro “Cohãmana”, ni pisure. ³⁶ Cohãcjũ yũhure besetjiãno, ahri yehpapũre ohori. Sa yegũ yũhũ “Cohãcjũ macũ ijijaja”, yũhũ nidi buhiri “Cohãcjũre ñano yahuducuro nine Jesu”, nine mũsa yũhure. ¿Dũhsena yũhure sa niajari mũsa? ³⁷ Yũhũ Pacũ tiqiro cahmediro sahata tiqiro tutuaye mehna yũhũ ye ihñoedagũ pũritare yũhũ buherire “Poto tjire” niedaboaga mũsa. ³⁸ Yũhũ Pacũ tiqiro tutuaye mehna yũhũ ye ihñoepegũta yũhũ pehere tuho duerare mũsa. Sa tuho duerapenata tiqiro tutuaye mehna yũhũ ye ihñoegũ ihñana yũhũ yerire “Poto tjire”, niña mũsa. Mũsa sa nina, yũhũ Pacũ mehna

usã ihcãno saha ijigũ masinata mûsa. Sa yena tũhonata mûsa, nidi Jesu tiquinare.

³⁹Tiquiro sa nigũ tiquina pari turi tiqiore ñehe duamedi. Tiquina sa ñehe duagũ ihãano tiquiro duhti wijiaa wahari.

⁴⁰Sa wijiariquiroputa Ñu masare tiquiro wame ye muhtariorpũ Jordã asũ mũja taro pehepũ pari turi Jesu wahari tja. Topũ esaro tojoa cãri tiquiro. ⁴¹Sa ye masa peyequina tiqiore ihãaãe esari. Ohõ saha nidi tiquina basi:

—Ñu pehe Cohãcjũ tutuaye mehna ye ihõedari. Sa ye ihõedapegũta ijip-ihtiye Jesure tiquiro yahuri pehe queorota ijire, nidi masa tiquina basi.

⁴²Sa ye topũre masa peyequina wacũ tutua dũcari Jesure.

Lázaro wame tiriqiro yariaa wahahye

11 Sa ye Betania wame tiri maca cjũno Lázaro wame tiriqiro dohatiro niahye. Ti macapũ tiquiro wahmiosãnumia gũhũ María, Marta mehna ijiri. ²María pehe Jesure ehme sitiye pio wisõaticoro, ticoro poari mehna tiqiore tu coseaticoro ijire. Ticoro bahuro Lázaro pehe dohatiro niahye. ³Sa ye tiquina numia apequinare Jesure yahu dutiye ohoahye.

—Pũhto, mũhũ cahĩniqiro dohatiro nine, ni yahu dutiye ohoahye Lázaro wahmiosãnumia.

⁴Ti quitire tũhoro ohõ saha nidi Jesu:

—Yojopũre Lázaro tiquiro dohatiye tiquiro yariati ijierare. Cohãcjũ tutuayere masare ihõoatire yojopũre tiquiro dohatire. Sa ye yũhũ tutuagu yũhũ ijigũ gũhũre masa ihãaeta, nidi Jesu.

⁵Jesu Martare, ticoro bahoro gũhũre, Lázaro gũhũre tutuaro cahĩdi. ⁶Sa nino Lázaro tiquiro dohatigũ tũhoeperota topũ Jesu pũa deco tojoari. ⁷Pũa deco

bato Jesu ohõ saha nidi usãre tiquiro buhenare:

—Pari turi Judea yehpapũ tojoa wahauhna tja, nidi usãre.

⁸—Buhegu, canuagãta judio masa mũhũre utã paca mehna doque wejẽ duamedi. ¿Dũhsegu pari turi tojoaa waha duajari mũhũ? nii usã pehe.

⁹Usã sa nigũ tũhoro tiqiore tiquina wejẽ masiedarĩne yahuro, queoye mehna buhero ohõ saha nidi usãre:

—Pajiro tũhotueracãhã. Ihcã decore doce horari waro ijire. Asũ deco cjũno ijigũ quehnoano ihãaja mari. Sa yena decore tinina, ne pũha boraeraja mari. ¹⁰Nahitianopũ tiniñequina pũha boraa wahare. Asũ deco cjũno mariedagũ quehnoano ihñedare tiquina, nidi Jesu. (Sa nino ohõ saha nino niahye: “Yojopũre yũhũ Pacũ yere yũhũ yahu pehoato dũhsarĩne. Sa ye yũhũre wejẽ masiedarĩne”, nino niahye.)

¹¹Sa nino usãre yahu nemori tja:

—Mari mehna cjũno Lázaro, carĩno niaga. Tiquiro sa carĩpegũta yũhũ tiqiore wahcõgu wahautja, nidi usãre.

¹²—Pũhto, Lázaro carĩniqiro ijiro, yũhdũrota, nii usã.

¹³Usã sa niepegũta Jesu “Carĩno niaga”, nino “Yariaa wahare”, nino nidi jimedi. Tiquiro sa nigũ tũhona “Lázaro soro niaga”, ni tũhotumi usã pehe. ¹⁴Usã sa ni tũhotugũ masino Jesu pota yahuri usãre:

—Lázaro yariaa wahaga. ¹⁵Yũhũ marieno tiquiro yariagũ quehnoarĩne. Sa yena mûsa yũhũre wacũ tutua nemonata. Isa mari ihãana wahauhna tiquiro cahapũ, nidi Jesu.

¹⁶Tomasu sũhdũariqiro tiquina ni pisuriqiro ohõ saha nidi usãre:

—Mari gũhũ Jesu mehna wahauhna. Tiquirore wejẽñe, mari gũhũre wejẽahdo, nidi Tomasu.

**Jesu sa ijiducugū yeriquiro
masare masoriqiro ijire**

¹⁷ Sa ye topure usā esari bato to cjēna ohō saha ni yahuri Jesure:

—Pititia deco wahare Lázaro mūnanore masa copepū tiquina cūri bato, ni yahuri tiqirore.

¹⁸ Betania pehe Jerusalē cahapū ihtia kilómetro yoaro ijiri. ¹⁹ Sa ye usā acaye judio masa peyequina Martare, Maríá gūhure ñehe quea utiye ahtahye Lázaro yariari bato. ²⁰ Sa yero Jesu mehna usā esana tana yegū tuhoro Marta pehe usāre piti caro ahtari jiri. Ticoro sa piti caro wahagū Maríá pehe tiquina ya wūhupū tojoahye. ²¹ Sa piti caro Marta ohō saha nidi Jesure:

—Puhto, yūhū bahū tiqiro yariato pano mūhū ohōpū ijigū tiqiro yari-eraboaya. ²² Yojobū gūhure Cohācjūre mūhū sini basagū tiqiro mūhū sinino sahata yerota, nidi Marta Jesure.

²³ —Mūhū bahū masa wijiatarota, nidi Jesu ticorore.

²⁴ —Ahri yehpa pihtiatu deco tiqiro masa wijiatarota masiaja yūhū, nidi ticoro.

²⁵ Ticoro sa nigū Jesu yahuri tja:

—Yūhū masa wijiagū yegū tjiaja. Yūhū sa ijiducugū yegū tjiaja. Yūhūre wacū tutuariquiro yarieperota sa ijiducurota. ²⁶ Sa ye ijipihitiyequina Cohācjū mehna ijiducuyequina yūhūre wacū tutuayequina ne pecapū wahasi. ¿Ahrire masiajari mūhū? nidi Jesu ticorore.

²⁷ —Puhto, masiaja yūhū. Cristo Cohācjū macū, “Ahri yehpapū ahtarota”, tiquina nidigū mūhū ijigū masiaja yūhū, nidi Marta Jesure.

**Lázaro masa cope cahapū
esaro Jesu utiahye**

²⁸ Marta sa ni tuhasa ticoro bahoro Maríare pijiro wahari.

—Marine buheriquiro mari ya macapūre wihiri. Mūhūre pijire, derogā ni yahuahye Maríare.

²⁹ Ticoro sa nigū tuhoro Maríá sojaro mehna wahcādūca, usā cahapū ahtahye Jesure ihñano taro. ³⁰ Tiquina ya macapū esera nii usā. Marta ticoro piti cariropū ijiniī usā. ³¹ Judio masa ti wūhupū Maríare ñehe quea utiye niahye. Sa ye ticoro wahagū ihñañe, tiquina ticorore nūnū tā cāhye. “Ticoro bahūro mūnanore tiquina cūri copepū utiro waharo nine ticoro”, ni tuhutumahye tiquina. Sa ni tuhutuyē ticorore nūnū tā cāhye.

³² Sa yero Maríá usā cahapū wihiro, Jesure ihñā, tiqiro dahpocāri cahapū dūsepe curi mehna quehe sari.

—Puhto, yūhū bahū tiqiro yariato pano mūhū ohōpū ijigū tiqiro yari-eraboaya, nidi ticoro Jesure.

³³ Sa yero judio masa ticoro mehna ahtariquina gūhū tiquina utigū ihñano Jesu pehe tutuaro būjua witi ñano jeripohna tiri.

³⁴ —¿Lázaro mūnanore nohopū cohāri masa? ni sinituri Jesu.

—Ihñāu taya, ni piji cāri tiquina.

³⁵ Tiquina sa nigū tuhoro Jesu utiri.

³⁶ —Lázaro mūnanore Jesu tutuaro cahimeyari, nidi judio masa tiquina basi.

³⁷ Apequina pehe ohō saha nidi:

—Caperi bajueriquirore ihñagū yeriquiro ijire ahriquiro Jesu. ¿Sa yero Lázaro tiqiro yariato pano tiqirore yūhdueraboayari? nidi tiquina.

Lázaro masa wijiahye

³⁸ Sa yero Jesu pari turi tutuaro būjua witiri. Sa yena usā ijipihtina Lázaro masa copepū esau. Utāpū tiquina seheri cope ijiri. Sa yero tiqiro pagure tiquina siō sāa cūri cope ijiri. Sa yero ti cope pajiria utā mehna tiquina bihari cope ijiri.

³⁹ —Utā bihariare neña, nidi Jesu.

Tiquiro sa nigū tuhoro Marta yariariquiro mūnano wahmiono ohō saha nidi:

—Puhto, yojopu pititia deco waha tuhasare tiquiro yariari bato. Sa yero tiquiro pagu ijiriro urī yuhduaga, nidi Jesure.

⁴⁰—“Yuhure wacū tutuago Cohācjū tutuayere ihñagota”, mūhure nimigu, nidi Jesu Martare.

⁴¹Tiquiro sa nidi bato tiquina utā bihariare ne wiori. Tiquina sa nedi bato Jesu pehe ūhmusepu ihña mūo, Cohācjūre ohō saha nidi:

—Mai, yuhure mūhu tuho tuhasari. Tire mūhu yegū masigu bucueaja mūhure. ⁴²Yuhure mūhu decoripe tuhoducure. Tire masiaja. Sa masiepeguta yuhū mūhu ohorigu yuhū ijigū ohōre ducuyequina tiquina masiatire mūhure sa niaja. Tire “Potota ijire”, tiquina nino quehnoano sa nigū niaja, nidi Jesu tiquiro Pacūrore.

⁴³Sa ni tuhasa Jesu tutuaro sañuducuri:

—Lázaro ahtaya, ni sañuducuri tiquiro.

⁴⁴Tiquiro sa nigū yariariquiro mūnano omocarine tiquiro dahpocāri gūhure suhti cahseri mehna tiquina dūhtemediquiro, tiquiro dapure suhtiro mehna tiquina wahmemediquiro, masa copepu wijia tari.

—Tiquina dūhterire pāña tiquirore, nidi Jesu.

Judio masa puhtoa pehe Jesure ñehe duamahye

(Mt 26.1-5; Mr 14.1-2; Lc 22.1-2)

⁴⁵Tiquiro sa masogū ihñañe peyequina judio masa mehna cjēna María mehna ahtariquina Jesure wacū tutua, cahmedi. ⁴⁶Apequina tiquina mehna cjēna pehe fariseo masa cahapu esaye, Jesu yerire yahuahye tiquinare. ⁴⁷⁻⁴⁸Sa ye pahia puhtoa, fariseo masa puhtoa

gūhu cahmecoa, tiquina basi ohō saha ni yahuducuahye:

—Jesu peye tahari Cohācjū tutuaye mehna ye ihñore. Tiquiro sa ye ihñogū “Tire yeracāhña”, mari niedagū ijip-ihtiyequina masa tiquirore cahmeñe, tiquiro mehna wahaboaga. Sa ye Roma cjēna puhtoa Cohācjū wūhure cohā dutiye ohoeta tiquina yequina surarare. Mari ya dihta gūhure ehmaeta tiquina. (Mari ya dihta cjēna Jesure tiquina puhtoro cūgū ihñañe Roma cjēna puhtoa “Marine cohāñe nine”, ni usua ñano yeeta marine.) ¿Sa yena dūhse yenatari yojopure? ni yahuducuahye tiquina basi.

⁴⁹Tiquina sa niepegūta apequiro Caifa wame tiriquiro ti cūhmare pahia puhtoro ijiro, tiquinare yahuahye:

—Musa pehe ne masiedare. ⁵⁰Judio masa ijipihtina mari ye ijiatire ihcāquiro masūno tiquiro yariagū quehnoare. Tiquiro yarieragū marine ijipiltina judio masare cohā peho cāboaga. Tire mūsa masiedare, niahye Caifa tiquinare.

⁵¹Sa nino tiquiro esa tuharo sa nino niedahye. Pahia puhtoro tiquiro ijigū judio masa ye ijiatire Jesu yariatire mari Pacu pehe Caifare sa ni yahu duti-ahye. ⁵²Jesu yariaro judio masa dihitare yuhduoro taro niedare. Sa yariaro ijip-ihtiyequina Cohācjū pohnene ahri yehpapu iji siteyequina gūhure ihcā curuata ijigū yeatire yariatiquiro ijiri Jesu. ⁵³Sa ye ti decota tiquina “¿Jesure dūhse ye wejēnatari mari?” ni yahuducuye, tiquirore wejēne tee niahye.

⁵⁴Tiquina sa wejē duagū masino Jesu peyequina judio masa watoa pari turi tinino wahaerari. Sa yero masa marieno cahagā Efraī wame tiri macapu ūsāre siho wahari. Ūsāre ti maca siho tojoarīdi Jesu.

⁵⁵Ti pjere pascua bose decori ūsā judio masa ūsā bose decori ijiato mehenogā dūhsatjiāri. Sa ye bose deco panogā masa peyequina apeye macari

cyjēna Jerusalēpu cahmecoari. Pascua cjęne tiquina ihyato pano Cohācjū yere yeye tehe, tiquina cahmomohnore cohoro saha tiquina ñañene cosee tee nidi. ⁵⁶Sa ye tiquina Jesure macañe niahye. Sa ye Cohācjū wuhupu ijiyequina ohō saha ni yahuducuahye:

—¿Bose decore ihñano ahtaeraboari Jesu, msa tuhogū? niahye tiquina basi.

⁵⁷Sa ye pahia puhto, fariseo masa gūhu ohō saha ni yahu dutiahye masare:

—Jesu wihigū ihñana, yahuya usāre. Tiquirore ñehena tana niaja, niahye puhto masare.

María Jesu dahpocārine ehme sitiye mehna pio peohye

(Mt 26.6-13; Mr 14.3-9)

12 Jesu, usā tiquiro buhena mehna Betaniapu usā esari bato pascua deco esato seis decori waro dūhsarīdi. Lázaro Jesu masoriquiro ti maca cjęno ijiri. ²Usā esari bato Jesu gūhu usā ihyatire dahreri apequina. Sa ye Lázaro, Jesu, usā mehna mesa cahapu nuju san. Usā sa nuju sari bato Marta ihyayere peori usāre. ³Sa yero María ehme sitiye uhsere nardo wame tiye cohorī uhsere kilo deco mehna ne cāhta Jesu dahpocārine pio peori. Ti uhsere wapa ti yuhduari. Pio peo tuhasa ticoro poari mehna wuori. Ticoro sa pio peori bato ti wuhū quehnoano ehme siti sehsaa wahari. ⁴Usā mehna cjęno, Jesure ihña tuhtiequinare ihñoatiquiro Juda Iscariote pehe ohō saha nidi:

⁵—¿Duhse yero ahricoro sa ye siteajari? Tire ticoro duaboaya. Tire duaro tres cientos niñeru cjoerire wapataboaya. Sa yero ticoro ti niñerure pejecuoyequinare ohoboaya, nidi tiquiro.

⁶Juda pehe pejecuoyequinare yedoho duerari. Tiquiro usā niñerure ihbo basariquiro ijieperota yaqueriquiro

ijiri. Sa yero tiquiro usā niñerure ihquē tahari ne mujari. Sa yero “Ti niñerure neitja”, nino, sa nidi Maríare tiquiro.

⁷Tiquiro sa nigū tuhoro ohō saha nidi Jesu:

—Sa niedacāhña tiorore. Ticoro ehme sitiye yuhure ticoro duharire yuhure pio peori, yuhure tiquina yato pano yuhū pagure quehnoyuro. Pejecuoyequina pehe msa mehna sa ijiduceta. Sa yena tiquinare oho masine msa. ⁸Yuhū pehe ahri yehpapure msa mehna sa ijiducusi, nidi Jesu.

Pahia puhto Lázaro wejē duahye

⁹Sa ye Jesu Betaniapu tiquiro ijigū tuhoye, usā acaye judio masa peyequina tiquirore ihñañe ahtari. Tiquiro dihitare ihñañe ahtaye niedari. Lázaro yariamediquirore Jesu masoriquirore tiquiro gūhure ihñañe ahtaye nidi. ¹⁰Tiquina ihñañe esarire masiñe, pahia puhto Lázaro gūhure wejē duari. ¹¹Lázaro yariamediquiro Jesu masoriquiro ijigū ihñañe peyequina masa Jesure wacū tuuari. Tiquiro sa masogū ihñañe peyequina judio masa tiquina pahia ye buhye pehere duhu cāri. Tiquina sa duhugū ihñañe pahia puhto pehe usua yuhduye Lázaro wejē duari.

Jerusalēpu esahye Jesu

(Mt 21.1-11; Mr 11.1-11; Lc 19.28-40)

¹²Pascua bose decore tiquina yegū peyequina masa Jerusalēpu ihñañe wahari jiri. Ape deco Jerusalēpu Jesu ahtatire masa tuhori. ¹³Sa ye iqui pohnarine ne cā, tiquirore piti caye wahari. Sa piti caye ohō saha ni sañuducuri tiquina:

—Ahriquirōre ño peuhna. Ahriquirō Cohācjū ohoriquiro quehnoano ijiahro. Ahriquirō judio masa mari puhtoro tjire, ni sañuducuri tiquina.

¹⁴Jesu burrogā tiquiro bocariquirogā bui pesari. “Ohō sahata yerota”, ni

ojoahye Cohăcjŭ yere tiquina ojoari pŭpŭ:

¹⁵Jerusalē wame tiri maca cjăna, cueracăhna masa. Ihnaña. Musa puh-toro burrogă bui pesa căhtare, ni yahuahye Cohăcjŭ yere tiquina ojoari pŭpŭ.

¹⁶“Tiquina sa ni ojoari Jesure nino niga”, ni, usă tiquiro buhena quehnoano masiedarŭi. Sa masiedapenata ŭhmŭsepŭ Jesu mŭjari bato usă ti ojoarire wacŭ boca tuho masii. Ohŭ saha ni tuhotuu: “Cohăcjŭ yere tiquina ojoari pŭ pehe Jesure yahuro nimeya. Sa ye Cohăcjŭ yere tiquina ojoari pŭ nidiro sahata yeri masa Jesure”, ni tuhotu, masii usă.

¹⁷Lăzarore masa copepŭ ijiriquirore Jesu pisu masogŭ ihnariquina pehe yahuri masare. ¹⁸Sa ye Lăzarore Jesu masorire tuhori bato masa peyequina Jesure ihnañe ahtari. ¹⁹Tiquina sa ahtagŭ ihnañe fariseo masa tiquina basi ohŭ saha niahye:

—Ijipihitiyequina Jesu yequina dihita wahaye nine yojojŭre. Sa yena mari dŭhse ye masiedaga tiquinare, niahye fariseo masa tiquina basi.

Mehenequinagă griego masa Jesure maca căhtahye

²⁰Sa ye bose deco Cohăcjăre ño peoye ahtayequina mehna cjăna meheñequinagă griego masa ijiri. ²¹Sa ye tiquina Felipe cahapŭ wihiahye. Felipe pehe Betsaida wame tiri maca Galilea yehpapŭ ijiri maca cjŭno ijiri. Sa ye tiquiro cahapŭ wihiriquina ohŭ saha niahye tiquirore:

—Jesure ihna duaga usă, niahye tiquina.

²²Tiquina sa nigŭ tuhoru Felipe Andrepŭre tire yahuro wahahye. Sa ye tiquina pŭaro Jesure yahuri. ²³Tiquina sa ni yahuri bato Jesu tiquinare yahuri:

—Yuhŭ masŭ Cohăcjŭ ohorigŭ ijiaja. Yuhure ijipihitiyequina tiquina ño peoati

pje yojojŭre ijirota nine. Yojojŭre yuhŭ yariati pje ijirota nine. ²⁴Potota musare yahugŭ niaja. Oteri pjere yehpapŭ mari yaeragŭ, ti pjere mari oteragŭ ihcă pjeta tojoarota. Sa yero ti pjere mari yari bato pihni, dŭca tirota. (Sata yuhŭ yariari bato yuhure tiquina yari bato peyequina masare Cohăcjŭ mehna sa ijiducuatiquina ijigŭ yeitja yuhŭ.) ²⁵Ahri yehpapŭ masa ijiyere pajiro tuhotuboaga masa. Sa tuhotuna Cohăcjŭre wacŭedana, pecapŭ wahanata masa. Ahri yehpapŭ masa ijiyere sa tuhotu căna, Cohăcjŭ mehna sa ijiducunata. ²⁶Yeere ye duana yuhŭ buheyere quehnoano tuhoya masa. Musa sa yena masa gŭhŭ yuhŭ ijiropŭ ijinata. Yeere yeriquirere yuhŭ Pacŭ pehe ño peorota, nidi Jesu.

Jesu tiquiro yariatore yahuahye

²⁷Sa ni tuhasa ohŭ saha ni nemori:

—Yojojŭre yuhŭ ñano jeripohna tiaja. ¿Yuhŭ Pacŭre dŭhse nigutari yuhŭ? ¿“Mai, yuhŭ ñano yuhduatire yeracăhna yuhure”, niboagari yuhŭ? Tire niedaja yuhŭ. Ñano yuhduacjŭta ahri yehpapŭ ahtau. Sa yero yuhŭ ñano yuhduati pje yojojŭre ijirota nine, ni yahuri usăre tiquiro buhenare.

²⁸Sa yero ohŭ saha nidi tiquiro Pacŭrore:

—Mai, mŭhŭ tutuagŭ ijiyere yojojŭre ihnaña masare, nidi Jesu tiquiro Pacŭrore.

Tiquiro sa nigŭ ŭhmŭsepŭ yahuducuro ca tari:

—Tutuagŭ yuhŭ ijiyere masare ihna tuhasau. Yojojŭre sa yegŭ pari turi ihñoutja masare, nino ca tari.

²⁹Tiquiro sa nigŭ tuhoye topŭ ducuyequina masa peyequina ohŭ saha nidi:

—Ŭpo ijiaga sa bisiro, nidi masa.

—Angel Jesure yahuro nidi, nidi apequina masa.

³⁰Ohŭ saha nidi Jesu pehe:

—Ūhmusepũ sa bisiro yũhũre tũho dutiro niedari. Mũsa pehere tũho dutiro sa bisiro ca tari. ³¹Yojopũre ahri yehpa cjẽna tiquina ñaũe yeri buhirire buhiri dahrerota tiquinare. Ahri yehpa cjẽna puhtoro watĩnore cohãnota Cohãcjũ. ³²Sa yegũ yũhũre curusapũ tiquina wahcõ docogũ peyequina masare yeequina ijiatiquinare yeitja yũhũ, nidi Jesu.

³³Sa nino curusapũ tiquiro yariatire yahuro nidi Jesu masare. ³⁴Tiquiro sa nigũ tuhoye masa pehe tiquirore ohõ saha nidi:

—Cohãcjũ yere tiquina ojoari pũpũ ohõ saha nine: “Cristo ijipihtiye decori ijirota”, ni ojoahye. ¿Tiquiro sa ni ojoagũ mũhũre masũre Cohãcjũ ohorigure dũhse yeye curusapũ wahcõ docoetari masa mũhũre? ¿Masũno Cohãcjũ ohoriquiro noa ijiajari tiquiro? ni sinituri tiquina.

³⁵Tiquina sa nigũ ohõ saha ni yũhtiri Jesu:

—Buhrioro mehna mari ihña masigũ yero saha masare Cohãcjũ yere quehnoano masigũ yeaja yũhũ. Came cjũnogã mũsa mehna ijisi yũhũ. Mũsare yũhũ buhegũ yojopũre tuhoya mũsa “Ñaũe yeari”, nina, Cohãcjũ mehna mũsa sa ijiducuatire. Yũhũ buheyere tuhoyequina nahitiano tiniñequina yero saha tiquina wahatore masiedare. ³⁶Sa yegũ buhrioro yero saha ijigũ ijijaja yũhũ. Sa yegũ mũsare buhegũ Cohãcjũ yere quehnoano masigũ yeaja mũsare. Yojopũre yũhũ wahato pano yũhũre wacũ tutuaya. Sa wacũ tutuana yeequina ijinata mũsa, nidi Jesu.

Sa ni yahu tuhasa duhti cãa wahari.

Judio masa Jesure cahmedahye

³⁷Peye tahari Cohãcjũ tutuaye mehna tiquinare Jesu tiquiro ye ihñoepegũta peyequina judio masa tiquirore ne tũho

duerari. ³⁸Cohãcjũ yere tiquina ojoari pũpũ Isaia mũnano tiquiro ojoariro sahata yeye nidi tiquina. Ohõ saha ni ojoahye Isaia mũnano:

Cohãcjũ, mũhũ buheyere usã yahugũ masa ne tũho duerare. Mũhũ tutuayere tiquinare mũhũ ye ihñoepegũta, tire “Poto ijierare”, nidi tiquina, ni ojoahye Isaia mũnano.

³⁹Tiquina sa tũho dueragũ ihñano Cohãcjũ tiquinare masiedagũ yeri. Ti gũhũre Isaia mũnano ohõ saha ni ojoahye:

⁴⁰Caperi bajueyequina yero saha ijigũ yee tiahye Cohãcjũ tiquinare. Sa yero tiquiro yere masiedagũ yee tiahye tiquinare. Sa ye tiquiro tutuayere ihñaepeta tiquina ihñarire masiedare. Sa ye tiquiro buheyere tuhoyepeta tire masiedare tiquina. Cohãcjũ ye buheyere masiñe tiquina ñaũe yerire cohã dutiboaya. Sa yero tiquinare yũhũoboaya tiquiro, ni ojoahye Isaia mũnano Cohãcjũ yere tiquina ojoari pũpũ.

⁴¹Sa ni ojoaro Isaia Cristo tutuayere masino tiquiro nidiro sahata Cristore yahu ojoahye.

⁴²Apequina Jesure tiquina cahmedapegũta judio masa usã puhtoa mehna cjẽna peyequina Jesure wacũ tutua, cahmedi. Sa cahmepeta tiquina fariseo masare cueye apequinare “Jesu yequina wahau usã”, ni yahu duerari. Tire tiquina yahugũ tuhoye Jesure tiquina cahmedi buhiri judio masa usã buheri wũhũpũ tiquinare sajã dutieraboaga fariseo masa pehe. ⁴³Cohãcjũre bucuegũ ye duepeta ti yũhũoro fariseo masa pehere bucuegũ ye duari Jesure cahme dũcayequina. Sa ye tiquina “Jesu yequina wahau”, ni apequinare yahu duerari.

**Jesu yahuyere tiquina tũho
duerari buhiri masa buhiri tieta**

⁴⁴Sa ye Jesu tutuaro sañuducu, yahuri:

—Yũhũre wacũ tutuariquiro yũhu dihitare wacũ tutuerare. Yũhũre ohoriquiro gũhũre wacũ tutuare tiquiro.

⁴⁵Sa ye yũhũre masiñequina yũhũre ohoriquiro gũhũre masine. ⁴⁶Buhriero mehna mari ihña masigũ yero saha ahri yehpapũ Cohãcjũ yere masigũ yei ahtau nii yũhu. Sa yegu Cohãcjũ yere masare masigũ yeaja. Ihcãquiro nahitiano wahariquiro yero saha ñañene yeducure. Yũhũre wacũ tutuariquiro tiquiro yero saha yesi. Yũhũre wacũ tutuariquiro potota tũhorota.

⁴⁷Apequina yũhu yahuyere tũhoepeta yũhu nidiro saha yerare. Tiquina sa yerapegũta tiquina yerari buhirire buhiri dahresi yũhu pehe tiquinare. Ahri yehpapũre buhiri dahregũ ahtagũ niedu yũhu. Ahri yehpa cjẽnare pecapũ wahaboriquinare yũhduoacjũ ahtagũ nii yũhu. ⁴⁸Yũhũre cahmeeñequina, yũhu yahuye gũhũre cahmeeñequina buhiri dahrenohatiquina ijieta. Tiquina yũhu yahuyere tiquina tũhoerari buhiri ahri yehpa pihtiri deco ijigũpũ buhiri tieta. ⁴⁹Yũhu esa tuharo yeraja. Yũhu Pacũ yũhũre ohoriquiro pehe yũhũre yahu dutiri. Sa yero yũhu yahuye pehe tiquiro ye yahuducuyere ijire. ⁵⁰Tiquiro ye yahuducuyere tũhona Cohãcjũ mehna sa ijiducunata mũsa. Sa yegu yũhu Pacũ tiquiro yahu dutiro sahata yahuaja mũsare, nidi Jesu.

**Jesu buheyequina dahpocãrine
coseahye tiquiro**

13 Sa ye pascua deco bose deco panogã ahri yehpare tiquiro cohã cãtore tiquiro Pacũro cahapũ tiquiro wahatore masidi Jesu. Sa yero ahri yehpa cjẽnare tiquiro yequinare tiquiro tutuaro

cahĩdi tiquina mehna tiquiro ijero puno. Sa cahĩducure tiquiro yequinare.

²Ti ñamine Jesu usã tiquiro buhena mehna usã ihyagũ Juda Iscariotere Simo macãnore Jesure ihña tuhtiyequinare ihño duti tuhasari jiri watĩno pehe. ³Sa yero mari Pacũ Cohãcjũ Jesure ijipihtiyequina bui tiquiro pũh-toro sũrire masidi Jesu. Sa yero Cohãcjũ cahapũ tiquiro ahtarire came uhmũsepũ tiquiro mujati gũhũre masidi. ⁴Sa masino wahcãduca, tiquiro suhtiro bui cjãnore tu we ne, tore cũ tuhasa, suhtiro cahsero mehna tiquiro pari yũju dũhteri. ⁵Dũhte tuhasa, waparopũ acore pio sãa, usã tiquiro buhena dahpocãrine cose dũcari. Usãre cose tuhasa tiquiro dũhteri cahsero mehna wũori usã dahpocãrine.

⁶Apequina buheyequinare cose cã, Simo Pedropũre esari. Tiquiro dahpocãrine tiquiro coseato pano Pedro pehe tiquirore ohõ saha nidi:

—¿Pũhto, yũhu dahpocãrine cosegũ tũu niajari mũhu? nidi Pedro Jesure.

⁷—Mianogã mũhũre yũhu yeatire masiedare mũhu. Sa masiedapegũta camepũ masiita mũhu, nidi Jesu tiquirore.

⁸—Yũhu dahpocãrine ne cosesi mũhu, nidi Pedro.

—Mũhũre yũhu coseragũ yaquiro ijisi mũhu, nidi Jesu.

⁹—Pũhto, yũhu dahpocãri dihitare coseracãhña. Yũhu dahpocãrine, yũhu omocarine, yũhu dapu gũhũre coseya, nidi Pedro.

¹⁰Tiquiro sa nigũ Jesu queoye mehna buhero ohõ saha nidi:

—Ihcãquiro masũno cuhsaro tiquiro pagure quehnoano tu cose pehore. Sa yero pari turi tiquirore tu cosero cahmedare. Tiquiro dahpocãri dihitare tu cosero cahmene. Ijipihtina mũsa ñañe yerire coserina mũsa ijiepegũta ihcãquiro mũsa mehna cjũno tiquiro

ñañene cosemehnediquiro ijire, nidi Jesu.

¹¹ Jesu tiqiurore ihña tuhtiyequinare ihñoatiquirore masidi: Sa masino “Ihcãquiro mûsa mehna cjãno tiqiuro ñañene cosemehnediquiro ijire”, nidi.

¹² Ûsã dahpocãrine cose tuhasa, tiqiuro suhtirore saña tuhasa, nuju sari tiqiuro dujiriroputa.

—¿Mianogã musare yũhu yerire masiajari mûsa? ¹³ Mûsa yũhure “Buhegũ”, ni pisuna, “Pũhto”, ni pisuna poto ninata nine mûsa yũhure. Mûsare buhegũ, mûsa pũhto potota ijiaja yũhu.

¹⁴ Sa yena yũhu musare buhegũ, mûsa pũhto ijiepegũta mûsa dahpocãrine yũhu cosegũ ihñana mûsa gũhu mûsa mehna cjẽna dahpocãrine coseya.

¹⁵ Mianogã mûsa yeatire musare ihñou. Mûsa mehna cjẽnare mûsa yedohoatire ihñou. Mûsare yũhu yeriro sahata mûsa gũhu yeya. ¹⁶ Ijirota niaja musare. Mûsa yũhu cahacjẽna yero saha ijina yũhu bui ijierare. Mûsare buhe duti yũhu ohorina ijire mûsa. Sa yena yũhu bui ijierare mûsa. Sa yegu “Yũhu yeriro sahata yeya”, nii musare. ¹⁷ Ahrire masina, yũhu dutiyere yena, bucuena ijinata mûsa.

¹⁸ Mûsare ijipihtinare sa niedaja. Yũhu beseriquinare masiaja yũhu. Cohãcjũ tiqiuro yere tiquina ojoari pũpu tiqiuro ni ojoariro sahata waharota. “Yũhu mehna ihyariquirola yũhure wejẽ duari”, ni ojoahye Cohãcjũ yere tiquina ojoari pũpu. ¹⁹ Tiqiuro sa yeato pano ahrire yahuyugu niaja musare. Yũhure tiqiuro sa yeri bato, “Jesuta Cristo Cohãcjũ ohoriquirota ijire”, mûsa niatire ahrire musare yahuyugu niaja yũhu. ²⁰ Ijirota musare niaja. Yũhu ohoriquinare cahmediquiro yũhu gũhure cahmene tiqiuro. Sa yero yũhure cahmediquiro yũhure ohoriquiro gũhure cahmene tiqiuro, nidi Jesu usãre tiqiuro buhenare.

Juda Jesure ihña tuhtiyequinare tiqiuro ihñoatore yahuahye Jesu

(Mt 26.20-25; Mr 14.17-21; Lc 22.21-23)

²¹ Sa ni yahu tuhasa Jesu tutuaro bujua witiri. Sa bujua witiro yahuri tiqiuro usãre.

—Ijirota musare niaja. Ihcãquiro mûsa mehna cjãno yũhure ihña tuhtiyequinare yũhure ihñonota, nidi Jesu.

²² Tiqiuro sa nigũ tũhona Jesure ihñoatiquirore masiedana, usã basi cahme ihñau. ²³ Jesu buheyequina mehna cjũ yũhu, Jesu cahĩdigũ ijii. Sa yegu tiqiuro cahapu pari paha dujii. ²⁴ Sa yero Simo Pedro yũhure tiqiuro omoca mehna sinituri:

—¿Jesure ihñoatiquiro noa pehere nino niajari Jesu? Yahuya usãre, nino, tiqiuro omoca mehna sinituri Pedro.

²⁵ Tiqiuro sa nigũ yũhu pehe Jesu cahapu dujirigu sinituu tiqiurore:

—¿Pũhto, noare nigũ niajari mũhu? nii yũhu.

²⁶ —Ahria pãre dahra waha ne, yũhu ña mio yũhu ohoatiquiro pehe tiquirola ijire yũhure ihñoatiquiro, nidi Jesu.

Sa ni tuhasa pãre tiqiuro dahra waha nedirore ña mio tuhasa tire Simo Iscariote macunore Judare ohori. ²⁷ Sa yero pãre tiqiuro ñehedi bato watino pehe Judare ñano ye dutiri jiri. Sa yero Jesu tiqiurore ohõ saha nidi:

—Mũhu yeatore sojaro mehna ye madoqueohya mũhu, nidi Jesu Judare.

²⁸ Tiqiuro sa nigũ tũhona usã mesapu dujina, Jesu Judare tiqiuro nidire quehnoano masiedu. ²⁹ Ihquẽquina ohõ saha ni tũhotumi: “Juda usã niñerure ihboriquiro ijire. Sa yero bose deco usã ihyatire dú dutiro ohori Jesu Judare. O pejesuoyequinare niñerure oho dutiro niboaga Jesu”, ni tũhotumi usã ihquẽquina. ³⁰ Sa yero Juda ti pãre ñehere

tuhasa, wijiara wahari. Tiquiro wijiari pje ñami ijiri.

Wahma dutiروه yahuahye Jesu

³¹ Tiquiro wijiari bato ohō saha nidi Jesu:

—Yojoḡu pūritare yūhu masu Cohācjū ohorigū yūhu tutuagū yūhu ijiye tiyere ihñonota Cohācjū masare. Sa yegū Cohācjū tiquiro tutuariquiro ijiyere ihñoutja yūhu pehe. ³² Sa yegū Cohācjū tiquiro tutuayere yūhu ihñogū tiquiro pehe yūhu tutuaye gūhure yojoḡu pūritare ihño madoqueorota. ³³ Yūhu pohna yūhure tuhoya. Meheñe decorigā mūsa mehna ijinigutja. Yūhu wahari bato yūhure macanata mūsa. Sa yegū mari acaye judio masare yūhu nidiro sahata mūsa gūhure niaja. “Yūhu wahatore mūsa pehe waha masiedare”, tiquinare yūhu nidiro sahata mūsa gūhure yahuaja. ³⁴ Wahma dutiروه mūsare yahugutja. Mūsa mehna cjēnare cahīña mūsa. Mūsare yūhu cahīdiro sahata, mūsa mehna cjēnare cahīña. ³⁵ Sa yena mūsa mehna cjēnare mūsa cahīgū ihñañe, yeequina mūsa ijiyere masieta apequna, nidi Jesu usāre.

“Jesure masiedaja”, Pedro tiquiro niatire yahuahye Jesu

(Mt 26.31-35; Mr 14.27-31; Lc 22.31-34)

³⁶ Tiquiro sa nigū Simo Pedro Jesure sinituri:

—¿Puhto, nohopu wahautjari mūhu? nidi Pedro.

—Yūhu wahatopure yojoḡure yūhu mehna waha masiedare mūhu. Yojoḡure waha masiedapeguta came yūhu cahapu wahauta mūhu, nidi Jesu Pedrose.

³⁷ —¿Puhto, dūhsegu yojoḡure mūhu mehna waha masiedaboari yūhu? Yūhure tiquina wejē duepegūta mūhure ne duhusi yūhu, nidi Pedro Jesure.

³⁸ —¿Yūhure ne duhueragutari mūhu? Poto mūhure yahutja. Canaca tiquiro

yahuato pano “Jesure masiedaja”, ni-ita mūhu apequnare. Ihtia taha sa niita mūhu, nidi Jesu Pedrose.

Jesu Cohācjū cahapu wahari maha yero saha ijire

14 Came Jesu usāre ohō saha ni yahuri:

—Ne bujua witi, pajiro wacūedacāhña. Cohācjūre wacū tutuaya. Sa yena yūhu gūhure wacū tutuaya. ² Yūhu Pacu tiquiro ijiropure peye wūhuse ijire. Mūsa ijiatore quehnoyugū wahagutja. Ti ijirota ijire. Sa yegū mūsare tire yahuaja. ³ Sa yegū mūsa ijiatore quehno tuhasa, tojoa tautja yūhu. Sa yegū yūhu cahapu mūsa ijiatire mūsare negu ahtautja yūhu. ⁴ Sa yena yūhu wahati mahare masine mūsa, nidi Jesu usāre tiquiro buhenare.

⁵ —Puhto, mūhu wahatore masiedaja usā. ¿Sa yena dūhse ye mūhu wahati mahare masinatari usā? ni sinituri Tomasu Jesure.

⁶ Tiquiro sa ni sinitugū Jesu yūhtiri:

—Cohācjū cahapu wahagū yegū iji-ita niaja yūhu. Sa yegū poto ijiyere yahugū ijiita niaja yūhu. Sa yegū ūh-mūsepure catiducugū yegū ijiita niaja yūhu. Sa ye yeequina dihita yūhu Pacu cahapu wahaeta. ⁷ Yūhure masina, yūhu Pacu gūhure masiboya mūsa. Yojoḡure tiquirore ihñari mūsa. Sa yena tiquirore masi tuhasare mūsa, nidi Jesu usāre.

⁸ Tiquiro sa nigū Felipe ohō saha nidi:

—Puhto, mari Pacure ihñoña usāre. To punota ihña duaja usā, nidi tiquiro.

⁹ Tiquiro sa nigū Jesu yahuri:

—¿Felipe, yoari pje yūhu mehna ijipeguta, mūhu masiedajari yūhure? Yūhure ihñariquiro yūhu Pacu gūhure ihña tuhasari. ¿Sa yegū “Mari Pacure ihñoña usāre”, nigū dūhsegu sa niajari mūhu yūhure? ¹⁰ Yūhu, yūhu Pacu mehna puana ijiepenata ihcūta iji-aja. ¿Tire “Poto ijierare”, niimeje ni-

ajari mûhu? Musare yahugu yuhu esa tuharo yahugu niedaja. Yuhu Pacure yahu basagu niaja. Sa yero tiquiuro yuhu mehna ijiriquiro tiquiuro tutuaye mehna ye ihñore. ¹¹Yuhu, yuhu Pacu mehna puana ijeppenata ihcûta ijiaja. Tire “Ijirota ijire”, ni wacûna musa. Tire “Ijirota ijire”, niedana, Cohâcjû tutuaye mehna yuhu ye ihñorire wacûna, yuhu Pacu mehna yuhu ihcûta ijiyere “Ijirota ijire”, ni wacûna musa. ¹²Ijirota musare niaja. Yuhure wacû tutuariquiro yuhu yeriro sahata yerota. Sa yero tiquiuro pehe yuhu yuhduoro yerota. Yuhu Pacu cahapu tojoa wahau tau niaja yojopure. Sa yero yuhure wacû tutuariquiro yuhu yuhduoro Cohâcjû tutuaye mehna ye ihñonota. ¹³Sa yegu yuhure wacû tutuayequina tiquina sinino punota yeitja. Sa yegu yuhu Pacu tiquiuro tutuariquiro ijiyere ihñoutja. ¹⁴Yuhure wacû tutuana musa ijigû musa sinino punota yeitja, nidi Jesu.

—Espíritu Santore musare ohoutja, ni yahuahye Jesu

¹⁵Sa ni tuhasa ohõ saha ni nemori:

—Yuhure musa cahîna, yuhu dutiyere quehnoano ye pehonata. ¹⁶Yuhu Pacure sinitja. Yuhu sa sinigû yuhu Pacu pehe apequiore musare yedohoatiquirore musare ohorota. Sa yero tiquiuro musare yedohoatiquiro pehe ijipihitiye decori musa mehna ijirota. ¹⁷Tiquiro poto yahuriquiro Espiritu Santota ijire. Ahri yehpa cjêna pehe Espiritu Santore masiedare. Sa ye tiquiore cûo masiedare. Tiquirota musa mehna ijirota. Sa yena musa pehe tiquiore cûonata. Sa yena tiquiore masine musa. ¹⁸Musare cohâsi yuhu. Musa mehna ijigû tagu, tojoa tautja yuhu. ¹⁹Sa ijepegûta mehenogâ duhsare yuhu wahato. Yuhu wahari bato ahri yehpa cjêna yuhure wacû tutuayequina yuhure pari turi ihñasi. Musa pehe yuhure

ihñanata. Yuhu catigu ijigû musa gûhu ijipihitiye decori Cohâcjû mehna catinata. ²⁰Ti deco yuhu tojoa tati deco yuhu Pacu mehna ihcûta usâ ijigû masinata musa. Sa yegu yuhu mehna cjâna musa ijigû musa mehna cjû yuhu ijigû gûhure masinata musa. ²¹Yuhu dutiyere yeriquiro yuhure cahîniquirota ijire. Sa yero yuhure cahîniquirore yuhu Pacu pehe cahînota. Sa yegu yuhu gûhu tiquiore cahîitja. Sa ye yuhure quehnoano masigû yeitja tiquiore, nidi Jesu usâre tiquiuro buhenare.

²²Usâ mehna cjâno apequiore Juda wame tiriquiuro ijiri. Juda Iscariote Jesure ihña tuhtiyequinare ihñoatiquiro ijierari tiquiuro. Apequiore Juda ijiri. Sa yero tiquiuro Jesure sinituri:

—¿Pûhto, duhsare yeitjari mûhu usâre sa nigû? ¿Ahri yehpa cjênare mûhure masigû yeragu, yabere yeitari mûhu usâ dihitare mûhure masigû yegu? ni sinituri Juda.

²³Tiquiro sa nigû tuhoro Jesu tiquiore yahuri:

—Yuhure cahînequina, yuhu dutiyere quehnoano yeye nine. Tiquina sa yegû yuhu Pacu pehe tiquinare cahînota. Sa yena tiquina mehna ijina ahtanatja usâ. ²⁴Yuhure cahîniquiro yuhu dutiyere yerare. Sa ye yuhu yahuye musa tuhori pehe yee yahuye ijierare. Yuhure ohoriquiro ye yahuye pehe ijire. Tiquiro yuhu Pacuta ijire.

²⁵Musa mehna ijinigu ahrire musare yahugu niaja. ²⁶Came yuhu sinigû yuhu Pacu Espiritu Santore ohorota musare. Sa yero Espiritu Santo pehe musare yedohoatiquiro ijiro, musare buhe pehorota tiquiuro. Sa yero musare yuhu yahurire musare wacûgû yerota tiquiuro.

²⁷Musare quehnoano ijigû yeitja yuhu. Yuhu quehnoano ijiri sahata quehnoano ijigû yeitja yuhu musare. Ahri yehpa cjêna tiquina ni mehoriro sahata yesi yuhu musare. Yuhu pûrita

potota quehnoano ijigū yeitja musare. Bujña witi pajiro wacūedacāhña musa. Sa yena cueracāhña musa. ²⁸“Yuhū wahautja. Sa yegu musa mehna ijigu tagu tojoa tautja”, musare yuhū sa ni yahugū tuho tuhasari musa. Tire tūhona, bucueboaya musa. Yuhūre musa poto cahña, bucueboaya musa. Yuhū Pacu pehe yuhū yuhūduoro tutuare. Sa yena tiquiro cahapū yuhū wahatore musa masidi bato yuhūre cahña, bucueboaya musa. ²⁹Musa yuhūre wacū tutuatire yuhū wahatore yahuyugu niaja musare.

³⁰Ahri yehpa cjēna puhtoro watino puhtoro ijiro taro nine yojopure. Tiquiro sa ijiro tagū yuhū musa mehna yuhū yahuducu bato tiati pje mehenogā dūhsare. Tiquiro pehe yuhūre yuhūduca masiedare. ³¹Sa yegu yuhūre yuhū Pacu tiquiro dutiriro sahata yeaja yuhū. Sata yeaja yuhū, yuhū Pacure yuhū cahñene ahri yehpa cjēna tiquina masiatire. Wahcādūcaya. Isa wahana, nidi Jesu usāre tiquiro buhenare.

Jesu uhse da yero saha ijiriquiro ijire

15 Came queoye mehna buhero usāre ohō saha nidi Jesu:

—Yuhū potota uhse da yero saha ijigu ijiaja. Yuhū Pacu pehe uhse dare ihña ihboriquiro yero saha ijire. ²Yeequina uhse da dūpuri yero saha ijiyequina yuhū mehna cjēnata ijire. Uhse da dūpuri dūca marieñe dūpurire ihña ihboriquiro tiquiro pehe cohāriro saha yuhū Pacu tiquiro cahmeñene yerariquinare cohāre. Dūca tiye dūpurire ihña ihboriquiro tiquiro quehnoriro saha yuhū Pacu tiquiro cahmeñene yeyequinare yedohorota tiquiro, “Yuhū cahmeñene ye nemoahdo”, nino. ³Yeere tūhona, “Ijirota ijire”, nidi musa. Sa yero yuhū Pacu musa ñañe yerire cohā tuhasari. ⁴Yuhū mehna cjāna ijiya musa. Sa yegu musa mehna iji-

itja. Uhse da dūpuri uhse da mehna wahñedaye dūpuri ijiye, ti dūpuri pehe dūca mariedare. Sata yuhū mehna cjāna ijierana, yuhū Pacu cahmeñene ye masiedare musa.

⁵Yuhū uhse da yero saha ijigu iji-aja. Musa pehe ti da dūpuri yero saha ijina ijire. Yuhū mehna cjūno mehna yuhū ijigū dūca tiye dūpuri yero saha tiquiro yuhū Pacu cahmeñene yere. Yuhū mehna cjāna ijierana yuhū Pacu cahmeñene ye masiedare musa. ⁶Ñañe dūpurire tiquiro cohāboriro saha yuhū mehna cjēna ijieyequinare yuhū Pacu cohānota. Ti dūpuri ñai dijiaa wahagū uhse dare ihña ihboriquiro ti dūpurire ne cahmecoa pecapū uñña cohānota. Sata yerota Cohācjū yuhū mehna cjēna ijieyequinare.

⁷Yuhū mehna cjāna ijina, yuhū buheyere boeraboaga musa. Sa boerana, musa cahmeno punota siniña. Sa yegu musa sinino punota ye basautja. ⁸Yuhū Pacu cahmeñene yena musa ijigū ihñañe “Jesu yequina ijire ahriquina”, ni masieta masa. Sa ye musare ihñañe yuhū Pacure ño peoeta. ⁹Yuhū Pacu yuhūre tiquiro cahīdiro sahata musare yuhū gūhū cahie tii. Yuhū cahña ijiducuya musa. ¹⁰Yuhū cahñequina ijiducuyequina yuhū dutiyere yere. Yuhū Pacu ye dutiyere yeaja yuhū. Sa yegu tiquiro cahñogu ijiducuaja yuhū. Sata musa gūhū yuhū dutiyere yena yuhū cahña ijiducunata musa.

¹¹Ahrire musare yahuu yuhū mehna musa quehnoano bucueatire. Sa yena tutuaro bucuenata musa. ¹²Ohō saha dutiaja musare: Musare yuhū cahīdiro sahata musa mehna cjēna gūhūre cahña. ¹³Ihcāquiro masuno tiquiro mehna cjūno ye buhiri yariaro tiquiro mehna cjūnore tutuaro cahñe, apequina tiquina cahīdiro yuhūduoro. ¹⁴Sa yena yuhū dutiyere yena yuhū mehna cjāna ijire musa. ¹⁵Potota yuhū

mehna cjāna waro ijire mūsa. Mūsa sa ijigū ijipihtiye yūhu yerire yahuaja mūsare. Cahacjāno tiquiro puhtoro yerire masiedare tiquiro. Sa yegū “Yūhu cahacjāna ihyo ijina ijire mūsa”, mūsare niedaja. Yūhu Pacu yūhure tiquiro yahurire mūsare yahu pehou. Sa yahugū “Yūhu mehna cjāna ijire mūsa”, mūsare niaja yojopure. ¹⁶Mūsa pehe yūhure ne beserari. Yūhu pehe mūsare besei yūhu Pacu cahmeñene mūsa yeatire. Mūsa sa yegū mūsa yeye ne ihyo waro ijisi. Ahri deco yoaro punota sa ijiducuat i ijire mūsa yeye. Mūsa sa yegū yūhure mūsa wacū tutuagū yūhu Pacure mūsa sinino punota tiquiro mūsare ohorota. ¹⁷Ahrire mūsare dutiaja yūhu: Mūsa mehna cjēnare cahīna mūsa, ni yahuri Jesu.

Jesure tiquiro yequina gūhure ahri yehpa cjēna ihña tuhtire

¹⁸Sa yero tiquiro yahu nemori:

—Ahri yehpa cjēna mūsare tiquina ihña tuhtigū ihñana ahrire wacūña mūsa: Mūsare tiquina ihña tuhtiatō pano yūhu pehere ihña tuhti muhtari tiquina. ¹⁹Cohācjūre cahmedana mūsa ijigū, ahri yehpa cjēna tiquina cahme cahīdiro sahata mūsa gūhure cahīboaya tiquina. Ahri yehpa cjāna mūsa ijigū mūsare besei. Sa yena yojopure ahri yehpa cjāna waro ijierare mūsa. Mūsa sa ijieragū ihñañe ahri yehpa cjēna mūsare ihña tuhtire. ²⁰“Yeequina ijina mūsa yūhu bui ijierare”, mūsare yūhu nidire wacūña mūsa. Sa yena yūhu docapu ijina yūhu ñano yūhdūriro sahata ñano yūhdūnata mūsa gūhu. Yūhure ñano yeriquinata mūsa gūhure ñano yeeta. Yūhu buhegū yūhtiriquinata mūsa buhegū gūhure yūhtietā tiquina. ²¹Ahri yehpa cjēna yūhure ohoriquirore masiedare. Sa ye yūhure wacū tutuana mūsa ijigū ihñañe tiquina ñano yeeta mūsare.

²²Tiquinare yūhu buhegū ahtaeragū yūhure tiquina cahmedari buhiri, buhiri mariedaboaya. Yojopure tiquinare yūhu buheri bato “Ñañe buhiri mariedare usāre”, ni masiedare tiquina. ²³Yūhure ihña tuhtiriquiro yūhu Pacu gūhure ihña tuhtire. ²⁴Cohācjū tiquiro tutuaye mehna apequina tiquina ne yerarire ye ihñou. Sa ye tiquinare tire yūhu ye ihñoedagū tiquinare ñañe buhiri mariedaboaya. Cohācjū tutuaye mehna yūhu ye ihñorire tiquina ihñari bato yūhure yūhu Pacu gūhure ihña tuhtire tiquina. ²⁵Sa ihña tuhtiyē Cohācjū yere tiquina ojoari pūpu duitaputa tiquiro ni ojoariro sahata yeye nidi tiquina. Ohō saha ni ojoahye: “Tiquinare yūhu ñano yerapegūta yūhure ihña tuhtire tiquina”, ni ojoahye duitaputa Cohācjū yere tiquina ojoari pūpu.

²⁶Yūhu batopu mūsare yedohoatiquiro, yūhu Pacu mehna ijiriquiro mūsare yūhu ohoatiquiro Espiritu Santota ijire. Tiquiro potota yahuriquiro ijire. Sa yero tiquiro ahtaro, yūhu ijiye tiyere yahurota mūsare. ²⁷Masare yūhu buhe ducagūputa mūsa gūhu decoripe yūhu mehna ijiducuri. Sa yena mūsa gūhu yūhu ijiye tiyere yahunata apequinare, ni yahuri Jesu.

16 Sa ni tuhasa usāre ohō saha ni yahu nemori:

—Came yūhu buheyere yūhu gūhure mūsa cohādatire ahrire ijipihtiyere yahuu mūsare. ²Judio masa mari buh-eye wuhusepu mūsa sajā duagū mūsare sajā dutisi yeequina mūsa ijiri buhiri. Sa ye ape tahapu mūsare wejē, “Cohācjū cahmeñene yena niaja”, ni tuhuetamaga apequina. ³Sa ye yūhu Pacure, yūhu gūhure tiquina masiedare. Sa masiedaye mūsare ñano yeeta tiquina. ⁴Sa yena mūsare ñano tiquina yegū ihñana “Tiquina ohō saha yeato panota Jesu yahu tuhasari usāre”, ni wacūnata mūsa. Mūsa sa ni wacūatire yojopure ahrire

yahu muhtagu niaja musare, ni yahuri Jesu.

**Espíritu Santo tiqiro
yeaire yahuahye Jesu**

Sa ni tuhasa ohō saha ni yahu nemori:

—Coã waropure musa mehna ijigu ahrire musare yahueru. ⁵Yojopu pehere yuhure ohoriqiro cahapu wahautja. “¿Nohopu wahautjari mahu?” yuhure ni, ihcãqiro borota ne sinituerari musa. ⁶Sa sinituerapenata yuhu wahatire musare yuhu yahu mujagũ musa ñano jeripohna tire. ⁷Musare ijirota yahuguta niaja. Yuhu wahari bato musare quehnoanota. Yuhu umusepu wahaeragũ musare yedohoatiqiro pehe ahtaeraboaya. Wahagu musare tiqirore oho dijioutja yuhu. ⁸Yuhu sa oho dijiogũ tiqiro ahtarota. Sa wihiro ahri yehpa cjẽna ñaãe yeyequina tiquina ijiyere tiquinare masigũ yerota tiqiro. Sa yero quehnoano ijiye tiye gũhure buherota tiqiro masare. Sa yero Cohãcjũ masare tiqiro buhiri dahreato gũhure yahurota masare yedohoatiqiro pehe. ⁹Yuhure wacũ tutueyquina ijire ahri yehpa cjẽna. Sa yero yedohoatiqiro pehe masa ñaãe yeyequina tiquina ijiye tiyere tiquinare masigũ yerota. ¹⁰Yuhu Pacu cahapu wahautja. Yuhu sa wahari bato masa yuhure ihñasi. Sa yero quehnoano ijiye tiye gũhure buherota yedohoatiqiro pehe. ¹¹Ahri yehpa cjẽna puh-torore watĩnore Cohãcjũ buhiri dahre duti tuhasari. Sa yero Cohãcjũ masare tiqiro buhiri dahreati gũhure yahurota yedohoatiqiro pehe.

¹²Pajiro ijire musare yuhu yahuati. Yuhu sa yahu nemo duepegũta tire yuhu yahugũ yojopu masinisi musa. Sa yena yojopure quehnoano tuhosi musa. ¹³Yuhu sa yahu nemoedagũ Espiritu Santo pehe musare yahu nemono ahtarota. Tiquiro esa tuharo musare yahusi. Tiquirore yuhu Pacu yahu

dutirire tiqiro yahurota musare. Sa yero musare poto yahu pehorota. Sa yero “Camepu ohō saha waharota”, ni yahurota tiqiro musare. ¹⁴Sa yero yeere musare tiqiro yahurota. Sa yahuro yuhure ño peogũ yerota masare. ¹⁵Ijipihtiye yuhu Pacu ye, yee gũhu ijire. Sa yegu “Espiritu Santo pehe yeere yahurota musare”, nii musare, ni yahuri Jesu.

**—Bujua witina ijiepenata came
bucuenata musa, ni yahuahye Jesu**

¹⁶Sa ni tuhasa ohō saha ni yahu nemori:

—Mehenogã bato musa yuhure ihñasi. Sa yena mehenogã bato musa yuhure ihñanata tja, nidi Jesu usãre tiqiro buhenare.

¹⁷Tiqiro sa nigũ tuhona, usã pehe meheñequinagã ohō saha ni yahuducuu usã basi:

—¿“Mehenogã bato musa yuhure ihñasi. Sa yena mehenogã bato musa yuhure ihñanata tja”, nino dũhse nino sa niajari marine? ¿Sa yero “Yuhu Pacu cahapu wahautja”, nino dũhse ijiro boro marine sa niagari tiqiro? ¹⁸¿“Mehenogã bato”, nino dũhse nino sa niajari ahriqiro? Tiquiro ni yahurire quehnoano masiedaja mari, ni yahuducuu usã basi.

¹⁹Usã sa ni yahuducugũ Jesu tiqirore usã sinitu duarire masino, usãre yahuri:

—¿“Mehenogã bato musa yuhure ihñasi. Sa yena mehenogã bato yuhure ihñanata tja”, yuhu nidire sinitu duajari musa? ¿Tire yuhu nidire masiedajari musa? ²⁰Ijirota musare nigũ niaja. Yuhu yariagũ ihñana musa utinata. Sa yena tutuaro bujua witinata. Sa ye yuhure ño peoyequina pehe bucueeta. Musa pehe bujua witina ijiepenata, came bucuenata musa. ²¹Ohō saha ijire ti: Numino niji wahcõno, ticoro ñano yuhduato pano ijire. Sa yero

ticoro tutuaro bujua witire. Sa bujua witieperota ticoro pohna tiri bato ticorore purĩdire wacũedare ticoro. Nijinogã ahri yehpapu tiquiro masa bajuagũ ticoro bucuere. Sa yero ticorore purĩdire wacũedare. ²²Sata musa yojopure bujua witinata. Came musare ihñautja. Sa yena musa tutuaro bucuenata. Musa sa bucuegũ apequina musare bujua witiğũ ye masisi.

²³Ti deco musa yuhure ihñari deco yuhure sinitusi musa. Masi tuhasarinapu ijinata. Ijirota musare nigũ niaja. Yuhure musa wacũ tutuagũ ihñano yuhu Pacure musa siniñene tiquiro musare ohorota. ²⁴Ahri deco pano yuhu tutuaye mehna Cohãcjũre siniedarĩdi musa. Yuhure wacũ tutuatjãna Cohãcjũre siniña. Musa sa sinigũ musa sinidire musare ohorota, musa quehnoano bucueatire, nidi Jesu usãre.

Ñañequinare Jesu pehe yuhduducahye

²⁵Sa ni tuhasa ohõ saha ni nemori:

—Queoye mehna musare yahue tii. Sa yahuepeguta came musare queoye mehna yahusi yuhu. Sa yahueragu yuhu Pacu pehere quehnoano potu yahutja musare. ²⁶Ti decore musare yuhu Pacure sini basasi yuhu. Yuhure wacũ tutuana, musa basi tiquirore sininata. ²⁷Musa yuhure cahĩne. Sa yena yuhu Pacu cahapu yuhu ahtarigu ijigũ “Ijirota ijire”, nine musa. Sa nina musa ijigũ ihñano yuhure cahĩna musa ijigũ ihñano yuhu Pacu pehe musare cahĩne. Tiquiro sa cahĩgũ tiquirore musa sininata. ²⁸Yuhu Pacu cahapu ijirigu ahri yehpapure ahtau yuhu. Sa yegu yojopure ahri yehpapu ijirigu yuhu Pacu cahapu wahautja, nidi Jesu.

²⁹Tiquiro sa nigũ usã tiquiro buhena ohõ saha nii:

—Yojopu pũrita queoye marieno yahuducugu quehnoano bajuro yahugu

nine muhu usãre. ³⁰Muhu quehnoano masi pehogu muhu ijigũ yojopu pũritare usã masiaja. Sa ye apequina muhure buhe masiedare. Tire yojopure usã quehnoano masiaja. Usã quehnoano masina, Cohãcjũ cahapu ahtarigu muhu ijigũ “Ijirota ijire”, niaja usã, nii usã Jesure.

³¹Usã sa nigũ Jesu yuhtiri usãre:

—¿Yojopure “Ijirota ijire”, niajari musa? ³²Came cjũno ijipihtina musa wuhusepu waha sitena, yuhure cohãnata musa. Musa sa cohãpepegũta yuhu Pacu pehe yuhu mehna ijire. Sa yegu yuhu ihcũta ijieraja. ³³Ahrire musare yahu muhtau, yuhure musa wacũ tutuaye mehna musa quehnoano ijiatore. Cohãcjũre cahmeeñequina cahapu musa ijigũ ñano yeeta musare tiquina. Tiquina sa yepegũta bucueya musa. Ahri yehpa cjẽna tiquina ñañe yerire yuhduducagu ijiaja yuhu. Sa yena yuhure wacũ tutuana bucueya musa, nidi Jesu usãre tiquiro buhenare.

Jesu tiquiro buheyequinare Cohãcjũre sini basahye

17 Sa ni yahu tuhasa Jesu uhmuanopu ihña muo, Cohãcjũre ohõ saha ni yahuducuri:

—Mai, yojopure muhu yahu queoriro sahata yuhure ñano tiquina yeati pje esarota nine. Yuhure muhu macure masare ño peogũ yeya. Muhu sa yegũ muhure masare ño peogũ yeitja yuhu gũhu. ²Ijipihtiequina puhto yuhure cũri muhu. Sa yegu yuhure muhu ohoriquinare muhu mehna sa ijiducugũ yeitja yuhu. Sa yegu muhure masare ño peogũ yeitja yuhu. ³Muhu dihita Cohãcjũ waro ijire. Yuhu Jesucristo muhu ohorigu ijiaja. Sa ye ijipihtiequina muhure masiñequina, yuhu gũhure masiñequina uhmusepu mari mehna sa ijiducuetu, nidi Jesu.

⁴Sa ninota ohō saha ni nemori mari Pacure:

—Ahri yehpapure mūhu ye dutirire ye peho tuhasau yūhu. Sa yegu mūhure masare ño peogū yei yūhu. ⁵Ahri yehpa ijiato pano mūhu mehna yūhu ijigū ijipihtiyequina yūhure tiquina ño peo muhtariro sahata yojopure yūhure tiquina ño peogū yeya tja.

⁶Ahri yehpapū ijieyquinare yūhure mūhu ohoriquinare mūhure masigū yei. Mūhu ohoriquina mūhu yequina ijire. Sa yegu tiquinare ohori mūhu yūhure. Sa ye mūhu dutiyere yeri tiquina. ⁷⁻⁸Yūhure mūhu yahurire tiquinare buhei. Yūhu sa buhegū tuhoye yūhu buheyere cahmedi tiquina. Sa ye potota mūhu cahapū ahtarigu yūhu ijigū masine tiquina. Sa ye mūhu ohorigu yūhu ijigū “Ijirota ijire”, ni tuhature tiquina. Sa ye ijipihtiyē yee mūhu ye ti ijigū masine tiquina.

⁹Tiquinare mūhure sini basagu ni-aja. Apequina pehere sini basagu niedaja yūhu. Yūhure mūhu ohoriquina mūhu yequina ijire. Sa yegu tiquinare sini basagu ni-aja mūhure. ¹⁰Tiquina ijipihtiyequina mūhu yequina ijire. Sa ye mūhu yequina pehe yeequina ijire. Yūhure wacū tutuaye yūhu tutuagu ijiyere masigū yere tiquina masare.

¹¹Yojopure ahri yehpapure tojoasi yūhu. Mūhu cahapū wahau tū ni-aja. Yūhu sa wahaepēgūta yojopure yūhure mūhu ohoriquina ahri yehpare tojoare. Mai, mūhu quehnoagu ijire. Yūhure mūhu ohoriquinare mūhu tutuaye mehna ihña ihbo basaya. Mūhu sa ihña ihbogū mari ihcūta mari ijiro saha tiquina gūhu ihcā curuata ijiahro. ¹²Tiquina mehna ijigū mūhu tutuaye mehna tiquinare quehnoano ihña ihbou. Ihcāquiro pūrita pecapū waharota mūhu yere tiquina ojoari pūpū yahuriro sahata.

¹³Yojopure mūhu cahapū wahau tū ni-aja. Sa yegu ahri yehpapū ahri

ijipihtiyere yeequinare yahuaja yūhu mehna tiquina quehnoano buceatire. ¹⁴Mūhu yere yahuu tiquinare. Tiquina gūhu yūhu yero sahata ahri yehpapū iji dojoatiquina ijierare. Sa ye ahri yehpa cjenā pehe tiquinare ihña tuhtire. ¹⁵“Ahri yehpapū ijieyquinare, yeequinare neahña”, niedaja. Yūhu sa niedapegūta tiquinare quehnoano ihña ihboya. “Watino ñañene tiquinare ye dutiari”, nigū, quehnoano ihña ihboya tiquinare. ¹⁶Ahri yehpa cju ijieraja. Tiquina gūhu yūhu yero sahata ahri yehpapū iji dojoatiquina ijierare. ¹⁷Yeequinare mūhu buheye mehna quehnoañequina yeya tiquinare. Mūhu yahuye pehe ijirota ijire. ¹⁸Ahri yehpapure yūhure mūhu ohoriro sahata yūhu pehe yeequina gūhure mūhu yere buhe dutigu ohou. ¹⁹Mūhu cahmeñene yegu tagu yariacju ijigū yūhu pagure ohoaja. Sa yeaja yūhu, yeequina gūhu mūhu cahmeñene poto tiquina quehnoano yeatire.

²⁰⁻²¹ “Yeequina yojopure ijieyquina dihitare yedohoya”, ni sini basaeraja yūhu. Yeequina apequina gūhure yeere tiquina buheri bato tiquina gūhu yūhure wacū tutuaeta. Tiquina gūhure yedohoya, yeequina ijipihtiyequina ihcā curua tiquina ijiro quehnoano. Yūhu mūhu mehna mari pūana ijiepenata ihcūta ijiaja. Ihcūta mari ijiro sahata tiquina gūhu mari mehna ihcā curuata ijiahro. Ihcā curuata ijiahro, mūhu ohorigu yūhu ijiyere ijipihtiyequina masa “Ijirota ijire”, tiquina niatire. ²²Yūhure mūhu tutuaye ohorire yeequinare ohou. Ti tutuayere cwoye, ihcūta mari ijiro sahata tiquina gūhu ihcā curuata ijietā. ²³Yūhu tiquina mehna ijiaja. Sa yegu mūhu yūhu mehna ijire. Mari sa ijigū yeequina potota ihcā curuata quehnoano ijietā. Ihcā curuata tiquina ijigū ihñañe mūhu ohorigu yūhu ijiyere ahri yehpa cjenā masieta. Sa ye yūhure

muhū cahīdiro sahata yeequina gūhure muhū cahīnene masieta masa.

²⁴Mai, ahri yehpa iji ducato pano yuhure cahie tiri muhū. Sa cahigu yuhū tutuagū ijiyere ihñori muhū. Sa yegu yuhure muhū ohoriquinare yuhū mehna tiquina ijigū cahmeaja, yuhū tutuagū ijiyere tiquina masiatire. ²⁵Mai, muhū quehnoagū ijire. Ahri yehpa cjēna ñañequina muhure masiedare. Yuhū pehe muhure masiaja. Sa ye muhū ohorigu yuhū ijigū masine yeequina. ²⁶Tiquinare muhure masigū yei. Came gūhure muhure tiquinare masigū yeitja, yuhure muhū cahīdiro sahata apequinare tiquina cahiatire. Sa yegu yeequina mehna ijigūtja, nidi Jesu mari Pacure.

Jesure peresu yeahye

(Mt 26.47-56; Mr 14.43-50; Lc 22.47-53)

18 Tiquiro sa nidi bato Jesu, usā gāhū tiquiro buhena Cedrō wame tiri mare pehā, olivo wame tiye cju wesepū esau. ²Peye tahari ti wesepū Jesu mehna cahmecoae tii. Sa yero Juda Jesure ihña tuhtiyequinare ihñoa-tiquiro ti wesere masidi. ³Sa masino pua curua surarare uhmū tā cāhtari ti wesepū Jesure ihñono taro. Ihcā curua surara waro ijiri. Ape curua surara Cohācjū wuhure cohteyequina ijiri. Tiquina pahia puhtoa, fariseo masa tiquina ohoriquina ijiri surara, Cohācjū wuhure cohteyequina mehna. Sa ah-taye sihāñe pacare, sihāñe cju gūhure sihā cāhtari. Tiquina wamoa gūhure ne cāhtari tiquina. ⁴Ti wesepū tiquina wi-hiri bato Jesu tiquiro ñano yuhduatire masino, tiquinare piti ca, sinituri:

—¿Noare macana niajari mūsa? nidi Jesu.

⁵—Jesu Nazare cjūnore macaja usā, ni yuhtiri tiquina.

—Tiquiro tjiaja yuhū, nidi Jesu.

Juda pehe Jesure ñehe dutiro ihñoriquiro tiquina mehna ijiri. ⁶Sa ye “Tiquiro tjiaja yuhū”, Jesu nigūta tiquina pehe tuho maria waha, du siti maa, yehpapū bora quehe sari. ⁷Tiquina sa wahagū ihñano pari turi sinituri tiquinare Jesu:

—¿Noare macana niajari mūsa? nidi.

—Jesu Nazare cjūnore macana niaja usā, ni yuhtiri tiquina tja.

⁸—“Yuhū tjiaja”, ni tuhasamigu yuhū mū sare. Sa yena yuhure ñehena ahriquinare yuhū mehna cjēnare peresu yeracāhña mūsa, nidi Jesu.

⁹Sa usāre cahño ne ihcāquirore butigū yerari. Sa yero to pano Cohācjūre tiquiro nidiro sahata yero nidi tiquiro. “Yuhure muhū ohoriquinare ne ihcāquiro boeru”, tiquiro nidiro sahata yero nidi Jesu. ¹⁰Sa ye Simo Pedro ñoseni pjīne cūoro, ti pjīne tuā we nedoqueo, pahia puhtoro cahacjūno Malco wame tiriquiro cahmonore dute pahrē cāri. Poto pehe cjā cahmonore dute pahrē cāri. ¹¹Tiquiro sa dute pahrēgū ihñano Jesu tiquirore ohō saha nidi:

—Muhū ñoseni pjīne ihboya. Yuhū Pacu yuhure tiquiro ñano yuhdu dutiriro sahata ñano yuhdu tja yuhū, nidi Jesu Pedrore.

Pahia puhtoro cahapū Jesure neahye tiquina

(Mt 26.57-58; Mr 14.53-54; Lc 22.54)

¹²Tiquiro sa ni tuhasagūta surara, tiquina puhtoro mehna, Cohācjū wuhure cohteyequina surara gūhū Jesure ñehe, tiquirore duhteri. ¹³Duhte tuhasa Anás cahapū nea muhtari tiquina. Anás pehe Caifa mareino ijiri. Caifa pehe ti cūhmare pahia puhtoro ijiri. ¹⁴“Judio masa ye ijiatire ihcāquiro masuno yariagū quehnoanota”, nidiquiro boro ijiri Caifa pehe.

—**Jesure masiedaja, niahye Pedro**

(Mt 26.69-70; Mr 14.66-68; Lc 22.55-57)

¹⁵Sa yena yuhu Simo Pedro mehna Jesure yoa cjünopu ihña nunu täu. Caifa ya wuhupu neañe nidi Jesure. Yuhu pehe pahia puhtoro tiqiro ihña masinohgu ijigu Jesu bato puhtoro ya wuhu ijiri sahrinopu sajã wahu. ¹⁶Yuhu sa sajãgü Pedro pehe sahrino sopecahapu tojoaduca sari. Sa yegu majare wijia ta, sopecahare cohtericore sinituu. Yuhu sa sinitu tuhasagü ticoro Pedrore sajã ta dutiri. Ticoro sajã ta dutiri bato yuhu Pedrore ne sajãa wahu. ¹⁷Yuhu sa ne sajãgü ihñano sopecahare cohtericoro pehe Pedrore sinituri:

—¿Jesu buheyequina mehna cjü ijierajari muhu? nidi ticoro Pedrore.

—Ijieraja yuhu, ni yuhtiri Pedro pehe.

¹⁸Usã esato pano to cjëna puhto ca hacjëna, surara mehna tiquina sohmati pecare wijia tuhasari jiri. Yasuaridi. Sa ye tiquina ti peca duhtu caha ducuye, sohmañe nidi. Tiquina sa sohmagü ihñano Pedro gühu ahta, sohmani.

Pahia puhtoro Jesure sinituahye

(Mt 26.59-66; Mr 14.55-64; Lc 22.66-71)

¹⁹Sa ye pahia puhtoro Jesu buherire, usã tiqiro buhena gühure sinituahye Jesure. ²⁰Tiqiro sa sinitugü Jesu pehe yuhtiahye tiquire:

—Ijipihtiequinare buhegu tiquina ihñono ducuu. Sa buhegu judio masa mari buheye wuhusepu Cohãcjü wuhupu gühure sa buheducuu yuhu. Duhtitjãgu buheru yuhu. ²¹¿Duhsegu yuhure sinituajari muhu? Sinitu duagu yuhu buheyequinare sinituya. Yuhu buherire tiquina masine, ni yuhtiahye Jesu.

²²Tiqiro sa nigü tuhoru topu ducuriqiro surara pehe tiqiro omoca mehna Jesure quëahye.

—Sa niedacãhña pahia puhtoro, niahye surara pehe Jesure.

²³Tiqiro sa nigüta Jesu ohõ saha niahye:

—Ñano yuhu ni yahuducurire yahuya yuhure. ¿Poto musare yuhu yahuepegüta, duhsegu tagu yuhure quëajari muhu? niahye Jesu surarare.

²⁴Came Anás Jesure tiquina duhteriquirore Caifa pahia puhtoro cahapu ohoahye.

—**Jesure masiedaja, pari turi niahye Pedro**

(Mt 26.71-75; Mr 14.69-72; Lc 22.58-62)

²⁵Sa ye Simo Pedro peca duhtu cahapu ducuro, sohmano nidi. Tiqiro sa sohmaducugü ihñañe to cjëna tiquire sinituri:

—¿Muhu gühu Jesu buheyequina mehna cjü muhu ijierajari? nidi tiquina Pedrore.

—Ijieraja yuhu, ni yuhtiri Pedro.

²⁶Sa yero pahia puhtoro cahacjëna mehna cjüno Pedro tiqiro cahmono dute pahrëdiquiro acayuro pehe Pedrore sinituri:

—¿Jesure tiquina ñehedi wesepu yuhu ijigü muhu gühu tiqiro mehna ijieracoachte? ni sinituri tiqiro Pedrore.

²⁷—Yuhu tiqiro mehna ijieru, nidi Pedro.

Tiqiro sa nigüta canaca yahuri.

Jesure Pilato sinituahye

(Mt 27.1-2, 11-14; Mr 15.1-5; Lc 23.1-5)

²⁸Ñami cjüno ijigü Caifa ya wuhupu ijiriquina Jesure ne wijia, Roma cjëna puhtoro Pilato ya wuhupu nea wahari tiquina. Sa wahaepeta tiqiro ya wuhupu sajãedari. Pascua deco ijigü tiquina ihyatiquina ijiye, ohõ saha nidi: “Judio masuno ijierare Pilato. Tiqiro sa ijiriquiro ijigü tiqiro ya wuhure sajãna, mari dutiyere yuhducana niboaga. Sa yena mari sajãgü marine bose deco cjë

ihyayere ihya dutieraboaga”, nidi. Sa niñe puhtoro Pilato ya wuhure sajædari Jesure neariquina pehe. ²⁹Tiquina sa sajædagũ ihñano Pilato tiquina cahapu wuhũ sopecahapu esaducaro, tiquinare sinituri:

—¿Yabe buhirire ahriquiore yahusã duajari musa? nidi Pilato tiquinare.

³⁰—Ahriquiore quehnoariquiore ijigũ muhure usã ohoeraboaya. Ñariquiore ijire tiquiore, ni yuhtiri tiquina.

³¹Tiquina sa nigũ Pilato ohõ saha nidi:

—Musa basita tiquiore neaña. Sa yena musa ye dutiye ti nidiro sahata tiquiore buhiri dahreya, nidi Pilato tiquinare.

—Musa ye dutiye pehe usãre masunore wejẽ dutiare, nidi tiquina Pilatore.

Sa niñe Jesure wejẽ dutiye tee nidi.

³²Tiquina sa wejẽ dutigũ Jesu pehe curusapu tiquiore yariatire to pano tiquiore yahuriro sahata wahari.

³³Tiquina sa nidi bato, Pilato pehe wuhupu majare sajã, Jesure pijioahye. Pijio tuhasa, tiquiore sinituahye:

—¿Judio masa tiquina puhto tjiajari muhu? ni sinituahye Pilato.

³⁴—¿Muhũ esa tuharota sa ni sinituajari muhu yuhure? ¿O apequna pehe yuhure tiquina yahusãri bato tire sinituajari muhu? niahye Jesu Pilatore.

³⁵—Judio masũ ijieraja yuhũ. Muhũ ya yehpa cjëna, pahia puhtoa gũhu muhure ohoi usãre. ¿Yabere ñano yeari muhu tiquina sa buhiri dahre duagũ? niahye Pilato.

³⁶—Ahri yehpa cjũ puhto ijieraja yuhũ. Ahri yehpa cjũ puhto yuhũ ijigũ, yuhũ buheyequina yuhure yedohoboaya. Judio masare ñehe dutieraboaya. Yuhũ puhto ijiye ahri yehpa cjẽ ijierare, niahye Jesu Pilatore.

³⁷—¿Sa yegu puhto ijiajari muhu sa nigũ? niahye Pilato.

—Muhũ nino sahata puhto ijiaja. Masa tiquina puhto ijigu tagu masa bajuu yuhũ. Sa yegu ahri yehpau ahtau tiquina puhto ijii tuhũ, poto ijiyere yahugu tuhũ. Ijipihtiequina poto ijiyere tuho duayequina, yuhũ yahuyere tuhore, niahye Jesu.

³⁸—¿Yabe boro ijiajari poto ijiye? niahye Pilato.

Judio masa Jesure wejẽ dutiahye

(Mt 27.15-31; Mr 15.6-20; Lc 23.13-25)

Sa ni tuhasa Pilato judio masa caha majare tojoa tiquinare yahuri:

—Ahriquiore Jesure ne buhiri mariedare. ³⁹Cuhmaripe pascua ijigũ ihcãquiore peresu ijiriquiore musa wio dutiducure. ¿Sa yegu ahriquiore Jesureta musa puhtoro ijiatiquiore musare wio basagari yuhũ? nidi Pilato judio masare.

⁴⁰Tiquiore sa nigũ tuhoye judio masa ohõ saha ni sañuducuri:

—Tiquiore wioeracãhña. Barrabá pehere usãre wio basaya, ni sañuducuri judio masa Pilatore.

Barrabá pehe yaque bucuro ijiri.

19 Tiquina sa ni sañuducuri bato Pilato Jesure tana dutiahye. Sa ye tiquiore yequina surara pehe tiquiore tanahye. ²Tana tuhasa tiquina pota behito ye tuhasa, Jesu dapu buipũ duhu peoahye. Duhu peo tuhasa, puhtoa ye suhti borore tiquiore sãa tuhasa, tiquiore cahapu esa dũca, ohõ saha ni bujũpeahye tiquina:

³—Quehnoano ahtaya. Judio masa puhto, quehnoano ahtaya, ni bujũpe, Jesu wãhdoare quẽ mujahye.

⁴Sa yero Pilato pari turi judio masa cahapu waha, tiquinare yahuri:

—Tuhoya musa. Ahriquiore ne buhiri mariediquiore ijire. Sa yegu tire musa masiatire musa cahapu tiquiore ne cãhtaũ, nidi Pilato.

⁵Tiquiore sa ni tuhasagũ Jesu pota behito pesariquiore, puhtoa ye suhti borore

sañariquiro wuhupū ijiriquiro wijia tari. Tiquiro sa wijia tagū Pilato tiquinare ohō saha nidi:

—Ihñaña. Ahriquiro ijire tiquiro, nidi Pilato.

⁶Tiquiro sa ni tuhasagū tuhoye, pahia puhto, surara gūhū Jesure ihñañe, sañuducuri:

—Curusapū quē biha wejēña tiquire. Curusapū quē biha wejēña tiquire, ni sañuducuri tiquina.

—Tiquiro ne buhiri mariedare. Sa yena mūsa basita tiquire neahña. Sa yena mūsata tiquire curusapū quē biha wejēña, nidi Pilato tiquinare.

⁷—Tiquiro basi “Cohācjū macū ijijaja”, nie tiri. Tire tiquiro sa nigū usā dutiye pehe tiquire wejē dutire, nidi tiquina Pilatore.

⁸Tiquina sa nigū tuhoro cue yūhdūa wahari Pilato pehe. ⁹Sa yero pari turi wuhupūre majare sajā, Jesure sinituahye tja:

—¿Noho cjū ijijari mūhū? ni sinituahye tiquiro Jesure.

Tiquiro sa ni sinituepegūta Jesu tiquire yūhtierahye.

¹⁰Tiquiro sa yūhtieragū ihñano Pilato tiquire sinitu nemoahye:

—¿Yūhūre yūhtierajari mūhū? Yūhū mūhūre peresupū ijirigūre wio masi-aja. Sa yegū mūhūre curusapū gūhūre quē biha wejē duti masi-aja yūhū. ¿Tire masiedajari mūhū? niahye Pilato Jesure.

¹¹—Cohācjū mūhūre tiquiro dutieragū yūhūre ñano ye dutieraboaya mūhū. Yūhūre ihñā tuhtiequinare ihñoriquiro pehe mūhū yūhdūoro ñano buhiri tire, niahye Jesu Pilatore.

¹²Tiquiro sa nigū tuhoro Pilato pehe tiquire wio duamahye. Tiquiro sa wio duepegūta pari turi judio masa sañuducuri:

—Jesu “Puhto ijijaja”, nino mari ijipihina puhtoro Roma cjūnore ihñā tuhtiriquiro ijire tiquiro. Sa yegu

tiquire wioyū mūhū gūhū mari puhtoro ihñā tuhtigū ijijaga mūhū, ni sañuducuri judio masa Pilatore.

¹³Tiquina sa nigū tuhoro Jesure wuhupū ijiriquiro ne wijia ta, buhiri dahre dutiro taro tiquiro dujiri pahtapū nuju sari Pilato. Tiquiro buhiri dahre dutiri paa utā mehna tiquina yeri paa judio masa ye mehna Gabata wame tiri. ¹⁴Ti deco pascua bose deco usā ihyatire usā quehnori deco ijiri. Ti pjere coheri pje waro ijiri. Nuju sa tuhasa Pilato masare ohō saha ni yahuri:

—Ahriquiro tjire mūsa puhtoro, nidi tiquiro.

¹⁵Tiquiro sa nigū tuhoye judio masa sañuducuri:

—Yariahro tiquiro. Yariahro tiquiro. Curusapū quē biha wejēña tiquire, ni sañuducuri tiquina.

—¿Mūsa puhtoro tiquiro ijiepegūta tiquire curusapū quē biha wejē duti-ajari mūsa? nidi Pilato.

Tiquiro sa nigū ohō saha ni yūhtiri pahia puhto:

—Mari ijipihina puhtoro Roma cjūnota tiquiro usā puhtoro ijire. Apequiro puhtoro usāre mariedare, ni yūhtiri pahia puhto.

¹⁶Tiquina sa ni yahuducuri bato Pilato Jesure curusapū quē biha wejē dutiro, tiquire ohori tiquinare.

Jesure quē biha wejēahye tiquina

(Mt 27.32-44; Mr 15.21-32; Lc 23.26-43)

Sa ye tiquina Jesure ne wijari. ¹⁷Tiquina ne wijiajū Jesu pehe tiquiro ya curusare tiquiro basi wūa ne, dapu pehtoro wame tiropū esari. Usā judio masa ye mehna Gólgota wame tiri. ¹⁸Topū esaye tiquina Jesure quē biha ohōri. Sa ye apequina puarore ihcāquiro tiquiro poto pehe, apequiro tiquiro cū pehe pehe quē biha ohōri tiquina. Sa yero Jesu tiquina deco curusapū wahñari. ¹⁹Tiquina quē biha tuhasagū Pilato

taboa pjine oja duti, Jesure tiquina quē biha ohōri curusapū quē biha ohō dutiri jiri ti pjine. Ohō saha ni oja dutiri jiri tiqiro: “AHRIQUIRO JESU NAZARE CJĪNO, JUDIO MASA PĒHTORO LJIRE”, ni oja dutiri jiri Pilato ti pjine. ²⁰Ti pjine ojoaro judio masa ye mehna, Roma cjēna ye mehna, griego masa ye mehna ojoari jiri apequiro. Sa yero Jesure curusapū tiquina quē biha ohōriro maca cahagā ijiri. To cahagā ijiyequina peyequina judio masa Pilato oja dutirire ihña, buheri. ²¹Sa buhe tuhasa judio masa usā pahia puhtoahō saha nidi Pilatore:

—“Ahriquiro judio masa puhtoro ijire”, ni oja dutieracāhña. Usā puhtoro ijierare ahriquiro. Sa yegū ohō saha ni oja quehno dutiya mūhū. “Ahriquiro ‘Judio masa puhto ijiaja’, ni ihcāquirola tiqiro basita sa ni tuhoturiquiro ijiri”, ni oja quehno dutiya, nidi pahia puhtoahō.

²²—Yūhū oja duti muhtariro sahata ijirola, nidi Pilato tiquinare.

²³Jesure tiquina quē bihari bato pititiaro surara pehe Jesu suhtire tiquina basi itiri. Tiquina sa iti duepegūta ihcā suhtiro yoari suhtiro dohori marieni suhtiro ijiri. Ti suhtiro suhari suhtiro ijiri. ²⁴Ti suhtiro sa ijiḡū ohō saha nidi tiquina basi:

—Ahri suhtirore tuhrēdacūhna. Ahri suhtirore neatiquirore masi duana, doquepeihna mari, nidi tiquina basi.

Sa doquepeye, Cohācjū yere tiquina ojoari pūpū tiquina ni ojoariro sahata yeye nidi tiquina. “Yūhū suhtire tiquina basi itiri. Sa ye yūhū suhtire neatiquinare masi duaye, doqueperi tiquina”, ni ojahye Cohācjū yere tiquina ojoari pūpū. Tiquiro sa ni ojoariro sahata sa yeye nidi tiquina.

²⁵Surara tiquina sa yegū, Jesu pacoro, Jesu mūono, María Cleofa namono, María Magdalena mehna Jesu curusa

cahagā ihñaducuri tiquina. ²⁶Sa yero tiqiro pacoro yūhū tiqiro cahñogū ḡūhū tiqiro cahapū usā ducugū ihñano tiqiro pacorore yahuri Jesu:

—Yojoḡure ahriquiro mūhū macū ijire, nidi Jesu tiqiro pacorore.

²⁷Sa ni tuhasa, yūhūre ohō saha ni yahuri tiqiro:

—Yojoḡure ahricoro mūhū paco ijire, nidi Jesu yūhūre.

Tiqiro sa nidi bato Jesu pacorore ya wūhūpū iji dutii.

Jesu yaria wahahye

(Mt 27.45-56; Mr 15.33-41; Lc 23.44-49)

²⁸Tiqiro sa ni yahuri bato ohō saha ni tuhotu, masiahye Jesu: “Ijipihtiye Cohācjū yūhūre dahra dutiro tiqiro cūrire ye pehou”, ni tuhotu, masiahye Jesu. Sa masino Cohācjū yere tiquina ojoari pūpū tiqiro ni yahuriro sahata ohō saha nidi Jesu:

—Aco wūoaga yūhū, nidi Jesu.

²⁹Sa yero topū vino suēne co pose tiri sutu dujiri. Sa yero topū ijiriquiro aco ihmini suhtere suēne co mehna tiquina sohari suhtere yucugū hisopo wame tidū sohtoapū duhte ohōri. Sa yero Jesu dūseropū siō ohōri. ³⁰Ti core Jesu ihmi tuhasa ohō saha nidi:

—To punota ijiaga, ninota tiqiro dapure muhri yo, yariaa wahari.

Surara Jesu pati pahma batogā ñoseahye ñosenū mehna

³¹Ti deco pascua bose deco pano ijiri. Bose deco cjēne usā ihyatire quehñori deco ijiri. Sa ye ape deco saurū ijiḡū tiquina bose deco ijiḡū curusaripū yariariquinare cū duerari. Ti deco Cohācjūre tiquina ño peori bose deco ijiri. Sa ye ti decopū tiquina quē biha ohōriquinare curusaripū tiquina wahñagū cahmedari tiquina. Sa ye tiquina quē biha ohōriquinare tiquina ñecu cohārine quē nuha dutiye tehe,

judio masa siniahye Pilatore, “Tiquina yaria madoqueoahro”, niñe. Tiquina sa yeri bato tiquina pagurire ne dijio madoqueoye tee nidi. ³²Tiquina sa dutigū surara pehe curusari cahapū esa, ihcāquiro yaqueriquiro ñecu cohārine quē nuhari. Apequiro gūhure sata yeri tiquina. ³³Sa ye Jesu ñecu cohārine quē nuhae tee yemehe, tiquiro yariariquiro ijigū ihñañe, quē nuhaedari.

³⁴Sa quē nuhaedaye ihcāquiro surara tiquiro pati pahma batogā ñosenū mehna ñosedī. Tiquiro sa ñosegū duita tiquiro dii, aco mehna wijiari. ³⁵Ti sa wahagū ihñau yuhu. Yuhu ahri pūre ojoarigū musare poto yahuaja. Poto yuhu yahuye ijigū masiaja yuhu. Musare yahuaja musa gūhu Jesure musa wacū tutuato saha. ³⁶Cohācjū yere tiquina ojoari pū ti nidiro sahata sa wahari: “Tiquiro cohārine ne ihcā cohāre quē nuhaedari”, tiquiro ni ojoariro sahata Jesu ñecu cohārine ne ihcā cohāre quē nuhaedari. ³⁷Sa yero ape pūpū Cohācjū yere tiquina ojoari pūpū ohō saha nine. “Tiquirore tiquina ñosediquirore ihñaeta tiquina”, ni ojoahye Cohācjū yere tiquina ojoari pūpū.

Jesu pagure masa copepū cūahye

(Mt 27.57-61; Mr 15.42-47; Lc 23.50-56)

³⁸Tiquiro yariari bato José Arimatea cjūno Jesu pagure ne dijioro taro, Pilatore siniahye. José pehe apequina judio masare cuero, Jesure wacū tutu-ariquiro tiquiro ijiyere yahu duerahye. Sa yero tiquiro pagure sinidi bato Pilato pehe Jesu pagure nea dutiahye. Tiquiro nea dutigū José curusa cahapū esa, Jesu pagure nea wahahye. ³⁹Nicodemo gūhu José mehna wahahye. Tiquiro yucugū cjē ehme sitiye, mirra wame tiye ehme sitiye yucugū cjē mehna dahra moredire ne cāhye. Jesu pagure tiquina cohāto pano tiquina quehnoati

ijiahye ti ehme sitiye. Tiquiro ne cāhtari treinta kilo nūcūahye. Nicodemo sohō ijiri pje Jesu mehna tiquiro coā yahuducuri pje ñamipū Jesu cahapū esariquiro ijiahye. ⁴⁰Sa ye tiquina puaro Jesu pagure ne, judio masa yariariquinare usā cohāducuro sahata tiquiro pagure ehme sitiye mehna suhti mehna wahmeahye. ⁴¹Curusapū Jesure tiquina wejēdiro cahapū wese ijiri. Ti wesepū masa cope utāpū wahma tiquina seheri cope ijiri. Ti copere ne ihcāquiro yariariquirore cohāedarīdi. ⁴²Pascua bose deco judio masa bose deco usā ihyatire quehnori deco ijiri. Sa ijiri deco ijigū ti cope cahagā tiquiro curusa ijigū, topū cūahye tiquina Jesu pagure.

Jesu masa wijiāhye

(Mt 28.1-10; Mr 16.1-8; Lc 24.1-12)

20 Domingo ñami cjūnogā ijigū, bohreato panogā María Magdalena Jesu masa copepū esahye. Topū esaro ti copere tiquina tu biharia utāre yoa cjūnopū tiquina pōo cūria utāre ihñahye ticoro. ²Sa ijigū ihñano, usā cahapū oma tojoa tari ticoro. Simo Pedro mehna yuhu usā puana ijii. Wihi ohō saha ni yahuri usāre ticoro:

—Mari puhtoro pagure ne cāri jiri. Nohopū ne cā cūcoayaye mari masiedaja, nidi ticoro usāre.

³Ticoro sa nigū tuhona, Pedro mehna masa copepū ihñana wahau usā. ⁴Sa ihñana wahana usā puana oma cāu. Sa oma cāna, yuhu Pedore oma yuhdu cāgu masa copepū esa muhtau. ⁵Topū esagu muhri ihña sōu ti copepūre. Muhri ihña sōgu tiquirore tiquina wahmedi suhtiro dihitare ihñau. Sa ye ti copere sajāedū. ⁶Yuhu sa ihñari batopū Simo Pedro yuhu batopū wihiri. Wihi masa copepū sajā, tiquiro pagure tiquina wahmedi suhtirore ihñari tiquiro. ⁷Sa yero Jesu dapure tiquina wahmedi cahsero gūhure ihñari tja. Ti cahsero si-

joro cuñano tiquiro torēdi cahsero ijiri. ⁸Sa yegu yuhū gūhū masa copepū esa muhtarigū ti copepū sajān. Jesu sa mariedagū ihñagu “Potota Jesu masa wijahya”, ni tuhutu yuhū. ⁹Ti copepū usā wahato pano Cohācjū yere tiquina ojoari pūpū Cristo tiquiro yariatire yahurire, tiquiro masa wijiatire yahuri gūhūre usā quehnoano masiedarimi. Ti copere yuhū ihñari bato, “Ijirota Jesu masa wijahya”, ni, tuhutu yuhū. ¹⁰Sa ihña tuhasa usā ye wuhūsepū tojoaa wahaū.

Jesu María Magdalenare bajuahye

(Mr 16.9-11)

¹¹Sa ye masa copepū María majare tojoa ta, ti cope sopecahapū wihi, ducuro, utiro niahye. Sa utieperota ticoro muhri ihña sōahye masa copepūre. ¹²Sa ihña sōno pūaro angelere, yehseye suhti sañañequinare Jesu tiquiro cuñamediropū tiquina dujigū ihñahye ticoro. Ihcāquiro tiquiro dapu timediropū dujiahye. Apequiro tiquiro dahpocāri timediropū dujiahye. ¹³Tiquinare ticoro ihñagū tiquina pehe ticorore sinituahye:

—¿Numio, dūhse yego utiajari mūhū? niahye tiquina.

—Yuhū puhtoro pagure ne cāri jiri. Sa yego tiquiro pagure tiquina cūrire masiedaga yuhū, niahye ticoro.

¹⁴Sa ni tuhasa, majaredūcameno Jesure topū ducuriquirore ihñahye ticoro. Sa ihñaeperota Jesure masiedahye ticoro.

¹⁵—¿Numio, dūhse yego utiajari mūhū? ¿Noare macago niajari? niahye Jesu ticorore.

“Ahriquiro ahri wesere cohteriquiro ijire”, ni tuhutumahye ticoro Jesure. Sa ni tuhuturo, ohō saha niahye ticoro:

—Mūhū tiquiro pagure nedigū ijigū mūhū cūrirore yahuya yuhūre. Mūhū yahuri bato tiquiro pagure negotja, niahye ticoro tiquirore.

¹⁶Ticoro sa nidi bato Jesu ohō saha niahye:

—María, niahye.

Tiquiro sa ni pisugū tuhoro majare ihñadoqueo ticoro hebreo ye mehna ohō saha niahye:

—Rabuni, niahye ticoro Jesure. “Rabuni”, nino, “Buhegū”, nino niahye.

¹⁷—Yuhū Pacū cahapū mujaedarīaja yuhū. Yuhū sa mujaedarīgū yuhūre ñehedacāhña. Sa yego apequina yeequina cahapū wahaya. Tiquina cahapū esago ohō saha ni yahuya tiquinare: “Yuhū Pacū cahapū wahau tūū niaja. Mūsa Pacū gūhū ijire tiquiro. Yaquiro Cohācjū cahapū wahau tūū niaja. Mūsa yaquiro Cohācjū gūhū ijire tiquiro’, nidi Jesu”, ni yahuya tiquinare, niahye Jesu Mariare.

¹⁸Tiquiro sa nidi bato María Magdalenā usā Jesu buhena cahapū wihi, yahuri usāre:

—Mari puhtorore ihñau yuhū, ni, Jesu tiquiro yahu dutirire yahuri usāre ticoro.

Jesu tiquiro buheyequinare bajuahye

(Mt 28.16-20; Mr 16.14-18; Lc 24.36-49)

¹⁹Ti deco domingo ñamicahapū usā Jesu buhena usā acaye judio masare cuena, wuhūpū biha sajā, dujii usā. Sa usā dujigū Jesu usā watoapū bajuadūca saro ohō saha nidi:

—¿Ne, ijiajari mūsa? Quehnoano ijiya mūsa, nidi.

²⁰Sa ni tuhasa, tiquiro omocarine, tiquiro pati pahma bato gūhūre usāre ihñori. Sa yena usā tiquirore usā puhtorore ihñana bucuēi. ²¹Pari turi Jesu usāre ohō saha nidi:

—Quehnoano ijiya mūsa. Yuhū Pacū yuhūre tiquiro ohoriro sahata, mūsa gūhūre yee buheye buheanare ohoaja, nidi Jesu usāre.

²²Sa ni tuhasa tiquiro usāre puti peori. Sa puti peoro Espiritu Santore usā ñehēatire ihñono nidi usāre. Ihño tuhasa ohō saha nidi:

—Yojopu Espiritu Santore ñehaña mûsa, mûsa mehna ijiatiquirore. ²³ Apequina tiquina ñañe yerire mûsa bogû, sata ijieta. Sa ye apequina tiquina ñañe yerire mûsa boeragû ti bori ijisi, nidi Jesu usâre tiquiro buhenare.

Jesure masa wijiariquirore Tomasu ihñahye

²⁴ Jesu usâ watoapu tiquiro bajuagû Tomasu sũhũariquiro tiquina ni pisuriquiro usâ mehna mariedari.

²⁵ Tiquiro sa mariedagû usâ mehna cjẽna tiquirore yahumedi.

—Mari puhtorore usâ ihñau, ni yahumi usâ Tomasure.

Usâ sa ni yahuepegûta ohõ saha nidi Tomasu:

—Tiquiro omocarine tiquina quẽ bihari coperire ihñedagu, ti coperire yũhu omo piria mehna ohbe tuhueragu “Ijirota masa wijiayahya”, nisi yũhu. Sa yegu tiquiro pati pahma bato ijiri copere yũhu omoca mehna siõ sõedagu, “Ijirota masa wijiayahya”, nisi yũhu tiquirore, nidi Tomasu.

²⁶ Ocho decori bato pari turi usâ tiquiro buhena usâ wũhũpu ijii. Ti pjere Tomasu usâ mehna ijiri. Ti wũhu bihari wũhu ijiri. Bihari wũhu ijiepegûta Jesu wũhũpu sajã taro, usâ watoapu bajuadũca saro ohõ saha nidi:

—¿Ne, ijiajari mûsa? Quehnoano ijiya mûsa, nidi.

²⁷ Sa ni tuhasa, tiquiro Tomasure yahuri:

—Ihñaña yũhu omocarine. Sa ye mũhu omo piria mehna yũhu omocarine tiquina quẽ bihari coperire ohbe tuhuya. Sa yegu mũhu omoca mehna yũhu pati pahma bato ijiri copere siõ sõ tuhuya. “Poto ijierare”, niedacãhña. “Ijirota ijire”, niña mũhu, nidi Jesu Tomasure.

²⁸ Tiquiro sa nidi bato Tomasu yũhtiri:

—Mũhu yũhu puhto ijire. Yaquiro Cohãcjũ ijire mũhu, nidi Tomasu Jesure.

²⁹ —Yũhũre mũhu ihñari bato yũhũre wacũ tutuare mũhu. Apequina pehe yũhũre ihñedapeta yũhũre wacũ tutu-aeta. Sa ye tiquina mũhu yũhũoro bu-cueeta, nidi Jesu Tomasure.

Jesure mari masiatire ahri pũre ojoahye Ñu

³⁰ Sa yero peye apeye gãhũre Cohãcjũ tutuaye mehna ye ihñori Jesu usâ mehna ijiro. Tire tiquiro yerire ahri pũpu ojoa pehoeradũ yũhu. ³¹ Sa ojoa pehoerapeguta ahri pũpu yũhu yahurire ojoau “Jesuta Cristo Cohãcjũ ohoriquiro ijire. Tiquiro potota Cohãcjũ macũno ijire”, mûsa ni masiatire. Sa yena mûsa tiquirore wacũ tutuana Cohãcjũ mehna mûsa sa ijiducuatire ojoau ahri pũre.

Jesu siete tiquiro buheyequinare bajuahye

21 Came Tiberia wame tiri ditara duhtũ cahapu usâre tiquiro buhenare Jesu pari turi bajuari tja. Usâre bajuaro ohõ saha yeri tiquiro. ² Simo Pedro, Tomasu sũhũariquiro tiquina niniquiro, Natanae Galilea yehpapũ ijiri maca, Canã wame tiri maca cjũno, apequina pũaro buheyequina, Zebedeo pohna pũana usâ ohõpequinata cahmecoau.

³ Sa usâ cahmecoari bato Simo Pedro usâre ohõ saha nidi:

—Wahi wejẽgu wahau niãja, nidi tiquiro.

—Usã gãhũ mũhu mehna wahanatja, nii usã tiquirore.

Sa ni tuhasa buhaa wahau. Sa yena yucusa mehna wahau. Ti ñamine usã quehnoano wahi wejẽ bohreenata ne ihcãquiro wahi wejẽdadũ. ⁴ Bohrea parĩ quehagũ Jesu padũropũ ducugũ tiquirore ihñami usã. Sa ihñapepenata

tiqirore ihña masiedu usã. ⁵ Sa yero tiqiro pehe usãre sinituri:

—¿Ne wahi wejējari musa? nidi Jesu.

—Ne wejēdabutiaga usã, ni yuhtii usã.

⁶—Yucusa potu pehe pahrē pehe doque ñoña. Tie pehe doque ñona wahi wejēnata musa, nidi usãre.

Tiqiro sa nigū tuhona usã tiqiro nidirota doque ñou. Usã doque ño tuhasagūta peyequina wahi sajāri. Peyequina wahi sajāgū wēñanure yucsapu weje sāana cūedadu usã. ⁷ Sa yegu yuhu Jesu cahñogu Pedrose yahuu:

—Mari puhtorota ijire siqiro paduropu ducuriqiro, nii yuhu Pedrose.

Yuhu sa nigū tūhoro Jesuta tiqiro ijigū masino, Simo Pedro tiqiro suhtirore sañari. Wahi wejēno taro tiqiro suhtirore tu weriqiro ijinidi. Tiqiro suhtirore saña tuhasa, diapū uhpu ñojoaa wahari. ⁸ Sa yena usã apequina buhena yucsapu ijina, cien metro yoaro diapure pahsau usã. Sa yena wēñanure wahi peyequina sajādure yucusa mehna weje nujuau usã. ⁹ Duhtu cahapu usã wahā sagū, topu peca niti dihita asi cuñari peca ijiri. Ti peca bui tiqiro puhō cūriqirore wahire ihñau usã. Pā gūhure ihñau usã.

¹⁰ Sa usã ihñagū ihñano Jesu usãre ohō saha nidi:

—Mianogā musa wejēdiquinare meheñequinagā ne cāhtaya, nidi usãre.

¹¹ Tiqiro sa nigū Simo Pedro pehe Jesu mehna ijiriqiro yucsapu sajā, wēñanure, bujayequina wahi ciento cincuenta y tres wahi sajādure weje majari. Peyequina wahi sajāepeta wēñanure tūhrēdari.

¹²—Ihyana ahtaya, nidi Jesu usãre.

“¿Noa boro ijijari mūhu?” ni sinitueru usã tiqirore. Usã puhtoro tiqiro ijigū masii usã. ¹³ Sa yero Jesu peca cahapu esaro, pāre ne, usãre itiri. Wahi gūhure itiri.

¹⁴ Sa yero Jesu tiqiro masa wijjari bato paduropu bajuaro ihtia taha usãre tiqiro buhenare bajuaro nidi.

Jesu Simo Pedro mehna yahuducuahye

¹⁵ Usã ihyari bato Jesu Simo Pedrose sinituri:

—¿Simo Ñu macu, ahriquinare mūhu cahino yuhduoro yuhure cahijari mūhu? nidi Jesu Simo Pedrose.

—Puhto, mūhure cahijaja yuhu. Mūhure yuhu cahīgū masine mūhu, ni yuhtiri Simo Pedro.

¹⁶—Sa yegu ovejagāre tiquina nuno saha yeequinare buhaya mūhu, nidi Jesu.

Sa ni tuhasa pari turi tiqiro Simo Pedrose sinituri:

—¿Simo Ñu macu, yuhure cahijari mūhu? nidi Jesu.

—Puhto, mūhure cahijaja yuhu. Mūhure yuhu cahīgū masine mūhu, ni yuhtiri Simo Pedro.

—Ovejare cohteriqiro ovejare tiqiro quehnoano cohtero saha, yeequinare quehnoano buhe cohteya, nidi Jesu Pedrose.

¹⁷ Sa ni tuhasa pari turi Simo Pedrose sinituri:

—¿Simo Ñu macu, yuhure cahijari mūhu? nidi Jesu tja.

Ihtia taha sa ni tiqiro sinitugū tūhoro Simo Pedro tutuaro bujua witiri:

—Puhto, mūhu masi pehore. Mūhure yuhu cahīgū masine mūhu, ni yuhtiri Simo Pedro.

—Ovejare tiquina nuno saha yeequinare buhaya mūhu. ¹⁸ Ijirota mūhure niaja. Mūhu wahmu ijigu mūhu suhtire saña, mūhu cahmediropu tinie tiahye mūhu. Sa yerigu mūhu ijiepegūta came mūhu bucū ijigū, mūhu omocarine mūhu siōdoqueogū apeqiro mūhure suhtiro sāanota. Sa yero mūhu waha

dueropu mûhure neanota, nidi Jesu Simo Pedrore.

¹⁹ Sa nino Simo Pedrore dũhse waha tiquiro yariatire yahuro nidi. Camepu bucuro tiquiro wahagũ sa yeye taye ni ahye apequina tiquirore. Cohãcjũ yere Pedro yeri buhiri apequina tiquirore wejẽne taye niahye. Sa yero Pedro yariatire yahuro nidi Jesu. Sa ni yahu tuhasa, ohõ saha ni nemori Pedrore:

—Poto yũhũ buheriro sahata yeya mũhũ, nidi Jesu Pedrore.

Jesu tiquiro cahĩniquiro buheriquiro ahri pũre ojoariquiro ijire

²⁰ Tiquiro sa nigũta Pedro pehe majare ihñadoqueo, yũhure Ñure Jesu tiquiro cahñogu buherigũre tiquinare yũhũ nunũ tãgũ ihñano Pedro Jesure sinituri. Yũhũ pehe Pedro ihñarigu to pano ohõ saha nidigu ijii. “¿Pũhto, mũhure ihña tuhtiyequinare ihñoatiquiro pehe noa boro ijiagari tiquiro?” ni Jesure siniturigu ijii yũhũ. Ti pjere Jesu tiquiro pari paha ihya dujii yũhũ. Sa yero yũhure ihñano Pedro Jesure sinituri:

²¹ —¿Pũhto, ahriquiro pehe dũhse waharotari? ni sinituri.

²²—Tire mũhure yahueraja. Ahri yehpapu yũhũ tojoa tato pano ahriquirore ijiducugũ yũhũ yeatire masiedare mũhũ. Sa yegu mũhure yahueraja. Poto yũhũ buheriro sahata yeya mũhũ, nidi Jesu Pedrore.

²³ Tire tiquiro yahurire ijipihtiyequina Jesu yequina tiquina basi yahu sitemedi. Tire yahu siteye ohõ saha nimesi tiquina pehe: “Jesu tiquiro cahĩniquiro buheriquiro yariasi”, ni yahu sitemedi yũhure Jesu yequina tiquina basi. Tiquina sa niepegũta “Tiquiro yariasi”, nino niedari jimesi Jesu. “Ahri yehpapu yũhũ tojoa tato pano ahriquirore ijiducugũ yũhũ yeatire masiedare mũhũ. Sa yegu mũhure yahueraja”, nidi Jesu Pedrore.

²⁴ Jesu buherigu ahrire yahurigu, ahri pũre ojoarigu ijiaja yũhũ. Sa yena ahri yũhũ yahuye poto ijigũ masiaja mari.

²⁵ Peye apeye gũhure Jesu yeri. Tiquiro yerire mari ojoa pehogũ ti pũri ojoari pũri peye waro wahaboaga. Sa ye ti pũrine mari ihbogũ esa tuhaeraboaga ahri yehpa. Wahpaa wahaboaga, yũhũ tãhotugũ. To puno tjire.

Jesu buhe dutiro tiquiro cūriquina tiquina yerire yahuri pū ijire

—Espíritu Santo ahtarota,
niahye ahri pūre ojoariquiro

1 ¹⁻²Teófilo, ahri quitire mūhure ojoagu niaja. To pano yūhu ojoa muhtari pūre Jesu yerire, tiquiro buheyere mūhure yahu tuhasa. Tee ūhmūsepū tiquiro mūjarire yūhu yahu bato tii. Jesu tiquiro mūjato pano Espiritu Santo tutuaye mehna dutiahye tiquiro bese cūriquinare. ³Sa ye Jesu curusapū tiquiro yariari bato ihquē tahari pagū tiriquire bajuahye tiquiro cūriquinare. Cuarenta decori bato bajua bato tiahye. Sa yero tiquiro basi catiriquire ijiyere ihñoahye tiquinare. Sa bajoaro mari Pacū tiquiro puhtoro ijiyere quehnoañe buheyere yahuahye tiquinare.

⁴Jesu tiquiro cūriquina mehna ijinino tiquinare ohō saha ni yahuahye:

—Jerusalēpata ijiniña yojopare. “Espiritu Santore musare ohogutja”, yūhu Pacū tiquiro nidiquirore cohteniña. Tire tiquiro nidire musare yahuu yūhu. ⁵Ñu musare wame yero aco mehna wame yemedi. Yūhu pehe ti yūhdūoro yeitja musare. Mehenogā bato Espiritu Santore musa mehna ijiducugū yeitja musare, niahye Jesu.

Jesu ūhmūsepū mūjaa wahahye

⁶Sa ye ape taha cūnupū Olivo wame tidupū Jesu tiquinare tiquiro bajuagū ihñañe tiquina sinituahye tiquirore:

—¿Puhto, Israe yehpare tiquina ehmari yehpare dūhse ijigū usāre pari turi cūgutjari mūhu? ¿Dūhse ijigū mari acaye warore puhtoro sōgutjari mūhu? niahye tiquiro yequina.

⁷Tiquina sa nigū tūhoro Jesu ohō saha niahye:

—Mari Pacū dihita ti decore musa ya yehpare musa quehnoano ijiatire cū masine. Ti decore musare masino basioerare. ⁸Sa masiedapenata musare Espiritu Santo tiquiro wihigū Cohācǰū ye tutuayere cūonata musa. Tiquiro ye tutuayere musa cūona Jerusalē cǰenare, ijipihtiyequina Judea yehpa cǰenare, Samaria yehpa cǰenare, sa ye ijipihtiye yehpari cǰenare quehnoañe buheyere buhenata musa. Yūhu yariarire, yūhu masa mūjarire tiquinare buhenata musa, ni yahuahye Jesu tiquinare.

⁹Sa ni yahu tuhasa, Jesu ūhmūsepū mūjaa wahahye. Tiquina tiquirore ihña nūnū tā mūogūta ehmeo curua puhipū sajā, buti mūjaa wahahye. ¹⁰Sa ye tiquina Jesu mūjariquire tiquina ihña mūori watoa pūaro angele yehseye suhti sañañequina Jesu tiquiro cūriquina watoa bajoadūca sahye. ¹¹Sa ye tiquinare ohō saha niahye:

—¿Musa Galilea cǰāna, dūhse ijiro boro ihña mūoducuna niajari musa? Ahriquire Jesu ūhmūsepū mūjariquire, tiquiro mūjariro saha ahtarota, ni yahuahye angele.

Jesu cūriquina Juda mūnanore comesatiquire beseahye

¹²Sa ye Jesu yequina cūnupū Olivo wame tidupū ijiriquina dijia ta, Jerusalēpū tojoa sahye. Tū cūnupūre ihcā kilómetro yūhdūo cǰūno yoaro ijiahye Jerusalē dūhtū cahapūre. ¹³Tojoa sa, ūhmūanopū tiquina ijiri tucūpū mūjaa wahahye. Ahriquina ijiahye: Pedro, Ñu, Santiago, Andre, Felipe, Tomasu, Bartolomé, Mateo, Santiago, Simo, Juda ijiahye. Santiago pehe Alfeo macūno ijiahye. Simo pehe celote wame tiri curua cǰūno ijimediquiro ijiahye. Juda pehe Santiago acayūro ijiahye. ¹⁴Peye

tahari ahriquina ijipihtiyequina, numia mehna, María Jesu pacoro mehna, Jesu bahana mehna quehnoano cahmecoa, tutuaro mehna mari Pacure sinie tiahye.

¹⁵ Sa ye ti decorire masa peyequina cahmecoahye. Ciento veinte ijiye iji-boaya. Sa yero Pedro pehe tiqiuro mehna cjēna Cristo yequina watoa ducu, yahuahye tiquinare:

¹⁶ —Yuhū acaye, Cohācjū panopū tiqiuro niđiro sahata waharo nidi. Tire Espiritu Santo Davire yahu dutiahye Juda mūnanore. Juda mūnano Jesure ñeheatiquinare ihñoriquiro ijiri. ¹⁷ Sa yeatiqiuro ijieperota mari mehna Jesu yere yeriquiro ijimedi. Sa yero usā mehna cjūnota ijimedi, niahye Pedro.

¹⁸ Jesure ihño dutiye tiquina wapa yerire Juda mūnano pehe wiari bato tiqiuro basita wejē yariaa wahahye. Sa yero bora waha, tiqiuro cuhta misi da tuhñua waha, yariaa wahahye. Tiquiro wiari mehna apequina mehenogā yehpare dúahye. ¹⁹ Ijipihtiyequina Jerusalē cjēna masi pihti cāri jiri Juda mūnano tiqiuro ñano yerire. Sa masiñe tiqiuro ye niñeru mehna tiquina dúri yehpare Acéldama wame yeri jiri tiquina ye yahuducuye mehna. Acéldama niñe, “Dii yehpa”, niñe nine. ²⁰ Came ohō saha ni nemoahye Pedro:

—Panopū tiquina ojoariro sahata sa wahari Juda mūnano. Salmo tiqiuro ojoari pūpū ohō saha ni ojoahye:

Tiquiro wuhū cohōri wuhū ijiyahro. Sa ye apequina ti wuhure ijieracāhdo, ni, ojoahye.

Ohō gūhure ohō saha ni ojoahye:

Apequiro tiqiuro dahrayere comesariquiro ijirota, ni, ojoahye Salmopū.

²¹⁻²² Sa yena mari ihcāquiro beseihna. Ńu wame yeriquiro mūnano masare tiqiuro buheri watoa ihquēquina Jesu yequina mari mehna wahari. Tiquina mehna cjūnore ihcāquiro bese

nenno cahmene mari mehna cjūno ijiatiquirore. Jesu mehna mari ijigū mari mehna sa ijiducuriquirore besero cahmene. Sa mari beseri bato Jesu tiqiuro masa mūjarire mari mehna buherota, ni yahuahye Pedro tiqiuro acayere Cristo yequinare.

²³ Tiquiro sa nigū tuhoye pūarore bese bocahye tiquina. Ihcāquiro José Justo wame tiriquirore beseahye. Tiquiro Barsaba tiquina ni pisuriquirore ijiyahye. Sa ye apequirore Matia wame tiriquirore beseahye. ²⁴⁻²⁵ Tiquinare bese boca tuhasa, tiquina mari Pacure ohō saha ni siniahye:

—Muhū usā puhto, ijipihtiyequina masa tiquina tuhutyere masine. Ahriquina pūaro usā beseriquina ijire. Juda mūnanore comesatiquirore diquiro muhū cahmeniquirore beseaya. Jesure cohātjiano Juda mūnano pehe pecapū wahahye. Tiquirore comesariquiro Jesu tiqiuro cūriquiro ijirota. Sa yero usā mehna quehnoañe buheyere buherota, niahye tiquina mari Pacure.

²⁶ Sa niñeta Juda mūnanore comesatiquirore beseye tehe utā paca mehna doque cū mūjahye “Noa pehe sajānotari”, niñe. Matia tiqiuro quehnoano wi-jiagū, tiqiuro pehe Jesu cūriquina once cūriquina mehna cjūno tojoahye.

Espiritu Santo Jesu yequina mehna iji dūcahye

2 Sa ye Pentecoste wame tiri deco ijigū tiquina ijipihtiyequina ihcā wuhupū cahmecoahye. ² Ti pjereta wihnono tutuaro wēno saha hñmūanopū bisiro ca tahye. Sa bisiro ca tagū tuhohaye ijipihtiyequina ti wuhupū ijiriquina. ³ Sa ye peca pohna yero saha ijiye tiquina ijipihtiyequina dapu paca bui bajuahye. Ti peca pohnarigā ñehmeno yero saha bajuahye. ⁴ Sa yero Espiritu Santo wihi-ahye tiquinare tiqiuro tutuayere ohoro taro. Espiritu Santo tiquinare yedohoro

puno tiquina pehe apequina ye mehna quehnoano yahuducuahye.

⁵Ti decorire Jerusalēpū peyequina judio masa ijiahye. Mari Pacure ño peoyequina ijiahye. Tiquina macaripe cjēna ijiahye. ⁶Sa ye uhmusepū bisigū tūhoye Jesu buheyequina cahapū peyequina cahmecoahye. Masape ye yahuducuyere Jesu buheyequina tiquina yahuducugū tūhoahye. Sa tiquina yahuducugū tūhoye, tiquina tūho maria wahahye.

⁷⁻⁸—Ahyou, ¿Duhse yeye ahriquina Galilea cjēna ijiepetā quehnoano mari yere yahuducuajari? Tiquina mari masa bajaroropū ahtariquina yero sahata yahuducuye ca tare, niahye tiquina pehe.

⁹⁻¹⁰—Ijipihitiyequina mari yere yojopūre yahuducuye nine: Partia cjāna, Media cjāna, Elā cjāna, Mesopotamia cjāna, Judea cjāna, Capadocia cjāna, Ponto cjāna, Asia cjāna, Frigia cjāna, Panfilia cjāna, Egipto cjāna, Libiapū ijiye macaripū Cirene cahapū ijina, Romapū ahtarina ijiaja mari. Ihqēquina judio masa ijiaja mari. Apequina mari judio masa ijiena, judio masa ye buheyere buhenapū ijiaja mari.

¹¹Creta cjēna gūhū, Arabia cjēna gūhū ijire mari mehna. Sa yena ahriquina mari yere tiquina yahuducugū tūhoaja mari. Tiquina mari ye mehna Cohācjū tutuaye mehna tiqiro yerire yahuye nine, ni yahuducuahye masa tiquina basi.

¹²Sa niñeta tiquina tūho acuaa waha, tiquina ihñarire tiquina tūhorire quehnoano masiedahye.

—¿Ahri duhse ijiro boro ahriquina apequina ye mehna Cohācjū yere sa quehnoano yahuducuajari, mūsa tūhotugū? ni cahme sinituahye tiquina basi.

¹³Tiquina sa ni tūhotuepegūta apequina tiquina mehna cjēna bujupeahye:

—¿Duhse ahriquina sihbiori sihni, queheye niajari? ni bujupeahye apequina tiquina basi.

Pedro masare yahuahye

¹⁴Sa yero Pedro once Jesu cūriquina mehna ducu, masare yahuahye:

—Mūsa Judea yehpa cjāna, ijipihitina Jerusalēpū ijina, ahrire masiña mūsa. Yūhū yahugū tūhoya mūsa. ¹⁵Mūsa tūhotuye poto ijierare. Yojojūta nueve hora ijire. Sa ye ahriquina queherare. ¹⁶Ahriquina Cohācjū panopū tiqiro nidiro sahata yeye nine. Ti pjerūre Jore Cohācjū yere yahu mūhtariquiore, ahrire yahu dutiahye Cohācjū pehe:

¹⁷Iji bato tiye decori ijigū ohō saha ijirota: Yaquiro Espiriture masare ijipihitiyequinare ohogūtja. Sa ye mūsa pohnapū yeere yahueta. Sa ye mūsa mehna cjēna wahma pjia bajumehneñene ihñæta. Sa ye mūsa mehna cjēna bucūna quehēnopū quehēeta.

¹⁸Sa yegū yūhū cahacjēnare, yūhū cahacjēna numia gūhūre yaquiro Espiriture ohogūtja. Sa ye tiquina yahueta yeere.

¹⁹Sa yegū yūhū tutuaye mehna bajumehneñene ye ihñogūtja uhmuanopū. Yehpapū gūhūre yūhū bajumehneñene ihñogūtja: Diire, pecare, peca ohmeore ihñogūtja.

²⁰Sa yero asū deco cjūno nahitiaa waharota. Ñami cjūno dii yero saha sohāriquiore comesarota. Ohō saha waharota Cristo mūsa pūhtoro tiqiro ahtati deco, yūhū nidi deco pano. Ti decopū ihñā maria wahaeta masa. Sa yero ihyo ijiri deco ijisi. Ti deco quehnoari deco ijirota. ²¹Sa yero ohō saha ijirota. Ijipihitiyequina masa Cristore tiquina ñañene cohā duti siniñequinare tiqiro tiquinare pecapū wahaboriquinare

yuhduorota, nine Cohācjū, ni ojoahye Joel.

²² Mūsa Israe masa yuhū yahugū tūhoya: Jesu Nazare cjūno pehe Cohācjū ohoriquiro ijiri. Jesure tiquiro ohorire masa tiquina masiato saha tiquiro tutuaye mehna ye ihñori mūsare. Mūsa tire masine. ²³ Jesure ohori mūsare apequiro. Panopū Cohācjū “Sa waharota”, tiquiro nidiro sahata sa yeri apequiro. Sa yena mūsa Jesure curusapū wejē dutiri masa ñañequinare. ²⁴ Cohācjū pehe Jesure yariariquiro mūnanore masori. Pari turi ne yariasi tiquiro. Tiquiro yaria dojoerare. Sa catiducuatiquiro ijire. ²⁵ Ohō saha niahye Davi panopū cjūno Cristo tiquiro niboriro sahata:

Yuhū pūhto, yuhū mehna ijire mūhu.

Ijipihtiye decori Cohācjū yuhū pūhto yuhū caha mūhu ijigū ihñae tii yuhū cuerato saha. ²⁶⁻²⁷ Mūhu Cohācjū yuhū jeripohnare yariayequina tiquina ijiropūre ne cohāsi. Yuhūre ñanopū yuhū jeripohnare cohāsi mūhu. Yuhū mūhu cahacjū mūhure ño peogu ijiaja. Yuhū pagūre ahba dutisi mūhu. Sa yegū tutuaro bucueaja. Bucueye mehna yahuducujaja. Sa yegū mūhure Cohācjūre quehnoano wacū tutuagu ijigū cuero marieno quehnoano iji cjā. ²⁸ Yuhūre pari turi catigū yegūta mūhu. Yuhū mehna mūhu ijigū tutuaro bucueaja, ni, ojoahye Davi mūnanao Cristo tiquiro niboriro sahata.

²⁹ Acaye, ohō saha quehnoano yahugūtja mūsare Davire mari acayūro, panopū cjūnore. Tiquiro yariaa wahahye. Sa yero tiquirore tiquina yari cope yojopūre ijire. Sa yero “Yuhū pagūre ahba dutisi mūhu”, ni ojoaro tiquiro basi wame peo yahuro niedahye. ³⁰⁻³¹ Panopū Cohācjū Davi mūnanore ohō saha niahye: “Poto niita niaja. Mūhu panamena iji turiayequina mehna

cjūno mūhu yero saha ahri yehpa cjēna pūhtoro ijirota”, niahye Cohācjū Davire. Davi Cohācjū yere yahu mūhtariquiro ijiahye. Sa yero Cristore Cohācjū tiquiro pūhtoro sōatire masino, Cristo tiquiro masa mūjatire yahu mūhta tuhasahye Davi pehe. Ohō saha niahye: “Tiquiro yariayequina ijiropūre iji dojoasi. Tiquiro pagū topū ahbasi”, niahye Davi. ³² Ahriquirore Jesure Cohācjū masori. Ūsā ijipihtina ihñau. ³³ Cristo mari Pacū poto pehepū ijire dutiriquiro ijiro. Sa yero tiquiro Pacūro “Espīritu Santore yehpapū ohogūtja”, niahye tiquirore. Sa yero Cristo pehe ahriquinare Espīritu Santore ohori. Yojopūre Espīritu tiquiro yeyere mūsa ihñana nine. Sa yena mūsa tūhore. ³⁴ Davi mūnanao pehe Jesu tiquiro mūjariro sahata ūhmūsepū mūjaedahye. Sa yero tiquiro basi ohō saha niahye:

Cohācjū nidi yuhū pūhtorore: “Yuhū poto pehepū dujiya mūhu. ³⁵ Mūhure ihñā tuhtiyequinare mūhure yuhdudūca basautja yuhū”, nidi Cohācjū yuhū pūhtorore, niahye Davi mūnanao.

³⁶ Sa yena ijipihtina Israe masa ahrire quehnoano masiña mūsa: Ahriquiro Jesure mūsa curusapū wejēdiquirore mūsa pūhtoro sōri Cohācjū pehe. Tiquirore mūsare yuhduoatiquirore Cristore cūri Cohācjū, ni yahuahye masare Pedro.

³⁷ Tiquiro sa nigū tūhoye tutuaro būjua witiye, cueye masa pehe Pedro gūhure sinituahye:

—¿Ūsā acaye, dūhse yenatari ūsā? ni sinituahye tiquina.

³⁸ Tiquina sa ni sinitugū yūhtiahye Pedro gūhu:

—Mūsa ñañe yeyere būjua witina ijiya. Quehnoañe pehere comesaya. Sa yena Jesu wame mehna wame yenohrina ijiya mūsa ijipihtina. Mūsa sa yegū mūsa ñañene borota

Cohācjū. Mūsa sa yegū Espīritu Santo mūsa mehna ijirota. Cohācjū yaquiro Espīritu Santore sa oho cānota musare. ³⁹Musare, mūsa pohmare, mūsa panamena iji turiayequinare, yoropu cjēnare, ijipihtiequina Cohācjū mari puhtoro tiquiro beseriquinare, “Potota yuhduogutja musare”, ni, cūahye Cohācjū, niahye Pedro.

⁴⁰Sa ni tuhasa peye yahu nemoahye tiquiro. Sa yero tutuaro mehna yahuahye tiquinare:

—Ahri yehpa cjēnare tiquina nāno yeri buhirire buhiri dahrerota Cohācjū. Sa yena mūsa pehe Cohācjū yequina ijiya. Mūsa sa ijigū tiquiro musare buhiri dahresi, niahye Pedro masare.

⁴¹Tiquiro sa nigū tuhoye peyequina tiquiro yahuducuyere quehnoano tūhoahye. Sa yero tiquinare tiquiro wame yeahye. Sa ye Cohācjū yequina mehna cjēna tres mil masa waha nemoahye. ⁴²Sa ye tiquina masa Cristo cūriquina mehna decoripe ijie tiahye. Sa ye tiquina ti buheyere decoripe tūhoe tiahye. Tiquina ihyayere cahme iti, Cohācjūre sini, Cristo cūriquina mehna quehnoano ijie tiahye.

Jesu yequina coā iji dūcayequina tiquina ijiye tiyere yahuahye

⁴³Sa ye Cohācjū tutuaye mehna ye ihñoahye Jesu cūriquina. Tiquina sa yegū ihñañe masa ijipihtiequina ihña maria wahae tiahye. ⁴⁴Sa ye ijipihtiequina Jesure wacū tutuayequina cahmecoā, quehnoano ijie tiahye. Sa ye tiquina yere cahme itie tiahye. ⁴⁵Tiquina yere dua, ijipihtiequinare apee boro marieñequinare tiquinape ohoe tiahye tiquina. ⁴⁶Sa ye decoripe tiquina Cohācjū wuhupū cahmecoae tiahye. Ijipihtiequina tiquina ye wuhusepū bucueye mehna cahmecoā, ihyae tiahye. ⁴⁷Tiquina sa cahmecoā,

“Cohācjū quehnoariquiro ijire”, ni ño peoe tiahye. Sa ye apequina masa tiquinare cahme yuhdūe tiahye. Sa yero decoripe Cohācjū apequinare tiquiro yequina wahagū yee tiahye.

Tini masieniquirore yuhduoahye mari Pacu

3 Ñamicahapū tres ijigū Cohācjū mehna yahuducuri pje ijigū Pedro, Ñu mehna Cohācjū wuhupū wahaye niahye. ²Decoripe ti wuhū cjā sopecaha quehnoari sopecaha wame tiri sopecahapū apequina ihcāquiro masūnore ne cāhta, duhu dapoe tiahye. Tiquiro masūno pehe wahma masa bajaropūta tini masiedahye. Sa yero tiquiro ti sopecaha caha niñerure sini dujie tiahye ti wuhupū sajāñequinare. ³Sa ye Pedro, Ñu mehna ti wuhupū tiquina esadūcagū tini masieniquiro pehe tiquinare ihña, niñerure siniahye. ⁴Sa ye Pedro gūhu tiquirore ihña, Pedro pehe ohō saha niahye:

—Ūsāre ihñaña mūhū, niahye Pedro tiquirore.

⁵Tiquiro sa nigū tuhoro “Ahriquina mehenogā yuhūre niñerure ohoeta”, ni tuhōturo ihñadoque ohō, tūhoahye tiquinare. ⁶Tiquiro sa ni tuhōtuepegūta Pedro tiquirore ohō saha ni yahuahye:

—Niñerure cuoeraja yuhū. Cuoerapeita, ahrire yeitja mūhūre. Jesu-cristo Nazare cjūno tiquiro tutuaye mehna tiniña mūhū, niahye Pedro tini masieniquirore.

⁷Sa ninota tiquiro omocare poto pehe cjā omocare ñehe, tiquirore weje wahcō docoahye. Ti pjeta tini masieniquirore tiquiro ñecari tutuāa wahahye. ⁸Tiquiro sa wahari bato tiquiro wahcādūca sa, waha dūcahye. Sa yero tiquiro waha, uhpu maa, “Cohācjū quehnoariquiro ijire”, ni bucueahye. Sa bucuro tiquina mehna Cohācjū wuhupū sajā wahahye. ⁹Tiquiro sa tinigū “Cohācjū

quehnoariquiro ijire”, tiquiro nigũ masa ijipihtiyequina tiquirore ihñahye. ¹⁰Sa ye masa tiquirore ihña masiahye. Tiquiro Cohãcjũ wuhũ cjã sopecaha quehnoari sopecaha caha niñerure tiquiro sini dujirire masiahye masa. Sa ye tiquiro tinigũ ihñañe, ihña maria wahahye.

Cohãcjũ wuhũpu Pedro masare bueahye

¹¹Sa ye tini masieniquiro Pedro gũhure tiquiro ñeheni watoa, masa ijipihtiyequina ihña maria waha, quehnoari paapu Salomo wame tiri paapu oma cã, cahmecoahye. ¹²Tiquina sa cahmecoari bato Pedro pehe yahuahye tiquinare:

—¿Musa Israe masa, duhse yena ahriquirore ihña mariajari? ¿Duhse yena usãre musa ihña nunuajari? Usã pehe usã ye tutuaye mehna Cohãcjũre usã wacũ tutuaye mehna usã esa tuharo ahriquirore tinigũ yerũ usã. ¹³Abrahã, Isaac, Jacob mari ñecusumua panopũ cjẽna Cohãcjũre ño peoe tiahye. Tiquiro Cohãcjũ pehe tiquiro cahacjũnore Jesure tutuariquiro, quehnoariquiro tiquiro ijigũ musare ihñoer tiri. Musa Jesure tiquirore ihña tuhtiyequinare ohori. Sa yena Pilato tiquirore peresu wio duepegũta musa pehe tiquirore wio gũ cahmedari. Pilatore Jesure ohori musa. ¹⁴Pilato tiquirore wio duamedĩ. Tiquiro sa wio duepegũta musa Jesure quehnoariquirore, quehnoano yeriquirore cahmedana, apequirore masa wejẽdiquiro pehere wio dutiri musa. ¹⁵Sa yena Jesure marine catigũ yeriquirore wejẽdi musa, usã acaye judio masa. Tiquiro yariagũ Cohãcjũ tiquirore masori. Tire usã ihñaũ. ¹⁶Sa yena usã tiquirore wacũ tutuana ijiãja. Usã sa wacũ tutuagũ ihñano ahriquirore musa yojopũ ihñariquirore musa ihña

masiniquirore Jesu pehe tiquiro tutuaye mehna tinigũ yeri.

¹⁷Yuhũ acaye, mari puhtoahye mehna Jesure quehnoano masiedapenata tiquirore wejẽdi musa. Tire masiaja yuhũ. ¹⁸Sa ye panopũ cjẽna Cohãcjũ yere yahu muhtariquina Cohãcjũ tiquinare tiquiro yahu dutiriro sahata yahuahye tiquina. “Cristo ñano yuhũrota”, ni yahuahye tiquina. Tiquina sa ni yahuriro sahata sa wahari yojopũre. ¹⁹Sa yena yojopũre musa ñaño yerire bujua witina ijiãja. Quehnoañe pehere comesaya. Cristore wacũ tutuaya. Sa yero musa ñaño yerire borota Cohãcjũ. Sa yero musare bucueye decori cũnota tiquiro. Sa yena quehnoano jeri sajãnata. ²⁰Sa yero Cohãcjũ Cristore tiquiro beseriquirore musare ohorota. Cristo Jesuta ijire. ²¹Cohãcjũ cahapu iji nine Jesu. Panopũ Cohãcjũ tiquiro yere yahu muhtariquinare yahuyu dutiahye. Masare ahri yehpa gũhure tiquiro yeatire yahuyu dutiahye. Sa yero tiquiro yahuriro sahata yojopũre ijipihtiyere quehnono nine. Quehno tuhasaro pari turi Cristore ahri yehpapũ ohorota. ²²Moise tire yahuro ohõ saha niahye: “Mari mehna cjũnore mari acayũrore Cohãcjũ yere yahu muhtariquirore Cohãcjũ mari puhtoro ohorota musare. Yuhũre tiquiro ohoriro saha ohorota tiquiro gũhure. Sa yena musare tiquiro yahugũ tuho pihti cãhña musa. ²³Ohõ saha ijirota. Ijipihtiyequina tiquirore tuhoerariquinare, tiquiro dutiyere yerariquinare tiquiro cohãnota. Cohãcjũ yequina mehna cjẽna ijisi tiquina”, niahye Moise.

²⁴Ijipihtiyequina Cohãcjũ yere yahu muhtariquinape Samuel, tiquiro bato ijiequina gũhũ ahri decorire yahuahye. ²⁵Mari ñecusumũare panopũ cjẽnare yahuahye Cohãcjũ. Mari gũhure sa ni yahuro niahye. Abrahãre

tiquiro nidiro sahata mari gũhure ni yahuro niahye. Ohõ saha ni yahuahye Cohãcjũ Abrahãre: “Ijipihtiri yehpa cjẽnare quehnoano yeitja. Ohõ saha tire yeitja: Camepũ iji nunũ târiquiuro mũhũ acayũro pehe masare quehnoano ye basarota yũhure”, niahye Cohãcjũ Abrahãre. ²⁶Sa yero Cohãcjũ tiquiro macũnare mari cahapũ oho mũhtari mari ñaũe yeyere duhu dutiatiquirore. Sa yero marine tiquiro quehnoano yeri, niahye Pedro tiquinare.

**Pedro, Ñũ mehna
puhtoare yahuducuahye**

4¹⁻³ Masa mehna tiquiro yahuducuri watoa pahia, Cohãcjũ wũhure cohteyequina surara puhtoro, saduceo masa gũhũ tiquinare tuhoahye. Ohõ saha ni buheahye Pedro Ñũ mehna masare:

—Jesu tiquiro yariari bato masa mũjaa wahari. Tiquiro sa masagũ ihũana mari gũhũ came mari tiquiro yequina mari masa mũjatire masiaja mari, ni yahuahye Pedro gũhũ.

Tiquina sa nigũ tuhoye puhtoa pehe tiquina mehna usuahye. Sa usuaye nahi quehagũ ihũaũe tiquina Pedore, apequina Jesu cũriquina gũhure ñehe, peresu yeahye. ⁴Puhtoa tiquina sa cahmedapegũta peyequina Cohãcjũ yere tuhoyequina pehe “Ijirota ijire”, ni tuhoahye. Sa ye Jesu yequina peyequina sajahye. Tiquinare umua seh sarore mari queogũ Jesure wacũ tutuayequina cinco mil masa ijiahye.

⁵Sa ye ape decopũ ti maca cjẽna puhtoa, bucũna, judio masa buheyequina mehna Jerusalẽpũ cahmecoahye. ⁶Sa yero pahia puhtoro, Anãs wame tiriquiuro topũ ijiahye. Tiquiro acaye gũhũ ijiahye. Caifa, Ñũ, Alejandro, apequina mehna Anãs acaye gũhũ ijiahye. ⁷Sa ye tiquina Pedro gũhure tiquina cahmedoqueogũ, surara pehe puhtoa watoapũ tiquinare

ne wihi docoahye. Tiquina sa yeri bato puhtoa sinituahye Pedro gũhure:

—¿Noa ye tutuaye mehna mũsa tiquirore tinigũ yeari? ¿Noa ijiajari mũsare tire ye dutiriquiro? ni, sinituahye tiquina.

⁸Tiquina sa nigũ tuhoro Espĩritu Santo tutuaye mehna yahuahye Pedro tiquinare:

⁹—¿Mũsa puhtoa, mũsa bucũna, usã tini masieniquireore quehnoa wahagũ usã yerire sinituna niajari mũsa?

¹⁰Ahrire masiũna mũsa ijipihtina, Israe masa. Ahrire Jesucristo sa yeri. Jesu Nazare cjũno, mũsa curusapũ wejẽdiquiro, Cohãcjũ tiquiro masoriquiro pehe ahriquiuro tini masieniquireore quehnoa wahagũ yeri. Sa yena ahriquireore yojopũre mũsa ihũonopũ tiquiro tinigũ ihũare mũsa. Ohõ saha nine Cohãcjũ yere tiquina ojoari pũpũ Cristore yahuro:

¹¹“Ahriquiuro utã yero saha ijiriquireore ijire. Utãre wũhũ dahreatiquina tiquina cohãno saha masa tiquirore cohãri. Tiquina sa yepegũta yojopũre wũhũ dahreriquireore wũhure yeye tiquina cũ mũhtari utãre tiquina cũno saha Cohãcjũ tiquirore puhtoro sũri. Tiquiro Cristo pehe mariedagũ Cohãcjũ yequina wahaeraboaya masa. Tiquiro sa ihyo ijiriquireore ijierapegũta mũsa mari puhtoa mehna tiquirore cahmedari. Mũsa sa cahmedapegũta Cohãcjũ pehe tiquirore mari puhtoro sũri”, ni ojoahye panopũre. ¹²Ne, apequiuro masare pecapũ wahaboriquinare yũhũoriquireore ne mariedare. Ahri yehpapũre Jesu dihita masare yũhũoriquireore ijire. Ne apequina tiquiro yero saha ijieyequina ne mariedare, ni yahuahye Pedro tiquinare.

¹³Tiquiro sa ni yahuri bato Pedro, Ñũ mehna buhemehneñequina tiquina ijigũ ihũaũe, cuero marieno tiquina buhegũ ihũaũe, puhtoa, bucũna, ju-

dio masa buheyequina mehna tuho maria wahahye. Sa ye Jesu yero saha tiquina buhegũ ihñañe, ohõ saha masiahye tiquina: “Pedro, Ñu gũhu potota Jesu mehna cjẽna ijire ahriquina”, ni, masiahye tiquina. ¹⁴Sa yero tini masieniquiro ijimediquiro Pedro gũhu mehna ijiahye. Tiquiro quehnoariquiro ijigũ ihñañe puhtoa, bucuna, judio masa buheyequina mehna. Sa ye tiquina Pedro gũhure “Ñano yeye nine”, ni yahusã masiedahye. ¹⁵Sa yahusã masiedahye, puhtoa tiquina cahmecoari tucũpu ijieyeyequinare Pedro gũhure wijia dutiahye. ¹⁶Tiquina wijari bato tiquina basi ohõ saha ni yahuducuahye:

—¿Ahriquinare dũhse yenatari mari? ni, yahuducuahye tiquina.

Ohõ saha ni yahuducu nemoahye:

—Pedro, Ñu mehna Cohãcjũ tutu-aye mehna tini masieniquirore tinigũ yeri jiri. Sa ye Jerusalẽ cjẽna ijipihiyequina tiquina sa yerire masidi. Sa yena mari pehe “Sa yerari tiquina”, ni masiedaja mari. ¹⁷Sa yena Jesu tiquiro buherire apequinare buhe dutieracũhna tiquinare, “Apequina ti buheyere cahmeari”, nina, ni yahuducuahye tiquina basi.

¹⁸Sa ni yahuducu tuhasa Pedro gũhure pijio, ohõ saha niahye:

—Jesu tiquiro buherire ne buheracãhña apequinare. Tire ne yahuducueracãhña, nimahye tiquinare.

¹⁹Tiquina sa nigũ tuhoye Pedro, Ñu mehna ohõ saha niahye tiquinare:

—Musa ohõ saha nigũ musare yuhtina, Cohãcjũ pehere yũhdũdũcana niboaga usã. ¿Noa pehere usã yũhtigũ cahmeajari musa? ¿Musa pehere usã yũhtigũ cahmeajari musa? ¿O Cohãcjũ pehere usã yũhtigũ cahmedajari musa? ²⁰Usã pehere usã ihñarire, usã tuhõrre usãre nũono basioerare, ni yũhtiahye Pedro, Ñu mehna.

²¹Tiquina sa nigũ tuhoye puhtoa pehe pari turi dutimahye tiquinare tja:

—Jesu tiquiro buherire musa buheri buhiri ñano yũhdũnata musa, nimahye puhtoa tiquinare.

“Ñu, Pedro mehna ñano yeye nine”, ni masiedari jiri tiquina. Sa ye masa pehe tini masieniquiro tiquiro yũhdũgũ ihñañe, “Cohãcjũ potota quehnoariquiro ijire”, niahye masa. Tiquina sa nigũ tuhoye puhtoa pehe Pedro gũhure buhiri dahre masieda, tiquinare wioahye. ²²Tini masieniquiro, tiquina yũhdũoriquiro cuarenta cahmari cõoriquiro ijiahye.

Jesu yequina tiquina cueratire siniahye Cohãcjũre

²³Sa ye Pedro, Ñu mehna tiquina mehna cjẽna cahapu esa, pahia puhtoa, bucuna tiquinare tiquina nidire yahuahye. ²⁴Tiquina sa nigũ tuhoye tiquina ijipihiyequina mari Pacure Cohãcjũre siniahye:

—Usã puhõ, mũhu uhmũsere, yehpare, mări gũhure yerigu, ijipihiyequina catieyeyequinare yerigu ijire mũhu. ²⁵Mũhu yaquiro Espĩritu Santo usã ñecu mũnano Davire mũhu cahacjũnore ahrire yahu dutiahye mũhu nidiro sahata:

¿Dũhse ye Israe masa ijieyeyequina usuajari? Tuho masieñequina ijire masa.

²⁶Peye yehpari cjẽna puhõ cahmeco, mari puhõro Cohãcjũre, tiquiro puhõro sõriquirõ Cristo gũhure ihña tuhti, ñano ye duare tiquinare, ni yahu dutiahye mũhu Davire panõpũre.

²⁷Sa tjire. Ahri macapu Herode, Poncio Pilato, judio masa ijieyeyequina, judio masa mehna mũhu beseriquiro Jesure quehnoariquiro mũhu cahacjũnore wejẽ duaye, cahmecoari. ²⁸Ti pje mũhu cahmediro sahata “Sa waharota”, mũhu nidiro sahata

yeri tiquina. Mũhũ masiñe mehna sa ni yahuahye mũhũ. ²⁹Sa yegũ usã pũhto, tiquina usãre “Mũsa buheri buhiri ñano yũhdũnata”, tiquina nidire wacũña mũhũ. Usãre yũhdũoya. Sa yegũ usãre mũhũ cahacjãnare cuero marieno mũhũ buheyere yahu dutiya usãre. ³⁰Mũhũ tutuaye mehna dohatiyequinare yũhdũoya. Sa yegũ mũhũ buheyere cuero marieno yahu dutiya usãre. Sa yegũ Jesu quehnoariquiro mũhũ cahacjũno tiquiro tutuaye mehna ye ihũno dutiya usãre. Sa yegũ dohatiyequinare usã yũhdũ dutigũ tiquiro tutuaye mehna yedohoya usãre, ni siniahye tiquina mari Pacure.

³¹Tiquina sa ni sinidi bato, tiquina cahmecoari wũhũ ñũhmia wahahye. Sa ñũhmigũta Espĩritu Santo tiquiro tutuaye mehna wacũ tutuayequina wahagũ yeahye tiquinare. Sa wahaye, Espĩritu Santo tiquiro dutiriro sahata yeye, cuero marieno Cohãcjũ yere yahuahye tiquina.

Jesu yequina tiquina yere itie tiahye

³²⁻³³Sa ye Cohãcjũ tiquiro tutuaye mehna tiquina Jesu cũriquina ohõ saha ni yahue tiahye masare: “Jesu tiquiro masarire usã ihũaũ”, ni, yahue tiahye tiquina masare. Sa yero tiquinare ijipihtiyequinare Cohãcjũ quehnoano yedohoducue tiahye. Sa ye Jesure wacũ tutuayequina peyequina ijiye, tiquina ihcãno saha tũhotuyequina ijie tiahye. Sa ye tiquina yere, tiquina doeri cjẽne “Yee dihita ijire”, ne nieda tiahye. Tiquina ijipihtiyequina tiquina yere apee boro marieñequinare tiquina mehna cjẽnare itie tiahye. ³⁴Sa ye tiquina mehna cjẽna pejecũoyequina marieda tiahye. Tiquina mehna cjẽna dihta cũoyequina, wũhuse cũoyequina tiquina yere duaehye. ³⁵Sa duaye tiquina wapatarire ne cãhta, Jesu cũriquinare ohoe tiahye. Sa ye tiquina pehe tire tiquina mehna cjẽnare itie

tiahye. Ijipihtiyequina cũoyequinare itie tiahye. ³⁶Ti pjere ihcãquiro tiquina mehna cjũno Josẽ wame tiriquiro ijiahye. Jesu cũriquina Josẽre Bernabẽ wame yeahye. Tiquiro wame Bernabẽ “Masare bucueriquiro ijire”, nine griego ye mehna. Tiquiro Levĩ ya curua cjũno Chipre nucũo cjũno ijiahye. ³⁷Sa yero tiquiro wese cũoriquiro ijiro tire duaehye. Sa yero tiquiro wapatarire Jesu cũriquinare ohoahye tiquiro apequinare iti dutiro.

Anania tiquiro namono Safira mehna ni mehoahye

5 Apequina gũhũ Bernabẽ yero saha yemahye. Tiquina Anania wame tiriquiro, tiquiro namono Safira wame tiricoro ijiahye. Tiquina ya wesere duaehye tiquiro. ²Sa dueperota tiquiro wapatarire tiquiro basi neahye. Tiquiro namono gũhũ tiquiro sa yerire masiahye. Sa yero tiquina wapatarire tiquina dũharire ne cãhta, Jesu cũriquinare ohoahye Anania pehe. Sa ohoro “Oho pehogũ niaja”, nimahye tiquiro. ³Tiquiro sa yegũ ihũnano Pedro tiquirore yahuahye:

—Anania, watĩno mũhũre ni meho dutiri jiri Espĩritu Santore. Sa yegũ mũhũ ya yehpare dua, mũhũ wapatarire mũhũ basi nedi jiri. ⁴Mũhũ duato pano mũhũ ya wese ijiri. Sa yero mũhũ duari bato mũhũ ye wapata ijiri. ¿Sa yegũ dũhse ijiro boro sa ni mehoari mũhũ? Mũhũ usã dihitarẽ ni mehoedari. Cohãcjũ gũhũre ni mehoari mũhũ, niahye Pedro tiquirore.

⁵Tiquiro sa nigũ tũhorota, Anania pehe doque quehe sa, yariaa wahahye. Sa ye ijipihtiyequina tiquiro sa wahagũ masiñe, tutuaro cueahye. ⁶Tiquiro yariari bato wahma pjia ahta, tiquiro pagũre suhtiro cahsero mehna wahme, sopecahapũ ne wijia, yahye tiquirore.

⁷ Sa ye ihtia hora bato Anania m̄n̄n̄ano namono, tiquiro yariarire masiedaro Pedro cahap̄u sajāhye. ⁸ Sa yero Pedro ticorore ohō saha niahye:

—¿Musa ya wesere duatjiāna noho puno wapatarī musa? niahye tiquiro.

Sa yero ticoro man̄no m̄n̄n̄ano tiquiro nidiro punota, “To punota wapatau usā”, ni yahumahye ticoro.

⁹ Sa yero Pedro yahuahye ticorore:

—¿Duhse yena musa ihcāno saha Cohācjū yaquiro Esp̄iture ni meho duajari? Tuhoya yojop̄ure. M̄h̄u man̄no m̄n̄n̄anore yariquina ahtare. M̄h̄u gūh̄ure m̄h̄u paḡure neñe taye nine, niahye Pedro.

¹⁰ Tiquiro sa ni yahuḡta ticoro doque quehe sa yariaa wahahye. Sa ye wahma pjia ti wuh̄ure sajā wihi, ticoro paḡure ne wijiaa wahahye. Ne wijia ticorore ne cāa wahahye. Ne cā, ticoro man̄no m̄n̄n̄ano pari paha yahye. ¹¹ Sa ye Jesu yequina ijipih̄tiyequina apequina tire t̄hoye cue yuh̄duahye.

Jesu cūriquina Cohācjū tutuaye mehna ye ihñeahye

¹² Sa ye masa watoap̄u Jesu cūriquina peye tahari Cohācjū tutuaye mehna ye ihñoe tiahye. Sa ye tiquina Salomo wame tiri tucūp̄u quehnoari tucūp̄u cahmecoae tiahye. ¹³ Sa ye apequina tiquinare cueye, tiquina cahap̄u wahaera tiahye. Sa cuepeta tiquinare Jesu cūriquinare, “Quehnoañequina ijire ahriquina”, nie tiahye masa. ¹⁴ Sa ye um̄a, numia peyequina Jesure wacū tutua d̄cahye. ¹⁵ Sa ye tiquina dohatiyequinare ne cāhta, coma cjūñe mehna pū ta, duhu cūe tiahye mahap̄u tiquinare. Sa ye Pedro tiquinare tiquiro ña peogū cahmeahye tiquinare ne cāhtariquina pehe dohatiyequina tiquina yuh̄dugū cahmeñe. Tiquinare tiquiro ña peeragū Pedro tiquina bui wat̄idoque peogū cahmeahye tiquina. Ti

dihitare cahmeahye tiquina yuh̄duato saha. ¹⁶ Sa ye Jerusalē caha ijiye macari cjēna gūh̄u dohatiyequinare, watīa mehna ijiyequina gūh̄ure ne cāhtae tiahye. Ijipih̄tiyequina tiquina paḡuri quehnoa wahahye.

Jesu cūriquinare apequina ñano yee tiahye

¹⁷ Tiquina sa yegū ihñañe pahia p̄h̄toro, tiquiro mehna cjēna mehna Pedro gūh̄ure ihñā tuhtiahye. Pahia p̄h̄toro mehna cjēna saduceo masa ijiyahye. ¹⁸ Sa ye tiquina usua yuh̄dua, Jesu cūriquinare ñehe, peresu yeahye. ¹⁹ Sa yero ñamip̄u Cohācjū yaquiro angel p̄oahye tiquinare peresup̄u dujiyequinare. Sa ye tiquinare wijia ta dutiro yahuahye angel:

²⁰—Cohācjū wuh̄up̄u wahaya. Ti wuh̄up̄u ijina Cohācjū tiquiro masorire ahri quehnoañe buheyere yahuya masare, niahye angel tiquinare.

²¹ Tiquiro sa nigū t̄hoye, ñami cjūno Cohācjū wuh̄up̄u sajā, masare buheahye tiquina. Ti decota pahia p̄h̄toro, tiquiro mehna cjēna, Israe masa p̄h̄toa mehna cahmecoa, Jesu cūriquinare peresup̄u ijiyequinare ne cāhta dutimahye surara p̄h̄toare. ²² Sa niepeḡta surara p̄h̄toa peresu tiquina yeri wuh̄up̄u waha, ihñahye. Tiquinare bocaerahye. Bocaera, tojoaa wahahye. Tojoa sa yahuahye tiquina p̄h̄toare:

²³—Peresup̄u ijiye sope pahmari bihari pahmari dihita ijiri. Sa ye ti pahmari cahap̄u tiquina peresu yeriquinare cohteyequina ducuri. Sa ihñau usā. Usā sa ihñaepeḡta p̄o s̄aa, usā ihñagū, tiquina peresu yeriquina mariedari, ni yahuahye tiquina.

²⁴ Tiquina sa nigū t̄hoye, surara Cohācjū wuh̄ure cohteyequina p̄h̄toro, pahia p̄h̄toa mehna tire t̄ho, t̄ho maria wahahye. “¿Duhse waha sohtori tirotari ahri, tiquina sa yeye?” ni, t̄ho-

tuahye tiquina. ²⁵ Sa yero tiquina cahap̄ apequiro ahta, tiquinare yahuahye: —Musa peresu yeriquina Cohācjū wuhap̄ ijiri. Ihñana wahaya. Ti wuhap̄ masare buheye nidi tiquina, ni yahuahye.

²⁶ Tiquiro sa nigū tuhoro, surara puh-toro tiquiro yequina surara mehna waha, Jesu cūriquinare pari turi ñehe cāhtahye tja. Sa ñehepeta tiquinare surara tuhtierahye. Sa ye tiquinare quēboriquina ijiepetā, masare cueye quēdahye tiquinare. “Ahriquinare mari quēgū apequina masa pehe utā paca mehna doqueeta marine”, ni, tuh-tuahye tiquina surara pehe. ²⁷ Sa ye tiquinare ne cāhta, puh-toa caha duhu docoahye tiquina. Tiquina sa ne wihi duhu docogū pahia puh-toro tiquinare tuhtiahye:

²⁸ —Musare usā tutuaro dutimi. “Jesu yere buheracāhña”, nimi usā musare. Usā sa niepegūta musa pehe ijipihtiey-quina Jerusalē cjēnare buheri musa. Jesu tiquiro yariari buhiri, usāre buhiri tigū ye duana niaga musa, niahye puh-toro pehe.

²⁹ Tiquiro sa nigū tuhoro Pedro pehe apequina Jesu cūriquina mehna yuhtiahye:

—Cohācjū dutiri pehere ye muh-tanatja. Sa yena came Cohācjū cahmegū masa tiquina dutiyere yematja. ³⁰ Cohācjū, mari acaye panop̄ cjēna puh-toro Jesure masori jiri. Tiquirota ijire musa curusap̄ quē biha wejēdiquiro. ³¹ Jesure “Quehnoagu ijire”, ni, tiquiro poto pehe duji dutiri Jesure tiquiro Pacuro pehe. Sa yero Jesu masa puh-toro, masare masoriquiro ijiro, Israe masare tiquina ñañe yerire bujua witiyequina iji dutiro, tiquina ñañene cohā duare Jesu. ³² Sa yena usā pehe Jesu tiquiro yerire ihñarina ijina tire yahua ja usā. Espiritu Santo tire ihñariquiro ijiro yahure tiquiro gūh. Tiquirore Espiritu Santore

Cohācjū ohori. Ijipihtieyquina Cohācjū dutiyere yeyequinare tiquiro Espiritu Santore ohori, ni yahuahye tiquinare.

³³ Tiquiro sa nigū tuhoye puh-toa pehe usua yuhduahye. Sa ye tiquina Jesu cūriquinare wejē duamahye. ³⁴ Sa wejē duepegūta Gamalie, fariseo masano top̄ ijiriquiro tiquinare “Wejēari”, nino tiquinare yahuro taro niahye. Tiquiro puh-toa mehna cjūno, dutiyere buheriquiro ijigū, masa tiquirore ño peo tiahye. Tiquiro Jesu cūriquinare mehenogā cohte dutiro ape siep̄ tiquinare ne cā dutiahye surarare. Tiquina sa ne cāri bato tiquiro yahuahye masare:

³⁵ —Musa Israe masa, ahriquinare musa yeatire quehnoano tuhutuya “Musap̄ wejēari”, nina. ³⁶ Wacūña Teuda mñanore. Tiquiro basi “Masare yuhduducagu ijiaja yuh”, nidi masare. Sa ye masa peyequina cuatro cientos masa tiquiro mehna cjēna tojoari. Sa ye apequina pehe tiquirore wejēdi jiri. Tiquiro buheyere buheriquina pehe waha sitea wahari jiri. Sa ye tiquina mña yojop̄are mariedare. ³⁷ Came masare tiquina queori pje ijigū Galilea cjūno Juda wame tiriquiro mñano masare tiquiro buhegū tiquiro mehna masa peyequina tojoari. Tiquiro gūh yariaa wahari jiri. Sa ye tiquiro yequina ijipihtieyquina waha sitea wahari jiri. ³⁸ Sa nigū musare yojop̄ ahrire yahugū niaja. Sa ihña cāhña ahriquinare Jesu yere yahuyequinare. Sa ye ahri buheye, ahriquina ye buheye Cohācjū ye buheye ijieraro, pihtia waharota Teuda gūh tiquina ye buheye ti pihtiro sahata. ³⁹ Sa ijiepegūta ahri Cohācjū ye buheye ijiro, ne pihtisi. Ahri buheye Cohācjū ye ijigū ne ahrire butigū ye masiedare musa. Musa ahrire butigū ye duana Cohācjū mehna cahmequena niboaga musa, niahye Gamalie tiquinare.

⁴⁰Tiquiro sa ni yahugū tūhoye, “Ijirota ijire”, ni tūhotuahye masa. Sa ye tiquina Jesu cūriquinare pijio, tiquina wihigū ihñañe, tiquinare tanahye. “Jesu yere buheracāhña mūsa”, ni tuhasa, tiquinare waha dutiahye. ⁴¹Tiquina sa waha dutigū tūhoye tiquina puhtoa cahapū ijiriquina wahaa wahahye. Jesu yere tiquina yerī buhiri ñano yūhdūye tutuaro bucueahye Jesu cūriquina. ⁴²Sa ye decoripe Cohācjū wūhūpū, tiquina ye wūhusepū Cristo Jesu ye buheyere yahue tiahye tiquina.

Siete yedohoyequinare beseahye Jesu yequina

6 Ti decorire Jesu buheyequina peyequina wahahye. Sa ye judio masa tiquina quehnoano yeragū ihñañe griego masa pehe tiquina mehna cahme tuhtiahye Jesu yequina dihita ijiepetā. Griego masa wape wiha numiare decoripe tiquina ihyayere quehnoano tiquina itieragū ihñañe, judio masare tuhtiahye. ²Sa ye doce Jesu cūriquina, peyequina Jesu buheyequinare tiquina cahapū pijio, ohō saha ni yahuahye:

—Ūsā Cohācjū yere buhena ijiaja.

Ihyayere itiborina ijieraja ūsā.

³Mūsa ūsā acaye, siete ūmūare, “Quehnoañequina”,

apequina tiquina niñequinare, quehnoano tūho masiñequinare, Espīritu Santo cūoyequinare macaña. Tiquinare ihyayere iti dutiya mūsa. ⁴Sa yena ūsā pehe decoripe Cohācjūre sini, Cohācjū yere buhenatja, niahye tiquina Jesu cūriquina.

⁵Tiquina sa nigū tūhoye, “Au, sata yeihna”, niahye tiquina ijipihtiequina Jesu yequina. Sa ye Estebāre Cristore wacū tutuariquiore, Espīritu Santo tutuayere pajiro cūoriquiore beseahye tiquina. Apequina gūhūre beseahye. Felipere, Prócorore, Nicanore, Timore, Parmenare, Nicolare ihyaye

itiatiquinare beseahye tiquina. Nicola pehe judio masūno ijieriquiro Antioquíā cjūno judio masa ye buheyere cahmeno, tiquina mehna sajāmediquiro ijiahye. ⁶Tiquina beseriquinare Jesu cūriquina cahapū ne wihiahye apequina Jesu yequina pehe. Tiquina sa ne wihigū ihñañe tiquina Cohācjūre sini basaye, tiquina beseriquina bui omocarine duhu peohaye.

⁷Sa ye ti yehpa cjēna Cohācjū yere masi pihti cjūne niahye. Sa ye Jerusalēpū ijiyequina Jesu buheyequina peyequina wahahye. Sa ye pahia gūhū peyequina Jesu yequina wahahye.

Apequina Estebāre ñeheahye

⁸Sa yero Estebā Cohācjū tutuayere cūoriquiore ijiahye. Tiquiro Cohācjū quehnoano yenohriquiore ijiahye. Sa yero tiquiro Cohācjū tutuaye mehna ye ihñoahye masa tiquina ihño.

⁹Tiquiro sa yepegūta judio masa tiquina buheri wūhū cjēna tiquirore ihña tuhtiahye. Sa ye tiquiro mehna cahme duse tini wiaye niahye. Cahācjēna ijirire yūhdū wiritiquina wame tiyequina ijiahye tiquina. Cirene cjēna, Alejandría cjēna, Cilicia cjēna, Asia cjēna mehna peyequina ijiahye tiquina. ¹⁰Sa ye Estebā quehnoano masiniquiro Espīritu Santore pajiro cūoriquiore tiquiro yahuducugū tūhoye tiquina “Mūhū nidi poto ijierare”, tiquirore ni ihño masiedahye. ¹¹Sa tūho dueraye tiquina apequinare ni meho dutiye, wapa yehye tiquinare. Tiquina sa ni meho dutigū ohō saha ni yahusāmahye tiquina:

—Ahriquiore Cohācjūre tiquiro ñano yahuducugū, Moiserere tiquiro ñano yahuducugū gūhūre ūsā tūhou, ni yahusāmahye ni mehoñequina pehe apequinare.

¹²Tiquina sa nigū tūhoye masa, judio masa buheyequina, bucūna gūhū

tiquiro mehna usuahye. Sa ye tiquina Estebäre ñehe, tiquina puhtoahapü neahye tiquirore.¹³⁻¹⁴ Sa ye tiquina apequinare ni meho dutiahye:

—Ahriquiroy decoripe Cohäcjö wuhure, tiquiro dutiye gühure ñano yahuducuriquiroy ijire. Tuhou usä tiquirore tiquiro ohö saha nigü: “Jesu Nazare cjüno Cohäcjö wuhure cohänota. Sa yero tiquiro Moise dutiyere marine yahurire comesarota Jesu”, nidi Estebä usä tuhögü, ni meho yahusämahye tiquina.

¹⁵Sa ye ijipihtiyequina topü dujiyequina Estebäre quehnoano ihñadoque ohö, tiquiro wuhdoare ihñahye tiquina. Angel yero saha bajuahye tiquiro wuhdoa.

Estebä Jesu yere yahuahye

7 Sa ye pahia puhtoro sinituahye Estebäre.

—¿Ahriquina niñe potota ijiajari? ni, sinituahye tiquiro Estebäre.

²Tiquiro sa nigü tuhoro, Estebä pehe tiquinare ohö saha ni yahuahye:

—Yuhü acaye, bucuna, usä pacusumua tuhoya. Abrahä mari ñecu munano panopü cjüno Mesopotamiapü tiquiro ijigü, Haräpü tiquiro ijiato pano, Cohäcjö tutuariquiroy asi siteriquiro pehe tiquirore Abrahäre bajuahye.

³Sa bajuaro Cohäcjö yahuahye tiquirore. “Muhü ya yehpare muhü acaye mehna ijieracähña. Sa yegü ape yehpapü wahaya. Muhü sa wahagü muhure ti yehpare ihñogutja yuhü”, niahye Cohäcjö Abrahäre. ⁴Tiquiro sa nigü tuhoye, Abrahä gühü Caldea yehpa cjëna ya yehpapü ijiriquina wahahye. Sa yero Haräpü esahye. Topü esa, ijiahye. Sa yero tiquiro pacuro yariari bato ahri yehpa yojopü müsä ijiri yehpapü Cohäcjö ahta dutiahye Abrahäre. ⁵Cohäcjö Abrahä tiquiro ijiri yehpare quehnoano waro

cüedaríahye tiquirore. Ne mehenogä cüedaríahye. Sa yero Abrahä pohna marieniquiro ijiepegüta Cohäcjö pehe tiquirore ohö saha ni yahuahye. “Muhure, muhü panamena ape tjuro cjënapare ahri yehpare ohogutja”, niahye Cohäcjö Abrahäre. ⁶Sa ninota ohö saha ni yahu nemoahye Cohäcjö. “Muhü panamena ape tjuro cjëna ape yehpapü wahaye, topü apequina cahapü ijiiye, tiquina cahacjëna ijieta tiquina. Sa ye cuatro cientos cühmari waro to cjëna ñano yeeta muhü panamena iji turiayequinare. ⁷Sa yegu to cjënaire tiquina sa yeri buhiri buhiri dahregutja yuhü. Yuhü sa yeri bato muhü panamena iji turiayequina ahri yehpapü wihietä tja. Sa ye ahri yehpapü yuhü cahacjëna ijieta tiquina”, niahye Cohäcjö Abrahäre. ⁸Sa nino Cohäcjö “Yuhü nidiro sahata yegutja”, nino Abrahä tiquiro wacüatire ohö saha cüahye tiquirore. Cuhnucunü sohtoa cahserogäre yuhre ne dutiahye tiquirore, tiquiro ni yahuripure wacü dutiro. Sa ye Abrahä Isaare pohna tiahye. Ocho decori bato cuhnucunü sohtoa cahserogäre yuhre neahye Isaare. Came Isaac Jacore pohna tiahye. Sa yero Jacob doce waro pohna tiahye. Tiquina doce pehe mari ye cururipe mari dahpoto cjëna ijiatiquina ijiahye.

⁹Sa ye tiquina mari ñecusumua muna panopü cjëna Josére cooye ihña tuhtiye, tiquirore dua cähye Egiptopü wahayequinare. Sa yero Josére Cohäcjö yedohoahye. ¹⁰Tiquiro ñano yuhdugü ihñano Cohäcjö tiquirore yedohoahye. Tiquiro sa yedohogü José pehe quehnoano tuho masiniquiro wahahye. Sa yero faraö Egipto cjüno puhtoro pehe Josére cahmeahye. Tiquirore cahmegü yeahye Cohäcjö pehe. Tiquiro sa yegü faraö pehe Josére puhtoro söahye tiquiro yequina masare dutiatiquirore.

Tiquiro faraō ya wūhu gūhure puhtoro ijiahye.

¹¹'Sa ye ti pjere Egiptopu, Canaapu ne acoro ahtaerahye. Sa ye nāno yuhduahye to cjēna. Sa ye mari nēcusumua mūna panopu cjēna ihyayere bocaerahye. ¹²Sa bocaeraro Egiptopu trigo ijigū tuhoro, Jacob tiquiro pohnene mari nēcusumua mūnare topu coā ohoro niahye. ¹³Came Egiptopu tiquina esagū José tiquiro wahmisumua yahuahye. "Musa bahuta ijiaja yūhu", niahye tiquinare. Sa yero José acayere coā ihñano niahye puhtoro faraō. ¹⁴Came José tiquiro wahmisumua tiquiro pacuro Jacore piji dutiro ohoahye. Tiquiro acaye setenta y cinco masa ijiahye. ¹⁵Tiquiro macno pijiogū tuhoro Jacob wahahye Egiptopu tiquiro macno cahapu. Tiquiro macno cahapu ijiro, came yariaa wahahye. Sa ye mari nēcusumua mūna gūhu topu yaria pihtia wahahye. ¹⁶Sa ye Siquē wame tiropu tiquina pagurire nea, masa coperire sehe tuhasa cohāhye tiquina pagurire. Abrahā tiquiro dūri yehpa ijiahye ti yehpa. Panopu Abrahā ti yehpare Hamor pohnene dúahye niñeru mehna.

¹⁷'Sa yero Cohācjū Abrahāre "Ahri yehpare ohogutja mūhure", niahye. Ti yehpare "Ohogutja", tiquiro nidi pje mūm sagū tiquiro acaye Israe masa peyequina masa wahahye. ¹⁸Egiptopu tiquina ijinigū, apequiro puhtoro sajāhye. Sa yero tiquiro puhtoro pehe Josere masiedahye. ¹⁹Tiquiro mari acayere nāno ye dua, tiquina pohnene wejē dua, cohā dutiahye tiquinare. Sa yero mari nēcusumua mūna iji turiayequinare nāno yeahye puhtoro faraō pehe. ²⁰Tiquiro sa yeri watoa Moise mūnāno pehe masa bajuahye. Tiquiro quehnoariquiro, Cohācjū tiquiro quehnoano ihña coariquiro ijiahye. Sa ye ihtia asū waro quehnoano ihboahye

tiquirogāre tiquiro pacusumua. ²¹Sa yero Moisere tiquina nūo nemoedagū faraō macono tiquirogāre ihña boca, ne maja, ticoro macnore yero saha cuoahye tiquirogāre. ²²Sa ye Egipto cjēna quehnoano masiñequina yere buheahye Moisere. Sa yero cuero marieno yahuducuriquiro puhtoro yero saha yeriquiro ijiahye Moise.

²³'Sa ijieperota tiquiro cuarenta cūhmari cuoro tiquiro acayere Israe masare ihña duaro tiquina cahapu tinino wahahye. ²⁴Sa tinino esaro Egipto cjūno Moise acayurore tiquiro nāno yegū Moise ihñahye. Sa ihñano tiquiro acayurore yedohoahye Moise. Tiquiro acayurore yedohoro, Egipto cjūno pehere wejēahye tiquiro. ²⁵Sa yero Moise ohō saha ni tuhutumahye. "Yūhu acaye tiquina acayurore yūhu yedohogū ihñañe 'Cohācjū marine quehnoano yedohogū ye dutiro ohori ahriquirore', ni tuhotueta yūhu acaye", ni tuhutumahye Moise. Tiquiro sa ni tuhotuepegūta tiquina pehe ne sa ni tuhotuerahye. ²⁶Ape decopu Moise tiquiro acayere puaro tiquina basi cahmequeñequinare ihñahye. Sa yero tiquiro tiquinare yahumahye. "¿Musa basi ijiepenata cahmequeajari musa?" nimahye Moise tiquinare. ²⁷Tiquiro sa nigū tuhoro ihcāquiro tiquiro acayurore nāno yeriquiro Moisere tudoqueoahye. "Mūhu usā puhto ijierare. Usāre dutigu ijierare mūhu. ²⁸¿Canure Egipto cjūnore mūhu wejēdiro sahata yūhure wejē duagu nijari mūhu?" niahye tiquiro Moisere. ²⁹Tiquiro sa nigū tuhō maria waha, Moise oma duhti cāa wahahye. Madiā yehpapu wahaa wahahye. Topure numino boca puaro pohna tiahye.

³⁰'Sa ye Moise cuarenta cūhmari waro topu tiquiro ijiri bato Sinaí wame tidū cūnū caha masa marienopu tiquiro ijigū angel tiquirore bajuahye. Angel pehe

yucugũ mehenugã ujũri peca pohnapũ bajuahye. ³¹ Tu sa ujũgũ ihñano Moise ihña maria wahahye. Ti pecare cahagã quehnoano tiquiro ihñano wahagũ waro Cohãcjũ tiquirore yahuahye. ³² “Cohãcjũ ijiaja yũhũ. Mũhũ ñecusũmũa Abrahã, Isaac, Jacob tiquina ño peorigũ ijiaja”, niahye Cohãcjũ Moiserẽ. Tiquiro sa nigũ tuhoro Moise pehe nanarea wahahye. Ne ihña wahcõedahye. ³³ Sa yero Cohãcjũ yahuahye tiquirore. “Mianogãta yũhũ cahapũ ducugũ nine mũhũ. Sa yegũ cua pesaro mehna mũhũ dahpo suhtire tu weya. ³⁴ Yeequina masa Egiptopũ tiquina ñano yũhdugũ ihñañ. Tiquina utiyere tuhõu. Sa yegũ tiquinare yedohogũ ahtañ. Tiquina sa wahagũ ihñagũ wahaya mũhũ gũhũ. Egiptopũ mũhũre ohogutja tiquinare yedoho dutigũ”, niahye Cohãcjũ Moiserẽ.

³⁵ Tiquina pehe mari acaye Israe masa Moiserẽ cahmedahye. “Mũhũ usã puhto ijierare. Mũhũ usãre dutigũ ijierare”, Moiserẽ sa niñe cahmedaye niahye tiquina. Tiquina sa cahmedapegũta Cohãcjũ tiquirore Egiptopũ ohoahye, mari acayere Israe masare yedohoatiquirore, puhtoro ijiatiquirore. Angel tiquirore yucugũpũ bajuariquiro pehe oho basahye tiquirore. ³⁶ Moise mari acayere Israe masare Egiptopũ ijieyquinare wioahye. Sa yero Egiptopũ ahriquiro Moise Cohãcjũ tutuaye mehna ye ihño dũcahye. Sa yero pajiri ma sohãri mapũ sa yeahye tja. Camepũ masa marienopũ gũhũre cuarenta cũhmari waro Cohãcjũ tutuaye mehna ye ihñoahye tiquiro. ³⁷ Ahriquiro Moise pehe mari acayere Israe masare yahuahye. “Yũhũ yero saha ijiriquirore Cohãcjũ yere yahu mũhtariquirore Cohãcjũ ohorota. Sa yero tiquiro mũsa mehna cjũno mũsa acayũro ijirota”, niahye Moise tiquinare. ³⁸ Moise masa marienopũ mari acaye Israe masa mehna ijiahye. Sa

yero Sinaí wame tidũ cũnũpũ tiquirore yahuriquiro angel mehna ijiahye. Sa yero mari ñecusũmũa panopũ cjẽna mehna ijiahye tiquiro. Cohãcjũ tiquiro dutiyere cũriquiro ijiahye Moise.

³⁹⁻⁴⁰ ‘Sa ye ti dutiyere cũnũpũ Moiserẽ tiquiro cũri watoa mari ñecusũmũa panopũ cjẽna Egiptopũ tojoaa duahye, Moiserẽ yũhdũducaye. Tiquina tiquirore cahmedahye. Sa cahmedaye, tiquina Moise bahũro Aarõre ohõ saha niahye: “Cohãmana queoyere yeya mari yequina ijiatiquinare. Sa ye tiquina mũhũ yeriquina marine dutiye mari waha duari mahapũ marine neaeta. ¿Tiquiro Egiptopũ ijieyquinare marine ne cãhtariquiro Moise dũhse wahayari tiquiro? Masiedaja usã”, niahye tiquina. ⁴¹ Sa ye ti decorire tiquina wecũ queoyere uru mehna yeahye. Sa ye tuhasa, tiquina wahiquinare wejẽ, tiquina yeriquiro cahapũ ne cãhta, ño peoahye tiquirore. Sa ye tiquina yeriquiro wecũre ihña, bucue, bose deco yeahye. ⁴² Cohãcjũ wecũre tiquina ño peogũ ihñano tiquinare cohã cãa wahamahye. “Yũhũre cohã, ñahpicoha pehere ño peocũnahdo”, nino cohã cãa wahamahye. Cohãcjũ yere yahu mũhtariquina sa ni, ojoahye.

Mũsa yũhũre ña yũhdũaro yeri. Israe masa masa marienopũ cuarenta cũhmari waro ijina, wahiquinare mũsa wejẽñequinare mũsa ujũañequinare ohona, yũhũre mũsa ño peoboriro sahata yemedi mũsa. Sa yepenata yũhũ pehere mũsa ño peorerari. ⁴³ Sa yena mũsa Molo wame tiriquirore ño peona ijina, tiquirore ño peori wũhũre cũori mũsa. Ñahpicoha apequiro cohãcjũ Rejã wame tiria queoyere mũsa yeriare mũsa ño peori tja. Ti queoyere mũsa yeriquinare mũsa ño peori. Mũsa sa yeri buhiri mũsare Babilonia ape sie pahrẽpũ cohãgutja yũhũ, ni,

yahu ojoahye Cohācjū yere yahu muhtariquina.

⁴⁴Sa ye masa marienopu Cohācjū masa mehna tiqiro ijiri wuhure wahiquina cahseri wuhure cuoahye mari necusumua panopu cjēna. Ti wuhū Cohācjū masa mehna tiqiro yahuducuri wuhū ijiahye. Ti wuhūpu Cohācjū dutiye tiqiro ojoari pjini utā pjini ijiahye. Ti wuhure Cohācjū tiqiro yahuriro sahata Moiseri tiqiro ihñoriro sahata dahre dutiahye Cohācjū Moiseri. ⁴⁵Sa ye mari necusumua panopu cjēna Josué mehna ti wuhure wahiquina cahseri mehna tiquina yeri wuhure ne cāhtahye ahri yehpapu mari ijiri yehpapu. Tiquinare mari acaye Israe masare Cohācjū tiqiro cūati yehpapure ahri yehpapure tiquina wihiato pano ahri yehpapu iji muhtariquina Canaa cjēna munare Cohācjū cohā cāhye. Ti pjere Cohācjūre ño peori wuhure wahiquina cahseri wuhure cuoahye mari necusumua. Tee Davi munano tiqiro ijigūpu cuo bato tiahye ti wuhure. ⁴⁶Sa yero Davi munano Cohācjūre bucuegū yeahye. Sa yero Cohācjū ya wuhū ijiatire Davi pehe ye duaro, sinimahye Cohācjūre. ⁴⁷Tiqiro sa siniepegūta Salomo pehe Cohācjū ya wuhure yeahye. ⁴⁸Tiqiro sa yepegūta Cohācjū pehe masa tiquina yeri wuhūpore ijierare. Ohō saha niahye Cohācjū yere yahu muhtariqiro.

⁴⁹“Uhmuse yuhū dujiro ijire. Topu dijū dutiaja yuhū. Sa yero yehpa pehe yuhū dahpocārine duhu peoro yero saha ijire. Yuhū tutua yuhūduagu ijiaja. Ya wuhū ijiatore ye masiedare musa. Cohācjū yuhū ijigū yuhū ijiati wuhure musa ye masiedare. ⁵⁰Yuhū basi ahri yehpare ijiphtiro yei yuhū”, niahye Cohācjū, ni ojoahye Cohācjū yere yahu muhtariqiro.

⁵¹Musa ne yuhti duena ijire. Cohācjū yere tuhoopenata, tiqirore yuhti duerare. Espiritu Santore yuhūduca yuhūduare musa. Musa necusumua tiquina yeriro sahata yere musa. ⁵²Musa necusumua ijiphtiyequina Cohācjū yere yahu muhtariquinare ñano yeahye. Tiquina Cohācjū yere yahu muhtariquina pehe “Came quehnoariqiro Cohācjū yere yahu muhtariqiro ahtarota”, tiquina ni yahuyequina ijigū tuhoye musa necusumua muna sa ni yahuriquinare wejē tiahye. Sa yena “Quehnoariqiro”, tiquina nidiquirore musa gūhu yojopure tiqiro ya curua cjāna ijiepenata tiqirore wejēdi. ⁵³Cohācjū dutiyere angele pehe yahumahye musare. Sa yena musa ti dutiyere cuomahye. Sa yena ti dutiyere yuhūduccari musa, niahye Estebā.

Tiquina Estebāre utā paca mehna doque wejēahye

⁵⁴Tiqiro sa nigū tuhoye tiquina pehe tutuaro usuahye. Sa tutuaro usuaye, cuayequina wahahye. ⁵⁵Tiquina sa usuepegūta tiqiro Espiritu Santo dutiriro sahata ye pehoriquiro ijiro, tiqiro tutuayere quehnoano cuoriquiro ijiro, uhmūsepu ihñadoque muo, Cohācjū asi siteyere ihñahye Estebā. Jesu Cohācjū poto pehepu ducugū ihñahye tiqiro. ⁵⁶Sa ihñano ohō saha niahye:

—Uhmūsepu mehenogā parī we maagū Jesu Cohācjū ohoriquiro Cohācjū poto pehepu tiqiro ducugū ihñaja yuhū, niahye Estebā.

⁵⁷Tiqiro sa nigū tuhoye tiquina tutuaro sañuducu, tiquina cahmo coperire biha cā, ihcāno mehna tiqiro cahapu oma maa cā, tiqirore ñeheahye. ⁵⁸Nehe tuhasa, tiqirore ne cā, ti maca duhtu cahapu cohāhye tiqirore. Sa ye utā paca mehna doque we-

jēahye tiquirore. Tiquina sa wejēato pano tiquirore yahusāriquina tiquirore ʔtā paca mehna doqueatiquina tiquina suhtire tu we, wahmānore Saulo wame tiriqirore tiquina suhtire cūo basa duti-ahye.⁵⁹ Sa yero Estebāre tiquina wejēato pano ohō saha niahye tiquiro:

—Jesu yūhū pūhto, yūhū jeripohnare neña, niahye tiquiro.

Tiquiro sa nino watoa tiquina pehe ʔtā paca mehna doqueye niahye tiquirore.

⁶⁰Sa yero tiquiro dusepe curi mehna quehe sa, ohō saha niahye:

—Pūhto Jesu, ahriquina yojopū ñano yūhure tiquina yeyere tiquinare buhiri dahreracāhña mūhū, niahye Estebā.

Sa nidi bato tiquiro yariaa wahahye.

8 Sa yero Estebā tiquiro yariagū ihñano, “Quehnoare”, niahye Saulo pehe.

Saulo Jesu yequinare ñano yeahye

Sa ye ti decoreta Jesu yequinare Jerusalēpū ijyiequinare ñano ye dūcāhye apequina pehe. Tiquina sa ye dūcagū Jesu yequina Judea yehpapū, Samaria yehpapū, yoaropū duhti site cāa wahahye. Jesu cūriquina dihita wahaerahye.² Sa ye apequina Cohācjūre ño peoyequina Estebāre ya, tutuaro utiahye tiquina.³ Sa yero Saulo pehe Jesu yequinare ña yūhdūaro yee timahye. Tiquiro tiquina ye wūhūsepū sajā, ʔmūare, numiare ñehe, peresupū biha docoe tiahye.

Samariapū Jesu yere buheahye Felipe

⁴Sa yeye yoaropū waha siteriquina Jesu yere buheahye.⁵ Sa yero Felipe Samaria wame tiri macapū esa, Cristo yere buheahye ti maca cjēnare.⁶ Tiquiro sa buhegū ti maca cjēna quehnoano tūhoe tiahye. Sa ye Cohācjū tutuaye mehna tiquiro ye ihñogū ihñahye tiquina. Sa ihñañe tiquirore quehnoano tūhoe tiahye.⁷ Peyequina watāre

cūoyequina tiquiro cahapū tiquina wihigū ihñano watā pehere waha dutie tiahye tiquiro. Watā pehe tutuaro sañuducu, duhu cāa wahahye tiquina. Sa yero peyequina tini masieñequinare, pari yuri wahayequinare quehnoano pagū tiyequina wahagū yeahye.⁸ Tiquiro sa yegū ihñañe ti maca cjēna peyequina masa bucueahye.

⁹Ti pjere Simo wame tiriqiro ti maca cjūno yairo ijiahye. Sa yero yayia tiquina yerire ye ihñoe tiahye Samaria cjēnare. Tiquiro sa ye ihñogū ihñañe, ti maca cjēna ihña maria waha, tiquirore cua pe-saro ihñae tiahye.

—Yūhū masi pehogū ijiaja, nimahye Simo pehe tiquinare.

¹⁰Tiquiro sa yegū ihñañe masa pehe ohō saha nie timahye:

—Ahriqiro Cohācjū ye tutuayere cūoriquiro ijire. Cohācjū yero saha tutuariqiro ijire, nie timahye tiquirore masa, pūhto mehna.

Tiquina ijipihtyequina quehnoano tuhoahye tiquirore.

¹¹Tiquiro yayia tiquina yeye mehna yoari pje ye ihñoe tiahye tiquinare. Tiquiro sa ye ihñogū ihñañe tiquina ihña maria wahae tiahye. Sa ye tiquina tiquirore ño peoe tiahye.¹² Tiquina sa ño peoepegūta Felipe pehe Cohācjū tiquiro pūhtoro ijyere, Jesucristo yere quehnoañe buheyere yahuahye. Tiquiro sa yahugū tiquina tiquirore quehnoano tuhoahye. Tiquina sa quehnoano tūhogū ihñano ʔmua, numia gūhure wame yeahye Felipe.¹³ Sa yero Simo gūhū Felipere quehnoano tūhoe tiahye. Sa yero tiquiro gūhure wame yeahye. Tiquiro sa wame yeri bato Felipe mehna tojoae tiahye tiquiro. Felipe pehe Cohācjū tutu-aye mehna tiquiro ye ihñogū ihñano, do-hatiyequinare tiquiro yūhdūogū ihñano Simo ihña maria wahahye.

¹⁴Sa ye Samaria cjēna Cohācjū yere tiquina tutuaro cahmegū Jesu cūriquina

Jerusalēpū ijiyequina tūhoohaye tiquinare. Sa tiquina cahmegū tūhooye Pedrōre, Ōu gūhure ohoahye Samariapū. ¹⁵ Topū esaye Pedro gūhu Cohācjūre siniahye. “Ahriquina Samaria cjēna mūhure ņo peoyequina mūhu yaquiro Espiritu Santore cūoahro”, ni, sini basahye tiquina Cohācjūre. ¹⁶ Tiquina Samaria cjēna Jesucristo wame mehna wame yeriquina ijiahye. Ti dihitare masiahye tiquina. Sa ye Espiritu Santore cūoera tiahye ti pjere tiquina. ¹⁷ Sa ye Pedro, Ōu mehna Samaria cjēnare tiquina omocarine tiquina bui duhu peori bato Espiritu Santore cūo dūcae tiahye tiquina.

¹⁸ Sa yero Pedro gūhu tiquina omocari mehna tiquina duhu peogū ihñahye Simo. Espiritu Santore tiquina ñehēgū gūhure ihñahye tiquiro. Sa ihñariquiro ijiro, ti tutuayere cahmeno, niñeru mehna wapa ye duamahye. Ohō saha nimahye Simo:

¹⁹ —Yūhu gūhure ohoya ahri tutuayere. Yūhu gūhu yūhu omocari mehna masa bui duhu peo yegū tūu niaja Espiritu Santore tiquina ñehēato saha. Sa yegū ahri yūhu yeati wapare wapa ye duaja, nimahye Simo tiquinare.

^{20–21} Tiquiro sa nigū tūhoro Pedro ohō saha niahye:

—Mūhu niñeru mehna Cohācjū ye tutuayere mūhu dú duari buhiri mūhu niñeru mehnata pecapū wahaya mūhu. Cohācjū mūhu tuhotuyere masine. Mūhu ñagū ijinine. Sa yegū ahrire usā yeyere ye masiedare mūhu. Ahrire yebogū ijierare mūhu. ^{22–23} Tutuaro ihña coore mūhu. Sa yegū ñañe yeyere ne duhu masiedare mūhu. Sa yegū ahrire mūhu ñañe yerire bujua witiya mūhu. Cohācjūre mūhu ñañe tuhotuyere bo dutigū siniña mūhu. Mūhu sa yegū ihñano tiquiro mūhu ñañene borota, niahye Pedro tiquirore.

²⁴ Tiquiro sa nigū tūhoro Simo yūhti-ahye tiquirore.

—Yūhure sini basaya mūsa Cohācjūre mūhu nidiro saha yūhu wahaeragū. Ti buhiri pecapū waha dueraja yūhu, niahye Simo tiquirore.

²⁵ Came Pedro Ōu mehna Cohācjū yere yahuahye. “Jesu tiquiro masa mū-jagū ihñau usā”, ni, Samaria yehapū ijiye macari cjēnare quehnoañe buheyerē buheahye. Tiquinare Cohācjū yere buhe tuhasa Jerusalēpū tojoa wahahye.

Felipe Etiopía yehpa cjūnore buheahye

²⁶ Sa ye Cohācjū tiquiro yaquiro angel Felipere yahuahye:

—Yojopure sur pehepū wahaya. Jerusalē caha ijiri mahapū Gazapū wahari mahapū wahaya, ni yahuahye angel Felipere.

Ti maha masa marienopū ijire. ²⁷ Tiquiro sa nigū tūhoro tiquiro pehe ti mahapū wahahye. Came ti mahapū ihcāquiro masūnore piti caro taro niahye. Tiquiro piti catiquiro ijiahye Etiopía yehpa cjūno puhtoro. Sa yero Candace wame tiricoro Etiopía cjōno puhtoro yere, niñerure ijipihtiyere ihña ihboriquiro ijiahye. Sa yero tiquiro Jerusalēpū mari Pacure ņo peoro waha tuhasahye. ²⁸ Tiquiro ya macapū tunuria mehna tojoa taro tiapū wahaeperota buhero niahye. Cohācjū yere yahu mūhtariquiro Isaia tiquiro ojoari pūre buhero niahye. ²⁹ Sa yero Espiritu Santo pehe Felipere ohō saha ni yahuahye:

—Siquiro tunuriapū wahariquiro cahapū wahaya, niahye Espiritu Santo tiquirore.

³⁰ Tiquiro sa nigū tūhoro Felipe pehe tunuria cahapū oma cā, Isaia ojoarire Etiopía cjūno buhegū tūhoahye. Sa tūhoro Felipe sinituahye tiquirore:

—¿Mũhũ buheyere tũho masiajari mũhũ? niahye tiqiro.

³¹ Tiquiro sa nigũ tũhoro Etiopía cjũno ohõ saha ni yũhtiahye:

—Apequiro yũhũre yahu yũhdũoat-iquiro mariedagũ quehnoano masiedaga yũhũ. Ohõ yũhũre yahu dujigũ ahtaya yũhũ pari paha, ni yũhtiahye tiqiro Felipere.

—Au, ni, nuju sahye tiqiro caha.

³² Sa ye Cohãcjũ yere Etiopía cjũnore tiqiro buheri pũ ohõ saha niahye:

Ovejare tiquina ñehe wejẽdiro saha tiqiro gũhũre ñehe wejẽeta masa. Sa yero ovejagãre tiqiro poarire tiquina segũ tiqiro dihta marieno saha tiqiro masũno gũhũ dihta marieno ijirota. ³³ Tiquirore tiquina bujũpeeta. Sa ye tiqiro ñano yerapegũta tiquina pehe ñano yeeta tiquirore. Tiquiro ahri yehpapũ ijigũ tiquina tiquirore wejẽeta. Sa yero tiqiro pohna marieniquiro yariaa waharota, ni ojoahye ti pũpũre.

³⁴ Ti pũ sa ni yahugũ ihũano, Etiopía cjũno sinituahye:

—Yahuya yũhũre. ¿Ohõ saha Isaia tiqiro nidiquiro noa boro ijiajari ahriquiro? ¿Isaia tiqiro basi yahuro niagari? ¿O apequirore yahuro niagari? ni, sinituahye Etiopía cjũno.

³⁵ Tiquiro sa ni sinitugũ tũhoro Felipe pehe ti pũre ihũna, Jesu yere yahuahye Etiopía cjũnore. ³⁶ Sa ye tiquina tia mehna waha, mágãpũ esahye.

—Ihũna, ohõ mágã ijire. Ahri mágãpũ yũhũre wame yeya, niahye Etiopía cjũno.

[³⁷—Jesure mũhũ quehnoano wacũ tutuagũ ihũnagũ mũhũre wame yeitja, niahye Felipe tiquirore.

—Jesure wacũ tutuaja yũhũ. Tiquiro Cristo Cohãcjũ macũno ijire. Tire quehnoano masiaja yũhũ, niahye Etiopía cjũno.]

³⁸ Sa ninota tunuria ohoturiquirore yũsũ dutiahye. Tia yũsũ quehe sari bato wijiahye tiquina. Wijia, ti mágãpũ esa, ñumudũca sahye tiquina. Topũ ñumudũca sa, Felipe pehe tiquirore wame yeahye. ³⁹ Wame ye tuhasa tiquina majadũca sagũ Cohãcjũ yaquiro Espĩritu Felipere nea wahahye. Tiquiro sa wahari bato Etiopía cjũno quehnoano bucueriquiro tiqiro ya yehpapũ tojoaa wahahye. Tiquiro sa yeri bato tigũ ne pari turi Felipere ihũna nemoedahye. ⁴⁰ Sa ye tuhasa Azotopũ esahye Felipe pehe. Sa yero peye macarine quehnoañe buheyere bueahye masare. Cesareapũ buhe bato tiahye.

Saulo Jesucristore ihũano tiquirore wacũ tutua dũcahye

(Hch 22.6-16; 26.12-18)

9 Ti pjere Saulo Jesu yequinare ihũna tuhtiriquiro, “Tiquinare wejẽgutja”, nino, tiqiro pahia pũhtoro cahapũ wahahye. ² Topũ esaro tiqiro ojoari pũrine siniahye pahia pũhtorore. Ohõ saha niahye:

—Damasco cjẽ wuhũsepũ judio masa mari buheye wuhũsepũ Jesu yequinare umũare, numiare boca sagũ, tiquinare ñehe duhte, Jerusalẽpũ ne cãhtagutja. Ti wuhũsepũ ijiyequinare yũhũ ñeheatire papera pũre ohoya, ni siniahye Saulo pahia pũhtorore.

³ Ti pũre ne tuhasa, waha, Damasco cahagã tiqiro esagũ waro umũanopũ asi sitedoque dijioahye tiquirore. ⁴ Sa asi sitedoque dijiogũta tiqiro yehpapũ bora quehe saro, yahuducugũ tũhoahye:

—¿Saulo, dũhsegu mũhũ yũhũre ñano yeajari? nino ca tahye.

⁵ —¿Pũhto, noa boro ijiajari mũhũ? niahye Saulo pehe.

—Yũhũ Jesu, mũhũ ñano yenohrigũ ijiaja. [Mũhũ yũhũ mehna usuagũ yũhũre yũhtieragũ, mũhũ basita ñano yũhdũre, niahye Jesu Saulore.

⁶Tiquiro sa nigū Saulo cue nanare, ohō saha ni sinituahye:

—¿Pūhto, dūhse yūhū yegū cahmeajari mūhū? niahye Saulo.

Tiquiro sa nigū ohō saha niahye Jesu:]

—Wahcādūcaya mūhū. Si macapū wahaya. Ti macapū mūhū esagū ti maca cjūno mūhū yeatire yahurota mūhure, niahye Jesu Saulore.

⁷Tiquiro sa nigū Saulo mehna cjēna pehe tiquiro yahuducuye dhitare tūhoahye. Jesu pehere ihñedahye. Tiquiro sa wahagū ihñañe, cueye, tiquina yahuducu masiedahye. ⁸Sa yero Saulo yehpapū cuñariquiro wahcādūca, tiquiro ihñagū tiquiro caperi bajuerahye. Sa ye tiquina tiquiro omocare ñehe, Damascopū tuā cāa wahahye tiquirore. ⁹Sa yero tiquiro ihtia deco waro ne ihñeda, ihyera, ne sihniedahye.

¹⁰Sa ye Jesu buheriquiro Anania wame tiriquiro Damascopū ijiahye. Sa yero Jesu bajuahye Ananiare. Sa bajuaro pisuahye tiquirore:

—¿Anania, ijajari mūhū? niahye Jesu.

—Ijjaja, ni, yuhtiahye Anania tiquirore.

¹¹Tiquiro sa nigū Jesu yahuahye tiquirore:

—Poto wame tiri mahapū wahaya. Topū wahagū Juda ya wūhūpū Tarso cjūnore Saulo wame tiriquirore macaña. Tiquiro Cohācjūre sinino niaga. ¹²Sa yero quehēno saha tiquiro ihñarire ihñano niaga topūre. Ohō saha ijyere ihñano niaga tiquiro: Mūhū omocare tiquiro bui duhu peo, tiquiro caperi quehnoa wahagū ihñano niaga tiquirore bajarire, niahye Jesu Ananiare.

¹³Tiquiro sa nigū tūhoro Anania ohō saha niahye:

—Pūhto, tiquiro mūhū yequinare quehnoañequinare Jerusalē cjēnare ñano yeñohti. Peyequina masa

yūhūre sa ni yahuri. ¹⁴Sa yero ohōre tiquiro ijipihtiyequina mūhūre cahmeñequinare peresu yero taro niñohti. Pahia pūhtoa tiquirore sa ye dutiñohti, niahye Anania Jesure.

¹⁵Tiquiro sa nigū Jesu pehe yahuahye tiquirore:

—Tiquiro Saulo pehe yūhū beseriquiro ijire. Tiquiro yee buheyere peye macari cjēnare, Israe masa ijieyequinare, tiquina pūhtoare, Israe masa gūhūre buherota. Sa yegū wahaya mūhū. ¹⁶Sa yero peye tahari yeere tiquiro yeri buhiri tiquiro ñano yūhdūrota. Tire tiquirore masigū yegutja, niahye Jesu Ananiare.

¹⁷Tiquiro sa nidi bato Anania pehe waha, esa, Saulo tiquiro ijiri wūhūpū sajāhye. Sajā sa, tiquiro omocare Saulo bui duhu peo, yahuahye tiquirore.

—Yūhū acayū Saulo, mari pūhtoro Jesu pehe mahapū mūhūre bajuariquiro yūhūre oho, mūhū caperire ihña dutiro, Espiritu Santore mūhūre cūo dutiro, tiquiro dutiriro sahata mūhūre ye dutiro, ni yahuahye Anania Saulore.

¹⁸Tiquiro sa nigūta tiquiro caperire wahi nūturi saha bajuyere tiquiro caperire pahna dijiagū ihñahye Saulo. Tiquiro sa ihña tuhasari bato wahcādūca sagū apequiro pehe wame yeahye tiquirore. ¹⁹Sa yero tiquiro ihyari bato pagū tutuariquiro wahahye.

Saulo Damascopū Jesu yere buhe dūcahye

Sa ye meheñe decorigā Damasco cjēna Jesu yequina mehna ijiahye Saulo.

²⁰Sa yero ti pjereta tiquiro judio masa buheye wūhūsepe Jesu yere buheahye masare. Jesu Cohācjū macūno tiquiro ijyere yahuahye Saulo. ²¹Tiquiro sa yahugū ihñañe ijipihtiyequina tiquirore tūhoyequina acūaa wahahye.

—Ahriquiro Cohācjū yequinare Jesure cahmeñequinare ñano yee tiriquiro ijire.

Sa yero tiquiro tiquinare ñehe, dũhte, pahia puhtoare oho duari jimedi. Sa ye duaro ohõpũre ahtari jimedi tiquiro, ni-ahye masa tiquirore tuhoyequina.

²² Tiquina sa ni tuhotepegũta Saulo cuero marieno tutuaro mehna buhe dũcahye. Judio masare Damasco cjẽnare quehnoano yahuahye. “Ahrikiro Jesu potota Cristo marine yũhdũoriqiuro ijire”, tiquiro ni yahugũ tiquina pehe tiquirore “Ni mehono nine ahrikiro”, ni masiedahye tiquirore.

²³ Sa ye peye decori bato judio masa tiquirore wejẽ duaye, tiquina basi yahuducuahye. ²⁴ Sa yero Saulo tiquina wejẽ duagũ masiahye tiquiro basi. Sa ye ti maca cjẽ sopecaharire decopũre, ñamipũ gãhũre cohtee tiahye tiquirore wejẽ duaye. ²⁵ Tiquina sa wejẽ duagũ ihñañe ñamipũ Saulo buheyequina tiquirore pũhũro pajiri pũhdũpũ ne sãa, ti maca cjã sahrĩno behero pehepũ duhu dijioahye tiquirore.

Saulo Jerusalẽpũ ijiahye

²⁶ Sa ye Saulo Jerusalẽpũ esaro, topũ Jesu yequina mehna tiquiro iji duamahye. Tiquiro sa iji duepegũta tiquina tiquirore “Jesu buheriquiro ijierare ahrikiro”, niñe, tiquirore cue niahye. ²⁷ Tiquina sa cuepegũta Bernabẽ pehe tiquirore ne cãhye Jesu cũriquina cahapũ. Sa yero Saulo mahapũ Jesure tiquiro ihñarire, Jesu mehna tiquiro yahuducurire, Damascopũ cuero marieno Jesu yere tiquiro buhe dũcarire yahuahye Bernabẽ pehe. ²⁸ Tiquiro sa ni yahuri bato Saulo tiquina mehna sajãno, Jerusalẽpũ tiquina mehna ijie tiahye. ²⁹ Sa yero tiquiro cuero marieno Jesu yere buhee tiahye. Sa yero tiquiro judio masare Jesu yere yahu yũhdũdũcaro niahye. Tiquina judio masa griego masa yere yahuducuyequina ijiahye. Sa ye Saulo tiquiro sa yahu yũhdũdũcari buhiri tiquina tiquirore wejẽ duamahye.

³⁰ Tiquina sa wejẽ duagũ ihñañe, Saulo mehna cjẽna Jesu yequina pehe tiquirore Cesareapũ ne duhti cãa wahahye. Topũ tiquirore siho ijiducume Tarsopũ ohoahye tiquirore.

³¹ Sa ye ijipihtiropũ, Judea yehpapũ, Galilea yehpapũ, Samaria yehpapũ Cohãcjũ yequina quehnoano ijie tiahye. Ti pjere ne masa ñano yera tiahye tiquinare. Sa ye quehnoano buheahye tiquina. Sa ye tiquina Cohãcjũre cua pẽsaro ihñañe. Espĩritu Santo tiquinare tiquiro yedohogũ tiquina pehe masa peyequina wahahye.

Pedro Eneare quehnoa wahagũ yeahye

³² Sa ye Pedro ijipihtiye macaripũ waharo, Jesu yequina Lida maca cjẽna cahapũ gãhũre esahye tiquiro. ³³ Topũ esaro Enea wame tiriqiurore boca sahye. Enea tini masieniquiro ijiro, ocho cũhmari waro cuñari cahsero mehna cuñaẽ tiahye tiquiro. ³⁴ Sa yero Pedro pehe tiquirore ohõ saha niahye:

—Enea, Jesucristo mũhũre quehnoa wahagũ yere. Wahcãdũcaya. Mũhũ eõ tu cuñari cahserore quehnoña, niahye Pedro tiquirore.

Tiquiro sa nigũta tiquiro wahcãdũca wahaahya. ³⁵ Sa ye ijipihtiyequina Lida cjẽna, Saronã cjẽna tiquirore ihñañe, tiquina ñañe yerire duhu, Jesure wacũ tutuahye.

Dorca wame tiricorore masoahye Pedro Jesu tutuaye mehna

³⁶ Sa ye Jope wame tiri macapũ Jesure ño peoricoro Tabita wame tiri-coro ijiahye. Ticoro wame Tabita griego ye yahuducuye mehna Dorca ijire. Ticoro quehnoañene yero, peye ohoe tiahye pejecũoyequinare. ³⁷ Sa yero ti pjere ticoro dohati wahcõ, yariaa wahahye. Ticoro yariagũ ihñañe, tiquina ticorore quehnoano cose, uhmũano cjã

tucūpū cūahye ticorore. ³⁸Lida wame tiri maca Jope cahagāpū ijiri. Sa ye Jesu buheyequina Jope cjēna Pedro Lidapū tiquiro ijigū tuhoahye. Sa tuhoeye, puaro ohoahye Pedro cahapū. Tiquiro cahapū esaye, Pedrore yahuahye tiquina.

—Sojaro mehna usā ijiropū wahaya, ni yahuahye tiquina.

³⁹Tiquina sa nigū tuhooro tiquina mehna wahaa wahahye tiquiro. Topū tiquirore tiquina ne sari bato ūh-muano cjā tucūpū ne mūjaa wahahye tiquirore. Sa ye ijiptiyequina wape wiha numia tiquiro cahapū esaduca, uti-ahye. Tabita tiquina mehna ijininopū peye suhtire yee tiahye. Sa ye tiquina ticoro yeri suhti ijiirire ihñoahye Pedrore. ⁴⁰Tiquina sa ihñoepēgūta Pedro tiquinare ti tucūpū ijiyequinare wijia dutiahye. Tiquina wijari bato tiquiro dusepe curi mehna quehe sa, Cohācjūre ticorore sini basahye. Sa yero ticoro pagure majare ihñahye.

—Tabita wahcāna, niahye tiquiro.

Tiquiro sa nigūta ticoro pehe ihña wahcō, Pedrore ihña, wahcā nuju sahye.

⁴¹Ticoro wahcā nuju sagū ihña, tiquiro ticoro omocare ñehe, tuā wahcō do-coahye ticorore. Sa yero tiquiro to cjēnare Jesu yequinare, wape wiha numiare pijio, ticorore catiricorore wiahye tiquinare. ⁴²Tiquiro sa yeri bato ijiptiyequina Jope cjēna tire masiñe peyequina masa Jesure wacū tutua dūcahye. ⁴³Came Jopepū Simo wahiquina cahserire quehnoriquiro mehna peye decori Pedro tiquiro mehna ijiyahye.

Pedro Corneliore Jesu yere yahu dūcahye

10 Ti pjere Cesareapū Cornelio wame tiri tiquiro ijiyahye. Tiquiro cien surara puhtoro ijiyahye. Tiquina surara pehe tiquina ya curua Italiano wame tiahye. ²Cornelio tiquiro ya wūhū cjēna mehna mari Pacure ño

peoyequina, cua pesaro ihñañequina ijie tiahye. Sa yero tiquiro judio masa pejecuoyequinare yedohoro, peye ohoahye. Sa yero decoripe tiquiro mari Pacure sinie tiahye. ³Sa ye ñamicahapū tres hora ijigū Cohācjū yaquiro angel tiquirore bajuahye. Sa bajuaro Cornelio cahapū sajahye.

—Cornelio, niahye angel tiquirore.

⁴Sa yero Cornelio tiquirore ihña cuero ohō saha niahye:

—¿Puhto, yabere cahmeajari? niahye tiquiro.

—Pejecuoyequinare mūhū ohorire, mari Pacure mūhū sinidire tiquiro wacūno niaga. ⁵Sa yegū Jopepū mūhū cahācjēnare ohoya. Topū Simo Pedro wame tiri tiquiro ijire. Tiquirore ne cāhta dutiya mūhū cahācjēnare. ⁶Tiquiro apequiro Simo wahiquina cahseri quehnoriquiro cahapū, pajiri ma dūhtū cahapū ijiri wūhūpū ijire, niahye angel Corneliore.

⁷Angel sa ni tuhasa, wijiaa wahahye. Tiquiro sa wijari bato Cornelio puaro tiquirore yedohoyequinare ihcāquiro surara mehna cjūnore pijiahye. Surara pehe mari Pacure ño pe-oriquiro ijiro, decoripe Corneliore yedohoe tiahye. ⁸Sa yero Cornelio tiquinare yahu peho, Jopepū ohoahye tiquinare.

⁹Sa ye ape deco Jopepū tiquina wahari watoa coheri pje ijigū Pedro pehe wūhū buipū Cohācjūre sinino wahahye. ¹⁰Sa yero tiquiro ūjua ahbagū ihya duahye. Sa ihya duaro apequina tiquiro ihyayere tiquina dahreri watoa tiquiro pehe bajuagū ihñahye. ¹¹Ūh-muanopū parī maagū, pajiri cahsero ti cahsero sohtoripū dūhteri cahsero dijia tagū ihñahye. ¹²Ti cahsero puhia pūpeyequina wahiquina nūcū cjēna, yehpapū bua tiniñequina, minicjua pari ijiyahye. ¹³Tire tiquiro ihñari bato, Pedro yahuducugū tuhoahye.

—Pedro, wahcādūcaya. Ahriquinare wejē ihyaya, ni yahuducugū tūhoahye tiqiro.

¹⁴Tiqiro sa niepegūta Pedro ohō saha niahye:

—Puhto, ne tiquinare ihyeraja yuhū. Ñañequinare, Cohācjū tiqiro ihya dutierarquinare ne ihyera tii yuhū, niahye Pedro.

¹⁵Sa yero Pedro pari turi yahuducugū tūhoahye:

—Cohācjū “Quehnoañequina ijire”, tiqiro nidiquinare “Ñañequina ijire”, niedacāhña mūhu tiquinare, ni yahuducugū tūhoahye Pedro.

¹⁶Sa ye ihtia taha tiquina sa ni yahuducuri bato ti cahsero ūhmuanopū mūjaa wahahye tja. ¹⁷Sa yero Pedro tutuaro wacū “¿Duhse ni yahu duaro niajari sa bajoaro?” ni tūhotuahye tiqiro basi. Tiqiro sa tūhoturi watoa Cornelio ohoriquina pehe Pedro ijiri wūhūpū esahye. “¿Simo ya wūhū nohopū ijiajari?” ni, tiquina sinituri bato ti wūhūpū esahye tiquina. ¹⁸Sa ye tiquina sinitu madoqueoahye. “¿Simo Pedro wame tiriqiro ahri wūhūre ijiajari?” ni sinituahye tiquina. ¹⁹Sa yero Pedro tiqiro tūhoturi watoa Espiritu Santo tiqirore yahuahye:

—Ihñaña. Ihtiaro ūmua mūhūre macañe nine. ²⁰Wahcādūcaya. Dijiahya. Tiquina mehna wahaya. Yabiro marieno wahaya quehnoano mehna. Yuhū pehe tiquinare ohōpūre ahtagū yei, niahye Espiritu Santo Pedore.

²¹Tiqiro sa nigū tūhoro Pedro tiquina cahapū dijiaa wahahye.

—Ihñaña. Ohōpū ijiaja yuhū mūsa maca cāhtarigū. ¿Duhse yena tana niajari mūsa yuhū cahapūre? niahye Pedro tiquinare.

²²Tiqiro sa nigūta tiquina pehe ohō saha niahye:

—Cornelio cien surara pūhtoro, quehnoañene yeriquiro, mari Pacūre cua pesaro ihñariquiro, ijipihtiyequina judio masa “Quehnoariquiro”, tiquina nidiquiro mūhūre piji dutiro ohori ūsāre. Cohācjū quehnoariquiro yaqiro angel Corneliore mūhūre piji dutiñohti. Ohō saha niñohti: “Pedrore mūhu ya wūhūpū ne cāhta dutiya mūhu cahacjēnare. Sa ye tiqiro mūhūre yahurota”, ni piji dutiñohti angel Corneliore, ni yahuahye Cornelio Pedrore tiqiro piji dutiriquina pehe.

²³Tiquina sa nigū Pedro pehe tiquinare sajā ta duti, ihyaye oho, tiqiro ijiri wūhūpū carī dutiahye tiquinare. Sa yero ape deco Pedro wahcā, tiquina mehna wahaa wahahye. Sa ye apequina Cristo yequina Jope cjēna Pedrore piti ti cāhye.

²⁴Ape deco tiquina Cesareapū esahye. Sa yero Cornelio pehe tiqiro acayere, tiqiro mehna cjēna gūhūre piji cahmecoa, Pedore cohteahye. ²⁵Sa yero Pedro Cornelio ya wūhū cahapū tiqiro ahtagū ihñano Cornelio pehe tiqirore piti ca wijia, tiqiro dahpocāri cahapū quehe sahye. ²⁶Sa yepegūta Pedro tiqirore ne wahcō doco ohō saha niahye:

—Ducuya mūhū. Yuhū gūhū mūhū yero saha ijigū ijiaja. Cohācjū ijieraja yuhū, niahye Pedro tiqirore.

²⁷Tiqiro sa ni tuhasari bato Cornelio tiqirore ne sajāa wahahye tiqiro ya wūhūpū. Topū sajā saro masa pari ti wūhūpū cahmecoa, tiqirore cohteyequinare ihñahye Pedro. ²⁸Sa yero Pedro tiquinare yahuahye:

—Judio masū ijiepegūta ape curua cjēna mehna ijigū ūsā dutiyere yūhdūdcagu niaja yuhū. Tire quehnoano masine mūsa. Sa ijiepegūta ape curua cjēnare “Ñañequina ijire”, yūhūre ni dutierari Cohācjū. Sa ni yahuri yūhūre tiqiro. ²⁹Tiqiro sa nigū tūhogū ohōpūre mūsa cahapūre ahtau.

Musa yuhure pijioḡ “Ne wahaeraja”, niedu yuhu. “¿Duhse ijero boro yuhu ohõpũ ahtagũ cahmeari musa?” niahye tiquinare Pedro.

³⁰Tiquiro sa nigũ tuhoro Cornelio pehe ohõ saha niahye:

—Tres hora ijigũ waro mari Pacu yaquiro angel yuhure bajuari. Pititia deco wahare yuhure tiquiro bajuari bato. Ti decota mari Pacure yuhu sinini watoa angel asi siteri suhtiro sañariquiro yuhu cahapũ ducuri. ³¹Sa yero tiquiro yuhure ohõ saha nidi: “Cornelio, muhu mari Pacure muhu sinigũ tiquiro tuhori. Sa yero pejecuoyequinare tiquina cahmeñene muhu ohogũ ihñano mari Pacu wacũno muhure yedohorota. ³²Sa yegu Joperũ muhu cahacjẽnare ohoya, Simore, Pedro wame tiriquire muhu cahapũ tiquina ne cãhtagũ. Tiquiro apequiro Simo wahiquina cahseri quehnoriquiro ya wuhũpũ pajiri ma duhtũ cahapũ ijiri wuhũpũ ijire tiquiro”, ni yahuri yuhure tiquiro. ³³Tiquiro sa nigũ tuhogu yuhu cahacjẽnare muhure ne cãhta dutigu ohou yuhu. Sa yegu quehnoano yegu ahtari jiri muhu usã cahapũre. Sa yena usã ijipiltina ohõre mari Pacu tiquiro ihñonopũ ijina niaja usã. Ijipihiyere mari Pacu muhure tiquiro yahu dutirire tuho duana, cohteĩ usã, niahye Cornelio Pedore.

Pedro Jesu yere yahuahye

³⁴Tiquiro sa nigũ tuhoro, Pedro ohõ saha ni yahuahye:

—Yojopũ masiaja. Ijirota ijire. Cohãcjũ ihcãno saha quehnoano yere marine. ³⁵Sa yero ijipihiyere macari cjẽna Cohãcjũre cua pesaro tiquina ihñagũ, quehnoañene tiquina yegũ Cohãcjũ pehe tiquina mehna bucuere. ³⁶Cohãcjũ usã judio masa cahapũ Jesucristore ohori. Masare Cohãcjũ mehna quehnoano iji dutiro Jesu

pehe quehnoañe buheyere yahuri. Ti buheyere musa masine. Jesucristo pehe ijipihiyequina masa puhtoro ijire. ³⁷Nu wame yeriquiro ohõ saha ni yahuri: “Musa ñañene bujua witiya. Sa yena wame yenohrina ijiya”, ni, yahuri Nu. Masare tiquiro sa ni yahuri bato Galileapũ quehnoañe buheyere Jesu pehe yahu ducari. Came Judea yehpapũ ti buheyere yahu pehori. ³⁸Ahriquiro Jesu Nazare cjũnore Cohãcjũ pehe tiquiro tutuayere, Espĩritu Santo mehna tiquiro ye masiatire ohori Jesure. Sa yero Jesu quehnoano yero wahari. Sa waharo watiare cuoyequinare ñano yuhduyequinare ijipihiyequinare quehnoa wahagũ yeri. Mari Pacu Jesu mehna ijiri. ³⁹Judea yehpapũ, Jerusalẽpũ gũhure ijipihiyere tiquiro yerire usã ihñau. Came tiquina curusapũ wejẽdi tiquirore. ⁴⁰Sa yero ihtia deco wahaboro Cohãcjũ tiquirore masori jiri. Sa yero Jesure apequinare bajuagũ yeri jiri mari Pacu. ⁴¹Ti pjere Jesure ijipihiyequina ihñedari. Meheñequinagãre bajuari tiquiro. Mari Pacu tiquiro cahmenare, Jesure ihñatinare panopũ usãre mari Pacu beseahye. Usã pehe Jesu tiquiro masari bato tiquiro mehna ihya, sihnii. ⁴²Sa yero usãre tiquiro dutiri. “Masare yahuya. Yuhũ Jesu ijipihiyequina catiyequinare, yariariquina gũhure buhiri dahreacjũ yuhure ijigũ yeri mari Pacu. Sa yena tire masare yahuya”, ni dutiri Jesu usãre. ⁴³Ijipihiyequina Jesure tiquina wacũ tutuagũ ihñano Cohãcjũ tiquina ñañene borota. Tire ijipihiyequina Cohãcjũ yere yahu muhtariquina panopũ cjẽna yahuyahye, ni yahuahye Pedro.

Judio masa ijieyequina Espĩritu Santore cuo dũcahye

⁴⁴Ti ijipihiyere tiquiro sa ni yahuri watoapũ, ijipihiyequina tire tuhoye-

quina mehna Espíritu Santo iji duc-ahye. ⁴⁵⁻⁴⁶ Sa ye judio masa ijieyequina tuhohemeñe yahuducuye mehna bucueye mehna yahuducu ducahye. Ti yahuducuye mehna Cohãcjüre “Tutu-agu, quehnoagu ijire”, niñe niahye. Tiquina sa nigũ tuhoahye Pedro acaye judio masa Jesu yequina. Sa ye Espíritu Santo judio masa ijieyequina mehna tiqiuro iji ducagũ ihñañe judio masa pehe ihña maria wahahye. Sa yero Pedro ohõ saha ni yahuahye judio masare:

⁴⁷ —Mari yero sahata Espíritu Santore cuore ahriquina gũhu. ¿Tiquina sa ijigũ ihñana ahriquinare wame yeraboagari mari? niahye Pedro tiquinare.

⁴⁸ Sa ni tuhasa Jesu wame mehna judio masa ijieyequinare wame ye duti-ahye Pedro. Tiquina sa yeri bato “Usã mehna meheñe decorigã tojoarĩña”, niahye tiquina Pedro gũhure.

Pedro Jerusalẽ cjẽnare Jesu yequinare yahuahye

11 Sa ye judio masa ijieyequina gũhu Cohãcjũ yere tiquina quehnoano cahmegũ Jesu cūriquina pehe tiquina acaye Judeapũ ijieyequina mehna tuhooahye. ² Sa ye Pedro Jerusalẽpũ tiqiuro tojoa sagũ ihñañe judio masa Jesu yequina meheñequinagã tiqiurore ohõ saha niahye:

³ —¿Judio masa ijieyequinare dũhse ijiro boro ihñagũ esari mũhu? ¿Dũhse ijiro boro tiquina mehna ihyari mũhu? ni, tuhtiahye Pedrore tiquina.

⁴ Tiquina sa nigũ tuhoro Pedro tiqiuro yerire yahu peho cãhye tiquinare. ⁵ Ohõ saha ni yahuahye:

—Yũhu Jopepũ ijigũ Cohãcjüre sinigu nii. Sa yero yũhure ohõ saha bajuari. Pajiri cahsero ti cahsero sohtoripũ dũhteri cahsero uhmuanopũ yũhu cahapũ dijia tagũ ihñau. ⁶ Sa yegũ ti cahserore quehnoano ihñau,

“¿Yabe boro ti cahseropũre ijiajari?” nigũ. Sa yegũ ihñau ti cahseropũre ijieyequinare: Wahiquinare nũcu cjẽnare, yehpapũ bua tiniñequinare, minicjua parire ihñau. ⁷ Sa yegũ yũhure tiqiuro yahuducuyere tuhohu. “Pedro, wahcãducaya. Wejẽ ihyaya ahriquinare”, nino ca tari yũhure. ⁸ Tiquiro sa nigũ tuhogu ohõ saha nii yũhu. “Pũhto, ne tiquinare ihyeraja yũhu. Ñañequinare, Cohãcjũ tiqiuro ihya dutieyequinare ne ihyera tii yũhu”, nii yũhu. ⁹ Yũhu sa niepegũta uhmuanopũ pari turi yũhure yahuducuro ca tari tja. “Cohãcjũ ‘Quehnoañequina ijire’, tiqiuro nidiquinare ‘Ñañequina ijire’, niedacãhña mũhu”, nino ca tari yũhure. ¹⁰ Sa yero ihtia taha usã sa ni yahuducuri bato ti cahsero uhmuanopũ mujaa wahari tja. ¹¹ Yũhu sa ihñari watoa ihtiaro umua usã ijiri wũhupũ esari jiri. Tiquina Cesarea cjũno ohoriquina ijiri. ¹² Sa yero Espíritu Santo pehe yũhure tiquina mehna waha dutiro “‘Tiquina ñañequina ijire’, niedacãhña tiquinare”, ni yahuri yũhure tiqiuro. Sa ye ahriquina seis yũhu acaye mehna Cesarea cjũno ya wũhupũ sajãu usã. ¹³ Sa yero tiqiuro usãre ohõ saha ni yahuri. “Angel yũhu wũhupũ ducugũ ihñau yũhu. Ohõ saha ni yahuri yũhure: ‘Jopepũ Simore Pedro wame tiriqiurore ne cãhta dutiya. ¹⁴ Tiquiro mũhure mũhu acaye mehna musare ijipihntinare pecapũ wahaborinare musa yũhduatire yahurota’, nidi angel yũhure”, ni, yahuri Cesarea cjũno yũhure. ¹⁵ Sa ye yũhu yahuducuri watoa Espíritu Santo pehe tiquina mehna iji ducari, marine tiqiuro ye mũhtariro sahata. ¹⁶ Sa yegũ Jesu tiqiuro yahurire wacũu yũhu. Ohõ saha ni yahuri tiqiuro: “Ñũ musare wame yero aco mehna wame yemedi. Yũhu pehe tiqiuro yũhduoro yeitja musare. Came Espíritu Santore musa mehna ijiducugũ yeitja”, ni yahuri. ¹⁷ Sa yero Jesucristo mari pũhtorore mari wacũ tu-

tuagū ihñano Cohācjū yaquiro Espíritu Santore ohori marine. Sa yero Cohācjū marine Espíritu Santore tiquiro ohoriro sahata judío masa ijieyequina gūhure tiquiro ohori. Cohācjū tiquiro sa yegū ihñagū tiquirore yūhdūdaca masiedaja yuhū, niahye Pedro tiquinare, judío masare Jesu yequinare.

¹⁸Tiquiro sa nigū tūhoye, tiquina tiquirore ne ni nemoedahye. Tiquirore tuhti masiedahye. Sa ye tiquina,

—Cohācjū quehnoariquiro, tutuariquiro ijire, niahye.

Ohō saha ni nemoahye:

—Judío masa ijieyequina gūhu tiquina ñañene bujua witiyequina ijiye, Cohācjū yequina ijieta. Sa tiquiro yequina ijiye, tiquina gūhu ijipihtiye decori tiquiro mehna ijieta, ni nemoahye tiquina.

Antioquíapū apeqúina Jesu yequina ijiahye

¹⁹Sa ye Estebāre tiquina wejēdi bato masa Jesu yequinare ñano yeahye. Tiquina sa yegū ihñañe Jesu yequina duhti sitea wahahye. Sa ye tiquina Feni-ciapū, Chiprepū, Antioquíapū waha, judío masa dihitare Cohācjū yere yahue timahye tiquina. ²⁰Tiquina sa yepegūta apeqúina pehe Jesu yequina mehna cjēna Chipre cjēna, Cirene cjēna, Antioquíapū esa, judío masa ijieyequinare Jesu yere bueahye Cohācjū tiquinare tiquiro yūhdūoatire. ²¹Sa yero mari puhtoro tiquinare yedohoahye. Sa ye masa peyequina Jesure wacū tutuaye, quehnoañe pehere comesahye.

²²Sa ye “Antioquía cjēnapū Jesure cahmeaga”, ni tūhoohaye Jerusalē cjēna Jesu yequina. Tiquina sa tūhoori bato Jerusalē cjēna Bernabé wame tiriquirore Antioquíapū ohoahye. ²³Sa yero tiquiro Antioquíapū esaro, Cohācjū yedohoye mehna judío masa ijieyequina tiquiro yequina tiquina wahagū ihñano, tutuaro

bucueahye. Sa yero tiquiro to cjēnare ohō saha ni yahuahye:

—Jesure sa wacū tutuaducuya. Tiquiro yere ne duhueracāhña, ni yahuahye tiquiro ijipihtiyequina tiquinare.

²⁴Bernabé quehnoariquiro ijiro, Espíritu Santore pajiro cūoriquiro ijiro, tiquiro dutiriro sahata yeriquiro ijiro, Jesure quehnoano wacū tutuahye tiquiro. Sa ye tiquiro buheri bato masa peyequina wacū tutuahye Jesure.

²⁵Came tiquiro Tarso wame tiri macapū Saulore macano wahahye.

²⁶Topū tiquirore boca sahye. Tiquiro boca sari bato Antioquíapū ne cāhye Saulore. Topū tiquina esari bato ihcā cūhma waro tiquina Cohācjū yequina mehna cahmecoa, peyequina masare buhee tiahye tiquina. Sa ye Antioquíapū Cristo yequina Cristiano wame ti dūcahye.

²⁷Ti pjere Cohācjū yere yahu muhtariquina Jerusalēpū ijiriquina waha, Antioquíapū esahye. ²⁸Sa yero tiquina mehna cjūno Agabo wame tiriquiro Jesu yequina watoapū ducuro, Espíritu Santo tutuaye mehna yahuahye tiquinare. “Ijipihitiri yehpapūre tutuaro ūjua waharota”, ni yahuahye tiquiro. Ti pjere ihyaye mariedi pje ijigū ijipihtiyequina puhtoro Claudio ijiahye. ²⁹Sa ye Cristo buheyequina, ijipihtiyequina tiquina cūoro puno tiquina acayere oho duaye, tiquina basi cahme yahuducuahye. “Judea yehpa cjēna Jesu yequinare niñerure ohouhna”, niahye tiquina basi. ³⁰Tiquina sa nidi bato Bernabé, Saulo mehna ti niñerure ne cā basahye. Topū esaye Judea yehpa cjēnare Jesu yequina puhtoare wiahye ti niñerure.

Pedrore peresu yeahye

12 Ti pjere puhtoro Herode ihquēquinare Jesu yequinare

ñano ye dūcae tiahye. ²Sa yero tiqiro Ñu wahminore Santiago pehere ñoseni pjī mehna tiqiro wejē dutigū apequina pehe tiqirore wejēahye. ³Santiagore tiqiro wejēgū judio masa bucueahye. Tiquina bucuyere Herode masino, “Sa dihita cahmene tiquina”, nino Pedro gūhure peresu yeahye. Ti decorire pugū yeye moremehneñe pāre tiquina ihyati bose deco pascua ijiahye.

⁴Sa ye Herode ñehe dutiriquina Pedrore ñehe, peresu yeahye. Sa yero diez y seis surarare cohte dutiahye tiqirore. Pititiaro surara cohteahye tiqirore. Came pititiaro tiquina came-sayequina tiqirore cohte mūjae tiahye. Sata yeahye tiquina diez y seis surara. Herode pehe pascua bato Pedrore peresupū ijiriquirore masa ihñonopū duhu doco duamahye tiqirore wejē dutiro taro. ⁵Sa yero Pedro peresupū ijiahye. Topū tiqiro ijigū Jesu yequina pehe Cohācjūre tutuaro sini basae tiahye tiqirore.

Peresupū ijiriquirore Pedrore Cohācjū wioahye

⁶Sa ye ñamine Pedro come dari pua da mehna tiquina dūhteriquiro pūaro surara watoapū carīno niahye. Sa ye surara sopecahapū cohteducue tiahye tiqirore. Sa yero ti deco bohrearo Herode Pedrore judio masa ihñonopū duhu doco duamahye tiqirore wejē dutiro taro. ⁷Sa yero Cohācjū yaqiro angel pehe Pedro cahapū tiqiro ducugū peresupū tiqiro ijiri tucū buhrio pih-tia wahahye. Sa yero angel Pedro cahapū ducuro Pedro pati pahmapū ohbe careahye.

—Sojaro mehna wahcāña, niahye tiqiro Pedrore.

Tiqiro sa nigūta tiqiro omocarine tiquina dūhteri dari come dari suru site dijiaa wahahye. ⁸Sa yero angel tiqirore yahuahye:

—Weje dihoya mūhu weje dihori dare. Mūhu dahpo suhti gūhure sañaña, niahye tiqiro.

Tiqiro sa nigū Pedro pehe tiqiro ni-diro saha yeahye.

—Mūhu bui cjā suhtirore sañaña. Yūhu mehna wahaya, niahye angel.

⁹Tiqiro sa nigū ti tucūpū ijiriquiro wijia, angel bato wahaa wahahye tiqiro. Sa wahaerota ohō saha ni tūhotumahye tiqiro. “¿Ahri poto ijieragari? ¿Quehēgū niagari yūhu?” ni, tūhotumahye tiqiro. ¹⁰Sa ye tiquina tiqiro ijiri tucū sopecahapū ducuyequina surarare yūhdu cā, apequina yoa cjūno ducuyequina gūhure yūhdu cā, pajiri sopecahapū esahye. Ti sope pahma macapū wahari mahare cahmotari pahma ijiahye. Ti sope pahma esa tuharo parīgū tiquina wijiaa wahahye. Wijiaa waha, tiquina mahapū wahaa wahahye. Mehenogā tiquina waha nemogū angel pehe wahaa wahahye. Sa yero Pedro ihcāquirola tojoahye. ¹¹Sa tiqirore angel tiqiro wahari bato tiqiro yerire Pedro masiahye. Ohō saha ni tūhotuahye tiqiro. “Angel Cohācjū ohoriquiro peresupū yūhu ijigū yūhure wioro wihiri. Yojopū tire masiaja tiqiro sa yerire. Judio masa pehe yūhure tiquina ye duarire Cohācjū pehe tiquinare ye dutierari. Sa yero yūhure, Herode tiqiro peresu yerigūre wiori”, ni, tūhotuahye Pedro.

¹²Tiqiro sa ni tūhoturi bato María Ñu pacoro ya wūhupū esahye Pedro. Ñu pehe Marco wame tiriquiro ijiri. Ti wūhupū masa peyequina cahmecoa, Cohācjūre siniñe niahye. ¹³Sa yero Pedro sope pahmare doteahye. Rode wame tiri-coro cahacjōno tiqiro dotegū tūhoro ihñano esahye ticoro. ¹⁴Sa yero Pedro ticorore tiqiro pisugū tūhoro tiqiro yahuducuyere tūho masi, tutuaro bucue, sopecahare pōoedahye. Sa bucuemeno

tiquirore pōoboricoro boaa wahahye. Pedro topu tiquiro ducugūta ticoro majareduca oma sajāa wahahye.

—Pedro sopecahapu wihiri, ni, yahuro sajahye.

¹⁵Sa ye tiquina wuhupu ijiyequina ticoro sa nigū tuhoye,

—Sa nicōo niaga mūhu. Sa ni macacōo nine mūhu, niahye tiquina ticorore.

—Poto tjire. Poto nigota niaja, niahye ticoro.

Ticoro sa nigū tuhoye,

—Tiquiro ijieraga. Tiquiro jeriphohna wihiro niaga, niahye tiquina pehe.

¹⁶Tiquina sa nini watoa Pedro sope pahmare sata doteducuro niahye. Tiquiro sa yegū tuhoye, tiquina sopecahare pōo, tiquirore ihña, ihña maria wahahye. ¹⁷Sa yero Pedro tiquiro omoca mehna “Dihta mariahña”, nino, Cohācjū peresupu tiquirore wiorire yahuahye tiquinare.

—Ahrire yahuya Santiagore, apequina Jesu yequina gūhure, niahye tiquiro.

Sa ni yahu tuhasa tiquiro ape sie pahrepū yūhdu cāa wahahye. ¹⁸Sa ye bohrea quehagū surara Pedro tiquiro dūhse ye wijiarire ne masiedahye. Sa masiedaye acūaa wahahye. ¹⁹Sa yero Herode Pedrore maca dutimahye. Sa yero tiquiro surarare peresu cohteriquinare tiquiro sinituri bato tiquinare wejē dutiahye Herode pehe. Sa yero Herode Judeapu ijiriquiro waha, Cesareapu ijiro wahahye.

Herode yariaa wahahye

²⁰Sa yero Tiro wame tiri maca cjēna mehna, Sidō cjēna mehna Herode pehe usuahye. Tiquiro sa usuagū ihñañe ti macari cjēna pehe Herode tiquina mehna tiquiro usarire quehnoñe waha, tiquiro mehna yahuducuye wahahye. Sa ye tiquiro cahacjūnore Blasto wame tiriquire piti tiahye tiquina. Sa ye tiquina Blasto yedohoro mehna Herode

cahapu esahye. Tiquiro cahapu esa, ohō saha niahye:

—Mari quehnoano ijihna. Mari basi ihña tuhtieracūhna, ni siniahye tiquina Herodere.

Tiquina ya yehpa cjēna Herode ya yehpupu ihyayere boca tiahye. Sa ye Herode tiquinare ihña tuhtigū cahmedahye tiquina. ²¹Sa yero Herode tiquiro queori decopu, puhtoro tiquiro sañañe suhti quehnoañe suhtire sañahye tiquiro. Sa yero tiquiro dujiropu dujitjāno, masare yahuducu ihñoahye. ²²Tiquiro sa yahuducu ihñogū tuhoye masa pehe sañuducuahye:

—Ahrikiro yahuducuriqiuro masano ijierare. Cohācjū ijire, ni sañuducumahye tiquina Herodere.

²³Tiquina sa nigūta Cohācjū yaqiuro angel Herodere dohatiyere ohoahye. “Cohācjū ijieraja yūhu”, ne niedahye Herode. Tiquiro sa niedari buhiri angel tiquirore dohatigū yeahye. Tiquiro sa dohatigū tiquirore becoa ihya wejē cāhye.

²⁴Sa ye Jesu yequina peyequina masare Jesu ye buheyer buhee tiahye.

²⁵Sa ye Bernabé, Saulo mehna buhe peho, Jerusalēpu ijiyequina Antioquíapu tojoaa wahahye. Sa ye Nū Marco wame tiriquire tiquina ne cāhye tiquina mehna.

Jesu yequina Bernabére Saulo mehna Cohācjū yere buhe dutiye ohoahye

13 Ti pjere Antioquíapu Cohācjū yequina mehna cjēna, Cohācjū yere yahu mūhtariquina ijiahye. Masare buheyequinata ijiahye tiquina gūhu. Bernabé, Simo Negro wame tiriquire, Ludio Cirene cjūno, Manae, Saulo mehna tiquina ijiahye. Manae pehe puhtoro Herode mūnano mehna tiquina puaro ihcāno mehna bucuariquina ijimahye. ²Sa ye tiquina Cohācjūre tiquina ño peori watoa, tiquina sijiri

watoa, Espiritu Santo pehe yahuahye tiquinare.

—Bernabére, Saulo mehna cūña yuhu cahmeno saha yeatiquinare. Tire yeatiquinare bese cūgū niaja tiquinare, niahye Espiritu Santo.

³Tiquiro sa nigū tiquina pehe siji Cohācjūre sini, Bernabé bui Saulo bui tiquina omocarine duhu peohaye. Sa duhu peoye tiquinare buhe dutiye ohoahye.

Chiprepū Jesu cūriquina buheahye

⁴Sa ye tiquina Saulo, Bernabé mehna Espiritu Santo tiquiro ohoriquina ijiye, Seleuciapū esa, ti macare yuhdu cā, Chipre wame tiri nūcūopū esahye tiquina. ⁵Sa ye Salamina wame tiri petamahapū esahye. Ti macapū judio masa buheye wuhūsepū, Cohācjū yere yahu dūcahaye tiquina. Sa yero Ņu Marco gūhū tiquina mehna waha, tiquinare yedohoahye. ⁶Sa ye tiquina ti nūcūo sohtoapū maja, ti nūcūo toperū ijiri macapū Pafō wame tiri macapū esaye, yairore boca sahye tiquina. Tiquiro judio masūno, Barjesu wame tiri tiquiro ijiahye. Barjesu griego ye mehna niñe Elima tiquina ni pisuriquiro ijiahye. “Cohācjū yere yahu muhtagū ijiaja yuhu”, ni, masare ni mehoducuriquiro ijiahye tiquiro. ⁷Sa yero tiquiro Sergio Paulo wame tiri tiquiro mehna cjāno ijiahye. Sergio Paulo pehe ti nūcūo cjēna puhtoro masi pehoriquiro ijiahye. Sa yero Cohācjū yere tuho duaro tiquinare Bernabé, Saulo mehna pijioahye tiquiro. ⁸Tiquiro sa pijiopegūta Elima, yairo pehe tiquinare buhe dutierahye. Tiquiro Sergio Paulo Jesu yere tiquiro ño peogū cahmesāedahye yairo pehe. Sa yero yairo pehe Sergio Paulore Cohācjū yere cohā dutiro nimahye. ⁹⁻¹⁰Tiquiro sa cohā dutiepegūta Saulo, Pablo tiquina nidiquiro Espiritu Santore cūoriquiro

ijiro, yairore quehnoano ihña diho cū tiquirore yahuahye:

—Mūhū ni mehoñe peyagū, ñagū, watīno tiquiro dutiyere yegū, quehnoañene ihña yabigū ijire mūhū. ¿Duhse yegū Cohācjū yere “Ni mehoñe ijire”, sa niducujari mūhū? ¹¹Mūhū sa nigū Cohācjū caperi bajueragū yerota mūhure. Sa yegū meheñe decorigā mūhū ihñasi, niahye Pablo.

Tiquiro sa nigūta yairo pehe bueri yero saha ijiyere ihña muhtano, nahitiano dihitare ihñahye. Sa yero tiquirore tuātiquire macahye tiquiro. ¹²Tiquiro sa wahagū ihñano, Sergio Paulo pehe Jesu yere “Ijirota ijire”, ni masiahye. Mari puhtoro yere tiquiro tuho, tuho maria waha, Jesure wacū tutua dūcahaye.

Pablo Bernabé mehna Antioquíapū Pisidia yehpapū ijiri macapū ijiahye

¹³Sa ye Pablo gūhū Pafopū ijiriquina yucūsa mehna waha, Pergepū esahye. Perge Panfilia yehpapū ijire. Topū esa, Ņu Marco tiquinare cohā cā, Jerusalēpū wahaa wahahye. ¹⁴Sa ye tiquina Pergepū ijiriquina waha, Antioquíapū esahye. Antioquía Pisidia yehpapū ijire. Topū esaye, saurū deco ijigū tiquina judio masa buheri wuhūpū sajā sa, topū dujiahye. ¹⁵Sa ye ti wuhūre cohteyequina Cohācjū dutiyere, Moisepū marine tiquiro cūrire, Cohācjū yere yahu muhtariquina tiquina ojarire tiquina buheri bato tiquina pijiahye Pablo gūhure.

—¿Ūsā acaye, masare mūsa yahu duaye ijiajari? Tire yahu duana yahuya mianogāta, niahye ti wuhūre cohteyequina.

¹⁶Tiquina sa nigū tuhoro, Pablo wahcādūca sa, “Yahuducueracāhña”, nino tiquiro omoca mehna quē dijioahye. Tiquina dihta mariagū ihñano, tiquiro ohō saha niahye:

—Israe masa, Israe masa ijiena gũhu mari Pacure ño peona, tũhoya musa. ¹⁷Mari ñecusumua muna panopũ cjẽna Cohãcjũre ño peoe tiahye. Tiquina munare Cohãcjũ besee tiahye. Sa ye mari ñecusumua muna yoari pje Egiptopũ ijie tiahye ape yehpa cjẽna ijiepetã. Topũ tiquina ijigũ Cohãcjũ quehnoano yee tiahye tiquinare. Sa ye peyequina masaputiahye tiquina. Ohõ saha yeahye tiquinare. Tiquinare Egiptopũ ijiriquinare tiquiro tutuaye mehna wioahye Cohãcjũ. ¹⁸Tiquiro sa wiori bato tiquina cuarenta cũhari waro masa marienopũ tinie tiahye. Topũ tiquirore tiquina yũhdũdũcagũ Cohãcjũ sata tũhotu cãhye. ¹⁹Sa yero Canaa wame tiri yehpapũre siete cururi cjẽnare cohã tuhãsa, Cohãcjũ ti yehpare ohoahye Israe masa pehere. ²⁰Ti ijipihitiyere tiquina yegũ cuatrocientos cincuenta cũhari waro yũhdũahye. Camepũ masare dutiatiquinare cũahye Cohãcjũ Israe masare. Cohãcjũ tiquiro cũriquina Samuel tiquiro ijigũpũ iji bato tie tiahye. Samuel pehe Cohãcjũ yere yahu mũhtariquiro ijie tiahye. ²¹Came Israe masa pehe tiquina pũhoro ijiatiquirore macae tiahye. Sa ye Cohãcjũre sinie tiahye. Tiquina sa sinigũ ihãno Cohãcjũ Saulore cũahye tiquinare. Saulo Cis macũno ijiro, Benjami ya curua cjũno ijiahye. Sa yero cuarenta cũhari waro tiquina pũhoro ijiatiquiro cũahye Cohãcjũ tiquirore. ²²Sa yero Cohãcjũ Saulore tiquiro cohãri bato Davire cũahye tiquiro. Ohõ saha niahye Cohãcjũ Davire: “Davi Isaĩ macũnore bocaũ yũhu. Tiquiro mehna bucueaja yũhu. Tiquiro yũhu cahmeñene yerota”, niahye Cohãcjũ. ²³Ahriquiro Davi panamino iji turariquiro ijire Jesu. Cohãcjũ Jesure cũri jiri Israe masare yũhdũoatiquiro. “Masare quehnoano yeitja”, niahye Cohãcjũ. Tiquiro nidiro sahata yeri

tiquiro. ²⁴Tiquiro sa yeato pano Jesu wihiato pano Ñu ohõ saha ni buheri jiri: “Musa ñañene bũjua witiya. Quehnoañe pehere comesaya. Sa yena wame yenohrina ijia”, ni buheri jiri Ñu ijipihitiyequina Israe masare. ²⁵Sa yero Ñu tiquiro buhe bato tiato pano, tiquiro yariato pano ohõ saha ni yahue tiri jiri: “¿Noa boro ijiajari yũhu, musa tũhotugũ? Cristo ijieraja yũhu. Apegu ijiaja. Yũhu sa ijiepegũ tũhoya yũhũre. Yũhu bato yũhu yũhdũoro tutuariquiro ahtarota. Tiquiro quehnoa yũhdũriquiro ijire. Tiquiro yero saha ijieraja yũhu”, ni yahuahye Ñu masare.

²⁶Yũhu acaye, Abrahã panamena iji turiana, Israe masa ijiena gũhu ijipihitina mari Pacure ño peona, marine ahri tiquiro yũhdũoatire yahuri buheyere ohori jiri mari Pacũ. ²⁷Jerusalẽ cjẽna tiquina pũhtoa mehna saurũ decori ijigũ Cohãcjũ yere yahu mũhtariquina tiquina ojoarire buhepeta quehnoano masiedari jiri. Sa masiedaye, Jesu tiquinare yũhdũoatiquiro tiquiro ijigũ gũhũre masiedari jiri. Tiquina sa masiedapeta Jesure wejẽ dutiahye. Sa yeye Cohãcjũ yere yahu mũhtariquina tiquina ojoariro sahata yeye niahye. ²⁸Tiquirore tiquina wejẽato pano tiquina Jesure yahusãmahye. Sa ye tiquiro ñañene yerapegũta tiquina Pilatore Jesure wejẽ dutiye tee, siniahye. ²⁹Sa ye panopũ tiquina ojoariro sahata Jesure ye tuhãsa, tiquirore curusapũ ijiriquirore ne dijio, masa copepũ utãre tiquina seheri copepũ cũahye tiquirore. ³⁰Sa ijiepegũta tiquiro yariari bato Cohãcjũ masori jiri tiquirore. ³¹Sa ye Galileapũ ahtariquina Jerusalẽpũ tiquiro mehna esariquina peye decori tiquirore yaria masa bajuariquirore ihãne tiahye. Sa ye yojopũre tiquirore tiquina ihãnarire masare yahuri tiquina.

32-33 Sa yena quehnoañe buheyere yahuaja usã musare. Cohãcjũ mari ñecusũmuare “Masare quehnoano yeitja”, panopũ tiquiro nidiro sahata yojopũre marine tiquina acayere yeri. Tire tiquiro yahurire ohõ saha yeri tiquiro. Cohãcjũ Jesure masori jiri. Sa yena Jesure tiquiro masorire yahuaja musare. Pũaro Salmopũ panopũ tiquina ojoariro sahata sa wahari jiri. “Mũhu yũhu macũ ijire. Miare mũhũre bajuagũ yei’, nine Cohãcjũ tiquiro macũnore”, ni ojoahye panopũre. 34 Sa yero Cohãcjũ Jesure tiquiro masoatire pari turi tiquiro yarieratire yahuyuro ohõ saha ni, yahu ojoahye Salmore ojoariquiro. “Davire yũhu paja ihñariro sahata tiquirore yũhu nidiro sahata potota quehnoano yegũtja mũhu gũhũre’, nidi Cohãcjũ”, ni ojoahye. 35 Sa yero ape Salmo gũhũre ohõ saha ni, yahuahye: “Cohãcjũ mũhu cahacjũno quehnoariquiro tiquiro pagũre ahba dutierare mũhu”, ni, ojoahye. 36 Sa yero Davi Cohãcjũ tiquiro cahmediro sahata tiquiro ijiri pje cjẽnare yedohoahye. Came tiquiro yariaa wahahye. Tiquiro yariari bato tiquiro pacusũmuare tiquina yeriro sahata yahye tiquiro gũhũre. Sa yero tiquiro ahbaa wahahye. 37 Tiquiro sa ahbaepẽgũta ahriquiro, Cohãcjũ tiquiro masoriquiro pehe ne ahbaerari. 38 Sa yena musa yũhu acaye ahrire masiña: Cohãcjũ musa ñañene tiquiro cohãtĩre musare yahuaja usã. Jesu pehe ñañene cohãtiquiro ijire. 39 Sa yero tiquirore wacũ tutuayequinare tiquiro tiquina ñañe yerire borota. Moiserẽ Cohãcjũ cũri dutiyere musa yeri mehna Cohãcjũ cahapũ wahasi musa. Sa yero dutiyere yeye mehna yũhdũ duayequinare tiquina ñañene cohãsi Cohãcjũ. 40 Sa yena quehnoano yeya. Musã quehnoano yeragũ Cohãcjũ yere yahu mũhtariquina tiquina

ojoariro sahata musare wahaboaga. Ohõ saha ni ojoahye:

41 Tũhoya musa. Nãno ni bujũpena, yũhũre ihñã tuhtina ijire musa. Yũhu ohõ saha yegũ cueya musa. Sa yena butia wahaya. Musã ijire decorire Cohãcjũ tutuaye mehna musare ye ihñogũtja. Yũhu sa ye ihñogũ ihñãepenata “Ijirota ijire”, nisi musa. Apequiro tire musare tiquiro quehnoano yahuepegũta “Ijirota ijire”, nisi musa, ni ojoahye Cohãcjũ yere yahu mũhtariquiro, ni yahuahye Pablo tiquinare.

42 Tiquiro sa ni yahuri bato judio masa buheri wũhũpũ tiquina wijari bato masa tiquirore tũhoriquina pehe tiquinare siniahye:

—Ape semanapũ saurũ ijigũ usãre ahrire buheya tja, ni siniahye tiquina Pablo gũhũre.

43 Sa ye ti wũhũpũ ijiriquina wijia, judio masa peyequina, judio masa ijieyequina gũhũ Pablo gũhũ mehna wahahye. Judio masa ijieyequina judio masa yere buheyequina ijiahye. Tiquina sa wahagũ Pablo, Bernabẽ mehna quehnoano yahuahye tiquinare. “Cohãcjũ musare cahĩne. Sa yena tiquirore ño peoducya”, ni buheahye tiquina.

44 Sa ye ape semanare saurũ ijigũ ijipihtiyequina Jesu yere tũho duayequina cahmecoahye. 45 Sa yepegũta judio masa pehe peyequina masare Jesu yere tũho duayequinare ihñãne, ihñã tuhtiahye. Sa ihñã tuhtiyẽ tiquina sijoro ni yahuducu, Pablõre ñãno quitĩ dojomehneahye. “Musare tiquiro buheye poto ijierare”, niahyẽ tiquina. 46 Tiquina sa nigũ tũhoye, Pablo, Bernabẽ mehna tiquinare quitĩ dojomehnediquinare cuero marieno yahuahye:

—Cohãcjũ tiquiro dutiriro sahata musare buhe mũhtami usã. Usã sa buhepegũta musa pehe tire cahmeda

tuhasari. Ijipihtiye decori Cohācjū mehna ijieye gūhure cahmeda tuhasari mūsa. Sa yena usā pehe judio masa ijieyequina pehere buhe dūcanatja.⁴⁷ Sata dutiahye mari pūhtoro usāre:

“Musa judio masa ijieyequinare buhena tiquinare Cohācjū yere quehnoano masigū yenata mūsa. Sa yegū mūsa yoaropū ijieyequinare mūsa buhegū tuhoyequinare tiquina pehere pecapū wahaboriquinare yūhdūogutja yūhū”, ni yahuahye usāre Cohācjū, ni yahuahye Pablo, Bernabé mehna.

⁴⁸Tiquina sa nigū tuhoye judio masa ijieyequina pehe bucueahye. “Cohācjū ye pehe quehnoañe ijire”, niahye tiquina. Sa ye Cohācjū tiquiuro cahmeñequina ijipihtiye decori tiquiuro mehna tiquina ijiatire tiquiuro oho duariquina Jesure wacū tutua dūcahaye.

⁴⁹Sa ye mari pūhtoro Cristo yere ti yehpapure yahu pehoahye.⁵⁰ Tiquina sa yahugū ihñañe judio masa coerahye. Topū mari Pacure ño peoye numia, quehnoañe numia ijiahye. Sa ye judio masa Pablo gūhure ñano ni yahu wajahye. Tiquina sa ni yahu wajagū tuhoye ti numia Pablo mehna, Bernabé mehna gūhure usuahye. Sa ye ti maca cjēna pūhtoa gūhū tiquina mehna usuahye. Sa usuaye to cjēna ñano yeahye Pablo gūhure. Tiquina sa yeri bato Pablo gūhure tiquina ya yehpapū ijieyequinare cohā wioahye.⁵¹ Tiquina sa yegū ihñañe Pablo, Bernabé mehna tiquina dahpocāri cjē dihta wahārire wejē site boro cūahye ti maca cjēna tiquina ñañe buhirire ihñōñe. Sa ye tuhasa tiquina Iconiopū wahaa wahahye.⁵² Sa ye tiquina Jesu yequina pajiro bucueye, Espiritu Santo pajiro cūoye, tiquiuro dutiro sahata yeyequina ijiahye.

Pablo, Bernabé mehna Iconiopū ijiahye

14 Sa ye Pablo, Bernabé mehna judio masa buheri wuhūpū sajā, Jesu yere yahuahye. Sa ye judio masa peyequina Jesure wacū tutua dūcahaye. Sa ye judio masa ijieyequina gūhū Jesure wacū tutua dūcahaye.² Sa ijiepegūta judio masa Jesure cahmedariquina gūhū tiquina mehna ijiahye. Tiquina judio masa ijieyequinare usuagū yeahye. Jesu yequina mehna tiquinare usuagū yeahye judio masa pehe. Tiquina sa yegū judio masa ijieyequina ñano tuhotuahye Jesu yequinare.³ Tiquina sa tuhutugū ihñañe Jesu yequina Pablo, Bernabé mehna topū yoari pje ijieye, cuero marieno mari pūhtoro yere quehnoano buheahye. Cohācjū masare tiquiuro cahñene buheahye. Tiquina sa buheri watoa Cohācjū tutuaye mehna ye ihñōahye, “Ahri buheye ijirota ijire”, niñe.⁴ Sa ijiepegūta ti maca cjēna deco mehna judio masa yere cahmeñequina tojoahye. Deco mehna Jesu yere cahmeñequina gūhū tojoahye. Tiquina pūa curua tojoahye.⁵ Sa ye judio masa ijieyequina, judio masa, tiquina pūhtoa mehna Jesu cūriquinare ñano yemahye. Utā paca mehna doque wejē duamahye tiquinare.⁶ Tiquina sa ye duarire masiñe, Pablo, Bernabé mehna Licaonia yehpapū duhti cāa wahahye. Ti yehpapū ijiri maca Listra wame tiri macare yūhdū cā, Derbepū esahye.⁷ Topū esaye, quehnoañe buheyere buheahye tiquina.

Listrapū Pablore utā paca mehna doqueahye

⁸Sa ye Listrapū tini masieniquiro ijiahye. Tiquiro wahma masa bajaropūta tini masieniquiro ijiahye.⁹⁻¹⁰ Sa yero tiquiuro Pablo buhegū tuhohaye. Tiquiro

tuhori watoa Pablo pehe tiqiro dihitaré ihñahye.

—Ahrikiro Jesure wacū tutuare. Sa yero tiqiro quehnoariqiro waha duare, ni tuhoutuahye Pablo.

Sa ni tuhuturo tutuaro mehna ohō saha niahye Pablo tiqirore:

—Wahcādūcaya, niahye Pablo tiqirore.

Tiqiro sa nigū tuhōrota tini masieniqiro pehe uhpuđuca sa, wahaa wahahye. ¹¹ Pablo sa yegū ihñañe masa sañuducuahye. Tiquina Licaonia ye mehna sañuducuahye.

—Cohāmana, masa saha bajuyequina ũhmusepū ijyequina mari cahapū dijia tari jiri, ni sañuducuahye tiquina.

¹² Sa ye tiquina Bernabére “Zeus”, ni, pisuahye. Sa ye Pablo buhe mūhtariqiro pūhtoro yero saha tiqiro ijigū ihñañe “Hermes”, ni, pisuahye tiquina tiqirore. ¹³ Sa yero Zeure ño peoyequina ya wūhū ti maca dūhtū cahapū ijiahye. Sa yero Zeus yequina tiquina yaqiro pahi pehe wecūare, cohorī mehna macapū sajā tari sopecaha cahapū ne cāhtahye. Zeure ño peo duaro wecūare oho duamahye. Sa yero tiqiro wecūare ũjūa mūoñe mehna Pablōre, Bernabére ño peo duamahye tiqiro, masa mehna.

¹⁴ Tiquina sa yegū ihñañe Pablo, Bernabé mehna tiquina basi tiquina ye suhtire tuhṛēdoqueohye tiquina bñjūa witiyere masare ihñoñe tehe. Tuhṛēdoqueo tuhasa masa watoa oma cā, sañuducuahye tiquina:

¹⁵ —Mūsa ohō saha yeracāhña. Ũsā gūhū mūsa yero sahata masa ijiaja. Mūsa ohō saha yeye ne dūhseati ijierare. Sa yena mū sare buhena ahtaū mūsa ohō saha yeyere duhu dutina tana. Ahriquina cohāmanare mūsa yeriquinare ñañequinare cohāña. Sa yena Cohācjūre catiriquiro pehere ño peoya. Cohācjū pehe ũhmūse, yehpare, pajiri mare

ijipihtiyere yeriquiro ijire. ¹⁶ Sa yero tiqiro panopū ijipihtiyē macari cjēna tiquina yerire sa ihña cāhye. ¹⁷ Sa yeperota tiqiro ijyē tyere ihñore masare. Tiqiro masare quehnoañene ye, acoro ahtagū ye, đuca tigū ye, masare ihyayere ohoducure. Tiqiro sa ohogū masa bucuere. Sata tiqiro ijyē tyere ihñore masare, niahye Pablo, Bernabé mehna.

¹⁸ Tiquina sa nigū tuhōepeta masa wecūare wejē ũjūa mūo, tiquinare ño peo duamahye. Sata tiquina ño peo duagū ihñañe tiquinare sa ye dutierahye Pablo gūhū. Tiquina sa yeyere duhu duerapeta duhuahye.

¹⁹ Sa ye apequina judio masa Antioquía cjēna, Iconio cjēna gūhū Listrapū esahye. Topū esayē, Pablōre ñano yahuducuahye judio masa. Tiquina sa ni yahuducugū tuhoye, masa tiqiro mehna usuahye. Sa usuayē ũtā paca mehna doqueahye tiqirore. ũtā paca mehna tiqirore doque tuhasa “Ahrikiro yariaa wahare”, niñe, ti maca dūhtū cahapū tiqirore weje sa cū cā, wahaa wahahye. ²⁰ Tiquina sa yeri bato Jesu yequina Pablōre ihñañe esahye. Tiqiro cahapū tiquina cahmecođuca sagū waro Pablo wahcādūca, tiquina mehna macapū tojoaa wahahye. Sa ye ape decopū tiqiro Bernabé mehna Derbepū wahahye.

²¹ Sa ye topū tiquina quehnoañe buheyere peyequina masare yahuahye. Sa ye peyequina Jesu yequina tiquina wahari bato, Pablo gūhū Listrapū esa, ti macare yūhđū cā, Iconiopū esa, ti macare yūhđū cā, Antioquiapū Pisidia yehparū ijiri macapū esa, ti macapū tojoahye. ²² Ti macaripū esayē to cjēna Jesu yequinare quehnoañe buheyere yahuyē, tiquinare quehnoano jeripohna tigū yeahye. Sa Jesure wacū tutuaducu dutiye ohō saha ni yahuahye tiquinare:

—Cohācjū ijiropure mari waha duana, tutuaro marine nāno yuhduro cahmene, ni yahuahye Pablo gūhu.

²³Sa ye macaripe cjēnare Jesu yequinare tiquina puhtoa ijiatire cūahye Pablo, Bernabé mehna. Sa ye tiquina sijiri bato Cohācjūre siniahye:

—Puhto, ahriquina muhu yequinare ihña ihboya, ni sini basahye tiquina Cohācjūre, tiquina wacū tutuariquirore.

**Pablo Bernabé mehna Antioquíapū
tiquina iji muhtari
macapū tojoaa wahahye**

²⁴Tiquina sa yeri bato tiquina Pisidia yehpapū ijiriquina wahaa wahahye Panfilia yehpapū. ²⁵Sa ye Pergepure tiquina buhe tuhasa, Atalia wame tiri macapū wahaa wahahye. ²⁶Sa ye ti macapū esa, Antioquíapū tojoaye, yucusa mehna wahaa wahahye. Ti macapūta panopū tiquina ijinigū Jesu yequina Cohācjū yere buhe dutiye Pablo gūhure ohoahye. Sa ohoje, ohō saha niahye:

—Cohācjū muhu cahīne mehna ahriquinare ihña ihboya, ni ohoahye tiquina.

Sa ye tiquina buhe dutirire buhe pehoahye Pablo, Bernabé mehna. ²⁷Sa ye tiquina Antioquíapū tiquina tojoa sari bato Jesu yequina mehna cahmeco, Cohācjū tutuaye mehna tiquina yerire yahu pehoahye tiquina. Judio masa ijieyequina gūhu Cohācjū yequina tiquina waharire yahuahye tiquina. ²⁸Sa ye Pablo gūhu topure Jesu yequina mehna yoari pje ijie tiahye.

**Jerusalēpū Jesu
yequina cahmecoahye**

15 Sa ye Judea yehpa cjēna meheñequinagā Antioquíapū esaye, Jesu yequinare ohō saha ni buhe dūcahye tiquina:

—Cohācjū dutiyere Moisere cūno ohō saha ni cūahye. Ijipihtiyequina

tiquina cuhnucunū sohtoa cahserogāre tiquina yuhre neatire yahu cūahye Moisere. Mūsa tire yeragū Cohācjū musare yuhduosi, ni buheahye tiquina to cjēnare.

²Sa ni buheye Judea yehpa cjēna pehe cahme duse tini wiahye Pablo, Bernabé mehna. Tiquina sa cahme duse tini wiari bato Jesu yequina pehe Pablōre, Bernabére apequna to cjēna gūhure Jerusalēpū ohoahye. Judea yehpa cjēna tiquina buherire Jesu cūriquinare, Jesu yequina puhtoa gūhure sinitu dutiye ohoahye Pablo gūhure.

³Sa ye Jesu yequina tiquinare ohogū waha, Fenicia yehpare esa, yuhdu cā, Samaria yehpapū esahye. Ti macaripū esaye, judio masa ijieyequina Cohācjū yere tiquina cahme dūcarire yahuahye tiquina to cjēnare. Tiquina sa yahugū tūhoye to cjēna Jesu yequina tutuaro bucueahye.

⁴Sa ye tiquina Jerusalēpū esagū ihñañe to cjēna Jesu yequina tiquiro cūriquina, tiquiro yequina puhtoa mehna bucueye mehna quehnoano piti cahye tiquinare. Sa ye Pablo, Bernabé mehna Cohācjū tutuaye mehna tiquina yerire yahuahye tiquina Jerusalē cjēnare. Judio masa ijieyequina Jesu yequina tiquina wahari gūhure yahuahye tiquinare. ⁵Sa ijiepegūta topū fariseo masa Jesu yequina meheñequinagā ijiyahye. Sa ye tiquina topure wahcādūca, ohō saha ni yahuahye:

—Tiqinare judio masa ijieyequinare tiquina cuhnucunū sohtoa cahserogāre yuhre neno cahmene. “Cohācjū Moisere tiquiro dutirire yeya mūsa gūhu”, nino cahmene tiquinare, niahye tiquina fariseo masa gūhu.

⁶Tiquina sa nigū tūhoye Jesu cūriquina, Jesu yequina puhtoa mehna tiquina sa nidire quehnoñe tehe, cahmecoahye. ⁷Sa ye peye tiquina

yahuducuri bato Pedro wahcādūca yuahaye tiquinare:

—Yūhū acaye, panopū yūhūre mūsa mehna ijirigure Cohācjū ohō saha ye dutiro yūhūre cūri. Tiquiro yūhūre quehnoāne buheyere judio masa ijieyequinare yahu dutiro cūri. Tiquinare Jesure wacū tutua dutiro yūhūre tiquinare buhe dutiri. ⁸Sa yero Cohācjū masa tuhuyere masine. Sa yero tiquiro judio masa ijieyequinare tiquiro yequina tiquiro yerire ihñono taro Espiritu Santore ohori tiquinare, marine tiquiro yeriro sahata. ⁹Sa ohoro tiquiro marine tiquina gūhūre ihcāno saha quehnoano yeri. Tiquirore tiquina wacū tutuagū tiquina ñañene bori tiquiro. ¹⁰Mari pehe Cohācjū Moiserre tiquiro cūri dutiyere ye peho masiedaja. Sa ye mari ñecūsūmūa mūna gūhū ti dutiyere ye peho masiedahye. ¿Sa mari ye masiedapegūta dūhse yena Jesu yequinare judio masa ijieyequinare tire ye duti duajari mūsa? Sa ye dutina Cohācjū tiquinare tiquiro yerire “Queoro wahaerare”, nina niaga mūsa. ¹¹Mūsa sa niepegūta ohō saha ūsā tuhutuaja. Yojoपुरe judio masa ijieyequina yero sahata mari gūhūre mari pūhtoro Jesu cahñe mehna Cohācjū yūhdūorota, niahye Pedro tiquinare.

¹²Tiquiro sa nigū tuhoye ijipihtiye-quina dihta maria wahahye. Sa ye Pablo, Bernabé mehna judio masa ijieyequina watoa Cohācjū tutuaye mehna tiquina ye ihñorire yuahaye tiquinare. ¹³Sa tiquina yahu tuhasari bato Santiago yuahahye.

—Acaye, tuhoya yūhūre. ¹⁴Cohācjū judio masa ijieyequinare tiquiro yequina wahagū yeahye. Coā tiquinare sa wahagū yeahye. Tire yahu tuhasari marine Pedro pehe. ¹⁵Panopū cjēna Cohācjū yere yahu mūhtariquina tiquina yahuro sahata sa wahari judio masa

ijieyequinare. Ohō saha ni mari Pacū yere ojoahye tiquina:

¹⁶Panopū Davi mūnāno ya curua cjēna tiquina pūhtoa tiquina ijiri pihtia wahari. Came tojoa tautja yūhū. Sa yegu pari turi Davi ya curua cjēnore pūhtoro sōutja. ¹⁷Yūhū sa yeri bato ijipihtiyequina apequina judio masa ijieyequina yūhūre tiquina pūhtore cahmeeta tiquina. “Yeequina ijiya”, yūhū ni pisuriquina pehe yūhūre cahmeeta. ¹⁸Sata nine mari pūhtoro. Panopū tiquiro ahire masare yahue tiri jiri, ni ojoahye Cohācjū yere yahu mūhtariquina.

¹⁹‘Sa yegu ohō saha tuhutuaja yūhū. Judio masa ijieyequinare Cohācjū yere wahma cahme dūcayequinare peye ye dutieracāhna mari. ²⁰Sa dutierapenata tiquinare oja ohouhna mari. Ohō saha ni, oja ohouhna. “Ñañe ihyayere, ‘Cohācjū ijire’, tiquina nimesi queoyere ño peo tiquina duhu peori ihyayere ihyeracāhna. Sa yena wūana tieracāhna. Sa yena wamūa tiquina ñehe wējēdiquinare wahiquinare ihyeracāhna. Diire sihnedacāhna”, ni yahu oja ohouhna. ²¹Yoari pje judio masa buh-eye wūhūsepū saurū ijigū Cohācjū Moiserre tiquiro cūri dutiyere buhee tiri masa. Sa ye ijipihtiye macaripū Moise tiquiro yahuyere buhee tiri. Sa yena yūhū nidiro sahata judio masa ijieyequinare Jesu yequinare oja ohouhna, judio masa pehe tiquina mehna “Usuari”, nina, niahye Santiago.

Judio masa ijieyequinare Jesu yequina pūhtoa oja ohoahye

²²Ti pjere Jesu cūriquina, Jesu yequina pūhtoa ijipihtiyequina Jesu yequina mehna pūaro tiquina mehna cjēnare beseahye tiquina ohoatiquinare. Antioquíapū Pablo, Bernabé mehna wahatiquinare tiquinare bese ohoahye. Sa ye tiquina Judare, Sila mehna

ohoahye. Juda pehe Barsaba puaro wame wame tiahye. Tiquina acaye Jesu yequina tiquinare ño peohaye. ²³Tiquinare tiquina beseri bato Jesu yequina ojoari püre ohoahye tiquina mehna. Ohõ saha ni ojoahye tiquina:

—Jesu cūrīna, tiqiro yequina puhto, m̄sa acaye Jesu yequina mehna ũs̄a quehnoa dutiaja m̄sare. Ijipihina judio masa ijenare Antioquíap̄, Sīriap̄, Ciliciap̄ ijinare m̄sare Jesu yequinare quehnoa dutiaja ũs̄a. ²⁴Ũs̄a mehna c̄jēna m̄sa cahap̄ esaye, m̄sare peye dutiyere ye dutiñohti. Sa ye m̄sare cariboñohti. Tiquina sa dutiepeḡta ũs̄a pehe tiquinare tire buhe dutina ohoeru. ^{25–26}Sa yena ũs̄a ijipihina ihc̄ano mehna m̄sa cahap̄ ohoatiquinare ũs̄a besei. Mari cahñequinare Pablo, Bernabé mehna Cristo Jesu mari puhtoro yere cuero marieno tiquina buheḡu peye tahari apequina tiquinare wej̄mahye. Tiquina sa wej̄ duaḡu mehenoḡa mehna yuhduahye tiquina. Tiquina mehna ũs̄a beseriquinare yojop̄re ohoaja. ²⁷Sa yena Judare, Sila mehna m̄sa cahap̄ ohoaja. Ũs̄a ojoarire tiquina pehe m̄sare yahueta. ²⁸Esp̄ritu Santo wac̄uno sahata ũs̄a ḡuh̄u tuhotaaja. Ohõ saha ijire ti: Apeye dutiyep̄re c̄uedaja m̄sare. Ahri dutiye dihitare c̄unatja m̄sare: ²⁹Ñañe ihyayere, “Coh̄ac̄j̄u ijire”, tiquina nimeri queoyere ño peo tiquina duhu peori ihyayere ihyerac̄añ̄a. Diire sihniedac̄añ̄a. Wam̄a tiquina ñehe wej̄ediquinare wahiquinare ihyerac̄añ̄a. Sa yena wuana tierac̄añ̄a. Ahri yuh̄u ye dutierarire yerana quehnoañene yena ninata m̄sa. To puno tjire m̄sare ũs̄a yahu duaye, ni ojoa ohoahye Jesu yequina Jerusal̄ep̄u ijiyequina.

³⁰Ti püre ojoa tuhasa, ohoahye Antioquíap̄u wahayequinare. Tiquina

ohori bato waha, Antioquíap̄u esahye. Top̄u tiquina esari bato peyequina masare cahmecoa duti, tiquina ojoari püre wiahye tiquinare. ³¹Ti püre tiquina buheri bato quehnoañene tiquina yahuḡu tuhoye, quehnoano bucueahye. ³²Sa ye Juda, Sila mehna Coh̄ac̄j̄u yere yahu m̄htariquina ijiye, yoari pje Jesu yequinare Coh̄ac̄j̄u yere yahuahye. Tiquina sa yahuḡu tuhoye, Jesu yequina pehe bucie, quehnoano jeripohna tiahye. ³³Sa ye Juda, Sila mehna top̄u meheñe decoriḡa tiquina ijiri bato tiquina tojoa taḡu to c̄jēnare tiquina cohe tiḡu, “Quehnoano wahaya m̄sa”, niahye Antioquía c̄jēna. Sa ye Juda ḡuh̄ure ohoriquinare quehnoa dutioahye. Tiquina sa nidi bato Juda pehe tojoaa wahahye. ³⁴Sa ijipeḡta Sila pehe top̄ta tojoa c̄ahye Antioquíap̄ta. ³⁵Sa ye Pablo, Bernabé ḡuh̄u meheñe decoriḡa tojoar̄ahye ti macap̄u. Sa ye tiquina apequina peyequina mehna Jesu yere buheahye.

Pari turi Pablo quehnoañe buheyere buhe tinino wahahye

³⁶Sa ye meheñe decoriḡa bato Pablo, Bernabé mehna yahuducuahye:

—Ijipihiyequinare mari buhe d̄u-cariquinare ihñana wahauhna tja, niahye Pablo ḡuh̄u tiquina basi.

³⁷Sa yero Bernabé pehe Ñure tiquina mehna nea duamahye. Ñu Marco puaro wame wame tiriqiro ijiahye. ³⁸To pano tiqiro tiquina mehna Panfiliap̄u esaro tiquina mehna tojoerahye. Tiquina yerire ihc̄ano sahaeraro, tojoaa wahahye. Tiquiro ihc̄ano sahaeraḡu ihñano Pablo pari turi tiqirore nea duerahye. ³⁹Tiquiro nea dueraḡu ihñano Bernabé Pablo mehna puaro tiquina basi cahme yahuducu cahme tu wahye. Bernabé pehe Chipre wame tiri n̄c̄uop̄u Marco mehna peh̄aa wahahye. ⁴⁰Pablo pehe Sila mehna piti ti c̄a, wahahye.

Sa ye tiquina buheye wahato pano Jesu yequina tiquinare ohoye, “Cohăcĵũ mŭsare quehnoano ihña ihboahro”, ni-ahye. Tiquina sa nidi bato Pablo, Sila mehna wahaa wahahye. ⁴¹Sa wahaye, Siria yehpapũ, Cilicia yehpapũ gũhũre esaye, topũ Jesu yequinare quehnoano jeripohna ti bucuegũ yeahye tiquinare.

Timoteo Pablo mehna wahahye

16 Tiquina sa yeri bato Pablo gũhũ Derberũ, Listrapũ esaye, Timoteore boca sahye. Timoteo Jesu yaquiro ijiro, judio masono macũno ijiahye tiquiro. Tiquiro pacoro gũhũ Jesu yacorota ijiahye. Tiquiro pacuro pehe griego masũno ijiahye. ²Sa ye Lистра cĵēna, Iconio cĵēna Jesu yequina ohõ saha niahye Timoteore: “Timoteo masa quehnoariquiro ijire”, ni yahue tiahye. ³Sa yero Pablo Timoteore nea duahye. Sa ijiepegũta ti yehpa cĵēna judio masa pehe Timoteo pacuro griego masũno tiquiro ijigũ masiahye. Sa yero Pablo judio masare “Usuari”, nino, Timoteo cuhnucunũ sohtoa cahserogāre yuhre neahye. Judio masa dutiye nidiro sahata yeahye. ⁴Tiquiro sa yeri bato tiquina esari macari cĵēnare tiquina dutiyere ojoari pũ cĵēne yahuahye. Ti pũ Jesu cũriquina, tiquiro yequina pũhtoa mehna Jerusalēpũ ijieyequina tiquina ojoari pũ ijiahye. Sa ye ti dutiyere quehnoano yahuahye to cĵēnare Jesu yequinare. ⁵Tiquina sa yahugũ tuhoye Jesu yequina pehe Jesure wacũ tutua nemoahye. Sa ye Jesu yequina decoripe peyequina wahaducuahye.

Pablo quehēnopũ Macedonia cĵūnore ihñahye

⁶⁻⁷Sa yero Asia yehpapũ pehere quehnoañe buheyere buhe dutierahye Espiritu Santo tiquinare. Sa ye tiquina Frigia yehpare yuhdua, Galacia yehpare yuhdua, Misia yehpa duhtũ cahapu

esahye. Bitinia yehpa pehe waha duamahye. Tiquina waha duepegũta Espiritu Santo pehe tiquinare topũre waha dutierahye. ⁸Tiquiro sa nidi bato tiquina pehe Misia yehpare yuhdua, Troapũ wihiri. ⁹Topũ tiquiro wihiri bato ohõ saha quehēahye Pablo. Macedonia yehpa cĵūno tiquiro caha ducugũ ihñahye tiquiro. “Ŭsāre Macedonia yehpa cĵānare yedohogũ ahtaya”, ni, pijiahye tiquiro Pablöre. ¹⁰Tiquiro quehēdi bato wahcā, usā yere quehno tuhasa, Macedoniapũ wahaa wahau usā. “Cohăcĵũ ti yehpapũre quehnoañe buheyere buhe dutiro nine marine”, ni tuhottuu usā.

Pablo, Sila mehna Filipopũ ijiahye

¹¹Sa yena usā Troapũ ijina yucũsa mehna Samotracia wame tiri nũcũopũ pehã sau usā. Sa yena ape deco Neapolipũ wahau usā. ¹²Ti macare yuhdu cāna Filipopũ Roma cĵēna ya macapũ esau usā. Ti maca Macedonia yehpapũ ijiri maca ijiri. Ihyo ijiri maca ijierari. Topũre meheñe decorigã usā ijii. ¹³Sa yena saurũ ijigũ usā ti maca duhtũ cahapũ, dia duhtũ cahapũ esau. Topũ Cohăcĵũ mehna tiquina yahuducuro ijiri. Topũ dujina topũ cahmecoañe numia mehna yahuducuu usā. ¹⁴Ihcăcoro usāre tuhoricoro Tiatura cĵōno Lidia wame tiricoro ijiri. Sa yero ticoro quehnoañe suhti wapa tiye suhtire duaricoro, mari Pacure ño peoricoro ijiri. Sa yero Pablo yahuyere quehnoano tuhogũ yeri Cohăcĵũ ticorore. ¹⁵Sa ye ticorore, ticoro ya wũhũ cĵēna mehna wame yeri Pablo. Tiquiro sa wame yeri bato ohõ saha nidi ticoro:

—“Jesu yacoro tĵire mũhũ gũhũ”, nine mũsa yuhũre. Sa yena ya wũhũpũ saĵã tariña mũsa. Yũhũ mehna tojoarĩña, nidi ticoro usāre.

Ticoro sa nigū tūhona ticoro ya wūhupū tojoarī ūsā.

¹⁶Ape deco Cohācjū mehna tiquina yahuducuropū ūsā wahagū watīnore cūoricoro piti cari ūsāre. Ticoro apequina cahacjōno ijiri. Sa yero ticoro masare “Ohō saha waharota mūsare”, ni, yahuyuricoro ijiri. Sa yahuro pajiro wapata basari ticoro puhtoare. ¹⁷Sa yero Pablo mehna ūsā wahagū, ūsāre nūnū tā, sañuducuri ticoro:

—Ahriquina Cohācjū tutua yūhduariquiro yedohoriquina ijire. Mari yariari bato Cohācjū marine tiquiro quehnoano yūhduoatire yahure tiquina, ni sañuducuri ticoro.

¹⁸Peye decori sa ni cariboducuri Pablōre. Sa yero pari turi ticoro sa ni sañuducugū tūhoro Pablo majare ihña, ohō saha nidi watīnore:

—Jesucristo tutuaye mehna dutiaja mūhure. Ticorore duhuya. Waharīsa mūhū, nidi Pablo.

Tiquiro sa nigūta watīno pehe wahaa wahari.

¹⁹Tiquina sa yeri bato ticoro puhto pehe niñeru ticoro wapataericoro wahagū ihñañe, tiquina Pablōre, Sila mehna ñehedi. Ñehe tuhasa, tiquinare neari ti maca decopū puhtoahapū. ²⁰Sa ne cā, buhiri dahre dutiyequina cahapū cūri tiquinare.

—Ahriquina judio masa mari ya maca cjēnare cariboye nine. ²¹Tiquina mari dutiyere cohā dutiye, apeye buheyere buheye nine. Mari ye dutiyere yūhduducagū ye duaye nine. Mari Roma cjāna ijina ahriquina yahuye pehere ye masiedaja mari. Sa yena tiquina buheyere mari cahmedaja, nidi ticoro puhtoahapū buhiri dahre dutiyequinare.

²²Tiquina sa nigū tūhoye masa peyequina Pablo gūhū mehna usua yūhdūa wahahye. Sa ye buhiri dahre dutiyequina pehe Pablo gūhū suhtire tiquina tūhrē cohāri bato daye cjugā mehna

tana dutiri tiquinare. ²³Tutuario tana tuhasa peresu yeri tiquinare. Tiquina sa peresu yeri bato peresu ijiyequinare cohteriquirore quehnoano ihña ihbo dutiahye tiquina. ²⁴Tiquina sa dutiri bato tiquinare cohteriquiro pehe ti wūhū puhia cjā tucūpū tiquinare cū, taboa mehna tiquina dahpocārine biha cūahye.

²⁵Ñami deco Pablo, Sila mehna Cohācjūre sini, tiquirore basa peohaye. Tiquina sa basagū tūhoahye apequina peresupū ijiyequina. ²⁶Tiquina sa ni basagūta ti wūhū tutuario ñuhmiahye. Sa ñuhmigū ihcāno mehna ijipihtiyē sope pahmari parīa wahahye. Sa ye peresupū ijiyequinare tiquina dūhteri dari come dari suru site dijiaa wahahye. ²⁷Sa wahagū ihñano ti wūhūre cohteriquiro pehe “Peresu ijiyequina duhti tuhasari jiri”, ni tūhotumahye. Sa ni tūhoturo tiquiro ñoseni pjīne nedoqueo tiquiro basi ñosemahye. ²⁸Tiquiro sa yegū ihñano Pablo tiquirore tutuario sañuducu ohō saha niahye:

—Mūhū basi ñano yeracāhña. Ijipihina ohōre ijiāja ūsā, niahye tiquiro tiquinare cohteriquirore.

²⁹Tiquiro sa nigū tūhoro tiquinare cohteriquiro pehe sihā duti, tiquina cahapū oma cā, Pablo, Sila tiquina dahpocāri cahapū nanare doque quehe sahye tiquiro. ³⁰Sa yero tiquiro tiquinare ti tucūpū ijiyequinare ne wijia, sinituahye:

—¿Dūhse yeagari yūhū Cohācjū yaquiro iji duagu? ni, sinituahye tiquiro.

³¹—Jesucristore wacū tutuaya mūhū. Mūhū acaye gūhū tiquirore wacū tutuahro. Mūsa sa yegū mūsare pecapū wahaborinare Cohācjū yūhdūorota, ni, yahuahye tiquina.

³²⁻³³Tiquina sa nidi hora ñami deco batogā ijiahye. Tiquina sa nidi bato tiquinare cohteriquiro ya wūhūpū neahye tiquinare. Tiquiro ya wūhūpū

ne sa, tiquina camine coseahye tiquiuro. Tiquiuro sa cose tuhasari bato tiquiuro cohteriquiuro acaye mehna ijigũ Cohãcjũ yere buheahye Pablo gũhu. Tiquina buheri bato wame yeahye tiquinare. ³⁴Tiquina wame ye tuhasari bato tiquinare cohteriquiuro Pablo gũhure ihyaye peohye. Sa ye tiquiuro acaye mehna quehnoañe buheyere tiquina tuhori bato tutuaro bucueahye, Cohãcjũre masi ducaye.

³⁵Bohrea parĩ cãhtagũ ihñañe puh-toa pehe surarare peresu yeri wuhupũ ohoahye Pablo gũhure wio dutiye.

³⁶Tiquina sa wio dutiri bato ti wuhure cohteriquiuro Pablo gũhure yahuahye:

—Puh-toa musare wio dutiri. Sa yena cuero marieno wijiaya, niahye tiquiuro Pablo gũhure.

³⁷Tiquina sa wio duepegũta Pablo yahuahye surarare:

—Usã ñano yerũ. Sa yena usã ne buhiri mariedaja. Ihyo warota tiquina puh-toa pehe masa ihñonopũ yucuri mehna tanari usãre, usã Roma cjãna usã ijiepegũta. Tana tuhasa peresu yeri usãre. Sa ye yojopũ masa tiquina ihñeno wio duare usãre, usãre ñano tiquina yerire “Bũoro yuhduari”, niñe. Puh-toa tiquina basita wioye ahtaahro usãre, niahye Pablo surarare.

³⁸Tiquiuro sa nigũ tuhoye surara pehe puh-toare yahuye wahahye. Tiquina sa ni yahuri bato Pablo, Sila mehna Roma cjãna tiquina ijigũ masiñe puh-toa pehe cue niahye. ³⁹Sa ye tiquina Pablo gũhu चाहपũ esa, ohõ saha niahye:

—Ñano yehti usã musare. Ne pari turi sa yesi, niahye puh-toa Pablo gũhure.

Sa ni tuhasa puh-toa tiquinare peresupũ ijieyquinare wio, tiquinare ape siepũ waha dutiahye. ⁴⁰Tiquina sa nidi bato Pablo, Sila mehna peresupũ ijiriquina wijia, Lidia wame tiricoro ya wuhupũ wahahye. Ti wuhupũ tiquina esari bato Jesu yequinare piti cahye. Sa

ye tiquina Jesu yequinare quehnoano buheye, quehnoano jeripohna tigũ yeahye tiquinare. Tiquina sa yeri bato Pablo, Sila mehna wahaa wahahye.

Tesalónica cjãna usuahye Jesu yequina mehna

17 Sa ye tiquina Anfipolipũ esa, yuhduaye, Apoloniapũ esa, yuhduaye, Tesalõnicapũ esahye tiquina. Topũ judio masa buheri wũhu ijiahye. ²Semanaripe tiquiuro yeriro sahata Pablo buheri wuhupũ wahae tiahye. Topũ esa, ihtia semana waro saurũ decorire tiquiuro panopũ cjẽ tiquina ojoarire Cohãcjũ yere masare buhe, tire tiquina basi cahme yahuducue tiahye Pablo. ³Sa yero tiquiuro Cohãcjũ yere yahuahye:

—Judio masa, musa puh-toro musa cohteriquiuro Cristo ahtahye ñano yuhduatiquiuro. Sa yero tiquiuro yariaa wahahye masa mujano taro. Sa yero ahriquiuro Jesu, yũhu yahuriquiuro, tiquiuro Cristo warota ijire marine yuhduoatiquiuro. Tiquirota ijire musa cohteriquiuro. Ohõ sahata nine Cohãcjũ yere tiquina ojoari pũ, ni yahuahye Pablo.

⁴Tiquiuro sa nigũ tuhoye meheñequinagã topũ ijieyquina “Potota ijire”, niahye. Sa ye tiquina Pablo gũhu mehna wahahye. Sa ye apequina gũhu griego masa peyequina mari Pacure ño peoyequina pehe Pablöre tuhoye, tiquina mehna cjãna numia gũhu peyequina puh-toa numia gũhu tiquiore tuhoye Jesu yequina tojoahye. Sa ye Pablo gũhu mehna wahahye. ⁵Sa ijiepegũta apequina judio masa pehe tiquina sa wahagũ ihñañe, ihña coohye. Sa ye tiquina ñañequina dahraeyequinare peyequinare piji cahmecoa ohõ saha ni dutiahye: “Ahriquina ñano yeye nine”, ni sañuducu dutiahye tiquinare. Sa sañuducuye ijipihtiyequina ti maca

cjēnare usuagū yeahye Pablo gūhū mehna. Sa ye judio masa Jasō ya wuhupū sajā, Pablo gūhūre macamahye, tiquinare masapūre ohoye tehe. ⁶Sa macaepeta tiquinare bocaerahye. Sa ye Jasōre, apequina Jesu yequina gūhūre ñehe, weje wijiaa wahahye tiquinare. Puhtoa cahapū ne sa, ohō saha ni yahusāhye tiquina.

—Pablo gūhū masare ijipihtiropūre caribo yuhduare. Sa ye yojopūre tiquina mari ya macare wīhi tuhasari. ⁷Sa yero ahriquiuro Jasō tiquinare tiquiuro ya wuhupū sajā ta dutiri. Tiquina ijipihtiyequina mari puhtoro Roma cjūno tiquiuro dutiyere yuhdudūcare. “Apequiuro musa puhtoro ijire. Jesu tiquiurota ijire”, niñe, mari puhtoro dutiyere yuhdudūcare tiquina, ni yahusāhye judio masa pehe puhtoare.

⁸Tiquina sa ni yahusāgū tuhoye, ijipihtiyequina masa, puhto gūhū usua, tutuaro sañuducuahye. ⁹Tiquina sa sañuducuepegūta puhto Jasōre, tiquiuro mehna cjēna gūhūre, niñerure wapa ye duti, wioahye.

Pablo Sila mehna Bereapū esahye

¹⁰Ti pjeta ñamipū Pablo gūhūre Jesu yequina nūo ohoahye Bereapū. Topū esa tiquina judio masa buheri wuhupū sajāa wahahye. ¹¹Berea cjēna pehe Tesalónica cjēna yuhduoro Jesu yere quehnoano tuhoyequina ijiahye. Sa ye tiquina Jesu yere tuhori bato “¿Potota ijajari?” ni masi duaye, decoriye tiquiuro yere tiquina ojoari pūre sa buheducue tiahye tiquina. ¹²Sa ye tiquina peyequina Jesure wacū tutuayequina ijiahye. Griego masa gūhū, umua, puhto numia mehna Jesure wacū tutuayequina ijiahye. ¹³Sa ijiepegūta Pablo Bereapū Cohācjū yere tiquiuro buhegū gūhūre tuhoye, Tesalónica cjēna judio masa topū esahye. Topū esaye, Berea cjēnare quitī dojomehneñe, Pablo gūhū mehna

usuagū yeahye tiquina. ¹⁴Tiquina sa yegū ihñañe Jesu yequina Pablōre sojaro mehna pajiri ma dūhtū cahapū ohoahye. Tiquina sa ohoepēgūta Sila, Timoteo mehna Bereapū tojoahye. ¹⁵Sa ye apequina Pablōre Atenapū ne cā soahye. Tiquirore so tuhasa, majare tojoaa wahahye Bereapū tja.

—Sojaro mehna waha, piti tina waha Pablōre, ni yahuahye Silare, Timoteo gūhūre.

Sa ni yahu dutiahye Pablo tiquinare.

Pablo Atenapū ijiahye

¹⁶Sa yero Pablo Atenapū cohtero niahye Sila, Timoteo gūhūre. Sa yero Atena cjēna “Cohācjū ijire”, tiquina niñe queoyere peye tiquina cuogū ihñano Pablo tutuaro bujua witiyahye tiquina mehna. ¹⁷Sa bujua witiuro judio masa buheri wuhupū judio masa mehna yahuducuahye. Sa yero tja judio masa ijieyequina gūhūre yahuducuahye tiquiuro. Tiquina ihquēquina mari Pacure ño peoyequina ijiahye. Sa yero Pablo ti maca decopū decoriye tiquiuro cahapū sa tini majare sajāñequina mehna yahuducuahye. ¹⁸Apequina Epicúreo yere buheyequina, Estoico yere buheyequina gūhū Pablo mehna yahuducuahye.

—¿Ahriquiuro yahuducuye peyariquiuro dūhse ni yahuducuro nijari tiquiuro? niahye tiquina.

Pablo Jesu yere, tiquiuro masa mujarire tiquiuro yahugū tuhoye ohō saha ni tuhutumahye masa. “Tiquiro apequina cohāmanare yahuro niaga”, ni, tuhutumahye tiquina. ¹⁹Tiquina tuhori bato Areópago wame tiropū Pablōre nea wahahye.

—Ahri buheye, wahma buheyere yojopū mūhū yahurire masi duaja usā. ²⁰Mūhū buheye sijoro saha ijire. Sa yena usā tire masi duaja, niahye tiquina Pablōre.

²¹ Ijipihtiyequina Atena cjēna decoripe wahma buheyere yahuducuducu duahye. Sa ye tire tūho duahye. Ape yehpa cjēna gūhu Atenapū ijiye, sata ye duahye. Sa ye Pablo yahuyere tūho duahye tiquina.

²² Sa yero Pablo Areópago wame tiropū wahcādūca, ohō saha ni yahuahye:

—Atena cjāna, peyequina mūsa cohāmanare mūsa tutuaro ño peona mūsa ijigū masiaja yūhu. ²³ Ahri maca mūsa ya macare cohāmanare mūsa ño peorire ihña tinii yūhu. Sa ihña tinigu yūhu ihcā cuhtupū, cohāmanare ño peona mūsa ohoyere mūsa cūnopū ahrire buhei. “Cohācjū, mari masimehnediquiro ya cuhtu ijire”, ni, ojoari jiri mūsa tire mūsa cūnopū. Mūsa tiquiore masiedapenata tiquiore ño peori jiri mūsa. Tiquiroreta mūsa masiediquirore yahugū niaja yūhu mū sare.

²⁴ Cohācjū ijipihtiri yehpare, ijipihtiyere bajumehnediquiro ijire. Tiquiro ūhmūserere, yehpapūre, pūhtoro ijiro, tiquiore masa tiquina yeri wūhūpū ijierare. ²⁵ Sa yero tiquiore mari ijiyere, mari jeri neñe gūhūre, ijipihtiye marine apee borore ohoriquiro ijiro, mari yedohoyere cahmedare. Tiquiro pejecuoriquiro ijierare.

²⁶ Tiquiro ihcāquiro ūmunore ye dūcahye. Tiquiro mehnata ijipihtiri yehpa cjēnare masare yeahye. Sa yero ijipihtiri yehpapūre marine cūahye tiquiro. “Ohō puno yoari pje ohōpūre catieta”, nino queo cūahye marine. ²⁷ “Tiquina yūhūre macañe, bocaeta”, ni tūhotuahye Cohācjū. Sa yero Cohācjū yoropū ijierare. Mari mehnata ijire. Ohō saha ni ojoahye. ²⁸ “Marine ijigū yere tiquiro. Sa yero masa mehna sa ijiducure tiquiro”, ni ojoahye. Mūsa mehna cjēna panopū cjēna basayere quehnoano ojoayequina tiquina ojoariro sahata nii niaja. “Mari gūhu Cohācjū pohna ijiaja”, ni ojoahye

tiquina. ²⁹ Sa yena tiquiore pohna ijina ohō saha ni tūhotueracāhña mūsa. Queoyere, uru, plata, ūtā mehna mūsa esa tuhoro mūsa yeriquinare “Cohāmana ijire”, ni tūhotueracāhña mūsa. ³⁰ Panopū masa tiquina masieñequina ijinigū tiquina ñañene yepegūta Cohācjū sa ihña cāhriahye. Sa yeperota yojopūre ijipihtiri yehpa cjēnare tiquina ñañene bujūa witi dutire Cohācjū. ³¹ Came Cohācjū tiquiore queori decopū ijipihtiri yehpa cjēnare queoro beserota quehnoañequinare, ñañequinare. Tiquiro bese duti cūriquiore Jesu pehe beserota. Jesure yariariquirore masoahye tiquiore. Sa masono “Ahriquiore yūhu cūriquiore ijire”, ni, ihñono niahye Cohācjū masare, ni yahuahye Pablo Atena cjēnare.

³² Tiquiro sa nigū masa mūjarire tiquiore yahuducugū tūhoye ayequina tiquiore bujūpeahye. Sa ye ayequina pehe ohō saha niahye:

—Pari turi ahrire mūhu yahugū ūsā tūho duaja, niahye tiquina Pablore.

³³ Tiquina sa nidi bato Pablo waha wahahye. ³⁴ Sa ye meheñequinagā tiquiore mehna ijiye, Jesure wacū tutua dūcahye. Dionisio Areópago cjāno pūhtoa mehna cjāno Jesure wacū tutua dūcahye. Damari wame tiricoro gūhu, ayequina mehna Jesure wacū tutua dūcahye.

Pablo Corintopū ijiahye

18 Sa ye, Pablo Atenapū ijiriquiro waha, Corinto wame tiri macapū esahye. ² Topū esaro, judio masuno Aquila wame tiriquirore boca sahye tiquiro. Ijipihtiyequina pūhtoro Claudio wame tiriquiro judio masare Romapū ijiyequinare tiquiro cohāgū, Aquila pehe tiquiro namono Priscila mehna waha, Corintopū esahye. Aquila pehe Ponto wame tiri yehpapū masa bajuariquiro ijiahye. Sa ye tiquina Corintopū tiquina

ijigū, Pablo tiquina cahapū esahye. ³Aquila gūhū carpa cahseri wūhusere yeyequina ijiahye. Pablo gūhū carpa cahseri wūhusere yeriquirota ijiahye. Sa yero tiqiro tiquina mehna dahra, topū tojoahye. ⁴Sa yero Pablo saurū ijigū semanaripe judio masa tiquina buheri wūhūpū judio masare, judio masa ijieyequina gūhūre Cohācjū yere yahuahye. Tiquiro sa ni yahugū tūhoye, “Ijirota ijire”, niahye tiquina ihquēquina.

⁵Sa ye Sila, Timoteo mehna Macedoniapū ijiriquina, Pablo cahapū esahye. Topū tiquina esari bato Pablo pehe ijipihtiye decori judio masare quehnoano buhee tiahye:

—Jesu, Cristo marine yūhdwoatiqiro mari cohteriquiro ijire, ni yahue tiahye tiqiro.

⁶Tiqiro sa ni buhepegūta, judio masa pehe tiqirore tūho duerahye. Sa ye tiquina nāno ni qiti dojomehneahye tiqirore. Tiquina sa yegū Pablo tiquinare tiqiro tuhtiboriro sahata, tiqiro suhtirore dihta wahārire wejē site cūahye.

—Musa ye buhiri pecapū wahanata. Cohācjū tiqiro dutiriro sahata musare buhemī yūhū. Sa buhepegūta mūsa yūhūre tūho duerari. Yojobūre judio masa ijieyequina pehere buhegū wahautja, niahye Pablo judio masare.

⁷Tiqiro sa nidi bato tiqiro topū ijiriquiro waha, Ticio Justo wame tiriqiro ya wūhūpū esahye. Justo Cohācjūre nō peoriquiro ijiahye. Tiquiro ya wūhū pehe judio masa buheri wūhū cahapū ijiahye. ⁸Sa ye Crispo wame tiriqiro buheri wūhūre cohteriquiro, tiqiro namono, tiqiro pohne gūhū Jesure wacū tutuayequina ijiahye. Sa ye apequina Corinto cjēna peyequina Cohācjū yere tūhoye, Jesure wacū tutuahye. Tiquina sa wacū tutuayequina

ijigū tiquinare wame yeahye. ⁹⁻¹⁰Ihcā nāmi Cohācjū quehēnopū yahuahye Pablōre. Tiquirore ohō saha niahye:

—Mūhū mehna ijiaja. Ahri macare yeequina peyequina ijire. Sa ye apequina masa mūhūre nāno ye masiedare. Sa yegū cueracāhña mūhū. Sa cueragū yeere tutuaro yahuya. Sa tūhotueracāhña, ni yahuahye Cohācjū Pablōre.

¹¹Sa ye ihcā cūhma quehnoano, ape cūhma deco waro to cjēnare Cohācjū yere buhe, ijie tiahye Pablo.

¹²Tiqiro sa ijiri watoa Galiō wame tiriqiro Acaya yehpa cjēna puhtoro tiqiro ijigū judio masa ijipihtiyequina ihcāno mehna Pablōre yahusāne taye, tiqirore buhiri dahre dutiyequina cahapū neahye tiquina.

¹³—Ahriqiro masare Cohācjūre nō peo dutiro ahri yehpa cjē dutiye pehere cohā dutiro nine, ni yahusāhye judio masa buhiri dahre dutiyequinare.

¹⁴Tiquina sa ni yahusāgū tūhoro Pablo pehe tiquinare yahu duamahye. Sa yahu duepegūta Galiō pehe judio masare yahuahye:

—Ahriqiro usā Roma cjāna ye dutiyere yūhdudūcariqiro tiqiro ijigū musare yūhtiboaya yūhū. ¹⁵Sa yena mūsa judio masa ye dutiye pehere ahriqiro yūhdudūcariqiro ijigū mūsa basi quehnoña. Ahrire mūsa mehna masino pjerare yūhūre, ni yahuahye tiqiro judio masare.

¹⁶Sa ninota tiquinare judio masa yahusāne ahtamediquinare tiqiro ya tucūpū ijiriquinare cohā wioahye tiqiro. ¹⁷Tiqiro sa cohā wiori bato ijipihtiyequina ti wūhūpū ijiriquina Sostene judio masa buheri wūhūre cohteriquirore Jesu yaqirore nēhe, buhiri dahre dutiyequina cahapū queāhye tiqirore. Tiquina sa quēgū ihñano Galiō sa ihñā cāhye.

Pablo Antioquíapü tojoaa wahahye

¹⁸ Sa yero Pablo Corintopü yoari pje ijiriquiro “Wahau niaja”, ni cohe tiahye tiqiro Jesu yequinare. Tiquiro sa nidi bato tiqiro Priscila, Aquila mehna Siria yehpapü ijiri macapü peháa wahahye. Cencrea wame tiri petamahapü tiquina esari bato Pablo Cohäcjöre “Ohö saha mühure ye basautja”, tiqiro nidire ye tuhasariquiropü ijiahye. Sa yero sa yeriquina judio masa tiquina yeducuro sahata tiqiro poarire waha peho dutiahye. ¹⁹ Sa yero tiquina Efeso wame tiri macapü pehá sa, Priscilare, Aquila gühure cüahye Pablo. Tiquinare topü cü, judio masa tiquina buheri wühüpu wahahye. Ti wühüpu esa, Cohäcjö yere yahuahye. Sa yahuro judio masa mehna yahuducuahye. ²⁰ Tiquiro sa yahuducuri bato tiqirore tiquina mehna tojoa dutimahye. Tiquina sa dutiepegüta ohö saha niahye Pablo:

—Tojoeraja müsa mehna, niahye Pablo tiquinare.

²¹ Sa ninota,

—Wahagü niaja. Cohäcjö cahmegü pari turi tojoa taboaga, niahye tiquinare Pablo.

Sa ni tuhasa Efesopü ijiriquiro peháa wahahye tiqiro.

²² Sa yero Cesareapü pehá sa, yühdu cã, Jerusalëpü esahye. Topü esa, to cjöna Jesu yequinare “¿Ne ijajari müsa?” ni, tiquinare ihña yühduä Antioquíapü esahye. ²³ Topü meheñe decorigã ijiahye. Topü ijiriquiro yühduahye. Galacia yehpapü ijiye macaripü, Frigia yehpapü ijiye macaripü pari turi esa, ti macari cjöna Jesu yequinare buhero, bucegü yeahye.

Apolo wame tiriqiro Efesopü buheahye

²⁴ Ti pjere, judio masüno Apolo wame tiriqiro, Alejandría cjöno Efesopü

esahye. Tiquiro quehnoano yahu mihnidiquiro ijiahye. Sa yero tiqiro Cohäcjö ojarire quehnoano masiahye. ²⁵ Apequiro tiqirore Cohäcjö yere yahu tuhasae tiahye. Sa yero tiqiro Ñu wame yeriquiro ye buheye dihitaré masiahye. Sa ijieperota tiqiro tutuaro buceye mehna Cohäcjö yere quehnoano buheahye. ²⁶ Sa yero judio masa tiquina buheri wühüpu tiqiro cuero marieno tiquinare buhe ducahye. Tiquiro sa buhegü tiquina tuhori bato Priscila, Aquila mehna tiqirore tiquina mehna neahye. Cohäcjö yere tiqiro quehnoano poto yahu pehoeragü ihñañe quehnoano poto yahu pehoahye tiquina tiqirore. ²⁷⁻²⁸ Sa ye tiqiro Apolo pehe Acaya yehpapü tiqiro waha duagü Jesu yequina tiqirore “Quehnoano wahaya”, ni, ojoari pürine ohoahye tiqirore. Ti püri Acayapü ijiyequina Jesu yequinare Apolare quehnoano piti ca dutiye püri ijiahye. Sa yero Apolo topü esaro, to cjönares Jesure wacü tutuayequinare Cohäcjö cahñe mehna quehnoano yedohoahye. Judio masare ti macapü ijiyequinare ohö saha ni yahuahye:

—Cohäcjö ohoriquiro müsa cohteriquiro ijire Jesu. Cristo waro ijire tiqiro, ni yahuahye judio masare apequina masa tiquina ihñonopü.

Cohäcjö yere tiquina ojoari mehna tiqiro quehnoano queoro yahugü tuhoye tiquina “Poto ijierare”, ni masiedahye. Sa yero Cohäcjö cahñe mehna tiqirore wacü tutuayequinare quehnoano yedohoahye Apolo.

Pablo Efesopü wahahye

19 Corintopü Apolo tiqiro ijiri watoa, Pablo pehe cünü cjöpu müja yühduä, Efesopü esahye. Topü esaro ihquëquina Jesu yequinare bocahye. ² Tiquinare boca saro tiqiro tiquinare sinituahye:

—¿Musa Jesure wacū tutuari bato musa pehe Espíritu Santore cwo ducari? ni, sinituahye Pablo.

Tiquiro sa nigū tuhoye tiquirore ohō saha ni yahuahye tiquina:

—“Espíritu Santo ijire”, ni yahuerari usāre, ni yahuahye tiquina.

³Tiquina sa ni yahuri bato Pablo tiquinare sinituahye tja:

—¿Noa ye buheyere musa tuhori bato wame yeri musare? niahye tiquiro tja.

—Ñu ye buheyere usā tuhori bato wame yeri usāre, ni yahuahye tiquina.

⁴Tiquina sa nigū tuhoro ohō saha niahye Pablo:

—Masa tiquina ñañe yerire tiquina duhugū ihñano wame yeahye Ñu. Sa yero tiquiro wame yeye pehe tiquina ñañe yerire tiquina duhurire masare ihñoati ijire. Sa yero apee boro gūhure yahu nemoahye Ñu. “Yuhū bato ahtariquiro pehere wacū tutuaya musa”, ni yahuahye tiquiro. Sa nino Jesure yahuro niahye, ni yahuahye Pablo tiquinare.

⁵Tiquiro sa nigū tiquina tuhori bato, Jesu wame mehna wame yeahye tiquinare. ⁶Sa yero Pablo tiquina ihquēquina bui tiquiro omoca duhu peogū, Espíritu Santo pehe wihiahye tiquinapere. Tiquiro sa wihiri bato tiquina pehe tuhomehneñe yahuducuye mehna yahuducu, Cohācjū yere yahuahye. ⁷Tiquina ijipihtiyequina doce umua ijiye ijiboaga.

⁸Came Pablo judio masa tiquina buheri wuhupū sajā, ihtia asū waro decoripe cuero marieno Cohācjū puhtoro tiquiro ijiyere yahuducuahye tiquina mehna. Tiquirore tiquina sa tuhori bato “Ahri ijirota ijire”, niahye tiquina. ⁹Sa niepegūta apequina pehe tūho duerahye. Sa ye tiquina masa tuhoro quehnoañe buheyere ñano niahye. Tiquina sa nigū tuhoro Pablo pehe Jesu yequinare piji wijia, ape

siepu wahahye. Waha, Tirano wame tiri wuhū buheri wuhupū decoripe masare Cohācjū yere yahuahye tiquiro. ¹⁰Pua cūhma waro buhee tiahye tiquinare. Tiquiro sa buhegū ijipihtiyequina Asia yehpa cjēna judio masa, judio masa ijieyequina mehna mari puhtoro Jesu yere tuhoahye. ¹¹Sa yero Cohācjū tutuaye mehna Pablo peye tahari ye ihñoahye. ¹²Suhti cahseri Pablo tiquiro pagure pihari cahserire, tiquiro pihari suhti gūhure ne cā, dohatiyequinare ohoahye. Ti suhtire ohogū tire ñeheñe tiquina dohatiye yuhdua wahahye. Sa ye watīa tiquina mehna ijiriquina wahaa wahahye ti suhtire tiquina ñehedi bato.

¹³Sa ijigū apequina judio masa, sa tiniducuyequina, watīare cohāñequina judio masa yayia ijiahye. Sa ye Pablo tiquiro yeriro sahata Jesu tutuaye mehna watīare cohā duamahye. Sa ye watīare duhu dutimahye tiquina.

—Pablo yahuriquiro, Jesu tiquiro tutuaye mehna dutiaja musare. Wahaya. Ahriquiro mehna pari turi ijieracāhña, nimahye tiquina watīare ohoye.

¹⁴Esceva wame tiriquiro siete tiquiro pohne pehe sata yemahye. Esceva pehe judio masano pahia puhtoro ijiahye.

¹⁵Tiquiro pohne watīnore tiquina waha dutiri bato, watīno pehe ohō saha niahye tiquinare:

—Jesure masiaja. Pablo gūhure masiaja. Musa pehere masiedaja, niahye watīno tiquinare.

¹⁶Tiquiro sa nigūta watīnore cworiquiro pehe tutuaro tiquinare ñehe maa wahahye. Sa yero tiquinare ña yuhduaro yeahye. Tiquiro sa yeri bato suhti marieñequina, cami tiyequina oma wijiaa wahahye tiquina ti wuhure. ¹⁷Tiquina sa yeri bato ijipihtiyequina Efeso cjēna, judio masa, judio masa ijieyequina mehna tire tuhoye, cue yuhduahye tiquina. Sa ye mari

pah̄toro Jesu yere buj̄perero marieno yahuducuahye masa pehe.

¹⁸Sa ye masa peyequina Jesure wacū tutuayequina tiquina ñano yerire yahuye ahtahye. ¹⁹Tiquina mehna cjēna peyequina yayia masare ujuayequina yero saha yeyequina ijiahye. Sa ye tiquina ojoari pūrine yayia tiquina yerire yahuye pūrine top̄a ne cāhta, masa ih̄nonop̄a ti pūrine uj̄ūa coh̄a cāhye tiquina. Ti pūri wapa tirire tiquina queogū, ijipihtiye pūri cincuenta mil cjoeri niñeru cjoeri wapa timahye ti pūri. ²⁰Sa ye Cohācjū yere cahmeñequina peyequina wahahye. Cohācjū tutuaye mehna tiquiroyequina wahahye.

²¹Tiquina sa wahari bato Pablo ohō saha ni tuh̄otuahye: “Macedonia yehpap̄a esa muhta, ti yehpare yuh̄d̄na, Acaya yehpare esautja. Ti yehpare yuh̄u esari bato Jerusalēp̄a wahautja. Ti macare yuh̄u esari bato Romap̄a wahautja”, ni tuh̄otuahye Pablo. ²²P̄uaro tiquirore yedohoyequinare tiquiro pano oho muhtahye Macedonia yehpap̄a. Timoteo, Erasto gūh̄u ijiahye tiquina. Sa yero Pablo pehe ih̄cāquirot̄a tojoa n̄nu t̄ariyahye Asia yehpap̄a.

Efesop̄a masa usua, sañuducuahye

²³Ti pjere Efesop̄a Jesu yere apequina cahmedaye, Pablo gūh̄ure tuhtiahye. ²⁴Plata mehna dahrariquiroyequina Demetrio wame tiquiro plata mehna cohācjōno Artemisa wame tiricoro ya wuh̄u queoyere yeriquiro ijiahye. Sa yero tiquiro apequina plata mehna dahrayequina mehna ti queoyere dua, pajiro wapatahye tiquina. ²⁵Sa yero Demetrio apequina plata mehna dahrayequinare piji cahmecoana yahuahye tiquinare.

—Tuh̄oya m̄sa. Ahri dahraye mehna pajiro mari wapatarire masine m̄sa. ²⁶Ahriquiroyequina Pablo yerire tiquiro buheri

gūh̄ure masine m̄sa. Ohō saha ni buhere tiquiro. “Cohāmana queoye masa tiquina yeyequina catiyequina ijierare”, ni yahue tiri tiquiro. Tiquiro sa nigū tuh̄oye peyequina Efeso cjēna, ijipih̄tirop̄a apequina Asia yehpa cjēna gūh̄u ti buheyere “Ijirota ijire”, nie tiri. ²⁷Sa niñe mari dahrayere masa ñano yahuducuboaga. Sa ye mari yacoro cohācjōno Artemisa ya wuh̄ure masa cohāboaga. Sa yero ticoro ijipihtiyequina Asia yehpa cjēna, ijipihtiri yehpa cjēna tiquina ño peoricoro ticoro ijiepegūta ticoro tutuaye butiarota. Sa ye masa ticorore masiedaboaga, niahye Demetrio tiquinare.

²⁸Tiquiro sa nigū tuh̄oye tiquina pehe tutuaro usua, sañuducuahye:

—Artemisa Efeso cjēna mari yacoro cohācjōno tutuaricoro ijire, ni, sañuducuahye tiquina.

²⁹Sa ye Efeso cjēna ijipihtiyequina sañuducu yuh̄d̄na, tuh̄o masiñe pihtia wahahye. Sa wahaye, Gayore, Aristarco gūh̄ure ñehe, masa tiquina cahmecoanop̄a tiquinare weje cāhye. Gayo, Aristarco mehna Macedonia cjēna ijiye, Pablo mehna tiniñequina ijie tiahye.

³⁰Sa ye Pablo masa cahap̄a tiquiro waha duagū, Jesu yequina pehe tiquirore waha dutierahye. ³¹Sa ye apequina ti yehpa cjēna pah̄toa, Pablo mehna cjēna ijiye, tiquina cahacjēnare yahu dutiahye Pabl̄ore:

—Masa tiquina cahmecoanop̄a wa haeracāh̄ña, ni yahu duti ohoahye pah̄toa tiquina cahacjēnare Pablop̄ure.

³²Sa ye top̄a cahmecoañequina mehna cjēna pehe peyequina “¿Duh̄sena tana mari cahmecoana niajari?” ni, masiedahye. Sa ye tiquina sañuducu nemoahye. Ahrie pehep̄a ijiyequina sijoro ni, sañuducuahye. Apequina gūh̄u sijoro ni sañuducuahye. ³³Sa ye judio masa pehe Alejandro wame tiquirore masare yahu dutimahye. Sa

yero Alejandro “Dihta mariahña”, nino tiquiro omoca mehna quē dijioahye. “Ahriquina usāre judio masare tuhtiyē nine”, ni tuhoturo judio masare cahmota duaro, yahuducumahye. ³⁴Tiquiro sa niepegūta judio masano tiquiro ijigū ihñañe masa ijipihtiyequina ihcāno mehna pua hora waro sañuducuahye:

—Artemisa, Efeso cjāna mari yacoro cohācjōno tutuaricoro ijire, ni, sañuducuahye tiquina.

³⁵Tiquina sa ni sañuducugū ihñano, Efeso cjēna puhtoare yedohoriquiro masare, “Dihta mariahña”, ni, yahuahye tiquinare.

—Musa Efeso cjāna tuhoya. Efeso cjāna mari yacoro tutuaricoro cohācjōno Artemisa ya wuhū cohtena mari ijigū ijipihtiri yehpa cjēna masine. Sa ye uhmūsepū bora dijia tari queoyere cohtena mari ijigū gūhure masine masa. ³⁶Sa ye apequina “Ahri poto ijierare”, ni masiedare. Sa yena usueracāhña musa. Quehnoano tuhotuya musa. ³⁷Ahriquina musa ñehe tariquina mari cohācjōnore ñano ni yahuducuerari. Sa ye tiquina cohāmana wuhūsepure sajā, yaquerari. Sa yena quehnoano yeya musa. ³⁸Sa ye Demetrio, plata mehna dahrayequina mehna ahriquinare musa ñehediquinare yahusā duaye, buhiri dahre dutiyequina pehere yahuhro tiquina. Tiquina buhiri dahre dutiyequinare ahriquinare yahusā masine. ³⁹Pari turi cahmecoana quehnoano mehna cahmecoaña. Yojopure musa yeriro saha yeracāhña. ⁴⁰Miare musa ihyo waro usua, sañuducurire mari puhtoā tuhoye, “Marine cohāñe niaga”, ni tuhotueta tiquina. Sa yena musa sa ni sañuducurire tiquinare quehnoano poto yahu masiedaja mari, niahye puhtoare yedohoriquiro masare. ⁴¹Sa ni yahu tuhasa, “To puno tjire. Wahaya”, niahye tiquiro masare.

Macedonia yehpapū gūhure, Grecia yehpapū gūhure Pablo esahye

20 Ti sa wahari bato, Pablo pehe Jesu yequinare piji cahmecoā yahuahye. Yahu tuhasa, tiquinare cohe tiahye. Cohe ti tuhasa, Macedonia yehpapū waha wahahye. ²Topū esa, buhe, to cjēna Jesu yequinare bucuegū yeahye tiquiro. Tiquinare buhe tuhasa, Grecia yehpapū esahye tiquiro. ³Topū tiquiro ihtia asū waro ijiahye. Topū ijiro Siria yehpapū pehā waha duamahye. Tiquiro sa waha duepegūta judio masa duhti queahye, tiquiore ñehe duaye. Sa yero Pablo ape mahapū, Macedoniapū wahari mahapū wahahye. ⁴Sa waharo Asiapūta esahye. Topū Berea cjūno Pirro macūno Sópater wame tiriquiro pehe Pablōre piti ti cāhye. Sa ye Tesalónica cjēna Aristarco, Segundo gūhū tiquiore piti ti cāhye. Sa ye Asia cjēna Tíquico, Trófimo gūhū Asiapū tiquiore piti ti cāhye. Derbe cjūno Gayo wame tiriquiro Timoteo gūhū tiquiro mehna wahahye. ⁵Tiquiro mehna cjēna tiquiro pano waha, Troa wame tiri macapū tiquiore cohteri jiri. ⁶Tiquina sa cohtegū pugū yeye moremehneñe pāre tiquina ihyari bose deco bato usā pehe Filipopū ijirina yucusa mehna waha, ihcā omope decori pehā, Troapū usā esau. Siete decori waro ijii topure.

Troapū Pablo tinino wahahye

⁷Domingo ijigū Jesu yequina cahmecoā, pāre duhu peori Santa cena yeye tehe. Tiquina sa yeato pano Pablo tiquinare buheri. Sa yero Pablo ape decopū wahatiquiro ijiro yoari pje tiquiro buheri. Ñami decopū buhe duhuro taro nimedi. ⁸Sa yena uhmūano cjā tucūpū peye paca sihāñe paca ijiri tucūpū cahmecoā usā. ⁹Pablōre tiquiro tuhori watoa wahmūno Eutico wame tiriquiro meheni sopecahagā buipū mūja pje du-

jiri. Sa yero Pablo tiquinare yoari pje tiquiro buhe nemogū wahmūnore wujua ahtari. Sa yero tiquiro carī maa, ihtia casario buipū dujiriquiro majare maa dijiaa wahari. Tiquiro bora dijiaari bato tiquina tiquirore yariariquiropūre tu wahcō daporī. ¹⁰Tiquina sa yegū ihñano Pablo dijia, wahmūnore quē suhuri. Tiquiro sa yeri bato Jesu yequinare yahuri tiquiro:

—Jeripohna ñaedacāhña. Yariare ahriquiro. Catire, nidi Pablo pehe.

¹¹⁻¹²Tiquiro sa nigū wahmūno yariamediquiro masaa wahari. Tiquiro sa masagū ihñañe tiquina bucue yuhduari. Sa bucueye uhmūano cǎa tucūpū mūja, pāre duhu peori Santa cena yeye tehe. Tiquina sa yeri bato yoari pje Pablo tiquinare buheri. Tee bohreato panogāpū tiquinare buhe duhuri. Tiquiro buhe tuhasagū wahaa wahau usā.

Pablo Troapū ijiriquiro waha, Miletopū esahye

¹³Pablo pano yucūsa mehna Asōpū usā pehe esa muhtau. Pablo pehe mahapū waha duari. Pablo tiquiro nidiro sahata Asōpū tiquirore usā piti cau. ¹⁴Tiquirore usā piti cagū, usā mehna tiquiro sajāri yucūsapū. Tia mehna waha, Mitilenepū usā esau. ¹⁵Topūre esa yuhduā, ape decopū Quifore yuhduau usā. Ape decopū Samopū esau usā. ¹⁶Pablo Pentecoste deco ijigū, Jerusalēpū esa duari. Sa yero Asia yehpapū yoari pje iji duerari. Sa yero Efesore poto yuhduā, Miletopū wahā sau usā.

Pablo Efeso cjēnare Jesu yequina pūhtoare yahuahye

¹⁷Sa yero Pablo Miletopū ijiro, Efeso cjēnare Jesu yequina pūhtoare pijiori tiquiro. ¹⁸Sa tiquiro pijiori bato tiquina

Pablo cahapū wihiri. Tiquina wihigū ihñano tiquinare Pablo yahuri:

—Asiapū coā wihigū mūsa mehna yuhū yerire masine mūsa. ¹⁹Mūsa mehna ijigū ne sijoro nino marieno Jesu, mari pūhtoro yere yee tii yuhū. Sa yegū mū sare paja ihñau. “Mū sare yuhducaja”, niedū yuhū. Judio masa yuhūre tiquina ñano yepēgūta Cohācjū yere yee tii yuhū. ²⁰Sa yegū mūsa quehnoano wahatire cahmegū mū sare yahu peho cāu yuhū. Masa tiquina ihñonopū mūsa wuhūsepū gūhūre buhei yuhū. ²¹Sa yegū judio masare, judio masa ijieyequina gūhūre ihcāno mehna buhei yuhū. “Mūsa ñañene bujua witina, Cohācjū ye pehere comesaya. Sa yena Jesu mari pūhtoro wacū tutuaya”, ni yahuu yuhū. ²²Sa yegū Espiritu Santo tiquiro dutiriro sahata yojopūre Jerusalēpū wahau niaja. Yuhū topū wahagū yuhū duhse wahatire masiedaja yuhū. ²³Ohō saha nidi Espiritu Santo yuhūre: “Jerusalēpū mūhū ñano yuhduata. Sa ye mūhūre peresu yeeta”, nidi Espiritu Santo yuhūre. Yojopūre yuhū macaripe yuhū esagū sa ni yahuri yuhūre. Jerusalēpū wahagū Espiritu Santo tiquiro yahuri dihitar masiaja. ²⁴Tiquiro sa yahuepegūta quehnoañe buheyere, Cohācjū tiquiro cahñe buheyere yahucjū ijiaja. Jesu mari pūhtoro tiquiro ye dutirire ye peho duaja. Ahrire yerigū ijigū, yuhū yariatire cueraja yuhū.

²⁵Sa yegū mūsa mehna ijigū Cohācjū tiquiro pūhtoro ijiyere yahue tii yuhū mū sare. Ne mū sare pari turi ihñasi yuhū. Ahrire masiaja yuhū. ²⁶⁻²⁷Sa masigū miare ahrire yahuaaja mū sare. Ijipihtiye Cohācjū yere yahuu yuhū mū sare. Sa yero ijipihtiyequina mūsa mehna cjēna Cohācjū yere cahmeeñequina tiquina ijigū yee buhiri ijierare. ²⁸⁻²⁹Mūsa basi quehnoano yeya.

Sa yena Jesu yequinare Espiritu Santo musare ihbo dutigū, tiqiro ihbo dutiriquinare quehnoano ihboya. Ovejare ihboyequina ovejare tiquina ihboro saha Jesu yequina gūhure ihboya musa. Cohācjū macano tiqiro yariaro tiqiro dii cohāno mehna Cohācjū tiquinare tiqiro yequina ijiatiquinare yeri. Yūhu ohōre wahari bato apequina ñañequina pehe yequiro ovejare tiquina wejēno saha Jesu yere musa yeborire dojomehneeta. Sa yena Jesu yequinare quehnoano ihboya. ³⁰Camepure apequina musa mehna cjēna pehe Jesu yequinare ni meho, apeye buheyere tūho dutieta. Tiquina sa dutigū tiquina tūhoeta. ³¹Sa yena quehnoano yeya musa. Decoripe, ñaminipe paja ihñañe mehna buhei yūhu musare. Ihtia cūhma waro quehnoano buhei yūhu musare ijipitinare. Tire quehnoano wacūña musa.

³²Yojopure yūhu wahari bato Cohācjū musare ihña ihborota. Tiquiro cahñe buheyere buhena quehnoano ijinata musa. Cohācjū tiqiro buheye mehna musare tiqiro yequinare quehnoano yedoho masine. Sa yero tiqiro yequina dihitare tiqiro ye duariro sahata musa pūritare quehnoano yerota. ³³Musa niñeru cūoyere, musa suhti cūoye gūhure “Yūhure ohoya”, niedū. ³⁴Yūhu basi dahra wapatau ye ijiatire. Sa yegu yūhu cahmeñene, yūhu mehna cjēna tiquina cahmeñe gūhure yūhu dahra wapatarī mehna nei. Yūhu sa yerire masine musa. ³⁵Mari ohō saha tutuaro dahrana apee boro cūoyequinare yedohoro cahmene marine. Ahrire musare ye ihñou yūhu. Jesu mari pūhtoro tiqiro nidire wacūña musa. “Tiquiro ohogū ñehediquiro yūhdūoro ohoriquiro pehe bucuere”, nidi jiri Jesu tiqiro basi, ni yahuri Pablo Jesu yequina pūhtoare.

³⁶Sa nidi bato Pablo tiquina mehna dusepe curi mehna quehe sa, Cohācjūre sinidi. ³⁷Tiquiro sa sinidi bato tiquina ijipihtyequina Pablore quē suhsu, wahsupure ihmi, utiri. ³⁸“Musare pari turi ihñasi yūhu”, to pano tiqiro nigū tūhoye tutuaro bujua witiri tiquina. Sa ye tiquirore tu nūnū tā buhari petamahapū. Topū usāre ihña nūnū tāri usā wahagū.

Pablo Jerusalēpū pari turi wahahye

21 Jesu yequinare “Wahana niaja”, ni, yucusa mehna, Cos wame tiri nūcūopū poto waha, pehā sau usā. Ape decopū Roda wame tiri nūcūopū pehā sa, yūhdūa, Pátara wame tiri macapū esau usā. ²Pátarapū ijina, Feniciapū wahatiare yucūsare bocaū usā. Sa yena tia mehna wahau usā. ³Sa wahana Chipre wame tiri nūcūore poto ihña yūhdūū usā. Cū pehe pehe ijiri ti nūcūo. Ti nūcūore yūhdūa, Siria wame tiri yehpapū esau usā. Sa yena yucusa cjē dōeri cjēne yucusa cjūno Tiro wame tiri macapū tiqiro dure mogū topū pahsarī. ⁴Topū Jesu yequinare ihñana, siete decori waro tojoarī usā ti macapū. Sa ye to cjēna Jesu yequinare Espiritu Santo tiqiro yahuriro sahata tiquina Pablore Jerusalēpū waha dutieramedi. ⁵Tiquina sa niepegūta ti macare siete decori usā ijiri bato, wahau usā. Usā wahato panogā ijipihtyequina Jesu yequina, tiquina namosānumia mehna, tiquina pohne mehna, maca dūhtū cahapū usāre ihña tojoari. Sa yena ijipihitina usā padūropū esa, dusepe curi mehna quehe sa, Cohācjūre sinii. ⁶Usā sa sinidi bato, “Wahana niaja”, ni, tiquinare quē suhsu bato ti wahau usā. Usā wahagū ihña nūnū tā, tiquina pehe majaa wahari tiquina ye wūhusepū.

⁷Tiro wame tiri macare maja yūhdūū usā. Sa yena Tolemaidapū wahā sau usā. Toputa pajiri mare waha bato tii

usã. Ti macapũ esa, Jesu yequinare “¿Usã acaye, ijiajari?” ni, ihcã deco usã tiquina mehna ijinii. ⁸Sa yena ape decopũ tja Pablo mehna mahapũ wahau usã Cesarea wame tiri macapũ wahana. Topũ esa, quehnoañe buheyere yahuriquiرو Felipe wame tiriquiرو ya wuhũpũ esau usã. Sa yena tiquiرو mehna tojoau usã. Felipe Jesu yequina tiquina siete besenohriquina mehna cjũno ijiri. ⁹Sa yero tiquiرو pititiaro numia pacũro ijiri. Tiquina numia pehe Cohãcjũ yere yahuye numia ijiri. Nuhmia ijiri. ¹⁰⁻¹¹Topũ usã meheñe decorigã usã ijiri bato, Agabo wame tiriquiرو Cohãcjũ yere yahu muhtariquiرو Judeapũ ijiriquiرو usãre ihñano wihiri. Sa yero tiquiرو Pablo ya dare jeri turi dare ne, tiquiرو dahpocãrine, tiquiرو omocarine duhtero, queo yahuri:

—Ohõ saha nidi Espĩritu Santo. “Ahri dare cuoriquiرو Jerusalẽpũ tiquiرو esagũ, judio masa sa duhteeta tiquiروre. Duhte tuhasa, judio masa ijieyequinare ohoeta tiquina tiquiروre”, nidi Espĩritu Santo, ni yahuri Agabo.

¹²Tiquiرو sa nigũ tuhona, usã Cesarea cjẽna mehna Pablure tutuaro cahĩ usã. Tiquiروre Jerusalẽpũ waha dutierami.

¹³Usã sa nigũ Pablo pehe yuhtiri:

—¿Duhse ni utina niajari musa? Yũhũ pehere bujua witigũ yeaga musa. Tiquina yũhũre peresu tiquina yegũ quehnoanota. Yũhũ Jerusalẽpũ Jesu mari puhtoro yere yũhũ yeri buhiri yũhũ yariagũ quehnoanota, nidi Pablo usãre.

¹⁴“Wahaeraja”, tiquiرو nigũ tuho duana nimi usã. Tiquiرو “Wahautja”, tiquiرو nigũ, sa tuhodu cũhũ usã. Ohõ saha nii:

—Mari puhtoro tiquiرو cahmeno sahata yeahro, nii usã.

¹⁵Tire yahu bato ti, usã yere quehno, wahaa wahau usã Jerusalẽpũ wahana. ¹⁶Topũ usã wahagũ meheñequinagã

Cesarea cjẽna Jesu yequina pehe usã mehna wahari. Sa yena tiquina mehna cjũno Chipre cjũno Mnasõ wame tiriquiرو ya wuhũpũ esau usã. Tiquiرو yoari pje Jesu buheriquiرو ijiri. Sa yero tiquiرو ya wuhũ usã ijiati wuhũ ijiri. Sa yena Jerusalẽpũ esau usã.

Pablo Santiagoه ihñano wahahye

¹⁷Jerusalẽpũ usã esagũ, to cjẽna Jesu yequina pehe “¿Wihiajari?” ni, bucueye mehna piti cari usãre. ¹⁸Ape decopũ Pablo usã mehna Santiagoه ihñano esari. Usã topũ esagũ topũ ijipihtiyequina Jesu yequina puhtoa ijiri. ¹⁹Sa yero Pablo tiquinare tiquiرو omoca ñehedi bato judio masa ijieyequinare tiquiرو buherire yahu pehori Jesu yequinare. Cohãcjũ tiquiرو yedohoye mehna tiquiرو yerire yahu pehori. ²⁰Tiquiرو sa ni yahugũ tuhoye, “Cohãcjũ quehnoagu, tutuagu ijire muhũ”, ni ño peori tiquina pehe Cohãcjũre. Sa ni tuhasa tiquina Pablure ohõ saha ni yahuri:

—Usã acayũ, yojopũre peyequina judio masa Jesure wacũ tutuayequina ijire. Tire masine muhũ. Sa ye tiquina ohõ saha ni tuhature: “Cohãcjũ dutiyere, Moiseputa marine tiquiرو cũrire marine ye pehoro cahmene”, niñe nine. ²¹Ohõ saha ni nemore tiquina. “Ape siepũ ijieyequinare judio masa ijieyequina watoapũ ijieyequinare judio masare Cohãcjũ Moiserre tiquiرو cũrire cohã dutiahye Pablo”, nimeri ohõ cjẽna judio masa muhũre. “Pablo judio masa pohnene cuhnucunũ sohtoa cahserogãre yũhre ne dutierare”, nimeri muhũre tiquina. “Judio masa tiquina yee tiyere Pablo duhu dutire”, ni ahri gũhũre ni yahu wajare muhũre. ²²Sa ye muhũ ohõre wihigũ tuhoye tiquina cahme-coaeta muhũre tuhtiyetehe. Sa yegu ohõ saha yero cahmene muhũre. ²³Muhũre usã dutiro sahata yeya. Yojopũre ohõre

pititiaro umua Cohācjüre wacūñequina “Ohō saha yematja”, niñequina ijire. ²⁴Tiquina mehna wahaya. Sa ye Cohācjū Moisere tiquiro dutihiro sahata tiquina basi Cohācjū yere yee tehe tiquina nāno yeyere coseye nine. Mūhū gūhū sata yeya. Sa yegū tiquina sa yeati wapare wapa yeya mūhū pehe. Mūhū sa wapa yeri bato tiquina poaire wūha peho duti masine tiquina. Mūhū sa yegū ihñañe masa mūhūre tiquina niñe ni mehori ijigū masieta ijipihtiyequina. Cohācjū Moisere tiquiro cūri dutiyere yegū mūhū ijigū masieta tiquina.

²⁵‘Sa yena judio masa ijieyequina Jesu yequina pehere usā ojoari pūre oho tuhasaū. Ohō saha ni, ojoaū usā. “Cohācjū ijire’, tiquina niñe queoyere ño peo tiquina duhu peori ihyayere, di-ire, wamua tiquina ñehe wejēdiquinare wahiquinare ihyeracāhña mūsa. Sa yena wūana tieracāhña”, ni, yahu ojoaū usā ojoari pūpūre, nidi tiquina Pablore.

Cohācjū wūhūpū judio masa Pablore ñeheahye

²⁶Tiquina sa ni yahuducuri bato ape deco Pablo pehe pititiaro umua mehna tiquina basi Cohācjū yere yeye tehe tiquina nāno yerire coseye tehe, Cohācjū wūhūpū sajāa wahahye. Ti wūhūpū sajā saro, tiquinare yahuahye Pablo: “Ohōpe decori dūhsare mūsa coseato”, ni yahuahye tiquiro pititiarore. Sa ye tiquina cose bato tiri decopū tiquinapequina Cohācjüre wahiquinare tiquina ohoati deco ijiri.

²⁷Sa ye tiquina cose pehoboriro mehenogā dūhsagū waro Cohācjū wūhūpū Pablo tiquiro ijigū Asia yehpa cjēna judio masa pehe ihñahye tiquirore. Sa ihñañe Pablore quitu dojomehne, apequinare tiquiro mehna usuagū yeahye tiquina. Sa usua, judio masa Pablore ñehe, sañuducuahye:

²⁸—Mūsa usā acaye, Israe masa usāre yedohona ahtaya. Ahriquiuro ijire. Ahriquiuro Cohācjū Moisere tiquiro cūri dutiyere, ahri wūhū gūhūre cohā duti, buhere ijipihtiyequinare. Sa ye marine judio masare nāno ni yahuducure. Sa yero tiquiro Cohācjū wūhūpūre judio masa ijieyequinare ne sajāri. Sa yero ahri wūhūre ñañe mariedi wūhūre tiquiro dojomehnedi, ni, sañuducuahye judio masa Asia yehpa cjēna to cjēnare.

²⁹To pano Jerusalēpū Pablo Tró-fimo mehna tiquiro ijigū judio masa ihñae tiahye. Tró-fimo Efeso cjūno judio masūno ijieriquiuro ijiri. Tiquiro sa ijigū masiñe ohō saha ni tūhotuahye tiquina: “Pablo Tró-fimore Cohācjū wūhūre ne sajāno niaga”, ni tūhotuahye judio masa. ³⁰Masare sa ni yahu tiquina sañuducuri bato ti maca cjēna peyequina tutuaro usuahye. Peyequina oma cāhta, Cohācjū wūhūpū ijiriquiore Pablore ñehe weje wijiaa wahahye. Sa ye ti wūhū sopecaharire bihahye tiquina. ³¹Sa ye tiquina tiquirore wejēne tee nimahye. Tiquina sa yegū ihñañe “Ijipihtiyequina Jerusalē cjēna usua, sañuducuye nidi”, ni, apequina pehe yahuye wahahye surara pūhtorore. ³²Tiquina sa nigū tūhoro pūhtoro pehe tiquiro yequina surarare, tiquina dutiyequina gūhūre cahmecoadoqueo, tiquina mehna Pablore wejē duayequina cahapū oma cā esahye. Surara tiquina esagū ihñañe Pablore quēmediquina quē duhu cāhye. ³³Sa yero surara pūhtoro Pablo cahapū esa, pūa da come dari mehna tiquirore dūhte dutiahye. Tiquina dūhte tuhasagū ihñano, pūhtoro Pablore sinituahye:

—¿Noa boro ijijajari ahriquiuro? ¿Yabe buhiri tiquirore sa yejari mūsa? ni, sinituahye tiquiro tiquinare.

³⁴Tiquiro sa sinitugū tūhoye masa pehe “Ohō saha yeri tiquiro”, ni, apequina gūhū sijoro saha ni sañuducu, yahuahye surara pūhtorore. Sa ni

tiquina sañuducugū surara puhtoro quehnoano tuhoerahye. Sa yero tiquiro surara ya wuhupū Pablora nea dutiahye. ³⁵Ti wuhupū esa, Pablo mujari escarera pū tiquiro mujano taro yegū masa pehe tiquirore quē duaye nimahye. Tiquina sa yegū surara pehe tiquirore ne wua mujaa wahahye. ³⁶Masa tiquinare peyequina nūnū tā, sañuducu nūnū tāhye.

—Tiquirore wejē cāhña, ni, sañuducuahye tiquina Pablora.

Pablo “Ne masare ñano yeraja yuhū”, ni, yahuahye

³⁷Sa ye ti wuhupū tiquina peresu yeato pano, Pablo pehe puhtororeshye:

—Yuhū mūhū mehna yahuducu duaga, ni siniahye Pablo.

—¿Mūhū griego masa yere yahuducuajari? ³⁸¿Sohō ijirigū, Egipto cǰū ijierajari mūhū? Tiquiro masare tiquina puhtoare cohā dutiriquiro, cuatro mil masa wejēnequina pehere masa marienopū neari jiri. ¿Tiquiro ijierajari mūhū? ni ahye surara puhtoro Pablora.

³⁹Tiquiro sa nigū tuhora Pablo yuhtiahye:

—Tiquiro ijieraja yuhū. Judio masū ijiaja. Tarsopū Cilicia yehpapū ijiri macapū masa bajuū yuhū. Ihyo ijiri maca cǰū ijieraja yuhū. Yuhū ahriquina masa mehna yahuducu duaga yuhū, ni ahye Pablo tiquirore.

⁴⁰Tiquiro sa nigū tuhora puhtoro pehe tiquirore yahuducu dutiahye masa mehna. Sa yero Pablo mujari escarera pū ducuro tiquiro omocari mehna “Dihta mariahña”, niahye masare. Tiquiro sa yegū ihñañe, dihta mari pihtia wahahye. Tiquina dihta mariahgū ihñano, Pablo judio masa ye mehna yahuahye tiquinare.

22—Yuhū acaye, yuhū yerire yahutja masare. Yuhū yahugū tuhoya masa, niahye Pablo.

²Tiquiro sa nigū Pablo judio masa ye mehna tiquiro yahuducugū tuhoye masa pehe dihta mari dojoa wahahye. Sa yero Pablo tiquinare yahuahye:

³—Yuhū judio masuta ijiaja. Tarso wame tiri macapū, Cilicia yehpapū ijiri macapū masa bajuū yuhū. Sa ijiepeguta ahri maca Jerusalēpūta bucnaū yuhū. Sa yero yuhūre Gamalie wame tiri quiro buhee tiri. Sa yegu yuhū mari ñecusumua muna panopū cǰēna dutiyere quehnoano buhei. Yojo pūre mari Pacure masa yero sahata yuhū gūhū ño peoe timi. ⁴Sa yegu Jesu yequinare ñano yee tii yuhū. Ihquēquina tiquinare wejē tii yuhū. Ūmūare, numia gūhūre ñehe, peresu yee tii yuhū. ⁵Pahia puhtoro, judio masa bucna mehna tiquina ojoaye pūrine Jesu yequinare ñehe dutiye pūrine yuhūre oja basari. Mari acayere Damasco cǰēnare ti pūrine ihñogu tū nimi Jesu yequinare ñehei tūhū. Tiquinare ñehe, ne cāhta peresu yei tū nimi. Jerusalēpū tiquinare ne cāhta duami buhiri dahrei tūhū. Ohō saha yuhū nigū pahia puhtoro, judio masa bucna gūhū quehnoano masine, ni yahuahye Pablo.

Pablo Jesu yaquiro tiquiro waha ducarire yahuahye

(Hch 9.1-19; 26.12-18)

⁶Sa ni tuhasa ohō saha ni yahu nemoahye:

—Sa yero coheri pje ijigū Damascopū yuhū esa quehegū waro uhmuanopū asi sitedoque dijiori yuhūre. ⁷Sa wahagū yuhū yehpapū bora quehe saa waharu yuhū. Yuhū bora quehe sari bato yahuducuro ca tari yuhūre. “¿Saulo, duhsegu yuhūre ñano yeajari?” nino ca tari yuhūre. ⁸“¿Puhto, noa boro ijiajari

muhū?” ni, sinituu yuhū. “Yuhū Jesu Nazare cĵū, muhū nāno yenohrigū ijiaja yuhū”, ni, yuhtiri yuhūre tiquiro. ⁹Yuhū sa wahagū yuhū mehna cĵēna buhri-orero ihñari. Sa ihñaepeeta yuhū mehna tiquiro yahuducugū tuhoerari tiquina. ¹⁰“¿Puhto, duhse yegutari yuhū?” ni sinituu Jesure. “Wahcādūcaya. Damascopū wahaya. Topū muhū wahagū, muhūre ijipihitiye yuhū ye dutiatire ape-quiroy yahurota muhūre”, nidi tiquiro yuhūre. ¹¹Tutuario tiquiro asi sitedo-queogū, yuhū caperi opoa waharu yuhū. Sa ye, yuhū mehna cĵēna yuhū omocare ñehe, Damascopū tuā cāri yuhūre.

¹²Topū Anania wame tiriquireo, Cohācĵüre ño peoriquiro marine Cohācĵū dutiyere ye pehoriquiro ijiri. To cĵēna judio masa ijipihitiyequina tiquina ño peoriquiro ijiri. ¹³Sa yero tiquiro yuhū cahapū wihidūca yuhūre yahuri. “Yuhū acayū Saulo, ihñaña pari turi tja”, nidi tiquiro. Tiquiro sa nidi bato pari turi ihñau yuhū. Sa yegū tiquireore ihñau yuhū. ¹⁴Yuhū sa ihñagū tiquiro Anania yuhūre yahuri. “Mari Pacū tiquiro cahmeñene quehnoano masiacĵüre panopū bese tuhasahye muhūre. Sa yero ‘Yuhū macū quehnoariquireore ihña, tuhorota’, ni yahuahye muhūre mari Pacū panopū. Tiquiro ijire mari ñecusumua mūna tiquina ño peoriquiro. ¹⁵Sa yegū muhū ihñarire, muhū tuhorire yahugūta muhū ijipihitiyequinare. ¹⁶Sa yena yojopūre yoari pje ijieracūhna. Wahcādūcaya. Sa yegū wame yenohrigū ijiya. Jesure muhū sinigū muhū ñañene cohānota”, nidi yuhūre tiquiro, niahye Pablo tiquireore wejē duariquinare.

Pablo judio masa ijieyequinare tiquiro buherire yahuahye

¹⁷Sa ni tuhasa Pablo yahu nemoahye: —Sa ye tuhasa yuhū Jerusalēpū tojoa ta, Cohācĵū wuhupū Cohācĵüre sinigū esau. ¹⁸Yuhū topū ijigū Jesu

yuhūre bajue tiri. Sa bajoaro yuhūre yahuri. “Jerusalē cĵēna yeere muhū yahugū tuho duerare. Sa yegū umūñano ape siepū wahaya”, nidi Jesu yuhūre. ¹⁹Tiquiro sa nigū tuhogū yahuu tiquireore: “Puhto, muhū yequinare judio masa buheye wuhusepū ijieyequinare yuhū ñehe, quēdire masine Jerusalē cĵēna. ²⁰Sa yegū muhūre yahuriquireore Estebā pehere tiquina wejēgū ihñagū ‘Quehnoano yeye wejēne’, nimi. Tiquirore tiquina wejēgū tiquina suhtire cūo basau yuhū. Ti gūhūre masine ahri maca cĵēna. Sa ye yuhū yahugū tuhoboaga yuhūre”, ni yahuu yuhū Jesure. ²¹Yuhū sa nigū tuhororo Jesu yuhūre yahuri: “Yoaropū judio masa ijieyequinare buheacĵüre ohoutja muhūre. Sa yegū wahaya muhū”, nidi yuhūre yuhū puhtoro, niahye Pablo masare.

Surara puhtoro Pablo mehna yahuducuahye

²²Tiquiro yahu muhtari dihitare quehnoano tuhomahye masa. Sa tuhoepeta judio masa ijieyequina cahapū Jesu Pablōre tiquiro ohoatire tiquiro yahugū tuhoye tiquina sañuducu dūcahye tja:

—Ahriquireo yojopū pūritare yariacūnahdo, ni sañuducuahye tiquina.

²³Sa ye tiquina sañuducu nemo, usuaye mehna tiquina suhtire wahba sitedūca, dihta mehna doque mūoahye. ²⁴Surara puhtoro surara ya wuhupū Pablōre ne sajā dutiahye tiquiro yequina surarare. Sa yero surara puhtoro “¿Duhse ijiro boro Pablo mehna usua ñano sañuducuye niajari masa?” ni sinitu duamahye. Pablōre tire sinituro taro, yuta dari mehna tana dutiepegūta tiquireore tiquina dūhteri bato, tiquiro cahapū ijiriquireore surarare yahuahye Pablo:

—Yuhũ Roma cjũ ijiaja. Sa yena “Ñano yeriquiro ijire ahriquiro”, yuhũre ni masiedare mũa. Sa yena yuta dari mehna yuhũre tana masiedare mũa, niahye Pablo tiquirore.

²⁶Tiquiro sa nigũ tũhoro surara tiquiro puhtorore yahuro wahahye:

—Ahriquiro Roma cjũno ijire. Sa yegũ quehnoano yeya tiquirore, ni yahuahye tiquiro puhtorore.

²⁷Tiquiro sa nidi bato surara puhtoro pehe Pablöre sinituro wahahye:

—¿Potota mũhu Roma cjũ ijiajari? Yahuya yuhũre tire, niahye tiquiro.

—To cjũta ijiaja yuhũ, ni yũtiahye Pablo.

²⁸Tiquiro sa nigũ tũhoro puhtoro pehe tiquirore yahuahye:

—Yuhũ Roma cjũ iji duagu niñeru pa-jiro wapa yei, niahye tiquiro.

—Yuhũ Roma cjã macapũ masa bajuũ. Sa yegũ Roma cjũ ijiaja yuhũ pehe, niahye Pablo.

²⁹Tiquiro sa nigũ tũhoye tiquirore tanaboriquina wahaa wahahye. Sa yero Pablo Roma cjũno tiquiro ijigũ masino, tiquirore come dari mehna tiquina dũhterire wacũno, cue niahye puhtoro pehe.

Pablo judio masa puhtorore yahuahye

³⁰Sa yero surara puhtoro judio masa Pablöre tiquina yahusãrire quehnoano masi duahye. Sa masi duaro ape decopũ come darire tiquirore pã dutiri bato, pahia puhtoare, judio masa bucuna mehna cahmecoa dutiahye surara puhtoro. Tiquiro sa cahmecoa dutiri bato tiquiro topũ Pablöre ne cã, tiquina ihũono duhu docoahye tiquirore.

23 Sa yero Pablo judio masa bucunare ihũa piti ca ducu, yahuahye:

—Yuhũ acaye, Cohãcjũ tiquiro ihũonopũ ijipihtiye decori quehnoano yeducuaja yuhũ, niahye Pablo.

²Tiquiro sa nigũ tũhoro ijipihtiye-quina pahia bui ijiriquiro Anania pehe Pablo dũserore quẽ dutiahye. ³Tiquiro cahapũ ducuyequinare quẽ dutiahye. Tiquirore tiquina quẽdi bato Pablo Ananiare tuhtiahye:

—Masa ihũono dihita quehnoano iji mehogũ ijire mũhu. “Cohãcjũ dutiyere yũhdũducagũ nine”, yuhũre niepegũta yuhũre quẽ dutire mũhu. Sa quẽ dutigũ mũhu pehe dutiyere yũhdũducagũ n-aga, niahye Pablo tiquirore.

⁴Tiquiro sa nigũ tũhoye Pablo cahapũ ducuyequina ohõ saha niahye tiquirore:

—Cohãcjũ tiquiro beseriquiro pahia puhtorore ñano yahuducueracãhũa mũhu, niahye tiquina Pablöre.

⁵Tiquina sa nigũ tũhoro Pablo ni nemoahye tja:

—Yuhũ acaye, tiquiro pahia puhtoro ijiyere masiedũ yuhũ. Sa yegũ sa ni maca cãhti yuhũ. Cohãcjũ yere tiquina ojoari ohõ saha ni yahure tiquirore: “Mũhu ya maca cjẽna puhtorore ñano ni, yahuducueracãhũa”, ni ojoahye, niahye Pablo tiquinare “Boya”, nino.

⁶Sa ye topũ pũa curua cjẽna ijiahye. Ihcã curua saduceo masa ijiahye. Ape curua pehe fariseo masa ijiahye. Pũa curua tiquina ijigũ masino, Pablo judio masa bucunare tutuaro sañuducu yahuahye:

—Yuhũ acaye, yuhũ fariseo masũ ijiaja. Fariseo masuno macuta ijiaja yuhũ gũhu. “Yariariquina masa mũjaeta”, yuhũ sa nidi buhiri yuhũre ñano ye duare mũa, niahye Pablo.

⁷Tiquiro sa nigũ tũhoye fariseo masa, saduceo masa tiquina basi cahme tuhtiahye. Sa ye tiquina basi pũa curua tu wahye. ⁸Saduceo masa ohõ saha niñequina ijiahye: “Yariariquina masa mũjasi. Espiritua, angele gũhu ne mariedare”, niñequina ijiahye. Sa ye fariseo masa pehe tiquina yero saha niedahye. Sa ye Pablo “Yariariquina masa mũjaeta”, tiquiro nigũ tiquina basi

cahme tuhtiahye. ⁹Sa cahme tuhtiye, tutuaro sañuducuahye. Sa ye fariseo masa mehna cjēna judio masa buheyequina wahcādūca, tuhti, yahuahye:

—Ahriquiō Pablo ñano yerari. Sa yero espīritu o angel, poto tiquiro mehna yahuducuriquiō ijiboaga, niahye tiquina.

¹⁰Tiquina sa nidi bato tiquina ijipihtiyequina cahme tuhti, tutuaro usuahye. Pablōre tiquina wejē duagū ihñano cuesāhye surara puhtoro pehe. Sa yero Pablōre tiquiro ya wuhupū ne cā dutiro, tiquiro masa watoapū surarare ohoahye.

¹¹Ape ñami Jesu mari puhtoro Pablo cahapū ducuro, yahuahye tiquirore:

—Cueracāhña. Yojoपुरे ohōre Jerusalēpū yee buheyere yahuri mūhū. Sa yegū Romapū gūhūre ohō sahata yei wahaya, niahye mari puhtoro Jesu Pablōre.

Judio masa Pablōre wejē duamahye

¹²⁻¹³Ape decopū ñami cjūno ijigū judio masa cahmecoahye.

—Ohō saha yeihna. Pablōre wejēihna. Tiquirore mari wejēato pano sihniedacūhna. Ihyeracūhna. Tiquirore wejēdana ūjua mehna yariuhna. Sa yero Cohācjū mari pehere wejēahdo, niahye tiquina.

Tiquina cuarenta bui cjūno judio masa ijiahye. ¹⁴Tiquina sa nidi bato tiquina pahia puhtoare, bucūna gūhūre yahuye wahahye:

—Pablōre usā wejēato pano ihyayere usā ihyeraja. ¹⁵Sa yena musa, bucūna mehna ohō saha ni pijioya. “Pablōre pari turi sinitu duaja”, niñā surara puhtorore. Musa sa nidi bato surara puhtorore ne cāhta dutiya Pablōre. Sa yena Pablo ohō cahagā tiquiro wihigū waro tiquirore wejēnatja usā, niahye tiquina pahia puhtoare.

¹⁶Sa ye Pablo pacjūno tiquina sa ni yahuducugū tuhoahye. Tiquina sa nigū tuhooro waha, surara ya wuhupū Pablōre yahuro sajāhye. ¹⁷Tiquiro sa yahuri bato Pablo pehe ihcāquiō surarare pijio yahuahye tiquirore:

—Ahriquiō wahmūnōre puhtoro cahapū neahña. Ahriquiō mūhū puhtorore yahu duaro nine, niahye Pablo.

¹⁸Tiquiro sa nigū tuhooro surara pehe Pablo pacjūnōre tiquiro puhtoro cahapū ne sa, yahuahye:

—Peresupū ijiriquiro Pablo pehe yuhūre pijio, ahriquiō wahmūnōre mūhū cahapū ne cā dutiri. Ahriquiō mūhūre yahuro taro niñohti, niahye surara tiquiro puhtorore.

¹⁹Tiquiro sa nigū tuhooro puhtoro pehe wahmūno omocare ñehe tuā cā, masa marienopū tiquirore sinituahye:

—¿Duhse nigū tūū niari mūhū yuhūre? niahye tiquiro Pablo pacjūnōre.

²⁰Tiquiro sa sinitugū tuhooro ohō saha ni yahuahye:

—Judio masa ihcāno mehna “Ohō saha yeihna”, ni, ñamiapū judio masa bucūna cahapū mūhūre Pablōre nea dutieta. “Bucūna Pablōre pari turi sinitu duare”, ni mehoeta. ²¹Sa niepegūta cuarenta bui cjūno masa tiquirore wejē duayequina duhti, cohte duare. Tiquina tiquirore wejēato pano ihyayere ihyasi. Sa ye sihnisi. “Tiquirore mari wejēdagū Cohācjū marine wejēahdo”, nidi tiquina basi. Sa ye yojoपुरे mūhūre Pablōre ne cāhta dutiye tiquina pehe duhti, cohte tuhasari, Pablōre wejēne tehe. Sa yegū tiquina yahuye wihigū tiquinare yuhtieracāhña mūhū, ni yahuahye wahmūno surara puhtorore.

²²Tiquiro sa nigū tuhooro surara puhtoro ohō saha niahye:

—Yuhūre mūhū yahurire apequinare yahueracāhña, ni yahuahye wahmūnōre.

Sa ni tuhasa wahmūnore “Waharīsa”, niahye tiqiro.

**Pablōre puhtoro Feli wame
tiriqiro cahapu ohoahye**

²³Sa yero surara puhtoro puaro tiqiro yequina cien surara puhtoare piji cā, tiquinare dutiahye:

—Dos cientos surarare, setenta caballoa bui pesayequinare, dos cientos doqueye cju cuoyequina mehna Cesareapu wahatiquinare tiquina yere quehno dutina wahaya. Sa yena mūsa mia ñami nueve ijigū mūsa waha-tore cohteya. ²⁴Sa yena Pablōre caballoare tiqiro pesatiquinare quehno basaya. Puhtoro Feli cahapu, Cesareapu, quehnoano soya tiqirore, niahye surara puhtoro.

²⁵Sa ni tuhasa papera ojoahye. Ohō saha ni ojoahye tiqiro: ²⁶“Yūhu Claudio Lisia mūhure tutuagu puhto Felire quehnoa dutiaja. ²⁷Judio masa ahriqiro Pablōre ñehe, wejēmedi. Sa yegu Roma cjūno tiqiro ijigū masigu, yequina surara mehna tiqirore yedohou esau. ²⁸Sa yegu tiqirore tiquina yahusārire masi duagu judio masa bucūna cahapu ne sau tiqirore. ²⁹Sa yegu tiqiro judio masa ye dutiye dihitare tiqiro yūhdūdūcagū mari ye dutiyere tiqiro yūhdūdūcaeragū ihñagu, tiqirore peresupu cū dueru. Yabe buhiri yariaro mariedare tiqirore. ³⁰Sa yero judio masa tiqirore wejē dua, tiquina buca quehegū ihñano apequiro yahuri yūhure. Tiqiro sa yahuri bato Pablōre yojopure mūhu cahapu ohogu niaja. Sa yegu tiqirore yahusāriquinare tiqiro ñaṅe yerire mūhure yahu duti tuhasau yūhu”, ni, ojoahye surara puhtoro.

³¹Sa ye surara tiquina puhtoro tiqiro dutiriro sahata yeahye. Ti ñamine Antipatri wame tiri macapu Pablōre ne sahye. ³²Ape decopu apequina surara

caballoa bui pesaerariquina ti macapu tojoa tahye tiquina ya macapu. Apequina surara caballoa bui pesayequina dihita tiqirore ne yūhdu cāhye. ³³Tee Cesareapu ne sahye Pablōre. Sa ye surara puhtoro tiqiro ohori pūre puhtoro Felire wiahye. Sa ye Pablōre ne sahye puhtoro cahapu. ³⁴Tiquina sa wiari bato puhtoro ti pūre tiqiro ihñari bato apequinare sinituahye:

—¿Di yehpa cjūno ijajari ahriqiro Pablo? ni sinituahye tiqiro.

—Cilicia yehpa cjūno ijire, ni yahuahye tiqirore.

³⁵Tiquinare sinitu tuhasa, Feli Pablōre yahuahye:

—Mūhure yahusāriquina ohōre tiquina wihigū mūhu yahugū tūhoutja, niahye Feli Pablōre.

Tiqiro sa nidi bato Herode ya wūhūpu tiqirore cūahye. Sa yero tiqiro yequina surarare Pablōre cohte dutiahye puhtoro.

**Pablo “Ñano yeru yūhu”,
ni yahuahye Felire**

24 Ihcā omope decori bato, Anania pahia puhtoro, apequina judio masa bucūna, dutiyere mihnidiquiro Tertulo wame tiriqiro mehna Cesareapu esahye. Sa ye tiquina Pablōre yahusā duaye puhtoro Feli cahapu esahye. ²Sa yero Pablōre topure tiquina ne sari bato Tertulo tiqirore yahusā dūcahye. Sa yahusā ducaro ohō saha ni yahusāhye Felire:

—Mūhu quehnoano masigu, usā puhto mūhu quehnoano dutigū usā ahri yehpa cjāna quehnoano iji cjā usā cahmequeno marieno. Mūhu dutiye mehna quehnoañe pehere comesaro nine ahri yehpa. ³Sa yena usā quehnoano iji cāna bucueaja. Sa yena mūhu mehna quehnoano bucueaja. ⁴Yojopure mehenogā mūhure cariboutja yūhu. Mehenogā

mũhu mehna yahuducu duaja. Usäre tũhodoqueoriña mũhu. ⁵Ahriquiroy usäre caribo yũhduare. Ijipihtiye yehpari cjenare judio masare tiquina usua saũducugũ yere ahriquiroy. Sa yero masa tiquina basi cahme tuhtigũ yere ahriquiroy. “Puhtoare cohãhna”, niñequina mehna cjũno ijire ahriquiroy. Sa yero nazareno wame tiri curua puhtoro ijire. ⁶Sa yero Cohãcjũ wũhũre ñano tiquiroy ye duagũ ihñana usã ñehel ahriquiroy. [Usã ñehedi bato usã ye dutiyere tiquiroy yũhdũdũcariquiroy ijigũ tiquiroyre buhiri dahre duami usã. ⁷Usã sa ye duepegũta surara puhtoro Lisia wame tiriquiroy tiquiroyre usäre tutuaro mehna ehma cãri. ⁸Came tiquiroyre yahusãriquinare mũhu cahapũ waha dutiri Lisia. Tiquiroy sa nigũ tũhona ahtaũ usã.] Mũhu pũrita ahriquiroyre sinitugũ, ijipihtiyere tiquiroy ye buhirire masigũta mũhu, niahye Tertulo Felire.

⁹Tiquiroy sa nidi bato apequina judio masa “Tertulo tiquiroy nidiroy sahata potoy ijire”, niahye tiquina gũhu. ¹⁰Tiquina sa ni yahusãri bato puhtoro Feli Pablore yahu dutiahye. Ohõ saha ni yahuahye Pablo:

—Peye cũhmari ahri yehpa cjenare mũhu dutirire masiaja yũhu. Sa yegũ yũhu yerire mũhũre yahugũ bucueaja. ¹¹Doce decorita wahare Jerusalẽpũ Cohãcjũre yũhu ño peori bato. Mũhu ahri potoy ijigũ masi duagũ apequinare sinituya. ¹²Judio masa yũhũre Cohãcjũ wũhũpũre boca tiquina ñehẽgũ masare ni saũducugũ niedũ. Sa yegũ “Musa puhtoare cohãña”, nigũ niedũ. Sa yegũ judio masa buheye wũhũsere, tiquina ya maca gũhũre ne ñano yera tii. ¹³Sa ye yũhũre yahusãriquina pehe tiquina yahusãrire “Ohõ saha yeri ahriquiroy”, ni, yahu masiedare mũhũre. ¹⁴Yojopũ yũhu yerire yahutja mũhũre. Duita usã ñecusũmũa tiquina ño peoriquiroyre mari Pacure ño peoja yũhu gũhu. Sa yegũ

tiquiroy yere yeaja Jesu ye quehnoañe buheye nidiroy sahata. “Jesu ye ni mehoñe ijire”, ni yahuducure ahriquina judio masa. Tiquina sa niepegũta Cohãcjũ dutiye, Moisepũre tiquiroy cũrire ti gũhũre ño peoja yũhu. Sa yegũ Cohãcjũ yere yahu muhtariquina tiquina ojoari gũhũre ño peoja yũhu. ¹⁵Ahriquina apequina judio masa tiquina tũhoturo sahata Cohãcjũ ijipihtiyequina masare yariariquinare quehnoañequina, ñañequina mehna tiquina masa mũjagũ yerota. Yũhu gũhu sata ni tũhotuaja. ¹⁶Sa yegũ buhiri mariedaja yũhu. Cohãcjũ tire masine. Sa ye masa gũhu tire masine. Sa ye potota yahuaaja yũhu mũhũre. Sa yegũ quehnoano tũhotuaja.

¹⁷⁻¹⁸Peye cũhmarine ape siepũ tinidigu ijigu Jerusalẽne tojoa wihi, yũhu acayere judio masa pejecũoyequinare niñerure ohogu tũũ nii yũhu. Tojoa wihi Cohãcjũre ño peogu tũũ, tiquiroy ya wũhũpũ sajãmi. Sa yegũ Cohãcjũ tiquiroy cose dutiriro sahata yũhu basi yũhu ñañene coseri bato wahiquiroyre oho duami tiquiroyre ño peogu tũhu. Topũ yũhu ijigũ ahriquina judio masa yũhũre bocari. Tiquina bocagũ apequina yũhu mehna mariedari. Usua, saũducuyequina mariedari. ¹⁹Sa ye apequina judio masa Asia yehpa cjenã topũ ijiri. Tiquina yũhu ñano yegũ ihñariquina ijiye, yahusãne ahtaahro. ²⁰Ahriquina ohõpũre ijiyequina pehe judio masa bũcuna mehna yũhu ijigũ ihñariquina yũhu ñano yerire masiñe, tiquina gũhu yahusãahdo. ²¹Ihcãnogã pũritare yũhũre tiquina yahusã masine: Ti pje tiquina mehna ijigu ohõ saha ni tutuaro saũducuu yũhu. “Yariariquina masa mũjaeta’, yũhu nidi buhiri, buhiri dahrere mũsa”, nii tiquinare, ni yahuahye Pablo Felire.

²²Tiquiroy sa ni yahuri bato Feli ohõ saha ni yahuahye Pablore:

—Yojoḡu to puno tjire. Surara puħtoro Lisia tiqiro wihiri bato muħure yuħu yeatore masitja yuħu, niahye Feli Pablore.

Feli pehe Jesu yequina tiquina yerire quehnoano masi pehoriqiro ijiahye.

²³Sa ni tuhasa, Pablore coheriqiro surarare Feli quehnoano ihña nuñu dutiahye “Peresupu ijiriqiro duhtiari”, nino. Sa ijieperota mehenogã ohori tiqiro tiniatore. Pablo mehna cjenare tiqirore peresupu ijiriqirore yedoho dutiro sa dutiahye Feli.

²⁴Meheñe decorigã bato Feli, tiqiro namono Drusila wame tiricoro mehna ahta, Pablore pijiahye. Feli namono pehe judio masono ijiahye. Pablore tiquina pijiri bato, Jesucristore tiqiro wacũ tutuayere Pablo pehe yahuahye tiquinare. ²⁵Sa yahuro quehnoañene, quehnoano wacũ masiñene, ñañene cahmedare, pihtiri deco ijigũ Cohãcjũ masare tiqiro buhiri dahreatore yahuahye Pablo. Tiqiro sa ni yahugũ tuħoro Feli cuero, Pablore yahuahye:

—Yojoḡure wahařisa. Came yuħure dahraye mariedagũ muħure pijitja tja, niahye Pablore.

²⁶Sa nino Pablo tiqiro niñeru ohogũ cahmemahye Feli. Sa yero tiqiro niñerure cahmeno, peye tahari Pablore piji, tiqiro mehna yahuducue timahye Feli. Niñerure tiqiro wapa yegũ Pablore wioboaga, ape taha yero. ²⁷Pua cuħma bato Porcio Festo wame tiriqiro Feli comesariqiro ijiahye. Sa ijiepegũta Feli pehe puħtoro ijero, judio masare bucuegũ ye duahye. Sa yero tiqiro Pablore peresupu iji dutiniahye.

Pablo Festore tiqiro yerire yahuahye

25 Sa ye Festo ti yehapu ihtia deco tiqiro ijiri bato, Cesareapu ijiriqiro waha, Jerusalẽpu esahye. ²Topu tiqiro ijigũ pahia puħtoa, judio masa puħtoa mehna Pablore tiquina

yahusãrire yahuahye Festore. ³Pablo mahapu wahagũ tiqirore buca quehe, wejẽ duaye nimahye tiquina. Sa ye tiquina Festore tutuaro sinimahye:

—Pablore Jerusalẽpu ohoya, ni, sinimahye tiquina Festore.

⁴Tiqina sa nigũ tuħoro, Festo yahuahye tiquinare:

—Yojoḡure Pablo Cesareapu peresu ijire. Yojoḡure yuħu topu wahau tuħta niaja. ⁵Pablo tiqiro ñano yeriqiro ijigũ, musa puħtoa Cesareapu yuħu mehna waha, tiqirore yahusãahdo, niahye Festo.

⁶Sa yero Festo ocho o diez decori tiquina mehna tiqiro ijiri bato Cesareapu tojoaa wahahye. Ape decoru tiqiro buhiri dahre dutiri wuħupu dujiro, Pablore ne cãhta dutiahye.

⁷Sa ye Pablo Festo cahapu tiqiro wihigũ, judio masa Jerusalẽpu ahtariquina pehe Pablo cahapu ducu, tiqirore tutuaro mehna yahusã ducahye. Sa yahusãepeta “Ahriqiro tiqiro ñano yegũ ihñau”, ni, masiedahye. ⁸Tiqina sa ni yahusãri bato Pablo tiqiro yerire yahuahye:

—Judio masa tiquina dutiyere, Cohãcjũ wuħu cjẽ dutiyere, Roma cjãno puħtoro tiqiro dutiyere yuħducaeru, niahye Pablo.

⁹Festo pehe judio masare bucuegũ ye duaro, Pablore sinituahye:

—¿Jerusalẽpu waha duajari muħu? Muħu yerire yuħure topu yahuta muħu, niahye Festo Pablore.

¹⁰Tiqiro sa nigũ tuħoro Pablo yahuahye:

—Ijipihtiyequina puħtoro tiqiro ya wuħupu buhiri dahre dutiri wuħupu ijiaja yojoḡure. Ahri wuħu boropu yuħu yerire tuħoya. Judio masare yuħu ñano yerarire quehnoano masine muħu. ¹¹Dutiyere yuħducarigu ijigu “Yuħure wejẽdacãhña”, niedaboaya yuħu. Sa yegu ahriquina yahusãri pehe

ni mehoñe ijigū yuhure yahusāriquinare yuhure oho masiedare mūhū. Yuhū yerire ijipihtiyequina puhtorore Césare yahu duaja, niahye Pablo.

¹² Tiquiro sa nigū tuhoro Festo pehe quehnoano masi yahuyequinare sinitu tuhasa, yahuahye Pablore:

—Mūhū ijipihtiyequina puhtorore mūhū yerire mūhū yahu duagū tiquiro cahapu ohonatja mūhure, niahye Festo Pablore.

Festo puhtoro Agripare Pablo tiquiro ijiye tiyere yahuahye

¹³ Camepu puhtoro Agripa, Berenice wame tiricoro mehna Cesareapu Festore ihñañe esahye.

—¿Ne, ijjajari mūhū? niahye tiquina Festore piti caye.

¹⁴ Topu peye decori tiquina ijiri bato Festo yahuahye Agripare Pablo tiquiro ijiye tiyere:

—Ohöre Feli tiquiro peresu yeriquiro ijire. ¹⁵ Sa ye Jerusalēpu yuhū wahagū judio masa tiquina pahia puhtoa, tiquina bucuna mehna ahriquiore yahusāri. “Tiquiro ye buhirire wejēña tiquirore”, ni, sinidi tiquina yuhure.

¹⁶ Tiquina sa ni sinigū tuhogu yuhū tiquinare ohō saha ni yahuu. “Roma cjēna pehe peresu tiquina yeriquinare masare ohoerare. Sa yegu tiquirore ohoeraja musare. Usā ñehediquirore tiquirore yahusāriquinare tiquiro ihñato pano tiquirore buhiri dahre masiedaja usā. Tiquiro basi tiquiro yerire tiquiro yahueragū tiquirore buhiri dahre masiedaja usā”, nii tiquinare. ¹⁷ Sa yegu ohöre tiquina wihigū ihñagu yoari pje yeru yuhū. Sa yegu ape decopu buhiri dahre dutiri wuhupu dujigu, tiquina yahusāriquiore pijii. ¹⁸ Sa ye ti wuhupu tiquiro wihigū ihñañe tiquirore ihña tuhtiyequina wahcāducari. Tiquina sa wahcāducagū ihñagu “Ña yuhduaro ni yahusāeta”, ni, tuhotumi yuhū

tiquinare. Tiquirore yahusā duepeta yahusā masiedari tiquina. ¹⁹ Sa ye ahriquiore Cohācjū yere tiquiro yahuri buhiri judio masa tiquirore tuhtiri. Jesu wame tiquiro tiquiro yaria masa mujarire tiquiro yahuri buhiri yahusāri ahriquiore. Ahri dihitarē yahusāri. ²⁰ Tire masiedagu tiquirore quehnoano sinituu. “¿Jerusalēpu waha duajari mūhū yuhū mehna? Topu yahuahye mūhū yerire yuhure”, nimi tiquirore. ²¹ Yuhū sa niepegūta tiquiro waha duerari. “Yuhū yerire ijipihtiyequina puhtorore yahu duaja”, nidi tiquiro yuhure. Tiquiro sa nidi bato ohōpūta tiquirore cohte dutii, ijipihtiyequina puhtoro cahapu tiquirore yuhū ohoato pano, niahye Festo Agripare.

²² —Yuhū basi tuho duaja tiquirore, niahye Agripa Festore.

—Ñamiapu tiquirore tuhoya mūhū, ni yahuahye Festo.

²³ Ape decopu Agripa, Berenice mehna tiquina buhiri dahre dutiri wuhupu esa, “Puhtoa ijiaja usā”, niñe cua pesaro ye ihñoahye tiquina, surara puhtoa, ti maca cjēna puhtoa mehna. Sata ye sajāhye ti wuhupu. Tiquina sajā sari bato Pablore pijiahye Festo. ²⁴ Sa yero Festo ohō saha ni yahuahye:

—Puhto Agripa, musa ijipiltina ahri wuhure cahmecoana, tuhoya. Ohöre ahriquiore peyequina judio masa tiquina yahusāriquiore ijire. Jerusalēpu, Cesareapu gūhure tiquina tiquirore yahusāri. “Tiquirore wejēña”, sa niducuye nine tiquina. ²⁵ Tiquina sa niepegūta ohō saha tuhoutuaja yuhū. Ahriquiore ne ñano yeriquiro ijierare. ¿Yabe buhiri wejēboagari mari tiquirore? Sa yegu ijipihtiyequina puhtorore César Augustore ahriquiore yerire tiquiro yahu duagū ijipihtiyequina puhtoro cahapu ohogutja tiquirore. ^{26–27} Sa yegu ahriquiore yerire tuho, quehnoano

masiedarīaja yūhū. Sa masiedagu mari puhtorore yahu ojoa masiedaja. Sa yegu musare tiqiro yahugū tūho dutigū nīaja yojopure. Puhto Agripa, yojopu pūritare ahriqiro ijire mūhū sinituatiqiro. Mūhū sinitu tuhasa, mari masidi bato ahriqirore tiquina yahusārire quehnoano yahu ojoaūtja. Ahriqiro nāno yerire yūhū masiedapegūta mari puhtoro cahapu tiqirore yūhū ohogū quehnoaedare. Sa yegu yojopure tiquina yahusārire quehnoano masi duagu nīaja, nīahye Festo tiquinare.

Pablo Agripare tiqiro yerire yahuahye

26 Tiquiro sa nidi bato Agripa Pablore yahuahye:

—Mūhū basita yahuya, nīahye tiqiro Pablore.

Tiquiro sa nidi bato Pablo pehe, “Dihta mariahā”, nino tiqiro omocarine siō mūo, tiqiro yerire yahuahye:

²—Puhto Agripa, yūhūre judio masa tiquina yahusārire, yūhū yerire mūhūre yahugū, yojopure quehnoano jeripohna tīaja. ³Mūhū judio masa usā yee tiyere, usā buheye gūhūre mūhū quehnoano masigū pūritare bucueaja yūhū. Sa yegu mūhū yūhūre quehnoano tūhoya, ni dūc-ahye Pablo.

Pablo Jesu yaqiro tiqiro ijiato pano tiqiro ijie tirire yahuahye

⁴Sa ni tuhasaro ohō saha ni nemoahye tiqiro:

—Wahmu yūhū ijie tirire ijipihtiye-quina judio masa masine. Ijipihtiye decori yūhū masa bajuari bato yūhū ya dihtapure, Jerusalēpu gūhūre yūhū ijirire masine tiquina. ⁵Coā waropure fariseo masu ijimi. Sa yegu fariseo masa tiquina dutiyere, tiquina yeye borore ye pehogu yūhū ijigū tiquina masine. Tiquina mūhūre yahu duaye,

tire yahu masine tiquina. ⁶Ahri buhiritā yūhūre yahusā mūjare. Usā nēcusumūa iji turiayequinare “Yariariquinare ma-soutja”, Cohācjū tiqiro ni cūrire “Poto tjire”, yūhū nidi buhiri ahriquina yūhūre yahusā mūjare. ⁷Yūhū acaye judio masa ijipihtiyequina doce cururi cjēna Cohācjū masare tiqiro masoatire bucue, cohteducure. Sa ye Cohācjūre nō peoducure. Sa cohteducuyequina ijiye usā yero saha yere tiquina. Puhto Agripa, sa ihcāno saha yena usā ijiepegūta tiquina pehe tiqiro masoatire yūhū cohteri buhiri yūhūre yahusā mūjare judio masa. ⁸¿Mūsa judio masa pehe dūhse yena Cohācjū tiqiro masorire tiquina yahugū tūho duerajari mūsa, judio masa? ni yahuahye Pablo.

Pablo Jesu yequinare tiqiro nāno yee tirire yahuahye Agripare

⁹Sa ni tuhasa ohō saha ni yahu nemoahye:

—Jesure Nazare cjūnore ihnedarīgū, nāñe dihitare ye duami tiqiro yequinare. ¹⁰Sa yegu Jerusalēpu sa yee timi yūhū. Pahia puhtoa yūhūre tiquina dutiri bato peyequina Jesu yequinare peresu yee tii. Sa yegu puhtoa tiquinare wejē dutigū, wejē dutii yūhū gūhū. ¹¹Peye tahari ijipihtiye judio masa buheye wūhūsepu Jesu yequinare nāno ye dutie tirū. Sa yegu Jesu yequina Jesure tiquina cohāgū ye duagu nimi. Tiquina mehna tutuaro usuau yūhū. Sa yegu apeye macaripu gūhūre tiquinare nāno yegu esae tii yūhū, ni yahuahye Pablo.

Pablo Jesu yaqiro tiqiro wāharire yahuahye

(Hch 9.1-19; 22.6-16)

¹²Sa ni tuhasa ohō saha ni yahu nemoahye:

—Damascopu Jesu yequinare nāno ye duagu esami. Tiquinare nāno yūhū

ye duagū ihñañe pahia puhto yuhure waha dutiri. ¹³ Ohō saha ijiri puhto Agripa: Coheri pje ijigū waro mahapu yuhu wahagū uhmuano cjē asi siteye, asū deco cjūno yuhduoro, yuhure yuhu mehna wahayequina gūhure asi siteri. ¹⁴ Usā ijipihtina yehpapu bora quehe sa, judio masa ye mehna yuhure tiquiro yahuducugū tuhō. “¿Saulo, dahse yegu muhu yuhure ñano yeajari? Muhu yuhu mehna usuagu yuhure yuhtieragu, muhu basi ñano yuhdure”, nidi yuhure. ¹⁵ “¿Puhto, noa boro ijajari muhu?” ni, sinituu yuhu. “Yuhu Jesu, muhu ñano yenohrigu ijiaja. ¹⁶ Wahcādūcaya muhu. Muhure yuhu cahacjū ijiajū yegu tagu, yojopu bajuaja yuhu. Miare yuhure muhu ihñarire, came muhure yuhu ihñoati gūhure apequinare yahugūta muhu. ¹⁷ Judio masare, judio masa ijieyequina gūhure muhure buhe dutigu ohogutja. Tiquina cahapu muhu ijigū, muhure tiquina ihña tuhtigū muhure yedohogutja. ¹⁸ Yeere tiquinare masigū yeya muhu. Sa yegu tiquinare ñañene duhugū yeya. Quehnoañe pehere comesagū yeya tiquinare. Watinore cahmedagū yeya muhu. Sa yegu Cohācjū ye pehere yegū yeya muhu tiquinare. Muhu sa yegū tiquina yuhure wacū tutuaeta. Tiquina sa wacū tutuagū ihñagu tiquina ñañe yerire boutja. Sa ye tiquina Cohācjū tiquiro beseriquina mehna cjēna ijietā. Tiquiro ohoatire cuoatiquina ijietā tiquina”, nidi Jesu yuhure, ni yahuahye Pablo.

Pablo tiquiro yerire tiquiro dahrayere yahuahye

¹⁹ Sa ni tuhasa ohō saha ni yahu nemoahye:

—Puhto Agripa, uhmuano cjē yuhu tuhoyere yuhdūcaeru. ²⁰ Damascopu buhe muhta. Came Jerusalēpu buhei tja. Came Judea yehpapu, judio masa ijieyequina cahapu gūhure

masare tiquina ñañe yerire bujua witi dutii, Cohācjū yere cahme dutigu. “Quehnoañene masa yegū ihñañe ñañene masa bujua witiire apequina masieta”, nigū, tiquinare quehnoañene ye dutigu buhei. ²¹ Cohācjū ya wuhapu yuhu ijigū yuhu sa ni yahuri buhiri judio masa yuhure ñehe, wejē duamedi. ²² Tiquina sa yepegūta decoripe Cohācjū tiquiro yedohoro mehna sa buheducuaaja. Sa yegu yojopure masa ijipihtina puhtoare, ihyo ijina gūhure tiquiro yere yahugu niaja. Panopu cjēna Cohācjū yere yahu muhtariquina, Moise mehna tiquina yahuyuriro sahata yahuaja yuhu gūhu. Ohō saha ni yahuyuahye tiquina. ²³ “Cristo Cohācjū ohoriquiro pehe ñano yuhdūrota. Sa yero yariaro masa muja muhtariquiro waharota tiquiro. Sa yero masare tiquiro yuhduoatire judio masare, judio masa ijieyequina gūhure masigū yerota”, ni yahuyu ojoae tiahye panopu cjēna. Yuhu gūhu tiquina yero sahata yahuaja, ni yahuahye Pablo Agripare.

Pablo Agripare Jesu yaquiro wahagū ye duamahye

²⁴ Tiquiro sa ni yahuri bato Festo tiquirore tutuaro sañuducu yahuducuahye:

—Pablo, muhu tuho masiegu ijire. Muhu peye buhegu cohto tia wahare, ni sañuducuahye tiquiro Pablō.

²⁵ Tiquiro sa nigū tuhoro Pablo yuhti-ahye Festore:

—Puhto, tuho masiegu ijieraja yuhu. Yuhu yahuye ijirota ijire. Sa yegu yuhu ahrire cua pesaro mehna quehnoano niaja. ²⁶ Puhtoro Agripa pehe ahri yuhu yahurire quehnoano masine. Sa yegu yuhu tiquirore cuero marieno yahuaja. Ahri yahuyere ijipihtiyequina masa masine. Sa yegu ijipihtiye ahrire yuhu nidire puhtoro Agripa tiquiro masigū masiaja yuhu, niahye Pablo Festore.

Sa ni tuhasa ohō saha niahye Agripare:

²⁷—Pūhto Agripa, Cohācjū yere yahu mūhtariquina tiquina yahue tirire tūhore mūhū. Tiquina yahue tirire mūhū tūhogū masiaja yūhū, niahye Pablo Agripare.

²⁸—¿Ahrire yūhure yahugū mehenogā mūhū yahuye mehna Jesu yaquiro yūhū wahagū ye duagu niajari mūhū? niahye Agripa Pablore.

Tiquiro sa nigū Pablo yūhtiahye:

²⁹—Mehenogā yahuducugū o yoari pje yahuducugū musa ijiphtinare “Yūhū ijiro sahata Jesu yequina ijiaho”, ni sini basaja Cohācjūre. Sa siniepegūta yūhū yero saha peresupū musa ijigū cahmedaja yūhū, niahye Pablo Agripare.

³⁰⁻³¹ Tiquiro sa nidi bato Agripa, Festo, Berenice ijiphtiequina apequina mehna wahcādūca, wija, tiquina basi yahuducuahye:

—Ahriquiroy buhiri mariedare. Sa yena tiquirore ne peresu ye masiedaja mari. ¿Sa yena mari yabe buhiri tiquirore wejēboagari? ni, yahuducuahye tiquina basi.

³²—Ahriquiroy “Ijiphtiequina pūhtorore César pehere yūhū yerire yahu duaja”, tiquiro niedagū mari wioboaya tiquirore peresupū ijiriqirore, niahye Agripa Festore.

Pablo tiquirore tiquina yahusārire Romapū yahuro wahahye

27 Pablore Italiapū yucusa mehna ohoye tehe, tiquirore apequina mehna tiquina peresu yequina mehna Julio wame tiquiro mehna cūri tiquina. Julio cien surara pūhtoro ijiro, tiquiro ya curua “Augusto yequina surara”, wame tiri. ²Sa yena Adramitio wame tiro cjāria yucūsapū sajāu usā. Tia Asiapū wahatia ijiri. Sajā tuhasa, tia mehna wahau. Aristarco Tesalónica wame tiri maca cjūno usā mehna wahari. Tesalónica Macedonia yehpapū ijire. ³Ape de-

copū usā Sidōpū esau. Topū esaro Julio Pablore quehnoano yeri. Sa yero Pablore tiquiro mehna cjēna cahapū ihñano waha dutiri. Sa yero Pablo mehna cjēna tiquirore tiquiro cahmeñene tiquina ohogū “Quehnoanota”, nidi Julio. ⁴Yucūsa mehna usā pehāgū tutuaro wiñono usāre ape siepū wēdoque pehōri. Sa yena Chipre wame tiri nūcūo cahmotaropū poto pehepū wahau usā. ⁵Tee Ciliciare yūhdūa, Panfilia gūhūre yūhdūa, Mira wame tiri macapū Licia yehpapū ijiri macapū pehā sau.

⁶Topū esana, Alejandriapū ahtariare, Italiapū wahatiare yucūsure bocau. Sa yero usāre tiapū waha dutiri surara pūhtoro. ⁷Peye decori dero dero waha, “Wape cūo yūhdūare”, ni, waha, Gnido wame tiri maca potopū esau usā. Topū esa yūhdūa, wiñono tutuaro wēgū, usā waha duaripū usāre wē ohōedari. Sa yena usā cū pehe pehepū majare pehāa wahau. Sa yena Creta wame tiri nūcūo cahmotari pahrē pehe usā pehāa waha, Salmón wame tiri ñoare yūhdūa wahau usā. ⁸Topū yūhdū, ti nūcūo dūhtū cahapū waha, “Wape cūo yūhdūare”, ni, waha, Quehnoari petamaha wame tiropū wahā sau. Petamaha Lasea wame tiri maca cahapū ijiri.

⁹Topū yoari pje usā ijiri bato, usā wahato pehe cua yūhdūari. Sa yero tiquina sijiri deco bose deco yūhdūari bato, Pablo tiquinare yahuri:

¹⁰—Tūhoya musa. Sijiri deco bose deco bato mari wahagū marine minino cua yūhdūare. Ahria yucūsa, yucūsa cjē, musa doeri cjē gūhū mari mehna cjēna gūhū mari butiboaga mari wahana, nidi Pablo.

¹¹Tiquiro sa niepegūta surara pūhtoro yucūsa upūrore tūhoro, ohoturiquiroy gūhūre tūhoro, Pablo yahuye pehere tūho duerari waha duaro. ¹²Tiquina pahsari petamaha quehnoari petamaha pohecū ijigū tiquina pahsari petamaha

ijierari. Sa ijiri petamaha ijigū yucusa cjēna peyequina waha dua, Fenicepū yojoa duamedī. Fenice Creta wame tiri nucuo cjā petamaha ijiro, wihnono ahtaro pehe, asū sajāno pehe cū pehe pehepū, poto pehepū gūhure ihñadoqueo, wihnono ahtagū quehnoano cahmotari maca ijiri. Sa ijiri petamaha ijigū masiñe tiquina topū ihcā pohecū iji duamedī.

Pajiri mapū wihnono, acoro mehna pajiro wē cāhtahye

¹³ Sa ye sur pehe derogā wihnono ahta ducari. “Miare quehnoari deco mari waha-ti deco ijire”, ni tuhotumahye tiquina. Sa wihnono wēgū yucusa mehna waha dūca, Creta nucuo dūhtū cahagā yojoau usā. ¹⁴ Sa yojoaepēgūta came cjūno wihnono noreste wame tiri wihnono tutuaro wēdi. ¹⁵ Sa yero yucūsare wihnono tutuaro wahā wihiri. Wihnono ahtaro pehere waha masiedana, majare paha, wihnono wēonopū wahau usā. ¹⁶ Cauda wame tiri nucūogā cahapū sur pehepū waha, ti nucūogā usāre mehenogā cahmotari. “Marine wape cūo yūhdūare”, nina tore pajiria yucusa cjāria meheniagā yucūsagāre quehnoano weje peo dūhtei usā. ¹⁷ Tiagāre yucūsapū usā weje peo dūhteri bato pajiria yucūsapū pajiri da mehna tiquina wahme ñehe peori. Sirte wame tiri padūrore “Tia yucūsa doque wahā sari”, niñe, cue nidi tiquina. Sa ye wihno ñeheñe suhtire tiquina ne dijiori bato yucusa dihitare wihnono wēdoqueori. ¹⁸ Wihnono, acoro mehna tutuaro ahtari. Ape deco gūhure wihnono mūnanota ahtagū ihñañe tiquina doeri cjēne diapū duredoque ño tuhasa, pehāa wahau usā. ¹⁹ Ape deco yucūsa cjēne diapū cohāri tiquina basi. ²⁰ Peye decori ñicuñe decori ijigū, asū deco cjūno ñahpicoha paca gūhū ne bajuerari. Sa yero tutuaro wihnono wēdi. Sa yena “Minia wahaja mari. Sa yena yariaa wahanata”, ni tuhotumi usā.

²¹ Sa ye tiquina yoari pje tiquina sijiri bato Pablo tiquina poto ducu, yahuri tiquinare:

—To pano mūsare yūhū yahugū tuhoerari mūsa. “Cretapū ijirina mari wahagū cuariaga”, yūhū nigū tuhoerari mūsa. Yūhure tuhona, ahria cjē ijipihtiyere boeraboaya mūsa. ²² Sa niepegūta yojoapū mūsare yahuaja. Cueracāhña. Ijipihitina mari yūhdūnata. Ahria yucūsa dihita marine wahtia waharota. ²³ Mia ñamine Cohācjū yaquiro angel yūhure bajuari. Cohācjū yaquiro ijiaja yūhū. Sa yegu tiquirore ño peoaja yūhū. Angel pehe yūhū cahapū ahtaro, yahuri. ²⁴ “Pablo, cueracāhña. Ijipihtiyequina pūhtorore mūhū yerire mūhure yahuro cahmene. Cohācjū quehnoariquiro ijire. Sa yero tiquirore mūhū sinidiro sahata yojoapūre mūhū mehna cjēna gūhure yedohorota”, nidi yūhure angel. ²⁵ Sa yena cueracāhña mūsa. Angel yūhure tiquiro nidiro sahata waharota. Cohācjūre wacū tutuaja yūhū. Sa yegu tiquiro yahuriro sahata “Ijirota ijire”, ni tuhotuaja yūhū. ²⁶ Yūhū sa niepegūta marine nucūopū wihnono wēdoque ohōnota, ni yahuri Pablo tiquinare.

²⁷ Ihcā ñami pūa semana bato pajiri ma Adria wame tiri mapū wihnono usāre tutuaro wēdi. Ti pjere ñami decopū yucūsa cjēna umūa pehe “Dūhtū cahapū ijiaja mari”, ni tuhoturi tiquina. ²⁸ Sa ni tuhotuye nūcuria comea yuta da mehna dūhte, duhudoque dijio, queori. Treinta y seis metro waro ūhcuāri. Mehenogā waha, queori tja. Ti pjere veintisiete metro waro ūhcuāri. ²⁹ Sa ye utā pacare “Doque wahā sari”, niñe yucūsa ohotur-opū pititia pjine dūhte pohoye pjine duhudoque dijiori diapū. Sa ye “Sojaro mehna bohreahro”, ni, tutuaro sinidi tiquina. ³⁰ Yucūsa cjēna umūa pehe duhtimedī. Tiquina meheniagāre yucūsa cjāriare diapū weje boro poho, yucūsa

ehquēapū dūhte pohoye p̄jīnine tiquina dijjioriro sahata yeri tiquina meheni-agāre “Marine ihñari”, niñe. ³¹ Tiquina sa yepegūta Pablo surara puhtorore, tiqiro yequina surara mehna yahuri:

—Ahriquina umua meheniagā yucusa mehna tiquina wahagū mūsa ijipihitina yarianata, nidi Pablo.

³² Tiquiro sa nigū tuhoye surara pehe meheniagāre dūhteye darire yūhre sure, tiare cohāri.

³³ Bohreato panogā Pablo tiquinare tutuaro ihya dutiri:

—Pua semana waro mūsa dūhse wahatire masi duana, cohtena, ne ihyerari mūsa. ³⁴ Sa yena yojopūre ihyana taya. Tutuaro mū sare ihya dutiaja. Mūsa cati duana ihyaya. Ijipihitina mūsa yūhdu-nata, nidi Pablo tiquinare.

³⁵ Tiquiro sa nidi bato Pablo pāre ne, ijipihitiquina tiquina ihñonopū Cohācjūre “Quehnoare”, ni duhu peo, tire ihya dūcari tiqiro. ³⁶ Tiquiro sa ihyagū ihñañe tiquina cuero marieno waha, ijipihitiquina tiquina gūhu ihyari. ³⁷ Usā ijipihitina doscientos setenta y seis masa yucūsapū ijii usā. ³⁸ Tiquina ijipihitiquina yapia waha “Ahria yucusa nūcūniaga”, ni, peye trigo ihyayere diapū cohāri.

Yucūsa padūropū doque quehe sahye

³⁹ Bohreagū yucūsa cjēna umua nūcūore ihñañe, “Ohō saha wame tiri nūcūo ijire ahri nūcūo”, ni, ihñā masiedari. Sa masiedapeta tiquina pari tucūpū padūro ijigū ihñañe, “Mari ti tucūpū wahana, topūre doque pje saboaga padūropū”, nidi tiquina. ⁴⁰ Sa niñe dūhte pohoye p̄jīnine dūhteye darire yūhre sure dijjioahye. Ohoturi p̄jī dūhteye dari gūhūre yūhre sure cāri tiquina. Tiquina sa yeri bato yucūsa ehquēa cjā suhtirore wahcō docori, poto wihtonno wēdoqueogū cahmeñe. ⁴¹ Sa yepegūta yucūsa ehquēa pehe ape

padūropū quehe sa, nūjua masiedari. Sa yero ohoturore tutuaro pahcōri quē ohōgu tia ohoturo wahtia wahari. ⁴² Tia sa wahagū ihñañe ohō saha nidi surara:

—Ahria minigū mari peresu yeriquina dūhtu cahapū ba nūjua duhtietia. Sa yena tiquinare wejē pehouhna, nidi surara.

⁴³ Sa niepegūta surara puhtoro pehe Pablore wejē dueraro, ijipihitiquina peresu ijiequinare wejē duerari. Sa yero ijipihitiquina ba masiequinare surara puhtoro poto dūhtu cahapū ba nūjua dutiri. ⁴⁴ Sa ye apequina yucūsa cjē p̄jīni wahti siteri p̄jīni mehna bora ñojoa, ti p̄jīni bui pesa ba nūjuari. Usā sa yena usā ijipihitina dūhtu cahapū wahā sau.

Pablo Malta wame tiri

nūcūopū ijiahye

28 Sa ye ti nūcūopū usā ijipihitina majadūca sana, ti nūcūo wamene masii. Malta wame tiri nūcūo ijiri. ² Ti nūcūo cjēna masa usāre quehnoano yeri. Sa yena usā acoro weri bato yūsuā yūhduari usāre. Sa ye to cjēna pehe peca wijiā tuhasa, usāre sohma dutiri. ³ Pablo pecare ne cāhta, tu tiāri. Tiquiro tu tiāri bato ti peca puhiapū sañariquiro aña tutuaro asigū wijiā taro, Pablo omocapū bahque wahā sari yaha wero marieno. ⁴ Tiquiro bahque wahā sagū ihñañe ti nūcūo cjēna tiquina basi ohō saha ni yahuducuri:

—Ahriquiro masa wejēdiquiro ijiboaga. Sa yero tutuaricoro buhiri dahrerico ro umūse cjōno tiquirore buhiri dahrero, cati dutierare. Tiquiro pajiri mapū minino yūhdu tuhasari jimedi. Yojopūre ticoro pehe tiquirore cati dutierare, nimedi tiquina basi.

⁵ Sa niepegūta Pablo añare pecapū wejē sitedoqueori. Tiquirore aña puriedari. ⁶ “Ipirota”, niñe, cohtemedi tiquina. Ne ipierari tiquirore. “Tiquiro yariaa waharota”, niñe tiquina cohtemedi. Tiquirore puriedari. Yoari

pje bato tiquireore ipieragū ihñañe, tiquireore puriedagū ihñañe, sijoro tūhoturi tiquina. “Ahriquiuro cohāmana mehna cjēno ijiboaga” nimesi tiquina.

⁷Tiquina ba wahā sariro cahagāpū Publio wame tiriquireo ye weseri ijiri. Tiquiro ti nūcūo cjāno pūhtoro ijiri. Sa yena usāre tiquireo quehnoano yegū ihtia deco waro tiquireo ya wūhupū ijiniū usā. ⁸Publio pacuro yojoa mehna, ujuaye dohatiriquiro ijiri. Sa yero tiquireo cuñanopū cuñari. Sa yero Pablo dohatiriquiro ya tucūpū sajā, Cohācjüre sini, tiquireo omocarine tiquireo bui duhu peo, quehnoa wahagū yeri tiquireore. ⁹Tiquiro quehnoa wahagū ihñañe ijipihitiyequina apequina ti nūcūo cjēna dohatiequinare Pablo cahapū ne cāhtari. Tiquina sa ne cāhtaḡū ihñano Pablo quehnoa wahagū yeri tiquina ḡūhure. ¹⁰Came tiquina peyequina usāre wapa marieno ohori. Usā wahato panogā ijipihitiye usā cahmeñene, usā wahana ihyatire yucusapū dure sāri tiquina.

Pablo Romapū esahye

¹¹Ihtia asū ti nūcūopū usā ijiri bato yucusa mehna wahañ usā. Tia yucusa ehquēapū pūaro cohāmana Cāstor, Pólux wame tiyequina tiquina queoye ducuri. Alejandrīapū ahtaria ijiri tia. Pohecū ijiro puno ti nūcūopū tia yucusa pahsari. ¹²Waha, Siracusa wame tiri macapū esana, ihtia deco waro ti macare ijii usā. ¹³Ti macare wijia, waha, Regio wame tiri macapū usā esau. Ape decopū surpū wihnono ahta, usāre wēdoqueori. Pua deco bato Puteoli wame tiri macapū esau. ¹⁴Topū Jesu yequina meheñequinagā usāre piti cari.

—Ihcā semana waro usā mehna tojoaya, nidi tiquina usāre.

Tiquina sa nigū tūhona ihcā semana waro tiquina mehna tojoariī. Came mahapū maja, Romapū esau usā. ¹⁵To

cjēna Jesu yequina pehe Romapū usā esatire tūhoye, Apio wame tiropū doeri cjēne duaropū usāre piti cari. Apequina Jesu yequina ihtia wūhu wame tiropū usāre piti cari. Tiquina sa piti cagū ihñano Pablo bucueye mehna Cohācjüre “Quehnoare”, ni, quehnoano jeri sāa wahari.

¹⁶Romapū usā esari bato peresu tiquina yeriquinare to cjānore peresu cohteyequina pūhtorore yahuri. Sa yahuepegūta Pablo pehere ihcāquiurota cūri to cjēna pūhtoa. Sa yero tiquireore ihcāquiuro surara cohteri.

Pablo Romapū buheahye

¹⁷Ihtia deco bato Pablo judio masa pūhtoa mehna cahmecoano taro, tiquinare pijiri. Tiquina cahmecoari bato tiquireo tiquinare yahuri:

—Yūhū acaye, mari acayere, mari ñecūsumua panopū cjēna tiquina yee tirire, marine tiquina buheri ḡūhure yūhdūducaera tii yūhū. Yūhū yūhdūducaerapegūta Jerusalēpū yūhure ñehedi apequina judio masa. Tiquina sa yeri bato Roma cjēnare yūhure peresu ye dutiri tiquina. ¹⁸Tiquina sa yegū Roma cjēna yūhure sinitu, yūhū ñano yerarigū yūhū ijigū yūhure “Buhiri tiriquireo ijire”, ni masiedari. “¿Ne yabe buhiri wejēboagari mari tiquireore?” nidi yūhure tiquina. Sa ye yūhure sinitu yequina pehe yūhure wio duamedi. ¹⁹Judio masa pehe yūhure wio dutierari. Sa yegu yūhū acayere judio masare yūhure tiquina yerire yahu duerapegūta “Ijipihitiyequina pūhtorore yūhū yerire poto yahu duaja yūhū”, ni sinii yūhū. Judio masa yūhure tiquina wio dueragū ihñagu “Romapū yahuro cahmene yūhure”, nii yūhū. ²⁰Sa yegu mūsare ahrire yahu duagu pijii. Cristo marine yūhdūoatiquiro judio masa tiquina cohteriquiro yere yūhū yahuri buhiri yūhū peresupū ijiaja. Sa yegu tire mūsare

yahugũ tuhũ pijii, nidi Pablo judio masa pũhtoare.

²¹ Tiquiro sa nigũ tuhoye tiquina pehe tiquiore yahuri:

—Judio masa mũhũre quti yahuye pũrine usũre ne ohoerari. Sa ye topũ ahtariquina gũhũ usũ acaye usũre mũhũ sa waharire yahuera tiri. Tiquina “Tiquiro ñano yeriquiro ijire” ni mũhũre yahuerari. ²² Tiquina sa yahuerapegũta mũhũ ya curuare ijipihtipopũ masa ñano tiquina yahuducugũ usũ masiaja. Sa masina mũhũ buheyere mũhũ yahugũ tuhũ duaja usũ, nidi tiquina tiquiore.

²³ Sa ni tuhasa, “Ape decopũ ijihna”, nidi tiquina. Ape decopũ Pablo mehna cahmecoa mũhtariquina yũhdũoro masa peyequina tiquiore ijipopũ wihiri. Ñami cjunogã Cohãcjũ tiquiore pũhtoro ijijere quehnoañe buheyere tiquiore buhe dũca, tee ñamipũ buhe duhuri. Cohãcjũ dutijere Moisepũre tiquiore cũrre, Cohãcjũ yere yahu mũhtariquina tiquina ojoari gũhũre buheri. Sa buhero, tiquinare Jesure masigũ ye duaro nimeri Pablo.

²⁴ Ihquẽquina tiquiore buherire cahmedi. Sa cahmepegũta apequina pehe tuhũ duerari. ²⁵ Sa ye tiquina basi pũa curua tu wa, wahaye tee nidi. Tiquina wahato pano Pablo Isaia tiquiore yahuducurire yahuri. Ohõ saha nidi tiquinare:

—Isaia Cohãcjũ yere yahu mũhtariquiro tiquiore yahuri ijirota ijire. Mari ñecusũmũa mũna iji turiayequinare yahuro taro Espĩritu

Santo Isaiare ohõ saha ni yahu ojoa dutiahye:

²⁶⁻²⁷ Ahrire ahriquinare yahugũ wahaya: “Dapu paca bũtina ijire mũsa. Sa yena yeere tuhũ duerare mũsa. Cahmo coperi susueyequina yero saha tuhũ duerare mũsa. Sa yena yeere tuhõepenata tuhosi mũsa. Mũsa sa ijierana quehnoano tuhõboaya mũsa. Sa yena quehnoañe pehere comesaboaya mũsa. Sa yegũ mũsare pecapũ wahaborinare yũhdũoboaya yũhũ”, nidi Cohãcjũ, ni ojoahye Isaia, nidi Pablo tiquinare.

²⁸ Tiquiro sa nidi bato Pablo yahu nemori:

—Ahrire masiña mũsa. Cohãcjũ ye buheyere masare tiquiore quehnoano yũhdũoyere judio masa ijieyequinare buhenatja usũ. Tiquina pehe tuhõeta, nidi Pablo judio masare.

²⁹ Tiquiro sa nigũ tuhoye judio masa tire tiquina basi tutuaro cahme dũse tini wia, wijiari.

³⁰ Pũa cũhma waro Pablo apequina wasori wũhũpũ, tiquiore ijijere wapa wapa yeati wũhũpũ ijiri. Topũ ijiro, ijipihtiyequina ti wũhũpũ wihiyequinare bucu-eye mehna piti cari tiquiore. ³¹ Sa yero tiquiore cuero marieno Cohãcjũ pũhtoro ijijere, mari pũhtoro Jesucristo ye gũhũre buhee tiri. Tiquiro sa buhegũ ne apequina tiquiore “Buheracãhña”, nieda tiri.

Romanos

Pablo Roma cjenare Jesu yequinare ojoa ohoahye

1 Yuhũ Pablo musare Roma cjanare ojoa ohoaja. Yuhũ Cohãcjũ cahãcjũ ijiaja. Sa yero quehnoañe buheyere buhe dutiro yuhũre cũri tiqiro.

²Ti buheyere quehnoañe buheyere panopũ Cohãcjũ “Yahugũ tũũ niaja”, nie tiahye. Tiquiro sa ni yahuriro sahata tiqiro yere yahu mũhtariquinare panopũ cjenare tiqiro yahuatire tiqiro ya pũpũ ojoa dutiahye. ³Ti buheyeta tiqiro macũnore yahuye ijire. Tiquiro masũno waro ijiro taro Davi mũnano panamino iji turiariquiro ijiahye tiqiro. ⁴Jesucristo mari pũhtoro Cohãcjũ macũno ñaÑe marieniquiro tiqiro ijiyere ohõ saha ihñoahye Cohãcjũ. Tiquiro yariari bato Cohãcjũ tutuaye mehna tiquiore masa wijiagũ yeahye. Sa yero Jesucristo potota Cohãcjũ macũno tiqiro ijiyere ihñoahye Cohãcjũ masare. ⁵Tiquirota usãre paja ihñano usãre tiqiro yere buhe dutiro ohori ijipihitiyequina Jesucristore wacũ tutua tiquina ño peotire. ⁶Sa yero mũa gũhũre Jesucristo yequina ijianare beseahye tiqiro.

⁷Musare, Cohãcjũ cahĩnare, Roma cjanare, tiqiro yequina ijianare yeri musare tiqiro. Musare ijipihitinare ahri pũre ojoa ohoaja. Sa yegũ Cohãcjũ mari Pacũ, mari pũhtoro Jesucristo mehna musare quehnoa dutiaja. Tiquina yedo-hoye mehna quehnoano ijiya mũa.

Pablo Romapũre ihñano waha duaro nimahye

⁸Ahrire yahu mũhtaũtja musare: Ijipihitiye macari cjẽna Jesucristore mũa wacũ tutuarire masa yahuri yuhũre. Tiquina sa ni yahugũ tuhogu

“Quehnoare”, niaja Cohãcjũre. Jesucristo yedohoro mehna sa ni sini basaja. Cohãcjũre sini basagũ musare sa sini basaducujaja. ⁹Yuhũre tiqiro dutigũ tiqiro macũno ye buheyere quehnoañe buheyere tutuaro buhegu tiqiro cahãcjũta ijiaja yuhũ. Sa yero musare Cohãcjũre yuhũ sa sini basaducugũ tiqiro masine. ¹⁰Sa sini basagũ Cohãcjũ cahmegũ yojopũ pũritare mũa cahapũ yuhũ ihñau wahatore siniaja. Yoari pje musare ihña duagu yuhũ wahatire cohteĩ ye cãmaja yuhũ. ¹¹Cohãcjũ yere musare buhe duaja Jesure mũa wacũ tutua nemoatire. Sa yegũ musare tutuaro ihña duaja yuhũ. ¹²Jesure wacũ tutuaja mari. Sa yegũ musare ihña duaja Jesure mari wacũ tutuaye mehna pũa peheri mari cahme bucuegũ yeatore.

¹³Yuhũ acaye, ahrire mũa masigũ cahmeaja. Quehnoañe buheyere yuhũ buheri bato apequina mũa acaye judio masa ijieyequina Jesure wacũ tutuari. Sa yegũ peye tahari mũa cahapũ waha duami apequina Jesure tiquina wacũ tutuariro sahata mũa mehna cjẽna gũhũ tiquina wacũ tutuatire. Sa waha duepegũta waha masiedũ yuhũ. ¹⁴Ijipihitiyequinare quehnoañe buheyere buhero ijiro nine yuhũre. Pecasãre, pohteri cjẽ gũhũre, masiÑequinare, masieÑequina gũhũre buheacjũ ijiita niaja yuhũ. ¹⁵Sa buheacjũ ijigũ musare Roma cjanare quehnoañe buheyere tutuaro buhe duaja.

Quehnoañe buheyere masa tuhoye Jesure wacũ tutua dũcare

¹⁶Quehnoañe buheyere tuhoye Jesure wacũ tutua dũcare masa. Sa yero ijipihitiyequinare Jesure wacũ tutuayequinare Cohãcjũ tutuaye mehna pecapũ wahaboriquinare yuhũdũore. Tiquina sa yuhũdũgũ masigũ ti buheyere

quehnoañe buheyere buhegu buoro yuhdueraja. Ti buheyere judio masa pehere buhe muhtari jiri Jesu gũhũ. Tiquina buheri bato judio masa ijieyequina gũhũre usã buhei. ¹⁷Ti buheye ohõ saha ni yahure: Jesure wacũ tutuayequinare “Quehnoañequina ijire”, ni, ihñare Cohãcjũ. Tiquirore wacũ tutua ducayequinare sata ni ihñare Cohãcjũ. Tiquiro sa ni ihñari bato tiquirore wacũ tutuaducure tiquina. Ahri panopũ tiquina ni ojoariro sahata ijire: “‘Quehnoañequina ijire’, tiquiro ni ihñañequina Cohãcjũre wacũ tutuayequinata ijire. Sa wacũ tutuaye, ijipihtiye decori Cohãcjũ mehna sa ijiducueta”, ni, ojoahye.

Masa tiquina ñañe yeri buhirire yahuahye Pablo

¹⁸Cohãcjũ ummusepũ ijiriquirore masa tiquina yuhduducarire, tiquina ñañe yeri gũhũre ihñano, tiquina sa yeri buhiri usuare. Tiquiro sa usarire masigũ yere tiquinare. Masa tiquina ñañe yeye mehna apequinare quehnoañe buheyere tuhoeragũ yere tiquina pehe. ¹⁹Tiquiro basi tiquiro ijieye tiyere masigũ yeahye Cohãcjũ. Tiquiro sa yegũ Cohãcjũre masigũ mijjoedare masare. ²⁰Cohãcjũ ummuse cjũno tiquiro ijiyere, tutuariquiro tiquiro ijieye gũhũre mari ihñedapegũta tiquiro basi tiquiro ijiyere marine masigũ yere tiquiro. Ahri yehpare tiquiro bajumehnedi bato ijipihtiye tiquiro bajumehnedire ihñañe “Cohãcjũ tiquiro yeri ijire ahri”, niñe, Cohãcjũ tiquiro ijieye tiyere masine masa. Sa ye masa Cohãcjũre masiepeta sa ñañene yeducuye, buhiri tire. “Muhũre masiedũ. Sa yegũ ñañene yei”, ni masisi Cohãcjũre. ²¹Sa ye Cohãcjũ tiquiro ijieye tiyere masiepeta tiquina tiquirore ño peerare. Sa ye tiquinare tiquiro quehnoano yeppegũta tiquina pehe

“Quehnoare”, niedare tiquirore. Sa tuho masieñequina ijieye, ñañe dihitare tuhoture tiquina. ²²“Tuho masina ijiaja”, niepeta tuho masieñequina wahare tiquina. ²³Sa wahaye Cohãcjũre sa ijiducuriquirore tiquina ño peerare. Sa ño peeraye, “Cohãcjũ ijire”, tiquina niñe queoye pehere ño peore. Mari masa yarianaja dihita ijiaja. Mari sa ijina mari ijiepegũta Cohãcjũre ño peoyequina pehe masa queoyere yere tiquina. Tiquina sa yeri bato ti queoye pehere ño peore tiquina. Sa ye tja minicjua queoyere, pinoa queoyere, wahiquina queoye gũhũre “Cohãcjũ ijire”, ni ño peo maca cãhre tiquina.

²⁴Tiquina sa yegũ ihñano “Tiquina esa tuharo ñañene yecũnahdo”, nino Cohãcjũ cohã cãri tiquinare. Tiquiro sa cohãri bato tiquina ña yuhduaro cahme yeducure tiquina basi. ²⁵Sa ye Cohãcjũ ye pehere cahmedaye, ni mehoñe pehere quehnoano tuhore tiquina. Cohãcjũ ye pehere ni mehoñe yero saha ijigũ yere tiquina. Potota Cohãcjũ warore ijipihtiyere yeriquirore ño peoducuro cahmene. Sata ijiahro. Tiquina pehe tiquirore ño peerare. Sa tiquirore ño peeraye, Cohãcjũ yeri pehere ño peore tiquina. Sata ijiahro.

²⁶Tiquina sa yeducugũ ihñano “Tiquina esa tuharo ñañene yecũnahdo”, nino Cohãcjũ cohã cãri tiquinare. Sa ye tiquina mehna cjẽna numia manũ tiyequina numia yero saha ijierare. Sa ye tiquina numia, numia sehsaro ñano yere tiquina paguri mehna. ²⁷Tiquina yero saha ijieyequina umma gũhũ tiquina esa tuharo ña yuhduaro yere tiquina paguri mehna. Sa ye tiquina basita ñano yeri buhiri tiquina paguri pehe ñano yuhdure.

²⁸Sa Cohãcjũre tiquina cahmedari buhiri, Cohãcjũ tiquinare cohãri. Tiquiro sa cohãgũ tiquina pehe ñano wacũducu, ñano yeducure. ²⁹Sa ye

tiquina tutuaro ñano yeducure. Ñañene tutuaro cahmeducuyequina, apequina yere tutuaro cahmeñequina, apequinare ñano yeducuyequina, apequina apee boro tiquina cuogũ ihña cooducuyequina, masare wejẽñequina, cahme duse tini wiayequina, ni mehoñequina, masare ihña tuhtiyequina, ñañe quiti dahreyequina,³⁰ apequina tiquina yerapegũta ñano ni yahu wajayequina, Cohãcjũre ihña tuhtiyequina, apequinare purino yuhtiyequina, “Usã pehe masi yuhduducaja”, ni tuhotuyequina, apequinare sa ni yahuyequina, apeye ñañene ye ducayequina, tiquina pacusumare yuhtiyequina,³¹ tuho masieñequina, tiquina nino sahata yeeyequina, masare ne cahieñequina, tiquina basi cahme pihopũri duhueyequina, ne paja ihñeñequina ijire tiquina.³² Sa ñano yeducuyequinare Cohãcjũ pecapũ cohãnota. Tiquiro sa cohãtire masiepetã tiquina ti ñañene sa yeducure. Sa ye apequina tiquinare ihña cũ tiquina yero saha ñano tiquina yegũ ihñañe, “Usã yero saha yere”, ni bucuere.

**Masare buhiri dahre dutiro
tire mehono marieno
potota yerota Cohãcjũ**

2 “Tiquina ña yuhduayequina ijire”, ni yahu wajaeracãhña apequinare. Musa gũhu tiquina yero saha yere. “Ñañene yeraja. Sa yena ñañe buhiri mariedaga”, ni masiedare musa. Sa yena ijina tiquinare yahu wajana ijina, musa basi buhiri dahre dutina niaga.² Sa yena ñañe yena ijiepenata musa yahu wajagũ musa gũhure Cohãcjũ buhiri dahrerota. Potota queoro tiquiro buhiri dahregũ masiaja mari.³ Apequinare “Buhiri tieta”, ni yahu wajana musa ijigũ musa gũhure buhiri dahrerota. Sa yena “Usãre buhiri dahresi”, ni tuhotuboaga musa. Ijierare.

Musa gũhure buhiri dahrerota tiquiro.⁴ Musa ñano yepegũta Cohãcjũ musare paja ihñano duita buhiri dahrerare. Sa yena “Cohãcjũ yuhũ mehna usuasi”, ni tuhotuboaga musa. Ijierare. Cohãcjũ musare paja ihñano, duita buhiri dahrerare musa ñañene bujua wigtigũ ihña duaro, tiquirore musa yuhtigũ cahmeno.⁵ Sa buhiri dahre dueraperota musa Cohãcjũre yuhti dueragũ, musa ñañe yerire bujua witieregũ, buhiri dahrerota musare. Buhiri dahre deco pano musare tiquiro buhiri dahreboriro yuhduoro ti deco waropure ñano musare buhiri dahrerota Cohãcjũ. Ni mehono marieno buhiri dahrerota.⁶ Sa yero ijipihtiyequinare tiquina ñano yeri buhiri buhiri dahrerota Cohãcjũ. Sa yero quehnoañene tiquina yeri wapa quehnoano yerota masare.⁷ Ihquẽquina quehnoañene yeducuyequina ijire. Tiquina quehnoañene ye duayequina, Cohãcjũre quehnoano bucuegũ ye duayequina, ijipihtiye decori Cohãcjũ mehna iji duayequina ijire. Tiquina pũritare decoripe tiquiro mehna ijigũ yerota Cohãcjũ.⁸ Apequina pehe tiquina yero saha ijierare. Tiquina esa tuharo yeeyequina ijire. Cohãcjũ yere cahmedare. Tiquina mehna Cohãcjũ tutuaro usarota.⁹ Ijipihtiyequina ñano yeriquina ñano yuhdueta. Judio masare sata waha muhtanota. Sa ye judio masa ijieyequina gũhure sata waharota.¹⁰ Ijipihtiyequina quehnoañene yeeyequina pehere Cohãcjũ “Quehnoare”, ninota. Sa ye masa tiquinare ño peota. Sa yero tiquinare quehnoano ijigũ yerota Cohãcjũ. Judio masare sata waha muhtanota. Sa ye judio masa ijieyequina gũhure sata waharota.¹¹ Cohãcjũ mari yerire ihñano queoro besere ijipitinare, ñana, quehnoana gũhure.¹² Apequina Cohãcjũ Moiserere tiquiro dutirire masieñequina tiquina

ijiepegūta ñañene tiquina yegū, buhiri dahrerota Cohācjū tiquina gūhure. Sa yero ti dutiyere cwoyequina ñañene tiquina yegū ti dutiyere tiquina yūhdūdūcari buhiri buhiri dahrerota Cohācjū. ¹³ Cohācjū dutiyere tuhoepeta yahtieyequinare “Quehnoañequina ijire ahriquina”, niedare Cohācjū. Tiquiro ye dutiyere yeyequina pehere “Quehnoañequina ijire”, ni ihñare tiquinare Cohācjū. ¹⁴ Judio masa ijieyequina Cohācjū Moiserere tiquiro cūri dutiye cwoerapeta, tiquina esa tuharo quehnoañene yeye, Cohācjū dutiyere yeye nine. Sa ye Moiserere tiquiro dutiyere ojoari pūre cwoerapeta tiquina tuhotuyepū tiquiro ye dutiyere cwoere. ¹⁵ Sa ye tiquiro ye dutiyere tiquina tuhotuyepū potota cwoere tiquina. Sa cwoye ñañene yeye, duita tiquina ñañe yerire masine tiquina. Sa yero ñañene yeriquiro “¿Dūhse ijire boro ñañene yeri yūhū?” ni tuhoture tiquiro. Sa yero quehnoañene tiquiro basi yeri gūhure masine tiquiro. ¹⁶ Sa ye Cohācjū Jesucristore tiquiro ohoati decopū masa tiquina yahu duerarire Jesucristo masi pehoru, tiquiro tiquinare beserota quehnoañequina, ñañequina gūhure. Sata tiquina yerire masidiquiro ijire, beserota tiquiro quehnoañe buheye ti nino sahata. Ti buheyeta ijire musare yūhū buheri.

Cohācjū Moiserere tiquiro dutirire yahuahye Pablo

¹⁷ Mūsa pehe judio masa ijina, Cohācjū Moiserere tiquiro dutiyere ño peona ijina, “Cohācjū yequina ijiaja”, ni tuhotumene mūsa. ¹⁸ Sa yena Cohācjū dutiyere masina ijina, tiquiro cahmeñene masine mūsa. Sa masina ijina, “Quehnoañene usā yeatire bese masiaja usā”, ni tuhotumene mūsa. ¹⁹ Sa ni tuhotuna ohō saha ni tuhotu nemore mūsa: “Apequinare ne

masieñequinare quehnoano masigū yeaja usā. Tiquinare usā buheragū ne Cohācjūre masiedaboaga tiquina. Sa ye ñañene duheraboaga”, ni tuhotumene mūsa. ²⁰ Sa yena “Tuho masieñequinare quehnoañene ye dutina, macanagā gūhure buhena ijiaja usā”, ni tuhotumene mūsa. Sa yena “Cohācjū dutiyere cwoena, poto ijire masi pehoaja usā”, ni tuhotumene mūsa. ²¹ ¿Sa yena apequinare buhena ijiepenata, dūhse yena mūsa pehe mūsa buheriro saha yerajari? ¿Apequinare yaque dutierapenata dūhsena mūsa pehe yaqueajari? ²² ¿Apequiro namono mehna ñano ye dutierapenata dūhsena mūsa pehe apequiro namono mehna ñano yeajari? “Cohācjū ijire”, tiquina niñe queoyere ihña yabina ijire mūsa. Sa ihña yabina ijina Cohācjū waro pehere ño peona ijimene mūsa. ¿Sa ño peona ijiepenata dūhsena tiquirore quehnoano ño peoerajari mūsa? ²³ “Cohācjū Moiserere tiquiro dutiyere cwoaja usā”, nina ijiepenata ti dutiyere yūhdūdūcare mūsa. Sa yūhdūdūcana Cohācjūre ño peoeragū yena niaga mūsa apequinare. ²⁴ Sata nine Cohācjū yere tiquina ojoari pūpū: “Cohācjū dutiyere mūsa yūhdūdūcari buhiri judio masa ijieyequina pehere Cohācjūre tiquina ñano yahuducugū yere mūsa judio masa”, ni ojoahye Cohācjū yere tiquina ojoari pūpū.

²⁵ “Cohācjū yequina ijiaja”, ni tuhoture ihquēquina judio masa cuhnucunū sohtoa cahserogāre yūhre nenohriquina. Cohācjū yere tiquina yegū judio masa tiquina ijigū quehnoarīne. Tiquiro yere tiquina yeragū judio masa tiquina ijieye tiye dūhseati ijierare. Yūhre nenohriquina tiquina ijieye tiye gūhū dūhseati ijierare. ²⁶ Sa yero judio masa ijieyequina cuhnucunū sohtoa cahserogāre yūhre nemehneñequina tiquina ijiepegūta,

Cohăcĵŭ dutiyere tiquina yegŭ ihñano “Yeequina masata ijire”, ni ihñare Cohăcĵŭ tiquinare. Judio masa pehere tiquiro sa ni ihñaboriro sahata judio masa ijieyequina pehere sa ni ihñare. ²⁷ Peyequina judio masa Cohăcĵŭ Moisere tiquiro dutiyere cuoepeta tire yerare tiquina. Sa ye apequina judio masa ijieyequina pehe cuhnuconŭ sohtoa cahserogăre yuhremehneñequina ijiepetata tiquiro dutiyere yere. Sa yeyequina ijiye judio masa tiquina ñano yerire masigŭ yeye nine. ²⁸ Yojopŭre judio masŭno waro tiquiro ijiyere yahutja masare. Tiquiro cuhnuconŭ sohtoa cahserogăre yuhre nenohrikiro ijieperota Cohăcĵŭre ño peoeraro, potota judio masŭno waro ijierare. ²⁹ Cohăcĵŭ yaquiro Espiritu Santore cuorikiro tiquirore yuhtiriuro tiquiro tjire judio masŭno waro. Sa yero tiquiro cuhnuconŭ sohtoa cahserogăre tiquiro yuhre ne cohăriro sahata tiquiro ñaŭe yerire duhure tiquiro. Tiquiro esa tuharo dutiyere yerikiro ijieraperota Espiritu Santo yedohoye mehna tiquiro ñaŭe yerire duhure. Sa ijirikirore “Quehnoariuro ijire”, ni ihñare Cohăcĵŭ pehe. Masa pehe tiquirore tiquina sa niedapegŭta, sa nine Cohăcĵŭ pehe.

3 ¿Yuhŭ sa nigŭ judio masa ijiye tiye ihyo waro ijiajari, musa tuhotugŭ? Ne ihyo waro ijiro niedare. ¿Cohăcĵŭ judio masare tiquiro dutiriro sahata tiquina pagurire cuhnuconŭ sohtoa cahserogăre tiquina yuhre ne cohăŭe ihyo waro ijiajari, musa tuhotugŭ? Ne ihyo waro ijiro niedare. ² Judio masa tiquina ijiye tiye ihyo waro ijierare. Cohăcĵŭ yere tiquina ojoari pŭre judio masare cŭ muhtahye. Sa ye judio masa tiquina ijigŭ quehnoarŭne tiquinare. ³ Sa ye ihquėquina judio masa Cohăcĵŭre tiquina tuhoerapegŭta tiquiro nidi ijirota ijire. Sa yero tiquiro ni

cŭriro sahata yerota tiquiro. ⁴ Sata ijire. Ijipihtiyequina masa ni mehoñequina tiquina ijiepegŭta Cohăcĵŭ pehe ne ni mehoedare. Panopŭ tiquiro yere yahu muhtariuro tiquiro ni ojoariro sahata ne ni mehoedare Cohăcĵŭ.

Poto nigŭ ijire muhu Cohăcĵŭ. Sa ye muhŭre masa ne “Queoro yahuducuerare”, ni yahusă masiedare, ni ojoahye panopŭre.

⁵ Ohŭ saha ni tuhotuboaga masa: “Mari ñaŭene yena Cohăcĵŭ quehnoañene tiquiro yerikiro ijigŭ masigŭ yeaja. Sa yero ñaŭene mari yegŭ quehnoarŭne. ¿Ti sa quehnoañene ijiepegŭta duhsero tiquiro mari ñaŭene yeri buhirire buhiri dahre maca cjări?” ni tuhotuboaga masa. Masa tiquina tuhotuboriro saha nigŭ niaja yuhŭ. ⁶ Sa ijierare. Mari ñaŭe yeri pehe quehnoañene ijigŭ Cohăcĵŭ mari ñaŭene yeri buhirire buhiri dahre masiedaboaga.

⁷ Masa pehe ni mehoñequina ijire. Cohăcĵŭ pehe ne ni mehoedare. Sa yena masa tiquina ni mehogŭ ihñana Cohăcĵŭ pehe ne ni mehoenikiro tiquiro ijigŭ quehnoano ihña masiaja mari. Sa ye masa ni mehoñe, Cohăcĵŭ tiquiro ni mehoenikiro tiquiro ijiyere ihñoŭe ni boaga tiquina. Sata ni tuhotumene ihquėquina. Sa ni tuhotuye ohŭ saha ni tuhotu nemomene tiquina: “Usă ni mehoñe mehna Cohăcĵŭ tiquiro ni mehoenikiro ijiyere ihñona niaja. Sa ihñona quehnoano yena niaja. Sa ye usă ni mehoñe quehnoarŭne. ¿Usă ni mehoñe quehnoañene ijiepegŭta duhse ijiro boro usă ni mehoeri buhirire usăre buhiri dahre maca căboari Cohăcĵŭ?” ni tuhotumene ihquėquina masa. ⁸ Sa ye ohŭ saha ni mehore ihquėquina usăre: “Ñano yena Cohăcĵŭ tiquiro quehnoariuro ijigŭ ihñona niaga. Sa yena ñano yeihna’, nidi Pablo gŭhŭ”, ni meho yahusăre usăre ihquėquina. Tiquina sa nidi buhiri tiquinare Cohăcĵŭ

buhiri dahrerota. Sata yero cahmene tiquinare.

Ijipihitina buhiri tina ijiaja mari

⁹ ¿Sa ye dahse ni tuhotuajari masa? ¿Mari judio masa apequina yuhduoro quehnoana ijiajari mari? Ijieraja mari. Judio masa, judio masa ijiena gũhũ ijipihitina buhiri tina ijiaja mari. Sata ijire ijipihitiyequinare yuhũ buheriro sahata. ¹⁰ Panopũ tiqiro ni ojoariro sahata ijire ti: Ohõ saha ni ojoahye:

Ne ihcãquiro masuno quehnoariquiro mariedare. ¹¹ Ijipihitiyequina masa tuho dueyequina dihita ijire. Sa ye ijipihitiyequina masa ne Cohãcjũre wacũ peerare. ¹² Sa ye tiquina Cohãcjũ yere cohãñe, ijipihitiyequina ñañene yeyequina wahari. Ne ihcãquiro quehnoañene yeriquiro mariedare. ¹³ Tiquina duseri masa coperi tiquina põo docoro yero saha ijire. Tiquina yahuducugũ, masa coperi wĩ wijiario saha ni mehoñe dihita tiquina duserire wijiare. Sa yahuducuye aña dusero tiqiro nima purĩñe wijiario saha purĩno tiquina yahuducuye wijiare tiquina duserire. ¹⁴ Sa ye tiquina apequinare ñano yahuducuyequina purĩno yahuducuyequina ijire. ¹⁵ Sa ye usua ñañequina duita masare wejẽñequina ijire. ¹⁶ Sa ye noho tiquina waharopũ tiquina masare ñano ye, ñano yuhdugũ yere tiquinare. ¹⁷ Sa ye apequina masa mehna tiquina quehnoano ijierare. ¹⁸ Sa ye Cohãcjũre ne ño peerare, ni ojoahye panopũre.

¹⁹⁻²⁰ Cohãcjũ Moiserere tiqiro dutiyere marine judio masare ohoahye tiqiro dutiyere ijipihitina mari ye pehoatire. Ti dutiyere cuoepeta, tire yeraye, “Ñañe buhiri mariedare usãre”, ni masiedare masa. Sa ye tiquina ijipihitiro cjẽna Cohãcjũ tiqiro buhiri dahrenohatiquina

tiquina ijigũ, masieta tiquina basi. Sa ye ñañequina tiquina ijiyere masiñe, “Quehnoana ijiaja usã”, ni masiedare Cohãcjũre. Cohãcjũ tiqiro ye dutiye pehere ne masa yerare. Sa ye tiquina ñañequina ijiyere tiqiro dutiye pehe masigũ yere tiquinare. Sa masiñe ohõ saha ni masiedare tiquina: “Cohãcjũ dutiyere ye pehou. Sa yero Cohãcjũ usãre ‘Quehnoañequina ijire’, ni ihñare”, ne ni masiedare masa.

Cohãcjũre quehnoano mari wacũ tutuana tiqiro yequina wahaja mari

²¹ Sa ye Cohãcjũ Moiserere tiqiro dutiye, tiqiro yere yahu muhtariquina tiquina ojoari gũhũ Cohãcjũ masare tiquina ñañe yerire tiqiro borire yahuahye. Tiquiro dutiye sa yahuepegũta yojopũta Moiserere tiqiro dutiri marieno masare tiquina ñañe yerire tiqiro borire yahure marine Cohãcjũ. ²² Ijipihitiyequina Jesucristore wacũ tutuayequinare, tiqirore tuhoyequinare “Quehnoañequina ijire”, ni ihñare Cohãcjũ. Cohãcjũ ijipihitiyequinare ihcãno saha yeriquiro ijire. ²³ Mari ijipihitina ñañene yerina ijiaja. Sa yena Cohãcjũ tiqiro cahmediro sahata ne yerũ. ²⁴ Mari sa yerapegũta mari Pacũ marine tiqiro paja ihñagũ mari ñañe yerire Jesucristo pehe bore. Tiquiro sa bogũ “Quehnoana ijire”, ni ihñare Cohãcjũ marine Jesure wacũ tutuanare. Mari esa tuharo ye dutiro marieno Jesu yedohoro mehna mari ñañe yerire bore. ²⁵ Panopũ cjẽna tiquina ñañe yerire ihñano Cohãcjũ duita buhiri dahrerahye tiquinare. Sa buhiri dahreraro tiquina ñañe yerire ihyo warota sa tuhutu cãno niedahye. Came tiqiro Jesucristore ohori jiri mari ñañe buhiri yariatiquirore tiqiro diire cohãtiqirore. Jesucristore mari wacũ tutuagũ Cohãcjũ pehe mari ñañe yerire borota. Sa yero tiqiro nidiro

sahata yeriquiro tiquiro ijyere masigũ yero niahye. ²⁶ Sa yero yojopũre tiquiro nidiro saha yeriquiro tiquiro ijyere masa tiquina masigũ cahmene tiquiro. Sa yero Jesure wacũ tutuayequinare quehnoañequina tiquiro yerire tiquina masigũ cahmene Cohãcjũ. Tiquiro sa yerire tiquina masiatire tiquiro macunore mari ñañe buhirire yariatiquirore ohori jiri.

²⁷ ¿Yojopũre “Quehnoana ijiaja mari”, ni masiagari mari, musa tuhogũ? Tire ne ni masiedaja mari. ¿Dũhsena tire ni masiedagari mari? ¿Cohãcjũ tiquiro dutiyere yena, “Quehnoana ijiaja”, ni masiboari mari? Ijierare. Ti gũhũre ni masiedaja mari. Mari sa ni masiedapegũta Jesure mari wacũ tutuagũ “Quehnoana ijire”, ni ihñanota marine Cohãcjũ. ²⁸ Ohõ saha masiaja mari: Jesure mari wacũ tutuagũ ihñano marine ihña coare Cohãcjũ. Sa yero marine “Quehnoana ijire”, ni ihñare tiquiro. Tiquiro ye dutiyere mari yeri wapa sa ni ihñedare. Tiquirore mari wacũ tutuagũ sa ni ihñare.

²⁹ Cohãcjũ judio masa pũtoro dihita ijierare. Judio masa ijyeyequina pũtoro gũhũ ijire tiquiro. ³⁰ Sa yero Cohãcjũ ihcãquirola ijiro, ijipihtiyequina pũtoro ijire. Sa ijiriquiro ijiro judio masa Jesure tiquina wacũ tutuagũ tiquinare “Quehnoañequina ijire”, ni ihñanota. Sa yero judio masa ijyeyequina gũhũ Jesure tiquina wacũ tutuagũ tiquina gũhũre “Quehnoañequina ijire”, ni ihñanota Cohãcjũ. ³¹ ¿Sa yena Jesure wacũ tutuana Cohãcjũ Moiserere tiquiro dutiyere cohãna niboari mari? Cohãedaja mari tire. Jesure wacũ tutuana, Cohãcjũ dutiyere yena niaja mari.

Abrahã Cohãcjũre tiquiro wacũ tutuarire yahuahye Pablo

4 Mari ñecũ mũnanano iji muhtariquiropũre Abrahã

mũnanore Cohãcjũ ohõ saha yeahye: ² Abrahã quehnoano tiquiro yepegũta “Quehnoariquiropũre ijire”, ni ihñedarĩahye Cohãcjũ tiquirore. Sa yero quehnoano yeperota ñariquiropũre ijinino “Yũhũ pũrita quehnoagũ ijiaja”, ni masiedahye Abrahã, Cohãcjũ ihñagũ. ³ Cohãcjũ yere tiquina ojoari pũ ohõ saha nine: “Abrahã Cohãcjũ tiquiro nidire quehnoano tuhogũ, Cohãcjũre tiquiro wacũ tutuagũ Cohãcjũ tiquirore ‘Potota quehnoariquiropũre ijire’, ni, ihñahye”, ni ojoahye tiquiro yere tiquina ojoari pũpũ. ⁴ Pũtoro dahrayequinare wapa yero, ihyo waro tiquiro paja ihñañe mehna wapa yero niedare. Tiquina dahrari wapa tiquinare wapa yero nine. ⁵ Cohãcjũre wacũ tutuayequina pehere dahrayequinare tiquiro wapa yero saha yerare Cohãcjũ. Cohãcjũre wacũ tutuariquiropũre “Quehnoariquiropũre ijire”, ni ihñare Cohãcjũ. Tiquiro sa ni ihñagũ ti quehnoañe tiquiro yeri wapa ijierare. Cohãcjũ pehe tiquirore cahmeñequinare quehnoañequina wahagũ yere. Sa yero masũno Cohãcjũre tiquiro wacũ tutuagũ ihñano “Quehnoariquiropũre ijire”, ni ihñare Cohãcjũ tiquirore. ⁶ Sata niahye panopũ cjũno Davi mũnanano. Masũno quehnoano tiquiro yepegũta Cohãcjũ pehe ihña coeranine. Cohãcjũre tiquiro wacũ tutuagũ ihñano Cohãcjũ ihña coare. Sa yero tiquirore “Quehnoariquiropũre ijire”, ni ihñare. Tiquiro sa ni ihñanohriquiropũre masũno pehe tiquiro bucuyere yahuahye Davi mũnanano. Ohõ saha niahye:

⁷ Tiquina ñañe yerire tiquiro bonohriquiropũre pehe tutuaro bucuere. ⁸ “Quehnoañequina ijire. Tiquina ñañe yerire wacũsi yũhũ”, Cohãcjũ sa ninohriquiropũre tutuaro bucuere, niahye Davi mũnanano.

⁹ ¿Judio masa tiquina cuhnucunũ sohtoa cahserogãre yũhre nenohriquiropũre dihitare tiquina ñañe yerire boyari

Cohăcĵŭ? Ijierare. Judio masa ijieyequina yŭhre nemehneŭequina gŭhŭre tiquina ņaŭe yerire bore tiqiro. Pari turi Abrahăre wacŭŭna masa. Tiquiro Cohăcĵŭre wacŭ tutuagŭ ihŭano “Quehnoariqiro ijire”, ni ihŭahye Cohăcĵŭ. ¹⁰¿Dŭhse ijigŭ sa yeari Abrahă, masa tŭhotugŭ? Tiquiro cuhnucunŭ sohtoa cahserogăre tiqiro yŭhre neato panopŭta tiqirore “Quehnoariqiro ijire”, ni ihŭahye Cohăcĵŭ. Sa yero yŭhre nenohno, tiqiro ņaŭe yerire bo tuhasanohriquiropŭ yŭhre nenohahye. ¹¹Sa yero duita Cohăcĵŭre wacŭ tutua mŭhtahye Abrahă. Tiquiro sa wacŭ tutuagŭ ihŭano “Quehnoariqiro ijire”, ni ihŭahye Cohăcĵŭ tiqirore. Sa tiqiro wacŭ tutuayere, Cohăcĵŭ yaqiro tiqiro ijiyere tiqiro ihŭoatore Cohăcĵŭ tiqirore cuhnucunŭ sohtoa cahserogăre yŭhre ne dutiahye. Sa yero Abrahă tiqiro yŭhreato pano Cohăcĵŭ pehe “Quehnoariqiro ijire”, ni ihŭa tuhasahye tiqirore. Tiquiro yŭhre neato pano tiqiro sa ihŭariro saha ijipihtiyequina Cohăcĵŭre wacŭ tutuayequinare judio masa ijieyequina yŭhremehneŭequinare “Quehnoaŭequina ijire”, ni ihŭare Cohăcĵŭ. Tiquiro sa ni ihŭaŭequina tiquina ijigŭ Abrahă tiquina ņecŭno mŭnano waro ijiriro saha wahare. ¹²Tiquina yero sahata judio masa, yŭhrenohriquina Cohăcĵŭre tiquina wacŭ tutuagŭ tiquina ņecŭno mŭnano poto ijie tiahye Abrahă. Tiquiro yŭhreato pano Cohăcĵŭre wacŭ tutuahye. Sa ye tiqiro yero saha wacŭ tutuayequina judio masa Abrahă panamena iji turiayequina ijire.

**Cohăcĵŭ Abrahăre tiqiro ni cŭrire
“Poto tĵire”, niahye Abrahă**

¹³Panopŭ ohŭ saha niahye Cohăcĵŭ Abrahăre. “Ahri yehpare muhŭre, muhu

panamena iji turiayequinapŭ gŭhŭre ohoutja”, ni, cŭahye Cohăcĵŭ Abrahăre. Ti dutiyere tiqiro quehnoano yeri wapa sa niedahye Cohăcĵŭ tiqirore. Abrahă Cohăcĵŭre tiqiro wacŭ tutuari wapa pehere sa niahye Cohăcĵŭ tiqirore, “Quehnoariqiro ijire”, tiqirore tiqiro ni ihŭari bato. ¹⁴“Cohăcĵŭ Moiserere tiqiro cŭri dutiye dihitare yero cahmene”, nine judio masa. Sa niŭequina Cohăcĵŭre wacŭ tutuaro marieno ahri yehpa ijipihtiore ne duare. Wacŭ tutuaro marieno tiquina negŭ mari pehe Cohăcĵŭre mari wacŭ tutuaye dŭhseati ijieraboaya. Sa yero Cohăcĵŭ marine tiqiro ni cŭri dŭhseati ijieraboaya. ¹⁵Moiserere tiqiro cŭri dutiye pehere yerare masa. Sa ye ti dutiyere tiquina yerari buhiri ahri yehpare tiquinare neno basioerare. Sa yero ti dutiyere tiquina yŭhdŭdŭcari buhiri masare buhiri dahrerota Cohăcĵŭ. Sa ye ti dutiye mariedagŭ ti dutiyere yŭhdŭdŭcaro gŭhŭ mariedaboaya.

¹⁶Sa ye Cohăcĵŭre wacŭ tutuayequina dihita tiqiro ohoatire neeta. Abrahă Cohăcĵŭre wacŭ tutuahye. Sa yero ijipihtiyequina tiqiro yero saha Cohăcĵŭre wacŭ tutuayequina tiquina ņecŭno poto yero saha tojoare Abrahă. Sa yero “Ahrire musare ohoutja”, Cohăcĵŭ nino ijipihtiyequinare tiqirore wacŭ tutuayequinare nino niahye. Sa ye Cohăcĵŭ Moiserere tiqiro dutirire yeyequina Cohăcĵŭre wacŭ tutuayequina Cohăcĵŭ ohoatire neeta. Tiquina dihita nesi. Ijipihtiyequina Abrahă yero saha Cohăcĵŭre wacŭ tutuayequina gŭhŭ tiquinare tiqiro ohoatire neeta. ¹⁷Tire Abrahăre tiqiro nidiro sahata ojoahye panopŭre: “‘Peye macari cĵena tiquina ņecŭno ijiaĵŭre cŭu muhŭre’, ni cŭahye Cohăcĵŭ Abrahăre”, ni ojoahye panopŭ. Sa yero tiqiro Cohăcĵŭre wacŭ tutuahye. Sa ye tiqiro yero saha

mari wacū tutuagū mari ñecu ijigū yeahye Cohācjū tiquirore. Cohācjū pehe yariariquinare masoriquiro, ijipihtiyequinare bajumehnediquiro ijire. Sa yero ijipihtiyere, yojopære mariedagū gūhure bajumehneatiquiro ijire.

¹⁸“Peye macari cjēna muhu panamena iji turiayequina ijeta”, Cohācjū tiquiro sa nigū Abrahā pehe pohna mariediquiro ijieperota, “Ijirota ijire”, ni tūhotuahye. ¹⁹Sa yero cien cūh-mari cuoriquiro ijieperota pohna dahre masieniquiro ijieperota Sara tiquiro namono ne pohna mariedicoro ticoro ijiepegūta “Pohna ti masiedaja usā”, ni tūhotuerahye Abrahā. Sa yero Cohācjū tiquiro ni cūrire “Ijirota ijire”, niahye Abrahā. ²⁰“Tiquiro nidiro sahata yeraboaga”, ne ni tūhotuerahye Abrahā. Sa yero tiquiro Cohācjū cūrire quehnoano tūhoahye. Sa niñene tūhotjiāno “Cohācjū tutuariquiro ijire”, ni ño peoro niahye. Sa yero Cohācjūre wacū tutua nemoahye tiquiro. ²¹“Cohācjū tiquiro nidiro sahata quehnoano ye masine”, ni tūhotu quehnoano masiahye Abrahā. ²²Tiquiro sa masigū Cohācjūre tiquiro wacū tutuagū Cohācjū pehe “Quehnoariquiro ijire”, ni ihñahye Abrahāre. Sata ni ojoahye Cohācjū yere tiquina ojoari pūpū.

²³Sa ye Abrahā dihitare sa ni ojoerahye. ²⁴Tire mari masiatire mari gūhure sa ni ojoahye. Sa yero Cohācjūre mari wacū tutuagū “Quehnoana ijire”, ni ihñanota mari gūhure Cohācjū. Tiquiro pūrita mari puhtoro Jesu tiquiro yariagū masori jiri tiquirore. ²⁵Jesu pehe mari ñañe buhiri yariari jiri. Tiquiro yariari bato masa wijiari jiri tiquiro Cohācjū marine “Quehnoana ijire”, tiquiro ni ihñatire.

“Quehnoana ijire”, Cohācjū ni ihñagū ohō saha waharota marine

5 Jesucristore mari wacū tutuagū ihñano “Quehnoana ijire”, ni ihñare marine Cohācjū. Tiquiro sa ni ihñagū Cohācjū mehna cjāna marine ijigū yere mari puhtoro Jesucristo. ²Sa yena mari tiquirore wacū tutuagū ihñano Cohācjū marine cahino, pecapū wahaborinare yūhdūori tiquiro mehna mari ijiato saha. Cohācjū pūrita quehnoa yūhduariquiro ijire. Sa yero tiquiro yero saha ijigū yerota marine tiquiro. Tiquiro sa yeatire quehnoano masiaja mari. Sa yena bucueaja. ³Mari ñano yūhdūna gūhū bucueaja mari. Ñano yūhdūna, tire dūca cjā mari. Sa dūca cāna, ñano yūhdūepenata quehnoano Cohācjūre wacū tutuana wahaja mari. Sa yena Cohācjū yere duhueraja mari. ⁴Mari sa yegū ihñano “Quehnoare”, ninota Cohācjū marine. Tiquiro sa nigū marine tiquiro yūhdūoatire quehnoano masiaja mari. ⁵Sa yero Cohācjū marine tiquiro yaquiro Espiritu Santore ohori mari mehna ijiatiquirore. Sa yero Espiritu Santo pehe mari mehna ijiro Cohācjū marine tiquiro sa cahīducuyere masigū yere. Tiquiro sa masigū yegū marine tiquiro yūhdūoati quehnoano waro ijiro nine. Potota yūhdūnata mari.

⁶Sa yero mari ñañe yerire mari basi mari yūhdūo masiedagū tiquiro queoriro esagū mari ñañe buhirire Cristo yariahye. ⁷Quehnoañe dihitare yeriquirore yūhdūoro taro apequiro yariaboaga ape taha yero. ⁸Mari pehe ñana mari ijinipegūta marine yūhdūoro taro Cristo yariahye. Tiquiro sa yegū Cohācjū marine tiquiro tutuaro cahīñene masiaja mari. ⁹Mari ye buhirire tiquiro sa yariagū tiquiro dii wijiagū Cohācjū pehe marine “Quehnoana ijire”, ni ihñare. Tiquiro sa ni ihñari bato yojopū pehere marine

pecapũ wahaborinare yũhdũorota Jesu. “Quehnoana ijire”, tiqiro niato pano marine yũhdũoranidi. Yojobũ pehere marine Cohãcjũ yequina tiqiro yeri bato marine buhiri dahresi pecapũ Cohãcjũ. ¹⁰Sa yena Cohãcjũre ihña tuhtina mari ijiniepegũta tiqiro macũno yariaro, mari ñañe yerire cohãri. Sa cohãno Cohãcjũre mari mehna usueragũ yeri tiqiro. Sa yena tiqiro yequina wahaja mari. Yojobũ pũritare ti yũhdũo cjũno yerota marine. Tiqiro yequina mari ijigũ Jesu tiqiro masa mũjari mehna, marine pecapũ wahaborinare quehnoano yũhdũorota tiqiro. ¹¹Camepũ mari yũhdũatire bucueaja. Yojobũre ahri gũhũre bucueaja. Mari pũhtoro Jesucristo mari ñañe buhirire tiqiro yariari bato Cohãcjũ yequina ijiaja mari. Sa yena bucueaja.

Adãre, Cristore yahuahye Pablo Roma cjẽnare

¹²Adãn tiqiro ñañene yeri bato ahri yehpare ñañe iji dũcahye. Ñañe iji dũcagũ masa yaria dũcahye. Ijipihitina mari ñañene yeaja. Sa yena ijipihitina ñana mari ijiri buhiri yari-aja. ¹³Cohãcjũ tiqiro dutiyere Moiseretiqiro cũato pano potota ahri yehpa cjẽna ñañene yee tiahye. Tiquina sa yepegũta ti dutiye mariedagũ ti dutiyere tiquina yũhdũdũcari buhiri buhiri dahre masiedahye. ¹⁴Tiqiro sa buhiri dahre masiedapegũta Adãn gũhũ tiqiro bato ijieyequina gũhũ dutiye mariedapegũta yarie tiahye. Moiseretiqiro ijiato pano dutiye mariedapegũta masa yarie tiahye. Apequina ñañe yeye Adãn tiqiro ñano yeriro saha waro yera timahye. Sa ijiepetatiquina gũhũ yarie tiahye. Sa yero Adãn ñañene tiqiro ye dũcariro saha yoari batopũ ahri yehpapũ ahtariqiro quehnoañene ye dũcari jiri.

¹⁵Adãn tiqiro yũhdũdũcari Cohãcjũ masare tiqiro paja ihñañe yero saha ijierare. Cohãcjũ tiqiro paja ihñañe pehe quehnoa yũhdũare. Adãn ihcãquirola ijieperota ñañene tiqiro ye dũcari buhiri peyequina masa yarie tiahye. Cohãcjũ pehe marine paja ihñano, Jesucristore ohori jiri. Sa yero tiqiro ihcãquirola ijiriqiro pecapũ wahaboriqinare masare peyequinare yũhdũore. ¹⁶Sa yero Cohãcjũ masare tiqiro paja ihñañe Adãn tiqiro yũhdũdũcari yero saha ijierare. Adãn pehe ihcãquirola ijiriqiro ñañene tiqiro yeri buhiri ijipihtieyquina masa buhiri tiyequina ijire. Sa tiquina buhiri tiyequina ijiepegũta masa pajiro ñañene tiquina yepegũta yojobũre masare paja ihñano Cohãcjũ tiquina ñañene bore. Sa boro “Quehnoañequina ijire”, ni ihñare tiqiro tiquinare. ¹⁷Adãn ihcãquirola ijiriqiro ñañene ye dũcagũ ijipihtieyquina masa yariaducure. Ti poto tjire. Sa ijiepegũta ahri pehere bucuenata mari. Yojobũre Cohãcjũ masare paja ihñano Jesucristo ihcãquirola ijiriqiro tiqiro yariari mehna tiquina ñañene boro, tiquinare “Quehnoañequina ijire”, ni ihñare. Sa ye ijipihtieyquina tiqiro sa ni ihñañequina uhmũsepu Cristo mehna pũhtoa ijietã.

¹⁸Ihcãquirola Adãn ñañene ye dũcagũ ijipihtieyquina ñañene ye dũcahye. Tiquina sa yegũ Cohãcjũ buhiri dahrerota tiquinare. Apeqiro Jesu pehe quehnoañene tiqiro yegũ ijipihtieyquina tiquina ñañene bonohriquina iji masine. Ñañene tiqiro bonohriquina tiquina ijigũ “Quehnoañequina ijire”, ni ihñanota tiquinare Cohãcjũ. Sa ye ijipihtiey decori tiqiro mehna ijiducuetatiquina. ¹⁹Ihcãquirola Adãn Cohãcjũre yũhdũdũcahye. Tiqiro sa yegũ peyequina masa ñano yeyequina iji

dɔcahye. Sa yero apequiro Jesu pehe Cohăcjure yuhtiahye. Tiquiro sa yegũ peyequina masa tiquina ñaňe yerire bonohriquina wahahye. Tiquina sa wahagũ “Quehnoaňequina ijire”, ni ihňahye Cohăcjũ tiquinare.

²⁰ Cohăcjũ dutiyere Moiserere cũahye ijipihtiyequina masa tiquina ñaňene tiquina quehnoano masiatire. Sa ye masa tiquina ñaňene masiňe, ti yuħduoro Cohăcjũ tiquinare tutuaro tiquiro cahĩňene masieta. Tiquiro marine cahĩ yuħduare. ²¹ Tiquina ñaňene tiquina yeri buhirire masa yariatiquina ijire. Sa ye pecapũ wahaeta. Cohăcjũ mari Pacũ pehe masare cahĩ yuħduare. Tiquiro sa tutuaro cahĩgũ mari puħtoro Jesucristore tiquiro ohogũ tiquiro pehe masare quehnoaňequina wahagũ yere. Sa ye tiquinare “Quehnoaňequina ijire”, Cohăcjũ tiquiro ni ihňagũ tiquina ijipihtiye decori tiquiro mehna sa ijiducueta.

Yariariquina muna tiquina ñaňene yerariro saha Cristo yequina gũhu ñaňene yeducuerare

6 ¿Duhse yenatari mari vojopure, masa tuhotugũ? ¿Cohăcjure marine cahĩ nemo duti duana ñaňene ye nemoboagari mari? ² Ijierare. Ñaňene yeracũhna mari. Yariariquina muna ñaňene tiquina yerariro saha Cristo yequina ijina mari gũhure ñaňene yeraro cahmene. ³ Sa ye Jesu yequina mari ijiyere masa tiquina masiatire aco mehna wame yeri marine apequina. Jesu mari ñaňe yeri buhiri yariari jiri. Sa yena tiquiro yequina ijina, mari ñaňe yerire ye dueru. Sa yena duhuu. Tiquiro mari ñaňe buhiri yariari jiri. ⁴ Sa yena Cristo pagure masa copepũ tiquina ya cohãriro sahata mari ñaňe yerire duhuaaja. Sa yena mari Pacũ tiquiro tutuaye mehna Cristo tiquiro

masa mujariro saha mari gũhu tiquiro tutuaye mehna quehnoaňe pehere comesaja. Sa yena quehnoana wahaja.

⁵ Sa yena Cristo yequina ijina Cristo yariaro ahri yehpa cjã pagure tiquiro cohãriro saha mari gũhu yariariquina tiquina duhuriro saha mari ñaňe yerire duhuu. Sa yena Cristo yequina ijina tiquiro masa mujariro sahata mari gũhu quehnoana ijinata. Ti poto tjire. ⁶ Cristo yequina iji ducana tiquiro mehna yariariquina yero saha wahau pari turi mari ñaňene yerato saha. Sa waharina ijina ñaňene yeducu nemosi mari. Tire mari masiaja. ⁷ Yariariquiro munanopũ ñaňene ye nemoedare. ⁸ Cristo mehna yariariquina yero saha ijina, tiquiro masa mujariro sahata mari gũhu quehnoana ijinata. “Ti poto tjire”, ni tuhotuaja mari. ⁹ Cristo tiquiro yaria masa mujari bato ne pari turi yariasi. Apequiro tiquirore pari turi yariagũ ye masiedare. Tire mari masiaja. ¹⁰ Sa yero Cristo ihcã taha yariaro, masa tiquina ñaňe yerire cohãno taro yariahye. Tiquiro catiriquiro ijiro mari Pacũ tiquiro cahmeno sahata yeducuatiquiro ijire tiquiro. ¹¹ Tiquiro yero sahata masa gũhu ohõ saha ni tuhotuya: “Yariariquina muna tiquina yeraro saha mari gũhu ñaňene yeraja. Jesu yequina ijina mari Pacũ tiquiro cahmeno sahata yeanaja ijina niaja mari gũhu”, ni tuhotuya masa.

¹² Sa yena masa yarianaja ijina ñaňene yeducueracãhña. Sa yena masa ñaňe ye duayere tutuaro cahmepenata tire sa tuhotu cãhña. ¹³ Ñaňene yeracãhña. Pecapũ wahaborina Jesu tiquiro yuħduonohrina ijire masa. Tiquiro sa yenohrina ijina Cohăcjũ cahmeňe dihitare yeya masa. Sa yena quehnoaňene yeya masa. ¹⁴ Vojopure Cohăcjũ Moiserere tiquiro dutiye mehna marine dutierare. Cohăcjũ marine cahĩno tiquiro pehe marine dutire. Sa

yena tiquiro yedohoro mehna ñañene ye duasi mari.

**Musa ñañene yeducugū ti ñañe
musa puhtoro yero saha ijire**

¹⁵ ¿Yuhū sa nigū duhse ni tuhotuajari musa? ¿Cohācjū pehere yuhtianaja ijina Moisere tiquiro dutiyere yuhtianaja ijierana, ñañene yeducuboagari mari? Ijierare. Yeducusi. ¹⁶ ¿Ahrire masiedajari musa? Musa quehnoano yuhtiriquiro musa puhtoro ijire. Sa yena tiquiro cahacjana ijire musa. Musa sa yuhti musa puhtoro tiro sahata ñañene yeducuna musa ijigū ti ñañe musa puhtoro yero saha ijire. Sa yena ñañene duhu masiedare musa. Sa yena ijina pecapū wahanaja ijire musa. Cohācjūre quehnoano ño peona ijina tiquiro cahacjana ijire musa. Sa yena tiquiro yequina quehnoana ijire musa. ¿Tire masiedajari musa? ¹⁷ Panopū ñañene yeducuna musa ijigū ti ñañe musa puhtoro yero saha ijimedi. Yojoḡū pehere quehnoañe buheyere tuhona Jesure wacū tutuana Cohācjūre quehnoano ño peona wahari musa. Tire masigū “Quehnoare”, naja Cohācjūre. ¹⁸ Sa wahana yojoḡūre ñañe ti dutiro saha yerare musa. Sa yena Cohācjū cahacjana ijina quehnoañe pehere yere musa. ¹⁹ Cahacjana puhtoare tiquina quehnoano ño peoyere masi pehore musa. Sa yegū ti musa masidi mehna queoye mehna buhei musare “Ahri buheyere musa esa tuharo tuhoeraboaga”, nigū. Panopū ñañene yeducuna ijimedi musa. Musa sa yeducuriro sahata yojoḡū pehere quehnoañene yeducuna ijia musa. Sa yena Cohācjū cahmeñe dihitare yenata musa.

²⁰ Panopū ñañe dihitare yerina ijina, quehnoañe pehere yera tiri musa. ²¹ ¿Ti pjeḡūre ñañe dihitare yena yabere wapatarari musa? Ti musa ñañe yerire wacūna yojoḡūre bue tiaga musa. Ti ñañene

musa yeri buhiri pecapū wahaboaya musa. Sa yena ñañene yena ne wapataerare musa. ²² Yojoḡū pehere musa ñañe yerire duhuna Cohācjū cahacjana wahari musa. Sa yena Cohācjū cahmeñe dihitare yena ijinata. Sa yena ijipihtiye decori Cohācjū mehna ijinata. ²³ Ñañene mari yeri buhiri pecapū wahanaja ijia ijipihtina mari. Mari sa ijiepegūta mari puhtoro Jesucristore mari wacū tutuagū ihñano, ijipihtiye decori tiquiro mehna marine ijiducugū yerota. Mari sa ijiducuatire sa oho cānota.

**Cohācjū Moisere tiquiro ohori
dutyere yahu nemoahye Pablo**

7 Yuhū acaye, Cohācjū Moisere tiquiro dutirire quehnoano masine musa. Masūno tiquiro catinigū ti dutyere yuhduduca dutierare. Tiquiro yariari bato pūritare ti dutyere yero basioerare. Ti gūhure masine musa. ² Ohō saha ijire: Numinore ticoro manūno mehna dihita iji dutire Cohācjū Moisere tiquiro dutiri pehe. Tiquiro sa dutiepegūta ticoro manūno yariari bato ticoro pehe apequirore manū ti masine. Ticoro ti dutiro mehna iji nemoedare. Ohō saha ni yahure ti dutye. ³ Sa yero ticoro manūno tiquiro catiepegūta ticoro apequirore manū tiro, ñano yero nine ticoro. Sa ijieperota ticoro manūno yariari batopū apequirore manū tiro, Cohācjū dutyere yuhduducaerare ticoro sa yericoro. Sa yero ñano yericoro ijierare ticoro.

⁴ Musa gūhu yuhū acaye Jesu yequina wahana, dutyere musa yeri wapa tiquiro yequina wahaerare musa. Sa yena yariariquina mūna dutye mehna tiquina ijieraro saha musa gūhū ti dutye mehna ijierare. Musa Cristo ya curua cjana ijire. Sa yena yojoḡūre tiquiro yequina ijire musa. Tiquiro pehe yariari bato masa mūjari jiri Cohācjū cahmeno saha mari yeatire. ⁵ Panopū ñañene mari esa tuharo yee timi. Sa

yena Cohācjū Moisere tiqiro dutirire mari masidi bato ti dutiyere yūhdūduca duami. Ti dutiye mariedagū yūhdūduca dueraboya. Sa yena ti dutiyere mari masidi bato ñañene tutuaro yemi mari. Sa mari ñañene yena mari pecapū wahaborinata ijie timi. ⁶ Sa wahaborina ijiepenata Cristo yequina ijina yojopūre ti dutiye mehna ijieraja mari. Sa yero Espiritu Santo mari mehna ijiriquiro marine quehnoañe pehere comesagū yere. Tiquiro sa yegū panopū cjē dutiye tiqiro ojoari ti mehna ijieraja mari yojopūre.

Tiquiro ñañe yerire yahuahye Pablo

⁷ ¿Sa yena Cohācjū Moisere tiqiro dutirire dūhse niboagari mari? ¿Ti dutiye ñañe ijiagari, mūsa tūhotugū? Ijierare. Ti dutiye mehna ñañene masii. Sa yegū ti dutiye mariedagū ñañene masiedaboya yūhū. Ti dutiye ohō saha ijire. “Apequina yepūre tutuaro cahmedacāhña”, niahye ti dutiye. Sa niedagū apequina yepūre tutuaro cahmeñe ti ñañe ijigū masiedaboya yūhū. ⁸ Sa yegū ti dutiyere yūhū masidi bato apequina yepūre tutuaro cahmee timi yūhū. Ti dutiyere masiedagū apequina yepūre tutuaro yūhū cahmeñe ti ñañe ijigū masiedaboya yūhū. ⁹ Ti dutiyere yūhū quehnoano masiato pano sa tūhotu cūhū. Sa yegū ti dutiyere yūhū masidi bato tutuaro ñañene ye duami. Sa yegū pecapū yūhū wahatire masie tii. ¹⁰ Sa ye Cohācjū dutiyere yūhdūducaeraye, masa tiqiro mehna quehnoano ijiducuboya. Sa ye ti dutiye pehe quehnoano ijiducugū yebori dutiye ijire. Sa ijieperota yūhū yūhdūduca buhiri yūhūre pecapū waha dutimedii. ¹¹ Sa yegū ñañene yegū Cohācjū Moisere tiqiro dutiyere yūhdūduca duami. Ñañene tutuaro cahmegū yūhū ijigū quehnoañene masiedū. Ti ñañe pehe yūhūre dojomehnedi. Sa yegū quehnoano masiedū. Sa masiedagū Co-

hācjū dutiyere yūhdūducau. Sa yegū ti dutiyere yūhū masidi bato yūhū ñañe buhirire pecapū yūhū wahaborirore masii. Ti dutiye mehna sa masii.

¹² Sa ye Moisere tiqiro cūri dutiye quehnoañe ijire. Sa ye queoro ijirota nine ti dutiye. ¹³ ¿Sa ijieperota marine ti quehnoañe dutiye pehe pecapū wahagū yeajari? Ijierare. Topū wahagū yerare. Mari ñañe yeye pehe marine pecapū wahagū yere. Ti dutiyere mari masidi bato ti dutiyere yūhdūducana, ñañene yena mari ijiyere masiaja mari. Sa yena mari ñana mari ijiyere masina, mari pecapū wahati gūhūre masiaja mari. Sa yena ti dutiyere masina mari yūhdūducarire ti ña yūhdūaye ijigū masiaja mari.

¹⁴ Moisere tiqiro dutiri Cohācjū pehe tiqiro cūri ti ijigū masiaja mari. Yūhū pehe apequina yero saha ñagū ijiaja. Sa yegū ñañene yeducugū ijiaja. ¹⁵ Sa yeducugū ijiepeguta yūhū yerire ne masiedū yūhū. Yūhū cahmeno saha yeraja yūhū. Sa yegū yūhū tutuaro ye dueramedi-reta yeaga yūhū. Sa yegū yūhū yerire ne masiedaga yūhū. ¹⁶ Sa yegū ñañene ye duepeguta ñañene yeaja yūhū. Tire yegū Cohācjū dutiye quehnoañe ijigū masiaja yūhū. ¹⁷ Sa yegū yūhū waro ti ñañene yojopūre yeraja. Yūhū tūhotuyepū ijiye ñañe ti pehe yūhūre ñañene yegū yere. ¹⁸ Quehnoañene tutuaro ye duepeguta ne cūedaga. Ñañe pehe yūhūre dojomehne mujare. Ahri yehpa cjū yūhū ijigū yūhū tūhotuyepū ñañe dihita ijire. Ne quehnoañe mariedabutiare. ¹⁹ Quehnoañe yūhū ye duaye pehere ne yeraja yūhū. Yūhū ñañene yūhū ye dueye pehere yeaja. ²⁰ Sa yegū yūhū ye dueyere yegū yojopūre yūhū waro tire yeraja. Yūhū tūhotuyepū ijiye ñañe ti pehe yūhūre ñañene yegū yere.

²¹ Sa yero yūhūre ohō saha wahare: Quehnoañene yūhū ye duepeguta yūhū tūhotuyepū ñañe ijire. Sa yegū quehnoañe pehere yeraja. ²² Cohācjū

Moisere tiqiro dutirire yuhu tuhutuye mehna tutuaro cahmeaja. ²³ Sa yegu yuhu ahrire masaja: Yuhu tuhutuye mehna quehnoañene ye duaja. Sa ye duepeguta yuhu basi ñañene tutuaro ye duaja. Sa yegu yuhu esa tuharo ñañene duhu masiedaga yuhu.

²⁴ Sa ñañene duhu masiedagu pejecuogu ijiaja yuhu. Ñañene yegu pecapu wahaguta yuhu. Yohnah. ¿Yuhu ñañene yuhure pecapu waha dutiye ñañene noa yuhure cohã basaboagari? ²⁵ Jesucristore yuhu wacũ tutuagũ tiquirola yuhu ñañene cohãnota. Tiquiro sa yegũ Cohãcjũre “Quehnoare”, niaja yuhu. Sa yegu yojopure yuhu basi yuhu tuhutuye mehna Cohãcjũ dutiyere yeaja. Sa yegu ijiepeguta yuhu esa tuharo ijigũ ñañe pehe yuhure ñañene yegũ yere.

Espíritu Santore cwoyequina tiquina ijiye tiyere yahuahye Pablo

8 Yojopure Jesucristo yequinare tiquina buhiri tiato mariedare. [Tiquina ñañe tutuaro cahmeñene yerare. Sa ye Espiritu Santo tiqiro dutiro saha yeducure tiquina.] ² Sa yero Jesucristo yaqiro yuhu ijigũ Espiritu Santo ñañene duhugũ yere yuhure. Sa yero Espiritu Santo ijipihtiye decori Cohãcjũ mehna ijigũ yere yuhure. Ñañene yuhure duhugũ yero yuhure pecapu wahaborigure yuhduore tiqiro. ³ Cohãcjũ Moisere tiqiro dutirire mari esa tuharo ne ye pehosi. Sa ye pehoerana yuhduducana ijiaja mari. Sa yena mari ijigũ Cohãcjũ marine yuhduoeranidi. Mari sa ijina ijiepegũta ohõ saha Cohãcjũ marine yuhduorota. Tiquiro mari ñañe buhirire yariatiquirore, ti ñañene cohãtiqirore tiqiro macunore ohoahye. Sa yero tiqiro macuno mari yero sahata pagu tiahye. Sa yero mari tuhutuyepu ijiye ñañene tiqiro cohãri. ⁴ Marine sata

yeri Cohãcjũ dutiyere tiqiro tutuaye mehna mari ye pehoatire. Ti dutiyere ye pehona ijina mari esa tuharo ijieraja. Sa ijina Espiritu Santo yedohoye mehna tiqiro dutiro sahata yeaja mari.

⁵ Ñañene ye duayequina, ti dihitaro tutuaro cahmene. Espiritu Santo dutiro sahata yeducuyequina pehe ti dihitaro ye duare tiquina. ⁶ Ñañene ye duayequina ti dihitaro tutuaro cahmeñe, pecapu wahaeta. Espiritu Santo cahmeno sahata tutuaro ye duayequina pehe ijip-ihtiye decori Cohãcjũ mehna ijieta. Sa ye tiquina quehnoano iji cãeta. ⁷ Tiquina esa tuharo yeyequina Cohãcjũre ihña tuhtire. Tiquina Cohãcjũ dutiyere ne yuhtierare. Tiquiro dutiyere yuhti duerare. Yuhti masiedare tiquina. ⁸ Sa ye tiquina esa tuharo yeyequina Cohãcjũre bucuegũ ye masiedare.

⁹ Musa pehe musa esa tuharo yerare. Espiritu Santo musa mehna ijigũ tiqiro cahmeno sahata yere musa. Sa ye Espiritu Santore cwoyequina pehe Cristo yequina ijierare. ¹⁰ Musa pehe tiqiro yequina ijire. Musa ñañe buhirita musa paguri yariare. Sa musa paguri yarianaja ijiepenata Cristo musa mehna tiqiro ijigũ tiqiro mehna sa ijiducunata musa. Cohãcjũ musare “Quehnoana ijire”, tiqiro ni ihñagũ ¹¹ Cohãcjũta Jesure masori jiri. Sa masoriquiro ijiro Espiritu Santo mari mehna tiqiro ijiducugũ mari yariari bato Cohãcjũ mari gũhure masonota. Sa masono mari pagurire yariati pagurire catigũ yerota marine.

¹² Yuhu acaye, tiqiro sa yegũ ihñana ñañe mari tutuaro cahmedire yeracũhna. ¹³ Mari ñañene yerina ijina, pecapu wahaborina iji cãnata niaja. Espiritu Santo yedohoye mehna ñañe yeyere duhurina ijina, ijipihtiye decori Cohãcjũ mehna ijinata.

¹⁴ Ijipihtiyequina Espiritu Santore yuhtiyequina Cohācjū pohne ijire.

¹⁵ Espiritu Santo mari mehna tiqiro iji ducagūta Cohācjū pohna iji ducacu. Sa yena tutuaro mehna tiqiro dutinohrina ijieraja mari. Sa yena panopu mari cuerio saha yojopu pehere mari cueraja. Tiquiro pohna ijina, Espiritu Santo yedohoye mehna yojopure “Yuhu Pacu”, niaja mari Cohācjūre. ¹⁶ Sa yero Espiritu Santo mari wacūñepu marine ohō saha masigū yere: Potota Cohācjū pohna ijiaja mari. Tire marine masigū yere tiqiro. ¹⁷ Sa yena tiqiro pohna ijina, Cohācjū ijipihtiyere tiqiro pohnene tiqiro “Ohoutja”, tiqiro nidire mari pehe cuonata. Jesucristo mehna mari cuonata tire. Cristo yere mari yeri buhiri ñano yuhdurina ijina mari tiqiro mehna ummusepu quehnoano bucueye mehna iji cānata. Sa yena Cohācjū tiqiro pohnene “Ohoutja”, tiqiro nidire cuonata mari.

¹⁸ Yojopure ahri yehpapu ñano yuhdurīaja mari. Camepūre mari ummusepu quehnoano iji cānata. Sa yena yojopure ñano yuhduna, pajiro bujua witi wacū tuhotueracūhna. Ahri mari ñano yuhduri sa iji cāno nine. Came quehnoano iji cānata Cohācjū mehna. Sa yena tutuaro bucuenata. Ahri pūrta ihyo waro ijierare. ¹⁹ Cohācjū pohna ijina Cohācjū mehna quehnoano ijinata. Mari sa wahatire cohteducuro saha yero nine Cohācjū bajumehnedi. ²⁰ Ijipihtiropure tiqiro bajumehnedi quehnoano ijiborire dojomehneahye masuno ñano ye ducaro. Ti esa tuhoro sa wahaerahye. Ñañe iji ducari bato tiqiro bajumehnedi sa wahahye. Sa yero Cohācjū tiqiro bajumehnedire sata ñano iji dutinahye. Came tiqiro bajumehnedire quehnoañe wahagū yerota tiqiro. ²¹ Sa yero Cohācjū tiqiro bajumehnedire ahba pihtiborire

quehnoañe wahagū yerota tja. Cohācjū pohnene quehnoañequina tiqiro wahagū yeriro sahata, tiquinare quehnoano tiqiro yuhduoriro sahata quehnoañe wahagū yerota Cohācjū tiqiro bajumehnedire. ²² Ijipihtiye Cohācjū tiqiro bajumehnedi ñano ti iji ducari bato ñano yuhdūe tiahye. Numino nihi wahcōno ticoro ñano yuhduro sahata tiqiro bajumehnedi gūhu decoripe ñano yuhduducure. Tire mari masiaja. ²³ Mari pehe Espiritu Santore cuona ijiaja. Tiquiro yequina mari wahagū Cohācjū tiqiro yaqiro Espiritu Santore duita ohori marine. Tiquiro bajumehnedi yero sahata mari gūhu ñano yuhduaja. Sa yena quehnoañe pehere tiqiro comesatire tutuaro cohteaja. Sa yena tiqiro pohna mari tiqiro mehna mari quehnoano ijiato gūhure tutuaro cohteaja mari. Wahma pagure marine tiqiro ohoati gūhure cohteaja. ²⁴ Mari sa cohtena ijigū, tiquiota marine pecapu wahaborinare yuhduore. Tiquiro cahapu ijinina ijina tiqiro cahapure mari wahatire cohteraboya mari. Marine tiqiro yuhduo tuhasari bato ijigū tire cohte nemoedaboya. ²⁵ Sa yena tiqiro ohoatire ihñedapenata Cohācjū marine tiqiro yuhduoatire cohtena, sa cohteducuaja.

²⁶ Sa yena Cohācjūre wacū tutuera cjūna tiqiro cahmeñene quehnoano masiena mari ijigū Espiritu Santo marine yedohore. Cohācjūre mari quehnoano sini masiedaja. Espiritu Santo pehe marine Cohācjūre tutuaro sini basare. Marine tutuaro paja ihñano marine tiqiro Cohācjūre tutuaro sini basare. ²⁷ Cohācjū cahmeno sahata marine Jesu yequinare sini basare Espiritu Santo. Tiquiro sa sini basagū Cohācjū mari tuhotuyere masi pehoriquiro ijiro, Espiritu Santo tiqiro sini basarire masine.

**Cristo tiqiro tutuaye mehna ñañe
yeyere yuhduducanata mari**

²⁸ Ahrire yuhū yahuatire masiaja mari: Ijipihtina Jesure cahīna mari ijigū tiqiro cahmeñene yeanajare beseahye marine. Sa ijina mari ijigū ihñano Cohācjū sa ihña ihboducure marine. Sa yena mari ñano yuhdūepenata ñano yuhduducu dojoeraja. Cohācjū tiqiro yedohoro mehna quehnoano ijinata mari. ²⁹ Cohācjū marine tiqiro yequinare duitaputa masi tuhasahye. Sa masino tiqiro macuno Jesu tiqiro ijiro sahata marine iji dutiro, marine quehnoañe pehere comesa duti tuhasahye. Tiqiro macuno yero saha marine iji dutiahye tiqiro peyequina masa tiqiro macunore mari wahmi tiatire. ³⁰ Panopu tiqiro yequina tiqiro iji dutirina mari ijigū, tiqiro pohna mari ijiatina gūhure beseahye marine. Sa yero marine tiqiro beserinare tiqiro “Quehnoañequina ijire”, ni ihñare. Marine tiqiro sa ninohrinare tiqiro mehna uhmusepu quehnoano ijigū yerota marine Cohācjū.

³¹ Tire masina ohō saha tuhotuaja mari: Cohācjū marine tiqiro cahñonare ne apequina ihña tuhtiye cūedare. ³² Cohācjū mari ye buhirire yariatiqirore tiqiro macunore ohoahye. “Yuhū macure cahīaja. Sa yegu tiqirore ohoeraja”, niedahye tiqiro. Marine sa tutuaro yedohoriquiro ijiro, ijipihtiye mari cahmeñe duhsarire marine oho pehorota. ³³ Cohācjū beserina mari ijigū, tiqiro marine “Quehnoana ijire”, ni ihñari. Mari sa ijina ijigū apequina marine “Ñana ijire”, ne ni yahusā masiedare. ³⁴ Cristo mari ye buhirire yaria masa wijiahye. Sa yero Cohācjū poto pehepu yojopure tiqiro ijire dutiriquiro ijiro. Sa yero tiqiro marine potota sini basaro nine Cohācjūre. Sa ye apequina pehe

marine ne buhiri dahre duti masiedare. ³⁵ Cristo marine tiqiro tutuaro cahīgū apequina tiqirore “Cahīedacāhña”, ne ni masiedare. Cahī duhusi tiqiro. Mari ñano yuhdūepēgūta, mari cuepegūta, apequina marine tiquina ñano yepegūta, mari ujuā ahbaepēgūta, suhti mariena mari ijepegūta, cuaropu mari ijepegūta, marine tiquina wejēpegūta Cristo marine sa cahīducurota. ³⁶ Cohācjū yere tiquina ojoari pūpu mari sa wahatire yahuro, ohō saha nine: Mūhu yequina usā ijiri buhiri apequina usāre sa wejē duaducure. Oveja tiquina wejōtatiquina tiquina ijiriro saha usā gūhure sa wahare, ni ojoahye Cohācjū yere tiquina ojoari pūpu.

³⁷ Sa yena mari ñano yuhdūepenata Cristo marine cahīniqiro tiqiro yedohoro mehna tutuaro mehna ñañene duhu pehonata mari. ³⁸⁻³⁹ Jesucristo yequina mari ijigū ihñano Cohācjū pehe marine tutuaro cahīne. Sa yero tiqiro marine ne cahī duhusi. Mari yariagū gūhure, mari catigū gūhure, yojopure, camepu gūhure, tiqiro marine cahī duhusi. Sa ye angele, watīa puhtoā, ahri yehpa cjēna puhtoā, uhmuse cjēna, ñañequina bajueyequina gūhu Cohācjūre “Mūhu yequinare cahīedacāhña”, tiquina niepegūta marine ne cahī duhusi Cohācjū. Cohācjū tiqiro bajumehnedi mehna marine ne cahī duhugū yeye mariedare. Marine ne tiqiro cahī duhusi.

Israe masa Cohācjū beseriquina ijire

9¹⁻² Yuhū acaye Israe masare wacūgu, tutuaro bujuā witiaja yuhū. Cristore cahmedare tiquina. Sa yegu ñano bujuā witi jeripohna tiaja yuhū. Ti yuhū sa ni yahuye ijirota ijire. Yuhū Cristo yaquiota ijiaja. Sa yegu mūsare potota niaja. Sa yegu Espīritu Santo yuhū mehna tiqiro ijigū yojopure yuhū

acayere yũhũ ni yahuye ti potota ijigũ quehnoano masiaja yũhũ. Tiquiro tire yũhũre quehnoano masigũ yere. ³Israe masa yũhũ acaye ya maca cǵena pecapũ wahaeta. Cohãcjũre tiquinare yũhdũo dutigũ ohõ saha niboã yũhũ pehe: “Tiquina ye buhirire yũhũ pehe pecapũ wahaeta. Sa yero tiquina ye buhirire yũhũ pehere buhiri dahreahro Cristo”, niboã yũhũ. ⁴Tiquina yũhũ acaye Israe mũnãno panamena iji turiayequina ijire. Sa yero Cohãcjũ pohne ijiatiquinare cũahye Cohãcjũ tiquinare. Sa yero Cohãcjũ tiquiro asi siteye mehna tiquina watoã ijie tiahye. Sa yero tiquina ijipihtiyequinare tiquiro masare tiquiro yũhdũoatire yahue tiahye tiquinare. Sa yero Moiserẽ tiquiro dutirire duita cũ mũhtahye Israe masare. Sa ye Cohãcjũre ño peoati wũhũre ye mũhtae tiahye tiquina. Sa yero tiquinare tiquiro quehnoano yeatire yahue tiahye Cohãcjũ. ⁵Usã ye cururi waro doce cururi waro ijire. Sa yena usã ñecũsumũã iji mũhtariquina mũnapũ tiquina panamena iji turianapũ ijiaja usã Israe masa. Sa yero mari yero saha pagũ tiriquire ahtarõ, usã acayũro Israe masũno waro ijire Cristo. Tiquiro Cohãcjũta ijire. Sa yero tiquiro ijipihtiyequina pũhtoro ijire. Ijipihtiye decori tiquirore quehnoano ño peouhna mari. Sa ño peoducuhna.

⁶Apequina Israe mũnãno panamena iji turiayequina ijiepetã Cohãcjũ yequina waro ijierare. Sa yena tiquina tiquiro yequina ijieragũ ihũana ohõ saha ni tũhotuboa mũsa: “Israe masare yeequina ijigũ yeitja’, nieperota ihquẽquinare Cohãcjũ tiquiro nidiro sahata yerare”, ni tũhotuboa mũsa. Sa ni tũhotueracãhũã. ⁷Ohõ saha ijire: Apequina Israe masa Abrahã panamena iji turiayequina tiquina ijiepegũta “Abrahã panamena iji turiayequina waro ijire”, ni ihũedare Cohãcjũ

tiquinare. Sa yero ohõ saha niahye Cohãcjũ: “Mũhũ macũ Isaac panamena iji turiayequina tiquina pũrita potota mũhũ panamena iji turiayequina waro ijietã”, niahye Cohãcjũ Abrahãre. ⁸Tiquiro sa ni yahugũ ahrire masinata mari: Abrahã panamena tiquina masa bajuari bato duita Cohãcjũ pohne wahaẽredaga tiquina. Cohãcjũ tiquiro ni cũrire quehnoano tũhoyequina tiquirore wacũ tutuayequina pehe tiquinata ijiaja Cohãcjũ pohne. Sa ye tiquinata ijire Abrahã panamena iji turiayequina waro. ⁹Ohõ saha niahye Cohãcjũ Abrahãre: “Ape cũhma ahri pje borota yũhũ majare tojoã tagũ mũhũ namono Sara nijinogãre cũorota mũhũ macũre”, niahye Cohãcjũ Abrahãre. Sa nino Cohãcjũ Abrahã macũno tiquiro masa bajuatire yahuyuro niahye.

¹⁰Came Isaac namono Rebecã wame tiricoro duita pũaro pohna tiahye. Tiquina pacũro Isaac usã ñecũ mũnãno iji turiariquire ijiahye. ¹¹⁻¹²Sa ye tiquina pohne tiquina masa bajuato pano quehnoañene, ñãñe gũhũre tiquina yeato pano Cohãcjũ tiquina pacoro ijiatitorore ohõ saha nie tiahye: “Tiquiro bahũro pehe tiquiro wahminore dutirota. Sa yero tiquiro pũhtoro ijirota”, nie tiahye ticorore. Cohãcjũ tiquiro cahmeno sahata besere tiquiro. Sa beseriquiro ijiro ihcãquirogãre besero ticorore sata ni yahue tiahye. Sa yero masa tiquina yeyere ihũedaperota tiquiro cahmeno sahata tiquiro yequina ijiatiquinare besere. ¹³Sata ni ojoahye tiquiro yere tiquina ojoari pũpũ: “Jacob pehere cahĩe tii. Sa yegũ Esãu pehere cahĩeda tii’, niahye Cohãcjũ”, ni ojoahye panopũ.

¹⁴¿Tire wacũna dũhse ni tũhotuboari mari? ¿Tiquina yeyere ihũedaperota ihcãquirore sa besero Cohãcjũ queoro yeraboari, mũsa tũhotugũ? Ijierare.

¹⁵ Ohō saha nie tiahye Cohācjū Moiserere: “Yūhū cahmediquiro dihitare paja ihñautja”, niahye tiquiro Moiserere. Sa yero ihcāquirore sa besero potota yero niahye Cohācjū. ¹⁶ Sa yena mari esa tuharo mari cahmeno saha Cohācjūre marine paja ihñagū yeraja mari. Sa yero ne mari quehnoañene mari yeri wapa gūhure marine paja ihñedare tiquiro. Tiquiro esa tuharo tiquiro cahmeñequina pehere paja ihñare. ¹⁷ Sa yero sata tiquiro esa tuharo yeahye Egipto cjēna puhtoro gūhure. Ohō saha niahye Cohācjū tiquirore faraōre: “Egipto cjēna puhto ijiacjure cūgū nii mūhure yūhū tutuayere ijipihtiyequinare yūhū ihñootire. Sa yegū ijipihtiye yehpari cjēna yūhure tiquina masiatire puhto sōu nii yūhū mūhure”, niahye Cohācjū tiquirore. Ohō sahata nine Cohācjū yere tiquina ojoari pūpū. ¹⁸ Sa yero tiquiro cahmeñequinare tiquiro esa tuharo paja ihñare tiquiro. Sa yero tiquiro esa tuharo apequinare yūhtieragū yere tiquiro. Sa yero Cohācjū tiquiro cahmediro sahata yere.

¹⁹ Tiquiro sa yeriquiro ijigū ihñana yūhū pehere ohō saha niboaga mūsa: “Cohācjū marine tiquiro cahmediro sahata tiquiro yegū mari pehe tiquirore yūhdūduca masisi. ¿Mari sa yūhdūduca masiedapegūta dūhse ijiro boro marine buhiri dahre duajari tiquiro?” ni pihopūri sinituboaga mūsa yūhure. ²⁰ Ohō saha ni yūhtiaja mū sare: “¿Masa ihyo ijina ijiepenata Cohācjūre tuhtiajari mūsa? Dihi sutu dahreriquirore ¿Dūhsegū yūhure ohō saha ijiri sutu yeri mūhū?” ti sutu ni sinituboriro saha nina niaga mūsa Cohācjūre. Sa ni masiedare mūsa. ²¹ Dihi sutu dahreriquiro dihi mehna tiquiro cahmeno sahata yere. Sa yero quehnoañene pose yeati suture ye masine tiquiro. Tia dihi yūbū mehnata ihyo ijiyere pose yeati sutu gūhure ye

masine tiquiro. Tiquiro yero saha Cohācjū gūhū tiquiro ye duaro sahata yere.

²² Sa yero Cohācjū pecapū tiquiro cohātiquinare tiquina ñañe yerire tiquiro ihña usuaro tiquinare buhiri dahre duamahye. Sa buhiri dahre dueperota, yoari pje tiquina ñañe yeyere sa ihña cārīahye, ijipihtiyequinare tiquiro buhiri dahreatire, tiquiro tutuayere ihñono taro. ²³ Sata yeahye Cohācjū tiquiro quehnoa butiariquiro tiquiro ijiyere, tiquiro tutuaye gūhure mari masiatire. Panopū marine tiquiro paja ihñanohanajare tiquiro beseahye, ijipihtiye tiquiro tutuayere tiquiro quehnoañene mari cūoatire. ²⁴ Sa yena mari pehe tiquiro beserina ijinata niaja. Sa ye tiquiro beseriquina pehe ihquēquina judio masa dihita ijierare. Ihquēquina judio masa ijieyequina gūhū ijire tiquiro beseriquina. ²⁵ Sata nine judio masa ijieyequinare Cohācjū yere Osea mūnano tiquiro ojoariro sahata:

Yeequina ijieyequina gūhure camepū tiquinare “Yeequina ijire”, niitja. Sa yegū yūhū cahieñequina gūhure camepū tiquinare “Yūhū cahīna ijire mūsa”, niitja, niahye Cohācjū. ²⁶ “Yeequina ijierare mūsa”, Cohācjū tiquiro nimesi yehpari cjēna tiquina Cohācjū catiriquiro pohmeta ijieta, ni ojoahye Osea panopūre.

²⁷ Sa yero panopū cjūno Isaiā mūnano Israe masare ohō saha ni yahuahye: “Pajiri ma cjē padū pjerigāre mari queona cūedaja. Israe masa ti padū pjerigā yero saha ijieyequina peyequina ijiepegūta meheñequinagā Cohācjū yūhdūorota tiquinare. ²⁸ Cohācjū ahri yehpa cjēnare peyequina masare sojaro mehna potota buhiri dahre madoqueorota”, niahye Isaiā. ²⁹ Sa yero pari turita ohō saha ni ojoahye Isaiā: Mari puhtoro ijipihtiyequina puhtoro meheñequinagā mari mehna cjēnare yūhdūoeraro, marine judio masare

ijipihtinare butigū yeboya tiquiro. Sodoma cjēnare, Gomorra cjēna gūhure tiquiro butigū yeriro sahata mari gūhure butigū yeboya tiquiro, ni ojoahye Isaia yūhu acaye Israe masare tiquiro yeato panopu.

Judio masa quehnoañe buheyere cahmedahye

³⁰Sa tjire. Sa yena ahrire masi nemoña musa: Judio masa ijieyequina Cohācjüre macaedapeta tiqiurore bocare. Jesucristore tiquina wacū tutuagū, “Quehnoañequina ijire”, ni ihñari tiquinare Cohācjū. ³¹“Cohācjū dutiyere mari yegū tiquiro marine yūhdūorota”, niñe judio masa pehe Cohācjū Moiserere tiquiro dutiyere yepeta, cūedari. Sa yero ti dutiyere tiquina yepegūta Cohācjū “Quehnoañequina ijire”, ni ihñedari. Sa ye quehnoañequina iji duepeta cūedari. ³²Ohō saha ye, tiquina cūedari: Tiquina Cohācjüre wacū tutuaro marieno tiquina esa tuharo Moiserere tiquiro dutirire ye duamedī, tiquiro yequina iji duaye. Mari queoye mehna buhegū Cristo utā yero saha ijiriquiro ijire. Omaperiquiro utāpu doque wahā sa bora quehero, tiquiro esaborirore ne eserare. (Tiquiro yero saha tiquina Cristore utā yero saha ijiriquirore cahmeeñequina Cohācjū cahapu ne esasi.) ³³Sata ni ojoahye Cohācjū yere tiquina ojoari pūpu:

Jerusalē wame tiri macapu utā yero saha ijiriquirore cūgu niaja. Mari queoye mehna buhegū ohō saha ijire: Omaperiquiro utāpu doque wahā sa bora quehero tiquiro esaborirore eserare. (Tiquiro yero saha ti maca cjēna utā yero saha ijiriquirore tiquina cahmedari buhiri Cohācjū cahapu ne esasi. Tiquiro pehe tiquinare topure waha dutisi.) Sa ye tiqiurore wacū

tutuayequina pehe quehnoano bucueeta, ni ojoahye.

10 Yūhu acaye, Israe masare pecapu wahaboriquinare Cohācjū tiquiro yūhdūoatire, tutuaro yūhu jeripohna mehna cahmesāja yūhu. Sa yegū Cohācjū tiquinare tiquiro yūhdūoatire sini basaja yūhu. ²Potota tiquina Cohācjū cahmeñene ye duamene. Sa ye duepeta tiquiro cahmeñene masiedare. ³Sa ye tiquinare Cohācjū tiquiro quehnoañequina wahagū yeborire tiquina masiedare. Sa masiedaye tiquina esa tuharo quehnoañene yepeta, cūedari. Tiquina sa yegū Cohācjū tiquiro wacū tutua dutiriro sahata tiquina yeragū ihñano, tiquiro pehe tiquinare “Quehnoañequina ijire”, ni ihñedari. ⁴Ijipihtiyequinare Cristore wacū tutuayequinare “Quehnoañequina ijire”, ni ihñare Cohācjū. Sa yena dutiye yeye mehna yūhdū witieraja mari. Cristo mehna yūhdūaja.

⁵Moise munano panopu cjūno ohō saha ni ojoahye: “Cohācjū dutirire mari duhuro marieno ye pehogū Cohācjū yūhdūorota marine”, ni ojoahye tiquiro. ⁶⁻⁷Tiquiro sa ni ojoaepēgūta yojopure masa Cristore tiquina wacū tutuagū Cohācjū tiquinare “Quehnoañequina ijire”, ni ihñare. Ti buheye quehnoañequina wahagū yeri buheye ohō saha ni yahure: Cristo tiquiro basi ahri yehpapu wihi tuhasari jiri. Sa yero masa mūja tuhasari jiri. Sa yena ohō saha ni tuhhotueracāhña musa: “¿Diquiro pehe uhmūsepu Cristore ne cāhta basaro wahaboagari marine tiquiro yūhdūoato saha? ¿Diquiro pehe yariariquina cahapu Cristore maso basaro ne cāhtaboagari? Tiquirore ne cāhtaboriquiro mariedare”, ni tuhhotueracāhña musa. ⁸Sa yero ohō saha ni yahure Cohācjū yere tiquina ojoari pūpu: “Cohācjū ye buheyere mari macagū ti buheye ohōpu ijire.

Ti buheyere masi tuhasare m̄sa. Sa yena ti buheyereta yahuducue tire m̄sa”, ni ojoahye. Ti buheyere Cristore wacū tutuaye buheyere masare yahuaja usā. ⁹Ti buheye ohō saha ni yahure: “Jesu mari puhtoro ijire”, ni mari yahugū, “Cohācjū Jesure yari-ariquire potota masori”, ni mari tuhotugū, Cohācjū marine pecapū waha-aborinare yuhduorota. ¹⁰Jesure mari wacū tutuagū Cohācjū pehe marine “Quehnoane ijire”, ni ihñanota. Sa yero Jesure mari wacū tutuayere apequinare mari yahugū tiquiro marine pecapū waha-aborinare yuhduorota.

¹¹Ohō saha nine Cohācjū yere tiquina ojoari pūpū: “Cohācjūre wacū tutu-ayequina tiquirore tiquina wacū tutuarire ne bujua witisī”, niahye Cohācjū yere tiquina ojoari pūpū. ¹²Judio masare, judio masa ijieyequina gūhure Cohācjū ihcāno saha yedohore. Mari puhtoro ijipihtieyquina puhtoro ijire tiquiro. Sa yero ijipihtieyquinare tiquirore siniñequinare quehnoano pajiro ohorota tiquiro. ¹³Ohō saha ni ojoahye panopūre: “Yuhū ñañene cohāña. Sa yegu yuhure yuhduoya’, ni mari puhtorore masa tiquina sinigū tiquinare pecapū waha-aborinare mari puhtoro yuhduorota”, ni ojoahye Cohācjū yere. ¹⁴Sa ye masa Cristore wacū tutueraye tiquirore sini masiedare tiquina. Sa ye tiquiro buheyere tuhoeraye, tiquirore wacū tutua masiedare. Sa ye tiquiro buheyere yahuriquire mariedagū tire tiquina ne masisī. ¹⁵Sa ye tiquiro ye buheyere yahuatiquinare Cohācjū pehe tiquiro ohoeragū tiquiro ye buheyere yahu masiedare. Tire ojoahye Cohācjū yere tiquina ojoari pūpū: “Quehnoane buheyere yahuatiquina tiquina ahtagū ihñana quehnoano bucueaja mari”, ni ojoahye panopūre.

¹⁶Ti sa ijiepegūta masa peyequina quehnoane buheyere tuho duerare.

Sata ni ojoahye Isaia m̄nana: “Puhto, tiquinare mari yahure tiquina ne tuho duerari”, ni yahuahye Isaia Cohācjūre. ¹⁷Sa ye masa quehnoane buheyere tuhoeraye Cristore wacū tutuari. Sa ye Cristo yequina tiquiro yere tiquina yahugū, tiquiro ye buheyere tuhoeraye masa.

¹⁸Sa yegu ahrire sinitu duaja m̄sare: ¿Israe masa Cohācjū yere tuhoera tiari, masa tuhotugū? Poto waro tiquina tuhomedī. Sata nine Cohācjū yere tiquina ojoari pū gūhū:

Cohācjū yere yahueyquina ijipihtiropū yahu siteye wahari. Sa ye ijipihtiro cjenapū tiquiro yere tuhori, ni ojoahye panopū.

¹⁹Pari turi m̄sare sinitu duaja tja: ¿Israe masa tuhoepeta quehnoano masiedari tiquina, masa tuhotugū? Masie timahye. Ahrire yahu nemoḡu Moise nidire yahu m̄htaḡtja. Ohō saha ni ojoahye tiquiro:

Ohō saha ni yahure Cohācjū Israe masare: “Tuho masieñequina, ñañequina, ihyo ijieyequina ijire”, ni masa ihñañequinare yeequina ijia-tiquina yeitja. Yuhū sa yegū masa pehe tiquinare ihña coonata. Sa yegu m̄sare usuagū yeitja yuhū, ni yahuri Cohācjū Israe masa ijieyequinare tiquiro yequina ijigū yero taro, ni ojoahye Moise.

²⁰Ape pūpūre Isaia cuero marieno ohō saha niahye:

Ohō saha nine Cohācjū: Yuhure macadariquina pehe yuhure bocari. Sa yegu yuhure cahmeeñequinare tiquinare yuhure masigū yei yuhū, nidi Cohācjū, ni ojoahye Isaia judio masa ijieyequinare.

²¹Israe masa pehere ohō saha ni ojoahye Isaia: “Ohō saha nine Cohācjū: Tiquina yuhure yuhduucayequina, yuhure cahmeeñequina ijire. Sa yegu

tiquinare tiquina ñañene bujua witi dutigu ‘Yeequina ijija’, sa niducumi tiquinare”, nidi Cohãcjũ, ni ojoahye Isaia.

**Meheñequinagã Israe masare
pecapu wahaboriquinare
yuhduorota Cohãcjũ**

11 ¿Sa yero Israe masare Cohãcjũ tiquiuro beseriquinare yojopure cohãyari tiquiuro, musa tuhhotugũ? Ijierare. Tiquinare cohãedari tiquiuro. Yuhu gũhu Israe masu, Abrahã panami iji turiagapu ijiaja. Sa yegu Benjami ya curua cjũ ijiaja yuhu. ²Panopu Israe masare Cohãcjũ besee tiahye. Tiquiuro sa beseriquinare cohãedari. Cohãcjũ yere tiquina ojoari pũpu Elia munano tiquiuro yerire yahure. ¿Ti pũpu Israe masare Elia Cohãcjũre tiquiuro yahusãrire masiedajari musa? Ohõ saha ni yahusãhye tiquiuro: ³“Puhto Cohãcjũ, tiquina Israe masa mũhu yere yahu mũhtariquinare wejedi. Sa ye tiquina mũhure wacũ usã ño peoye altarire cohãri. Sa yegu yuhu dihita mũhu yaquiuro duhsaja yojopure. Yuhu sa ijigũ tuhoye yuhu gũhure wejẽ duare tja, yojopure”, niahye Elia Cohãcjũre. ⁴Tiquiuro sa nigũ tuhoro Cohãcjũ pehe ohõ saha ni yuh-tiahye Eliare: “Siete mil umua yeequina ijire yojopure. Tiquinare ihbou yuhu. Baal wame tiriquiuro queoyere ne ño peoera tiri tiquina, yeequina”, niahye Cohãcjũ Eliare panopure cue dutieraro. ⁵Ti pjere Elia tiquiuro ijiri pjere tiquiuro yequina masare beseriro sahata yojopu gũhure meheñequinagã Israe masare tiquiuro yequina ijatiquinare beseri jiri Cohãcjũ. Cohãcjũ tiquinare paja ihñano beseri jiri. ⁶Quehnoañene tiquina yeri wapa tiquinare beserari jiri. Tiquinare paja ihñano beseri jiri. “Quehnoañene musa yeri wapa musare besetja”, nino, tiquiuro tiquinare potota paja ihñano niedaboya.

⁷Sa ye ohõ saha ijire. Israe masa Cohãcjũ tiquinare “Quehnoañequina ijire”, tiquiuro ni ihñagũ cahmepeta tiquina ihcãno sahaerari. Cohãcjũ tiquiuro basi tiquiuro beseriquina pehe quehnoañequina tiquiuro yequina wahari jiri. Apequina pehe tiquiurore ihcãno sahaeraye, tiquina pehe tiquiuro yere tuho duerari. ⁸Sata niahye Cohãcjũ yere tiquina ojoari pũpu: “Cohãcjũ tiquiurore cahmeñequinare tiquiuro yere tuhoyequina ijigũ yeri. Sa yero potota ijiyere tiquina tuhoepegũta tiquinare quehnoano tuhogũ yerari Cohãcjũ. Sata ijiducure tiquina yojopu gũhure”, ni ojoahye panopure. ⁹Sa yero ohõ saha niahye Davi panopu cjũno Cohãcjũre:

Tiquina Israe masa tiquina bose decori tiquina bucueye decori yeye, ñano yere tiquina. Tiquina sa yegũ ihñagũ buhiri dahreya mũhu. ¹⁰Tiquinare quehnoano tuhoeagũ yeya mũhu. Sa ye sa buhiri tiducuyequina ijiahydro tiquina. Sa ye sa bujua wituducuetta, niahye Davi Cohãcjũre.

**Judio masa ijieyequinare
pecapu wahaboriquinare
yuhduorota Cohãcjũ**

¹¹¿Judio masare Cristore tiquina cahmedagũ ihñano Cohãcjũ tiquinare cohãno, cohã bo cãno niboari, musa tuhhotugũ? Cohã bosì tiquinare. Sa cohãedaperota tiquina Cristore tiquina cahmedagũ yojopure judio masa ijieyequina pehere Cohãcjũ yuhduorota. Yojopure tiquinare tiquiuro yequina wahagũ yeri Cohãcjũ. Tiquiuro sa yegũ ihñañe ihquẽquina judio masa pehe tiquinare ihña cooboa. ¹²Judio masa tiquina yuhduocagũ tiquina quehnoano yeragũ apequina pehere ahri yehpa cjẽnare ihquẽquinare Cohãcjũ yuhduori. Tiquiuro sa yuhduogũ tiquina pehere quehnoano wahari. Tiquiuro sa yeriro yuhduoro, came judio

masa pehe Cristore tiquina quehnoano wacū tutua ducagū pūritare ahri yehpa cjēnare quehnoa yuhduaro waharota.

¹³Yojobure musare judio masa ijienare yahugu tūu niaja. Cristo cūri yuhure judio masa ijieyequinare buheacjüre. Sa buhegu ihyo waro yei niedaja. ¹⁴Sa niaja yuhū acayere judio masare musare tiquina ihña coogū ye duagu. Cohācjū yuhduorina musa ijigū ihñañe tiquina gūhu Cristore cahme, tiquiuro yuhduoriquina wahaboa. ¹⁵Judio masare mehenogā cohābo curero, judio masa ijieyequina pehere quehnoañe buheyere Cohācjū yahu dutiri. Ti buheyere tiquina tuhori bato Jesure tiquina wacū tutuari bato ihquēquina ahri yehpa cjēna Cohācjū yequina wahari. Sa ye judio masare mehenogā tiquiuro cohābo curegū quehnoano wahari ahri yehpa cjēnare. Tiquiro sa yeriro yuhduoro judio masare tiquiuro yequina ijiatiquina tiquiuro yegū pūrita quehnoa yuhduaro waharota ahri yehpa cjēnare. Tiquiro yequina tiquina wahagū peyequina masa Jesure wacū tutuayequinare pecapu wahaboriquinare yuhduorota.

¹⁶Ohō saha ijire: Mehenogā trigo yubū Cohācjüre ño peo tiquina duhu peori yubū quehnoari yubū Cohācjū tiquiuro yegū, duhsari yubū gūhu quehnoari yubuta ijire. Sa yero yucugu nuhcori quehnoagū, tū dūpuri gūhu quehnoañe dūpuri ijire. (Ohō saha mari ni queoye mehna buhegū Abrahā usā ñecu munano quehnoariquiuro tiquiuro ijiriro sahata tiquiuro panamena iji turiayequinapu gūhu quehnoañequina ijjeta Cristore wacū tutuayequina ijiye.)

¹⁷Ihquēquina sa ijiatiquina tiquina ijiepegūta apequina tiquina acaye pehere judio masare Cohācjū meheno cohābo cureri. Olivo wame tidū dūpuri ihquē dūpuri tiquiuro dute cohāboriro saha apequina judio masa pehere Co-

hācjū meheno cohābo cureri. Sa yucugu dūpuri cohāno tiquiuro cohāri dūpuri ijiriroapu apeye dūpuri ñecu cjānu olivogu dūpuri camesa doho ohōri. Sata Cohācjū musare judio masa ijienare Abrahā panamena iji turianare comesari musare, musa gūhure yuhduoro taro. ¹⁸Musare tiquiuro sa cūgū “Judio masa yuhduoro quehnoana ijiaja usā”, ni tuhoturacāhña. Ahrire yuhū yahuatire wacūna musa: Judio masa pehere bese muhtahye Cohācjū. Sa besero tiquina acayuro ijiatiquirore cūahye Cristore, marine yuhduoro taro. Sa yena “Judio masa yuhduoro quehnoana ijiaja”, ni tuhoturacāhña musa.

¹⁹Musa judio masa ijiena pehe ohō saha niboa: “Ihquē ñañe dūpuri tiquiuro cohāboriro saha Cohācjū judio masare cohābo cureri ihquēquinare. Sa cohābo cureri tiquiuro apeye dūpuri camesa tiquiuro doho ohōno saha tiquiuro yequina marine cūno taro”, niboa musa judio masare yuhduoca duana. ²⁰Ti musa niñe ijirita ijire. Sa ijiepegūta tiquina Jesure tiquina wacū tutuerari buhiri Cohācjū cohābo cureri tiquinare. Sa yero musa gūhure Jesure musa wacū tutueragū tiquiuro yequina ijanaja musare cūedaboaya. Sa yena “Judio masa yuhduoro quehnoana ijiaja usā”, niedacāhña musa. Sa niedana Cohācjüre quehnoano ño peoya. ²¹Uhmū tāñe dūpuri yero saha judio masa pehe Cohācjū yequina iji muhtahye. Tiquiro comesari dūpuri tiquiuro doho ohōboriro saha camepu Cohācjū tiquiuro yequina musa pehere cūahye. Sa yero tiquiuro yequina iji muhtariquina judio masa tiquiurore tiquina wacū tutueragū, tiquinare cohābo cureri. Tiquinare tiquiuro cohāriro saha musa gūhure cohānota, tiquiurore musa wacū tutueragū. Sa yena Cohācjüre quehnoano ño peoya musa. ²²Cohācjū musare quehnoano yeriquiro tiquiuro

ijigũ masiña m̄sa. Sa yena cua pesaro mehna buhiri dahreriquiro tiquiro ijigũ gũhũre masiña m̄sa. Tiquirore ño peoyequinare tiquiro buhiri dahrerota. Sa m̄sa tiquirore ño peoducugũ pũrita m̄sare quehnoano yerota tiquiro. Ño peoerana ñaňe dũpũrire tiquiro cohãboriro saha m̄sa gũhũre cohãnota Cohãcjũ. ²³ Sa yero judio masa tiquiro cohãbo cureriquina Cristore tiquina wacũ tua dũcagũ, yucũgũ dũpũrire masa tiquina doho ohõno saha Cohãcjũ tiquiro yequina ijigũ yerota tiquinare. Cohãcjũ tiquiro sa yeati tutuayere cuori. Sa yero tiquiro tiquinare ihquẽquinare tiquiro yequina wahagũ yerota. ²⁴ M̄sa judio masa ijiena ijina, nũcu cjãnu olivogũ dũpũri yero saha ijire m̄sa. Sa ijina m̄sa ijiepegũ olivogũ otedũpu nũcu cjẽ dũpũrire masa tiquina ohõno saha Cohãcjũ m̄sare tiquiro yequina ijigũ yerota. Judio masa Cohãcjũ tiquiro bese m̄htariquina ijire. Sa yero tiquiro bese m̄htarina m̄sa ijierapegũta tiquiro yequina m̄sare ijigũ yeri tiquiro. Judio masare tiquiro bese m̄htariquina pehere tiquiro yequina ijigũ ye duare. Tire tiquiro yegũ m̄sare yero yũhduoro mijoeda cjũre.

**Came judio masare
pecapũ wahaboriquinare
yũhduorota Cohãcjũ**

²⁵ Yũhũ acaye, ahrire masa tiquina masiedarire m̄sare yahutja. “Yojopũre usã dihitare besere Cohãcjũ. Usã pehe masi peho cjã”, m̄sa ni tũhotuerato saha ahrire yahutja. Ohõ saha ijire: Yojopũre peyequina judio masa Cohãcjũre tũho duasi. Sa ye peyequina judio masa ijieyequinare Cohãcjũ tiquiro queoriro puno tiquiro yequina tiquiro yeri bato judio masa pehe tiquirore cahmeeta. ²⁶ Tiquina sa cahmegũ ijipihtiyequina tiquirore cahmeñequinare judio masa pecapũ wahaboriquinare Cohãcjũ

yũhduorota. Cohãcjũ yere tiquina ojoari pũpu sata ni ojoahye:

Jerusalẽ wame tiri macapũ judio masa ya macapũ tiquinare yũhduoatiquiro ahtarota. Sa yero Jacob panamena iji turiayequinare tiquina ñaňe yerire tiquiro cohãnota. ²⁷ Sa yegũ tiquinare yũhduogũ panopũ tiquinare yũhũ ni cũriro sahata yei niaja, nidi Cohãcjũ, ni ojoahye Cohãcjũ yere tiquina ojoari pũpu.

²⁸ Yojopũre tiquina judio masa Cristo yere ño peoyequina Cohãcjũre ihña tuhtire. Tiquina sa yegũ yojopũre m̄sa pehe judio masa ijiena Cristore wacũ tutua dũcari. Judio masa pehere Cohãcjũ bese m̄htahye. Sa yero judio masa ñecũsum̄na m̄na panopũ cjẽna tiquiro beseriquina tiquina ijigũ yojopũ ijieyequina judio masa gũhũre tiquiro cahĩne. ²⁹ Cohãcjũ tiquiro ni cũriro sahata masare tiquiro beseriro sahata potota yerota tiquiro. Tiquiro nidire bosì tiquiro.

³⁰ Panopũre masa gũhũ Cohãcjũre yũhdũdũcari jiri. Yojopũre judio masa Cohãcjũre tiquina yũhdũdũcagũ ihñano tiquiro m̄sa pehere paja ihñano yũhduori. ³¹ Yojopũre judio masa tiquirore yũhdũdũcari. Tiquina sa yepegũta Cohãcjũ m̄sare tiquiro paja ihñariro sahata tiquina gũhũre camepũre paja ihñanota. ³² Ohõ saha ijire: Ijipihtiyequina masare “Buhiri tiyequina ijire”, nine Cohãcjũ. Sa yero ijipihtiyequina buhiri tiyequina tiquina ijigũ ihñano ijipihtiyequinare paja ihña masine tiquiro.

³³ Yohou. Cohãcjũ tutua yũhduariquiro ijiajari. Quehnoano masi pehoriquiro ijire tiquiro. Sa yero tiquiro tũhotuyere, tiquiro yerire marine quehnoano masino basioerare. ³⁴ Ohõ saha ni ojoahye Cohãcjũ yere: “Cohãcjũ mari pũhtoro tiquiro tũhotuyere ne

masa quehnoano masiedare. Sa ye masa tiquireo 'Ohō saha yeya', ni masiedare. ³⁵Sa ye masa Cohācjūre apee borore tiquina ohori bato 'Tiquiro marine wapamore', ni masiedare masa", ni ojoahye panopure. ³⁶Cohācjū ijiptiyere yeahye. Sa yero tiquireo tutuaye mehna ijiptiyere ijigū yere tiquireo. Sa ye ijiptiyere tiquireo ye ijire. Tiquiro sa ijiriquiro ijigū ijiptiyere decori tiquireo ño peouhna mari. Sata yeducuuhna.

Cohācjū cahmeñene marine yeducu dutiahye Pablo

12 Cohācjū marine tutuaro paja ihñari. Tiquiro sa paja ihñariquiro ijigū ihñana yuhū acaye, mūsa basita Cohācjū yere yeducuya. Sa yena quehnoañe pehere comesarina, ñañe mariena ijiya. Mūsa sa ijigū tiquireo bucuero. Sata yero cahmene marine Cohācjūre ño peona. Sa yegu mū sare tire tutuaro ye dutiaja. ²Ahri yehpa cjenā ñañequina tiquina yero saha ye nemoedacāhña mūsa. Sa yena mūsa tuhutuyepure quehnoañe pehere comesaya mūsa. Sa yena quehnoañe pehere comesarina ijinata mūsa. Sa comesana Cohācjū mū sare tiquireo ye dutirire masinata mūsa. Sa yena quehnoañene, Cohācjū cahmeñene, ñañe marieñene masinata mūsa.

³Cohācjū yuhure paja ihñano mū sare buhe dutiro beseri yuhure. Sa yegu ijiptinare mū sare ahriye ni dutieraja yuhū. "Quehnoa yuhūana iji yuhūducāja usā", ni tuhuteracāhña. Sa tuhutu cāhña. Jesure mūsa wacū tutuari bato Cohācjū mū sare tiquireo yedohoro punota "To punota ye masiaja usā", ni tuhutuya. ⁴Ohō saha ni yahu nemoutja yuhū: Mari omocari, mari dahpocāri, mari caperi, ijiptihiro mari pagupū ijiye peye ijire. Mari pagupū ijiye ihcā pagupū ijiepetā sijoro saha

ijiye dahraye dihitare cūore. ⁵Mari queoye mehna buhegū ahri yero saha ijire. Cristo pagū yero saha ijina ihcā curuata ijiaja mari. Sa yena mari ijiptina peyequina ijiepenata ihcā curuaputa ijiaja mari.

⁶Cohācjū marine tiquireo yedohoro punota tiquireo tutuaye mehna ye dutire. Sa yero maripe sijoro saha ijiye dahrayere cūre tiquireo. Tiquiro sa yegū marine tiquireo cūre mari quehnoano yehna. Sa ye Jesu yequina ohō saha yeahro. Ihquēquinare Cohācjū tiquireo yere yahuatiquinare cūre. Sa ye tiquina Cristore tiquina masino puno tiquireo yere quehnoano yahuahro. ⁷Ihquēquinare Cohācjū masare yedohoatiquinare cūre. Sa ye tiquina masare quehnoano mehna yedohoahro. Ihquēquinare Cohācjū masare buheatiquinare cūre. Sa ye tiquina masare quehnoano buheahro. ⁸Masare bucuegū yeatiquina ijiye, tire quehnoano yeahro. Sa ye apee borore ohoyequina quehnoano mehna jeripohna ti, pajiro ohoahro. Sa ye apequinare dutiyequina quehnoano mehna dutiahiro. Sa ye pejecuoyequinare yedohoyequina bucueye mehna yedohoahro.

Jesu yequina ijina ohō saha yena ijiya

⁹Apequinare cahña, potota cahña tiquinare. Sa yena ñañene ihña yabina ijiya mūsa. Sa yena quehnoañe pehere cahmeña. ¹⁰Mūsa bahanare mūsa cahño sahata Jesu yequinare mūsa mehna cjenare cahña. Sa yena mūsa mehna cjenare quehnoano cahme ño peoya.

¹¹Cohācjū cahmeñene yena, ne caperacāhña. Sa yena mari puhoro tiquireo dutihiro sahata quehnoano bucueye mehna yeya.

¹²Cohācjū mū sare pecapū wahaborinare tiquireo yuhūorinapū

ijire m̄sa. Tire masina bucueya m̄sa. Sa yena ñano ȳhd̄na, ihc̄ano sahaya “Cristo yere duhuari”, nina. Sa yena Coh̄c̄j̄re sa siniducuya.

¹³ Apee boro Jesu yequinare duhsaḡū ohoya tiquinare. Sa yena m̄sa ye wuhusep̄u masa tiquina esaḡū quehnoano jeripohna ti, tiquinare piti caya.

¹⁴ M̄sare ñano yeyequina pehere quehnoa dutiya. Sa quehnoa dutina, tiquinare “Ñano ȳhd̄nc̄inahdo”, niedac̄ah̄ña.

¹⁵ Apequina bucueyequina mehna ijina m̄sa ḡūh̄u bucueya. Sa yena utiyequinare ih̄ñana, uti dohoya.

¹⁶ M̄sa mehna cj̄ēna mehna quehnoano ijiya m̄sa. Sa yena “Apequina ȳhd̄noro quehnoana ijiaya”, ni tuh̄otuerac̄ah̄ña. Oh̄o saha ni tuh̄otuya. “Ihyo ijina ijiaya”, ni tuh̄otu, ihyo ijiyequina mehna ijiya. Sa yena “Masi ȳhd̄d̄ucana ijiaya us̄a”, ni tuh̄otuerac̄ah̄ña.

¹⁷ Apequina m̄sare tiquina ñano yepeḡūta, tiquinare ñano ye cahmedac̄ah̄ña. Sa yena quehnoañene yeya, quehnoana m̄sa ijiye tiyere ijipih̄tiyequina masa tiquina masiatire.

¹⁸ Tutuaro mehna quehnoañene yeya m̄sa, ijipih̄tiyequina mehna m̄sa quehnoano ijiatire. ¹⁹ M̄sa ȳh̄u cah̄ña, ȳh̄u acaye apequina m̄sare tiquina ñano yepeḡūta tiquina yero saha ñano ye cahmedac̄ah̄ña. Coh̄c̄j̄u pehe m̄sare tiquina ñano yeri buhiri buhiri dahreahro tiquinare. Coh̄c̄j̄u yere tiquina ojoari p̄p̄u sata ni ojoahye: “Ȳh̄u pehe masa tiquina ñano yeri buhiri buhiri dahreac̄j̄u ijiaya. Sa yeḡu potota buhiri dahreit̄ja’, nine mari puhtoro”, ni ojoahye panop̄re. ²⁰ Sa yena oh̄o saha yeya m̄sa: “M̄sare ih̄ña tuhtiriq̄iuro tiq̄iuro ũj̄ua ahbaḡū ih̄ñana nuña tiq̄iurore. Tiq̄iuro aco w̄uoḡū ih̄ñana tiq̄iurore sih̄ña. M̄sa

sa yeḡū ih̄ñano tiq̄iuro b̄ue tirota”, nine mari puhtoro. ²¹ Sa yena apequina m̄sare tiquina ñano yepeḡūta m̄sa pehe tiquinare ñano ye cahmedac̄ah̄ña. Sa yena tiquinare quehnoano yeya. Sa yena ñañene ye duerana ninata m̄sa.

13 Ijipih̄tiyequina puhtoare Coh̄c̄j̄u dihita c̄ure. Sa yero m̄sa puhtoro ḡūh̄re Coh̄c̄j̄u bese c̄ure. Tiquiro sa c̄uriquina tiquina ijiḡū ih̄ñana ijipih̄tina m̄sa tiquinare yuhtiya. ² Mari bui cj̄ēna puhtoare quehnoano yuhtierana Coh̄c̄j̄u tiq̄iuro bese c̄uriquinare ȳhd̄d̄ucana niaga mari. Sa ȳhd̄d̄ucariquinare Coh̄c̄j̄u pehe buhiri dahrerota. ³ Quehnoañequinare cueḡū yeatiquina ijierare puhtoa. Ñañene yeyequina pehere cueḡū yeatiquina ijire tiquina. Quehnoañene yeya m̄sa puhtoare m̄sa cueratire. Sa yena cuesi m̄sa. Quehnoañene m̄sa yeḡū puhtoro pehe “Quehnoano yeri m̄sa”, m̄sare ninota. ⁴ M̄sa puhtoa m̄sare yedohoatiquinata ijire m̄sa quehnoano ijiatire. Sa ye tiquina m̄sare buhiri dahreatiquinata ijire. Ijipih̄tiyequina ñañene yeriquinare buhiri dahre dutiro Coh̄c̄j̄u tiquinare beseri. Tiquina sa buhiri dahreatiquina ijiḡū ñañene yena m̄sa puhtoare cueya. ⁵ Sa yena mari puhtoare yuhtina, tiquina buhiri dahreatire cuerac̄h̄ña. Sa yena ño peoye mehna “Quehnoañene yero cahmene ȳh̄re”, ni tuh̄oturo mehna quehnoano yuhtih̄na. ⁶ M̄sa puhtoare tiquina dahrayere c̄uri Coh̄c̄j̄u. Sa yena tiquina dahrayere tiquina yeḡū ih̄ñana m̄sa puhtoare wapa ne cohteyequinare wapa yere m̄sa.

⁷ Ijipih̄tiyequinare m̄sa puhtoare quehnoano yuhtiya. Sa yena puhtoare wapa ne cohteyequinare wapa yeya m̄sa. Sa yena puhtoa pehe apeyere tiquina wapa ye dutiḡū ḡūh̄re wapa yeya. Sa yena ijipih̄tiyequina puhtoare

quehnoano ño peoya. ⁸Apequina masare wapamoedacāhña. Tiquinare cahño cahmene. Sa ye cahī nemono cahmene. Tiquiro cahapū ijiriquirore cahīdiquiro Cohācjū dutiyere ye peho tuhasariquiro ijire. Sa yena mūsa caha ijieyequina gūhure cahña. ⁹Ohō saha nine Cohācjū dutiye: “Apequiro namono mehna ñano yeracāhña. Masare wejēdacāhña. Yaqueracāhña. Apequina yere tutuaro cahmedacāhña”, ni yahure tiquiro dutiye. Apeye dutiye gūhu ijire. Sa ijiepegūta ihcāno dutirore mūsare yahugū tūu niaja. Ti dutiro ihcāno dutiro ijiepegūta ti dutirore yena, Cohācjū dutiyere ye pehona niaja mari. “Mūhu basi mūhu cahño saha mūhu caha ijieyequina gūhure cahña”, nine ti dutiro. Ti dutirore yena Cohācjū dutiyere ye pehona ijina nine mūsa. ¹⁰Mūsa caha ijiriquirore cahña, tiquirore ñano yesi. Sa yena tiquirore cahña, Cohācjū dutiyere ye pehona nine mūsa.

¹¹Sa yena carñequina yero saha ijieracāhña mūsa. Quehnoano wacū masiña. Jesure quehnoano wacū cohteya. Jesu marine tiquiro tojoa ta, tiquiro neato mehenogā dūhsatjiāre. Tiquirore mari coā masi dūcana, “Yoari batopū marine yūhdūoro tarota Jesu”, ni tūhotumi. Mari sa ni tūhotuepegūta yojopūre mehenogā dūhsare Jesu marine tiquiro yūhdūoro ahtato. Ahri yūhu nidire masine mūsa. ¹²Yojopūre ñañene tiquina yeri deco ijire. Cristo tiquiro ahtagū ahri deco pihtirota. Tiquiro ahtato mehenogā dūhsare. Tiquiro ahtato mehenogā dūhsagū ihñana ñañene duhu pehocūhna mari. Sa yena Cohācjū cahmeñe pehere yeihna mari. Sa Cohācjū yere yena, ñañene duhu pehocūhna mari. ¹³Sa yena quehnoañe pehere yeihna. Sa yena bose decorire yena ñano yeracūhna. Sa yena queheracūhna. Sa yena wuana tina, apequina mehna

ñano yena, cahme duse tini wiana, ihña coona ijieracūhna. ¹⁴Sa yena mari puh-toro Jesucristo tiquiro yedohoye mehna quehnoano ijiya mūsa. Sa yena ñañene mūsa tutuaro cahmeñene yeracāhña.

Mūsa acayere Jesu yequinare “Ñano yee nine”, ni yahu wajaeracāhña

(1 Co 8.1-13)

14 Jesure wacū tutuariquiro Jesu yere tiquiro quehnoano masiedarīgū tiquirore quehnoano yedohoya. Sa yena Jesu yere tiquiro quehnoano masiedarīgū ihñana “Ne masiedare mūhu”, ni cahme duse tutueracāhña tiquiro mehna. ²“Ijipihtiyere ihya masiaja yūhu”, ni tūhoture apequina. Sa ye apequina pehe Jesu yere quehnoano masiedarñe, wahiquinare ihyeraye, oteye dūca dihitare ihyare. ³Ijipihtiyere ihyayequina pehe oteye dūcare ihyayequinare ihña tuhtieracāhdo. Sa ye oteye dūca dihitare ihyayequina pehe ijipihtiyere ihyayequinare “Ñano yeye nine”, ni yahu wajaeracāhdo. Ijipihtiyere ihyayequina pehe Jesure wacū tutuayequina tiquina ijigū Cohācjū tiquinare tiquiro yequina ijigū ye tuhasari. Tiquiro yequina tiquina ijigū ihñañe wahiquinare ihyeyequina pehe tiquinare yahu wajaeracāhdo. ⁴Jesure wacū tutuayequina Cohācjū cahacjēna ijire. Tiquina sa ijigū ihñana mūsa tiquinare yahu waja masiedare. Jesure wacū tutuayequina Jesu cahmeno saha tiquina yeragū ihñano tiquiro dihita tire yahu masine. Tiquina quehnoano yegū gūhure tire yahu masine tiquiro tiquinare. Sa yero tiquiro pehe “Ñano yeri mūhu”, ni yahuatiquiro ijirota. Sa yero tiquiro cahacjēnare quehnoañene yeducu masigū yeriquiro ijire Cohācjū.

⁵Ihquēquina ihcā decore Cohācjūre tiquina ño peoati deco yere. Sa ye apeye

decorire “Dahraye decori ijire”, ni tuhature. Apequina pehe decoripe Cohācjüre ño peoducure. Tiquina ihcāno saha sa yerariquina ijiepetā ijipihtiequina ohō saha ni tuhoutuahro: “Jesu tiquiro cahmeno sahata quehnoano yena niaja”, ni tuhoutu masiahdo. ⁶Masuno ihcā deco tiquiro ño peoati deco yere Cohācjüre ño peoro taro. Sa yero decoripe ño peoducuriquiro Cohācjüre quehnoano ño peore tiquiro gūhu. Sa yero sijieriquiro gūhu ihyaro, Cohācjüre “Quehnoare”, ni sinine. Sa yero tiquiro gūhu ihyariquiro ijero Cohācjüre ño peoriquiro ijire. Sa yero ihquē ihyayere sijieriquiro pehe tiquiro sijire Cohācjüre ño peoro taro. Sa yero tiquiro gūhu Cohācjüre “Quehnoare”, ni sinine.

⁷Mari cahmeñe dihitare yena iji masiedaja mari. Cristo ijire mari puhtoro. Sa yero mari catigū mari yariagū gūhure mari puhtoro ijire. ⁸Yojopure mari catiro puno Cristo yere yeana iji aja mari. Tiquiro yequina iji aja. Mari yariari batopu gūhure tiquiro yequina ijinata. Sa yero mari catigū mari yariagū gūhure Cristo mari puhtoro ijire. ⁹Sata ijire. Cristo yaria masa mujahye, catiequina, yariariquina gūhu tiquina puhtoro ijero taro.

¹⁰¿Duhse tana musa acayure Jesu yaquire ño Nano yero nine”, ni yahu waja duajari musa? ¿Duhse tana musa acayure cahata diho cū duajari musa? Mari ijipihtina Cristo caha mari ducugū tiquiro pehe mari yerire masi pehorro, marine beserota quehnoana, ñana gūhure. Tiquiro sa beseatiquiro ijigū musa acayure ño Nariquiro ijire” ni yahu wajaeracāhña. ¹¹Cohācjū yere tiquina ojoari pūpu ohō saha ni ojoahye:

Ohō saha nidi mari puhtoro: “Ahri potota ijire. Ijipihtiequina yahu potodusepe curi mehna quehe saeta. Sa ye ijipihtiequina ‘Quehnoagu, tu-

tuagu ijire’, ni, yuhure ño peota”, nidi mari puhtoro, ni ojoahye.

¹²Sa yena ijipihtina mari yerire Cohācjū siniturota. “¿Duhse yena sa yeari?” ni siniturota. Tiquiro sa ni sinitugū yuhtiro cahmene marine.

Musa acayure ñano yegū yeracāhña musa

¹³Sa yena mari mehna cjenā gūhure “Ñañequina ijire”, ni yahu wajaeracāhña. Sa yena mari acayure Jesu yaquire ñano yegū yeracāhña.

¹⁴Yuhu Jesucristo yaquire iji aja. Sa yegu ahri yuhu niatire quehnoano masiaja yuhu: Yuhu pehe ijipihtie ihyayere yuhu ihyagū yuhu ihyari buhiri, buhiri mariedare. Apequiro pehe “Ahri ihyayere ihyagu ñano yei niaja”, ni tuhoturiquiro pehe ihyaro, potota buhiri tiriquiro ijire. ¹⁵Ti potota ijire. Musa apee borore musa ihyagū musa acayure musare ihña cū ihyaro, “Yohou, ñano yei niaga yuhu”, ni pajero tuhutoaga tiquiro. Tiquiro sa ihña cū ihyagū yena, tiquiro cahiedare musa. Apee borore musa ihyagū ihña cū ihyaboaga tiquiro. Sa ihyaro “Ñano yei niaja”, ni tuhuro Cristore duhuboaga. Musa acayure ye buhirire yariari Cristo. Sa yena “Cristore duhuari”, nina tiquiro ihña cūgū yeracāhña. ¹⁶Sa ye “Ahri usā yeri quehnoariaga”, musa ni tuhutugū apequina musare yahu waja boaga. Tiquina sa yahu waja gū ihñana, musa sa yerire ye nemoedacāhña, “Yahu waja nemoari” nina. ¹⁷Cohācjū pehe mari puhtoro ijire. Tiquiro sa ijigū mari ihyayere, mari sihniñe gūhu sa iji cāno nine. Ihyo warota ijire. Sa ye mari puhtoro tiquiro dutiyere, quehnoañe gūhure mari yegū ti waro ijero nine. Sa ye apequina mehna mari quehnoano ijigū gūhure quehnoañe waro ijero nine. Sa ye Espiritu Santo yedohoye mehna mari

bucuegū quehnoañe waro ijiro nine. ¹⁸Sata Cristo yere yeriquirore ihñañe Cohācjū, masa gūhū “Quehnoano yeri mūhū”, nieta.

¹⁹Sata yeihna mari pūrita quehnoano mari ijiatire, mari basi mari cahme yedohoatire. Sa yena Jesure wacū tutua nemonata. ²⁰Apequiro Jesu yaquiro tiquiro ihya dutierarire mūsa ihyagū ihñano tire coeraro, Cohācjū yere cohāboaga. Sa yena tire ihyeracāhña. Potota ijipihtiye ihyaye quehnoañe ihyayeta ijire. Sa ijiepegūta apee borore mari ihyagū apequiro “Ñañe ihyaye ijiaga ahri”, nidiquiro ijieperota ihña cū ihyaboaga. Sa ihyaro ñano yero niaga tiquiro. Sa yena marine tiquiro ihña cū ihyagū, mari gūhū ñano yena niaga. ²¹Wahiquina dihire mūsa ihyagū ihñano, vinore mūsa sihnigū ihñano, apequiro Jesu yaquiro “Tire ihyagū ñano yei niaga yūhū”, ni tūhoturiquiro ijieperota tiquiro gūhū ihña cū, ihya sihniboaga. Sa ni tūhoturiquiro pūrita ihya sihnino ñano yero nine. Sa yena tiquiro ñano yerato saha Jesure tiquiro wacū tutua duhuerato saha wahiquina dihire, vino gūhūre mūsa pehe mūsa duhugū quehnoarīne. ²²“Ijipihtiyere ihya masiaja”, ni tūhotuna, tire Cohācjū dihitare yahuya. Ñañene yerariquiro, “Quehnoano yei niaga yūhū”, ni tūhoturiquiro bucueriquiro ijire. ²³Apequiro pehe “Ahri ihyayere ihyagū ñano yei niboaga yūhū”, ni tūhoturiquiro ijieperota ti ihyayere ihyaro, buhiri tiriquire ijire tiquiro. “Ahrire ihyagū potota quehnoañene yei niaga”, ni tūhotuerare tiquiro. Sa ni tūhotueraro tire ihyaro, tiquiro ihyari buhiri buhiri tire tiquiro. “Quehnoañene yei niaga”, ni tūhotueraro tire yero, buhiri tire tiquiro.

Mari caha ijiyequinare quehnoano yeihna

15 Mari Cohācjūre quehnoano wacū tutuana pehe wacū tutuera cjūñequinare yedohouhna. Sa yena mari ye dihitare yeducueracūhna. ²Sa yena mari caha ijiyequinare Jesu yequinare quehnoano yeihna tiquina quehnoano ijiatire, Cohācjūre tiquina quehnoano wacū tutua nemoatire. ³Cristo pehe tiquiro ye dihitare yerahye. Sata nine Cohācjū yere tiquina ojoari pūpū. Ohō saha ni ojoahye: “Cristo ohō saha nidi Cohācjūre: ‘Mūhū pehere ñano yahuducuboriquina yūhū pehere ñano yahuducuri’, nidi Cristo Cohācjūre”, ni ojoahye panopūre. (Sa tiquina ñano yahuducunohriquire ijiro Cristo tiquiro Pacuro ye pehere ye basaro niahye.) ⁴Panopū Cohācjū yere tiquina ojoari pūpū tiquina ojoahye mari quehnoano buheatire. Sa yena ti pūre buhena bucueaja. Sa buhena mari ñano yūhdūna ihcāno sahanata. ⁵Cohācjū mū sare tutuagū yeriquiro bucuegū yeriquiro mū sare ijipihtinare ihcāno saha quehnoano ijigū yehro, Cristo cahmediro sahata. ⁶Sata yehro tiquiro mūsa ijipihtina ihcāno mehna Cohācjūre mari puhtoro Jesu-cristo Pacurore “Quehnoagū, tutuagū ijire”, ni mūsa ño peoatore.

Judio masa ijieyequinare quehnoañe buheyere yahu dūcahye

⁷Cristo marine tiquiro yeriro sahata mūsa mehna cjēnare quehnoano cahme piti caya. Mūsa sa yegū ihñañe “Potota Cohācjū quehnoariquiro ijire”, ni ihñañeta masa pehe. ⁸Mū sare ahrire niita niaga: Judio masare yedohoatiquiro ahtahye Cristo. Cohācjū tiquirore ohoro judio masa usā ñecusumūna mūnapūre panopū cjēnare tiquiro ni yahuriro sahata yero niahye. Tire tiquiro yerire masare masigū yeatiquiro

ahtahye Cristo. ⁹Masare Cristo tiqiro yedohogū Cohācjū paja ihñano nine tiquinare. Tiquiro sa paja ihñagū judio masa ijieyequina gūhu Cohācjūre “Quehnoagū, tutuagū ijire”, ni, ño peore yojopure. Tiquina gūhure tiqiro yequina ijigū yero ahtahye Cristo. Cohācjū yere tiquina ojoari pūpū sata ni ojoahye:

Cristo ohō saha niahye Cohācjūre:

Judio masa ijieyequina caha mūhure “Cohācjū quehnoagū, tutuagū ijire”, ni ño peoutja. Sa yegū tiquina caha basagū mūhure basautja, niahye Cristo Cohācjūre, ni ojoahye panopure.

¹⁰Sa yero ohō saha ni ojoahye tja:

Cohācjū tiqiro beseriquina judio masa mehna cahme bucueya mūsa gūhu judio masa ijiena, ni ojoahye panopure.

¹¹Sa yero ohō saha ni ojoahye tja:

Judio masa ijieyequina ijipihtiyequina Cohācjūre ño peohro. Sa ye ijipihitiro cjēna tiqirore “Quehnoagū, tutuagū ijire”, ni ño peohro, ni ojoahye.

¹²Sa yero Isaia munano gūhu ohō saha ni ojoahye:

Isaī panamino iji turiariquiro ahtarota. Sa ahtarō judio masa ijieyequina pūhtoro ijirota tiqiro. Sa ye tiquina pehe tiqirore wacū tutua, tiquinare pecapū wahaboriquinare tiqiro yūhdūotire masieta tiquina, ni ojoahye panopure.

¹³Cohācjū marine yūhdūoro ahtatiqiro quehnoano mū sare bucuegū yeahro. Sa yero Jesure mūsa wacū tutuagū mū sare quehnoano ijigū yeahro tiqiro. Mū sare tiqiro sa yegū mū sare tiqiro yūhdūotire Espiritu Santo tutuaye mehna bucueye mehna masi nemonata mūsa.

¹⁴Ahrire mū sare yūhu yahuatire quehnoano masiaja. Mūsa pehe

quehnoana ijire. Sa yena Jesu yere quehnoano masine. Sa masina mūsa mehna cjēnare cahme quehnoano yahu, buhe masine mūsa. ¹⁵Mūsa sa masina mūsa ijiepegūta ihquē tahari ahri pūpure mū sare cuero marieno quehnoano yahu peho ojoau mūsa wacūato saha. Cohācjū yūhure cahino mū sare buhe dutiro cūri yūhure. Sa yegū tiqiro cūriro sahata yegū tagū mū sare wacūgū yei. ¹⁶Yūhure tiqiro sa cūgū Jesucristo cahacjū ijigū tiqiro yere quehnoañe buheyere judio masa ijieyequinare buheaja yūhu. Yūhu sa buhegū tuhoye judio masa ijieyequina Jesure wacū tutueta. Tiquina sa wacū tutuagū ihñano tiquinare Cohācjū “Quehnoañequina ijire”, ni ihñanota. Sa yero tiquinare cahmenota. Sa yero Espiritu Santo pehe Cohācjū yequina ijigū yerota tiquinare. Pahia ũjūa mūo Cohācjūre tiquina ohoriro sahata, tiquinare ñañe marieñequinare Cohācjūre oho duaja.

¹⁷Sa yegū Jesucristore wacū tutuagū ijigū Cohācjū tiqiro buhe duti cūrigū ijigū bucueye mehna buheaja mū sare. ¹⁸⁻¹⁹Apequina judio masa ijieyequinare Cristo yedohoye mehna tiquinare yūhu buhegū tuhoye, yūhu yerire ihñañe, Cohācjū tutuaye mehna ye ihñorire ihñañe, Espiritu Santo tiqiro tutuaye mehna tiquina Cristore wacū tutuari. Ahri pūritare mū sare pototi yahu duaja. Apequinapū tiquina yerire yahueraja. Jerusalēpū coā yūhu buhe ducari bato ijipihtiye macaripū buhe ducan. Tee Ilirico yehpapū gūhure Cristo ye buheye quehnoañe buheyere buhei esau. ²⁰Sa yegū Cristo yere masieñequina dihitare quehnoañe buheyere tutuaro buhe duau, yūhu mehna cjēna tiquina buhenohriquinapūre buhe dueragū. ²¹Sata ni ojoahye Cohācjū yere tiquina ojoari pūpū:

Panopu tiqirore ne tuhoerariquina tiqirore masieta. Sa ye tiqirore ne tuhoerariquina tiqirore yere quehnoano tuhoeta, ni ojoahye Cohäcjü yere tiquina ojoari püpu.

Pablo Romapu tiqirore wahatire yahuahye

²² Sa yegu ijipihti cjenare buherigu ijigu peye tahari musa cahapu waha duepeguta waha masiedahti. ²³ Yojopure ahri yehparipure yuhu dahraye pihia wahari. Sa pihigü ihñagü, peye cuhmari musa cahapu waha duarigu ijigu musa cahapu wahautja. ²⁴ Sa ye Espanapu wahagu musare topu ihña yuhdu cäutja. Sa yegu musa mehna bucueitja. Sa yegu musa mehna yuhu mehenogã ijiri bato yuhure musa yedohoye mehna Espanapu wahautja. ²⁵ Yojopure Jerusalëpu wahau tuu niaja. To cjenare Jesu yequinare yuhu acayere niñerure sogu wahau tuu niaja. ²⁶ Macedonia yehpa cjenä, Acaya yehpa cjenä gühu quehnoano mehna Jesu yequinare Jerusalëpu ijieyequinare pejecuoyequinare niñerure ohori tiquinare yedohoye. Sa yegu tiquinare tire oho basagu wahau tuu niaja. ²⁷ Ti niñerure ohoye, quehnoano mehna ohori tiquina. Tiquina sa yegü quehnoarüne, yuhu tuhutugü. Tiquinare judio masa ijieyequinare judio masa pehe Cohäcjü yere buhe muhtari. Sa ye tiquinare tiqiro yuhduoato gühure buhe muhtari judio masa. Tiquina sa buhegü ihñagü Macedonia cjenä, Acaya cjenä mehna tiquinare tiquina yedohogü quehnoarüne yuhure. Tiquinare tiquina buheri wapa yero saha ijire ti, yuhu tuhutugü. ²⁸ Sa yegu Jerusalë cjenare ti niñerure oho tuhasagu Espanapu wahautja. Topu wahagu musare ihña yuhdu cäutja. ²⁹ Sa yegu musa cahapu yuhu wahagü

Cristo yere musare yuhu buhegü tiqirore musare quehnoano jeripohna tigü yerota.

³⁰ Yuhu acaye, mari puhtoro Jesucristo wacü tutuare musa. Sa yena Espiritu Santo tutuaye mehna apequinare cahine musa. Sa yena yuhu gühure tutuaro sini basaya Cohäcjüre. ³¹ Ohö saha ni sini basaya: Judea yehpa cjenä Jesure ño peoyequina yuhure tiquina ñano ye duagü Cohäcjü yuhure tiqirore yedohoato saha sini basaya. Sa yena Jerusalë cjenare niñerure yuhu ohogü tiquina tire bucueye mehna tiquina ñeheatu saha sini basaya. ³² Musa sa sinigü Cohäcjü cahmegü bucueye mehna musa cahapu wahautja. Sa yegu musa mehna ijigu bucueye mehna soutja. ³³ Cohäcjü marine quehnoano ijigü yeriquiro musa mehna ijiducuahro. Sata ijiaho.

Pablo quehnoa dutiahye

16 Mari acayoro Febe wame tiricoro musa cahapu waharo taro nine. Ticoro Cencrea wame tiri macapu Jesu yequinare cahmecoañequinare yedohoricoro ijire. ² Sa yero peyequinare yedohoricoro yuhu gühure yedohoricoro ijiri ticoro. Sa yero mari puhtoro Jesu yacoro ijire. Sa yena ticorore quehnoano mehna piti caya. Sata yero cahmene marine Jesu yequinare. Sa yena apee boro ticorore mariedagü ihñana ticorore ohoya musa. ³ Aquila, tiqiro namono Priscila gühu quehnoahdo. Jesucristo yere yuhu buhegü tiquina gühu yuhu mehna dahrari. ⁴ Tiquinare meheni wejemedi, apequina yuhure tiquina wejë duagü tiquina yedohori buhiri. Sa yegu tiquina mehna bucueaja yuhu. Sa ye judio masa ijieyequina Jesu yequina ijipihtiequina tiquina gühu tiquina mehna bucuere. ⁵ Sa ye Aquila ya wuhapu cahmecoañequina gühu Jesu yequina quehnoahdo. Yuhu

cahīniqiro Epeneto gūhū quehnoahdo. Tiquiro Asia yehpa cjūno topū ijiro Cristore wacū tutua mūhtariqiro ijiri. ⁶María gūhū quehnoahdo. Ticoro mūsa mehna tutuaro dahrari. ⁷Yūhū acaye Andronico, Junia gūhū quehnoahdo. Peresupū yūhū ijigū tiquinata yūhure piti tiyequina ijiri. Sa ye yūhū pano Cristore wacū tutua mūhtari tiquina pehe. Apequina Jesu cūriquina pehe tiquinare “Potota quehnoañequina ijire”, ni yahuducure.

⁸Amplia gūhū yūhū cahīniqiro Jesu yaqiro ijire. Tiquiro quehnoahdo. ⁹Sa yero Urbano gūhū quehnoahdo. Tiquiro gūhū mari mehna Cristo yere dahrari. Sa yero yūhū cahīniqiro Estaqui quehnoahdo. ¹⁰Sa yero Apele gūhū quehnoahdo. Tiquiro potota quehnoano Jesure wacū tutuare. Tiquiro yerire ihñana tire masiaja mari. Sa ye Aristobulo ya wūhū cjēna ijipihtiyequina tiquiro namono tiquiro pohne gūhū quehnoahdo. ¹¹Yūhū acayuro Herodiō quehnoahdo. Sa ye Narciso ya wūhū cjēna Jesu yequina quehnoa pihti cāhdo. ¹²Sa ye Trifena, Trifosa gūhū quehnoahdo. Ti numia mari pūhtoro Jesu ye dahrayere tutuaro yere. Mari cahīnicoro Pérsida gūhū quehnoahdo. Ticoro mari pūhtoro yere tutuaro dahrari. ¹³Sa yero Rufo mari pūhtoro Jesure quehnoano wacū tutuariqiro, tiquiro yere quehnoano yeriquiro quehnoahdo. Tiquiro pacoro gūhū quehnoahdo. Ticoro yūhū paco yero saha ijiricoro ijire. ¹⁴Asincrito, Flegonte, Herma, Patroba, Herme, apequina Jesu yequina tiquina mehna cjēna gūhū quehnoahdo. ¹⁵Sa ye Filologo, Julia, Nereo, tiquiro bahoro gūhū, Olimpa, apequina tiquina mehna cjēna gūhū Jesu yequina quehnoahdo.

¹⁶Sa yena mūsa mehna cjēnare piti cana, quehnoano mehna piti caya. Ijip-

ihtiyequina Jesu yequina ijipihtiro cjēna mūsare quehnoa dutire.

¹⁷Yūhū acaye, mūsa mehna cjēna ihquēquina mūsare cahme ihña tuhtigū yevequina, cahme tu wagū yevequina ijiñohti. Sa ye mūsare Jesu ye buheyere dojomehnene. Sa yena sa yevequinare ihñana quehnoano yeya, “Dojomehneri”, nina. Sa ijiyequinare piti tieracāhña. ¹⁸Sa yevequina mari pūhtoro Jesucristo yere yerare. Ñañene tiquina tutuaro cahmeñe dihitare yere. Sa ye quehnoano tūho coaro dero majare doco ni meho buhere quehnoano masieñequinare. Tiquina sa ni mehogū tiquinare quehnoano tūhore. Sa yena tiquinare piti tieracāhña mūsa. ¹⁹Mūsa pehe Jesure quehnoano yūhtina ijiñohti. Tire ijipihtiyequina masine. Sa quehnoano yūhtina mūsa ijigū bucueaja yūhū. Sa yegu quehnoano mūsa yeatire mūsa masigū cahmeaja yūhū. Sa yegu ne ñañene mūsa yeragū gūhure cahmeaja yūhū. ²⁰Sa yero Cohācjū marine quehnoano ijigū yeriquiro mehenogā bato mūsare yedohorota “Satanare yūhduducaahro”, nino. Mari pūhtoro Jesucristo mehna mūsare quehnoa dutiaja.

²¹Timoteo yūhū piti mūsare quehnoa dutire. Yūhū acaye judio masa gūhū, Lucio, Jasō, Sosipate mūsare quehnoa dutire.

²²Yūhū Tercio ahri pūre Pablöre oja basagū ijiaja. Yūhū Jesu yaqiro ijigu mūsare Jesu yequinare quehnoa dutiaja.

²³Gayo ya wūhūpū ijigū niaja yūhū Pablo. Tiquiro ya wūhūpū Jesu yequina cahmecoare. Tiquiro gūhū mūsare quehnoa dutire. Sa yero Erasto ahri maca cjēna pūhtoare niñeru ihbo cohteriquiro mūsare quehnoa dutire. Mari acayuro Jesu yaqiro Cuarto gūhū mūsare quehnoa dutire.

[²⁴Mari pūhtoro Jesucristo mehna mūsare ijipihtinare quehnoa dutiaja.]

**Pablo Cohãcjüre ño
peoro oja bato tiahye**

²⁵⁻²⁷ Mari puhtoro Jesucristo ye buheye mehna quehnoañe buheye mehna Cohãcjũ musare tiquirore wacũ tutua nemogũ ye masine. Panopũre quehnoañe buheye ne masare yahuerari buheye ijimahye. Yojopũre Cohãcjũ yere yahu muhtariquina muna tiquina ojoari mehna ti buheyere yahuri jire. Yũhũ gũhũ tire buheaja. Ti buheyere

ijipihtiro cjẽna yojopũre masine. Cohãcjũ sa ijiducuriquiro tiquiro dutiro sahata tiquina masine. Ti buheyere tiquirota yahu dutiahye masa tiquirore tiquina yuhtiatire, tiquirore tiquina wacũ tutuati gãhure. Sa yena tiquirore “Potota quehnoagũ, tutuagũ ijire”, ni ño peuhna. Tiquiro ihcãquirota Cohãcjũ dihita quehnoano masi pehoriquiro ijire. Jesucristo yedohoye mehna Cohãcjüre sa ño peoducuuhna mari. Sata ijiducuuhna.

1 Corintios

Pablo Cohãcjũ yequinare Corinto cãnare ojoa ohoahye

1¹⁻² Yũhũ Pablo, Jesucristo yere buhe duti tiquiro cũrigũ ijiaja. Cohãcjũ tiquiro cahmeno sahata Jesu tiquiro cũacjũre beseahye yũhũre tiquiro. Musare Cohãcjũ yequinare Corinto cãnare ojoa ohoaja yũhũ. Sostene mehna quehnoa dutiaja musare. Ahriquiroy gũhũ mari acayũro Jesu yaquiroy ijire. Jesucristo mehna cãna musa ijigũ Cohãcjũ yequina ijiana beseahye Jesu musare. Sa ye ijipihtiyequina apequina mari puhtoro Jesucristore siniñequina ijiye, tiquina gũhũ Cohãcjũ yequinata ijire. Tiquina sa ijigũ Jesucristo pehe mari ijipihtina puhtoro ijire. Sa yena musare ijipihtinare ojoa ohoaja yũhũ. ³ Sa yena Cohãcjũ mari Pacũ, mari puhtoro Jesucristo mehna musare quehnoa dutiaja. Tiquina yedohoye mehna quehnoano ijiya musa.

Jesucristo pehe musare quehnoano ye basahye mari Pacũ tiquirore dutiriro sahata

⁴ Jesucristo yequina musa ijiri bato tiquiro pehe musare quehnoano ye basare Cohãcjũre. Tiquiro sa yegũ ihñagu, Cohãcjũre “Quehnoare”, niducujaja yũhũ decoripe. ⁵ Cristo yequina musa ijigũ ihñano Cohãcjũ pehe musare quehnoano ijigũ yere. Sa yero tiquiro yere musare apequinare quehnoano yahuanare yeri tiquiro. Sa yero tiquiro yere quehnoano masigũ yeri musare. ⁶ Cristo yere musare usã buheriro sahata sata wahari musare, Cristo yequina musa wahagũ. ⁷ Sa yero Cohãcjũ musare quehnoano yedoho peho cãnota. Mari puhtoro Jesucristo

ahri yehpapũ tiquiro tojoa tatire musa cohtero watoa Cohãcjũ pehe musare sa yedohoducurota. ⁸ Sa yero Jesucristo pehe musa ñañe yerire cohãriquiroy ijire. Tiquiro sa ijiriquiroy ijigũ musa pehe decoripe, ahri deco pihtigũpũ gũhũre musa ñañe yerire tiquiro cohãnohrina ijiducunata. Sata tiquiro musare yedohorota. Sa yena Jesucristo mari puhtoro tiquiro tojoa tagũpũre ñañe buhiri mariena ijinata musa. ⁹ Tire Cohãcjũ tiquiro nidiro sahata tiquiro yere. Tiquiro macũno mari puhtoro Jesucristo yequina ijianare marine beseahye. Tiquiro sa besenohrinare Jesu yequina ijigũ yeri marine.

Jesu yequina Corinto cãnã cahmecoañe cahme tuhtiahye

¹⁰ Yũhũ acaye, mari puhtoro Jesucristo tiquiro dutiro mehna musare tutuaro dutigu tagu niaja ahrire: Musa basi cahme tuhtieracãhña. Sa yena musa basi cahme tu waeracãhña. Ihcã curuata ijiya musa. Sa yena sijoro saha ni yahuducueracãhña musa basi. Sa yena musa yeatire tuhotuna, ihcãno mehna yeya musa.

¹¹ Yũhũ acaye, musa basi cahme tuhtina niñohti musa. Sa ni yahuri Cloe ya wũhũ cãnã yũhũre. ¹² Ihquẽquina musa mehna cãnã ohõ saha ni cahme tuhtiñohti: “Pablo ya curua cãnã ijiaja usã”, ni cahme tuhtiñohti ihquẽquina musa. Sa ye apequina “Apolo ya curua cãnã ijiaja usã”, niñohti tiquina gũhũ. Sa ye apequina pehe “Pedro ya curua cãnã ijiaja usã”, niñohti tiquina gũhũ. Sa ye apequina pehe “Cristo ya curua cãnã ijiaja usã”, niñohti tiquina gũhũ. ¹³ Musa sa niepegũta Cristo yequina ihcã curuata ijiaja mari. Mari basi cahme tu wa doco masiedaja mari. Ihcã curuata ijiaja mari. Yũhũ Cristo ijieraja. Tiquiro yero saha musa ye buhirire curusapũ yariarigu ijierũ. Tutuayere cuo-

eraja. Sa yegu ihyo ijigũ ijiaja. Sa yero m̄sare apequiro wame yero, Cristo ye tutuaye mehna wame yeri. Yee tutuaye mehna wame yerari. ¹⁴M̄sare, m̄sa mehna cj̄ena gũhure wame yeru yuhũ. Crispore, Gayo gũhure tiquina dihitare wame yei. Apequina pehere wame yerarigũ yuhũ ijigũ quehnoare yuhure. ¹⁵Peyequina masare wame yerigũ yuhũ ijigũ “Pablo ye tutuaye mehna tiquiro wame yeri us̄are”, ni ih̄naboaga m̄sa yuhure. Sa yegu tire cahmedũ. ¹⁶Estefana ya wuhũ cj̄ena gũhure wame yei yuhũ. Topequinata wame yei yuhũ. Apequinare yuhũ wame yeriquinare boaa wahau yuhũ. ¹⁷Cristo yuhure ohoro, wame yeacj̄ure c̄uedari tiquiro yuhure. Quehnoañe buheyere buheacj̄u pehere c̄uri yuhure. Cristo curusapũ tiquiro yariarire yahuye buheye marine quehnoana wahagũ yere. Tiquiro sa yepegũta quehnoañe buheyere yuhũ esa tuharo yuhũ buhegũ yuhũ pehere ih̄na wah̄aboaga m̄sa. M̄sa sa ih̄na wah̄ana quehnoañe buheye pehere ño peeraboaga m̄sa. Sa yena quehnoana wah̄aeraboaga. Sa yegu Jesu ye buheyere buhegu yuhũ esa tuharo yuhũ masiñe mehna buheraja yuhũ.

Coh̄acj̄ũ tiquiro tutuayere tiquiro masiñe gũhure cuoriquiro ijire Cristo

¹⁸Pecapũ butiatiquina pehe Cristo curusapũ tiquiro yariarire yahuye buheyere “Tũho masiñequina ye buheye ijire ti”, nimene butiatiquina pehe. Mari pehe Cristo tiquiro yuh̄duonohatina ijina oh̄o saha niaja: “Curusapũ tiquiro yariarire yahuye buheye ti waro ijiro nine. Ti buheye Coh̄acj̄ũ tiquiro tutuayere yahure marine”, niaja mari. ¹⁹Coh̄acj̄ũ pehe tiquiro yere tiquina ojoari p̄p̄ũ oh̄o saha nine: Ahri yehpa cj̄enare “Quehnoano masiñequina ijire”, tiquina niñequinare

tiquina masidire d̄uhseati ijieragũ masigũ yeitja yuhũ, niahye Coh̄acj̄ũ tiquiro yere tiquina ojoari p̄p̄ũ.

²⁰Sa ye ahri yehpa cj̄ena quehnoano masiñequina d̄uhseatiquina ijierare. Us̄a acaye judio masare buheyequina gũhũ d̄uhseatiquina ijierare. Yojobure yahuducu mihniñequina gũhũ d̄uhseatiquina ijierare. Ahri yehpa cj̄ena quehnoano masiñequina tiquina ijiepegũta masiñequina tiquina ijiyere masigũ yeri Coh̄acj̄ũ. ²¹Coh̄acj̄ũ p̄urita quehnoano masiniquiro ijire. Tiquiro sa ijigũ ahri yehpa cj̄ena tiquina esa tuharo tiquina masiñe mehna Coh̄acj̄ũre ne masiedare tiquina. Coh̄acj̄ũ tiquiro masi dutiero sahata sa wahari tiquinare. Coh̄acj̄ũre cahmeeñequina pehe oh̄o saha nine quehnoañe buheye warore: “Tũho masiñequina ye buheye ijire”, nimene. Sa yeye quehnoañe buheyere “Tũho masiñe buheye”, tiquina niñe buheyere tuhoye, Cristore masi d̄ucare masa. Tiquina sa masi d̄ucagũ Cristore tiquina wacũ tutuagũ ih̄nano tiquinare tiquiro yequina wahagũ yere Coh̄acj̄ũ. Sa waha dutiri tiquiro.

²²Judio masa Coh̄acj̄ũ tutuaye mehna tiquiro ye ih̄norire ih̄na duaye nine. Sa yeye griego masa pehe, judio masa ijieyequina pehe quehnoano tiquina masiatire macañe nine. ²³Mari pehe Cristo curusapũ tiquiro yariarire yahuye buheyere buheaja mari. Ti buheyere judio masa pehe ih̄na tuhtire. Sa ye ti buheyere judio masa ijieyequina pehe “Tũho masiñequina ye buheye ijire”, ni tuhoture. ²⁴Tiquina sa ni tuhotuepegũta Coh̄acj̄ũ yequina ijiatire tiquiro beseriquina pehe ti buheyere oh̄o saha nine. “Cristo ye buheye Coh̄acj̄ũ tutuayere tiquiro quehnoano masiñene masigũ yere marine”, nine tiquina ahri buheyere. Tiquina judio masa, judio masa ijieyequina ijiepete, sa nine Jesu yequina.

²⁵ Cohācjū masi pehoriqiro ijire. “Tiquiro tūho masieniqiro ijire”, masa tiquina ni tūhotuepegūta ahri yehpa cjēna yūhdūoro quehnoano masi pehoriqiro ijire tiquiro. Sa yero Cohācjūre “Tutueriqiro ijire”, masa tiquina ni tūhotuepegūta tiquina bui tutua yūhdūducariqiro ijire tiquiro. ²⁶ Ti yūhū nidi ijirota ijire.

Yūhū acaye, Cohācjū musare tiquiro yequina wahagū tiquiro yegū mūsa peyequina ihyo ijina mūsa ijire wacūna mūsa. Ahri yehpa cjēnare “Quehnoano masiñequina”, tiquina niñequinare meheñequinagā Jesu yequina ijatiquinare beseahye Cohācjū. Sa yero pūhtoa gūhūre meheñequinagā Jesu yequina ijatiquinare beseahye tiquiro. Sa yero pūhtoa pohne gūhūre meheñequinagā Jesu yequina ijatiquinare beseahye tiquiro. ²⁷ “Tūho masiñequina ijire”, tiquina niñequinare Cohācjū beseahye “Quehnoano masiñequina ijire”, tiquina niñequina tiquina būoro wahatire. Sa yero “Wacū tutueyequina ijire”, tiquina niñequinare Cohācjū beseahye, “Wacū tutuayequina ijire”, tiquina niñequina tiquina būoro wahatire. ²⁸ Masa tiquina ihña tuhtiequinare “Dūhseatiquina ijierare”, nine masa. Tiquina sa nidiquinare Cohācjū tiquiro yequina ijatiquinare beseahye tiquinare. Sa besero “Pūhtoa waro ijire”, tiquina niñequinare ihyo ijiyequina tiquina ijiyere masigū yeahye Cohācjū tiquinare. ²⁹ Tiquiro sa yegū ahri yehpa cjēna ne ihcāqiro “Tutuagu, quehnoano masigu ijiaja”, ne ni yūhdūduca masiedare, Cohācjū ihñonopū.

³⁰ Cohācjū pehe marine Jesu yequina ijigū yeri. Tiquiro yequina ijina marine tiquiro yūhdūori bato ijipihtiye decori Cohācjū mehna ijinata mari. Jesucristo pehe Cohācjū yere quehnoano

masigū yere marine. Sa yero mari ñañe buhirire cohāre. Sa yero mari ñañe yerire cosero, marine “Quehnoañequina ijire”, Cohācjū ni ihñagū yere Cristo Cohācjūre. Sa yero marine pecapū waha-borinare yūhdūore. ³¹ Tiquiro sa yegū Cohācjū yere tiquina ojoari pūpu tiquiro ni ojoariro sahata sa wahare: “Yūhū esa tuharo masi pehogū ijiaja’, nidiquiro tire niedacāhdo. Ohō saha ni-ahdo: ‘Mari pūhtoro Cristo pehe marine yūhdūoriquiro ijire’, niahdo tiquiro”, nine Cohācjū yere tiquina ojoari pūpu.

Ahri buheye Cristo curusapū tiquiro yariarire yahure

2 Yūhū acaye, mūsa cahapū esagu “Quehnoano masi pehoaja”, musare ni buherū. Cohācjū yere musare buhegu, sa ni buhegu niedū. ² “Ohō saha ni buheitja”, nigū mūsa mehna ijigū Jesucristo ye dihitare curusapū tiquiro yari-ari dihitare wacūgu, ti buheyere buhei yūhū. ³ Sa yegu mūsa mehna ijigū ihyo ijigū yero saha ijii yūhū. Sa yegu Cohācjū yere queoro buhe duagu ijigū cuegu, nanaredigu yero saha ijii yūhū. ⁴ Sa yegu Cohācjū yere buhegu, “Masi pehoaja”, ni buherū. Tiquiro yere yūhū buhegū Espiritu Santo tutuaye mehna yūhū buhegū ihñari mūsa. ⁵ Ohō sahata ni buhei yūhū musare masa tiquina esa tuharo buheye pehere mūsa cahmedatire. Cohācjū pehere mūsa wacū tuatire sa ni buhei yūhū.

Espiritu Santo pehe Cohācjū ijiye tiyere buhere marine

⁶ Sa yena Cohācjū ye buheyere tiquiro masiñene musare Jesure quehnoano wacū tutuanapūre yahuaja ūsā. Masa tiquina esa tuharo tiquina buheye yero saha ijierare ahri musare ūsā buheye. Ti buheye pūhtoa ye buheye gūhū ijierare. Tiquina pūhtoa pehe pihtia wahaeta. ⁷ Apequina tiquina masiedarire

Cohăcjŭ ye yahuducuyere yahuaja usă pehe. Panopŭ ahri buheyere Cohăcjŭ yequina mŭna quehnoano masi pehorerahye. Ahri yehpa ijiato pano ahri buheye ti nidiro sahata “Sata wahaahro”, ni tuhasahye Cohăcjŭ. Marine pecapŭ wahaborinare tiqiro yahduoatire, tiqiro mehna mari ijiati gŭhŭre “Sata wahaahro”, ni tuhasae tiahye tiqiro. ⁸Tiqiro sa nigŭ Cohăcjŭre cahmeeŭequina pŭhtoa ne tiqiro ye buheyere tuho dureray, masiedare. Tire quehnoano masiŭne, mari pŭhtorore Cohăcjŭ macŭno warore curusapŭ quē biha wejēdaboaya tiquina. ⁹Cohăcjŭ yere tiquina ojoari pŭpŭ ohō saha nine:

Ijipilhtyequina Cohăcjŭre cahŭnequina ye ijiatire Cohăcjŭ quehnoano quehno basa tuhasahye. Quehnoa yahduyere tiqiro quehno basahye. Tire masa ne ihŭedari. Sa ye tire ne tuhoerari. Tire dŭhse masino basioerare marine, nine Cohăcjŭ yere tiquina ojoari pŭpŭ.

¹⁰Tiqiro sa niepegŭta Espŭritu Santo pehe Cohăcjŭ yere masigŭ yere marine. Ijipilhtye Cohăcjŭ yere Espŭritu Santo masi pehore. Sa masino tiqiro marine tire masigŭ yere.

¹¹Ne apequina pehe masŭno tiqiro masiŭnene ne masiedare. Sa ijiepegŭta masŭno pehe tiqiro esa tuharo tiqiro wacŭŭnepŭ tiqiro tuhotuyere masine. Sata apequina Cohăcjŭ tiqiro masiŭnene ne masiedare. Cohăcjŭ yaqiro Espŭritu Santo dihita tiqiro masiŭnene masine, masŭno tiqiro esa tuharo tiqiro wacŭŭnene tiqiro masino sahata. ¹²Sa yena mari pehe Jesu yequina ijina masa tiquina esa tuharo tiquina buheyere cŭoreraja. Cohăcjŭ yaqiro Espŭritu Santore ohoŭi marine masigŭ yero taro. Marine tiqiro quehnoano yeatire masigŭ yere Espŭritu Santo pehe. ¹³Sa yena Cohăcjŭ yere musare buhena, masa ye masiŭne mehna usă esa tuharo buher-

aja usă. Espŭritu Santo tiqiro buheye pehere musare buheaja. Sa buhena Espŭritu Santore cŭoyequinare Cohăcjŭ yere quehnoano buheaja usă.

¹⁴Espŭritu Santore cŭoyequina pehe Espŭritu Santo yere ne cahmedare. “Tiqiro ye ihyo warota ijire”, nimene tiquina. Espŭritu Santo tiqiro yedohoro marieno tiqiro yere masino basioerare masare. Sa ye tiquina tiqiro yere ne masiedare. Espŭritu Santo yedohoro mehna tiqiro yere masiaja mari. ¹⁵Espŭritu Santore cŭoyequina pehe Cohăcjŭ yere quehnoano masine. Apequina pehe tiquinare “Quehnoaŭnequina ijire. Naŭnequina ijire”, ni bese masiedare Espŭritu Santore cŭoyequinare. ¹⁶Ohō saha nine Cohăcjŭ yere tiquina ojoari pŭpŭ: “Mari pŭhtoro Cristo tiqiro tuhotuyere masiŭnequina ne mariedare. Sa ye tiqirore masa duti masiedare”, nine tiqiro yere tiquina ojoari pŭpŭ. Mari pehe Cristo yequina ijina, Cristo yero sahata masiaja.

Jesu yequina ihcāno saha Cohăcjŭre dahra cohteyequina ijire

3¹⁻²Yŭhŭ acaye, musare buhegŭ Espŭritu Santore quehnoano yahŭtiyequinare yahŭ buheriro sahata buhe masiedŭ mŭsa pehere. Cristo yequina ijiepenata, macanagă dihire tiquina ihya masieno saha Cohăcjŭ yere quehnoano masiedare mŭsa. Yojopŭ gŭhŭre quehnoano masiedaŭhti mŭsa. Ahri yehpa cŭjēna naŭnequina yero saha tuhotuŭhti mŭsa. Sa yena macanagă epēcore tiquina apŭno saha mijoeda cŭjŭne buheye dihitare tuhoŭhti mŭsa. Sa yegŭ ti yero saha ijiye buheye dihitare buhei musare. Cristo yequina ijiepenata macanagă tiquina ihya masieno sahata Cristo yere quehnoano masiedaŭhti mŭsa. ³Mŭsa pehe mŭsa mehna cŭjēnare cahme coona, cahmequena, mŭsa

basi ihquē cururi tu waduca sana, Espiritu Santore cwoeyequina yero saha yena niñohti musa. Sa yena ahri yehpa cjēna Cristore cahmeeñequina yero saha yeñohti musa. ⁴Ohō saha niñohti musa: “Pablo ya curua cjāna ijiaja usā”, niñohti musa ihquēquina. Sa yena apequina musa mehna cjēna pehe “Apolo ya curua cjāna ijiaja usā”, niñohti. Musa sa ni yahuducuna Espiritu Santo marieñequina yero saha ni yahuducuñohti musa.

⁵¿Yuhū Pablo, Apolo mehna duh-seanaja ijiajari usā, musa tuhogū? Ohō saha yeanaja ijina niaja usā: Cohācjū tiquiro dutiriro sahata tiquirore dahra cohtena ihyo ijina ijiaja usā. Sa yena musare usā buhegū tuhona Jesucristore wacū tutua ducare musa. ⁶Quehnoañe buheyere buheyequina wesepe dahrayequina yero saha ijire, mari queoye mehna buhegū. Wese upuro tiquiro ote muhtariro saha yuhū gūhu musare buhe muhtau. Sa yero apequiro wesere tiquiro cure nunu tāno saha Apolo pehe yuhū bato musare buhe nunu tāri. Usā sa buhepegūta wese cjē oteyere bucua nemogū tiquiro yeriro saha Cohācjū pehe musare tiquiro yere masi nemogū yeri. ⁷Sa yegu yuhū buhe muhtarigu ijiepeguta ihyo ijigu ijiaja. Sa yero Apolo yuhū bato buhe nemoriquiro gūhu ihyo ijiriquirota ijire. Cohācjū pūrta oteyere tiquiro bucua nemogū yeriro saha tiquiro yequinare tiquirore masi nemogū yere. Sa yena Cohācjū pehere ño peoro cahmene musare. ⁸Ote muhtariquiro, came cure nunu tāriquiro ihcāno saha dahra cohteyequina ihyo ijiyequinata ijimene tiquina. Sa ye tiquina dahrariro punota wapatare tiquina. Sata ijiaja usā, Apolo mehna. ⁹Sa yena usā Cohācjū yere dahra cohtena ijiaja. Sa yero Apolo yuhū mehna cjūno ijire. Usā sa ijigū musa pehe Cohācjū ya wese yero saha ijire. Musa sa

ijigū Cohācjū ya wese cjē oteyere tiquiro bucua nemogū yero saha musare tiquiro yere masi nemogū yerota tiquiro.

Sa ye Cohācjū musare tiquiro yequinare quehnoari curua yero nine. Sa yena utā mehna tiquina yeri wuhū yero saha ijire musa tiquiro ya curua cjāna, mari queoye mehna buhegū. ¹⁰Musa sa ijigū Cohācjū yuhūre tiquiro dutiriro sahata yuhū pehe wuhū dahre mihnidiquiro utāre tiquiro cū muhtariro sahata Jesucristo yere musare buhe muhtau. Sa yero ti utā paca bui apequiro tiquiro ye nemo mujano sahata apequiro yuhū bato buhe nemo nunu tāno nine. Sa buhe nemono quehnoano mehna buherota. Sa yero Cristo ye dihitare buherota tiquiro. Sata buheahro tiquiro. ¹¹Wuhūre tiquina dahre dūca tiquina cū muhtariro saha ijire Cristo. Sa yena ti utāre usā quehnoano cū muhtariro saha Cristo yere buhe tuhasau. Apequiro ye buheye pehere mari buhegū quehnoaedaga.

¹²⁻¹⁵Uru mehna, plata mehna, wapa bujuye utā paca mehna mari yeri wuhūre mari ujūa tuhugū ujūedare. Sata Jesucristo yere mari quehnoano yeri bato pihtiri deco ijigū Cohācjū mari yerire ujūa tuhuriro saha yerota mari yerire masino taro. Sa tiquiro yegū quehnoano yeri wuhū ujūedariro saha mari yerire ti quehnoañe ijigū masinota. Sa yero mari quehnoano yerina mari ijigū masigū yerota tiquiro. Quehnoano mari yeri wapa quehnoano yerota marine.

Sa yero yucuri mehna, taa mehna, ñaidi pūri mehna mari yeri wuhūre mari ujūa tuhugū ujūa wahare. Sata Jesucristo yere mari quehnoano yerari bato pihtiri deco ijigū, Cohācjū mari yerire ujūa tuhuro yero saha yerota mari yerire masino taro. Sata tiquiro yegū ñano yeri wuhū ti wuhū ujūariro saha mari yerire ñañe ijigū masinota.

Sa yero mari quehnoano yerari bato ijigũ marine masigũ yerota tiquiro. Sa yero quehnoano yerarina mari ijigũ ihñano quehnoañene mari yemedi wapore quehnoano yesi marine. Sa ijiyequinare Cohãcjũ yuhduorota. Sa ye sa quehnoano yerariquina mehenogã mehna yuhdueta.

¹⁶Musa pehe Jesu yequina Cohãcjũ ya wuhu yero saha ijire. Musa sa ijigũ ihñano ti wuhupũ tiquiro ijiboro saha Espiritu Santo pehe musa mehna ijire. ¿Tire masiedajari musa? ¹⁷Cohãcjũ ya wuhu ñañe marieni wuhu ijire. Sa yena musa gũhu ti wuhu yero saha ijina tiquiro yequina waro ijire. Sa yero Jesu yequinare ihcãquiro dojomehnegũ Cohãcjũ pecapũ cohãnota tiquiro pehere.

¹⁸Ni mehoñene tuhoturacãhña musa. “Yojopũ cjẽna ye masiñene quehnoano masiaja”, ni tuhoturiquiro musa mehna cjũno ijiro Jesu ye pehere quehnoano masiahdo. Tiquiro sa masigũ ihñañe apequina tiquirore “Tũho masieniquiro ijire”, nieta. Sa yero Jesu yere masino, potota quehnoano masidiquiro waharota. ¹⁹Masa esa tuharo tiquina basi tiquina masiñene “Ihyo warota ijire”, ni tuhature Cohãcjũ. Sata nine Cohãcjũ yere tiquina ojoari pũpũ: “Tiquina esa tuharo masiñequina tiquina masiñe duhseati ijierare, Cohãcjũ tiquiro ihñagũ. Sa yero tiquina cahmeno saha yeragũ yere tiquinare”, nine Cohãcjũ yere tiquina ojoari pũpũ. ²⁰Sa ye ape pũpũ ohõ saha nine: “Masa tiquina esa tuharo masi pehoyequina tiquina tuhutuye duhseati ijieragũ masine mari puhtoro Cohãcjũ pehe”, nine Cohãcjũ yere tiquina ojoari pũpũ.

²¹⁻²²Sa yena “Pablo ya curua cjãna ijiaja usã”, niedacãhña. “Apolo ya curua cjãna ijiaja usã”, niedacãhña. “Pedro ya curua cjãna ijiaja usã”, niedacãhña. Usã ijipihtina musa yequina dihita iji-

aja. Ijipihtiyeye musa ye ijire. Cohãcjũ tiquiro bajumehnedire, catiye gũhure ohori musare. Sa yero pecapũ wahaeragũ yerota musare. Yojopũ ijiyere, camepũ ijiati gũhure musare ohorota. Sa ye ijipihtiyeye musa ye ijire. ²³Sa yena musa pehe Cristo yequina ijire. Sa yero Cristo pehe Cohãcjũ yaquiro ijire.

Cristo tiquiro yere buhe duti tiquiro cũriquina tiquina dahrayere yahuahye Pablo

4 Ohõ saha ni tuhutuya musa yuhure Apolo gũhure: “Tiquina Cristore dahra cohteyequina ijire. Sa ye masa tiquina masiedarire Cohãcjũ yere buheyequina ijire”, ni, tuhutuya musa usãre. ²Dahra cohteyequinare tiquina puhtoro tiquiro dutiriro saha ye cohtero cahmene tiquinare. Yuhu gũhure sata yero cahmene Cristore. ³Sa ijiepegũta yuhure musa yahu wajaepẽgũta sa tuhutu cjã yuhu. Apequina puhtoa yuhure tiquina yahu wajaepẽgũta sa tuhutu cjã yuhu. Yuhu yerire ihñana “Ahri quehnoañe ijire. Ahri ñañe ijire”, ni masiedare musa. Yuhu gũhu masuta ijiaja. Sa yegu yuhu yerire quehnoano masi pehoeraja yuhu gũhu.

⁴“Cristo yere yuhu yuhduducari yuhure mariedare”, ni tuhutumaja yuhu. Yuhu ohõ saha ni tuhotivepegũta buhiri tiboaga yuhu. Mari puhtoro Cristo dihita yuhu yerire ihñano, quehnoano masine. ⁵Sa yena mari puhtoro tiquiro tojoa tato pano masare ñano ni yahu wajaeracãhña musa. Tiquiro tojoa taro masa tiquina yerire, panopũ apequina tiquina masiedarire Cristo masigũ yerota. Sa yero mari ye duayere, mari tuhutuyere tiquiro masigũ yerota. Sa yero tiquiro yere yeriquinare “Musa quehnoano yeri”, ninota Cohãcjũ.

⁶Yuhu acaye, yuhu Apolo mehna usã buherire yahuu yuhu, musare buhegu tagũ. Sa ni yahuu yuhu Cohãcjũ tiquiro

yere tiquina ojoari pūpū tiquiro nidiro sahata mūsa yeducuatire. Sa yena mūsa mehna cjenare ihcāno saha cahme ño peoya. Ihcāquiroreta ño peoeracāhña. ⁷Mūsa pehe apequina yūhdūoro quehnoana ijierare. Masi yūhdūducana ijierare mūsa. Cohācjū mūsare tiquiro ohoři dihitare cūore mūsa. Sa yena mūsare tiquiro yahuri dihitare masine mūsa. ¿Mūsa esa tuharo cuona, mūsa esa tuharo masina ijierapenata, dūhse yena “Masi pehona ijijaja”, nijari mūsa? Sa nina “Cohācjū usāre ohoerari. Sa yero usāre yahuerari”, niboriro saha yere mūsa.

⁸Mūsa pehe “Cohācjū yere masi pehoaja usā. Usāre yabe boro dūhsaerare”, nimene mūsa. Sa yena mūsa cahapū usā ijieragū mūsa ohō saha ni tūhotumene: “Pūhtoa yero saha masina ijijaja usā”, ni tūhotumene mūsa. Potota Cohācjūre masi pehona pūhtoa yero saha masina mūsa ijigū mūsare quehnoa yūhdūaboaga. Mūsa sa ijigū mūsa mehna usā gūhū pūhtoa yero saha masina ijiaboaga. “Masina ijijaja usā”, ni tūhotuna, quehnoa yūhdūaro ni tūhotumene mūsa. ⁹Ohō saha ni tūhotuaja yūhū pūrita: Usāre Jesu tiquiro yere buhe dutiro cūno, ijipihtiyequina iji bato tiri cjā curua cūri usāre. Tiquina wejē dutinohriquina yero saha ijianare cūri usāre. Masa tiquina cahacjēna yero saha ijijaja usā. Ahri yehpa cjēna masa, angele gūhū cahacjēna yero saha ihñare usāre. ¹⁰Cristo yere usā buhegū ihñañe “Tūho masieñequina ijire”, nine masa usāre. Sa Cristo yere usā yegū ihñañe, usāre ihña tuhtire. Mūsa pehe quehnoa yūhdūaro Cristo yere masina ijijari mūsa. “Cohācjūre wacū tutueyequina ijire”, ni tūhotumene masa usāre. Mūsa pehe quehnoa yūhdūaro wacū tutua yūhdūana ijijari. Mūsa pehere masa ño peore. Usā pehere masa ne ño peoerare. ¹¹Usā pehe yojopure ñano yūhdūna,

ujūa ahbana, aco wūona, ñano suhti mariena, wūhūse mariena ijijaja. Sa ye apequina usāre ño peoera, usāre ñano yere. ¹²Sa yena usā tutuaro dahraja. Sa yena apequina usāre tiquina ñano yahuducuepegūta usā pehe tiquinare “Quehnoano ijijaja”, nijaja usā. Sa yena apequina usāre ñano tiquina yepegūta sa tūhotu cjā usā. ¹³Sa yena “Ñano yeyequina ijire”, usāre tiquina niepegūta usā pehe quehnoano mehna tiquinare yūhtijaja. Sa ye panopū, yojopū gūhūre ñañe wete yero saha masape cururi iji bato tiri curua cjēna yero saha ihñare masa usāre.

¹⁴⁻¹⁵Mūsare quehnoañe buheyere buhe mūtagū mūsa pacū yero saha wahau yūhū. Peyequina mūsare Cristo yere buheyequina tiquina ijiepegūta mūsare buhe mūhtarigū ihcūta ijijaja yūhū. Sa ijigū mūsare buhe tigū yegū tagū ahrire ojoagu niedū yūhū. Yūhū pohñare, yūhū cahñare yūhū dutiboriro saha mūsare quehnoano mehna dutigū tagū ahrire ojoagu yūhū. ¹⁶Sa yegū ahrire mūsare tutuaro mehna dutigū tagū nijaja yūhū. Yūhūre ihña cuña mūsa.

¹⁷Ahrire ye dutigū tagū mūsa cahapū Timoteore ohou. Tiquiro yūhū macū yero saha ijiriquiro yūhū cahñiquiro mari pūhtoro Jesu yaquiro ijire. Sa yero Cristo yere yeducure tiquiro. Cristo yere mari yeatire ijipihtiyequina Jesu yequina cahapū buhei yūhū. Timoteo tire mūsare wacūducugū yerota. Sa yegū Cristo yere yūhū yeriro sahata mūsa ihña cūato saha Timoteore ohou yūhū. ¹⁸Timoteore yūhū ohogū ihquēquina mūsa mehna cjēna pūhtoa iji duayequina ohō saha nine: “Pablo marine cuero, mari cahapū ahtasi”, ni tūhotumene tiquina. ¹⁹Cohācjū cahmegū mūsa cahapū mianogāta esautja. Sa esagu pūhtoa iji duayequinare mūsa mehna cjenare Cohācjū ye tutuayere tiquina cuogū

masigutja yuhũ. Sa yegu tiquina sa ni maca cãri gũhũre masigutja yuhũ. ²⁰“Cohãcjũ usã puhtoro ijire”, mari ni yahuepegũta tiquiro yere mari yeragũ ti mari niñe duhseati ijierare. Cohãcjũ tutuaye mehna tiquiro cahmeno saha ye masiaja. Ti ihyo waro ijierare. ²¹¿Musa cahapũ musare buhiri dahreacjũ musare tuhtiacjũ yuhũ wahagũ cahmeajari musa yuhũre? ¿O musare cahĩgũ musare bucuegũ yuhũ wahagũ cahmeajari musa yuhũre? ¿Duhse ijigũ yuhũ wahagũ cahmeajari musa?

Corinto cjẽna tiquina wuana tirire yahuahye Pablo

5 Potota ohõ saha quti tire usãre apequina: Ihcãquiro musa mehna cjũno tiquiro m̃onore wuana tiñohti. Sa ni yahuri masa usãre. Apequina pehe Cohãcjũre cahmeeñequina ijiepetata tiquina pehe sa yerare. ²Musa mehna cjũno tiquiro sa yepegũta musa pehe “Quehnoana ijiaja usã”, ni tuhotumene. ¿Duhse yena tiquiro ñano yeyere masiepenata bujũa witierajari musa? Sa yena sa ñano yeriquirore musa mehna Jesu yequina mehna ijiriquirore cohãña musa. ³⁻⁴Yuhũ musa mehna ijierapegũta yuhũ wacũñepũ musa mehnata ijiaja yuhũ. Sa yegu musa mehna ijigũ yuhũ niboriro saha ñano yeriquirore tiquiro sa ñano yeri buhiri buhiri dahre duti tuhasaja yuhũ. Jesu tiquiro dutiro mehnata sa ye dutiaja. Sa yena musa cahmecoana yuhũ wacũñe mehnepũ musa mehna yuhũ ijigũ mari puhtoro Jesu tiquiro tutuaye mehna tiquirore ñano yeriquirore cohãña, ohõ saha niña: ⁵“Watĩno tiquiro cahmeno saha mũhũre yecũnahdo”, niña tiquirore. Sata niña tiquirore ñañene tiquiro tutuaro cahmeñene tiquiro duhuatire. Musa sa cohãgũ tiquiro ñano yuhũdũrota. Mari puhtoro Jesu tiquiro tojoa tati deco ñano yeriquiro Jesu

mehna tiquiro quehnoano yuhũduatire yojopũre tiquirore sa niña.

⁶“Quehnoana ijiaja usã”, niepenata ñano yena niaga musa. Ñano yeriquirore musa sa ihña cãna, ti ñañene musa ijipihtina piha pihtia wahanata. Pãre pugũ yeye trigore ti quehnoano sehso saha ti ñañe musare piharo quehnoano sehsoa waharota. ¿Tire masiedajari musa? ⁷Yuhũ acaye judio masa pascua ijigũ ovejare wejẽ, ujuã muo, Cohãcjũre ño peore. Sata oveja tiquiro yariaro saha Cristo mari ñañe buhirire yariaa wahahye. Tiquiro sa waharire masina musa pehe ñano yeriquirore musa mehna cjũnore cohãña ti ñañe musare “Pihari” nina. Musa ñañe yerire cohã tuhasari Cristo. Sa yena ñano yeriquirore cohãña “Pari turi ti ñañene pihari”, nina. ⁸Pãre pugũ yeye trigore ti sehso saha panopũ ñañene ihña cũ, ye pihtirina ijimi mari. Sa yena pascua bose decopũ pãre pugũ yeye marieno pãre tiquina ihyariro saha mari gũhũ ñañene cahmeno marieno ñano yero marieno ijihna mari. Panopũ mari ñañene yeriro saha yeracũhna. Sa yena potota quehnoano tuhotuye mehna, quehnoañene yeihna.

⁹Musare yuhũ ojoari pũpũre Jesu yaquiro tiquiro ijiepegũta sa wuana tiducuriquirore ne piti ti dutierami. ¹⁰Sa nigũ wuana tiyequinare, apequina yere tutuaro cahmeñequinare, yaqueyequinare, “Cohãcjũ ijire”, tiquina niñe queoyere ño peoyequinare Jesu yequina tiquina ijieragũ “Tiquina mehna ijieracãhña”, niedaja. Ahri yehpapũ sa ijieyequina marieno Jesure cahmeeñequina marieno mari dihita iji masiedaja. Ijipihtiropũre ijire tiquina pehe. ¹¹Sa yegu musare ojoagu ohõ saha dutimi: Musa mehna cjũno “Jesu yaquiro ijiaja”, nidiquiro ijieperota numino mehna ñano yeriquiro, apee borore tutuaro cahmediquiro, “Cohãcjũ

ijire”, tiquina niñe queoyere ño peoriquiro, ñano quti yeducuriquiro, queheriquiro, yaqueriquiro tiquiro ijigũ tiquirore piti tieracãhña. Sa yeriquiro “Jesu yaquiro ijiaja”, nidiquiro ijigũ tiquirore piti tieracãhña. Sa yena sa yeriquiro mehna ihyeracãhña. ¹²Sa yegũ Jesu yequina ijieyequinare tiquina ñañe yeri buhirire buhiri dahre dutirigũ ijieraja yuhũ. Sa yuhũre yeraró cahmene. Yuhũ sa niepegũta mûsa mehna cahmecoãnequina Jesu yequina mûsa basi mûsa yerire ihñana, masino cahmene musare. Sa ihña cãedaró cahmene. Sa yena tiquina ñano yegũ ihñana musare buhiri dahrero cahmene tiquinare. ¹³Jesu yequina ijieyequina pehere Cohãcjũ pehe buhiri dahrerota. Sa yena mûsa pehe mûsa mehna cjẽnore ñano yeriquirore buhiri dahrena tiquirore cohãña.

Jesu yequinare yahusãrire yahuahye Pablo

6 ¿Mûsa basi cahme ihña tuhti yahusã duana dũhse ijiro boro Jesu yequina ijieyequina cahapũ mûsa acayere Jesu yequinare yahusãna wahajari? Jesu yequinare mûsa mehna cjẽnare yahusã duana apequina Jesu yequinare tire yahuro cahmene musare. Sa ye Jesu yequinapũ beseahro. ²Pihtiri deco ijigũ mari Jesu yequina pehe masa ijipihtieyquina tiquina yerire ihñana besenata mari tiquinare. ¿Tire masiedajari mûsa? Sa yena pihtiri deco ijigũ masa ijipihtieyequinare beseatina ijina, yojopũ gãhũre bese masiaja mari. Sa yena yojopũre ihyo ijieyegã buhiri gãhũre bese masiaja mari. ³Angele tiquina yerire ihñana tiquina gãhũre besenata mari. ¿Tire masiedajari mûsa? Mari sa beseatina ijina potota ti yũhdũoro yojopũ gãhũre Jesu yequina tiquina yerire ihñana bese masiaja mari. ⁴¿Sa yena dũhse yena mûsa

mehna cjẽnare yahusã duana Jesure cahmeeñequina cahapũ ihyo ijieyegã buhirire yahusãna wahajari mûsa? ⁵Ahrire nigũ niaja mûsa queoro yerarire mûsa bujua witiatire. ¿Mûsa mehna cjẽnare mûsa cahme duse tini wiagũ musare yahuatiquiro mûsa mehna cjẽno quehnoano masiniquiro mariedajari? Ijire. ⁶Sa ijiepegũta mûsa mehna cjẽno Jesu yaquiro apequiro Jesu yaquirore yahusã duaro Jesu yequina ijieyequinare yahusãno wahare.

⁷Masare beseyequina puhtó cahapũ mûsa mehna cjẽnare yahusãna Cohãcjũ ye pehere yũhdũducana nine mûsa. Apequiro mûsa mehna cjẽno musare ñano tiquiro yegũ sa tũhotu cãboaga mûsa. Jesu yequina ijieyequinare mûsa yahusãto pano mûsa acayũrore mûsa sa tũhotu cãgũ quehnoa yũhdũaboaga. Jesu yaquiro musare tiquiro yaquegũ tiquirore mûsa yahusãto pano tiquiro yaquerire mûsa sa tũhotu cãgũ quehnoa yũhdũaboaga. ⁸Mûsa gãhũ sa ijinata ijire. Apequinare ñano yere mûsa. Sa yena yaquere mûsa. Sa yena apequina mûsa mehna cjẽna Jesu yequina tiquina ijiepegũta tiquinare ñano yena, yaquere mûsa.

⁹Sa yeyequina Cohãcjũ puhtóro ijiropũre uhmũsepũre waha masiedare. ¿Tire masiedajari mûsa? Ni mehoñene tũhotueracãhña mûsa. Mari puhtóro ijiropũ ne wahasi ohõ saha yeyequina: Wuana tiyequina, “Cohãcjũ ijire”, tiquina niñe queoyere ño peoyequina, numia mehna ñano yeyequina, umua mehna ñano yeyequina numia, umua sehsaro tiquina paguri mehna ñano yeyequina, numia sehsaro tiquina paguri mehna ñano yeyequina numia, ¹⁰ni meho ehmañequina, apequina yere tutuaro cahmeñequina, queheyequina, masare ñano tuhtieyquina, yaqueyequina, ne Cohãcjũ puhtóro ijiropũre uhmũsepũre

waha masiedare. ¹¹ Panopure musa gūhu sa yerina ijimedi. Sa yemedina musa ijiepegūta yojopure musa nāno yerire cose tuhasari Jesucristo pehe. Sa tiquiro cosenohrina musa ijigū tiquiro yequina ijiatinare yeri Cohācjū musare. Sa yero “Quehnoana ijire”, ni ihñare musare tiquiro. Sata yere musare mari puhtoro Jesucristo, Espiritu Santo gūhu tiquina tutuaye mehna.

Mari paguri Cristo ye paguri ijire

¹² “Yuhu cahmeno saha ye masiaja yuhu”, nine ihquēquina. Sata ijire. Yuhu gūhu sa nidigu ijiepeguta tire yegu apequinare yedohorigu ijieraboaga yuhu. Yuhu cahmeno saha ye masiaja. Sa ye masiepeguta ihquē tahari sa yegu ijigu duhu masiedaboaga yuhu. Sa yegu tire pari turi yesi yuhu, “Duhu masiedaboaga”, nigu. ¹³ Ohō saha nine musa: “Ijipihtiye ihyaye mari paa cjē ijiati ijire. Sa yero mari paa ihyaye pose tiati paa ijire”, nine musa. Ti ijirota ijire. Sa ijieperota came Cohācjū pehe mari ihyayere mari paa gūhure pihtia wahagū yerota. Sa ye mari ihyaye ihyo warota ijiro nine. Ihyaye mari paa cjē ijiati ijire. Sa ijieperota mari paguri numia mehna nāno yeati paguri ijierare. Mari paguri pehe mari puhtoro Cristo ye paguri ijiye nine. Sa yero mari puhtoro pehe mari pagurire quehnoano yeati tiquiro ijire. ¹⁴ Sa yero Cohācjū tiquiro tutuaye mehna mari puhtoro Cristore masoahye. Sa tiquiro yeriro sahata mari gūhure masonota tiquiro.

¹⁵ ¿Sa yena musa paguri Cristo ye paguri ijigū masiedajari musa? ¿Ti sa ijigū Cristo ya pagu mehna wuana tircoro mehna mari nāno yegū quehnoajari? Quehnoaedare. ¹⁶ Wuana tircorore nēheniquiro tiquiro pagu pehe ticoro ya pagu mehna ijiro, ihcā pagu yero saha ijire. ¿Tire masiedajari musa? Sata ni ojoahye Cohācjū yere tiquina ojoari

pūpu: “Tiquina puaro ijiepetā ihcā pagu yero saha wahare”, ni ojoahye. ¹⁷ Mari puhtoro Jesu tiquiro yaquiro masuno mehna ijiro nine. Sa yero masuno mari puhtoro mehna puaro ijiepetā ihcā pagu yero saha ijire.

¹⁸ Sa yena wuana tieracāhña. Tire musa yabiro saha tire yeracāhña. Apeye ñañene mari yena mari pagure dojomehnedaja. Wuana tiriquire pehe tiquiro pagure nāno dojomehnene. ¹⁹ Espiritu Santore marine ohori Cohācjū. Sa yero mari paguri mehna ijire Espiritu Santo. ¿Tire masiedajari musa? Sa ye musa paguri, musa jeripohnari gūhu musa ye waro ijierare. ²⁰ Musa ñañe buhirire buhiri dahre tuhasari Cristore. Sa yena tiquiro yequina waro ijire musa. Tiquiro yequina ijina musa paguri mehna Cohācjū tiquiro cahmeno sahata yeya. Sa yena Cohācjūre ño peona nine musa. Sa yena apequina gūhure tiquirore ño peogū yena nine.

Namo tiyere yahuahye Pablo

7 Yojopure yuhure musa sinitu ojoarire yuhu gūhu yuhti cahmegu tagu niaja: Masuno namo tieragū quehnoare, yuhu ihñagū. ² Ti sa ijiepegūta apequina umua pehe namo tiahro apequina numia mehna tiquina “Ñano yeari”, niñe. Sa ye ihquē numiata manu tiahro apequina mehna tiquina “Ñano yeari”, niñe. ³⁻⁴ Manu tircoro pagu ticoro ya pagu dihita ijierare. Ticoro manuno ya pagu gūhu ijire. Ticoro manuno gūhu tiquiro pagu tiquiro ya pagu dihita ijierare. Tiquiro namono ya pagu gūhu ijire. Sa yena musa umua pehe musa namosānumiare quehnoano cuoya. Sa yena musa numia gūhu musa manusumhare “Yuhu pagure piheracāhña”, niedacāhña. ⁵ Sa ijiepegūta Cohācjūre puaro musa sini duana “Meheñe decorigā yuhu mehna ijieracāhña. Cohācjūre sinihna”, ihcāno

mehna sa nina, sa ye masine m̄sa. M̄sa sa nidi bato m̄sa iji m̄htariro saha ijiducuya tja, Satana m̄sare “Ñano ye dutiari”, nina. “Apequina mehna ñano yeboaga”, nina, m̄sa basi piti ti duhueracãhña. M̄sa iji m̄htariro saha ijiducuya tja.

⁶Ahrire m̄sare yojop̄ yũhũ nidire nigũ m̄sare dutiye waro mehna niedaja. Sa yahugũ niaja m̄sa yeatire m̄sa masiatire. ⁷Ijiphtina m̄sa yũhũ yero saha namo tienã m̄sa ijigũ quehnoaboaga yũhure. Sa iji duepenata mari ijiphtina ihcãno saha ijieraja. Ihquẽquinare namo ti dutire Cohãcjũ. Sa yero tiquiro ihquẽquinare namo ti dutierare.

⁸Sa yegũ namo marienare, manũ marienare, wape wiha numia gãhure ohõ saha niaja m̄sare: Namõ mariena, manũ mariena iji masina, sata iji cãhña yũhũ yero saha. ⁹Sa iji masiedana tutuaro ñañene cahmena, namo tiya. Sa yena manũ tiya. Ñañene m̄sa tutuaro cahmegũ quehnoaedare m̄sare. M̄sa sa tutuaro cahmegũ m̄sa namo tigũ pũrita quehnoarĩne. Sa yena m̄sa manũ tigũ gãhure quehnoarĩne.

¹⁰M̄sa namo tinare, manũ tina numiare ohõ saha dutiaja. Yũhũ sa niepegũta yee dutiye waro ijierare ahri. Mari pũhtoro Cristo ahrire dutire: M̄sa numia pehe m̄sa manũsum̄are cohãedacãhña. ¹¹M̄sa manũsum̄are cohãna, manũ mariena numia tojoaya. Sa tojoerana pari turi m̄sa manũsum̄a mehna quehnoano ijiya tja. Sa yena m̄sa gãhũ um̄a m̄sa namosãnumiare cohãedacãhña.

¹²Sa yegũ m̄sa gãhure apequinare ohõ saha niaja yũhũ. Mari pũhtoro tiquiro dutiye ijierare ahri. Yũhũ pehe ohõ saha niaja m̄sare: Ihquẽquina m̄sa mehna cjẽna Jesu yequina pehe Jesure cahmeeñequina numiare namo tiriquina ijire. Sa ye tiquina

namosãnumia tiquina mehna tojoa duagũ tiquina numiare cohãedacãhdo tiquina. ¹³Sa ye ihquẽquina m̄sa mehna cjẽna numia Jesu yequina numia Jesure cahmeeñequinare manũ tiriquina numia ijire. Sa ye tiquina manũsum̄a tiquina numia mehna tojoa duagũ tiquinare cohãedacãhdo. ¹⁴M̄sa manũsum̄a Jesure cahmeeñequina ijiepegũta Jesu yequina numiare tiquina namo tigũ, Cohãcjũ quehnoañequina yero saha ihñare tiquinare. Sa yena m̄sa um̄a pehe Jesu yequina m̄sa ijigũ m̄sa namosãnumia Jesure cahmeeñequina numia ijiboaga. Tiquina sa ijiepegũta m̄sa mehna tiquina numia manũ tigũ Cohãcjũ quehnoañe numia yero saha ihñare tiquina numiare. Tiquiro sa ihñedagũ m̄sa pohna Jesure cahmeeñequina pohne yero saha ihñaboaga Cohãcjũ. Sa yero tiquina pohne gãhure quehnoañequina yero saha ihñare Cohãcjũ. ¹⁵Sa ye m̄sa um̄a pehere m̄sa namosãnumia Jesure cahmeeñequina numia m̄sare cohã duaye, sata yeahro. M̄sa manũsum̄a gãhũ sa cohã duaye, sata yeahro. Quehnoano mari ijigũ cahmene Cohãcjũ. Sa yero tiquina numia Jesu yequina ijieye numia m̄sare cohã duagũ “Tiquina numia mehna ijiniña”, ni, dutierare Cohãcjũ. ¹⁶Tiquina namosãnumia Jesu yequina numia pehe quehnoano yegũ ihñañe camerũ tiquina manũsum̄a Jesure cahmeboaga. Sa cahmegũ Cohãcjũ tiquinare pecapũ wahaboriquinare yũhd̄orota. Sa ye tiquina manũsum̄a Jesu yequina pehe quehnoano yegũ ihñañe camerũ tiquina namosãnumia Jesure cahmeboaga. Sa cahmegũ Cohãcjũ tiquina numiare pecapũ wahaboriquina numiare yũhd̄orota. Sa Jesure cahmeboriquina tiquina ijiepegũta potota Jesure tiquina cahmeatire masiyuro basioerare m̄sare.

¹⁷ Sa yena ijipihtina m̄sa mari puhtoro Cristo m̄sare tiqiro iji dutiuro sahata yeya. Sa yena Coh̄c̄j̄ m̄sare tiqiro c̄uire yeya m̄sa. Tire ijipih̄tiyequina Jesu yequinare sa ye dutiducua ja ȳh̄. ¹⁸ Jesu yequina m̄sa ijimoto pano cuhnucun̄ sohtoa cahseroḡare ȳhre nena ijina, tire ih̄na yabierac̄h̄na. Sa yena Jesu yequina m̄sa ijimoto pano cuhnucun̄ sohtoa cahseroḡare ȳhre nedarina ijina yojop̄ ḡh̄re sata ijiducuya. ¹⁹ Yojop̄re ti cahseroḡare ȳhre nedina m̄sa ijiḡ d̄h̄seati ijierare. Tire yerarina m̄sa ijiḡ ḡh̄re d̄h̄seati ijierare. Sa ijiepeḡta Coh̄c̄j̄ dutiyere mari yeḡ ti p̄rita ihyo waro ijierare. ²⁰ Sa yena Coh̄c̄j̄ Jesu yequina m̄sare tiqiro c̄uri pje m̄sa ijiriro sahata tojoaya. ²¹ Jesu yaquiro m̄h̄ iji d̄cato pano apequiro cahac̄j̄ m̄h̄ ijiḡ quehnoanota. Sata tojoaya. M̄h̄ puhtoro m̄h̄re tiqiro wio duḡ pehere wijiaya m̄h̄. M̄h̄ wijiaḡ quehnoanota m̄h̄re. ²² Sa yero mari puhtoro Jesu yaquiro ihc̄aquiuro ijiro mas̄no cahac̄j̄no ijieperota Jesu tiqiro ȳh̄duoriq̄iro ijire. Sata apequiro mari puhtoro Jesu yaquiro ijiro, mas̄no cahac̄j̄no ijieraperota Jesu cahac̄j̄no ijire tiqiro ḡh̄. ²³ Mari ñāne buhirire buhiri ti tuhasahye Cristo. Sa yena tiqiro dih̄tare potota m̄sa puhtoro waro tuhotuya m̄sa. Apequina m̄sare tire tiquina ye dutieraḡ tiquinare tuhoerac̄h̄na. ²⁴ Sa yena ȳh̄ acaye, Jesu yequina ijiatiquina Coh̄c̄j̄ m̄sare tiqiro c̄uri pje m̄sa ijiriro sahata tojoaya. Sa tojoana Coh̄c̄j̄ mehna c̄jana ijiya.

²⁵ Yojop̄re namo marienare, man̄ mariena numia ḡh̄re yahu duaja m̄sare. Mari puhtoro ah̄re “Oh̄ saha nīna”, niedare ȳh̄re. Ȳh̄re tiqiro paja ih̄naḡ ȳh̄re tiqiro yedohoḡ tiqiro cahmeno sahata yeducurigu ijiaja ȳh̄. Sa ijirigu ijigu

ah̄re quehnoano yahut̄ja m̄sare. ²⁶ Yojop̄re m̄sa ñano ȳh̄d̄na niaga. Sa yena m̄sa namo mariena ḡh̄, man̄ mariena ḡh̄ m̄sa tojoaḡ quehnoanota, ȳh̄ tuhotuḡ. ²⁷ Namu mariena, man̄ mariena numia m̄sa ijina sata tojoaya. Sa yena m̄sa pehe namo tina, man̄ tina numia ḡh̄ sata tojoaya. ²⁸ Namu tina ñano yerare m̄sa. Sa yena m̄sa nuhmia man̄ tina, ñano yerare m̄sa ḡh̄. Sa yena namo tina, man̄ tina numia m̄sare wape cuoro tojoarota. Sa yegu m̄sare “Sa wape tiari”, niḡ “Namu mariena, man̄ mariena numia tojoaya”, niaja ȳh̄.

²⁹ Ȳh̄ acaye, ah̄re m̄sare yahugu niaja. Cristo ah̄ri yehpap̄ tiqiro tojoa tato mehenoḡ d̄hsare. Sa ye yojop̄re namo marienequina Coh̄c̄j̄ cahmeno saha tiquina quehnoano ye masino sahata quehnoano yero cahmene namo tiyequina ḡh̄re. Sa ye man̄ tiyequina numia ḡh̄re sata Coh̄c̄j̄ tiqiro cahmeno saha quehnoano yero cahmene. ³⁰⁻³¹ Ah̄ri yehpa yojop̄ ijiro saha camep̄ ijisi. Camesa pihtia waharota. Sa pihtiat̄i yehpa ijiḡ yojop̄re mari ñehe quea utiye, mari bucueye, mari cuoye pihtia waharota. Sa ye ti ihyo waro ijire. Coh̄c̄j̄ yere yeye pehe ihyo waro ijierare. Sa ye ah̄ri yehpa c̄ene cuoyequina, cuoyequina yero saha ijiaho. Ah̄ri yehpa c̄ene pajiro tuhotuero cahmene. Ah̄ri yehpa yojop̄ ijiri yehpa camesa pihtia waharota.

³² M̄sa ñano ȳh̄dueraḡ cahmeaja ȳh̄. Sa yeḡ m̄sa pajiro m̄sa tuhotuereḡ ḡh̄re cahmeaja. Namu marieniquiro Jesu yaquiro ijiro Jesu yere wac̄ducure. Sa wac̄ducuro Jesu cahmēene tutuaro ye duare. ³³ Namu tiriquiro pehe tiqiro namono cahmēne pehere tutuaro ye duare. Sa yero ah̄ri yehpa c̄ene pajiro tuhoture. ³⁴ Sa yero tiqiro p̄arore ye duare. Jesu cahmēene, tiqiro namono cahmēne

gāhure tiqiro ye duare. Sa yero b̄uc̄oro manū mariedicoro ijiro, ticoro mari p̄h̄toro Jesu cahmeñene tutuaro ye duare. Nuhmino gūh̄ sata ye duare. Sa ye duaro ticoro tutuaro Cohācjū yacoro iji duare. Manū tiricoro pehe ahri yehpa cjē pehere ticoro manūno cahmeñe pehere tutuaro ye duare. Sa yero ahri yehpa cjēne pajiro tuhature.

³⁵Ahrire m̄sare ni niaja m̄sare yedohogū tagū. Tutuaro dutiyere m̄sare cū dueraja. Sa cū duerapegūta quehnoano m̄sa yegū cahmeaja. Sa yegū Jesu mari p̄h̄toro yere m̄sa tutuaro ye duagū cahmeaja yūh̄.

³⁶M̄sa mehna cjēno tiqiro cahmedicoro b̄uc̄oro wahagū ihñano ticorore namo tiahero. “Sata yero cahmene”, ni tuhuturo, namo tiahero. Sa yero ticorore namo tiro ñano yero niedare.

³⁷Apequiro pehe tiqiro cahmedicorore “Yūh̄ure namo tiro cahmene”, ni dueraro, tiqiro cahmediro sahata yeahro. Tiqiro namo ti dueragū, quehnoanota. Quehnoano yero nine. ³⁸Sa yero tiqiro cahmedicorore namo tiriqiro gāh̄ quehnoano yere. Sa yero yojop̄re ticorore namo tieriqiro pehe apequiro yūh̄oro quehnoano yere.

³⁹Manū tiricorore ticoro manūnore cohā dutierare Cohācjū. Tiqiro sa cohā dutierapegūta ticoro manūno tiqiro yariari bato ticoro apequiro mehna ticoro cahmediquiro mehna manū ti masine. Ticoro manū tiriquirore Jesu yaquiro ijiro cahmene tiquirore.

⁴⁰Ticoro manū mariedicoro tojoaro, manū tiricoro yūh̄oro quehnoano bucuericoro ijirota ticoro. Sata ni tuhutuaja yūh̄ pehe. Cohācjū yaquiro Esp̄ritu Santore c̄ogū ijiaja. Yūh̄ sa c̄ogū ijigū masina, ahri yūh̄ yahurire masiña m̄sa.

“Cohācjū ijire”, tiquina niñe queoyere ño peo, ihyayere duhu peohaye masa. Ti ihyayere yahuahye Pablo

8Yojop̄re “Cohācjū ijire”, tiquina niñe queoyere ño peo, tiquina duhu peori ihyayere yahu duaja. Ijipiltina m̄sa ti borore “Masaja”, ni tuhutare m̄sa. Sa ni tuhutuna “Apequinare masi yūh̄ducaja”, ni tuhutumene m̄sa. Sa ni tuhutuna apequinare yedohoerare m̄sa. Apequinare cahina tiquinare yedohore m̄sa. Sa ye masiñe yūh̄oro apequinare cahine pehe ihyo waro ijierare. ²“Masi peho cjā”, nina ijina, Cohācjū quehnoañene tiqiro masi dutiyere masiedarīaga m̄sa. ³Sa ijiepegūta Cohācjūre m̄sa cahīgū m̄sare masine tiqiro. Sa yena tiqiro yequina ijire m̄sa.

⁴“Cohācjū ijire”, tiquina niñe queoyere ño peo, tiquina ihyayere duhu peore. Ti ihyayere m̄sare yahutja: Ti queoye ne d̄h̄seati ijierare. Potota ti queoye jeripohna mariedare. Cohācjū pehe ihcāquirota ijire. Apequina cohāmana mariedare. Ahrire masaja mari. ⁵⁻⁶“Peyequina cohāmana ijire. Tiquina mari p̄h̄toa ijire”, ni tuhutumene masa. Sa yero ūhm̄sep̄, ahri yehpapū gūh̄ure “Cohāmana”, tiquina niñequina ijiepegūta mari pehere ihcāquirota ijire Cohācjū. Tiquiro mari Pacu ijipihtiyere bajumehnediquiro ijire. Sa yero tiqiro yequina ijiatina yeahye tiqiro marine. Sa yero mari p̄h̄toro Jesucristo ihcāquirota ijire. Tiquiro ijipihtiyere mari Pacure ye basariquiro ijire. Tiquiro yequina ijiatinare yeahye tiqiro marine. Sa yena tiqiro mehna sa ijiducunata mari.

⁷Yūh̄ nidiro saha ijiepegūta apequina Jesu yequina tire masiedare. Panop̄ tiquina “Cohācjū ijire”,

tiquina niñe queoyere “Catiyequina ijire”, ni tūhotuducumahye. Ti pjeppure sa yeriquina ijiye yojopu gūhure ti queoyere ño peo, tiquina duhu peo ihyayere “Cohāmana ye ihyaye ijire”, ni tūhotumene. Sa ye ti ihyayere ihyaye, “Mari ñano yena niaja”, ni tūhotumene. Tire tiquina yerire quehnoano masiedaye, sa ni tūhotumene. ⁸Ti ihyayere mari ihyagū mari ihyeragū gūhure Cohācjū marine “Quehnoañequina ijire”, ni ihñedare. Sa ye ti ihyayere mari ihyagū ihyo warota iji cāhno nine ti ihyaye. Mari tire ihyana ñano yeraja. Ti ihyayere mari ihyeragū gūhure ihyo warota iji cāhno nine. Mari ihyerana apequina yūhduro quehnoana ijieraja mari gūhū. ⁹⁻¹⁰Sa ijiepegūta quehnoano yeya mūsa. Ti ihyayere ihyarina mūsa ijigū apequina mū sare “Masaja”, ninare ihña cū ihyaboaga. Sa ihña cū ihyaye tiquina yerire quehnoano masiedaye, “Ñano yena niaja mari”, ni tūhotueta tiquina gūhū. Tiquina sa ni tūhotugū tiquina pehere ñano yegū yena niaga mūsa. Sa yena quehnoano yeya mūsa. ¹¹“Mari ti ihyayere mari ihyagū quehnoanota marine”, mūsa ni tūhotuna ijina apequina quehnoano masieñequinare ñano yegū yeboaga mūsa, mū sare tiquina ihña cūgū. Sa yeriquina ye ijia ti gūhure yariahye Cristo. Sa yena Cristo yequinare mūsa acayere ñano yegū yena niboaga mūsa. ¹²Quehnoano masieñequinare Cristo yequinare mūsa ñano yegū yena, Cristo gūhure ñano yena nine mūsa. ¹³Sa yegu ti queoyere ño peo, tiquina duhu peo ihyayere yūhū ihyagu Cristo yequinare ñano yegū yegu niboaga yūhū. Jesu yequina ñano yegū cahmedaja. Sa yegu “Yūhū tiquinare ñano yegū yeari”, nigū ti ihyayere ne pari turi ihyasi yūhū.

Pablo Jesu cūriqui tiquiroye yahuahye

9 Jesu tiquiroye yere buhe dutiroye cūrigū ijiaja. Sa yegu apequina tiquiroye cūriquina tiquina yero saha ye masaja yūhū gūhū. Jesu cūrigūta ijiaja yūhū gūhū. Mari puhtoro Jesure ihñarigūta ijiaja yūhū. Sa yena Jesu yere yūhū buhegū mūsa pehe tire quehnoano tūhona tiquiroye yequina wahare mūsa. Sa yena Jesu cūrigū yūhū ijierare masi tuhasare mūsa. ²Apequina yūhure yahu wajaye “Jesu cūriquiroye ijierare”, niboaga. Tiquina sa niepegūta mū sare yūhū buheri bato Jesu yequina wahana, “Jesu cūriquiroye ijire”, ni, yūhure masi tuhasare mūsa. Sa yena apequina yahu wajaepēgūta mūsa pehe tiquiroye cūrigū yūhū ijiye tiyere masine.

³Yūhure yahu wajayequinare ohō saha ni yūhtiitja. ⁴Mū sare yūhū buheri bato yūhū ihyatire yūhū sihniati gūhure yūhure ohoro cahmene mū sare. ⁵¿Sa yegu namo tigu ijigu yūhū namono Jesu yacoro ticoro ijigū ticoro mehna tini masiedaboagari yūhū? Apequina Jesu cūriquina, Jesu bahana, Pedro gūhū tiquina namosānumia mehna tiquina tinidiro sahata yūhū gūhū tini masiboaga. Yūhū sa tinigū yūhū namo tigu ijigū ticoro gūhure ihyayere ohoboaga mūsa. ⁶Yūhū Bernabé mehna mū sare quehnoañe buheyere usā buhepegūta usāre ne apee borogā ohoerari mūsa. Sa yena usā basita usā ihyatire dahra wapatau usā. ¿Usā dihitare wapataro marieno buhero cahmeajari, mūsa tūhotugū? ¿Usā sa buhena apeye dahraye pehere duhu masiedaboagari usā? ⁷Ahriquina yūhū queoye mehna yahuatiquina pehe tiquina dahrari wapa wapatare. Ihcāquiroye surara dahragū tiquiroye puhtoa tiquiroye wapa yere. Tiquiroye basi wapa yerare. Ihyayere oteriquiroye

gũhu tiquiro oteri dũca tigũ tireta ihya masine. Sa yero wapatare tiquiro. Sa yero ovejare ihña ihboriquiro tiquiro nuñequina epẽcore sihni masine tiquiro. Sa yero wapatare tiquiro gũhu.
⁸“Tiquina dahrari wapare wapa yero cahmene”, nigũ masa tiquina dutiye dihitare musare yahueraja. Cohãcjũ dutiyepũ tiquiro nidi gũhũre musare yahugũ niaja.
⁹Tiquiro dutiyere tiquina ojoari pũpũ ohõ saha ni yahure: “Wecũ trigo pjerire tiquiro dahpocãri mehna suhti weriquiro ihya duagũ tiquiro duserore cahmotaeracãhña”, niahye Cohãcjũ dutiye. Sa dutiro wecuare nino niedahye.
¹⁰Sa dutiro marine nino niahye marine buhero taro. Wesere seheriquiro gũhu ti dũcare nediquina gũhu tiquina dahrari bato dũca tiri pje ijigũ tiquina wapatatire cohtere. Sa yena dahrayequinare tiquina dahrari wapare ohoro cahmene marine.
¹¹Musare Cohãcjũ yere quehnoañe buheyere buhei usã. ¿Usã sa buhegũ musa pehe usãre ihyayere ohoeraro cahmeajari, musa tuhutugũ? Ohoro cahmene. Musa ohogũ quehnoaboaga usãre. Sa ijiepegũta musa ohoerari usãre.
¹²Sa ohoerapenata apequina ihyayere musare sinigũ tiquina pehere ohore musa. Tiquina musare ihyayere sinigũ tiquina yũhdũoro usã pehe oho dutiboaga musare.

Sa oho dutiborina ijiepenata usã pehe “Usãre ohoya” ne niedũ. “Cristo ye buheyere musapũ cahmedaboaga” nina, usãre mariedapegũta musare ne siniedũ.
¹³Cohãcjũ wũhũpũ dahrayequina ti wũhũpũta tiquina ihyayere nene. Sa ye Cohãcjũre tiquina ño peori altarũ cohteyequina wahiquirore tiquina ujuã mũoriquirore mehenogã ne, ihyari tiquina gũhu. ¿Tire masiedari musa?
¹⁴Sa tiquina yeriro saha quehnoañe buheyere buheyequinare tiquina buheri wapare tiquina ihyatire tiquinare

ohoro cahmene musare. Sata ye dutiri mari puhtoro Jesu.
¹⁵Sa yegũ musare siniborigũ ijiepegũta yũhu ne apee borore siniedũ musare. Sa yegũ ahrire yojopure ojoa ohogũ apee borore wapa cahmegũ tagũ ojoagũ niedaja. Musare ne wapa cahme dueraja. Yariacjũ ijiepegũta ne wapa cahmesi yũhu musare. Wapa marieno buhegũ tutuaro bucueaja. Sa yegũ musare yũhu buheri wapa ne wapata ihyasi.

¹⁶Quehnoañe buheyere buhe dutiro yũhũre cũri Cohãcjũ. Tire buheacjũta ijigũ niaja yũhu. Quehnoañe buheyere buheragũ pejecũogũ ijiboaga yũhu. Sa yegũ ti buheyere buhegũ “Apequinare masi yũhdũdũcaja”, niacjũ ijieraja yũhu.
¹⁷Quehnoañe buheyere yũhu esa tuharo buhegũ yũhu buheri wapa wapa neboaga yũhu. Cohãcjũ yũhũre tiquiro yere buhe dutiro cũri yũhũre. Sa yegũ yũhũre tiquiro cũrire yegũ niaja. Sa buheacjũ ijiaja yũhu.
¹⁸¿Tiquiro yere sa buhegũ yabe borore wapatajari yũhu? Ohõ saha ijire yũhu wapataye: Quehnoañe buheyere buhegũ musare ne apee borore siniedagũ wapa marieno ti buheyere buheaja musare. Yũhu sa nidire masigũ bucueaja. Yũhu bucueyeta ijire yũhu wapataye.

¹⁹Ne masa cahacjũ ijierapegũta ijipihitiyequina cahacjũ yero saha ijiaja yũhu apequina masa Jesu yequina tiquina wahatire.
²⁰Sa yegũ yũhu acaye judio masa mehna ijigũ, tiquina yero saha yeaja yũhu Jesu yequina tiquina wahatire. Cohãcjũ dutiyere Moiserere tiquiro cũrire ño peorigũ ijierapegũta, ti dutiye dihitare ño peoyequina mehna ijigũ ti dutiyere ño peoriquiro yero saha ijiaja yũhu. Sata yeaja yũhu tiquina Jesu yequina tiquina wahatire.
²¹Sa yegũ Cristo yaquiro ijigũ Cohãcjũ dutiyere Moiserere tiquiro cũrire cohã dueraja. Ti dutiyere cohã duerapegũta ti dutiye marieñequina mehna ijigũ ti dutiye marieniquiro yero saha

ijijaja. Sata yeaja yũhũ Jesu yequina tiquina gũhũ wahatire. ²²Jesu yere quehnoano masieñequina mehna ijigũ tiquina yero saha ijijaja. “Masi pehogu ijijaja”, niedaja yũhũ. Sata yeaja yũhũ Jesu yequina tiquina gũhũ wahatire. Sa yegũ ijipihtiyequina masa tiquina ijiro saha ijijaja yũhũ, ihquẽequina Jesu yequina tiquiuro yũhũdũoriquina tiquina wahatire. ²³Ahrire yeaja quehnoañe buheyere ijipihtiyequina tiquina tũhoatire. Yũhũ sa yegũ ihñano Jesu tiquiuro buheriro saha yũhũ gũhũre quehnoano yere. Sa yegũ masa tiquina ijie tiro saha ijijaja.

²⁴Ohõ saha ijire mari queoye mehna buhegũ. Oma cohãpeyequina omañe tiquina ijipihtiyequina omare. Tiquina sa oma pihtiepegũta oma tutuariquiuro pehe esa mũhtare. Sa esa mũhtariquiuro wapatate. Sa yena tiquina omariro saha mũsa gũhũ Cohãcjũ cahmeñene yeya mũsa wapatatire. ²⁵Ijipihtiyequina omañequina tiquina pagure dojomehneñene duhu cã, quehnoano omapore tiquina oma tutuatire. Sa ye tiquina quehnoano omatire queoro ihyaye, queoro carĩne, quehnoano yere tiquina. Sata yere tiquina wapatato saha. Sa ye tiquina wapataye pũri mehna tiquina yeri behto ijire. Ti behto pehe yoiari pje ijierare. Duita ahbaa wahare. Mari pehe Cohãcjũ yere quehnoano buheaja tiquiuro yere mari wapatato saha. Ti wapataye pũrita ne ahbaerare. ²⁶Sa yegũ yũhũ ape siepũ omariquiuro yero saha yeraja. Sa yegũ cahmequeperiquiuro ape siepũ dote maca cãriquiuro yero saha yeraja. Sa yegũ Cristo yere queoro ye duaja. ²⁷Sa yegũ omapeyequina, cahmequepeyequina gũhũ tiquina pagũre tiquina buheriro saha, quehnoano queoro tiquina yeriro saha yũhũ gũhũ yũhũ pagũ mehna quehnoañe dihitare yepoaja. Sa yeragu

apequinare buherigu yũhũ ijiepegũta duhseacjũ ijieraboaga yũhũ pehe.

“Cohãcjũ ijire”, tiquina niñe queoyere ño peo dutierahye Pablo

10 Sa yena yũhũ acaye, ahrire masiña mũsa. Ûsã Israe masa ñecusumua mũna panopũ cjẽna ijipihtiyequina Cohãcjũ ya ehmeo curuare ihña nũnũ tã cãa wahahye. Sa wahaye, aco sohãri mare aco pũa peheri tojoadũcari mahapũ wua queheri mahapũ tiniñe, pehãa wahahye. ²Sa wahaye, tiquina ijipihtiyequina ehmeo curua mehna aco sohãri ma cjẽ aco mehna Cohãcjũ ye ijiatire wame yenhriquina yero saha wahahye. Wame yenhriina wahana Cristo yequina mari ijiyere ihñona niaja. Sa tiquina aco sohãri mare wame yenhriquina yero saha wahaye, Moise yequina tiquina ijiyere ihñoñe niahye. ³Sa ye tiquina ijipihtiyequina uhmuse cjẽ ihyayere ihyae tiahye Cohãcjũ tiquiuro ohoyere. ⁴Sa ihyaye tiquina ijipihtiyequina Cohãcjũ ohori aco gũhũre sihnie tiahye. Ti pjepũre ti acore Cohãcjũ cũri utãpũ wijiari acore sihnie tiahye tiquina. Tia utã yero saha ijiriquiuro, tiquinare aco ohoriquiuro Cristo ijiahye. ⁵Tiquina sa wahariquina ijiepegũta apequina tiquina mehna cjẽna ñano yegũ ihñano Cohãcjũ pehe peyequina tiquina mehna bucuerahye. Sa yero tiquinare masa marienopũ yariagũ yeahye Cohãcjũ.

⁶Sata yeahye tiquinare Cohãcjũ marine buhero taro. Sa yero tiquinare ihña cũ ñañene mari tutuaro cahmedatire Cohãcjũ sa yeahye tiquinare. ⁷Sa yena “Cohãcjũ ijire”, tiquina niñe queoyere tiquina ño peoriro saha yeracãhña mũsa. Ti queoyere tiquina ño peorire Cohãcjũ yere tiquina ojoari pũpũ yahuro ohõ saha niahye: “Tiquina ihya duji sihni tuhasa, wahcãdũca, bese deco

ye dūcahye wecū queoyere ño peoye tehe”, ni ojoahye panopure. ⁸Came apequina Israe masa pehe numia mehna ñano yeahye. Tiquina yeriro saha yeraro cahmene marine. Tiquina ñano yeri bato ihcā decota tiquina veintitres mil masa yariaa wahahye. ⁹Apequina Israe masa Cohācjüre tiquina mehna usuagū yeahye. “Marine buhiri dahresi”, niñe Cohācjüre tuhtiahye. Sa tuhtiyē tiquirore usuagū yeahye. Tiquina sa yeri buhiri Cohācjü añaa pari mehna bahque wejēahye tiquinare tja. Sa yena tiquina yero saha Cristore yeracāhña musa. ¹⁰Apequina Cohācjüre unure tuhtigū angel masare wejēdiquiro tiquinare wejēahye. Sa yena tiquina yero saha yeracāhña.

¹¹Sa wejē dutiahye tiquinare Cohācjü marine buhero taro. Mari pehe pihtiri deco panogā ijina ijiāja. Mari sa ijina ijigū panopu cjēna tiquina sa waharire Cohācjü oja dutiahye marine quehnoano buhero taro. ¹²Sa yena “Quehnoana ijiāja, Cohācjü tiquiro ihñagū”, ni tuhotu, quehnoano yeya musa “Ñañene yeari”, nina. ¹³Mari ijipihntina ihcāquiro duhsaro marieno ihquē tahari ñañene wacūaja. Sa wacūna ti ñañene ye duaja. Mari sa ye duepegūta Cohācjü marine yedohoducuriquiro ijire. Sa yero ti ñañene mari bo masiedagū tiquiro pehe marine yedohorota. Sa yero ti ñañene mari ye duagū ihñano Cohācjü ti ñañene marine ye dueragū yerota. Tiquiro sa yegū ti ñañene ye duasi mari.

¹⁴Sa yena yuhū cahña yuhure tuhoya. “Cohācjü ijire”, tiquina niñe queoyere ne ño peoeracāhña. ¹⁵Musa quehnoano masina ijigū musare yahuaja. Sa yena yuhū niato poto ijigū masiña musa basi. ¹⁶Cristore tiquina ñehedi ñamine vinore tiquiro sihniato pano Cohācjüre “Quehnoare”, niahye. Tiquiro nidiro saha mari gūhū ti vinore sihni Co-

hācjüre “Quehnoare”, nina, mari ye buhiri Cristo tiquiro yariarire masigū yena niāja. Tiquiro dii wijiarire masigū yena niāja. Sa yena tiquiro yequina mari ijiye gūhure masigū yena niāja mari. Sa yena pāre mari Cristo yequina nuhana mari ye ijiatire tiquiro pagū curusapū tiquiro yariarire masigū yena niāja. Sa yena tiquiro yequina mari ijiye tiye gūhure masigū yena niāja. ¹⁷Sa yena peyequina masa ijiepenata ihcāria pāgāre ihyana, ijipihntina mari Cristo yequina ihcā curuata ijiāja. Sa yena peyequina ijiepenata ihcā curuata ijiāja.

¹⁸Israe masa tiquina yerire wacūña musa: Tiquina wahiquirore wejēñe, uñū mūo, ohoye, Cohācjüre ño peore. Sa tiquina ohoi bato ihcā curuata tiquina ohoriquirore ihyare. Sa ihyaye Cohācjü yequina tiquina ijiye tiyere masigū yere tiquina. ¹⁹Ohō sahata nii niāja musare: “Cohācjü ijire”, tiquina niñe queoye duhseati ijierare. Sa yero queoyere ño peo tiquina duhu peoye ihyaye pehe ihyo warota ijiro nine. Ti ihyaye marine sijoro saha wahagū yerare. ²⁰Ti ihyaye sijoro saha wahagū yerapegūta ti ihyayere ihyeraro cahmene. Ohō saha ijire ti. Cohācjüre cahmeeñequina wahiquirore wejē, uñū mūo, Cohācjüre ño peoye niedare. Sa ye queoyere ño peoye watia pehere ño peore tiquina. Tiquina sa ño peoyequina ijigū tiquina mehna ihyana watino yequina yero saha yena niāga musa. Musa sa yegū pūritare ne cahmedaja. ²¹Santa cenare mari yeri deco mari puhtoro Jesure wacūna tana sihniāja. Mari sa sihni, watino ye pehere sihni masiedaja mari. Sa yena Jesure wacūna tana pāre ihyaja. Mari sa ihyana, watia ye pehere ihya masiedaja mari. ²²¿Jesure musa mehna usuagū ye duajari musa? ¿Tiquiro yuhdūoro tutuana ijiajari musa? Ijierare musa. Sa yena quehnoano yeya musa.

Cohăcjũ cahmeñe dihitare yeya

²³ Mũsa yeri ñañe ijierapegũta tire yena apequinare yedohoeraboaga mũa. Sa yena tire yena Jesure wacũ tutua nemogũ yeraboaga mũa apequinare. ²⁴ Mũa cahmeñe dihitare yeracãhña. Apequina pehere quehnoano yedohoya mũa.

²⁵⁻²⁶ Ihyaye duaropũre ihyayere dũna “¿Ahri ihyaye cohãmana queoye cahapũ tiquina duhu peori ihyaye ijiajari?” ni, sinitueracãhña. “Ñañene yeari”, nina, sinituboaga mũa. Sa ni sinitueracãhña. Ahri yehpa, ahri yehpapũ ijiye gũhũ Cohăcjũ ye ijire. Sa yena ti ihyayere “¿Ñañe ihyaye ijiajari?” niedacãhña.

²⁷ Jesure cahmeediquiro mũsare ihya dutiro tiquiro pijioğũ waha duana wahaya. Sa wahana mũsare tiquiro duhu peoyere ihyaya. “¿Ahri ihyaye Cohăcjũ queoye cahapũ tiquina duhu peori ihyaye ijiajari?” ni, sinitueracãhña. ²⁸ Sa yena apequiro Jesu yaquiro “Ahri ihyaye Cohăcjũ queoyere tiquina duhu peori ihyaye ijire”, mũsare tiquiro ni yahugũ ti ihyaye pũritare ihyeracãhña. Mũsare sa ni yahuriquiro “Ñañe ihyayere ihyare ahriquina”, mũsare tiquiro ni tuhotueratire ihyeracãhña. ²⁹ Sa ihya dutieragu mũa pehere yedohogu tagũ sa niedũ. Mũsare ahrire yahuriquiro pehere yedohogu tagũ sa ihya dutieraja. Tiquiro pehe mũsare “Ñañe ihyayere ihyare ahriquina”, niboaga. “Sa niari”, nina ti ihyayere ihyeracãhña.

“Ihyeracãhña”, yũhũ nigũ ohõ saha ni sinitu yũhtiboaga mũa yũhũre: “¿Dũhse ijiro boro apequirore ‘Sijoro saha wacũari’”, nina ihyeraboagari usã? ³⁰ “¿Ti queoyere ohori ihyayere usã ihyagũ Cohăcjũ warore ‘Quehnoare’, usã niepegũta dũhsero tire usã ih-yari buhiri apequiro usãre yahu wajaboagari?” ni sinitu yũhtiboaga mũa yũhũre. ³¹ Ahri ijipihtiyere yahugũ ohõ

saha nigũ niaja mũsare: Decoripe Cohăcjũ tiquiro dutiriro sahata bucuweye mehna ihya, sihniaja, Cohăcjũre masa tiquina ño peotire. Sa yena ijipihtiyere quehnoano yeducuya Cohăcjũre masa tiquina ño peotire. ³² Ne judio masare, judio masa ijieyequinare, Cohăcjũ yequina gũhũre ñano yegũ yeracãhña mũa tiquinare. ³³ Ohõ saha yeaja yũhũ pehe. Masa ijipihtiyequinare yedoho duaja. Sa yegu yee ijati pehere pajiro tuhotueraja. Yũhũ ñano yũhdũgũ quehnoanota. Masa pehere yedohoaja tiquinare pecapũ wahaboriquinare Cohăcjũ tiquiro yũhũotire.

11 Sa yena Cristore yũhũ ihña cũrĩro sahata mũa gũhũ yũhũre ihña cũña.

Corinto cjẽna cahmecoanopũ numia tiquina yeatire yahuahye

² Mũsare yũhũ buhe turiarire wacũ pehoñohiti mũa. Sa wacũna mũsare yũhũ nidire yũhũ ye dutiriro saha yeñohiti mũa. Sa yena quehnoano yere mũa. ³ Sa yena mũa ijiepegũta ahri gũhũre mũa masigũ cahmeaja: Ijipihtiyequina umua tiquina pũhtoro, Cristo ijire. Sa yero tiquiro namono pũhtoro ijire ticoro manũno. Sa yero Cristo pũhtoro tiquiro Pacũro ijire. ⁴ Cohăcjũre sinidiquiro tiquiro dapure mohariquiro sinino, tiquiro basi pũhtoro ijiyere wijiario nine. Cohăcjũ yere yahuriquiro gũhũ tiquiro dapure mohano, sata yero nine tiquiro gũhũ. ⁵ Sa yero ticoro dapure moheno Cohăcjũre sinino, ticoro manũno pũhtoro ijiyere wijiagũ yero nine. Cohăcjũ yere yahuricoro gũhũ ticoro dapure moheno, sata yero nine ticoro gũhũ. Sa yero ticoro poarire wũhari pjĩ mehna wũha pehoricoro yero saha yere ticoro. ⁶ Ticoro dapure moha dueraro ticoro poarire se peho cã dutiahro. Ticoro sa yeri bato ticoro dapure bue tiro, ticoro mohaahdo ticoro dapure.

⁷ Ʋmua pehe Cohācjū yero saha pūh-toa ijire. Sa ye Cohācjū quehnoariquiro, tutuariquiro tiquiro ijiye tiyere ihñore tiquina pehe. Sa ye tiquina dapure moheñequinata ijiāhro. Numia pehe Ʋmua tiquina pūh-toa ijiye tiyere ihñore. Sa ye ye tiquina dapure mohaahdo. ⁸ Cohācjū Ʋmūnore yero, numino ya pagū cjē mehna Ʋmūnore yerahye. Numino pehere yero, Ʋmūno ya pagū cjē mehna yeahye ticorore. ⁹ Sa yero Ʋmūnore yero, numino yaquiro ijiatiquirore yerahye. Numino pehere yero Ʋmūno yacoro ijiaticorore yeahye Cohācjū ticorore. ¹⁰ Sa ye numia tiquina dapure mohaahdo angele gūhu tiquina ihña bucueatire. Sa mohañe Ʋmua tiquina pūh-toa tiquina ijiyere ihñone nine. ¹¹⁻¹² Cohācjū numinore yero, Ʋmūno pagū cjē mehna yeahye. Sata yojopure Ʋmūno masa bajuaro, numino pagurū masa bajuare. Sa yero ijiipihyequinare Cohācjū pehe yeahye. Sa yero Ʋmūno tiquiro iji mūhtaedagū numino mariedaboaga. Sa ye numino ticoro mariedagū Ʋmūno gūhu mariedaboaga. Sa ye tiquina Ʋmua numia gūhu tiquina basi cahme yedohore masa putiatire. Sa yero ijiipihyequinare ijiatiquinare bajumehnediquiro ijire Cohācjū.

¹³ ¿Musa basi dūhse ni tūhotuajari? ¿Numino ticoro dapu mohedico, Cohācjūre ticoro sinigū quehnoajari, musa tūhotugū? Ne quehnoaedare. ¹⁴ Sa yero Ʋmūno poa nahmo cūoriquiro tiquiro ijigū ñarīne. Ijiipihyequina masa tire masine. ¹⁵ Sa yero numino ticoro poa nahmo ticoro dapure mohari cahsero yero saha ijire. Sa yero ticoro poa nahmo cūoricoro ijiro quehnoaricoro bajure ticoro. Ti gūhure ijiipihyequina masine. ¹⁶ Musa mehna cjūno ahrire yūhu yahurire tiquiro cahmedagū, ohō saha ni yahutja tiquirore: “Yūhu ni yahuriro saha yeducuaja mari. Apequina Jesu yequina gūhu sata yere

tiquina gūhu. Ūsā sa yerina ijigū ihñagu yūhu ni yahuriro saha yero cahmene mūhu gūhure”, ni yahutja yūhu yahurire cahmeediquirore.

Santa cenare tiquina ihyari watoa dojomehneahye Corinto cjēna

¹⁷ Yojopure musare ahrire yahugū tūh, “Quehnoano yena ijire”, niedaja yūhu musare. Musa cahmecoana quehnoano yerare. Ñano yere musa. ¹⁸ Ohō saha ni yahu mūhtautja musare: Musa cahmecoanopū cahme duse tutuana musa basi ihquē cururi tu wana niñohiti musa. Apequina tire yūhure tiquina yahugū “Potota ijiaga”, ni tūhotuaja yūhu. ¹⁹ Sata yere musa. Sa yena ohō saha ni tūhotumene musa. “Mari tu warina ijina, Jesu yequina waro ijiyequina pehere masinata mari. Sa yena marine tu waro cahmene”, ni tūhotumene musa. ²⁰ Musa basi sa cahme ihña tuhtina, musa ihcānopū cahmecoana ihyana quehnoano yerare. Potota Santa cena waro yena niedare. ²¹ Musa cahmecoana ihquēquina musa sehsaro ihya mūhtana, apequina pehere Ʋjua ahbagū yere. Sa ye sihni mūhtana quehea wahare. ²² ¿Musare musa ihyaye wūhuse mariedajari? ¿Musare musa sihniñe wūhuse mariedajari? Ti wūhusepūta ihya, sihniña. Yojopure Cohācjū yequina tiquina cahmecoanore dojomehnena niaga musa. Sa yena apequina Jesu yequina pejecūoyequinare ihyaye marieñequina pehere musa pehe būoro yūhdugū yere. ¿Dūhse ni yahugutari yūhu musare? “Quehnoano yerare musa”, niaja yūhu.

Santa cenare ihyarire yahuahye Pablo (Mt 26.26-29; Mr 14.22-25; Lc 22.14-20)

²³ Mari pūh-toro Jesu tiquiro ihya bato tirire yahuri yūhure. Sa tiquiro yahuri bato yūhu pehe musare tire yahuu. Ti

ohō saha ijire: Tiquirore ihña tuhtiyequinare Juda tiquiro ihñoati ñamine mari puhtoro Jesucristo päre ne, ²⁴ Cohäcjüre “Quehnoare”, niñohti. Tiquiro sa nidi bato ti päre nuha, tiquiro buheyequinare itiñohti. Sa itiro ohō saha niñohti: “Ahrire ihyaya. Ahri yuhü pagu ijire. Musa ye ijiatire yariutja. Yuhüre musa wacüatire ahrire ihyaya”, niñohti Jesu mari puhtoro. ²⁵ Sa tiquina ih-yari bato tiquiro sihnidi pare neno ohō saha niñohti: “Musa ñañe yeyere cohägu tagu yariutja. Sa yegu ye diire cohägutja. Cohäcjü ‘Musare yuhduoutja’ tiquiro nidiro esagü yuhü yariaro mehna tiquiro nidiro sahata sohtori tirota. Ahri papu pose tiyere sihnina, yuhü dii wiji-arire wacünata. Ahrire sihnina, yuhüre musa wacüatire sihniña”, niñohti Jesu. ²⁶ Sa yena Santa cena cjë päre musa ihyana, sihniñene sihnina, Jesu mari puhtoro mari ye buhirire tiquiro yari-arire wacü, ihñona nine musa. Sa ihñoducunata musa tee ahri yehpapu tiquiro tojoa tato pano.

“Santa cenare ihya sihnina ohō saha yeya”, ni yahuahye Pablo

²⁷ Santa cenare ihya, sihnina, Jesure ño peoro marieno cua pesaro yerana, tiquiro pagüre tiquiro dii cohäri gühüre bujupero saha yena niaja mari. Sa yena Jesure bujupena niaja mari. Sa yeyequina buhiri tiyequina ijire. ²⁸ Sa yena mari yerire, mari ijiye tiyere quehnoano wacüihna. Sa wacüna Santa cenare ihya, sihni masiaja mari. ²⁹ Mari puhtoro mari ye ijiatire tiquiro pagu yari-arire wacüno marieno Santa cenare ihya, sihnina mari buhiri tinata. ³⁰ Ohō saha dihita yere peyequina musa mehna cjëna. Sa ye tiquina ihquëquina tutueyequina, dohatiyequina wahare. Sa ye apequina tiquina sa yeri buhiri yariaa wahare. ³¹ Sa ijiepegüta tiquina ihya, sihniñe tiquina yerire, tiquina ijiye tiyere

quehnoano wacüñe, tiquina ñañe yerire duhu, ti buhirire buhiri tieraboaga. ³² Mari puhtoro pehe marine tuhtire, tiquina ye buhirire marine buhiri ti dutieraro. Apequina ñañequina Jesure ño peoyequina buhiri tiatiquina dihita ijire. Tiquina yero saha marine buhiri tigü cahmedare mari puhtoro.

³³ Sa yena yuhü acaye, Santa cenare ihyana tana cahmecoana, musa basi cohteniña. ³⁴ Sa ye musa mehna cjëna ujua ahba, tiquina ye wuhusepu ihyariähdo. Sa yena Santa cenare ihyana tana cahmecoana, cua pesaro yerariquina ye buhiri buhiri tisi musa. Apee borore yahu duami musare. Came yuhü basi esagupu musare yahutja tire.

Cohäcjü yere mari yeatire cüno marine ye masigü yere Espíritu Santo

12 Yuhü acaye ahrire yahu duaja musare. Cohäcjü yere mari yeatire cüno marine ijiphtinare ye masigü yere Espíritu Santo. Sa yegu tire musa quehnoano masigü cahmeaja.

² Jesu yequina ijieranina sijoro saha ijiye buheyere tuho nununa ijina, musa pehe “Cohäcjü ijire”, tiquina niñe queoyere, yahuducueye queoyere ño peomedi. Tire masine musa. ³ Sa ijimedina musa ijigü yojopüre ohō saha ni yahutja musare. “Jesu ñano wahacünahdo”, niñequina Cohäcjü yaquiro Espíritu Santo tutuaye mehna sa niñe niedare. Espíritu Santo warore cuerare tiquina. Sa ijiye “Jesu mari puhtoro ijire”, niñequina pehe Espíritu Santo tutuaye mehna sa niñequina ijire tiquina.

⁴ Cohäcjü yere ye masiñe peye ijire. Ti sa ijiepegüta marine ye masigü yeriquiro pehe ihcäquirota ijire. Tiquiro Espíritu Santo ijire. ⁵ Sa ye apequinare yedohoye gühü peye ijire. Ti sa ijiepegüta mari puhtoro Jesu pehe marine yedoho dutiriquiro ihcäquirota

ijire. ⁶Sa ye Cohăcĵū yere yeye gūhu peye ijire. Ti sa ijiepegūta Cohăcĵū ijipiltina marine ye masigū yeriquiro pehe ihcăquirota ijire. ⁷Marine Jesu yequinare Espĭritu Santo yedohoro, Cohăcĵū tutuayere ihŋono nine. Ohō sahata yedohore tiqiro Jesu yequinare ijipiltiyequinare mari quehnoano yeatire. ⁸Ihquēquinare quehnoano masi yahugū yere Espĭritu Santo. Sa yero apequinare Cohăcĵū yere quehnoano buhegū yere tiqiro. ⁹Sa yero apequinare Cohăcĵure quehnoano wacū tutuagū yere tiqiro. Sa yero apequinare Cohăcĵū tutuayere ohore tiqiro. Ti tutuaye mehna tiquina pehe dohatiyequinare yuhdugū yere. Cristore tiquina wacū tutuagū ihŋano tiqirore tiquina sinidiro sahata yere tiqiro. Espĭritu Santo ihcăquirota ijiriquiro ti tutuayere ohore. ¹⁰Sa yero apequinare Cohăcĵū tutuaye mehna ihŋoŋene ye masigū yere tiqiro. Sa yero apequinare Cohăcĵū yere quehnoano yahu masigū yere tiqiro tiquinare. Sa yero apequina Jesu yequinare buheyere quehnoano bese masigū yere tiqiro. Sa masiŋe wafino ye buheye ti ijigū masine tiquina. Espĭritu Santo waro ye buheye gūhure ti ijigū masine tiquina. Sa yero apequinare tuhohemeŋe yahuducuyere yahuducu masigū yere tiqiro. Sa yero tuhohemeŋe yahuducuyere yahuducuyequina tiquina nino sahata yahu yuhduo masigū yere tiqiro apequinare. ¹¹Espĭritu Santo ihcăquirota ijiriquiro tiqiro cahmeno saha marine ijipiltinare yuhu yahuriro saha ye masigū yere. Ihquēquinare sijoro saha ye masigū yere. Apequina gūhure sijoro saha ye masigū yere.

**Cristo yequina ijina ihcă
curuata ijiaja mari**

¹²Ohō sahata ijire ahri mehna mari queoye mehna yahugū: Mari pagu ihcă

pagu ijiepegūta omocari, caperi, dahpocări, cahmo ti pūrita peye ijire mari pagupū ijie. Sata ijiaja mari Cristo yequina gūhu. Cristo yequina tiqiro pagu yero saha ihcă curuata ijiaja. ¹³Sa yena Cristo yequina ijina, tiqiro pagu yero saha ihcă curuata ijiaja mari. Judio masa, judio masa ijiena, cahacĵāna, cahacĵāna ijiena peye cururi mari ijiepenata ihcăquirota ijiriquiro tiqiro pagu yero saha ihcă curuata ijiaja mari. Espĭritu Santo ihcăquirota ijiriquiro tiqiro tutuaye mehna wame yenohrina ijiaja mari ijipiltina. Sa yena ihcăquiroreta Espĭritu Santore cuoaja mari, Cristo ya curua cĵāna ijina.

¹⁴Mari pagu ihcă pagu ijiepegūta omocari, caperi, dahpocări, cahmo, ti mari pagupū ijie peye ijire. ¹⁵Muhu dahpocă yahuducuri dahpocă ijiro, ohō saha niboaga mūhure sijoro saha ni duaro: “Omoca ijieraja yuhu. Sa yegu pagu cĵā dahpocă ijieraja yuhu”, ni-boaga. Muhu dahpocă sa nieperota pagu cĵā dahpocă ijirota nine. ¹⁶Muhu cahmono yahuducuri cahmono ijiro, ohō saha niboaga mūhure sijoro saha ni duaro: “Capea ijieraja yuhu. Sa yegu pagu cĵā cahmono ijieraja yuhu”, ni-boaga. Muhu cahmono sa nieperota pagu cĵā cahmono ijirota nine. ¹⁷¿Mari pagu capea dihita ijigū dūhse tuhobogari mari? Basioerare. ¿Sa yena mari pagu cahmono dihita ijigū dūhse wi-ji-boagari mari? Basioerare. ¹⁸Sa ijierare mari pagu. Ohō saha ijire. Mari pagupū ijiyere Cohăcĵū tiqiro cahmeno saha cūahye mari pagure. ¹⁹¿Mari pagupū ijie mariedagū dūhse wahabogari mari pagu? ¿Mari omocari dihita ijigū dūhse wahabogari mari pagu?

²⁰Mari pagu ohō saha ijire: Ihcă pagu ijiepegūta mari pagupū ijie peye ijire.

²¹“Muhu yedohogū cahmedaja”, muhu capea ni masiedare muhu omocare. Sa yero muhu dapu muhu

dahpocārīne “Musa yedohogū cahmedaja”, ni masiedare. ²²Apeye mari pagurū ijyere “Ihyo iji cjuñe ijire”, mari niñe pehere pototi cahmeaja mari apeye mari pagurū ijyere yuhduoro. ²³Sa yena mari pagurū ijyere “Ihyo ijyere ijire”, mari ni tuhutupenata tire mari pagurū ijyere cahmeaja mari, mari quehnoano ijiato saha. Sa yena apeye mari pagurū ijyere mari bue tiyere suhti mehna nuojaja. ²⁴Apeye mari pagurū ijyere nuojedaja mari. Ti puritare ihñona, bue tieraja. Ohō saha iji dutiahye Cohācjū mari pagure. Mari ihñoeñene mari pagurū ijyere mari quehnoano ño peoye mehna cuojaja. Sata ye dutiahye Cohācjū. ²⁵Sa ye mari pagurū ijyere ti basi cahme yedohore. ²⁶Sa ye mari caperi ñano yuhdugū apeye mari pagurū ijyere gūhu ñano yuhdure. Sa ye mari caperi quehnoañe wahagū mari pagurū ijyere gūhu quehnoano tuhature.

²⁷Sa yegu ohō saha nigū niaja musare: Musa pehe Cristo pagu yero saha ihcā curuata ijire. Sa yena ijipihitina musa tiqiro pagurū ijyere yero saha tiqiro yequina ijire. ²⁸Sa yero Jesu yequinare mari yedohoatire cūahye Cohācjū marine. Ohō saha cūahye tiqiro marine. Ihquēquinare marine buhe dutiro Jesu cū muhtarinare cūahye tiqiro. Apequinare tiqiro yere yahu muhtariquinare cūahye. Apequinare masare buheatiquinare, apequinare Cohācjū tutuaye mehna yeatiquinare, apequinare dohatieyquinare yuhduoatiquinare, apequinare masare yedohoatiquinare, apequinare masa puhtoia ijiatiquinare, apequinare tuhohemeñe yahuducuyere yahuducuatiquinare cūahye Cohācjū marine. ²⁹Sa tiqiro cūgū ijipihitina ihcāno saha tiqiro cūrīna ijieraja mari. Apequina Cohācjū buhe dutiro tiqiro cūrīquina ijierare. Sa yena apequina

Cohācjū yere yahu muhtarina ijieraja mari. Sa yena apequina masare buhena ijieraja mari. Sa yena apequina Cohācjū tutuaye mehna yeatina ijieraja mari. ³⁰Sa ye apequina dohatieyquinare yuhduoatiquina ijierare. Sa yena apequina tuhohemeñe yahuducuyere yahuducuna ijieraja mari. Sa yena apequina tuhohemeñe yahuducuyere yahu yuhduoana ijieraja mari. Sa yero maripe mari yeatire cūahye tiqiro. ³¹Sa yena Cohācjū yere ye masi duana quehnoa yuhduye pehere tutuaro cahmeña musa. Sa yegu ijipihitnye yahu nidi yuhduoro musa cahmeatire yojopure yahutja musare yahu.

Apequinare quehnoano tiquina cahātire yahuahye Pablo

13 Masa ye yahuducuyere yahuducu masiepenata, angele ye yahuducuyere yahuducu masiepenata apequinare cahiedana, duhseanaja ijieraja mari. Sa ye mari yahuducuyere gūhu duhseati ijierare. Sa yena apequinare cahiedana mari yahuducuna, ihyo waro yahuducuna niaja. ²Cohācjū yere quehnoano yahu masiepenata, masa tiquina masiedarire Cohācjū yere tiquina buheri gūhure masi pehoepenata apequinare cahiedana duhseanaja ijieraja mari. “Ahdu cunū ape siepū wahaahro”, mari nigū “Potota mari nidiro sahata Cohācjū yerota”, ni mari tuhutugū sata yerota. Cohācjūre sa ni tuhutuyequina ijiepenata apequinare cahiedana ne duhseanaja ijieraja mari. ³Ijipihitnyere pejecuoyequinare mari ohoepegūta apequinare mari cahiedagū ti mari ohori duhseati ijierare. Sa yena Cohācjū yere yena tana mari pagure mari ujuā muo dutiepegūta apequinare mari cahiedagū ti mari sa yeye duhseati ijierare.

⁴Usueraja apequinare cahīna. Tiquinare cahīna quehnoano yeaja tiquinare. Sa yena apequinare cahīna tiquinare coeraja. Sa yena mari cahīniquiro mehna ijina “Mūhu yūhdūoro ijigū ijiaja”, niedaja mari. ⁵Apequinare cahīna “Mūsare masi yūhdūdūcaja”, niedaja mari tiquinare. Sa yena apequinare cahīna tiquinare ño peoro mehna yeaja mari. Apequinare cahīna “Ūsā cahmeno saha yeaja. Mūsa cahmeno saha yeraja”, niedaja mari. Sa yena tiquinare cahīna duita usueraja mari tiquina mehna. Sa yena apequinare cahīna marine ñano tiquina yegū gūhure tiquina mehna sa usuaducueraja mari. ⁶Apequinare cahīna ñañene tiquina yegū ihñana bucueraja mari. Quehnoañe pehere tiquina yegū ihñana tutuaro bucueaja. ⁷Apequinare cahīna tiquina ye buhiri ñano yūhdūepenata tiquinare sa cahīducueaja mari. Apequinare cahīna apequina pehe mari cahīnequinare tiquina yahu wajagū tuhoepenata tire tuho dueraja. Mari cahīnequinare apequina yahugū quehnoañe dihitare tuho duaja mari. Apequinare cahīna “Tiquina ñañene yesi”, ni tuhoutuaja mari tiquinare. Apequinare cahīna ñano yūhdūepenata tiquinare cahī duhusi mari.

⁸Ti cahme cahīne ne pihtisi. Cohācjū yere yahuye pehe came pihtia waha-
rota. Tūhomehneñe yahuducuye gūhu came pihtia waha-
rota. Cohācjū yere masa tiquina buheri gūhu came pihtia wa-
harota. Apequinare cahme cahīne pehe ne pihtisi. ⁹Yojopure Cohācjū yere mari masi peho masiedaja. Sa yena tiquiro yere yahuna mari yahu peho masiedaja. Mari masi pehoati dūhsare. ¹⁰Sa yena Cristo ñañe marieniquiro tiquiro tojoa wihiri bato mari masi pehonata. Sa yena ñañe mariena ijinata. Ti pjere masi pehonata. “Masiedaja”, ni nemosi.

¹¹Mari masi pehoati ohō saha ijire: Nijigū ijigū nijinogā yero saha yahuducumi yūhu. Sa yegu nijinogā yero saha tuhotumi. Sa yegu bucū wahagu nijinogā tiquiro yeriro saha duhu cāu. Sata mari yojopure “Masi pehoeraja”, niepenata camepure masi pehonata. ¹²Eōno quehnoano wūhdoa bajero saha yojopure quehnoano masi pehoeraniaja mari. Came apequirore quehnoano mari ihñana masino saha mari masi pehonata. Yojopure mari masi pehoati marine dūhsare. Cohācjū marine tiquiro quehnoano masi pehoriro saha came mari gūhu quehnoano masi pehonata. ¹³Sa ye ihtiarore mari ye masiaja yojopure. Cohācjūre wacū tutua masiaja. Sa yena marine tiquiro yūhdūoatire masina, mari quehnoano cohte masiaja. Sa yena apequinare cahme cahī masiaja. Ahri ihtiaro ijire pototi mari yeati. Sa yena apequinare cahme cahīna, ahri pūaro yūhdūoro yena niaja. Wacū tutuaye, tiquiro yūhdūoatire cohteye yūhdūoro ijire cahme cahīne pehe.

Tūhomehneñe yahuducuyere yahuahye Pablo

14 Sa yena apequinare cahme cahīna mūsa. Sa ye Cohācjū yere mūsa quehnoano ye masiatire cahmeña mūsa. Cohācjū yere mūsa yahuati pūritare tutuaro cahmeña mūsa. ²Tūhomehneñe yahuducuyere yahuducuriquiro Cohācjū mehna dihita yahuducure. Sa ni yahuducuro masa mehna yahuducuro niedare tiquiro. Tiquiro sa ni yahuducugū tuhoye masa pehe ne tuhoerare tiquirore. Masa tiquina masiedarire Espiritu Santo tutuaye mehna yahuducuro nine tiquiro. ³Cohācjū yere yahuriquiro pehe masa pehere yahure. Sa yahuro tiquiro masare yedohoro nine. Sa yero tiquinare buhero nine tiquiro. Sa yero tiquina ñano yūhdūgū tiquinare bucuegū

yere. ⁴Tuhomehneñe yahuducuyere yahuducuriqiro ihcãquiota buhere. Apequinare buherare. Cohãcjũ yere yahuriquiro pehe apequinare Jesu yequinare buhero, yedohore tiqiro.

⁵Tuhomehneñe yahuducuyere ijipitina msa yahuducugũ quehnoaboaga, yũhũ tuhutugũ. Sa ijiepegũta Cohãcjũ yere msa yahugũ pũritare tutuaro cahmeaja. Cohãcjũ yere yahuriquiro pehe tuhomehneñe yahuducuyere yahuducuriqiro yũhũoro apequinare yedohore. Sa ijiepegũta tuhomehneñene yahuducuriqiro tiqiro yahuducuyere apeqiro yahu yũhũogũ tiquina pehe pototi apequinare yedohore. Tiquiro yahuducuyere yahu yũhũoriquiro ijiro tiqiro pehe apequinare Jesu yequinare buhero nine. ⁶Tuhomehneñe yahuducuyere msa mehna yũhũ yahuducugũ, apeqiro musare tiqiro yahu yũhũoeragũ musare yedohoeraboaga yũhũ. Sa yegũ Cohãcjũ yũhũre tiqiro yahurire yahugũ, tiqiro yere yũhũ masiñene yahugũ, apeyere tiqiro yere yahugũ musare yedohogu niaja. Tire msa tuhõatire musare buhegũ musare quehnoano yedohogu niaja yũhũ.

⁷Tuhomehneñene yahuducuriqiro tiqiro yahuducuye basa wamoa yero saha ijire. Carisure putina, arpare bua pũtẽna tire mari queoro yeragũ ti basayere apequinare masino basioerare. ⁸Sa yero cornetare putiriquiro surara ijiro tiquina cahme wejẽato panore queoro tiqiro putieragũ apequina surara pehe tiquina cahme wejẽatire masisi. Sa ye tiquina cahme wejẽato pano tiquina wejẽatire wamoare quehnoyuriquina ijisi tiquina. ⁹Sata msa gũhũ tuhomehneñe yahuducuyere msa yahuducugũ tuhoye, yahu yũhũoriquiro mariedagũ apequina tire ne masisi. Tiquina sa masiedagũ msa yahuducuye dũhseati ijierare. ¹⁰Ahri

yehpapũ peye yahuducuye ijiaga. Sa ye tire yahuducuyequina tiquina basi sa yahuducuyere quehnoano tuhore. ¹¹Ihcãquiota ye yahuducuyere yũhũ tuhõeragũ ihñano tire yahuducuriqiro pehe “Ape dihta cjũno ijire”, ni tuhõturota yũhũre. Sa yegũ yũhũ gũhũ sata ni tuhõtutja tiqirore. ¹²Sata ijiri msa gũhũ tuhomehneñene yahuducuna. Espĩritu Santo tiqiro tutuaye mehna tutuaro ye duamene msa. Tiquiro tutuaye mehna sa ye duana apequina Jesu yequinare msa buheatire tiquinare msa yedohõatire tutuaro cahmeña msa.

¹³Sa yero tuhomehneñene yahuducuriqiro tiqiro yahuducurire tiqiro quehnoano yahu yũhũoatire Cohãcjũre siniahdo tiqiro. ¹⁴Tuhomehneñe yahuducuye mehna Cohãcjũre sinigu yũhũ tuhõtuyere mehna sinigu niaja. Sa sinigu yũhũ tuhõtuyere apequinare quehnoano yahueraja. Sa yegũ apequinare yedohoeraja yũhũ.

¹⁵Ahrire masina, ohõ saha yenata mari: Espĩritu Santo tutuaye mehna tuhomehneñe yahuducuye mehna Cohãcjũre sininata. Sa yena ape deco quehnoano masi tuhõtu, apequina tiquina quehnoano tuhõatire tiquina ye mehna Cohãcjũre sinina, ti gũhũre sininata tja. Espĩritu Santo tutuaye mehna tuhomehneñe yahuducuye mehna Cohãcjũ yere basanata. Sa yena ape deco quehnoano masi tuhõtu, apequina tiquina quehnoano tuhõatire tiquina ye mehna Cohãcjũ yere basana, ti gũhũre basanata tja.

¹⁶Mari sa yeragũ tuhomehneñe yahuducuye mehna Espĩritu Santo tutuaye mehna Cohãcjũre “Quehnoariquiro, tutuariqiro ijire”, mari niepegũta apequina pehe ne tuhõerare. Sa tuhõeraye “Poto ijire”, ni masiedare. ¹⁷Tuhomehneñe yahuducuye mehna Cohãcjũre “Quehnoare”, ni masiaja

mari. Mari sa niñe quehnoañe ijiepegūta tire yahu yuhduoerana apequinare buheraja mari. Sa yena tiquinare yedohoeraja mari. ¹⁸ Ijipihtina mūsa yuhduoro yuhū pehe tuhohemeñene yahuducujaja. Sa yegū Cohācjū yuhūre sa yahuducu masigū tiquiro yegū tiquirore “Quehnoare”, niaja yuhū. ¹⁹ Sa yahuducugū yuhū ijiepegūta Jesu yequina cahmecoañequina watoa yuhū ijigū, tuhohemeñe yahuducuye mehna peye yuhū yahuepegūta dūhseati ijierare. Ti yuhduoro masa tiquina quehnoano tuhoati pehe meheñegā yuhū yahuepegūta quehnoarīne, yuhū tuhutugū.

²⁰ Yuhū acaye, macanagā tuho masieñequinagā tiquina ijiro saha ijieracāhña mūsa. Sa yena coā bajuayequina ñañe yeyere tiquina masieno saha ijiya mūsa gūhū. Sa yena bēcuna tuho masieñequina tiquina ijiro saha ijiya mūsa. ²¹ Cohācjū yere tiquina ojoari pūpū ohō saha nine: “Tuhohemeñene yahuducuyequinare ahriquina masare yeere yahu dutiitja. Sa yegū ape dihta cjēnare yeere yahu dutiitja ahriquina masare. Yuhū sa yahu dutiepegūta ahriquina yuhū yahuyere tuhosi”, nine Cohācjū mari pūhutoro”, nine Cohācjū yere tiquina ojoari pūpū. ²² Sa ye tuhohemeñene yahuducuye Jesu yequinare Cohācjū tutuayere masigū yeati ijierare. Ti yahuducuye Jesure cahmeeñequina pehere Cohācjū tutuayere masigū yeati ijire. Sa yero Cohācjū yere yahuye Jesure cahmeeñequinare Cohācjū tutuayere masigū yeati ijierare. Cohācjū yere yahuye Jesu yequina pehere Cohācjū tutuayere masigū yeati ijire.

²³ Sa ye ijipihtina mūsa Jesu yequina cahmecoagū tuhohemeñene mūsa yahuducugū tire masieñequina, apequina Jesure cahmeeñequina gūhū sajā, tuhoboaga. Sa tuhoye “Tiquina

tuho masieñequina ijire”, niboaga mūsa tiquina. ²⁴ Ijipihtina mūsa Cohācjū yere mūsa yahugū pūrita tire masiedariquiro, Jesure cahmedariquiro sajā dūca tuhoro, tiquiro ñañe yerire masiboaga tiquiro. Sa yero tiquiro ñañe yerire bujua witiboaga tiquiro. ²⁵ Sa yero poto tiquiro ijiye tiyere tiquiro tuhutuye gūhūre masiboaga tiquiro. Sa yero Cohācjū poto dūsepe curi mehna quehe saro, tiquirore ño peorota. Sa yero “Cohācjū potota mūsa mehna ijire”, ninota tiquiro mūsa.

Mūsa cahmecoana quehnoano yeya dojomehnenno marieno

²⁶ Sa yegū yuhū acaye, mūsa ahrire nigū niaja: Cahmecoana ihquēquina mūsa mehna cjēna Cohācjū yere basa duare. Sa yena apequina buhe duare. Sa yena apequina Cohācjū mūsa tiquiro buherire yahu duare mūsa. Sa yena apequina tuhohemeñe mehna yahuducu duare mūsa. Sa yena mūsa apequina ti yahuducuyere yahu yuhduo duare mūsa. Ti ijipihtiyere sa yena apequina mūsa tuhoyequina tiquina quehnoano masiatire tire yeya.

²⁷ Sa yena tuhohemeñe mehna mūsa yahuducuna pūana, ihtiana topenata yahuducuya mūsa. Sa yena camesa yahuducuya. Mūsa sa yahuducugū, ihcāquiro mūsa mehna cjūno mūsa yahuducurire apequinare yahu yuhduoahro. ²⁸ Mūsa yahuducuyere yahu yuhduoriquiro mariedagū mūsa cahmecoana ijipihtina mūsa tuhohemeñene yahuducu duana marienopū Cohācjū mehna yahuducuya mūsa. ²⁹ Sa yena Cohācjū yere yahu duana pūana, ihtiana topenata yahuya mūsa. Mūsa sa yahugū apequina mūsa tuhoyequina mūsa yahurire quehnoano tuho nūnūahdo. ³⁰ Sa yero Espiritu Santo Cohācjū yere apequirore topū

dujiriquireo yahu ducaboaga. Tiquiro yahu ducagũ tiquirore tũhoriquireo gũhu Jesu yequinare yahu duaboaga. Sa yero tiquiro pano yahuriquireo pehe dihta mariaho. ³¹Sa yena ijipihitina m̄sa Cohãc̄jũ yere yahuna, camesa yahuya m̄sa ijipihitiyequina apequina tiquina quehnoano tũhoatire, tiquina quehnoano bucueatire. ³²Sa yena Cohãc̄jũ yere yahuna ijina, quehnoano tũho masi, quehnoano tũhotu yahuducuya.

³³Cohãc̄jũ tiquiro yequina tiquina cahmecoanopũ tiquina cahme yahuducugũ, suhriɡũ cahmedare tiquiro. Dojomehnenno marieno tiquina quehnoano ijigũ cahmene tiquiro. Ijipihitropũ Jesu yequina cahmecoa, ohõ saha yere tiquina. ³⁴Tiquina cahmecoanopũ numiare yahuducu dutierare. Tiquina numiare mari pehe yahuducu dutieraja. Cohãc̄jũ ojoari pũpũ tiquiro nidiro sahata numiare m̄m̄are quehnoano yãhtiyequina numia ijero cahmene. Sa ye cahmecoanopũ numia masare yahuducueracãhdo. ³⁵Jesu yequina tiquina cahmecoanopũ numia tiquina yahuducugũ ñarĩne. Sa yero apee borore masi duaro numino ticoro ya wũhũpũta ticoro manũnore sinituahro.

³⁶Ahri yũhu yahuatire quehnoano masiña m̄sa. Cohãc̄jũ yere yahu mũhtana ijierare m̄sa. Sa yena tiquiro yere tũhorina m̄sa dihita ijierare. Apequina gũhu tiquiro ye buheyere cuore. ³⁷M̄sa mehna c̄jũno “Yũhu Cohãc̄jũ yere yahugũ ijiaja”, ni tũhoturiquireo ijero ahri m̄sare yũhu ojoari Cohãc̄jũ dutiye ijigũ masiaho tiquiro. Sa yero apequiro “Espĩritu Santo tutuaye mehna ye masiaja”, ni tũhoturiquireo ijero tiquiro gũhu ahri yũhu ojoari Cohãc̄jũ dutiye ijigũ masiaho tiquiro. ³⁸Tire tiquiro masi dueragũ yũhu ojoarire “Poto ijierare”, tiquiro

nigũ tiquirore duhu cãhña. Tũhoeracãhña tiquirore.

³⁹Sa yena yũhu acaye, Cohãc̄jũ yere yahuna m̄sa ijiatire tutuaro cahmeña m̄sa. Sa yena m̄sa mehna c̄jẽna m̄sa cahmecoanopũ tũhomehneñe yahuducuye mehna tiquina yahu duagũ “Sa yahuducueracãhña”, niedacãhña tiquinare. ⁴⁰Sa cahmecoana quehnoano, cahme dojomehnenno marieno yeya m̄sa.

Quehnoañe buheyere tiquiro yahurire yahuahye Pablo

15 Yojoþure yũhu acaye, quehnoañe buheyere m̄sare yũhu yahurire m̄sare wacũgũ ye duaja. Ti buheyere quehnoano cahmene m̄sa. Sa cahmena ti buheyere ne cohãedare m̄sa. ²M̄sa sa cahmegũ tire m̄sa cohãedagũ Cristo m̄sare pecapũ wahaborinare yũhũto tuhasari. M̄sa sa tũhori bato Cristo yere m̄sa duhu cãgũ ti m̄sa tũhori dũhseati ijierare.

³Ohõ saha ni yahu mũhtautja m̄sare. Ahri ihyo waro ijierare. M̄sare buhegu yũhũre Cristo tiquiro yahurire m̄sare ohõ saha ni yahuu: Cohãc̄jũ yere tiquina ojoariro sahata mari ñañe buhirire Cristo yariahye. ⁴Sa yero Cohãc̄jũ yere tiquina ojoariro sahata Cristo tiquiro yariari bato apequina tiquirore tiquina yagũ ihtia deco wahaboro tiquiro pehe masa wijiahye. ⁵Tiquiro sa masa wijiaro bato Pedrore bajuahye. Tiquiro sa bajuari bato apequinare tiquiro buheyequinare bajuahye tja. ⁶Tiquiro sa bajuari bato ihcã tahata quinientos bui ijieyequinare tiquiro yequinare bajuahye tja. Ihquẽquina tiquirore ihñariquina m̄na yojoþure yariariquina m̄na ijire. Tiquina sa ijiepegũta peyequina tiquina mehna c̄jẽna yojoþure ijinine. ⁷Came Cristo Santiagore bajuahye tja. Sa tiquiro

bajuari bato ijipihtiyequina buhe duti tiqiuro cūriquinare bajuahye tja.

⁸Ijipihtiyequina apequinare tiqiuro bajuari bato yuhu gūhure bajuari tja. Nijinogā queoro masa bajueriquirogā tiqiuro masa bajua nūnū tāriro saha yuhu gūhū Jesure wacū tutua nūnū tārigū ijiaja. Yuhu sa ijirigū ijigū tiquina batopū bajuari Jesu yuhu gūhure tja. Yuhureta tiqiuro bajua bato tiri. ⁹Panopure Jesu yequinare nāno yemi. Sa yerigū ijigū apequina Jesu cūriquina ijipihtiyequina tiquina docapū waro ijiaja yuhu. Sa yegu yojopū gūhure Jesu buhe duti tiqiuro cūnohborigū ijierami yuhu. ¹⁰Sa ijiepeguta Cohācjū yuhure cahīgū yojopure Jesu cūrigū ijiaja yuhu. Sa yegu yuhure tiqiuro cahīgū yojopure tiqiuro cahmeñene ye pehoaja. Sa yegu yuhure cahīgū tiqiuro yaquiuro sa iji cāgū niedaja. Ijipihtiyequina apequina tiqiuro cūriquina yuhduoro yuhu pehe tutuaro buhei. Sa buhegū yuhu esa tuharo buherū. Cohācjū yuhure cahīno yuhure yedohori. ¹¹Ūsā buheye pehe ihyo waro ijierare. Yuhu musare quehnoañe buheyere buherigū yuhu ijigū apequina yuhduoro yuhure musa ño peogū ihyo waro ijiro nine. Tiquina gūhū musare buheyequina ijigū apequina yuhduoro tiquina gūhure musa ño peogū ihyo waro ijiro nine. Ūsā pehe ahrire buhena ijiepenata ihyo ijina ijiaja. Ūsā buheye pehe ihyo waro ijierare. Sa yena musa pehe ahri buheyere quehnoano tuhore.

Yariariquina muna tiquina masa wijiare yahuahye Pablo

¹²Cristo yariari bato tiqiuro masa wijiare ūsā buhepegūta “Yariariquina muna ne masa wijaerare”, nine musa mehna cjēna ihquēquina. ¿Duhse ijiro boro sa niajari tiquina tire? ¹³Sa yero yariariquina muna masa wijaeragū Cristo gūhū ne masa wijaeraboya. ¹⁴Sa

ye Cristo masa wijaeragū quehnoañe buheyere ūsā yahuri ne duhseati ijieraboya. Tiquiro masa wijaeragū tiqiurore musa wacū tutuaye gūhū duhseati ijieraboya. ¹⁵Masa wijiario mariedagū ūsā pehe Cohācjū yere ni mehona niboya. Yariariquina muna tiquina masa wijaeragū Cohācjū pehe Cristore masa wijiare yeraboya. Tiquiro sa yeragū “Cohācjū Cristore masa wijiagū yeahye”, nina ni mehona ijiboaga ūsā. ¹⁶Yariariquina munare Cohācjū masoedaro, Cristo gūhure tiqiuro masoedaboya. ¹⁷Sa yero Cristo masa wijaeragū tiqiurore musa wacū tutuaye duhseati ijieraboaga. Sa yena musa ñañe buhiri, buhiri tiboaga musa. ¹⁸Masa wijiario mariedagū Cristo yequina muna yaria muhtariquina pecapū waha tuhasaboya. ¹⁹Cristore mari wacū tutuari bato mari yariana masa wija masiedana ijipihtiyequina apequina masa yuhduoro pejecuona ijiboaga mari pehe. Sa yena tiqiurore ihyo warota wacū tutuana niboaga mari.

²⁰Potota Cohācjū Cristore masa wijiagū yeahye. Cristo masa wijiari bato mari gūhū yarianapū masa wijiadata ijiaja. Tiquiro sa masa wijiario, marine siho masa wija muhtariqiuro ijire. ²¹Ohō saha ijire ahri: Adán mehna masa yaria ducahye. Ohō saha apequiuro mehna yariariquina muna masa wijaeta. ²²Adán yequina iji nūnū tānapū mari ijipihina yarianata. Sata Cristo yequina mari ijigū mari yariari bato marine masa wijiagū yerota Cohācjū. ²³Ihquē cururi masare tiquina queori pje ijigū masa wijaeta. Cristo marine iji muhtariqiuro masa wija muhtahye. Came ahri yehpapū tiqiuro tojoa tagū tiqiuro yequina gūhū masa wijaeta. ²⁴Ti pjeta pihitiri deco ijirota. Sa yero ijipihtiyequina watiare, watia puhtoare, tutuayequinare

cohãno, Cristo yuhduducarota. Tiquiro sa yeri bato ijipihtiyequina puhtoro tiquiro ijirire Cristo wijiario, Cohãcjüre mari Pacure comesarota. ²⁵Tiquiro wijiato pano mari Pacu Cristore ihña tuhtiyequinare tiquiro yuhduduca pehoato pano Cristo pürita ijipihtiyequina puhtoro ijirota. Sa ijiriquirota ijiro cahmene tiquirore. ²⁶Tiquirore ihña tuhtiyequinare tiquiro yuhduducari bato, yariamedi gũhure cohã cãnota. Yariaye pihitia waharota. ²⁷Ijipihtiyequina bui dutiatiquirore cũahye Cohãcjũ Cristore. Ijipihtiyere cuoriquiro gũhure cũahye tiquirore. Sata nine Cohãcjũ yere tiquina ojoari pũpũ. Cohãcjũ pehe tiquirore cũriquiuro ijire. Sa yero “Ijipihtiyequina bui dutiatiquirore cũahye tiquirore”, nino, “Cohãcjũ bui dutiriquiro ijire tiquiro”, nino niedahye tiquiro yere tiquina ojoari pũpũ. ²⁸Ijipihtiyequina bui dutiriquiro Cristo Cohãcjũ macno ijigũ Cohãcjũ tiquirore cũriquiuro pehe tiquiro macno bui dutiriquiro ijirota. Sa yero Cohãcjũ pehe ijipihtiyequina puhtoro waro ijire. Ijipihtiyere cuoriquiro gũhu ijire.

²⁹¿Masa wijiario mariedagũ duhse ye apequina masa yariariquina muna ye ijiatire tiquina wame yenohriquina ijiajari? Yariariquina muna masa wijaeragũ tiquina ye ijiatire apequina wame yegũ ihyo warota wame yenohriquina ijiboaya.

³⁰Usã pehe usã buheri buhiri decoripe apequina usãre tiquina ñano ye duagũ cuarĩne usã gũhure. Usãre sa cuaepegũta masa wijiario ijigũ masina sa buheducuaaja usã. ³¹Mari puhtoro Jesucristo yequina masa ijigũ tiquirore wacũ tutua nemona masa wahagũ yuhũ pehe tutuaro bucueaja yuhũ masa mehna. Ti ijirota ijire. Sa yero “Duhse ijiri decopũ yuhure yariario cuarĩne”, yuhũ nigũ ti gũhu ijirota ijire. ³²Efeso cjëna

usuayequina quehnoañe buheyere yuhũ buheri buhiri yuhure quëdi. Masa wijiario mariedagũ Jesu yaquiro yuhũ ijieragũ, yuhũ sa ñano yuhduri duhseati ijieraboya. Ihyo waro ñano yuhdugũ ni-boya yuhũ. Yariariquina muna tiquina masa wijaeragũ ohõ saha ni-boaga mari: “Came cjünogã yarianata. Duhse wahasi mari. Sa yena ihya sihniinha. Mari esa tuharo yeihna”, ni-boaga mari.

³³Ni mehoñene tuhoteracãhña muna. “Ñañequinare piti tina, quehnoañe muna yerire bonata muna”, nine masa. Ti ijirota ijire. ³⁴Quehnoañene tuhutuna ijiya masa. Sa yena quehnoañene yena ijiya tja. Sa yena ñañene ye nemoedacãhña tja. Ihquëquina muna mehna cjëna ne Cohãcjüre masiedare. Muna buoro wahati pehere musare sa niaja.

Yariariquina muna tiquina masa wijiariore yahu nemoahye Pablo

³⁵Sa ye masa mehna cjëno ohõ saha ni sinituboaga yuhure: ¿Duhse yariariquina muna masa wijaetari? ¿Duhse ijiye paguri masa wijaetari? ni sinituboaga. ³⁶Sa sinituriquiro tuho masieniquiro ijire. Oteri pjere mari oteri bato ti pje ahbagũ waro pihnine. Ahbaeraro ne pihnisi. Tire masine masa. ³⁷Bujuye cjupure oteraja mari. Ti pjeri dihitaro oteaja mari. Ti pjeri trigo pjeri ijiro ijiboaga. O apee boro pjeri ijiro ijiboaga. ³⁸Ti pjerire mari oteri bato Cohãcjũ tiquiro cahmediro saha ti pjerire bucua mujagũ yere. Sa yero oteye pjerire bujuye pihnigũ yere tiquiro. Sata pihni dutire Cohãcjũ.

³⁹Ijipihtiyequina paguri ihcãno saha bajuerare. Masa paguri pehe ihcãno saha ijire. Wahiquina paguri gũhu sijoro saha bajure. Minicjua paguri gũhu sijoro saha bajure. Sa yeye wahi gũhu sijoro saha pagu tire. ⁴⁰Sa ye uhmuse cjë gũhu sijoro saha bajure. Sa yeye ahri yehpa

cjēna gūhu sijoro saha pagu tire. Sa yeye uhmuse cjēna paguri gūhu sijoro saha bajure. Sa yeye ahri yehpa cjē uhmuse cjē yero saha ijierare. ⁴¹ Ohō saha ijire. Asū deco cjūno asi sitere. Sa ye nāmi cjūno gūhu sijoro saha ijire tiquiro gūhu. Ihyo buhriore. Sa yeye nahpicoha gūhu sijoro saha asi paare. Nahpicoha pari gūhure mari ihnagū ihquē paca mehenogā asiye paca bajure. Sa yeye ap-eyē paca tutuaro asiye paca bajure.

⁴² Ohō saha ijire yariariquina muna tiquina masa wijiagū. Masuno tiquiro pagure mari yari bato tiquiro pagu ah-baa waharota. Sa yero ape pagu sijoro saha ijiri pagu ijipihtye decori catiati pagu masa wijiara. ⁴³ Ti pagure mari yagū yariariquiro munano pejecuo nine. Cohācjū tiquirore masogū tiquiro pagu quehnoa yuhduari pagu ijire. Sa yero tiquiro pagu mari yari pagu tutuaye mariedi pagu ijire. Sa yero Cohācjū tiquirore masogū tiquiro pagu tutua yuhduare. ⁴⁴ Ahri yehpa cjā pagure mari yagū yariariquiro munano tiquiro masa wijiagū tiquiro pagu uhmuse cjā pagu ijirota. Ahri yehpa cjā pagure mari cuona, uhmuse cjā pagu gūhure cuonata, masa wijiana.

⁴⁵ Sata ni yahure Cohācjū yere tiquina ojoari pūpū: “Ahri yehpapū iji muhtariquiro Adán wame tiriquiro catiriquiro wahahye”, ni ojoahye. Ti sa ijiepegūta Adán yero saha ijiriquiro bato tiriquiro Cristo pehe catiyere ohoro ahtahye. ⁴⁶ Ahri yehpa cjā pagu iji muhtari pagu ijire. Camepū uhmuse cjā pagu ijirota. ⁴⁷ Ohō saha ijire: Iji muhtariquiro Adán pehe ahri yehpa cjūno dihta mehna tiquiro yeri pagure pagu tiahye. Tiquiro bato ahtariquiro, Cristo pehe uhmusepū ahtahye. ⁴⁸ Dihta mehna tiquiro yeri pagure pagu ti muhtariquiro tiquiro ijiriro saha ijipiltina apequina dihta mehna tiquiro yeri pagure pagu tina ijaia

mari. Sa yena uhmusepū ahtariquiro yero saha tiquiro yequina ijipiltina tiquiro yero saha pagu tina ijinata mari. ⁴⁹ Dihta mehna tiquiro yeri pagure pagu tiriquiro yero saha bajuaja mari. Tiquiro yero saha mari ijiriro saha uhmuse cjūno yero saha bajunata mari.

⁵⁰ Yūhu acaye, mūsare ahrire yahu duaja: Ahri yehpa cjā pagu dii mehna, dihi mehna ijiri pagu Cohācjū puhtoro ijirōpūre uhmusepūre ne wahasi. Mari pagu ahbati pagu ijire. Sa ye uhmusepū ijipihtye decori mari ijiatōpūre ahri pagu wahasi. ⁵¹⁻⁵² Panōpūre masa tiquina masiedarire yojōpūre mūsare yahu duaja: Mari mehna cjēna ihquēquina yariasī. Sa ye duita, tiquina pagūre comesayequina ijietā. Cornetare tiquiro puti, bato tiri decopū sata waharota marine. Ohō saha waharota. Corneta bisiri bato yariariquina munare Cohācjū masonota ijipihtye decori tiquina ijiatire. Sa yena pagūre comesarina ijinata mari gūhu.

⁵³ Mari pagūre tiquiro comesagū to pano mari ahbati paguri ijiepegūta mari comesari bato ne ahbasi. Sa ye mari paguri comesagū to pano mari yariati paguri ijiepegūta ne yariasī. ⁵⁴ Mari ahbati paguri ne ahbaerati pagūre comesarota. Sa ye mari yariati paguri sa ijiducuatī pagūre comesarota. Sa marine comesagū panopū tiquiro ojoariro sahata sa waharota: “Cohācjū yariayere cohā cāri. ⁵⁵ Yojōpūre ne pari turi mari yariasī. Sa yena yariaro mehna pari turi nāno yuhdusi mari”, ni ojoahye panōpūre. ⁵⁶ Mari nāne buhiri ijigū pūrita yariaro mehna nāno yuhdunata. Sa ye Cohācjū dutiye Moiserē tiquiro cūrire mari masidi bato, buhiri tiaja mari. Sa yero marine pecapū waha dutire Cohācjū dutiye. ⁵⁷ Tiquiro sa dutiepegūta mari puhtoro Jesucristo pehe marine pecapū wahaeragū yere. Tiquiro sa yeriquiro ijigū masina

Cohăcĵŭ mehna bucue, “Quehnoare”, niaja mari.

⁵⁸Sa yena yuhŭ acaye, yuhŭ cahĭna, Cristore wacŭ tutua duhueracăhĭna. Sa yena apequina musare quehnoaĭne buheyere tiquina cohă dutigŭ, ne cohăedacăhĭna tire. Sa yena decoripe mari puhtoro Jesucristo tiqiro ye dutiyere quehnoano yeducuya musa. Mari puhtoro Jesucristo yere mari yegŭ, ahri ihyo waro ijierare. Ahrire masina tiqiro ye dutiyere quehnoano yeducuya musa.

**Apequinare Jesu yequinare
Corinto cĵena niĭneru tiquina
ohoatire yahuahye Pablo**

16 YojoPURE apequinare Jesu yequinare musa niĭneru ohoatire yahu duaja musare. Galacia yehpa cĵenare Jesu yequinare yuhŭ dutiriro sahata musa gŭhŭ yeya. ²Semanaripe domingo ijigŭ ijipihitina musa Jesu yequinare ohoati niĭnerure mehenogă ohoya. Mehenogă cuona mehenogă ohoya. Sa yena paji cĵunogă cuona paji cĵunogă ohoya. Semanaripe musa sa yegŭ musa cahapŭ yuhŭ esagŭ musa ohoati niĭneru iji tuhasarota. ³Musa ohoatire yahuye pŭrine ojoaŭtja. Sa yegŭ yuhŭ topŭ esagŭ ti pŭrine topŭ wahatiquinare musa beseriquinare ohoutja. Sa oho tuhasagŭ Jesu yequinare musa ohori niĭnerure neatiquinare ohoutja Jerusalĕpu. ⁴Ti macapure yuhŭ yeati ijigŭ yuhŭ gŭhŭ wahagutja. Yuhŭ sa wahagŭ yuhŭ mehna tiquina wahaeta.

Tiqiro tiniatire yahuahye Pablo

⁵Macedonia yehpa cĵenare ihĭna yuhdutja yuhŭ. Yuhdu că, musa cahapŭ Corintopŭ esaŭtja. ⁶Topŭ esagŭ musa mehna meheĭne decorigă ijiboaga yuhŭ ape taha yegŭ. Yoa cĵŭri pje pohero ijiro puno musa mehna ijiboaga yuhŭ.

Sa yena ape siepŭ yuhŭ wahagŭ musa gŭhŭ yuhŭre yedoho masine. ⁷Meheĭne decorigă iji dueraja yuhŭ musa mehna. Sa yegŭ Cohăcĵŭ cahmegŭ yoa cĵŭri pje musa mehna ijiiĭtja yuhŭ. ⁸Sa iji duepeguta Pentecoste bose deco ijigŭpŭ Efesopŭ ijiniitja yuhŭ. ⁹Ohŭpŭ Efesopŭ yojoPURE mari puhtoro Jesu yere tuho duayequina peyequina ijire. Tiquina sa ijigŭ tiquinare yahuaĵa. Yuhŭ sa yahugŭ yuhŭre ihĭna tuhtiyequina peyequina ijire.

¹⁰Timoteo yuhŭ yero saha mari puhtoro yere yere. Tiqiro sa yeriqiro ijigŭ musa cahapŭ esagŭ quehnoano mehna tiqirore piti ca, tiqiro mehna quehnoano bucueye mehna ijiya musa. ¹¹Sa yena tiqirore yuhducaeracăhĭna musa. Sa yena tiqiro cohe tigŭ quehnoano mehna tiqirore yedohoya yuhŭ cahapŭ tiqiro tojoa tagŭ. Apequina Jesu yequina mehna usă tiqirore cohtena niaja. Sa yena quehnoano yedohoye mehna tiqirore ohoya.

¹²Apolo mari acayuro Jesu yaqiro musare ihĭano wahagŭ tutuaro cahmemi. Sa yegŭ tiqirore waha dutimi apequina Jesu yequina mehna tiqiro wahatire. Yuhŭ sa waha dutiepegŭta yojoPURE tiqiro waha duerare. Sa yero came tiqiro yeye mariedagŭ musa cahapŭ waharota.

Pablo quehnoa duti bato tiahye

¹³Quehnoano wacŭ masiĭna musa. Cristore wacŭ tutua duhueracăhĭna. Ne cuenata ijiducuya musa. Sa yena Cohăcĵŭ tutuaye mehna tutuana ijiya musa. ¹⁴Apequinare sa cahiducuya.

¹⁵YojoPURE yuhŭ acaye musare ahrire yahu duaja: Estefana ya wuhŭ cĵena Acaya yehpa cĵena quehnoaĭne buheyere tuho muhtariquina, tiquina ya yehpapŭ Cristore wacŭ tutua muhtariquina ijire tiquina pehe. Sa ye apequinare

mari acayere Jesu yequinare tiquina quehnoano yedohoducure. Tire m̄sa masine. ¹⁶Tiquina yero saha ijiyequinare, apequina Cristo yere yedohoyequinare m̄sa quehnoano yuhtigū cahmeaja yuh̄u. ¹⁷Estefana, Fortunato, Acaico gūh̄u yuh̄u cahapu wihi tuhasare. Ohōp̄u tiquina ijigū quehnoano bucueaja yuh̄u. M̄sare tiquina bucuegū yeriro saha yuh̄u gūh̄ure bucuegū yere tiquina. M̄sa mariedagū m̄sare tutuaro wacūmi yuh̄u. Sa yegu tiquina wihigū bucueaja yuh̄u. ¹⁸Tiquina mehna ijigū quehnoano jeripohna tigu ijii yuh̄u. M̄sa gūh̄ure sata bucuegū yere tiquina, yuh̄u tuh̄otugū. Tiquinare quehnoano ño peoya m̄sa. Sa yena apequina tiquina yero saha ijiyequina gūh̄ure ño peoya.

¹⁹Asia yehpa c̄jēna Jesu yequina m̄sare quehnoa dutire. Sa ye Aquila, Priscila, tiquina ya wuh̄up̄u cahme-coañequina mehna Cristo tiquiro cahñe mehna m̄sare tutuaro quehnoa dutire. ²⁰Ohō c̄jēna Jesu yequina ijiptiyequina m̄sare quehnoa dutire. M̄sa mehna c̄jēnare quehnoano mehna piti caya.

²¹Yuh̄u, Pablo yuh̄u basi ahri dihitare ojoaja. M̄sare quehnoa dutiaja.

²²Mari puhtoro Jesucristore apequiro tiquiro cah̄iedagū, Coh̄acjū tiquirore buhiri dahreahro. Mari puhtoro sojaro mehna tojoa taahro.

²³Mari puhtoro tiquiro cahñe mehna m̄sare quehnoa dutiaja. ²⁴Mari ijiptina Jesucristo yequina ijiaja. Sa yegu m̄sare tutuaro cah̄iaja.

2 Corintios

Ohõ saha ojoa ohoahye Pablo Corinto cjenare

1 Yuhũ Pablo, Jesucristo yere buhe duti tiqiro cūrigũ ijiaya. Mari Pacu tiqiro cahmediro saha cūri yuhũre Jesu. Yuhũ, musare Cohācjũ yequinare, Corinto cjanare ojoa ohoaja. Ijipihtina Cohācjũ yequinare Acaya cjanare musa gũhure ojoa ohoaja. Mari acayuro Timoteo mehna quehnoa dutiaja musare. ²Sa yena Cohācjũ mari Pacu, mari puhtoro Jesucristo mehna musare quehnoa dutiaja. Tiquina yedohoye mehna quehnoano ijiya musa.

Pablo tiqiro ñano yuhdũri ohõ saha ni yahuahye:

³Mari puhtoro Jesucristo Pacuro Cohācjũ marine paja ihñare. Sa yero tiqiro dihita marine yedohore. Quehnoa yuhduariquiro ijire tiqiro. ⁴Mari ñano yuhdũgũ ihñano ijipihtinare marine tiqiro yequinare yedohore tiqiro apequinare mari yedohatire. Sa yena apequina tiquina ñano yuhdũgũ ihñana tiquina pehere yedohoro cahmene marine. Cohācjũ marine tiqiro yedohoye mehna mari gũhũ tiquina gũhure yedohonata. ⁵Cristo yequina mari ijiri buhiri mari ñano yuhdũgũ tiqiro tutuaro yedohorota marine. ⁶Usã pehe musare yedohona ñano yuhduaja. Sa yena Cristo mehna musa yuhduatire musare usã yahuri buhiri ñano yuhduaja. Sa yena Cristo usãre tiqiro yedohogũ usã pehe musa gũhure yedoho masiaja. Sa yena usã ñano yuhdũriro sahata musa gũhũ ñano yuhdũna, quehnoano mehna ihcãno sahanata musa, yuhũ tuhutugũ. ⁷Quehnoano mehna musa ihcãno sahatire usã masiaja. Usã ñano

yuhdũriro sahata ñano yuhdũri musa gũhũ. Sa yena Cohācjũ tiqiro yedohoye mehna usã ihcãno sahariro sahata musa gũhũ ihcãno sahanata, yuhũ tuhutugũ.

⁸Usã acaye, yojopure ahri yuhũ yahuatire musa quehnoano masigũ usã cahmeaja. Asia yehpapũ ña yuhduaro yuhdũe tii usã. Ohõ saha ni tuhutumi usã: “Ne yuhdũsi mari. Sa yena mari yarianata”, ni tuhutumi usã. ⁹Sa yena “Marine wejẽ cãeta”, ni tuhutumi usã. Sa ñano yuhdũna Cohācjũ dihitare usã wacũ tutua nemou. Usãre tiquina ñano yegũ cahmeahye Cohācjũ tiqirore usã wacũ tutua nemoatire. Tiquiro pehe yariariquinare masoriquiro ijire. Sa tiqirore wacũ tutuana usã esa tuharo usã ihcãno sahaerare masiaja. Cohācjũ marine yedohore. ¹⁰⁻¹¹Usãre cuaro yepegũta tiqiro yedohoro mehna usã yuhdũũ. Camepũ gũhure pari turi usãre yuhdũorota. Usãre Cohācjũre musa sini basagũ tiqiro usãre yedohorota. Usãre tiqiro yedohatire masiaja usã. Sa yena usãre tiqiro yedohogũ ihñana, tiqirore “Quehnoare”, ninata musa. Peye musa sini basarire tiqiro yuhutigũ ihñana bucue, “Quehnoare”, ninata musa Cohācjũre. Peyequina apequina gũhũ sata nieta.

Pablo Corintopũ tiqiro waha duamedire yahuahye

¹²Sa yena musa mehna usã ijirire wacũna bucueye mehna ohõ saha tuhutuaja usã: Ahri yehpapũ Cohācjũ tiqiro yedohoye mehna ñañe marieno quehnoano mehna masare piti ti buhei. Musa pũritare quehnoano piti ti buhei. Ohõ saha yena usã esa tuharo yerũ. Cohācjũ cahĩne mehna tiqiro tutuaye mehna sa yei. ¹³⁻¹⁴Sa yena quehnoano yahu ojoaũ musare, quehnoano musa masiatire. Yojopũ usãre quehnoano masiedare musa. Usã ijiye tiyere musa quehnoano masigũ tutuaro cahmeaja

usã. Sa yena mari puhtoro Jesu tiqiro tojoa tagũ usã mehna bucuenata musa. Musa mehna usã bucuero sahata musa gãhu usã mehna bucuenata.

¹⁵⁻¹⁶ Ohõ saha nigu Macedonia yehpapu waha duamaja yuhu. Sa yegu musare ihña yuhdu cã duamaja yuhu. Sa yegu topure esarigu tojoa tagu pari turi musa mehna meheñe decorigã ijiyoaga yuhu. Sa yena puã taha musa mehna yuhu ijigũ ihñana pajiro yuhu mehna musa bucuoaga. Musa cahapu ijirigu Judea yehpapu yuhu wahagũ ihñana yuhure yedohoboaga musa. ¹⁷ ¿“Wahautja”, yuhu nigũ tuhorina ijina musa cahapu yuhu eseragũ ihñana “Pablo ni mehono nine”, ni tuhotuajari musa? “Wahautja”, nigu yuhu esa tuharo sa nigu niedaja yuhu. ¿“Tiqiro nidiro saha yerare”, yuhure ni tuhotuajari musa? ¹⁸ Ohõ saha ni mehogu ijieraja yuhu. Sa yegu “Yeitja”, nigu yuhu nidiro saha yeaja yuhu. Tire masine Cohãcjũ.

¹⁹ Yuhu, Sila, Timoteo mehna Jesucristo Cohãcjũ macuno yere musare yahuu usã. Cristo pehe “Yeitja”, nino, poto yeriquiro ijero nine. Cohãcjũ tiqiro nidiro sahata Cristo yere. ²⁰ Ijipihiyere Cohãcjũ tiqiro yahurire Cristo ye pehoahye. Tiqiro sa yeriquiro ijigũ ihñana tiqiro yere usã apequinare yahuaja Cohãcjũre tiquina ño peotire. ²¹ Cristo yequina marine ijiducugũ yeriquiro Cohãcjũta ijire. Sa yero tiqiro yere yahuanajare marine sõri tiqiro. ²² Sa yero tiqiro yequina mari ijiyere ihñano tire marine masigũ yere tiqiro. Sa yero tiqiro yaquiro Espiritu Santore mari mehna iji dutiri tiqiro. Mari mehna ijero tiquirota marine Cohãcjũ yuhduoatore masigũ yere.

²³ YojoPURE poto yahutja musare. Poto yuhu yahueragũ Cohãcjũ pehe musare poto yahuahro. Tiquirota yuhu tuhotuyere masine. Musare tuhti dueragu musa cahapu wahaeru. “Musare bujua

witigũ yeari”, nigu musa cahapure Corintopure wahaeru. ²⁴ Sa yena “Musare dutina ijiaja usã”, nina niedaja. Cristore quehnoano wacũ tutua tuhasari musa. Sa yena “Ohõ saha Cristore wacũ tutuaro cahmene musare”, nina niedaja usã. Musare quehnoano bucuẽgũ ye duaja usã.

2 Sa yegu ohõ saha ni tuhotuu: “Pari turi tiquinare bujua witigũ ye dueraja. Sa yegu yojoPURE wahaeraja”, ni tuhotuu. ² Musare bujua witigũ ye dueraja. Musa bujua witigũ ihñagu yuhu pehe musare bucuoaga. Sa yena yuhure bucuẽgũ yeatina ijieraboaga musa pehe. ³ Sa yegu musa cahapu wahaeru. Sa wahaeragu musare ihyo ojoau. Musa yuhure bucuẽgũ yeatina ijiepenata yuhure bujua witigũ yeoaga musa, musa cahapu yuhu esagũ. Musa mehna yuhu bucuẽgũ, musa gãhu bucuenata. Tire masiaja yuhu. Sa yegu yojoPURE musa mehna bujua witi dueragu wahaeru musa cahapu. ⁴ Pajiro tuhotugu, ñano jeripohna tigu, tutuaro utigu musare ojoapeguta musare bujua witigũ ye dueru. Musare tutuaro yuhu cahñene musare masigũ ye duagu musare ojoau.

**Corinto cãna mehna cãno
tiqiro ñano yerire bo dutiahye
Pablo Jesu yequinare**

⁵ Ihcãquiro musa mehna cãno yuhure bujua witigũ yeriquiro ijiri. Sa yeriquiro ijiepegũta musare tiqiro tutuaro bujua witigũ yeriro saha yuhu pehere pajiro bujua witigũ yerari tiqiro. Tiqiro sa ñano yepegũta pajiro waro buhiri dahre duti dueraja. ⁶ Peyequina musa mehna cãna tiqirore buhiri dahre tuhasañohti. To punota buhiri dahre duhuro cahmene tiqirore. ⁷ Tiqirore musa buhiri dahreducugũ tutuaro bujua witiboaga tiqiro. Sa yero Cristo yere duhuboaga. Sa yena tiqiro ñañe yerire boya musa.

Tiquirore yedohoya tiquiro bucuegũ. ⁸Sa yena tiquirore quehnoano yeya m̄sa tiquirore m̄sa cahĩñene tiquiro masigũ. M̄sa sa yegũ tutuaro cahmeaja yuħu. ⁹To pano m̄sare ojoagu “¿Potota yuħare yuħtietari?” nigu sa ni ojoau m̄sare. Yuħare m̄sa yuħtigũ ihña duagu m̄sare sa ni ojoau. ¹⁰⁻¹¹Yojop̄are tiquiro ñañe yerire m̄sa bogũ ihñagu yuħu gũhu tire boutja. Yuħare ñano yerahye tiquiro. M̄sa pehere ñano yeahye. Tiquiro sa ijiepegũta tiquiro ñañe yerire boaja yuħu gũhu. M̄sare quehnoano yedoho duagu Cristo ihñonopu tiquiro ñañe yerire boaja. Tire boaja Satana marine tiquiro yuħducaeratire. Tiquiro marine ñañene yegũ cahmene. Tire quehnoano masiaja mari. Sa yena Jesu yequina tiquina ñañe yerire wacũducueraja mari, “Tiquinapu Satana yere yeari”, nina.

**Troa wame tiri macapu ijiro
Titore bocaeraro pajiro bujua
witi tuhotuahye Pablo**

¹²Sa yegu Troa wame tiri macapu esau Cristo yere buhegu wahagu. Topu yuħu ijigũ peyequina masa quehnoañe buheyere tuho duayequina ijiri. Mari puħtoro tiquiro yedohoye mehna tiquiro yere yuħu buheatiquina peyequina masa ijiri. ¹³Sa ijiepegũta mari acayurore Titore bocaeragu pajiro bujua witi tuhotuu. Sa yegu to cjenare cohe ti tuhasagu Macedonia yehpapu wahau.

**Cristo yedohoye mehna
ñañene yeducueraja mari**

¹⁴Sa ye Cohãcjũ pehe marine ñañene yeragũ yere. Cristo yequina mari ijigũ ihñano marine ñañene yeragũ yere. Sa yegu Cohãcjũre bucue, “Quehnoare”, njaja. Sa yena Cohãcjũ marine tiquiro dutigũ masina ijipihtiropu Cristore masare masigũ yeaja mari. Sa tiquirore masiñe tiquina quehnoano tuhoture.

¹⁵Cristo yequina ijina, Cohãcjũ pehere bucuegũ yeaja mari, ehme sitiye mari bucuerdo saha. Sa ye Cristo yequina mari ijiyere ihña masine apequina Cohãcjũ yuħduoatiquina. Apequina tiquina ñañe buhiri pecapu wahatiquina gũhu Cristo yequina mari ijiyere ihña masine. ¹⁶Cristo yequina mari ijigũ ihñañe, tiquina ñañe buhiri pecapu wahatiquina pehe pecapu tiquina wahatire masine. Cohãcjũ yuħduoatiquina pehe marine Jesu yequinare ihñañe, ijipihtiyecori tiquiro mehna tiquina ijiatire masine. Sa ye Cristo ye ihyo ijye buheye ijierare. Sa yero ahrire Cristo yere ihcãquiro esa tuharo buhe sohtori tiriquire ne mariedare. Cohãcjũ yedohoro mehna tiquiro yere mari buhe masiaja. ¹⁷Peyequina apequina Cohãcjũ yere buhemene niñerure wapata duaye. Usã pehe tiquina yero saha yeraja. Ni mehono marieno Cristo tutuaye mehna tiquiro yere buheaja usã. Cohãcjũ usãre cũgũ tiquiro ihñonopu quehnoano buheaja usã.

**“Ohõ saha yeitja”, Cohãcjũ ni cũrre
wahma buheyere yahuahye Pablo**

3 ¿Pari turi usã ijye tiyere m̄sare yahuna njajari usã, m̄sa tuhotugũ? Apequina m̄sare tiquina buheato pano tiquina ijye tiyere masi duana tiquina ojoari pũre cahme muħtari m̄sa. Usãre masi tuhasari m̄sa. ¿Usãre masiepenata ti pũ borore cahmeajari m̄sa? ¿O apequina cahapu usã buhena wahana ti pũ borore usãre neno cahmeajari, m̄sa tuhotugũ? ²Ti pũ borore cahmedaja usã. M̄sa pehere ijipihtiyequina apequina ihñañe m̄sare usã quehnoano buherire masieta. M̄sare usã buhegũ Cristo yequina iji ducari m̄sa. ³Cristo yequina m̄sa ijigũ ihñañe masa m̄sare Cohãcjũ ye buheye warore usã queoro buherire masi tuhasare. M̄sare buhena Cohãcjũ yaquiro Espĩritu Santo tiquiro

yedohoye mehna buhei. Tiquiro Cohăcĵũ catiriquiro waro ijire. Ūsă sa buhegũ tũhona Cristore quehnoano cahmedi mŭsa. Sa cahmena mŭsa ijigũ apequina mŭsare ihăăne Cristo yequina mŭsa ijiyere quehnoano masine. Sa masiăe mŭsare Cohăcĵũ ye buheye warore ūsă queoro buherire masine masa.

⁴ Ahrire ijipihtiyere tũhotuaja ūsă Cohăcĵũre quehnoano wacũ tutuana. Cristo tiquiro yedohoye mehna sa wacũ tu-tuaducuaaja mari. ⁵⁻⁶ “Ūsă esa tuharo ahri dahrayere yeaja ūsă”, ni masiedaja ūsă. Cohăcĵũ tiquiro yedohoye mehna ye masiaja ūsă.

Yojopũre tiquiro yahuyere quehnoăne buheyere Cohăcĵũ pehe quehnoano ūsăre buhe masigũ yere. Ahri buheye panopũ tiquiro dutiye tiquiro ojoari yero saha ijierare. Quehnoăne buheye pehere buheaja ūsă. Panopũ tiquiro dutirire mari esa tuharo ne ye masiedaja. Sa mari ye masiedari buhiri pecapũ wahaboya mari. Quehnoăne buheye pehere tũhona Cristore wacũ tutuaja. Sa yena ijipihtiyere decori Cohăcĵũ mehna ijinata mari. ⁷ Cohăcĵũ tiquiro dutiyere ūtă pĵinipũ ojoaro Moisere cũahye. Tiquiro sa cũri bato tiquiro asi siteye bajuahye. Moise wũhdoa asi siteahye. Asi site yũhduahye. Came ti asi siteye pihtia wahahye. Came ti asi siteye pihtia wahatĩ ijiepegũta coă warore tiquiro wũhdoare masa ne ihăadoque ohũ masiedahye. Ti dutiyere masa tiquina ye pehoerari buhiri pecapũ wahatiquina ijiahye. Sa ye ti dutiye masare pecapũ waha dutiepetă, tutuaro asi siteye mehna iji dũcahye ti dutiye.

⁸ Ti dutiye yũhduoro quehnoăne buheye pehe quehnoa yũhduare. Ahri buheyere apequinare mari buhegũ tiquina quehnoano tũhogũ Espĩritu Santo tiquina mehna ijirota. Sa ye panopũ cĵe dutiye yũhduoro Cristo ye

pehe quehnoa yũhduare. ⁹ Cohăcĵũ dutiye panopũ cĵe masare pecapũ waha dutiahye. Sa dutieperota Cohăcĵũ tutuaye mehna tiquiro asi siteye mehna iji dũcahye. Ti yũhduoro quehnoăne buheye pehe Cohăcĵũ tutuaye mehna ijire. Ti buheye mehna quehnoănequina wahare masa, Cohăcĵũ ihăagũ. ¹⁰ Panopũ Cohăcĵũ tiquiro dutiri pehe ihyo ijiyere dutiye yero saha tojoa căhre yojopũre quehnoăne buheye mehna mari ihăa piti cagũ. Quehnoăne buheye pehe quehnoa yũhduare. Ti buheye mehna ūhmũsepũ mari waha masiaja. ¹¹ Panopũre tiquiro ye dutiye yoa cĵũri pje asi siteye ijiducume, pihtia wahahye. Ti dutiye yũhduoro quehnoăne buheye pehe quehnoa yũhduare. Ti buheyere quehnoano tũhona, Cohăcĵũ mehna sa ijiducunata.

¹²⁻¹³ Mari sa ijiducuatire masina, cuero marieno quehnoăne buheyere quehnoano yahu peho cĵă ūsă. Moise pehe ūsă yero saha ijierahye. “Cohăcĵũ asi siteye pihtiro nine’, Israe masa ni ihăari”, nino, tiquiro wũhdoare cahmotahye Moise. Bue tiro sa cahmotahye. Tiquiro yee tiriro saha bue tieraja ūsă pehe. Sa yena cuero marieno tiquiro yere quehnoăne buheyere buheaja. ¹⁴ Ti pjepũ cĵena Israe masa pehe ne masieda tiahye. Yojopũ gũhũre Cohăcĵũ yere panopũ tiquiro ojoari pũrine tiquina buheye, ne masiedare. Moise tiquiro wũhdoare cahmotagũ Cohăcĵũ asi siteyere tiquina ihăadoque ohũedariro saha tiquina quehnoăne buheyere quehnoano masiedare. Cristore cahmedaye, masisi tiquina. Tiquirore tiquina wacũ tutuari bato, tiquiro yere masieta.

¹⁵ Yojopũ gũhũre Israe masa Cohăcĵũ dutiye Moisere tiquiro cũrire buheye, tiquinare cahmotaro saha ne masiedare tiquina. ¹⁶ Mari pehe mari pũhtorore cahmegũ tiquirota marine masigũ yere.

Moise tiqiro wuhdoa cahmotaritore tiqiro ne cāboriro saha mari puhtoro marine tiqiro yere quehnoano masigū yere. ¹⁷“Mari puhtoro”, nigu Espiritu Santore nigu niaja. Cohācjū yaqiro Espiritu mari mehna tiqiro ijigū pecapū wahaborinare tiqiro yuhduorina ijiaja. Sa yena “Panopū cjē dutiye mehna mari yuhdunata”, niedaja mari. Sa yena ti dutiyere duhuna, Espiritu Santo ye dutiye pehere yeaja mari. ¹⁸Sa yena Jesu yequina ijina, Cohācjū yere masiaja mari. Tiquina wuhdoa pacare cahmotamehnequina yero saha Cristo tutuayere ihñona niaja mari. Sa yero mari puhtoro Espiritu Santo marine quehnoañe pehere comesagū yere. Tiquiro sa yegū Cristo quehnoa yuhduariqiro tiqiro ijiro saha wahana niaja mari.

4 Sa ye Cohācjū usāre paja ihñano, quehnoañe buheyere yahuanajare cūri usāre. Tiquiro sa cūgū masina, tiqiro yere buhena caributieraja usā. ²Tiquiro yere buhena ni meje cū buheraja. Sa yena usā tire comesaeraja. Sijoro saha cjūnogā buhena buoro yuhduboaga. Sa yena tire buhe dueraja. Cohācjū ihñonopū ijiaja usā. Sa yena quehnoañe buheyere quehnoano potu buheaja usā. Usā sa buhegū ihñañe tire quehnoano masine usāre ihñañequina waro. ³Usā buheyere quehnoañe buheyere buheaja usā. Usā tire buhepegūta apequina ne tuho duerare. Sa tuhoeyequina pecapū wahatiquina ijire. ⁴Satana ñariqiro ahri yehpa cjēna puhtoro tiquinare masiedagū yere. Caperi bajueyequina tiquina ihña masiedaro saha masiedagū yere tiquinare. Quehnoañe buheyere Cristo tutuayere tiquinare masiedagū yere tiqiro. Cristo pehe Cohācjū ijiye tiyere marine masigū yere. Tiquiro Cristo Cohācjū waro ijire. ⁵Usā buhena “Usā pehere ño peoya”, ni buheraja. Ohō

saha ni buheaja usā: “Jesucristo pehe ijire mari puhtoro”, ni buheaja usā. Usā pehe Jesure yuhtina ijiaja usā. Sa yena musare yedohoaja usā. ⁶Panopū ohō saha niahye Cohācjū: “Nahitianopure buhriero ijiaja”, ni, dutiahye tiqiro. Yojobure tiquirola ijire marine tiqiro tutuayere masigū yeriqiro. Buhriero marine ti ihñagū yero saha, tiqiro tutuayere marine masigū yere. Cristo Cohācjū tutuayere marine masigū yere.

Cristo tutuaye mehna mari ijiaja

⁷Sa masina ijina, tiqiro tutuayere apequinare masigū yeaja. Sa yena ijiepenata tutueraja usā. Dihi sutu duita wahtiro ti butiro saha usā gūhū tutueraja. Sa ijiepenata Cohācjū tutuayere apequinare buheaja usā. Usā sa tutuerapenata tire buheaja usā. Usā sa buhegū ihñañe usāre “Tiquina esa tuharo ahri buheyere masiedare. Cohācjū pehe tiquinare masigū yere”, ni masieta apequina usāre. ⁸Ijipihtiequina apequina usāre ñano yepeta Cohācjū usāre tiqiro yedohogū tiquina usāre yuhducaerare. Sa yena usā caributiepenata, Cohācjū yere ne yahu duhueraja. ⁹Usāre tiquina ñano yeducuepegūta Cohācjū usāre sa yedohoducure. Usāre tiquina quēdoque cū mūjaepēgūta tiqiro yedohoye mehna yarieraja usā. ¹⁰Tiquina wejēatina ijinata niaja usā, Cristo ahri yehpapū tiqiro ñano yuhduriro saha. Tiquina wejēatina ijiducuna niaja usā Cristo catiducugū yeriqiro tiqiro ijiyere masa tiquina masiato saha. Usā sa ñano yuhdugū ihñañe tire masieta masa.

¹¹Sa ye decoripe usāre apequina wejēno cuarīne Cristo yequina usā ijiri buhiri. Ohō sahata ñano yuhduaja usā Cristo catiducugū yeriqiro tiqiro ijiyere apequina tiquina masiato saha. Usā paguri came yariaa waharota. Usā

sa wahatina ijiepenata Cristore catiducugū yeriquirore masigū yeaja usā apequinare. ¹²Sa ye musare usā buheri buhiri usā pehere apequina wejēno cuarīne. Usā buheyere musa tuhori bato ijipihtiye decori Cohācjū mehna ijiatina ijire musa.

¹³Cohācjū yere tiquina ojoari pūpu ohō saha nine: “Cohācjūre wacū tutuagu, tiqiuro yere buhei”, ni ojoahye panopu cjūno. Usā gūhu sata yeaja. Cohācjūre wacū tutuana, tiqiuro yere buheaja. ¹⁴Ahri yūhu niati gūhure quehnoano masiaja usā: Cristo yariari bato Cohācjū tiqiurore masoahye. Sa yero Cristo yequina mari ijigū ihñano tiqiuro mari gūhure masonota. Tiquiro sa masori bato tiqiuro cahapu neanota marine. ¹⁵Sa yena musare yedoho duana, ñano yūhduaja usā. Sa yena Cristo yequina musa peyequina wahana, peyequina musa Cohācjūre bucueye mehna ño peonata. Tiquirore “Quehnoare”, ninata.

¹⁶Musa sa wahagū ihñana, usā ñano yūhdūepenata bujua witieraja. Sa yena Cristo yere buhe duhueraja. Usā pagu tutuaye decoripe pihti cāno nine. Usā tutuaye sa pihti cāpegūta quehnoano jeri sajāja usā. ¹⁷Yojopure ñano yūhdūepenata ñano yūhdu dojoeraja. Ti mari ñano yūhdūye pihtia waharota. Sa yena marine mehenogā ñano yūhdūro cahmene. Sa mari ñano yūhdūrina ijina, camepūre tutuaro bucueye mehna ijiducunata Cohācjū mehna. Sa yena mari ñano yūhdūri yūhdūoro pajiro bucueye mehna ijiducunata. ¹⁸Mari ihñari ahba pihtia waharota. Mari ihñedari pehe sa ijiducurota. Sa yena mari ihñarire wacūducueraja. Mari ihñedari pehere Cohācjū yere sa wacūducuaaja mari. Sa yena camepū mari quehnoano ijiatire bucueaja.

5 Wūhure tiqiuro cohāboriro saha came mari paguri pehe butia wa-

harota. Sa yero wahma wūhure tiqiuro yeboriro saha Cohācjū wahma pagurire yerota. Sa yero ti pagurire marine ohorota. Ti paguri masa tiquina yeri paguri ijierare. Sa yena ūhmūsepū sa ijiducunata ti paguri mehna. Tire mari masiaja. ²Sa yena ti pagurire ūhmūse cjē pagurire tutuaro cahmena, mari sa cohteducuna niaja. ³Suhtirore tutuaro mari saña duaro saha ti pagurire tutuaro cahmeaja mari. Sata cohteaja mari paguri mariena iji duerana. ⁴Yojopure ahri pagurire cohā duerapenata wahma paguri pehere tutuaro cohteaja mari. Yojopure mari pagurire cohā duerapenata ijipihtiye decori Cohācjū mehna mari ijiatire tutuaro cahmeaja mari. Sa yena ahri mari paguri yariati paguri ti ijigū masina, wahma paguri mehna Cohācjū mehna sa ijiducu duaja mari. ⁵Mari sa ijiducuatire quehnoahye Cohācjū pehe. Sa quehnono tiqiuro yaquiuro Espiritu Santore ohori marine. Sa yero tiqiuro yaquiuro Espiritu Santo mari mehna ijiro, marine Cohācjū tiqiuro yeatire “Poto tjire”, nino, marine masigū yere tiqiuro.

⁶Sa yena Cohācjūre wacū tutuaducuaaja mari. Cuero marieno ijiaja mari. Ahri mari iji muhtari pagupū ijina, mari puhtoro mehna ijieraniaja. ⁷Ūhmūse cjēne Cohācjū gūhure mari ihñedapenata “Ti potota ijire”, ni tuhutuaja mari. Sa yena tiqiurore wacū tutuaja mari. ⁸Sa yena mari cueraja. Mari pagurire ahri yehpū cohāna mari puhtoro mehna ūhmūsepū ijiducunata mari. Sa yero mari yariagū quehnoanota marine. ⁹Sa yena Cristore bucuegū ye duaja mari. Ahri yehpa cjā pagu mehna ijinina tiqiurore bucuegū ye duaja. Ūhmūsepū gūhure tiqiurore bucuegū ye duaja. ¹⁰Ijipihtina Cristo cahapu mari wahagū ihñano tiqiuro mari yerire ihñano marine beserota. Ñano mari yerire masinota tiqiuro. Sa masino marine tiqiuro ohoborire ma-

rine ohosi tiqiro. Quehnoañene mari yeri gũhure masinota. Sa masino bucuero marine quehnoano yerota. Tiquiro sa masidiquiro ijigũ ihñana tiquiore bucuẽgũ ye duaja mari.

**Cohãcjũre mari ihña tuhtigũ ihñano
Cristo pehe marine bosare**

¹¹ Sa yena cua pesaro mehna Cristore ño peoro cahmene marine. Tire masina, Cristo yere masigũ yeaja usã masare. Tiquinare cuesãna, tiquiore wacũ tutuagũ ye duaja usã tiquinare. Quehnoano mehna tire usã buherire Cohãcjũ quehnoano masine. Usã sa buherire musa gũhure quehnoano masigũ cahmeaja yũhũ. ¹² Pari turi quehnoana usã ijiye tiyere musare yahuna niedaja. “Apequinare yũhdũdũcaja”, niñequinare musa yahuati pehere quehnoano mehna usã buherire yahuna niaja usã musare. Tiquina pehe tiquina wacũñepũ ñañequina ni mehoñequina ijiepetata masa tiquina ihñono dihita quehnoañequina yero saha ye ihñomene. Sa yena usã mehna musa bucuẽati pehere ahri ijipihtiyere musare yahu ojoana niaja. “Pablo gũhu usãre quehnoano mehna buhere”, usãre apequinare musa ni cahmotati pehere ahri ijipihtiyere musare yahu ojoana niaja. ¹³ ¿Usã ohõ saha ni yahuna tuho masiena ijiajari usã, musa tuhotugũ? Masa usãre ihñañe, tuho masieñequina yero saha ihñare usãre. Cohãcjũ yere usã yegũ ihñañe sa ihñaaboaga usãre. Sa tiquina ihñano hrina ijiepenata sa ijina ijieraja musare yedoho nemonata tana.

¹⁴ Cristo marine tiqiro cahigũ ihñana musare sa yedohojaja. Tiquiro sa cahigũ ihñana tiqiro yere sa yahuducujaja usã. Ihcãquirola Cristo ijipihtina mari ñañe buhirire yariari jiri. Tiquiro sa yariari bato mari pehe ijipihtina mari ñañe buhirire yariariquina yero saha ijiaja. Tiquiro buhiri dahre tuhasariquina

yero saha ijiaja. Cristo tiqiro yariari mehna marine tiqiro buhiri dahre tuhasariquina yero saha ihñanota Cohãcjũ. ¹⁵ Ijipihtina mari ñañe buhiri yariari jiri Cristo tiqiro ye dihitare mari yeato saha. Sa yero tiqiro cahmeñe pehere marine ye dutiro yariari jiri tiqiro. Mari ye ijiatire yariari, masa mujari jiri. ¹⁶ Sa yena yojopũre usã esa tuharo masare “Quehnoañequina ijire. Ñañequina ijire”, ni ihñedaja usã. Panopũ usã esa tuharo yee timi. Sa yena Cristore masiedũ. Yojopũre Espiritu Santo yedohoye mehna tiquiore quehnoano masi tuhasaja. ¹⁷ Sa yena Cristo yequina wahana quehnoañe pehere yena wahaja mari. Panopũ mari esa tuharo mari yemedire duhu cãã mari. Yojopũre quehnoañe pehere comesana tire yeaja mari.

¹⁸ Cohãcjũ pehe marine quehnoañe pehere comesagũ yeri. Cohãcjũre ihña tuhtina mari ijigũ ihñano Cristo pehe mari ñañene cohãri. Sa cohãno mari ihña tuhtiyere duhugũ yeri tiqiro. Sa yegũ yeri Cohãcjũ Cristore. Sa yero usãre tiqiro yere buhe dutiro cãri. Sa buhena, apequinare Cohãcjũ mehna tiquina ihña tuhtirire duhugũ yeaja usã gũhũ. ¹⁹ Ohõ saha masare yahu dutiri Cohãcjũ usãre: “Cristore mari wacũ tutuagũ ihñano mari ñañe buhirire buhiri dahrerare Cohãcjũ marine. Sa yero marine ihña tuhtiritiquiro ijieperota tiqiro marine tiqiro yequina ijigũ yere”, ni yahu dutiri Cohãcjũ usãre. ²⁰ Sa yena Cristo yere buheanaja tiqiro cãrina ijiaja usã. Cohãcjũ musare tiqiro yahu boriro saha usã pehe ohõ saha ni musare yahuaja: Cristore yahu basana niaja. Sa yena musare ihña tuhtieragũ yeaja. Cohãcjũre musa ihña tuhtiyere to punota duhuya. ²¹ Cristo tiqiro ñañene yerapegũta Cohãcjũ pehe tiquiore mari ñañe buhirire yaria dutiahye. Sa yero mari ñañe buhirire buhiri dahreahye

Cohăcĵŭ tiqiro pehere. Sa yero Cristo yequina mari wahagŭ Cohăcĵŭ yero saha quehnoana marine ijigŭ yere tiqiro.

6 Cohăcĵŭre yedohona ijiaja ũsă. Sa yena ahrire tutuaro musare ye dutiaja ũsă. Cohăcĵŭ yere quehnoăne buheyere musa tuhoriro sahata yeya musa. Musa tuhoriro sahata musa yer-agŭ ti musa tuhori duhseati ijierare. ²Ohŭ saha nine Cohăcĵŭ:

Musare yuhŭ quehnoano yeati pjere musa siniĕene taho yuhtiitja. Sa yegu musare yuhŭ yuhduoati decore musare yedohoutja, nine tiqiro.

Tuhoya musa. Yojoĵŭre Cohăcĵŭ musare tiqiro quehnoano yeati pje ijire. Yojoĵŭre Cohăcĵŭ musare tiqiro yuhduoati deco ijire.

³Ne mehenogă apequinare ñano yer-aja ũsă. Apequinare ne ñano ni yahuducueraja, “Quehnoăne buheye pehere cahmedari”, nina. ⁴Sa yena Cohăcĵŭ cahacĵăna ũsă ijiyere musare masigŭ ye duaja. Sa yena ohŭ saha ijiaja ũsă: Ñano yuhduna, apee borore cuoerana sa tuhodu cĵă. ũsăre tiquina ñano yepegŭta usuaro marieno ijiaja. ⁵Ohŭ saha ñano yuhdun ũsă: Masa ũsăre quĕgŭ, peresu tiquina yegŭ, peyequina masa ũsăre wejĕ duagŭ tiquina sañuducugŭ ñano yuhdun ũsă. ũsă tutuaro dahra wahyia yuhduna, wujua purĕpegŭta carĕdana, ũjua ahbana ñano yuhdun. ⁶Numia mehna ñano yeru. Sa yena Cohăcĵŭ yere quehnoano masiĕe mehna buhei musare. Sa yena ne usueru ũsă. Sa yena quehnoano cahĕe mehna yei ũsă musare. Sa yena Cohăcĵŭ cahacĵăna ũsă ijiyere musare masigŭ yena nii ũsă. Espĕritu Santo tiqiro yedohoye mehna Cohăcĵŭ cahacĵăna ũsă ijiyere masigŭ yena nii musare. Sa yena poto musare ũsă cahĕgŭ ihĕnana, tiqiro cahacĵăna ũsă ijiyere masine musa. ⁷Sa yena quehnoăne buheyere musare poto ũsă buhegŭ ihĕnana, Cohăcĵŭ tutuaye mehna

ũsă yegŭ ihĕnana tiqiro cahacĵăna ũsă ijiyere masine musa. Quehnoăne pehe ijipihtiye ũsă yeri ũsă wamoa yero saha ijire quehnoano ũsă cahmotati pehe. Tire quehnoăne yena watinore ũsă cahmotana niaja. Sa yena ti quehnoăne ũsă yeri mehna tiqirore ũsă yuhducaja.

⁸Apequina ũsăre ño peore. Apequina pehe ũsăre ño peoerare. Apequina ñano ni yahuducure ũsăre. Apequina pehe quehnoano ni yahuducure ũsăre. Poto ũsă buhepegŭta “Ni mehoĕnequina ijire”, ni yahusăre apequina ũsăre. ⁹Apequina ũsăre ihĕna masiĕnequina yero saha yere. Ihquĕ tahari ũsăre masiĕnequina yero saha yere. ũsăre tiquina wejĕ duepegŭta catiniaja ũsă. Ihĕna ũsăre. Ijirota ijire. Tiquina wejĕ dutinohrina ijiepenata, yarieraniaja ũsă. ¹⁰ũsă ihquĕ tahari bujua witina ijiepenata, sa bucueducuja. Pejĕcŭona ijiepenata apequinare quehnoăne buheyere buhena tiquinare pajiro doeri cĵĕne ũsă ohoboro saha yena niaja tiquinare. Apee boro cuoena ijiepenata, potota Cohăcĵŭ ye pehere cuo peho cĵă ũsă.

¹¹Ne Corinto cĵăna yuhŭ acaye, musare quehnoano mehna yahu peho ojoau ũsă musare. Musare tutuaro cahĕna, sa yahuu musare. ¹²ũsă pehe musare cahĕ duhueraja. Musa pehe ũsăre cahĕda cĵŭre. ¹³Sa yegu pohna tigŭ yuhŭ pohmare yuhŭ yahuboro saha musare yahutja: Musare ũsă tuhoturiro sahata musa gŭhŭ sata quehnoano tuhotuya ũsăre. Sa yena ũsăre cahĕna musa.

Cristore cahmeeĕnequinare piti ti dutierahye Pablo

¹⁴Sa yena Cristore cahmeeĕnequina mehna sa piti tiducueracăhĕna. Tiquina mehna cĵăna ijieracăhĕna. Ihcăno saha ijierare musa. Quehnoăne yeriqiro ñăne yeriqiro mehna quehnoano iji

masiedare. Cohācjüre cahmeñequina Cohācjüre cahmeñequina mehna quehnoano cahme piti ti masiedare. ¹⁵Sa yero Cristo watino mehna ihcāno saha tuhותרare. Sa yero Cristo yaquiro, Cristore cahmeediquiro mehna quehnoano cahme piti ti masiedare. ¹⁶Cohācjü wuhupü “Cohācjü ijire”, tiquina niñe queoyere mari cuogü ñarīne. Ti wuhupü ti queoyere mari cügü quehnoaedare. Ti yero sahata Cristo yequina Cristore cahmeñequina mehna mari piti tiducugü gühure ñarīne. Ti cururi pua curua ihcāno mehna iji masiedare. Cohācjü catiriquiro tiquiro ya wuhü yero saha ijijaja mari. Ti wuhupü tiquiro ijiro saha mari mehna ijire tiquiro. Ohō saha nine Cohācjü:

Tiquina mehna ijigutja yuhü. Sa yegü tiquina watoa sa ijiducugutja. Yuhü Cohācjü tiquina puhto ijigutja. Sa ye tiquina pehe yeequina masa ijieta, nine tiquiro.

¹⁷Sa yero ohō saha ni nemore tiquiro mari puhtoro:

Ñañequina mehna tojoeracāhña. Sa yena tiquinare piti tieracāhña. Cristore cahmeñequinare tiquina ñañene ne piheracāhña. Sa yegü yuhü pehe musare piti tigutja. ¹⁸Sa yegü musa Pacu ijigutja. Musa pehe yuhü pohna ijinata, nine Cohācjü mari puhtoro tutua yuhduariquiro.

7 Yuhü acaye, yuhü cahina, musare ahrire yahutja: Ahri ijiphtiyere Cohācjü tiquiro sa ni yahugü tuhona ijiphtiyere mari ñañene yeyere duhuuhna. Sa yena mari ñañene wacüñe gühure duhuuhna. Sa yena Cohācjüre quehnoano ño peoye mehna ñano yero marieno ijiihna mari.

Pablo bucueye mehna yahuahye Corinto cjēnare

²Quehnoano mehna ijija musa usā mehna. Ne mehenogā mehna ñano yeru usā musare. Sa yena usā buh-eye mehna musare ñano yegü yeru usā. Ne ihcāquiro musa mehna cjūnore ni mehoñe mehna wapa cahmedu. ³Sa nigu “Usāre wapa yerari. Sa yena buhiri tina ijire musa”, nigu niedaja musare. Musare yahu tuhasau. Musare cahiaja usā. Catinina ihcā curuata ijijaja mari. Mari yariari batopü gühure ihcā curuata ijinata mari. ⁴Quehnoano musa yerire masiaja yuhü. Sa yegü musare wacūdoqueogu bucueaja. Sa yena usā ñano yuhduri watoa musa pehe yuhure pajiro bucuegü yeri.

⁵Sa ye Macedonia yehpapü usā esari bato topü ijina, ne soeru usā. Topure ñano yuhduu usā. Apequina usā mehna cahmeque duari. Sa yena “Cristo yere duhuari”, nina Cristo yequina pehere cuesā nii usā. ⁶Usā sa ñano yuhduepegüta Cohācjü usāre bucuegü yeri. Tiquiro bujua witiyequinare bucuegü yeriquiro ijire. Sa yero Tito usā cahapü tiquiro wihiro mehna usāre bucuegü yeri Cohācjü. ⁷Tito wihigü ihñana bucuei. Ahri gühure bucuei. Musare tiquiro quiti yahugü gühure tutuaro bucuei usā. Yuhure musa ihña duarire yahuri usāre. Yuhure musa wacüe ti bujua witiri gühure yahuri tiquiro. Tiquiro sa ni yahugü tuhogu tutuaro bucuei yuhü.

⁸To pano yuhü ojoari pü mehna musare bujua witiügü yemi. Sa yerigu ijiepegüta bujua witieraja yuhü pehe. Ti püre musa buheri bato bujua witiñohti musa. Sa yena mehenogā bujua witi, duhuñohti musa. Sa yegü coā ojoa muhtagu bujua witiiepegüta yojopure bujua witieraja. ⁹Yojopü pūritare bucueaja yuhü. Musa bujua witiügü

tuhogu bucueraja. Sa ijiepegūta sa bujua witina, quehnoañe pehere came-sañohti mūsa. Sa yero mūsa bujua witiḡū ihñano, Cohācjū pehe musare quehnoañene comesagū yere. Sa yena musare bujua witiḡū yena, ñano ye do-jomehnena niedu usā musare. ¹⁰ Sa yena Cohācjū tiqiro cahmeno saha bujua witina, mari ñañene bujua witinata. Quehnoañe pehere comesanata. Sata mari bujua witiḡū ihñano marine pecapū wahaborinare yuhdūore Cohācjū. Mari sa bujua witiḡū quehnoarīne marine. Cristore cahmeeñequina pehe tiquina ñañene bujua witiḡapeta, sa bujua witi maca cā, pecapū wahatiquina ijinine.

¹¹ Mūsa pehe Cohācjū tiqiro cahmeno saha bujua witiñohti. Mūsa sa bujua witina ohō saha yeñohti mūsa: Yojoḡure ñañene yeyequinare sa ihña cādañohti mūsa. Tiquinare duhu dutiñohti mūsa. Sa yena tiquina ñañe yeyere cueñohti mūsa “Tiquina yero saha yeari”, nina. Sa yena yuhūre ihña duañohti mūsa. Sa yena ñañene yeriqirore buhiri dahre duañohti mūsa. Ti ijipihtiyere mūsa yena yojoḡure poto yena mūsa ijiyere masiḡū yeri mūsa usāre. ¹² Panopū ñano yeriqirore musare yahu ojoaepēgūta tiqirore yedohogu tagū sa ni yahu ojoaerū. Tiquiro ñano yenohriqiro ḡūhure yedohogu tagū sa ni ojoaerū. Mūsa pehere yedohogu tagū ti pūre ojoaū. Usāre quehnoano ño peore mūsa. Tire mūsa ño peorire quehnoano mūsa masiatire ti pūre ojoaū musare. Cohācjū tire musare masiḡū cahmene. ¹³ Sa yena Tito mūsa yerire tiqiro quiti yahugū tūhona tutuaro bucuēi usā.

Tito ḡūhū tutuaro bucuēi. Tiquirore mūsa quehnoano mehna mūsa piti caḡū tūhona, mūsa mehna tiqiro bucuēire tūhona usā ḡūhū quehnoano bucuēi. ¹⁴ Coā waropū mūsa cahapū tiqiro wahato pano mūsa mehna yuhū bu-

cuēire, quehnoano mūsa ijirire yahuu tiqirore. Sa yena yuhū nidiro sa-hata quehnoano yeñohti mūsa tiqirore. Sa yegu tiqirore yuhū nidire buē tieraja. Musare poto sa yahuducuaja usā. Ohō saha Tito ḡūhure poto usā yahuu musare tiqiro ihñariro saha. ¹⁵ Mūsa cahapū tiqiro esagū ño peoye mehna tiqirore piti cañohti mūsa. Sa yena quehnoano yuhūta yuhdūducaro mariena mūsa ijigū ihñañohti tiqiro. Sa yero musare cahī nemore tiqiro. ¹⁶ Yojoḡure quehnoano yuhūta, Cohācjū cahmeno saha mūsa quehnoano ye pehona mūsa ijigū quehnoano masiaja yuhū. Sa masiḡū tutuaro bucuēaja.

**Cristo yequina ijina,
pejecuoyequinare sa oho
cāno cahmene marine**

8 Usā acaye, ahri yuhū yahuatire musare masiḡū cahmeaja usā. Cristo yequina Macedonia yehpa cjēna Cohācjū cahīne mehna tiqiro paja ihñañe mehna tiquina yerire musare yahutja. ² Tiquina ñano yuhdūepeta, niñeru marieñequina ijiepetā cahīno marieno sa oho cāhri pejecuoyequinare Jesu yequinare. Cristo mehna tutuaro bucuēyequina ijiye, tiquina Judea yehpa cjēnare quehnoano mehna tiquina cuoyere sa oho cāhri. ³ Musare niita niaja. Tiquina cūoro puno ohori. Ijierare. Bui cjūnogā ohori. Usā sini basaerapēgūta pejecuoyequinare ohori tiquina. ⁴ Cohācjū yequinare pejecuoyequinare tutuaro yedoho duaye, tiquinare tiquina ohoatire nea dutiri usāre. ⁵ “Ohō puno ohoeta”, tiquinare usā ni tūhoturiro bui cjūnogā ohori tiquina. Ohō saha yeri tiquina: Coā warore niñerure tiquina ohoato pano mari pūhtoro Cristo cahmeno saha ye pehori jiri tiquina. Sa ye Cohācjū cahmeno saha usā ḡūhure ño peoye

mehna yuhtiri jiri. Sa yeyequina ijiye tiquina niñerure ohori.

⁶Tiquina sa oho tuhasagū ihñana Titore usā pehe ohō saha nii: “Corinto cjēnare mūhū buhe ducararo sahata quehnoano mehna pejecuoyequinare tiquina ohoatire buhe pehoya”, nii usā tiquire. Mūsa gūhū apequinare paja ihñana, mūsa yedohoatire sa nii tiquire. ⁷Sa yena mūsa pehe ijipiltiyere quehnoano yena iji tuhasare: Cristore potota quehnoano wacū tutuare mūsa. Sa yena tiquire yere quehnoano yahure mūsa. Sa yena Cohācjū yere quehnoano masine mūsa. Sa yena Cohācjū cahmeno saha tutuaro ye duare mūsa. Sa yena usāre cahñe mūsa. Ohō saha quehnoano yena iji tuhasare mūsa. Mūsa sa quehnoana ijiepegūta mehenogā duhsare mūsa. Pejecuoyequina pūritare mūsa paja ihñagū cahmeaja usā. Sa yena cahño marieno tiquinare quehnoano mehna mūsa pajiro ohogū cahmeaja usā.

⁸Sa nigu mūsa dutigu niedaja. Sa ni yahugūta niaja mūsa. Apequina pejecuoyequinare tiquina tutuaro yedohore mūsa yahugū niaja. “¿Potota paja ihñana ijajari mūsa?” ni, masi duagu niaja. ⁹Mari puhtoro Jesucristo pehe marine tiquire paja ihñare masine mūsa. Ti ijirota ijire. Tiquire uhmūsepū pajiro cūriquire ijieperota ahri yehpapū ahtarō pejecūriquire wahahye. Sa yero mari ye ijiatire yariaro pejecūriquire wahahye. Ohō saha wahahye tiquire mari pehe tiquire yere pajiro mari cūoatire, tiquire mehna mari sa ijiducuatire.

¹⁰Mūsa sa yahugūta niaja. Ohō saha tuhotuaja yūhū pehe: Ihcā cūhma wahare mūsa oho duagū. Mūsa pehe pejecuoyequinare oho dua mūhtamedi. Sa yena tiquinare oho mūhtaborina ijimedi mūsa. ¹¹Sa yena mūsa ye duararo saha yojopūre sohtori tiya. Mūsa oho dua

mūhtararo saha yojopūre quehnoano oho pehoya. Sa yena pajiro cūona ijina pajiro ohoya. Mehenogā cūona ijina mehenogā ohoya. ¹²Tutuaro mūsa oho duagū tire mūsa ohore Cohācjū bucuero. Sa yena noho mūsa cūoro puno ohoya. Mūsa ohoro punota bucuero Cohācjū. “Pejecuoyequinare mūsa cūoye yūhūoro ohoya”, mūsa nino niedare Cohācjū.

¹³“Pejecuoyequinare ohoya”, nigu tiquinare pajiro cūo dutigu niedaja. Sa yegu mūsa pehere pejecūoro ye dueraja. ¹⁴Mūsa ihcāno saha cūo dutigu sa nigu niaja. Yojopūre mūsa pehe pajiro cūore. Sa cūona apee boro marieñequinare oho masine mūsa. Came mūsa apee boro mariedagū tiquina gūhū oho masine mūsa. Mūsa sa cahme ohona ihcāno saha cūonata ijipiltina Cristo yequina. ¹⁵Ohō saha nine Cohācjū yere tiquina ojoari pūpū: “Pajiro nediquiro gūhū apequina bui cjūnogā cūerari. Mehenogā nediquiro gūhūre ne mehenogā duhsarari”, nine Cohācjū yere tiquina ojoari pūpū.

Tito tiquire mehna cjēna mehna Corintopū wahahye

¹⁶Sa ye mūsa yūhū yedohoro sahata Tito gūhū mūsa yedoho duare. Cohācjū pehe tiquire yedoho duagū yeri tiquire. Tiquire sa yegū ihñagū “Quehnoare”, niaja Cohācjūre. ¹⁷Titore mūsa cahapū usā waha dutigū tiquire quehnoano mehna yuhtiri. Sa yero tiquire usā waha dutiatio pano tiquire basita mūsa cahapū tutuaro waha duariquire iji tuhasari.

¹⁸Tiquire apequire Jesu yaquire mehna piti dahrei usā tiquire. Tito mehna cjūnore ijipiltiyequina apequina Jesu yequina quehnoano ño peore. Quehnoañe buheyere tiquire quehnoano yahuriquire ijigū ihñañe tiquire quehnoano ño peore. ¹⁹Sa ye

Jesu yequina tiquireore cahmene usã mehna tiquireo tinino wahagũ. Tiquina ye niñerure pejecuoyequina cahapu usã neagũ usã mehna wahatiquireore cahmene tiquireore. Sa ye ti niñerure usã ohogũ ihñañe “Marine yedohoriquiro ijire”, nieta masa Cohãcjüre. Usã sa ohona, tiquireore tutuaro mari yedoho duarire masigũ yenata tiquireore. ²⁰ Sa yena ahri niñerure, pajiro Jesu yequina tiquireo ohorire neana, quehnoano ihña ihbonata tiquireo ohorire, “Usãre yahusãri”, nina. ²¹ Mari puhtoro tiquireo ihñonopu queoro, quehnoano ye duaja usã. Sa yena masa tiquireo ihñono gũhure queoro ye duaja.

²² Sa yena tana apequireore mari acayurore ohonatja Tito gũhu mehna. Usã piti dahreriquirore peye tahari apequinare tiquireo quehnoano yedohogũ ihñañ usã. Sa yero yojopure musa pehe apequinare musa yedoho duagũ ihñano to pano tiquireo yeriro yuhduoro quehnoano musare yedoho duare. ²³ Tito pehere musare yahutja. Tiquireo yuhu mehna cjũno ijire. Musare yuhu yedohogũ tiquireo yuhu mehna dahreriquiro ijire. Apequina tiquireo mehna wahatiquireo Jesu yequina tiquireo bese ohoriquina ijire. Cristo yere tiquireo yere, apequina tiquireo ño peoatire. ²⁴ Sa yena cahño mehna quehnoano mehna tiquireo piti caya musa. Musa sa yegũ ihñañe apequina Jesu yequina quehnoañequina pehe musa cahñene masieta. “Quehnoano piti caeta Corinto cjẽna”, ni yahu tuhasau apequinare. Musa sa quehnoano piti cagũ ihñañe tiquireo usã yahuri poto ijigũ masieta apequina Jesu yequina.

Jesu yequinare pejecuoyequinare tiquireo ohoatire yahuahye Pablo

9 Sa yena Cohãcjũ yequinare musa yedohoatire musa ohoatire masi

tuhasare musa. ² Apequinare musa yedoho duagũ masiaja yuhu. Sa masigu Macedonia yehpa cjẽnare ohõ saha ni yahuu: “Corinto cjẽna Jesu yequina pehe apequinare yedoho dua tuhasari. Ihcã cuhma yuhdure tiquireo yedoho duari”, ni yahu tuhasau tiquireo. Musa sa yedoho duagũ tuhoye peyequina tiquireo gũhu pejecuoyequinare yedoho duari. ³ Musare sa ni yahugu yojopure ahriquireore mari acayere musa cahapu ohogu tagu niaja, yuhu yahuriro saha musa yeato. Sa yegu pejecuoyequinare musa ohoatire musa cahmecoa cuoyuatire ahriquireore ohogu niaja. ⁴ Tiquireo ohoeragu Macedonia yehpa cjẽna mehna musa cahapu esagu, musa ohoatire musa cuoeragũ ihñagu bue tisãboaga yuhu musare. “Pejecuoyequinare ohoeta”, musare yuhu ni tuhaturi bato musa ohoeragũ ihñagu bue tisãboaga yuhu. Musa gũhu buoro yuhduoaga. ⁵ Sa yegu musa cahapure yuhu esato pano tiquireo mari acayere oho muhtagu niaja. “Pejecuoyequinare ohonatja”, to pano musa nidire musa cuoyuatire tiquireo oho muhtagu niaja. Musa ohoatire musa cahmeoagũ tiquireo pehe musare yahueta. Musa ohoatire musa cuoyu tuhasagũ bucueye mehna musa oho duari ijigũ masiitja.

⁶ Sa yena ahrire wacũña musa: Meheñe pjerigã oteriquiro meheñe pacagã nenota. Peye pjeri oteriquiro peye paca nenota. (Ohõ saha ijire pejecuoyequinare mari ohogũ. Mehenogã mari ohogũ, Cohãcjũ mehenogã ohorota marine. Pajiro mari ohogũ, pajiro marine ohorota.) ⁷ Sa yena ihquẽquina musa “Ohõ puno ohonatja”, ni ohoya. Cahño marieno ohoya. “Marine oho dutiri”, nino marieno ohoya. Bucueye mehna ohoyequinare cahine Cohãcjũ. ⁸ Tiquireo pehe musa cahmeno yuhduoro musare

ohorota. Sa yena ijipihtiye m̄sa cahmemedire d̄hsaro marieno c̄o pehonata. Sa yero apequinare m̄sa ohogū gūh̄re quehnoano esa tuharota m̄sa c̄oye. ⁹Sata nine Cohācjū yere tiquina ojoari p̄p̄:

Pejecuoyequinare pajiro ohore tiquiro.

Quehnoano mehna masare sa yeducure tiquiro, nine tiquiro yere tiquina ojoari p̄p̄.

¹⁰ Sa yero oteye d̄ca tiri bato oteriquiro tiquiro oteati capere ohore Cohācjū. Came tiquiro oterire d̄ca tigū yere tiquiro ihyatire. Pejecuoyequinare m̄sa pajiro ohogū oteriquirore tiquiro ohoriro saha m̄sa gūh̄re pajiro ohorota Cohācjū. Sata musare ohorota pejecuoyequinare m̄sa oho nemoatire. ¹¹ Sata ijire. Pajiro ohorota musare apequinare pajiro m̄sa sa ohoducuatire. Sa ye m̄sa oho dutirire pejecuoyequinare us̄a ohogū peyequina tiquina pehe Cohācjūre bucueye mehna “Quehnoare”, nieta. ¹² Sa yena pejecuoyequinare Cohācjū yequinare ohona, tiquinare yedohore m̄sa. Sa yedohona bucueye mehna Cohācjūre “Quehnoare”, tiquina nigū yenata m̄sa. ¹³ Sa m̄sa apequinare yedohogū ihñāne, Cohācjūre ño peoye mehna yahuducueta masa. Sa ye tiquinare apequina gūh̄re pajiro m̄sa ohogū ihñāne Cohācjūre “Quehnoa yuhd̄gu ijire m̄h̄”, nieta masa. Ohō saha nieta Cristo buheye quehnoāne buheye ti nidiro sahata m̄sa yegū ihñāne, tiquinare m̄sa ohogū ihñāne. ¹⁴ Sa ye Cohācjū musare tiquiro paja ihñano sahata m̄sa gūh̄re tiquinare m̄sa paja ihñagū tiquina pehe musare cahmeeta. Sa cahmeñe musare sini basaeta Cohācjūre. ¹⁵ Cohācjū marine quehnoa yuhd̄aro yerota. Tiquiro sa yeatire masina “Quehnoa yuhd̄are”, nielna mari tiquirore.

Jesu cūriquiro tiquiro ijiyere yahuahye Pablo

10 Yojoṗure yuh̄ Pablo, musare yahutja. Ihquēquina m̄sa mehna cjēna ohō saha nine yuh̄re: “Mari mehna ijiro apequinare yuhd̄d̄ca d̄ueriquiro, ihyo ijiriquiro yero saha ijire. Sa ijieperota ape sieṗ ijiro marine cuero marieno tuhti ojoadoqueore”, nine m̄sa ihquēquina yuh̄re. Cristo pehe ne usueriquiro, masare quehnoano yeriquiro ijire. Tiquiro yero saha yuh̄ gūh̄ iji duaja. ² Sa yegu musare ahrire tutuaro mehna yahutja: M̄sa cahap̄ yuh̄ esagū quehnoano yeya m̄sa “Pablo us̄are tuhtiari”, nina. Ihquēquina yuh̄re ohō saha nine: “Tiquiro esa tuharo, Cohācjū dutiro marieno yere”, nine yuh̄re ihquēquina. Sa niñequina p̄ritare tuhtiboaga yuh̄.

³ Us̄a gūh̄ ahi yehpa cjānata ijina niaja. Sa ijiepenata ahi yehpa cjēna tiquina esa tuharo tiquina yero saha yeraja us̄a. ⁴ Surara cahme wejē tiquina yuhd̄d̄ucariro saha us̄a pehe ñañene yuhd̄d̄ca duaja. Ti ñañene ye d̄eraja. Us̄a sa yegū us̄a wamoa ahi yehpa cjēna tiquina wamoa yero saha ijierare. Surara tiquina wamoare tiquina c̄oro saha us̄a pehe Cohācjū tutuayere c̄oaja. Ti tutuaye mehna Cohācjūre cahme dutieyequinare cohāja us̄a. Masa tiquina esa tuharo tiquina masiñene ti d̄h̄seati ti ijieragū masigū yeaja us̄a ti tutuaye mehna. ⁵ Sa yena ijipihtiyequina tiquina esa tuharo t̄hotuyequinare Cohācjūre tiquina masi dutierarire duhugū yeaja us̄a. Sa yena ti tutuaye mehna Cohācjūre cahmeñequinare Cristore quehnoano yuh̄tiyequina tiquina ijigū yeaja us̄a. Cristo cahmeno saha tiquinare t̄hotugū yeaja us̄a. ⁶ Sa yena apequina m̄sa mehna cjēna Cristore tiquina yuhd̄d̄ucagū ihñana

tiquinare buhiri dahrenatja usã. Musa pehe musa quehnoano yuhtiri bato Cristore yuhduducayequinare sa buhiri dahreatinata ijinata musa.

⁷Yuhu pagu dihitare masine musa. Yuhu ijiye tiye pehere ne masiedare musa. “Cristo yequina ijiaya”, nina ijina, ohõ saha masiña musa: Usã gũhu musa yero saha Cristo yequinata ijiaya. ⁸“Mari puhtoro ye buheyere quehnoañe buheyere buhe dutiro, cõri usãre”, nigũ peye tahari musare sa ni yahuepeguta bue tieraja yuhu. Usãre sa buhe dutiro musare yedohoanajare cõri usãre. Musare dojomehneanajare cõno niedari usãre. ⁹Ohõ saha potõ ni yuhaja musare “Cueari”, nigũ. Ahri yuhu ojoari pũre ihñana musa ihña mariagũ cahmedaja. ¹⁰Ihquẽquina musa mehna cjẽna ohõ saha nine: “Pablo ojoaro dusero purĩniquiro yero saha oja mujare marine. Sa ijiriquiro ijieperota mari mehna ijiro ne sa ijiaga niediquiro ijire. Pejecõriquirõ yero saha ijire. Sa yero marine tiquirõ yahuducuye dũhseati ijierare”, nine ihquẽquina. ¹¹Sa niñequinare ohõ saha ni yahutja: Musare usã oja ohõriro sahata yahunatja musare musa cahapu ijina. Sa yena “Ohõ saha yenata”, usã ni ojoarõ sahata yenatja usã, musa cahapu ijina.

¹²Ihquẽquina musa mehna cjẽna “Quehnoano masi pehona ijiaya”, ni yahuducure tiquina basi. Yohou, quehnoa yuhduaro masiñequina ijiajari tiquina sa ni yahuducuye. Usã pehe tiquina yero saha ne sa nisi. Tiquina basi cahme ihña piti ca “Mari pehe quehnoa yuhduducana ijiaya”, nine tiquina basi. Sa ni maca cãne nine tiquina basi. ¹³Usã pehe tiquina yero saha yesi. Cohãcjũ usãre buhe duti tiquirõ cõri dihitare yuhaja usã pehe musare. Apequina ye dahrayere “Yei”, nina niedaja. Cohãcjũ musare buhe

dutiro usãre cõri. ¹⁴Ohõ saha nina, ni mehona niedaja usã. Quehnoañe buheyere Cristo yere musare buhe muhtana esau usã. ¹⁵Sa yena apequina ye dahrayere “Usã pehe tire yei”, ne niedaja usã. Sa yena Cristore musa wacũ tutua nemogũ cahmeaja usã. Sa cahmena musare buhe nemo duaja usã. Sa buhena Cohãcjũ tiquirõ cõriro punota buhe duaja musare. ¹⁶Sa yena musa ya yehpa yuhduropũ quehnoañe buheyere yahuna wahanatja. Sa wahana apequina tiquina buheri bato esana, “Usã buhei”, nisi usã.

¹⁷Mari yerire “Usãta yeaja”, niedaro cahmene. Mari puhtoro Jesu tiquirõ yeri pehere ihñana bucuero cahmene. Ti pehere apequinare yahuro cahmene. ¹⁸Masa tiquina basi “Usã pehe yei”, tiquina nigũ bucuere Cohãcjũ. Mari puhtoro Cristo “Ahriquina quehnoano yeri”, tiquirõ ninohriquina pehere bucuere Cohãcjũ.

“Jesu cõrina ijiaya usã”, ni mehoñequinare yahuahye Pablo

11 Yuhu ijiye tiyere yahugũ tuho masiegũ yero saha yahugũ niaya. Yuhu ijiye tiyere yahugũ mehenogã bue tiaja. Sa yahurigũ yuhu ijiepegũta yuhũre tuhõriña musa yojopũre. ²Cohãcjũ musare tiquirõ cahĩno saha tutuaro cahĩaja yuhu gũhu musare. Sa yegũ musare cuesãja yuhu “Ñañene yeari”, nigũ. Nuhmino omoca dũhteaticoro umũno mehna ijiericoro quehnoaricoro ticoro ijiro saha quehnoana musa ijigũ tutuaro cahmeaja, Cristo dihitare musare cahme dutigũ. Sa yegũ Cristo cahapu musa wahagũ ñañe mariena musa ijigũ cahmeaja.

³Apequina ñañequina musare ni mehoñe, sijoro saha ijiye buheyere cahmegũ yeboaga musare. Pinono Evare ni mehono tiquirõ masiñe mehna ticorore Cohãcjũre yuhduducagũ

yeahye panopure. Tiquiro sa yeriro sahata yojopure ñañequina musare ni mehoñe, Cristore musare quehnoano ño peoeragū yeboaga. Sa yegu musare cuesāja. ⁴“Ohō saha ijiriquiro ijire Jesu”, tiquina esa tuharo sijoro saha ni meho buhepegūta tuhomene musa. Musare usā buheriro saha ijierapegūta musare ni meho buheyequinare tuhomene musa. Sa yena “Ohō saha ijiriquiro ijire Espiritu Santo”, tiquina esa tuharo sijoro saha ni meho buhepegūta tuhomene musa. Usā musare buheriquiro Espiritu Santo waro ijire. Tiquiro pehere queoro tiquina yahuerapegūta musare ni meho buheyequinare tuhomene musa. Tiquina sijoro saha ijiye buheyere tiquina ni meho buhegū quehnoañe buheyere tiquina buherapegūta tire tuhomene musa.

⁵Musa mehna cjēna “Jesu cūrina ijiaja”, nimediquina yuhure masi yuhduducaerare. Tiquinare docaducaeraja yuhu. ⁶Quehnoano yahu mihnigū ijieraboaga yuhu. Quehnoano yahu mihniedapegūta Cohācjū yere quehnoano masiaja. Yuhu sa masiñene peye tahari musare quehnoano masigū yei.

⁷Quehnoañe buheyere Cohācjū yere musare buhegū ne wapa cahmedu. Musare yedoho duagu wapa cahmedu. Ihyo ijiriquiro yero saha ijii yuhu. ¿Yuhu sa wapa cahmedagū quehnoaedajari, musa tuhutugū? ⁸Musare yuhu buhegū apeye macari cjēna Jesu yequina yuhure niñerure oho. Tiquina sa ohogū ti niñerure ñehi sinino marieno musare buhegū tagu. Musa pehe yuhure musa ohoborire tiquina pehe yuhure oho. ⁹Musa mehna ijigu apee boro yuhure duhsapegūta musare niñerure

ne siniedu. Mari acaye Macedonia yehpa cjēna Jesu yequina ijipihtiye yuhu cahmedire ne wihiri yuhure. Panopure musare ne cariboeru yuhu. Camepū gūhure musare ne caribosi. ¹⁰Cristo potota tiquiro yahuriro sahata yuhu gūhu yojopure musare potota yahugū niaja. Ijipihtiro Acaya yehpapū ijiyequinare ahri musare yuhu siniedarire sa yahuducugūta. ¹¹¿Musare yuhu siniedarire apequinare yuhu sa yahuducugū tuhona, dūhse tuhotuajari musa? ¿“Pablo sa yahuro usāre cahēdaro niaga”, ni tuhutuboagari musa? Ijierare. Musare cahāja. Musare yuhu cahīgū Cohācjū masine.

¹²Wapa cahmeno marieno musare yuhu buhe ducarero sahata sohtori tiitja. Yuhu buheri wapa yuhu wapa negū ihñañe tiquina “Jesu cūrina ijiaja”, ni mehoñequina ohō saha niboaga: “Pablo quehnoañe buheyere buhero, wapa cahmene. Sa yena usā gūhu tiquiro yero sahata yematja”, niboaga tiquina wapa cahmeñe. ¹³Tiquina potota Jesu cūriquina waro ijierare. Tiquinare ne cūdari tiquiro. “Jesu cūrina ijiaja”, ni mehoñe, usā yero saha ijimene. ¹⁴Tiquina sa ni mehoñequina ijigū masi tuhasaja yuhu. Satana gūhu quehnoariquiro yero saha camesa mujare. Tiquiro angel asi siteriquiro yero saha iji duaro camesamene. ¹⁵Tiquiro sa yeriquiro ijigū masigu, Satanare yedohoyequina “Jesu cūrina ijiaja”, ni mehoñequina Cohācjūre yedohoyequina yero saha tiquina camesagū ihñagu, ni mehoñequina tiquina ijigū masi tuhasaja yuhu. Yojopure tiquina sa camesapegūta pihitiri deco ijigū ijipihtiye tiquina ñano yeri buhirire buhiri dahrerota Cohācjū tiquinare.

Tiquiro ñano yuhdürice yahuahye Pablo

¹⁶ Pari turi ahrire musare yahutja. Ne “Tuho masieniquiro ijire”, yuhure niedacähña. Yuhu sa ni dutierapegüta yuhure musa sa ni tuhutugü quehnoanota yuhure. “Tuho masieniquiro ijire”, yuhure ni tuhotuepenata tuhoriña musa yuhure. Mehenogã yuhu ijiye tiyere yuhu yahugü tuhoya musa. ¹⁷ Musare sa yahugu tuho masiegu yero saha yei niaja. Yuhu ijiye tiyere yahugu mehenogã bue tiaja. Mari puhtoro Jesu yuhure “Muhu basi muhu ijiye tiyere yahuya”, niedare yuhure. ¹⁸ Tiquiro sa niedapegüta ahrire yahutja musare. Tiquina esa tuharo “Quehnoana ijiaja”, niñequina tiquina ijigü ihñagu yuhu gũhu yuhu ijiye tiyere musare yahutja. ¹⁹ Musa pehe tuho masieñequinare tuhona bucueye mehna ihñare musa tiquinare. Quehnoa yuhduaro masina ijiajari musa pehe sa tuhona. ²⁰ Musare cahacjana tiquina yegu, musa yere tiquina ehmagü, sa ihña cãhre musa. Sa yena musare tiquina doca cügü, musa wahsupurire tiquina quëgü sa tuhutu cãhre musa. ²¹ Quehnoa yuhduaro yeajari musare tiquina. Usã pehe tiquina yero saha yuhduducaeraja.

Sa yena tiquina yero saha yeraja. Tiquina yero saha ijierapegüta tiquina “Ohõ saha ijina ijiaja”, tiquina nigü tuhogu yuhu gũhu sata ni yahuboaga. Pari turi bue tiepegüta ohõ saha ni yahutja musare tja. ²² Tiquina “Hebreo masa ijiaja”, nine apequinare masi yuhduduca duaye. Hebreo masuta ijiaja yuhu gũhu. “Israe masa mari Pacu tiquiro beserina ijiaja”, nine tiquina pehe. Tiquina yero saha tiquiro beserigu ijimaja yuhu gũhu. “Abrahã panamena iji turiana ijiaja”, nine tiquina tja apequinare masi yuhduduca

duaye. Tiquina yero saha Abrahã panami iji turiaguta ijimaja yuhu gũhu. ²³ “Cristo cahacjana ijiaja”, nine tiquina pehe. Yuhu gũhu Cristo cahacjüta ijiaja. Tiquina yuhduoro Cristo yere quehnoano yeaja yuhu. Yohou, sa nigu tuho masieniquiro yero saha yahuducugu niaja. Sa yahuducugu mehenogã bue tiaja yuhu. Tiquina yuhduoro tutuaro dahrau yuhu Cristo yere yegu. Peye tahari tiquina yuhduoro Cristo yaquiro yuhu ijiri buhiri peresu yeri apequina yuhure. Tiquina yuhduoro peye tahari tanari yuhure masa. Tiquina yuhduoro Cristo yaquiro yuhu ijiri buhiri masa yuhure wejë duamedí. Sa yegu mehenogã yuhduu yariaborigu. ²⁴ Ihcã omope tahari judio masa yuhure ñehedi. Yuhure tiquina ñehepe tahari treinta y nueve tahari yuhure tanari. ²⁵ Ihtia taha apequina yuhure ñehedi. Sa ñeheñe tiquina pürita yuhure ñano yucuri mehna quëdi. Ape taha yuhure apequina utã paca mehna doqueri. Ihtia taha yucusa mehna utãpu doque quehe sa, minii. Sa yegu ihcã deco, ihcã ñami taboa pjí bui pajiri ma decopure ba pahsau. ²⁶ Peye tahari macaripure buhe tinigu esau. Yuhu sa buhe tinigü cua yuhduari yuhure. Yuhure minino cua yuhduari. Yuhure apequina yaquero cua yuhduari. Ya dihta cjëna judio masa, judio masa ijieyequina gũhu yuhure ñano yero cua yuhduari. Macaripu, masa marienopu, pajiri mapu gũhure yuhure yariaro cua yuhduari. “Muhu mehna cjãna ijiaja”, ni mehoñequina gũhu yuhure ñano yero cua yuhduari. ²⁷ Cristo yere yegu tutuaro dahrae tii. Sa dahragu ñano wahyie tii. Peye tahari yuhure wujua ñano puriepegüta sa dahraducue tii. Ñano ujua ahbae tii. Sa yegu ñano aco wuoe tiru. Peye tahari ihyaye bocaera tii. Yuhu suhti sañaboje gũhu

ne marieda tiri yuhure. Sa yero yuhure yusua yuhdwe tiru.

²⁸Sa nãno yuhdwepeguta decoripe ijipihtiyequina apequina Cristo yequinare, musa gũhure pajiro wacũ tuhutuaja. ²⁹Sa yegu ihcãquiro Cristo yaquiro tiquiro sa iji cãriquiro ijigũ ihñagũ bujua witiaja. Apequina Cristo yaquirore ñano ye dutiboaga. Tiquina sa yegũ ihñagũ Cristo yaquirore cuesãgũ, tiquina ñañequina mehna usuaja.

³⁰Yahu duerapeguta yuhũ ijiye tiyere yahugũ tagũ, yuhũ esa tuharo tutuegũ yuhũ ijiye tiyere musare bucueye mehna yahuaja. ³¹Cohãcjũ mari puhtoro Jesu pacuro decoripe mari ño peoatiquiro tiquirota musare yuhũ ni mehoedagũ masine. Ahrire musare poto yahutja.

³²Damasco wame tiri macapu yuhũ ijigũ ihñano, ihcãquiro puhtoro yuhure ñehe duamedí. Ijipihtiyequina masa puhtoro Areta wame tiriquiro doca ijiriquiro puhtoro pũrita yuhure ñehe duamedí. Sa ñehe duaro ti maca cjã sahrĩno sopecaharipe surarare cohte dutimedí.

³³Tiquina sa cohteri watoata yuhũ mehna cjẽna pajiri puhũdupũ yuhure duhu sã, ti sahrĩno cjã sopecahagãpũ yuhure duhu dijiori. Ti sahrĩno behero pehepũ yuhure duhu dijiori. Tiquina sa duhu dijiori bato duhti cãa wahau.

Pablo Cristo tiquiro ihñorire yahuahye

12 Yuhũ ijiye tiyere bucueye mehna yuhũ yahugũ duhseati ijierare. Sa ni yahugũ mehenogã bue tiepeguta yahu nemoutja musare. Mari puhtoro Jesu yuhure tiquiro ihñorire tiquiro masigũ yerire yahutja musare. ²Ohõ saha ihñõ ducari tiquiro yuhure: Catorce cũhmari waro wahare yuhure Cristo yaquirore uhmusepũ tiquiro ne mujari bato. Uhmusepũ ñahpicoha buipũ yuhure ne mujari. Yuhũ jeripohna dihitare tiquiro negũ masiedaja yuhũ. O yuhũ pagu

gũhure tiquiro negũ masiedaja. Cohãcjũ dihita tire masine. ³⁻⁴Sa yero paraíso wame tiropũ ne mujari yuhure. Yuhũ jeripohna dihitare tiquiro negũ masiedaja yuhũ. O yuhũ pagu gũhure tiquiro negũ masiedaja. Cohãcjũ dihita tire masine. Tiquiro sa ne mujagũ esagu topure tiquiro yahurire tuhõ. Ti yuhũ tuhõre masa ne masiedare. Tiquiro yahurire yahu dutierare.

⁵Ohõ saha yuhure tiquiro ihñorire musare yahugũ, “Yuhũ ihcũta apequinare yuhdũducaja”, niboaga yuhũ. Sa niedaja yuhũ. Yuhũ esa tuharo masiegũ yuhũ ijiyere, yuhũ tutuegũ yuhũ ijiyere bucuegũ musare yahutja. Ti dihitare bucuegũ musare yahutja. ⁶“Apequinare yuhdũducaja”, musare ni yuhũ yahu duagũ yuhũ nidi potota ijiboaga. Sa yegu sa ni yahugũ tuhõ masiegũ ijieraboaga yuhũ. Sa ijierapeguta “Ohõ saha apequinare yuhdũducaja”, ni yahusi yuhũ musare, “Cua pesa yuhdũaro yuhure ihñari”, nigũ. Yuhure ihña masina ño peore musa. Musa ño peoepegũta ti yuhdũoro yuhure musa ño peogũ cahmedaja.

⁷Cristo quehnoa yuhdũayere uhmusere yuhure tiquiro ihñogũ ihñarigũ ijigũ, “Apequinare yuhdũducaja”, niboaga yuhũ pehe. Sa yuhũ niedatire Satana yuhũ pagure tiquiro duti dahregũ ihñano “Quehnoanota”, nidi Cohãcjũ. Yuhure duti dahreri Satana yuhure ñano wahagũ yero. Ahri dohatiyere pota sajàno purĩno saha yuhure purĩne. ⁸Ohõ yuhũ dohatiyere yuhure yuhdũo dutigũ sinie timi Cristore mari puhtorore. Ihtia taha sinimi. ⁹Ohõ saha ni yuhũtie tiri yuhure tiquiro: “Ohõ mũhũ dohatiyere pũritare mũhure yuhdũosi yuhũ. Sa mũhure yuhdũoerapeguta mũhure cahĩaja. Yuhũ cahĩne mehna quehnoano ijiita mũhũ. Dohatigũ tutuegũ ijigũ yuhũ tutuayere quehnoano ihñoguta mũhũ.

Tutuayequina yuhduoro muhu pehe yuhu tutuayere masare masigū yeita muhu”, ni yuhtie tiri tiquiro yuhure. Tiquiro sa nigū tuhogu tutuegu yuhu ijirire masigu bucueaja. Sa yegu tutuegu yuhu ijiyere musare bucueye mehna yahutja. Ohō saha ni yahutja Cristo tiquiro tutuaye pehere musare yuhu quehnoano masigū yeatire.

¹⁰ Sa yegu Cristo yaquiro yuhu ijiri buhiri yuhure puriepegūta bucueaja. Apequina ñano yuhure tiquina yahu wajaepēgūta, ña yuhduaro yuhduepeguta bucueaja. Yuhure tiquina ñano yeducuepegūta yuhure bujua witiḡ tiquina yepegūta bucueaja yuhu. Sa ñano yuhduepeguta Cristo tutuaye mehna ihcāno sahaja, tiquirore wacū tutuagu. Sa yegu bucueaja.

Corinto cjenare Cristo yequinare pajiro bujua witi tuhoutuahye Pablo

¹¹ Yuhu ijiye tiyere yahugu mehenogā bue tiaja yuhu. Yuhu sa yahuepegūta ti musa ye buhiri ijire. Musa pehe yuhu ijiye tiyere apequinare quehnoano yahuboaga. Yuhu esa tuharo ijigu dahseacju ijieraboaga yuhu. Sa ijiborigu ijiepeguta “Jesu cūrina, masi pehona ijiaja”, ni mehoñequinare docaducaeraja yuhu. ¹² Potota ñano yuhdurigu ijiepeguta Cohācjū tutuaye mehna ye ihñomi musare. Sa ihñogu Jesu cūrigu yuhu ijiyere ihñogu nimi musare. ¹³ Apeye macari cjenare Jesu yequinare musa gūhure ihcāno saha yee timi yuhu. Sa yepeguta musa pehere sijoro saha cjunogā yemi. Musa dihitare cariboeramī. Musa dihitare apee boro gūhure siniedami. ¿Yuhu sa siniedagū ñaniajari, musa tuhoutugū? Ti ñañe ijigū ti ñañene boya musa yuhure.

¹⁴ Ahri yuhu yahuatire tuhoya musa. Pua taha musa cahapu yuhu esari bato pari turi waha duaja tja. Topu esagu musare caribosi yuhu. Apee borore sin-

isi yuhu musare. Musa yere cahmedaja. Cristo ye pehere musa yuhtigū cahmeaja yuhu. Masa pohne pehe tiquina pacusumare tiquina cahmeñene ohorerare. Tiquina pacusumua pehe tiquina pohne cahmeñe pehere ohore. Ohō saha musa yuhu pohna yero saha ijina yuhu cahmeñe pehere ohosi musa. ¹⁵ Sa yegu yuhu pūrita yuhu cūoye pehere oho duaja musare yedohogu tagu. Musa cahacjūno yero saha iji duaja musare yedohogu tagu. Musa pehere yuhu tutuaro cahiepegūta yuhu pehere musa mehenogā cahine, yuhu tuhoutugū.

¹⁶ Sa yegu musa mehna ijigu musare cariboeru. ¿Sata ijiyari yuhu, musa tuhoutugū? Yuhu sa ijiepegūta ihquēquina musa mehna cjenā ohō saha niboaga: “Pablo apee borore marine ne duaro ni mehorī marine”, niboaga. ¹⁷ ¿Musa sa nidiro saha yerigu ijigu, dahse tire yeari yuhu, musa ihñagū? ¿Musa cahapu yuhu ohoriquina yabe borore yuhure ni meho ehma basari tiquina musare, musa ihñagū? Ni meho ehmedari jiri. ¹⁸ Sohō ijiri pjepu musa cahapu Titore waha duti tuhasau tiquirore. Sa yegu apequirore Cristo yaquirore tiquiro mehna piti dahre ohou. ¿Tito apee borore musare ni meho ehmari, musa ihñagū? Ni meho ehmedari jiri. Tiquiro yuhu yero saha Cohācjū cahmeno saha yeriquiro ijire. ¿Sa yero yuhu yero saha yerari tiquiro, musa ihñagū? Yuhu yero saha yeri jiri.

¹⁹ “Ñano yeraja usā”, ni cahmotana niedaja usā. Cristo yequina ijiaja. Sa yena Cohācjū tiquiro ihñonopu musare yahuna niaja. Yuhu acaye, yuhu cahina, musare yahuu musa pehere yedoho duana. Musare yahuna, usā pehere musare cahmegū yena niedu. ²⁰ Topu yuhu esagū yuhu cahmeno saha yerapena ijiboaga musa. Sa yegu musare tutuaro cuesāja. Sa yegu musa cahmeno saha yerigu ijieraboaga yuhu gūhu, topu esagu. Sijoro saha

musa yegū ihñagu yahutja musare. Topu yuhu esagū musa pehe cahme duse tini wiana, apee boro tiquina cuogū ihña coona, duita usuana, musa esa tuharo apequinare yuhdudaca duana, apequinare ñano yahuducuna, ñano quti yena, “Apequinare masi yuhdudacaja”, nina, musa cahmecoanore dojomehna ijiboaga musa. “Tire yeari”, nigū cuesāja yuhu musare. ²¹ Topu yuhu esagū yuhre musare bue tisagū yeboaga Cohācjū. Sa yegu ijipihtiyequinare panopu ñano yeyequinare, tiquina ñañene bujua witieyequinare ihñagu, tutuaro bujua witiitja yuhu. Numia mehna ñano yeyequinare, umua mehna ñano yeye numiare, wuana tiyequinare, ñañene tutuaro cahmeñequinare ihñagu bujua witiitja yuhu.

Pablo yahu bato tiahye

13 Yojoপুরে musa cahapu wahagu ihtia taha esagutja topure. Pua taha topure esa tuhasau. Sa yegu musare ahrire yahutja. Ohō saha nine Cohācjū yere tiquina ojoari pūpu: “Ihcāquireore mari buhiri dahreato pano ihtiaro tiquirore yahusāno cahmene. Ihtiaro mariedagū pūaro tiquirore yahusāno cahmene. Tiquina sa yahusāri bato buhiri dahre masiaja mari”, nine Cohācjū yere tiquina ojoari pūpu. ² Panopure ñano yerina musa ijigū musare, ijipihtiyequina apequina gūhure pari turi ahrire cuaro mehna yahutja. Ihcā taha musa cahapu pari turi esagu musare ahrire yahuu. Yojoপুরে musa mehna ijieragu pari turi musare ahrire yahutja: Yojoপুরে musa cahapure esagu, ñano yeyequinare potota buhiri dahregutja yuhu. ³ Sa yeitja Cristo yuhu mehna tiquiro buherire musa ihño dutigū. Cristo pehe musare dutiriquiro tutua yuhduariquiro ijire. Sa yero tiquiro tutuayere ihñore

musare. ⁴ Mari yero saha pagu tiro, tiquiro tutueriquiro ijiro, curusapu yariahye. Sa yarieperota Cohācjū tutuaye mehna catiriquiro ijire tiquiro yojoপুরে. Tiquiro curusapu ijiro tiquiro tutuerariro saha usā gūhu tutuena ijiaja. Sa yena usā esa tuharo musare yedoho masiedaboaga. Sa yena Cohācjū tutuaye mehna ijinata musare yedohona tana.

⁵ Sa ye musa pehe musa basi ohō saha ni tuhutuya. “¿Potota Cristore wacū tutuajari yuhu?” ni tuhutuya musa. ¿Potota Cristo musa mehna cjūno ijiajari? Tiquiro ijieragū tiquiro yequina waro ijierare musa. Tiquiro yequina ijierana ni mehona ijire musa. ⁶ Usā pehe “Jesu yequina ijiaja”, ni mehona ijieraja. Tiquiro yequina waro ijiaja usā. Tire musa masigū cahmeaja yuhu. ⁷ Sa yegu musa ñano yeratire Cohācjūre sini basaja musare. Sata sini basaja usā musa quehnoañene musa yeatire. Musa sa yegū ihñana usā ohō saha niboaga: “Usā pehe tiquinare quehnoañequina wahagū yei usā”, niboaga usā apequinare usāre ño peo dutina. Sa ño peo dutieraja usā. Sa yena Cohācjūre sini basana, musa ye ijiatire sini basana niaja. Apequina usāre “Ni mehoñequina ijire”, tiquina niepegūta quehnoañene musa yegū pūritare cahme yuhduaja usā. ⁸ Ijipihtiye musa quehnoañene yegū cahmeaja usā. Cohācjū yere quehnoañene dojomehne masiedaja usā. ⁹ “Cristo cahmeñene yeaja usā”, ni ihño masiedana, tutueyequina yero saha ijiboaga usā, musa ihñagū. Quehnoanota. Quehnoañene yena musa pehe tutuana ijire. Musa sa ijigū ihñana tutueyequina yero saha usā ijiepenata bucueaja. Sa yena quehnoana musa wahatire Cohācjūre sini basana niaja usā musare. ¹⁰ Sa yegu musa mehna ijieragu musare ahri pūre ojoayugu niaja. Musa cahapu esagu, musa ñano yerina ijigū ihñagu musare buhiri

dahreitja. Cristo yũhure tiquiro dutiro sa hata mũsare buhiri dahreitja. Yũhu sa buhiri dahreratire ahri pũre mũsare ojoayugu niaja. Cristo yũhure tiquiro dutiro sa hata mũsare yedohoacju ijiaja. Mũsare dojomehneacju ijieraja.

¹¹Yojopure, yũhu acaye, mũsare quehnoa dutiaja. Cristore wacũ tutua nemoña. Sa yena quehnoana ijiya. Mũsare yũhu yahurire quehnoano tuho nũnũña. Mũsa mehna cjẽna mehna ihcãno mehna ijiya. Mũsa basi quehnoano mehna ijiya. Mũsa sa ijigũ ihãano mũsa mehna Cohãcjũ

ijirota. Tiquiro marine cahme cahĩgũ yeriquiro, marine quehnoano mehna ijigũ yeriquiro ijire. ¹²Sa yena mũsa mehna cjẽnare quehnoano bucueye mehna piti caya. ¹³Ijipihtiyequina ohõ cjẽna Cohãcjũ yequina mũsare quehnoa dutire.

¹⁴Mari puhtoro Jesucristo mehna mũsare ijipihtinare quehnoa dutiaja. Sa yegu Cohãcjũ mari Pacu tiquiro cahĩne mehna ijipihtina mũsare quehnoa dutiaja. Sa yero Espĩritu Santo ijipihtina mũsa mehna quehnoano ijire.

Gálatas

Galacia wame tiri yehpa cjênare Jesu yequinare ojoa ohoahye Pablo

1 Yuhu Pablo, Cristo yere buhe duti tiqiro cûrigu ijiaja. Masa cûrigu ijieraja yuhu. Masa pehe yuhure buhe dutiye cûdari. Cohâcjû mari Pacu pehe Jesure yariariquirore masoriqiro yuhure cûri tiqiro yere buheacjûre. Jesucristo gûhu yuhure cûri. Tiquina sa cûrigu ijigu ahrire ojoa ohoaja musare. ²Yuhu musare Jesu yequinare Galacia yehpa cjânare quehnoa dutiaja. Yuhu mehna cjêna Jesu yequina gûhu musare quehnoa dutire. ³Cohâcjû mari Pacu, mari puhtoro Jesucristo mehna musare quehnoa dutiaja. Tiquina yedohoye mehna quehnoano ijiaja musa. ⁴Tiqiro Jesucristo pehe mari ñañene yeri buhirire yariahye. Yojopure masa tiquina ñañene yeri pje ijire. Sa yero tiqiro yariahye Cohâcjû mari Pacu tiqiro cahmediro saha marine yuhduoro taro. Sa tiqiro yuhduogû yojopure ñañene tiquina yeriro saha ye duasi mari. ⁵Sa ye ijipihitiye decoripe tiqirore mari Pacure ño peouhna. Sata yeihna.

Cohâcjû masare tiqiro yuhduoati buheye ihcânota ijire. Apeye buheye mariedare

⁶Cristo musare cahîno tiqiro yequina ijianajare musare cûri. Sa yegu musare cûriqiro yere cohâna sijoro saha ijiye buheye pehere duita musa cahmegû ihña acuaa wahaja. ⁷Apeye buheye quehnoañe buheye yero saha ijiye buheye waro ijierare. Ti sa ijierapegûta ihquêquina musa cahapu ijiequina musare cariboye, sijoro saha ijiye buheyere buheye, quehnoañe buheyere dojomehne duare.

⁸Sa yena musare usâ buhe muhtarire mari cohâgû sijoro saha ijiye buheyere mari buhegû Cohâcjû marine buhiri dahreahro. Sa yero angel uhmuse cjûno sa tiqiro buhegû tiqiro gûhure buhiri dahreahro Cohâcjû. ⁹Mianogâta usâ nidiro saha pari turi niitja: Ihcâqiro musare usâ buherire cohâno, sijoro saha ijiye buheyere tiqiro buhegû Cohâcjû tiqirore buhiri dahreahro.

¹⁰Sa nigu yuhu “Pablo dihita quehnoano buheriqiro ijire”, yuhure ni dutigu niedaja. Cohâcjû pehe yuhure “Quehnoano buheri muhu”, tiqiro nigû cahmeaja. Masare bucuegû yegu tagu sijoro saha ijiye buheyere buheboaga yuhu. Masa dihitare bucuegû yegu ijigu ne Cristo cahacjû ijieraboaga yuhu.

Pablo Cristo cûriqiro tiqiro iji ducarire yahuahye

¹¹Yuhu acaye, ahrire musa masigû cahmeaja yuhu: Quehnoañe buheyere yuhu buheri masa ye buheye ijierare. ¹²Ti buheye masare yuhu tuhori ijierare. Sa ye apequina masa yuhure ti buheyere yahuerari. Jesucristo pehe yuhure ti buheyere masigû yeri.

¹³Panopu judio masu yuhu ijie tirire masine musa. Ohô saha yee tii yuhu: Jesu yequinare tutuaro ñano yegu tiquinare quehnoano wejê peho câ duami. ¹⁴Mari ñecusumua muna iji turiayequina tiquina buherire tutua yuhduaro ye duagu yuhu acaye yuhu ihcâno mehna masariquina yuhduoro ye muhtarigu ijie timi yuhu. ¹⁵Yuhu sa ijirigu ijiepegûta yuhu masa bajuato pano Cohâcjû yuhure bese tuhasari jiri. Sa yero yuhure cahîno tiqiro yaqiro ijiaçju cûri yuhure. ¹⁶Sa yero tiqiro cahmeno saha tiqiro macunore yuhure masigû yeri. Tiqiro yere quehnoañe buheyere judio masa ijieyequinare buheacjû yuhu ijiatire tiqiro macunore masigû yeri yuhure. Tiqiro sa

yegū “¿Duhse ni buhero cahmeagari yuhure?” ni masare sinitueru yuhu. ¹⁷Sa yegu Cristo cūriquina yuhu pano ijiriquina cahapure Jerusalēpūre sinitugu wahaeru. Duita Arabia yehpapu wahu. Sa yegu Damascopu majare tojoa wihii.

¹⁸Ihtia cūma bato Pedrore ihñagū wahu Jerusalēpū. Topure pua semana waro ijii. ¹⁹Sa yegu apequinare Cristo cūriquinare ihñedu. Santiago dihitare mari puhtoro bahurore ihñau. ²⁰Ohō saha ni ojoagu Cohācjū mehna ne ni meho ojoaeraja.

²¹Came Siria yehpapu, Cilicia yehpapu gūhure wahu. ²²Topure yuhu esagū ti pjere Judea yehpapu ijiyequina Jesu yequina yuhure ihña masiedari. ²³Sa ye ahri dihitare yuhure masi ducari tiquina: “Panopure marine ñano yeriquiro yojopure quehnoañe buheyere tiquiro cohā duari buheyere buhero nine”, ni, masi ducari tiquina. ²⁴Yuhure sa masiñe Cohācjūre “Quehnoa yuhduagu ijire”, nidi tiquina.

Apequina Cristo cūriquina Pablora piti ca, duita cahmene

2 Catorce cūmari bato pari turi Jerusalēpū wahagu Bernabé mehna wahu. Tito gūhu wahari yuhu mehna. ²Cohācjū yuhure tiquiro waha dutigū topure wahu. Jerusalēpū ijigu “Jesu yequina puhtoa”, masa niñequina tiquina sehsaro cahmeoagū quehnoañe buheyere judio masa ijieyequinare yuhu buherire yahuu tiquinare. “¿Judio masa ijieyequinare quehnoañe buheyere yuhu buhegū quehnoajari, masa tuhotugū?” nigū, sa yahuu tiquinare. Sa yahuu tiquinare panopu yuhu buherire, yojopure yuhu buheri gūhure tiquina quehnoano masiatire, tire “Quehnoare”, tiquina niatire. Tiquina sa niedagū yuhu buheri duhseati ijieraboaga.

³Yuhu mehna cjāno Tito judio masano ijieriquire ijiri. Sa yero cuhnucunū sohtoa cahserogāre yuhre nemehnediquiro ijire. Sa yuhremehnediquiro tiquiro ijiepegūta Jesu yequina puhtoa “Muhu gūhu ti cahserogāre yuhre neña”, niedari tiquire. ⁴Tiquina sa niedapegūta ihquēquina “Jesu yequina ijjaja”, ni mehoñequina wacūeno mehna usā mehna sañā, tiquire ti cahserogāre yuhre negū cahmemedi tiquina. Jesu yequina mari ijina “Panopu cjēne tiquina dutiriro saha yena ti mehna yuhdusi”, ni tuhotuaja mari. Mari sa ni tuhotugū mari yeyere ihña duaye tiquina pehe usā mehna ni meho sañari. Sa yeye usā ñecusumua muna iji turiayequina ye dutiyere ye duti duaye, ti dutiyere ño peoducugū ye duamedi usāre tiquina. ⁵Tiquina sa ye duepegūta quehnoañe buheyere potō masa masiatire ne mehenogā mehna tuho dueru usā tiquinare.

⁶Sa ye Jesu yequina puhtoa quehnoañe buheyere yuhu buherire tiquina tuhori bato “Ahri buheye mehna apeye buheyere buhe moreña”, ne niedari tiquina yuhure. Jesu yequina puhtoare ihyo ijiyequina yero saha tuhotuaja tiquinare. Cohācjū pehe ijipihtiyequinare ihcāno saha ihñare. Sa yegu sata tuhotuaja yuhu gūhu puhtoa gūhure, ihyo ijiyequina gūhure. ⁷Sa ye yuhu buheri mehna tiquina “Ahri buheye mehna apeye buheyere buhe moreña”, ne niedari. Sa ye judio masa ijieyequinare yuhu buheatire Cohācjū yuhure tiquiro cūrire tuhoye, “Tita ijire”, nidi tiquina. Judio masare buheyere Cohācjū Pedrore tiquiro cūriro sahata yuhu gūhure cūri judio masa ijieyequinare yuhu buheatire. ⁸Judio masare Pedrore buhe dutiriquirota Cohācjū yuhu gūhure tiquirota buhe dutiri judio masa ijieyequinare.

⁹Sa ye Santiago, Pedro, Ñu mehna Jesu yequina puhto waro quehnoañe buheyere buherire Cohãcjũ yuhũre tiquiro cũrire tuhoye “Tita ijire”, nidi tiquina. Sa nieta yuhũre Bernabé mehna quehnoano bucueye mehna omoca ñehedi usãre piti tiye tehe. Sa yena judio masa ijieyequinare buhena ijiaja usã. Santiago gũhu pehe judio masare buheyequina ijire. “Sata ijiaho”, nii usã basi. ¹⁰Sa nepeta tiquina judio masare pejecuoyequinare yedoho dutiri usãre. Pejecuoyequinare yedohoacjũ ijiita niaja yuhũ.

Antioquíapũ Pablo Pedrore tuhtiahye

¹¹Sa ye Antioquíapũ yuhũ esari bato Pedro gũhu esari. Sa yegu quehnoano tiquiro yerari buhiri tuhtii tiquirore. ¹²Ohõ saha yeri tiquiro: Santiago ohoriquina Antioquíapũ tiquina esato panogã, Pedro pehe judio masa ijieyequina mehna ihyaro nidi, judio masũno ijieperota. Santiago ohoriquina judio masa ijieyequinare “Cuhnucunu sohtoa cahserogãre yuhũre neña”, niñequina, usã judio masa panopũ cjẽna ye dutiyere ye dutiyequina ijiri. Pedro sa ihyari watoa Santiago ohoriquina esari. Sa ihyariquiro ijieperota tiquina tiquiro cahapũ esagũ ihñano, tiquinare cuero, Pedro judio masa ijieyequinare duhu cã, pari turi tiquina mehna ihyaro wahaerari. “Panopũ cjẽna mari judio masa yere yuhduducagu niaja. Sa yeye yojopũre wihiyequina yuhũre tuhtiarĩ”, nino, judio masa ijieyequina mehna ihya nemoedari. ¹³Tiquiro sa ye mehoriro saha tiquiro yegũ ihñãne, apequina judio masa gũhu tiquiroreta ihña cũ, tiquina gũhu tiquiro yero saha yeri. Sa yero Bernabé quehnoariquiro ijieperota tiquina yero saha yeri tiquiro gũhu.

¹⁴Cristo ye buheye marine quehnoano, queoro ye dutire. Sa ye

Pedro gũhu ti buheye nidiro sahata yerari, judio masa ijieyequina mehna ihya duhuyẽ. Tiquina sa yegũ ihñagu, ijipihtiyequina Jesu yequina ihñonopũ Pedrore ohõ saha ni yahuu: “Mũhu judio masũ ijiepeguta judio masa ye dutiyere, tiquina ijieye tiyere duhu cãri mũhu, Jesu yere yegu tuhũ. Sa yegu judio masa ijieyequina dutiye marieñequina yero saha yee tiri mũhu. Sa yerigu ijiepeguta apequina judio masa wihigũ ihñagu, judio masa ijieyequinare piti ti nemoedari mũhu. ¿Judio masa dihitare mũhu piti tigũ ihñãne, duhse ni tuhotuẽtari judio masa ijieyequina pehe? ‘Judio masa yero saha ijiihna’, ni tuhotuboga tiquina. ¿Tiquina gũhũre judio masare ihña cũgũ cahmeajari mũhu? To ijierare”, nii tiquirore.

Judio masare apequina masa yero saha Jesure wacũ tutua dutiahye Cohãcjũ

¹⁵Usã pehe judio masa masa ba-juana, apequina ñano yeyequina judio masa ijieyequina yero saha ijieraja usã. ¹⁶Sa ijina ijiepenata Cohãcjũ dutiyere Moiserẽ tiquiro cũrire usã yerina ijigũ “Quehnoana ijire”, ni ihñedare Cohãcjũ usãre. Tire mari masiaja. Sa yero Jesucristore mari wacũ tutuagũ Cohãcjũ marine “Quehnoana ijire”, ni ihñanota. Tire masina, usã gũhu Jesucristore wacũ tutuaja tiquirore usã wacũ tutuari mehna usãre “Quehnoana ijire”, Cohãcjũ tiquiro ni ihñatire. Sa yero tiquiro dutiyere usã yerina ijigũ “Quehnoana ijire”, ni ihñedare Cohãcjũ usãre. Ne masa ti dutiyere yeye mehna “Quehnoañequina ijire”, ni ihñedare Cohãcjũ tiquinare.

¹⁷Cristore mari wacũ tutuaye mehna quehnoana Cohãcjũ yequina mari waha duagũ, ñana mari ijiyere masigũ yerota Cristo. ¿Cristo mari ñañene marine

masigū yero, ñana marine ijigū yeajari tiqiro, mūsa tūhotugū? Ne mehenogā mehna sa yerare. ¹⁸ Ūsā dutiye yeye mehna yūhdu duamedina ijiepenata ti buheyere cohāu. Sa cohāepenata pari turi ti buheyere yena ti dutiyere ūsā ye pehoerari buhiri potota buhiri tinata ūsā. ¹⁹ Cohācǰū dutiyere Moiserere tiqiro cūrire ihcāno sahaeraja mari. Sa yena ti dutiye mehna ne yūhdūsi mari. Sa yena Cohācǰū tutuaye mehna tiqiro yequina ijijaja mari.

²⁰ Cristo mehna curusapū yariariquina yero saha ijijaja mari. Sa yena yariariqiro tiqiro esa tuharo tiqiro yerariro saha mari esa tuharo yeraja. Cristo ye tutuaye mehna yeaja. Sa yena yojopūre Cohācǰū macūnore wacū tutuaye mehna ijiducujaja mari. Tiqiro Cohācǰū macūno marine cahīne. Sa yero mari ye buhirire yariari. ²¹ Ti dutiye yeye mehna quehnoana Cohācǰū yequina mari wahagū Cristo yariari pehe ne dūhseati ijieraboaga. Cohācǰū marine tiqiro cahīdire, Cristo tiqiro yariarire ihyo ijiye waro yero saha ijigū ye dueraja yūhu pehe. Sa yegū “Dutiye mehna yūhdugutja”, ne nisi yūhu.

Cohācǰū dutiye Moiserere tiqiro cūrire, wacū tutuaye gūhure yahuahye Pablo

3 Yūhu acaye, mūsa Galacia cjāna tūho masiena iji wame tire mūsa. Jesucristo curusapū tiqiro yariarire buheyere ijipihtiequina tiquina ihñonopū musare yahuu. ¿Sa yena yojopūre tiqiro yere mūsa yūhdūducature ni mehoñequina musare tiquina dojomehnegū dūhse yena tiquinare yūhtiri mūsa? ² Ahrireta yahu duaja musare: Dutiyere mūsa yeye mehna Espiritu Santore cūo dūcaerari mūsa. Quehnoañe buheyere pehere tūhona Cristore mūsa wacū tutuaye mehna Espiritu Santore cūo

dūcari mūsa. ³ Espiritu Santo tutuaye mehna mūsa Cristo yequina iji dūcagū yojopūre mūsa basi dutiyere mūsa yeye mehna Cohācǰū cahapū mūsa waha duagū ñarīne. Tūho masiena ijire mūsa, sa yena. ⁴ ¿Quehnoañe buheyere mūsa yeri buhiri peye tahari mūsa ñano yūhdūna ihyo warota ñano yūhdūna niyari mūsa, sa wahana? Ihyo waro ijierare mūsa sa ñano yūhdūri. Dutiyere yeye mehna Cohācǰū cahapū mūsa waha duana ihyo warota ñano yūhdūna niboaga mūsa. ⁵ ¿Dūhse mūsa yeri wapa Espiritu Santore musare ohori Cohācǰū, mūsa tūhotugū? Tiqiro dutiyere mūsa yeri wapa ohoerari tiqiro. Tiqiro buheyere quehnoano mūsa tūhogū ihñano tiqiore mūsa wacū tutuari batopū Espiritu Santore ohori tiqiro. ¿Cohācǰū mūsa watoa tiqiro tutuaye mehna ye ihñono dūhse ijiro boro sa ye ihñojari tiqiro, mūsa tūhotugū? Tiqiro dutiyere mūsa yeri wapa sa ye ihñoadari tiqiro. Tiqiro buheyere quehnoano mūsa tūhogū ihñano tiqiore mūsa wacū tutuagū sa ye ihñori tiqiro.

⁶ Abrahā Cohācǰūre wacū tutuahye. Tiqiro sa yegū tiqiore Cohācǰū “Quehnoariqiro ijire”, ni ihñahye. ⁷ Sa yena ahri yūhu niatire masiña mūsa: Cohācǰūre wacū tutuayequinata potota Abrahā panamena iji turiayequina ape tjuo cjēna yero saha ijire. ⁸ Panopū Cohācǰū yere tiquina ojoari pūpū ohō saha ni yahuahye: Judio masa ijieyequina Cohācǰūre tiquina wacū tutuagū ihñano “Quehnoañequina ijire”, ni ihñare Cohācǰū. Tiqiro sa ni ihñatire Cohācǰū panopū masiyuro, tiqiro quehnoañe buheyere Abrahāre yahu muhta tuhasahye. “Mūhu mehna ahri yehpa cjēnare ijipihtiequinare quehnoano yeitja”, niahye Cohācǰū Abrahāre. ⁹ Sa yero Abrahā Cohācǰūre quehnoano tūho wacū tutuahye. Tiqiro

sa wacū tutuagū ihñano Cohācjū tiquirote quehnoano yeahye. Sa ye apequina masa Cohācjūre tiquina wacū tutuagū, tiquina gūhure quehnoano yerota Cohācjū, Abrahāre tiquiro yeriro sahata.

¹⁰“Ti dutiyere Moiserē tiquiro cūri mehna Cohācjū yequina wahanata”, ni tūhotuyequina buhiri tiyequina ijire. Tiquiro ojoari pūpū sata nine: “Cohācjū dutiyere tiquiro ya pūpū tiquina ojoarire ye pehoeyequina buhiri tiyequina ijire tiquina ijipihtiyequina”, ni ojoahye. ¹¹Cohācjū yere tiquina ojoari pūpū ohō saha nine: “Cohācjūre wacū tutuayequinare ‘Quehnoañequina ijire’, ni ihñare Cohācjū. Sa wacū tutuaye ijipihtiye decori Cohācjū mehna sa ijiducuenta”, nine Cohācjū yere tiquina ojoari pūpū. Tiquiro sa nigū ahri yūhū niatire mari quehnoano masiaja: Ti dutiyere tiquina yeye mehna masare quehnoañequina yero saha ihñedare Cohācjū. ¹²Dutiye yeye mehna Cohācjū cahapū waha duayequina Cohācjūre wacū tutuerare. Ohō saha nine Cohācjū yere tiquina ojoari pūpū: “Dutiye yeye mehna quehnoañequina waha duayequinare ti dutiyere ye pehorō cahmene tiquinare”, nine Cohācjū yere tiquina ojoari pūpū.

¹³Sa ye ti dutiye marine buhiri tigū yere. Mari buhiri tigū ihñano Cristo pehe tiquiro basi mari ye buhirire buhiri tiriqiro waharo, mari buhiri ti-borire buhiri ti basahye marine. Cristo tiquiro buhiri tiatire yahuro ohō saha ni ojoahye panopūre: “Ijipihtiyequina yucuripū tiquina duhu ohōriquina buhiri tiriqina ijire”, ni, ojoahye panopūre. ¹⁴Tiquiro sa ni ojoariro sahata sa yeahye Cristore. Cohācjū Abrahāre “Ahri yehpa cjenare quehnoano yeitja”, tiquiro nidiro sahata yero niahye masare. Sa yeahye Cristo mehna. Tiquiro yari-ahye judio masa ijieyequinare Cohācjū

quehnoano tiquiro yeatire. Sa yero Jesucristo mehna sohtori tiahye Cohācjū Abrahāre tiquiro nidiro sahata. Sa yeahye tiquirote mari wacū tutuari bato Espiritu Santore mari cuoatore.

Tiquiro buherire quti mehna yahu nemoahye Pablo

¹⁵Yūhū acaye, masa ye quti mehna ti yūhū nidire yahutja musare: Tiquina pacuro tiquiro yariato pano tiquiro pohne comesatire yahuri pū ohō saha ni ojoare. “Yeere yūhū pohnare ohoutja”, ni ojoare. Tiquiro sa ni oja cūri pūre tiquiro yariato pano apequiro pehe ti pūre sijoro saha ni oja nemo masiedare. Sa yero ti pūre “Poto ijierare”, ni masiedare. ¹⁶Ti pūre tiquina pacuro tiquiro pohnene tiquiro cūriro saha “Musare quehnoano yeitja”, Cohācjū nino, Abrahāre tiquiro panamino iji turiariquiro gūhure nino niahye. Sa nino apequina tiquiro panamena iji turiayequinapūre nino niedahye. Ihcāquiroreta tiquiro panamino iji turiariquiro dihitare nino niahye Cohācjū. Tiquiro Abrahā panamino iji turiariquiro Cristo ijire. ¹⁷Yojopūre quehnoano yahutja musare: Abrahā gūhure Cohācjū “Musare quehnoano yeitja”, tiquiro ni cūri bato cuatro ciento treinta cūhmari yūhdūri bato tiquiro dutiyere Moiserē cūahye. Sa cūno Abrahā gūhure Cohācjū “Musare quehnoano yeitja”, tiquiro nidire boro taro niedahye. ¹⁸Cohācjū marine yūhdūoro dutiyere mari yeye mehna marine yūhdūoerare. Dutiyere yeye mehna mari yūhdugū Cohācjū “Musare quehnoano yeitja”, tiquiro nidi pehe dūhseati ijieraboaga. Marine yūhdūoro taro Cohācjū Abrahāre tiquiro ni cūri mehna sa yero taro niahye.

¹⁹¿Sa yero dūhse yeatire tiquiro dutiyere cūri Cohācjū? Tiquiro dutiyere

cūahye ti dutiyere mari yūhdūdūcarire mari quehnoano masiatire. Sa yero panopūre Cohācjū “Mūhū panamino iji turiariquiro mehna masare quehnoano yeitja”, Abrahāre tiquiro nidiquiro tiquiro wihato pano Cohācjū dutiyere cuomahye masa. Sa yero Cohācjū dutiyere tiquiro cūgū tiquiro yequina angele pehe tire duti turiahye. Sa ye Moiserere tiquina cūgū, tiquiro pehe masare cū turiahye tja. ²⁰Ti dutiyere Moise cū turiagū Cohācjū tiquiro basita masare cūedahye. Sa cūedaperota Cohācjū “Mūhūre quehnoano yeitja”, Abrahā pehere ni cūno, tiquiro basita sa ni cūahye.

²¹Cohācjū Moiserere tiquiro dutiyere cūno, to pano Abrahāre tiquiro nidire “Abrahāre yūhū nidiro saha yesi yūhū”, nino niedahye tiquiro. Abrahāre tiquiro nidiro sahata yero taro nihaye. Tiquiro dutiye yeye mehna Cohācjū yequina wahana ti pje pūrita dutiyere mari yeye mehna quehnoana wahaboaga mari. ²²Sa yero Cohācjū tiquiro yere tiquina ojoari pū pehe ijipihitiyequina nāñe buhiri tiyequina tiquina ijiyere yahuahye. Sa ni yahuahye Cohācjū “Mūsare quehnoano yeitja”, to pano tiquiro nidiro sahata yero taro. Sa yero Jesucristore wacū tutuayequinare quehnoano yere to pano tiquiro nidiro sahata.

²³Cohācjūre wacū tutuati buheyere marine tiquiro cūato pano tiquiro dutiye pehe mari nāñe yerire marine masigū ye tuhasari. Sa ye marine yahuri ti dutiye pehe. Cohācjūre wacū tutuati buheyere marine tiquiro yahugūpū tiquiro dutiye marine yahu duhuri. ²⁴Sa ye Cohācjū dutiye pehe Cristo wihato pano marine yahuri. Sa yahuri marine Cristore mari wacū tutuaye mehna Cohācjū “Quehnoana ijire”, marine tiquiro ni ihñatire. ²⁵Yojopū pūritare Cristore mari wacū tutuari pje ijire. Ti sa

ijigū tiquiro dutiye pehe marine yahu nemoedare. Marine duti nemoedare.

²⁶Sa yena Cristo Jesure mūsa wacū tutuaye mehna Cohācjū pohna ijire mūsa. ²⁷Ijipihitina mūsa Cristo wame mehna wame yenohrina ijina, Cristo Cohācjū macuno tiquiro ijiro sahata tiquiro pohnata ijire mūsa gūhū. ²⁸Yojopūre pūa curua ijierare mūsa. Judio masa ijiena, judio masa mehna pūa curua ijierare mūsa. Cahacjāna, cahacjāna ijiena mehna pūa curua ijierare mūsa. Ūmūa, numia mehna pūa curua ijierare mūsa. Sa yena ijipihitina mūsa Cristo yequina ijina, ihcā curuata ijire mūsa. ²⁹Sa yena Cristo yequina ijina, Abrahā panamena iji turiana yero saha ijire mūsa. Mūsa sa ijina ijigū Cohācjū Abrahāre “Mūsare quehnoano yeitja”, tiquiro nidiro sahata mūsa gūhūre quehnoano yerota tiquiro. Cristo yequina mūsa ijigū ihñano mūsare quehnoano yerota.

4 Ohō saha ijire ahri quti mehna yūhū yahu nemogū: Tiquiro pacūro came tiquiro yere neatiquiro wahmūno iji cāhtariquiro ijiropū ijipihitiye tiquiro ye ijiepegūta cahacjāno yero saha ijire tiquiro. ²Sa ye tiquiro wahmūno iji cāhtariquiro ijigū tiquirore ihñā ihboyequina tiquiro yere ihñā ihbore. Sa yero tiquiro pacūro queoriro esagūpū tiquiro pacūro yere cūorota. ³Ohō saha wahmūno iji cāhtariquiro yero saha ijimi mari gūhū. Sa ijina mari ijigū cahacjēnare tiquina dutiro saha ahri yehpa cjē dutiye masa ye dutiye marine dutinimedi. ⁴Mari sa ijina ijiepegūta tiquiro queori pje esagū Cohācjū tiquiro macūnore ohoahye. Sa tiquiro ohogū tiquiro macūno ihcācoro nuhmino mehna masa bajuahye. Sa yero tiquiro judio masūno masa bajuagū Cohācjū dutiye Moiserere tiquiro cūri tiquirore dutinimahye. ⁵Mari gūhūre ti dutiyeta dutinimahye. Sa yero marine yūhdūoatiquirore ohoahye Cohācjū

tiquiro macunore, tiquiro pohna mari wahatire.

⁶Sa yero tiquiro pohna mari ijigũ Cohãcjũ macuno tiquiro yaquiro Espiritu Santore mari mehna ijiatiquirore ohoahye Cohãcjũ. Tiquiro yaquiro Espiritu Santo pehe Cohãcjũre “Mai”, niniquiro ijire. ⁷Sa yena musa Cohãcjũ yedohoye mehna cahacjãna ijierare musa yojopũre. Tiquiro pohna ijire musa. Sa yena tiquiro pohna ijina, Cohãcjũ tiquiro ohoatire cunata.

Pablo Galacia cjẽnare Jesu yequinare cuesãhye

⁸Panopũ Cohãcjũre musa masiena ijina “Cohãcjũ ijire”, musa niñe queoyere ño peona ti queoye cahacjãna ijimahye musa. Musa sa ño peoyequina cohãmana waro ijierahye. ⁹Sa ijirina ijiepenata yojopũre Cohãcjũre masine musa. Ijierare. Tiquiro pũrita musa pehere masine. ¿Tiquiro sa masiepegũta dũhse yena ahri yehpa cjẽna ye buheye pehere cahmeajari musa? Ti buheye dũhseati ijierare. ¿Dũhse yena panopũ musa yeriro sahata Cristo marieno ye duajari musa? ¿Dũhse yena dutiyere musa yeducuri mehnata Cohãcjũ cahapũ waha duajari musa? Wahasi musa. ¹⁰Ihquẽ decorire, ihquẽ asũrine, ihquẽ pohecurire, ihquẽ cũhmarine bose decorire dahre dutire musa. “Mari sa yeye mehna dutiye mehna yũhdũnata”, ni, tuhutumene musa. ¹¹Musa sa ni tuhotugũ musare tutuaro yũhu buheri dũhseati ijieraboaya, yũhu tuhotugũ. Sa yegu musare cuesãja.

¹²Yũhu acaye ahrire tutuaro duti-itja musare: Cristore yũhu tuhoturiro sahata musa gũhu tiquirore tuhotuya. Panopũ dutiye yeye mehna yũhdũ du-ayequina ijieramahye musa judio masa ijiena ijina. Yojopũ pehere yũhu gũhu musa yero saha wahaũ, dutiye yeye mehna yũhdũ dueragũ. Sa yena Cristore

yũhu tuhoturiro sahata musa gũhu sata tiquirore tuhotuya.

Musa mehna yũhu ijigũ quehnoano yeri musa yũhure. ¹³Dohatigupũta musare quehnoañe buheyere coã warore buhe dũcaũ yũhu. ¹⁴Yũhu sa dohatigu ijiepegũta yũhure yabierari musa. Sa yena yũhure cohã tojoerari musa. Sa yena Cohãcjũ yaquiro angelre, Jesucristo gũhure musa piti caboriro saha yũhure quehnoano piti cari musa. ¹⁵¿Yojopũre dũhse wahari musa bucueye? Musare ahrire niitja: Purĩñene dũcana musa caperire ore we ne yũhure ohoboaya musa. ¹⁶¿Yũhu mehna cjãna ijiepenata yojopũre queoro musare yũhu yahuri buhiri ihña tuhtiajari musa yũhure?

¹⁷Sohõ ijiriquina musare tutuaro cahmesãre. Tiquina tuhutuye sijoro saha ijire. Quehnoañe ijierare. Tiquina musare yũhure yũhdũdũcagũ cahmene, tiquina pehere ño peo dutiye. ¹⁸Quehnoano mehna musa quehnoano wahati pehe musare tiquina cahmesãgũ quehnoarĩboaga. Sa ye topũre yũhu mariedagũ gũhure tiquina sa cahmesãgũ quehnoarĩboaga. ¹⁹Yũhu pohngã, niji wahcõricoro ticoro ñano yũhdũro saha musare ñano wacũ tuhoutuaja yũhu. Tee Cristo yero saha musa ijigũpũ musare wacũ duhutja. ²⁰Mianogã musa mehna ijigu tuhtiro marieno bucueye mehna musa mehna yũhu yahugũ quehnoaboaga yũhure. Musare pajiro tuhotugu njaja yũhu.

Agar Sara mehna tiquina ijirire yahuahye Pablo

²¹Tũhoya musa yũhure. Cohãcjũ dutiyere yeye mehna yũhdũ duana ijiepenata tiquiro dutiye pehere quehnoano masiedare musa. ²²Ohõ saha niahye Cohãcjũ yere tiquina ojoari pũpũ: Abrahã pũaro pacũro ijiahye. Tiquiro cahacjõno Agar wame tiricoro

mehna ihcãquirore pohna tiahye. Sa ye tiqiro namono poto Sara wame tiricoro mehna gũhũre ihcãquiro pohna tiahye. ²³ Sa ijiepegũta tiqiro cahacjõno macũno masa mari yero saha masa bajuahye tiqiro. Tiqiro namono poto macũno pehe “Ihcãquirogã pohna tinata mũsa”, Cohãcjũ ni yahuriro sahata masa bajuahye tiqiro pehe. ²⁴ Ahri quti marine quehnoano queoye mehna yahure: Cohãcjũ pũa taha masare “Mũsare yedohoutja”, tiqiro niñe yero saha ijire ahriquina numia pũaro numia. Ihcãcoro Sinaí wame tidũpũ Cohãcjũ dutiyere ohori yero saha ijire. Ticoro Agar ijire. Ticoro mehna mari queoye mehna buhegũ judio masa gũhũ dutiyere yeducuye mehnata yũhdũ duayequina ticoro yero saha ijire. Tiquina cahacjẽna yero saha ijire. ²⁵ Ticoro Sinaí wame tidũ Arabiapũ ijidũ yero saha ijiricoro ijire. Yojoþũre Jerusalẽ cjẽna judio masa dutiye yeye mehna yũhdũ duayequina dutiye cahacjẽna yero saha ijire. Sa yeye mari queoye mehna buhegũ tiquina ticoro yero saha ijire cahacjõno ticoro ijero saha. Tiquina Cohãcjũ pohne ijierare. ²⁶ Mari pehe Cristo yequina ijina Cohãcjũ pohna ijiaja. Sa yena uhmũse cjãna ijiaja. Jerusalẽ uhmũseþũ ijiri maca cjãna ijiaja mari. Topũre masa tiquina yũhdũatire dutiyere yeye mariedare. ²⁷ Cohãcjũ yere tiquina ojoari pũpũ ohõ saha ni ojoahye Cohãcjũ pohne warore, Sara yero saha ijiricorore yahuro:

Pohna mariego, bucueya. Sa ijigo bucueye mehna sañuducuya, niji wahcõno purĩnore masiego ijigo. Mũhũ pehe manũ cohõrigo ijigo apecoro manũ tiricoro yũhdũoro peyequina pohna tigota. Sa yego bucueya, ni ojoahye panopũre ticoro pohna tiato pano Sara yero saha ijiricorore yahuro.

²⁸ Yũhũ acaye, Cohãcjũ nidiro sahata Isaac masa bajuahye. Mari gũhũ tiqiro yero saha Cohãcjũ nidiro sahata tiqiro pohna ijiaja mari. ²⁹ Sa ijiepegũta ti pjeþũre ihyo ijiriquiro yero saha masa bajuariquiro ñano yeahye apeqirore Espĩritu nidiro sahata masa bajuariquirore. Yojoþũ gũhũre sata ijire Cohãcjũ yequinare masa ñano yegũ. ³⁰ Sa yero ohõ saha nine Cohãcjũ yere tiquina ojoari pũpũ: “Cahacjõno macũno tiqiro pacũro yere cũo masiedare. Tiqiro namono poto macũno pehe tiqiro pacũro yere cũo masine. Sa ye tiqiro cahacjõnore ticoro macũno mehnata cohã cãhña”, ni ojoahye. ³¹ Yũhũ acaye, ne cahacjõno pohne yero saha ijieraja mari. Sa yena Abrahã namono poto pohne yero saha ijiaja. (Sa yena Cohãcjũ mari Pacũ yere cũo masiaja.)

Cristo marine cahacjẽna yero saha ijiyere tiqiro duhugũ yeri bato tutuana ijero cahmene marine

5 Sa yero mari cahacjẽna yero saha ijirire potota Cristo marine duhugũ yeri. Tiqiro sa duhugũ yeri bato tutuana ijiaja mũsa. Ti dutiye mehna yũhdũ duayequina cahacjẽna yero saha ijimedina pari turi cahacjãna sajãedacãhña mũsa.

² Yojoþũre yũhũ Pablo ahrire yahutja mũsare: “Cuhñucunũ sohtoa cahserogãre mari yũhre nedi mehna yũhdũnata”, mũsa ni tuhutugũ Cristo mũsare tiqiro yedohori dũhseati ijierare mũsare. ³ Ijipihtina ti cahserogãre mũsa yũhre nedi mehna yũhdũ duanare pari turi ohõ saha ni yahutja yũhũ. Ti cahserogãre mũsa yũhre nedi mehna yũhdũ duana, aþeye Cohãcjũ dutiyere ye pehoerana, yũhdũsi mũsa. ⁴ Dutiyere yeye mehna yũhdũ duana Cristo pehere cohãri mũsa. Sa yena mũsare Cohãcjũ tiqiro

cahĩnene, tiqiro yũdũo duayere duhu cãri musa. ⁵ Sa ijiepegũta Espĩritu Santo tutuaye mehna Cohãcjũre mari pehe wacũ tutuaja. Mari sa wacũ tutuagũ “Quehnoana ijire”, ni ihĩare Cohãcjũ marine. Tiquiro sa ni ihĩagũ marine tiqiro yũdũoatire masiaja mari. ⁶ Cristo Jesu yequina ijina cuhnucunũ sohtoa cahserogãre mari yũhre negũ ne duhseati ijierare. Ti cahserogãre mari yũhre nedagũ gũhũre ne duhseati ijierare. Sa ijiepegũta Cristo pũritare wacũ tutuana apequinare cahĩnata mari. Ti wacũ tutuaye pehe ihyo waro ijiro niedare.

⁷ Musa Cristore quehnoano wacũ tutuamedi. ¿Quehnoañe buheyere musare yũhũ acaye judio masa tiquina yũhdũdũca dutigũ duhse yena tiquinare yũhtiri musa? ⁸ Tiquina ye buheye Cohãcjũ musare cũriqiro tiqiro ye buheye ijierare. ⁹ Ahri yũhũ niatire wacũña musa: Mehenogã pã pugũ yeye trigo yũbũre quehnoano ti sehsharo saha yũhũ acaye judio masa ye buheye pehere peyequina musa mehna cjẽna cahmeboaga. ¹⁰ Mari puhtoro Cristore wacũ tutuaja yũhũ. Sa yegu ahri yũhũ niatire masiaja yũhũ. Cristo yedohoye mehna apeye buheyere camepũre cahmesi musa. Tire masiaja yũhũ. Musare dojomehne cohteyequina noho ijieyequina ijiaga. Tiquinare Cohãcjũpũ buhiri dahrerota.

¹¹ Yũhũ acaye, “Dutiye yeye mehna yũhdũnata”, tiquina ni buheyere yũhũ buhegu ijigũ judio masa yũhũre ñano yeraboaga. Cristo curusapũ tiqiro yariarire yahuye buheyere yũhũ buheri buhiri tiquina ñano yeri yũhũre. Cristo ye buheye mehna judio masa ye buheyere yũhũ buhe moregũ yũhũre ñano yeraboaga tiquina. ¹² Musare dojomehne cohteyequina musa cuhnucunũ sohtoa cahserogãre

yũhre ne dutiyequina tiquina basi dihita yũhre neahdo.

¹³ Yũhũ acaye, “Dutiye mehna yũhdũnata”, ni tuhotu dutierare Cohãcjũ musare. Ti dutiye mehna yũhdũerape-nata ti dutiyere yũhdũdũcaeracãhña musa. Sa ye musa mehna cjẽnare cahme cahĩna, tiquina cahacjẽna yero saha yedohoya tiquinare. ¹⁴ Ihcã dutirore quehnoano yena, Cohãcjũ dutiyere ye pehona niaja mari. Ohõ saha ijire ti dutiro: “Mũhũ basi mũhũ cahĩno saha mũhũ cahapũ ijieyequina gũhũre cahĩna”, ni, dutiahye. ¹⁵ Sa yena wahiquina yero saha musa basi cahme dũse tutueracãhña. Sa yena cahme-quadacãhña. Musa mehna cjẽna “Cristo yere duhuari”, nina, quehnoano yeya musa.

Masa ñañene tiquina tutuaro cahmeñene, Espĩritu Santo cahmeñe gũhũre yahuahye Pablo

¹⁶ Espĩritu Santo tiqiro cahmeno sa-hata ijiya musa. Sa yena musa ñañene musa tutuaro cahmeñene yeracãhña. ¹⁷ Ñañene musa tutuaro cahmegũ Espĩritu Santo ihña tuhtire. Tiquiro sa ihña tuhtigũ ti ñañene duhu duare musa. Sa yena ñañene musa tutuaro cahmena, Espĩritu Santore ihña tuhtire musa. Sa ihña tuhtina tiqiro cahmeno saha yerare musa. Sa ye ñañene musa tutuaro cahmeñe Espĩritu Santo tiqiro cahmeñe yero saha ijierare. Sa ye Espĩritu Santo tiqiro cahmeñe ñañene musa tutuaro cahmeñe yero saha ijierare ti. Sa yena musa cahmeno saha yerare musa. ¹⁸ Sa yena Espĩritu Santo tiqiro cahmeñene yena ijina “Dutiye mehna mari yũhdũnata”, ni, tuhotuerare musa.

¹⁹ Masa ñañene tiquina yeyere mari quehnoano masi tuhasaja. Ohõ saha ijire ti: Numino mehna ñano yeye, umũno mehna ñano yeye, wũana tiye, bũe tiro marieno ñano yeye, ²⁰⁻²¹ “Cohãcjũ ijire”,

tiquina niñe queoyere ño peoye, masare ujuayequina yayia tiquina yeye, ihña tuhtiye, cahme ðuse tini wiaye, doeye, usuaye, tiquiro basi dihita cwo duaye, ihña tuhti cahme tu waye, ihcã curua cjēna ape curua cjēnare ihña tuhtiye, apequina yere cooye, masare wejēñe, queheye, queheye bose decorire yeye, ohō saha ijiye ijire ñañene yeye. Panopũ musare cuaro mehna yũhu nidiro sahata yojopũ gũhure niitja: Ti borore yeriquina Cohãcjũ puhtoro ijiropũre uhmũsepũre ne esasi.

²² Espĩritu Santo pehe marine ohō saha yena ijigũ yere: Masare cahña, bucuena, cueye mariena, usua mũñena, apequinare quehnoano yena, quehnoana, duhuro marieno Cohãcjũ cahmeñene yena, ²³ quehnoano mehna yena, tiquina ñañe ye duarire yerana ijigũ yere marine tiquiro. Sa yeyequinare “Sa yeracãhña”, ne ihcãquiro niedare. ²⁴ Cristo Jesu yequina ijina tutuaro mari ñañene ye duarire cohã tuhasau. ²⁵ Espĩritu Santo marine Cohãcjũ mehna sa ijiducugũ yerota. Sa yena tiquiro cahmeno sahata yeducuna ijiihna mari.

²⁶ “Apequinare masi yũhdũducaja usã”, ni, tuhotuna ijieracũhna mari. Sa yena mari mehna cjēnare usuagũ yeracũhna mari. Sa yena mari basi cahme coeracũhna.

Musa mehna cjēnare yedohoya

6 Yũhu acaye, ihcãquiro musa mehna cjēno tiquiro ñañene yegũ Cristore quehnoano wacũ tutuana ijina cahñe mehna tiquirore yedohoya quehnoañene pari turi tiquiro yeatire. Sa yena musa gũhu “Ñañene tutuaro cahmeari”, nina quehnoano yeya. ² Musa mehna cjēna tiquina ñano yũhdugũ gũhure yedohoya tiquinare. Musa sa yena Cristo tiquiro dutiro saha yena ninata musa.

³ Ihcãquiro ihyo ijiriquiro ijieperota “Apequinare masi yũhdũducaja”, ni tuhoturo, tiquiro basi ni mehoñe dihitare tuhoturiquiro ijire.

⁴ Ihquēquina musa sehsaro musa yerire “Ahri quehnoañe ijire. Ahri ñañe ijire”, ni masiña. Sa masina musa yeri quehnoañe ijigũ musa basi bucuenata. Sa yena “Apequinare masi yũhdũducaja”, nisi musa. Sa niedana apequinare musa yũhdũducari mehna bucuensi musa. ⁵ Sa yero Jesu yaquiro Cohãcjũ yere tiquiro basi yere. Apequiro masũno tiquirore tire yedoho masiedare.

⁶ Sa yena quehnoañe buheyere buheriquirore apee boro musa cwoyere tiquirore ohoya musa tiquiro buhena.

⁷ Oteyere oteriquiro ñañe pjerire otero ñañe ðucare cworota. Quehnoañe pjerire otero quehnoañe ðucare cworota. Ohō saha mari gũhu ñañene yena ñañene cwonata. Sa yero mari ñari buhiri buhiri dahrerota. Quehnoañene yena quehnoañene cwonata. Sa yena quehnoano ijinata. Sa yena “Usã ñañene yegũ Cohãcjũ usãre buhiri dahresi”, ni tuhotueracãhña. Ñañene yeyequina Cohãcjũre bujupeyequina ijire. Cohãcjũre bujupeyequinare buhiri dahrerota tiquiro. ⁸ Mari ñañene tutuaro cahmena, tire yena, ti mehnata yarianata. Sa yena pecapũ wahanata. Espĩritu Santo pehe tiquiro cahmeñene mari yegũ tiquiro marine ijipihtiye decori uhmũsepũ ijiducugũ yerota. ⁹ Sa yena quehnoañene yena tire caributieracũhna mari. Cohãcjũ tiquiro queori pje ijigũ quehnoañene cwonata mari caributierana. ¹⁰ Sa yena ijipihtiyequinare mari ihñañequinape quehnoano yeihna mari. Mari acaye Jesu yequina pũritare apequina yũhdũoro quehnoano yeihna.

**Pablo yahu bato tiro,
quehnoa duti bato tiahye**

¹¹ Bujuye letra yuhu ojoari mehna ya omoca mehna musare yuhu ojoarire ihñaña musa. ¹² Musare cuhnucunu sohtoa cahserogãre yuhre ne dutiyequina masa tiquinare ño peogũ cahmene. Cristo curusapũ tiquiro yariarire yahuye buheyere mari buheri buhiri masa ñano yere marine. Tiquina sa yegũ ihñañe ahriquina musare cuhnucunu sohtoa cahserogãre yuhre ne dutire “Judio masa ye buheyere yeaja”, niñe. Sa tiquina ye dutigũ judio masa tiquinare ñano yeraboaga. Sa ye ti cahserogãre yuhre ne dutire. ¹³ Musare ti cahserogãre yuhre ne dutiyequina pehe Cohãcjũ tiquiro dutirire ye pehoerare. Sa ye ti cahserogãre musare tiquina yuhre ne dutiri bato musa yuhtigũ ihñañe, judio masa pehe tiquinare musare yuhre ne dutiyequinare ño peoboaga. Tiquina sa ño peoatire musare dutire tiquina.

¹⁴ Yuhu pehe masa yuhure tiquina ño peogũ cahmeda yuhduaja. Mari puhtoro

Jesucristo curusapũ tiquiro yariari pehere masa tiquina ño peogũ cahmesãja yuhu. Sa curusapũ tiquiro yariagũ ahri yehpa cjẽ ñañene watino yuhure tiquiro ye dutigũ yeru yuhu. Sa yariaro ti ñañene yuhure cahmedagũ yeri tiquiro. ¹⁵ Tiquiro sa yegũ Cristo Jesu yequina ijina ti cahserogãre mari yuhre negũ ne duhseati ijierare. Ti cahserogãre mari yuhre nedagũ gũhure ne duhseati ijierare marine. Sa ijiepegũta quehnoañe pehere mari comesagũ pũritare quehnoare. ¹⁶ Ijipihtina ahri yuhu buherire yena, potota Cohãcjũ yequina ijina, cuero marieno quehnoano ijiya musa. Sa yena Cohãcjũ tiquiro paja ihñano mehna ijiya musa.

¹⁷ Mari puhtoro Jesu cahãcjũ yuhu ijiri buhiri yuhu pagure cami tiaja yuhu. Yuhu sa ijirigu ijigũ yojopure apequina yuhure cariboeracãhdo.

¹⁸ Yuhu acaye, mari puhtoro Jesucristo mehna musare ijipihtinare quehnoa dutiaja. Sata ijiahro.

Efesios

Efeso cĵnare oĵoa oĵoahye Pablo

1 Yũhu Pablo musare Efeso wame tiri maca cĵnare oĵoa oĵoaja. Yũhu Jesucristo yere buhe duti tiquiro cũrigũ ijiaja. Cohãcĵũ tiquiro cahmeno sahata Jesu yũhũre tiquiro yere buheacĵare cũri. Sa yegũ musare Jesucristore sa wacũ tutuaducunare oĵoa oĵoaja yũhu. ²Sa yegũ Cohãcĵũ mari Pacũ mehna, mari puhtoro Jesucristo mehna musare quehnoa dutiaja. Tiquina yedohoye mehna quehnoano ijiya musa.

Cristo yequina mari ijigũ ihñano Cohãcĵũ quehnoano yere marine

³Cohãcĵũ, mari puhtoro Jesucristo Pacuro marine quehnoano yeducure. Ijipihtiyere tiquiro ye uhmũse cĵe quehnoañe mehna tiquiro marine quehnoano yeducure. Marine tiquirore quehnoano wacũ tutuagũ yeducure. Cristo yequina mari ijigũ ihñano sa marine quehnoano yeducure. Tiquiro sa yeriquiro ijigũ ihñana quehnoano ño peoye mehna tiquirore quehnoano yahuducuhna. ⁴Ohõ saha yeahye tiquiro marine tiquiro yequinare: Ahri yehpa ijiato pano tiquiro yequina ijianajare bese tuhasahye tiquiro marine. Sa beseahye marine ñañe mariena mari ijiatire. Sa yena ñañe mariena ijiaja mari, tiquiro ihñagũ. Sa yero marine “Ñana ijire musa”, nisi tiquiro. ⁵Marine cahĩno, paja ihñano panopũ ohõ saha niahye tiquiro marine: “Yũhu macũ Cristo yedohoro mehna tiquina yũhu pohna ijieta”, ni cũahye marine panopũ. Tiquiro cahmediro sahata sa yeahye tiquiro marine. ⁶Marine tiquiro sa quehnoano yegũ ihñana ño peoye mehna tiquirore quehnoano yahuducuhna. Tiquiro

macũno tiquiro cahĩniquiro yequina mari ijigũ ihñano quehnoano yere marine. Sa yena tiquirore quehnoano yahuducuhna.

⁷⁻⁸Cristota ijire marine pecapũ waborinare yũhũoriqũro. Mari ñañe yerire tiquiro cohãgũ ihñano, Cohãcĵũ pehe mari ñañene bore. Cristo mari ñañe buhirire yariaro tiquiro diire cohãhye. Marine tutuaro cahĩno, marine paja ihñano sa ye dutiahye Cohãcĵũ. Tiquiro masi pehoye mehna sa ye dutiahye tiquiro. ⁹⁻¹⁰Sa yero marine tiquiro yeatire marine masigũ yeri. Panopũ apequinare tire masigũ yerahye tiquiro. Ohõ saha ijire marine tiquiro yeati: Tiquiro cahmediro sahata tiquiro tũhoturiro sahata ijipihtiyequinare ihcã curuata Cristo yequina ijigũ yerota. Sa yero ijipihtiyere tiquiro ye ijigũ yerota. Tiquiro queori pje ijigũ uhmũse cĵenare, ahri yehpa cĵena gũhũre, ihcã curuata tiquiro yequina ijigũ yerota. Sa yero uhmũse cĵene, ahri yehpa cĵe gũhũre tiquiro ye ijigũ yerota. Sa yero Cristo pehe ijipihtiyequina puhtoro ijirota. Sa ye ijipihtiyere tiquiro ye dihita ijirota. Sa ijiatiquiro iji dutiahye Cohãcĵũ tiquirore.

¹¹Sa yero Cristo yequina mari ijiatire masino panopũ Cohãcĵũ marine bese tuhasahye tiquiro yequina mari ijiatire. Ahri ijipihtiyere cũahye tiquiro tũhoturiro sahata, tiquiro cahmediro sahata yero taro. ¹²Sa yeahye tiquiro yere mari yeatire. Mari sa yegũ ihñane apequina tiquirore ño peoye, “Tutuagũ ijire muhũ”, nine. Ušã pehe judio masa Jesure cahme dũcarina ijina tiquirore wacũ tutua muhtarina ijii. ¹³Musa gũhũ poto yahuducuyereta quehnoañe buheyere tũhori. Ti buheye mehnata Cohãcĵũ cahapũ wahanata musa. Tire tũhona tiquirore wacũ tutuani musa. Sa wacũ tutuana tiquiro yequina wahari musa. Tiquiro yequinare ohõ saha niahye Cristo: “Musare Espĩritu San-

tore ohoutja”, ni yahu cūahye. Sa yero tiqiurore mūsa wacū tutuagū ihñano Espiritu Santore ohori mūsare. Sa yero Espiritu Santo mūsa mehna ijiro Cohācjū yequina mūsa ijiye tiyere masigū yere tiqiuro pehe. ¹⁴ Cohācjū marine yuhdugū yere. Sa yero came tiqiuro cahapū neanota marine. Marine tiqiuro neato pano Espiritu Santo pehe Cohācjū yere mari cūoatire masigū yere marine. Cohācjū marine tiqiuro sa yegū ihñana tiqiurore ño peoye mehna “Quehnoagu ijire mūhū”, niaja mari.

Pablo Cohācjūre sini basahye Jesu yequinare

¹⁵⁻¹⁶ Cristore mūsa wacū tutuana ijigū ihñagu Cohācjūre sa sini basaducuaaja mūsare. Jesucristore mūsa wacū tutuarire, ijipihtiyequina tiqiuro yequinare mūsa cahīdire tuhogu Cohācjūre “Quehnoare”, niaja. Ohō saha tiqiurore sini basaja mūsare: ¹⁷ Cohācjū ūhmūse cjēno tiqiuro yere mūsa quehnoano masiatire sini basaja. Sa yegū tiqiurore mūsa quehnoano masiatire sini basaja mūsare. Tiquiro mari puhtoro Jesucristo Pacuro ijire. ¹⁸ Sa yegū mūsa quehnoano masiatire mūsare sini basaja Cohācjūre. Tiquiro mūsare yuhduoro, tiqiuro yequina ijigū yeri mūsare. Tiquiro sa yegū quehnoa yuhduare marine. Tire mūsa masiatire sini basaja mūsare Cohācjūre. Sa yegū marine tiqiuro ohoatire quehnoa yuhduye ti ijigū gūhure mūsa masiatire sini basaja. ¹⁹ Ohō saha mūsa masiatire sini basaja mūsare Cohācjūre. Cohācjūre wacū tutuana mari ijigū ihñano tiqiuro tutuaye mehna marine yedohore. Tutua yuhduariquiuro ijire. Ti gūhure mūsa masiatire sini basaja Cohācjūre. ²⁰ Ti tiqiuro tutuaye mehna tiqiuro Cristo yariariquiurore masoahye. Sa yero ūhmūsepū tiqiuro potō pehepū Cristore dujigū yeahye Cohācjū,

ijipihtiyequinare tiqiuro dutiatio saha. ²¹ Topū dujiro ijipihtiyequina ūhmūse cjēna puhtoa bui, ijipihtiyequina apequina bui ijire Cristo. Sa yero yojopure ijipihtiyequina ahri deco cjēna bui puhtoro ijire. Camepū ijipihtiyequina ape deco cjēnapū gūhure tiquina bui puhtoro ijiatiquirota ijire tiqiuro. ²² Sa yero ijipihtiyequina bui cūahye Cohācjū Cristore. Sa yero ijipihtiye cūoriquiro yeahye tiqiurore. Sa yero Cristo yequina ihcā curua ijiyequina bui puhtoro sōahye tiqiurore. Tiquina dapu ijire tiqiuro pehe. ²³ Cristo yequina ihcā curuata ijina, tiqiuro pagu yero saha ijiaja. Cristo ijipihitropū sa ijiducure. Sa yero ijipihtiye tiqiuro bajumehnedi mehna sa ijiducure.

Cohācjū marine cahīno, paja ihñano yuhduoahye marine

2 Ñañe buhiri tina, pecapū butiborina mūsa ijiepegūta Cohācjū mūsare yuhduori. ² Panopure ahri yehpa cjēna Cohācjūre yuhduducayequina yero saha yemedi mūsa. Sa yena watīno tiqiuro nidiro saha yemedi mūsa. Tiquiro watīno ahri yehpapū dutiriquiro Cohācjūre yuhduducayequina puhtoro ijire. ³ Panopure ijipihitina mari ohō saha dihita yerina ijimi. Mari ñañe dihitare tutuaro cahmēmī. Mari esa tuharo, mari tuhoturiro saha yemi. Sa yena ijina ijipihtiyequina apequina yero saha, mari gūhū ñana ijimi. Mari sa yena ijigū ihñano Cohācjū mari mehna usuaro, buhiri dahre duamahye. ⁴ Sa ye duariquiuro ijieperota marine tutuaro paja ihñano, quehnoano cahīdi marine. ⁵ Sa cahī yuhduaro, mari ñañe buhiri pecapū butiborina mari ijiepegūta marine tiqiuro mehna sa ijiducuanaja ijigū yeri. Cristo yequina mari ijigū ihñano marine sa yeri. Marine paja ihñano, yuhduori tiqiuro marine. ⁶ Sa yero Cristo yequina mari

ijigū ihñano Cohācjū marine came tiqiro masoatinare cūri. Cristo tiqiro masoatinare cūri marine. Sa yena tiqiro mehna masa mujanata mari. Sa yero uhmusepu marine Cristo mehna ijigū yerota Cohācjū. ⁷Ohō saha yeri marine tiqiro paja ihñarire, camepu ijiatiquinare masigū yero taro. Sa yeri tiqiro tutuaro cahñene tiqinare masigū yero taro. Cristo yequina mari ijigū ihñano sa yuhduori tiqiro marine.

⁸Cristore mari wacū tutuagū ihñano Cohācjū marine pecapu wahaborinare yuhduori. Marine paja ihñano, marine cahño marine yuhduori. Mari esa tuharo mari quehnoano yeye mehna Cohācjū cahapu waha masiedaja mari. Cohācjū pehe marine yuhduore. Sa yero tiqiro mehna mari sa ijiducuatire ohore marine. Tiqiro sa ohogū mari esa tuharo quehnoañene mari yeri wapa ijierare ti. ⁹“Usā esa tuharo pecapu wahaborina yuhduu’, niboaga”, nino ohō saha dutiahye tiqiro: Mari esa tuharo yuhdu dutierare marine. ¹⁰Cristo yequina ijigū yeri marine Cohācjū pehe quehnoañe dihitare yeanaja mari ijiatire. Panopu quehnoañene mari yeatire cū tuhasahye tiqiro marine.

Cristore cuona mari quehnoano ijiaja

¹¹Sa yena panopu musa ijie tirire yojopu gūhure wacūña musa. Cristo yequina ijieranina judio masa ijiena ijina musa acaye yero saha yerina ijimedi musa. Cuhnucunū cahserogāre yūhre nedari musa. Musa sa yūhre nedagū ihñana usā judio masa pehe cuhnucunū cahserogāre yūhre nena pehe musare ihña tuhtina ohō saha nie tii. “Cuhnucunū cahserogāre yūhre neñequina ijiye, Cohācjū yequina ijierare”, nie tii musare. ¹²Ti pjere Cristo yequina ijierari jimedi musa. Usā judio masa pehe Cohācjū beserina ijie tii. Usā sa ijigū “Musare yuhduoutja”, ni cūahye Co-

hācjū usāre. Sa yena musa pehe tiqiro sa ni cūrina ijierari jimedi. Sa ye Cohācjū beseriquinare ihña tuhtina ijinimedi musa. Musa ñañe buhirire pecapu wahanaja ijiri jimedi musa. Cohācjū mariena ijina pecapu waha, butiborina ijie tiri jimedi musa.

¹³Yojopu pehere Cristo Jesu yequina ijire musa. Panopu Cohācjūre ihña tuhtirina ijiepenata, yojopure tiqiro yequina ijire musa. Cristo musa ñañe buhiri curusapu tiqiro dii cohāri bato Cohācjū yequina ijigū yeri musare. ¹⁴Usāre judio masare ihña tuhtina musa ijigū ihñano Cristo marine ihña tuhti dutierari. Masare sa ni yahuriquiro ijire tiqiro. Usā judio masa, judio masa ijiena mehna puā curua mari ijigū ihñano, tiqiro ihcā curuata ijigū yeri marine. Mari cahme ihña tuhtirire duhugū yeri tiqiro. ¹⁵⁻¹⁶Ohō saha tire yeri tiqiro: Mari ñañe buhirire curusapu yariaro marine pecapu wahaborinare yuhduori. Sa yuhduoro tiqiro yequina ijigū yeri marine. Sa yero puā curua mari ijiepegūta ihcā curuata wahma curua ijigū yeri marine. Sa yero panopu mari cahme ihña tuhtirina mari ijiepegūta marine ihña tuhtieragū yeri. Sa yero judio masa usā dutiyere cohāri tiqiro. Ti dutiye marine puā curua iji dutiri jimedi. Yojopure ihcā curuata iji-aja mari. Sa yero Cristo Cohācjū yequina ijigū yeri marine.

¹⁷Sa yero marine cahme ihña tuhtieragū yero taro Cristo quehnoañe buheyere yahuro ahtahye. Musa judio masa ijiena Cohācjū yere cuoerari jimedi. Musa sa cuoeragū ihñano musare yahuro ahtahye. Usā judio masa pehe Cohācjū yere cuou. Usā gūhure yahuro ahtahye. Sa yero ijipihtinare marine cahme ihña tuhtieragū yero, bosaro ahtahye tiqiro. ¹⁸Yojopure ijipihtina mari judio masa, judio masa ijiena gūhu mari Pacu mehna

quehnoano iji masiaja mari. Espiritu Santo tiqiro yedohoye mehna mari Pacu mehna quehnoano iji masiaja mari. Cristo pehe marine sa ijigū yeri.

¹⁹ Sa yena yojopure ape dihta cjēna yero saha ijierare musa. Yojopure Cohācjū yequinare ihña tuhtina ijierare musa. Cohācjū yequina mehna cjāna ijire musa. Tiquiro ya curua cjāna ijire musa. ²⁰ Cohācjū yere yahu muhtariquina panopu cjēna tiqiro ye yahuducuyere ojoa, musare yahue tiahye. Ūsā gūhu tiqiro yere yahu dutiro tiqiro cūrina gūhu Cristo yere yahue ti musare. Ūsā ijiphtina sa yahugū tuhona, Cristore wacū tutua ducari musa. Quehnoa yuhduariqiro, ñañe marieniqiro ijiro, tiqiro yequina ijigū yeri tiqiro musare. Tiquiro mariedagū mari ne yuhdueraboya. ²¹ Sa yero tiqiro masiñe mehna marine tiqiro yequinare ihcā curua ijigū yeri tiqiro. Sa yena tiqiro masiñe mehna quehnoana wahaja mari. Mari sa ijigū ihñano, tiqiro mari mehna ijire. ²² Sa yena Cristo yequina ijina ijiphtiyequina apequina tiqiro yequina mehna ihcā curua wahari musa gūhu. Musa sa wahagū Cohācjū yaqiro Espiritu Santo musa mehna ijiro nine.

Judio masa ijieyequinare quehnoañe buheyere yahuriqiro ijiahye Pablo

3 Sa yegu yuhu Pablo, Cristo Jesu yere musare ijiphtina judio masa ijienare yuhu yahuri buhiri peresupu ijiaja yuhu. ² Cohācjū yuhure paja ihñano, yuhure cahino, quehnoañe buheyere musare judio masa ijienare yuhure yahu dutiro, cūri. Tire tuho tuhasari musa. ³ Panopu musare tiqiro yahuarire Cohācjū yojopure yuhure masigū yeri. Ahrire mehenogā yahu, musare ojoa tuhasau. ⁴ Yuhu sa ojoarire buhena Cristo yere yuhure tiqiro masigū yerire masinata musa. ⁵ Ti tiqiro yahurire

panopu cjēnare tiqiro yahuerahye. Yojopu pehere usāre Jesu cūrinare, Cohācjū yere yahu muhtariquina gūhure tiqiro yahurire masigū yeri Cohācjū. Tiquiro yaqiro Espiritu Santo pehe usāre masigū ye basari tiqiro. ⁶ Ohō saha ijire tiqiro yahuri: Ūsā judio masa dihitare Cohācjū yuhduerare. Judio masa ijieyequina gūhure yuhduorota tiqiro. Quehnoañe buheyere yequina quehnoano tuhogū yuhduorota tiqiro tiquinare. Sa yena usā judio masa, musa judio masa ijiena mehna ihcā pagu yero saha ihcā curuata ijiaja mari. Sa yena mari ijiphtina Cristo Jesu yequina ijina ihcāno saha Cohācjū “Musare yuhduoutja”, tiqiro ni cūriro sahata tiqiro yuhduonohrina ijiaja mari.

⁷ Cohācjū yuhure paja ihñano, yuhure cahino ahri quehnoañe buheyere yahuacjere yuhure cūri. Tiquiro masiñe mehna sa cūri yuhure tiqiro. ⁸⁻¹⁰ Ijiphtiyequina apequina Jesu yequina docapu ijieyequina tiquina docapu waro ijiaja yuhu. Yuhu sa ijiepegūta judio masa ijieyequinare quehnoañe buheyere yahuacjere cūri Cohācjū yuhure. Ti buheye Cristo quehnoa yuhduariqiro tiqiro ijiyere, quehnoa yuhduye tiqiro cuoyere tiqiro ohoatire yahure marine. Yuhure sa cūno Cohācjū “Ohō saha yuhduoutja masare pecapu wahaboriqinare”, nino tiqiro yuhduoatire quehnoano yahu pehoacjere cūri tiqiro yuhure. Sa yero panopu cjēnare ti buheyere ne yahu pehoeraniahye Cohācjū. Ijiphtiyere bajumehnediqiro ijire tiqiro. Yojopure quehnoañe buheyere yahu dutiro cūri tiqiro yuhure, tiqiro quehnoano masi pehoyere masigū yero taro. Masi pehoriqiro tiqiro ijieye tiyere uhmuse cjēna dutieyequinare, angele puhtoā gūhure masigū ye duaheye tiqiro. Sa yero taro quehnoañe buheyere buhe dutiri marine Jesu

yequinare. Musare judio masa ijenare yahu dutiri yuhure.

¹¹Ahri yehpa ijiato panoputa “Masare pecapu wahaboriquinare yuhduoutja” niahye Cohäcjü. Sa nidiquiro ijiro yojopure mari puhtoro Cristo Jesu tiquiro yariaro mehna tiquiro nidiro sahata marine yuhduori Cohäcjü. ¹²Tiquiro sa yuhduogü yojopure Cristore wacü tutuana tiquiro yequina wahaja mari. Tiquiro yequina ijina cuero marieno Cohäcjü mehna yahuducu masiaja mari. ¹³Quehnoañe buheyere musare yuhu buheri buhiri yojopure peresupu ijigu yuhu ñano yuhdugü ihñana bujua witieracähña. Quehnoañe buheyere yuhu yahugü tuhona Cohäcjü yequina wahari musa. Yuhu sa yeri buhiri peresupu ijiaja. Sa yegu musa ye ijiatire ñano yuhdugu niaja. Sa yena bucueya musa. Tire tutuaro bucue dutiaja musare.

Cristo masare tutuaro cahine

¹⁴Sa yegu ahri ijipihtiye mari Pacu tiquiro yerire wacügu tiquiro potu dusepe curi mehna quehe sagu sini basaja musare. ¹⁵Tiquiro ijipihtiye cururi cjëna, tiquiro yequina uhmusepu ijieyequina, ahri yehpau ijiniñequina gühu tiquina Pacuro ijire. Ijipihitina mari Pacu ijire tiquiro. ¹⁶Tiquirore ohö saha ni sini basaja musare: Tiquiro masi pehoriquiro ijire. Tutua yuhduariquiro ijire. Sa yero tiquiro masiñe mehna musare quehnoano tiquiro wacü tutuagü yeatire sini basaja. Espiritu Santo yedohoro mehna sa yerota.

¹⁷Sa yegu Cristore musa wacü tutua nemoatire tiquiro musa mehna tiquiro quehnoano ijiatire sini basaja musare. Sa yegu apequinare quehnoano cahina musa ijigü, Cristo tiquiro tutuaro cahine musa masiatire sini basaja musare. ¹⁸⁻¹⁹Ijipihtiyequina apequina Cohäcjü yequina gühu Cristo tiquiro

tutuaro cahine tiquina masiatire sini basaja. Tiquiro ijipihtiyequina masare cahi yuhduariquiro ijire. Sa cahiniquiro tiquiro ijieye tiyere musa quehnoano masiatire sini basaja musare. Sa yegu tiquiro cahine musa masigü cahmeaja musa mehna Cohäcjü quehnoano ijiatire. Quehnoa yuhduariquiro, ñahe marieniquiro tiquiro ijiro saha musa wahatire tiquiro cahine musa masigü cahmeaja. Sa yegu tiquiro cahine musa masiatire sini basaja musare Cohäcjüre.

²⁰Sa ye Cohäcjüre ño peoye mehna “Tiquiro tutuariquiro ijire”, niñna mari. Tiquiro masiñe mehna quehnoañe pehere comesa masine tiquiro marine. Marine quehnoana ijigü ye masine. Mari sinidi yuhduoro ye masine tiquiro. Mari cahmeñene mari tuhaturi yuhduoro ye masine tiquiro. ²¹Cristo Jesu yequina mari ijigü ihñañe, Cristo ijieye tiye gühure ihñañe, ijipihtiye decori ijipihtiyequina Cohäcjüre ño peohro. Sata yeahro.

Cristo yequina ijina ihcã curuata ijiaja mari

4 Sa yegu musare tutuaro yahuaja: Cohäcjü tiquiro yequina ijiatinare musare besee tiahye. Sa yena tiquiro beserina ijina tiquiro iji dutihiro saha quehnoana ijiaja musa. Tire musare yahuaja yuhu. Mari puhtoro yuhu yedohori buhiri peresupu ijiaja yuhu. Sa ye musare quehnoana iji dutiaja. ²“Ûsã pürita masi yuhducaja”, ni tuhutuna ijieracähña. Apequinare quehnoano mehna yeya usuario marieno. Musa mehna cjëna musare tiquina ñano yepegüta tiquinare cahine mehna sa ihña cãhña. ³Sa yena Espiritu Santo yedohoye mehna quehnoano mehna ihcãno mehna ijiducuya musa. Sa yena cahmequeno marieno ijinata musa. ⁴Ihcã pagu yero saha ihcã curua ijiaja

mari. Sa yero Espiritu Santo ihcāquirola ijire. Cohācjū tiquiro yequina ijanajare mūsare besee tiahye mūsare yūhdūoro taro. Sa yena tiquiro yūhdūoatire masine mūsa. Ti mūsa masidi ihcānota ijire. ⁵Mari puhtoro Cristo ihcāquirola ijire. Tiquiro buheye gūhū ihcānota ijire. Tiquiro yequinare wame yeye gūhū ihcānota ijire. ⁶Sa yero Cohācjū ihcāquirola ijire. Tiquiro ijipihitequina Pacuro ijire. Sa yero mari puhtoro ijire. Sa yero ijipihinare marine yedohore tiquiro. Ijipihina mari mehna ijire tiquiro. Sa yero ijipihitropū ijire tiquiro.

⁷Ihcā curua mari ijiepegūta ijipihina marine mari ye masiatire cūri Cristo. Tiquiro cūriro sahata ye masiaja mari. Tiquiro marine sa cūno apee borore tiquiro sa oho cāriro saha yero nidi tiquiro. ⁸Sata nine Cohācjū yere tiquina ojoari pūpū:

Cohācjūre ihña tuhtiequinare tiquiro yūhdūducari bato tiquiro pari turi mūjaa waharota. Sa mūjano tiquiro peye sa oho cānota masare, ni ojoahye panopūre.

⁹“Tiquiro pari turi mūjaa waharota”, tiquiro nigū coā warore tiquiro dijia tari gūhūre mari masiaja. Ahri yehpapūre tiquiro dijia tarire mari masiaja. ¹⁰Sa yero ohōpūre dijia tariquiro tiquirota ijire mūjaa wahariquiro. Ijipihiteye bui mūjaa wahari tiquiro, ijipihitropū ijiro taro. ¹¹Tiquiro ijire “Masare peye sa oho cāriquiro”, tiquina nidiquiro. Masare tiquiro sa oho cāno saha tiquiro peye tiquina ye masiatire cūri masare.

Ohō saha cūri tiquiro: Ihquēquinare Cristo ye buheyere buheatiquinare cūri. Apequinare Cohācjū yere yahu mūhtatiquinare cūri. Quehnoañe buheyere buhe tiniatiquinare apequinare cūri. Cristo yequina cahmecoañequina puhtoia ijiatiquinare, quehnoano buheatiquinare cūri apequinare.

¹²Sa dihita cūri marine apequinare tiquiro yequinare mari yedohoatire. Sa cūri marine tiquiro yequinare tiquirore mari wacū tutua nemoatire, tutuana mari wahatire. ¹³Sa yena mari ijipihitina quehnoano mehna ihcāno mehna ijinata. Sata ijiro cahmene marine Cristore wacū tutuana ijina. Sa yena mari ijipihitina Cohācjū macūnore quehnoano masinata. Sa yena Cristo tutuariquiro, quehnoano masiniquiro tiquiro ijiro saha mari gūhū quehnoano masina wahanata.

¹⁴Mari sa wahana macanagā yero saha ijisi mari. Macanagā quehnoano tuho masiedariaga. Apequina tiquina buhegū “Ahri poto ijire”, ni tiquina ni meho buhegū macanagā yero saha ijiyequina apeye buheyere tuho, bese-ducure. Sa ye apequina tiquina sijoro saha buhegū ti buheye pehere cahmene. Tiquina yero saha ijisi mari.

¹⁵Ohō saha yematja mari: Mari mehna cjenare cahme cahina, poto quehnoañe buheyere yahumatja tiquinare. Sa yena macanagā tiquina bucua tuho masinequina tiquina wahariro saha mari gūhū tutuana, Cohācjū yere quehnoano masina wahanatja. Cristo ijiro saha wahanata.

Tiquiro ijire mari dapu. ¹⁶Tiquiro yequina ijina tiquiro pagū yero saha ihcā curuata ijiaja mari. Sa yena mari caperi, mari cahmo, mari dahpocāri ihcā pagupū ti quehnoano ijiro saha mari gūhū peyequina ijiepenata ihcāno mehna quehnoano ijiaja. Mari sa ihcāno mehna mari ijiatire Cristo yedohore. Mari omocari mari pagūre ti quehnoano yedohoro saha mari quehnoano yedohoaja apequinare Cristo yequinare. Sa yena mari mehna cjenare Cristo yequinare quehnoano cahina, tiquinare quehnoano yedohona, tutuana Cristore wacū tutua nemona wahanata mari.

**Cristo yequina wahana mari ñañe
yeyere duhu, quehnoañe
pehere comesaja mari**

¹⁷ Sa ye mari puhtoro Cristo tiqiro dutiro mehna ohō saha niitja musare: Cohācjüre cahmeeñequina waro yero saha yeracāhña. Tiquina tuhotuye pehe ñañe dihita ijire. Sa ye tiquina tuhotuye duhseati ijierare. ¹⁸ Sa yero Satana Cohācjü yere tiquinare tuhoer-agü yere. Sa ye tiqiro yere ne tuhoerare. Tuho duerare tiquina. Sa ye Cohācjü tiqiro quehnoano iji dutiriro saha ijierare tiquina. ¹⁹ Sa ye tiquina ñano yeye ne bue tiera yuhduare. Ne bujua witierare. Ñañene tiquina tutuaro cahmeñe dihitare yeducure. Ijipihitiye ti ñañene yeducuye duhu duerare. ²⁰⁻²¹ Musa pehe poto tiqiro yere tuhona musa ijigü, Jesu yere quehnoano masina musa ijigü musa pehere tiquina yero saha ye dutierare tiqiro. ²² Sa yena panopu musa yerire duhu cāhña. Ti pjere ñañene yeducuna musa ijigü ti ñañe pehe musare dojomehnenonimedi. “Ñañene yena, quehnoano bucuenata”, ni tuhotuna ijiepenata ne bucuerari musa. ²³ Sa ye musa tuhotuyere quehnoañe pehere comesaro cahmene musare. ²⁴ Panopu musa ñañe yerire duhu cāhña. Sa yena quehnoañe pehere comesarina ijiya musa. Ohō saha ijiyequina Cohācjü yero saha ijire. Musa sa ijina, quehnoañene yeducunata. Sa yena ñañene yabinata musa.

²⁵ Sa yena musa ni mehorire duhu cāhña. Musa mehna cjēnare poto yahuya, ni mehono marieno. Mari ihcā pagu yero saha ihcā curua cjānata ijina niaja. Sa yena musa basi ni mehoedacāhña.

²⁶ Apequinare usuana, tiquinare ñano yeracāhña. Sa yena usuana, ne yoari pje usuaducueracāhña musa. ²⁷ Yoari pje

usuana, watīno tiqiro cahmeno saha yena niaga musa. Sa yeracāhña.

²⁸ Ihquēquina musa mehna cjāna Jesu yequina musa ijiato pano yaquerina ijina pari turi yaqueracāhña. Sa yena yojopure quehnoano dahraya pejecuoyequinare musa ohoatire.

²⁹ Ne ñano yahuducueracāhña. Quehnoañene yahuducuna apequinare yedohore musa. Sa yena quehnoañe dihitare yahuducuya. ³⁰ Ñañene yena Espiritu Santore bujua witigü yena niaga musa. Sa yeracāhña. Yojopure pihitiri deco pano Cristo marine tiqiro neato pano Espiritu Santo marine ihña ihbore marine ñañene ye dutieraro. Sa yero Cristo yequina mari ijiyere masigü yere tiqiro marine. Sa yena tiqirore bujua witigü yeracāhña.

³¹ Sa yena ne ñano ye nemoedacāhña. Usua, cahme duse tutua nemoedacāhña. Apequinare ñano ni sañuducu nemoedacāhña. Apequinare quiti dahre nemoedacāhña. Ne apequinare ñano ni tuhotu nemoedacāhña. ³² Sa ye musa mehna cjēnare quehnoano mehna quehnoano yeya. Cristo yequina musa ijigü ihñano musa ñañene bo cāhri Cohācjü. Ohō saha apequina musare tiquina ñano yegü ihñana tiquina ñañene bo cāhña musa gühu.

**“Cohācjü pohnene ohō saha ijiro
cahmene”, ni yahuahye Pablo**

5 Sa ye Cohācjü pohna tiqiro cahñona ijina Cohācjüre ihña cūña musa. ² Sa yena apequinare sa cahiducuya. Cristo marine cahño, mari ñañe buhiri yariahye. Sa yariaro Cohācjüre bucuégü yeahye tiqiro. Sa yena marine tiqiro cahīdiro saha musa gühu apequinare cahña.

³ Sa yena Cohācjü yequina ijina ne numia mehna ñano yeracāhña. Numia gühu umua mehna ñano yeracāhña. Apeye ñañene ohō saha ijiye

ñañene yeracãhña. Apee borore cahme yuhdueracãhña. Ne sa yeraro cahmene musare Cohãcjũ yequina ijina. ⁴Sa yena buoyere cahme yahuducueraro cahmene musare. Tũho masieñequina yero saha yahuducueraro cahmene musare. Sa yena ñano ni bujuperaro cahmene musare. Ahri pehere yero cahmene musare. Cohãcjũ mehna yahuducuro cahmene musare. Sa yahuducuna tiquirore “Quehnoano yeri muhũ usãre”, nino cahmene. ⁵Apee borore cahme yuhduana, “Cohãcjũ ijire”, mari niñe queoyere mari cahmeno saha yena niaja mari tire. Doeri cjẽne ño peoyequina yero saha yena niaja mari. Sa ye wũana tiyequina, ñañe dihitare tũhotuyequina, apee borore cahme yuhduayequina Cohãcjũ, Cristo mehna tiquina puhtoro ijiropũ ne wahasi tiquina. Tire quehnoano masiaja mari. ⁶Ohõ saha yeyequina tiquina yeri buhiri buhiri dahrerota Cohãcjũ tiquirore yuhduucayequinare. Sa yena apequina musare “Ahri ñañe ijierare”, tiquina ni mehogũ tũhoeracãhña. ⁷Sa yena ohõ saha ñano ye yuhduucayequinare ne piti tieracãhña.

⁸Cristo yequina musa ijiato pano sa ijinata ijimedi musa gũhũ. Yojoopũ pehere tiquiro yequina ijina, Cohãcjũre quehnoano masine musa. Cohãcjũ yequina quehnoañene yere. Sa yena sa yero cahmene musare. ⁹Sa yena Cristo yequina ijina quehnoañene, Cohãcjũ cahmeñene, ni mehono marieno yeducunata musa. ¹⁰Quehnoañene mari yegũ ihñano mari puhtoro Cristo bucuer. Sa yena tire yeya. ¹¹Cristore cahmeeñequina ñañe tiquina yeye ñañe waro ijire. Sa yena tiquina yero saha musa pehe yeracãhña. Quehnoañe buheyere Cristo yere yahuya tiquinare. Sa yena tiquina ñañe yeyere tiquinare

masigũ yeya. ¹²Masa ihñenopũ tiquina ñano ye cohere. Tiquina sa yerire yahuducuna mari buẽ tiboaga. Sa yeye ña yuhduaro yere tiquina. ¹³Sa yena tiquinare quehnoañe buheyere mari yahuna, ña yuhduayequina tiquina ijiyere masigũ yena niaja mari tiquinare. Ijipihtiye mari yerire marine masigũ yere quehnoañe buheye, buhrioro marine ti ihña masigũ yero sahata. ¹⁴Ti ijirota ijire. Sa ye ohõ saha ni yahure Cohãcjũ yere yahuyequina:

Ne, yuhũre tũho duena, tũhoya musa.
Musa ñañe yeyere bujua witi, tire duhuya. Cristo musa ñañe yeyere masigũ yerota, ni yahure.

¹⁵Sa yena decoripe quehnoano yeya musa. Tũho masieñequina yero saha ijieracãhña. Tũho masina ijiya. ¹⁶Yojoopũ cjẽna masa ña yuhduaro yeducure. Sa yena musa pehe quehnoañene, Cristo yere sa yeducuya musa. ¹⁷Sa yena tũho masiena ijieracãhña. Cohãcjũ cahmeñene quehnoano masiña. Sa yena tire yeya. ¹⁸Sa ye pairure sihni queheracãhña. Queheyequinare ñano yuhduaro cua yuhduare. Sa yena pairure tutuaro cahmedacãhña. Espĩritu Santo pehere tutuaro cahmeña musa mehna tiquiro quehnoano ijiatire. Tiquirore quehnoano yuhtiya. ¹⁹Sa yena musa basi Cohãcjũre ño peo basayere cahme yahuducuya. Sa yena Salmore Cohãcjũ yere basayere, apeye tiquirore ño peo basaye gũhũre tiquirore basa peoya musa. Quehnoano wacũ ño peoye mehna basa peoya. Sa yena mari puhtoro Cristore ño peoya. ²⁰Cohãcjũ mari Pacũ ijiipihtiye musare tiquiro ohorire bucue “Quehnoare”, sa niducuya musa tiquirore. Mari puhtoro Jesucristo yequina ijina mari Pacũre “Quehnoare”, sa niducuya musa.

**“Musa ihcã wũhu cãna Jesu
yequina ijina, ohõ saha yeya”,
ni yahuahye Pablo**

²¹ Sa ye musa mehna cjenare cahme ño peoye mehna yũhtiya. Sa cahme ño peo yũhtina Cristo gãhure ño peona nine musa.

²² Musa namosãnumiare yahutja yojopũre. Mari puhtoro Cristore mari yũhtiro saha musa manusũmuare quehnoano mehna yũhtina numia ijiya. ²³ Jesucristo marine yũhdũore tiquiro ya curua cãna mari ijiatire. Sa yero mari tiquiro ya curua cãna mari puhtoro tiquiro ijiro saha musa manusũmua musa namosãnumia puhtoa ijire. ²⁴ Sa yena Cristo yequina ijina tiquirore sa yũhtiducuaa mari. Sata musa namosãnumia musa manusũmuare quehnoano yũhtiducuna numia ijiya.

²⁵ Musa manusũmua pehere yahutja yojopũre. Cristo marine tiquiro yequinare cahĩno, mari ye ijiatire yariahye. Sa yena marine tiquiro cahĩdiro saha musa gãhu musa namosãnumiare quehnoano cahĩducuya. ²⁶ Cristo mari ye ijiatire yariahye mari ñaũe yerire cosero taro. Tiquiro buheye quehnoañe buheye mehna mari ñaũe yeyere cosere. Sa yero tiquiro yequina mari ijigũ ihũano aco mehna marine wame yere. ²⁷ Sa cosere marine tiquiro yequina ijianare yero taro. Tiquiro sa cosegũ ne ñaũe buhiri mariena ijinata, tiquiro ihũagũ. Sa yena quehnoana, Cristo yero saha ijinata. ²⁸ Musa namosãnumiare cahĩna, musa basi musa pagũre musa cahĩno saha tiquina numiare cahĩña. Mari namonore cahĩna mari pagũre cahĩna niaja.

²⁹⁻³⁰ Ne mari pagũre ñano wahagũ cahmedaja. Mari ihyayere ihyana quehnoano yena niaja mari pagũre. Cristo yequina ijina tiquiro pagũ yero

saha tiquiro ya curua cãna ijiaja mari. Sa yero marine quehnoano yere tiquiro. Sa yena Cristo marine tiquiro quehnoano yeriro sahata mari gãhu mari pagũre quehnoano yeaja. Mari namosãnumia gãhure sata quehnoano yero cahmene marine. ³¹ Sata nine Cohãcjũ yere tiquina ojoari pũpũ: “Sa ye umũno tiquiro pacũsumũare wijiario tiquiro namono mehna ijirota. Sa ye tiquina pũaro ijiepetã ihcãquiro yero saha ijietã”, ni ojoahye panopũ. ³² Ahri tiquiro ojoarire apequina quehnoano tuhoerari jiri. Sa yegũ tire ohõ saha ni yahutja musare. Ohõ saha ni yahuro niaga. “Cristo tiquiro yequina mehna ihcã pagũ yero saha ihcã curuata ijire”, ni yahuro niaga. ³³ Sa yegũ musare ohõ saha ni yahu nemoutja tja: Musa pagũre musa cahĩno saha musa namosãnumiare cahĩña. Sa yena musa manusũmuare quehnoano ño peoya musa.

6 Yojopũre macanagãre yahutja. Mari puhtoro Cristo yequina ijina musa pacũsumũare quehnoano yũhtiya. Musa sa yegũ quehnoarĩne. ²⁻³ Ohõ saha niahye Cohãcjũ dutiye: “Musa pacũsumũare quehnoano ño peoya”, ni dutiahye tiquiro. Ahri dutiro mehna Cohãcjũ yahu nemoahye. Ohõ saha niahye: “Musa pacũsumũare ño peona, ahri yehpapũ yoari pje bucueye mehna ijinata musa”, ni yahuahye. Tiquiro sa ni yahugũ ahri dutiro ihyo ijiri dutiro ijierare. Sa yena tiquiro nidiro saha musa pacũsumũare ño peoya.

⁴ Yojopũre tiquina pacũsumũare yahutja: Musa pohmare sa tuhtiducuer-acãhña, “Usuagũ yeari”, nina. Mari puhtoro Cristo tiquiro cahĩne mehna tiquiro yedohoye mehna tiquinare quehnoano cohteya. Sa yena tiquinare quehnoano yahuya.

⁵ Yojopũre cahacãanare musare yahutja: Cua pesaro mehna, ño peoye

mehna ahri yehpa cjênare mûsa puhtoare quehnoano yuhtiya. Ni mehono marieno quehnoano yuhtiya. Cristore mûsa yuhtiyo sahata tiquinare yuhtiya mûsa.

⁶Tiquina ihñono dihitare yuhtina ijieracãhña. Sa yeyequina masa dihitare tiquinare ihña bucuegũ cahmene. Mûsa pehe Cristo tiquiro cahacjãna mûsa ijiro saha mûsa puhtoa gũhure sa yuhtiducuya. Cohãcjũ tiquiro cahmeno sahata quehnoano bucueye mehna yuhtiya. ⁷Sa yena Cristore yuhtina mûsa ijiro saha bucueye mehna yuhtiya mûsa puhtoa gũhure. “Masa dihitare yuhtina niaja”, ni tuhoteracãhña. ⁸Sa yena ahrire wacũña: Ijipihtina quehnoañene mari yegũ ihñano Cohãcjũ quehnoano yerota marine. Cahacjênare, cahacjêna ijieyequina gũhure quehnoano yerota.

⁹Yojopure puhtoare yahutja: Mûsa cahacjênare quehnoano yeya. Tiquinare quehnoano yuhũ ye dutiriro sahata yeya mûsa gũhu tiquinare. Tiquinare tuhtiperacãhña. Æhmuse cjũno Cohãcjũ potota tiquina puhtoro ijire. Mûsa yaquiro puhtoro ijire tiquiro gũhu. Sa yena ijipihtina mûsa tiquiro cahacjãna dihita ijire. Sa yero tiquiro ihcãno saha ihñare mûsare ijipihtinare. Sa yena mûsa cahacjênare tuhtiperacãhña.

Cristo yequina watĩnore tiquina cahmotarire yahuahye Pablo

¹⁰Ahrire yahu bato tiitja mûsare: Quehnoano wacũ tutuana ijiya mûsa. Mari puhtoro Cristo mûsa mehna ijire. Sa yena tiquiro ye masiñe mehna wacũ tutuana ijiya. ¹¹Watĩno marine ni mehono, ñano ye dutire marine. Cohãcjũ marine cahmotare mari ñañene yeborire. Marine tiquiro cahmotaye surara tiquiro cahmotari suhtiro, come suhtiro yero saha ijire. Sa yena ti suhtirore mûsa sañano saha Cohãcjũ tiquiro cahmo-

tayere quehnoano cœo pehoya. ¹²Jesu yequina mari ijigũ, marine ihña tuhtiyequina masa waro ijierare. Æhmuse cjêna ijimediquina ñañequina, tutuayequina, tiquina pehe ijire marine ihña tuhtiyequina. Watĩa ahri yehpa cjêna puhtoa ijire. Sa ye tiquina gũhu ijire marine Jesu yequinare ihña tuhtiyequina.

¹³Sa yena yojopure cahmotari suhtirore mûsa sañano saha Cohãcjũ mûsare tiquiro cahmotatire tiquiro yere quehnoano cœo pehoya. Sa yena watĩno mûsare tiquiro ñano ye dutigũ, mûsare tiquiro ñano ye duagũ, tiquirore cahmotanata. Sa yena yuhduducanata. Sa tiquirore yuhduducana, tutuana tojoanata mûsa.

¹⁴Sa yena tutuana ijiya. Cohãcjũ mûsare tiquiro cahmotatire ohõ saha yeya mûsa:

Surara tiquiro come suhtiro mehna tiquiro jeripohnare cahmotariro saha pota yahuyere Cohãcjũ yere quehnoano tuhoya mûsa watĩnore mûsa cahmotatire. Sa yena Cristo yedohoye mehna quehnoana ijiya mûsa, watĩnore mûsa quehnoano cahmotatire.

¹⁵Surara tiquiro dahpo suhti mehna tiquiro dahpocãrine tiquiro cahmotariro saha quehnoañe buheyere quehnoano masiña mûsa, watĩnore mûsa cahmotatire. Ti buheye marine quehnoano ijigũ yere.

¹⁶Surara tiquiro tohoriro mehna tiquiro cahmotariro saha Cristore quehnoano wacũ tutuaducuya mûsa watĩnore mûsa cahmotatire. Bueye cjũ mehna tiquiro sihã mûsare tiquiro bũedoqueboro saha watĩno mûsare ñano yegũ ye duare. Sa yena Cristore quehnoano wacũ tuana, cahmotanata mûsa.

¹⁷Surara tiquiro come sapea mehna tiquiro dapure cahmotariro saha mûsare pecapũ wahaborinare Cristo yuhduorina ijiya mûsa, watĩnore mûsa cahmotatire.

Surara tiqiro ñoseni pji mehna tiqiro cahmotariro saha Cohãcjũ ye buheyere quehnoano masiña msa, quehnoano msa cahmotatire. Sa yena apeqinare quehnoano yahuya tiqiro yere. Ti Cohãcjũ ye buheyere Espiritu Santo marine yahure.

¹⁸ Sa msa watinore cahmotana Cohãcjũre decoripe sa siniducuya. Espiritu Santo yedohoye mehna sa siniducuya. Sa yena quehnoano wacũ masiña. Sa sinina, caributieracãhña. Ijipihtiequina Cohãcjũ yequinare sa sini basaducuya.

¹⁹ Sa yena yũhũ gãhũre sini basaya Cohãcjũre. Ohõ saha ni sini basaya: Quehnoãne buheyere, panopũ tiquina masiedarire quehnoano yũhũ yahuatire sini basaya yũhũre. Sa yena cuero marieno yũhũ yahuatire sini basaya yũhũre. ²⁰ Cristo tiqiro yere yahu dutiro yũhũre ohori. Yũhũ sa yahuri buhiri peresupũ ijiaya yojopũre. Ohõpũ yũhũ

ijiepegũta cuero marieno tiqiro yere yũhũ yahuatire sini basaya yũhũre. Tiqiro yere yahuacjũ ijigũta niaja yũhũ.

Pablo quehnoa duti bato tiahye

²¹ Yojopũre Tiquico msa cahapũ esaro yũhũ ijiye tiyere msare yahu pehorota. Tiqiro mari acayũro mari cahĩniqiro ijire. Sa yero mari pũhtoro yere quehnoano yedohoriquiro sa ijiducure. ²² Usã ijiye tiyere msare yahu dutigũ tiqirore ohogũ niaja msa quehnoano bucueatire.

²³ Cohãcjũ mari Pacũ mari pũhtoro Jesucristo gãhũ tiquina mehna msa ijipihtinare usã acayere quehnoa dutiaja. Cristore msa quehnoano wacũ tutuaye mehna msa cahme cahĩatire Cohãcjũre sini basaja msare. ²⁴ Ijipihtiequina mari pũhtoro Jesucristore sa cahĩducuyequinare Cohãcjũ mehna quehnoa dutiaja.

Filipenses

Peresupũ ijiriquiro ahri pũre ojoa ohoahye Pablo

1 Yũhu Pablo, Timoteo mehna Jesucristo cahacjãna ijiaja usã. Sa yena ijipihtinare musare quehnoanare Jesucristo yequinare Filipo cjãnare quehnoa dutiaja usã. Musare, musa puhtoã gũhure, musare yedohoyequina gũhure ojoa ohoaja yũhu, Pablo. ²Sa yena Cohãcjũ mari Pacu, mari puhtoro Jesucristo mehna musare quehnoa dutiaja. Tiquina yedohoye mehna quehnoano ijiya musa.

Pablo Jesu yequinare Cohãcjũre sini basahye

³⁻⁶Cohãcjũ musare quehnoañe pehere comesagũ yero nine. Sa yero musare tiquiro sa ye dũcariro sahata sohtori dahrerota tiquiro. Sa yena Jesucristo ahri yehpapure tiquiro wi-higũpũre ñãñe mariena ijinata musa. Sa yena coã waropure Jesu yequina musa ijiri bato, yojopũ gũhure yedohore musa yũhure quehnoañe buheyere yũhu buhegũ. Musa sa yegũ ihãagu Cohãcjũre “Quehnoare”, niaja yũhu. Musare wacũgũ sa dihita niaja yũhu. Musare Cohãcjũre sini basagu, bucueye mehna sini basaja.

⁷Musare yũhu sa tuhutugũ quehnoañe. Quehnoañe buheyere “Poto tjire”, puhtoare yũhu tutuaro ni yahuducugũ musa yũhure yedohori. Poto ti buheye ijigũ yũhu tiquinare yahugũ musa yũhure yedohori. Peresupũ yũhu ijigũ gũhure musa yũhure yedohori. Sa yero Cohãcjũ marine quehnoano yero, tiquiro ye buheyere cũri marine. Musa yũhure yedohori. Sa yena ti buheyere yũhu mehna musa buheboriro saha yena

nine musa, yũhure yedohona. Sa yegu yũhu jeripohna mehna tutuaro wacũaja yũhu musare. ⁸Jesucristo cahĩñe mehna tutuaro musare wacũaja yũhu. Yũhu sa wacũgũ Cohãcjũ tire masine.

⁹Musare ohõ saha ni sini basaja yũhu Cohãcjũre: Cohãcjũ yere quehnoano masiñe mehna, tuho masi pehoye mehna apequinare musa cahĩ nemoatire sini basaja yũhu musare Cohãcjũre. ¹⁰Quehnoa yũhdũyere musa masiati gũhure sini basaja musare. Musa sa masina Cristo ahri yehpapũ tiquiro tojoa tagũ quehnoañene yena, ñãñe buhiri mariena ijinata musa. ¹¹Sa yena ijina Cohãcjũ cahmeñene yenata musa. Musare sa yegũ yerota Jesucristo pehe. Cohãcjũ quehnoa yũhduariquiro, tutuariquiro tiquiro ijiyere ihñono taro, ijipihtiyequina tiquirore tiquina ño peoatire tiquiro cahmeñene musare yegũ yerota.

Pablo Cristo yaquiro tiquiro ijiyere tiyere yahuahye

¹²Yũhu acaye, ahri yũhu niatire musa quehnoano masigũ cahmeaja yũhu. Yojoapure peresupũ yũhu ijiepegũta quehnoañe buheye pehe sa uhmũ tãducuro nine. ¹³Sa ye Cristo yaquiro yũhu ijiri buhiri peresupũ yũhu ijiyere masi pihtire puhtoro ya wũhu cjẽna surara. Ijipihtiyequina apequina gũhu ohõpũ ijiyequina tire masine. ¹⁴Sa ye peresupũ yũhu ijigũ ihãañe, peyequina mari acaye Jesu yequina mari puhtoro Jesure wacũ tutua nemoñe nine. Sa wacũ tutuaye, cuero marieno quehnoañe buheyere apequinare buhere tiquina.

¹⁵Ihquẽquina Cristo yere buheraboriquina ijiepetã yũhure ihña cooye, Cristo yere buhere apequinare tiquinare ihña wahãgũ cahmeñe. Apequina pehe quehnoano mehna Cristo yere buhere. ¹⁶⁻¹⁷Quehnoañe buheyere yũhu tutuaro

yahuatire Cohācjū yuhure tiquiro cūrire quehnoano masine ahriquina pehe. Sa masiñe tiquina cahñe mehna Cristo yere buhere. Apequina pehe yuhure ihña tuhtiyē, masare tiquina pehere tiquina ihña wahāgū cahmeñe, Cristo yere buhere. Sa ye peresupū yuhū ijigū tiquina yuhure bujua witiḡū ye duare. ¹⁸Quehnoanta. Cristo yereta buheye nine. Tiquina Cristore potō cahñedapeta Cristo yereta buhere. Apequina pehe quehnoano mehna buhere. Ijipihtiyequina tiquina tiquiro yere buheḡū bucueaja.

¹⁹Sa yegū sa bucueducugutja yuhū. Cohācjūre musa sini basari mehna Jesucristo yaquiro Espiritu yedohoye mehna Cohācjū yuhure wiorota peresupū ijirigūre. Tire masiaja. ²⁰Ohō saha yeitja yuhū. Decoripe yuhū yeriro sahata yojopū ḡuhure cuero marieno Cristo yere buheaja, masa tiquirore quehnoano tiquina ño peoato saha. Ohō saha ye duaja yuhū yerire yuhū buoro yuhduerato saha. Catinigū waro ohō saha ye duaja. Tiquina yuhure wejē duepegūta ohō saha ye duaja. ²¹Catinigū Cristo yere yenigutja. Yariagupū pūrita ti yuhduoro quehnoano tojoagutja yuhū.

²²Sa niepegūta catinigū Cristo yere yuhū ye nemoato saha cati nemo duaja. Sa niepegūta yariaye ḡuhure cahmeaja. ¿Dise boro pehere yuhū cahmeboagari? Masiedaja yuhū. ²³Yuhū ohō saha ni yahuducugū mijorine yuhure. Cristo mehna tutuaro iji duaja. Sa yegū yojopūre tiquiro cahapū waha duaja. Catiye yuhduoro ahri pehe quehnoa yuhduḡucare. ²⁴Sa ijiepegūta musare yuhū yedohoato saha catinino cahmene yuhure. ²⁵Tire masigū ohōpū musa mehna yuhū ijiniatire masiaja yuhū. Sa ijinigutja Cristore musa wacū tutua nemoatire, ti wacū tutuaye mehna musa bucueatire. ²⁶Ahri yehpapū ijinigū musa cahapū pari turi yuhū wahāḡū

musa bucuenata. Cristo Jesu yuhure tiquiro yedohogū masina, “Tutuagū ijire mūhū”, ni ño peonata musa tiquirore.

²⁷Yojopūre ahri dihitare yahutja musare. Cristo ye buheye ti nidiro sahata ijiducuya musa. Wacū tutuana ijiya. Sa yena cahme tu waro marieno qjehnoañe buheyere yahu tutuaya. Sata yuhū mariedagū ḡuhure yuhū ijigū ḡuhure musa yegū cahmeaja. Sa ijina musa ijigū tuhoo duaja yuhū. ²⁸Musare ihña tuhtiyequinare cueracāhña. Musa sa cueragū ihñañe Cohācjū yequina musa ijigū masieta tiquina. Sa masiñe pecapū tiquina wahati ḡuhure masieta. Sa ye Cohācjū musare tiquiro yuhduoati ḡuhure masieta. Ohō saha masigū yere Cohācjū masare. ²⁹Cristore musa wacū tutuatire Cohācjū cūri. Ahri ḡuhure cūri. Cristo yere musa yeri buhiri musa ñano yuhduati ḡuhure cūri Cohācjū. ³⁰Sa ye Cristo yequina musa ijiri buhiri apequina musare ñano yere. Musare tiquina yeriro saha yuhū ḡuhure ñano yere tiquina. Musa mehna yuhū ijigū yuhure tiquina sa yegū ihñari musa. Yojopū ḡuhure yuhure tiquina sa yegū tuhoore musa. Sa yena mari ihcāno saha ñano yuhduaja.

**Cristo ihyo ijiriquiro
sajāno, ijipihtiyequina
puhtoro ijiatiquiro ijiahye**

2¹⁻²Cristo musare quehnoano jeripohna tigū tiquiro yegū, Cristo tiquiro cahñe mehna musa bucuena, yuhure quehnoano bucuēḡū yeya musa. Sa yena Espiritu Santo ijipihtina musa mehna tiquiro ijigū apequinare cahña, paja ihñana ijina, yuhure quehnoano bucuēḡū yeya musa. Ahrire musa yegū bucuēitja: Ihcāno mehna quehnoano jeripohna tiya musa. Sa yena musa basi cahme cahña. Quehnoano mehna ijiducuya. Sa yena ihcāno mehna quehnoano ijiya.

³Apequinare yuhduduca dueracāhña. Sa yena sa tūhotu cāhña mūsa. Sa yena apequinare quehnoano ño peo, ohō saha ni tūhotuya: “Tiquina pehe yuhū yuhduoro quehnoañequina ijire”, ni tūhotuya. ⁴Ihcāquiro apequinare yedoho dueraboaga. Tiquiro yero saha yeracāhña. Apequina gūhure yedohoya.

⁵Cristo Jesu apequinare yuhduduca dueriquiro tiquiro ijiro saha mūsa gūhū apequinare yuhduduca dueracāhña. ⁶Tiquiro pehe Cohācjū waro ijieperota “Cohācjū mehna ihcāno saha ijigu wijiasi yuhū”, ni tūhotuerahye tiquiro. ⁷Sa yero tiquiro Cohācjū mehna ihcāno saha tiquiro ijiyere wijia, ohōpū ahtaro masunota masa bajuaro tiquiro cahacjūno yero saha iji dūcahye. ⁸Sa yero tiquiro masuno ihcāno saha pagū tiriquire ijiro, ihyo ijiriquiro waro wahahye. Sa waharo “Curapū wejēña tiquirore”, tiquina nigū tiquiro yuhduducaerahye. Curapū yariatiquiro ijieperota tiquiro yuhduducaerahye. ⁹Sa yero mari Pacu ijipihtiequina tiquina ño peoatiquirore cūahye Jesure. Sa yero ijipihtiequina apequina puhtoro sōahye Cohācjū tiquirore, ¹⁰ijipihtiequina ūhmūse cjēna, ahri yehpa cjēna, yariariquina gūhū Jesu wamene tūhoyequina tiquina dūsepe curi mehna quehe sa, tiquina ño peoato saha. ¹¹Sa puhtoro sōahye tiquirore mari Pacu, “Jesucristo mari puhtoro ijire”, ijipihtiequina tiquina niatiquirore. Sa niñe Cohācjūre mari Pacure ño peoye nine.

**Cristo yequina buhrioro yero
saha ijie, quehnoano
masare yahu, masigū yere**

¹²Sa yena yuhū cahīna, mūsa mehna yuhū ijigū mūsa yūhtiducuriro saha, yojopū yuhū yoaropū ijigū gūhūre panopū mūsa yūhtiriro yuhduoro yūhtiya yuhure. Sa yena ijipihitina mūsa

quehnoana ijina tana Cristo yedohoro mehna ñañene yeracāhña. Sa yena ño peoye mehna apepero marieno Cohācjū yere yeya. ¹³Cohācjū quehnoañe pehere mū sare cahmegū yero nine tiquiro cahmeno saha mūsa yeato saha. Sa yero tire mūsa yeatire yedohorota Cohācjū. Tiquiro sa yedohogū ti yuhū nidiro saha yeya mūsa.

¹⁴Ijipihtiyere yena tuhtiro marieno, mūsa basi unureno marieno yeya. ¹⁵Sa yeya mūsa ñañe buhiri mariena, ñañene yerarina Cohācjū pohna mūsa ijiatire. Sa yeya mūsa masa ni mehoñequina, ñañequina watoapū dojomehnenno marieno mūsa ijiatore saha. Tiquina ñañequina watoapū ijina, buhrioro ihña masigū yero saha quehnoañe buheyere buhena, masigū yere mūsa ahri yehpa cjēnare. ¹⁶Ti buheyere mūsa tūho ñehedi bato Cohācjū mehna sa ijiducuaana wahari mūsa. Ti buheyere ahri yehpa cjēna pehere mūsa sa buhegū ihñagu mūsa mehna bucuetija. Sa yegu mū sare yuhū buherire “Ihyo waro buherari ijii yuhū”, niitja yuhū. Sa yegu Cristo ahri yehpapū tiquiro tojoa tagū mūsa mehna bucuetija. Sa yegu buoro yuhdusi yuhū. ¹⁷Cristore mūsa wacū tutuagū Cohācjū mūsa mehna bucuero. Tiquiro sa bucuegū masigu mū sare Cristo yere yuhū buheri buhiri yuhure tiquina wejē duepegūta bucuetija. Sa yena mari ijipihitina ihcāno saha bucuenata. ¹⁸Sata mūsa gūhure bucuero cahmene yuhū mehna, came yuhū sa yariagū ihñana.

**Timoteore, Epafrodito
gūhure yahuahye Pablo**

¹⁹Mari puhtoro Jesu tiquiro cahmegū sojaro mehna Timoteore mūsa cahapū oho duaja yuhū mūsa ijie tiyere masigu tūhū. Sa masigu bucuetija. ²⁰Ijirota ijire. Timoteo mūsa quehnoano ijiatire pajiro tūhoture mū sare. Apequiro tiquiro yero saha ijiriquiro mariedare yuhū

mehna. ²¹ Apequina pehe ijipihitiyequina tiquina cahmeñe dihitare ye duaye, Cristo Jesu tiquiro cahmeñe pehere ye duerare. ²² Timoteo pehe quehnoano yeriquiro tiquiro ijiyere masine musa. Yuhũ macũ yero saha tiquiro yuhũ mehna quehnoañe buheyere yahue tiri. Sa yena usã ihcãno saha Cristo yere buhee tii. ²³ Sa yegũ puhtoahũ yuhũre tiquina duhse yeatire masigũ, Timoteore musa cahapũ oho duaja. ²⁴ Sa yegũ mari puhtoro Jesu yedohoye mehna sojaro mehna yuhũ gũhũ musa cahapũ wahautja.

²⁵⁻²⁶ Yuhũre yedoho dutina musa Epafroditore ohori yuhũ cahapũ. Tiquiro yuhũ acayũro yuhũ mehna dahrariquiro, yuhũ mehna cjũno, Cohãcjũ yere buhe tutuariquiro ijire. Tiquiro musare tutuaro wacũe tiri. Sa yero tiquiro dohatirire musa tuhogũ masino tiquiro pehe pajiro bujua witi tuhuturi. Sa pajiro tiquiro tuhutugũ ihñagũ “Tiquirore musa cahapũ oho majare tojoro cahmene yuhũre”, ni tuhutuaja yuhũ yojopũre. ²⁷ Potota ijire. Tiquiro tutuaro dohatiri. Mehenoyariabo cure yuhũdũri. Tiquiro sa tutuaro dohatiepegãta Cohãcjũ tiquirore paja ihñano, yuhũdũgũ yeri. Tiquiro yariagũ yuhũ pehe tutuaro bujua witiboya. Sa yero Cohãcjũ yuhũ gũhũre paja ihñari tiquirore yuhũdũgũ yero. ²⁸ Sa yegũ yojopũ pũritare sojaro mehna tiquirore musa cahapũ oho duaja parituri musa tiquirore ihña, musa jeri sajãno quehnoano. Musa sa bucuegũ ihñagũ yuhũ gũhũ bucueitja. ²⁹ Sa yena tiquirore Epafroditore mari puhtoro yaquirore mari acayũrore quehnoano bucueye mehna piti caya. Sa yena apequinare tiquiro yero saha ijiyequinare ño peoya. ³⁰ Tiquiro Cristo yere yedohomehno yariamedi. Musa pehe yuhũ cahapũ ijieragũ, yuhũre

yedoho masiedagũ tiquiro pehe yuhũre yedohomedi. Sa yero yariamedi tiquiro.

Quehnoano yeye warore yahuahye Pablo

3 Yojopũ pũritare ahrire yahutja. Mari puhtoro yequina ijina bucueya. Ahri buheyere to pano yuhũ yahurire parituri musare ni ojoagũ bucueaja yuhũ. Sa yegũ musare ahrire yahugũ yedohogũ niaja musare. ² Quehnoano yeya musa. Ñañene yeducuyequina, diayea yero saha ijiyequina ñañequina cuhnucunũ cahserogãre yuhre ne dutiye, musa pagurire yuhre ne duare. Quehnoano yeya musa, “Sa ye dutiyequina sijoro saha ni buheari”, nina. ³ Tiquina cuhnucunũ cahserogãre yuhre nepeta Cohãcjũ dutiyere quehnoano yerare. Mari pehe potota Cohãcjũ dutiyere quehnoano yena ijiaja mari. Espiritu Santo tiquiro yedohoye mehna Cohãcjũre ño peoaja mari. Sa yena Jesu yequina mari ijiyere bucueye mehna apequinare mari yahuaja. “Usã esa tuharo Cohãcjũ dutiyere ye peho masi-aja”, ne ni tuhotueraja. ⁴ Sa ni tuhotuerapeguta “Tiquinare doca cũ cjã”, tiquina yero saha nidigũ ijigũ sa tjiboa yuhũ gũhũ. Apequiro ohõ saha ni yuhũdũdũca duare. Yuhũ pehe tiquiro yuhũduoro sa niboaga yuhũ.

⁵ Ohõ saha yerigũ ijimi yuhũ: Ocho decori yuhũ masa bajuari bato cuhnucunũ cahserogãre yuhre nedi jiri yuhũre. Israe masũ ijigũ Benjami ya curua cjũ ijiaja yuhũ. Yuhũ pacusumua hebreo masa tiquina ijigũ potota hebreo masũ warota masa bajuũ. Cohãcjũ dutiyere potota peho duagũ fariseo curua mehna sajãmi yuhũ. ⁶ “Cohãcjũ ye ijiri”, nigũ quehnoano yemi. Sa yegũ Jesu yequina pehere ñano yee timi yuhũ. Potota Cohãcjũ dutiyere yegũ tire yuhũdũdũcaro marieno ye pehou.

⁷Panopure “Ti quehnoañe ijiri”, ni tuhutumí. “Ti yuhu sa ni tuhaturi panopu yuhu ijie tiri duhseati ijierari”, ni tuhoutuaja yojopure. Sa ni tuhoutu ducáu yuhu Cristore wacū tutuagu tuhū. ⁸Cristo Jesu yuhu puhtorore yuhu masigū pūrta quehnoa yuhduare. Sa yegu apeye pehere masa “Quehnoañe ijire”, tiquina nidire “Ti ijipihtiyere duhseati ijierari”, ni tuhoutuaja yuhu. Tire ijipihtiyere duhu cūhu Cristo ye pehere yegu tuhū. Sa yegu tire yuhu cohārire “Ñañe waro ijire”, ni tuhottuu Cristore quehnoano masigū tuhū, tiquiuro mehna cjū ijigū tuhū. ⁹Sa yero yuhu esa tuharo quehnoano yuhu yeri wapa “Quehnoagu ijire”, ni ihñedare Cohācjū yuhure. Sa yero Cohācjū dutiye Moiseretiquiuro cūrire yuhu yeri wapa gūhure “Quehnoagu ijire”, ni ihñedare. Cristore yuhu wacū tutuari bato “Quehnoagu ijire”, ni ihñare tiquiuro yuhure. Cohācjū pehe marine buhiri mariena ijigū yere, tiquiore mari wacū tutuagū. ¹⁰Sa yegu to pano yuhu ni tuhottu mūhtamedire duhu cjā Cristore quehnoano masigū tuhū. Cohācjū tutuaye mehna Cristo masa mūjahye. Ti tutuaye mehna iji duaja. Sa yegu ti tutuaye mehna quehnoañene ye duaja. Cristo curusapu yariahye mari ñañe yerire cohāno taro. Sa yegu tiquiuro yere yuhu yeri buhiri tiquiuro yero saha ñano yuhdu duaja yuhu gūhu. ¹¹Sa yegu Cristo tiquiuro masa mūjariro sahata masa mūjacū ijitja yuhu gūhu.

¹²Ahri ijipihtiyere sa nigu, “Cristo yero saha ñañe mariegu ijijaja”, ni tuhottueraja. Yuhu sa ni tuhottuerapegūta Cristo tiquiuro yaquiuro ijigū ye tuhasari yuhure. Sa yegu tiquiuro yere tiquiuro gūhure quehnoano masi duagu tutuaro mehna tiquiuro yere yeaja yuhu. ¹³Yuhu acaye, “Tiquiurore quehnoano masi peho tuhasaja”, ni tuhottueraja.

Sa ni tuhottuerapegūta ahri pūritare yeaja: ¹⁴Omaperiquiro tiquiuro wapata duariro saha tutuaro yeaja yuhu, yuhu wapatarire yuhu ñeheato saha. Cristo yaquiuro yuhu ijigū ihñano Cohācjū ti yuhu wapatarire yuhure ohoro taro uhmusepū pijiori yuhure.

¹⁵Ohō saha yuhu tuhotturiro sahata tuhottuya masa gūhu Cristore quehnoano masina. Sa yero ahri musare yuhu yahurire masa tuho dueragū, sijoro saha masa tuhottugū Cohācjū musare quehnoano masigū yerota. ¹⁶Sa yena tiquiuro yere mari masidire quehnoano ye sohtori tiihna.

¹⁷Yuhu acaye, masa ijipihtina yuhure ihñā cūñā. Sa yena apequina usā yero saha yeyequinare quehnoano ihñā diho cūñā masa tiquinare masa ihñā cūato saha. ¹⁸Peye tahari apequina tiquina ijiye tiyere yahuu yuhu musare. Yojoopū gūhure tutuaro bujūa witigu tiquinareta yahuaja musare. Tiquina Cristo curusapu tiquiuro yariari buheyere ihñā yabiyequina ijire. ¹⁹Tiquina pecapu wahatiquina ijire. Tiquina ñañe tutuaro cahmeñe pehere tutuaro ye duare tiquina. Sa ye tiquina bue tiboyere yeye, tire quehnoañe yero saha tuhotture tiquina. Ahri yehpa cjē dihitare quehnoano tuhotture tiquina. ²⁰Mari pehere mari ya maca uhmusepū ijire. Sa yero topūta marine yuhduoatiquiro, mari puhtoro Jesucristo ahtarota. Sa yena tiquiuro ahtatire cohtena niaja mari. ²¹Tiquiro ahtarō mari pagurire pejecuoye pagurire sijoro saha ijiye paguri dihita comesarota tiquiuro. Sa yero tiquiuro ya pagū yero saha quehnoari pagure asi siteri pagure ohorota marine tiquiuro tutuaye mehna. Ijipihtiyequina puhtoro sajāri tiquiuro, tiquiuro tutuaye mehna. Sa yero ijipihtiyere upūro ijire tiquiuro ti tutuaye mehna.

Decoripe mari puhtoro mehna bucueya

4 Sa yena yuhu acaye, yuhu cahina, tutuaro yuhu wacuna, yuhure bucuegu yena, yuhu buhegu quehnoano tuhoriga, panopu musa wacu tutuariro saha mari puhtoro tutuaro wacu tutuaya musa.

²Ahrire yahutja musare Evodiare, Sintique guhure: Jesu yequina numia ijire musa. Sa yena cahme duse tutuaro marieno quehnoano mehna ijiducuya musa. ³Muhu pehe potota yuhu mehna cu ju warota ijire. Muhu guhure yahutja: Tiquina numia yuhu mehna, Clemente mehna, apequina yuhu piti tiyequina mehna dahrari quehnoane buheyere usa buhegu. Cohacju tiquinare ijipihiyequina wamene oja ohohaye tiqiro ya tju. Ijipihiyecori catiyere tiqiro ohoriquina wamene tiqiro oja ohori tju oja ohohaye. Sa yegu tiquina numiare bosaya muhu.

⁴Decoripe mari puhtoro mehna bucueya. Pari turita yahutja: Bucueya.

⁵Quehnoano yeya ijipihiyequinare. Mari puhtoro Cristo ahtato mehenoga dhsare.

⁶Ne buja witi tuhouteracahna. Cohacjare quehnoano yahu pehoya. Sa yena tiqirore siniha. Sa yena musa sinidire tiqiro yuhutig ihana "Quehnoare", niha tiqirore. ⁷Musa sa yegu quehnoano ijigu yerota musare Cohacju. Tiqiro sa yegu quehnoa yuhduare. Ahri mari quehnoano ijiye quehnoa yuhduare. Sa yero Cristo Jesu yequina mari ijigu marine quehnoano ijigu yero, Cohacju marine quehnoano jeripohna tigu yerota. Sa yero buja witi tuhouteragu yerota marine.

Quehnoane tuhoriga

⁸Ahrire yahu bato tigu tuu niha musare, yuhu acaye. Queoro ijiyere, masa tiquina no peoyere, quehnoano

yeyere, nane marieene, bucueyere, masa "Quehnoane ijire", tiquina niene tuhoriga musa. Quehnoa yuhduye ijigu tireta tuhoriga. Masa quehnoane ihane tiquina bucueyere pehere musa guhu bucue tuhoriga.

⁹Musare yuhu buheriro saha sa yeducuya musa. Sa yena yuhure ihana cuna musa. Musa sa yegu Cohacju musare quehnoano ijigu yeriquiro musa mehna ijigota.

Filipo cuna Pablore tiquina ohorire yahuhaye tiqiro

¹⁰Yojopu purita yoari pje bato musa pari turi yuhure wacuna, musa yedohoyere bucueaja. Sa bucuegu mari puhtoro Cristore "Quehnoare", niha. "Yuhure boaa wahari musa", niedaja yuhu. Panopure yuhure yedoho duepenata yedoho masiedari musa.

¹¹Yuhure musa yedohorire yahugu yuhure dhsarire musare yahu tuu niedaja. Musare apee borore cahmegu sa nigu niedaja. Yuhu cuoye mehna iji masiaja yuhu. ¹²Apee boro cueragu guhu quehnoano iji masiaja yuhu. Sa yegu pajiro cuogu guhu quehnoano iji masiaja. Decoripe uja ahbagu guhu ducapoa wahaja. Yapigu ijigu guhu ijipoa wahaja. Pajiro cuogu guhu ijipoa wahaja. Yuhure apee boro mariedagu guhure ijipoa wahaja. ¹³Cristo yuhure tutuagu yeriquiro mehna ijipihiyere Cohacju cahmeene ye masi pehoaja yuhu. ¹⁴Yuhu sa ijiporigu yuhu ijiepeguta yuhu nana yuhdugu musa yedohona yuhure quehnoano yeri musa.

¹⁵Quehnoane buheyere yuhu buhe ducagu Macedonia yehpau musa ya yehpau ijirigu yuhu wahagu musa dihita yuhure yedohori. Sa yedohona, musare yuhu buheri wapa musa wapa yero saha yena nidi musa. ¹⁶Sa yena Tesalonicapu yuhu ijiri watoa yuhure yedohona, ihu tahari ohori musa.

¹⁷ Apee borore sinigu sa nigu niedaja. Apequinare musa yedohogũ Cohãcjũ musare quehnoano yerota. Tiquirore musa yedohori wapa Cohãcjũ musare tiquiro quehnoano yegũ cahmeaja yũhũ. Sa yegũ yũhure musa yedohorire wacũgũ yeaja musare. ¹⁸ Yojopũre yũhure quehnoano oho pehori musa. Yũhũ cahmedi yũhũoro ohori musa yũhure. Yũhure Epafrodito mehna musa ohori bato apee boro ne dũhsaerare yũhure. Cohãcjũ wũhũpũ ehme sitiye bue muo, Cohãcjũre tiquina quehnoano bucuegũ yeriro saha yũhure musa ohori gũhũ Cohãcjũre quehnoano bucuegũ yeri. ¹⁹ Musa Cristore wacũ tutuare. Sa yero ijipihtiyere musare dũhsarire

ohorota mari Pacũ musare, quehnoa yũhdũye tiquiro cũoyere. ²⁰ Ijipihtiyere decori mari Pacũre Cohãcjũre ño peouhna. Sata yeihna.

Pablo quehnoa dutiahye

²¹ Ijipihtiyequina quehnoañequina Jesucristo yequina quehnoahdo. Mari acaye gũhũ Jesu yequina yũhũ mehna cjẽna musare quehnoa dutire. ²² Ijipihtiyequina ohõ cjẽna quehnoañequina Jesu yequina quehnoa dutire. Roma cjẽna pũhtoro ya wũhũ cjẽna pũrita tutuaro quehnoa dutire.

²³ Mari pũhtoro Jesucristo cahĩne mehna quehnoano ijiya.

Colosenses

Colosa cĵenare oĵoa ohoahye Pablo gũhu

1¹⁻² Yũhu Pablo mari acayũro Timoteo mehna musare Colosa cĵanare quehnoa dutiaja usã. Yũhu Jesucristo yere buhe dutiro tiquiro cũrigũ iĵiaja. Cohãcĵũ cahmeno sahata Jesu yũhũre tiquiro yere buheacĵure cũri. Sa yegũ musare usã acaye Cristore wacũ tutuaducunare oĵoa ohoaja yũhu. Sa yena Cohãcĵũ mari Pacũ mehna musare quehnoa dutiaja. Sa yena tiquiro mehna quehnoano iĵiya musa.

Jesu yequinare Pablo sini basahye Cohãcĵũre

³⁻⁸ Musa ye iĵiatire Cohãcĵũre sini basana “Quehnoare”, sa niducuaĵa usã. Tiquiro pehe mari puhtoro Jesucristo Pacũro iĵire. Iĵipihtiye decori uhmusepu musare iĵigũ yerota Cristo pehe. Tiquiro sa yeatiquiro iĵigũ tire musa sa cohteducu wame tire. Cristo Jesure wacũ tutua wame tire musa. Sa yena tiquiro yequinare cahĩ wame tire musa. Musa sa iĵi wame tigũ Cohãcĵũ mehna bucue, tiquirore “Quehnoare”, niaĵa usã. Iĵipihitropũre Jesu yequina poto iĵiye buheyere quehnoañe buheyere tiquina yahugũ tuhoye masa quehnoañe pehere comesare. Ahrireta musa gũhũre Epafra quehnoañe buheyere yahuri jiri. Tiquiro usã tutuaro cahĩniquiro usã mehna Cristore dahra cohteriquiro iĵire. Sa yero Cristo yere ne duhuerare tiquiro. Musare tiquiro sa yahugũ tuhona, duita quehnoano ye wame tire musa. Sa yena Cohãcĵũ musare tiquiro cahĩnene poto masina, duita quehnoano ye wame tire musa. Musa sa yerire Epafra yahuri usãre. Espĩritu Santo yedohoye mehna Jesu yequinare musa cahĩnene yahuri

tiquiro usãre. Tiquiro sa yahugũ tuhona “Quehnoare”, niaĵa usã Cohãcĵũre.

⁹ Sa yena musare tuhona musare duita sa sini basaducuaĵa usã Cohãcĵũre. Cohãcĵũ cahmeñene musa masi pehoatire tiquirore sini basaja usã. Tiquiro yere quehnoano masina musa iĵiatire sini basaja usã. ¹⁰ Sa sini basaja usã mari puhtoro Cristo cahmeno sahata quehnoano musa yeatire. Musa sa yegũ ihũano tiquiro bucuero. Sa yena iĵipihtiye quehnoañene musa yeatire sini basaja. Cohãcĵũre musa masi nemoatire sini basaja. ¹¹ Ahri yũhu yahuati gũhũre sini basaja usã. Cohãcĵũ tutuaye mehna musa tutuatire musare sini basaja. Sa sini basaja ñano yũhdũepenata musa ihcãno sahatire. Ñano yũhdũepenata musa sa tuhutu cãtire, musa bucuere mehna musa sa iĵiducuaĵa gũhũre sini basaja. ¹² Cohãcĵũ tiquiro yequina iĵianare marine yere. Sa yero tiquiro ohoyere cuoanajare yere marine tiquiro. Tiquiro iĵiropũ buhrioropũ marine ohorota tiquiro. Tiquiro sa yegũ ihũana tiquirore musa “Quehnoare”, niatire sini basaja usã musare.

¹³ Tiquirota marine pecapu wahaborinare yũhdugũ yere. Panopũre ti ñañene ye duhu masiedami mari. Ñariquiro pehe marine dutiriquiro iĵinimedi. Cohãcĵũ pehe marine pecapu wahaborinare yũhdugũ yeri. Macunore tiquiro cahĩniquirore puhtoro sũno uhmusepu marine iĵigũ yere. Sa yena tiquiro macuno mehna iĵinata. ¹⁴ Tiquiro macuno mehna marine yũhdũore Cohãcĵũ. Tiquiro macuno yariari mehna mari ñañe yerire bori Cohãcĵũ.

Masa Cohãcĵũ mehna tiquina cahme ihũa tuhtigũ ihũano Cristo bosahye

¹⁵ Mari Pacũre ihũamehnedare. Tiquiro macuno pehe tiquiro Pacũro

ijiyere iyere ihñore masare. Tiquiro macano ijipihitiyequina pano, ijipihitiye pano iji tuhasari jiri. Sa yero puhtoro ijire tiquiro. ¹⁶Mari Pacu tiquiro dutigũ tiquiro macano pehe tiquiro Pacuro mehna ijipihitiyequinare, ijipihitiyere bajumehneahye. Uhmusepu ijiyere, ahri yehparu ijiyere gũhure bajumehneahye. Mari ihñarire, mari ihñedari gũhure bajumehneahye. Uhmuse cjana puhtoare, dutiyequinare ijipihitiyequinare bajumehneahye. Tiquiro ijipihitiyequina gũhure ijipihitiye gũhure bajumehneahye. Sa yeye ijipihitiyequina tiquiro yequina ijiatiquina ijimahye. Ijipihitiye gũhure tiquiro ye ijiasi ijimahye. ¹⁷Ijipihitiyequina pano, ijipihitiye pano Cristo iji tuhasahye. Sa ye tiquiro tutuaye mehna ijipihitiye gũhure, ijipihitiyequina gũhure yojopure ijiyere nine.

¹⁸Mari tiquiro yequina ijipihitiye tiquiro pagu yero saha tiquiro ya curua cjana ijiaja. Sa yero tiquiro mari dapu ijire. Tiquiro yariaro masa muja muhtariquiro ijire ijipihitiyequina puhtoro, ijipihitiyere cuoriquiro ijiro taro. ¹⁹Cristo ihcãno sahata ijire mari Pacu tiquiro ijiro sahata. Tiquiro sa ijigũta cahmeahye mari Pacu pehe. ²⁰Ijipihitiyequina masa tiquiro Pacurore cahme ihña tuhtie tiahye. Sa tiquina cahme ihña tuhtigũ ihñano Cristo bosa duahye. Uhmuse cjenare, ahri yehpa cjena gũhure tiquiro Pacurore ihña tuhtieragũ ye duahye Cristo. Sa yero uhmuse cje, ahri yehpa cje gũhure quehnoano ijigũ cahmeahye tiquiro. Sa bosa duahye tiquiro curusapu yariaro, tiquiro diire cohãno. Tiquiro Pacurore cahmediro sahata yeahye Cristo.

²¹Musa gũhure sata yeri tiquiro. Tiquiro Pacurore ihña tuhtina tiquiro mehna cjana ijieramahye masa gũhure. Nãñene yeri jimedi masa. ²²Tiquiro

yariari mehna tiquiro Pacurore musare ihña tuhtieragũ yeri tiquiro. Sa yeri tiquiro quehnoano, ñãñe mariena, buhiri mariena musare ijigũ yero taro. Musa sa ijigũ musare sa buhiri marienapure tiquiro Pacurore ohorota. ²³Sata ohorota, masa tiquirore wacũ tutuaducugũ. Sa yerota tiquiro quehnoane buheyere masa tuhorire masa boeragũ. Ti buheyere quehnoane buheyere ijipihitiyequina ahri yehpapure ijiyequina tuhori jire. Sa yegu yuhũ gũhure Pablo ti buheyere yahuguta ijiaja.

Jesu yequinare yedohoriquiro ijiro, bucueahye Pablo

²⁴Cristo mari ñano yeri buhirire ñano yuhduahye. Sa yegu yuhũ gũhure musare yuhũ buheri buhiri ñano yuhdugu bucueaja. Sa ñano yuhdugu Cristo marine tiquiro cũrire ye sohtori tigu njaja. Sa yegu bucueaja. Cristo yere mari yeri buhiri mari ñano yuhdu nemoati duhsarine. Sa yegu tiquirore masa wacũ tutuatire ñano yuhdugu bucueaja yuhũ. Tiquiro pagu yero saha ijina tiquiro ya curua cjana ijire masa. ²⁵Jesu yequinare yedohoacjũre cũri Cohãcjũ yuhure. Musa ye ijiatire yedohoacjũre yuhure cũri tiquiro. Tiquiro yere masare yahu pehoacjũre cũri yuhure. ²⁶Tiquiro yere peye cãhmari panopũ cjenare yahu pehoera tiahye mari Pacu. Yojopũ cjenare tiquiro yequinare tire quehnoano yahu peho cãhre. ²⁷“Judio masa ijieyequinare yuhũ buhegũ yee buheye quehnoa yuhduare”, ni tiquiro yequinare tire yahuri. Panopũ tiquiro yahuerarire yojopũ yahuri. Ohõ saha ijire tiquiro ye: Cristo tiquiro yequina mehna ijire. Tiquiro sa ijigũ tiquiro yequina uhmusepu quehnoano yuhduaropũ ijiaja. Ti ijire panopũ tiquina masiedari mari Pacu ye.

²⁸ Cristoreta yahuaja. Ijipihtiye-quinare cuesāgū tiquinare buheaja yūhū. Quehnoano masiñe mehna buheaja yūhū quehnoano Cristore masare masigū yegū tagū. Sa buheaja yūhū tiquiore yere tiquina quehnoano yeyequina ijigū yegū tagū. ²⁹ Ahri ijire yūhū dahraye. Mari Pacu tiquiore ye tutuaye mehna yūhūre tiquiore ohori tutuaye mehna tutuaro dahraja yūhū, tiquiore yere buhegū.

2 Ahrire mūsa masigū cahmeaja. Mūsa ye ijiatire, Laodicea cjēna ye ijiatire, ijipihtiyequina apequina ye ijiati gūhūre tutuaro dahraja yūhū. Ijipihitina mūsa yūhūre ihñena ye ijiati gūhūre tutuaro dahraja yūhū. ² Sa dahraja yūhū mūsa quehnoano jeripohna tiatire. Mūsa mehna cjēnare mūsa cahme cahīati gūhūre sa dahraja yūhū. Cohācjū ye panopū tiquiore yahuerari Cristore masigū yeye ijire. Tiquiore yere masina tiquiore wacū tutuare mūsa. Tiquiore mūsa quehnoano masiatire, tiquiore mehna mūsa quehnoano ijiatire tutuaro yedohoaja mū sare. ³ Apequina tiquina masiedarire Cristo dihita quehnoano masi peho cāhre. Sa yero quehnoano masiniquiore ijire tiquiore. ⁴ Ahrire niaja mū sare “Apequina mū sare sijoro saha tūho coaye buheye mehna ni mehoari”, nigū. ⁵ Yūhū mūsa watoa ijierapegūta yūhū wacūno mehna mūsa watoa ijigū yero saha tūhotuaja. Sa yegū Cristore mūsa quehnoano wacū tutuaducurire, mūsa quehnoano yeri gūhūre masigū bucueaja yūhū.

⁶ Sa yena Cristore mūsa wacū tutuaducariro saha sata tiquiore wacū tutuaye mehna decoripe quehnoano ijuducuya. ⁷ Tiquiore quehnoano masina ijiya mūsa. Sa yena decoripe tiquiore masi nemoña panopū mū sare apequina tiquina buheriro saha. Sa yena Cri-

store bucue, “Quehnoare”, niducuna ijiya mūsa.

Cristo yequina ijina, quehnoañe pehere cahmeaja mari

⁸⁻¹⁰ Quehnoano yeya mūsa. Masa tiquina esa tuharo tiquina buheye tiquina ni mehoñene tūhoeracāhña. Tiquina panopū cjēna tiquina esa tuharo niñene buhere. Tiquina sa niñe dūhseati ijierare. Ūhmuse cjēna pūtoa yere, watia ye gūhūre sa buhe maca cāhre. Cristo ye pehere buherare. Cristo mari Pacu ijiro saha ijiiriquiro ijiro, Cohācjū warota ijirota nine. Tiquiore yequina ijina Cohācjū mehna quehnoano ijiaya mari. Tiquiore ijiipihityequina pūtoa bui, angele pūtoa bui gūhūre pūtoro ijire. Tire masina ni mehoñene buheyequinare tūhoeracāhña. ¹¹ Sa yena Cristo yequina ijina cūhnucunū cahserogāre yūhre nediquina yero saha ijire mūsa. Ti cahserogāre tiquina yūhre ne cohāriro saha Cristo mūsa ñañene tutuaro cahmeñene cohāri. ¹² Tiquiore yequina ijina wame yenohrina wahari jiri mūsa. Tiquiore wame yenohrina wahana ohō saha ni ihñona nidi jiri mūsa: Panopū cjē mūsa ñañe yerire mūsa duhurire ihñona nidi jiri mūsa. Ti mūsa ñañe yerire mūsa ya cūboro saha tire duhuri jiri mūsa. Cristo masa mūjano quehnoanopū wahahye. Tiquiore sa wahariro saha Cohācjūre wacū tutuana “Tiquiore tutuariquiore ijire”, nina, quehnoañe pehere comesari jiri mūsa. Tiquiore Cohācjū pehe Cristore masoriquiro ijire. Tiquiore wame yenohrina ijina quehnoañe pehere mūsa comesarire ihñona niaga mūsa.

¹³ Panopūre mūsa ñana mūsa ijiri buhiri pecapū wahaborina ijimahye mūsa. Sa wahaborina ijimahye mūsa Cohācjū yequina ijierana. Tiquiore dutiye mariena ijimahye mūsa. Yojoopūre mari Pacu marine tiquiore mehna sa ijuducua-

nare yeri. Cristo tiqiro yariari mehna sa yeri tiqiro marine. Sa yero ijipihina mari ñañe yerire bo cãhri jiri tiqiro. ¹⁴Cohãcjũ tiqiro dutiyere yũhdũdũcana mari ijiepegũta tiqiro marine buhiri ti dutierari jiri. Ti dutiye marine buhiri dahre dutiepegũta ti dutiyere sa ihña cãhno, marine buhiri ti dutierari jiri. Cristo curusapũ tiqiro yariari mehna Cohãcjũ pehe mari ñañe buhirire cohã cãhre. ¹⁵Masa tiquina ihñonopũ watĩa pũhtoare Cohãcjũ yũhdũdũcahye. Ihyo ijieyquina tojoa cãhye tiquina pehe. Sa yero tiquinare bũoro wahagũ yehaye. Curusapũ yariaro Cristo ñañequina pũhtoare yũhdũdũcahye.

Ūhmuse cjẽne Cohãcjũ yere cahmeña

¹⁶Sa ye apequina mũasi ihyayere, mũasi sihniñe gũhũre ihñañe musare “Buhiri tina ijire”, ni ihñaboaga. Tiquina sa ni ihñagũ sa ihña cãhña tiquinare. Cũhmaripe ijie decorire, asũripe ijie decorire, semanaripe ijie decorire bõse decori mũasi yeragũ ihñañe musare “Buhiri tina ijire”, niboaga tiquina. Tiquina sa nigũ sa ihña cãhña tiquinare. ¹⁷Panopũ ti ihya dutiyere, bõse decorire ye dutiyere, apeye dutiye gũhũre cũahye Cohãcjũ marine buhero taro. Ti dutiye mehna camepũ tiqiro yeatire Cohãcjũ ye ihñono niahye. Cristo tiqiro ijie tiatire mehenogã ye ihñono niahye masare. “Tiqiro ohõ saha waharota”, nino sa ye ihñono niahye. Sa yeati ijimahye ti dutiye. ¹⁸Ohõ saha nimene ti dutiyere ye dutieyquina. “Sijoro saha ijieyere bajuagũ ihñau usã”, niñe, tiquina angelere Cohãcjũre tiquina ño peoboro saha ño peomene. Apequina masa yero saha tiquina ñañene tutuaro cahmeñene tũhotumene tiquina. Sa ijieyquina ijieyere “Masi peho cjã usã”, ni tũhotumene tiquina. Sa yeye tiquina apequinare “Yũhdũdũcaeraja”, niñequina, sijoro saha yeeyequina yero

saha ye ihñomene musare. Sa yeye musare tiquinare ihña cũ dutire. Tiquina sa dutigũ tiquinare sa ihña cãhña. ¹⁹Sa yepeta Cristo tiqiro dutiro saha yeye niedare. Cristo pehe tiqiro yequinare dapu yero saha ijieyere tiqiro yequina pũhtoro ijieyere. Tiqiro yequina pehe tiqiro pagũ yero saha ijieyequina tiqiro ya curua cjẽna ijieyere. Mari cohãri dohoye mari wa dari gũhũ mari pagũre ihcã pagũ ijigũ yere. Sata Cristo pehe tiqiro yequinare ihcãno mehna quehnoano mehna ijigũ yere. Sa yero Cohãcjũ pehe tiqiro yequinare tiqirore masi nemogũ yere.

²⁰Sa ye Cristo yequina ijina ñañene ye duhurina ijieyere mũasi. Sa yena ahri yehpa cjẽ ñañe buheyere cahmedacãhña. Ti buheyere ũhmusepũ ijimediquina ñañequina pũhtoa ye ijieyere. Sa yena ti buheyere cahmedacãhña. ¿Dũhse yena masa tiquina esa tuharo dutiyere ño peojari mũasi?

²¹Ohõ saha ni dutire tiquina esa tuharo dutieyquina: Ahri borore ihyeracãhña. Ahri borore ne ihya tuhueracãhña. Ahri borore piheracãhña. Sata ni, dutire tiquina. ²²Mari apee borore ihyagũ duita pihtia wahare. Sa ijieyere borore pihtieyere borore tũhotuyere nine sa dutieyquina. Tiquina sa dutigũ ahri yehpa cjẽ dutiye dihita ijieyere ti dutiye. Masa tiquina esa tuharo tiquina buheyere dihita ijieyere ahri buheyere. Sa ye dũhseati ijierare. ²³Ti dutiyere yeeyequina Cohãcjũre ño peoyequina yero saha ijimene. Sa ijieyere apequinare yũhdũdũcaeyequina yero saha ye ihñomene. Tiquina pagũre ñano yũhdũgũ yeye Cohãcjũre ño peoyequina yero saha ye ihñomene tiquina. Tiquina sa yegũ tiquina ye dutiye pehe masi pehoyequina ye dutiye yero saha ijimene. Sa ijierare. Ti dutiyere yepeta tiquina ñañene tutuaro cahmeñene duhuerare.

Sa ye tiquina ye dutiye pehe duhseati ijierare.

3 Sa yena Cristo yequina ijire musa. Panopu musa ñañe yerire duhu, quehnoañe pehere comesari jiri musa. Sa comesana ijina uhmuse cjene Cristo yere cahmeña musa. Topure mari Pacu pototo pehepu dujire tiqiro. ²⁻³ Uhmuse cjê Cohâcjû yere quehnoano tuhutuya musa. Ahri yehpa cjê ñañene wacû nunuedacâhña musa. Cristo yequina ijina ti ñañene wacû duerare musa. Tiquiro pehe ti ñañene cahmotare. Sa yena tire wacû nunuedaro cahmene musare. ⁴ Sa yena Cristo uhmusepu marine sa ijiducuatinare yeriquiro tiqiro ahtagû tiqiro mehna wahanata musa. Sa wahana tiqiro mehna cjâna ijinata.

Cristo yequina mari ijiato panore ñañene yemi mari

⁵ Sa ye ñañene ye duhu câhña musa: Omoca duhterina gûhu, duhterarina gûhu wûana tiyere, ña yuhduaro yeyere, apequiro namonore tutuaro cahmeñene, apecoro manunore tutuaro cahmeñene, ñañene tutuaro cahmeñene duhu câhña musa. Apee borore tutuaro cahmedacâhña. Apee borore tutuaro cahmena “Cohâcjû ijire”, tiquina niñe queoyere mari cahmeno sahata yena niaja mari tire. Doeri cjene ño peoyequina yero saha yena niaga musa. ⁶ Ti ñañene yeyequina Cohâcjûre yuhduducayequina ijire. Tiquina sa ye yuhduducagû ihñano tiquinare buhiri dahrerota. ⁷ Panopure musa pehe ti ñañene yena ijina tiquina mehna ijinata.

⁸ Sa ijimedina ijiepenata yojopure ahri ñañene duhu peho câhña musa: Usuayere, apequinare ñano ni tuhutuyere, apequinare ñano quitidahreyere, ñano yahuducuyere tire ijipihiyere duhu câhña. ⁹⁻¹⁰ Musa pehe Jesu yequina wahana ti ñañe yeyere

duhu tuhasari jiri. Sa yena quehnoañe pehere comesarina ijire musa. Musare quehnoañe pehere cahmegû yero nine Cohâcjû tiqiro yero saha musa ijiato saha. Sa yere tiqiro quehnoano tiqirore musa masiato saha. Sa yena musa mehna cjenare ni mehoedacâhña. ¹¹ Cristo yequina ijina judio masa, judio masa ijena gûhu ihcâno saha ijire musa, Cohâcjû ihñagû. Cuhnucunu cahserogâre yuhre nediquina, yuhre nedariquina gûhu Cristo yequina ijieyehcâno saha ijire, Cohâcjû ihñagû. Ape yehpa cjêna, musa masieñequina, musa ya yehpa cjêna gûhu Cristo yequina ijieyehcâno saha ijire, Cohâcjû ihñagû. Dahra cohteyequina, dahra cohteyequina ijieyequina gûhu Cristo yequina ijieyehcâno saha ijire, Cohâcjû ihñagû. Jesu ijipihiyequina tiqiro yequina mehna ijire. Ihyo ijiriqiro ijierare, tiqiro yequina ihñagû.

¹²⁻¹³ Sa ye Cohâcjû beserina, quehnoana, tiqiro cahña ijina ohõ saha ijia musa: Apequinare paja ihñana, apequinare quehnoano yena, apequinare quehnoano mehna yena, “Apequinare masi yuhduducaya”, niëna, musare tiquina ñano yepegûta sa tuhutu câna ijia musa. Musa mehna cjêna mehna usuana, tiquinare quitidahrena, musa basi usua duhuya. Mari puhtoro musa ñañe yerire bori. Sa tiqiro boriro sahata musa gûhu musa mehna cjêna musare tiquina ñañe yerire boya. ¹⁴ Ahri dutiye yuhduoro ohõ saha ni dutiaja musare: Apequinare cahña. Musa sa yena quehnoano ijipihiyequina mehna ihcâno mehna ijinata. ¹⁵ Cristo marine quehnoano ijigû yere unureno marieno mari ijiato saha. Tiquiro sa yegû quehnoano ijia musa basi. Sa yeatinare tiqiro yequina ijiatinare cûahye mari Pacu musare. Sa yena Cristo pagu yero saha ihcâ curuata ijire

musa. Sa ye Cohăcjüre “Quehnoare”, ni bucuena ijija musa.

¹⁶Cristo ye buhevere quehnoano wacüducuya musa. Quehnoano masi buheya tiquiro yere. Cua pesaro mehna tire yahuya. Sa yena Salmore Cohăcjü yere basayere, apeye tiquirore ño peo basayere tiquirore basa peoya. Quehnoano wacü ño peoye mehna basa peoya. Sa basana tiquiro yere quehnoano wacüña musa. Sa yena Cohăcjüre “Quehnoare”, ni bucuena ijija musa. ¹⁷Ijipihtiyere dăhse ijiyere musa yeyere quehnoano jeripohna ti yeya, mari puhtoro Jesu tiquiro bucueato saha. Cristore ño peore musa. Sa yena tiquirore ño peoye mehna quehnoañe dihitare yahuducuya. Sa yena Cristo yedohoye mehna Cohăcjü mari Pacure sinina “Quehnoare”, ni bucueya tiquirore.

Jesu yequinare ihcāno mehna iji dutiye ohō saha ijire

¹⁸Musa manu tina numia, musa manusumare quehnoano yuhtiya musa. Sata yero cahmene musare mari puhtoro Cristo yequina numia ijina.

¹⁹Musa namo tina, musa namosānumiare cahña. Sa yena tiquina numiare tuhtieracāhña.

²⁰Musa tiquina pohna gūhū, musa pacusumare yuhdudcaeracāhña. Musa sa yegū ihñano mari puhtoro quehnoano bucuere.

²¹Musa tiquina pacusumua gūhū musa pohmare sa tuhtiducueracāhña “Bujua witigū yeari”, nina.

²²Cahacjāna, musa puhtoare ahri yehpa cjēnare quehnoano yuhtiducuya. Tiquinare bucue dutina tiquina ihñonopū dihitare yuhtina ijieracāhña. Tiquina mariedagū gūhūre yuhtiya. Mari puhtoro Cristore cua pesaro mehna musa ihñano sahata quehnoano mehna yuhtiya musa puhtoa gūhūre.

²³Potota Cristo yequina ijina quehnoano yuhtire musa tiquirore. Sa yena musa puhtoare ahri yehpa cjēnare yuhtina, Cristore musa yuhtiro saha yuhtinata nine musa. Sa yena musa puhtoa tiquina dutiro sahata tutuaro mehna dahraya, Cristo ye dutiye ti ijiboriro saha. ²⁴Musa sa yegū Cristo musare quehnoano yerota. “Musare ohoutja”, tiquiro niñene musare ohorota mari puhtoro. Tire masine musa. Mari puhtoro Cristo cahacjāna ijire musa. Sa yero tiquiro pehe musa puhtoro waro ijire. ²⁵Tiquina puhtoare yuhdudcayequinare buhiri dahrerota mari puhtoro pehe. Sa yuhdudcayequinare ihcāquiro dăhsaro marieno ihcāno saha buhiri dahrerota tiquiro.

4 Musa puhtoa pehe, musa cahacjēnare poto queoro quehnoano yeya tiquinare. Musa gūhū puhtoroore cuore. Musa puhtoro musa cuoriquiro pehe ūhmuse cjūno ijire.

²Decoripe Cohăcjüre siniña musa. Quehnoano wacü tūhotu siniña. Sa yena “Quehnoare”, niña mari Pacure. ³⁻⁴Ūsā ye ijia ti pehere sini basaya tja. Cristo yere apequina panopū tiquina masedarire buhena niaja ūsā. Tiquinare ūsā quehnoano masigū yeati pehere sini basaya mari Pacure. Cristo yere yūhū buheri buhiri yūhū yojopure peresupū ijiaja. Sa yegū musa sa sini basagū cahmeaja tiquiro yere yūhū quehnoano yahuatire. Cristo dutiriro saha yūhū yahuatire pehere sini basaya.

⁵Jesu yequina ijieyequina mehna ijina quehnoano yeya musa. Cristo yere yahuya tiquinare. Tiquina mehna musa ijiro puno sata quehnoano yeya. ⁶Tiquina mehna yahuducuna quehnoano bucueye mehna yahuducuya. Quehnoañe dihitare yahuducuya. Apequina musare

tiquina sinitugũ quehnoano masiña m̄sa yũhtiatire.

Quehnoa duti bato tiahye Pablo

⁷Tĩquico mari acayũro Jesu yaquiro ijire. Tiquiro yũhũ ijiye tiyere musare yahurota. Tiquiro mari cahĩniquiro ijire. Cristo yere buhero, usã mehna dahrariquiro ijire. Sa yero Cristo yere ne duherare tiquiro. ⁸M̄sa cahapũ tiquirore ohou yũhũ usã ijiye tiyere m̄sa masino quehnoano. Tiquirore ohou yũhũ musare bucegũ yeatiquirore. ⁹Onésimore mari acayũrore m̄sa cahapũ ohou. Tiquiro gũhũ Cristo yere ne duherare. M̄sa mehna cjũno ijire. Tiquina p̄aro usã ohõre dũhse yũhdũrire yahueta musare.

¹⁰Aristarco peresupũ ijiriquiro yũhũ mehna cjũno musare quehnoa dutire. Marco gũhũ quehnoa dutire. Tiquiro Bernabé basuriro ijire. Tiquirore yahu tuhasaũ musare. M̄sa cahapũ tiquiro esagũ quehnoano mehna tiquirore piti caya. ¹¹Jesu “Justo”, tiquina ni pisuriquiro quehnoa dutire tiquiro gũhũ. Ahriquina ihtiarota yũhũ mehna dahrayequina judio masa waro ijire. Judio masa waro tiquina dihita Cohãcjũ yere yũhũ mehna buhere. Sa buheaja usã Cohãcjũ yequina masa wahatire, Cohãcjũre tiquina pũhtoro tiatire. Tiquina yũhũre quehnoano yedohoriquina ijire. ¹²Epafr̄a m̄sa mehna ijiriquiro musare quehnoa dutire. Tiquiro Cristore dahra

cohteriquiro ijire. Cohãcjũre sinino, m̄sa ye ijiatire tutuaro sini basaducuro nine tiquiro. Cohãcjũre quehnoano wacũ tutuaducuatiquinare, tiquiro cahmeno saha yeatiquinare m̄sa ijiatire sa sini basaducuro nine tiquiro Cohãcjũre. ¹³Tiquiro m̄sa ye ijiatire tutuaro sini basare. Laodicea cjẽna ye ijiatire, Hierapoli cjẽna ye ijiati gũhũre tiquiro tutuaro sini basare. Tiquiro sa yeriquiro ijigũ ihnãgũ musare yahugũ niaja. ¹⁴Duturu Luca mari cahĩniquiro musare quehnoa dutire. Dema gũhũ quehnoa dutire.

¹⁵Quehnoahdo mari acaye Jesu yequina Laodicea cjẽna. Ninfa gũhũ quehnoahdo. Jesu yequina ticoro ya wũhũpũ cahmecoãnequina gũhũ quehnoahdo. ¹⁶Ahri pũre yũhũ ojoa ohori pũre m̄sa mehna cjẽnare m̄sa buhe tuhasari bato Laodicea cjẽna gũhũre ohoya. Sa yena tiquinare Laodicea cjẽnare yũhũ ojoa ohori pũre m̄sa gũhũ buheya. ¹⁷Sa yena ohõ saha niña Arquipore: “Mari pũhtoro Jesu yaquiro m̄hũ ijigũ tiquiro yere buheacjũre cũri m̄hũre. Tiquiro sa cũgũ quehnoano buhe sohtori tiya m̄hũ”, niña tiquirore.

¹⁸Yũhũ Pablo, yũhũ omoca mehna ahrire ojoaja. M̄sare quehnoa duti-aja yũhũ. Peresupũ yũhũ ijiyere wacũ, sini basaya m̄sa Cohãcjũre. Quehnoano ijiya m̄sa. Cohãcjũ cahĩne mehna musare quehnoa dutiaja.

1 Tesalonicenses

Pablo ojoa ohoahye Jesu yequinare Tesalónica cjênare

1 Yuhu Pablo, Silvano, Timoteo gũhu m̄sare quehnoa dutiaja. Sa yegũ ahrire m̄sare ojoa ohoaja yuhu, Pablo. M̄sa pehe Tesalónica cj̄ana mari Pacu Cohãcjũ yequina ijire. Mari puhtoro Jesucristo yequina gũhu ijire m̄sa. Sa yena Cohãcjũ mari Pacu, mari puhtoro Jesucristo mehna m̄sare quehnoa dutiaja. Tiquina yedohoye mehna quehnoano ijiya m̄sa.

Jesu yequina Tesalónica cj̄ena pehe Jesure quehnoano wacũ tutuahye

²Cohãcjũre sinina ijipihtiequina Jesure m̄sa wacũ tutuayere wacũna, “Quehnoa yuhduare usãre”, niducuaja usã m̄sare. Cohãcjũre sinina, m̄sa ye ijiatire sa sini basaducuna niaga usã. ³M̄sa pehe Jesucristore quehnoano wacũ tutuañohti. Sa wacũ tutuana, Jesu yere yeñohti m̄sa. Jesucristore, apequina gũhure m̄sa cahĩñohti. Sa cahĩna, Jesu yere tutuaro yena niaga m̄sa. Jesucristore mari puhtorore wacũ tutuaducũñohti m̄sa. Sa wacũ tutuaducuna m̄sare tiqũiro yuhduoatire masina, tire cohtena niñohti m̄sa. Sa yena tiqũirore wacũ tutua duhuerañohti m̄sa. Cohãcjũ mari Pacure sinina, tire m̄sa sa yerire wacũaja usã. ⁴⁻⁵Usã acaye, Cohãcjũ cahĩona ijire m̄sa. M̄sare tiqũiro beserire masiaja usã. Sohõ ijiri pje m̄sare quehnoañe buheyere buhena sa yahu cãna niedu m̄sare. Espĩritu Santo tiqũiro tutuaye mehna quehnoañe buheyere buhena nii m̄sare. Sa buhena ti buheye poto ijigũ quehnoano masii usã. Sa yena m̄sa watoa usã ijina, usã yerire masine m̄sa. M̄sare yedohona

sa yei usã. M̄sare buherina ijina, Cohãcjũ beserina m̄sa ijigũ masiaja usã.

⁶Sohõ ijiri pjepure m̄sa ñano yuhduna, quehnoañe buheyere cahmedi m̄sa. M̄sa sa cahmegũ, Espĩritu Santo pehe m̄sare quehnoano bucuegũ yerĩ. Tiquiro sa yegũ m̄sa pehe usãre ihña cũ, usã yeriro sahata yerĩ. Sa yena Jesu gũhure ihña cũri m̄sa. ⁷Sa ye Jesu yequina Macedonia yehpa cj̄ena, Acaya yehpa cj̄ena gũhu Jesu yere m̄sa yerire masidi. Sa masiñe tiquina gũhu m̄sare ihña cũ, m̄sa yeriro sahata yerĩ. ⁸Macedonia yehpa cj̄ena, Acaya yehpa cj̄ena gũhu mari puhtoro yere m̄sa buhegũ tuhooñohti. Cohãcjũre m̄sa wacũ tutuarire tuhoriquina pehe tiquina dihita ijierare. Ijipihtiro cj̄ena m̄sa wacũ tutuarire tuhooñohti. Sa ye usã tiquinare yahuerapegũta tire masi tuhasari tiquina. ⁹Sa ye m̄sa cahapũ usã tinidire, usãre m̄sa quehnoano piti carire yahuri tiquina ijipihtiro cj̄enare. Sa yena Cohãcjũ pehere wacũ tutuana, “Cohãcjũ ijire”, ni m̄sa ño peoye queoyere cohã cãri m̄sa Cohãcjũ ye pehere yena tana. Tiquiro Cohãcjũ pehe catiriquiro, Cohãcjũ waro ijire. ¹⁰Sa ye “Cohãcjũ macunore uhmusepũ ahtatiqũirore Tesalónica cj̄ena cohteye nine”, ni yahuri masa m̄sare. Tiquiro macunore yariariqũirore Cohãcjũ masoahye. Tiquiro sa masogũ tiqũiro macuno Jesu pehe marine ña yuhduaro tiqũiro buhiri dahreborinare yuhduori jiri.

Tesalónica wame tiri macapũ tiqũiro dahrarire yahuahye Pablo

2 M̄sa cahapũ ijina usã sa iji cãna nieda tii. M̄sare quehnoano yedohorina ijie tii usã. Tire quehnoano masine m̄sa, usã acaye. ²Sa yena Filipopũ ijina ñano usã yuhdurire, usãre ñano tiquina yerire quehnoano

masine mûsa. Úsäre tiquina sa yepegûta Cohâcjû yedohoye mehna cuero marieno Cohâcjû yere quehnoañe buheyere buhei usâ mûsa gûhure. Úsäre masa peyequina tiquina ihña tuhtiepegûta quehnoañe buheyere buhei usâ mûsare. ³Mûsare buhena quehnoano usâ masidire buhei usâ mûsare. Sa buhena potota mûsare yedohona nii. Mûsare buhena ni mehoedû. ⁴Cohâcjû cahmeno saha buheaja usâ. Quehnoañe buheyere buheanare Cohâcjû beseri usäre. Tiquiro sa beserina usâ ijigû tiquiro ye buheyere usâ buhegû quehnoarîne, Cohâcjû ihñagû. Sa yena ohõ saha buheaja usâ. Masa tiquina ihña bucueatire buhena niedaja usâ. Cohâcjû pehe usäre tiquiro ihña bucueatire tiquiro yere buheaja usâ. Tiquiro pehe mari tuhutyere, mari ye duayere quehnoano masine. ⁵Quehnoañe buheyere buhena tuho bucueati yahuducuye mehna buhena niedû. Queoro quehnoano mehna buhei usâ mûsare. Ahrire masine mûsa. Sa yena usâ buhena, mûsare apee borore wapa cahmena niedû usâ. Ahrire Cohâcjû masine. Potota nigû niaja. ⁶Sa buhena masa usäre tiquina ño peoatire yena niedû usâ. Mûsare apequina gûhure usäre ño peo dutina tana niedû.

⁷Sa ño peo dutierapenata Cristo cûrina ijiaja. Sa tiquiro cûrina ijina mûsare wapa cahmeboya usâ. Sa yena puh-toa yero saha mûsare dutina ijiboja usâ. Sa ijiepenata numino ticoro nijinogäre ticoro quehnoano masoriro saha quehnoano mehna yei usâ mûsare. ⁸Sa yena mûsare quehnoano cahmena, Cohâcjû yere quehnoañe buheyere buhei usâ mûsare. Sa yena ti dihitaré yena niedû mûsare. Mûsare quehnoano yedohou, usâ catinina. Úsâ cahîna mûsa ijigû mûsare sa yedohou usâ. ⁹Sa mûsare cahîna tutuaro yedohou usâ mûsare. Tire wacûre mûsa, usâ acaye. Cohâcjû

yere quehnoañe buheyere buhena mûsa cuoyere sini cariboerû mûsare. Sa yena decori, ñamini gûhure dahrau usâ.

¹⁰Quehnoano, poto, ni mehono marieno mûsare Jesu yequinare usâ yerire masine mûsa. Cohâcjû gûhu tire masine. ¹¹Sa yena ihcâquiromo masano tiquiro pohnene tiquiro quehnoano yahu bucuegû yeriro saha masa gûhure yahuna bucuegû yei. Tire masine mûsa. ¹²Cohâcjû tiquiro puh-toro ijiorû, quehnoa yuhduaropû mûsare pijiori. Sa yena tiquiro yequina mûsa ijigû Cohâcjû cahmediro sahata mûsare iji dutii usâ.

¹³Cohâcjû yere mûsare usâ yahurire mûsa tuhona, ohõ saha ni tuhotori mûsa: “Masa tiquina esa tuharo tiquina buheye ijierare. Cohâcjû ye buheyeta ijire”, ni tuhotori mûsa. Tire mûsa tuhutigû masina bucueaja usâ. Sa yena Cohâcjûre sinina “Quehnoare”, niaja usâ tiquirore. Ijirota ijire. Mûsare usâ buheye Cohâcjû yahuducuye poto ijirota nine. Sa yero mûsa Jesure wacû tutuana ijigû Cohâcjû tiquiro ye buheye mehna mûsare quehnoañe pehere comesagû yere. ¹⁴Jesu cristore wacû tutuayequinare Judea yehpa cjênare tiquina yeriro saha mûsa gûhure yeri apequina. Judea yehpa cjêna Jesu yequina pehere tiquina acaye ijiepetâ ñano yuhdugû yeri judio masa pehe. Mûsa gûhure mûsa ya dihta cjêna ñano yuhdugû yeri. ¹⁵⁻¹⁶Judio masa pehe Cohâcjû yere yahu muhtariquinare panopû cjênare wejêe tiahye. Sa ye mari puh-toro Jesu gûhure wejêahye tiquina. Sa yeye tiquina usäre cohâri. Cohâcjûre tiquina bujua witigû yeri. Sa ye peyequina masare ihña tuhtiri tiquina. Judio masa ijieyequinare Cohâcjû yere usâ yahu duami tiquina gûhure pecapû waboriquinare “Cohâcjû yuhduoahro”, nina. Úsâ sa yahu duepegûta judio masa pehe usäre ne Cohâcjû yere apequinare yahu dutierari. Sa yahu dutieraye pa-

jiro buhiri ti nemoñe nine tiquina. Yo-jopure tiquinare tutuaro Cohãcjũ buhiri dahrerota.

Pablo Tesalónica cjëna cahapũ pari turi tini duamahye

¹⁷ Ûsã acaye, yojopure mehenogã mûsa cahapũ ijierana mûsare wacũna niaja. Sa yena mûsare tutuaro ihña duana, mûsa cahapũ waha duami. ¹⁸⁻¹⁹ Ihquẽ tahari yũhũ Pablo mûsare ihñagũ waha duami. Yũhũ sa waha duepegũta Satana pehe usã wahaborirore dojomehnedi. Sa yena wahaeru usã. Ûsãre bucegũ yena mûsa ijigũ mûsare ihña duami. Ûsã buhegũ quehnoano tũhorina ijire mûsa. Mari puhtoro Jesu ahri yehpapũ tiquiro tojoa tagũ mûsa pehe usãre bucegũ yenata. Sa yena bucueye mehna mûsa mehna Jesu poto ducunata. ²⁰ Sata ijire. Mûsare ihñano Jesu pehe “Quehnoano buheri mûsa”, ninota usãre. Sa yena quehnoano bucueaja usã.

3¹⁻² Sa ye mûsare yoari pje ihñedana mûsare tutuaro tuho duana tire wacũna, Timoteore mûsa cahapũ ohou. Tiquiro mari acayũro Jesu yaquiro Cohãcjũ cahacjũno ijiro, usã mehna quehnoañe buheyere buheriquiro ijire. Sa yena tiquirore ohou Jesucristore quehnoano mûsa wacũ tutuatire, mûsa bucueati gũhure. Tiquirore ohona usã sehsaro Atena wame tiri macapũ tojoari. ³ Mûsa ñano yũhdũepenata Jesu yere mûsa cohãedatire ohou usã Timoteore. Jesu yequina ijina ñano yũhdũenata mari. Tire masine mûsa. ⁴ Panopure mûsa mehna usã ijinina, mari ñano yũhdũatireta yahu tuhasaũ mûsare. Sa yena usã nidiro sahata mari ñano yũhdũũ. Tire mûsa quehnoano masine. ⁵ Sa yegũ mûsare yoari pje ihñedagũ mûsare tutuaro tuho duaũ. Sa yegũ Jesure mûsa wacũ tutuarire masigu

tagũ Timoteore ohou yũhũ. “Watĩno mûsare ñano ye dutiari”, nigũ, “Mûsare usã buherire mûsapũ duhuari”, nigũ, tiquirore ohou yũhũ. Jesu ye buheyere mûsa duhugũ mûsare usã buheri duh-seati ijieraboaga.

⁶ Sa yero yojopure Timoteo mûsa cahapũ ijiriquiro usã cahapũ tojoa wihiri. Sa tojoa wihiro quehnoañe quitire usãre yahuri tiquiro. Jesure mûsa quehnoano wacũ tutuayere, apequinare mûsa cahĩne gũhure tiquiro yahuri usãre. Sa ni tuhasa usãre mûsa quehnoano wacũrere, mûsare usã ihña duariro sahata mûsa gũhũ tutuaro usãre mûsa ihña duarire yahuri usãre tiquiro. ⁷ Sa yena usã acaye yojopure ñano yũhdũepenata mûsa Jesure quehnoano wacũ tutuagũ tũhona usã bucueaja. ⁸ Jesure mûsa quehnoano wacũ tutuarire tiquiro yere mûsa cohãedarire tũhona quehnoano jeri sajãja usã. ⁹ Sa ni tũhotuna, Cohãcjũ ihñonopũ usã tutuaro bucueaja. Sa bucuenta Cohãcjũre “Quehnoare”, niaja usã. ¹⁰ Deco gũhure, ñamipũ gũhure Cohãcjũre siniaja mûsare usã ihñatire. Jesu yere mûsa quehnoano masi pehogũ ye duaia usã quehnoano mûsa tiquirore wacũ tutua nemoatire.

¹¹ Cohãcjũ mari Pacũ tiquiro basi, mari puhtoro Jesu gũhũ usãre tiquina yedohogũ cahmeaja mûsa cahapũ usã wahatire. ¹² Sa yero mari puhtoro Jesu ijipihtiyequina mûsa mehna cjënare, ijipihtiyequina apequina gũhure cahĩ nemogũ yeahro mûsare. Mûsare usã cahĩdiro sahata tutuaro cahĩ nemogũ yeahro mûsare. ¹³ Mûsare quehnoano tiquiro yedohogũ, buhiri mariena, ñañe mariena ijinata mûsa, Cohãcjũ mari Pacũ ihñagũ. Mari puhtoro Jesu ijipihtiyequina tiquiro yequina quehnoañequina mehna ahri yehpapũ tiquiro tojoa tagũ sata ijinata mûsa.

“Cohãcjüre bucuẽgũ ye duana ohõ saha yeya”, ni yahuahye Pablo

4 YojoPURE Jesu mari puhtoro tiqiuo dutiro mehna musare ohõ saha ni yahujaja: “Cohãcjüre bucuẽgũ ye duana ohõ saha yeya”, ni buhei usã musare. Usã sa buheri bato usã buheriro sahata yẽnohti musa. Musa sa yeriro sahata ye nemoña. Tire tutuaro ye dutiaja musare.

²Jesu mari puhtoro tiqiuo buhe dutiro mehna musare usã buherire quehnoano masine musa. ³Ahrire musare yahu nemoutja: Musa ohõ saha ijigũ cahmene Cohãcjũ: Ñañene yeracãhña. Cohãcjũ ye pehere yeya. Sa yena numia mehna ñano yeracãhña. Musa numia gũhu umua mehna ñano yeracãhña. ⁴Ñano yero marieno, ño peoye mehna musa namosãnumiare cnoya. Cohãcjũ musa tire masigũ cahmene. ⁵Cohãcjüre cahmeeñequina Cohãcjüre masieñequina ñañene tutuaro cahmeñe, numia mehna ñano tiquina yeriro saha yeracãhña musa pehe. ⁶Tiquina yero saha musa yeragũ cahmene Cohãcjũ, musa acayuro namono mehna musa ñano yeratire. Musa sa ñano yena musa acayurore yuhduducana niaga. Mari puhtoro Cohãcjũ ti ñañene tiquina yegũ ihñano buhiri dahreatiquiro ijiro nine. Sa yena musare cuesãna tire yahujaja musare. ⁷Ñañene yeanare beserahye Cohãcjũ marine. Ñañene ye dutieraro beseahye marine. ⁸Sa yena ijipihtina musa ahri usã buherire yuhduducana, masa ye buheyere yuhduducana niedare musa. Cohãcjũ ye pehere yuhduducana nine. Tiquiro musare Espiritu Santore ohoriquiro ijire.

⁹⁻¹⁰Musa acayere Jesu yequinare cahme cahñene Cohãcjũ musare buhe tuhasari. Tiquiro sa buhegũ potota Jesu yequinare Macedonia cjẽnare ijipihtiyequinare quehnoano cahine

musa. Musa sa cahigũ ihñana “Musa acayere cahme cahña”, ni buheraja musare. Tiquinare cahĩ tuhasare musa. Sa ni buhe nemoedapenata ahri pehere musare dutiaja. YojoPURE apequinare musa cahino sahata cahĩ nemoña musa. ¹¹Sa yena musa basi cahme ihña tuhtiro marieno ijiya musa. Apequinare sijoro saha ni yahuducueracãhña. Sa ihña cãhña tiquinare. Sa yena musa ye dahraye pehere quehnoano dahraya. Panoputa musare sa ye dutii. ¹²Sata yeya musa, apequina musare tiquina ño peotire, apequina yere musa cariboeratire.

Ahri yehpapure Jesu tojoa tatire yahuahye Pablo

¹³YojoPURE yariariquina munare yahutja musare: Jesure cahmedaye, masa Cohãcjũ cahapu wahasi. Sa ye tiquina mehna cjẽna tiquina yariagũ ihñañe tutuaro bujua witire. Yariariquina muna tiquina duhse wahatire potota quehnoano musa masigũ cahmeaja usã, apequina tiquina bujua witiro saha musa bujua witiatore. ¹⁴Jesu yariari bato masa mujari jiri. “Ti potota ijire”, niaja mari. Sa yena ahri gũhure “Ijirota ijire”, ninata. Cohãcjũ pehe tiqiuo yequina munare yariariquina munare masa mujagũ ye, neanota Jesu mehna. Ti gũhure “Ijirota ijire”, niaja mari.

¹⁵Jesu tojoa tagũ tiqiuo yequina yariariquina muna catiyequina pano masa mija muhtaeta. Mari puhtoro Cohãcjũ ye yahuyeta ijire ahri. ¹⁶Ohõ saha ijirota Jesu tojoa tagũ: Mari puhtoro tiqiuo basi tutuaro sañuducu muhtanota. Sa yero tiqiuo yequina angele puhtoro tutuaro pisurota. Sa tiqiuo pisugũ Cohãcjũ ya corneta bisirota. Tiquina sa yegũ Jesu yequina yariariquina muna masa mija muhtaeta. ¹⁷Came catiyequinare, yariariquina muna mehna Co-

hăcjũ ũhmũsepũ mũjagũ yerota. Tiquiro sa yegũ mari puhtoro Jesure piti canata mari. Sa piti cana ijiphtiyē decori mari puhtoro Jesu mehna ijinata mari.¹⁸ Ahri yũhũ yahurire mũa mehna cjēnare yahuya. Sa ni yahuna, bucuenata mũa ijiphtina.

5 Jesu tojoa tati decore “Ahri deco tojoa tarota”, ni, mũsare yahu ojoasi.² Yojoꝛũ mũa masino saha tiquiro tojoa tati decore marine masino basioerare. Yaqueriquiro ñamipũ wacũeno mehna tiquiro yaquero ahtaro saha ahri yehpapũre mari puhtoro wacũeno mehna tojoa tarota. Ahrire mũa basita masine.³ “Yojoꝛũre mari quehnoano iji-aja. Cuaro mariedare marine”, masa tiquina ni wacũgũ duita ñano waharota tiquinare. Sa wahagũ tiquina duhti masisi. Niji wahcõricoro wacũeno mehna ticoro purĩno tũhoturo saha wacũeno mehna sa waharota masare.

⁴Yũhũ acaye, mũa pehere sa wahasi. Yaqueriquiro wũhũ cjũnare tiquiro cuegũ yeriro saha mũa pehere sa wahasi. Jesu ahtaro mũsare cuegũ yesi. Nahitianopũ ijiyequina tiquina ihña masieno saha apequina Jesure ne masiedare. Mũa pehe tiquina yero saha ijierare.⁵ Mũa ijiphtina Jesu yequina ijire. Sa yena buhrioropũ tiquina ihña masino saha Jesu ahtatire masine mũa. Apequina tiquirore masieñequina yero saha ijieraja mari.

⁶Sa yena Cohăcjũre tũho nũnũna iji-ihna. Carĩnequina yero saha Cohăcjũre tũho nũnũena ijieracũhna mari. Apequina sata yere. Tiquina yero saha yeracũhna mari. Carĩnequina yero saha, queheeyequina yero saha quehnoano wacũ masina ijiihna mari.⁷ Carĩnequina ñamipũ carĩne. Sa ye queheeyequina ñamipũ quehere.⁸ Mari pehe buhrioropũ ijiyequina yero saha Jesure masina ijina, quehnoano wacũ masina ijiihna. Sa yena surara come suhtiro

mehna tiquiro cutirore saña cahmotariro saha Cohăcjũre wacũ tutuaya mũa, watĩnare tiquiro cahmotatire. Sa yena Cohăcjũre, apequina gũhure cahĩña. Mũa sa yegũ Cohăcjũre mũsare ihña ihborota. Sa yena mũsare pecapũ waha- borinare Jesu tiquiro yũhdũoatire “Potota ijire”, ñiña mũa. Mũa sa nigũ surara tiquiro dapure come sapea mehna tiquiro pesa cahmotariro saha watĩno mũsare ñano ye dutigũ Cohăcjũre tiquirore cahmotarota.

⁹Tiquiro buhiri dahreatinare marine beserahye Cohăcjũ. Jesucristo mari puhtoro pecapũ wahaborinare tiquiro yũhdũoatinare marine beseahye tiquiro.¹⁰ Jesu mari ye ijiatireta yariahye tiquiro mehna mari ijiatire. Catiyequina, yariariquina gũhũ tiquiro mehnata ijieta. Sa yena ijiphtina tiquiro mehna ijinata mari tiquiro yequina ijina.¹¹ Sa yena mũa mehna cjēnare yojoꝛũ mũa bucuẽgũ yeriro saha mũa basita bucuẽgũ ye nemoña mũa. Sa yena mũa basita Cohăcjũre wacũ tutua nemogũ yeya mũa mehna cjēnare.

Jesu yequinare Pablo yahu bato tiahye

¹²Mũsare buheyequinare mari puhtoro buhe dutiro beseri jiri. Tiquiro sa ni besenohriquinare quehnoano ño peoya mũa. Mũa sa ño peogũ cahmegũ mũsare tutuaro dutiaja.¹³ Tiquina dahrayere yegũ tiquinare cahĩne mehna quehnoano ño peoya. Sa yena mũa mehna cjēna mehna cahmequeno marieno ijiya.

¹⁴Mũsare usã acayere, ahrire tutuaro dutiaja: Dahra dueyequinare dahra dutiya mũa. Bũjua witiyequinare bucuẽgũ yeya mũa. Jesure wacũ tutuera cjũnequinare yedohoya. Tiquina ijiphtiyequina mehna quehnoano usuaro marieno bucuẽye mehna ijiya mũa.

¹⁵ Ihcãquiro m̄sare tiquiro ñano yegũ ihñana tiquirore ñano ye cahmedacãhña. Sa yena m̄sa mehna cjẽnare, ijipihtiyequina apequina gãhure quehnoano yeya.

¹⁶ Sa yena decoripe sa bucueducuya m̄sa. ¹⁷ Sa yena decoripe Cohãcjũre siniducuya. ¹⁸ M̄sa ñano yũhd̄epenata Cohãcjũre bucue, “Quehnoare”, niña. M̄sa quehnoano yũhd̄uri pje gãhure “Quehnoare”, niña. Sa nina Cohãcjũ cahmeno sahata yena niaga m̄sa. Cristo Jesu yequina m̄sa ijigũ ihñano m̄sa sa nigũ cahmene tiquiro.

¹⁹ Espĩritu Santore yũhtiena ijieracãhña. ²⁰ Espĩritu Santo masiñe mehna apequina m̄sare buhere. Tiquina sa buhegũ ti buheyere yũhtiena ijieracãhña. ²¹ Apequina m̄sare sijoro saha tiquina ni buhegũ ti Cohãcjũ ye ijieragũ masiña m̄sa. Sa yena Cohãcjũ ye buheye ti ijigũ gãhure masiña m̄sa. Sa masina quehnoañe buheye dihitare cahmeña. ²² Sa yena ijipihtiye ñañene yeracãhña m̄sa.

²³ Cohãcjũ marine quehnoano ijigũ yeriquiro ijire. Tiquiro basi m̄sare

tiquiro yequinare quehnoana, ñañe mariena ijigũ ye nemoahdo m̄sare. M̄sa paguri gãhure m̄sa jeripohnari gãhure quehnoano ihña ihboahro. Mari pũtoro Jesucristo ahri yehpapure tiquiro tojoa tato pano m̄sare Cohãcjũ quehnoano ihña ihboahro m̄sare “Ñañene yeari”, nino. Tiquiro sa yegũ Cristo ahtagũ ñañe mariena ijinata m̄sa. ²⁴ Sata ijigũ yerota Cohãcjũ. Tiquiro m̄sare beseriquiro tiquiro nidiro sahata yere.

Pablo gãhu quehnoa dutiahye

²⁵ Uã ye ijiatire Cohãcjũre sini basaya m̄sa, uã acaye.

²⁶ M̄sa mehna cjẽnare quehnoano mehna piti caya.

²⁷ Ijipihtiyequina Jesu yequinare ahri pũre buheya m̄sa. Jesu mari pũtoro dutiye mehna ahrire m̄sare dutiaja yũhu.

²⁸ Jesucristo mari pũtoro cahĩne mehna m̄sare tutuaro quehnoa dutiaja.

2 Tesalonicenses

Pablo ojoa ohoahye Jesu yequinare Tesalónica cjênare

1 Yuhu Pablo, Silvano, Timoteo gũhu musare quehnoa dutiaja. Sa yegũ yuhu Pablo ahrire ojoa ohoaja. Mũsa pehe Tesalónica cjãna mari Pacũ Cohãcjũ yequina ijire. Mari puhtoro Jesucristo yequina gũhu ijire mũsa. ²Sa yena Cohãcjũ mari Pacũ, mari puhtoro Jesucristo mehna musare quehnoa dutiaja. Tiquina yedohoye mehna quehnoano ijiya mũsa.

Ahri yehpapũre Cristo tojoa tagũ buhiri dahrerota Cohãcjũ

³Cohãcjũre sinina, Jesure mũsa wacũ tutuayere wacũna “Quehnoa yuhduare usãre”, niducuaja usã Cohãcjũre. Usã sa nigũ quehnoarĩne. Decoripe Cohãcjũre mũsa quehnoano wacũ tutua nemonã niñohti. Sa yena decoripe mũsa mehna cjênare cahĩ nemonã niñohti mũsa. Sa ye Cohãcjũre “Quehnoa yuhduare usãre”, usã ñigũ quehnoarĩne. ⁴Apequina musare ñano tiquina yepegũta Jesure wacũ tutuaducuñohti mũsa yojopũ gũhure. Sa yena tiquirore wacũna duhuerañohti. Mũsa sa yegũ ihñana tire mũsa yerire apequinare Cohãcjũ yequinare bucueye mehna yahuaja usã. ⁵Sa wacũ tutuaducuna Cohãcjũ mari puhtoro yequina mũsa ijiri buhiri ñano yuhdũna niñohti mũsa. Sa yero Cohãcjũ tiquiro puhtoro ijiropũre waha dutiri jiri musare. Tiquiro sa dutigũ queoro yeriquiro tiquiro ijigũ masiaja mari.

⁶Sa yero Cohãcjũ queoro yeriquiro ijire. Sa yero musare ñano yuhdũgũ yeyequina pehere ñano yuhdũgũ yerota tiquiro. ⁷Sa yero mari ñano yuhdurina ijigũ ihñano tiquiro marine quehnoano ijigũ yerota. Mari puhtoro Jesu tiquiro

yequina angele tutuayequina mehna, peca mehna uhmũsepũ bajuaro quehnoano ijigũ yerota marine, ñano yuhdurinare. ⁸Sa yero Cohãcjũre masieñequinare, mari puhtoro Jesu ye buheyere quehnoañe buheyere yuhdũducariquinare Cohãcjũ buhiri dahrerota. ⁹Sa yero Cohãcjũ tiquinare ohõ saha buhiri dahrerota: Pecapũ tiquina ñano yuhdũducueta. Sa ye tiquina tutuariquiro mari puhtoro Jesu cahapũ ne waha masiedare. Sa ye tutua yuhduariquiro tiquiro ijiyere ihñasi tiquina. ¹⁰Sata waharota ti decopũ Jesu tiquiro tojoa tagũ. Ti decopũta tiquiro ahtarota tiquiro yequina “Quehnoariquiro, tutuariquiro ijire Jesu”, tiquina ni ño peoatire. Sa ye tiquirore wacũ tutuayequina ño peoeta tiquirore. Musare usã buherire mũsa quehnoano tũhori. Sa yena mũsa pehe tiquiro mehna ijinata.

¹¹Sa yena Cohãcjũre sa sini basaducuaaja usã mũsa ye ijiatire. Ohõ saha ni Cohãcjũre sini basaja usã: Tiquiro cahmeno sahata mũsa yeatire, mũsa mehna tiquiro bucueatire sini basaducuaaja usã musare. Mũsa quehnoana iji duanata niñohti. Sa yena Cohãcjũ tutuaye mehna quehnoana mũsa iji duariro sahata mũsa ijiatire sini basaducuaaja usã. Mũsa Cohãcjũre wacũ tutuañohti. Sa wacũ tutuana tiquiro yere yeñohti mũsa. Tire mũsa quehnoano ye nemoatire Cohãcjũre sini basaducuaaja usã musare. ¹²Sa yena mari puhtoro Jesucristore apequinare tiquina ño peogũ yenata mũsa. Mũsa sa yegũ Jesucristo yequina mũsa ijigũ ihñañe apequina ño peoeta musare. Cohãcjũ cahĩne mehna, mari puhtoro Jesucristo gũhu tiquiro cahĩne mehna sa waharota.

Ñano yeducuriquirore yahuahye Pablo

2 Yojopũre mari puhtoro Jesucristo ahri yehpapũre tiquiro tojoa tatire,

tiqirore mari cahmecoa mari piti catire yahu nemo duaja yuhũ. Ahrire tutuaro yahu duaja musare, usã acaye. ²Apequina musare ohõ saha niboaga: “Mari puhtoro tiqiro tojoa tati deco, mianogã pihtiri decopũ ijiro nine”, ni mehoboaga musare. Tiquina sa nigũ tuhona, tuho mariedacãhña. Sa yena tuho wisieracãhña. “Cohãcjũ yuhure sata nidi ijiri”, ni mehoboaga musare apequiro. Apequiro gũhu musare buhero, sata ni mehoboaga. Apequiro gũhu sata ni ojoa ohoboaga, “Yuhũ Pablota iji-aja”, ni meho ojoaro. Tire musare yahuriqirore masiedaja yuhũ. ³Apequina musare tiquina ni mehogũ tuhoeracãhña musa. Ti decopũ ahri yehpa pihtiato panogã peyequina masa Cohãcjũre duhueta. Sa yero ti decopũ ñano yeducuriqiro pecapũ wahatiqiro ijirota. ⁴Tiqiro Cohãcjũ warore, “Cohãcjũ ijire”, tiquina niñe queoye gũhure ijipihtiyequina masare ño peo dutisi ñano yeducuriqiro. Tiqiro ohõ saha ni tuhoturora. “Ahriquina ijipihtiyequina puhto tjiaja yuhũ”, ni tuhoturora. Sa yero Cohãcjũ wuhupũ dujiro “Yuhũ pehe Cohãcjũ ijiaja”, ninota.

⁵Musa mehna ijinigũ tireta yahuu musare. ¿Tire wacũajari musa? ⁶Yojopũre apequiro pehe ñano yeducuriqirore ne iji dutieranine. Sa yena tiqirore iji dutieriqirore masine musa. Sa yero tiqiro dutigũ tiqiro queori deco ijigũ ñano yeducuriqiro ijirota. ⁷Yojopũre masa ihñenopũ tiqiro yero saha apequina ñañene ye tuhasari. Tiquina sa yepegũta ñañene ye dutieriqiro tiqiro wahato pano ñano yeducuriqiro pehe ijisi. ⁸Tiqiro wahari bato pũritare ñano yeducuriqirota ijirota. Sa yero came mari puhtoro Jesucristo tiqirore yaria dutirota. Tiqiro asi siteye mehna ahri yehpapũ tojoa taro, tiqiro putiye mehna tiqirore wejẽ borota.

⁹Ñano yeducuriqiro pehe watĩno ye tutuaye mehna ahtaro, ti tutuaye mehna ni meho, peye ye ihñonota. ¹⁰Tiqiro peye ñañe mehna ni mehogũ pecapũ wahatiqina pehe tiqirore tuhoeta. Tiquina pehe quehnoañe buheyere cahmedare. Tiquina sa cahmedagũ Cohãcjũ tiquinare pecapũ wahatiquinare yuhduosi. Sa ye tiquina ñano yeducuriqiro ni mehoriqiro tiqiro yerire “Ijirota ijire”, nieta. ¹¹Sa yero, quehnoañe buheyere tiquina cahmedari buhiri Cohãcjũ tiquinare wisiagũ yerota. Sa wisiaye ni mehoñene cahmeeta tiquina. ¹²Sa yero ijipihtiyequina quehnoañe buheyere tuho dueyequinare, ñañe ye coayequinare tiqirota buhiri dahrerota.

“Cohãcjũ musare beseahye tiqiro yequina ijigũ yero taro”, ni yahuahye Pablo

¹³Musa usã acaye, mari puhtoro Jesu tiqiro cahñona ijire musa. Duita coã waropũreta musare pecapũ wahaborinare tiqiro yuhduoatinare Cohãcjũ beseahye musare. Musare beseahye Espĩritu Santo tutuaye mehna tiqiro yequina ñañe mariena musare ijigũ yero taro. Sa yero quehnoañe buheyere “Ijirota ijire”, nianaja musa ijigũ ihñano musare bese neahye. Tiqiro sa besenohrina musa ijigũ ihñana Cohãcjũre bucuenta, “Quehnoare”, niducuaja usã. ¹⁴Quehnoañe buheyere musare usã buhegũ Cohãcjũ musare beseahye mari puhtoro Jesucristo tiqiro masa mũjariro sahata musa gũhu masa mũjatire.

¹⁵Sa yena quehnoano wacũ tutuana ijiya musa. Sa yena usã yahuducuye mehna usã ojoari pũri mehna musare usã buherire quehnoano wacũña musa. Sa yena ti buheyere yuhdu-

caeracãhña. ¹⁶Mari puhtoro Jesucristo tiquiro basi, Cohãcjũ mari Pacu gãhu marine cahĩne, ijipihtiye decori marine bucuegũ yere. Marine cahĩne, marine pecapu wahaborinare yuhduoeta. Sa yena Cohãcjũ tiquiro yuhduoatire quehnoano masina, bucueaja mari. ¹⁷Jesucristo, mari Pacu mehna musare quehnoa dutiaja quehnoano musa bucueatire. Sa ye ijipihtiye quehnoañene musa yeatire, musa quehnoano yahudu-cuatire Cohãcjũre musare sini basaja.

“Usã ye ijiatire Cohãcjũre sini basaya”, ni ojoahye Pablo gãhu

3 Yojopu usã acaye, usã ye ijiatire Cohãcjũre sini basaya mari puhtoro Jesu ye buheyere peyequina masare usã buheatire. Sa yena tiquiro ye buheyere musa quehnoano cahmediro sahata apequina pehe ti buheyere ño peoye mehna tiquina cahmeatire sini basaya musa Cohãcjũre. ²Ihquẽquinata Jesure wacũ tutuare. Apequina pehe tiquiro yere tuho derae, Jesure wacũ tutuerare. Sa yena ñañequina masa usãre tiquina ñano ye duagũ Cohãcjũre sini basaya musa usãre tiquiro yedohogũ. ³Mari puhtoro Jesu tiquiro nidiro sahata yeriquiro ijire. Sa yero musare tiquirore wacũ tutuagũ yerota. Sa yero watino musare tiquiro ñano ye dutigũ Jesu musare yedohorota. ⁴Cohãcjũ musare tiquiro yedohorire masiaja usã. Sa yena musare usã dutiriro sahata musa yegũ gãhure masiaja usã. Sa yena sata yeducunata musa. Ti gãhure masiaja usã. ⁵Cohãcjũ musare tiquiro cahĩnene musare masigũ yeahro. Sa yero Cristo yero saha musa ñano yuhduepegũta ihcãno sahagũ yeahro musare mari puhtoro. Sa ihña cãhña musare ñano yeyequinare.

Marine tutuaro dahraro cahmene

⁶Jesucristo mari puhtoro tiquiro dutiro mehna ohõ saha ni dutinatja

musare: Jesu yequinare dahra dueyequinare, usã dutiyere yeyequinare, tiquinare piti ti duhuya. ⁷Sohõ ijiri pje musa mehna usã ijigũ tutuaro usã dahragũ ihñari musa. Sa yena usã yeriro saha musa gãhure dahraro cahmene. Tire quehnoano masine musa. ⁸Sa yena musa ihyayere wapa yero marieno ihyeru usã. Sa yena decopre, ñamipũ gãhure tutuaro dahra usã “Musa ihyayere siniari”, nina. ⁹Usã buheri wapa musare wapa ye dutiboaga usã. Sa wapa ye dutiborina ijiepenata wapa ye dutierana, tutuaro dahra usã, usãre musa ihña cãuatire. ¹⁰⁻¹¹Musa mehna ijina, ohõ saha ni buhei musare: “Dahraeyequina ihyeracãhdo”, ni buhei usã musare. Ihquẽquina musa mehna cjẽna ne dahra duerañohti. Sa ye apequinare ñano quti yeye, caribo yuhduãñohti tiquina. Sa yeyequina musa mehna tiquina ijigũ ihñana ohõ saha ni ojoaja musare: “Dahraeyequina ihyeracãhdo”, ni aja usã. ¹²Mari puhtoro Jesucristo tiquiro dutiro mehna dahra dueyequinare ohõ saha ni aja: Quehnoano bucueye mehna dahrauro quehnoano tiquina ijiatire.

¹³Usã acaye, musa pehe quehnoañene yeducuna caributieracãhña.

¹⁴Ihquẽquina to cjẽna ahrire usã ojoarire yuhduucaboaga. Tiquina sa yegũ tiquina yerire quehnoano ihñaña. Sa ihñana tiquinare piti ti duhuya tiquina buoro wahatire. ¹⁵Sa piti ti duhuepenata tiquinare ihña tuhtieracãhña. Tiquina musa acaye, Jesu yequinata ijire. Tiquina sa ijigũ tiquina yuhduucarire yahuya tiquinare tire tiquina duhugũ.

Pablo tiquinare quehnoa duti bato tiahye

¹⁶Mari puhtoro Jesu marine quehnoano ijigũ yeriquiro mehna decoripe quehnoano ijiducuya musa.

Sa yegũ “Mari puhtoro m̄sa mehna ijipihtina mehna ijiducuahro”, nigũ m̄sare quehnoa dutiaja.

¹⁷ Yũhũ Pablo, yũhũ omoca mehnata yojopũre yũhũ basita oja bato tiaja. Sa yegũ m̄sare quehnoa dutiaja. Ijipih̄tiye yũhũ ojaari pũrine oh̄ saha dihita

yũhũ omoca mehna oja bato tiaja yũhũ. Yũhũ oh̄ saha dihita yũhũ oja bato tigũ ih̄nana yũhũ ojaari pũ ijigũ masinata m̄sa. ¹⁸ Mari puhtoro Jesucristo cahĩne mehna tutuaro quehnoa dutiaja m̄sare ijipih̄tinare.

1 Timoteo

Pablo Timoteore ojoa ohoahye

1 Yuhũ Pablo ahrire mũhũre Timoteore ojoa ohoaja. Cohãcjũ marine pecapũ wahaborinare yuhũdũoriqiro ijire. Jesucristo yere buhe duti tiqiro cũrigũ ijiaja yuhũ. Mari Pacũ, Jesu mehnata tiquina dutiriro sahata tiqiro cũrigũ ijiaja yuhũ. Jesuta marine yedohore. Sa yena marine tiqiro yuhũdũoatire masina, tire cohteaja mari. ²Mũhũre Timoteore Jesu yere buhei. Yuhũ sa ni buhegũ tuhogũ Jesure wacũ tutua dũcarĩ mũhũ. Sa yegũ mũhũ potota yuhũ macũ yero saha ijigũta nine. Sa yegũ Cohãcjũ mari Pacũ mehna, mari pũhtoro Jesucristo mehna mũhũre quehnoa dutiaja. Sa yegũ mũhũre paja ihñañe tiquina yedohoye mehna quehnoano ijiya mũhũ.

Pablo ni mehoñe buheyere buhe dutierahye

³Sohõ ijiri pjere Macedonia yehpapũ wahagũ mũhũre Efesopũ cũ yuhũdũ cãũ. Topũ ihquẽquina tiquina ye buheyere ni mehoñe buheyere buheyequina ijiri. Ti buheyere buhe dutieracjũre mũhũre cũu yuhũ. ⁴Tiquina esa tuharo sa buhe maca cãre. Sa ye tiquina acaye panopũ cjẽna tiquina esa tuharo tiquina buherire sa buheducure. Ti buheye mehna apequina mehna cahme dũse tutuaducure. Cohãcjũ marine tiqiro dutirire quehnoano yegũ yerare tiquina sa buheye. Cohãcjũ ye pehere yena tiqirore wacũ tutuaja. Sa yegũ tiquina esa tuharo tiquina buherire buhe dutieracjũre cũu mũhũre.

⁵Sa cũu mũhũre Jesu yequina apequinare “Cahĩahdo”, nigũ. Ñañe buhiri marieno mehna, quehnoañe wacũñe mehna, poto Cohãcjũre wacũ tutuaye mehna apequinare tiquina

cahĩatire sa cũu mũhũre. ⁶Ihquẽquina ahri quehnoañe buheyere cohã tuhasa, apeye buheye pehere cahmene. Sa ye ti buheye pehere cahme dũse tutuaye wisia wahare. Ti buheyere tiquina cahme dũse tutuaye ti dũhseati ijierare. ⁷Sa ye tiquina Cohãcjũ dutiyere buheyequina iji duamene. Sa buhe duepeta ti buheyere tiquina basi quehnoano masiedare. Sa ye ti buheyere masiñequina yero saha buhepeta ti buheyere ne masiedare tiquina.

⁸Cohãcjũ dutiyere Moise marine tiqiro cũrire queoro mari buhegũ quehnoañe dutiye ijire. Tire mari quehnoano masiaja. ⁹⁻¹⁰Ti dutiyere buhena ahrire masino cahmene: Ti dutiye quehnoañequinare tiquina buheati ijierare. Ahriquina pehere tiquina buheati ijire. Dutiyere yuhũdũdũcayequinare, Cohãcjũre yuhũdũdũcayequinare, ñañe dihitare yeyequinare, Cohãcjũre cahmeeñequinare, tiquina pacũsumũare wejẽñequinare, tiquina pacosãnumia gũhũre wejẽñequinare, apequina masare wejẽñequinare, wũana tiyequinare, cahme numia mehna tiquina ñano yeriro saha mũmũa sehsaro o numia sehsaro ijiepeta tiquina pagũri mehna ñano yeyequinare, masa tiquina ijiepegũta tiquinare duayequinare, ni mehoñequinare, Cohãcjũ dutiye Moise marine tiqiro cũri pehe tiquinare buheati ijire. Sa yero apequina ijipihtiyequinare quehnoañe buheyere yuhũdũdũcayequinare buheati ijire Cohãcjũ dutiye. ¹¹Quehnoañe buheye pehe quehnoariqiro Cohãcjũ tiqiro ye buheyeta ijire. Ti buheye pehere yuhũre Cohãcjũ buhe dutiri.

Cohãcjũ paja ihñañe yahuahye Pablo

¹²Sa yuhũ buhegũ Jesucristo mari pũhtoro yuhũre tutuayere ohoro, yuhũre

yedohore. “Pablo buhero, yee buheyere quehnoano buherota”, ni tuhotori Jesu yuhure. Sa yero yuhure besero tiquireore yedohoacjüre cūri yuhure. Tiquiro sa yegū “Quehnoare”, ni aja yuhū tiquireore. ¹³ Panopure Cristore yuhū ñano yahuducuepegūta, tiquireo yequinare ñano yuhū yepegūta, tiquireo yuhure beseri. Sa yegū tiquireore masiedarīgū tiquireore ñano yegū “Ñano yei niaga yuhū”, ni tuhotori. Yuhū sa masiedagū ihñano tiquireo paja ihñari yuhure. ¹⁴ Sa yero Cohācjū mari puhtoro yuhure tutuaro cahño, quehnoano yeri yuhure. Sa yero Cristo Jesure wacū tutuagū yeri yuhure tiquireo. Sa yero apequinare cahīgū yeri yuhure Cohācjū.

¹⁵ Yuhū pehe apequina yuhduoro ña yuhduagu ijimi. Nana mari ijiepegūta Jesucristo ahri yehpapū ahtari jiri ñañequinare pecapū wahaboriquinare yuhduoatiquireo. Ti ijirota ijire. Tiquiro sa ijiriquireo ijigū ijipihtiequina tire masiahdo. ¹⁶ Ña yuhduagu yuhū ijiepegūta tiquireo yuhure paja ihñari. Sa paja ihñano Jesucristo usuario marieno yuhure tiquireo quehnoano yerire masigū yero nidi apequinare came tiquireore wacū tutuatiquireo masigū yero taro. Sa wacū tutuatiquireo uhmusepū sa ijiducuetā. ¹⁷ Cohācjū ijipihtie decori masa puhtoro ijire. Tiquiro ne yariere. Sa yero mari mehna tiquireo ijiepegūta tiquireore ihñedaja mari. Sa yero tiquireo dihita Cohācjū waro ijire. “Potota quehnoariquireo, tutuariquireo ijire tiquireo”, ni ihna mari tiquireore. Ijipihtie decori tiquireore ño peouhna. Sata yeihna.

¹⁸ Timoteo yuhū macū yero saha ijire mūhū. Sa yegū yojopure ahrire mūhure dutiaja: Mari acaye Jesu yequina Cohācjū yere yahu mūhtariquina mūhure tiquina ni mūhtariro sahata mūhure dutiaja. Cristo yere quehnoano yahuducuya.

Sa yegū ñano yuhdupegūta tiquireore wacū tutua duhueracāhña mūhū. ¹⁹ Jesure sa wacū tutuaducuya. Ñañe buhiri mariegu ijiya mūhū. Sa yegū quehnoañe dihitarē yeya. Ihquēquina tire yeraye, Jesu yere cohāre. Sa cohāne tiquireore wacū tutua duhuri. ²⁰ Sata yeri Himeneo, Alejandro mehna. “Watino tiquireo cahmeno sahata yecūnahdo musare”, ni cūu tiquireore, Cohācjūre tiquina ñano yahuducu nemoedatire.

Cohācjūre sini basayere yahuahye Pablo

2 Yojopure ohō saha ni duti mūhtaja musare: Ijipihtiequina ye ijiatire Cohācjūre sini basaya. Sa sini basana “Quehnoare. Bucueaja”, niña Cohācjūre. ² Puhtoa, apequina masa bui dutiequina gūhū tiquina ye ijiatie gūhure Cohācjūre sini basaya, cahmequeno marieno Cohācjūre ño peona mari quehnoano ijiatire. Sa sini basana mari quehnoañene yena quehnoano iji masiaja. ³⁻⁴ Sata apequina ye ijiatire mari sini basagū quehnoarīne. Tire mari yegū ihñano Cohācjū marine yuhduoatiquireo pehe marine quehnoano ihña bucuere. Ijipihtiequina pecapū wahaboriquinare tiquireo yuhduoriquina ijigū cahmene Cohācjū. Sa yero quehnoañe buheyere tiquina masigū cahmene tiquireo. Sa yero apequina ye ijiatire mari sini basagū bucuere tiquireo. ⁵ Ihcāquiota ijire Cohācjū. Sa yero Cohācjūre mari ihña tuhtigū Cohācjū gūhū marine tiquireo ihña tuhtigū, marine bosariquireo ihcāquiota ijire. Tiquiro Jesucristota ijire. Jesucristo gūhū masūnota ijiri. ⁶ Sa yero wapamonore wapa ye basaro saha ijipihtina mari ñañe buhirire yariahye. Cohācjū tiquireo queori pjepe tire masare masigū yeri. ⁷ Tire yahuaacjüre, Jesu tiquireo cūacjüre Cohācjūpe yuhure beseri. Sa yero judio masa ijieyequinare

Jesure wacū tutuayere, quehnoañe buheyere buheacjüre beseri yuhure. Potota musare yahugū niaja yuhū. Ni mehoedaja.

⁸ Cohācjū yere quehnoano yeyequina, ijipihtiro cjēna pehe Cohācjüre tiquina sinigū cahmeaja. Sa yegū tiquina usuaro marieno, unureno marieno tiquiro mehna tiquina yahuducugū cahmeaja.

⁹ Sa yegū numia pehere quehnoañequina numia ye suhti yero saha sañañequina numia ijigū cahmeaja. Sa ye sijoro saha bajuye poari tiquina poaire yeracāhdo. Uru dari busaye darire, perla dari gūhure busaeracāhdo, tiquina umuare “Ihña ũe pjeari”, niñe. Sa ye wapa bujūye suhtire sañaedacāhdo tiquina Jesu yequina numia. Umuare tutuaro ũe pjegū yeracāhdo. ¹⁰ Sa ye tiquina numia quehnoañe pehere yeahro. Sata yero cahmene “Cohācjū yequina numia ijiaja”, niñequina numiare. ¹¹ Dihta marieno ño peoye mehna buheyere tūhoahro tiquina numia. ¹²⁻¹⁴ Sa yeye numia umuare buheracāhdo. Sa yeye umuare dutieracāhdo. Tiquina numia pehe dihta marieno ijiahro. Adāre Cohācjū ye muhtahye. Tiquiro bato Evare yeahye. Sa yero watīno ni mehogū tūhoriquiro Adán ijierahye. Tiquiro ni mehogū tūhoricoro pehe Eva ijiahye. Sa tiquiro ni mehogū tūhoro, Cohācjüre yūhduducaricoro wahahye ticoro. Sa yeye, numia pehe umuare dutieracāhdo.

¹⁵ Numino iji muhtaricoro ticoro yūhduducapegūta numia tiquina pohna tigū ihñano tiquinare Cohācjū yedohorota. Tiquina numia pohna tiye numia pehe Cohācjüre tiquina wacū tutuaducugū tiquiro yedohorota tiquinare. Sa yero masare, Cohācjū gūhure tiquina cahiducugū, quehnoañequina numia tiquina ijiducugū, ñañe marieñequina numia

tiquina ijigū Cohācjū tiquinare yedohorota.

Jesu yequina puhto a tiquina yeaire yahuahye Pablo

3 Masa Jesu yequina puhto a iji duaye, quehnoañene ye duaye niaga tiquina. Ti ijirota ijire. ² Jesu yequina puhtoare besegū ohō saha ijieyequinare beseya: Buhiri marieñequinare beseya “Apequina tiquinare ñano ni yahusāri”, nigū. Sa yegū ihquēquina numiare namo tiyequinare, quehnoano tūho masieñequinare, cua pesayequinare, masare quehnoano mehna tiquina ya wūhure sajā ta dutiyequinare, apequinare quehnoano buhe mihniñequinare beseya mūhū. ³ Sa besegū queheye marieñequinare, cahmequeñe marieñequinare, masare quehnoano yeyequinare, cahme duse tutueyequinare, niñerure cahieñequinare beseya mūhū. ⁴ Sa ye mūhū beseriquina tiquina pohnene, tiquina namosānumia gūhure ño peoye mehna yūhtigū yeyequina ijiahro. ⁵ Tiquinare yūhtigū ye masiedaye Jesu yequina gūhure yūhtigū ye masiedaboaga tiquina.

⁶ Jesu yequina puhto a iji duayequina Jesu yequina coā sajāñequina ijieye, tiquina puhto a iji masiedare. Coā sajāñequinare Jesu yequina puhto a musa cūgū tiquina “Quehnoa yūhduana ijiaja”, ni tūhotuboaga. Tiquina sa ni tūhotugū Cohācjū tiquinare buhiri dahre dutirotā watīnore tiquiro yeriro saha. Watīno gūhū sata ni tūhotumahye Cohācjüre yūhduduca duaro.

⁷ Sa ye Jesu yequina puhto a ijiatiquina ohō sahata ijiro cahmene. Jesu yequina ijieyequina tiquina ño peonohñequina ijiro cahmene tiquinare. Quehnoano yeyequina tiquina ijigū ihñañe apequina ño peoeta tiquinare. Sa quehnoano yeye, watīno cahmeñene wacūeno mehna

tiquiro ye dutigū tiquina pehe watīno cahmeñene yesi. Sa ye masa tiquinare ñano quiti dahresi.

Jesu yequinare yedohoatiquina tiquina yeatire yahuahye Pablo

⁸ Sa yegū Jesu yequinare yedohoatiquina pehere besegū ohō saha ijiye-quinare beseya: Tiquina cua pesaro ijiye-quinare, quehnoano potota yahuducuyequinare, queheye marieñequinare, apequina yere ni meho ehmeñequinare beseya mūhū. ⁹ Sa yegū ñañe buhiri marieno Cohācjū ye buheyere sa wacū tutuaducuyequinare beseya mūhū. ¹⁰ Sa yegū Jesu yequinare yedohoatiquina iji duayequinare tiquina yerire ihñaña mūhū. Tiquinare mūhū sa ihñari bato tiquina pehe buhiri marieñequina ijiye, Jesu yequinare yedohoatiquina sa jāahdo tiquina.

¹¹ Sa yena tiquina namosānumia ohō saha tiquina ijigū cahmeaja mari. Cua pesayequina numia, ñañe quiti marieñequina numia, tuho masiñequina numia, ijiptiyere quehnoañene yeducuyequina numia tiquina ijigū cahmeaja mari. ¹² Sa yegū Jesu yequinare yedohoatiquinare besegū ihquēquina numiare namo tiyequinare, tiquina pohnene apequina tiquina ya wūhū cjēna gūhūre quehnoano yūhtigū yeyequinare beseya.

¹³ Sa ye mūhū beseriquina Jesu yequinare tiquina yedohogū apequina tiquinare quehnoano ihña bucueta. Sa ye tiquina yedohoyequina pehe quehnoañe buheyere, Jesucristore tiquina wacū tutuaye gūhūre cuero marieno buheeta tiquina.

Cohācjū ye buheyere yahuahye Pablo

¹⁴⁻¹⁵ Yojoṗure mūhū cahapū waha duagū niaja. Sa waha duepeguta yojoṗure wahaeranigū ahri pūṗu yahu, mūhūre ojoa ohogū niaja. Jesu yequina cahmecoañequina watoa musa yeatire

mūhūre yahu ojoa ohogū niaja, “Mi-anore waharīsi”, nigū. Jesu yequina Cohācjū catiriquiro yequina ijiye. Tiquiro yequina poto ijiye buheyere Cohācjū ye buheyere cuore. Sa cuoye tire buheducure. ¹⁶ Ahri ijirota ijiye. Marine Cohācjū tiquiro buheri, panopū mari quehnoano masiedari quehnoa yūhdūaye buheye ijiye. Ahri buheye ohō saha ijiye:

Tiquiro Cristo mari pagū yero saha pagū tiriquiro masa bajuahye. Quehnoariquiro, ñañe marieniquiro tiquiro ijigū ihñori Espiritu Santo pehe. Angele gūhū tiquirore ihñari. Sa ye tiquiro buhe duti cūriquina pehe apeye yehpari cjēnare tiquiro yere yahu buhere. Sa ye ahri yehparū masa peyequina tiquirore wacū tutuari. Came ūhmūsepū Cohācjū neari tiquirore. Ti ijiye quehnoañe buheye.

Quehnoañe buheyere cohāriquinare yahuahye Pablo Timoteore

4 Espiritu Santo ahrire quehnoano yahure: Pihtiri deco panogā ihquēquina masa Jesu ye buheyere cohāeta. Sa ye ni meho buheyere watīno ye buheye pehere tuho nūnūeta tiquina. ² Ti buheyere ni mehoducuyequina yahueta masare. Tiquina ni mehoducuyequina pehe “Ñañe buhiri mariedare usāre”, ni tuhotuyequina ijiye. Sa ye tiquina ñañe yeyere “Ñañe ijiye”, ni tuhotuerare. ³ Ohō saha ni buheeta tiquina: “Namo tieracāhña. Ahri ihyayere ihyeracāhña”, ni buheeta tiquina. Tiquina sa ihya dutierapegūta Cohācjū ihyayere bajumehnenno mari ihyatire quehnoañene cūahye tiquiro. Mari Cristore wacū tutuana ijigū quehnoañe buheyere mari masina ijigū, mari ye ijiatire ti ihyayere bajumehneahye tiquiro. Ti ihyayere cuona tiquirore “Quehnoare”, mari nigū cahmene

tiqiro. ⁴Ijipihtiye Cohācjū tiqiro bajumehnedi quehnoañe ijire. Sa yena tiqiro bajumehnedi ihayere nena, Cohācjüre “Quehnoare”, nina, tire marine cohāedarō cahmene. Tire marine bucue ihyarō cahmene. Sa yegū apeqina tiqina ihyā dutieragū tūhoeracāhña tiquinare. ⁵Tiqiro bajumehnedi quehnoañe ti ijigū yahu tuhasahye Cohācjū. Sa ye tiqirore “Quehnoare”, mari ni bucueri bato ti ihyaye tiqiro yeri ihyaye quehnoañe waro ijiro nine.

Jesucristo cahacjūnore Timoteore quehnoariqirore yahuahye Pablo

⁶Ahri yūhū yahurire Jesu yequinare mari acayere buhegū Jesucristo cahacjū quehnoagū ijire mūhū. Sa buhegū quehnoañe buheyere, quehnoano mūhū tūhorire quehnoano masi pehogū ijire mūhū. ⁷Sa yegū tiqina esa tuharo tiqina buherire, Cohācjū ye ijieyere tūhoeracāhña. Sa yegū Cohācjū cahmeñe pehere yepogū ijiya mūhū. ⁸Mūhū dahrapogū quehnoa cjüre. Mūhū dahraporiro yūhūoro Cohācjū cahmeñene mūhū yepogū quehnoa yūhūare mūhūre. Cohācjū cahmeñene yepogū yojopūre quehnoano ijigūta mūhū. Sa yegū mūhū yariari batopū gūhūre masa mūjagū quehnoano ijigūta mūhū. ⁹Ti ijirota ijire. Ijipihtieyequina tire yūhū nidire masiñequinare “Ijirota ijire”, nino cahmene tiquinare. ¹⁰Ijipihtieyequina tire tiqina niatire Cohācjū cahmeñene tiqina yeatire mari tutuaro dahraja. Sa yena ñano yūhūaja mari apeqina marine ñano tiqina yegū. Cohācjū catiriquiro, ijipihtieyequinare pecapū wahaboriquinare yūhūoriquiro ijire. Tiqirore wacū tutuayequina pūritare tiqiro yūhūorota. Sa yena tiqiro yūhūoatire masina, cohteaja mari. Sa yena Cohācjū cahmeñe pehere masa

tiqina yeatire tutuaro buhe dahraja mari.

¹¹Ti ijipihtiye yūhū nidire dutiya Jesu yequinare. Sa yegū tire buheya mūhū. ¹²Wahmū mūhū ijigū ihñañe apeqina Jesu yequina mūhūre yūhūdūca duaboaga. Tiquina “Sa yeari”, nigū, ohō saha ye ihñña tiquinare. Masare cahñña. Sa yegū Jesure wacū tutuaducuya. Sa yegū buhiri mariegū ijiya. Wahmū ijiepegūta mūhū sa yegū ihññe mūhūre yūhūdūcasi tiqina. Sa ye mūhū yahuducurire tūhoye, mūhū yerire ihññe mūhūre ihñña cūeta. ¹³Sa yegū mūhū cahapū yūhū esato pano Jesu yequinare Cohācjū yere tiqina ojoari pūre buhe tuhasa tiquinare sa yahu quehnoducuya. ¹⁴Jesu yequina pūtoare Cohācjū tiqiro dutigū tiqina pehe Cohācjū yere yahu tuhasa mūhū bui tiqina omocarine duhu peori. Tiquina sa duhu peogū Cohācjū ye ijiatire mūhū ye masiatire cūri mūhūre Cohācjū. Tiqiro sa cūrire ye duhueracāhña.

¹⁵Ahri dutiyere sa yeducuya mūhū. Sa yegū ahri dutiyere quehnoano masiña. Mūhū sa yeri bato quehnoañene mūhū ye nemogū ijipihtieyequina ihññaeta. ¹⁶Mūhū pehe quehnoano yeya mūhū, “Sijoro saha yeari”, nigū. Sa yegū quehnoano buheya mūhū, “Sijoro saha buheari”, nigū. Sa yegū mūhū basita pecapū wahaborigū yūhūgūta mūhū. Sa ye mūhūre tūhoriquina gūhū pecapū wahaboriquina yūhūeta.

“Apeqina Jesu yequinare ohō saha yeya mūhū”, niahye Pablo Timoteore

5 Ne bucūrore tuhtieracāhña. Mūhū pacūre mūhū quehnoano yeriro sahata bucūro gūhūre quehnoano mehna yahuya. Sa yegū mūhū bahanare mūhū quehnoano yeriro sahata wahma pjia gūhūre quehnoano ño peoro mehna tiquinare yahuya. ²Sa yegū mūhū pa-

core m̄h̄u quehnoano yeriro sahata b̄ac̄na numia ḡūh̄ure quehnoano ño peoye mehna yahuya. Sa yeḡu m̄h̄u bahana numiare m̄h̄u quehnoano ño peoriro sahata nuhmia ḡūh̄ure ñano ʉ p̄ero marieno, quehnoano ño peoye mehna yahuya tiquinare.

³Sa yeḡu wape wiha numiare potota acaye marieñequina numiare ño peoye mehna yedohoya tiquinare.

⁴Wape wihoro pohna tiororo ijiḡu, o panamena tiororo ticoro ijiḡu ḡūh̄ure ticoro pohne, ticoro panamena ḡūh̄u yedohoahro tiororo. Sa yedohoye Coh̄ācj̄ū masare tiquina acayere tiqiro ye dutiyere yeye nine tiquina. Sa yeye tiquina tiororo wapamonore wapa yeye niaga. Tiquina sa yeḡu ih̄ñano Coh̄ācj̄ū quehnoano bucuere. ⁵Pejec̄uoricoro, wape wihoro acaye marienioro ijiro, Coh̄ācj̄ū tiororo tiqiro yedohoatire cohtere ticoro. Sa yero ñaminipe, decoripe ticoro Coh̄ācj̄üre sa siniducure. ⁶Apecoro pehe wape wihoro ñañe mehna bucue duarioro ijiro ticoro catiororo ijieperota pecap̄u wahaticoro ijire.

⁷Ahri ijipihtiye ȳh̄u yahurire Jesu yequina ḡūh̄ure ye dutiya m̄h̄u, quehnoañe dihitare tiquina yeatire. Tiquina sa yeḡu ih̄ñañe apequina tiquinare “Ñano yeye nine”, ni masiedare. ⁸Ihc̄āquiro tiqiro acayere ih̄ña ihboeraro, tiqiro pohne tiquina pacoro ḡūh̄ure quehnoano ih̄ña ihboeraro “Jesu yaquiro ijiaja”, ni masiedare. Sa yero Jesure cahmeeñequina ȳh̄uoro ña ȳh̄uariquiro ijire tiqiro.

⁹Wape wiha numiare yedohonata m̄sa. Oh̄o saha beseya m̄sa yedohoatiquina numiare. Tiquina wamene ojoa oh̄oti p̄up̄u ojoagu taḡu oh̄o saha beseya tiquina numiare: Sesenta c̄uh̄mari c̄uoricoro ticoro wamene ojoa oh̄edac̄h̄ña. Sa yegu

wape wihoro ihc̄āquiroreta man̄u timedicorore ticoro wamene ojoa oh̄ña. ¹⁰Sa man̄u timediquina numiare “Quehnoañene yeyequina numia ijire”, masa tiquina niñequina numiare, tiquina pohne quehnoano masori numiare beseya. Sa yeḡu tiquina ye w̄h̄usep̄u apequinare quehnoano sajt̄a dutiyequina numiare, cahac̄j̄ena yero saha Jesu yequinare yedohoye numiare, tiquina dahpoc̄arine coseri numiare, ñano ȳh̄duyequinare yedohoye numiare, quehnoañe dihitare yeye numiare beseya. Tiquina numiare m̄sa yedohoati numiare bese tuhasagup̄u, tiquina wamene ojoa oh̄ña m̄h̄u.

¹¹Sa ye wape wiha numia nuhmia c̄j̄ūno tiquina ijiḡu tiquina numia pehere beserac̄h̄ña. Sa yeḡu ti p̄up̄u tiquina wamene ojoa oh̄edac̄h̄ña. Came tiquina yere tutuaro ye duaye, Cristore coh̄ā, pari turi man̄u tiboaga.

¹²Tiquina Cristore “M̄h̄u yequinare yedohonatja”, nidiquina numia ijiepetata camep̄ure tiquina nidiro sahata yedohoeraboaga tiquina. Tiquina sa yedohoerari buhiri buhiri tieta.

¹³Tiquina numia oh̄o saha yere: Dahraeye numia ijipore. Sa ye apequina ye w̄h̄usep̄u waha, ñañe quiti dahre, sijoro saha mari yeḡu marine sa yahuducure. Sa ye tiquina yahu dutierarire yahu wajare tiquina numia.

¹⁴Sa yeḡu tiquina numia oh̄o saha yeḡu cahmeaja ȳh̄u: Wape wiha numia nuhmia c̄j̄ūnoḡa ijiye numia man̄u tiahro. Sa ye Jesu yequinare “ʉs̄are yedohoya”, nino marieno ijiahro tiquina numia. Sa ye tiquina pohna tiahro. Sa ye tiquina ye w̄h̄use c̄j̄enare quehnoano ih̄ña ihboahro. Mari ye numia wape wiha numia tiquina sa yeḡu marine ih̄ña tuhtiyequina marine “Ñañene yeye nine”, ni tuhti masiedare. ¹⁵Yojop̄u p̄uritare ihquē numia wape wiha numia Cristo yere duhu, wat̄ino cahmeñe pe-

here ye tuhasare. Sa yegũ sa ni yahuaja muhũre.

¹⁶ Jesu yequina tiquina acayoro wape wihoro ticoro ijigũ tiquina ticoro acaye ticorore yedohoahro. Apequina Jesu yequina pehe ticorore yedoheracãhdo. Sa ye Jesu yequina ticoro acaye cuoricorore yedoheraye, apequina numia wape wiha numia acaye marieñe numia pehere yedoho masine.

¹⁷ Jesu yequina puhto masare tiquina quehnoano buhegũ tiquina dahrayere tiquina quehnoano yegũ ihñana ño peoya tiquinare. Sa yena quehnoano wapa yeya tiquinare. Ihquẽquina tiquina mehna cñena Cohãcjũ yere yahuyequina masare buheyequina gũhu ijire. Tiquina pũritare apequina yuhduoro quehnoano ño peoya. ¹⁸ Cohãcjũ yere tiquina ojoari pũpũ ohõ saha nine, dahrariquirore tiquina wapa yeatire yahuro: “Wecu trigo pjerire tiquiro dahpocãri mehna suhti wegũ tiquiro duserore cahmotaeracãhña. Tiquiro cahmeno ihyaahro”, ni ojoahye. Sa yero ape pũpũ ohõ saha nine: “Dahrariquirore tiquiro dahrari wapare ohoro cahmene”, nine Cohãcjũ yere tiquina ojoari pũpũ. Tiquiro sa nigũ tuhona Jesu yequina puhtoare quehnoano ño peoya musa. Sa yena quehnoano wapa yeya tiquinare.

¹⁹ Jesu yequina puhtorore tiquiro ñano yegũ ihñano ihcãquirola yahusã masiedare. Puhtorore ñañene yahusãtiquina ihtiaro ijiye, tiquirore yahusã masine. Ihtiaro mariedagũ puaro yahusã masine. ²⁰ Sa yena ñañene yeducuriquirore ijipihtina musa watoa tiquiro ijigũ tiquirore tuhtiya, apequina cueatire, ñañene tiquina yeratire. ²¹ Sa yegũ Cohãcjũ, Jesucristo, tiquiro beseriquina angele gũhu tiquina ihñonopũ ahrire dutiaja muhũre: Yojobũ muhũre yũhu dutirire ye pehoya. Sa yegũ ijigũ ijipihtiyequinare Jesu yequinare ihcãno saha yeya.

Apequirore sijoro saha, apequirore sijoro saha yeracãhña. ²² Apequinare Cohãcjũ dahrayere muhũ cũatire tiquina bui muhũ omocarine muhũ duhu peoato pano sojaro marieno quehnoano tuho masiñe mehna tiquinare beseya. Tiquina ñañequina ijiboaga. Sa ijiyequinare Cohãcjũ dahrayere cũedacãhña. Sa cũgũ muhũ gũhu muhũ duhu peoyequina tiquina ñañene yero sahata yegũ niboaga muhũ. Sa yeracãhña. Sa yegũ ñañe mariegũ ijiya muhũ.

²³ Usũro waro paa purĩnohgũ ijire muhũ. Sa yegũ yojobũre aco dihitare sihnimene muhũ. Sa yegũ mehenogã vino gũhũre sihniña muhũ. Paa purĩne co ijire ti.

²⁴ Ihquẽquina tiquina ñañene yegũ mari ihñaja. Sa yena Cohãcjũ tiquinare tiquiro buhiri dahreatire masiaja mari. Apequina pehere tiquina ñañe yerire mari masiedaja. Tiquina ñañe yerire came masinata. ²⁵ Ti ijiro sahata ihquẽquina quehnoañene tiquina yegũ tire mari masiaja. Apeye tiquina quehnoañe yerire yojobũre masiedapenata camepũ masinata mari. Ti quehnoañene ñono basioerare.

6 Cahacjẽna Jesu yequina pehe tiquina puhtoare quehnoano ño peohro. Tiquina sa ño peogũ ihñañe apequina Cohãcjũre, mari buheye gũhũre ñano yahuducu masiedare. ² Tiquina puhtoa Jesu yequina tiquina ijigũ ihñañe tiquina cahacjẽna pehe Jesu yequina ijiye, tiquinare ihñapoye ño peoeraboaga. Sa yeraro cahmene. Tiquina puhtoa Jesu yequina tiquina ijigũ pũritare tiquina cahacjẽna quehnoano ño peohro tiquinare. Sa ño peoye tiquina cahacjẽna pehe Jesu yequinare, tiquina cahĩnequinare yedohoye nine. Tiquina puhtoare Jesu yequinare yedohoye, Jesure cahmeeñequinare tiquina ño peoriro

yǎhduro Jesu yequina pehere ño peohro tiquina cahĩnequina ijigũ. Ahri yǎhu yahurire buheya. Sa yegu ahrire dutiya.

**Cohãcjũre ño peoye
gũhũre quehnoano
ijiyegũ gũhũre yahuahye Pablo**

³ Sijoro saha ijiye buheyere buheriquiro mari puhtoro Jesucristo ye buheyere quehnoañe buheyere “Ijirota ijire”, ni tuho duerare. Sa yero mari ye buheyere Cohãcjũre ño peoye buheyere cahmedare. ⁴ Sa yero tiquiro “Masi pehogũ ijiaja”, nieperota tire ne masiedare. Sa yero tuho masieniquiro yero saha tutuaro cahme dũse tutua duare tiquiro. Sa yero Cohãcjũ yere sa ni maca cãriquiro ijire. Masa tiquiro yero saha ijiyequina cahme dũse tutuaye, tiquina basi cahme ihña cooye, cahme ihña duerare. Sa ye apequinare ñano quti dahreye, masiedapeta masare ñano ni tuhoture tiquina. ⁵ Sa ye tiquina ñañe dihitare tuhotuyequina, pota ijiyere ne masieñequina sa cahme dũse tutuaducure. Sa ye “Cohãcjũ yere buhena, niñerure wapatanata mari”, ni tuhoture tiquina.

⁶ Mari ye mehenogã mari cuoye mehna bucuena, Cohãcjũre ño peona, potota quehnoano ijina niaja mari. ⁷ Ahri yehpapure masa bajuana ne apee borore ne cãhtaeru mari. Sa yena mari yariari bato wahana, ne apee borore nea masiedaja mari. Sa yena musa yere musa cuoye mehna to punota bucueya. Pajiro cahme nemoedacãhña. ⁸ Sa yena mari ihyayere mari suhti gũhũre cuona apeyere cahme nemoedacãhña. Musa cuoro punota bucueya musa. ⁹ Doeri cje opana iji duayequinare watĩno ñañene tiquiro ye dutigũ tiquina pehe peye ñañene yeducuyequina ijiboaga. Sa ye tiquina peye tahari tuho masieñequina yero saha apee borore tutuaro cahmeñe,

ñañe yeyere duhueraye, tiquina basita ñano yũhdũre. Sa duhueraye, pecarũ wahaeta tiquina. ¹⁰ Niñerure tutuaro cahmeñe, peye ñañene ye dũcare masa. Ihqũequina niñerure cahĩne, tutuaro cahmeñe, Jesure wacũ tutua duhuye, peye tahari ñano jeripohna tire tiquina.

Cohãcjũ yere yena ñañene duhuya

¹¹ Mũhu pũrita Cohãcjũ yaquirota ijire. Sa yegu ahri ñañene yeraçãhña. Sa yegu quehnoañe pehere cahmeña. Cohãcjũ yere yeya. Sa yegu Jesure wacũ tutuaya. Sa yegu apequinare cahĩña. Ñano yũhduepegũta ihcãno sahaya. Sa yegu sa tuhotu cãhña. ¹² Uhmũsepu sa ijiducuaçjure Cohãcjũ beseri mũhũre. Sa yegu Cohãcjũre mũhu wacũ tutuayere peyequina masare quehnoano yahuri mũhu. Sa yegu ñano yũhduepegũta tiquirore wacũ tutua duhueraçãhña uhmũsepu mũhu sa ijiducuatire. ¹³ Cohãcjũ ijipihtiyequinare catigũ yeriquiro ijire. Ijipihtiyere ijigũ yeriquiro ijire. Sa yero Jesucristo pehe Poncio Pilatore Cohãcjũ yere quehnoano yahuriquiro ijire. Sa yegu Cohãcjũ, Jesucristo gũhu tiquina ihñonopũ ahrire mũhũre ye dutiitja: ¹⁴ Mũhũre tiquiro dutirire ye peho cãhña. Jesucristo tiquiro tojoa tato pano masa mũhũre ñañene tiquina “Yahusãri”, nigũ, tiquiro dutirireta yeducuya. ¹⁵ Tiquiro queoriro sahata Cohãcjũ Cristore tojoa tagũ yerota. Cohãcjũ quehnoariquiro, tiquiro dihita masare dutiriquiro ijire. Sa yero ijipihtiyequina apequina puhtoa bui puhtoro ijire tiquiro. ¹⁶ Sa yero tiquiro dihita ne yariერიquiro ijire. Tiquiro asi siteye mehna ijiriquiro ijire. Sa ye masa tiquiro asi siteye cahapu waha masiedare. Sa yeye tiquirore masa ne ihñedari. Sa yeye yojopũ gũhũre tiquirore ihñedare. Tiquiro pehere ño peouhna. Sa yena “Ijipihtiyegũ decori

tutuariquiro ijire tiquiro”, niinha tiquirore. Sata niinha.

¹⁷ Ahri yehpa cjēna doeri cjē opanare ohō saha ni dutiya m̄h̄h̄: “Apequinare masi yuhduducaja”, ni tiquina basi t̄hotueracāhdo. Tiquina doeri cjē tiquina c̄oye pihtia waharota. Sa yeye tiquina c̄oye dihitare bucueracāhdo. Cohācjū pehere bucueahro. Ijipihtiye pototi mari cahmeñene ohoriquiro ijire tiquiro. Tiquiro pehere wacū tutuahro tiquina doeri cjē opana. ¹⁸ Sa yeye tiquina quehnoañe pehere yeahro pajiro quehnoañene yeyequina tiquina ijiatire. Sa yeye tiquina c̄orire apequinare ohoahro. ¹⁹ Tiquina sa yegū h̄hm̄sepu Cohācjū cahapu tiquina ye ijirota. Topu tiquina ye ijigū ne butisi. Sa ye topu sa ijdudueta tiquina.

Pablo Timoteore duti bato tiahye

²⁰ Timoteo, m̄h̄h̄re Cohācjū tiquiro c̄urire tiquiro buhe dutirire quehnoano yeya. Boeracāhña m̄h̄h̄. Ihquēquina masa Cohācjūre cahmeeñequina yero saha ni mehoñe, tuho masieñequina ye buheyere yahuducuducure. Sa yahuducuye “Quehnoano masieñequina ye buheye ijire”, nimene tiquina. Sa tiquina ni buheyere tuho n̄n̄nedacāhña. ²¹ Ihquēquina ti buheyere tuho n̄n̄ñequina Cristo yere cohā cāhre. Cohācjū tiquiro cahñe mehna m̄h̄h̄re tutuaro quehnoa dutiaja.

2 Timoteo

Pablo Timoteore pari turi ojoa ohoahye

1 Yuhu Pablo, ahrire mûhure Timoteore ojoa ohoaja. “Ijipihtiyequina Jesucristore wacû tutuayequina uhmusepu sa ijiducuetâ”, ni, cûri marine Cohâcjû. Tiquiro sa ni cûrire yahuacjûre yuhure bese cûri Jesu. Sa cûno Cohâcjû tiquiro cahmeno sahata yero nidi yuhure. ²Mûhu Timoteo yuhu cahîgu ijire. Mûhure Jesu yere yuhu buhegû tuhogu tiquirore quehnoano wacû tutua ducari mûhu. Sa yegu yuhu macu yero saha ijire mûhu. Sa yegu Cohâcjû mari Pacu, mari puhtoro Jesucristo mehna mûhure quehnoa dutiaja. Sa yeye mûhure paja ihña, tiquina yedohoye mehna quehnoano ijiya mûhu.

Masare Cristo yere tiquina yahurire yahuahye Pablo

³Namipu, decopu gûhure Cohâcjû mehna yahuducugu mûhu ye ijiatire sini basagu mûhu mehna bucueaja. Sa bucuegu Cohâcjûre “Quehnoare”, niaja yuhu. Panopu cjêna yuhu acaye ñañe buhiri marieno Cohâcjû yere tiquina yeriro sahata yuhu gûhu yojopure tiquiro yere yeaja. ⁴Sohô ijiri pjere yuhu wahagû mûhu uti nûnu tãe tirire wacûgu mûhure tutuaro ihña duaja, mûhu mehna quehnoano bucue duagu. ⁵Sa yegu Jesure potota mûhu wacû tutuarire wacûaja yuhu. Mûhu ñeco, Loida, mûhu paco Eunice gûhu mûhu yero sahata Jesure wacû tutua muhtari mûhu pano. Sa yegu yojopure mûhu gûhu tiquirore mûhu wacû tutuagû quehnoano masiaja yuhu.

⁶Sa yegu ahrire mûhure wacûgû ye duaja. Mûhu bui yuhu omocarine yuhu duhu peogû Cohâcjû yere mûhu yeatire

tutuayere ohoi mûhure. Ti tutuaye mehna ye nemoña mûhu. ⁷Cohâcjû marine tiquiro yaquiro Espiritu Santore ohoi. Sa yero masare marine cueragû yere Espiritu Santo. Sa yero tutuana, masare cahîna, tuho masina marine ijigû yere tiquiro. ⁸Sa yegu mari puhtoro ye ijiatire apequinare yahugu, bue tieracâhña mûhu. Yuhu tiquiro yere yuhu yeri buhiri peresupu ijigu niaja. Peresupu yuhu ijigû yuhure bue tisâedacâhña mûhu. Sa yegu quehnoañe buheyere mûhu buheri buhiri ñano yuhdugu “Quehnoanota”, niña mûhu gûhu. Mûhu sa ñano yuhdugû Cohâcjû mûhure yedohorota. ⁹Cohâcjû pehe marine pecapu wahaborinare yuhduori. Sa yero quehnoana, tiquiro yequina ijianare tiquiro beseahye marine. Mari quehnoano yeye mehna tiquirore marine besegû yera. Tiquiro esa tuhoro tiquiro cahmediro sahata yero ahri yehpare tiquiro bajumehneato pano marine cahîno, tiquiro marine beseahye. Marine sa cahîno marine yuhduoatiquirore Jesucristore ohoahye Cohâcjû. ¹⁰Yojopure Jesucristore marine yuhduoatiquirore ohoi, marine potota tiquiro cahîñene masigû yero niahye Cohâcjû. Jesu marine tiquiro yequinare pecapu wahaeragû yeri. Sa yero “Yuhure wacû tutuana Cohâcjû mehna sa ijiducunata”, nino, quehnoañe buheyere marine yahuro ah-tahye tiquiro.

¹¹Ti buheyere quehnoañe buheyere yahuacjûre tiquiro cûacjûre beseri yuhure. ¹²Sa tiquiro beserigu ijigu yojopure ñano yuhduaja yuhu. Ohô saha ñano yuhdupeguta yuhu bue tieraja. Yuhu wacû tutuariquirore Jesure masiaja yuhu. Tutuariquiro ijire tiquiro. Sa yero yuhure tiquiro yere buhe duti cûno quehnoano yedohorota. Sa yero ahri yehpapu tiquiro tojoa tato pano, “Mûhure yuhduogutja”, tiquiro nidiro sahata sohorti tirota

yũhure. Yũhure yũhdũorota tiquiro. Tire quehnoano masiaja.

¹³ Mũhure quehnoano yũhũ yahurire ye pehoya. Cristo Jesu yequina ijina tiquirore quehnoano wacũ tutuaja mari. Sa yena apequinare quehnoano cahĩaja. Sa yegũ tiquirore sa wacũ tutuaducuya mũhũ. Apequinare quehnoano cahĩducuya. ¹⁴ Sa yegũ Espĩritu Santo mari mehna ijiriquiro tiquiro yedohoro mehna quehnoañe buheyere quehnoano yeya. Queoro buheya.

¹⁵ Ijipihtiyequina Asia yehpa cjẽna Jesu yequina yũhure yedoho dueraye, cohã cãa wahari. Tiquina mehna cjẽna puaro Figelo, Hermõgene sata yeri tiquina gãhũ. Tiquina sa cohã cãrire masi tuhasare mũhũ. ¹⁶⁻¹⁷ Tiquina sa cohãepẽgũta Onesĩforo pehe peye tahari yũhure yedohoro quehnoano jeri sajãgũ yeri. Sa yero yũhũ peresupũ ijigũ tiquiro yũhure bue tisãedari. Sa yero yũhũ Romapũ ijigũ sa macaducuri jiri yũhure. Sa macaducuro yũhure bocari. Sa yero tiquiro pohnene, tiquina pacoro gãhure paja ihñanota Jesu mari puhtoro. Tiquirore sa paja ihña dutigu tiquirore sini basaja. ¹⁸ Sa yero ahri yehpapũ Jesu mari puhtoro tiquiro tojoa tati deco tiquirore paja ihñanota. Tiquirore sa paja ihña dutigu tiquirore sini basaja. Efesopũ marine Onesĩforo tiquiro yedohorire quehnoano masine mũhũ.

Ñano yũhdũepenata Jesu yequina ijina ihcãno sahoro cahmene marine

2 Mũhũ pehe yũhũ macũ yero saha ijigu, Jesucristo yedohoro mehna tiquirore wacũ tutuaducuya. ² Sa yegũ peyequina masare yũhũ buherire mũhũ tũhorire apequina gãhure buheya mũhũ. Tiquina mũhũ buheyequina Cohãcjũ yere yeducuyequina ijiahero. Sa ye apequinare buhe masiñequina ijiahero.

³ Surara ñano yũhdũeperota tiquiro ihcãno saharo saha mũhũ gãhũ Jesu

yaquiro ijigu ñano yũhdũgũ, ihcãno sahaya mũhũ. Sa yegũ apequina Jesu yequina yero saha yegũ nine mũhũ. ⁴ Surara tiquiro puhtoro dutiye pehere yere. Sa yero tiquiro surara ijieyequina yero saha ihyo ijiyere yerare tiquiro. Mũhũ gãhũ sata Cohãcjũ dutiye dihitarã yeya. ⁵ Omariquiro oma dutiyequina tiquina dutiyere queoro yeraro, tiquiro oma yũhdũducari wapare ne masiedare. (Sa yegũ omariquiro ti dutiyere queoro tiquiro yeriro saha Cohãcjũ dutiyere quehnoano ye pehoya mũhũ.) ⁶ Sa yero wese dahrariquiro quehnoano dahrariquiro pehe apequina pano quehnoano wapatare. (Sa yegũ mũhũ gãhũ tiquiro yero saha quehnoano dahraya mũhũ.) ⁷ Ijipihtiyere quehnoano masigũ yerota Jesu mari puhtoro mũhure. Sa yegũ yojopũre mũhure yũhũ nidire quehnoano wacũ tũhotuya.

⁸ Sa yegũ Jesucristore wacũña. Tiquiro puhtoro Davi mũnano panopũ cjũno tiquiro panamino iji turiariquiro ijiahye. Sa yero yariaro masa mũjahye tiquiro. Quehnoañe buheyere buhegu tiquiro sa waharireta buhegu niaga. ⁹ Tiquiro yere buhegu ñano yũhdũaja yũhũ. Sa yegũ tire yũhũ buheri buhiri ñañene yeriquiro yero saha peresupũ ijiaja yũhũ. Yũhũ sa ijiepegũta Cohãcjũ ye yahuducuyere buhe duhugũ ye masiedare masa yũhure. ¹⁰ Sa yegũ Cohãcjũ beseriquinare buhegu peye tahari ñano yũhdũaja yũhũ, tiquina gãhũ Jesucristo yequina tiquina ijiatire. Tiquiro yequina ijiye tiquina pecapũ wahaboriquina pehe tiquiro yũhdũoatiquina ijiaeta. Sa ye tiquina Cohãcjũ mehna sa ijiducuenta.

¹¹ Ahri yũhũ niati ijiorota ijire. Cristo yere mari yeri buhiri apequina marine tiquina wejẽgũ tiquiro mehna uhmũsepũ sa ijiducunata.

¹² Sa yena tiquiro yere mari yeri buhiri ñano yuhdæpenata ihcãno sahana tiquiro puhtoro ijiropære tiquiro mehna puhtoata ijinata mari gũhu.

¹³ “Cristore usã masiedaja”, mari nigũ, tiquiro gũhu marine sata ninota. Tiquirore mari yuhduducagũ ihñano tiquiro nidiro sahata marine buhiri dahrerota. Tiquiro nidiro sahata yeriquiro ijire tiquiro. Ne ni mehoedare. Ahri ijipihitiye tiquiro yahuri ijirota ijire.

Cohãcjũ tiquiro ihña coayequinare, tiquiro yere buheyequinare yahuahye Pablo Timoteore

¹⁴ Ahri yũhu yojoꝛu yahuatire muhu mehna cjẽnare wacũgũ yeya. Tiquina esa tuharo ihyo ijiyere tiquina yahuducuye duhseati ijierare. Sa yeye tiquinare tuhoriquinare ñano yegũ yere. Sa yegu mari puhtoro ihñonopu ohõ saha ni yahuya tiquina esa tuharo buheriquinare. “Musa yahuducuro saha yahuducueracãhña”, niña tiquinare.

¹⁵ Mũhu pehe Cohãcjũ yere quehnoano buheya. Sa yegu Cohãcjũ yere tutuaro yeya. Mũhu sa yegũ ihñano “Quehnoano yeri muhu”, ninota Cohãcjũ muhure. Sa yegu muhu buherire tiquiro ihñagũ bæ tisi muhu. Sa yegu tiquiro ye buheyere quehnoano masiña. Sa yegu tire queoro buheya. ¹⁶ Tiquina esa tuharo yahuducyeyquina ñañene sa yeducure. Sa yegu tiquina sa ni yahuducuyere tuho yabiya muhu. ¹⁷ Tiquina pehe tiquina yahuducuye camino ahba mujano yero saha ijire. Camino ahba mujano saha tiquina yahuducuye gũhu apequina Jesu yequinare ñañequina wahagũ yeeta. Sa yahuducyeyquina mehna cjẽna Himeneo, Fileto gũhu ijire. ¹⁸ Sa yeye tiquina “Jesu yequina masa mũa tuhasari”, ni buheye, quehnoañe buheyere duhu cãri tiquina.

Sa sijoro saha buheye, meheñequinagã Jesu yequinare tiquirore wacũ tutua duhugũ yeri tiquina. ¹⁹ Tiquina sa ñano buhepegũta Cohãcjũ ye buheye pehe ne comesarare. Ohõ saha nine tiquiro ye buheye: “Mari puhtoro Jesu tiquiro yequinare masine. Sa ye, ijipihitiyeyquina ‘Jesu yequina ijiaja’, niñequina ñañene duhu cãhdo”, ni yahure Cohãcjũ ye buheye.

²⁰ Mari queoye mehna buhegũ masa sihniñe pari yero saha ijire. Pajiri wuhupu uru, plata mehna tiquina yeri pari ijire. Sa yero ti wuhupu apeye pari yucugu mehna, dihi mehna tiquina yeri pari ijire. Uru, plata mehna tiquina yeri pari quehnoañene tiquina pose yeati ijire. Apeye pari ihyo ijiyere tiquina pose yeati ijire. ²¹ Sa yero ñañene yerariquiro uru pa quehnoari pa yero saha ijirota. Sa yero tiquiro pehe Jesu ye dihitare yeducuriquiro ijirota. Sa yero wũhu cjũno quehnoari pa mehna quehnoañene tiquiro yeriro saha, ñañene yerariquiro Jesu ye ijiatire quehnoañene yerota.

²² Wahmu ijire muhu. Sa yegu wahma pja ñañene tiquina tutuaro ye duaro sahata yeracãhña muhu. Sa yegu quehnoañene yeya. Jesure wacũ tutuaducuya. Sa yegu tiquirore, masa gũhure cahña. Sa yegu muhu mehna cjẽna Jesu yequina mehna ijigu cahmequeno marieno quehnoano ijiya muhu. Sa yeya muhu Cohãcjũre yuhtiyequina tiquirore siniducyeyquina mehna ijigu. ²³ Sa yegu tuhoturo marieno tiquina cahme yahuducuyere muhu gũhu tuho nunuedacãhña. Sa yegu muhu gũhu sa cahme yahuducueracãhña. Sa ni yahuducuye masa tiquina basi cahme tuhti, usuare. ²⁴ Cohãcjũ cahacjũno ihcãquiro ijiro, cahme tuhtieraro cahmene tiquirore. Sa yero ijipihitiyeyquinare quehnoano yeriquiro, buhe mihnidiquiro, duita usueriquiro ijiro cahmene tiquirore.

²⁵ Sa yero apequina tiquiro mehna tiquina cahme tuhtigũ tiquiro tiquinare yahuro, quehnoano mehna usuaro marieno yahuro cahmene tiquirore. Tiquiro sa yahugũ ihñañe Cohãcjũ yedohoye mehna tiquina pehe tiquina ñañe yerire bujua witiboaga. Sa ye quehnoañe buheyere masi ducaboaga. ²⁶ Tiquinare watino cuomedi tiquiro cahmeñene yeatiquinare. Sa ye tiquina ñañe yerire bujua witiri bato quehnoañe buheyere masiñe, watinore cohã cæta.

Pihtiati deco ijiatire yahuahye Pablo Timoteore

3 Pihtiati deco panogãre ñano yuhdueta masa. Tire quehnoano masiña mũhu. ² Ti pjere masa apequinare wacũ peoyequina, niñerure cahme yuhduducayequina, “Apequinare masi yuhduducaja”, ni tiquina basi tuhotuyequina, masare ñano tuhtiyequina, tiquina pacusũmare yuhduducayequina, tiquina ohopegũta “Quehnoare”, nieñequina, Cohãcjũre ño peoyequina ijieta. ³⁻⁴ Sa ye masare cahieñequina, paja ihñeñequina, ñañe quitu dahreyequina, tiquina esa tuharo ñano yeducuyequina, masare sa queducuyequina, quehnoañene yabiyequina, tiquina mehna cjẽnare ñano yeyequina, tuho masieñequina, “Masi pehoaja”, ni tuhotuyequina ijieta masa. Sa ye ñañene cahme yuhduducayequina ijiye, Cohãcjũ pehere cahmeeñequina ijieta. ⁵ Sa ye tiquina masa ihñonopũ Cohãcjũre ño peopeta “Cohãcjũ ihyo ijiriquiro ijire”, ni tuhotumene tiquina.

Sa niñequinare piti tieracãhña mũhu. ⁶ Tiquina mehna cjẽna tuho masieñequina numia ye wuhusepũ sajã, tiquina numiare ni mehoñene buhere. Tiquina numia pehe sa ñañene yeducuyequina numia, tutuaro ñañene ye duare. ⁷ Tiquina numia sa

buheducuye ihyo ijiye buheyere, sijoro saha ijiye buheyere tuhoye numia ijiye, Cohãcjũ ye buheye pehere ne masiedare. ⁸ Panopũ Jane, Jambre yayia mũna Moisere tiquina ihña tuhtiriro sahata pihtiati deco panogã ijiyequina masa quehnoañe buheye pehere ihña tuhtieta. Tiquina ñañe dihitarẽ tuhotuyequina ijieta. Sa ye Jesure wacũ tutuayequina waro ijierare. ⁹ Sa yeyequina tiquina ni mehoñene tuho duasi apequina pehe. Came tiquina ni mehoñene, tuho masieñequina tiquina ijiye gũhure ijipihtiyequina masieta. Jane, Jambre mehna tiquina ni mehoñene panopũ masa tiquina masidiro sahata sata masieta pihtiati deco panogã ni mehoñequina tiquina ijiyere.

Pablo Timoteore duti bato tiahye

¹⁰ Yũhu buheyere, yũhu yee tirire, yũhu ijiye tiyere, yũhu ye duayere, Jesure yũhu wacũ tutuayere masine mũhu. Sa yegũ usuaro marieno yũhu yerire, masare yũhu cahĩñene, ñano yuhdũepẽguta yũhu ihcãno saharire masine mũhu. ¹¹ Sa yegũ yũhure tiquina ñano yerire, yũhu ñano yuhdũrĩre masine mũhu. Sa yegũ Antioquĩapũ, Iconiopũ, Listrapũ, yũhure ña yuhduaro tiquina yerire masine mũhu. Yũhu sa wahagũ ihñano mari puhtoro Jesu pehe yũhure yedohori. ¹² Ijipihtiyequina Jesucristo yequina tiquina iji duagũ Cohãcjũ dutiriro sahata tiquina yeducu duagũ apequina tiquinare ñano yeeta. Ti ijirota ijire. ¹³ Sa ye ñañequina pehe ni mehoñequina gũhu ña yuhduayequina wahaeta. Apequinare ni mehoñe, tiquina basi ni mehoñene “Sa tjire”, niñe, ña yuhduayequina wahaeta.

¹⁴ Mũhu pehe mũhure yũhu buherire, quehnoano mũhu tuhorire sa wacũducuya. Sa yegũ yũhu buheriro sahata yeya. Mũhure buheriquinare ma-

sine mūhu. ¹⁵Mūhu nijigu ijiguputa Cohācjū yere tiquina ojoari pūre masi dūc-ahye mūhu. Tiquiro yere tiquina ojoari pūpū ohō saha ni yahure mūhure: Jesucristore wacū tutuayequina dihitarē pecapū wahaboriquinare yūhduore Cohācjū. ¹⁶Cohācjū yere tiquina ojoari pūpū ijipihtiyere Cohācjū pehe oja dutiahye. Sa yena ti pūre buhena mari masi nemoaja. Ti pūre buhena Cohācjū dutiyere mari yeatire masiaja. Sa buhena mari űaűe yerire “Ahri űaűe ijire”, ni tūhotuaja mari. Sa yero ti pū marine quehnoañe pehere comesa dutire. Sa yero decoripe quehnoañene mari yeducuatire yahure ti pū. ¹⁷Sa yero Cohācjū yaquiro tiquiro ya pūre buhero, masi pehorota. Sa masino ijipihtiyere quehnoañene ye masinota tiquiro.

4 Jesucristo ijipihtiyequina pūtoro, tojoa tatiquiro, catiyequinare, yariariquina gūhure buhiri dahre dutiatiquiro tiquiro ihñonopū mūhure ohō saha ni yahutja. Cohācjū ihñonopū gūhure ohō saha ni yahutja mūhure: ²Decoripe masa tiquina tuho duagū tiquina tuho dueragū gūhure Cohācjū yere yahuya. Sa yahugu masa tiquina űaűe yerire masigū yeya tiquinare. Sa yegu tiquina űaűe yerire “Ye nemoedacāhña”, ni yahuya tiquinare. Quehnoañe pehere ye dutiya. Sa buhegu ne usuegu, caributieracāhña mūhu. Sa yegu ne apequinare buhe duhueracāhña. ³⁻⁴Camepū masa quehnoañe buheyere tuho duasi. Sa tuho dueraye, tiquina cahmeno sahata yeye, tiquina tuho coaye dihitarē buheyequinare cahmeeta tiquina. Sa ye ni mehoñe buheyere peyequina buheyequinare cuoeta. Tiquina sa yeye quehnoañe buheye pehere cohā, tiquina sa buhe maca cārire tuho nūnūeta. Sa yegu quehnoañe buheyere buhe duhueracāhña mūhu. ⁵Mūhu gūhu sa ijigu decoripe tuho masigu ijiya.

Sa yegu űano yūhduerepūta ihcāno sahaya. Sa yegu quehnoañe buheyere sa buheducuya. Cohācjū mūhure tiquiro ye dutirire ye peho cāhña mūhu.

⁶Yūhu Cohācjū yere yūhu yeri buhiri yūhu yariato mehenogā dūhsare. Sa yegu meheñe decorigā catiniitja. ⁷Yūhu yariato panogā ahrire yahutja: Jesu quehnoañe buheyere yūhure buhe dutiro tiquiro cūrire quehnoano buhe sohtori tii. Tiquiro ye dutiyere quehnoano ye pehou. Sa yegu űano yūhduerepūta tiquirore ne wacū tutua duhuerū. ⁸Yojopure quehnoañene yūhu yeri wapare űmūsepe ihboro niaga. Sa yero mari pūtoro, ijipihtiyequinare masi pehoriquiro, buhiri dahre dutiro queoro yahuriquiro tiquiro tojoa tati deco tiquiro yere yūhu yeri wapare ohorota yūhure. Apequina gūhure tiquiro tojoa tatire cohteyequinare tiquirore cahñequinare tiquiro yere tiquina yeri wapare ohorota Jesu.

Pablo yahu nemoahye Timoteore

⁹Yūhu cahapū űmūñano ihñagu ah-taya mūhu. ¹⁰Dema ahri yehpa cjē ijipihtiyere tutuaro cahmeno yūhure yedoho dueraro cohā cāa wahari Tesalōnicapū. Crescente gūhu Galacia yehpapū wahari. Sa yero Tito gūhu Dalmaciapū wahari. ¹¹Luca dihita yūhu mehna ijire. Marco yūhure quehnoano yedohoatiquiro ijire. Sa yegu tiquirore ne cāhtaya mūhu. ¹²Sa yegu Tiquicore Efesopū ohou. ¹³Ohōpū ahtagū, yūhu bui sañari suhtirore, Troapū Carpo ya wūhūpū yūhu cūri suhtirore ne cāhtaya. Sa ye sohō ijiri tunuri ojoari tunuri gūhure ne cāhtaya. Sohō ijiri cahseri ojoari cahseri pūritare tutuaro cahmeaja yūhu. Sa yegu ti cahseri gūhure ne cāhtaya.

¹⁴Alejandro comene dahrariquiro yūhure űa yūhduaro yeri. Sa yero tiquiro sa yeri buhiri Cohācjū buhiri dahrerota. ¹⁵Tiquiro Alejandro mari

ye buheyere tutuaro ihña tuhtiri. Sa yegu tiqiro musare “Ñano yeari” nigu, tiqirore ihñagu, quehnoano wacū masiña.

¹⁶Masare beseriquore peresupu ye dutiriquore yuhu yerire, yuhu buherire tiqirore yuhu coā yahugū ne ihcāquiro boro Jesu yaquiro yuhure yedohoerari. Ijipihtiequina yuhure yedohoeraye, cohā cāa wahari. Tiquina sa cohāpegūta yuhure tiquina cohāri buhiri Cohācjū buhiri dahreracāhdo. ¹⁷Yuhu sa wahaepēgūta Cohācjū yuhure yedohori. Sa yero tiqiro ye buheyere yuhu quehnoano yahuatire tiqiro ye tutuayere ohori yuhure, ijipihtiequina judio masa ijieyequina ti buheyere tiquina tūhoatire. Sa yero yuhure tiquina ñano tiquina ye duepegūta yuhure tiquina ñano yeborigure yedohori mari puhtoro. ¹⁸Ijipihtiequina yuhure ñano yeyequinare yuhuducaro, yuhure yedo-

horota mari puhtoro. Sa yero uhmusepu tiqiro puhtoro ijiropu yuhure iji dutiro, yuhure yuhduorota tiqiro. Sa yena “Tiqiro quehnoa yuhduariquiro, tutua yuhduariquiro ijire”, niihna mari ijipihitiye decori. Sata niihna.

**Pablo quehnoa dutiahye
Timoteo cahapu ijiyequinare**

¹⁹Prisca, Aquila, Onesíforo ya wuhu cjeña gūhu quehnoahdo. ²⁰Erasto Corintopu tojoari. Tróximo Miletopu dohatia wahari. Sa yegu tiqirore topu cūu yuhu. ²¹Pohero pano umñano ah-taya mūhu. Eubulo, Pudente, Lino, Claudia gūhu, ijipihtiequina Jesu yequina mūhure quehnoa dutire.

²²Mari puhtoro Jesucristo mūhu mehna ijirota. Sa yegu musare ijipihitinare Cohācjū mehna pajiro quehnoa dutiaja.

Tito

Pablo Titore ojoa ohoahye

1 Yũhu Pablo Cohãcjũ cahacjũ, Jesucristo yere tiquiro buhe duti cûrigũ ijiaja. Cohãcjũ beseriquina Jesure tiquina wacũ tuatire quehnoañe buheyere tiquina masiatire Jesu buhe dutiro yũhũre cûri. Ti buheye Cohãcjũ dutiro saha mari yeatire yahure. ²Sa yegũ ijipihtiyẽ decori Cohãcjũ yequina uhmũsepũ tiquina ijiducuati gãhũre buheaja tiquinare. Cohãcjũ ne ni mehoñe marieniquiro ahri yehpare tiquiro bajumehneato pano ohõ saha ni cũahye marine: “Uhmũsepũ sa ijiducunata mũsa”, ni cũahye marine. ³Sa yero tiquiro queori pje Cohãcjũ tiquiro ni cûrire yahu dutiri masare. Sata yũhũre ni yahu dutiri tiquiro. Marine pecapũ wahaborinare yũhdũoriquiro ijire. ⁴Mũhũre Titore Jesu yere buhei. Yũhu sa buhegũ tũhogũ Jesure wacũ tutua dũcari mũhu. Sa yegũ mũhu potota yũhu macũ yero saha ijigũta nine. Mũhũre ahrire ojoagũ niaja. Sa yegũ Cohãcjũ mari Pacũ mehna, Jesucristo marine yũhdũoriquiro mehna mũhũre quehnoa dutiaja. Sa ye paja ihñañe, mũhũre tiquina yedohoye mehna quehnoano ijiya mũhu.

Creta wame tiri nũcũopũ Tito tiquiro yeatire yahuahye Pablo

⁵Creta wame tiri nũcũopũ mũhũre yũhu cũgũ Jesu yequina tiquina buheati dũhsarĩdi ti pjere. Sa yegũ tiquina yeatire yahuyuacjũre cũgũ nii yũhu mũhũre. Sa yegũ macaripe cjẽna Jesu yequina pũthoa ijiatiquinare bese dutigũ cũgũ nii mũhũre. ⁶⁻⁸Tiquina pũthoa Cohãcjũ cahacjẽna ijire. Sa yegũ tiquinare besegu

quehnoañequinare beseya sijoro saha yeeyequinare. Sa yegũ ihquẽquina numiareta namo tiyequinare, “Apequinare masi yũhdũducaja”, ni tũhotueyequinare, usueyequinare, queheye marieñequinare, cahmequeñe marieñequinare, apequina yere ni meho ehmeñequinare beseya. Sa besegu tiquina wũhũsepũ sajã sayequinare quehnoano ihña ihboyequinare, quehnoañe pehere quehnoano bucueyequinare, tũho masiñequinare, quehnoañene yeducueyequinare, ñañe marieñequinare, ñañene yeeyequinare, niji siaro marieno dahrayequinare, quehnoañene yeducueyequinare beseya. Sa ye mũhu beseatiquina pohnene ohõ saha ijiyequina ijiro cahmene: Jesure wacũ tutuayequina, quehnoano yeducueyequina, ijipihtiyequinare quehnoano yũhtiyequina ijiro cahmene pũthoa pohnene. ⁹⁻¹⁰Sa ye quehnoañe buheyere queoro mari buheducuriro sahata ne duhueyequina ijiahro pũthoa mũhu beseatiquina. Sa ye tiquina quehnoañe buheyere yahueyequina ijieta. Sa ye quehnoañe buheyere ihña tuhtiyequinare buheye, tiquina ye ni mehoñe ijigũ masigũ yeeta tiquina. Sa yegũ quehnoano beseya Jesu yequina pũthoa ijiatiquinare.

Peyequina tiquina pũthoare yũhdũducayequina, quehnoano tũhotu yahuducueyequina, ni mehoñequina ijire yojopũre. Sa yeeyequina judio masa pũrita ña yũhdũaro yeye nine. Tiquina ye buheye poto ijieragũ tiquinare masigũ yero cahmene. ¹¹Tiquina judio masa pehe niñerure wapata dua, buhere. Sa yero cahmene. Sa buheye ihquẽ wũhũse cjẽnare ijipihtiyequinare Cohãcjũ ye pehere cohãgũ yeye niaga tiquinare. Tiquina sa yegũ tiquinare sa ye dutieraro cahmene.

¹²Tiquina yere panopũ yahuriquiro ti nũcũo cjẽno ijieperota ohõ saha ni

yahuahye: “Creta nꝛꝛo cǵēna sa ni mehoducuyequina ijire. Ti nꝛꝛo cǵēna wahiquina yero saha usuayequina ijire. Sa ye sa ihyaducuyequina ijiye ne dahra duerare”, niahye tiquiro, tiquiro ya nꝛꝛo cǵēnare. ¹³Tiquiro sa niñe ijirota ijire. Tiquina sa ijigū ihñagu tiquinare tutuaro tuhtiya Jesu ye buheye pehere quehnoano tiquina masiatire. ¹⁴Sa yegu judio masa panopꝛ cǵēna tiquina esa tuhoro tiquina ni maca cārire, Jesu yere cahmeeñequina tiquina dutiye gūhure Creta cǵēna tiquina tuho nunuedatire tuhtiya tiquinare.

¹⁵Buhiri marieñequina quehnoañe dihitare tuhoture. Ñañene yeducuyequina, Jesure wacū tutueyequina pehe ñañe dihitare tuhoture. Tiquina tuhotuyepure ña yuhduare. Sa ye quehnoañe pehere bese masiedare. ¹⁶Tiquina “Cohācjüre masiaja usā”, niepeta, ñañene yere. Sa yeyequina tiquina ijigū ihñana Cohācjüre masieñequina tiquina ijigū masiaja mari. Sa ye tiquina ña yuhduayequina, Cohācjū yere yuhduducayequina ijire. Sa ye tiquina quehnoañene ye masiedare.

Quehnoañe buheyere queoro yahu dutiahye Pablo Titore

2 Mūhū pehe buhegū, quehnoañe buheye ti nidiro sahata quehnoano buheya. ²Bucunare ohō saha ni yahuya: Cua pesayequina, masa ño peonohñequina, tuho masieñequina, Jesure quehnoano wacū tutuayequina, quehnoañe buheyere quehnoano yeyequina, Jesure masa gūhure cahñeñequina, ñano yuhdūepeta ihcāno sahayequina ijiahro tiquina. ³Bucuna numia gūhure sata ni yahuya: Cua pesaye numia, ñañe quitu dahraye numia, queheraye numia ijiahro tiquina numia gūhū. Sa yeye numia ijiye, quehnoañene buheahro apequina

numiare. ⁴Apequina numiare ohō saha ni buheahro bucuna numia: Tiquina manusumare, tiquina pohne gūhure cahñahdo. ⁵Sa yeye tiquina tuho masieñe numia, apequina umua mehna ñano yeraye numia, ihcā wuhū cǵēna ijiyequinare quehnoano ihña ihboye numia, masa quehnoañe numia, tiquina manusumare quehnoano yuhtiye numia ijiahro tiquina, Cohācjū ye buheyere apequina “Ñano yahu wajari”, niñe.

⁶Sa yegu wahma pjia gūhure ohō saha ni yahuya: Tuho masieñequina ijiahro tiquina. ⁷Sa yegu mūhū pehe quehnoañe dihitare yeducuya mūhure tiquina ihña cūatire. Buhegū ne ni mehono marieno buheya. Sa buhegū cua pesaro mehna buheya mūhū. ⁸Sa buhegū tuho masieñe mehna quehnoano buheya apequina mūhure “Yahu wajari”, nigū. Mūhū sa buhegū ihñañe marine ihña tuhtiyequina ijiepetā marine ihyo warota yahu waja masiedare. Marine sa yahu waja maca cāñe, buoro wahaeta tiquina.

⁹Sa yegu cahacjēnare ohō saha ni yahuya: Tiquina puhtoare quehnoano yuhtiahro. Sa yeye tiquina puhtoare quehnoano bucuegū yeahro. Sa dihita yeahro. Sa ye tiquina puhtoare purino yuhtieracāhdo. ¹⁰Sa ye tiquina puhtoa yere yaqueracāhdo. Sa ye quehnoañequina ijiahro. Tiquina puhtoa dutiyere queoro yeducuahro. Tiquina sa quehnoano yuhtiyequina ijigū ihñañe, Cohācjū marine yuhduoriquiro ye buheyere tuho bucueeta apequina.

¹¹Masare tiquiro cahñene Cohācjū ihño tuhasari. Sa cahño ijipihitiyequina pecapꝛ wahaboriquinare Cohācjū tutuaro yuhduo duare. ¹²⁻¹³Masare sa cahño Cohācjū marine ohō saha ni buhere: Cohācjüre ihña tuhtiyere, ñañe tutuaro cahmeñene duhu cā dutire marine. Cohācjū tutuariquiro,

Jesucristo marine yuhduoriquiro tiquiro asi siteyere mari ihñati decore, quehnoari decore mari cohtena niaja. Sa yero mari cohteri deco pano tuho masina, quehnoañene yeducuna, Cohãcjãre ño peoducuna marine iji dutire Cohãcjũ. ¹⁴ Tiquiro Jesucristo mari ye ijiatire yariahye ijipihitiye mari ñañe yerire duhugũ yero taro, marine tiquiro yequina wahagũ yero taro. Mari ñañene tiquiro sa cohãgũ mari ñañe buhiri mariena ijinata. Sa yena tutuaro quehnoañene ye duana ijinata.

¹⁵ Ahri ijipihitiyere ti nucuo cjẽnare Jesu yequinare buheya muhu. Tiquina puhtoro ijigũta nine muhu. Sa yegu tiquinare yahuya. Sa yegu tiquina ñañene yegũ ihñagu tuhtiya tiquinare. Sa ye ijipihitiyequina apequina muhare doca cuedacãhdo.

Jesu yequina tiquina yeatire yahuahye Pablo

3 Ohõ saha ni yahuya to cjẽnare Jesu yequinare: Tiquina puhtoare quehnoano yuhtiequina ijiãhro. Ijipihitiyere quehnoañene yeatiquina ijiãhro. ² Sa ye apequinare ne ñañe quiti dahreracãhdo. Cahme tuhtieracãhdo. Sa ye masa quehnoañequina, ijipihitiyequinare ño peoyequina ijiãhro.

³ Panopãre mari gũhu tuho masiena, yuhduducana, ni mehoñene tuho nununa, ñañene ye duana, ñañene tutuaro cahme duhu masiena, decoripe ñañene yeducuna, apequinare ihña coona ijie timi mari gũhu. Sa ye marine apequina ihña tuhtiri. Sa yena mari gũhu tiquinare ihña tuhtimi. ⁴⁻⁵ Sa ijirina mari ijiepegũta Cohãcjũ marine pecapũ wahaborinare yuhduori. Sa yuhduoro tiquiro quehnoariquiro ijiyere, masare tiquiro cahñe gũhare marine ihñono nidi. Quehnoano mari yeri mehna yuhduoerare marine. Marine paja ihñano mari ñañe yerire

cohãno Espiritu Santo mehna marine yuhduori. Sa yero marine tiquiro pohna wahagũ yeri. Espiritu Santo pehe quehnoana mari ijiatire comesagũ yeri marine. ⁶ Jesucristo marine yuhduoriquiro tiquiro yaria masa mjañe mehna Cohãcjũ yaquiro Espiritu Santore ohori marine pajiro tiquiro tutuayere mari cuoatire. ⁷ Marine cahno, marine quehnoano ye duari. Sa yero tiquiro yaquiro Espiritu Santore marine ohori ñañe buhiri mariena mari ijiatire, uhmusepũ mari sa ijiducuatire. Mari sa ijiducuatire masina, tire cohtena niaja.

⁸ Ti yuhũ nidi ijirota ijire. Sa yegu tire yuhũ ni ojoariro sahata masare buhegu, ti dutiyere ye peho dutiya muhu. Sa yegu Cohãcjũre wacũ tutuayequinare tire buheya quehnoañene tiquina quehnoano yeatire. Ahri yuhũ ni buheri quehnoañe buheye ijire. Sa ye masa ahri buheyere tiquina tuho nunugũ ihyo waro ijierare. ⁹ Apequina tiquina yahuducuye pehe duhseati ijierare. Sa ye masiedapeta tiquina yahuducu yuhduducayere muhu tuho nunugũ ihyo waro tuho nunugũ nine muhu. Sa ye tiquina acaye panopũ cjẽna tiquina ijie tirire yahuducu yuhduducayere, Cohãcjũ Moiserre tiquiro dutirire tiquina yahuducu yuhduducayere ti ijipihitiyere quehnoano muhu tuho nunugũ ihyo waro tuho nunugũ nine muhu. Sa yegu tire tuho nunedacãhña. Muhũ gũhu tiquina yero saha yahuducu yuhduducaeracãhña.

¹⁰ Mũsa mehna cjũno sa ni yuhduducariquiro musare cahme tu wagũ tiquiro yegũ ihñagu “Yeracãhña”, niña tiquirore. Pua taha tire tiquirore muhu ye dutierari bato tiquiro yuhtieragũ ihñagu tiquirore piti ti duhuya. ¹¹ Ohõ saha yeriquiro ñañe dihitare tutuaro cahmeducuriquiro ijire.

Tiquiro sa ijigũ ihñana tiquiro ñariquiro ijigũ masiaja mari.

Pablo duti bato tiahye

¹² Nicopolipũ pohecũ ijiro puno ijigũ tagũ niaja. Sa yegũ Artemare o Tiquicore mũhũ cahapũ yũhũ oho mũhtagũ topũre yũhũre piti caya mũhũ. ¹³ Sa yegũ dutiyere quehnoano mihnidiquirore Zena wame tiriquire, Apolo gũhũre quehnoano yedohoya tiquina wahatire. Sa yegũ apee boro tiquina cahmeñene ijipihitiye tiquinare ohoya tiquinare tiquina cahmeno puno.

¹⁴ Sa ye Jesu yequina mari mehna cjẽna quehnoañene yepoahro apee borore dũhsayequinare tiquina yedohoatire, quehnoañene yeducuyequina tiquina ijiatire.

**Pablo quehnoa dutiahye
Jesu yequinare**

¹⁵ Ijipihitiyequina yũhũ mehna cjẽna mũhũre quehnoa dutire. Topũ ijiyequina Jesu yequina usãre cahĩñequina quehnoahdo. Ijipihitinare mũsare Cohãcjũ mehna pajiro quehnoa dutiaja.

Filemón

Pablo Filemo wame tiriquire ore oja dācahye

1 Yuhu Pablo, Jesucristo yaquiro yuhu ijiri buhiri peresupū ijiaja. Yuhu, mari acayuro Jesu yaquiro Timoteo mehna mūhure Filemore quehnoa dutiaja usā. Sa yegū mūhure oja ohoaja yuhu, Pablo. Mūhu usā cahīgū Cristo yere usā mehna dahradohogū ijire mūhu. ²Sa yena Jesu yequina mūhu ya wūhūpū cahmecoañequina gūhure oja ohoaja yuhu. Mari acayoro Jesu yacoro Apia gūhure oja ohoaja yuhu. Mari cahīniquire Arquipo gūhure oja ohoaja yuhu. Arquipo pehe usā yero saha Cristo yere yahuriquire ijire. ³Sa yena Cohācjū mari Pacū, mari pūhoro Jesucristo mehna musare quehnoa dutiaja. Tiquina yedohoye mehna quehnoano ijiya musa.

Filemo apequinare tiquiro cahīnene, Cristore tiquiro wacū tutuayere yahuahye Pablo

⁴⁻⁵ Yuhu acayū Filemo, Cohācjūre mūhure sini basagu mūhure wacūgū “Quehnoare”, niaja tiquirore. Cristore mūhu cahīgū tiquirore mūhu wacū tutuagū, apequina Cohācjū yequinare mūhu cahīgū tuhō yuhu. Sa yegū Cohācjūre “Quehnoare”, ni bucueaja. ⁶ Mari ihcāno mehna Cristore wacū tutuana ijiaja. Sa wacū tutuagū mūhu ijigū ohō saha ni sini basaja Cohācjūre. Jesucristo yequina ijina, pajiro quehnoañene cūonata mari. Tire quehnoano mūhure masi peho dutigū sini basagu niaja Cohācjūre. ⁷ Yuhu acayū, yojopūre apequinare mūhu cahīgū tuhōgū bucueaja yuhu. Ijipilhiyequina Cohācjū yequinare

quehnoano bucuegū yeñohti mūhu. Mūhu sa yegū tuhōgū bucueaja yuhu.

Pablo Onésimore sini basahye Filemore

⁸⁻¹⁰ Sa yegū yojopūre Onésimore mūhu cahācjūnore mūhu quehnoano yeatire mūhure sini basa duaja. Peresupū yuhu mehna tiquiro ijigū Cristo yere yahū yuhu tiquirore. Tire tuhoro Cristore cahmedi tiquiro. Sa yero tiquiro Cohācjū yaquiro wahari. Sa waharo yuhu macū yero saha ijire. Sa yegū yuhu Pablo bacū ijigū Cristo yere yuhu buheri buhiri peresupū ijigū mūhure yahutja Onésimore mūhu yeatire. Cristo buhe dutiro tiquiro cūrigū ijiaja yuhu. Sa tiquiro cūrigū ijigū Onésimore mūhu yeatire dutioborigū ijiaja yuhu. Sa niepegūta mūhure dutisi yuhu. Cahīne mehna mūhure yahutja, to punota.

¹¹ Cristo yaquiro tiquiro ijiato pano Onésimo mūhu cahācjūno ijiro duhseatiquire ijierari jiri. Mūhure quehnoano yedoho masiedari jiri. Yojopū pūritare tiquiro mūhure, yuhu gūhure quehnoano yedohoriquire ijirota. Yojopūre Cristo yaquiro ijiro ihyo ijiriquire waro ijierare.

¹² Sa yegū yojopūre tiquirore mūhure wia tojogū niaja. Sa yegū tiquirore quehnoano piti caya mūhu. Tiquirore tutuaro cahīaja. ¹³ Quehnoañe buheyere yuhu buheri buhiri peresupū yuhu ijiri watoa tiquirore yūhure yedoho dutiboaya yuhu tiquirore ohoeragu. Sa yegū yuhu mehna tojoa dutiboaya yuhu. Mūhu pehe yūhure mūhu yedohoro basioeragū tiquiro pehe mūhure comesariquire ijiboaya. ¹⁴ Yūhure yedohoboriquire tiquiro ijiepegūta tiquirore mūhure oho tojoaja. Mūhu pehe tiquirore “Pablo mehna tojoarīna”, mūhu nigū masigu yuhu mehna tiquirore tojoa dutiboaya

yuhũ. Yuhũ pehe “Yuhũ mehna cũña tiquirore”, ni dueraja mũhũre. Sa yegũ tiquirore oho tojorĩaja.

¹⁵Tiquiro Onésimo meheñe decorigã mũhũre tiquiro duhti cãri bato pari turi mũhũ mehna ijire. Cohãcjũ tiquiro cahmediro sahata mũhũre duhti cãri jiri tiquiro Cohãcjũ yaquiro tiquiro wahato saha, yuhũ tuhohugũ. Sa yero pari turi mũhũ mehna ijiro, sa ijiducurota mũhũ mehna. ¹⁶Sa yero tiquiro vojopũre cahacjũno ijierare. Cahacjẽna tiquina bui cjũno ijiriquiro ijire tiquiro, yuhũ ihñagũ. Vojopũre tiquiro mũhũ acayũro Jesu yaquiro ijire. Sa yegũ tiquirore tutuaro cahĩaja. Mũhũ pehe yuhũ yuhũoro tiquirore cahĩgũta. Mũhũ sa cahĩdiquiro ijiro, cahacjũno ijieperota vojopũre cahacjũno tiquiro ijiriro saha ijierare tiquiro. Tiquiro mũhũ acayũro Jesucristo yaquiro ijire.

¹⁷Sa yegũ yuhũre mũhũ piti caboriro sahata Onésimo gũhũre quehnoano piti caya. Mũhũ mehna cjũ yuhũ ijigũ tuhohugũ tiquiro gũhũre quehnoano piti caya mũhũ. ¹⁸Sa yegũ mũhũre sijoro saha tiquiro yeriquiro ijigũ mũhũre tiquiro wapamoriqũro ijigũ yuhũ pehe tire wapa yeitja. ¹⁹Yuhũ Pablo, yuhũ basi ahũre mũhũre yahu ojoautja: Yuhũ pehe wapa yeitja mũhũre. Mũhũre yuhũ buheri bato Cristo yaquiro wahagũ ijipihũre decori Cohãcjũ mehna ijiajũ ijire mũhũ. Mũhũre yuhũ sa buheri bato

mũhũ gũhũ yuhũre pajiro wapamorigũ ijiboaya. Mũhũ sa ijiepegũta mũhũre wapa yeitja tiquiro wapamoñene. ²⁰Sa yegũ yuhũ acayũ, yuhũ cahĩgũ, mari puhtoro Cristo yaquiro ijire mũhũ. Sa yegũ Onésimore quehnoano piti caya. Cristo yaquiro ijigũ yuhũ acayũ ijire mũhũ. Sa yegũ yuhũre quehnoano bucuegũ yeya.

²¹Ahri yuhũ yahũre quehnoano yegũta mũhũ. Sa yegũ yuhũ yahũri yuhũoro yegũta mũhũ. Tire masigũ mũhũre ojoa ohogu niaja. ²²Ahri gũhũre yahugutja mũhũre. Musa cahapũ yuhũ wahatire Cohãcjũre sini basañohti musa yuhũre. Musa sa sini basarire tiquiro yuhũtiboga. “Aũ”, tiquiro nigũ cahmeaja yuhũ. Sa yegũ musa cahapũ yuhũ esati tucũre quehnoyuya mũhũ.

Pablo quehnoa duti bato tiahye Filemore

²³Epafrã mũhũre quehnoa dutire. Tiquiro pehe Cristo yere tiquiro yeri buhiri yuhũ mehna peresupũ ijire. ²⁴Sa ye Marco, Aristarco, Demã, Luca mehna mũhũre quehnoa dutire. Cristo yere yuhũ buhegũ tiquina pehe yuhũre yedo-hoyequina ijire.

²⁵Mari puhtoro Jesucristo mehna quehnoa dutiaja mũsare. Tiquiro mũsare quehnoano yerota.

Hebreos

1 Panopu Cohăcĵu ijiahye. Tiquiro peye tahari mari acayere panopu cjĕnare tiquiro yere yahuahye. Apequinare tiquiro bajuaro yahuahye. Apequinare quehĕnopu yahuahye. Apequinare tiquiro piti caro yahuahye. Tiquiro yere yahu muhtariquinare yahu dutiro, sa yahuahye tiquiro mari acayere. ²Yojopure pihtiri deco panogă ijiye decorire tiquiro macunore tiquiro yere yahu dutigū tiquiro pehe marine yahue tiri. Tiquiro Pacuro ye dutiro mehna ahri yehpare, ũhmuse gūhure yeriquiro ijire. Tiquiro Pacuro pehe pihtiri deco ijigū ijipihtiyere cĕoatiquirore cūahye tiquiro macunore. ³Sa yero tiquiro macuno pehe tiquiro Pacuro ye asi siteyere cĕoriquiro ijiro, tiquiro tutuayere marine ihĕnore. Sa yero ihcāno saha tiquiro Pacuro yero sahata ijiro, tiquiro Pacuro ijiye tiyere marine ihĕnore tiquiro macuno. Sa yero tiquiro macuno tiquiro tutuaye mehna dutigū ahri yehpa, ũhmuse gūhū sa ijiducure. Sa yero mari ņano yerire tiquiro coseri bato ũhmusepu tiquiro Pacuro tutua yūhduariquiro pototo pehe dujiahye, puhtoro tiquiro ijiyere ihĕnono.

Cohăcĵu macuno angele yūhduro ijire

⁴Tiquiro “Cohăcĵu macuno”, wame tire. Ti wamene Cohăcĵu cūahye tiquirore. Sa wame tiro apequina puhtoro ijire. Sa yero tiquiro angele yūhduro ijire. ⁵Tiquiro yequina angele pehere Cohăcĵu ne ohō saha ni yahuera tiahye:

Yūhū macu ijire mūhū. Miare mūhure bajuagū yei, niahye Cohăcĵu tiquiro macunore.

Angele pehere ne sa ni yahuera tiahye. Sa yero tiquinare ahri gūhure ne yahuera tiahye:

Tiquiro Pacuro ijitja yūhū. Sa yero tiquiro yūhū macu ijirota, niahye Cohăcĵu tiquiro macunore.

Angele pehere ne sa ni yahuera tiahye. Sa yero tiquiro macuno tiquina yūhduro ijire. ⁶Sa yero ape taha tiquiro macunore coă masa bajuariquirore ahri yehpare cūno ohō saha niahye Cohăcĵu tiquirore:

Ijipihtiyequina yeequina angele dusepe curi mehna quehe sa, ņo peota tiquina yūhū macure, niahye tiquiro.

⁷Sa yero tiquiro yequina angele pehere yahuro taro ohō saha niahye tiquiro:

Yeequina angelere wihnono yero saha pagu tigū yeaja yūhū. Tiquina yūhū cahacĵena ijire. Sa yegu tiquinare peca pohna yero saha pagu tigū yeaja yūhū, ni yahuahye Cohăcĵu.

⁸Tiquinare sa nieperota tiquiro macuno pehere ohō saha niahye:

Mūhū Cohăcĵu ijipihtiyequina puhto sa ijiducuguta. Queoro dutiguta mūhū, mūhū yequinare. ⁹Ni mehono marieno yeyere, quehnoano yeyere tutuaro cahmene mūhū. Sa yegu ņaņe yeyere ihĕna yabire mūhū. Mūhū sa ijigū ihĕagu yūhū mūhū Pacu ijipihtiyequina apequina yūhduro mūhure bucuagū yei, niahye Cohăcĵu mari Pacu.

¹⁰Ahri gūhure niahye tiquiro, tiquiro macunore “Puhto” ni pisuro:

Puhto, coă waropure ahri yehpare, ũhmuse gūhure bajumehnedi mūhū.

¹¹Ti ijipihtiyē comesa pihtia waharota. Mūhū pehe ne comesasi. Sa ijiducuguta mūhū. Ti ijipihtiyē suhtiro ahba bora dijiaro saha pihtia waharota. ¹²Ti ijipihtiyē ũhmūserē, ahri yehpa gūhure comesagū yeita mūhū. Munano suhtirore mūhū co-

hāboro saha ti ijipihtiyere comesagū yeita mūhu. Sa yero suhtiro ahba bora dijiaro saha ti ijipihtiyere comesarota. Mūhu pehe ne comesasi. Sa ijiducuguta mūhu, niahye Cohācjū tiquiro macūnore.

¹³Ne angele pehere ahrire yahuera tiahye mari Pacū:

Yūhu poto pehe dujiya mūhu. Puhto ijire mūhu. Sa yegū mūhure ihña tuhtiyequinare yūhdūdūca basagūtja. Sa yegū tiquina puhto ijigūta mūhu, niahye Cohācjū tiquiro macūnore.

¹⁴Ijipihtiyequina angele pehe Cohācjū cahācjēna ijire. Sa yero mari Pacū ohore tiquiro yequina angelere Cristo yūhdūoatiquinare yedoho dutiro.

Cohācjū yere quehnoañe buheyere marine sa tūhotu cāhno cahmedare

2 Sa yena Cohācjū macūno waro marine yahuriquiro tiquiro ijigū masina tiquiro yahuyere mari tūhorire quehnoano wacūno cahmene marine, “Tire boari”, nina. ²⁻³Angele yahurire masa pehe yūhdūdūcagū ihñano Cohācjū tiquinare buhiri dahreahye. Sa buhiri dahrero angele tiquina yahuri poto ijigū ihñono niahye. Sa yena angele yahuri poto ijigū masina, tire marine yūhtiro cahmene. Ti yūhdūoro Cristo pehere yūhtiro cahmene. Tiquiro mari puhtoro marine tiquiro yūhdūoatire yahu mūhtahye. Sa ye tiquirore tūhoriquina pehe tiquiro yahurire marine yahu turari, marine quehnoano masigū yee tehe. Sa yero ti buheyere marine tiquiro yūhdūoati buheyere mari sa tūhotu cāgū Cohācjū marine buhiri dahrerota. Tire duhti masiedaja mari.

⁴Ti buheyere tūho mūhtariquina tiquina buheri watoa Cohācjū pehe ti buheye poto ijigū ihñono nidi. Tiquiro tutuaye mehna ihñono nidi. Sa yero peye tahari tiquiro tutuaye mehna ye ihñono ti buheyere poto ijigū ihñono

nidi. Sa yero tiquiro yequinare tiquina ye masiatire tiquiro cahmeno sahata cūahye. Espiritu Santo pehe ijire marine ye masigū yeriquiro.

Jesucristo mari yero sahata pagū tiriquiro masa bajaahye

⁵Pihtiri deco bato ijiyequina Cohācjū caha ijiyequina puhtoa ijisi angele pehe. Tiquinare puhtoa sōsi mari Pacū.

⁶Sa yero ihcāquiro mari Pacūre tiquiro yahuducurire ohō saha ni ojoahye panopū:

Masa ihyo ijiyequina tiquina ijipegūta tiquinare wacūre mūhu. Masare quehnoano yere mūhu. ⁷Meheñe decorigā angele docapū masare cūahye mūhu. Sa cūepēgūta yojopūre tiquinare tutuayere ohogū, puhtoa sōahye mūhu.

⁸Mūhu sa sōgū ahri yehpapū ijiyequina wahiquina gūhu bui dūhsaro marieno masare cūahye mūhu, niahye panopū cjūno mari Pacūre.

Sa sōno ahri yehpapū ijiyequina wahiquina gūhu bui dūhsaro marieno masare cūahye. Masare tiquiro sa puhtoa sōepēgūta ijipihtiyequina ahri yehpapū ijiyequina wahiquina masare ihña wahāedarīaga, ūsā tūhotugū. Ahri yehpapū ijiyequina wahiquinare ihña wahāgū yeraniaga masa. Ijipihtiyere bui ijieraniaga masa. ⁹Sa tiquinare ihña wahāgū yerapenata Jesu pehere wacū tutuaja mari. Meheñe decorigā angele docapū mari Pacū tiquiro macūno gūhure cūahye, mari ñañe buhiri yariatiquirore. Mari Pacū marine cahño mari yariaborirore Jesure yariagū cahmeahye. Sa yero tiquiro sa yariagū ihñano tiquirore tutuayere ohoro, puhtoro sōahye tiquirore.

¹⁰Cohācjū ijipihtiyere bajumehnediquiro ijire. Sa ye ijipihtiyere tiquiro ye dihita ijire. Sa yero Jesure

varia dutiro ñañene cohāgū yeahye tiquirore. Sa yeahye tiquiro masa peyequina tiquiro yequina ijiatiquinare uhmusepu neano taro. Jesu sa yero, ñañe marieniquiro, quehnoa yuhduariquiro tiquiro ijiyere ihñono niahye. Sa yero Jesu pehe marine yuhduoriquiro, mari puhtorota ijire. ¹¹Ijipihtiequina masare tiquina ñañe yerire cose were tiquiro. Sa yero Jesu mari tiquiro cose wenohrina mehna Pacu tire Cohācjüre. Mari Pacu ihcāquirotota ijire. Mari Pacu tiquiro ijigū Jesu marine tiquiro yequinare tiquiro cose wenohrinare “Yuhū acaye ijire”, ni pisuro ne bue tierare. Tiquiro sa ni pisurire musare yahutja. ¹²Ohō saha nino niahye tiquiro:

Cohācjū, mūhu ijiye tiyere yahutja yuhū acayepure. Ijipihtiequina yeequina ihñonopu mūhure ño peogu “Tutuariquiro ijire”, ni yahutja yuhū tiquinare, niahye tiquiro Pacurore.

¹³Ahri gūhure niahye tiquiro:

Cohācjüre wacū tutuautja yuhū, niahye tiquiro.

Ahri gūhure niahye tiquiro:

Ohō ijiaja yuhū. Cohācjū pohne mehna ohō ijiaja. Yuhūre tiquiro cūriquina yuhū acaye mehna ohō ijiaja, niahye tiquiro yequinare “Yuhū acaye” ni pisuro.

¹⁴“Tiquiro pohne” tiquiro niñequina pagu tiyequina mari ijigū ihñano, Jesu pehe mari ya pagu saha pagu tiriquire ahtahye. Sa ijiriquiro ahtahye tiquiro curusapu yariaro taro, watīnore butigū yero taro. Tiquiro watīno pehe varia dutiriquiro ijire. ¹⁵Sa ye watīnore butigū yero, marine yuhduore. Mari pehe decoripe mari yariatire cuemi. Sa cuerina ijina pecapu wahaborina ijimi mari. Sa ijina mari ijigū ihñano tiquiro marine yuhduore. ¹⁶Sa yuhduoro angele pehere yedohoro ahtaerahye tiquiro. Abrahā panamena iji turianare Co-

hācjū yequinare mari pehere yedohoro ahtahye. ¹⁷Sa yero tiquiro mari acayuro warota ahtahye. Ihcāno saha mari yero saha pagu tiriquire ahtahye. Sa ahtaro mari yuhduatire mari ñañe yerire mari Pacure cohā dutiro ahtaro niahye. Sa yero mari yequina pahia puhtoa tiquina yeriro saha yero ahtaro niahye. Mari yero saha ijiro marine quehnoano paja ihñare. Sa yero Cohācjū cahmeno saha sa yeducuriquiro ijire. Sa yero tiquiro mari yaquire pahia puhtoro ijiro nine. ¹⁸Tiquiro ñano yuhduahye. Sa yero watīno tiquirore ñano ye dutimahye. Yerahye tiquiro. Sa ñañene yerariquiro ijiro, tiquiro pehe mari gūhure ñañene yeragū ye masine. Watīno ñañene tiquiro ye dutigū ihñano marine ñañene yeragū ye masine Jesu.

Jesu Moise yuhduoro ijiriquiro ijire

3 Jesu tiquiro sa ijiriquiro ijigū ihñana tiquirore quehnoano wacūña musa. Yuhū acaye Jesu yequina, Cohācjū besenohrina ijire musa. Tiquiro Jesu pehe Cohācjū cūriquire ijiro mari yaquire pahia puhtoro ijire. Tiquiro ye buheyere quehnoañe buheyere mari quehnoano ño peoaja. Tiquiro pehere quehnoano wacūña musa. ²Cohācjū tiquirore marine yuhduoatiquirore tiquiro cūgū tiquiro pehe Cohācjū cūriro saha yeahye. Ne yuhduucaerahye. Moise gūhu Cohācjū yequina Israe masare yedohoro ne yuhduucaerahye. Sata yeahye Jesu gūhu.

³Sa yero Moisere tiquina ño peoriro yuhduoro Jesu pehere ño peoro cahmene marine. Ohō saha ijire ti mari queoye mehna buhegū. Wuhure mari ño peoriro yuhduoro wuhū dahreriquiro pehere ño peoro cahmene marine. Sa yero Jesu pehe wuhū dahreriquiro yero saha ijiriquiro tiquiro ijigū Moisere mari ño peoriro yuhduoro tiquiro pehere ño peoro cahmene marine. ⁴⁻⁶Ohō

saha ijire ti. Mari Cristo yequina Cohācjū ya curua cjāna ijiaja. Cristo pehe wuhure tiqiro cūboriro saha marine tiqiro ya curua cjāna ijiatinare cūno nine. Masa pehe wuhuse yeyequina ijire. Cohācjū pehe ijipihtiyere yeriqiro ijire. Moise pehe Cohācjū ya curua cjēnare yedohoducuriqiro ijiro, camepū Cohācjū yahuatire yahue tiahye masare. Cristo pehe Cohācjū macano ijiro, Cohācjū yere yeducuriqiro ijiro, Cohācjū ya curua cjēna puhtoro ijire. Sa ijiriqiro ijigū ihñana Moiseri mari ño peoriro yuhdoro Cristo pehere ño peoro cahmene marine. Sa yena mari pehe Cristore wacū tutua duhuerana, marine tiqiro yuhduotire sa bucueducuna, tiqiro ya curua cjāna ijiaja mari.

Cohācjū tiqiro yequinare tiqiro mehna quehnoano sogū cahmene

⁷ Sa yena Cristore mari wacū tutua duhueratire ohō saha yero cahmene marine. Ohō saha nine Espiritu Santo:

Miare yuhū, Cohācjū, musare yuhū yahugū, yuhti dueyequina yero saha ijieracāhña. ⁸ Quehnoano yuhtiya musa yuhure. Panopū Israe masa masa marienopū ijiye, sa yuhduducari yuhure. Sa ye yuhure ne bucuercagū yeri tiquina. Sa yena tiquina yero saha yeracāhña musa yuhure. ⁹ Topure cuarenta cūhmarī waro tiquinare yuhū tutuaye mehna ye ihñomi. Yuhū sa ye ihñopegūta tiquina pehe ohō saha ni tuhoteu timedi: “¿Ñañene mari yegū ihñano Cohācjū marine buhiri dahreboagari?” ni tuhoteu timedi. Sa ni tuhoteuye ñano ye tuhue tiri. ¹⁰ Tiquina sa yegū ihñagu tiquina mehna usuau. Sa usuagu ohō saha nii: “Tiquina yuhū yahuducuyere tūho dueraye, sijoro saha ijiye buheyere sa wacūducuye nine. Yee pehere ne yuhti duerare”, nii tiquinare. ¹¹ Sa yegu

tiquina mehna usuagu ohō saha ni yahuu: “Tiquina yuhū mehna cjēna ne ijisi. Sa ye wape tiro marieno ijisi tiquina’, ni yahuu yuhū”, ni yahuahye Cohācjū, niahye Espiritu Santo pehe.

¹² Sa yena yuhū acaye, quehnoano yeya musa, “Cohācjūre cohāri”, nina. Musa ñañene tuhutuna, Cohācjūre catiriqirore wacū tutuerana, tiqirore cohāboaga musa. Ne ihcāqiro musa mehna cjūno sa yeracāhdo. ¹³ Sa yena ahri pehere yero cahmene: Musa mehna cjēnare decoripe Cohācjū yere musa basi cahme yahuducuya “Ñañene yeari”, nina. Ñañene yena, “Ti mehna bucueaja”, nina ni mehoñene tuhutuna niaja mari. Sa ni tuhoteuercāhña. Ñañene yeducuna Cohācjū ye pehere cahmedaja mari. Sa yena ñañene duhu dueraja. “Sa yeari”, nina, musa mehna cjēnare Cohācjū yere musa basi cahme yahuducuya. Cristo tiqiro ahtato pano decoripe tire sa cahme yahuducuya. ¹⁴ Sa yena coā waropū Cristore mari wacū tutua ducariro saha mari wacū tutuaducuna, mari catiro puno tiqiro yere duhuerana, tiqiro mehna cjāna ijiaja.

¹⁵ Ohō saha nine Cohācjū yere tiquina ojoari pūpū:

Miare yuhū Cohācjū musare yuhū dutigū quehnoano yuhtiya musa yuhure. Panopū cjēna Israe masa yuhū yahuepegūta ño peo dueraye, yuhure yuhti duerari. Sa yena tiquina yero saha yeracāhña musa, niahye Cohācjū, ni ojoahye panopūre.

¹⁶ Sa ye Cohācjū tiqiro yahurire tuhomediquina ijiepetā tiquina tiqirore yuhtierahye. Tiquina ijipihtiyequina Egiptopū ijiyequina Cohācjū wioriquina ijiepetā tiqirore ne yuhtierahye. ¹⁷ Sa ñano yeye cuarenta cūhmarī waro Cohācjūre usuagū yee tiahye. Tiquina

sa yeri buhiri masa marienopu yariahye tiquina. ¹⁸Tiquirore tiquina sa yuhti dueragū ihñano ohō saha cua pesaro mehna niahye tiqiro: “Tiquina yuhu mehna cjēna ne ijisi. Sa ye wape tiro marieno ne ijisi tiquina”, niahye tiqiro. ¹⁹Tiqiro sa nigū tuhona ahri pehere masinata mari: Cohācjüre tiquina wacū tutuerari buhiri tiqiro mehna cjēna iji masiedahye. Sa ye tiqiro mehna quehnoano so, iji masiedahye.

4 Sa yero panopu cjēnare tiqiro mehna tiquina quehnoano soatire cahmeno, tiquinare “Yuhu mehna wape tiro marieno sonata”, ni cūahye Cohācjū. Mari gūhure sata ni cūahye tiqiro. Sa yena cua pesaro mehna Cohācjüre quehnoano yuhtihna mari, “Wihearī”, nina. Sa wihena tiqiro mehna quehnoano sosi mari. ²Panopu cjēna Cohācjū yere tiquina tuhoro saha mari gūhu quehnoañe buheyere tuhō. Tiquina tuhō muhtariquina pehe tuhoye, “Cohācjū ye waro ijire”, ni tuhōtuerahye. Sa ye tiquina tuhori dūh-seati ijierahye. ³Mari pehe tiqirore wacū tutuana Cohācjū mehna cjāna ijinata. Sa yena tiqiro mehna quehnoano iji, sonata. Wape tiro marieno ijinata. Cohācjū tiqiro nidiro sahata ijire ti. Ohō saha niahye tiqiro tiqirore yuhtierariquinare:

Tiquina mehna usuagu cua pesaro mehna ohō saha ni yahuu: “Tiquina yuhu mehna cjēna ne ijisi. Sa ye wape tiro marieno ne ijisi”, ni yahuu, niahye Cohācjū yere tiquina ojoari pūpu.

Ahri yehpare tiqiro yeri bato dahra duhurīahye tiqiro. ⁴Ahrire mari masi-aja. Seis decori ahri yehpare tiqiro yeri bato tiqiro dahra duhurire yahuro ohō saha niahye Cohācjū ye yahuducuyere tiquina ojoari pūpu:

Seis decori bato ijipihtiyere tiqiro dahrarire pehoro, Cohācjū dahra

duhuahye, niahye tiqiro yere tiquina ojoari pūpu.

⁵Sa yero Cohācjū yere tiquina ojoari pūpu ohō saha ni yahure tiqiro mehna quehnoano ijieyequinare:

“Tiquina yuhu mehna cjēna ne ijisi. Sa ye wape tiro marieno ne ijisi”, niahye Cohācjū, nine tiqiro yere tiquina ojoari pūpu.

⁶Sa ye quehnoañe buheyere tuhō muhtariquina tiqirore tiquina yuhduducari buhiri tiqiro mehna cjēna ijisi tiquina. Sa ye tiqiro mehna wape tiro marieno ijisi tiquina. Apequina pehe tiqiro mehna cjēna ijietā. Sa ye tiqiro mehna wape tiro marieno soyequina ijietā. ⁷Sa yero masare tiqiro yuhduoati deco ihcā deco cūahye pari turi Cohācjū. Ti decota yojoPURE ijire. Peye cūhmari bato Israe masa Cohācjüre tiquina tuhō muhtari bato ti decore yahuahye Davi pehe. Cohācjū tiqirore yahu dutigū yahuahye. Cohācjū ye yahuducuyere tiquina ojoarire musare yuhu yahuri decore ohō saha ni ojoahye Davi:

Ahri decore yuhu Cohācjū musare yuhu yahugū yuhduducaro marieno quehnoano yuhtiya musa yuhure, ni ojoahye panopure.

⁸Coā waropure Josué Israe masare Cohācjū ohori yehpapu ne sahye. “Yuhu mehna wape tiro marieno soyequina ijietā”, nino, ti yehpapu tiquina soatire nino niedahye Cohācjū. Ti yehpapu so dutiro, ape deco tiqiro yuhduoati decore cūedaboaga tiqiro.

⁹Seis decori bato ahri yehpapure tiqiro yeri bato Cohācjū tiqiro dahra duhuriro saha mari tiqiro yequina gūhu tiqiro mehna wape tiro marieno mari soati ijirota. Tiquiro mehna mari quehnoano ijieto ijirota. ¹⁰Sa yero Cohācjū tiqiro dahrarire duhu cārīahye. Sa yena mari gūhu mari wape tirire duhu cānata. ¹¹Sa yena mari

tiqiro yequina quehnoano yeihna. Cohācjū yere quehnoano yūhtiihna tiqiro mehna mari quehnoano soato saha. Panopu cjēna mari acaye tiquina yūhduducari bato Cohācjū mehna cjēna iji masiedahye tiquina. Tiquina yero saha yeracūhna mari.

¹² Cohācjū ye yahuducuye marine catigū yere. Quehnoañe pehere marine comesagū yere. Sa ye tiqiro ye yahuducuye ihyo ijiye ijierare. Sa ye ñoseni pjī pua peheri siori pjī mehna dihireo tiquina yūhre ihña tiquina masino saha tiqiro ye yahuducuye gūhu mari ijiye tiyere quehnoano masigū yere. Tiquiro ye yahuducuyere mari tuhogū, tire mari buhegū mari ijiye tiyere quehnoano masi pehogū yere marine. ¹³ Ne Cohācjūre mari ijiye tiyere mari yerire nuo masiedaja mari. Ijipihtiyere tiqiro bajumehnedire, tiqiro bajumehnediquina gūhure ihñare tiqiro. Sa yena mari yerire tiqirore yahu yūhduro cahmene marine.

Jesu tutuariqiro mari yaqiro pahia puhtoro ijire

¹⁴ Jesu Cohācjū macno tiqiro Pacuro cahapu tojoariqiro ijire. Tiquiro tutuariqiro mari yaqiro pahia puhtoro ijire. Sa yero marine Cohācjūre sini basare. Tiquiro sa ijiriquiro ijigū ihñana mari pehe tiqiro yere quehnoano yūhtiihna. Tiquirore quehnoano wacū tutuaducuhna. ¹⁵ Tiquiro mari yaqiro pahi mari ñano yūhdugū ihñano quehnoano paja ihñariqiro ijire. Mari ñañene tutuaro cahmeñene masine tiqiro. Watīno ijipihtiyere ñañene marine tiqiro ye dutiro sahata tiqiro gūhure ñañene ye dutimahye. Tiquiro sa ye dutiepegūta tiqiro ñañene yerahye. Sa ñañene tiqiro ye dutinohriqiro ijiro, marine paja ihñano tiqiro yedoho masine marine. ¹⁶ Sa yena cuero

marieno Cohācjūre sinihna. Tiquiro marine cahīne. Sa yero tiqirore mari sinigū tiqiro pehe paja ihñano, marine yedohorota. Watīno marine tiqiro ñañene ye dutigū, mari ñano yūhdugū gūhure tiqiro marine yedohorota.

5 Ijipihtiyequinare pahia puhtoare besero, masare besere Cohācjū. Sa tiqiro beseri bato pahia puhtoa pehe tiquina mehna cjēnare yedohoye tehe Cohācjū cahacjēna ijire. Sa ye ñañene tiquina yeri buhiri Cohācjūre sini basare tiquina mehna cjēnare. Wahiquirore wejē ujūa muoñe, Cohācjūre sini basare. ² Pahia puhtoa apequina masa yero saha quehnoano masi pehoeyequina ijire. Sa masieñequina ijiye, apequina masieñequinare yedoho masine. Sa ye quehnoano yerariquina gūhure quehnoano yedoho masine. ³ Sa ye pahia quehnoano ye pehoeyequina ijiye ñañe buhiri tiyequina ijire. Sa ye tiquina basi ñañene tiquina yeri buhiri wahiquirore wejē ujūa nuo, Cohācjūre sinine. Apequina masare yedohoye tehe, tiquina ñañe buhiri tiquina sini basariro sahata tiquina basi tiquina ñañe buhiri gūhure sinine Cohācjūre.

⁴ Sa yero tiqiro basi tiqiro esa tuharo pahia puhtoro sajāedare. Cohācjū pehe tiqirore besero, pahia puhtoro sōre. Panopu cjūno Aaron munanore tiqiro cūriro sahata apequina pahia puhtoa gūhure cūre tiqiro. ⁵ Sata Cristo gūhu tiqiro basi tiqiro esa tuharo pahia puhtoro sajāedahye. Cohācjū pehe tiqirore puhtoro sōno, ohō saha niahye: Yūhu macu ijire mūhu. Miare mūhure bajuagū yei, niahye Cohācjū.

⁶ Ape taha ohō saha niahye Cohācjū Cristore:

Ijipihtiyē decori pahi ijiducugūta mūhu. Melquisede tiqiro ijiriro saha pahi ijiducugūta mūhu, niahye tiqiro macnōre.

⁷Cristo ahri yehpapu ijiro sañuducuye mehna, utiye mehna mari Pacure tutuaro siniahye tiqiro “Yuhare masoña”, nino. Mari Pacu pehe tiqirore yariariqirore maso masiniqiro ijire. Tiquiro sa sinigü mari Pacu tuhoahye tiqirore. Mari Pacu cahmeñe dihitare tiqiro ye duagü ihñano mari Pacu pehe tiqiro sinidire tuhoro, tiqirore yuhtiahye. ⁸Sa yero Cristo Cohäcjü macano ijieperota ñano yuhduahye tiqiro. Sa ñano yuhduro yuhtiahye mari Pacure. Sa yuhtiro quehnoano yuhti masiahye. ⁹Sa ñano yuhduro, curusapu yariaro ijipihitiyequina tiqirore yuhtiatiquinare yuhduoatiqiro wahahye. ¹⁰Sa yero mari Pacu pehe tiqirore pahia puhtoro cüahye. Sa yero Melquisede pahia puhtoro tiqiro ijiriro saha ijire Cristo.

Cristo yequina tiqirore wacü tutua duhugü cuarñe

¹¹Peye ohö saha ijiyere musare yahu nemo duaja usä. Usä sa yahu nemo duepegüta musa pehe dapu butina ijire. Sa yena musare yahuro basioerare usäre. ¹²Yoari pje Cristo yequina ijimene musa. Sa yena yojopure apequinare buhenapu iji tuhasaboya musa. Musa sa ijiborina ijiepegüta apequina musa pehere buheeta. Cohäcjü yere mijoeda cjüñe buheye dihitare tuhore musa. Macanagä epëco dihitare tiquina apü masino saha musa gühu mijoeda cjüñe dihitare quehnoano tuhore. Coã buhe ducayequina yero saha ijire musa. ¹³Epëcore apüñequina macanagä ijine. Tiquina yero saha musa gühu ijire. “Ahri ñañe ijire. Ahri quehnoañe ijire”, ni ihña masiedare musa. ¹⁴Ihyayere ihyayequina pehe bucuna ijire. Tiquina yero saha ijiyequina quehnoano tuho masiñequina quehnoano buheriquina ijire. “Ahri ñañe ijire. Ahri quehnoañe ijire”, ni ihña masine tiquina pehe.

6¹⁻²Sa yena Cohäcjü yere quehnoano masina, quehnoano yuhtina ijiihna. Cristo yere coã warore mari buhe ducana ohö saha masi ducaru: Mari ñañene yerire bujua witi, duhuro cahmene. Mari ñañene yeri buhiri pecapu wahanata. Sa yena Cohäcjüre wacü tutuaro cahmene marine. Ahrire coã waropure marine buhe ducari. Sa ye wame yeyere, omocarine marine tiquina duhu peoyere, yariariquina tiquina masa mujañene, ahri deco pihitiro bato Cohäcjü buhiri dahreatire, tiqiro buhiri dahreatiquina tiquina ñano yuhduducuato gühure ahri gühure coã waropure marine buhe ducare. Sa ijiye buheyere masi tuhasana, quehnoano buhe nemouhna tja. ³Sa yena Cohäcjüre, tiqiro ye gühure masi nemouhna. Cohäcjü cahmegü sa yenata mari.

⁴Mari sa yerana Cohäcjü yere duhuboaga mari. Cohäcjü yere duhuriquinare ne pari turi tiquina ñañe yerire tiquinare bujua witi gü ye masiedare. Sa ijiyequina Cristo tiqiro yuhduomediquina ijiye, Espiritu Santore cuomedi. ⁵Sa ye Cohäcjü ye yahuducuyere tuhoye quehnoañe ti yahuducuye ijigü masimedi. Sa ye pihitiro deco batopu Cohäcjü tutuaye mehna mari sa ijiducuatire, masare tiqiro buhiri dahreato gühure tiquina masimedi.

⁶Sa ijiriquinapure Cristo yere tiquina duhugü pari turi tiquina ñañe yerire tiquinare bujua witi gü ye masiedare. Sa duhuriquina Cohäcjü macnore pari turi curusapu tiquina quë bihaboriro saha tiqirore yeye nine. Tiquina sa yegü ihñañe apequina masa Cristore bujupere. Sa ye tiquina ñañe yerire tiquinare bujua witi gü ye masiedare. ⁷Ohö saha ijire ti mari queoye mehna buhegü: Quehnoari yehpare pajiro acoro ahtagü ti oteye quehnoano bucua, ducare. Sa yero ti wese upuro ducare

cuore tiquiro ihyatire. Ti yehpa Cohăcĵũ quehnoano tiquiro yeri yehpa ijire. Sa quehnoano yere tiquiro yequina gũhũre.⁸ Sa ijiepegũta pota mehna, taa mehna ti yehpa diaro duhseati ijierare. Sa ijiri yehpare Cohăcĵũ Ʃjũa cohănota. Sata yere tiquiro tiquirore duhuyequinare.

Cristore sa ño peoducuyequinare yuhduore Cohăcĵũ

⁹ Үһһу cahĩna, musare sa ni yahuepeguta musa pehere “Cristore duhuna ijire”, nigũ niedaja. Musa pehe Cristo yuhduonohrina ijire. Sa yena quehnoañene yena niaga musa. Ahrire masiaja yuhũ. ¹⁰ Quehnoano mari yeri wapa queoro marine quehnoano yeriquire ijire mari Pacũ. Sa yero tiquiro yere musa tutuaro dahrari wapare bosu tiquiro. Tiquirore cahĩna quehnoano yedohore musa tiquirore. Apequina Cristo yequina gũhũre yedohore musa. Sa yena tiquinare yedohona niaga musa. Sa yerina musa ijigũ ihñano bosu tiquiro. ¹¹ Musa catiro puno apequinare musa cahĩducugũ, musa yedohoducugũ gũhũre cahmeaja usă. Musa sa yeri wapa queoro quehnoano yerota mari Pacũ musare. ¹² Sa yena musa cape bujũna musa ijigũ cahmedaja usă. Apequina Cristo yequina ñano yuhduepeta tiquiro yere ne duhuerare. Tiquina sa yegũ ihñano mari Pacũ “Musare ohoutja”, tiquiro nidire tiquinare oho pehorota. Sa yena musa gũhũ tiquina yero saha yeducuya.

¹³⁻¹⁴ Panopũ Cohăcĵũ Abrahăre ohũ saha ni cũahye. “Yuhũ wame mehna ahrire poto nii niaja muhũre. Muhũre quehnoano yeitja. Sa yegũ muhũ panamena iji turiayequinare peyequina masa ijigũ yeitja”, ni yahu cũahye Cohăcĵũ. Sa ni yahu cũno tiquiro ye wame mehna wame peo yahuro niahye. Apequiro tiquiro bui ijiriquire ne mariedagũ tiquiro ye wame mehna tiquiro ba-

sita sa wame peo yahuahye. ¹⁵ “Muhũre quehnoano yeitja”, Cohăcĵũ tiquiro ni cũrire Abrahă pehere quehnoano tiquiro cohtegũ ihñano tiquiro nidiro sahata tiquirore quehnoano yeahye. ¹⁶ “Cohăcĵũ mehna poto nina niaja”, masa pehe niñe, tiquina bui ijiriquire wame mehna wame peo yahuye nine. “Cohăcĵũ mehna poto nii niaja”, ihcăquiro nigũ tuhoro apequiro pehe tiquiro mehna cahme duse tutuariquire pehe “Ijirota ijire”, ninota. Sa ye cahme duse tutua duhueta tiquina. ¹⁷ Sa yero Cohăcĵũ Abrahăre “Muhũre quehnoano yeitja”, ni cũno wame peo yahuahye. Tiquiro sa wame peorire tuhona “Ijirota ijire ti. Tiquiro sa nidi ne comesasi”, ni, masiaja mari. Tire mari masiato saha tiquiro ni cũri mehna wame peo yahuahye.

¹⁸ Sa yero puaro tiquiro ni yahuducuri mehna tiquiro nidi poto ijigũ masigũ yeahye Cohăcĵũ marine: Tiquiro ni cũri gũhũ tiquiro wame peori gũhũ ti puaro mehna tiquiro ni yahuducurire yahuahye tiquiro. Sa ye tiquiro ni cũri gũhũ, tiquiro wame peori gũhũ ne comesaerare. Sa yero Cohăcĵũ ne ni mehoedare. Tiquiro sa ijiriquire ijigũ masina, mari tiquirore quehnoano wacũ tutuana, bucueye mehna marine tiquiro yuhduoatire cohtenatja mari. ¹⁹⁻²⁰ Sa tiquiro yuhduoatire cohtena, wacũ tutuana ijiaja mari. Sa yena cueraja. Pahia puhtoro Cohăcĵũ ijiri tucũ waropũ sajăno, cahmotari suhtirore yuhdu sajăre. Sa sajăno masa ye ijiatire sini basare Cohăcĵũre. Tiquiro sa yeriro sahata Jesu gũhũ came mari wahato sahata uhmusepu Cohăcĵũ cahapu waharo, mari ye ijiatire sini basare Cohăcĵũre. Topũ mari wahato pano tiquiro pehe wahahye. Sa yero ijipihtiye decori pahia puhtoro ijire tiquiro. Melquisede pahi tiquiro ijiriro saha pahia puhtoro ijire tiquiro gũhũ.

Melquisede pahi tiqiro ijiriro saha Jesu pahia puhtoro ijire

7 Melquisede Salē wame tiri maca cjēna puhtoro ijiahye. Sa yero pahi ijiro Cohācjū tutuariquirore, uhmuse cjūnore sini basariquiro ijiahye. Sa yero apequina puhtoare Abrahā wejē tuhasa, tiqiro tojoa tagū waro Melquisede tiqiro ya macapū ijiriquiro Abrahāre piti caro esahye. Sa piti caro tiquirore sini basahye Cohācjūre. “Quehnoano yeya ahriquirore”, ni sini basahye Abrahāre Cohācjūre. ²Tiqiro sa piti cato pano Abrahā pehe tiquirore ihña tuhtyequinare wejē tuhasa tiqiro wejēdiquina puhtoa yere neahye. Tiqiro sa nedire mehenogā ohoahye Melquisedere. Melquisede tiqiro wame pehe “Puhtoro quehnoano yeriquiro ijire”, nino nine. Sa yero tiqiro Salē wame tiri maca cjēna puhtoro ijigū tiqiro wame ohō saha nino nine: “Puhtoro quehnoano ijigū yeriquiro”, nino nine. “Salē” nino, “Quehnoano ijiye”, nino nine. ³Ne Melquisede pacusumare, tiqiro pano iji muhtariquinare, tiqiro acayere tiquina yahu ojoa ohōri mariedare. Tiqiro masa bajuarire, tiqiro yariari gūhure yahu ojoa ohōri mariedare. Sa yero sa ijiducuriquiro yero saha ijire tiqiro. Tiqiro sa ijiriquiro ijigū Cohācjū tiqiro mehna marine queoye mehna buhere. Cohācjū macūno tiqiro pahi ijirire marine buhere. Melquisede pahi sa ijiducuriquiro yero saha ijire. Tiqiro yero saha Cristo gūhū pahi sa ijiducuriquiro ijire.

⁴Sa yero Melquisede ne ihyo ijiriquiro ijierahye. Abrahā mari nēcū mūnano puhtoro waro ijieperota mehenogā tiqiro nedire Melquisede pehere ohoahye. ⁵Sa yero Cohācjū dutiye Moiserere tiqiro cūri ijipihtyequina apequina Israe masare to punota wapa

ye dutire. Sa dutiro Leví panamena iji turiayequinare tiquina acaye wapa yerire nēhe dutiro, cūahye. Leví panamena pahia wahae tiahye. Sa ye Israe masa Abrahā panamena iji turiayequina ijiepetā tiquina pahiare wapa yee tiahye. ⁶Melquisede pehe Leví panamino iji turiariquiro ijieraperota wapa neahye Abrahāre. Sa yero Cohācjū “Mūhure quehnoano yeitja”, tiqiro ni cūriquiro ijieperota Abrahā pehe Melquisedere wapa yeahye. Sa yero Melquisede pehe Cohācjūre Abrahāre sini basaro quehnoano ye dutiahye.

⁷Quehnoano ye dutiriquiro Melquisede pehe tiqiro quehnoano ye dutinohriquiro Abrahā bui ijire. Tire mari quehnoano masiaja. ⁸Mari mehna cjēna pahia marine mehenogā wapa neñequina mari yero saha masa ijire. Sa ye yariatiquinata ijire tiquina gūhū. Ahriquiro Melquisede pehe Abrahāre mehenogā wapa nediquiro sa catiducuriquiro yero saha ijire. Tiqiro yariarire yahueraro, sata nino niahye Cohācjū yere tiquina ojoari pūpū. ⁹Yojopū cjēna Leví panamena iji turiayequina pahia ijiye, mehenogā wapa nene. Sa ijiyequina tiquina ijiepegūta Abrahā Melquisedere mehenogā wapa yero, ijipihtyequina Leví panamena ye ijiati gūhure oho basaro saha yero niahye. Sa ye tiquina gūhū Melquisedere mehenogā ohoyequina yero saha ijire. ¹⁰Melquisedere Abrahā tiqiro wapa yeri pjere Leví pehe masa bajueraniahye. Sa ijieperota tiqiro nēcūno mūnano Abrahā pagapū tiqiro ijiboriro saha Leví pehe iji tuhasaro niahye. Sa yero Melquisede Abrahāre tiqiro piti cagū Leví gūhū tiqiro nēcūno mūnano mehna ijiro saha ijiro niahye. Sa ye Leví, tiqiro panamena mehna Melquisedere mehenogā wapa

yeyequina yero saha ijiye, tiquina tiqiro docapū ijiye niahye.

¹¹ Tiquiro dutiyere cūno Cohācjū Lev-
īre tiqiro acaye gūhure pahia iji
dutihaye. Sa ye tiqiro dutiye ni-
diro sahata tiquina pahia wahiquinare
wejē ūjūa mūo, Cohācjūre sini basahye
masare. Tiquina sa yeri mehna mari
yūhdūna, apequiro pahi sijoro saha
ijiriqiro pahire cahme nemoedaboya
mari. Sa yena apequiro pahire cahmeaja
mari yojopūre, Melquisede yero saha
ijiriqirore. Levī ya curua cjūno Aaron
mūnano yero saha ijiyequina pahiare
yojopūre mari cahmedaja. ¹² Sa yena
pahiare comesana niaja mari. Mari sa
comesana, marine dutiye gūhure came-
saro cahmene marine. ¹³ Aaron, Levī
gūhū tiquina ya curua cjēna dihitare
pahia sajā duti mūhtamahye Cohācjū,
tiqiro dutiyere cūno. Tiquiro sa du-
tiepegūta yojopūre mari pūhtoro pahi
sōriqiro ape curua cjūno ijire. Sa ye
ti curua cjēna ne pahia sajāedahye.

¹⁴ Tiquiro Cristo Judā ya curua cjūno
masa bajuahye. Tire mari quehnoano
masiaja. Sa yero, Moise pahia sōno, Judā
ya curua cjēnare ne pahia sōeda tiahye.
¹⁵ Ahrire masina, ohō saha mari
quehnoano masiaja: Yojopūre wahma
tiqiro sōriqiro pahi Cristo Melquisede
yero saha ijiriqiro ijire. ¹⁶ Panopū cjē
dutiye ti nidiro sahata Levī ya curua
cjēna dihita pahia sajāhye. Yojopūre
tiqiro sōriqiro pahia tiquina yero
saha pahi sajāedare. Tiquiro Cohācjū
tutuaye mehna ijipihtiye decori
ijiriqiro ijire. Sa yero ti tutuaye mehna
pahi sajāhye tiqiro. ¹⁷ Ohō saha nine
Cohācjū yere tiquina ojoari pūpū:

Ijipihtiye decori pahi ijiducugūta mūhū.
Melquisede pahi tiqiro ijiriro saha
pahi ijiducugūta mūhū, niahye Co-
hācjū tiqiro macūnore, ni ojoahye
panopū.

¹⁸ Ti dutiye tiqiro cū mūhtari dutiye
dūhseati ijierahye. Sa yero ti dutiyere
duhu cāhye Cohācjū. ¹⁹ Moiserē tiqiro
cūri dutiye mehna ne yūhdūerare masa.
Sa yero yojopū pehere Cohācjū ma-
rine tiqiro yūhdūoatire marine cūre.
Tiquiro sa yegū yojopūre tiqiro mehna
yahuducu masiaja.

²⁰ Sa yero Cristore pahi sōno, wame
peoro mehna tiqirore sōahye. Apequina
pahiare tiqiro yero saha wame peo
sōedahye. ²¹ Cristo pehe Cohācjū wame
peoro mehna pahi sajāhye. Ohō saha ni-
ahye tiqiro Pacuro Cristore:

Yūhū mūhū pūhto yūhū wame
mehna mūhūre poto yahutja.
Sa yegū ahrire ne duhu cūno
marieno yahuaja mūhūre. Pahi
sa ijiducugūta mūhū, ni cūahye
Cohācjū tiqiro macūnore.

²² Sa wame peo cūno, wahma buheyere
quehnoāne buheyere marine cūno,
marine tiqiro yūhdūoatire cūno
niahye. Panopū cjē dutiye yūhdūoro
mari quehnoano ijiatire cūno niahye.
Sa yero Cohācjū “Mūsare yūhdūoutja”,
tiqiro nidiro sahata yero taro, Jesure
ohoahye marine yūhdūoatiquirore. ²³ Iji
mūhtariquina pahia tiquina yariagū
ihñāne apequina comesa sajāre tja. Sa
ye tiquina peyequina pahia wahare.
²⁴ Jesu pehe sa ijiducure. Sa ye tiqirore
comesayequina mariedare pahia. ²⁵ Sa
yero tiqiro sa ijiducuro, Cohācjūre
sa sini basaducure tiqiro yequina ye
ijiatire. Sa yero Cohācjū mehna tiquina
sa ijiducuoato saha masare yūhdūo
masine tiqiro. Ijipihtiyequina tiqirore
wacū tutuayequina Cohācjū cahapū
wahaeta. Sa yero Jesu ijire potota
tiquinare yūhdūoriqiro.

²⁶ Sa yero Jesu ijire mari yaquiro
pahia pūhtoro. Tiquiro pūritare
tuturo cahmeaja mari. Ne ñāne buhiri
marieniqiro ijire tiqiro. Sa yero
masa yero saha ne ñāne yere.

Sa yero Cohācjū tiquirore ñañequina cahapū ijiriquire neano, ũhmusepū cū, ijipihtiequina apequina bui puhtoro sōahye. ²⁷Apequina pahia yero saha ijierare tiquiro. Tiquina pehe decoripe wahiquire wejē, ũjūa mūo, Cohācjūre sinie tiri. Tiquina basi tiquina ñañe buhirire sini mahtae tiri. Came apequina masa tiquina ñañe buhiri gūhūre sini basae tiri tiquina. Sa ye peye tahari tiquina Cohācjūre sinie tiri. Jesu pehe pahi ijiro, ihcā tahata tiquiro yariari mehna siniahye Cohācjūre masa tiquina ñañe buhirire yuhduoro taro. Sa yariaro tiquiro basi tiquiro pagure tiquiro jeripohna gūhūre tiquiro ohoboriro saha yero niahye. ²⁸Cohācjū dutiye Moiserere tiquiro cūri pahia puhtoare sajā dutire. Sa sajāepeta ñañe marieñequina ijierare sa pahia sajāñe. Ti dutiye bato ijiye buheye mehna Cohācjū wame peoro mehna tiquiro yahuri buheye mehna tiquiro macno pahia puhtoro sajāhye. Tiquiro pehe ñañe marieniquiro sa ijiducure.

Cohācjū “Musare yuhduoutja”, ni cūahye tja Moiserere tiquiro cūrire comesaro. Tire yahu basariquiro ijire Jesu

8 Ti ijipihtiyere yahuna, ahri pūritare musare yahuna tana niaja: Musare ũsā yahuriquiro pahia puhtoro tiquiro pūrita mari yaquiro waro ijire. ũhmusepū Cohācjū tutua yuhduariquiro tiquiro puhtoro dujiro poto pehe dujiro Cristo mari yaquiro pahia puhtoro. ²Sa yero ahri yehpa cjā wuhupū, masa tiquina yeri wuhupū pahia dahrayere yerare tiquiro. ũhmusepū ijiri wuhupūre mari puhtoro tiquiro yeri wuhupūre pahia dahrayere yere tiquiro. Ti wuhū pūrita Cohācjū waro ya wuhū ijire.

³Ijipihtiequina ahri yehpa cjēna pahia puhtoahye wahiquire wejē ũjūa mūo, ohore Cohācjūre ño peoye.

Sa ye dutie tiahye tiquinare. Mari yaquiro pahi gūhūre Cohācjūre oho dutiahye. Mari ñañe buhirire tiquirore oho dutiahye. Sa yero Cristo mari ñañe buhiri yariaro bucuegū yehye Cohācjūre, pahia puhtoahye Cohācjūre ohoye tiquina bucuegū yeriro saha. ⁴Mari judio masa mari dutiye ti nidiro sahata ahri yehpū pahia masa tiquina ñañe buhirire ohore Cohācjūre sinieñe. Sa ye ahri yehpū pahia iji tuhasare. Sa yero Jesu pehe mari yaquiro pahi ahri yehpū ijirino, pahi ijieraboa tiquiro pehe. ⁵Ahri yehpa cjēna pahia tiquina dahrayere ahri yehpa cjā wuhupūta dahrare. Ti wuhupū Cohācjūre tiquina ño peorire ihñana ũhmuse cjā wuhupūre tiquirore mari ño peoatire masi cjūna niaja. “Ti wuhū yero saha ijire”, nino niahye Cohācjū cūpūre Moiserere tiquiro ya wuhūre dahre dutiro. Tiquiro sa dahreato panogā Cohācjū ohō saha niahye tiquirore. “Cūpūre mūhūre yuhū ihñoriro sahata ti wuhū ijiriro sahata ya wuhūre queoro dahreya”, niahye Cohācjū tiquirore. ⁶Sa yero yojopū pehere Jesu pahi ijiro, tiquiro dahraye apequina pahia ye dahraye yuhduoro ijire. Ihyo waro ijierare. Cohācjū marine “Musare yuhduoutja”, tiquiro ni yahuri panopū cje dutiye Moiserere tiquiro cūri dutiye yuhduoro ijire. Marine tiquiro yahuri ti dutiye yuhduoro marine quehnoano ijigū yeeta. Sa yero marine yuhduo basariquiro ijiro, Cristo pehe apequina pahia yuhduoro ijire.

⁷Coā waropūre tiquiro dutiri mehna mari yuhdueraja. Ti dutiye mehna mari yuhdugū, apeye buheyerere cūedaboya Cohācjū. ⁸Sa yero ti dutiyere tiquina ihcāno sahaerare yahuro ohō saha niahye tiquiro yeequire Israe masare: Ohō saha nine mari puhtoro: “Quehnoano tūhoya. Camerū apeye buheyerere yahutja yequinare

Israe masare, Judá ya curua cjēna gūhure. ⁹Ti buheye tiquina ñecusumua muna iji turiayequinare yuhū yahu cūri yero saha ne ijisi. Yuhū basi tiquinare Egipto yehpapū ijieyequinare wiogū tiquinare yahu cūmi. Yuhū sa ni yahu cūrire yuhūdudūcare tiquina. Tiquina sa yegū ihñagū wahmanore tiquinare yuhū yahumedire duhu cūhū.

¹⁰Sa yegū camepū Israe masare ohō saha ni yahutja: Yuhū dutiyere tiquinare wacūgū yeitja. Sa ye yuhū dutiyere yuhtieta. Sa yegū yuhū Cohācjū tiquina puhto, tiquinare ihña ihbogu ijigutja. Sa ye tiquina pehe yeequina masa ijieta. ¹¹Sa ye ti pjere tiquina mehna cjēnare ne tiquina ohō saha cahme nisi: ‘Mari puhtorore Cohācjūre masiña masa’, ne ni cahme buhesi. Tiquina ijipihitiyequina yuhūre masi tuhasaeta. Macanagā, bucuna gūhū yuhūre masiñequina dihita ijieta. ¹²Sa yegū tiquina ñañe yerire boutja yuhū. Sa yegū tiquinare buhiri dahresi yuhū. Tiquina ñañe yerire pari turi wacūsi yuhū”, niahye mari puhtoro, nine Cohācjū yere tiquina ojoari pūpū.

¹³Yojobure marine tiquiuro ye buheyere cūno, panopū cjē dutiyere duhuro nidi. Sa yero muna dutiyere tiquiuro duhuri bato ti dutiye comesaa wahare.

**Ahri yehpa cjā tucūre uhmuse
cjā tucū gūhure Cohācjūre
ño peori tucūre yahuahye**

9Coā waropure Cohācjū tiquiuro dutiyere Moiserere cūno, masa tiquiore tiquina ño peoato gūhure cūahye. Sa yero Cohācjūre tiquina ño peoati wuhū gūhure ye dutiro cūahye. ²Ti wuhū wahiquina cahseri wuhū ijiahye. Pua tucū cūoahye. Paji cjūri tucū tiquina sajā sa muhtari tucū “Cohācjū ya tucū”,

wame tiahye. Ti tucūpū tiquina sihō docodū ijiahye. Sa yero mesa gūhū ijiahye. Ti mesa bui Cohācjūre tiquina ohori pā pesahye. ³Ape tucū suhti cahseri mehna tiquina cahmotari tucū ijiahye. Ti tucū “Cohācjū ijiri tucū waro”, wame tiahye. ⁴Ti tucūpū uru mehna tiquina yeri altar, ehmeo bueyere tiquina ujuari altar ijiahye. Sa yero uru quehnoañe mehna tiquina duhu ohōri acaro topū cuñahye. Ti acaro puhiapū uru pa maná wame tiye ihyaye pose tiri pa ijiahye. Sa yero ti acaro puhiapū Aaron yadu tuadu pūri tidū ijiahye. Sa yero pua pjī utā pjīni Cohācjū dutiyere tiquiuro ojoari pjīni gūhū ti acaro puhiapū sañahye. ⁵Ti acaro bui puaro angele queoye ijiahye. Ti queoye Cohācjū asi siteyere, ti tucūpū tiquiuro ijiyere ihñoñe niahye. Ti acaro mohano bui tiquina wūye dūpūri mehna mohahye. Ti acaro mohano bui masa ñañe buhirire tiquina ohorire wejē site peoe tiahye pahia puhtoro. To punota yahutja ahri wuhū cjēne yojobure.

⁶Sa ye ti wuhūre tiquina quehnoano quehnoano bato pahia decoripe tiquina sajā sa muhtari tucūpū sajā sa, tiquina dahrayere yee tiahye. ⁷Sa yero pahia puhtoro dihita ape tucūpū sajāhye. Cūhmaripe ihcā tahata tiquiuro sajāri deco boropūta sajāe tiahye tiquiuro. Sa sajāno tiquina wejēdiquiuro wahiquiro tiquina ohoriquiro diire ne sajāno, Cohācjūre ño peoe tiahye. Dii marieno ne sajāedahye. Tiquiro basi tiquiuro ñañe yeri buhirire diire ne sajāe tiahye. Sa yero ijipihitiyequina apequina Israe masa “Ñañe ijia-aga”, nino marieno tiquina ñañe yeri buhiri gūhure diire ne sajāe tiahye tiquiuro Cohācjūre sinino taro.

⁸Ijipihitiye ahri mehna Espiritu Santo ohō saha ni marine buhero nine: Ti wuhūpū Moiserere tiquiuro cūri wuhūpū mari ño peorīna, tiquiuro cūri dutiyere yeatina ijinina, ihyo ijina Cohācjūre ño

peona wahaeraboya mari. Pahia puhtoro dihita Cohăcĵũ ijiri tucũ waropũ sajă masine. Sa yena ihyo ijiyequina tiquina ño peoye wahaeraro saha sa ijiboya mari Moiseru tiqiro cũri dutiyere yena.

⁹Ahri ijipihtiyere Cohăcĵũre ño peori wuhupũ ijiyere marine cũno, marine yojopũ cĵenare buhero niahye Cohăcĵũ. Wahiquinare wejĕ Ƶjũa mũo, masa Cohăcĵũre tiquina ño peori mehna ne Cohăcĵũ cahapũ wahasi. Tiquina sa yeri mehna tiquina ñaňe yerire cose werahye. ¹⁰Sa wahiquinare ohoye, tiquina ihyaye, tiquina sihniňe, tiquina pagũ coseye, tiquina ohũ saha yeye mehna Cohăcĵũre ño peoe timahye. Ahri tiquina sa yeri ihyo warota ijire yojopũre. Sa yeye ti dutiye Moiseru tiqiro cũri dutiye marine quehnoana wahagũ yerahye. Sa ye wahma buheyere Cohăcĵũ tiqiro cũri bato mũna dutiye pehe dũhseati ijierare.

¹¹Cristo pehe mari pahia puhtoro ijiro ahta tuhasari jiri. Sa ijiro marine quehnoañene cũ tuhasari jiri. Cohăcĵũre ño peori wuhũ Ƶhmũsepũ pahia puhtoro tiqiro dahrari wuhũ apequina pahia tiquina dahraye wuhũse yuhduoro quehnoari wuhũ ijire. Ƶhmũse cĵă wuhũ ijire. Ti wuhũ ahri yehpa cĵă wuhũ ijierare. Sa yero masa tiquina yeri wuhũ ijierare. ¹²Sa yero Cristo Ƶhmũsepũ Cohăcĵũ ijiro waropũ ihcă taha sajăhye mari ñaňene yeri buhirire Cohăcĵũre ohoro saha yero taro. Topũ Ƶhmũsepũ ohõpũ tiqiro ijiri tucũ waro yero saha ijire mari queoye mehna buhegũ. Sa yero chivoa diire, wecuagă diire ne sajă, ohoerahye tiqiro. Tiqiro pehe tiqiro ye dii warore Cohăcĵũre tiqiro ohoro saha yero niahye yariaro. Ijipihtiyere decori Cohăcĵũ mehna mari ijiducuatõ saha tiqiro ye diire cohăhye. Mari ñaňe buhirire yariahye.

¹³“Yariariquinare dahra peona mũsa pagũ wete tina ijire”, ni cũahye Cohăcĵũ Moiseru. Sa ijiye ñaňene wete tiyere

cose wee tiahye chivoa diire tiquina ohori mehna. Wecuă diire tiquina ohori mehna, wecuagăre tiquina Ƶjũari nitine tiquina ohori mehna sa ijiye ñaňene cose wee tiahye. ¹⁴Sa ijiye ñaňene wahiquina diire tiquina ohori mehna, nitine tiquina ohori mehna tiquina cose weriro saha ti yuhduoro Cristo pehe tiqiro diire cohăno mehna mari ñaňe yerire quehnoano cose we peho căre. Tiqiro ñaňe marieniquiro ijiro, curusapũ yariaro tiqiro basita tiqiro pagũ, tiqiro jeripohna mehna Cohăcĵũre ohoro saha yeahye. Espĩritu Santo sa ijiducuriquiro yedohoye mehna sa yeahye tiqiro. Sa ye mari ñaňe yerire tiqiro cose wegũ ihňano mari ñaňe buhirire Cohăcĵũ bo căhye. Ti ñaňe buhirire cũona pecapũ wahaborina ijimi mari. Tiqiro cose wenohrina ijina, Cohăcĵũ catiriquiro tiqiro cahmeňene ye masiaja mari.

¹⁵Sa yero “Ohõ saha mũsare yuhduoutja”, masare pari turi Cohăcĵũ ni yahu cũgũ Cristo pehe tiqiro yahuyere yahu basariquiro ijire. Sa yahu basare tiqiro Cohăcĵũ beseriquinare yuhduoro taro. Tiqiro sa yuhduogũ ijipihtiyere decori tiqiro mehna ijinata mari tiqiro yequina. Sa yena mari tiqiro yequinare Cohăcĵũ marine ohoatire cũonata mari. Moiseru tiqiro cũri dutiye dihita ijigũ masa tiquina ñaňe buhiri ijiniahye. Sa yero curusapũ yariaro ti pjeta tiquina ñaňe yeri buhirire yuhduoahye tiqiro yequinare.

¹⁶⁻¹⁷Masũno came tiqiro acayere tiqiro ohoatire ojoa ohõyure papera pũpũ. Tiqiro ohoatire yahuro taro ojoa ohõyure. Ti pũre ojoa ohõyuriquiro tiqiro yarieranigũ ti pũ dũhseati ijierare. Tiqiro acaye tiqiro cũorire nea masiedare. Sa ye tiqiro yariagũ ihňañe ti pũpũ tiqiro ni ojoariro sahata tiqiro yere neañeta tiquina. ¹⁸Tiqiro yariato pano ti pũ dũhseati ijieraro sahata yari-

aro marieno dii wijiario marieno Cohācjū Moiserē tiqiro cūri dutiye gūhū ne dūh-seati ijieraboya. Sa yero wahiquiro diire tiqiro wejē siteri bato ti dutiyere potota yero niahye.

¹⁹ Sa yero ohō saha ye muhtahye Moise Cohācjū tiqiro cūri dutiyere masare yahu pehoahye. Came wecuagā diire, chivoa diire aco mehna moreahye. Sa yero hisopo wame tidū dūpū mehna oveja poari sohāñe mehna tiquina nīmiori poarire torēahye. Ti dūpū mehna diire soharo, Cohācjū dutiyere tiqiro ojoari pū bui wejē site peohye. Ijipihtiyequina masa bui gūhure wejē site peohye.

²⁰ Sa yero ohō saha niahye tiqiro: “Cohācjū marine tiqiro yahuri tiqiro dutiri ahri dii mehna poto ijigū masi-aja mari. Ahri diire ihñana tiqiro ni-diro sahata marine tiqiro yeatire masi-aja mari. Ti dutiyere yūhti dutiahye tiqiro marine”, niahye Moise. ²¹ Sa yero masare tiqiro yeriro saha Cohācjūre tiquina ño peori wūhū wahiquina cahseri wūhure, ijipihtiye ti wūhūpū ijiye gūhure wejē siteahye. ²² Sa tjire. Ti dutiye ti nidiro sahata peye ñañene dii cohāno mehna cose wero cahmene. Mehenogā dūhsaye ñañene apee boro mehna cose wegū quehnoare. Sa yero Cohācjū mari ñañe yerire ne bosī dii cohāedagū.

**Cristo tiqiro diire cohāno,
yariaro, tiqiro yequina ñañe
yerire cose weahye**

²³ Ti ijipihtiye Cohācjūre tiquina ño peori wūhū, ti wūhūpū ijiye gūhū ūh-mūse cjā wūhūpū ijiye yero saha iji-ahye mari queoye mehna buhegū. Ūh-mūse cjā wūhū pehe potota Cohācjū ya wūhū waro ijire. Sa yero ahri yehpa cjā wūhūre, ti wūhūpū ijiye gūhūre wahiquina diire tiqiro wejē siteri mehna cose wero cahmeahye. Sa

ye ti yūhdūoro ūhmūsepu wahatiquinare tiquina ñañe buhiri tiyequinare cose wero cahmene. Sa yero wahiquina yūhdūoro ijiriquiro ye dii tiqiro cohāno mehna tiquina ñañe yerire cose wero cahmene.

²⁴ Sa yero Cohācjūre tiquina ño peori wūhū masa yeri wūhū ijire. Ūhmūse cjā wūhū yero saha ijire ti wūhū gūhū, mari queoye mehna buhegū. Sa yero Cristo pahi ijiro, marine sini basaro taro ahri yehpa cjā wūhūre sajāedahye. Potota ūhmūsepu wahahye tiqiro Cohācjū caha marine sini basaro taro. ²⁵ Mari judio masa mari pahia puhtoro cūh-maripe Cohācjū ijiri tucū waropū sajāe tiahye wahiquina diire ohoro taro. Cristo pehe tiqiro diire Cohācjūre ohoro saha yero taro, yariaro, peye tahari sajāedahye. ²⁶ Peye tahari yariariquiro ijiro, ahri yehpa iji dūcari bato peye tahari yariaboya tiqiro. Peye tahari tiqiro mari ñañe buhirire yariaducuriquiro ijiboya. Sa ijiboriquiro ijieperota pihtiri deco panogā vojopūre marine ijipihtinare yūhdūoro taro ihcā taha bajuahye tiqiro ahri yehpapū. Sa bajuahye yariaro taro, mari ñañe buhirire cohāno taro.

²⁷ Ijipihtiyequina masa ihcā tahata yarieta. Tiquina sa yariari bato masa quehnoañequinare, ñañequina gūhūre beserota Cohācjū. ²⁸ Ihcā tahata mari yariaro saha Cristo gūhū ihcā tahata yariahye peyequina masa tiquina ñañe yerire cohāno taro. Came pari turi ahtarota. Mari ñañe yerire cohā tuhasariquiropū ijirota. Sa yero pari turi mari ñañe yerire cohāno taro ahtasi. Sa ahtarota tiqirore cohteyequinare, bucueye mehna tiqirore ihñā duayequinare yūhdūoro ahtarota.

10 Cohācjū dutiye Moiserē tiqiro cūri quehnoañe buheye yero saha ijiepetā, ihcāno saha ijierare. Ti dutiye ti ye dutiriro saha cūhmaripe wahiquinare

wejē, ʌjūa mʌo, Cohācjüre ño peo-
ducure. Tiquina sa yeye mehna masa
tiquina ñañe yerire boerare Cohācjū.
²Ti mehna tiquina ñañe yerire Cohācjū
bogū, ihcā tahata Cohācjüre tiquina ño
peori bato “Yojopure buhiri mariedare
ʌsāre”, ni tuhotuboya masa. Sa ye
pari turi wahiquinare wejē ʌjūa mʌo,
Cohācjüre ño peo ohoeraboya. Duhu
cāboya. ³Cahmaripe wahiquinare wejē
ʌjūa mʌo, Cohācjüre tiquina ño peogū
tiquinare ñañe buhirire wacūgū yere.
To punogāta yedoho duare ti tiquinare.
⁴Wecua dii mehna mari ño peori mehna,
chivoa dii mehna mari ño peori mehna
ne mari ñañe buhirire cohāedare.

⁵Ti ijjirota ijire. Ti sa ijigū ihñano
Cristo ahri yehpapure tiquiropure ahtato
pano ohō saha niahye Cohācjüre:

Wahiquinare ʌjūa mʌo tiquina ohogū,
trigore tiquina ohogū gūhure mūhu
ihñagu bucuere mūhu. Sa yegu
yūhu pagure yeri mūhu ya pagu
ijiatire. ⁶Ñañene tiquina cohātore
wahiquinare wejē, tiquina ʌjūa
mʌogū ihñagu bucuere mūhu.
⁷Mūhu sa bucueregū ihñagu ohō
saha nii mūhure: “Mūhu cahmeno
sahata yegu wahagutja. Sata ni
yahure mūhu ya pūpū”, nii yūhu,
niahye Cristo tiquiropure.

⁸“Wahiquinare ʌjūa mʌo tiquina
ohogū, trigore tiquina ohogū gūhure
ihñagu bucuere mūhu”, ni yahu
mūhtahye tiquiropure. Coā waropure
tiquiropure ye dutiye wahiquinare, trigo
gūhure tiquina ohoye mehna ti ño peo
dutiepegūta sa niahye tiquiropure. ⁹Sa ni
tuhasa ohō saha ni nemoahye: “Mūhu
cahmeno sahata yegu wahagutja”,
niahye. Tiquiropure sa nigū ohō saha
masiaja mari. Panopū wahiquinare wejē
ʌjūa mʌoñe mehna tiquina ño peorire

duhugū yero, apeye buheye pehere
cūno niahye Cohācjū. (Sa cūno yojopure
Cristo tiquiropure yariari mehna masare
yuhduorota Cohācjū.) ¹⁰Jesucristo
tiquiropure pagure ohoro, yariari, ijipihtina
marine mari ñano yerire cohāre. Ihcā
tahata tiquiropure pagure ohore mari
ñañene cohāno taro. Sa yero Cohācjū
cahmeno sahata yero niahye.

¹¹Ijipihtina mari judio masa mari
yequina pahia decoripe Cohācjüre
ño peori wūhūpū dahraducure. Sa
dahraducure decoripe mūnanota
wahiquinare wejē, ʌjūa mʌo, Cohācjüre
siniducure. Tiquina sa wejē ʌjūa
mʌoepegūta ti ʌjūa mʌori mari ñano
yerire ne cohāedare. ¹²Cristo pehe ihcā
tahata mari ñañe buhirire yariahye,
mari ñañe yerire quehnoano cohā
pehorro taro. Tire cohā tuhasa, wahaa
wahahye tiquiropure Pacuro cahapū
tiquiropure poto pehe dujiro waharo.
Pūhoro ijiro, topū dujire. ¹³Topū
dujiro, cohtero nine. Tiquiropure ihñā
tuhtiequinare Cohācjū pehe tiquiropure
yuhduca basatore cohtero nine. ¹⁴Sa
yero ihcā tahata tiquiropure yariari mehna
tiquina ñañene cohānohriquinare
ñañe marieñequina sa ijiducugū yere
tiquinare. ¹⁵Ti ijjirota ijire. Sata ni
yahure Espiritu Santo marine. Ohō saha
ni yahure tiquiropure:

¹⁶Ohō saha nine Cohācjū: “Camepūre
ohō saha ni yahutja Israe masare.
‘Yūhu dutiyere tiquina wacūñepū
cūtja’, ni yahutja”, nine tiquiropure.

¹⁷Ohō saha ni nemore Cohācjū:

“Tiquina ñañe yerire pari turi wacū
nemosi yūhu”, nine tiquiropure, ni
yahure Espiritu Santo.

¹⁸Mari ñañe yerire tiquiropure sa bogū
pari turi mari ñañe buhiri yariatiquiropure
cahmedaja mari.

**Cohācjū cahapū esana, cuero
marieno tiquiro mehna mari
yahuducuboriro saha tiquiro mehna
yahuducu masiaja yojopure**

(Mt 27.51; Mr 15.38; Lc 23.45)

¹⁹ Sa yena yuhū acaye, Cristo tiquiro yariaro mehna tiquiro dii cohāno mehna yojopure mari gūhū cuero marieno Cohācjū mehna yahuducu masiaja. Sa yena tiquirore sini masiaja. ²⁰ Ahri yehpa cjūno pahia puhtoro Cohācjū ijiri tucū waropū tiquiro yemedi yojopure marine duhseati ijierare. Ti mehna Cohācjū mehna yahuducu masiedaja mari. Cristo pehe mari ñañene yeri buhirire yariaro tiquiro dii cohāri mehna Cohācjū mehna yahuducu masiaja mari. Pahia puhtoro ti tucūpu tiquiro sajāriro sahata Cristo pehe Cohācjū cahapū esahye mari ñañe yerire bo dutiro waharo. Ti tucū cjā cahserore cahmotari cahserore tiquiro tuhre cohāriro saha Cristo tiquiro pagure cohāhye Cohācjū mehna marine iji dutiro. ²¹ Sa yero Cohācjū ya wuhūpu dahrariquiro mari yaquiro pahi tutua yuhduariquiro ijire tiquiro. ²² Sa yena Cohācjūre siniihna poto ni mehono marieno. Tiquirore quehnoano wacū tutua, cuero marieno tiquirore siniihna. Cristo mari ñañe yerire tiquiro cose wenohrinapū ijiaja. Sa yena “Buhiri tina ijiaja mari”, ni tuhhotuna ijieraja mari. Sa yena wete marieñe aco mehna mari cose wero saha Espiritu Santo tiquiro cose wenohrinapū ijiaja. Sa yena Cohācjūre siniihna. ²³ “Musare yuhduoutja”, tiquiro nidiro sahata yerota. Sa yena marine tiquiro yuhduoatore quehnoano masiaja mari. Tire masina, ne boeracūhna. Cohācjūre sa wacū tutuaducuhna. Sa wacū tutuana tire apequinare yahuaja. ²⁴ Mari mehna cjēnare cahīna, tiquinare yedohouhna mari, ijiphtina mari ihcāno saha mari cahme cahī yedohoato saha.

²⁵ Sa yena quehnoano cahmecoaducuhna Cohācjū yere yena tana. Apequina pehe tiquina cahmecoamedirore duhuye nine. Tiquina yero saha yeracūhna. Mari mehna cjēnare bucuegū yeihna. Ahri yehpapure mari puhtoro ahtato mehenogā duhsare. Tire masina tutuaro bucuegū yeihna mari mehna cjēnare Jesu yequinare.

²⁶ Poto ijiye buheyere quehnoañe buheyere mari masiepenata ñañene mari pari turi sa yeducugū mari ñañene cose we nemoato ne mariedare.

²⁷ Sa yero sa yeyequinare cuarīne. Ijiphtiyequina tiquirore ihña tuhtiyequinare buhiri dahrero, tutuaro ujnopū cohānota Cohācjū tiquinare. Sa ye tiquiro buhiri dahreatire cueyequina dihita ijimene tiquirore duhuyequina.

²⁸ Cohācjū dutiye Moiserre tiquiro cūrire yuhduucayequinare buhiri dahreye, mari acaye judio masa wejēne tiquinare. Ne paja ihñano marieno wejēne tiquinare. Ihtiaro tiquina yahusāgū tuhoro beseriquiro tiquina yuhduucarire masino tiquinare buhiri dahre dutire. Ihtiaro mariedagū puaro tiquina yahusāgū tiquinare buhiri dahre dutire. Sa dutigū tiquinare wejēne.

²⁹ Ti bui cjūno Cohācjū macunore ihña yabiyequina tiquiro buhiri dahreatiquina ijietā. Cristo dii cohāri mehna mari ñañe yerire cohāre Cohācjū. Sa cohātoare yahuahye tiquiro marine. Sa yeye tiquina ñañe yerire cohānohriquina ijiepetā pari turi ñañene yeye, tiquina ñañe yerire tiquiro cohārire tiquiro dii gūhūre “Ihyo waro ijire”, niñe nieta. Sa niñequina tiquiro buhiri dahreatiquina waro ijiye nieta. Sa niñequina Espiritu Santore ñano ni yahuducuyequina ijire. Tiquiro tiquinare cahīniquiro ijire. Tiquina sa ñano yahuducugū ihñano tutuaro buhiri dahrerota Cohācjū tiquinare. ³⁰ Ahrire mari quehnoano masiaja.

Cohācjū tiquiro basita ohō saha niahye: “Yuhū ijiaja buhiri dahreacjū. Tiquina ñañene yeri buhiri buhiri dahreitja yuhū”, niahye tiquiro. Ohō saha ni nemoahye: “Yeequina ijimediquinare ñano yeyequinare buhiri dahreitja yuhū”, niahye tiquiro. ³¹Cohācjū catiriquiro marine tiquiro buhiri dahregū cua yuhduare.

³²Panopu musa ijirire wacūña musa. Ti pjere Cohācjū yere coā masi ducana peye tahari ñano yuhduepenata tiquiro yere cohādari musa. ³³Ihquē tahari masa tiquina ihñonopu apequina musare ñano ni, ñano yeperi musare. Sa yena apequina Jesu yequinare tiquina ñano yegū ihñana, tiquinare paja ihñari musa. ³⁴Peresupu ijieyequinare paja ihñari musa. Sa yena musa yere tiquina ehmaepēgūta bucueye mehna, “Quehnoanota”, nidi musa. Ahri yehpa cjē yuhduoro quehnoañene cūore musa uhmusepu. Ti quehnoañe sa ijiducuetā. Tire masina, musa cūoyere tiquina ehmagū bujua witiere musa. ³⁵Sa yena cueracāhña. Cohācjūre sa wacū tutuaducuya. Musa sa yeri wapa tiquiro quehnoano yerota musare. ³⁶Cohācjū “Musare ohō saha yedohoutja”, tiquiro ni cūrire quehnoano cohteya musa tiquirore wacū duhuro marieno. Sa cohtena tiquiro cahmeñene yenata musa. Sa yena tiquiro ni cūrire cūonata. ³⁷Ohō saha nine Cohācjū yere tiquina ojoari pūpu:

Mehenogā duhsare Cristo wihiato. Sa ahtaro duita wihi madoqueorota.

³⁸Yeequina quehnoañequina pehe yuhūre wacū tutuaducuetā. Sa ye yeequina yuhū mehna sa ijiducuetā. Yeere cohāñequina pehere ihña yabijaja yuhū, niahye tiquiro ye yahuducuye tiquina ojoari pūpu.

³⁹Mari pehe Cohācjū yere cohārīna ijieraja mari. Sa yena pecapu wahatina

ijieraja mari. Cohācjūre wacū tutuaja mari. Sa yena tiquiro yuhduorina ijiaja.

Wacū tutuayere yahuahye

11 Ohō saha ijire wacū tutuaye: Cohācjūre wacū tutuana, marine tiquiro quehnoano yeatire quehnoano masiaja mari. Cohācjū tiquiro nidiro sahata yeraniepegūta tiquiro yahuyere “Ijirota ijire”, ni tuhutuaja mari tiquirore wacū tutuana. Tiquirore ihñedapenata, wacū tutuana, “Ijirota ijire”, ni tuhutuaja mari tiquiro yahuyere tuhona. ²Panopu cjēna Cohācjūre tiquina wacū tutuagū ihñano bucueahye tiquiro pehe.

³Cohācjū tiquiro yahuducuye mehna ijipihtiyere bajumehnee tiahye. Sa yero tiquiro mari ihñedari mehna ijipihtiyere mari yojopu ihñañene bajumehnee tiahye. Tire mari quehnoano masiaja Cohācjūre wacū tutuana pūrita.

⁴Cohācjūre wacū tutuaro Abe pehe corderore wejē, ujuā muo, Cohācjūre ño peo “Quehnoare”, niahye. Tiquiro wahmino Caī yuhduoro quehnoanore ohoro, ño peoahye tiquiro Cohācjūre. Sa yero Cohācjū tiquiro ohorire bucueahye. Sa bucuro “Quehnoariquiro ijire”, ni ihñahye tiquiro Abere. Sa Cohācjūre tiquiro wacū tutuagū ihñana mari tiquirore ihña cūaja. Sa yena tiquiro yariari bato ijiepegūta tiquiro wacū tutuarire ihña cūaja mari.

⁵Enoco Cohācjūre tiquiro wacū tutuagū ihñano bucueahye Cohācjū. Sa bucuro tiquirore tiquiro cahapu ne muoahye. Sata nine Cohācjū yere tiquina ojoari pūpu. Tiquiro ne muori bato masa tiquirore ne bocaerahye. Tiquiro ne muonohriquiro ijiro ne yarierahye. ⁶Cohācjūre wacū tutuerana tiquirore bucuegū ye masiedaja mari. Cohācjūre wacū tutuerana, tiquirore ño peo masiedaja mari. “Potota tiquiro Cohācjū warota ijire. Sa yero tiquirore mari ño peogū marine quehnoano yere

tiqiro”, mari ni tuhoturana mari tiqirore sini masiedaja.

⁷Noé Cohăcjüre wacū tutuaro, tiqirore Cohăcjü yahurire quehnoano yuhtiahye. Camedu tiquina năno wahatore tiqiro yahugū tuhoro quehnoano yuhtiahye tiqiro. Sa yuhtiro, pajiria yucusare yeahye. Sa yeye tia yucusa mehna tiqiro acaye mehna dia mininore yuhduahye. Sa wacū tutuariqiro ijiro ahri yehpa cjăna nănequina tiquina wacū tutuerarire tiquina pecapu wahato gūhure ihŋono niahye. Sa yero tiqiro wacū tutuagū ihŋano “Quehnoariqiro ijire”, ni ihŋahye Cohăcjü tiqirore.

⁸Abrahă gūhu Cohăcjüre wacū tutuaro tiqirore yuhtiahye. Ape dihtapure tiqirore ohoati dihtapure Cohăcjü waha dutigū tuhoro Abrahă yuhtiahye. Tiqiro ya dihtapu ijiriqiro wijiaa waharo, tiqiro masiedi dihtapu esahye. ⁹“Ahri dihtare muhure ohoutja”, Cohăcjü nigū tuhoro tiqirore wacū tutuaro ti dihtaputa tojoahye tiqiro. Topu ijiro ape dihta cjăno ijieperota toputa tojoa căhye. Tiqirore, tiqiro macuno Isaac gūhure, tiqiro panamino Jacob gūhure tiquinare “Ahri dihtare musare ohoutja”, ni Cohăcjü yahue tiahye tiquinape. Tiquina tuhoe tiahye. Sa yeye tiquina ti dihtapu ijiye, wahiquina cahseri wuhusepu ijie tiahye munano ijieyequina ijiye. ¹⁰Topu ijinie tiahye Abrahă Cohăcjü mehna tiqiro ijiatore cohtero. Ape macapu Cohăcjü ijiri macapu uhmusepu tiqiro wahatore cohtero niahye. Ti macare dahreahye Cohăcjü. Sa yero ti maca ne pihtisi.

¹¹Cohăcjüre wacū tutuaro, bucuro waro ijieperota, tiqiro namono Sara bucuro waro ticoro ijiepegūta, Abrahă pohna tiahye. “Tiqiro nidiro sahata yerota”, Cohăcjüre nino sa pohna tiahye. ¹²Sa yero Abrahă bucuro waro ijieperota pohna tiahye. Sa yeye tiqiro

panamena iji turiayequinapu peyequina waha căhye. Năpicoha parire, padu pjeri gūhure mari queona ihcăno sahaeraro sahata tiqiro panamena iji turiayequina gūhure queona ihcăno sahaeraja mari.

¹³Ijipihtiequina ahriquina yuhu yahuriquina Cohăcjüre wacū tutuaro tuhasayequinapu yariahye. Cohăcjü tiquinare “Musare ohō saha yeitja”, tiqiro ni cūrirore eserapeta yariaa wahahye. Tire ņehedapeta Cohăcjü tiqiro nidiro sahata camedu tiquina cuotire masiahye. Sa masiŋe bucueahye. Sa yeye ohō saha niahye tiquina: “Ahri yehpapu tinina ijiaja. Ape yehpa cjăna ijiaja”, niahye tiquina. ¹⁴Sa niŋequina ape yehpare tiquina ya yehpa ijiatore cohteye nine. Tire mari quehnoano masiaja. ¹⁵“Ape yehpa cjăna ijire”, nigu panopu tiquina cohări yehpare nigu niedaja. Ape yehpapu tiquina iji muhtari yehpapu waha dua, waha wahaboya. ¹⁶Quehnoa yuhduari yehpa pehere cahmeŋe niahye. Ti yehpa uhmusepu ijire. Tiquina sa cahmegū ihŋano “Cohăcjü usă puhtoro ijire”, tiquina nigū tuhoro bue tisi Cohăcjü. Tiquina ya maca ijiatore dahre basa tuhasahye tiqiro.

¹⁷⁻¹⁸Cohăcjü Abrahăre tiqiro macunore Isaare wejê ujăa muo dutiahye. Tiqirore ihŋa duaro sa dutiahye, “¿Ijirota yuhure wacū tutuajari?” nino. Cohăcjüre wacū tutuaro tiqiro nidiro sahata yemahye Abrahă. “Muhu macu Isaac mehna panamena iji turiayequinare peyequinare cuoguta muhu”, Cohăcjü tiqiro nidiquiro ijiepegūta tiqiro macunore wejêno taro nimahye Cohăcjüre ņo peoro taro. ¹⁹“Yuhu macu Isaare yuhu wejêgū Cohăcjü tiqirore masonota”, ni tuhuturo, tiqirore wejêno taro nimahye. Sa nidiquiro ijieperota Cohăcjü tiqirore cahmota,

wejē dutierahye. Tiquiro pacuro tiquiro sa wejēboriquiro ijero yaria masariquiro yero saha ijiahye Isaac, Abrahā ihñagū. Sa yero Abrahā tiquirore catiriquirore pari turi cūoahye.

²⁰ Isaac Cohācjūre wacū tutuaro, tiquiro pohnene Jacore, Esaú gūhure “Camepū Cohācjū musare pajiro quehnoano yerota”, niahye.

²¹ Cohācjūre wacū tutuaro Jacob tiquiro yariato panogā José pohnene, mūare “Cohācjū musare pajiro quehnoano yerota”, niahye Jacob. Dusepe curi mehna quehe sa, tiquiro tuadū mehna tua ñehe cuña, Cohācjūre ño peoro “Cohācjū musare quehnoano yerota”, ni cūahye.

²² Cohācjūre wacū tutuaro José tiquiro yariato panogā Israe masa Egiptopū ijijyequina tiquina wijiatiye yahuyuahye. Sa tiquina wijiatiye masiyuro tiquiro yariari bato tiquiro pagure nea dutiahye tiquiro pohnene.

²³ Cohācjūre wacū tutuaye, Moisegāre ihtia asū waro nūo cūoahye tiquiro pacusūmua, tiquiro masa bajuari bato. Quehnoariquirogā tiquiro ijigū ihñañe tiquirogāre nūoahye. Ti yehpa cjēna pūhtoro tiquina pohnene tiquiro wejē dutirore yūhdūca cāhye tiquina. Tiquirore cuerahye.

²⁴ Moiserē masoricoro Egipto yehpa cjēna pūhtoro macono ijiahye. Sa ticoro masonohriquiro ijero, Cohācjūre wacū tutuaro “Ticoro macūno ijire”, ni pisugū cahmedahye Moise. ²⁵ Cohācjūre yūhdūcariquiro ijero tiquirore masoricoro cahapū meheñe decorigā quehnoano ijiboya. Sa ijiboriquiro ijieperota ti yūhdūoro tiquiro Cohācjū yequina mehna ñano yūhdū duahye. ²⁶ Sa ñano yūhdūoro Cristore tiquina bājūpeato sahata tiquina bājūperiquiro ijiahye. Camepū tiquiro quehnoano yeri wapa Cohācjū tiquirore tiquiro quehnoano yeatiye masino ñano yūhdu

duahye, Cristo tiquiro ñano yūhdūato sahata. Ijipihtiyequina Egipto cjēna quehnoañene tiquina cūoro yūhdūoro tiquiro Cohācjū pehere tutuaro cahmeahye. Ñano yūhdūeperota, Cohācjūre cahmeahye.

²⁷ Cohācjūre wacū tutuaro, Egipto cjēna pūhtoro tiquiro mehna usuagū cuerahye. Sa cueraro ti yehpapū ijiriquiro ti yehpare cohā cāa wahahye. Sa yero Cohācjūre bajueriquiro tiquiro ihñaboriro saha cuerariquiro ijiahye. Cohācjū tiquirore ye dutirire ne cohāedahye Moise. ²⁸ Cohācjūre wacū tutuaro Moise Israe masare Cohācjū yūhdūoatire masiahye. Sa masino Cohācjū dutiriro sahata Israe masa tiquina sopecaharire ohōñe pjinine dii mehna wejē site dutiahye tiquiro. Tiquina sa yegū ihñano angel masare wejēdiquiro tiquina wahmisūmūare wejēboriquiro Israe masa pohne wahmisūmūare wejēdahye.

²⁹ Cohācjūre wacū tutuaye, Israe masa “Sohāri ma”, tiquina nidi mapū aco watoa ijiri mahapū aco marieni mahapū pehāa wahahye. Tiquina sa pehāgū ihñañe Egipto cjēna gūhū tiquinare ihñā cū, nūnū tā pehāmehe, mini yariaa wahahye.

³⁰ Cohācjūre wacū tutuaye, Israe masa Jericó wame tiri maca cjā sahrīno pajiri sahrīno behero pehe majare sotoahye. Siete decori waro ti macare majare sotoa tiniahye. Tope decori tiquina majare sotoa tinidi bato ti sahrīno sehte bora dijia pihtia wahahye. ³¹ Cohācjūre wacū tutuaro mūa mehna ñano yeducumedicoro Rahab wame tiricoro, ti maca cjōno Israe masare yedohoahye. Ti macare tiquina cohāto pano meheñequinagā Israe masa topū sajā tiquina duhti ihñagū, ticoro tiquinare yedohoahye. Ticoro sa yedohogū ihñañe Israe masa wejēdahye ticoro. Sa yeye ti maca cjēnare Co-

hãcjũre yũhdũdũcayequinare wejẽpeta ticoro pehere wejẽdahye.

³²Apequinare Cohãcjũre wacũ tutuayequinare yahu nemoboa yũhũ. Sa yahu duepegũta peyequinare sa Cohãcjũre wacũ tutuayequinare yahu ojoa peho masiedaga yũhũ. Peyequina ijire tiquina. Gedeõ, Barac, Sansõ, Jeftẽ, Davi, Samuel, Cohãcjũ yere yahu mũhtariquina gãhũ ahriquina ijipihitiyequina yũhũ yahuboriquina ijire. ³³Cohãcjũre wacũ tutuayequina ihquẽquina apeye yehparipũ ijiye macari cjẽnare cahme wejẽ yũhdũdũcahye. Sa yeye apequina quehnoano dutiyequina ijiahye. Cohãcjũ tiquinare “Mũsare yedohoutja”, tiqiro nidiro sahata tiquinare yedohoahye. Tiquirore tiquina wacũ tutuagũ ihũano sa tiquinare yedohoahye. Sa wacũ tutuaye, yayia tiquinare ihya duagũ tiquina dũserire bihagũ yeahye tiquina. ³⁴Tutuario ƣjũri pecapũ ijiepetã ƣjũedahye tiquina Cohãcjũre wacũ tutuaye. Apequina tiquinare ñose wejẽ duagũ duhti cãa wahahye Cohãcjũre wacũ tutuaye. Tutueyequina ijiepetã Cohãcjũre wacũ tutuaye tutuayequina wahahye. Cohãcjũre wacũ tutuayequina ijiye, cahme wejẽne tutuayequina ijiahye. Sa ye apeye yehpari cjẽna surara tiquinare wejẽne ahtayequina ne ihcãno sahaerahye tiquinare. ³⁵Ihquẽquina numia Cohãcjũre wacũ tutuagũ ihũano tiquina acaye yariagũ ihũano Cohãcjũ pehe tiquinare maso basahye.

Apequina “Cohãcjũre cahmedacãhã”, tiquina ni peresu yenohriquina ijiepetã Cohãcjũre duhu duerahye. “Cohãcjũre mũa duhugũ mũsare wionata”, nimahye tiquinare peresupũ yenohriquina Cohãcjũ yequinare. Tiquina sa niepegũta tiquinare yũhtierahye, Cohãcjũ cahapũ tutuario waha duaye. Sa yeye tiquinare

ña yũhdũaro tiquina yepegũ yariaa wahahye. ³⁶Apequinare Cohãcjũre wacũ tutuayequinare ñano ni bũjũpe tiquinare tana mũjãe tiahye. Sa yeye apequinare dahpocãrine, omocarine dũhte cãa, peresu yeahye. ³⁷Cohãcjũre wacũ tutuayequinare ñãnequina utã mehna doque wejẽahye. Apequinare tiquina pagũrire seroti mehna yũhre sure mũjahye. Apequinare ñoseñe pjĩni mehna ñose wejẽahye tiquina. Sa yeye tiquina sa ñano yepenohẽnequina oveja cahseri mehna, cabra cahseri mehna suhti tiyequina pejesũoyequina ijiahye. Sa ye apequina tiquinare ñano yepeahye. ³⁸Tiquina quehnoa yũhdũayequina ijigũ ahri yehpa cjẽna ñãnequina tiquina mehna ijiboriquina ijierare. Ahriquina Cohãcjũre wacũ tutuayequina wũhuse marieñequina ijiye, masa marienopũ, cũnũ cjũpũ iji soto tae tiahye. Sa iji soto tae, cũnũpũ ijiye coperipũ, yehparũ ijiye coperipũ gãhũre carĩ soto tae tiahye.

³⁹Ahriquina ijipihitiyequina Cohãcjũre tiquina wacũ tutuagũ ihũano bucueahye tiqiro. Tiquina sa wacũ tutuepegũta Cohãcjũ tiquinare “Mũsare yũhdũoutja”, tiqiro nidiro eseraniahye.

⁴⁰Tiqiro yũhdũoeranidire yahuro ohõ saha ni tũhotuahye Cohãcjũ. “Ahriquina yeequina camepũre ijiatiquina mehna ihcãno saha ihcã curuarũta yũhdũoutja”, ni tũhotuahye. Sa ni tũhoturo tiqiro nidiro sahata yerota. Tiquiro sa yegũ quehnoa yũhdũare panopũ tiqiro yeriro yũhdũoro.

Jesure sa wacũducuhna mari

12 Sa yena ahriquina yũhũ yahuriquinare peyequina Cohãcjũre wacũ tutuayequinare ñãne yeyequinare masina, ijipihitiye ñãne yeyere duhu cãũhna mari gãhũ. Ohõ saha ijire mari queoye mehna buhegũ: Omaperiquirore oma tutuagũ

cahmotaye ijire apeye. Tiquiro dahpo suhti nācūñe suhti tiquirore oma tutueragū yeboaga. Ti yero saha Cohācjū cahmeñene mari ye duagū cahmotaye gūhu ijire. Ti gūhure duhuuhna mari. Sa yena omapeyequina tiquina oma tutuaro saha mari gūhu tutuaro Cohācjū cahmeno saha yeihna. ²Sa yena Jesure sa wacūducuuhna mari. Tiquirota ijire marine wacū tutua dūcagū yeriquiro. Sa yero marine wacū tutua nemogū gūhure yere tiquiro. Curusapu yariaro wacū tutuahye. Came tiquiro bucuateore masino curusapu yariahye. Sa yariaro bue tiboriquiro ijieperota bue tierahye tiquiro. Sa yero yojopure Cohācjū tiquiro puhtoro dujiro poto pehe dujitiñano tiquiro dutiriquiro ijire.

³Nānequina masa tiquirore tiquina ña yūhdūaro yegū ihcāno sahahe tiquiro. Tire wacūña mūsa, mūsa gūhu ñano yūhdūna, “Ihcāno sahaeraboa”, nina. Tire wacūña mūsa “Tiquirore wacū tutua duhuari”, nina. ⁴Ñano yūhdūepenata ñañene yerare mūsa. Sa ñano yūhdūepenata ña yūhdūaro waro yūhdūeraniaga mūsa. Nānequina musare wejēdarīaga. ⁵¿Cohācjū musare tiquiro pohñare tiquiro yahurire bo cjāri mūsa? Mūsa ñano yūhdūatire tiquiro yahurire wacūña mūsa. Ohō saha niahye tiquiro:

Yūhu macū, mūhure yūhu yahugū usueracāhña ñano yūhdūepēguta. Mūhure yūhu tuhtigū tuhogu bujua witieracāhña. ⁶Ijipihtiyequina yūhu cahñēquinare yahuaaja. Sa yegu ijipihtiyequina “Yūhu pohña ijire mūsa”, yūhu ni ihñañēquinare yūhdūdūca dutieraja. Sa yegu tiquina yūhdūdūcagū ihñagu tiquinare buhiri dahreja, niahye Cohācjū.

⁷Ñano yūhdūna Cohācjū yere duhueracāhña. Cohācjū musare

tiquiro pohñare buhiri dahrero nine. Tiquina pacūsumua tiquina pohñene sa yahuducure. Sa yeye tiquinare buhiri dahreducure. Sata yere Cohācjū gūhu marine tiquiro pohñare. ⁸Ijipihtiyequina tiquiro pohñene yahure Cohācjū. Cohācjū musare yahueragū tiquiro pohña waro ijierare mūsa. Pacūsumua marieñequina yero saha ijire mūsa tiquiro yahumehñena ijina. Sa ijina “Usā pacū waro ijire”, ni masiedare mūsa Cohācjūre, musare tiquiro yahueragū. ⁹Mari pacūsumua marine tiquina yahugū tuhona tiquinare ño peoaja mari. Mari pacūsumūare mari ño peoro yūhdūoro ño peoro cahmene mari Pacūre Cohācjūre tiquiro yahugū. Sa yena tiquirore yūhtiro cahmene marine. Sa yūhtina ijina ijipihtiye decori tiquiro mehna ijinata. ¹⁰Meheñe decorigā ahri yehpapū mari ijinigū mari pacūsumua marine yahuye, buhiri dahrere. Tiquina esa tuharo tiquina masino punota marine yahuye, buhiri dahrere. Cohācjū pehe marine quehnoano yahure. Sa yero tiquiro masiñe mehna marine buhiri dahrere, marine quehnoana bucua dutiro. Sata yere marine tiquiro yero saha quehnoana marine iji dutiro. ¹¹Marine tiquiro buhiri dahregū bucueraja mari. Mari ihyo bujua witiāja. Sa bujua witiēpenata tiquiro sa buhiri dahreri bato quehnoana wahanata mari. Sa yena ñañene yero marieno quehnoano ijinata.

Cohācjū marine tiquiro dutiyere mari yūhtieragū cuarīne marine

¹²Sa yena wacū tutuera cjūna ijiepenata Cohācjūre wacū tutuana ijiya. Tiquirore duhueracāhña. ¹³Quehnoano potori mahare mūsa waharo saha quehnoano poto yeya mūsa. Mūsa sa yegū ihña cūñe apeqina Jesu yequina ñañene yesi. Mūsa quehnoano yegū

ihña cūñe quehnoano wacū tutuera cjūñequina gūhū wacū tutuayequina wahaeta.

¹⁴ Ijipihtiyequina masa mehna quehnoano ijiya, cahmequeno marieno. Sa yena ñano yeracāhña. Ñañe marieñequina dihita mari puhtoro Cristore ihñaeta. ¹⁵ Quehnoano yeya musa. Cohācjū musare tiqiuro yedohogū quehnoano yuhtiya. Ñañe taa diaye tiqiuna oteyere ti dojomehnenno saha musa gūhū Cristo yere duhueracāhña, “Apequinare dojomehnenari”, nina. ¹⁶ Ne wuana tieracāhña. Sa yena Cohācjū yere cahmeena ijieracāhña. Cohācjūre cahmeediquiro ijiahye Esaú. Tiquiro wahmino ijimahye. Sa yero tiqiuro pacuro yariari bato tiqiuro pacuro yere cūoatiqiuro ijimahye. Cohācjū tiqiuro pacurore tiqiuro ni cūri gūhūre cūoatiqiuro ijimahye. Sa yero ihcā deco ihcā pa ihyaye pose tiri pare cahmeno, ti pa mehna tiqiuro bahuro pehere tiqiuro wahmino wahagū yero taro comesahye. ¹⁷ Tiquiro sa yeri bato tiqiuro duhse waharire masine musa. Tiquiro pacuro tiqiurore ohoatire tutuaro cahmemahye Esaú. Tiquiro sa cahmepegūta tiqiuro bahurore wahmino wahagū yeri buhiri, came tiqiuro cūoborire ohoerahye tiqiuro pacuro. Tire utiye mehna tiqiuro siniepegūta tiqiurore ohoerahye.

¹⁸ Cohācjū dutiyere Moiserere tiqiuro cūgū mari acaye Israe masa muna Cohācjū mehna ijie tiahye. Tiquina tiqiuro mehna ijiriro saha musa pehe ijierare. Ohō saha yeahye tiqiuna pehe. Cūnupū Cohācjū mehna ijiye taye, esahye. Ti cūnū pehe Sinaí wame tidū ijiahye. Ti cūnūre dahra tuhu masiahye masa. Ti cūnupū tiqiuna esagū tutuaro peca ūjūahye. Sa yero nahitiano, bueri, tutuaro wiwnono mehna ijiahye ti cūnupūre. ¹⁹⁻²⁰ Ti cūnupū tiqiuna esagū corneta bisiro ca tahye. Sa yero yahuducue bisiro ca tahye. Ti sa yahudu-

cue bisigū tuhoye, masa ihcāno sahaerahye. Cohācjū cuaro mehna ohō saha ni, dutiahye tiquinare: “Ijipihtiyequina ahdu cūnūre dahra tuhuyequinare utā mehna doque wejēña tiquinare. Ahdure dahra tuhuriqiuro wahiqiuro waro tiqiuro ijiepegūta tiqiuro gūhūre utā mehna doque wejēña tiqiurore. O ñosenū mehna ñose wejēña tiqiurore”, niahye Cohācjū. Tiquiro sa nigū tuhoye ihcāno sahaerahye tiqiuna. ²¹ Sa yero ijipihtiye tu cūnupū ijiro tiqiuro ihñarire ihña cuero, ohō saha niahye Moise: “Cuegu nanaregu niaja”, niahye tiqiuro.

²² Sa Cohācjū mehna tiqiuna iji ducariro sahata ijierare musa pehe. Cohācjū mehna ijina wahana, Siō wame tidupū ūhmūse cjādūpū musa esaboro saha potota Cohācjū mehna yahuducure musa. Cohācjū catiriquiro ya macapū musa esaboro saha potota tiqiuro mehna yahuducure musa. Ti maca ape maca wahma maca Jerusalē ūhmūse cjā maca ijire. Topūre peyequina angele pari ijire. ²³ Tiquina Cohācjū mehna bucu-eye tehe cahmecoañequina ijire. Sa yena musa pehe tiqiuro ya maca cjāna ijina, topū Cohācjū pohne iji muhtañequina mehna musa cahmecoaboriro saha ijire. Tiquina tiqiuro pohne wamene tiqiuro ojoa ohōri tjuṗū ūhmūsepū tiqiuna wamene tiqiuro ojoa ohōnohriqiuna ijire tiqiuro pohne. Tiquiro pehe mari Pacu pehe ijipihtiyequinare beseatiqiuro ijire. Tiquiro mehna cjāna ijire musa pehe. Sa yena tiqiuna quehnoañequina Cohācjū yequina mehna cahmecoano saha ijire musa gūhū. Tiquinare iji muhtariquinare ñañe marieñequina ye tuhasahye Cohācjū. ²⁴ Sa yena Jesu mehna cjāna ijire musa pehe. Wahmanopū Moiserere tiqiuro duti cūrيره comesaro “Musare yūhdūoutja yūhū”, ni cūahye Cohācjū marine. Tiquiro sa ni cūriro sahata yeriquiro ijire Jesu. Tiquiro diire cohā, tiqiuro yariari

mehna marine sa yuhduore. Abe m̄nano tiquiro dii cohāgū ihñano Cohācjū Abere wejēdiqirore buhiri dahreahye. Jesu pehe tiquiro diire cohāgū, tiquiro yariari mehna quehnoano yuhduaja mari. Sa yero Abe tiquiro dii cohāri ihyo warota ijiahye. Cristo pehe tiquiro dii cohāri bato quehnoa yuhduaro yeahye Cohācjū marine. Sa ye tiquiro dii cohāri ihyo warota ijierare.

²⁵ Sa yena quehnoano yeya m̄sa. Cohācjū yere m̄sare yahuriqirore quehnoano yuhtina ijiya. Panopu ahri yehpapu ijiriquiro Moise Cohācjū yere tiquiro yahugū tuhoye, peyequina tire tuho duerahye. Sa tiquina tuhoerari buhiri buhiri dahreahye Cohācjū tiquinare. Tiquina yuhduoro buhiri dahrerota Cristore cohānequinare. Cristo pehe um̄sepu ijiriquiro Cohācjū yere yahuriqiro ijire. ²⁶ Ti pjere Moiseri tiquiro dutiyere cūri pjere Cohācjū tiquiro yahuducuro mehna yehpa n̄uhmigū yeahye. Yojoṗu pehere ohō saha ni yahuahye tiquiro: “Ihcā tahata ahri yehpa n̄uhmigū ye nemoutja. Ahri yehpa dihitare n̄uhmigū yesi yuh̄. Um̄sepu gūhure n̄uhmigū yeitja”, ni yahuahye tiquiro. ²⁷ “Ahri yehpa n̄uhmigū ihcā tahata ye nemoutja”, nino, ijipihtiyere tiquiro bajumehnedire tiquiro cohātire masigū yero niahye. Cohācjū puhtoro ijiropure cohāno basioerare. Sa yero tiquiro bajumehnedire cohāgū tiquiro puhtoro ijiro dihita tojoarota. ²⁸ Tiquiro puhtoro ijiropu wahanata mari. Sa yena tiquiro puhtoro ijirore tiquiro cohāedagū ihñana, Cohācjūre “Quehnoare”, ni ihna mari. Sa yena tiquirore ño peoye mehna, cua pesaro mehna tiquiro yere yeihna mari tiquirore bucegū yena tana. ²⁹ Peca ūjūno cuaro saha Cohācjū gūhu cuaro mehna buhiri dahreriquiro ijire.

Ohō saha Cohācjūre bucegū yeya

13 M̄sa mehna cjēnare cahī duhueracāhña. ² M̄sa m̄sa ihña masieñequina tiquina ijiepegūta tiquinare m̄sa wuhusepu quehnoano mehna sajā ta dutiyya. Apequina sa yeye, masiedapeta angelere tiquina ye wuhusepu sajā ta dutiahye. Sa yena tiquina yero saha yeya m̄sa gūhu.

³ Peresupu ijiequinare paja ihñaña. M̄sa pehe tiquina mehna peresupu ijina m̄sa ijiboro saha tiquinare paja ihñaña. Apequina tiquina ñano yenhriquina gūhure paja ihñaña. Tiquina yero saha m̄sa gūhu ñano yuhduboro saha tiquinare paja ihñaña.

⁴ Omoca duhterina ijipihtina m̄sa basi quehnoano cahme ño peoya. Sa yena apequina mehna ñano yeraçāhña. Ijipihtiyequina numia mehna ñano yeyequinare, um̄sa mehna ñano yeye numia gūhure buhiri dahrerota Cohācjū.

⁵ Niñerure ne cahiedacāhña. Ohō saha niahye Cohācjū: “M̄sare ne cohāsi yuh̄. M̄sare sa yedohoducugutja”, niahye tiquiro. Sa yena noho puno m̄sa cuoye mehna to punota buceyya. Pajiro cahme nemoedacāhña. ⁶ Sa yena cuero marieno ohō saha ni tuhotunata mari: Mari puhtoro Cohācjū marine yedohoriqiro ijire. Ne cuesi mari. M̄sa marine tiquina ñano yeatire cuesi mari, ni tuhotunata.

⁷ Cohācjū yere m̄sare yahuriquinare m̄sare dutiriquinare wacūña m̄sa. Sa yena quehnoano tiquina ijie tirire quehnoano tiquina yee tirire wacūña. Sa wacūna, Cristore tiquina wacū tutuariro saha yeya m̄sa gūhu.

⁸ Jesucristo ne comesaerare. Panopu, yojoṗu gūhure, camepu gūhure tiquiro ijiriro sahata ijiducurota tiquiro. ⁹ Peye buheyere sijoro saha ijiye buheyere tuhoeracāhña m̄sa “Quehnoañe buheyere usāpu cohāri”, nina. “Ahrire

ihyaya. Ahrire ihyeracāhña”, ni buhere ihquēquina. Sa tiquina ni buheyere mari yuhtigū ti marine yedohoerare. Sa yero sa ijiye buheyere mari yegū ihyo warota ijire. Ti marine wacū tutuana ijigū yerare. Cohācjū pehe marine wacū tutuana ijigū yere. Sa yena tiqiuro ye tutuaye mehna tiqiurore wacū tutuana ijiya msa gūhu.

¹⁰ Cristo mari ñaṇe buhirire yariahye mari ñaṇene cohāno taro. Pahia pehe ohō saha niṇequina ijire: “Wahiquina mari wejē ũjūa mso, mari ohoyequina mehna yuhdunata”, niṇequina ijire pahia. Sa niṇequina tiquina ñaṇe yerire cohānohriquina iji masiedare.

¹¹ Mari judio masa mari pahia puhtoro Cohācjū ijiri tucū waropu diire ne sajāno wejē siteahye, masa tiquina ñaṇe yerire cose wero taro. Sa yero tiqiuro wejēdiqiuro wahiquiro pagure ti maca duhtu cahapu ũjūa cohā cāre. ¹² Tiquiro yeriro saha Jesu gūhu maca duhtu cahapu yariahye, masa tiquina ñaṇene tiqiuro dii cohāno mehna cose wero taro.

¹³ Maca duhtu cahapu tiqiuro yariagū ihñaṇe, tiquina ye buheyere tiqiuro cohāgū ihñaṇe judio masa puhto tiqiurore ihña tuhtiahye. Sa yena mari gūhu tiqiuro mehna cjāna ijiihna. Mari sa ijigū ihñaṇe, masa mari gūhure ihña tuhtieta.

¹⁴ Ahri yehpapu mari iji dojoati maca ne mariedare. Mari camepu ijiati macare cohtena niaja mari. ¹⁵ Sa yena Jesu yedohoro mehna mari Pacu mehna yahuducuaja mari. Sa yena tiqiurore quehnoano sinihna. “Mūhu ũsā Pacu quehnoagu, tutuagu ijire”, ni, ño peoducuuhna. “Jesu yequina ijiaja”, ni, sa niña mari Pacure. Mari sa nigū tiqiuro bucierota.

¹⁶ Msa mehna cjēnare quehnoano yeya. Sa yena tiquinare yedohoya. Tire boeracāhña. Msa sa quehnoano yena Cohācjūre ño peona niaga msa. Sa yena tiqiurore buciegū yena niaga.

¹⁷ Msa puhtoare quehnoano yuhtiya. Tiquina dutiro sahata yeya. Cohācjū ihña ihbo, buhe dutiro cūre msare tiquinare. Sa cūnohriquina ijiye msare sa ihña ihboducuye nine “Cohācjūre yuhduducari”, niṇe. Camepu msare tiquina dutirire, tiquina yerire Cohācjūre yahueta. Sa yena tiquinare quehnoano yuhtiya msa. Msa sa yuhtigū ihñaṇe bucieye mehna msare yedohoeta tiquina. Msa yuhtieragū ihñaṇe tiquina bujua witieta. Sa yuhtierana quehnoano ijisi msa.

¹⁸ ũsāre sini basaducuya Cohācjūre. Decoripe quehnoañe dihitare ye duaia ũsā. Sa yena “Ñañene yena niaja”, ni tuhotueraja ũsā. ¹⁹ Ahri pūritare tutuaro sini basaya Cohācjūre yuhure: Sojaro mehna msa cahapu yuhu wahatire tiqiurore sini basaya.

Ahri pūre ojoariqiuro quehnoa duti bato tiahye

²⁰ Cohācjū mari puhtoro Jesure yariariqiurore masoahye. Marine quehnoano ijigū yeriqiuro ijire. Tiquiro “Msaare yuhduoutja”, ni cūahye Cohācjū marine. Tiquiro sa ni cūrire yeriqiuro marine yuhduoriqiuro Jesu pehe ijire. Mari ñaṇe buhirire yariahye tiqiuro. Sa yero tutuariqiuro ovejare ihña ihboriqiuro yero saha ijiro, marine tiqiuro yequinare quehnoano ihña ihbore. ²¹ Sa yero Cohācjū tiqiurore masoriqiuro msa gūhure yedohohoro ijipihtiye quehnoañene tiqiuro cahmeñene msa yeatire. Sa yero Jesucristo yedohoro mehna Cohācjū cahmeno saha ijipihtinare marine quehnoañe pehere comesagū yeahro. Sa yena ijipihtiye decori Cristore ño peouhna. Sata yeihna.

²² Yuhu acaye, ahrire tutuaro msare dutiitja: Ahri pūpu yuhu yahurire quehnoano mehna tuhoya msa. Ahri msare yuhu ojoari pū pajiro ijierare.

Sa yena ahrire quehnoano tuhoya.

²³Ahri gũhure musare yahutja: Mari acayũrore Timoteore peresu ijiriquire wioñõhti. Sojaro mehna tiquiro wihigũ musare ihãagũ wahagũ tiquirore neagutja. Yuhũ mehna waharota.

²⁴Musa puhtoare, ijipihtiequina apeqinare Cohãcjũ yequinare topũ ijiye-

quinare quehnoa dutiaja. Italia cjẽna Jesu yequina gũhũ musare quehnoa dutire.

²⁵Ijipihtinare musare Cohãcjũ mehna quehnoa dutiaja.

Santiago

Santiago Israe masare macari wahariquinare ojoa ohoahye

1 Yuhū, Santiago ahri pūpū musare quehnoa duti ojoa ohogū niaja. Mari Pacū, mari puhtoro Jesucristo gūhū cahcjūta ijiaja yuhū. Sa yegū Israe masa ye cururi cjānare doce cururi cjānare Jesu yequinare macari waharinare yuhū acaye musare ojoa ohogū niaja.

Cohācjū pehe quehnoano masigū yere

2 Yuhū acaye, peye ijieta mūsa nāno yuhduati. Sa nāno yuhdūepenata quehnoano bucueye mehna tūhotuya. **3** Sa nāno yuhdūna, potota Jesure mūsa wacū tutuarire ihñona ninata mūsa. Sa yena nāno yuhdūepenata Jesure mūsa quehnoano wacū tutuana ijina, tiqiore wacū tutua nemona wahanata. Sa wahana mūsa nāno yuhdūyere ihcāno sahanata. **4** Sa yena duhuro marieno sa ihcāno sahana ijiducuya mūsa quehnoano tuho masina mūsa ijiatire.

5 Mūsa masiati duhsagū tūhotuna Cohācjūre siniña. Tiquiro duhsaro marieno ijipihtiyequinare ohore. Sa ohoro tiqiore siniñequinare sijoro saha nino marieno ohore tiqiuro. Tiquiro sa ijiriquiro ijigū masina, mūsa masiati duhsagū tūhotuna, tiqiore siniña. Mūsa sa sinigū musare masi nemogū yerota tiqiuro. **6** Sa sinina Cohācjūre quehnoano wacū tutuatjiāna siniña mūsa. “Usā sinigū Cohācjū ohoeraboaga usāre,” ni tūhotueracāhña. Sa ni tūhotuyequina pajiri ma cjē pahcōri yero saha ijire. Pahcōri ti usuro comesaro saha tiquina gūhū tiquina wacūñepūre usuro comesare. Ihcāno saha yerare tiquina. Sa ye Cohācjūre

wacū tutuarare. **7** Sa ni tūhotuyequinare tiquina sinipegūta ne mehenogā tiquina siniñene tiquinare ohosi mari puhtoro, Cohācjū. **8** Miare ahrire cahmediquiro ijieperota nāmiare sijoro saha tūhoture tja. Sa yeriquiro queoro yerare.

9 Jesu yequinare ihyo ijieyequinare Cohācjū pehe puhtoa sōnota. Sa ijiatiquina ijieye bucueahro tiquina. **10** Sa ye Jesu yequina doeri cjē opana ijieye tiquina ye doeri cjē pihtiatire masiñe bucueahro. Ti doeri cjē ihyo warota ijire, Cohācjū ihñagū. Cohori ti duita ahba bora dijiaa waharo saha ti doeri cjē pihtia waha harota. Sa ijieye tiquina gūhū bucueahro. **11** Asū mūja taro tiqiuro tutuaro asigū taa pehe nāia wahare. Sa ye cohorī gūhū nāi bora dijiaa waha, quehnoañe cohorī ti ijieye pihtia wahare. Sata waha harota doeri cjē opanare doeri cjēne tiquina ne cahmecoano watoa. Tiquina, ti doeri cjē mehnata butia wahaeta.

Ñano ye dutiyere yerariquiro bucueriquiro ijire

12 Ñano yuhdūriquiuro ihcāno saharo, nāno ye dutiyere yeraro bucueriquiro ijirōta. Tiquiro sa ihcāno saha gū, tiqiuro nāñene yeragū ijipihtiye decori uhmūsepū ijiducugū yerota Cohācjū tiqiore. “Sa uhmūsepū ijiducugū yeitja”, ni cūahye Cohācjū ijipihtiyequina tiqiore cahñequinare. **13** Musare apequina nāno ye dutigū “Cohācjū yuhūre nāno ye dutiro nine,” ni tūhotueracāhña. Ñano yeyere tūhoturiquiuro ijierare Cohācjū. Sa yero tiqiuro pehe masare nāno ye dutiriquiro ijierare. **14** Masa nāñene tiquina tutuaro cahmeñeta tita tiquinare nāno yegū yere. **15** Sa ye nāñene tutuaro cahmene masa. Sa ye ti pehere tūhoture. Sa tūhotuye, ti nāñene yeducure tiquina. Tiquina sa yeducuri buhiri Cohācjū tiquinare pecapū cohānota.

¹⁶ Sa yena yũhũ acaye yũhũ cahĩna, “Cohãcjũ yũhũre dutigũ ñano yei,” ni tũhotueracãhña. Poto ijierare ti. ¹⁷ Mari Pacũ uhmũse cjũno marine quehnoañe dihitare ohore. Tiquiro pũrita asũ deco cjũnore, ñami cjũnore, ñahpicoha paca gũhũre bajumehmediquiro ijiro, tiquiro pehe tiquiro ijiriro sahata sa ijiducu cãre. ¹⁸ Tiquiro cahmediro sahata quehnoañe buheye mehna marine tiquiro pohna wahagũ yeri. Sa yeri tiquiro, tiquiro pohna iji muhtana marine iji dutiro.

Potota Cohãcjũre ño peoye ohõ saha ijire

¹⁹ Yũhũ cahĩna, yũhũ acaye, ahrire quehnoano tũhoya mũsa. Cohãcjũ yere quehnoano tũhoya mũsa. Sa tũhona, tũhoturo marieno yahuducueracãhña. Sa yena usueracãhña. ²⁰ Ihcãquiro usuariquiro ijigũ tiquiro yerire bucuere Cohãcjũ. ²¹ Sa yena ijipihtiye mũsa ñañe yeyere, mũsa ñañene tutuaro cahmedire duhuya mũsa. Sa yena Cohãcjũre quehnoano yũhtina ijina tiquiro buheyere tũho, cahmeña mũsa. Tiquiro ye buheyere mũsa tũho cahmegũ Cohãcjũ pehe mũsare pecapũ wahaborinare yũhũorota.

²² Tiquiro yere tũhoepenata yũhtierana ni mehoñene tũhotuna nine mũsa. “Yũhtieragũ quehnoanota,” ni tũhotuna ni mehoñene tũhotuna nine mũsa. Sa yena tiquiro yere tũhona ti pehere yeya. ²³ Cohãcjũ yere tũhoepenata, yũhtierana, tiquiro wũhdoare eõno mehna ihñariquiro yero saha ijire mũsa. ²⁴ Tiquiro wũhdoare tiquiro ihñari bato waha, tiquiro ihñarire boaa wahare. ²⁵ Sa yero apequiro pehe tiquiro ihñarire boero saha Cristo ye dutirire tũhoro tire yero, bucueriquiro ijirota. Ti dutiye Cristo cahĩne mehna masare tiquiro yũhũoati buheye ijire. Ti buheyere ne cohãediquiro bucueriquiro ijirota.

Tiquiro pũrita tiquiro tũhorire yeriquiro ijire. Sa yeriquirore quehnoano yerota Cohãcjũ.

²⁶ Ihcãquiro sa ni maca cãriquiro ijiro, potota Cohãcjũre ño peerare. “Cohãcjũre quehnoano ño peoaja,” ni tũhoturiquiro ijieperota ni mehoñene tũhoture tiquiro. “Cohãcjũre ño peoaja,” nidiquiro ijiepegũta tiquiro ño peoye ne duhseati ijierare. ²⁷ Ijirota Cohãcjũre mari Pacũre mari ño peona, tiquiro cahmeno saha ño peona, ohõ saha yeaja mari: Pacusumua marieñequinare, wape wiha numia gũhũre tiquina ñano yũhdugũ ihñana, tiquinare yedohoaja mari. Sa yena ahri yehpa cjẽna ñañene tiquina yerire ne ye dueraja mari. Sa yena potota Cohãcjũre ño peonata ijiaja mari.

Masare ihcãno saha quehnoano yero cahmene marine

2 Yũhũ acaye, quehnoa yũhũuariquirore Jesucristore mari puhtorore tũhona, tiquirore wacũ tutuana ijire mũsa. Sa wacũ tutuana masare ihcãno saha quehnoano yero cahmene mũsare. ²⁻³ Sa ye uru behtorire, omoca sañañe behtorire cuoriquiro, wapa bujũye suhtire sañariquiro mũsa Jesu yequina cahmecoano cahapũ tiquiro ahtagũ ihñana tiquirore quehnoano mehna piti caboaga. “Ohõpũ dujiro ijire,” niboaga mũsa tiquirore. Sa niepenata ti pjeta pejecuoriquiro gũhũ ñano suhti tiriquiro mũsa cahapũ tiquiro ahtagũ ihñana tiquiro pehere quehnoano piti caeraboaga. “Ohõpũ ducuya. O yehpapũ dujiya,” niboaga mũsa tiquirore. ⁴ Mũsa sa yena masare ihcãno saha yena niedaga mũsa. Sa yena ñañene tũhotuyequina masare beseyequina yero saha ijina niaga mũsa. “Ahriquiro pehe quehnoariquiro ijire. Ahriquiro ñariquiro ijire,” ni besemene mũsa.

⁵Yuhū acaye, yuhū cahīna, yuhūre tuhoya. Peyequina pejecuoyequina pehere Cohācjū beseahye. Tiquirore quehnoano wacū tutuatiquinare, tiquiro puhtoro ijiropure ijiatiquinare beseahye tiquinare. “Topure wahanata mūsa,” ni cūahye Cohācjū tiquirore cahīnequinare. ⁶Tiquinare tiquiro sa besepegūta mūsa pehe pejecuoyequinare quehnoano ño peorare. Doeri cjē opana pehe musare ñano yere. Sa ye tiquina masare beseriquiro cahapū musare neare musare yahusāne tehe. ⁷Mūsa pehe “Cristo yequina,” masa tiquina ninohna ijire. Peyequina doeri cjē opana pehe Cristore ñano ni yahuducuyequina ijire. Sa ye pejecuoyequinare mūsa ño peoriro yuhūoro doeri cjē opanare mūsa ño peogū ñarīne.

⁸Cohācjū dutiye mehna cjā dutirore apeye dutiye bui cjūnogā ijiri dutirore ohō saha ni ojoahye: “Mūhū basi mūhū cahīno saha mūhū cahapū ijiyequina gūhure cahīna,” nine Cohācjū dutiro. Ahri dutirore yena, quehnoañene yere mūsa. ⁹Masare ihcāno saha yerana ñano yena nine mūsa. Sa yena Cohācjū dutiyere yuhūduducana ijire mūsa. Sata nine Cohācjū yere tiquina ojoari pūpū. ¹⁰Cohācjū dutiyere yena ijiepenata ihcāno dutirogāre mūsa yeragū apeye dutiyere mūsa yepegūta dūhseati ijierare. Sa yena ñañe buhiri tina ijine mūsa. ¹¹“Apequiro namono mehna ñano yeračāhña,” ni, musare dutiriquiro Cohācjūta ijire. “Masare wejēdacāhña,” nidiquiro tiquirota ijire Cohācjū. Apequiro namono mehna ñano yerapenata masunore wejēna Cohācjū dutiyere yuhūduducana ijire mūsa.

¹²Cristo marine tutuaro cahīno, marine dutire marine yuhūoro taro. Tiquiro dutiyere mari yerire, mari yerari gūhure ihñano marine besero ahtarota. Tiquiro sa besenohanaja

ijina tiquiro dutiyere quehnoano yeihna. Sa yena tiquiro cahmeno sahata yahuducuuhna mari. ¹³Yojopure mari apequinare paja ihñedagū Cohācjū pehe masare tiquiro beseri pje ijigū marine paja ihñasi. Sa yena apequinare mari paja ihñagū Cohācjū pehe marine paja ihñano, marine buhiri dahresi.

Cristore wacū tutuayequina pehe quehnoañene yere

¹⁴Yuhū acaye, tuhoya mūsa. “Cristore wacū tutuaja yuhū,” ihcāquiro tiquiro ni tuhōtuepegūta tiquiro quehnoañene yeragū tiquiro sa nimesi pehe ne dūhseati ijierare. Sa ni wacū tutu maca cāriquirore Cohācjū yuhūosi. ¹⁵⁻¹⁶¿Jesu yaquiro, Jesu yacoro ñañe suhti dihita tiquina cūogū ihñana, tiquina ihyati mariedagū ihñana, dūhse yeajari mūsa tiquinare apee boro cūona ijina? “Quehnoano ijiya mūsa. Sa yena quehnoano suhti sañaña. Sa yena quehnoano ihya yapi iji cāhña,” niepenata tiquina cahmeñene mūsa ohoeragū mūsa sa nimesi ne dūhseati ijierare. ¹⁷Sa yena “Cristore wacū tutuaja,” mūsa niepegūta quehnoañene mūsa yeragū Cristore mūsa wacū tutuaye ne dūhseati ijierare.

¹⁸Mūsa mehna cjūno ahri yuhū buherire tuho dueraro ohō saha masiahdo. Quehnoañene yeraperota “Cristore wacū tutuaja,” niboaga tiquiro. Quehnoañene yeraro Cristore tiquiro wacū tutuayere apequinare masigū ye masiedare. Quehnoañene yeriquiro pūrita quehnoañene tiquiro yeye mehna Cristore tiquiro wacū tutuayere masigū ye masine. ¹⁹“Cohācjū ihcāquirota ijire,” ni tuhōture mūsa. Mūsa sa ni tuhōtugū quehnoarīne. Sa ijiepegūta to punota Cohācjūre yuhtiro marieno tiquirore mūsa masigū ti dūhseati ijierare. Watīa gūhū mūsa tuhōturo sahata

tuhotuñohti. Sa ijiye Cohācjū tiquiro ijiye tiyere masiñohti tiquina. Sa masiñe, cue, nanareñohti. ²⁰Ihcāquiro quehnoañene yeraperota “Cristore wacū tutuaja,” ni tuhoturiquiro ijiro tūho masieniquiro ijire. Cristore wacū tutuamediquiro quehnoañene yeraro potota Cristore wacū tutuerare.

Ohō saha ni yahutja mūsare ahrire: ²¹Abrahā mari ñecu mñnano tiquiro macño Isaac wame tiriquirore wejē basamahye Cohācjūre. Sa yero tiquirore utā paca mehna tiquina yeri buhu bui duhu peomahye. Sa duhu peoro Cohācjū dutiriro sahata tiquiro macñore wejēno taro nimahye Cohācjūre ño peoro taro. Tiquiro sa yegū ihñano “Potota quehnoariquiro ijire,” ni ihñahye Cohācjū tiquirore. ²²Tiquiro sa ni ihñagū ahrire masine mūsa: Abrahā Cohācjūre wacū tutuaro tiquirore yūhtiahye. Sa yūhtiro Cohācjūre tiquiro wacū tutuayere ihñono niahye. ²³Sa yero Cohācjū yere tiquina ojoari pūpū tiquiro nidiro sahata sa wahahye: “Abrahā Cohācjūre wacū tutuayere. Tiquiro sa yegū ihñano ‘Quehnoariquiro ijire tiquiro’, ni ihñahye Cohācjū tiquirore”, ni ojoahye Cohācjū yere tiquina ojoari pūpū. Tiquiro sa ni ihñagū masiñe “Abrahā Cohācjū mehna cjūno ijire”, nine masa tiquirore.

²⁴Sa yena ahri yūhū yahuatire masine mūsa: “Cohācjūre wacū tutuaja,” nidiquiro, tiquiro quehnoañene yeragū ihñano Cohācjū pehe tiquirore “Quehnoariquiro ijire,” ni ihñedare. Cohācjūre wacū tutuariquiro pehere potota tiquiro quehnoañene yegū ihñano “Quehnoariquiro ijire,” ni ihñare Cohācjū tiquiro pehere. ²⁵Sata ni ihñahye Cohācjū Rahab wame tiricorore mñna mehna ñano yeducumedicorore. Josué mñnano tiquiro ohoriquinare quehnoano piti ca, “Quehnoano sajà taya,” niahye ticoro. Sa yero tiquina

tojoa duagū ticoro pehe ape maha pehere ihñeahye tiquinare “Tiquinare ihña tuhtiyequina wejēari,” nino. Ticoro sa yegū ihñano “Quehnoaricoro ijire,” ni ihñahye Cohācjū ticorore.

²⁶Sata ijire. Mari pagupure jeripohna mariedagū catieraja mari. Sa yero jeripohna mariedagū mari pagu dūhseati ijierare. Sata “Cohācjūre wacū tutuaja,” mari niepegūta mari quehnoañene yeragū queoro ijierare mari wacū tutuaye. Sa yero mari quehnoañene yeye mariedagū mari wacū tutuaye dūhseati ijierare, jeripohna marieni pagu yero saha.

Mari duseropu wijiayere mari yahuducuyere yahuahye

3 Cohācjū yere masare buheyequina tiquiro yere tiquina quehnoano yeragū ihñano tiquina pūritare masare buheyequina yūhduoro Cohācjū buhiri dahrerota. Tire mūsa masine. Sa yena mūsa mehna cjēna masare buheyequina peyequina ijieracāhdo.

²Ijipihtiyequina peye tahari mari ñañene yeaja. Ihcāquiro ñañene yahuducueriquiro Cohācjū cahmeñene quehnoano yeriquiro ijire tiquiro. Sa yero apeye ñañe gūhure yerare.

³Ohō saha ijire ahri mari queoye mehna buhegū: Caballo duseropu come pjī tiquiro ñehmenore ña dihori pjīne mari cūaja, tiquirore mari majareducagū yena tana. Sa yena ti pjī come pjī mehna tiquirore tiquiro wahatopu mari weje majare docoaja. Ti pjīgā meheni pjīgā ijiepegūta ti pjīgā mehna tiquirore wahagū yeaja mari. Sata mari dusero mehenogā ijiepegūta ti dusero mehna pajiro yeaja mari.

⁴Yucsa quiti mehna queoye mehna yahu nemoutja mūsare: Yucsa pajiria ijiepegūta tiare wihnono tutuaro wēdoqueoepegūta ohoturiquiro pehe meheni pjīgā mehna tiare noho tiquiro

waha duaropu ohoture. ⁵Sata ijire mari duseropu wijiaye. Mari dusero mehenogā ijiepegūta ti dusero mehna pajiro yeaja mari. Meheni pecagā pajiro ti peca ujū cāno saha mari dusero mehna mari yahuducuye mehna pajiro ñañene yeaja. ⁶Sa yero mari dusero ujūri peca yero saha ijire. Mari duseropu wijiaye ijipihitiye ñañene yegū yere marine. Peca ujū ducaro saha mari duseropu wijiaye mehna mari quehnoano ijiborire ña yuhduaro yeaja mari. Ñañene yahuducuna watino tiquiro dutiro saha mari yena niaja.

⁷Ijipihitiyequinare nucu cjenare wahiquinare, minicjuare, sihcō cāhñequinare, wahire mari ihña wahāgū ye masiaja. Sa yena mari peyequina tiquina borore ihña wahāgū ye tuhasau. Sa ye tiquina quehnoano tuho masine. ⁸Tiquinare mari yuhtigū yepegūta mari dusero pehe ñañene yahuducuro ne duhuera yuhduare. Sa yero nuñequinare mari yuhtigū yero saha mari dusero pehere ne yuhtigū ye masiedaja mari. Mari duseropu wijiaye ña yuhduaye ijire. Sa yero aña apequinare tiquiro wejēno saha marine apequina gūhure ña yuhduaro wahagū yere mari dusero.

⁹Mari dusero mehna Cohācjū mari puhtoro mehna mari quehnoano yahuducujaja. Sa yahuducuepenata masa Cohācjū yero saha ijieyequinare tiquiro bajumehnediquina tiquina ijiepegūta tiquinare ña yuhduaro ni yahuducujaja mari. ¹⁰Ihcā duseroputa quehnoañene yahuducuye gūhu, ñañene yahuducuye gūhu wijiare. Yuhhu acaye, sa ni yahuducueracāhña. ¹¹Māgā pohtepu aco wijiari copepu quehnoañe aco, ñañe aco gūhu ne wijaerare. ¹²Yuhhu acaye, higeragu olivo pacare dūca tierare. Sa yero

uhse da higuera pacare dūca tierare. Sa ye moreno mehna pue paca dūca tierare. Sa ye māgā pohtepu aco wijiari copepu moa yuaye co wijiagū moa marieñe co wijaerare. Sata mari duseropu quehnoañe yahuducuye, ñañe yahuducuye mehna wijaeracāhdo.

Quehnoano masiñe waro ohō saha ijire

¹³Ihquēquina mūsa mehna cjēna quehnoano masiñequina ijire. Sa yena “Apequina yuhduoro quehnoano masiaja usā,” niedacāhña. Sa niedana quehnoañene yeya mūsa. Sa quehnoano yena potota quehnoano masina ijire mūsa. ¹⁴Sa yena apequiro apee borore tiquiro cuogū ihñana cahme ihña coona, apequina mehna usuaducuna, apequinare yuhdudūca duana, “Cohācjū yere quehnoano masiaja usā,” niedacāhña mūsa. Mūsa sa nina ni mehona ijire mūsa. ¹⁵Sa yeyequina tiquina wacūñe Cohācjū ye wacūñe ijierare. Tiquina wacūñe ahri yehpa cjēna tiquina ñañe wacūñe ijire. Tiquina wacūñe pehe watino ye ijire. ¹⁶Masare cahme ihña cooyequina, apequinare yedoho dueyequina sa cahme tuhtiducure. Sa ye ijipihitiye ñañene yeducure.

¹⁷Apequina pehe Cohācjū yere quehnoano masiñequina pehe tiquina pūrita sa ye maca quēhe niedare. Sa ye tiquina ne cahme tuhtierare. Sa ye masa quehnoañequina, dutiyere quehnoano yuhtiyequina, paja ihñañequina, masare yedohoyequina, masare ihcāno saha yeyequina ijire tiquina. Tire yeye, ni mehono marieno yere tiquina. ¹⁸Sa yena cahmequeno marieno ijina, apequinare “Cahmequedacāhña,” mari ni yahuna quehnoañequina wahagū yena niaja mari masare.

**Ahri yehpa cjē ñañene cahmena,
Cohācjüre ihña tuhtina ijire mūsa**

4 ¿Duhse ijiro boro mūsa cahme tuhtiajari? ¿Sa yena duhse ijiro boro cahmequeajari mūsa? Ñañene tutuaro cahmena, cahmeque duare mūsa. Quehnoañene ye duopenata ñañene yere mūsa. ²Apee borore mūsa cahmene. Sa cahmena masare wejēne mūsa tiquina yere nena tana. Sa yena apequiro apee borore tiquiro cuogū ihñana tire mūsa tutuaro cahmene. Sa cahmepenata tire nea masiedare mūsa. Sa yena tire cahme sehña soducure mūsa. Cohācjüre siniedana, mūsa cahmeñene ne bocaerare. ³Sa yena Cohācjüre sinina, mūsa ye ijiati dihitare sinimene mūsa, mūsa cahmeno sahata yeducuna tana. Apequina ye ijiati pehere sini basaerare. Sa mūsa sinigū Cohācjū mūsa siniñene ohoerare.

⁴Cohācjüre duhurina ijire mūsa. Ahri yehpa cjē ñañene cahmena, Cohācjüre ihña tuhtire mūsa. ¿Tire masiedajari mūsa? Sa yero ahri yehpa cjē ñañene cahmediquiro Cohācjüre ihña tuhtiriquiro iji tuhasare. ⁵Ohō saha niahye Cohācjū yere tiquina ojoari pūpū: “Cohācjū yaquiro Espiritu Santore mari mehna ijiatiquirore cūri. Sa yero Espiritu Santo pehe marine cahño, ñañene mari tutuaro cahmepegūta cahmesāedare tiquiro. Ihcāquiro namonore tiquiro cahī doero saha marine tutuaro cahñe Espiritu Santo”, ni ojoahye panopū. Tiquiro sa ni ojoari ihyo warota ijierare. Poto ijirota nine.

⁶Sa yero Cohācjū marine quehnoano yedohore tiquirore mari quehnoano yuhtiatire. Ohō saha nine Cohācjū yere tiquina ojoari pūpū: “Yuhū pūrita apequinare masi yuhdudūcaja, nidiquire, Cohācjū ihña tuhtire. Apequiro pehere ‘Ñagu, ihyo ijigu ijijaja,’ nidiquire pehere Cohācjū yedohore, tiquirore quehnoano

yuhti dutiro”, nine tiquiro yere tiquina ojoari pūpū.

⁷Sa yena Cohācjüre quehnoano yuhtina ijija mūsa. Sa yena watinore yuhtieracāhña. Sa mūsa yuhtieragū ihñano tiquiro pehe musare duhti oma cāa waharota. ⁸Cohācjüre quehnoano yuhtiya mūsa. Mūsa sa yegū tiquiro pehe musare yedohorota.

Ñana ijire mūsa. Sa yena ñañene ye nemoedacāhña. Ñañe gūhure cahmena, quehnoañe gūhure cahmena ijire mūsa. Sa yena mūsa ñañe yerire bujua witiya. Mūsa sa yegū ihñano Cohācjū mūsa ñañe yerire cohānota. ⁹Mūsa ñañene yerire tutuaro bujua witiya. Sa yena mūsa ñañe yeri buhirire utiya. Bucueye mehna bujuna ijieracāhña. Sa yena mūsa ñañe yerire ñano jeripohna tina, tire bue tina ijija. ¹⁰“Ñagu ihyo ijigu ijijaja yuhū”, nina, Cohācjüre ño peoya. Mūsa sa yegū tiquiro pehe mūsa ñañe yerire cohāno, quehnoano yerota musare.

**Tiquina acayere Jesu yequinare
tiquina basi ñano quti ye dutierahye**

¹¹Yuhū acaye, Jesu yequina ijina, mūsa basi ñano quti yeracāhña. Mūsa acayurore ñano quti yena tiquirore buhiri dahre duti duana niaga mūsa. Cristo ye dutiye pehe masare buhiri dahre dutiye iji tuhasare. Sa yena masare ñano quti yena Cristo ye dutiyere ohō saha nina niaga mūsa: “Marine quehnoano dutiare Cristo ye. Sa yena mari esa tuharo buhiri dahre dutihna”, nina niaga mūsa masare ñano quti yena. Sa nina Cristo ye dutiyere ñano ni yahuducuna tojoare mūsa. Sa yena ti dutiyere yerana tojoare. ¹²Masare dutiyere ohoriquiro, masare beseriquiro Cohācjūta ijire. Sa yero masare pecapū wahaboriquinare tiquirota yuhduo masine. Sa yero tiquirota masare pecapū cohā masine. Sa yena mari pehe masare “Ñañequina

ijire”, ni masiedaja. Cohācjū dihita mari acayere beseatiqiro ijire.

Ñamiare dūhse mari ijiatire masiedaja mari

¹³YojoPURE yūhure tuhoya mūsa. Ohō saha nina tuhoya yūhure: “Miare, ñamiare ape macapū ijina wahanata. Topūre ihcā cūhna ijina, apee boro dua, dūnata. Sa yena wapatanata mari”, nine ihquēquina mūsa mehna cjēna Cohācjūre wacūno marieno. Sa nina ijina, yūhū pehere tuhoya mūsa. Sa niñequinare ahrire yahugu tagū niaja. ¹⁴Ñamiapū dūhse mūsa ijiatire masiedare mūsa. Ehmeo iji, duita pihtiri mūjano saha ijire mari ijiye tiye. Ehmeo mehenogā iji, pihtia wahare. Ohō saha mari gūhū mehenogā ijina, yariaa wahanata. ¹⁵Sa yena ohō saha ni tuhutuya mūsa: “Cohācjū cahmegū ijinata mari. Sa yena tiqiro cahmegū ohō saha yenata mari”, ni tuhutuya mūsa. ¹⁶Yūhū sa niepegūta yojoPURE “Mari esa tuharo ohō saha yenata”, niducumene mūsa pehe Cohācjūre wacūno marieno. Sa niducuna ñañene yere mūsa. ¹⁷Quehnoañene mari yeatire masiepenata tire yerana, ñañene yena niaja mari.

Doeri cjē opanare yahuahye Santiago

5 Doeri cjē opana mūsa yojoPURE tuhoya yūhure. CamePURE mūsa ñano yūhdūnata. Sa yena uti sañuducuya mūsa. ²Mūsa doeri cjē ahba pihtia waharota. Sa ye mūsa suhtire casia gūhū ihya pehoeta. ³Mūsa niñerure mūsa pajiro ihbogū ne ti dūhseati ijierare. Pihtiri deco panogā mūsa sa ihbogū ihñano niñerure mūsa cahīgū masine Cohācjū. Sa yena niñerure mūsa cahīdi buhiri pihtiri deco ijigū ñano yūhdūnata pecapū mūsa ūjūgū mūsa pagure ūjū pjero saha. ⁴Mūsa weserire dahra cohteyequinare wapa yerari mūsa. Sa yena mūsa

tiquinare ni mehoiri. Sa yero tiquinare mūsa wapa yerari niñerure ihñano, mūsa ni mehorire masine Cohācjū. Musare dahra cohteyequina wapa ye dutiye, sañuducure tiquina. Tiquina sa ni sañuducugū mari puhtoro Cohācjū tutua yūhdūariqiro tiquinare tuhore. ⁵Ahri yehpapūre peye doeri cjē mehna ijie tiri mūsa. Sa yena mūsa bucueye dihitare yee tiri mūsa. Sa yena pajiriquiro wecū tiquina quehnoano nuriqiro yero saha ijire mūsa. Sa ye pajiriquiro wecū pajiro tiqiro ihyari bato tiqiroire tiquina wejēati cuhtupū ne cāre. Sata mūsa gūhūre pajiro mūsa cūori bato musare tiqiro buhiri dahreatopū ne cānota Cohācjū. ⁶Quehnoañequinare peresu ye, wejē dutiri mūsa tiquinare. Mūsa sa yegū tiquina pehe duhti wijia masiedare.

Cristo tiqiro tojoa tatire quehnoano cohte dutiahye marine Santiago

⁷Sa yena yūhū acaye, mari puhtoro Cristo ahri yehpapūre tiqiro tojoa tatire quehnoano cohteya. Wese upūro tiqiro oteye dūca tiati pjere quehnoano tiqiro cohtero saha quehnoano cohteya. Tiquiro oteyepūre “Acoro ahtaahro” nino tiqiro ya wesere ti quehnoano pihniatire quehnoano cohtere tiqiro. ⁸Sata mūsa gūhū quehnoano cohteya. Mari puhtoro tiqiro tojoa tato mehenogā dūhsare. Sa yena Cohācjūre sa wacū tutuaducuya mūsa. Sa yena tiqiro ahtatire sa cohteducuya mūsa. ⁹Yūhū acaye, mūsa basi ñano qiti yeracāhña Cohācjū musare “Buhiri dahreari”, nina. Sa yena ahrire wacūña mūsa. Buhiri dahreatiquiro tiqiro ahtato mehenogā dūhsare. ¹⁰Yūhū acaye, ñano yūhdūepenata mari puhtoro quehnoano cohteya Cohācjū yere yahu mūhtariquina tiquina yeriro sahata. Tiquina ihcāno sahariro sahata ihcāno sahaya, tiquinare ihña cūna.

¹¹ Sa yena ahri yuhũ yahuatire wacũña m̄sa. Ñano yuhd̄epeta Cohãcjũre duhueyequina bucueyequina ijire. Panopũ cjũnore Job wame tiriquirero tũhori m̄sa. Tiquiro ñano yuhd̄eperota Cohãcjũre duhuerahye. Sa yero tiquiro ñano yuhd̄uri bato Cohãcjũ tiquirore quehnoano yeahye. Cohãcjũ mari pũthoro quehnoano paja ihñariquireo ijiro, sata yeahye tiquiro. Ti ijipihitiyere masine m̄sa.

¹² Yuhũ acaye, ahrire tũhoya. Ohõ saha ni wame peore masa: “Uhm̄use cjũno mehna pototo nina niaja”, nine masare tũho dutiye. Tiquina yero saha sa ni wame peoracãhña. Uhm̄use mehna, ahri yehpa mehna, apee boro mehna sa ni wame peoracãhña. Ahrire m̄sare tutuaro dutiaja. M̄sa apequinare yahuna, quehnoano potota yahuya tiquinare. Ni wame peo yahu nemoedacãhña. Sa m̄sa pototo yahugũ ihñano Cohãcjũ sijoro saha m̄sa nidi buhirire buhiri dahresi.

¹³ M̄sa mehna cjũno ñano yuhd̄uriquiro ijiro, Cohãcjũre siniahdo tiquiro. Apequiro bucueriquiro ijiro Cohãcjũre bucueye mehna basaahro.

¹⁴ M̄sa dohatina, Jesu yequina pũthoate pijioya m̄sa. M̄sa sa pijiogũ tiquina pehe m̄sare uhse mehna wisõeta. Sa yeye mari pũthoro Cohãcjũre m̄sare sini basaeta tiquina.

¹⁵ Sa tiquina sini basagũ “Mari sinino sahata tiquiro yerota”, tiquina ni tũhotugũ Cohãcjũ m̄sare dohatinare yuhd̄uorota. Sa yero m̄sare quehnoana wahagũ yerota mari pũthoro. Sa ye

m̄sa ñañe yeri buhiri m̄sa dohatina ijigũ ihñañe m̄sare sini basaeta. Tiquina sa sini basagũ ihñano m̄sa ñañe yerire borota Cohãcjũ. ¹⁶ Sa yena m̄sa mehna cjẽnare m̄sa ñañe yerire cahme pua peheri yahu yuhd̄aya. Sa yena m̄sa basi Cohãcjũre cahme sini basaya. M̄sa sa sini basagũ m̄sa sini basariquinare Cohãcjũ yuhd̄uorota. Quehnoañene yena m̄sa ijigũ Cohãcjũre tutuaro m̄sa sini basariro sahata yerota Cohãcjũ. Sa ye m̄sa sini basaye tutuarĩaga. Ihyo ijiye ijierare. ¹⁷ Cohãcjũ yere yahu m̄htariquireo m̄nano Elia wame tiriquireo mari yero sahata masũno ijie tiahye. Sa yero “Acoro ahtaeracãhdo” ni tutuaro siniahye Cohãcjũre. Tiquiro sa ni sinigũ ihtia cũhma quehnoano ape cũhma deco ahri yehpapũre ne acoro ahtaerahye. ¹⁸ Sa yero pari turi tja Cohãcjũre acorore tiquiro sinigũ acoro ahtahye. Sa yero pari turi ahri yehpapũ yucũri pihni, bũca, dũca tiahye. Sa ye Cohãcjũre mari siniñe ihyo ijiye ijierare.

¹⁹ Yuhũ acaye, m̄sa mehna cjũno Cohãcjũ yere cohãriquireo Cohãcjũ yere pari turi tiquiro cahmeatire tiquirore yahuna, quehnoano yena nine m̄sa. ²⁰ Sa yena ahrire masiña m̄sa: Cohãcjũre duhuriquireo Cohãcjũre pari turi cahmegũ yena, pecapũ wahaboriquirore yuhd̄ugũ yena niaga m̄sa. Sa yero tiquiro ñañe yerire Cohãcjũ borota.

1 San Pedro

Jesu yequinare macari wahariquinare ojoa ohoahye Pedro

1 Yuhū, Pedro, Jesucristo tiquiro buhe duti cūriguta ijiaja. Sa yegū musare yoaro cjē macaripū waharinare Ponto yehparū, Galacia yehparū, Capadocia yehparū, Asia yehparū, Bitinia yehparū ti yehparipū waharinare musare ijipihtinare ojoa ohoaja yuhū. Musare quehnoa duti ojoaja yuhū. ²Coā waropūre Cohācjū mari Pacū “Ohō saha yeitja”, tiquiro ni wacūyuro sahata musare beseahye. Tiquiro sa beseri bato tiquiro yaquiro Espiritu Santo musare Cohācjū yequina ijigū yeahye. Sa yeahye tiquiro Jesucristore quehnoano yuhtiana mūsa ijiatire, tiquiro dii cohāno mehna mūsa nāñene cosenohrina mūsa ijiatire. Cohācjū cahīne mehna tutuaro quehnoa dutiaja musare.

Jesu yequina ijina marine uhmūsepu tiquiro neatire cohtena niaja mari

³⁻⁵Cohācjū marine tutuaro paja ihñano, Jesucristo yaria masa mūjari mehna marine pecapū wahaborinare yuhdugū yere tiquiro. Sa marine yuhdugū tiquiro yegū pari turi mari masa bajariro saha Cohācjū pohnata wahaja mari. Sa wahana tiquiro mehna mari sa ijiducuatire quehnoano masiaja mari. Sa yero musare quehnoano yero taro musare cohtero nine. Tiquiro mehna mūsa sa ijiducuatire cūnota tiquiro. Sa yena sa ijiducunata mūsa. Sa yero tiquirore mūsa wacū tutuagū, Cohācjū tiquiro tutuaye mehna musare ihña ihboro, yuhdugū yerota. Pihtiri deco ijigū musare tiquiro yuhdūorire masigū yerota tiquiro. Marine tiquiro sa paja ihñagū ihñana, tiquirore Cohācjūre

mari puhtoro Jesucristo pacūrore ño peouhna.

⁶Sa tiquiro yuhdūoana ijina, mehenogā ahri yehparū mūsa ijiro puno peye tahari mūsa ñano yuhdūepenata bucuere mūsa. ⁷Sa ñano yuhdūepenata Cohācjūre cohāedana mūsa tiquirore wacū tutuaye potota ti ijigū tire masigū yena niaga mūsa. Uru ahri yehpa cjē pūrita pihtia waharota. Uru yuhdūoro mūsa wacū tutuaye pehe ihyo waro ijierare. Sa ye masa uru ti ijiyere masi duaye doha tuhu ihñare. Urure tiquina doha tuhu ihñano saha mūsa wacū tutuayere Cohācjū ihña duaro “Ñano yuhdūahro”, niboaga musare. Mūsa sa ñano yuhdūri bato potota tiquirore mūsa quehnoano wacū tutuaducugū ihñano, Cristo ño peoye mehna musare “Quehnoano yeri mūsa”, ninota. Ahri yehparū tojoa taro sa ninota.

⁸Tiquirore Jesucristore mūsa ihñedapenata cahīne mūsa. Sa yena yojopūre tiquirore ihñedapenata tiquirore wacū tutuare. Sa wacū tutuana, tutuaro bucuere mūsa. Cohācjū tiquiro sa musare bucuegū yegū tutuaro bucuere mūsa. Ti bucueye quehnoa yuhdūare. ⁹Sa yero Cohācjū musare pecapū wahaborinare yuhdugū yerota, mūsa tiquirore quehnoano wacū tutuagū.

¹⁰Cohācjū musare tiquiro sa yuhdūoatire panopū cjēna Cohācjū yere yahu muhtariquina tire masi duaye, sinitue tiahye. ¹¹Cristo tiquiro ñano yuhdūatire, tiquiro masa mūjatire, ijipihtiyequina puhtoro tiquiro ijiatire tiquiro masa bajuato panopūta tire yahuyu tuhasae tiahye tiquina. Jesucristo yaquiro Espiritu Santo tiquiro yedohoye mehna sa yahuyuahye tiquina. Sa ye tiquina Cohācjū yere yahu muhtariquina tiquina yahurire quehnoano masi duaye sinitue tiahye

tiquina Cohăcjüre. “Cristo wihirota”, Espiritu Santo tiquiro nidire “¿Noa boro pehe ijivotari?” ni sinitue tiahye tiquina. Tiquiro wihiati pje gühure sinitue tiahye. ¹²Tiquina yahuyuri tiquinare masi pehogü yeati ijierahye. Maripüre masi pehogü yeatire sa ni yahue tiahye. Tire tiquinare masigü yeahye Cohăcjü. ðhmüsepü ahtariquiro Espiritu Santo yedohoye mehna yojoüre quehnoañe buheyere musare usâ yahuaja. Panopü musa masiatire tiquina yahuyuri tita ijire yojoüre musare usâ yahuye. Ti buheyere angele gühü tutuaro masi duae tiahye.

Cohăcjü marine ñañe mariena iji dutire

¹³Sa yena quehnoano wacü masitjiána ijyuya musa. Sa yena tuho masina ijiya. Cristo tiquiro tojoa tagü Cohăcjü musare quehnoano tiquiro yeatire wacüña. Sa yena tire quehnoano cohteya. ¹⁴Panopü Cohăcjüre masiedarîna ñañene tutuaro cahmena ijimedi musa. Yojoüre tire yeracähña. Sa yena tiquina pohne tiquina pacusumüare quehnoano tiquina yuhtiro saha yeya musa. ¹⁵Sa yena tiquiro yequina ijiatire musare beseriquiro ñañe marieniquiro tiquiro ijiro sahata musa gühü ñañe mariedacähña. Sa yena quehnoañe dihitare yeya. ¹⁶Sata ni ojoahye Cohăcjü yere tiquina ojoari püpü: “Ñañe mariegu ijiaya yühü. Yühü sa ijigü musa gühü ñañe mariena ijiya”, ni, ojoahye.

¹⁷Tiquiro Cohăcjü ijipihtiequinare tiquina yerire ihñano ihcãno saha besere tiquinare. Ñañequinare, quehnoañequinare besere. Tiquiro sa yeriquiro ijigü tiquirore “Yühü Pacü” ni duana quehnoano yeya. Ahri yehpapü musa ijiro puno cua pesaro mehna quehnoano ijiducuya musa. ¹⁸Musa ñecusumua muna panopü cjëna tiquina yeri ne duhseati ijierahye. Musa

gühü tiquina yeriro saha yena musa ijiepegüta Cristo musare tiquiro yequina ijigü yeri. Wapamoñequinare tiquina wapamorire tiquina boriro sahata tiquiro pehe musa ñañe yerire potota bo cãhri. Tire quehnoano masine musa. Musare sa yero plata mehna, uru mehna wapa ye wioerare tiquiro musare sa yero. Plata, uru butia waharota. ¹⁹Tiquiro pehe oveja quehnoariquiro, wete marieniquiro yero sahata ijiriquiro Cristo tiquiro dii mehna tiquiro yariari mehna musa ñañe yerire cohã, musare yuhduorota. Tiquiro dii mehna marine sa yero quehnoano waro yero nidi. ²⁰Panopüre ahri yehpare tiquiro bajumehneato pano Cristo tiquiro sa wahatire masi tuhasahye mari Pacü. Yojoüre pehere pihtiatu deco panogã ijigü, Cristore quehnoano masigü yeri mari Pacü musare. ²¹Cristo yedohoro mehna mari Pacüre wacü tutuare musa. Mari Pacü pehe Cristore yariariquirore masori jiri. Sa yero tiquirore ðhmüsepü cüno ijipihtiequinare tiquirore ño peogü yeahye mari Pacü. Tiquiro sa yegü mari Pacüre wacü tutuare musa. Sa yena musare tiquiro yuhduoatire quehnoano masine musa.

²²Quehnoañe buheyere tiquiro nidiro sahata yena ijina, musa ñañe yerire cohãnohrina ijire musa. Sa yena potota mari acayere Jesu yequinare cahï masine musa. Sa yena musa mehna cjënëre musa jeripohnari mehna tutuaro cahña. ²³Sa yena coã bajuayequina yero saha ijina Cohăcjü pohna wahari musa. Mari pacusumua mehna masa bajarina ijina came yarianata. Ti yero saha ijierare Cohăcjü pohna musa wahagü. Cohăcjü buheye mehna tiquiro catigü yeye buheye mehna tiquiro pohna wahari musa. Ti buheye mehna Cohăcjü mehna sa ijiducunata mari. ²⁴Ohõ saha nine Cohăcjü yere tiquina ojoari püpü:

Ijipihtiyequina masa taa yero saha ijire.

Sa ye quehnoañe tiquina cwoye, taa cohoru yero saha ijire. Taa ñaia wahare. Cohori gũhu buru dijia, ahbaa wahare. Ti yero saha yariare masa gũhu. ²⁵ Mari puhtoro ye buheye pehe ne pihtisi. Tiquiro nidiro sahata sa waharota, ni ojoahye.

Ti buheye musare tiquina yahuri quehnoañe buheyeta ijire.

2 Sa yena ijipihtiye ñañe yeyere, ni mehoñene, masa ihñono dihita quehnoano iji mehoñene, apee borore tiquina cwogũ cooyere, apequinare ñano qũiti yeyere tire duhuya musa. ² Sa yena coã masa bajuayequina epẽcore tiquina cahmeno saha musa gũhu quehnoañe buheyere Cohãcjũ yere tutuaro cahme nemoña. Sa cahme nemoña musa tiqiurore musa wacũ tutua nemoatire, tiqiuro yuhduonohatina musa ijiatire. ³ Sata ijinata musa. Mari puhtoro musare tiqiuro quehnoano yeyere mehenogã masi tuhasare musa.

Cristo catigũ yeriquiro utã yero saha ijire

⁴ Cristo catigũ yeriquiro utã yero saha ijire. Wuhũ dahreyequina ihcãria utãre tiquina cahmedaro saha masa tiqiurore cahmedare. Cohãcjũ pehe tiqiurore ihñagũ tiqiuro beseriquiro quehnoa yuhduariquiro ijire. Tiquiro sa ijiriquiro ijigũ tiqiurore wacũ tutuaya. ⁵ Sa yena musa gũhu wuhũ cjẽ utã paca yero saha ijire. Musa sa ijina Cohãcjũ ya wuhũ cjẽ utãre ihcãno saha tiquina cũriro saha musa tiqiuro yequina gũhu ihcãno saha quehnoano ijinata. Sa yena Cohãcjũ ya wuhũ cjãna quehnoana pahia ijinata musa. Sa yena Jesucristo yedohoye mehna Cohãcjũ yere quehnoano yenata musa. Musa sa yegũ ihña bucueroa Cohãcjũ. ⁶ Ohõ saha nine Cohãcjũ yere tiquina ojoari pũpũ:

Utã wuhũpũ tiquina cũ muhtaria mariedagũ wuhũre ye dũca masiedare. Sata Cristo marieno yeequina waha masiedare masa. Sa yero tiqiuro ihyo ijiriquiro ijierare. Sa yegũ tiqiurore Jerusalẽpũ yojopure cũgũ niaja. Tiquiro yuhũ beseriquiro quehnoa yuhduariquiro ijire. Sa ye tiqiurore wacũ tutuayequina bucueeta, ni ojoahye.

⁷ Tiquirore wacũ tutuayequina pehe quehnoa yuhduaro wahaeta. Sa yero ihyo ijiriquiro ijierare tiqiuro. Tiquirore wacũ tutuayequina pehe sijoro saha wahaeta. Tiquinare ohõ saha nine Cohãcjũ yere tiquina ojoari pũpũ.

Ahriquiro Cristo utã yero saha ijire.

Utãre wuhũ dahreyequina tiquina bese cohãno saha masa tiqiurore cohãeta. Tiquina sa yepegũta yojopure wuhũ dahreyequina wuhũre yeye, tiquina cũ muhtaria utãre tiquina cũno saha Cohãcjũ tiqiurore puhtoro cũri, ni, ojoahye.

⁸ Ahri gũhũre nine Cohãcjũ yere tiquina ojoari pũpũ:

Omariquiro utãre doque wahã saro tiqiuro esaboriurore ne eserare. Sata utã yero saha ijiriquirore Cristore cahmedana, tiqiurore yuhduaducana, Cohãcjũ cahapũ esasi mari, ni ojoahye panopũ.

Tiquina Cohãcjũ ye buheyere yuhtierare. Sa yeye panopũ tiqiuro ni ojoariro sahata Cristore cahmedare. Cohãcjũ panopũ “Sa waharota”, tiqiuro nidiro sahata Cristore cahmedare tiquina. Sa yea-tiquinare cũahye Cohãcjũ tiquinare.

Ohõ saha ijire Cohãcjũ yequina

⁹ Musa pehe Cohãcjũ beserina ijire. Tiquiro mari puhtoro tiqiuro yequina pahia, tiqiuro yere ye basana ijire musa. Sa yena tiqiuro ya curua cjãna ñañe mariedana, Cohãcjũ yequinata ijire musa. Sata ijire musa. Cohãcjũ

tiquiro quehnoa yuhduayere tiquiro yerire apequinare yahuatina ijire musa. Musare beseahye tiquiro musare ñañene ye dutieraro. Sa besero quehnoañe pehere yeanajare cūri musare. ¹⁰ Panopure duhseatina ijierari jiri musa. Yojoṗu pūritare Cohācjū yequina ijire musa. Panopure musare paja ihñariquiro musare mariedahye. Yojoṗu pūritare musare Cohācjū paja ihñari.

Cohācjū yere yena ijiya musa

¹¹ Yuhū cahīna, ahri yehpapu iji do-joatina ijierare musa. Cohācjū yequina ijire musa. Musa sa ijina ijjū ahrire tutuaro yahuaja musare: Musa ñañe tutuaro cahmeñene yeracāhña. Ti ñañene tutuaro cahmena, ñana wahana niaga musa. ¹² Cohācjūre cahmeeñequina watoa ijina quehnoano yena ijiya musa, musare “Yahusāri”, nina. Musa sa yegū tiquina yojoṗure musare ñano yahusā duepeta, musa quehnoano yeyere masieta tiquina. Sa masiñe, tiquina Cohācjūre “Quehnoagu, tutuagu ijire”, nieta. Sata nieta Cristo ahri yehpapu tiquiro tojoa tagū.

¹³ Mari puhtoro yuhti duana ahri yehpa cĵēna puhto gūhure yuhtiya musa. Roma cĵēnore musa ijipihtina puhtoro tiquiro gūhure yuhtiya. ¹⁴ Puhtoare yuhduayequinare buhiri dahre dutiro, ohori puhtoro tiquirore yedohoyequinare. Sa yero quehnoano yeyequinare “Quehnoano yeri musa”, ni dutiro ohori tiquiro tiquinare. Tiquiro sa ohogū, tiquinare yuhtiya musa. ¹⁵ Musa quehnoano yegū ihñañe tuho masieñequina tiquina esa tuhoro musare quitu dahre duepeta quitu dahre masiedare. Musa sa yegū cahmene Cohācjū. Sa yena musa puhtoare yuhtiya.

¹⁶ Cohācjū musa puhtoro ijire. Apequina cahacjana ijierare musa. Sa ijepe-

nata “Usāre dutiriquiro mariedare. Sa yena ñañene yenatja”, ni tuhotur-acāhña, “Ñañene yeri”, nina. Cohācjū cahacjana ijire musa. Sa yena tiquirore quehnoano yuhtina ijiya musa. ¹⁷ Ijipihitiyequina masare ño peoya. Mari acaye Jesu yequinare cahña. Cohācjūre ño peoye mehna ihñaña. Ahri yehpa cĵēna puhtoro gūhure ño peoya.

Cristo ñano yuhduro tiquiro ihcāno saharo sahata ihcāno sahaya musa gūhu

¹⁸ Cahacjana, musa cua pesaro mehna musa puhtoare yuhtiya. Quehnoañequina, musare quehnoano yeyequina dihitare yuhtina ijieracāhña. Musa mehna usuayequina gūhure yuhtiya musa. ¹⁹ Musa ñano yerapegūta musare tiquina buhiri dahregū “Cohācjū cahmeno sahata ye duaja”, musa ni tuhutugū tire musa ihcāno sahaḡū “Quehnoano yeri musa”, ninota Cohācjū musare. ²⁰ Musa ñano yeri buhiri tiquina musare buhiri dahregū tire musa ihcāno sahaḡū ti duhseati ijierare. Sa yena musa quehnoano musa yeri buhirire tiquina buhiri dahregū tire musa quehnoano mehna ihcāno sahaḡū Cohācjū “Quehnoano yeri musa”, ninota musare.

²¹ Sa ñano yuhduanajare musare tiquiro yequina iji dutiri jiri Cohācjū. Cristo musa ye ijiatire ñano yuhduri tiquirore musa ihña cūatire. ²² Tiquiro ne ñano yerari. Sa yero ne ni mehoedari. ²³ Tiquirore tiquina tuhtigū, tiquiro pehe tiquinare tuhti cahmedari. Tiquirore tiquina ñano yepegūta “Quēitja musare”, ne niedari. Tiquina sa yepegūta tiquinare Cohācjū tiquiro buhiri dahreatire potota tiquiro yeatire masino, “Yuhū Pacuṗu tiquinare buhiri dahrerota”, ni tuhutori. ²⁴ Tiquiro basi curusapu mari ñañe buhirire yariari. Sa waha yariari pari turi mari ñañene

yeratire, Cohācjū cahmeñe pehere mari yeatire. Tiquiro ñano camí tire, marine pecapū wahaborinare yūhdūoro taro. ²⁵Oveja wisiaye tiquina butiriro sahata mari gūhū pecapū butiatina ijimi. Yojoḡū pehere Cristore, ovejare ihña ihboriquiro yero saha ijiriquirore, marine ihña ihboriquirore wacū tutuaja mari. Sa wacū tutuana, tiquiro yequina wahau mari.

Omoca dūhteriquinare ohō saha yero cahmene tiquinare

3 Sa yegu cahacjēnare yūhū dutiriro sahata mūsa namosānumiare dūtitiija. Mūsa manusūmūare yūhdūducaeracāhña tiquina Cohācjū buheyere tiquina cahmeatire. Ihquēquina tiquina Cohācjū buheyere cahmeeñequina ijiye, tiquinare mūsa yūhdūducaeragū ihñañe Cohācjū ye buheyere cahmeboaga tiquina. Ti buheyere mūsa yahuerapegūta tiquiro yere cahmeboaga tiquina. ²Sata cahmeboaga tiquinare mūsa quehnoano yeyere, mūsa ño peoye gūhūre ihñañe. ³Mūsa numia, cariboyequina numia yero saha yeracāhña. Sa yena mūsa poarire wūhapo sepahtana numia, uru darire busana numia, wapa bujūye suhtire sañana numia ijieracāhña, ūmūa mū sare “Ūe pjegū yeari”, nina. Mūsa pagūrire masa tiquina ūe pjegū yeracāhña. ⁴Sa yena mūsa cua pesaro mehna apequinare tutuaro cahñe mehna yena, cua pesaro mehna yahuna, ti pehere ihña bucuegū yeya. Ti pehere mūsa yegū ihyo waro ijierare, Cohācjū ihñagū. ⁵Sata yee tiahye panopū cjēna numia Cohācjū yequina numia. Tiquina numia Cohācjūre wacū tutuaye numia ijiye, tiquina manusūmūare yūhdūducaera tiahye. ⁶Sata Sara ticoro manūno Abrahāre quehnoano mehna yūhtie tiahye. Sa yero tiquirore “Pūhto”, ni pisuahye. Sa yena mūsa

quehnoano yena numia ijina, cuero marieno ijina numia ijina, Sara yero saha ijire mūsa gūhū.

⁷Sata mūsa ūmūa gūhū mūsa namosānumiare quehnoano yeya. Tiquina numia mari ūmūa yero saha tutuayequina numia ijierare. Sa yena ño peoye mehna quehnoano yeya tiquina numiare. Cohācjū ijipihtiye decori tiquiro mehna mari ijiatire tiquiro ohoriro sahata tiquina numia gūhūre ohorota tiquiro. Tiquina sa ijiyequina ijigū tiquina numiare quehnoano yeya. Cohācjūre mūsa siniñene mūsa dojomehnedatire tiquina numiare quehnoano yeya.

Quehnoano tiquina yepegūta apequina tiquinare ñano yeyere yahuahye Pedro

⁸Ahri mehna mū sare yahu bato tiitja: Mūsa ijipihina ihcāno saha quehnoano mehna ijiya. Sa yena mūsa mehna cjēnare quehnoano paja ihñaña. Mūsa acaye Jesu yequinare pūa peheri cahme cahña. Sa yena quehnoano yeya tiquinare. Sa ye “Ihyo ijina ijiaja”, ni tuhotuya. ⁹Apequina mū sare tiquina ñano yegū tiquinare ñano ye cahmedacāhña. Mū sare tiquina tuhtigū tiquinare tuhti cahmedacāhña. Mū sare tiquina sa yepegūta quehnoano yeya tiquinare. Sa yena “Quehnoano ijiya”, niña tiquinare. Tire yeatinare tiquiro yequinare cūri mū sare Cohācjū pehe mū sare quehnoano yero taro.

¹⁰Sata nine Cohācjū yere tiquina ojoari pūpū:

Mūsa quehnoano bucueye mehna iji duana ne ñano ni yahuducueracāhña. ¹¹Ñañe yeyere duhu cāhña. Quehnoañe pehere yeya. Cahme mūsa basi ihña tuhtiro marieno ijiya. Tire tutuaro yeya. ¹²Quehnoañequinare mari pūhtoro sa ihña ihboducuro nine. Sa yero

tiqirore tiquina siniñene sa tuhoducuro nine. Ñano yeyequina pehere tiqiro ihña tuhtire, ni ojoahye.

¹³Quehnoañene musa tutuaro ye duagū apequina pehe musare ñano yuhdugū ye duaye, ye masi tiquina. ¹⁴Quehnoano musa yepegāta musare tiquina ñano yuhdugū yegū ihñano Cohācjū musare quehnoano yerota. Tiquiro sa yegū musare ñano ye duayequinare cueracāhña. Sa yena bujua witieracāhña. ¹⁵Musa Cristore “Usā puhtoro ijire”, ni tuhotuna, ño peoya tiqirore. Sa yena Cristore musa wacū tutuayere, Cohācjū mehna musa ijiatire apequina sinituboaga. Tiquina sa sinituato pano tiquinare musa yuhtiatire quehnoano masiyuya. Sa yuhtina cahño mehna, quehnoano ño peoye mehna yahuya tiquinare. ¹⁶Quehnoana ijiya. Sa yena “Ñañene yeaja”, ni tuhotusi musa. Sa ye Cristo yere quehnoano yena musa ijigū apequina musare ñano quti yeye, buoro wahaeta tiquina. ¹⁷Ñañene musa yeri buhiri musa ñano yuhdugū quehnoaedare. Sa yero Cohācjū cahmegū quehnoañene musa yeri buhiri musa ñano yuhdugū quehnoañene ti pūrita.

¹⁸Sata ñano yuhduri Cristo. Ihcā tahata ijipilhtiequina tiquina ñañe buhirire yariari tiqiro. Quehnoariquiro ijiri. Sa yero mari ñañe buhiri ñano yuhduri tiqiro. Ñano yuhduri tiqiro marine Cohācjū yequina wahagū yero taro. Tiquiro pagu yariaa wahari. Yariari bato tiqiro masari jiri. ¹⁹Sa masariquiro ijiro tiquina buhiri dahreatire cohteyequina muna yariariquina muna jeripohnarine buheahye tiqiro. ²⁰Sa cohteyequina panopu Cohācjūre yuhtierariquina muna ijahye. Ti pjepure Noé tiqiro ijiri pjepure, pajiria yucusare dohoroni ahye. Tiare tiqiro dohori watoa

Cohācjūre yuhtierariquina munare tiquina yuhtigū cahmeno, tiquina yuhtiatire yoari pje cohtemahye Cohācjū. Sa ye meheñequinagā ocho masa dia minidi pjere yuhduahye. ²¹Minigū tiquina yuhduriro saha wame yeye mehna yuhdure masa. Mari pagure mari wete tu cosero saha ijierare wame yeye. Sijoro saha ijire wame yeye. Ñañe mariena mari ijiatire Cohācjūre mari siniñe ijire ahri wame yeye. Sa yena Jesucristo tiqiro masa mujari mehna yuhduaja mari. ²²Tiquiro Jesucristo uhmusepu wahahye poto pehepu dujiro taro, Cohācjū mehna dutiro taro. Sa yero tiqiro angele bui, uhmuse cjēna puhto bui, dutiequina bui tiquina puhtoro ijire.

Cristo yequina ijina quehnoañe pehere comesarina ijinata

4 Mari ñano yuhduna ñañe yeyere duhu cjā mari. Sa yena Cristo ñano yuhduriro tiqiro cuerariro sahata tiqiro usuerariro sahata musa gūhu tiqiro yero sahata yeya. ²Sa yeya musa ñañene musa ue pjerire musa duhuro quehnoano, Cohācjū cahmeñe pehere musa yero quehnoano.

³Panopu Cohācjūre cahmeñequina ñañene tiquina ue pjerire tiquina yeriro sahata yeducumahye musa gūhu. Bue tiro marieno ñano yena, ñañene tutuaro musa ue pjerire yena, quehena, queheye bose decorire yena, “Cohācjū ijire”, musa niñe queoyere ño peona ti pehere yee timahye musa. Ti queoyere ihña yabire Cohācjū. Sa yena to punota ye bato tiya. ⁴Sa ye ti ña yuhduayere yeyequina mehna musa ijigū yojopure musa tire yeragū ihñañe tiquina pehe ihña maria wahari. Sa ye tiquina musare quti dojomehnedi. ⁵Tiquina sa yegū ihñano tiquina ñañe yerire Cohācjū pehe sinituro, yahu yuhdu dutirota tiquinare. Tiquiro

catiyequinare, yariariquina gūhure beseatiqiro buhiri dahreatiqiro ijire.

⁶Tiqiro sa beseatiqiro ijigū Jesu yequina pehe yojopure yariariquina munare quehnoañe buheyere yahuri tiquina yariato pano. Sa ni yahuri tiquina pagurire Cohācjū tiqiro varia dutiepegūta. Sa yahuri tiquinare Cohācjū ijipihtiye decori tiqiro ijiro saha tiqiro mehna tiquina ijiducuatire.

⁷Pihtiati deco mehenogā dūhsare. Sa yena quehnoano wacū masina ijiya, yojopure Cohācjū mehna mūsa quehnoano yahuducuatire.

⁸Apequinare cahīna, peye tahari tiquina ñañene tiquina yepegūta sa ihña cǵa mari. Sa yena mūsa mehna cǵenare sa cahīducuya. Apeye dutiye yūhdūoro ahrireta yeya.

⁹Mūsa mehna cǵenare unureno marieno mūsa ye wūhūsepu sajā ta dutiya. ¹⁰Cohācjū mū sare ijipitinare mūsa yeatire cūri. Tiqiro sa cūgū, mūsa ye masino sahata mūsa mehna cǵenare tire quehnoano yeya. Cohācjū mūsapē cūri mūsa yeatire. Tiqiro cūriro sahata apequinare quehnoano yedohona, Cohācjū cūriro saha quehnoano yena niaga mūsa.

¹¹Mūsa quehnoano yahuna, Cohācjū tiqiro yahuboriro saha quehnoano yahuya mūsa gūhū. Masare yedohona Cohācjū tiqiro cūri tutuaye mehna apequinare yedohoya. Ti ijipihiyere yena Cohācjūre masa tiquina ño peoatire sa yeducuya. Jesucristo pehe tire mūsa yegū yedohorota. Tiqirore ijipihiyē decori ño peo, “Tutuagu ijire”, nino cahmene ijipihiyequinare. Sata niahdo.

**Jesu yequina tiquina ijiri
buhiri tiquina ñano
yūhdūyere yahuahye Pedro**

¹²Yūhū cahīna, yojopure ña yūhdūoro yūhdūna, “Yohou, sijoro saha ijiro wahaga yūhure”, ni, wacūedacāhña.

¹³Cristo tiqiro ñano yūhdūriro saha mūsa gūhū tiqiro yero saha sa wahanā, bucueya mūsa. Sa bucuenta Cristo asi siteye mehna tiqiro tojoa tagū mūsa quehnoano bucuenata. ¹⁴Cristo yequina mūsa ijiri buhiri apequina musare tiquina tuhtigū Cohācjū yaqiro Espiritu Santo asi siteriqiro mūsa mehna ijiro nine. Sa yena bucueya mūsa. ¹⁵Sa yena masare wejēdacāhña mūsa. Apee borore yaqueracāhña. Ñano yeracāhña. Sa yena apequina tiquina yerire ihñana tiquinare sijoro saha ni dojomehnedacāhña. Ti buhiri mūsa ñano yūhdūgū ñarīne. ¹⁶Sa yena Cristo yequina mūsa ijiri buhiri ñano yūhdūna, bue tieracāhña. Ñano yūhdūepenata Cristo yequina mūsa ijiye mehna bucuenta, Cohācjūre “Quehnoare”, ni, ño peoya mūsa.

¹⁷Cohācjū tiqiro yequina yerire ihñano tiqiro beseati pje ijiro nine yojopure. Ijipitina mari tiqiro yequina mari yerire ihñano bese muhtanota, “Ahri ñañe ijire. Ahri quehnoañe ijire”, nino. ¿Sa bese muhtano dūhse yerotari tiqiro yequina ijieyequina pehere? Tiqirore yūhtieyequina pehere tutuaro buhiri dahrerota. ¹⁸Sa ye quehnoañequina yūhdūeta. Tiquina sa yūhdūati mijo cǵure. Ti sa mijo cǵūgū Cohācjūre cahmeeñequina, ñañequina pehe ne yūhdūsi. Basioerare tiquinare. ¹⁹Sa yena Cohācjū cahmegū mūsa ñano yūhdūna, quehnoañene mūsa yerire duhueracāhña. Sa yena mū sare bajumehnediqirore, mū sare ne duhueriqirore tiqirore wacū tutuaya mūsa.

**Jesu yequina tiquina
yeatire yahuahye Pedro**

5 Yojopure Jesu yequina puhtoare yahutja. Yūhū Jesu yequina puhto ijiaya. Mūsa gūhū tiquina puhtoata

ijire. Musare yuhū yero saha puhtoā ijinare ahrire yahugū tagū niāja yuhū. Cristo tiquiro ñano yuhdugū ihñarigu ijigū, uhmusepu Cristo mehna yuhduacju ijigū ahrire musare yahutja: ²Cohācjū yequina oveja yero saha ijire. Mūsa pehe ovejare ihña ihboyequina yero saha ijire. Tiquinare Cohācjū musare tiquiro cūriquinare tiquiro yequinare quehnoano ihña ihboya. Sa yena Cohācjū tiquiro cahmediro sahata quehnoano jeripohna tiye mehna tiquinare ihña ihboya. Sa yena tiquinare ihña ihbona, “Ūsā ihña ihbori wapa niñerure wapatanata”, niedacāhña mūsa. Cohācjū cahmeno sahata yeducuna ijiya. ³Sa ihña ihbona tiquinare ñano dutiperacāhña. Sa yena quehnoano yeya mūsa Jesu yequina musare tiquina ihña cūatore. ⁴Mūsa sa yena Cristo ijipitinare marine ihña ihboriquiro tojoa tagū tiquiro musare quehnoañene ohoatire mūsa yuhduatire cūonata. Ti mūsa cūoati ne piltisi.

⁵Tiquinare yuhū dutiro sahata mūsa wahma pjia gūhū mūsa puhtoare yahtiya. Sa yena mūsa mehna cjēnare ijipititiquinare ño peoya.

“Masi yuhduducaja”, niñequina pehere Cohācjū ihña tuhtire. Apequinare ño peoyequina pehere “Ihyo ijina ijiaja”, ni tuhotuyequina pehere quehnoano yere tiquiro.

⁶Sa yena Cohācjū tutuariquiro musare tiquiro dutigū tiquirore ño peoya. Mūsa sa yegū tiquiro queori pje ijigū musare apequina ño peoeta tiquiro dutiro mehna. ⁷Tiquiro musare pajiro tuhotu ihña ihbore. Sa yena tiquirore wacū tutuana, ne pajiro tuhotueracāhña mūsa pehe.

⁸Sa yena wacū masi ijiya. Musare ihña tuhtiriquiro watīno yairo

usuariquiro tiquiro maca ihya duaro saha musare ñano yuhdugū ye duare. Sa yero musare ñano ye dutire. ⁹Ijipitiropu ahri yehpapure apequina Jesu yequinare ñano yuhdugū yere watīno. Tire masina, tiquirore yuhtieracāhña. Sa yena Cristore tutuaro wacū tutuaya mūsa. ¹⁰Sa yena mehenogā mūsa ñano yuhduri bato Cohācjū musare yedohorota. Musare quehnoana ijigū yerota. Sa yero tiquirore mūsa wacū tutua nemogū, tiquirore mūsa ne duhueragū yerota musare. Tiquiro ijipitititiquinare uhmusepu Cristo mehna mūsa ijiatire musare cūriquiro ijire. Tiquiro Cohācjū ijire ijipititiquinare paja ihñariquiro. ¹¹“Ijipititiquinare decori tiquiro tutuariquiro ijire”, ni ño peuhna tiquirore. Sata yeihna.

Quehnoa duti bato tiahye Pedro

¹²Ahri pū meheni pūgāre musare yuhū oho duagū Silvano pehe yuhure ojoa basari. Tiquiro Jesu yaquiro yuhū acayuro Jesure duhueriquiro ijire, yuhū tuhotugū. Musare quehnoano yahu duaja. Sa yegū “Ahri buheye potota Cohācjū marine tiquiro cahñene yahuri buheye ijire”, ni yahugū musare ahri pūre ojoaja. Sa yena ahri buheyere ne duhueracāhña mūsa.

¹³Musare tiquiro yequina ijiatinare tiquiro beseriro sahata Jesu yequina Babilonia cjēna gūhure beseahye Cohācjū. Tiquina pehe musare quehnoa dutire. Marco gūhū yuhū macu yero saha ijiriquiro musare quehnoa dutire. ¹⁴Mūsa mehna cjēnare quehnoano mehna piti caya.

Ijipitina Jesucristo yequinare quehnoa dutiaja musare.

2 San Pedro

Jesu yequinare ojoa ohoahye Pedro

1 Yuhũ Simo Pedro, Jesucristo buhe duti tiquiro cürigũ ijiája. Sa yegũ tiquiro cahacjũta ijiája. Sa yegũ musare ojoa ohoaja yuhũ. Cohãcjũ marine yuhduoriquiro Jesucristo pehe ñañe marieniquiro ijire. Sa yero tiquirore musa wacũ tutuagũ, tiquiro yequina wahagũ yeri jiri musare. Sa wahana musa gũhu usã yero saha tiquiro yequina ijire. Mari ihcãno saha tiquiro yequina ijiája. Sa yegũ musare ojoa ohoaja. ²Sa yena Cohãcjũ gũhure, mari pũhtoro Jesu gũhure masi nemona tiquina cahĩne mehna quehnoano ijiducunata musa. Sa quehnoano musa ijiatire musare sini basaja. Sa yegũ musare quehnoa dutiaja.

Ohõ saha ijire Cristo yequina

³⁻⁴Tiquiro yequina ijiatinare Cristo marine pijiri. Tiquiro sa pijigũ tuhona, tiquirore yuhtii mari. Sa yuhtina Cohãcjũre masi nemona, tiquiro tutuaye mehna tiquiro cahmeno sahata quehnoana ijinata mari. Tiquiro ijire tiquiro yequina ijiatinare marine pijiriquiro. Quehnoariquiro, masi pehoriquiro tiquiro ijiro sahata ijiatinare marine pijiriquiro ijire. Sata tiquiro tutuaye mehna marine quehnoa yuhduaro yeri. “Ohõ sahata musare quehnoano yeitja”, tiquiro nidiro sahata marine quehnoa yuhduaro yeri. Marine tiquiro sa yegũ ahri yehpa cjẽ ñañene, ñañene mari Ʃe pjeje pehere mari duhu cjã. Ti ñañe pehe marine ñano wahagũ yemedi. Sa yena tiquirore yuhtina, Cohãcjũ ijiro saha ijinata mari. ⁵Sa yena Cristore wacũ tutuana iji tuhasare musa. Sa yena ohõ saha ye nemoña tja: Quehnoana ijiya musa. Quehnoano wacũ masina ijiya musa. ⁶Ñano ye

duepenata Cohãcjũ cahmeñe pehere yeducuya musa. Sa yena Cristo yequina musa ijiri buhiri ñano yuhduepenata sa ihcãno sahaducuya musa. Sa yena Cohãcjũre ño peona, tiquiro cahmeñene yeya musa. ⁷Sa yena musa mehna cjẽnare cahme cahĩna, tiquinare quehnoano yedohoya musa. Sa yena ijipihtiyequina apequina gũhure cahĩña musa.

⁸Musa sa ye nemogũta quehnoa yuhduare. Musa sa ye nemona, quehnoañene yena ijiducunata. Sa yena Cristo tiquiro cahmeñene quehnoano yeducuna ijinata musa. Ihyo ijina ijisi musa. Sa ye Cristore musa wacũ tutuari ihyo warota ijisi. Yuhũ nidiro sahata musa ye nemogũ quehnoa yuhduare. ⁹Musa sa ye nemoedana Cohãcjũ yere ne masiedabutiare musa. Sa ye nemoedana Cristo musa ñano yerire tiquiro cohãrire ne wacũedare musa. Sata bo cã duare musa. ¹⁰Sa yena, yuhũ acaye, Cohãcjũ yequina ijiatinare musare tiquiro iji dutigũ yuhtiri musa. Sa yuhtirina ijina, tiquiro yere wacũducu duana, tiquiro cahmeñene tutuaro sa yeducuya. Musa sa yena potota Cohãcjũ mehna ijinata musa. Sa yena potota tiquiro beserina ijinata musa. Sa yena ñañene yeducusi musa. ¹¹Musa sa tiquiro cahmeno saha yerina ijina mari pũhtoro marine yuhduoriquiro Jesucristo tiquiro ijiropũ quehnoano wahanata musa. Potota tiquiro yequina waro musa ijigũ ihñano “Quehnoano mehna yuhũ mehna ijiya musa”, ninota Jesu musare.

¹²Sa yegũ ahrire musare sa wacũgũ yeducuutja. Ahri musare yuhũ yahurire masi tuhasari musa. Sa masina Cohãcjũ yere musa tuhoriro sahata quehnoano yena nine musa. Sa yerina musa ijiepegũta ahri musare yuhũ yahurire sa wacũgũ yeducuutja musare. ¹³⁻¹⁴Mehenogã duhsare yuhũ yariato.

Tire quehnoano yahuri mari puhtoro Jesucristo yuhure. Sa yegū catinigu waro ahri yuhu yahurire musare sa wacūgū yeducuutja. Yuhu sa yegū quehnoarine. ¹⁵ Sa yegū ahri yuhu yahu ojoarire musare ojoa cū pehogutja, yuhu yariari bato musa quehnoano masiatire. Sa yena ahri yuhu yahurire sa wacūducunata musa.

**Cristo tutuariquiro tiquiro ijiye
tiyere ihñahye Pedro gūhu**

¹⁶ Sa yena Cristo tiquiro tutuaye gūhure tiquiro ahtati gūhure musare yahuna, usā esa tuharo yahuna niedaja. Tutuariquiro tiquiro ijiyere usā basita ihñau. ¹⁷ Cristo tutua yuhduariquiro tiquiro ijiyere usāre ihñori Cohācjū mari Pacu. Tiquiro sa ihñogū tiquiro pehe quehnoano asi siteriquiro ijiri. Tiquiro sa asi sitegū ohō saha nino ca tari ti asi siteropu: “Ahriquiro yuhu macu, yuhu cahīniquiro ijire. Tiquiro mehna quehnoano bucueaja”, nino ca tari usā tuhogū. ¹⁸ Uhmusepu tiquiro sa nigū tūhou usā. Cūnu buipu Cohācjū tiquiro ijiri cūnupu Cristo mehna ijii usā.

¹⁹ Tire ihñarina ijina, Cohācjū yere yahu muhtariquina panopu cjēna tiquina ojoari potota ijigū quehnoano masiaja usā. Tiquina ojoarire quehnoano buheducuna quehnoano yena nine musa. Ti tiquina ojoari Cohācjū yere marine quehnoano masigū yere. Ahri yehpapu ñano tiquina yeri yehpapu mari ijigū quehnoano masigū yere marine. Sa yena Cohācjū yere tiquina ojoarire sa buheducuya. Sa buheducuna Cristo tiquiro tojoa tagūpu buhe duhunata. Sa tojoa taro tiquiro yere mari masiedarire marine quehnoano masi pehogū yerota. ²⁰ Ijipihtiyē ti yuhu yahuri yuhduoro ahri pehere quehnoano masiña musa: Cohācjū yere panopu tiquina ojoarire buhena mari esa tuharo tire buhena,

“Ohō saha nino niaga”, ni masiedaja mari. Espiritu Santo yedohoro mehna masiaja mari. ²¹ Ne masa tiquina esa tuharo Cohācjū yere ojoerahye. Panopu cjēna Cohācjū yere tiquina ojoagū Espiritu Santo pehe tiquina ojoatire tiquinare masigū yeahye.

**“Cohācjū ye buheye ijire”, ni meho
buheyequinare yahuahye Pedro**

(Jud 1.4-12)

2 Panopu mari acaye judio masa mehna cjēna “Cohācjū yere yahu muhtarina ijiaja”, ni mehoñequina ijiē tiahye. Tiquina yero sahata yojopu gūhure musa mehna cjēna sa ni mehoñequina ijietta. Potota tiquina buheboro sahata ni mehoñe pehere buheeta. Sa buheye Cristo ye buheye pehere dojomehneeta. Sa ye “Cristo yuhduonohrina ijiaja”, niepeta Cristo dutiyere ne yuhtierare tiquina. Sa ye tiquirore “Usā puhtoro ijire”, ni tuhotuerare. Ti ijipihtiyere tiquina sa yeri buhiri duita tiquinare Cohācjū pecapu waha dutirota. ² Sa ni meho tiquina buhegū tuhoye tiquina ñañene tutuaro cahmediro sahata peyequina masa tiquinare ihña cū ñano yeeta. Tiquina sa ñano yegū ihñañe apequina masa gūhu quehnoañe buheyere ñano quitī dahreeta. ³ Sa ye tiquina ni mehoñequina niñerure wapa cahmeñe, ni mehoñe buheyere buheeta musare. Tiquina sa buheri buhiri Cohācjū tiquinare pecapu waha dutirota. Panopure sa yeyequinare buhiri dahre duti tuhasahye tiquiro.

⁴ Sata panopu buhiri dahre dutiahye ñañequina angele gūhure. Tiquinare pecapu peresu yeahye. Sa yero pihtiri deco bato tiquinare buhiri dahrerota. ⁵ Sata panopu cjēnare Cohācjūre cahmeeñequinare buhiri dahreahye. Sa yero ijipihtiro ahri yehpare miono, ijipihtiyequina ñañequina masare

mio wejēahye. Sa yero Noéne tiqiro mehna cjēna gūhure yūhdūoahye. Tiquina ijipihiteyiquina tiqiro yūhdūoriquina ocho masa ijiahye. Noé pehe quehnoañene ye dutiro ti pje cjēnare buhee timahye. ⁶Sata Sodoma wame tiri maca cjēnare, Gomorra wame tiri maca cjēna gūhure Cohācjū buhiri dahreahye. Ti macarine peca mehna quehnoano ūjūa peho cāhye. Sa yero camepū ijatiquinare tiqirore cahmedatiquinare ihñono niahye. Ñañequinare tiqiro buhiri dahreatire ihñono niahye tiquinare. ⁷Sa yero Lote wame tiriqirore yūhdūoahye. Lote pehe quehnoariqiro ijiahye. Sa quehnoariqiro ijiro Sodoma cjēna Cohācjū dutiyere yūhdūducayeiquina ña yūhdūaro tiquina yegū ihñano caributia wahahye tiqiro Lote. Sa yero ūmūa tiquina basi tiquina pagūri mehna tiquina ñano yegū ihñano caributia wahahye tiqiro. ⁸Tiqiro quehnoariqiro ñañequina watoa ijiahye. Sa yero decoripe ña yūhdūaro tiquina yegū ihñano, ñano tiquina yahuducugū tūhoro ñano jeripohna tiahye. ⁹Tiqirore Cohācjū yūhdūogū ihñana ahri yūhū yahuatire masiaja mari. Cohācjū mari pūhtoro tiqirore cahmeñequinare tiquina ñano yūhdūgū ihñano tiquinare yūhdūorota. Sa yero ñañequina pehere peresu yero, tiquinare cūore pihitiri deco ijigū tiqiro buhiri dahreatiquinare.

¹⁰Ñañene tutuaro ūe pjeyeiquina Cohācjūre yūhdūducayeiquina tiquina pūritare ñano buhiri dahrerota tiqiro. Tiquina mūsa mehna cjēna ni meho buheyeiquina ñañene yeye, ne cuerare. Sa ye bue tierare tiquina. “Apequinare masi yūhdūducaja”, ni tūhotuyequina ijire tiquina. Sa ijieyeiquina ijieye ūhmūse cjēna tutuayequinare ne ño peera, ñano ni būjūpere tiquinare. ¹¹Angele pehe ne tiquina yero saha yerare.

Tiquina pehe ni meho buheyeiquina yūhdūoro tutuayeiquina ijire. Sa ijiepetā tiquina ne būjūpeye mehna ni meho buheyequinare ñano yahūsāedare Cohācjūre, yūhdūducayeiquina ijieye.

¹²Sa ye ahriquina ni meho buheyeiquina pehe nūcu cjēna wahiquina yero saha tūho masieñequina ijire. Nūcūpū boca sa tiquina wejēatiquina yero saha ijire tiquina. Tiquina basi cahmeno saha yere tiquina. Sa ye tiquina masieñequinare būjūpe, ñano ni yahuducu cohtere. Sa yeyeiquina ijigū wahiquinare mari wejēdro saha Cohācjū tiquinare pecapū cohānota. ¹³Sa yero tiquina ñano yeri buhiri buhiri dahrerota Cohācjū. Tiquina ñañene tutuaro cahmene. Sa ye ñano yeducure. Mūsa mehna bōse deco yeye, ti bōse deco ijigū tiquina ñañene ye yūhdūare. Sa yeye mūsa bōse deco tiquina wete ohōno saha tiquina ñañene pihore mū sare.

¹⁴Sa ye numiare ihñañe, ñehe duare tiquina. Sa ye ñañene sa yeducu duare. Cohācjūre wacū tutuera cjūñequinare ñañene ye dutiye, sa ijieyequinare tiquinare ihñā cūgū yere. Sa ijieye tiquina sehsaro apee borore, niñeru gūhure ni meho ehma mihniñequina ijire. Tiquina Cohācjū tiqiro buhiri dahreatiquina ijire. ¹⁵Tiquina Cohācjū yere buheraye, sijoro saha ijieye buheye pehere buhere. Sa ye Balāa yero saha yeye nine. Balāa, Beor macūno ijiahye. Tiqiro pehe panopū tiqiro ñañe yeri mehna niñerure wapata duamahye. ¹⁶Tiqiro sa yegū ihñano tiqiro yacoro burro tuhtiahye ticoro upūrore. Tiqiro yacoro burro yahuducuericoro ijiepegūta Cohācjū ticoro upūrore tuhti dutiahye ticorore. Ticoro sa tuhtigū tūhoro Balāa tutuaro tiqiro ñañene ye duamedire duhu cāhye.

¹⁷Ahriquina ni mehoñequina mári pohteripū aco marieno yero saha ijire. Aco marieñe pohteri ti dūhseati

ijieraro saha tiquina ni mehoñequina ne dūhseati ijierare. Sa ye ehmeo cururi wihnono ti wēdoqueoye cururi ti sa comesaducuro sahata, tiquina ni mehoñequina gūhū ihcāno saha yahuducuera, sa comesaducure. Sa yero nahitiano warore quehno tuhasahye Cohācjū topū tiquinare buhiri dahrero taro. ¹⁸Tiquina ni mehoñequina tiquina yahuducuye dūhseati ijierare. Masiñequina yero saha masare sa buhe maca cāhre. Ohō saha ni buhere tiquina: “Mari cahmeno sahata mari yegū quehnoarīne”, ni buhemene tiquina. Tiquina sa ni buhegū masa tūhoye ñañene űe pjeje, tiquina ye buheyere cahmene. Apequina masa Cohācjūre potota coā cahme dūcayequina mehenogāta wahare tiquina ñañene tiquina duhuri bato. Tiquinare ni mehoñequina buhegū tūhoye ñañene cahmene tja Cohācjū yequina ijiboriquina ijiepetā. ¹⁹Tiquinare ohō saha ni buhere ni mehoñequina: “Mari cahmeno sahata mari yegū quehnoarīne”, ni buhemene tiquina. Tiquina sa ni buhepegūta tiquina nidiro saha wahaerare tiquinare. Ñañene duhu dureraye, tire duhu masiedabutiare. Tiquina sa ñano yeye, “Queoro ijire űsā yeri”, ni tūhotumene tiquina. Sa ye tiquina ti ñañene ne duhu masiedare. Ti ñañe tiquina pūhtoro yero saha ijire.

²⁰Mari pūhtoro Jesucristore marine yūhdūoriqirore coā cahme dūcayequina pehe ahri yehpa cjē ñañene duhu cāmedi. Tiquina sa duhuri bato pari turi ñañene yeye, ña yūhdūaro tojoare tiquina. Cristore tiquina masiatio pano tiquina iji mūhtariro yūhdūoro ña yūhdūaro tojoare, pari turi ñañene yeye. ²¹Sa ña yūhdūaro tojoaye quehnoañe buheye pehere tiquina ne masi mūhtaedagū quehnoa yūhdūboya tiquinare. ²²Sa ye pari turi ñañene yeye, masape tiquina ni yahuducue

tiro saha yee nine tiquina. Ohō saha ni yahuducure masa: “Diero etoa tuhasa pari turi tiquiro etoa cūrire ihyare. Sa yero yesere tiquina coseri bato pari turi tiquiro ñari sahbapū cuhsare tja. Sata yere quehnoañene cahmemediquina gūhū pari turi ñañene cahmeñe tja”, ni yahuducue tire masa.

Cristo ahri yehpapū tiquiro tojoa tatire yahuahye Pedro

3 Yūhū cahīna, mūsare ihcā pū ojoa oho tuhasau. Sa yegū ahri pūre tja yojopure mūsare ojoa ohogu niāja. Sa yegū pua taha ojoagu ahri ijipihitiyere mūsare wacūgū ye duagu niāja quehnoañe dihitare mūsare tūhotu dutigu. ²Ahri yūhū yahuatire wacūña mūsa: Panopū cjēna quehnoañequina Cohācjū yere yahu mūhtariquina mūna tiquina yahu ojoarire wacūña. Sa yena mari pūhtoro marine yūhdūoriqiro Cristo tiquiro dutiye gūhūre wacūña. Ti dutiyere űsā tiquiro cūrina mūsare buhei.

³Sa yena ahrire wacū mūhtaña: Pihtiatī deco panogā Cohācjū yere būjūpeyequina ijietā. Tiquina ñañene tutuaro cahmeducuyequina ijiye, ti ñañene yeducueta. Ohō saha ni būjūpeeta: ⁴“Cristo ‘Tojoa tautja’, nieperota ne tojoa tasi. ¿Tojoa ta dueperota dūhsero ne bajuerajari tiquiro? Ahri yehpa iji dūcari bato mari ñecusumūa mūna iji turīayequina tiquina yariari bato ijipihtiro sijoro saha waharo marieno sa ijiducure. Mūnanota sa ijiducu cāre. Sa yero ahri yehpare ahtatiquiro űhmūsepūre mariedare”, ni būjūpeyequina ijietā. ⁵Sa ni būjūpeye ahri pehere ne wacū durerare tiquina: Panopūre Cohācjū tiquiro dutiro mehna ahri yehpare, űhmūse gūhūre bajumehneahye. Sa yero ahri yehpapū aco dihita ijirirore dihta ijigū yeahye tiquiro. Sa yero aco

mehna ahri yehpa yojopure ti ijiro sahata ahri yehpare yeahye tiqiro. ⁶Sa yero camepu ahri yehpare miono, cohã pehoahye ahri yehpa cjêne. Sa yero ahri yehpare ihcã tahata sijoro saha wahagũ ye tuhasahye Cohãcjũ. ⁷Sa sijoro saha wahagũ yeperota yojopure umusere, ahri yehpa gũhure pari turi comesagũ yerari tiqiro. Tiqiro dutiro mehna ahri yehpare, umuse gũhure yojopure ti ijiro sahata ijducu nemogũ yero nine. Sa yero cohtero nine came ijipihitropure ujuano taro. Sa cohtero nine Cohãcjũ tiqirore cahmeñequinare buhiri dahrero taro. Sa buhiri dahrero tiquinare pecapu cohãnota.

⁸Yũhũ cahĩna, ahrire wacũna musa: Mil cuhmarine “Yoa yũhũari pje ijire”, mari ni tuhotepegũta ihcã decota ijire, Cohãcjũ ihñagũ. ⁹“Cohãcjũ tiqiro ni diro saha umũñano yerabutiare”, nine masa. Sa ijierare. Masare quehnoano ye duaro cohtenino nine. Ne ihcãquiro masunore pecapu cohã duerare tiqiro. Sa yero ijipihitiyequina tiquina ñañene bujua witagũ, ñañene duhugũ cahmeno nine tiqiro.

¹⁰Ñamipure yaque bucuro tiqiro wacũeno mehna yaquero sajãriro saha Cristo ahri yehpare wacũeno mehna ahtarota. Tiqiro ahtagũta to tutuaro bisigũta umuse cjẽ pihitia wahaota. Uju pihitia wahaota. Sa yero ahri yehpa gũhũ, ahri yehpa cjẽ gũhũ uju pihitia wahaota.

¹¹“Ahri ijipihitiye pihitia wahaota”, Cohãcjũ nigũ tuhona ñañene duhuna, Cohãcjũ cahmeñene yero cahmene marine. ¹²Mari puhtoro ahri yehpare tiqiro ahtatire cohtena, sojaro mehna tiqiro ahtagũ yeya musa. Ti deco umuse cjẽ uju pihitia wahaota. ¹³Ti sa cuaro wahati ijiepegũta mari pehe Cohãcjũ ni cũriro sahata ijipihitiye tiqiro comesagũ yeatire cohteaja mari. Ijip-

ihtiye ti uju pihitari bato ohõ saha ijirota. Umusepu gũhũ ahri yehpare gũhũ wahma ijirota. Sa ye ti pjepure quehnoañe dihitare yeeta ijipihitiyequina. Tireta cohteaja mari.

¹⁴Sa yena yũhũ cahĩna, mari puhtoro tiqiro ahtatire cohtena, Cohãcjũ ihñonopũ quehnoano yena ijiya musa. Sa quehnoano yena ijiya musa Cohãcjũ musa mehna tiqiro bucueatire. ¹⁵Sa yena yoa cjũri pje tiqiro bajueragũ ihñana ahrire masiña musa. Masa tiqirore cahmeñequina tiqiro yũhũoatiquina duhsarĩne yojopũ. Sa yero tiquinare cohtenino nine Cohãcjũ. Sata ni musare oja ohoari jiri mari acayuro mari cahĩniqiro Pablo. Cohãcjũ masiñe mehna tire ojoari jiri tiqiro. ¹⁶Sa dihita ni ojoari jiri Pablo tiqiro ojoaripe. Cristo tiqiro ahtatire, ñañene yeeyequina mari ijiati gũhure yahuro ohõ saha dihita ni ojoari jiri tiqiro. Ihuẽ tahari mijo cjũñene tiqiro yahu ojoari jiri. Apequina ne masieñequina, tuho masieñequina ni mehoñe mehna tiqiro sa nidire camesa mujare. Sa ye tiqiro sa nidi ijiepegũta sijoro saha ni camesa yahure tiquina. Apeye Cohãcjũ yere tiquina ojoari pũri gũhure sata yeri tiquina. Tiquina sa yegũ ihñano Cohãcjũ tiquinare buhiri dahrero, pecapu cohãnota.

¹⁷Yũhũ acaye, yũhũ cahĩna ahri ijipihitiye ti sa wahato pano yahuu musare. Sa yena ahrire masina, quehnoano yeya musa. Ñañequina musare sijoro saha ni tiquina buhegũ tuhoeracãhña tiquinare, “Cristo yere duhuari”, nina. ¹⁸Sa yena mari puhtoro marine yũhũoriquirore Cristore quehnoano wacũ tutua nemoña musa. Tiquirore quehnoano masi nemoña musa. Yojopure, ijipihitiye decori tiqirore quehnoano ño peouhna mari. “Quehnoariqiro, tutuariqiro

ijire”, niihna mari tiquirore. Sata
niihna.

1 San Juan

Jesucristo catiyere ohoriquiro ijire

1 Jesu Cohācjū mari Pacu ye yahuducuyere yahuriquiro ijire. Duita coā waroputa ijiriquiro tiquiro mari Pacu mehna masare sa ijiducugū yeriquiro ijjahye. Yojoṗure usā tiquiro yere, tiquiro ijije tiyere yahu ojoana niaja. Tiquirore tuhona, tiquiro waroreta ihñau usā. Sata ijire. Tiquirore ihñana, usā omocari mehna tiquirore dahra tuhuu. ²Ahriquiro mari Pacu mehna sa ijiducugū yeriquiro ahri yehpapu tiquiro masa bajuari bato tiquirore usā ihñau. Sa yena tiquirore yahuaja usā musare. Ijipihtiyere decori mari Pacu mehna tiquiro ijiducuriquiro ijjgū, yojoṗure mari Pacu tiquirore ihñori usāre. Tire yahuaja usā musare. ³Mari Pacu mehna cjāna ijjaja usā. Tiquiro macuno mehna cjāna gūhu ijjaja usā. Sa yena musa gūhu usā mehna cjāna, mari Pacu mehna cjāna, tiquiro macuno mehna cjāna musa ijjatire usā ihñarire, usā tuhore musa gūhure usā yahuaja. ⁴Ahrireta usā ojoaja quehnoano mari bucueatire.

Buhrioro to wete marieno saha Cohācjūre ñañe ne mariedare

⁵Ahri buhaye Cohācjū macuno usāre tiquiro yahuri ijije nine. Yojoṗuta ahrire yahunatja usā musare: Cohācjū buhrioro yero saha ijire. Buhrioro to wete marieno saha tiquirore ne ñañe mariedare. Ñañe nahitiano yero saha ijire. Cohācjūre ne ñañe mariedare. Tiquiro sa ijije tiyere yahuaja musare. ⁶Sa yena nahitianopu ijina yero saha mari ñañene yena ijiepenata “Cohācjū mehna cjāna ijjaja”, nina, mari ni mehona niaja. Sa yena Cohācjū yere queoro yeraja. ⁷Sa yena buhrioropu

ijina yero saha Cohācjū tiquiro yeriro sahata mari quehnoañe pehere yena, apequina Jesu yequina mehna quehnoano ijina niaja. Mari sa yegū Cohācjū macuno Jesu tiquiro dii cohāno mehna, curusapu tiquiro yariari mehna ijipihtiyere mari ñañe yerire bore.

⁸“Yūhu pūrita ne ñañene yeraja”, ni wacūna, mari ni mehoñene tuhutuna niaja. Mari sa ni tuhutuna Cristo yere ne masiedaja. ⁹Sa yena Cohācjūre mari ñañene mari yahu yūhdugū tiquiro poto yeriquiro mari ñañene borota. Sa yero ijipihtiyere mari ñañe yeri gūhure, mari ñano tuhutuyere gūhure cose werota tiquiro. Tiquiro nidiro sahata yeriquiro ijire. ¹⁰“Ñañene yeraja”, nina, “Cohācjū ni mehoriquiro ijire”, nina niaja mari. Sa niñequina tiquiro buheyere cahmedare.

Cristo marine yedohore

2 Yūhu pohna, musare “Ñañene yeari”, nigu ahrire ojoagu niaja. Yūhu sa ni ojoapegūta ñañene yeboaga musa. Musa sa yegū ihñano Jesucristo quehnoariquiro musa ye ijjatire tiquiro Pacurore ohō saha ni sini basarota: “Ahriquina tiquina ñañene yeri buhirire buhiri dahreracāhña”, ni sini basarota tiquiro Pacurore. ²Cristo mari ñañene cohāriquiro ijire. Mari ñañene mari dihitare cohāedare. Ijipihtiro cjēna gūhure tiquina ñañene cohā masine tiquiro.

³Cohācjū dutiyere yena, tiquirore potota quehnoano masiaja mari. ⁴Ihcāquiro Cohācjū dutiyere yeraperota “Yūhu Cohācjūre masiaja”, nino, tiquiro ni mehoriquiro ijire. Sa yero Cristo yere ne masiedare. ⁵Apequiro pehe Cohācjū dutiyere yeriquiro Cohācjūre tutuaro cahñiquiro ijire. “¿Cohācjū mehna cjāna ijjajari mari?” ni masi duana, ohō saha mari masinata: ⁶Cohācjū mehna cjūno Jesucristo quehnoañene tiquiro

yeriro sahata yeriquiro ijire. Sata yeduccuhna mari.

Wahma dutiروه yahuahye

⁷Yuhū cahīna, ahri dutiروه yojopure musare yuhū yahuati wahma dutiروه ijierare. Ahri dutiروه musa coā waropure cuoriro muna dutiروه ijire. Ti dutiروه musa tuho tuhasari. ⁸Yojopure pehere musare yuhū yahuati muna dutiروه ijieperota wahma dutiروه gūhu ijire. Cristo gūhu, musa gūhu ti dutiروه yere. Yojopure nahitiano pihti cā mari ihña masino saha mari masiedare masi dūca cāna niaja mari. Sa yero buhrioro mehna mari ihña masino saha Cristo musare poto ijiyere masigū yero ahta tuhasari.

⁹“Yuhū buhrioropure ijiriquiro yero saha Cohācjū dutiyere yegū ijiaja”, ihcāquiro nieperota, apequinare ihña tuhtiro, tiquiro Cohācjū dutiyere yere. ¹⁰Sa yero apequirore cahīniquiro pūrita buhrioropure ijiriquiro yero saha Cohācjū dutiyere yeriquiro ijire tiquiro. Sa yero ñañene pari turi ye duerare. ¹¹Masare ihña tuhtiriquiro pehe nahitianopure ijiriquiro yero saha ijiro nine. Tiquiro caperi bajueriquiro yero saha ijire. Tiquiro wahatore ihña masiedare tiquiro.

¹²Yuhū pohna, Cristo tiquiro yariari mehna musa ñañe yerire cohāri jiri. Sa yegū musare yahu ojoagu niaja. ¹³Musa pacusumma gūhu, musa Cristore coā waropure ijiriquirore masine musa. Musa sa masigū ihñagu musa gūhure yahu ojoagu niaja. Musa wahma pjia ñariquiro watinore yuhduducari musa. Musa sa yuhduducana ijigū musa gūhure yahu ojoagu niaja.

Yuhū pohna, mari Pacure musa masine. Musa sa masigū ihñagu musare yojopure yahu ojoagu niaja. ¹⁴Musa pacusumma, musa Cristore coā waropure ijiriquirore masine musa. Musa sa masigū ihñagu musare yahu ojoagu

niaja. Musa wahma pjia potota musa Cohācjūre wacū tutuana ijire. Sa yena musa Cohācjū yere yena niaga. Sa yena, musa ñariquiro watinore yuhduducari. Sa yegū musare yahu ojoagu niaja. ¹⁵Ahri yehpa cje ñañene cahmedacāhña. Ahri yehpa cje ñañene cahmena mari Pacu pehere cahmedare musa. ¹⁶Ñañequina tiquina basi ñañene tiquina tutuaro cahmedi, ñañene tiquina ihña duari mari Pacu Cohācjū ye ijierare. “Ijipihtiyere cuo pehogu, masi pehogu ijiaja yuhū. Ne ihcāquiro masuno yuhure yuhduducare”, masa tiquina ni tuhotuye mari Pacu ye ijierare. Ti ijipihtiyere ahri yehpa cje ijire. ¹⁷Ahri yehpa, ahri yehpa cje gūhu masa tiquina cahmeñe pihtia waharota. Sa yero Cohācjū cahmeñene yeriquiro ijipihtiyere decori Cohācjū mehna ijirota.

Cristore ihña tuhtiriquiro pehere yahuahye Ņu

¹⁸Yuhū pohna, ahri yehpa pihtiatu deco mehenogā dūhsare. “Cristore ihña tuhtiriquiro ahtarota”, ni, Jesu yequina musare yahu tuhasari. Yojopure Cristore ihña tuhtiyequina peyequina iji tuhasare. Tiquina sa ijigū ihñana yojopure pihtiatu deco mehenogā dūhsagū masiaja mari. ¹⁹Ahriquina Cristore ihña tuhtiyequina pehe mari caha ijiepetu potota mari mehna cjeña ijierare. Sa ye tiquina marine cohā cāri. Tiquina mari mehna cjeña ijieye, mari mehna ijiboaga. Marine cohā cāri. Tiquina sa cohāgū mari mehna cjeña tiquina ijieragū masiaja mari.

²⁰Cristo Espiritu Santore musa pehere ohori. Sa yero Espiritu Santo musa mehna ijire. Sa yena musa ijipihntina Cristo yere masi tuhasare. ²¹Musare yahugu “Cristo yere masiedare musa”, ni tuhotueraja yuhū. Musa Cristo yere masigū ihñagu musare yahua. Cristo ye ne ni mehoñe mariedare.

Ti gũhũre masina mũa ijigũ masiaja yũhũ. ²²Ahriquiroy ijiye ni mehoriquiroy: “Jesu Cohãcjũ macũno ijierare”, nidiquiroy pehe ni mehoriquiroy ijiye. Potota Cristore ihũa tuhtiriquiroy ijiye tiquiroy. Mari Pacũre, tiquiroy macũno gũhũre cahmedariquiroy ijiye Cristore ihũa tuhtiriquiroy. ²³Ohõ saha ijiye: Jesure cahmeediquiroy pehe mari Pacũ gũhũre cahmeediquiroyta ijiye. Jesure cahmediquiroy pehe mari Pacũ gũhũre cahmediquiroy ijiye.

²⁴Coã waropũ Cohãcjũ yere mũa tuhõrõre quehnoano wacũña. Tire mũa wacũna, Jesu mehna cjãna ijinata. Sa yena mari Pacũ mehna cjãna ijinata. ²⁵Tireta Jesu marine yahuri. Ohõ saha ijiye tiquiroy yahuri: “Mũa ijipihtiye decori Cohãcjũ mehna ijiducunata”, ni cũri Jesu marine.

²⁶Apequina mũsare ni mehoñe nine. Tiquina sa ni mehõgũ masigũ mũsare yahu ojoagũ niaja. ²⁷Tiquina sa ni mehonõhrina mũa ijiepegũta mũa pehere Cristo tiquiroy yaquiroy Espĩritu Santore oho tuhasari. Espĩritu Santo mũa mehna ijiye. Mũa mehna ijiroy mũsare buheriquiroy ijiye. Tiquiroy ijipihtiyere mũsare yahure. Tiquiroy yahuye ijirota ijiye. Ni mehoñene yahuerare tiquiroy. Espĩritu Santo nidiroy sahata yeya mũa yojopũre. Sa yena mũa Cristo yere tuhõna, tiquiroy mehna quehnoano ijiya.

²⁸Sata ijiye. Yũhũ pohna, mũa Cristo mehna cjãna ijiya. Sa yena Cristo ahtati decore cuesi mũa. Sa yena tiquiroy ahtati decore bũe tiye mehna duhtisi mũa. ²⁹Cristo quehnoañene yeriquiroy tiquiroy ijigũ mũa masine. Tire masina ahri gũhũre masiña mũa. Ijipihtiyequina quehnoañene yeyequina Cohãcjũ pohneti ijiye. Ti gũhũre masiña mũa.

Mũsata Cohãcjũ pohna ijiye

3 “Mũa yũhũ pohna ijiye”, nino, tu-tuaro cahĩ yũhdũducaro nine ma-

rine mari Pacũ. Tiquiroy sa cahõna ijina tiquiroy pohna ijiaja mari. Ahri yehpa cjẽna ñañequina Cohãcjũre masiedare. Sa yeye Cohãcjũ pohna mari ijigũ ihũañe tiquina mari gũhũre masiedare. ²Yũhũ cahĩna, yojopũre Cohãcjũ pohna ijiaja mari. Sa ijiepenata came mari ijiatire mari quehnoano masiedaja. Sa masiedapenata ahri pehere masiaja. Cristo tojoa tagũ mari ihũana, tiquiroy ijiriro sahata tiquiroy mari ihũanata. Sa yena Cristo marine bajuagũ ihũana tiquiroy yero saha mari comesanata. ³Ijipihtiyequina ahriye masiñequina Cristore ihũa cũñe, ñañene ye duerare.

⁴Ñañene yena duiyere yũhdũducana niaja. Sa ye ijipihtiyequina ñañene yeyequina Cohãcjũ duiyere yũhdũducayequina ijiye. ⁵Cristo masare tiquina ñañene cohãtiquiroy bajuahye. Tiquiroy ne ñañene yerare. Tire masine mũa. ⁶Sa ye ijipihtiyequina Cristo yequina ñañene yeducuerare. Apequiroy pehe ñañene sa yeducuriquiroy Cristore ne masiedare. Sa yero Cristo yaquiroy ijierare. ⁷Yũhũ pohna, mũsare ni mehoñequinare tuhõeracãhũa. Ijipihtiyequina quehnoañene yeyequina Cristo yero saha quehnoañequina ijiye. ⁸Apequiroy pehe ñañene sa yeducuriquiroy watĩno yaquiroy ijiye. Watĩno pũrita duita ñañene yeriquiroy ijiahye. Sa yero watĩno tiquiroy ñañene ye duiyere cohãtiquiroy Cohãcjũ macũno masa bajuahye.

⁹Cohãcjũ pohna ijina Cohãcjũ yero saha ijina ijiaja. Sa yena ñañene yeducueraja. Cohãcjũ mari Pacũ tiquiroy ijigũ mari pehe ñañene yeducu masiedaja. ¹⁰Ohõ saha ijieyequina Cohãcjũ pohne tiquina ijigũ masinata: Cohãcjũ pohne watĩno pohne yero saha ijierare. Ñañene yeducuyequina, apequinare cahĩñequina Cohãcjũ pohne ijierare.

Musa mehna cĵenare cahĩna

¹¹“Mari mehna cĵenare cahĩhna”, ni buheyere coã waropure tuho tuhasari musa. ¹²Mari Caĩ tiquiro ñano yeriro sahata yeracũhna. Tiquiro watĩno yaquiro ijiro, tiquiro bahurore wejĕahye. ¿Dũhse yero tiquirore wejĕyari, musa tuhotugũ? Tire yahutja musare: Caĩ tiquiro yeri ñaĩe ijiahye. Tiquiro bahuro pehe quehnoañene yeriquiro ijigũ ihĩnato tiquiro wahmino pehe tiquirore wejĕahye.

¹³Sa yena yũhu acaye, ahri yehpa cĵena musare tiquina ihĩna tuhtigũ “¿Dũhse ijiro boro yũhure ihĩna tuhtijari tiquina?” ni, tuhotueracãhĩna.

¹⁴Mari pecapũ wahaborina ijimi. Yojopure uhmusepũ sa ijiducuatina comesarina ijiaja mari. Jesu yequinare cahĩna, Cohãcĵũ marine tiquiro comesagũ yerire masiaja mari. Masare cahĩeniquiro pecapũ wahatiquiro ijire.

¹⁵Tiquiro acayurore ihĩna tuhtiriquiro masare wejĕdiquiro ijire, Cohãcĵũ ihĩnagũ. Masare wejĕnequina uhmusepũ ijiducusi. Tire quehnoano masine musa.

¹⁶Masare cahĩnene ohõ saha masinata. Ijipiltiye decori Cohãcĵũ mehna mari ijiatire Cristo yariaro marine tutuaro cahĩdi. Sa yariaro marine tiquiro sa cahĩducure masigũ yero nidi. Sa yena mari gũhure Jesu yequina ye ijiatire yariaro cahmeboaga. ¹⁷Peye cuoriquiro Jesu yaquirore pejecuoriquirore ihĩnaeperota tiquirore paja ihĩndaro, Cohãcĵũre cahĩedare tiquiro. ¹⁸Yũhu pohna, masare mari cahĩne pehe mari dusero dihita wijiaeracãhdo. Masare mari cahĩna, tiquinare yedohoro cahmene marine.

Cuero marieno Cohãcĵũ cahapũ iji masiaja mari

¹⁹⁻²⁰Sa cahĩna mari potota Cohãcĵũ yequina mari ijiye gũhure masinata. Sa

yena Cohãcĵũ cahapũ cuero marieno mari iji masiaja. Sa yena “Ñaĩe buhiri ijiaja yũhure”, mari ni tuhotuepegũta, Cohãcĵũ cahapũ cuero marieno iji masiaja. Tiquiro pehe mari yũhduoro tutuariquiro ijiro ijipiltiyere masine. ²¹Yũhu cahĩna, quehnoañene yena, “Quehnoañe pehere yena niaja”, ni tuhotuna, Cohãcĵũ cahapũ mari cuero marieno iji masiaja. ²²Cohãcĵũ dutiyere, tiquiro cahmeĩe gũhure mari yegũ, tiquirore mari sinino punota tiquiro ohorota. ²³Ohõ saha dutire tiquiro marine: “Cohãcĵũ macunore Jesucristore wacũ tutuaya. Sa yena Cristo marine tiquiro dutiriro sahata musa mehna cĵenare cahĩna musa”, nino, ye dutire marine. ²⁴Cohãcĵũ dutiyere yeriquiro Cohãcĵũ mehna cĵũno ijiro nine. Sa yero Cohãcĵũ tiquiro mehna cĵũno ijire. Cohãcĵũ mari mehna cĵũno tiquiro ijiyere mari masi duagũ marine tiquiro ohoriquiro Espĩritu marine masigũ yerota.

Ni mehoĩe buheye gũhure, Cohãcĵũ ye buheye gũhure quehnoano ihĩna masi dutiahye

4 Yũhu cahĩna, apequina “Cohãcĵũ yaquiro Espĩriture cuoaja”, niĩnequina tiquina ijiepegũta tiquina ye buheye ni mehoĩe ijire. Sa ye apequina pehe Espĩritu Santo warore cuoyequina ni mehono marieno buhere tiquina. Peyequina “Cohãcĵũ yere yahu muhtarina ijiaja”, niepeta ni mehoĩequina ijire yojopure. Ijipiltiopure ijire tiquina. Sa yena apequina musare tiquina buheye ni mehoĩe buheye ijigũ ihĩna masiĩna musa. ²Cohãcĵũ yaquiro Espĩriture cuoyequinare musa ihĩna masi duana, ohõ saha masinata: “Jesucristo ahri yehpapũ masũno pagũ waro cuoriquiro ahtari jiri”, ni, buheyequina Cohãcĵũ

yaquiro Espíriture cwoyequina ijire tiquina. Sa yena sa ni buheyequinare ihña masinata msa. ³Apequina pehe “Jesu ahri yehpapu masuno pagu waro cworiquiro ahtaerari jiri”, ni buheyequina Cohãcjũ yaquiro Espíriture cwoyequina ijire. Tiquina ye tuhutuye Cristore ihña tuhtiriquiro tiquiro tuhuturo saha ijire. “Cristore ihña tuhtiriquiro ahtarota”, tiquina nidire tuho tuhasari msa. Sa ye tiquiro ye buheye ahri yehpapure wihi tuhasari.

⁴Msa pehe yuhu pohna, Cohãcjũ yequina ijire msa. Sa yena “Cohãcjũ yere yahu muhtarina ijiaja usã”, ni, mehoñequinare yuhduduca tuhasari msa. Msa mehna ijiriquiro Espiritu Santo pehe tutua yuhduducare. Sa yero ahri yehpa cjëna yaquiro watino yuhduoro tutuare. Sa yena ni mehoñequinare yuhduducari msa. Sa yena ti buheyere cahmedari msa. ⁵Ni mehoñequina pehe ahri yehpa cjëna ijire. Sa ye tiquina ahri yehpa cjë ñañene tiquina buhegũ ahri yehpa cjëna ñañequina pehe tiquinare quehnoano tuhore. ⁶Mari pehe Cohãcjũ yequina ijiaja. Sa ye Cohãcjũre masiñequina marine quehnoano tuhore. Apequina pehe Cohãcjũ yequina ijieraye, marine ne tuho duerare. Tiquina sa tuho dueragũ ihñana tiquina ye buheye Cohãcjũ ye buheye ti ijieragũ masinata mari. Sa yena apequina pehe marine tiquina tuhogũ tiquina ye buheye quehnoañe buheye ti ijigũ gũhure masiaja mari.

Cohãcjũ masare tutuaro cahĩducuriquiro ijire

⁷Yuhu cahina, Cohãcjũ marine apequinare cahigũ yeriquiro ijire. Tiquiro sa yeriquiro ijigũ ihñana mari mehna cjënare cahihna mari. Masare quehnoano cahĩnequina

pehe Cohãcjũ pohne ijire. Sa ye tiquina Cohãcjũre quehnoano masine. ⁸Cohãcjũ masa ijipihtiequinare tutuaro cahĩducuriquiro ijire. Tiquiro sa cahĩducuriquiro ijigũ masare cahĩnequina pehe Cohãcjũre masiedare. ⁹Cohãcjũ marine tiquiro cahĩnene mari masi duana, ohõ saha masinata: Cohãcjũ pehe tiquiro macunore ihcãquirola ijiriquirore marine yuhduoatiquirore ahri yehpapure ohoahye. Sa ohoro marine tiquiro cahĩnene marine masigũ yero niahye. ¹⁰Apequinare cahĩne waro ohõ saha ijire: Cohãcjũre mari cahĩne pehe poto cahĩne waro ijierare. Marine Cohãcjũ tiquiro cahĩne pũrita potota cahĩne waro ijire. Sa yero tiquiro macunore mari ñañene cohãtiquirore ohoro marine tutuaro cahĩne tiquiro.

¹¹Yuhu acaye, Cohãcjũ marine tiquiro sa tutuaro cahigũ ihñana mari gũhu mari mehna cjënare cahihna. ¹²Masa pehe ne Cohãcjũre ihñedari. Tiquirore mari ihñedapegũta mari mehna cjënare mari cahigũ, Cohãcjũ pehe mari mehna sa ijiducuro nine. Sa yero potota marine cahĩ nedomodugũ yere tiquiro. ¹³Cohãcjũ pehe marine tiquiro yaquiro Espíriture ohori. Sa yena Espíriture cwona, Cohãcjũ mehna mari quehnoano ijiyere masiaja mari. ¹⁴Sa yena mari Pacu tiquiro macunore ahri yehpa cjënare yuhduoatiquirore tiquiro ohore usã ihñau. Tire ihñana apequinapure tire yahuaja usã. ¹⁵Cohãcjũ mehna cjũno ohõ saha nidiquiro ijire: “Jesu Cohãcjũ macuno ijire”, nidiquiro tiquiro pũrita Cohãcjũ mehna cjũno ijiro nine. Sa yero Cohãcjũ gũhu tiquiro mehna cjũno ijiro nine.

¹⁶Sa yena marine Cohãcjũ tiquiro cahĩnene mari masiaja. Sa yena marine potota cahĩniquiro tiquiro ijigũ masiaja mari. Cohãcjũ masa ijipihtiequinare tutuaro cahĩducuriquiro ijire. Sa yero

apequiro masare cahĩducuriquiro Cohãcjũ mehna cjũno ijire. Sa yero Cohãcjũ gãhũ tiquiro mehna cjũno ijire. ¹⁷ Sa yena mari quehnoano cahĩ nedomucuaia Cohãcjũre, apequina gãhure, buhiri dahreri deco ijigũ mari cuero marieno mari ijiatire. Sa yena cuesi mari ahri yehpapũ Cristo yero saha ijina. ¹⁸ Apequinare mari cahĩgũ cuero mariedare. Cohãcjũ marine tiquiro cahĩnene masina mari ne cueraja. Masa cueye tiquinare buhiri dahreatire cue nine. Sa cueye ñano yũhdũre. Sa yero cueriquiro pehe Cohãcjũ cahĩnene masieniquiro ijire. ¹⁹ Marine Cohãcjũ cahĩ mũtahye. Sa yena mari gãhũ tiquirore cahĩaja. ²⁰ Ihcãquiro “Cohãcjũre cahĩaja”, nidiquiro ijieperota apequirore ihña tuhtiro, ni mehoriquiro ijire tiquiro. Tiquiro ihñariquirore cahĩedar, Cohãcjũre tiquiro ihñeniquiro gãhure cahĩ masiedare tiquiro. ²¹ Sa yero ahri ijire marine Cristo tiquiro dutiriro: Cohãcjũre cahĩna, mũa cahapu ijieyequina gãhure cahĩna.

Cohãcjũ pohne ahri yehpa cjẽ ñañene ye duerare

5 Ijipihtieyequina Jesure “Cristo ijire. Cohãcjũ ohoriquiro ijire”, niñequina, Cohãcjũ pohne ijire. Apequina pacũrore cahĩna, tiquiro pohne gãhure cahĩaja mari. Sata Cohãcjũre cahĩna, tiquiro pohne gãhure cahĩaja mari. ² Cohãcjũre cahĩna, tiquiro dutiyere quehnoano yena, tiquiro pohne gãhure mari cahĩna niaja. ³⁻⁴ Tiquiro dutiyere yena Cohãcjũre cahĩna niaja. Marine Cohãcjũ dutiyere yegũ mijoedare. Mari ijipihtina Cohãcjũ pohna ijina, ñañene cahmedaja mari. Sa ye marine tiquiro dutiyere yegũ mijoedare. Cohãcjũre wacũ tutuana ñañene cahmedaja. Sa yena tiquirore mari wacũ tutuari bato ñano ye dueraja.

⁵ Ñañene cahmedana ohõ saha nina ijiaja mari: “Jesu Cohãcjũ macũno ijire”, nina ñañene cahmedaja mari.

Cohãcjũ macũnore yahuahye Ñu

⁶ Jesucristo ahri yehpapũ tiquiro ah-tagũ tiquirore Ñu aco mehna wame yerire masina, curusapũ tiquiro dii cohãri gãhure masina, Cohãcjũ macũno tiquiro ijiyere masiaja mari. Tiquiro wame yeri dihita Cohãcjũ macũno tiquiro ijiyere marine masigũ yerare. Tiquiro dii cohãri gãhũ marine tire masigũ yere. Espĩritu Santo “Ahri ijirota ijire”, ni yahure marine. Tiquiro poto ni yahuriquiro ijire. [7 Sa ye Jesu Cohãcjũ macũno tiquiro ijiyere mũmũse cjẽna yahuyequina ihtiaro ijire: Mari Pacũ, tiquiro macũno Jesu, Espĩritu Santo mehna “Jesu potota Cohãcjũ macũno ijire”, niñequina ijire tiquina. Tiquina ihtiaro ijiepetata ihcãno mehna yahure tiquina Jesure.] ⁸ Jesu Cohãcjũ macũno tiquiro ijiyere ahri yehpapũre ihtiaro yahure: Cohãcjũ macũno tiquiro ijiyere Espĩritu Santo pehe marine yahure. Sa yena Jesure aco mehna tiquiro wame yeri gãhure masina, Cohãcjũ macũno tiquiro ijiyere masiaja mari. Sa yena mari ye ijiatire tiquiro yariarire tiquiro dii cohãri masina, Cohãcjũ macũno tiquiro ijiyere masiaja mari. Sa ye ti ihtiaro ihcãno mehna marine masigũ yere Cohãcjũ macũno Jesu ijiyere.

⁹ Masa tiquina yahuyere tũhona “Ijirota ijire”, niaja mari. Sa niepenata mari Pacũ tiquiro macũnore yahugũ masa tiquina yahuye yũhdũoro tiquiro pehere tũhoro cahmene marine. Cohãcjũ waro tiquiro ijigũ tiquiro yahuyere tũhoro cahmene marine. ¹⁰ Sa ye ijipihtieyequina Cohãcjũ macũnore wacũ tutuayequina Jesure yahuri buheyere quehnoano tũhore. “Queorota ijire”, ni tũhoture tiquina Jesure yahuri buheyere. Cohãcjũ macũnore tiquiro

yahurire tũhoeriquiro “Cohãcjũ ni mehoriqũro ijire”, nidiquiro ijire tiqũro. ¹¹ Cohãcjũ marine ijipihtiye decori tiqũro mehna sa ijiducugũ yerota. Cohãcjũ macũno yequina mari ijigũ tiqũro mehna sa ijiducugũ yerota marine. Ahri ijire Cohãcjũ marine tiqũro yahuye. ¹² Cohãcjũ macũno yequina ijiye tiqũro mehna sa ijiducũta. Sa ye apeqũna pehe tiqũrore cahmeeñequina tiqũro mehna sa ijiducũsi.

Ñu yahu oja bato tiahye

¹³ Mũsa Cohãcjũ macũnore wacũ tu-tuana Cohãcjũ mehna sa ijiducunata. Tire mũsa masiatire mũsare yahu ojoagu njaja.

¹⁴ Cohãcjũ tiqũro cahmediro sahata mari tiqũrore dũhse ijiyere mari sinigũ tiqũro marine quehnoano tũhorota. Sa mari sinina “Potota quehnoano tũhore tiqũro”, ni masiaja mari. ¹⁵ Tiqũrore mari sinigũ, marine tũhore. Tiqũro sa tũhorire masina, tiqũrore mari sinino punota tiqũro ohoati gũhũre masiaja mari.

¹⁶ Mũsa acayũro tiqũro ñañene yegũ ihñana, ti ñañe Cohãcjũ pecapũ tiqũro waha dutiye ñañe ijieragũ, tiqũrore sini basaya Cohãcjũre. Sa yero Cohãcjũ tiqũrore yedohoro tiqũro mehna

sa ijiducugũ yerota tiqũrore. Cohãcjũ pecapũ tiqũro waha dutiyequina dihitare sini basaya mũsa. Apeye ñañe pehe Cohãcjũ pecapũ tiqũro waha dutiye ñañe waro ijire. Ihcãqũro ti ñañe warore tiqũro yegũ “Tiqũrore sini basaya mũsa”, niedaja yũhũ. ¹⁷ Ijipihtiye ñañe yeye ñañe warota ijire, Cohãcjũ ihñagũ. Ti sa ijiepegũta apeye ñañe Cohãcjũ pecapũ tiqũro waha dutiye ñañe ijierare.

¹⁸ Cohãcjũ macũno Jesu pehe Cohãcjũ pohnene quehnoano ihña ihbore. Tiqũro sa ihña ihbogũ watĩno pehe Cohãcjũ pohnene ñano ye masiedare. Sa ye Cohãcjũ pohne pehe ne ñañene sa yeducuerare. Ahrire mari masiaja.

¹⁹ Mari pehe Cohãcjũ yequina ijiaja. Watĩno pehe ahri yehpa cjẽna pũhoro ijire. Ahri gũhũre mari masiaja.

²⁰ Cohãcjũ macũno ahri yehpapũre ahtaro marine quehnoano masigũ yeri tiqũro. Tiqũro sa yegũ potota Cohãcjũ waroreta mari quehnoano masiaja. Ahri gũhũre mari masiaja. Cohãcjũ macũno Jesucristo yequina ijiaja mari. Sa yena potota Cohãcjũ waro mehna cjãna njina njaja mari. Ahriqũro yũhũ nidiquiro potota Cohãcjũ waro ijire. Sa yero tiqũro uhmũsepũ sa ijiducugũ yeriquiro ijire.

²¹ Yũhũ pohna, “Cohãcjũ ijire”, tiqũna niñe queoyere ño peoeracãhña.

2 San Juan

Jesucristo yere, potota apequnare cahĩne gũhure yahuahye Ñu

1¹⁻² Yũhũ bucũ mũsare Cohãcjũ beserinare ahri pũre ojoa ohoaja. Jesucristo yere yũhtina ijiaja mari. Sa ye tiquiro buheye gũhũ mari mehna ijipihitiye decori sa ijiducurota. Sa yegũ potota mũsare cahĩaja yũhũ. Yũhũ dihita cahĩgũ niedaja mũsare. Apequna Jesu yere masĩnequina tiquina gũhũ potota cahĩne mũsare. ³Cohãcjũ mari Pacũ, Jesucristo tiquiro macuno gũhũ poto tiquina cahĩne mehna marine quehnoano yeeta. Sa ye marine paja ihĩaeta. Sa yeye marine quehnoano ijigũ yeeta tiquina. Sata yeahro marine. Sa nigũ mũsare quehnoa dutiaja.

⁴Mari Pacũ marine tiquiro dutiriro sahata ihquẽquina mũsa mehna cjẽna tiquiro yere yũhtiyequina tiquina ijigũ masigũ bucueaja yũhũ. ⁵Yojopũre mũsare yũhũ dutiati wahma dutiro ijierare. Coã waropũre ahri dutiro marine duita ijiahye. Ohõ saha dutire marine. Mari mehna cjẽnare cahĩihna. ⁶Tiquiro ye dutiyere ye pehona mari tiquirore cahĩaja. Sa yero coã waropũre mũsa tuhoriro sahata yojopũ gũhũre ohõ saha dutire mũsare. Apequnare sa cahĩducuya.

Peyequina ni mehoñequina ijire

⁷Peyequina ni mehoñequina “Potota Jesucristo ahri yehparũ masũno pagũta

cuoriquiro ahtaerari jiri”, niñequina gũhũ ahri yehpa cjẽnare buheye wahari. Cristore ihĩna tuhtiriquiro ni mehoriquiro tiquina yero sahata ijire. ⁸Quehnoano yeya mũsa. Cohãcjũ ye wapare mũsa quehnoano yeri wapare boeracãhĩna. Mũsa sa boeragũ Cohãcjũ quehnoa yũhũaro yerota mũsare.

⁹Ijipihitiyequina Cristo yere yũhdũducayequina, Cristo yere cohãnequina mari Pacũ yequina ijierare. Sa ye Cristo yere ne duhueyequina Cohãcjũ mari Pacure, tiquiro macuno gũhũre masine tiquina. ¹⁰Cristo ye buheyere cahmedariquiro, apeye buheyere buheriquiro mũsa cahapũ ahtagũ, tiquirore mũsa ya wũhũpũ sajã ta dutieracãhĩna. Tiquirore piti caeracãhĩna. ¹¹Apeye buheyere buheriquiro Cristo yere cahmedariquiro ñano yere. Sa yero tiquirore piti cariquiro pehe ñano yeriquirore yedohoro nine. Sa yena tiquirore piti caeracãhĩna.

Ñu yahu ojoa bato tiahye

¹²Peye mũsare yahu duepeguta tire ojoa dueraja. Mũsare ihĩagũ waha duaja. Mũsare ihĩagũ mũsa mehna yahuducutja, mari quehnoano bucueatire.

¹³Cohãcjũ beseriquina ohõpũ cahme-coañequina, mũsa mehna cjẽna mũsare quehnoa dutire.

3 San Juan

Ñu Gayo wame tiriquireore “Quehnoariquireo ijire”, niahye

1 Yuhu bucū mūhure Gayore potota yuhu cahigure ahri pūre ojoa ohoaja.

²Yuhu cahīgu, Cohācjū mehna cjū mūhū ijīgū masiaja yuhu. Tiquiro mehna mūhū quehnoano ijiriro sahata mūhū quehnoano yūhduatire, mūhū pagū dohatiro marieno mūhū ijiatire Cohācjūre sini basaja mūhure. ³Ihquēquina Jesu yequina yuhu cahapū wihiye mūhū ijiye tiyere yahuri yūhure. “Cristo cahmeno sahata potota yere Gayo”, ni yahuri tiquina yūhure. Tiquina sa ni yahugū tūhogū tutuaro bucuei yuhu. ⁴Musa Jesu yere yuhu buherina tiquiro cahmeno sahata musa yegū tūhogū tutuaro bucueaja.

⁵Yuhu cahīgu, Jesu yequinare yedohogū quehnoano yeri mūhū. Sa yegū Jesu yequinare mūhū ihña masieñequina pehere yedohogū quehnoa yūhduaro yeri mūhū.

⁶Tiquina panopū mūhū ihña masieñequina pehe Jesu yequina ohōpū cahmecoañequinare usāre ohō saha ni yahuri: “Gayo usāre quehnoano cahīne”, ni yahuri panopū mūhū ihña masieñequina pehe. Came mūhū ya macare tiquina yūhdu cāgū ihñagu tiquinare quehnoano yedohoya Cohācjū tiquiro bucueatire. ⁷Tiquina Jesu yere buhe tiniñe wahaye, Cohācjūre cahmeeñequinare yedohogū cahmedari.

⁸Sa yena tiquinare Jesu yere buhe tiniñequinare yedohouhna mari. Tiquinare sa yedohona, tiquina yero saha mari gūhū Cohācjūre yedohona niaja.

Diotrefe tiquiro ñañe yerire yahuahye Ñu

⁹To cjēnare Jesu yequinare ojoami. Yuhu sa ojoaepegūta Diotrefe tiquiro basi tiquina puhtoro yero saha iji duaro, yūhure tuho duerari. ¹⁰Musa cahapū yuhu esari bato tiquiro yerire musare yahu pehoutja. Usāre ñano yahuducure tiquiro. Sa yero ni mehoñe peyariquireo ijire tiquiro. Sa yero apeye ñañe gūhure yere tiquiro. Jesu yequinare tiquiro yere buhe tiniñequinare tiquiro ya wūhure sajā dutierare. Sa yero apequina to cjēna Jesu yequina pehe buhe tiniñequinare tiquina sajā dutigū ihñano tiquiro pehe “Buhe tiniñequinare sajā dutieracāhña musa ye wūhusepūre”, ni yahusāre tiquinare. “Musa ye wūhusepū buhe tiniñequinare musa sajā dutiri buhiri mari Jesu yequina mari ya wūhupūre mari cahmecoari wūhupūre sajāedacāhña musa pehe”, nine Diotrefe to cjēnare Jesu yequinare.

¹¹Yuhu cahīgu, ñañequinare ihña cūedacāhña. Quehnoano yeyequina pehere ihña cūña. Quehnoañene yeyequina Cohācjū yequina ijire. Ñañene yeyequina Cohācjūre masiedare.

Demetrio quehnoañene tiquiro yerire yahuahye Ñu

¹²Ijipihtiyequina quehnoano yahuducuri Demetriere. Sa ye tiquiro yerire ihñañe quehnoano tiquiro yeriquiro ijīgū masine masa. Usā gūhū tiquirore sata ni yahuaja. Sa yena usā yahuye pehere potota ijīgū masine musa.

Yahu bato tiahye Ñu

¹³Mūhure peye yahu duami. Sa yahu duepegūta tire ojoaeraja. ¹⁴Mehenogā batota mūhure ihña duaja. Sa yena mari basi cahme yahuducunata.

¹⁵Quehnoa dutiaja mūhure. Mari mehna cjēna ohō cjēna Jesu yequina

muhare quehnoa dutire. To cjēna
mari mehna cjēna ijipihtiyequina
quehnoahdo.

San Judas

Juda Jesu yequinare ojoa ohoahye

1 Yuhu Juda Santiago bahu, Jesucristo cahacjũ musare Jesu yequinare ahri pũre ojoa ohoaja. Musare mari Pacu Cohãcjũ beseahye. Sa yena tiqiro cahĩne mehna quehnoano ijire musa. Sa yero Jesucristo yedohore musare “Ñañene yeari”, nino. ²Quehnoa dutiaja musare. Cohãcjũ yedohoro mehna quehnoano ijiya musa. Sa yegu Cohãcjũre paja ihña dutigu, musare cahĩ dutigu sini basaja Cohãcjũre yuhu.

Ni mehoñequina tiquina ye buheyere yahu ñacahye Juda

³Cohãcjũ marine pecapũ wahaborinare tiqiro yuhduoye pehere tutuaro ojoa duami musare, yuhu cahĩnare. Sa ojoa duepeguta musare yojopũre ni mehoñe buheyere cahme dutieragu musare ojoaja. Sa yena Jesucristo ye buheye pehere tutuaro buheya musa. Ahri buheye pehe Jesu yequinare Cohãcjũ cũri buheye sa ijiducurota comesaro marieno. ⁴Ihquẽquina masa ñañequina wacũeno mehna musa cahapũ esari. Musa mehna ijiye tiquina ohõ saha ni buhemene musare: “Cohãcjũ yequina musa ijigũ, tiqiro cahĩne musare. Sa yero numia mehna musa ñano yegũ tiqiro musare ne buhiri dahresi”, ni buhemene tiquina. Sa ye mari puhtoro ihcãquirola ijiriqirore Jesucristore “Cohãcjũ macũno ijierare”, ni buhemene tiquina. Ohõ saha ni buheyequinare Cohãcjũ tiqiro buhiri dahreatire yahuahye panopũre. Tiqiro yere tiquina ojoari pũpũ sata ni yahuahye.

⁵Yojopũre musare apeyere wacũgũ ye duaja. Ahrire musa masiepegũta

pari turi ahrire musare wacũgũ ye duaja. Cohãcjũ judio masare Egiptopũ ijiyequinare tiqiro wiori bato tiquina mehna cjenare tiqirore wacũ tutueyequinare tiqiro wejẽahye.

⁶Sa yena musa apequina gũhure wacũña. Apequina angele pehe Cohãcjũ dutiyere ye duerahye. Sa ye tiquinare tiqiro iji duti cũrirore tiquina iji duerahye. Sa ye tiquina ijimedirore duhu cãhye tiquina. Tiquina sa duhugũ ihñano Cohãcjũ nahitianopũ tiquinare peresu yeahye. Sa ye tiquina pihtiatu deco pano come dari mehna duhteriquina yero saha ijiducuetu. Sa yero pihtiatu deco ijigũ tiquinare buhiri dahrerota Cohãcjũ.

⁷Sata yeahye apequina gũhũ. Tiquina gũhure wacũña musa. Tiquina Sodoma wame tiri maca cjenã, Gomorra wame tiri maca cjenã ti macari cahapũ ijiye macari cjenã gũhũ numia mehna ñano yeahye. Sa ye sijoro saha yeye gũhure ye, umua pehe tiquina basita tiquina paguri mehna ñano yeahye. Numia gũhũ sata yeahye. Tiquina sa yeri buhiri Cohãcjũ tiquinare ujuã peho cãhye. Tiquinare ujuãno Cohãcjũ ijipihtiequina tiqirore yuhduacariquinare tiqiro buhiri dahreatire masare ihñono niahye. Tiquinare tiqiro buhiri dahreru peca ne yatisi.

⁸Tiquina Cohãcjũ buhiri dahrenohriquina muna yero saha yojopũ gũhure sata yeducure ni mehoñene buheyequina. Tiquina quehẽnequina yero saha ijiye, tiquina paguri mehna ñano yere. Sa yeye Cohãcjũ dutiyere cahmedare tiquina. Sa ye tiquina yuhduoro tutuayequinare tiquina pehe ñano yahuducu cohtere. ⁹Quehnoañequina angele pehe tutuayequina ijiepetu sa ni yahuducuerare. Miguel wame tiriqiro angele puhtoro pehe Moise pagure cahmeno, watĩno mehna cahme sehña

soahye. Tutua yuhduariquiro ijieperota tiquiro “Watīno yuhduoro yuhū pūrīta tutuaja”, ni tūhotuerahye. Sa yero tiquiro esa tuharo watīnore nāno yahuducuera, tiquiore tuhtierahye. Sa yero ohō saha niahye watīnore. “Cohācjūpū mūhure tuhtiahro”, niahye Miguel watīnore.¹⁰ Sa ye ahriquina ni mehoñequina pehe tiquina masieñequinare nāno yahuducu cohtere. Sa ye wahiquina tūho masieñequina tiquina esa tuharo tiquina yero saha ni mehoñequina pehe yere. Sa yeyequina ijiye, pecapū wahaeta.

¹¹ Tiquinata nāno yuhdueta. Caī yeriro saha nāno yeri tiquina. Sa ye Balāa tiquiro yeriro saha tiquina niñerure cahī wapata duaye, ni mehoñene buhere. Sa ye niñeru neati dihitare tūhotu, ti dihitare yere. Sa ye Coré tiquiro pūhtorore cohā duariro saha tiquina gūhū tiquiro yero saha yere. Sa ye tiquiro yero saha tiquina gūhū pecapū wahaeta.¹² Tiquina ni mehoñequina pehe mūsa cahme cahīati bose decorire ihyaye, ño peoro marieno tiquina cahmeno saha apere. Sa ye tiquina sehsarota ihyayere bore apequinare ohoro marieno. Wete yero saha tiquina mūsa bose decorire quehnoañe decori ijiborirore dojomehne cohtere.

Ehmeo cururi acoro marieñe cururi ti dūhseati ijieraro saha tiquina ni mehoñequina ne dūhseatiquina ijierare. Sa ye ehmeo cururi wilhnono wēdoqueoye cururi ti sa comesaducuro saha tiquina ni mehoñequina gūhū ihcāno saha yahuducueraye, sa comesaducure.

Sa ye, dūca tiri pje ijigū dūca marieñe cjū yero saha ijire tiquina. Ti cjū pūa tahapū yariaa wahare. Ihcā taha dūca tieye cjū, yariaye cjū yero saha waha tuhasare. Ti cjūre tiquina duhari bato pari turi yariaa wahare tja. Ti cjū yero saha ijiye dūhseatiquina ijierare tiquina ni mehoñequina.

¹³ Sa ye pajiri ma cjē pahcōri būjūye pahcōri yero saha ijire tiquina. Ti pahcōri quē ohōgū, wete būjūye sahpōri wahare. Dūhse ijiyere tiquina ni mehoñequina tiquina yegū pahcōri cjē sahpōri wete būjūye sahpōri ti waharo saha ni mehoñequina tiquina nāno yeye ijire.

Sa ye asī maa cāe paca ñahpicoha paca yero saha ijire tiquina. Sa yeye ñahpicoha paca nahitianopū ti waharo saha tiquina gūhū ñanopū wahaeta. Sa ye topūre sa ijiducuenta tiquina ni mehoñequina.

¹⁴⁻¹⁵ Enoco panopū cjūno Adán panamino iji turiariquiro seis cururi bato masa bajuariquiro ohō saha niahye. Tiquinare ni mehoñequinare ohō saha niahye: “Tūhoya yūhure. Cohācjū peyequina tiquiro yequina angele quehnoañequina mehna ijipihtiyequina ñañequinare tiquina ñañe buhiri buhiri dahrero ahtarota. Sa yero ijipihtiyequina Cohācjūre ihñā tuhtiyequinare tiquina ñañe yeri buhiri tiquinare buhiri dahre dutiro ahtarota Cohācjū. Sa yero Cohācjūre nāno tiquina yahuducuri buhiri gūhūre tiquinare buhiri dahre dutiro ahtarota”, niahye Enoco.¹⁶ Tiquina ni mehoñequina unureducuyequina, apequinare yahu wajayequina tiquina nāno wacūñe dihitare yere tiquina. Sa ye “Apequinare masī yuhducaja ūsā”, niducure tiquina. Sa ye tiquina cahmeno saha ye duaye, apee borore ehma duaye, tūhoro quehnoanopūta yahuducure masare.

Jesu yequinare yahu nemoahye Juda

¹⁷ Mari pūhtoro Jesucristo buhe duti tiquiro cūriquina tiquina buherire wacūñā mūsa, yuhū cahīna.¹⁸ Ohō saha nidi tiquina mū sare. “Ahri yehpa pihtiato panogā Cohācjūre nāno yahuducu būjūpeyequina ijieta. Sa

ye tiquina Cohãcjüre cahmedaye, ñañene tiquina tutuaro cahmeñene yeeta tiquina”, ni yahuri Jesu cūriquina müsare. ¹⁹Jesu yequinare tiquina basi tiquina cahme ihña tuhtigū yere tiquina ni mehoñequina pehe. Sa ye tiquina ñañequina ahri yehpa cjēna ijiye, Espíritu Santore ne cūerare tiquina. Sa ye tiquina ñañene tutuaro cahmeñe dihitare yere tiquina.

²⁰Musa pehe yuhñ cahña, Jesucristo ye buheyere quehnoano tuho nemoña, quehnoano wacū tutuana musa ijiro quehnoano. Ti buheye pehe quehnoa yuhduare. Espíritu Santo yedohoye mehna Cohãcjū mehna yahuducuya musa. ²¹Quehnoañene yeya musa Cohãcjū müsare tiquiro cahñene musa masino quehnoano. Sa yena Jesucristo mehna musa sa ijuducuatire cohteya. Tiquiro marine paja ihñano uhmūsepū sa ijuducugū yerota.

²²Cristo yere tuho duera cjūñequinare paja ihñaña. Sa yena tiquinare buhe, masigū yeya. ²³Tiquinare pecapū waha-

boriquinare Cohãcjüre yuhduogū yeya musa. Sa yena apequinare paja ihñaña musa. Tiquinare yedohona musa gūhū tiquina ñañe yeyere ihña cūedacāhña. Wete tiri suhtirore musa yabiro saha, apequina tiquina ñañe yeyere yabiya, “Tiquina ñañe yeyere pihari”, nina.

Juda Cohãcjüre tiquiro ño peoye ijire

^{24–25}Cohãcjū mari pūhtoro marine ihña ihbo masine “Ñañene yeari”, nino. Sa yero tiquiro marine ñañe buhiri marienare uhmūsepū tiquiro cahapū cū masine. Sa marine topū tiquiro cūgū mari bucuenata. Tiquiro Cohãcjū ihcãquiota ijire. Apequiro mariedare. Sa yero marine pecapū wahaborinare yuhduoriquiro ijire tiquiro. Tiquiro pehe panopū, yojopūre, ijipihtiye decori gūhūre quehnoa yuhduariquiro, mari pūhtoro, tutua yuhduariquiro, ijipihtiyequinare dutiriquiro ijire. Tiquiro sa ijigū mari pūhtoro Jesucristo yedohoro mehna tiquirore ño peouhna. Sata yeihna.

Apocalipsis

Camepüre ahri deco dūhse wahatire marine masigū yeahye Jesucristo

1 Ahri pūpū Jesucristo marine tiquiro masigū yerire yahu ojoagu niaja. Mari Pacū pehe tire yahu dutiro cūahye tiquirore, tiquiro yequinare tiquiro cahcānare masigū ye dutiro. Sa yero mianota dūhse wahatire masigū yeri tiquiro. Mehenogā dūhsatjiāno nine sa wahato. Jesucristore tiquiro sa cūgū tiquiro pehe angelre tire yuhure Ñure yahu dutiro ohori. ²Sa yegu yuhū Ñū ijipihtiyere yuhū ihñarire yahu ojoagu niaja. Cohācjū ye yahuducuyere Jesucristo ye buheyere yahu ojoagu niaja.

³Ahri pūpū camepüre dūhse wahatire yahu ojoagu niaja. Mehenogā dūhsatjiāno nine ahri ijipihtiyere sa wahato. Sa ye ijipihtiyequina ahri pūre buheyequina, yuhū yahurire quehnoano tūhoyequina ahri pū nidiro saha yeyequina bucuyequina ijietā.

Siete cururi cjēnare Jesu yequina cahmecoañequinare ojoa ohoahye Ñū

⁴Yuhū, Ñū musare siete cururi cjānare Jesu yequinare Asia yehpa cjānare ojoa ohoaja: Cohācjū tiquiro cahñe mehna musare quehnoa dutiaja. Sa yena tiquiro yedohoye mehna quehnoano ijiya musa. Tiquiro panopūta sa ijiducuriquiro ijie tiahye. Yojoḡpū gūhūre sa ijiducure. Cameḡpū ahtarota. Tiquiro pūhtoro dūjiri poto ijiyequina siete pagū bajueyequina ijire. Tiquina cahñe mehna musare quehnoa dutiaja tja. ⁵Cristo tiquiro cahñe mehna musare quehnoa dutiaja tja. Cohācjū yere ni mehono marieno yahuriquiro ijire tiquiro. Sa yero tiquiro yariari bato tiquiro masa mūjari bato ne pari turi yariasi tiquiro. Sa yero ijipihtiyequina ahri yehpa cjēna

pūhtoa tiquina bui pūhtoro ijire tiquiro. Marine cahñe tiquiro dii cohāri mehna mari ñañene coseri tiquiro. ⁶Sa cosero marine pūhtoa sōri tiquiro. Marine pahia wahagū yeri tja. Cohācjū mari Pacū tiquiro yere yeatiquinare marine sa sōri tiquiro. Ijipihtiyere decori “Tutuagu ijire mūhū”, ni ño peoducuetā ijipihtiyequina tiquirore. Ijipihtiyequina pūhtoro sa ijiducure tiquiro. Sata ijiagro.

⁷Quehnoano wacū masi cohteya musa. Ehmeo cururi watoa dijia tarota Cristo. Tiquiro sa ahtagū ihñæta ijipihtiyequina. Tiquirore quē biha wejēdiquina gūhū tiquirore ihñæta. Sa ye tiquiro ahtagū ihñæne ahri yehpa cjēna ijipihtiyere cururi cjēna tutuaro utieta. Sata utiaagro.

⁸Ohō saha nine mari pūhtoro Cohācjū: “Yuhū ijipihtiyere bajumehnedigū ijiaja. Sa yegu ijipihtiyere pihtigū yeacjū ijiaja. Tutua yūhdūdcagū ijiaja yuhū. Panopū gūhūre sa ijiducue tii. Yojoḡpū gūhūre sa ijiducuaja. Came ahtautja”, nine Cohācjū.

Cristore asi siteriquirore tiquiro ihñarire yahuahye Ñū

⁹Yuhū Ñū musa acayū Jesu yaquiro ijiaja. Sa yegu musa yero saha yuhū gūhū Jesu yere yuhū yeri buhiri ñano yūhdū. Sa yegu musa yero saha yuhūre tiquina sa ñano yepegūta Jesu yedohoye mehna Jesure cohædū. Mari ihcāno saha tiquiro pūhtoro ijiro cjāna ijiana ijiaja mari. Ya dihta cjēna tiquina cohārigū ijigū Patmo wame tiri nūcḡopū ijiaja. Cohācjū yere, Jesucristo tiquiro buheri gūhūre apequinare yuhū buheri buhiri ohōpū tiquina cohārigū ijiaja. ¹⁰Ohōpū yuhū ijigū ihcā deco domingo ijigū Espíritu Santo yuhūre quehēnopū ihñono nidi. Tiquiro sa ihñogū yuhū behero peheḡpū tutuaro yahuducuro ca tari. Corneta tutuaro bisiro saha tutuaro bisiro

ca tari tiquiro yahuducuye. ¹¹ Ohō saha nino ca tari yuhū tuhogū:

—Yuhū ijipihtiyere bajumehnedigu ijiaja. Sa yegu ijipihtiyere pihtigū yeacju ijiaja. Yojoḡu muhu ihñatire ojoati pūpu ojoa ohōña. Mūhu sa ojoa ohōri bato siete cururi cjēnare Cohācjū yequinare ohoya ti pūre. Tiquina siete cururi Asia dihtapū ijiye macari cjēna ijire. Efeso cjēnare, Esmirna cjēnare, Pérgamo cjēnare, Tiatira cjēnare, Sardis cjēnare, Filadelfia cjēnare, Laodicea cjēnare muhu ihñatire ojoa ohoya, nino ca tari yuhure.

¹² Tiquiro sa nigū tuhogu majareducau yuhure yahuducuriquire ihñagu tuhu. Sa majareducaḡu siete sihāñe pacare tiquina duhu peoye cjure uru mehna tiquina yeri cjure ihñau. ¹³ Ti cju watoa ducuriquire masuno yero saha bajuriquire ihñau. Tiquiro yoari suhtiro dahpocāripū esari suhtirore sañariquiro ijiri. Sa yero uru mehna tiquina yeri cahsero mehna tiquiro cutiro bui tuā dihoriquire ijiri. ¹⁴ Sa ye tiquiro poari buhsa cohoḡi yero saha yehseri. Sa ye tiquiro caperi peca pohna yero saha asiri. ¹⁵ Sa ye tiquiro dahpocāri bronze wame tiye come asiye come yero saha asi siteri. Broncere peca mehna tiquina quehnoano űjūa weri bato tire wahtere quehnoano asi paha dutiye. Ti quehnoano wahtenohriro yero saha tiquiro dahpocāri quehnoano asi siteri. Sa yero tiquiro yahuducuye peo tutuaro cuari peo yero saha tutuaro bisiro ca tari. ¹⁶ Tiquiro omoca poto pehe siete ñahpicoha pacare cuori. Sa yero tiquiro duseropū ñoseni pji pua peheri siori pjiñe cuhñuri. Sa yero asū deco cjēno tiquiro tutuaro asi sitero saha tiquiro wuhdoa tutuaro asi siteri.

¹⁷ Sa yegu tiquire ihñagu tiquiro dahpocāri cahapū doque quehe sau yariquiro yero saha. Yuhū sa doque quehe

sagū ihñano tiquiro poto pehe cjā omoca mehna yuhure duhu peo ohō saha nidi:

—Cueracāhña. Yuhū ijipihtiyere bajumehnedigu ijiaja. Sa yegu ijipihtiyere pihtigū yeacju ijiaja. ¹⁸ Catigu ijiaja yuhū. Yariarigu ijimi. Yojoḡure ihñaña. Ijipihtiye decori sa catiducugū ijiaja yuhū. Pari turi masagu masare pari turi yarieragū ye masaja yuhū. Sa yegu masare yariariquina tiquina ijiropū wa haeragū ye masaja yuhū. ¹⁹ Sa yegu yojoḡu wahatire ihñagu, ojoa ohōña. Cameḡu duhse wahati gūhure ihñagu ojoa ohōña muhu. ²⁰ Ahri siete ñahpicoha pacare yuhū poto pehe yuhū cuoye pacare yahutja muhure. Sa yegu siete sihāñe pacare tiquina duhu peoye cju uru cju gūhure yahutja. Ohō saha ijiye yahuyere panopū cjēna masare ne yahuera tii. Ohō saha ijire ti: Siete ñahpicoha paca siete cururi cjēna yeequina puhtoa ijiye nine, mari queoye mehna buhegū. Sa ye siete sihāñe pacare tiquina duhu peoye cju siete cururi cjēna yeequina ijiye nine, mari queoye mehna buhegū, nidi yuhure.

Efeso cjēnare Jesu yequinare ojoa oho basa duca dutiahye Ñure

2 Sa ni tuhasa ohō saha ni nemori yuhure ojoa dutiriquire:

—Efeso cjēna yeequina, tiquina puhtoro gūhure ohō saha ni ojoa oho basaya muhu: “Yuhū omoca poto pehe siete ñahpicoha pacare cuogū ijiaja. Sa yegu siete sihā docoye cju watoa tinigu ijiaja. Sa tinigu ijigu musare ohō saha ni yahuaja: ² Ijipihtiye musa yerire masi pehoaja. Yee ijiatire musa tutuaro dahrarire, yuhure musa wacū tutua duhuerari gūhure quehnoano masaja. Ñañene yeriquinare musa ihña yabigū gūhure masaja. Sa yena ‘Jesu buhe dutiro tiquiro cūrina ijiaja’, nimediquinare queoro tiquina buheragū ihñana, ni mehoñequina tiquina ijigū masidi musa.

³Yeere m̄sa yeri buhiri m̄sa ñano yuh̄d̄epenata ihc̄ano sahari m̄sa Efeso cj̄ana. Sa yena yuh̄re ne duhuerari m̄sa. ⁴Sa quehnoano yena ijiepenata ihc̄anore queoro yerari m̄sa. Ahri ijire ti: Yuh̄re m̄sa quehnoano cah̄i muhtariro saha yojop̄re yerare m̄sa. ⁵Yuh̄re m̄sa cah̄i muhtarire wac̄ña m̄sa tja. Yojop̄re yuh̄re m̄sa cah̄ieda cj̄urire wac̄ña. Sa yena m̄sa ñañe yerire bujua witiya. Tire duhuya. Sa duhuna, yeere m̄sa ye muhtariro sahata yeya tja. M̄sa ñañe yerire m̄sa duhueraḡũ sojaro mehna sih̄iare yuh̄ duhu peodu m̄sa ya d̄re yuh̄ dapod̄re ne coh̄ut̄ja. (Sa niḡ oh̄o saha ni yahuḡ niaja musare. M̄sa to cj̄ana yuh̄re coh̄boaga. Sa coh̄ana to punota pih̄tinata m̄sa ñañe yeyere duhuerana.) ⁶Yuh̄re cah̄ieda cj̄una ijiepenata ahrire quehnoano yeri m̄sa: Nicolaita wame tiyequinare ñañequinare ih̄ña yabire m̄sa. Yuh̄ ḡuh̄ tiquinare ih̄ña yabiaja. ⁷Cahmo tina ijire m̄sa. Sa yena m̄sa ye cururi cj̄enare yeequinare Esp̄ritu Santo tiquiro yahurire tuh̄oya m̄sa. Oh̄o saha nine tiquiro: ‘Ijipihtiyequinare Jesure wac̄i tutua duhueyequinare Coh̄cj̄ũ ya wese paraíso wame tiro cj̄ad̄ d̄ucare ihya dutiit̄ja. Tu d̄uca catiḡũ yeye ijire’, nine Esp̄ritu Santo”, ni yahu ojoa oho basaya Efeso cj̄ena yeequinare, tiquina puhtoro ḡuh̄re.

Esmirna cj̄enare Jesu yequinare ojoa oho basa dutiah̄e Ñure

⁸Esmirna cj̄ena yeequinare, tiquina puhtoro ḡuh̄re oh̄o saha ni ojoa oho basaya muh̄: “Yuh̄ ijipihtiyere bajumehnediḡũ ijiaja. Sa yeḡũ ijipihtiyere pihtiḡũ yeac̄jũ ijiaja. Yariaa wahau. Pari turi catiaja tja. Sa yeḡũ oh̄o saha ni yahuaja musare: ⁹M̄sa ñano yuh̄d̄urire masiaja. Pejecuona m̄sa ijiḡũ ḡuh̄re masiaja. Sa ijiepenata Coh̄cj̄ũ yere quehnoañene pajiro cuore

m̄sa. Apequina pehe ‘Judio masa ijiaja’, nimediquina ni mehon̄equina ijire. Tiquina musare ñano quiti yerire masiaja. Tiquina Satana yequina ijire. ¹⁰Yojop̄re m̄sa ñano yuh̄duatire cuerac̄ah̄ña. Tuh̄oya m̄sa. Wat̄ino musare Coh̄cj̄ũre duhu dutiro ihqūequina m̄sa mehna cj̄enare peresu ye dutirota. P̄ua omope decori waro ñano yuh̄d̄unata m̄sa. Tiquina sa ñano yeḡũ musare tiquina sa wej̄e duepeḡũta yuh̄re, yee ḡuh̄re coh̄aedac̄ah̄ña. M̄sa sa yuh̄re coh̄edaḡũ ih̄ñaḡũ ijipihtiye decori Coh̄cj̄ũ cahap̄ũ musare sa ijiducuḡũ yeit̄ja. ¹¹Cahmo tina ijire m̄sa. Sa yena m̄sa ye cururi cj̄enare yeequinare Esp̄ritu Santo yahurire tuh̄oya m̄sa. Oh̄o saha nine tiquiro: ‘Ijipihtiyequinare Jesure wac̄i tutua duhueyequinare pecap̄ũ wahasi. Tiquina yariari bato pecap̄ũ wahasi’, nine Esp̄ritu Santo”, ni ojoa oho basaya Esmirna cj̄ena yeequinare, tiquina puhtoro ḡuh̄re.

Pérgamo cj̄enare Jesu yequinare ojoa oho basa dutiah̄e Ñure

¹²Pérgamo cj̄ena yeequinare, tiquina puhtoro ḡuh̄re oh̄o saha ni ojoa oho basaya muh̄: “Yuh̄ ñoseni pj̄i p̄ua peheri siori pj̄ine cuogu ijiaja. Musare oh̄o saha ni yahut̄ja: ¹³M̄sa yerire, m̄sa ya maca cj̄ena tiquina yeri ḡuh̄re masiaja. To cj̄ena puhtoro Satana ijire. To cj̄ena Satanare ño peoyequina Antipare yeere quehnoano yahuriquire wej̄edi. Tiquirore tiquina sa wej̄eḡũ ih̄ñaepenata yuh̄re ne wac̄i tutua duhuerari m̄sa. ¹⁴M̄sa sa wac̄i tutua duhuerapenata mehenoḡã yuh̄re yuh̄d̄ud̄ucari m̄sa. Ihqūequina m̄sa mehna cj̄ena Bal̄aa ye buheyere cahmene. Panop̄ũ Balac wame tiquiro puhtoro oh̄o saha ni buhee tiri Bal̄aa pehe: ‘Israe masare yuh̄d̄ud̄uca duana “Coh̄cj̄ũ ijire”, m̄sa niñe queoyere ño peo m̄sa duhu peo

ihyayere ihya dutiya tiquinare. Sa yena numia mehna ñano yegū yeya tiquinare', ni buhee tiri Balāa mūnano. Panopu tiquiro yeriro saha vojopu gūhure ñano yegū yere ihquēquina mūsa mehna cjēna apequinare. ¹⁵Sa ye tiquina yero saha apequina mūsa mehna cjēna Nicolaita wame tiyequina ye buheye pehere cahmene. ¹⁶Sa yena mūsa ñañe yerire duhuya mūsa. Mūsa sa duhueragū ihñagū sojaro mehna mūsa cahapu wahagu, sa ñano yeyequina mehna cahmequitja yuhu duseropu ijiri pjī ñoseni pjī mehna. ¹⁷Cahmo tina ijire mūsa. Sa yena mūsa ye cururi cjēnare yeequinare Espiritu Santo tiquiro yahurire tuhoya mūsa. Ohō saha nine tiquiro: 'Ijipihtieyquinare Jesure wacū tutua duhueyequinare maná wame tiye ihyayere umūse cjē ihyayere ohoutja. Yehseye utā paca gūhure ohoutja tiquinare. Ti utā pacapure wahma wamene yuhu ojoa ohōati utā paca ijirota. Apequina ti wamene ne masisi. Ti utā pacare neñequina dihita ti wamene masieta', nine Espiritu Santo", ni ojoa oho basaya Pérgamo cjēna yeequinare, tiquina puhtoro gūhure.

Tiatira cjēnare Jesu yequinare ojoa oho basa dutiahye Ñure

¹⁸Tiatira cjēna yeequinare, tiquina puhtoro gūhure ohō saha ni ojoa oho basaya mūhu: "Yuhu Cohācjū macu yuhu caperi peca pohna yero saha asire. Sa ye yuhu dahpocāri bronze wame tiye come tiquina wahteri come yero saha asi sitere. Mūsa ohō saha ni yahuaja.

¹⁹Mūsa yerire masiaja yuhu. Cohācjūre, apequina gūhure mūsa cahīdire, yuhure mūsa cohāedarire, apequinare mūsa yedohorire, ñano yuhdūepenata yuhure mūsa duhuerarire masiaja. Coā waropu mūsa yeriro yuhdūoro vojopu pehere quehnoano ye

nemona nine mūsa. Ti gūhure masiaja yuhu.

²⁰Mūsa sa quehnoano yena ijiepenata ohō saha yuhure yuhdūducari mūsa: Jezabe wame tiricoro 'Cohācjū yere yahugo ijiaja', ni mehoricoro mūsa tioro ñano buhegū tuhona tiorore tuhtierari mūsa. Ni meho buhero yeequinare yuhu cahācjēnare numia mehna ñano yegū yere. Sa yero 'Cohācjū ijire', tiquina niñe queoyere apequina ño peo, tiquina duhu peoe tiri ihyayere. Ti ihyayere yeequinare ihya dutire ticoro. ²¹Ticoro ñañene bujua witiatire cohtenimi. Yuhu sa cohtepegūta umua mehna ticoro ñano yeyere duhu duerari. ²²Yuhure tuhoya mūsa. Tiorore dohatigū yeitja. Ticoro mehna ñano yeriquina gūhure dohatigū yeitja. Sa ye tiquina tutuaro ñano yuhdūeta. Sata yeitja tiquinare ticoro mehna tiquina ñano yerire tiquina bujua witiaragū, tire tiquina duhueragū. ²³Sa yegu ticoro pohnene wejēitja. Yuhu sa yegū ihñañe ijipihtieyquina yeequina yuhu quehnoano masigu ijigū masieta. Masa tuhutuyere tiquina tutuaro cahmeñe gūhure masiaja. Yuhu sa masiñene masieta tiquina tiorore yuhu buhiri dahregū ihñañe. Ijipihtina mūsa ñañene yeri buhirire buhiri dahreitja mūsa. Sa yegu mūsa quehnoañene yeri wapa pehere quehnoano yeitja mūsa. ²⁴Apequina mūsa mehna cjēna Tiatira cjēna ticoro ye buheyere cahmedari. Mūsa pehe Satana ye buheyere 'Panopu tiquiro yahuerari jiri', tiquina niñe buheyere cahmedari mūsa. Sa yegu mūsa pehere duti nemosi yuhu. ²⁵Ahri dihitare ye duti nemoutja mūsa: Mūsa cahapu yuhu tojoa tato pano yuhu buheyere mūsa masidire ne mehenogā duhueracāhña. ²⁶⁻²⁷Ijipihtieyquina ñañene duhuyequinare, yeere sa yeducuyequinare puhtoa sōutja. Yuhu Pacu yuhure tiquiro puhtoro sōriro

sahata musa gūhure puhtoia sōutja. Ijipihtiye yehpari cjēna bui puhtoia sōutja musare. Sa puhtoia sajāna, musa docapu ijiyequinare ijipihtiye yehpari cjēnare tutuaro dutinata musa. Dihi suturire mari yucugū mehna pohagū duita wahtiro saha tiquina duita pihtia wahaeta. ²⁸Sa yegū musare yeere ne duhueyequinare ñahpicoha bohrea mūja tariare ohoutja musare. Sa yegū musa mehna ijiitja yūhū.

²⁹Cahmo tina ijire musa. Sa yena musa ye cururi cjēnare yeequinare Espiritu Santo tiquiro yahurire tuhoya musa”, ni ojoa oho basaya Tiatira cjēna yeequinare, tiquina puhtoro gūhure.

Sardis cjēnare Jesu yequinare ojoa oho basa dutiahye Ñure

3 Sardis cjēna yeequinare, tiquina puhtoro gūhure ohō saha ni ojoa oho basaya mūhū: “Yūhū siete pagū bajueyequinare Cohācjū yequinare cūogu ijiaja. Sa yegū siete ñahpicoha pacare cūogu ijiaja. Musare ohō saha ni yahuaja:

Musa yerire masiaja. Ohō saha ni tuhutumene apequina musare: ‘Tiquina Cohācjū yere quehnoano ye pehoyequina ijire’, ni tuhutumene musare apequina. Tiquina sa ni tuhotuepegūta Cohācjū yere quehnoano yerare musa. ²Sa yena quehnoano yeya musa ‘Ñañene yeari’, nina. Cohācjū yere musa masidire quehnoano wacūña, ‘Tiquiro yere duhuari’, nina. Cohācjū ihñagū quehnoano ye pehoerare musa. ³Sa yena yeere musa tuho mūhtarire quehnoano wacūña musa. Sa wacūña yeere yeya. Musa ñañe yerire duhuya. Yūhū nino saha musa yeragū wacūeno mehna musare buhiri dahreitja. Yaqueriquiro wacūeno mehna tiquiro yaquero sajāriro saha musare wacūeno mehna buhiri dahreitja. ⁴Ihquēquina musa mehna cjēna Sardis cjēna ñañene yeducuerare. Wete marieni suhtirore

musa sañaboriro saha ti ñañe yeyere piha duerare musa. Sa quehnoana ijina, yehseri suhtiro sañana yūhū mehna ijinata musa pehe. ⁵Ijipihtiequina yeere duhueyequina sata yehseye suhti sañaducuequina ijietā. Sa yeye yūhū mehna sa ijuducuatiquina wamene tiquiro ojoa ohōri tjuṗu tiquina gūhū tiquina wamene ojoa ohōnohriquina ijietā. Tiquina wamene tiquiro ojoa ohōrire cosesi yūhū. Yūhū Pacu ihñonopū, angele gūhū tiquina ihñonopū yeequina musa ijirire yahutja tiquinare.

⁶Cahmo tina ijire musa. Sa yena musa ye cururi cjēnare yeequinare Espiritu Santo tiquiro yahurire tuhoya musa”, ni ojoa oho basaya Sardis cjēna yeequinare, tiquina puhtoro gūhure.

Filadelfia cjēnare Jesu yequinare ojoa oho basa dutiahye Ñure

⁷Filadelfia cjēna yeequinare, tiquina puhtoro gūhure ohō saha ni ojoa oho basaya mūhū: “Yūhū ñañe mariegu ijiaja. Poto yegū ijiaja. Davi mūnāno panopū cjūno sawire tiquiro cūoboriro saha, masare tiquiro puhtoro ijiropū tiquiro pōoboriro saha yeitja yūhū. Sa yegū Cohācjū tiquiro puhtoro ijiropū sajātore yūhū pōogū ne apequina tire biha masiedare. Yūhū bihagū ne apequina pōo masiedare.

⁸Ijipihtiye musa yeyere masiaja yūhū. Wacū tutuera cjūna ijiepenata yūhū buheyere quehnoano tuhori musa. Sa yena yūhure, yee gūhure duhuerari musa. Sa yegū yeere cūu musare. Sa ye apequina ‘Tire yeracāhña’, ni cahmota masiedare musare. ⁹Sa yegū ohō saha yeitja: Apequina musa caha ijiyequina Satana yequina ijire. ‘Judio masa ijiaja’, niepeta judio masa waro ijierare. Tiquinare musa caha dusepe curi mehna quehe sa, musare ño peogū yeitja tiquinare. Yūhū sa yegū ihñañe

musare yuhu cahĩñene masieta tiquina. ¹⁰Musare yeere yuhu duhu dutieragũ tuhona quehnoano yuhtiri musa. Musa sa yegũ ihñagu ahri yehpa cjẽna ijipihtiyequina tiquina ñano yuhduati pje ijigũ musare cahmotautja. Ti pje ijipihtiyequina tiquina ñano yuhduati pje ijirota. ¹¹Mehenogã duhsare ahri yehpapũ yuhu tojoa tato. Yeere musa masidire boeracãña. Sa yena yuhure sa yuhtiducuya, musa quehnoano yeri wapare 'Boari', nina. ¹²Sa yegũ yeere sa yeducuyequinare yuhu Pacu ya wuhu cjẽna ijiatiquinare cũtja tiquinare. Tiquiro ya wuhu cjẽ botari ti yoari pje ijiducuro saha Cohãcjũ mehna ijiducugũ yeitja tiquinare. Sa ye tiquina mehna cjẽna sa ijiducuetã. Sa yegũ Cohãcjũ wuhu cjẽ botaripũ yuhu ojoa ohõno saha tiquinare tiquina paguripũ ohõ saha ni ojoa ohõutja: Cohãcjũ yuhu Pacu wamene, tiquiro ya maca wame gũhure ojoa ohõutja. Tiquiro ya maca wahma maca Jerusalẽ ijirota. Ti maca uhmusepũ Cohãcjũ cahapũ ahtari maca ijirota. Yuhu wahma wame cuoutja. Ti wame gũhure ojoa ohõutja tiquina paguripũ.

¹³Cahmo tina ijire musa. Sa yena musa ye cururi cjẽnare yeequinare Espiritu Santo yahurire tuhoya musa", ni ojoa oho basaya Filadelfia cjẽna yeequinare, tiquina puhtoro gũhure.

Laodicea cjẽnare Jesu yequinare ojoa oho basa dutiahye Nure

¹⁴Laodicea cjẽna yeequinare, tiquina puhtoro gũhure ohõ saha ni ojoa oho basaya muhu: "Yuhu poto yegũ ijiaja. Sa yegũ ni mehono marieno yuhu ihñarire, yuhu tuhõrre sa yahuducugũ ijiaja. Ijipihtiyere mari Pacu tiquiro yerire ye basagu ijiaja yuhu.

¹⁵Ijipihtiyere musa yerire masiaja yuhu. Yuhure wacũ tutuana ijiepenata mehenogã wacũ tutuana ijire musa.

Ohõ saha ijire ti: Aco yusueye aco asũ mehna asi busuye aco yero saha ijire musa. Sata ijieye acore mari coaero saha yuhure wacũ tutuera cjũna musa ijigũ yuhu gũhu musare coaeraja. Yuhure musa quehnoano wacũ tutuagũ quehnoaboaga yuhure. Yuhure musa wacũ tutueragũ ñariõboaga yuhure. Ti yuhduoro mehenogã wacũ tuana musa ijigũ ña yuhduare. ¹⁶Musa sa ijigũ ihñagu yabi yuhduaja yuhu. Ñañe acore yuhu sihco puti cohãno saha yuhure mehenogã wacũ tutuayequinare yabi yuhduaja yuhu. ¹⁷Sa yena ohõ saha ni tuhõtumene musa: 'Ijipihtiyere cuõaja. Ne yabe duhsaerare marine', ni tuhõtumene musa. Sa niepenata pejecuoyequina yero saha ijire musa. Sa yena suhti marieñequina bue tiro saha Cohãcjũ ihñonopũ musa ñañe yerire bue tiana ijire musa. Sa yena caperi bajueyequina tiquina ihña duayere tiquina masieno saha Cohãcjũ yere ne masiedare musa. ¹⁸Musa sa yena ijigũ ihñagu ohõ saha ni yahutja musare: Uru warore musa dúro saha quehnoañene yuhu cuoyere neña musa. Musare yuhure wacũ tutuagũ yeitja. Sa yena potota Cohãcjũ ye mehna pajiro cuõnata. Sa yena yehseri suhtirore musa dú musa sañano saha yuhu dii cohãri mehna yuhu yariari mehna musa ñañe yerire cosenohrina ijiya. Sa yena quehnoañe suhti sañañequina tiquina bue tiero saha musa ñañene cosenohrina ijina ne bue tisi musa gũhu. Sa yena musa caperire musa aco tiri bato quehnoano musare caperi bajuro saha Cohãcjũ yere quehnoano tuhoya, musa masino quehnoano.

¹⁹Ijipihtiyequina yuhu cahĩñequinare yahuaja. Sa yegũ yuhu cahĩñequina tiquina ijigũ ihñagu, tiquina yuhtieragũ tiquinare buhiri dahreaja, tiquinare yedohogu tuhũ. Sa yena yee pehere tutuaro cahmeña. Sa yena ñañene duhuya.

²⁰ Tuhoya yuhure. Musa wuhure bihari wuhure yuhu esaduca yuhu sajā duaboriro saha musa mehna cjū iji duagu niaja. Yuhu sa ye duagū tuhona yuhure musa mehna iji dutiya. Yeequina ijiya. Musa sa ye dutigū musa mehna ijiitja. Sa yegu mari siho ihyaro saha musa mehna quehnoano ijiitja. Sa yena yuhu mehna cjāna ijinata musa. ²¹ Ñañene yuhu cohāri bato yuhu Pacu puhtoro tiquiro dujiro cahapu dujiaya yuhu gūhu dutigu tūhu. Sata musa gūhu ñañene musa duhuri bato yuhu puhtoro dujiro cahapu dujinata musa dutina tana. Musare yuhu cahapu dujigū yeitja.

²² Cahmo tina ijire musa. Sa yena musa ye cururi cjēnare yeequinare Espiritu Santo tiquiro yahurire tuhoya musa”, ni ojoa oho basaya Laodicea cjēna yeequinare, tiquina puhtoro gūhure, nidi yuhure ojoa dutiriquiro.

**Uhmusepu Cohācjū cahapu
dusepe curi mehna quehe sa
tiquina ño peoyere ihñahye Ñu**

4 Yuhure tiquiro sa ni yahuri bato uhmusepu pōori sopecahare ihñau. Pari turi corneta tutuaro bisiro saha tutuaro yahuducuye bisiro ca tari, yuhu tuhogū. Ohō saha nidi yuhu tuhogū.

—Ohōpu mūja taya. Ahri yuhu yahuati camepūre sijoro saha wahaota. Sa wahatire mūhure ihñoutja. Yuhu nidiro sahata wahaota, nino ca tari uhmusepu.

² Tiquiro sa ni yahugūta topu mūja esagu Espiritu Santo tutuaye mehna ihñagu nii. Sa yegu puhtoro dujirore uhmusepu ihñau. Topu ihcāquiro dujiri. ³ Sa yero quehnoano asi siteriquiro dujiri. Jaspe wame tiri utā yero saha, cornalina wame tiri utā yero saha quehnoano asi siteriquiro dujiri tiquiro. Sa yero buheni da esmeralda yero saha asi siteri da docapu dujiri tiquiro. ⁴ Sa yero tiquiro dujiro cahapu veinticu-

tro dujiyere ihñau. Ti dujiye puhtoa ye dujiye yuhu ihña muhtariquirore duji behtoari. Ti dujiyepu veinticuatro Jesu yequina puhtoa dujiri. Yehseye suhti sañañequina ijiri. Sa ye puhtoa pesaye behtori uru behtorire pesariquina ijiri tiquina. ⁵ Yuhu ihña muhtariquiro dujiropu miadoqueori. Sa yero sijoro saha ijiro bisiro ca tari. Upo gūhu bisiro ca tari. Ti dujiro poto siete sihāne paca ijiri. Siete sihāne paca mehna tiquiro queoye mehna buhegū Cohācjū yequina siete pagu bajueyequina ijiri. ⁶ Sa yero tiquiro dujiro poto pajiri ma yero saha vidrio yero saha, quehnoano aco sitiri ma yero saha ijiri.

Ti dujiro cahapu pititiaro sijoro saha bajueyequina ijiri. Tiquina paguri paa pehe gūhure tiquina behero pehe pehe gūhure peye caperi tiyequina ijiri tiquina. ⁷ Yuhu ihña muhtariquiro sijoro saha bajuriquiro yairo sohāriquiro yero saha bajuri. Tiquiro bato ijiriquiro wecu yero saha bajuri. Tiquina bato ijiriquiro masuno wuhdoa saha wuhdoa tiriquiro ijiri. Tiquina ihtiaro bato ijiriquiro cacu wūye dūpurire seō dujiriquiro yero saha bajuri. ⁸ Tiquiro seis dūpuri wūye dūpuri tiriquiro ijiri. Tiquiro mehna cjēna gūhu sa dihita wūye dūpuri tiri. Sa ye tiquina wūye dūpuri pua peheriputa peye caperi tiye dūpuri ijiri. Sa ye decoripe, ñaminipe sa basaducuye nidi. Ne basa duhuerari. Ohō saha ni basari:

Quehnoariquiro, quehnoariquiro, quehnoariquiro, Cohācjū mari puhtoro tutua yuhdūriquiro ijire. Tiquiro panoputa sa ijiducuahye. Yojobu gūhure sa ijiducure. Camepu ahtarota, ni basaducuye nidi.

⁹ Sa basaye tiquina pititiaro sijoro saha bajueyequina tiquiro tutuayere basa peoye nidi. Sa ye tiquirore ijipihtiye decori ijiducuriquirore ño peoye

“Quehnoare”, niñe nidi. ¹⁰Tiquina sa ye peogū ihñañe veinticuatro Jesu yequina puhtoa pehe puhtoro dujiropu dujiriqiro poto dusepe curi mehna quehe sa, tiquirore ño peori. Tiquiro ijipihitiye decori ijiducuriqiro ijire. Sa ño peoye tiquina puhtoa pesaye behtorire tiquiro dujiro caha doque peori. Sa doque peoye ohō saha nidi tiquina:

¹¹Mūhu Cohācjū usā puhto waro ijire. Tutuagu, quehnoagu ijire mūhu. Mūhu usā ño peoguta ijigu nine. Mūhure sa ño peoducuro cahmene usāre. Ijipihitiyere bajumehnedigu ijire mūhu. Mūhu cahmediro sahata ti ijipihitiyere bajumehneahye mūhu, nidi tiquina Cohācjūre, topu dujiriqirore.

Ojoari pūre torēdi tunure cordero gūhure yahuahye Ñu

5 Came topu dujiriqiro tiquiro omoca poto pehe tiquiro cūori pūre ojoari pūre ihñau. Ti pū pua peheri ojoari pū tiquiro torēdi tunu ijiri. Sa yero siete piha ñeheñe mehna tiquiro piha ñehedi tunu ijiri. ²Sa yegu tutuariqiro angelre ihñau. Tiquiro tutuaro yahuducuye mehna ohō saha ni yahuri:

—Ahri tunure piha ñeheñene quehnoariqiro dihita tūhrē masine. ¿Diquiro pehe ijajari tūhrēatiqiro? nidi tiquiro angel.

³Sa nieperota tiquina ti tunure tūhrēatiqirore bocaerari. Ti tunure tūhrēatiqirore, quehnoariqirore bocaerari. Ūhmusepū, ahri yehpapū, catiyequina watoapū, yaria tuhasariquina watoapū ne ti tunure ñeheñene tūhrēatiqiro mariedari. Sa yero ti tunure buheatiquiro mariedari. ⁴Sa yegu tūhrēatiqirore, ti pūre buheatiquirore tiquina bocaeragū ihñagu tutuaro utii yūhu. ⁵Yūhu sa utigū ihñano ihcāqiro Jesu

yequina puhtoa mehna cjāno ohō saha nidi yūhure:

—Utieracāhña. Ti tunure ñeheñene ihcāqiro tūhrē masine. Tiquiro Judá ya curua cjāno tutuariqiro ijire. Tutuariqiro ijiro “Yairo sohāriqiro”, tiquina ni pisuriqiro ijire. Tiquiro puhtoro Davi panamino iji turiariqiro ijire. Watinore yūhdūdūcariqiro ijire tiquiro. Sa yero tiquiro ti tunure siete ñeheñene tūhrē masidiquiro ijire, nidi tiquiro yūhure.

⁶Tiquiro sa nigū tuhogu puhtoro dujiro poto cordero ducugū ihñau. Pititiaro sijoro saha bajuyequina, Jesu yequina puhtoa gūhu tiquina watoa ducuri cordero. Tiquiro tiquina wejēdiqiro mūnano saha bajuri. Siete sahari tiriqiro, siete caperi tiriqiro ijiri. Ti siete caperi mehna tiquiro queoye mehna buhegū Cohācjū yequina pagu bajuyequina siete bajuyequina yero saha ijire. Tiquina tiquiro yequina pagu bajuyequina ijipihitiro ahri yehpapū Cohācjū ohoriquina ijiri. ⁷Sa yero cordero pehe puhtoro dujiro cahapu esaro, tiquiro poto pehe cūori tunure tuā we nedi tiquirore. ⁸Tiquiro sa tuā we negū ihñañe cuatro sijoro bajuyequina, veinticuatro puhtoa gūhu cordero poto dusepe curi mehna quehe sa, tiquirore ño peori. Tiquina puhtoa ijipihitiyequina arpa wame tiye bua putēñene, uru pari gūhure cūori. Ti pari bueye ehme sitiye quehnoano wahpaye pose tiye pari ijiri. Ti ehme sitiye mehna tiquiro queoye mehna buhegū Cohācjū yequina tiquirore tiquina sini basari yero saha ijiri. ^{9–10}Sa tiquirore ño peoye ohō saha ni wahma basayere tiquina basa peori tiquirore:

Mūhu tiquina wejēdigu ijire. Sa yegu mūhu dii cohāri mehna usā ñañe yerire coseri mūhu Cohācjū yequina usāre iji dutigu. Sa yegu usāre ijipihitiye cururi cjanare, ijipihitiye

yahuducuyere yahuducunare, ijipihitiye yehpari cjanare usape usare ijipihitinare mure cahmena dihitare usa nane yerire muhu dii cohari mehna cosere muhu Cohacju yequina usare iji dutigu. Usare ijipihitinare Cohacju yequina ijiatunare cūri muhu. Sa yegu pahia cūri muhu usare Cohacju cahacjana usare iji dutigu. Sa yegu peye yehpari cjana bui puhtoā sōri muhu usare. Sa yerigu ijigu muhu ti tunure piha nehehene tuhrēacju ijire muhu, ni basa peori tiquina corderore.

¹¹ Pari turi ihnagu millones angele parire ihna. Puhtoro dujirore pititiro sijoro saha bajuyequinare, veinticuatro puhtoare angele pehe tiquinare wahme dca sari. Tiquina angele pari tutuaro tiquina sañuducu peogū ihna. ¹² Ohō saha ni tutuaro yahuducu peori tiquina: Cordero tiquina wejēdigu muhu ijipihitiyequinare dutigu, ijipihitiyere cōogū, masi pehogū, tutua yuhdugu ijire muhu. Masa tiquina nane buhiri tiquina wejēdigu muhu ijigū ihnana sa ni nō peoaja mure. “Quehnoa yuhdugu ijire”, ninatja mure. Mure quehnoano yahuducunatja, ni yahuducu peori angele pari.

¹³ Sa yegu apequina gūhure tiquina yahuducu peoye ca tagū tuhou. Ijipihitiyequina umuse cjana, ahri yehpa cjana, catiyequina, yariariquina gūhū, pajiri ma cjana, ijipihitropū ijiyequina ohō saha ni yahuducu peoye ca tari:

Cohacjūre muhu dujiropū dujigūre, Cordero gūhure musare pūanare quehnoano yahuducunatja. Musare nō peonatja. “Quehnoa yuhdūna ijire. Tutua yuhdūna ijire”, nina, ijipihitiye decori sa niducunatja musare, ni yahuducu peoye ca tari.

¹⁴ Sa ye tiquina pititiro sijoro saha bajuyequina tiquina sa yahuducu peogū

tuhoje “Sata ni yahuducu peoahro”, nidi. Sa ye Jesu yequina puhtoā pehe dusepe curi mehna quehe sa Cohacjūre, Cordero gūhure nō peori.

Papera tunure tiquiō nedi tunure piha nehehene tuhrēne Cordero

6 Came papera tunure tiquiō nedi tunure Cordero piha nehe muhtaritore tuhrēdi. Tiquiō sa tuhrēgū ihna. Tiquiō sa tuhrēdi bato ihcāquiō sijoro saha bajuyequina mehna cjana, “Ihnana ahtaya”, nidi. Sa nino upo yero saha bisiri tiquiō.

² Tiquiō sa nidi bato ihna yūhū. Yehseriquiō caballore ihna. Tiquiō bui pesariquiō bēdure cōori. Tiquiōre puhtoro pesari behtore ohori apequiō pehe. Tiquiō sa ohori bato tiquiō pehe tiquiōre ihna tuhtiyequinare yuhdūcaro wahari.

³ Came ihcāno nehenore tuhrē tuhasa Cordero apero nehenore tuhrēdi tja. Tiquiō sa tuhrēdi bato apequiō sijoro saha bajuyequina mehna cjana “Ihnana ahtaya”, tiquiō nigū tuhou tja.

⁴ Sa yegu apequiō caballore sohāriquiōre ihna tja. Tiquiō bui pesariquiōre tutuayere ohori apequiō pehe. Ahri yehpa cjanare cahme wejē dutiatiquiōre cūri tiquiōre. Sa ye ijipihitiro cjana cahme wejēta ahri yehpapū. Sa yero pajiri pji noseni pjine ohori tiquiōre.

⁵ Came pūarore tuhrē tuhasa Cordero apero nehenore tuhrēdi tja. Tiquiō sa yegū pūaro tiquina yahuducuri bato apequiō sijoro saha bajuyequina mehna cjana “Ihnana ahtaya”, tiquiō nigū tuhou.

Tiquiō sa nidi bato niniquiō caballore ihna. Tiquiō bui pesariquiō balanza nūcūne queorore cōori. ⁶ Tiquiōre yūhū ihnari bato sijoro saha bajuyequina watoapū ohō saha bisiro ca tari:

—Ihcā deco dahrari wapa mehna trigore ihcā kilota dúeta masa. Ihcā deco dahrari wapa mehna cebada wame tiye pjerire ihtia kilota dúeta masa. Trigo, cebada gūhū pihtia waharota. Sa ye ti wapa bujaninota. Sa ijiepegūta ihyaye dahreye uhse, vino gūhū peye ijininota, nino ca tari.

⁷ Came ihtiarore tuhrē tuhasa Cordero apero ñehenore tuhrēdi tja. Tiquiro sa tuhrēdi bato apequiro sijoro saha bajuyequina mehna cjūno iji bato tiriquireo “Ihñana ahtaya”, nidi tja.

⁸ Tiquiro sa nigū tuhogū opoariquireo caballore ihñau. Tiquiro bui pesariquireo “Yariagū yeriquiro”, wame tiri. Sa yero tiquiro bato ahtariquireo “Peca”, wame tiri. Sa yero tiquinare tutuayere ohori apequiro pehe. Ahri yehpapure deco mehna ijieyequina docapū peyequina masare wejē dutiri. Cahme wejēñe mehna, ujuā ahbaye mehna, dohatiye mehna, wahiquina nūcūri cjēna usuayequina mehna peyequina masare tiquina wejēatire cūri tiquinare.

⁹ Came pititiaro ñehedire tuhrē tuhasa Cordero apero ñehenore tuhrēdi tja. Tiquiro sa tuhrēgū altar docapū Jesu yequinare tiquina wejēdiquina jeripohnarine ihñau. Cohācjū yere tiquina yahuri buhiri, “Jesu yequina ijiaja”, tiquina ni yahuri buhiri tiquinare wejēdi jiri. ¹⁰ Tiquina sañuducuye ohō saha nidi Cohācjūre:

—Mūhū usā puhto, ñañe mariegū, ni mehoñe mariegū, mūhū nidiro sahata yegū ijire mūhū. ¿Ahri yehpa cjēnare, usāre wejēdiquinare dūhse ijigū buhiri dahreitjari mūhū? ni sañuducuri tiquina.

¹¹ Sa yero tiquinare yehseye suhti yoaye suhtire ohori. Tiquinare sa ohoro ohō saha nidi tiquinare:

—Sorīña. Apequina mūsa acaye Jesu yequina mūsa yeriro sahata yojopū gūhūre quehnoañe buheyere buheniñe nine. Mū sare tiquina wejēdiro sahata

tiquina gūhūre tiquina wejē pehoato dūhsarīne. Sa yena tiquinare ijipihtiyequinare tiquina wejēato pano mehenogā sorīña mūsa, nidi tiquinare.

¹² Came ihcā omope ñehedire tuhrē tuhasa Cordero apero ñehenore tuhrēdi tja. Tore tiquiro sa tuhrēgūta tutuaro yehpa ñuhmidi. Sa yero asū deco cjūno ñiniquireo wahari. Ñini suhtiro yero saha ñiniquireo wahari. Sa yero asū ñami cjūno dii yero saha sohāriquireo wahari. ¹³ Sa ye ñahpicoha paca yehpapū bora dijiaa wahari. Yucu dūca yahsayere wihnono wē bure dijioro saha ñahpicoha paca bora dijiaa wahari. ¹⁴ Sa yero uhmūse butia wahari. Papera tunure mari torēgū bajuero saha bajuerari uhmūse. Sa ye ijipihtiye cūnū cjū gūhū, nūcūpo gūhū ape siepū esadūcari. ¹⁵ Sa wahagū ihñañe, ahri yehpa cjēna puhto cūnū cjū cjē utā wūhusepū duhtiri. Apequina puhto, surara puhto, doeri cjē opana, tutuayequina, ijipihtiyequina tiquina cahacjēna, cahacjēna ijieyequina gūhū topūta duhtimedī. ¹⁶ Sa duhtiye, cūnū cjūre, utā wūhuse gūhūre ohō saha nidi:

—Usā bui bora pjeya. Usāre nūoña. Siquiro puhtoro, dujiropū dujiriquireore cue yūhduaja. Cordero usāre ñano buhiri dahrerota. Sa yena nūoña usāre. ¹⁷ Ijipihtiyequinare tutuaro buhiri dahreati deco iji tuhasare. Sa ye ti buhiri dahreatire ne ihcāquireo duhtiriquireo ihcāno sahasi, nidi tiquina ijipihtiyequina.

Israe masa pagurire Cohācjū tiquiro wame ña ohōatire yahuahye Ņu

7 Came pititiaro angelere ihñau. Tiquina ijipihtiropū wahari. Ihcāquireo nortepū waharo topū ahtari wihnonore ahtaeragū yeri. Apequiro surpū, apequiro asū mūja taropū, apequiro asū sajānopū wahaye, nortepū wahariquireo yero saha yeri tiquina

gūhū. Sa yero ahri yehpapū, pajiri mapū gūhure ne wiwnono ahtaerari. Ne ihcādū yucūgure wiwnono nūhmigū yerari. ²Sa yegū apequiro angelre ihñau tja. Asū mūja taropū ahtaro nidi tiquiro. Cohācjū catiriquiro tiquiro wame ña ohōnore ne cāhtaro nidi tiquiro. Sa ne cāhtaro apequina pititiaro angelere tiquiro sañuducuri. Tiquina angele pehe ahri yehpare, pajiri ma gūhure Cohācjū tiquiro ñano wahagū ye dutinohriquinapū ijiri. ³Tiquinare sañuducuro ohō saha nidi angel:

—Cohteniña. Cohācjū cahacjēna tiquina wūhdoa pacare tiquiro wamene ohōna tana niaja. Usā sa ohōato pano ahri yehpare, pajiri mare, yucuri gūhure ñano wahagū yeracāhña mūsa, nidi tiquiro apequina pititiaro angelere.

⁴Sa yero Cohācjū tiquiro wame mehna tiquina wūhdoa pacare tiquina ohōatiquinare “Ohōpequina ijire”, ni yahuri yūhure ihcāquiro. Israe masa doce cururi cjēna ciento cuarenta y cuatro mil masa tiquina ohōatiquina ijiñohti.

⁵Ahriquina ijiñohti tiquina ohōatiquina: Doce mil masa Judá panamena iji turiayequina tiquina ohōatiquina ijiri. Apequina doce mil masa Rubē panamena iji turiayequina tiquina ohōatiquina ijiri. Apequina doce mil masa Gad panamena iji turiayequina tiquina ohōatiquina ijiri.

⁶Apequina doce mil masa Aser panamena iji turiayequina, apequina doce mil masa Neftalí panamena iji turiayequina, apequina doce mil masa Manase panamena iji turiayequina tiquina ohōatiquina ijiri. ⁷Apequina doce mil masa Simeo panamena iji turiayequina, apequina doce mil masa Leví panamena iji turiayequina, apequina doce mil masa Isacár panamena iji turiayequina tiquina ohōatiquina ijiri. ⁸Apequina doce mil masa Zabulón panamena iji turiayequina, apequina doce mil masa José panamena iji turiayequina, ape-

quina doce mil masa Benjami panamena iji turiayequina tiquina ohōatiquina ijiri. Topequinata ijipihtiyequina masa ciento cuarenta y cuatro mil tiquiro wame mehna tiquiro ohōatiquina ijiri.

Peyequina yehseye suhti sañañequinare yahuahye Ñu marine

⁹Came peyequina masare ihñau. Ijipihtiye yehpari cjēnare, ijipihtiye cururi cjēnare, ijipihtiye yahuducuyere yahuducuyequinare, ijipihtiye macari cjēnare peyequinare Cristore cahmeñequina dihitaro topū ducuyequinare ihñau. Pūhtoro dujiro potō, Cordero caha ducuri tiquina masa. Peyequina masa ijiri. Sa ye queo pehoyequina ijierari. Yehseye suhti sañañequina ijiri tiquina. Sa ye iqui pohnarine cūori. ¹⁰Sa ye tiquina ijipihtiyequina ohō saha ni tutuaro sañuducuri:

Cohācjū ijire usāre yūhdūoriquiro. Tiquiro dujiropū dujiriquiro ijire. Cordero gūhū usāre yūhdūoriquiro ijire, ni sañuducuri tiquina.

¹¹Sa ye ijipihtiyequina angele, Jesu yequina pūhtoa gūhū, sijoro saha bajuyequina mehna pūhtoro dujiro cahapū ducuri. Sa ducuye tiquiro dujiro potō dusepe curi mehna quehe sa, Cohācjūre ño peori. ¹²Ohō saha ni ño peori tiquina: Sa tjire. Cohācjū usā pūhto, mūhure quehnoano yahuducujaja. Quehnoa yūhdūagū ijire mūhū. Masi pehogū ijire mūhū. Mūhure “Quehnoare”, niaja. Mūhure ño peoja. Tutua yūhdūagū ijire mūhū. Mūhū tutuaye mehna yerigū ijire mūhū. Sa ijiducugū ijire mūhū ijipihtiye decori. Sa tjire, ni ño peori tiquina.

¹³Sa yero ihcāquiro Jesu yequina pūhtoa mehna cjēno yūhure sinituri:

—¿Ahriquina yehseye suhti sañañequinare masiajari mūhū?

¿Tiquina ahtaritore masiajari m̄h̄u? ni sinituri yuh̄ure.

¹⁴Tiquiro sa nigū tuhogu,

—Masiedaja, ni yuhtii.

—¿Noa ijjajari tiquina? ni sinituu tiquirore.

Yuh̄u sa nigū tuhoro oh̄o saha nidi yuh̄ure:

—Ahriquina ña yuh̄duaro yuh̄duri deco ijigū ihcāno sahayequina ijire. Tiquina suhti cosenohriquina tiquina ijiro saha Cordero tiquiro dii cohāno mehna tiquina ñañene cosenohriquina ijire. Sa ye quehnoano yehseye suhti sañañequina ijire.

¹⁵Sa tiquiro cosenohriquina ijiye Cohācjū dujiro poto tiquirore sa ño peoducure. Decoripe, ñaminipe tiquirore sa ño peoducure, pahia Cohācjū wuh̄p̄u tiquina yeriro saha. Sa yero tiquina mehna sa ijjiducuro, tiquinare yedohorota Cohācjū “Sijoro saha wahari”, nino. ¹⁶Ne pari turi ʋj̄ua ahbasi tiquina. Sa ye ne aco wuosi tiquina. Ne asū deco cjūno asiyere tiquina asiye posi. Tutuaro asiye tiquinare ñano yuh̄dugū yesi.

¹⁷Puhtoro dujiro poto ducuriquiro Cordero tiquinare ih̄ña ihborota. Ovejare ih̄ña ihboriquiro yero saha tiquinare ih̄ña ihborota. Sa yero m̄ari pohterip̄u catigū yeye m̄ari pohterip̄u tiquinare uhm̄u t̄a cānota, ovejare ih̄ña ihboriquiro tiquiro uhm̄u t̄a cāno saha. Sa yero sa bucueducugū yerota tiquinare. Sa ye ne pari turi utisi tiquina, nidi Jesu yequina puhtoah̄ mehna cjūno yuh̄ure.

Seis papera tunurine tiquina piha ñehedire tuh̄rē tuhasaro aperore tuh̄rēah̄ye tja Cordero

8 Seis papera tunurine tiquina piha ñehedire tuh̄rē tuhasaro aperore

tuh̄rēdi tja Cordero. Tiquiro sa tuh̄rē tuhasagū hora deco top̄u uhm̄usep̄u quehnoano dihta mariaa wahari.

²Sa yegu siete angelere Cohācjū poto ducuyequinare ih̄ñau. Sa yero tiquinare siete cornetarire ohori apequiro. ³Apequiro angel uru pare bueye ehme sitiye pose yeati pare cuoriquiro altar cahap̄u esa, ducuri. Top̄u tiquiro ducugū peye ehme sitiye tiquirore ohori ijipihtiyequina Cohācjū yequina tiquirore tiquina sinidi mehna moreatire. Sa yero uru altarp̄u Cohācjū dujiro caha ijiri altarp̄u ti ehme sitiye bueri Cohācjūre. ⁴Sa ye angel tiquiro cuori pa cjē ehme sitiye altarp̄u tiquiro poho siteri bato ti ehme sitiye cjē ohmeo Cohācjū yequina tiquirore tiquina sinidi mehna mujaa wahari.

⁵Sa wahari bato altar cjē nitine ti pap̄u wehe s̄aa tuhasa, yehpap̄u doque cūri. Tiquiro sa doque cūgūta mia sitedoqueo, tutuaro ʋpo pari. Sa yero sijoro saha ijiro bisi maa, yehpa ñuhmi maari.

Cornetarire yahuah̄ye Ñu

⁶Came siete angele tiquinape tiquina cornetarire putie tee nidi.

⁷Ihcāquiro angel tiquiro yariare puti muhtari. Tiquiro sa putigū aco paca yusuaye paca, peca mehna, dii mehna moreñe paca yehpap̄u doque dijiori. Sa doque dijioğūta yehpa ʋj̄ua wahari. Oh̄o puno ʋj̄uri: Ahri yehpa deco esaro taro yemehno ʋj̄ua wahari. Sa yero to puno poseta yucuri gūhu, taa gūhu ʋj̄ua wahari.

⁸Angel ihcāquiro tiquiro sa puti muhtari bato apequiro angel tiquiro yaria cornetare putiri tja. Tiquiro sa putigū pajidu cunu yero saha bajudu quehnoano ʋj̄uducudu pajiri map̄ure waha maa ñojoaa wahari. Sa yero yehpa ʋj̄uriro puno to punota pajiri ma dii ma dojoa wahari. ⁹Sa ye pajiri ma cjēna

wahi deco mehna meheno esaboro yariaa wahari. Sa ye tope yucʻsari gūhu minia wahari pajiri mapure.

¹⁰ Puarō angele tiquina putiri bato apequiro angel gūhu tiquiro yaria cornetare putiri tja. Tiquiro sa putigū pajiria ñahpicoha, sihāria yero saha asiria yehpapu bora sa quehea wahari. Ahri yehpa cjē mārī deco mehna meheno esaboro tope mārī bui bora sa quehea wahari ñahpicoha. Tope mārī pohteri bui bora sa quehea wahari. ¹¹ Tope mārīta sūēñe mārī wahari. Sa wahagū peyequina masa ti mārī cjē acore sihnime, yariaa wahari. Tia ñahpicoha “Sūēña”, wame tiri.

¹² Ihtiaro angele tiquina putiri bato apequiro angel gūhu tiquiro yaria cornetare putiri tja. Tiquiro sa putigū asū deco cjūno, ñami cjūno gūhu deco mehna meheno esaboro dojoa wahari. Ñahpicoha pari gūhu deco mehna meheno esaboro tope pacata dojoa wahari. Tope paca ūhmuse cjē paca quehnoano buhrioterari. Decopu pititia hora waro asū deco cjūno ne buhrioterari. Ñamine pititia hora waro asū ñami cjūno, ñahpicoha pari gūhu ne buhrioterari.

¹³ Came ihñadoque m̄ou tja. Ūhmusepu w̄riquirore cacure ihñau. Sa yegu tiquiro sañuducugū t̄hou. Ohō saha nidi tiquiro:

—Ña yuhduare. Ña yuhduare. Ihtiaro angele d̄hsari yojopu putiatiquina. Tiquina putiri bato ña yuhduaro waharota. Sa wahagū ahri yehpapu ijiequina ña yuhduaro yuhdueta, nidi tiquiro.

9 Came pititiaro angele tiquina putiri bato apequiro angel tiquiro yaria cornetare putiri tja. Tiquiro sa putigū ñahpicoha yero saha ijiriquiro angel ūhmusepu bora dijia tariquirore ihñau. Sa yero tiquirore ūhcuāri cope cjā sawire oho. ² Sa yero tiquiro ti copere tiquiro

pōogū peca ohmeo wijiari. Pajiri peca cjē ohmeo yero saha pajiro ohmeo wijiari ti copere. Sa wijiario ti ohmeo duita asū deco cjūnore, ūhmuse gūhure butia wahagū yeri. ³ Sa ye ti ohmeo puhipapū ijiequina poreroa yehpapū ahtari. Sa ye cutipa tiquina tutuaro purīno saha tiquina gūhu tutuaro purīdi. ⁴ Sa yero taare, yucurire, apeye oteyere ñano ye dutierari tiquinare. Masa dihitare ñano ye dutiri tiquinare. Cohācjū wamene tiquina wuhdoa pacare ohōmehneñequina dihitare ñano ye dutiri tiquinare poreroare. ⁵ Sa ñano ye dutieperota tiquinare wejē dutierari. Tiquinare wejē dutieraperota ihcā omope asūri waro tiquinare ñano purīgū ye dutiri. Cutipa toaye tiquina purīno saha purīgū yeyequina ijiri poreroa gūhu. ⁶ Tiquinare tiquina sa purīgū yegū masa yariaa duaeta. Tiquina sa yaria duepegūta tiquinare yaria dutisi.

⁷ Poreroa pehe caballoa yero saha bajuri. Tiquina cahme wejēato pano caballoare tiquina suhti sāraro saha sa bajuequina ijiri tiquina poreroa gūhu. Tiquina dapu paca bui puhtoa pesaye behtori uru behtori yero saha bajuri. Tiquina wuhdoa paca masa yero saha bajuri. ⁸ Tiquina poari numia poari yero saha ijiri. Sa ye tiquina upiri yayia upiri yero saha ijiri. ⁹ Jeripohna cahmotari cahsero come cahsero yero saha bajuri tiquina cutiro. Sa ye tiquina wugū peyequina caballoa omañequina tiquina omano saha tiquina wugū bisiri. Caballoa tunuñe paca wejeyequina tiquina cahme wejēnopu wahaye, tiquina bisiro saha bisiri poreroa wugū. ¹⁰ Sa ye cutipa picōno tiro saha, toaria tiquiro curo saha ijiri tiquina poreroa. Sa ye tiquina toaye paca mehna toaye, ihcā omope asūri waro masare purīgū yeri. ¹¹ Sa ye tiquina puhtoro tiyequina ijiri. Ūhcuāri cope upuro ijiri tiquina puhtoro. Tiquiro angel ijiri. Hebreo ye mehna

Abadón wame tiri tiquiro. Griego ye mehna Apolión wame tiri. (Apolión “Dojomehneniquiro” nino nine.)

¹² Poreroa masare ñano tiquina purīgū yeri bato ahri tiquina ñano yuhdu muhtariro pihtia wahari. To bato pua taha pari turi ñano yuhdueta masa.

¹³ Came ihcā omopequina angele tiquina putiri bato apequiro angel tiquiro yaria cornetare putiri tja. Tiquiro sa putigū Cohācjū caha ducuri altarpū uru altarpū yahuducuye bisi wijiario ca tari. Ti altar cjē sahari pititia saharopū yahuducuye bisi wijiario ca tari. ¹⁴ Sa yahuducuro cornetare putiriquiro angelre yahuri:

—Eufrates wame tiri ma pajiri mapū peresupū ijiyequinare angelere wioya. Tiquina pititiaro angele ijire, nino ca tari.

¹⁵ Sa nigū tuhoro angel pehe tiquinare pititiarore wiori, peyequina masare wejēatiquinare. Ahri cūhmare, ahri asūre, ahri decore, ahri horare queoro cohteye nidi tiquina pititiaro angele. Tiquina cohteriro esa tuhasare. Sa ye wejēne tee nine. Ijipihtiyequina deco esaboro caha masare wejēatiquina ijire. ¹⁶ Sa yegū tiquina yequina surarare “Ohōpequina ijire”, tiquina nigū tuhoro. Tiquina caballoa bui pesayequina ijiri. Doscientos milones surara ijiri.

¹⁷ Sa yegū caballoare tiquina bui pesayequina gūhure ihñau. Sa ye caballoa bui pesayequina tiquina jeripohnarine cahmotaye suhti come suhti sohāñe suhti, yahsaye suhti, bojoyaye suhti ijiri. Sa ye caballoa tiquina dapu paca yayia sohāñequina yero saha bajuri. Tiquina duseripū peca, ohmeo, azufre wame tiye ohmeo gūhū wijiari. ¹⁸ Sa ye caballoa duseripū wijiaye masare wejēdi. Ijipihtiyequina deco mehna meheno esaboro waro topequina masare wejēdi. Sa ye peca mehna, ohmeo mehna, azufre mehna peyequina masare wejēdi.

¹⁹ Tiquinare caballoa duseri mehna wejēdi. Sa ye caballoa picōri mehna wejēdi tja. Tiquina picōri sohtoapū añaa dapu paca yero saha bajuri. Sa ye tiquina picōri mehna ñano yeri tiquina masare.

²⁰ Peyequina masa yarieyequina tiquina wejē duhariquina pehe tiquina ñañe yerire ne duhuerari. Watiare ño peo duhuerari. “Cohācjū ijire”, tiquina niñe queoye gūhure ño peo duhuerari. Ti queoye uru mehna, plata mehna, bronce wame tiye come mehna, utā mehna, yucuri mehna tiquina yeri queoye ijiri. Sa ye ti queoye pehe ihñedari. Tūhoerari. Tiniedari. ²¹ Peye ñañe gūhure tiquina ne bujua witierari. Masare tiquina wejēdire, tiquina numia mehna tiquina ñano yerire, tiquina yaqueri gūhure ne bujua witierari tiquina. Sa ye masare ujuayequina yayia tiquina yero saha yeye, ti gūhure ne bujua witierari tiquina.

Meheni tunugāre papera tunugāre ne cāhtahye angel

10 Came apequiro tutuariquiro angel uhmusepū tiquiro dijia tagū ihñau. Ehmeo curua watoapū ahtari. Sa yero buheni da tiquiro dapu bui pesari. Tiquiro wuhdoas asū deco cjāno yero saha asi siteri. Tiquiro ñecari ujūri peca yero saha bajuri. ² Sa yero meheni tunugā papera tunugāre tiquiro pāri tunugāre cūori tiquiro. Tiquiro dahpocā poto pehe cjā dahpocā mehna pajiri mapū cūhta cūri. Tiquiro dahpocā cū pehe pehe mehna dihtapū cūhta cūri. ³ Sa ducuro yayia tiquina sañuducuro saha tiquiro tutuaro sañuducuri. Tiquiro sa sañuducuri bato siete upoa yahuye ca tamedī. ⁴ Tiquina sa yahugū tuhogū ojoa dūcami. Yuhū sa ojoa dūcagūta uhmusepū yuhūre yahuducuro ca tari.

—Siete upoa tiquina nidire apequinare yahueracāhña. Sa yegū tire ojoa nedacāhña, nino ca tari yuhure.

⁵Tiquiro sa nidi bato pajiri mapure cūhta cū, dihtapure cūhta cūriquiuro angel tiquiro omoca poto pehe siōdoque mūori ũhmusepu. ⁶Sa siōdoque mūono Cohācjū sa catiducuriquiuro wame mehna wame peori. Tiquiro Cohācjū pehe ijipihtiyere ũhmūserere, ũhmūserere cjēne, ahri yehpare, ahri yehpa cjēne, pajiri mare, pajiri ma cjēne yeriquiro ijire. Sa yero ohō saha nidi angel:

—Cohācjū mehna poto nii niaja. To punota cohtenatja. ⁷Seis angele cornetarire tiquina putiri bato apequiuro angel putigū Cohācjū panopu tiquiro “Ohō saha yeitja” nidiro sahata yerota. Panopu masare tire quehnoano yahuerahye. Came tiquiro cahacjēnare, tiquiro yere yahu mūhtariquina pehere quehnoano yahu pehoahye tiquiro. Ti tiquiro yahu cūrire yojopure yerota tiquiro, nidi angel.

⁸Tiquiro sa nidi bato ũhmūserere yūhure yahuducuriquiuro pari turi yahuducuro ca tari tja. Ohō saha nino ca tari yūhure:

—Pajiri mapu cūhta cūriquiuro dihtapu cūhta cūriquiuro siquiuro angel cahapu wahaya. Sa wahagu papera tunugāre tiquiro cūori tunugāre neña, nino ca tari yūhure.

⁹Tiquiro sa nigū tūhogu angel cahapu wahau. Tiquirore papera tunugāre yūhu sinigū tūhoro ohō saha ni yūhtiri yūhure:

—Neña. Sa yegu ahri tunu papera tunugāre ihyaya. Mūhu coā ihyagū umi yero saha quehnoano bisirota. Mūhu paapu mūhu ihya sōri bato suēne waharota, nidi yūhure.

¹⁰Tiquiro sa nigū tūhogu ti tunugāre angelre yūhu nedi bato ihyau. Yūhu coā ihyagū umi yero saha bisiri. Yūhu ihya sōri bato yūhu paapu suēno wahadu. ¹¹Yūhu sa ihyari bato ohō saha nidi yūhure:

—Pari turi ijipihtiyere macari cjēna, ijipihtiyere yehpari cjēna, peye yahuducuyere yahuducuyequina, tiquina puhto gūhu came tiquina dūhse wahatire yahuyuya mūhu, nidi yūhure.

Puaro Cohācjū yere yahuatiquinare yahu ojoahye Nu marine

11 Came yūhure queodure ohori Cohācjū. Tuadu puno yoadu ijiri tu. Ture ohoro ohō saha nidi yūhure:

—Ya wūhure queogu wahaya. Ti wūhu cjā altar gūhure queoya. Sa yegu ti wūhuru yūhure ño peoyequinare queoya. ²Sopecaha wija saducari paare quehnoari paare queoeracāhña. Ti paa yūhure cahmeeñequinare tiquina cūri paa ijire. Tiquina cuarenta y dos asūri waro Cohācjū ya macare, ti maca cjēna gūhure ñano yeeta. Sa yegu queoeracāhña tiquina ya paare quehnoari paare. ³Sa yegu yeere yahuatiquinare puarore ohoutja. Mil doscientos sesenta decori waro yeere yahueta. Masa dija suhtire sañañequina ijieta tiquina yūhu yahu dutiyequina, ni yahuri yūhure.

⁴Ahri yehpa cjēna puhtoro poto puadu Olivo wame tiye cju ducure. Puadu sihā peoye cju gūhu ti cju cahapu ducure. Ti cju mehna queoye mehna yūhu buhegū ahriquina puaro mari puhtoro yere yahuyequina ti cju yero saha ijire. ⁵Sa ye tiquinare ihña tuhtiyequina tiquinare ñano ye duagū tiquina pehe dūseri cjē peca mehna ũjūa pehoeta tiquinare ihña tuhtiyequinare. Sata tiquinare ñano yeyequinare wejēeta tiquina puaro mari puhtoro yere yahuyequina pehe. ⁶Sa ye tiquina puaro acoro ahta dutieragū acoro ahtasi. Sa yero mari puhtoro yere tiquina yahuro puno acoro ahtasi. Sa ye mārīne dii mārī wahagū yeeta tiquina. Sa ye ahri yehpare ñano wahagū yeeta. Ijipihtiyere dūhse ijiyere, ijipihtiyequina dūhse ijyeyequinare masare ñano wahagū

yeeta. Tiquina cahmeno sahata sa ñano wahagũ yeeta ahri yehpare.

⁷Tiquina sa ye pehogũ uhcũari copepu ijiriquiro ñariquiro nucũ cjũno wijiara. Sa wijiara Cohãcjũ yere yahuyequina mehna cahmequenota. Sa cahmequeno tutua yuhducuro tiquinare wejẽnota. ⁸Tiquiro sa wejẽdi bato tiquina paguri pajiri maca cjã mahapu cuñaeta. Yahuyequina puhtoro tiquina quẽ biha wejẽdi maca ijire ti maca. Ti maca cjẽna ñañequina ijiye Sodoma cjẽna, Egipto cjẽna yero saha ijire. ⁹Sa cuñañe ihtia deco quehnoano cuña, ape deco deco mehna tiquina paguri mahapu cuñaeta. Sa ye ijipihtiye yehpari cjẽna, ijipihtiye cururi cjẽna, ijipihtiye yahuducuyere yahuducuyequina tope decori waro tiquina pagurire ihñaducuetã. Sa ye tope decori waro tiquina pagurire ya dutisi. ¹⁰Tiquina sa yariariquina ijigũ ihñañe ahri yehpa cjẽna bucueeta. Sa bucueye bose decore yeye, tiquina basi apee borore sa oho quẽeta. Tiquina puaro Cohãcjũ yere yahuyequina masare ñano yuhdugũ yeriquina ijiahye. Sa ye tiquina sa yariagũ ihñañe bucue yuhdueta ahri yehpa cjẽna.

¹¹Sa yero ihtia deco ape deco deco mehna bato Cohãcjũ tiquina pagurire masonota. Tiquiro sa masogũ tiquina pari turi wahcãducuetã. Tiquina sa wahcãducagũ ihñañe ijipihtiyequina cue yuhdueta tiquinare. ¹²Came tiquina puaro uhmusepu tutuaro yahuducugũ tuhoeta. Ohõ saha ninota tiquinare.

—Ohõpu mũja taya musa, ninota.

Tiquiro sa nigũ tuhoye ehmeo curua watoa mũjaa wahaeta. Tiquina yabiriquinare mũjagũ ihñaeta masa. ¹³Tiquina sa mũjagũta yehpa tutuaro ñuhminota. Sa ñuhmigũ ti maca cjẽ wuhuse peye bora dijiaa waharota. Sa ye yehpa ñuhmino mehna siete mil masa yariaa wahaeta. Apequina dahsariquina pehe acuaa wahaeta. Sa ye Cohãcjũre

uhmuse cjũnore “Tutuagu ijire” ni ño peoeta tiquirore.

¹⁴Ahri ijipihtiye tiquina sa wahari bato puã taha masa ñano yuhdu tuhasariquina ijieta. Tiquina sa yuhduri batogãta pari turi duita masa ñano yuhdueta tja.

Seis cornetarire tiquina putiri bato apequiro putiahye

¹⁵Came seis cornetarire tiquina putiri bato apequiro angel tiquiro yariare putiri. Tiquiro sa putigũ uhmusepu tutuaro yahuducuye ca tari. Ohõ saha nino ca tari:

Yojopũ mari Pacũ, Cristo mehna ahri yehpa cjẽna puhtoã ijieta. Sa yero puhtoro sa ijiducurota Cohãcjũ, nino ca tari.

¹⁶Sa ye Cohãcjũ poto puhtoã dujiyepũ dujiyequina veinticuatro Jesu yequina puhtoã Cohãcjũ poto quehe sa, tiquirore ño peori. ¹⁷Sa ño peoye ohõ saha nidi:

Usã puhto Cohãcjũ, tutua yuhduagu ijire mũhu. Mũhu panopũ sa ijiducuahe. Sa yegu yojopũ gũhure sa ijiducure. Camepũ ahtaũta mũhu. Mũhu tutuaye mehna masa tiquina puhto mũhu ijiducagũ “Quehnoare” niaja mũhure.

¹⁸Ijipihtiyequina ahri yehpa cjẽna mũhure cahmedariquina mũhu mehna usuamedĩ. Yojopũre tiquinare mũhu buhiri dahreati pje ijire. Yariariquina gũhure mũhu buhiri dahreati pje ijire. Sa yero mũhu yequina pehere quehnoañene tiquina yeri wapare mũhu ohoati pje ijire. Ihquẽquina tiquina mũhu cahacjẽna mũhu yere yahu mũhtariquina ijire. Sa ye tiquina, apequina mũhu yequina mehna ijipihtiyequina mũhure ño peoyequina ijire. Sa yegu puhtoare, ihyo ijieyequina gũhure mũhu yequina tiquina ijiri

wapa quehnoano yeita muhu. Sa yero ahri yehpa cjênare dojomehne coheriquinare muhu cohâti pje ijire yojoþure, ni ño peori puhtoa Cohâcjäre.

¹⁹Tiquina sa yeri bato uhmuse cjä wuhu Cohâcjü ya wuhu tiquiro pöori wuhu ijiri. Sa yena ti wuhupü ijiri acarore ihñau. Ti acaro puhiapü Cohâcjü masare tiquiro yedohoatire yahuri pü sañari. Yuhu sa ihñagüta mia sitedoqueo, upo pa maari. Sa yero sijoro saha ijiro bisi maa, yehpa ñuhmi maa, aco paca yusüaye paca uhmusepü peye bora dijia tari.

Numino gühure pinono gühure yahuahye Ñu

12 Came ahri yehpa duhse wahatire uhmusepü ihñori. Tiquiro sa ihñori ihyo waro ijierari. Ohö saha ihña muhtau: Uhmusepü numinore ihñau. Ticoro suhtiro asü deco cjüno yero saha asi siteri. Sa yero asü ñami cjüno bui ducuri. Puhtoro pesari behto borore doce ñahpicoha paca cuori behtore pesaricoro ducuri. ²Sa yero mehenogã duhsari ticoro pohna tiato. Sa yero ticoro sañuducuri. ³Came pari turi ihñau uhmusepü tja: Pajiriquiro pinonore sohâriquiore ihñau. Siete dapu paca tiriquireo ijiri. Ijipihtiyeh tiquiro dapu paca puhtoa pesaye behtori borore pesaye dapu paca ijiri. Sa yero diez waro sahari tiriquireo ijiri tiquiro. ⁴Tiquiro picöno mehna ñahpicoha pacare wahba sitedoque dijiori yehpapü. Ijipihtiyeh ñahpicohare deco esaboro caha wahba sitedoque dijiori. Sa yero numino pohna tiaticoro poto ducuri pinono. Ticoro macunogã bajuagü tiquirogäre ihyaro taro nimesi. ⁵Camegãta cüo tuhasari nijinogäre. Ijipihtiyeh yehpari cjëna puhtoro ijiatiquiro ijiri tiquirogã. Tiquiro sa puhtoro tutuariquireo ijigü, masa

tiquirore yuhduhcaye ihcãno sahasi. Tiquiro sa masa bajuagüta Cohâcjü tiquiro dujiro cahapü tiquirogäre ne cãa wahari. ⁶Tiquiro sa yegü numino pehe masa marienopü duhti cãa wahari. Cohâcjü tiquiro quehnoyuriropü duhti cãa wahari ticoro. Topäre mil doscientos sesenta decori waro Cohâcjü ticorore ihña ihburi.

⁷Coã waropäre uhmusepü cahme wejê ducahye. Miguel wame tiriquireo angel tiquiro yequina angele gühu pinono mehna cahmequeahye. Tiquina sa cahmequegü pinono tiquiro yequina angele mehna Miguel gühu mehna cahmequeahye. ⁸Sa ye Miguel gühu pinonore yuhduhcahye. Sa yero pinono yequina angele gühure uhmusepü iji nemo dutierahye. ⁹Sa yero pajiriquiro pinonore cohã cãhye Cohâcjü. Tiquiro pinono watinota ijiro nidi. Satana wame tiriquireo ijiri. Panopü tiquiro pinono pagü saha bajuriquiro ijiahye. Sa yero ijipihtiri yehpa cjênare ni mehoriquireo ijire. Tiquirore tiquiro yequina angele mehna yehpapü cohã dijioahye.

¹⁰Came uhmusepü sañuducuro ca tagü tuhau:

Yojoþure mari Pacü masare yuhduori. Yojoþü püritare mari Pacü mari puhtoro ijiro ahtari tiquiro tutuayere ihñono taro. Sa yero tiquiro ohoriquireo Cristo gühu tiquiro puhtoro ijiyere tiquiro tutuayere ihñori ijipihtiyequinare. Watinore uhmusepü ijiriquirore yehpapü cohã dijiori. Sa yero tiquiro tutuayere ihñori mari Pacü. Tiquiro watino pehe decoripe, ñaminipe Jesu yequinare “Ahriquina ñañequina ijire”, ni yahusãno niahye mari Pacüre. Sa yero mari acayere Jesu yequinare yahusãriquireo ijiahye. ¹¹Cristo Cordero wame tiriquireo tiquiro

dii cohāri mehna mari acaye Jesu yequina tiqiurore wacū tutuayequina tiquina ñano yerire tiqiuro cohānohriquina ijire. Sa wacū tutuayequina ijiye, wafīnore yūhdūdcari. Sa ye quehnoañe buheyere buheye, wafīnore yūhdūdcari. Tiquiro yere buheye apequna tiquinare wejē duepegūta, Cristo yere duhuerari. ¹² Sa yena mūsa ūhmūse cjāna bucueya. Wafīnore yehpapū tiqiuro cohā dijiogū ihñana bucueya. Sa yepegūta ahri yehpa cjāna, pajiri ma cjāna gūhu pejecuona wahanata mūsa pehe. Mūsa cahapū dijiari wafīno. Tiquirore buhiri dahreato mehenogā dūhsare. Sa yero usua yūhdūare tiqiuro. Mūsa cahapū tiqiuro esagū pejecuona mū sare tojoagū yerota tiqiuro, ni sañuducugū tūhou.

¹³ Sa yero pinono tiqiuro cohā dijiuriqiuro nūminore, nijinogā pacorore nūnū tā cāri. ¹⁴ Sa yero ticorore pajiriqiuro cacū tiqiuro wūye dūpūrire ohori Cohācjū, masa marienopū ticoro wū duhti cāto. Topū ticoro esari bato ihtia cūhma quehnoano ape cūhma deco waro ticorore ihña ihbōri Cohācjū. Tiquiro sa ihña ihbōgū pinono ticorore ñano ye masiedari. ¹⁵ Topū ticoro ijigū ihñano pinono acore pajiro puti sitedo-queori ticorore miono taro. ¹⁶ Tiquiro sa yegū yehpa pehe ticorore yedohori. Pinono dūseropū wijiaye acore yehpa pehe aco ihmi peho cāri. ¹⁷ Sa wahagū ihñano pinono numino mehna usua yūhdūari. Sa usuaro ihquēquina ticoro panamena iji turiayequina mehna cahmequeno wahari. Tiquina pehe Cohācjū dutiyere yeyequina ijiye, Jesu ye buheyere quehnoañe buheyere ne duhūyequina ijiri. ¹⁸ Sa yero pinono pajiri ma dūhtū cahapū ducuri.

Puaro nūcu cjēnare yahuahye Ñu

13 Pajiri ma dūhtū cahapū ducugū, nūcu cjēnore ti mapū ijiriqiurore wahcā pahagū ihñan. Tiquiro pehe siete dapu paca, diez sahari waro cūoriqiuro ijiri. Tiquiro sahari pūhtoa pesaye behtori borore pesari. Sa yero tiqiuro dapu pacare tiqiuro wamene ojoa ohōri dapu paca ijiri. Ti wame tiqiuro ñano wame tigū ihña yabiri Cohācjū. ² Sa yero tiqiuro nūcu cjēno yairo dohroriqiuro yero saha bajuri. Sa yero mie yero saha dahpocāri tiriqiuro ijiri. Sa yero yairo sohāriqiuro pajiriqiurodu yero saha dūsero tiriqiuro ijiri. Sa yero pinono pehe tiqiuro tutuayere ohori nūcu cjēnore. Sa ohoro tiqiurore pūhtoro dūjiropū cūno tiqiuro yero saha peyequina masare dutigū yeri pinono nūcu cjēnore. ³ Ihcā dapu nūcu cjēno dapu tiquina wejēbo cureriqiuro dapu yero saha bajuri. Sa bajuepegūta tiqiuro camino pehe yatia wahari. Ti dapu catigū ihñañe, ihña maria wahari ijiphiyequina ahri yehpa cjēna. Sa ihña maria wahaye, nūcu cjēnore ño peori. Sa ye tiqiuro yequina wahari masa. ⁴ Sa ye nūcu cjēnore pinono tiqiuro tutuayere tiqiuro ohogū ihñañe masa pehe tiqiurore pinonore dūsepe curi mehna quehe sa, ño peori. Sa ye nūcu cjēno gūhūre dūsepe curi mehna quehe sa, tiqiurore ño peori. Sa ño peoye ohō saha nidi:

—Ne apeqiro mūhu yero saha tutu-ariqiuro mariedare. Apeqiro mūhūre ne yūhdūdūca masiedare, ni ño peori masa nūcu cjēnore.

⁵ Sa yero tiqiuro nūcu cjēno “Tutua yūhdūdcagū ijijaja”, tiqiuro niepegūta Cohācjūre tiqiuro ñano yahuducuepegūta sa tūhotu cārdi Cohācjū pehe. Sa yero cuarenta y dos asūri waro tiqiuro nūcu cjēno masare dutinimedi. To punota tiqiuro pūhtoro ijigū cahmedi Cohācjū. ⁶ Sa yero

tiquiro Cohācjüre ñano yahuducuri. Tiquiro wamene, tiquiro ya wuhure, umusepu tiquiro ijero cjēna gūhure ñano yahuducuri nucu cjūno. ⁷Sa yero Cohācjū yequinare cahme wejēno tiquinare yuhduducari. Tiquiro sa yepēgūta sa ihña cārīdi Cohācjū. Cohācjū tiquiro sa ye dutieragū yeraboya. Sa yero ijipihtiyequina ahri yehpa cjēna bui puhtoro ijinimedi nucu cjūno. Ijipihtiye cururi cjēna bui, ijipihtiyequina macari cjēna bui, yehpari cjēna bui, ijipihtiye yahuducuyere yahuducuyequina bui puhtoro ijinimedi tiquiro. ⁸Sa ye ijipihtiyequina ahri yehpa cjēna tiquiro nucu cjūno potō dusepe curi mehna quehe sa tiquirore ño peori. Ahri yehpare Cohācjū tiquiro bajumehneato pano tiquiro yequina ijiatiquinare, sa ijduducatiquinare tiquina wamene ojoa ohō tuhasahye. Ti tju tiquiro sa ojoa ohōri tju Cordero tiquina wejēdiqiro ya tju ijire. Ti tju pu tiquina wamene ojoa ohōnohedariquina dihita nucu cjūnore ño peori.

⁹Cahmo tina ijire mūsa. Sa yena tuhoya. ¹⁰Ijipihtiyequina masare peresu yehatiquinare came tiquinare peresu yeeta. Ijipihtiyequina masa ñose wejēnohatiquinare tiquinare ñose wejēeta. Tire masina mari Cohācjū yequina ñano yuhdūepenata tiquirore cohādedacūhna. Sa yena tiquirore wacū tutuuhna.

¹¹Came apequiro nucu cjūnore ihñau tja. Yehpa puhiapu ijiriquiro wijiagū ihñau. Pua saharo oveja sahari yero saha bajuye sahari sahari tiriquiro ijiri. Sa yero pinono yero saha yahuducuri. ¹²Sa yero nucu cjūno iji muhtariquiro pehe came ijiriquiro pehere puhtoro sōri. Tiquiro sa puhtoro sōnohriquiro pehe ijipihtiye yehpari cjēnare iji muhtariquirore ño peogū yeri. Iji muhtariquiro nucu cjūno tiquina wejēbo cureriquiro camino yatiriquiro

ijiri. ¹³Sa yero came ijiriquiro nucu cjūno tutuaye mehna ye ihñori masa tiquina ihña mariatore. Sa yero masa tiquina ihñonopu peca pajiri peca umusepu bora dijia tagū yeri. ¹⁴Sa yero iji muhtariquiro ihñonopu apequiro nucu cjūno pehe tutuaye mehna masare mehori “Ahriquiro mūsa ño peoatiquiro ijire”, nino. Sa yero tiquiro masare mehono, iji muhtariquiro queoyere masare ye dutiri. Tiquiro iji muhtariquiro ñoseni pjī mehna tiquina ñosediquiro ijieperota catiriquiro ijiri. Tiquiro yero saha bajuye queoye ye dutiri apequiro nucu cjūno masare. Tiquina sa yegū Cohācjū yabieperota sa ihña cārīahye. ¹⁵Sa yero came ijiriquiro nucu cjūno pehe iji muhtariquiro queoyere catigū yeri masare ti queoye dutiatio saha. Sa yero ti queoyere ño peoeyequinare wejē dutiri masare queoye pehe. ¹⁶Sa yero ijipihtiyequinare tiquina omocari potō pehe, tiquina wuhdo paca gūhure ojoa ohō dutiri nucu cjūno came ijiriquiro. Ihyo ijieyequinare, puhtoare, doeri cjē opanare, pejecuoyequinare, tiquina cahacjēnare, cahacjēna ijieyequinare, ijipihtiyequinare tiquina omocarine tiquina wuhdo paca gūhure ojoa ohō dutiri. ¹⁷Tiquiro iji muhtariquiro nucu cjūno tiquiro wamene, tiquiro ya numerore ojoa ohōnequinare ne dú dutierari. Sa yero tiquinare dua dutierari.

¹⁸Tire quehnoano wacū masiña mūsa. Tuho masina ijina nucu cjūno tiquiro ya numerore quehnoano ihña masiña. Ti numero umūno wame yero saha ijire. Ti numero seis cientos sesenta y seis ijire.

Cohācjū tiquiro yuhduoriquina wahma basayere basahye

14 Came Siō wame tidu cūnu bui ducuriquirore Corderore ihñau. Tiquiro mehna ciento cuarenta

y cuatro mil masa ijiri. Tiquina tiquiro ye wamene, tiquiro Pacuro ye wame gũhure tiquina wũhdoa pacare tiquina ojoa ohõnohriquina ijiri. ²Tiquinare yũhũ ihñagũta uhmũsepũ yahuducuro ca tari. Pajiri peo bisiro saha upo tutuaro bisiro saha bisiro ca tari tiquiro yahuducuye. Sa yero arpa wame tiyere tiquina bũa putẽno saha bisiro ca tari tiquiro yahuducuye. ³Topũ puhtoro dujiro cahapũ pititiaro sijoro saha bajuyequina, Jesu yequina puhtoa gũhu ijiri. Sa ye tiquina poto ciento cuarenta y cuatro mil masa ducuri. Topũ ducuye, wahma basayere basaye nidi. Ti basayere tiquina dihita masidi. Cristo yũhduoriquina dihita ti basayere masidi. Tiquina ahri yehpapũ ijimediquina tiquiro ne mũoriquina ijiri. ⁴Ne tiquina ihcã tahagã numino mehna ñano yerari. Sa ye Corderore ihña cũnequina ijiye, tiquiro yere sa yeducuyequina ijiri. Sa yero ñañequina mehna ijiyequinare tiquiro yũhduoatiquinare nedi Cohãcjũ pehe. Sa tiquiro yũhduoriquina ijiye, Cohãcjũ yequina ijiatiquina, Cordero yequina ijiatiquina gũhũ iji mũhtariquina ijiri. ⁵Sa ye tiquina mehna cjẽna ne ihcãquiro ni mehoriquiro mariedare. Sa ye Cohãcjũ tiquiro tũhotugũ ñañe marieñequina ijiri tiquina.

Ihtiaro angele yahuducu dijioahye

⁶Came uhmũsepũ wũriquiore angelre ihñau. Tiquiro ahri yehpa cjẽnare, ijipihitiye cururi cjẽnare, ijipihitiye yahuducuyere yahuducuyequinare, ijipihitiye yehpari cjẽnare, quehnoañe buheyere yahuatiquiro ijiri. Ti buheye ne came-saeraye, sa ijiducure. ⁷Sa yero angel sañuducuro ohõ saha ni yahuducu dijiori:

—Cohãcjũre cueya. “Tutua yũhduagũ, quehnoa yũhduagũ ijire”, niña tiquirore. Yojoþure masare tiquiro

buhiri dahreati pje ijiro nine. Tiquiro uhmũsere, ahri yehpare, pajiri mare, mări pohteri gũhure yeriquiro ijire. Sa yena tiquirore dusepe curi mehna quehe sa, ño peoya, ni sañuducuri angel.

⁸Tiquiro sa nidi bato apequiro angel uhmũsepũ wũriquiore ohõ saha ni yahuducu dijiori:

—Tiquinare cohã cãhri. Pajiri maca Babilonia wame tiri maca cjẽnare cohã cãhri Cohãcjũ. Tiquina tiquiro cohãriquina pehe ijipihitiyequina apequinare ñano yegũ yeri. Queheyequina vinore tiquina tutuaro cahmeno saha tiquina ñañene tutuaro cahmeñe, Babilonia cjẽnare ihña cũri. Sa yero Cohãcjũ tiquinare tutuaro buhiri dahreri, ni yahuducu dijiori apequiro angel.

⁹⁻¹⁰Tiquina puaro angele tiquina sa nidi bato apequiro angel tiquina bato wũriquiore ohõ saha ni yahuducu dijiori:

—Ijipihitiyequina nũcũ cjũnore ño peoyequinare, tiquiro queoyere ño peoyequinare, tiquina wũhdoa pacare, tiquina omocarine tiquiro wamene ojoa ohõnohriquina gũhure buhiri dahrerota Cohãcjũ. Tiquina mehna usuario, tiquina pũritare tutuaro waro buhiri dahreducurota Cohãcjũ. Nũcũ cjũnore ño peoyequina ijipihitiyequina pecapũ wahaeta. Topũ tutuaro purĩnota tiquinare peca mehna, azufre wame tiye mehna tiquina wijiãri peca mehna. Quehnoañequina angele, Cordero gũhũ tiquina ihñonopũ ñano yũhdueta tiquina. ¹¹Ti peca sa ohmeo tiducurota. Ne yatisi. Tiquinare sa purĩducugũ yere. Ijipihitiyequina nũcũ cjũno poto dusepe curi mehna quehe sa, ño peoyequinare sa purĩducurota. Decoripe, ñaminipe sa purĩducurota. Tiquiro queoyere ño peoyequina, tiquiro wamene ojoa ohõnohriquina gũhũ sata ñano yũhdueta, ni yahuducu dijiori angel.

¹²Sa tiquina ñano yuhdugū ihñana Cohācjū yequina tiqiro dutiyere yena, Jesure cohāedarina ijina, tiqiro yere duhueracāhña. Ñano yuhdūepenata Cohācjū yere cohāedacāhña.

¹³Came ũhmusepū yuhure yahuducuro ca tagū tūhou. Ohō saha nidi yuhure:

—Ahrire ojoaya muhū. Cohācjū yequina tiqirore cohāedarina ijina yojopure mūsa yariari bato gūhure bucuena ijire mūsa, ni yahuducu dijiori yuhure.

Tiqiro sa nidi bato Espiritu Santo pehe ohō saha ni nemori tja:

—Sa tjire. Poto tjire. Tiquina tutuaro tiquina dahrayere duhu, soeta. ũhmusepū tiquina wahagū quehnoano tiquina yerire wacūnota Cohācjū. Sa yero tiquina sa yeri wapa tiquinare quehnoano yerota. Sa ye tiquina bucueyequina ijire, ni nemori Espiritu Santo.

Wese cjē oteye ducare mari bese neno saha Cohācjū tiqiro yequinare bese nenota. Ñañequina pehere sijoro bese docorota

¹⁴Came ehmeo curua yehseri curuare ihñau. Ti curua bui masuno yero saha bajuriquiro dujiri. Tiqiro uru behto puhtoro pesari behto borore pesari. Sa yero dihi pjī siori pjīne cuori tiqiro. ¹⁵Came apequiro angel Cohācjū wuhupū ijiriquiro wijia tari. Sa wijia taro tutuaro sañuducuri ehmeo curua bui dujiriquirore:

—Muhū dihi pjī mehna wese cjē ducare ahri yehpa cjē ducare dute ne pehoya. Yojopure tiqiro queori pje esare. Yojopure dūca neni pje esare, nidi angel.

¹⁶Tiqiro sa nigū tūhoro tiqiro dihi pjī mehna ahri yehpa cjē ducare ne ducari ehmeo curua bui dujiriquiro.

¹⁷Came apequiro angel gūhū Cohācjū wuhupū ijiriquiro wijia tari. Tiqiro

gūhū dihi pjī siori pjīne cuori. ¹⁸Sa yero apequiro angel altar cahapū ijiriquiro wijia tari. Tiqiro pehe altar cjā pecare ihña ihboriquiro ijiri. Sa wijia taro dihi pjī siori pjīne cuoriquirore sañuducuri:

—Muhū dihi pjī mehna ahri yehpapū ijiri wese, uhse wese cjē ducare neña. ũhse pehe ñi tuhasari, ni sañuducuri.

¹⁹Tiqiro sa nigū tūhoro angel tiqiro ya pjī dihi pjī mehna ahri yehpa cjē uhse tōhorine yuhre nedi. Tiqiro sa yeri bato ti tōhorine uhse tōhorine tiqiro ñatihātopū cohāri. Tiqiro sa cohāriro saha Cohācjū tiqirore cahmeeñequinare tutuaro usuaro, cohānota. ²⁰Ti maca dūhtū cahapū tiquina ñatihātopū ti uhse tōhorine ñatihāri. Topū tiquina ñatihāgū dii wijari. Dii ma yero saha ijiri. Tres cientos kilómetro yoari ma, ihcā metro quehnoano ape metro deco uhcuāri ma ijiri.

Masa tiquina ñano yuhduatire angele cū bato tiahye masare

15 Came ũhmusepū sijoro saha ijirore ihñau. Tire ihñañe masa ihña maria wahaga. Ahri yehpapure dūhse wahatore marine ihñori. Sa yero ti ihyo waro ijierare. Ohō saha ihñau: Siete angele ijiri. Cohācjū usuaro, siete tahari masare buhiri dahre bato tiro taro nidi. Sa ye tiquina siete angele pehe buhiri dahre dutiro tiqiro cūatiquina ijiri.

²Angelere yuhū ihñari bato pajiri mare quehnoano aco sitiri ma yero saha ijiri mare ihñau. Ti ma peca mehna ijiri ma ijiri. Sa yegu nūcu cjūnore tiqiro queoye gūhure yuhdūducayequinare ihñau. Tiquina tiqiro wamene tiqiro ya numerore cuoeyequina ijiri. Tiquina yuhū ihñagū pajiri ma aco sitiri ma dūhtū cahapū ducuri. Topū ducuyequina arpa wame tiyere bua putēñene cuori. Ti bua putēñe Cohācjū tiqiro ohori ijiri. ³Sa ye Cohācjū

cahacjuno, Moise ye basayere basaye nidi. Cordero ye basaye gũhure basaye nidi. Ohõ saha ni basari:

Usã puhto mũhu Cohãcjũ tutua yuhduagu ijire. Mũhu yerire ihñana ihña maria wahaja usã. Mũhu yeri quehnoa yuhduare. Mũhu ijipihitiye yehpari cjẽna puhto ijire. Quehnoano ni mehono marieno yeducure mũhu. Ijipihitiyequina mũhure cueeta. ⁴Ijipihitiyequina mũhure “Tutuagu ijire”, nieta. Mũhu dihita ñaãe mariegu ijire. Ijipihitiye yehpari cjẽna mũhu cahapu esaye, dusepe curi mehna quehe sa, mũhure ño peoeta. Sata yeeta tiquina ijipihitiyequina queoro mũhu yerire ihñaãe, ni basaye nidi tiquina.

⁵Came umusepu ihña mũogu, Cohãcjũ wũhu põori wũhure ihñaã. Topũ Cohãcjũ ijiri tucũ waropũ Cohãcjũ dutiye tiquiuro ojoari pjĩni utã pjĩni tiquina ihbori pjĩni ijiri. ⁶Ti wũhure yũhu ihñagũta siete angele ti wũhu puhiapu ijiriquina wijia tari. Tiquina Cohãcjũ buhiri dahre dutiuro tiquiuro cũatiquina ijiri. Tiquinape tiquina buhiri dahreatire cuori tiquina angele. Quehnoaãe suhti, yehseye suhti sañaãequina ijiri. Sa ye tiquina cutiuro bui uru cahsero mehna tuã dihoriquina ijiri. ⁷Ti wũhũpũ ijiriquina tiquina wijia tagũ pititiaro sijoro saha bajuyequina mehna cjũno tiquinare siete angelere siete uru parire oho. Ti pari Cohãcjũ usua tiquiuro buhiri dahreati mehna quehnoano wahpari ti pari. Tiquiuro Cohãcjũ sa ijiducuriquiuro ijire. ⁸Tiquiuro sa ohogũ Cohãcjũ wũhu puhiapu tiquiuro asi siteye mehna tiquiuro tutuaye mehna ohmeo ti sehsaa wahari. Sata ohmeo wũhu wahagũ ne masa ti wũhure sajã masiedari. Siete angelere Cohãcjũ buhiri dahre dutiuro tiquiuro cũriuro saha masare tiquina buhiri dahre tuhasari bato pari turi ti wũhũpu

sajã masine tja. Tiquiuro buhiri dahreato pano sajã masiedari.

Cohãcjũ masare tiquiuro buhiri dahreatore yahuahye

16 Came Cohãcjũ wũhũpũ tutuaro yahuducuro ca tari. Siete angelere yahuro nidi:

—Siete paripũ pose tiyere yehpapũ pio sitedoque dijiona wahaya. Yehpa cjẽnare Cohãcjũ tiquiuro nidiuro sahata buhiri dahreya yojopũre, ni yahuducuro ca tari.

²Tiquiuro sa nigũ tuhoro iji mũhtariquiuro angel tiquiuro cuori papũ pose tiyere yehpapũ pio sitedoque dijiori. Tiquiuro sa pio sitedoque dijiogũ nũcu cjũno wamene ojoa ohõnohriquina, tiquiuro queoyere ño peoriquina ñano cami tiri. Ti cami tutuaro purĩdi tiquinare.

³Tiquiuro sa pio siteri bato apequiuro angel tja tiquiuro cuori papũ pose tiyere pio sitedoque dijiori tja pajiri mapũ. Tiquiuro sa pio sitedoque dijiogũta ti ma dii ma wahari. Yariariquiuro dii yero saha ijiri ti dii. Sa wahagũ ti ma puhiapu ijiyequina yaria pihtia wahari.

⁴Puaro tiquina sa pio siteri bato apequiuro angel tja tiquiuro cuori papũ pose tiyere pio sitedoque dijiori tja mãripũ, ti mãri pohteripũ gũhure. Tiquiuro sa pio sitedoque dijiogũ mãri dii mãri dihita wahari. ⁵Sa wahagũ ihñano apequiuro angel mãrine cohteriquiuro ohõ saha nidi: Cohãcjũ mũhu ñaãe mariegu ijire. Yojopũ gũhure sa ijiducugũ ijire mũhu. Panopũ gũhure sa ijiducue tiri mũhu. Sa yegũ masa tiquina ñano yegũ ihñagu queoro buhiri dahreri mũhu tiquinare. Dii mãrine yegũ quehnoano yeri mũhu. ⁶Nũcu cjũno yequina pehe mũhu yequinare wejẽãe, dii cohãgũ yeri. Mũhu yere yahuyequina gũhure wejẽãe, dii cohãgũ yeri. Tiquina sa wejẽdi

buhiri mári dii mári wahari. Sa ye tiquinare diire mǎhǎ sa sihnigǔ yegǔ quehnoaríne. Sata mǎhǎ buhiri dahregǔ tiquina ye buhiri ijire, nidi máríne coheriquiro angel.

⁷ Tiquiro sa nidi bato altarpǎ yahuducuro ca tari:

—Sa tjire. Cohǎcjǔ usǎ pǎhto tutua yǎhduagǔ ijire mǎhǎ. Ni mehono marieno, queoro masare bese, buhiri dahre mǎhǎ, ni yahuducuro ca tari.

⁸ Ihtiaro angele tiquina pio siteri bato apequiro angel tiquiro cuori papǎ pose tiyere pio sitedoque dijiori tja asǔ deco cjǔno bui. Tiquiro sa pio sitedoque dijiogǔta asǔre masare tutuaro asigǔ yeri Cohǎcjǔ. ⁹ Sa yero asǔ deco cjǔno masare tutuaro asiri. Sa ye Cohǎcjǔ tiquinare tiquiro buhiri dahre dutigǔ masíne, tiquirore ñano yahuducuri masa. Sa ñano yǎhdǎepeta tiquina ñañe yerire ne bujǎa witierari. Sa ye duhuerari. Cohǎcjǔre “Tutuagǔ ijire”, ni ño peo duerari.

¹⁰ Pititiaro angele tiquina pio siteri bato apequiro angel tja tiquiro cuori papǎ pose tiyere pio sitedoque dijiori tja nǎcu cjǔno tiquiro dujiro bui. Pǎhtoro dujiro ijiri tiquiro dujiro. Tiquiro sa pio siteri bato tiquiro yequina tiquina ijiri yehpapǎ nahitiaa wahari. Sa ye tiquiro yequina masa ñano puríngǔ bahque dihori. ¹¹ Tiquinare ñano purípegǔta ñano camí tiepeta, ne tiquina ñañe yerire bujǎa witierari. Sa ye tire duhuerari. Sa ye Cohǎcjǔ tiquinare tiquiro camí dahregǔ masíne tiquirore ǎhmǎse cjǔnore ñano yahuducuri.

¹² Ihcǎ omopequina angele tiquina pio siteri bato apequiro angel tja tiquiro cuori papǎ pose tiyere pio sitedoque dijiori tja Eufates wame tiri ma pajiri mapǎ. Tiquiro sa pio sitedoque dijiogǔta ti ma sihbí quehea wahari. Asǔ mǎjǎ taro cjǔna pǎhtoa yequina masa mehna ti mare tiquina pehǎ tatore sa yeri.

¹³ Came ihtiaro watíare taharocǎa yero saha bajyequinare ihǎa. Ihcǎquiro pinono puhiapǎ ijiriquiro tiquiro dǎseropǎ wijia tari. Apequiro watíno nǎcu cjǔno dǎseropǎ wijia tari. Apequiro watíno “Cohǎcjǔ yere yahu mǎhtagǔ ijíaja”, ni mehoriquiro dǎseropǎ wijia tari. ¹⁴ Sa ye tiquina ihtiaro watía tutuaye mehna yeyequina ijiri. Ijipihtiro cjǔna pǎhtoare cahmecoagǔ yeri tiquina cahme wejǔ dutiye tehe. Tiquina sa cahme wejǔati deco Cohǎcjǔ tutua yǎhduariquiro ijipihtiyequinare tiquiro dutiati deco, pihtiatí deco ijire.

¹⁵ Ohǔ saha nidi Jesu: “Ihǎañǎ mǎsa. Yaqueriquiro wacǔeno mehna tiquiro yaquero ahtaro saha yǎhǎ gǎhǎ wacǔeno mehna ahtaǔtja. Yǎhǎ ahtatore quehnoano coheriquiro bucueriquiro ijírota. Tiquiro ye suhtire quehnoano quehnoyuriquiro yero saha yeere quehnoano yeriquiro ijire bucueriquiro. Sa yeriquiro ijíro yǎhǎ ahtagǔ suhtí marieniquiro tiquiro bǔe taboriro saha bǔe tisi tiquiro”, nidi Jesu.

¹⁶ Came ihtiaro watía yehparí cjǔna pǎhtoare cahmecoagǔ yeri tiquinare. Tiquina cahmecoano Hebreo ye mehna “Armagedon”, wame tiri.

¹⁷ Seis angele tiquina pio siteri bato apequiro angel tja tiquiro cuori papǎ pose tiyere ehmeo cururi cahapǎ pio sitedoque dijiori tja. Tiquiro sa pio sitedoque dijiori bato pǎhtoro dujiropǎ Cohǎcjǔ wǎhpǎ tiquiro dujiropǎ tutuaro yahuducuro ca tari:

—To punota ijíaja, nino ca tari.

¹⁸ Tiquiro sa nigǔta mia sitedoqueo, ǎpo pa maa, síjoro saha ijíro bisi maa, cuaro yehpa ñuhmídi. Ahri yehpapǎ masa tiquina ijí dǎcari bato ne sa ñano yehpa ñuhmíeda tiri. Apeye ñuhmíne yǎhdǎoro cuaro yehpa ñuhmídi. ¹⁹ Sa ñuhmigǔ pajiri macare ihtía maha yihtí maa wahari. Sa ye bujǎye macari ahri

yehpapu ijiye macari sehte dijiaa wahari. Sa yero Babilonia wame tiri maca pajiri maca cjênare wacûri Cohâcjû tiquinare buhiri dahrero taro. Tiquina ñañene yeri buhiri tiquina mehna tutuaro usuari. Sa usuaro tiquinare tutuaro buhiri dahreri. ²⁰Tiquiro sa yegû ijipihitiye nûcûpo, cûnû cjû gûhû cohô pihitia wahari. Sa ye ne mariedare. ²¹Sa ye bujûye paca aco paca yûsuaye paca yehpapu masa bui bora dijia tari. Ijipihitiye paca aco paca cuarenta kilo nûcûne paca ijiri. Tiquina bui ti paca sa bora dijia tagû Cohâcjû masare tiquiro tutuaro buhiri dahregû masiñe ñano yahuducuri masa Cohâcjûre.

**Ûmua mehna ñano
yeducuricorore ña yûhduaro
yericorore buhiri dahre dutirota**

17 Came siete pari cûoyequina angele mehna cjûno yûhu cahapu wihiro ohô saha nidi yûhure:

—Ihñagu ahtaya. Peye mári bui duricorore ñmua mehna ñano yeducuricorore ña yûhduaro yericorore Cohâcjû tiquiro buhiri dahreatire ihñagu ahtaya mûhû. ²Ahri yehpa cjêna puhtoa ticoro mehna tiquina ñano yeboro saha ticoro yero saha yeri. Cohâcjû ye pehere cahmedari. Ahri yehpa cjênare ticoro quehegû yeboro saha tiquina mehna ticoro ñano yeboro saha ticoro masare ñañene tutuaro cahmegû yeri. Sa yero ñañene yegû yeri masare, ni yahuri angel yûhure.

³Tiquiro sa nidi bato Espíritu Santo pehe yûhure ihñori: Angel pehe masa marienopû neari yûhure. Topû numinore ihñau. Ticoro nûcû cjûno sohâriquiroy bui pesaricoroy ijiry. Nûcû cjûno pehe tiquiro pagupû peye wame tiquina ojoa ohônohriquiroy ijiry. Ti wame ñañe wame Cohâcjû tiquiro ihña yabiye wame ijiry. Sa yero siete dapu paca tiriquiroy, diez sahary tiriquiroy ijiry

nûcû cjûno. ⁴Sa yero numino pehe quehnoano yahsaye suhti puhtoa tiquina sañañe suhti saha ijiyere sañaricoroy ijiry. Sohãñe suhti gûhure sañaricoroy ijiry. Peye urure, wapa tiye utãre, perla pjeri gûhure ohôri suhtire sañaricoroy ijiry ticoro. Sa yero uru pare cuori ticoro. Ti papû pose tiye ñañe ticoro yeri jiry. Ûmua mehna ñano yero, pajiro ñano yeri ticoro. Ti ñañene ihña yabire Cohâcjû. ⁵Ticoro wûhdoapû ticoro wame tiquina ojoa ohônohricoroy ijiry. Ti wamene quehnoano masiedajay mari. Ti wame queoye mehna buheri wame ijire. Ahri ijire ti wame: “Pajiry maca Babilonia wame tiri maca ijire. Ijipihitiye wûana tiye dahpoto cjôno, ña yûhduayere yericoroy ijire”, ni, ticoro wûhdoapû tiquina ojoa ohônohricoroy ijiry. ⁶Sa yero ticoro peyequina Cohâcjû yequinare wejêdicoroy ticoro ijigû masiy. Queheyere ticoro bucuro saha tiquinare wejêno, tiquina dii cohãgû bucueri ticoro. Jesure tiquina cohãedari buhiri ticoro wejêdi tiquinare. Ticorore ihñagu, ihña mariy wahau.

⁷—¿Duhsegu mûhû ihña mariy wahajary? nidi angel yûhure.

Sa niny yûhure ohô saha ni nemori:

—Mûhû masiedarire mûhure yahutjay. Numinore mûhure yahutjay. Ticoro pesariquiroy gûhure yahutjay. Tiquiro nûcû cjûno ijiry. Sa yero siete dapu paca tiriquiroy, diez sahary tiriquiroy ijiry. ⁸Tiquiro panopû ijiryquiroy ijiry. Yojopure mariedare tiquiro. Came tiquiro uhcuãri copepû ijiryquiroy wijiy tarotay. Tiquiro sa wijiy tari bato pecapû waharotay. Ahri yehpa cjêna tiquirore ihña mariy, ño peori tiquirore. Ahri yehpa ijiatoy pano Cohâcjû tiquiro yequinay ijiatiquinay sa ijiducuatiquinay tiquina wamene ojoa ohôahye. Tiquiro ojoa ohônohedariquinay ijiry nûcû cjûnore ño peoyequinay. Tiquiro pehe panopû ijiry. Yojopû pehere mariedare. Camepû pariy turiy bajarotay. Sa ye tiquiro ba-

juagũ ihñañe masa tiquireore ihña maria wahaeta.

⁹Yojopũre yũhũ yahuatire masi duana, quehnoano tuhonata musa. Sa yena tũho masina ijiya. Nũcu cjũno dapu paca siete dapu paca siete cũnũ cju ijire, mari queoye mehna buhegũ. Ti cũnũ cju buipũ pesare ticoro umua mehna ñano yeducuricoro. ¹⁰Ti dapu paca siete puhtoa yero saha ijire, mari queoye mehna buhegũ. Peyequina masa puhtoa ijire. Ihcã omopequina puhtoare cohã tuhasari. Apequiro tiquina bato ijiriquireo puhtoro ijire yojopũre. Apequiro pehe came puhtoro sajãnota. Sa sajãno mehenogã puhtoro ijirota tiquireo. ¹¹Sa yero nũcu cjũno sohãriquireo panopũ iji muhtariquireo, yojopũre marieniquiro tiquina siete puhtoa bato puhtoro ijirota. Siete puhtoa mehna cjũno ijire. Came pecapũ waharota.

¹²Nũcu cjũno sahari diez sahari diez puhtoa yero saha ijire, mari queoye mehna buhegũ. Peyequina masa puhtoa ijire. Tiquina puhtoa sajãedare yojopũ. Camepũ puhtoa sajãñe mehenogã puhtoa ijieta. Yoari pje iji dutisi tiquinare. Sa puhtoa ijiye nũcu cjũno mehna puhtoa ijieta. ¹³Tiquina diez puhtoa ihcãno saha tuhutuyequina ijire. Sa ijiye tiquina nũcu cjũnore tiquina ye yehpari cjẽna puhtoro sœta. ¹⁴Sa ye Cordero mehna cahme wejẽeta. Tiquina sa cahme wejẽpegũta Cordero tiquireo beseriquina mehna tiquireore ne cohãñequina mehna tiquinare yũhdũdũcaeta. Tiquireo ijipihtiyequina apequina puhtoa bui puhtoro ijire. Sa yero tiquinare yũhdũdũcarota, nidi angel yũhũre.

¹⁵Ahrire yũhũre yahu nemori angel:

—Umua mehna ñano yeducuricoro mári bui dujiri. Ti mári ahri yero saha ijire mari queoye mehna buhegũ: Ijipihtiye yehpari cjẽna, peye cururi cjẽna, peye yahuducuyere yahuducuyequina

yero saha ijire ti mári. ¹⁶Nũcu cjũno, diez puhtoa gũhũ umua mehna ñano yeducuricoro ihña yabieta. Tiquina diez puhtoa nũcu cjũno mehna ticoro yere ehma peho, suhti mariedicoro cohãeta ticorore. Sa ye ticoro pagure ihyaeta. Tiquina sa yeri bato ticorore ujuã pehoeta. ¹⁷Tiquina diez puhtoa ihcãno saha tuhutuye, nũcu cjũnore tiquina ye yehpari cjẽna puhtoro sœta. Tiquinare sa yegũ yeri Cohãcjũ, tiquireo cahmeno saha yero taro. Sa yero nũcu cjũno pehe puhtoro ijirota. Ijipihtiye Cohãcjũ panopũ tiquireo yahuriro sahata tiquireo yeri bato nũcu cjũnore cohãnota. ¹⁸Ticoro muhũ ihñaricoro mehna ohõ saha ni queoye mehna buhere: Ticoro pajiri maca Babilonia wame tiri maca yero saha ijire. Ijipihtiyequina apequina puhtoa bui ijire ti maca cjẽna, nidi angel yũhũre.

Babilonia wame tiri maca tiquireo cohãri maca ijire

18 Came apequiro angel uhmũsepũ dijia tariquireore ihñaũ. Tiquireo puhtoro waro ijiri. Sa yero tiquireo asi siteye ijipihtiropũ quehnoano buhrio sehsaa wahari. ²Tiquireo sa dijiari bato tutuaro sañuducu yahuri:

—Cohãri jiri. Babilonia wame tiri maca pajiri maca cjẽnare cohãri jiri. Yojopũre wafia, peyequina ñañequina pagũ bajueyequina gũhũ ti macapũ ijiye nine. Ñañequina boro minicjua pari gũhũ ti macapũ ijiye nine. Tiquina minicjua masa tiquina ihña yabiyequina ijiri. ³Ijipihtiye yehpari cjẽna ti maca cjẽnare ñañequinare ihña cũñe, tiquina gũhũ ñano yeri. Sa ye ahri yehpari cjẽna puhtoa ti maca cjẽna numia mehna ñano yeri. Ticoro sa umua mehna ñano yeducuricoro ijiro wapa tiyere dũe tiri. Pajiro ticoro sa dũgũ ahri yehpa cjẽna doeri cjẽ duayequina pajiro wapatari, ni yahuri angel.

⁴ Came pari turi ʘhmusepʘ yahuducuro ca tari. Ohō saha nidi:

—Yeequina, ahricoro ʘmʘa mehna ñano yeducuricoro mehna ijieracāhña mʘsa. Ticoro mehna mʘsa ijigū mʘsa gāhure buhiri dahrerota. Sa yena ticoro ñano yeyere ihña cūedacāhña.

⁵ Ticoro ñano yeri peye ijire. Ticoro ñano yerire pari tju mari duhu peo mʘogū ti tju pehe ʘhmusepʘ wahā sa cāboaga. Sa ye ticoro ñano yeri peye ijire. Sa yero ticoro ñano yerire wacūre Cohācjū. Sa wacūno ticorore buhiri dahre dutirota. ⁶ Ticoro tutuaro tiquiro buhiri dahrenohaticoro ijiahro. Masare ticoro ñano yegū yeriro saha ticoro gāhure ñano yūhdugū yeahro. Masare ticoro sa ñano wahagū yeriro saha ti yūhduoro ticorore ñano buhiri dahreahro. ⁷ Ticoro “Quehnoago ijiaja”, ni tūhotumedi. Sa ni tūhoturo, wapa bujuyere pajiro cʘori ticoro. Ti wapa bujuyere pajiro ticoro cʘoro punota ticorore pajiro ñano yūhdugū yeahro. To punota ticorore bujua witiigū yeahro. Ticoro basi ohō saha ni tūhotumene. “Ohōpʘ dutigo dujiaja. Wape wiho ijieraja. Sa yego ne ñano yūhdusi yūhʘ”, ni tūhotumene ticoro. ⁸ Sa ni tūhoturicoro ijigū wacūeno mehna ticorore buhiri dahrerota. Ticoro dohati, yariariquinare yahco uti, ʘjua ahbarota. Sa yero ticorore ʘjua borota. Mʘsa pūhoro Cohācjū ticorore buhiri dahre dutiriquiro tutua yūhduariquiro ijire. Sa yero sa yūhʘ nidiro saha ticorore buhiri dahre dutirota, nino ca tari ʘhmusepʘ.

⁹ Sa ye ticoro yero saha ijiri macare Cohācjū tiquiro buhiri dahreri bato ahri yehpa cjēna pūhtoa tutuaro bujua witi, utieta. Ti maca cjēna mehna ñano yeyequina ijiri. Ti maca ʘjūgū ihñañe utieta tiquina. ¹⁰ Sa ʘjūgū ihñañe tiquina pūhtoa yoaropʘ ihñadoqueoducuenta, “ʘsā gāhure buhiri dahreari”, niñe. Topʘ ihñadoqueoducuye ohō saha nieta:

—Yohou, pejesʘori maca ijire, Babilonia. Si maca pajiri maca tutuari maca ijimedi. Wacūeno mehna si macare buhiri dahreri, nieta tiquina.

¹¹ Ijipihtiro cjēna doeri cjē duayequina ti macare ihñañe tutuaro bujua witi utieta. Ti maca pihtigū ihñañe, tiquina ye doeri cjēne dúyequina mariedagū ihñañe bujua witieta tiquina. Sa ye utieta. ¹² Tiquina ne cāhtarire urure, platare, wapa bujuye utāre, perla wame tiye paca gāhure dúyequina marisi. Sa ye apeye tiquina ne cāhtarire suhti quehnoañe suhtire, yahsaye suhti pūhtoa tiquina sañañe suhti saha ijiye suhtire, seda wame tiye suhtire, sohñañe suhtire dúyequina marisi. Sa ye apeye tiquina ne cāhtarire yucūri ehme sitiye yucūrire dúyequina marisi. Sa ye apeye tiquina ne cāhtarire marfil wame tiye mehna tiquina yerire, wapa bujuye cʘa mehna tiquina yerire, bronce wame tiye come mehna tiquina yerire, come butiye mehna tiquina yerire, marmol wame tiye mehna tiquina yerire dúyequina ne marisi. ¹³ Sa ye apeye tiquina ne cāhtarire canela wame tiyere tiquina ihyayere ocagū yeyere, apeye tiquina ihyayere ocagū yeyere, bueyere, mirra wame tiye ehme sitiye, ap-eye ehme sitiye dúyequina marisi. Sa ye apeye tiquina ne cāhtarire vinore, ʘhse ihyaye moreñene, trigore, trigo pjerire, wecuare, corderoare, caballoare, tunuñe cohrori caballoa tiquina wejeye cohrorire dúyequina marisi. Cahacjēnare dú tiquinare cʘoyequina gūhʘ marisi. Masa tiquina ijiepegūta tiquinare dúyequina ijimedi. Yojoṗure marisi. Sa ye bujua witieta doeri cjēne duayequina. ¹⁴ Sa ye ohō saha nieta tiquina ti maca cjēna ijiriquinare:

—Adei, ñabutiaro wahayari. Ijipihtiyeh mʘsa cahimedi pihtia wahari. Sa ye ijipihtiyeh quehnoañe mʘsa cʘomedi pihtia

wahari. Sa yena tire pari turi bocasi m̄sa, nieta doeri cjēne duayequina.

¹⁵Tiquina ti macare doeri cjēne duaye, pajiro wapatamedī. Sa ye tiquina ti macare yoarop̄ ihñadoqueoducueta, “Ŭsā ḡahure buhiri dahreari”, niñe. Sa ihñadoqueoducuye ti macare tutuaro bujua witi utieta. ¹⁶Ohō saha nieta ti macare:

—Adei, pejes̄oyequina ijire si maca pajiri maca quehnoari maca cjēna m̄na. Si maca numino yero saha quehnoañene cuori. Numino pehe quehnoañe suhtire, yahsaye suhti puhtoa tiquina sañañe saha ijiye suhtire, sohñe suhti ḡuh̄re sañari. Sa yero uru, wapa bujuye utā, perla wame tiye paca ohōri suhtire sañari. Sa yeri si maca cjēna. ¹⁷Sa ye wac̄ūeno mehna si maca buti pihtia wahari, nieta ti macare.

Sa ye ijipihtiyequina yuc̄sari mehna tiniñequina, ti yuc̄sari opana, tiquina ūm̄a, apequina pajiri map̄ dahra wapatayequina ḡuh̄ ti macare yoarop̄ ihñadoqueoducueta. ¹⁸Top̄ ihñadoqueoducuye ti macare to ūj̄ḡū ihñañe ohō saha ni sañuducueta:

—Quehnoañe macari si maca yero saha ijiye macari ne apeye macari mariedare, ni sañuducueta tiquina.

¹⁹Sa bujua witiyequina ijiye tiquina dapu paca bui dihtare orē peoeta. Sa ye tutuaro yahco utiye ohō saha nieta:

—Adei, pejes̄oyequina ijire si maca cjēna m̄na. Quehnoari maca ijimedi. Ijipih̄tina yuc̄sarire cuona pajiri map̄ tinina ijina si maca cjē doeri cjē mehna quehnoano wapatami mari. Sa ye duita si maca cjē buti pihtia wahari, nieta yuc̄sari cjēna.

²⁰Ti macare tiq̄iuro coh̄ḡū ihñana bucueya m̄sa ūhm̄se cjāna. Coh̄cj̄ū yequina, Jesu tiq̄iuro c̄urina, tiq̄iuro yere yahu m̄htarina ijipih̄tina m̄sa bucueya. Ti maca cjēna m̄sare ñano yuh̄d̄ḡū yeri. Tiquina sa yeri buhiri

buhiri dahreri Coh̄cj̄ū. Sa yena bucueya m̄sa.

²¹Sa yero tutuariq̄iuro angel pajiria utāre ne wahc̄ō, pajiri map̄ doque ñori. Sa doque ñono ohō saha nidi:

—Ahria utā bora ñojoariro saha pajiri maca Babilonia wame tiri maca boraro tutuaro bisirota. Sa borari bato ti macare pari turi ihñasi masa. ²²Ti macare butia wahaḡū yerota. Sa ye ti macap̄ basayere m̄sa basaducuriro saha ne acaro tisi. Arpa wame tiyere m̄sa bua p̄t̄educuriro saha, flauta wame tiye pacare, corneta ḡuh̄re m̄sa putiducuriro saha pari turi ti macap̄ acaro tisi. Sa ye ti maca mariedaḡū pari turi ti macap̄ dahrayequina dahrasi. Sa ye utā mehna trigore m̄sa ña m̄toñe ḡuh̄re t̄uhonohsi. ²³Ne ti maca buhrio cuñariro saha ne ijisi. Sa ye omoca d̄htena m̄sa bucue yahuducuriro saha pari turi ne acaro tisi. Ti maca cjāna m̄sa doeri cjēne duana, d̄na ḡuh̄re apequina yuh̄d̄oro c̄omedi m̄sa. Sa yena yayia masare ujuayequina yero saha yena ijipihtiro cjēnare mehorī m̄sa. M̄sa sa yerire ihñā mariañe, Coh̄cj̄ū pehere cahmedari masa, nidi tutuariq̄iuro angel.

²⁴Ti maca cjēna Coh̄cj̄ū yere yahu m̄htariquinare apequina tiq̄iuro yequina ḡuh̄re ijipihtiro cjēnare wej̄di jiri. Tiquina sa wej̄di buhiri buhiri dahreri Coh̄cj̄ū Babilonia cjēnare.

19 Babilonia d̄hse wahatire yuh̄ ihñari bato ūhm̄sepu peyequina masa sañuducue ca tari yuh̄ t̄uhoḡū. Ohō saha ni sañuducuri:

Aleluya. Coh̄cj̄ere quehnoano yahuducuuhna. Coh̄cj̄ū marine yuh̄d̄oriq̄iuro ijire. Tiquirore quehnoano ño peouhna. Tutua yuh̄d̄ariq̄iuro ijire tiq̄iuro. ²Mehono marieno queoro masare buhiri dahrere tiq̄iuro. Ñañe buhiri marieñequinare tiquinare buhiri

dahrerare. Ñaricorore amua mehna ñano yeducuricorore ihña cñe ijipihtiro cjēna, ahri yehpa cjēna ñano yeri. Ticoro pehere buhiri dahreri Cohācjū. Sa yero tiquiro cahacjēnare ticoro wejēdi buhirire buhiri dahreri tiquiro, ni sañuducue ca tari.

³ Pari turi sañuducue ca tari tja:

Aleluya. Cohācjüre quehnoano yahuducuuhna. Ti maca ñari maca tiquiro ujjari maca sa ohmeo tiducurota, ni sañuducue ca tari.

⁴ Sa yeye veinticuatro Jesu yequina puhtoa, pititiaro sijoro saha bajuyequina mehna dusepe curi mehna quehe sa, mari Pacure tiquiro dujiropu dujiriquire ño peori. Ohō saha ni ño peori tiquina: “Aleluya. Sata yeihna. Mari Pacure quehnoano yahuducuuhna,” nidi tiquina. ⁵ Came puhtoro dujiropu ohō saha nino ca tari:

Mari puhtoro Cohācjüre ño peoya. Tiquiro cahacjana, tiquiro ño peona, ihyo ijina, puhtoa gūhu ijipihtina musa tiquiro quehnoano yahuducuya, nino ca tari.

Cordero tiquiro omoca dūhteati deco bōse decore yahuahye Ñu

⁶ Came peyequina masa tiquina yahuducugū tuhōu. Sa ye pajiri peo, upo mehna tutuaro bisiro saha yahuducue ca tari yūhu tuhōgū:

Aleluya. Cohācjüre quehnoano yahuducuuhna. Tiquiro mari puhtoro pehe puhtoro sajā tuhasari. Tutua yūhduariquiro ijire tiquiro. ⁷⁻⁸ Cordero tiquiro omoca dūhteati pje ijire yojopure. Tiquiro omoca dūhteaticoro quehnoano tiquina quehno tuhasaricoropu ijire. Ticorore quehnoari suhtiro wetemarieni suhtirore ohori. Ti suhtiro Cohācjū yequina quehnoañene tiquina yeri yero saha ijire,

mari queoye mehna buhegū. Sa yena ti omoca dūhteati pje ijigū bucueihna mari. Cohācjüre “Tutua yūhduariquiro ijire”, niuhna, ni yahuducue ca tari.

⁹ Tiquina sa nidi bato angel ohō saha nidi yūhure:

—Ahrire ojoa neña: “Cordero tiquiro omoca dūhteri deco bōse decore tiquiro pijioriquina bucueyequina ijire”, ni ojoa neña, nidi angel yūhure.

Sa ninota ohō saha ni nemori:

—Ijirota ijire ahri yūhu yahuri. Cohācjū ye yahuducuye ijire, ni nemori yūhure.

¹⁰ Tiquiro sa nigū tuhōgūta tiquiro caha dusepe curi mehna quehe sa, tiquiro ño peou tūu nimi. Yūhu sa yegū waro ohō saha nidi tiquiro yūhure:

—Tire yeracāhña. Mūhu yero saha yūhu gūhu Cohācjū cahacjūta ijiaja. Mūhu acaye Jesu yequina ijipihtiyequina tiquiro ye buheyere duhueyequina yero saha yūhu gūhu Cohācjū cahacjūta ijiaja. Sa yegū Cohācjū pehere dusepe curi mehna quehe sa, tiquiro ño peoya, nidi angel yūhure.

Cohācjū yere yahu muhtariquina muna panopu cjēna Espiritu Santo yedohoro mehna ti buheyere Jesu ye buheyere yahuyuahye.

Caballo yehseriquiro bui pesariquire yuahye Ñu

¹¹ Came ūhmuse parī maa wahagū ihñau. Topu caballo yehseriquiro ijiri. Tiquiro bui pesariquiro ohō saha wame tiri: Tiquiro nidiro sahata yeriquiro poto yeriquiro wame tiri tiquiro. Queoro masare dutiriquiro ijiro, tiquiro ihña tuhtiyequina mehna cahme wejēne. ¹² Tiquiro caperi peca pohna yero saha ijiri. Sa yero tiquiro dapupu peye puhtoa pesaye behtori ijiri. Sa yero tiquiro pagupu wame ojoa ohōnohriquiro ijiri. Ti wamene

tiquiro dihita masidi. Apequina masiedari. ¹³Tiquiro sañari suhtiro yoari suhtiro dii wahñari suhtiro ijiri. Tiquiro ohō saha wame tiri: Cohācjū ye yahuducuyere yahuriquiro wame tiri tiquiro. ¹⁴Sa ye tiquiro yequina surara uhmuse cjēna tiquirore nūnū tāri. Yehseyequina caballo bui pesayequina quehnoañe yehseye suhtire, wete mariēne suhtire sañariquina ijiri. ¹⁵Tiquiro duseropū ñoseni pjīne siori pjīne cuhñuri. Ti pjī ijiphihtye yehpari cjēnare tiquiro yuhduducati pjī ijiri. Sa yero tiquiro tutuaye mehna tiquiro dutigū ne ihcāquiro tiquirore yuhduducaro cūsi. Cohācjū ijiphihtye yehpari cjēna mehna usuare. Tiquiro sa usuagū caballo bui pesariquiro tiquinare tutuaro buhiri dahrerota. ¹⁶Tiquiro suhtiropū, tiquiro ñecu gūhure ahri wamene ojoa ohōri jiri: “Ijiphihtyequina apequina puhto bui puhtoro”, ni ojoa ohōri jiri.

¹⁷Came asū asiropū ducuriquirore angelre ihñau. Ijiphihtyequina uhmusepū wuyequina yuca parire sañuducu mūori tiquiro. Ohō saha ni tutuaro sañuducu mūori:

—Cahmecoana ahtaya. Cohācjū tiquiro bose decopū ihyana ahtaya.

¹⁸Peye yehpari cjēna puhtoare, surara puhtoare, surara parire, caballoare, tiquina bui pesayequinare, ijiphihtyequina apequina masare, cahacjēnare, cahacjēna ijieyequinare, apequina puhtoare, ihyo ijieyequinare tiquina ijiphihtyequina tiquina paguri ijirire ihyana ahtaya, nidi angel yucaare.

¹⁹Came nūcu cjūnore, ahri yehpa cjēna puhto tiquina yequina surara pari gūhure ihñau. Caballo bui pesariquiro mehna tiquiro yequina surara pari mehna cahme wejēne tehe cahmecoari tiquina. ²⁰Tiquina sa cahme wejēgū caballo bui pesariquiro

nūcu cjūnore peresu yeri. Apequiro “Cohācjū yere yahu mūhtagū ijija”, ni mehoriquiro gūhure peresu yeri. Tiquiro ni mehoriquiro pehe nūcu cjūno tiquiro ihñonopū tutuaye mehna ye ihñoriquiro ijiri. Tiquiro sa ye ihñori mehna nūcu cjūno wamene wahñañequinare tiquiro queoyere ño peoyequinare ni mehori “Ahri Cohācjū ye ijire”, nino. Tiquina puarore tiquiro peresu yeri bato tiquinare catieyquinareta pecapū cohāri. Ti peca pajiri ma yero saha pajiri peca azufre mehna ujurī peca ijiri. ²¹Sa yero dūhsariquinare tiquina yequina surara parire ñoseni pjī mehna tiquiro duseropū ijiri pjī mehna wejēdi caballo bui pesariquiro pehe. Sa tiquiro wejēdi bato yuca pari tiquina paguri ijirire ihyaye, yapi yuhdua wahari.

Mil cūhmari waro Cristo tiquiro yequina mehna masare dutirota

20 Came apequiro angel uhmusepū tiquiro dijia tagū ihñau. Uhcūāri cope cjā sawire, pajiri da, come da gūhure cūori tiquiro. ²Sa dijia wihiro pinonore ñehedi tiquiro. Tiquiro pinono panopū pinono saha pagū tiriquiro ijiro, wafino Satana wame tiriquiro ijiri. Tiquirore ñeheno tiquirore dūhteri mil cūhmari waro peresu yero taro. ³Sa dūhte tuhasa, uhcūāri copepū cohāri tiquirore ahri yehpari cjēnare mil cūhmari waro tiquiro “Mehoari”, nino. Sa cohā tuhasaro ti copere biha, piha ñehē cāri. Sa yero mil cūhmari bato pari turi meheñe decorigā tiquirore wiorīnota.

⁴Came puhto dujiyere ihñau. Ti dujiyepū dujiyequina gūhure ihñau. Tiquinare masare tiquina besatore ñañene yeyequinare tiquina buhiri dahreatore cūri Cristo. Apequina gūhure ihñau. Tiquina pehe Jesu yere Cohācjū yere tiquina yahuri buhiri tiquina dapu pacare dute cohānohriquina ijiri. Nūcu

cjūnore tiqiro queoye gūhure dusepe curi mehna quehe sa ño peerari. Sa ye tiquina wāhdoa pacare tiquina omocari gūhure tiqiro wamene oja ohō dutierari tiquina. Sa ye apequina tiquinare wejēdi bato masaa wahari tja. Masari tiquina mil cūhmari waro Cristo mehna pūhtoa ijiye tehe. ⁵Apequina Cristo yequina yariariquina muna masaedarīdi. Tiquina wejēdiquina tiquina masari bato mil cūhmari pūhtoa tiquina ijiri bato apequina gūhu masaa wahaeta. Sa ye tiquina wejēdiquina muna Cristo yequina tiqiro bato masa mūhtañequina ijiri. ⁶Tiqiro maso mūhtariquina pehe tutuaro bucueyequina ijieta. Ñañe marieñequina ijieta tiquina. Sa ye pecapū wahasi tiquina. Masa pecapū wahaye, pari turi tiquina yariaro saha wahare. Sa ye tiquina pecapū wahaerare. Masa mūhtariquina Cohācjū, Cristo yequina pahia ijieta tiquina. Sa ye mil cūhmari waro Cristo mehna masa pūhtoa ijieta.

⁷Mil cūhmari bato Satanare peresupū ijiriquirore wiorota. ⁸Tiquirore sa wiori bato ahri yehpa cjēnare mehono waharota tiqiro. Gog wame tiyequinare, Magog wame tiyequina gūhure mehono waharota. Sa ye tiquina tiqiro mehoñene tūhoye, tiquina yequina surara parire cahmecoeta cahme wejēñe tehe. Surara pari peyequina ijieta. Pajiri ma cjē padū pjeri peye ti ijiro saha peyequina surara ijieta.

⁹Sa ye ahri yehpapūre waha siteye, Cohācjū yequina tiquina ijiri macare Cohācjū tiqiro cahīdi macare majare behtoa cahmotaeta. Tiquina sa cahmotari bato Cohācjū tiquinare ūhmuse cjā peca mehna ūjūadoque dijiorota. ¹⁰Sa wahari bato watīnore tiquinare mehoriqirore pecapū cohānota. Ti peca pajiri ma yero saha ijiri peca azufre mehna ūjūri peca

ijiri. Topū nūcu cjūnore, “Cohācjū yere yahu mūhtagū ijiaya”, ni mehoriqiro gūhure cohā tuhasari. Topū tiquina ijigū deco, ñamipū gūhure sa ñano purīdu-curota tiquinare.

Cohācjū masare buhiri dahre bato tire

¹¹Came pajiro dujirore quehnoano yehserore pūhtoro dujirore ihñau. Ti dujiro bui dujiriquiro gūhure ihñau. Ahri yehpa cjēna gūhu ūhmuse cjēna gūhu tiqirore cuye, duhti oma cāa wahari. Sa duhtiepeta tiqirore duhtiyē cūedari. ¹²Sa yegu pūhtoro potō yariariquina muna tiquina ducugū ihñau. Tiquina ihyo ijiyequina, pūhtoa ijiriquina gūhu ijiri. Topū tiquina ducugū oja ohōñe tjurire pōori. Ti tjuri masa tiquina yerire tiquina oja ohōñe tjuri ijiri. Sa yero beseriquiro ti tjurire ihña tuhasa tiquina yerire masidi. Tire masino yariariquinare beseri ñañequina, quehnoañequina gūhure. Came ape tju gūhure pōori. Ti tju Cohācjū mehna sa ijiducuatiquinare tiquina wamene oja ohōri tju ijiri. ¹³Came pajiri mapū, diapū gūhure yaria dijiariquina wahcā mūjaa wahari. Sa ye yehpa puhapū ijiyequina, yariariquina tiquina ijiropū ijiyequina gūhu mūjaa wahari. Tiquina sa mūja sagū topū dujiriquiro tiquina yerire masi pehorō, tiquinare beseri ñañequina, quehnoañequina gūhure. ¹⁴Came yariarore, yariariquina tiquina ijiro gūhure cohā cāhri Cohācjū pari turi mari yariarore. Pecapū cohā cāhri. Ti peca pajiri ma yero saha ijiri peca pajiri peca ijiri. Pecapū wahayequina pehe pari turi yariaro saha wahare. ¹⁵Sa yero sa ijiducuatiquina tiquina wamene Cohācjū tiqiro oja ohōri tju pū ijpilhtiyequina tiquina wamene oja ohōmehneñequina pehere pecapū cohāri tiqiro.

**Uhmusepü, ahri yehpa gühure
wahmare comesarota Cohäcjü**

21 Came uhmusepü, ahri yehpa gühure wahmare tiquiro comesarire ihñaü. Uhmusepü iji muhtari, yehpapü iji muhtari, pajiri mapü iji muhtari gühü pihtia wahari. Mariedari.² Sa yegü yuhü Ñu quehnoari macare, wahma macare Jerusalêne ihñaü. Ti maca uhmusepü Cohäcjü cahapü dijia tagü ihñaü. Omoca duhteaticorore quehnoañe suhti mehna wahma suure omoca duhteatiquirore bucuegü yero taro. Sata ti macare quehnoyuri jiri Cohäcjü, tiquiro yequinare bucuegü yero taro.³ Tire yuhü ihñari bato puhtoro dujiropü tiquiro sañuducugü tuhou:

—Ihñaña. Yojobure masa watoapü ijiro nine Cohäcjü. Tiquina mehna ijirota tiquiro. Sa ye tiquiro yequina ijieta tiquina. Sa yero Cohäcjü tiquiro basi tiquina mehna cjüno ijiro, tiquina yaquiro Cohäcjü ijirota.⁴ Sa yero sa bucueducugü yerota tiquiro tiquinare. Sa ye pari turi bajüa witisi tiquina. Sa ye ne pari turi yariasi tiquina. Ne ñano jeripohna tiye, utiye, puriñe gühü marisi tiquinare. Ahri ijipihitiye panopü cjë ijiri pihtia waharota, ni sañuducuro ca tari.

⁵ Came puhtoro dujiropü dujiriquire ohö saha nidi:

—Ihñaña. Ijipihitiyere wahma comesagü yeitja, nidi.

Tiquiro sa nidi bato yuhure ohö saha nidi tja:

—Ahri yuhü niñene ojoa neña. Yuhü niñe ijirota ijire. Sa yero yuhü nidiro sahata sa waharota. Sa yegü yuhü niñene ojoa neña, nidi yuhure.

⁶ Came ohö saha nidi tja yuhure:

—To punota ijiaga. Yuhü ijipihitiyere bajumehnedigü ijiaga. Sa yegü ijipihitiyere pihtigü yeacjü ijiaga. Aco wuoyequina tutuaro tiquina acore cahmeno saha yuhü cahapü ahta duayequina

yuhure cahmeeta. Sa ye yuhure yuhtieta. Yuhü catigü yeye aco yero saha ijigü ijiaga. Yuhure cahmeñequinare yuhü mehna sa ijiducugü yeitja tiquinare. Tiquina esa tuharo ye dutiro marieno, yuhü tutuaye mehna yuhü mehna sa ijiducugü yeitja.⁷ Ijipihitiyequina yuhure wacü tutua duhueyequinare ohö saha yeitja: Tiquina yaquiro Cohäcjü ijiitja. Sa ye tiquina pehe yuhü pohna ijieta.⁸ Sa ijiepetä cueye, yeere duhuyequina, yuhure cahmeñequina, ña yuhduyere yeyequina, masare wejñequina, wuana tiyequina, masare ujuayequina yero saha yeyequina yayia, “Cohäcjü ijire”, tiquina niñe queoyere ño peoyequina, ijipihitiyequina ni mehoñequina pecapü wahaeta. Topü pajiri ma yero saha ijiri peca pajiri peca azufre mehna ujëno nine. Topü wahayequina pari turi tiquina yariaro saha wahaye nine, nidi yuhure.

Wahma maca Jerusalêne yahuahye

⁹ Came ihcäquiro angel yuhü cahapü wihiri. Tiquiro siete pari cuoyequina, tiquiro buhiri dahre duti cüriquina angele mehna cjüno ijiri. Sa wihiro, ohö saha nidi yuhure:

—Ihñañu ahtaya. Cordero tiquiro omoca duhtericorore ihñoutja muhure, nidi angel yuhure.

¹⁰ Sa yero Espiritu Santo yuhure Cohäcjü ya macare ihñori. Ohö saha bajuro ihñori yuhure: Uhmuanu canu buipü yuhure ne mujari. Tüpu usä ijigü Jerusalêne Cohäcjü ya macare quehnoari macare ihñori yuhure. Cohäcjü cahapü uhmusepü ijiri maca dijia taro nidi ahri yehpapü.¹¹ Cohäcjü tiquiro asi siteye mehna asi siteri maca ijiri ti maca. Wapa tiye utä yero saha asi siteri. Jaspe wame tiye utä yero saha asi siteri. Sa yero vidrio yero saha quehnoano aco sitiri maca ijiri ti maca.¹² Sa yero pajiri sahrino uhmuari sahrino

tiquina sahrī sārī maca ijiri ti maca. Doce sopecahari tiri ti sahrīno. Ti sopecaharipe cohteri angele. Ti maca cjē sope pahmaripū Israe masa cururi doce cururipe tiquina wame wahñari. ¹³ Asū mūja taro pehe ti sahrīno cuori ihtia sopecaha. Sur cū pehe pehe ihtia sopecaha ijiri. Norte poto pehe ihtia sopecaha ijiri. Asū sajāno pehe gūhure ihtia sopecaha ijiri. Ijipihtiro doce sopecahari waro cuori ti sahrīno. ¹⁴ Ti sahrīno doce utā paca bui pesari. Ti utā pacape Cordero cūrīna doce tiquiro cūrīna usāpe wame wahñari.

¹⁵ Sa yero angel yūhure yahuriquiro queodu uru mehna tiquina yedure cuori. Ti macare, ti maca cjē sopecaharire, sahrīno gūhure queoro taro nidi. ¹⁶ Ti maca yoaro punota ehsaro gūhū to punota ehsari. Uhmūano gūhū to punota uhmūari. Sa yero angel queodu mehna ti macare queori. Ti maca dos mil doscientos kilómetro yoari maca ijiri. To punota ehsari maca ijiri. To punota uhmūari maca ijiri. ¹⁷ Sa yero ti maca cjā sahrīnore queori angel. Sesenta y cinco metro uhmūari sahrīno ijiri. Masa mari queoro sahata queoro nidi tiquiro angel.

¹⁸ Ti sahrīno jaspe wame tiye utā paca mehna tiquiro yeri sahrīno ijiri. Sa yero ti maca pehe uru mehna tiquiro yeri maca ijiri. Ti uru wete marieñe ijiro quehnoano asi siteri. ¹⁹ Ti sahrīno docapū ijiye utā pacapūre peye sijoro saha ijiye wapa tiye paca wahñari. Ti utā paca sahrīnopū pesaye paca doce paca ijiri. Iji muhtaria utāre jaspe wame tiye utā wahñari. Ti paca bato ijiria utāre zafiro wame tiye utā wahñari. Puaria bato ijiria utāre ágata wame tiye utā wahñari. Ihtitaria bato ijiria utāre esmeralda wame tiye utā wahñari. ²⁰ Pititaria bato ijiria utāre ónice wame tiye utā wahñari. Ihcā omope paca bato ijiria utāre cornalina wame tiye utā wahñari. Seis paca bato ijiria utāre crisólito wame tiye utā

wahñari. Siete paca bato ijiria utāre berilo wame tiye utā wahñari. Ocho paca bato ijiria utāre topacio wame tiye utā wahñari. Nueve paca bato ijiria utāre crisoprasa wame tiye utā wahñari. Diez paca bato ijiria utāre jacinto wame tiye utā wahñari. Once paca bato ijiria utāre amatista wame tiye utā wahña bato tiri.

²¹ Sa ye doce sope pahmari doce perla mehna tiquiro yeri pahmari ijiri. Ti pahmaripe ihcā pje perla pje mehna tiquiro yeri pahmari ijiri. Sa yero ti maca cjā maha uru mehna tiquiro yeri maha ijiri. Ti uru wete marieñe uru ijiri. Sa yero quehnoano aco sitiri maha ijiri ti maha.

²² Ti macapū Cohācjū wūhure ihñedu. Mariedari. Ti macapū ijipihtiropū mari puhtorore Cohācjū tutua yūhduariquirore, Cordero gūhure ño peore masa. Sa yero ti maca ijipihtiro Cohācjū wūhū yero saha ijiri. ²³ Sa yero ti macapū Cohācjū tiquiro asi siteye quehnoano buhriori. Cordero gūhū sihāria yero saha buhriori. Sa ye asū deco cjūno gūhure ñami cjūno gūhure topū tiquina buhriogū cahmedari. ²⁴ Sa ye ahri yehpapū ti buhrioye mehna ijieta ijipihtiro cjēna. Sa ye ijipihtiyē yehpari cjēna puhtoa ti macapū quehnoa yūhduayere tiquina cuoyere ne wihieta. ²⁵ Sa ye decore ti maca cjē sopecahari pōori sopecahari ijieta. Topūre ne ñami marisi. Sa ye ti sopecaharire ne bihasi. Sa susuducurota. ²⁶ Sa ye ahri yehpari cjēna quehnoañene tiquina cuoyere ti macapū ne wihieta. ²⁷ Ñañe pehere ti macapū ne ne wihisi. Bue tigū yeyequina, ñañene yeyequina gūhū ti macapū ne wahasi. Mehoñequina gūhū ne wahasi. Cordero tiquiro ojoari tjupū tiquina wame wahñañequina dihita ti macapū wahaeta. Ti tju tiquiro yūhduoriquina tiquina wamene tiquiro ojoa ohōri tju ijire. Ti tju pū tiquina wame wahñañequina sa ijiduceta.

22 Came quehnoari mare catigū yeri mare ihñori yuhure angel. Ti ma quehnoano aco sitiri ma Cohācjū, Cordero gūhu tiquina dujiropu ahtari ma ijiri. ²Sa yero ti maca cjā maha deco buruari ti ma. Ti ma pua peheri duhtu cahapu catigū yeye cju ducuri. Ti cju asūripe dūca tiri. Ihcā cahmare doce tahari dūca tiri. Sa ye ti cju cjē pūri mehna quehnoano aco tieta ahri yehpa cjēna. ³Ti macare ne ñañe buhiri dahreati marisi. Ti macapu Cohācjū dujiro ijirota. Cordero dujiro gūhu ijirota topu. Sa ye ijipihiteyquina masa topu ijiyequina tiquina cahacjēna tiquina poto dusepe curi mehna quehe sa, tiquinare ño peoeta. Sa yero topu ñañe ne marisi. ⁴Tiquina Cohācjūre ihña piti ca dujieta. Sa ye tiquina wuhdoa pacapu tiquiuro wame wahñañequina ijieta. ⁵Topure ñami ne marisi. Sa ye sihñe paca gūhure cahmesi topu ijiyequina. Asū buhriogū gūhure cahmesi. Mari puhtoro Cohācjū buhriorota. Sa ye ti macapu ijiyequina ape sie cjēna puh-toa ijiducuenta.

Jesucristo ahri yehpapu tiquiuro tojoa tato mehenogā dūhsare

⁶Came angel yuhure ohō saha nidi:

—Ijipihiteye ahri tiquina yahuri ijirota ijire. Sa ye tiquina nidiro sahata waharota. Mari puhtoro Cohācjū tiquiuro yere yahu muhtariquinare masigū yeriquiro ijire. Tiquiro pehe yojopure tiquiuro yaquiuro angelre ohori tiquiuro cahacjēnare masigū yero taro. Came cjūnogā dūhse wahatire masigū yero taro tiquiuro yaquiuro angelre ohori, nidi angel yuhure.

⁷Jesu pehe ohō saha nidi:

—Tuhoya musa. Mehenogā dūhsare yuhū tojoa tato. Ahri pū cjē yahuyere yuhdudūcaeyequina bucueyequina ijieta, nidi Jesu.

⁸Yuhū Ñu ahri ijipihiteyere yuhū ojoa nedire tuhōu. Sa yegu tire ihñau. Sa yegu yuhū tuhōri bato, yuhū ihñari bato yuhure ihñoriquiro angel poto dusepe curi mehna quehe sami. Tiquirore ño peogu tūu nimi. ⁹Yuhū sa yegū ihñano ohō saha nidi yuhure:

—Sa yeracāhña. Mūhu yero saha yuhū gūhu Cohācjū cahacjūta ijieta. Mūhu acaye Cohācjū yere yahu muhtariquina, ijipihiteyquina ahri pū cjē dutiyere yeyequina gūhu tiquina ijiro saha yuhū gūhu Cohācjū cahacjūta ijieta. Sa yegu Cohācjū poto dusepe curi mehna quehe sa, tiquiuro pehere ño peoya, nidi angel yuhure.

¹⁰Sa yero ohō saha ni yahu nemori yuhure:

—Ahri pūpu came dūhse wahatire yahure. Sa wahato mehenogā dūhsare. Sa mehenogā dūhsagū ahri pūpu yahurire nuoadacāhña mūhu. ¹¹Ti pje yuhū yahuri pjere ñañequina pehe sa yeducucūnahdo ñañene. Nbutiayequina gūhu ña yuhduaro yeducucūnahdo. Quehnoañequina pehe quehnoano yeducuahro. Sa ye ñañe marieñequina gūhu ñañe marieñequina sa ijiducuahro ti pjere, nidi angel yuhure.

¹²Ohō saha nidi Jesu:

—Tuhoya musa. Mehenogā dūhsare yuhū tojoa tato. Musare yeequinare yuhū ohoatire ne cāhtagū tūu nieta. Sa yegu quehnoañene musa yeri wapa musare quehnoano yeitja. ¹³Yuhū ijipihiteyere bajumehnedigū ijieta. Sa yegu ijipihiteyere pihtigū yeacju ijieta.

¹⁴Ijipihiteyequina wete marieñe suhtire sañañequina tiquina ijiro saha tiquina ñañe yerire cosenohriquina ti macapu esaeta. Sa ye ti maca cjē cju catiyere ohoye cju dūcare ihyaeta. Sa ye bucueyequina ijieta tiquina, nidi Jesu. ¹⁵Ti macapu eseyequina pehe ahriquina ijire: Ña yuhduayequina, masare

ujuaequina yero saha yeyequina yayia, wuana tiyequina, masare wejẽnequina, “Cohãcjũ ijire”, tiquina niñe queoyere ño peoyequina, ni meho peyayequina gũhũ ijire ti macapũ eseyequina.

¹⁶ Sa yero ohõ saha ni yahu nemori Jesu:

—Yũhũ, Jesu, yaquiro angelre ohou musare yeequinare ahri pũ cjẽne yahugũ tuhũ. Puhtoro Davi panami iji turiagũ iji-aja yũhũ. Yũhũ bohrearia yero saha ijigũ ijiaja, ni yahu nemori Jesu.

¹⁷ Espíritu Santo Jesure “Tojoa taya”, nine. Jesu yequina tiquiro omoca duhteaticoro yero saha ijieyequina gũhũ “Tojoa taya”, nine. Ijipihtiyequina tiquina “Tojoa taya”, nidire tuhoyequina gũhũ “Tojoa taya”, niahdo Jesure.

Aco wuoyequina acore tutuaro tiquina cahmeno saha Cohãcjũ cahapũ waha du-ana Jesure tutuaro cahmeña. Tiquiro catigũ yeye aco yero saha ijire. Tiquirore cahmeñequinare uhmusepũ sa ijiducugũ yerota Cohãcjũ. Tiquina esa tuharo ye dutiro marieno Jesu yedohoro mehna sa ijiducugũ yerota.

¹⁸ Yũhũ Ñũ, ijipihtina ahri pũ cjẽ Cohãcjũ yere tuhorinare musare ohõ saha ni cua pesaro mehna yahutja. Ahri buheye mehna apeye buheye mehna more yahu nemoñequina Cohãcjũre yuhduucayey nine. Tiquina sa yuhduucagũ ihñano ijipihtiye ahri pũpũ tiquiro buhiri dahreatre tiquiro yahuriro sahata cunota tiquina gũhũre. Sa yero sata tiquina gũhũre buhiri dahrerota. ¹⁹ Sa ye ahri pũ cjẽ yahuyere yahu duhayequina Cohãcjũre yuhduucayequina ijire. Tiquina sa yuhduucagũ ihñano catigũ yeye cjũ ducare tiquinare ihya dutisi. Sa ye sa ijiducusi tiquina. Sa yero tiquiro ya macapũ quehnoari macapũ waha dutisi. Ti cjũ, ti maca gũhũ ahri pũpũ tiquina yahuripũ ijire.

²⁰ Ijipihtiye ahri pũ cjẽne yahuriquiro ohõ saha nine:

—Sa tjire. Mehenogã duhsare ahri yehpapũ yũhũ tojoa tato, nine tiquiro.

Sa tjiya. Usã puhto Jesu, tojoa taya.

²¹ Mari puhtoro Jesu tiquiro yedohoro mehna ijipihtina musa quehnoano ijiya.